

He Vānaŋa o te 'Atua

New Testament in Rapa Nui

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at dbs.org/bibles.

MĀTEO.....	4
MARKO	42
RUKA.....	66
IOVANI.....	106
ANĀ O TE 'ĀPŌTORO	137
RŌMANO.....	171
1 KŌRINTO	187
2 KŌRINTO	202
KARATIA.....	212
ĒFETO	218
FĪRIPO	224
KŌROSA.....	228
1 TĒTĀRŌNIKA.....	232
2 TĒTĀRŌNIKA.....	236
1 TIMOTEO.....	239
2 TIMOTEO.....	244
TITO	248
FIREMONO	251
'EVEREO.....	253
TANATIAKO	265
1 PĒTERO.....	269
2 PĒTERO.....	274
1 IOVANI.....	277
2 IOVANI.....	281
3 IOVANI.....	282
HURA	283
ME'E HAKA TAKE'A	285

MĀTEO

Me'e rahi nō atu matahiti a tu'a ki te poreko iŋa o Ietū, o te 'ariki era ko Tāvita te haka tere i te itaraera. Te nu'u nei he mana'u nō te aŋa ki a Tāvita pa he 'ariki hope'a o te riva-riva i ai o rāua, 'e he tiaki nō te aŋa ki te hora mo haka tano e te 'Atua i tā'ana hōrea pē nei ē: nā e tu'u rō te mahana he haka 'ariki e ia i te hakaara e tahi o Tāvita, 'e mā'ana e haka nui-nui haka 'ou i a rāua i te itaraera. E kī era ki rā hakaara: he «[Mētia]» 'o he «[Kiritō]», te aura'a: «he 'ariki ha'ata'a e te 'Atua».

'I ruŋa i te 'evaneria nei, e haka 'ite 'ana i te roŋo riva-riva ki te itaraera: ko poreko 'ana te Mētia (1–2), 'e rā Mētia ko Ietū era o Nātāreta, poki o te tāmuta era ko [Kōsē] ararua ko [Māria] (13.55). Te kī 'a Māteo: e 'ite nei a tātou he aŋi mau 'ana a Ietū he Kiritō era mo oho mai 'i te me'e era 'i ruŋa i a ia i haka tano tahi ai te me'e kī era e te 'Atua o ruŋa i te Kiritō haka pāpa'i era ki a [Mōtē] 'e ki te perofeta 'i ruŋa i te [Pāpa'i Mo'a].

Te kī tako'a 'a Māteo: a Ietū ta'e nō he Kiritō era mo tu'u mai, he Ma'ori hāpī hōnui tako'a. Hai 'a'amu ha'aaurā'a i hāpī ai a Ietū ki te nu'u o ruŋa i te me'e hauha'a mo te 'Atua. O te rahi ra'a o te me'e hāpī e Ietū, te me'e 'ata pūai he me'e hāpī e ia 'i ruŋa i te ma'uŋa (5–7), he hatu iŋa ō'ona ki tā'ana 'āpōtoro hora uŋa era i a rāua mo haka 'ite i te roŋo riva-riva o ruŋa i a ia (10), he ŋā 'a'amu ha'aaurā'a era 'ā'ana o ruŋa i te [haka tere iŋa 'āpī o te 'Atua] (13), he haka 'ite iŋa era ō'ona o ruŋa i te haka tere iŋa tano mo te nu'u hāpī 'ā'ana (18), 'e he ŋā tātara hope'a era 'ā'ana (23–25). Te me'e hōhonu mau o te 'evaneria nei 'a Māteo he vānaŋa pāhono era e Pētero: (16.15–16), 'i te hora 'ui era e Ietū ki tā'ana nu'u hāpī: .

E tahi 'iŋoa haka 'ou o Ietū ko 'Emanuera. Te aura'a o te 'iŋoa nei: (1.23). Ki te kī 'a Māteo he aŋi 'ā te me'e nei; a Ietū mau 'ā, pa'i, i kī ki tā'ana nu'u hāpī pē nei ē: (28.20).

He nu'u mai i a rāua i haka ara mai ai a Ietū

(Ruka 3.23-38)

1 Te ŋā 'iŋoa nei o te hakaara o Ietū Kiritō, he kope mai i a Tāvita 'e mai i a ['Aparahama] i haka ara mai ai:

²A 'Aparahama he matu'a o Ita'ata,
'e a Ita'ata o Hākovo,

'e a Hākovo o Hūrā ananake ko tō'ona taina.

³A Hūrā he matu'a o Pare 'e o Tera (te rāua matu'a vahine ko Tāmara).

A Pare he matu'a o 'Eterone,
'e a 'Eterone o 'Ārama.

⁴A 'Ārama he matu'a tane o 'Aminarava,
'e a 'Aminarava o Nātone,

'e a Nātone o Taramono.

⁵A Taramono he matu'a o Vō (te matu'a vahine ko Rāhava).

A Vō he matu'a o 'Ōveti (te matu'a vahine ko Ruti).

A 'Ōveti he matu'a tane o Hētē,

⁶'e a Hētē he matu'a o te 'ariki era ko Tāvita.

Te 'ariki era ko Tāvita he matu'a o Toromono (te matu'a vahine he vi'e hāipo-ipo 'a 'Ūria).

⁷A Toromono he matu'a tane o Rovoama,

'e a Rovoama o 'Āvia,

'e a 'Āvia o 'Ātā.

⁸A 'Ātā he matu'a o Hotafata,

'e a Hotafata o Hōrama,

'e a Hōrama o 'Ōtia.

⁹A 'Ōtia he matu'a tane o Hoatana,

'e a Hoatana o 'Āhasa,

'e a 'Āhasa o Ēsēkia.

¹⁰A Ēsēkia he matu'a o Manatē,

'e a Manatē o 'Āmō,

'e a 'Āmō o Hōtia.

¹¹A Hōtia he matu'a o Hēkōnia 'e o tō'ona taina, 'i te noho iŋa ma'u era i te itaraera ki [Vāvīrōnia].

¹²A Hēkōnia he matu'a tane o Taratīere 'i te hora ko e'a 'ana e te itaraera mai te rima o te nu'u o Vāvīrōnia,

'e a Taratīere o Torovāvere.

¹³A Torovāvere he matu'a o 'Aviū,

'e a 'Aviū o Eriatime,

'e a Eriatime o 'Ātoro.

¹⁴A 'Ātoro he matu'a tane o Tāroko,

'e a Tāroko o 'Ākimi,

'e a 'Ākimi o 'Eriū.

¹⁵A 'Eriū he matu'a o 'Ereatara,

'e a 'Ereatara o Mātana,

'e a Mātana o Hākovo.

¹⁶A Hākovo he matu'a o Kōsē, kenu 'a [Māria], matu'a vahine o Ietū, kope kī e tātou he [Kiritō].

¹⁷E ho'e 'ahuru mā maha hakaara mai i a 'Aparahama ki a Tāvita, e ho'e 'ahuru mā maha mai i a Tāvita ki te ma'u iŋa o te itaraera ki Vāvīrōnia, 'e e ho'e 'ahuru mā maha haka 'ou hakaara mai te noho iŋa 'i Vāvīrōnia ki te hora o te Kiritō.

He poreko iŋa o Ietū

(Ruka 2.1-7)

¹⁸ Pē nei i topa ai te poreko iŋa o Ietū Kiritō: Te matu'a vahine ō'ona ko Māria ko ha'amo'a-mo'a 'ana mo hāipo-ipo ararua ko Kōsē. 'E kai moe hia ararua pa he kenu pa he vi'e i 'ite rō ai a Māria ko hānautama 'ana a ia i haka tupu e te [Vārua Maitai]. ¹⁹ 'E a Kōsē, 'o te ai he taŋata aŋa i te me'e tī-tika, kai haŋa mo haka ha'amā i a Māria. He mana'u mo ha'ata'a kiva-kiva mai i a ia.

²⁰ Ko mana'u 'ā mo aŋa 'i rā me'e, i o'o rō ai e tahi merahi o te 'Atua 'i roto i tō'ona moe vārua he kī: «E Kōsē, hakaara o te 'ariki ko Tāvita ē, 'ina koe ko ri'a-ri'a mo hāipo-ipo ki a Māria. Te poki ena 'ā'ana o te Vārua Maitai i haka tupu. ²¹ Nā e poreko rō poki tane, 'e he nape e koe i te 'iŋoa ko Ietū; mā'ana, pa'i, e haka e'a i tō'ona taŋata mai roto i te ūtu'a o te hara».

²² Te me'e ta'ato'a nei i topa ai mo haka tano ki te vānaŋa o te 'Atua haka 'ite e te perofeta pē nei ē:

²³ «E tahi uka kai moe 'ā e te taŋata e tupu rō te poki 'e he poreko poki tane. He nape i te 'iŋoa ko 'Emanuera».

Te ha'aaura'a o te 'iŋoa nei: «He 'Atua 'i muri i a tā-tou».

²⁴ I 'ara era a Kōsē, he aŋa i tū me'e kī era e te merahi, he to'o i a Māria mo vi'e 'ā'ana. ²⁵ 'E kai moe hia ararua pa he kenu pa he vi'e i poreko rō ai te poki 'e he nape e Kōsē i te 'iŋoa ko Ietū.

He tu'u iŋa o te nu'u ma'ori mo ha'amuri ki a Ietū

2 A Ietū i poreko ai 'i Vērene, he kona e tahi o Hūrea, 'i te noho iŋa ko ['Erore] te 'ariki o rā kona. 'I rā ŋā mahana i tu'u ai ki Hērutarema, mai te pā'iŋa e'a o te ra'ā, te nu'u ma'ori hāpī i te hetu'u. ² He 'ui: «¿'I hē rō te 'ariki poreko nei o te [hūrio]? Ko take'a 'ana e mātou te e'a iŋa o tō'ona hetu'u. I oho mai nei a mātou mo ha'amuri ki a ia».

³ I ŋaro'a era e te 'ariki ko 'Erore i rā parau 'āpī, he veveri he ta'e au, 'e pē ira tako'a 'ana te taŋata ta'ato'a o ira. ⁴ He uŋa ia he haka taka-taka tahi i te [oromatu'a ra-rahi] 'e i te [ma'ori o te haka tere hūrio]. I taka-taka tahi era, he 'ui e 'Erore ki rā nu'u:

—¿'I hē e kī ena ka poreko era te [Kiritō]?

⁵ He kī e rā nu'u:

—'I Vērene o Hūrea; pē ira, pa'i, i pāpa'i ai e te perofeta 'i te kona kī pē nei ē:

⁶ «'E a koe, e Vērene ē, ka ai atu he kona 'iti-'iti, e riro rō koe he kona hōnui o roto o te kona ta'ato'a o Hūrea.

Mai i a koe, pa'i, ka e'a ena e tahi kope hōnui

mo haka tere i tō'oku taŋata he itaraera».

⁷ He uŋa kiva-kiva e 'Erore mo oho ki a ia tū nu'u ma'ori hāpī hetu'u era, 'e mai rā nu'u i 'ite ai 'i 'aŋahē i e'a ai rā hetu'u. ⁸ He haka oho ia i rā nu'u ki Vērene 'e he kī: «Ka oho kōrua ki Vērene ka rara o ruŋa o nā poki. Ki rava'a, e hā'aki mai mo oho tako'a atu ō'oku mo ha'amuri ki a ia».

⁹ I oti era te vānaŋa e te 'ariki, he e'a tū nu'u era he oho. 'I mu'a e oho era te hetu'u take'a era e rāua 'ātā ka noho rō 'i ruŋa i te kona 'i ira rā poki. ¹⁰ I u'i era ko noho 'ana te hetu'u, he to'o rō atu 'ai te koa o rā nu'u.

¹¹ He uru ia ananake ki roto i te hare, he take'a i te poki ararua ko tō'ona matu'a vahine ko [Māria], 'e he tū-turi he ha'amuri ki rā poki. He mātaki i te rāua 'ava-hata he va'ai i te piru, i te me'e mo tutu mo haka 'eo o te hare, 'e i te mano'i aŋa hai tāpau o te tumu te 'iŋoa he *mirra*.

¹² I oti era he hoki ananake ki te rāua henua a te ara kē 'o te ai ko haka 'ite 'ā e te 'Atua, 'i roto i te moe vārua, mo ta'e hipa ki a 'Erore.

He tere iŋa ki Ehipto

¹³ I oho era tū nu'u ma'ori hāpī hetu'u era, he o'o e tahi merahi o te 'Atua 'i roto i te moe vārua o [Kōsē] 'e he kī: «Ka 'ara koe. Ka to'o te poki ararua ko tō'ona matu'a vahine, 'ai ka e'a ka tē-tere ki Ehipto. 'I ira kōrua ana noho 'ātā ki tō'oku hā'aki iŋa haka 'ou atu. Nā, pa'i, a 'Erore he kimi i te poki mo tiŋa'i mo mate».

¹⁴ 'I rā pō 'ā he to'o a Kōsē i te poki ararua ko te matu'a vahine 'e he e'a he tē-tere ki Ehipto. ¹⁵ 'I ira i noho ai 'ātā ka mate rō a 'Erore. Te me'e nei i topa ai mo haka tano ki te vānaŋa kī e te 'Atua haka 'ite e te perofeta: «Ko haka e'a mai 'ana a au i tā'aku Poki mai Ehipto».

He haka tiŋa'i iŋa o 'Erore i te ŋā poki

¹⁶ A 'Erore, i u'i era kai hoki rā ŋā ma'ori kai hā'aki ki a ia, he riri rō atu 'ai. He uŋa ia he tiŋa'i he haka mate i te ŋā poki tane ta'ato'a o Vērene 'e o te kona hāhine ta'ato'a, mai te rua matahiti pe raro. I haka tano ai te matahiti o rā ŋā poki ki te mahana take'a e tū ŋā ma'ori era i te hetu'u. ¹⁷ Pē ira i tano ai te me'e pāpa'i e te perofeta era ko Heremia † pē nei ē:

¹⁸ «'I ŋaro'a rō e tahi re'o 'i Rāmā e 'au-auē 'ā.

Ko Rāhera †† tū me'e era e taŋi 'ana ki tā'ana ŋā poki, 'e 'ina he haŋa mo haka kore e te rua i tō'ona taŋi. Ko mā-mate 'ana, pa'i, tā'ana ŋā poki».

† A HEREMIA he perofeta e tahi o te 'Atua. 'I te hora 'ina he ha'atura te rahi ra'a o te itaraera ki te 'Atua, 'a Heremia te kī mo huri haka 'ou i te rāua mana'u. 'E i kī tako'a rō me'e rahi te me'e mo topa 'i te hora mo tu'u mai o te Kiritō. †† A RĀHERA he vi'e 'a Hākovo, matu'a vahine o Kōsē ararua ko Mēhāmīna. 'I te kona nei e kī ena i te 'iŋoa nei mo te matu'a vahine ta'ato'a taŋi mo te rāua ŋā poki ko mā-mate 'ā e tiŋa'i e 'Erore.

He tu'u iŋa o kuā Kōsē ki Nātāreta

¹⁹ I mate era a 'Erore, he o'o haka 'ou te merahi o te 'Atua 'i roto i te moe vārua ki a Kōsē 'i Ehipto 'e he kī: ²⁰ «Ka e'a ki ruŋa ka to'o te poki ararua ko tō'ona matu'a vahine ka hoki ki Itaraera. Te nu'u haŋa era mo tiŋa'i i a ia ko mā-mate 'ā».

²¹ He e'a a Kōsē he ma'u i te poki ararua ko tō'ona matu'a vahine he hoki ki Itaraera. ²² I 'ite era he poki 'a 'Erore, ko Arakerao, te suerekao o Hūrea, he ri'a-ri'a mo noho 'i ira. He haka 'ite ia e te 'Atua 'i roto i te moe vārua mo ta'e noho 'i rā kona. 'O ira i e'a i oho ai ki Karirea, he kona haka 'ou o Itaraera.

²³ I tu'u era ki Karirea he oho he noho 'i Nātāreta. Te me'e nei i topa ai tano ki te me'e kī e te perofeta o ruŋa i te Kiritō pē nei ē: «E kī rō i a ia he taŋata o Nātāreta».

He haka riva-riva iŋa o te ara mo te [Kiritō]

(Marko 1.1-8; Ruka 3.1-9,15-17; Iovani 1.19-28)

3 'I te mahana e tahi ia he tu'u a Iovani Papatito ki te kona 'one ta'e noho taŋata o Hūrea. ² 'I roto i tā'ana tātara e kī era: «Ka [huri te kōrua mana'u] ki te 'Atua; te haka tere iŋa 'āpī ō'ona ko hāhine mai 'ā!».

³ Te perofeta era ko 'Itaia i vānaŋa rō o ruŋa i a Iovani 'i te hora kī pē nei ē:

«E tahi re'o e ohu 'ana 'i te kona 'one ta'e noho taŋata:

“Ka haka riva-riva te ara mo te Kiritō; ka mātaki e tahi ara tī-tika».

⁴ Te kahu uru o Iovani hai huru-huru kameio i aŋa ai, 'e hai pena kiri e here era; e kai era hai me'e tu'u pa he perete'i 'e hai meri rava'a o ruŋa o te ma'uŋa.

⁵ Me'e rahi te nu'u o Hērutarema, o te kona ta'ato'a o Hūrea 'e o te pā'iŋa ararua o te rio ko Horotana i e'a i oho ai mo haka roŋo. ⁶ He pinitinia i te rāua hara 'e he [papatito] e Iovani 'i roto i te rio era ko Horotana.

⁷ I take'a era e Iovani me'e rahi te [fariseo] 'e te [saruseo] i tu'u mo papatito, he kī:

«ĪE te hua'ai o te kōreha veneno ē! Ī'A 'ai i kī atu he e'a kōrua mai roto i te ūtu'a nui-nui ena ko hāhine mai 'ā? ⁸ Ka haka tī-tika te kōrua noho iŋa ki take'a ai he parauti'a mau 'ā ko huri 'ana te kōrua mana'u ki te 'Atua. ⁹ 'E 'ina ko te'o-te'o ko kī ki a kōrua 'ā: “A mātou, ho'i, he hakaara o ['Aparahama]; 'o ira e tano rō 'ā ki te mata o te 'Atua”. Ī' a au he kī atu: e tano nō te 'Atua mo haka riro i te ŋā mā'ea nei he hakaara o 'Aparahama. ¹⁰ Te 'ōhio nā ko rito era 'ā mo pa'o i te tumu mai tō'ona aka. Te tumu ta'ato'a ta'e hua o te me'e riva-riva he pa'o 'e he hoa ki roto i te ahi.

¹¹ »Te parauti'a, e papatito atu ena a au hai vai mo take'a e te nu'u ko huri 'ana te kōrua mana'u ki te 'Atua. 'E nā he oho mai te kope mā'ana e papatito atu hai [Vārua Maitai] 'e hai ahi. A ia 'ata hau rō atu 'i te pūai kī a au; a au mau nei e ko tano mo ma'u i tō'ona kiri-

va'e. ¹² Te kope nei e tu'u rō pa he kope ma'u i te ope mo haka ma'itaki i te tariko 'e mo ha'ata'a i te kave-kave paka-paka. He tariko te me'e ka hāpa'o era 'i roto i te hare ha'aputu tariko, 'e he kave-kave ka tutu era 'i roto i te ahi 'ina he mate».

He papatito iŋa i a Ietū

(Marko 1.9-11; Ruka 3.21-22)

¹³ He oho a Ietū mai Karirea ki te rio era ko Horotana, he kona 'i ira a Iovani, mo haka papatito i a ia. ¹⁴ A Iovani kai haŋa 'i ra'e mo papatito i a Ietū 'e he kī:

—ĪTa'e 'ō ko au te me'e mo papatito mai e koe? 'E, ka ai atu pē ira, ĩe oho mai 'ā koe mo papatito atu e au?

¹⁵ He pāhono e Ietū:

—Mo te hora nei ka haka rē pē nā 'ā, mo haka tano tahi i te me'e haŋa o te 'Atua.

He papatito ia e Iovani. ¹⁶ I oti era he e'a a Ietū mai roto i te vai. Ī' ka u'i atu ena ka ha-hata te raŋi. He take'a te turu iŋa o te Vārua Maitai o te 'Atua ki ruŋa i a ia pa he pāroma. ¹⁷ He ŋaro'a i te re'o ka kī mai te raŋi: «He Poki nā 'ā'aku, Poki haŋa rahi; 'i ruŋa i a ia tō'oku koa».

He haka 'atu iŋa o Rukifero i a Ietū mo hara

(Marko 1.12-13; Ruka 4.1-13)

4 He ma'u ia e te [Vārua Maitai] i a Ietū ki te kona 'one ta'e noho taŋata mo haka 'atu e Rukifero koi'ite e aŋa rō e tahi me'e ta'e haŋa e te 'Atua.

² 'I ira i noho ai e maha 'ahuru mahana 'ina he kai. I oho era he ŋaro'a te maruaki. ³ He haka hāhine ia a Rukifero he kī:

—Ē, a koe he Poki o te 'Atua, ĩhe aha rā koe e ta'e haka riro ena i te ŋā mā'ea nei he haraoa?

⁴ He pāhono e Ietū:

—'Ina. Pē nei, pa'i, e kī ena 'i ruŋa i te [Pāpa'i Mo'a]:

«Ta'e hai haraoa nō te taŋata e ora ena. Hai haka roŋo tako'a ki te vānaŋa ta'ato'a o te 'Atua».

⁵ He ma'u ia e Rukifero i a Ietū ki Hērutarema, ki ruŋa i te kona hope'a o te ruŋa nui o te Kona Ha'amuri 'Atua ⁶ 'e he kī:

—He Poki koe o te 'Atua. Ka rere mai ruŋa nei ki raro. Nā, pa'i, e hā'aki rō 'ana 'i ruŋa i te Pāpa'i Mo'a:

«E uŋa rō atu te 'Atua i tā'ana merahi mo hāpa'o i a koe.

Hai rima o rāua ka ma'u ena i a koe a ruŋa 'o hetu ki te mā'ea».

⁷ He pāhono e Ietū:

—E hā'aki tako'a rō 'ana 'i ruņa:

«'Ina koe ko haka 'atu i tu'u 'Atua, 'ina ko aņa e tahi me'e ma'a-ma'a hai mana'u pē nei ē: e haka e'a rō koe e te 'Atua mai rā me'e».

⁸ 'I te hora hope'a he ma'u e Rukifero ki ruņa i te ma'uņa hope'a o te ruņa nui. He haka take'a i te henua ta'ato'a o te ao 'e i te rāua hauha'a ⁹ he kī:

—He va'ai tahi atu a au i te me'e ta'ato'a era mo tū-turi 'e mo ha'amuri mai ō'ou ki a au.

¹⁰ He pāhono e Ietū:

—Ka mahiti koe ka oho, e Rukifero ē! Ko pāpa'i era 'ana 'i ruņa i te Pāpa'i Mo'a:

«E ha'amuri koe ki a Iehoha ki tu'u 'Atua 'e ki a ia mau nō koe ana tāvini».

¹¹ He haka tapa ia a Rukifero mai muri, 'e he oho e te merahi he hāpa'o i a Ietū.

He ha'amata iņa o Ietū i tā'ana aņa 'i Karirea

(Marko 1.14-15; Ruka 4.14-15)

¹² 'I ŋaro'a era e Ietū ko puru 'ā a [Iovani] 'i roto i te hare ma'u'aurī, he e'a he oho ki Karirea. ¹³ 'Ina kai noho 'i Nātāreta; 'i Kaperenāu i noho ai, 'i te taha-taha o te vai, 'i te kona o te hakaara o Tāvūrone 'e o Nefetārī. ¹⁴ Te me'e nei i topa ai tano ki te me'e pāpa'i e te perofeta era ko 'Itaia pē nei ē:

¹⁵ «'I te henua o Tāvūrone 'e o Nefetārī,
'i te taha-taha o te vaikava,
'i te rua pā'iņa o te rio era ko Horotana,
'i Karirea, kona noho o te nu'u ta'e he [hūrio],
¹⁶ te taņata noho 'i roto i te pōhāhā o te hara
ko take'a 'ana i te mōrī nui-nui.
Ko haka mā'eha 'ana
i te nu'u noho 'i roto i te pōhāhā o te mate,
he ta'e 'ite ko ai te 'Atua».

¹⁷ Mai rā hora he ha'amata a Ietū he tātara: «Ka huri te kōrua mana'u ki te 'Atua; ko hāhine mai 'ana te haka tere iņa 'āpī ō'ona».

He to'o iņa o Ietū i te ŋaņata hī ika hoko hā

(Marko 1.16-20; Ruka 5.1-11)

¹⁸ E ha'ere e oho nō 'ā a Ietū a te taha-taha o te vai era o Karirea, he take'a e rua taina: e tahi ko Tīmona, kī tako'a ko Pētero, 'e te rua ko Antarea, he nu'u hī ika e hoa 'ana i te rāua kūpeņa. ¹⁹ He kī e Ietū: «Ka oho mai kōrua 'i muri i a au. He haka riro a au i a kōrua he nu'u hī taņata mo te 'Atua».

²⁰ 'I tū hora 'ana he haka rē i te rāua kūpeņa he e'a he oho 'i muri i a Ietū.

²¹ Pe mu'a 'iti he take'a e Ietū i te taina haka 'ou hoko rua: ko [Tanatiako] 'e ko Iovani, he ŋā poki 'a

Tevereo, e haka riva-riva 'ana i te rāua kūpeņa ananake ko te rāua matu'a tane 'i ruņa i te vaka. He kī e Ietū mo oho tako'a 'i muri i a ia. ²² 'I tū hora 'ā he to-topa tū ŋā taina era mai ruņa i te vaka, he haka rē i te rāua matu'a tane 'e he e'a he oho rō 'ai 'i muri.

He haka ora iņa o Ietū me'e rahi nu'u māui-ui

(Ruka 6.17-19)

²³ A te kona ta'ato'a o Karirea e ha'ere e oho era a Ietū, e hāpī 'ana 'i roto i te [hare pure hūrio] ta'ato'a o rā ŋā kona. E haka 'ite 'ana i te parau 'āpī riva-riva o te [haka tere iņa 'āpī o te 'Atua] 'e e haka ora 'ā i te māui-ui ta'ato'a.

²⁴ 'I te kona ta'ato'a o Tīria e 'a'amu era o ruņa i te me'e aņa e Ietū. He ma'u ia e te taņata o ira i te nu'u huru kē huru kē te rāua māui-ui, te nu'u o'o e te tā-tane, te nu'u māui-ui kiki-kiki, te nu'u ta'e makenu o te hakari, 'e he haka ora tahi e Ietū.

²⁵ Me'e rahi nō atu nu'u o Karirea, o Rēkāpori, o Hērutarema, o Hūrea 'e o te pā'iņa e'a o te ra'ā o te rio ko Horotana i oho 'i muri i a Ietū.

He ha'amaitai o te 'Atua

(Ruka 6.20-23)

5 I take'a era e Ietū i te rahi o te nu'u, he iri 'iti pe ruņa o te ma'uņa 'ai ka noho. 'E, i puā era tā'ana nu'u hāpī, ² he ha'amata he tātara:

³ «Ko te koa i te nu'u 'ite ta'e i a rāua mau nō te rāua ora;
i te nu'u nei te haka tere iņa 'āpī o te 'Atua.

⁴ Ko te koa i te nu'u taņi 'e 'amo i te 'ati;
e haka koa rō a rāua e te 'Atua.

⁵ Ko te koa i te nu'u ta'e mana'u i hau rō atu rāua ki te rua;
ki a rāua ka va'ai ena i te henua.

⁶ Ko te koa i te nu'u te rāua me'e haņa mau nō he tano o te haka tere iņa o te taņata ki te mata o te 'Atua;
te 'Atua e haka tano rō i rā me'e.

⁷ Ko te koa i te nu'u e haka 'aroha rō 'ana i te rua;
e haka 'aroha tako'a rō te 'Atua i a rāua.

⁸ Ko te koa i te nu'u māhatu ma'itaki;
e take'a rō e rāua i te 'Atua.

⁹ Ko te koa i te nu'u aņa mo ai o te haumārū 'i roto i te taņata;
e kī rō e te nu'u he ŋā poki o te 'Atua.

¹⁰ Ko te koa i te nu'u tute mo tōtōā 'o te aņa i te me'e haņa o te 'Atua;
a rāua o roto i te haka tere iņa 'āpī ō'ona.

¹¹ »Ko te koa i a kōrua 'i te hora vā-vā 'e tōtōā atu e te taŋata, 'e 'i te hora ha'a'ino hai rauhuru nō atu reo-reo 'o te pe'e mai o kōrua ki a au. ¹² E koa; 'i te ranji e va'ai rō atu e te 'Atua i te me'e nui-nui mo haka koa i a kōrua. Pē ira tako'a i tōtōā ai i te perofeta o mu'a 'ā.

He miti 'e he mōrī mo te ao

(Marko 9.50; Ruka 14.34-35)

¹³ »A kōrua he miti mo te taŋata o te ao nei. Mo kore tā'ue te maŋeo o te miti, 'ina ō'ona hauha'a toe; 'ina pa'i, he rāve'a mo haka maŋeo haka 'ou. He hoa ki te ara 'e he rei-rei e te taŋata.

¹⁴ »A kōrua he mōrī mo te ao nei. Te nūna'a hare 'i ruŋa i te ma'uŋa e ko ta'e take'a e te taŋata. ¹⁵ 'Ina he nu'u haka pura i te hakari'i mo haka rē 'i raro i te 'ava-hata; e haka rē ena 'i te kona ruŋa nui mo haka mā'e-ha i te nu'u ta'ato'a o roto i te hare. ¹⁶ Pē ira kōrua ana haka tere 'i mu'a o te taŋata. Ka take'a ena, pa'i, i te kōrua haka tere iŋa tano ki te mata o te 'Atua, he ha'a-hana-hana tahi ki te kōrua Matu'a o te ranji.

E haka tano tahi rō te [haka tere iŋa 'a Mōtē]

¹⁷ »'Ina kōrua ko mana'u: a au 'ō i oho mai ai mo haka kore i te haka tere iŋa o te 'Atua pāpa'i e [Mōtē] 'e i te me'e pāpa'i e te perofeta. Mo haka tano tahi i rā ŋā me'e a au i oho mai ai, ta'e mo haka rē a te tapa. ¹⁸ 'I a au he kī atu i te parauti'a: mo ai nō o te ranji 'e o te henua, 'ina e tahi ti'ara'a ka hope'a atu te 'iti-'iti o ruŋa i te haka tere iŋa o te 'Atua mo haka kore 'ātā ka haka tano tahi rō te me'e hā'aki o ruŋa. ¹⁹ 'O ira, te kope ta'e ha'atura ki te me'e e tahi o ruŋa i te haka tere iŋa o te 'Atua, ka ai atu he me'e hope'a o te 'iti-'iti, 'e hāpī i te taŋata mo ta'e ha'atura tako'a ki rā me'e, ko ia te kope hope'a o roto i te [haka tere iŋa 'āpī o te 'Atua]. 'E te kope ha'atura 'e hāpī i te rua mo ha'atura he kope hōnui o roto i te haka tere iŋa 'āpī o te 'Atua. ²⁰ 'I a au he kī atu: mo ta'e ai o te kōrua aŋa iŋa i te me'e tī-tika ki te mata o te 'Atua 'ata hau ki te ma'ori o te haka tere [hūrio] 'e o te [fariseo], e ko o'o kōrua ki roto i te haka tere iŋa 'āpī o te 'Atua.

O ruŋa i te riri

(Ruka 12.57-59)

²¹ »Ko ŋaro'a 'ana e kōrua te me'e i kī ki te kōrua tupuna: "'Ina ko mate te taŋata 'i tu'u rima; mo mate te kope e tahi 'i te rua, he haka ūtu'a". ²² 'E, 'i a au he kī atu: he haka ūtu'a e te 'Atua i te kope riri mo te rua. 'E te kope vā-vā 'e kī i te ma'a-ma'a o te rua he ture e te [nūna'a taŋata i a rāua te kī iŋa hope'a o te haka tere hūrio]. Te kope haka ha'amā 'e kī i te ta'e hauha'a o te rua te ūtu'a tano mō'ona he pō'auahi.

²³ »Mo ai ia e ma'u 'ana koe i ta'a tūtia ki te 'Atua 'e he mana'u koe e riri rō 'ana tu'u taina mō'ou, ²⁴ ka haka rē ta'a tūtia 'i muri i te [fata] 'e ka e'a koe ka oho 'i ra'e ka haka kore i tō'ona riri, 'ai koe ka hoki ka va'ai iho i ta'a tūtia ki te 'Atua.

²⁵ »Mo horo i a koe e te kope e tahi, ka u'i te rāve'a, mai ai 'ā te hora, mo haka kore i rā ture 'o va'ai i a koe ki te rima o te pū'oko haka tere o te hare ture, he va'ai ia i a koe ki te mūto'i 'e he ma'u he puru. ²⁶ Te parauti'a, mo puru ō'ou, e ko e'a koe mai roto 'ātā ka 'auhau rō i te tara hope'a.

O ruŋa i te tai'ata

²⁷ »A kōrua ko ŋaro'a 'ana te roŋo: "'Ina ko tai'ata". ²⁸ 'E, 'i a au he kī atu: te kope u'i 'e pohe mo moe i te vi'e o te rua, ko tai'ata 'ana 'i roto i tō'ona mana'u.

²⁹ »'O ira, mo haka hara atu i a koe e tu'u mata mata'u, ka kume, ka hoa ki kōnui. I hau 'i te tano mo kore e tahi kona o tu'u hakari, ki te hoa i tu'u hakari ta'ato'a ki roto i te pō'auahi. ³⁰ 'E mo haka hara atu i a koe e tu'u rima mata'u, ka hore, 'ai ka hoa rō ki kōnui. I hau 'i te tano mo kore e tahi kona o tu'u hakari, ki te hoa i tu'u hakari ta'ato'a ki roto i te pō'auahi.

O ruŋa i te ha'ata'a o te nu'u hāipo-ipo

(Māteo 19.9; Marko 10.11-12; Ruka 16.18)

³¹ »Te roŋo i kī tako'a: "Te taŋata mo ha'ata'a mai tā'ana vi'e, e va'ai ki rā vi'e te parau o te ha'ata'a". ³² 'E, 'i a au he kī atu: te taŋata mo ha'ata'a mai tā'ana vi'e, ka ai atu kai tai'ata rā vi'e, e haka rē 'ana i tā'ana vi'e mo viri ki roto i te tai'ata ana [hāipo-ipo] haka 'ou rā vi'e. 'E te kope mo hāipo-ipo ki te vi'e ha'ata'a e tai'ata 'ā.

O ruŋa i te me'e he hōrea

³³ »Ko 'ite tako'a 'ana e kōrua i te me'e i kī ki te tupuna: "'Ina ko ta'e aŋa te me'e hōrea ki te 'Atua". ³⁴ 'E, 'i a au he kī atu: 'ina mau nō kōrua ko hōrea. 'Ina ko hōrea hai ranji, he pepe 'ariki o te 'Atua, ³⁵ 'e hai henua, he kona ranjo o tō'ona va'e; pē ira 'ana hai Hērutarema, he kona o te 'Ariki hope'a o te nui-nui. ³⁶ 'Ina tako'a ko hōrea hai pū'oko o kōrua; e ko rava'a, pa'i, e kōrua mo haka tea-tea 'e mo haka 'uri-'uri ni e tahi o te kōrua rau'oho. ³⁷ Te me'e mau nō mo kī: "'ina" 'o "'ē-ē". Te vānaŋa haka 'ou kī mo 'ata haka pūai i te ŋā vānaŋa nei 'a Rukifero.

E haka hoki hai me'e riva-riva te me'e rake-rake

(Ruka 6.29-30)

³⁸ »A kōrua ko ŋaro'a 'ana i te kī: "Te kope ka-karo i te mata o te rua he 'auhau hai mata mau era 'ā ō'ona. 'E te niho hai niho". ³⁹ 'E, 'i a au he kī atu: 'ina koe ko haka hoki hai me'e ta'e tano ki te me'e ta'e tano aŋa atu e te rua. Te me'e mau 'ā'au mo aŋa ko te me'e nei: mo pu'a atu o te kope e tahi i tu'u pā'iŋa 'āriŋa mata'u, e va'ai te rua pā'iŋa. ⁴⁰ 'E mo horo i a koe 'e he haŋa mo hiko i tu'u kamita, e haka rē tako'a tu'u paratoa. ⁴¹ Mo haka 'amo atu i te me'e paŋaha'a e tahi ta'utini mētera, e 'amo e rua ta'utini. ⁴² Te kope haŋa e tahi me'e mai i a koe, e va'ai, 'e ki te kope no-no'i atu, 'ina ko hāruai hai tua'ivi.

E haŋa ki te nu'u ma'u i te riri mo kōrua

(Ruka 6.27-28,32-36)

⁴³»A kōrua ko ŋaro'a 'ana te kī iŋa pē nei ē: "E here kōrua ki te rua, 'e 'ina ko haŋa ki te nu'u ma'u i te riri mo kōrua". ⁴⁴'E, 'I a au he kī atu: e haŋa kōrua ki te nu'u ma'u i te riri mo kōrua, 'e e pure mo te nu'u tute i a kōrua mo tōtōā. ⁴⁵Pē ira he take'a he poki kōrua o te kōrua Matu'a 'i te raŋi; a ia, pa'i, e haka e'a ena i te ra'ā mo te nu'u aŋa i te me'e riva-riva 'e mo te nu'u aŋa i te me'e rake-rake, 'e e haka hoa ena i te 'ua mo te nu'u tano ki tō'ona mata 'e, tako'a, mo te nu'u ta'e tano.

⁴⁶»Mo haŋa o kōrua ki te nu'u haŋa nō atu, ζe va'ai mau rō atu te 'Atua i te me'e mo koa o kōrua mo aŋa pē ira? 'Ātā, pa'i, te [nu'u haka 'auhau i te taŋata hai moni mo te rōmano] e aŋa tako'a rō 'ana pē ira. ⁴⁷'E mo 'aroha o kōrua ki te kōrua taina mau nō, ζhe aha ia te me'e nui-nui o kōrua i aŋa? 'Ātā te nu'u ta'e 'ite ko ai te 'Atua parauti'a, pa'i, e me'e rō 'ana pē ira.

⁴⁸»E ai kōrua he nu'u 'ina e tahi hape, pa he Matu'a o kōrua 'i te raŋi.

Te hā'ū'ū iŋa ki te nu'u veve

6 »Te kōrua me'e riva-riva aŋa 'ina ko aŋa 'i mu'a i te taŋata mo take'a nō e rāua. Mo aŋa pē ira, te Matu'a o kōrua o te raŋi e ko va'ai atu i te me'e mo koa o kōrua.

²»'O ira, hora ena ō'ou mo hā'ū'ū ki te nu'u veve, 'i-na ko haka 'ite ki te tētahi, pa he me'e aŋa 'i roto i te [hare pure hūrio] 'e 'i te ara e te nu'u riva a te haho nō mo take'a e te nu'u mo vānaŋa riva-riva o ruŋa i a rāua. 'I a au he kī atu: he vānaŋa riva-riva o te nu'u te me'e mau nō mo haka koa i a rāua.

³»Hora ena ō'ou mo hā'ū'ū ki te nu'u veve, 'ina ko 'a'amu e tahi kope, ka ai atu he repahoa haŋa rahi ō'ou. ⁴E hā'ū'ū 'e 'ina ko haka 'ite ki te rua. 'E tu'u Matu'a o te raŋi take'a i ta'a me'e aŋa ta'e 'ite e te rua, he va'ai atu i te me'e mo koa ō'ou.

He hāpī iŋa o Ietū pē hē ana pure

(Ruka 11.2-4)

⁵»Hora era o kōrua mo pure, 'ina ko ai pa he nu'u riva a te haho nō, te me'e haŋa o rāua he māroa he pure 'i roto i te hare pure hūrio 'e 'i te pini o te ara mo take'a e te taŋata. 'I a au he kī atu: he māta'i-ta'i o te taŋata te me'e mau nō mo haka koa i a rāua.

⁶»Hora ena ō'ou mo pure, e uru ki roto i tu'u piha e puru te 'ōpani, 'ai ka pure rō ki tu'u Matu'a o te raŋi ta'e e 'ite e te taŋata. 'E tu'u Matu'a o te raŋi take'a i ta'a me'e aŋa ta'e 'ite e te rua, he va'ai atu i te me'e mo koa ō'ou.

⁷»E pure 'ana kōrua, 'ina ko haka hoki te vānaŋa ko tū vānaŋa 'ā ko tū vānaŋa 'ā, pa he me'e aŋa e te nu'u ta'e 'ite ko ai te 'Atua parauti'a 'i te mana'u ana rahi te rāua vānaŋa iŋa, he ŋaro'a e te 'Atua. ⁸'Ina ko aŋa pē

rāua. 'I ra'e ki te kōrua no-no'i, pa'i, ko 'ite era 'ā e te kōrua Matu'a o te raŋi i te me'e riva-riva mo kōrua.

⁹»Pē nei ana pure:

"E te Matu'a o mātou o te raŋi ē, te me'e haŋa he mo'a o te taŋata ta'ato'a i tu'u 'iŋoa, ¹⁰'e he haka rē atu mo haka tere ō'ou i a rāua, ki haka tano ai i ta'a me'e haŋa 'i te ao nei pa he haka tano iŋa atu o ta'a me'e haŋa 'i te raŋi.

¹¹E va'ai mai koe 'arīnā to mātou o te kai.

¹²E haka kore koe i te mātou hara, pa he haka rehu iŋa o mātou i te me'e 'ino aŋa mai e te rua.

¹³'E, 'i te hora o te haka 'atu mai, 'ina koe ko haka rē i a mātou mo viri ki roto i te hara; e haka e'a koe i a mātou mai roto i te rima o Rukif-ero".

¹⁴»Mo haka rehu o kōrua i te me'e 'ino aŋa atu e te rua, te kōrua Matu'a o te raŋi he haka rehu tako'a i te kōrua me'e ta'e tano aŋa. ¹⁵'E mo ta'e haka rehu o kōrua i te me'e ta'e tano aŋa atu e te rua, e ko haka rehu tako'a e te kōrua Matu'a i te kōrua hara.

Te tapu iŋa i te kai

¹⁶»Hora ena o kōrua mo tapu i te kai mo ha'amuri ki te 'Atua, 'ina ko haka topa te 'āriŋa pa he nu'u riva a te haho nō haka tu'u i te rāua 'āriŋa pa he 'āriŋa haka 'aroha mo 'ite e te taŋata e tapu 'ana a rāua i te kai. 'I a au he kī atu: he 'ite mau nō era o te nu'u te me'e o rāua mo rava'a, ta'e 'ō he me'e va'ai e te 'Atua mo haka koa. ¹⁷Hora ena ō'ou mo tapu, e hopu te 'āriŋa e haka riva-riva, ¹⁸'o 'ite e te nu'u e tapu 'ana a koe. 'E mo tu'u Matu'a o te raŋi, ta'e take'a e koe, e 'ite. A ia, pa'i, e 'ite rō 'ana i te me'e ta'e 'ite e te rua taŋata, 'e mā'ana e va'ai atu i te me'e mo koa.

He kona tano mo ha'aputu o te hauha'a

(Ruka 12.33-34)

¹⁹»'Ina kōrua ko ha'aputu i te hauha'a 'i te ao nei, he kona e kai rō 'ana te me'e e te manu kai hare, e rake-rake rō 'ana 'i te para, 'e e uru rō 'ana e te toke-toke mo toke. ²⁰Te tano mau: 'i te raŋi a kōrua ana ha'aputu i te hauha'a, he kona 'ina e ko kai e te manu kai hare, 'ina e ko rake-rake 'e 'ina e ko toke. ²¹'I te kona 'i ira, pa'i, tu'u hauha'a, 'i ira tako'a tu'u māhatu.

Te mana'u he mōrī o te taŋata

(Ruka 11.33-36)

²²»Te mata pa he mōrī haka mā'eha i te hakari, 'e pē ira 'ā te mana'u o te taŋata. Mo riva-riva, he ha'ere a roto i te mā'eha; ²³'e mo rake-rake, a roto i te pōhāhā. Mo kī ō'ou e mā'eha rō 'ana tu'u mana'u, 'e te parauti'a mau ta'e pē ira, jko roto i te pōhāhā taparahi-ta'ata koe!

Te 'Atua 'e he hauha'a

(Ruka 16.13)

²⁴ »'Ina e tahi kope mo rava'a mo tāvini, 'i tū hora 'ā, ki te nānata hoko rua. Mo aña pē ira, ki te kope e tahi ka haña era 'e ki te rua 'ina. He ha'atura ki te tañata e tahi 'e ki te rua ka ta'e haka au era. Te aura'a: e ko tano koe mo aña ki te 'Atua 'e ki te hauha'a 'i tū hora 'ā.

Te 'Atua e hāpa'o rō 'ana i tā'ana nā poki

(Ruka 12.22-31)

²⁵ »'I a au he kī atu: 'ina kōrua ko mana'u rahi ki te me'e mo kai 'e mo unu mo ora o kōrua, 'e 'ina tako'a ko mana'u rahi ki te me'e mo uru. ¿Ka kī 'ō e ora ena te tañata mo kai mau nō, 'e te hakari e ai ena mo uru nō i te kahu?

²⁶ »E u'i rā te manu: 'ina he 'oka, 'ina he kato 'e 'ina he hāpa'o i te kai 'i roto i te hare ha'aputu kai. Ka ai atu pē ira, te Matu'a o kōrua 'i te rañi e hāñai rō 'ana i a rāua. 'E a kōrua i hau rō atu 'i te hauha'a ki te manu.

²⁷ »E mana'u tako'a: ka rahi atu te hāpa'o iña o te kope e tahi o kōrua i a ia 'ā, e ko rava'a mo haka roa 'i-ti i tō'ona noho iña 'i te ao nei.

²⁸ »¿He aha ia kōrua e mana'u rahi ena ki te kahu? Ka u'i rā te tiare 'ūa'a 'i 'uta: 'ina he aña 'e he hiro i te hau. ²⁹ Ka ai atu pē ira, 'ina kai ai 'ā e tahi kope i uru i te kahu hope'a o te nehe-nehe pē rā nā tiare, koro-haña te 'ariki 'ono era ko [Toromono].

³⁰ »Mo ai pē ira te 'Atua e haka nehe-nehe ena i te tiare o 'uta, 'ūa'a 'i 'añarīnā 'e mae-mae āpō, ¿pē hē ia ana ta'e haka uru atu i a kōrua hai kahu, e te nu'u ta'e [haka moe i te mana'u] 'i ruña i te 'Atua ē?

³¹ »'Ina ko mana'u pē nei ē: "¿Hai aha a tātou ana kai 'e ana unu?" 'e "¿Hai aha a tātou ana uru?". ³² Te nā me'e nei he me'e mana'u rahi e te nu'u ta'e 'ite ko ai te 'Atua parauti'a. 'E, a kōrua e ai rō 'ana te Matu'a 'i te rañi ko 'ite 'ana i te me'e mo te kōrua ora.

³³ »O ira, e va'ai tahi te kōrua māhatu mo haka tere atu e te 'Atua 'e mo aña o kōrua i te me'e tī-tika ki tō'ona mata 'e mā'ana e va'ai atu i rā nā me'e. ³⁴ 'Ina ko mana'u rahi o ruña i te me'e ka topa ena āpō; āpō ana mana'u iho o ruña. Ta'ato'a nō mahana e ai rō 'ana tō'ona 'ati.

¿Ko ai koe mo kī i te me'e ta'e tano o te rua?

(Ruka 6.37-38,41-42)

7 »Ka haka rē te kōrua kī i te hape o te rua, 'o kī atu e te 'Atua i te kōrua hape. Ta'e, pa'i, i a kōrua te parau mo ture. ² Pa he ture iña o kōrua i te rua, pē ira 'ā te 'Atua ka ture atu ena i a kōrua. Pa he pūai o te kōrua kī iña i te hape o te rua, pē ira 'ā te pūai ka kī atu ena e te 'Atua i te kōrua hape.

³ »¿He aha koe e u'i ena i te pua mauku o roto i te mata o tu'u taina, 'e 'ina koe he u'i i te pou o roto i tu'u mata? ⁴ 'E, mo ai 'i roto i tu'u mata e tahi pou, ¿pē hē ia koe ana kī ki tu'u taina: "Ka haka rē ki to'o atu i te pua mauku mai roto i tu'u mata"? ⁵ ;E te kope riva a te

haho ē! Ka kume 'i ra'e te pou o roto i tu'u mata, ki take'a riva-riva iho ai e koe mo kume i te pua mauku mai te mata o tu'u taina.

⁶ »'Ina kōrua ko hāpī ko oho i te vānaña mo'a o te 'Atua ki te nu'u te rāua aña nō he ta'e haña mo haka roño ki rā vānaña. A rāua pa he paiheña taehae 'ā, ka hoa atu hai me'e hauha'a, e nāu nō atu i a kōrua. A rāua tako'a pa he oru 'ā, ka hoa atu hai me'e hauha'a pa he poe, e rei-rei nō.

He no-no'i, he kimi 'e he pātōtō i te 'ōpani

(Ruka 11.9-13; 6.31)

⁷ »E no-no'i ki te 'Atua, he va'ai atu; e kimi, he haka take'a atu; e pātōtō te 'ōpani, he mātaki atu. ⁸ Ki te kope no-no'i, pa'i, he va'ai; ki te kope kimi, he haka take'a; 'e ki te kope pātōtō, he mātaki ki a ia.

⁹ »¿Ko ai o kōrua mo va'ai tā'ue hai mā'ea ki tā'ana poki ana no-no'i atu hai haraoa; ¹⁰ 'o hai kōreha veneno ana no-no'i atu hai ika?

¹¹ »Mo ai ko 'ite 'ana a kōrua mo va'ai i te me'e riva-riva ki te kōrua nā poki, ka ai atu kōrua he nu'u hara, ¿e ko ta'e va'ai hō e te Matu'a o te rañi hai me'e riva-riva ki te nu'u no-no'i ki a ia?

¹² »E aña kōrua ki te rua i te me'e haña e kōrua mo aña atu e te rua. Ko te me'e nei te hāpī mau o te me'e pāpa'i e Mōtē 'e e te perofeta.

Te 'ōpani vako-vako

(Ruka 13.24)

¹³ »E uru kōrua a roto i te 'ōpani vako-vako. Te 'ōpani uru ki te pō'auahi e 'a'ano rō 'ana 'e te ara oho ki ira e nui-nui rō 'ā, 'e e rahi rō 'ana te tañata uru 'e ha'ere a rā ara. ¹⁴ 'E, te 'ōpani mo uru ki te ara o te ora 'ina he hope'a ra'a e vako-vako rō 'ā 'e aña ri'a-ri'a te ha'ere te oho a roto, 'e nu'u ta'e rahi te nu'u o'o ki ira.

Ka anji-anji ena ko ai hai me'e aña o rāua

(Ruka 6.43-44)

¹⁵ »E u'i kōrua e te nu'u reo-reo haka tu'u i a rāua pa he nu'u vānaña hai 'iñoa o te 'Atua. E oho atu ena pa he māmoē, 'e te roto pa he paiheña taehae 'ā. ¹⁶ E anji-anji nō e kōrua ko ai a rāua hai me'e aña. Te vino, pa'i, 'e te pika 'ina he kato mai ruña i te tumu pū-pū. ¹⁷ Te tumu riva-riva he me'e riva-riva te me'e hua mo kai, 'e te tumu rake-rake he me'e rake-rake. ¹⁸ 'Ina he tumu riva-riva hua o te me'e rake-rake, 'e 'ina he tumu rake-rake hua o te me'e riva-riva. ¹⁹ Ta'ato'a tumu hua o te me'e rake-rake, he pa'o he hoa ki roto i te ahi. ²⁰ Pē ira ka anji-anji ena e kōrua ko ai mau a rāua, hai me'e aña e rāua.

Ta'e ta'ato'a ka o'o ena ki roto i te [haka tere iña 'āpī o te 'Atua]

(Ruka 13.25-27)

²¹ »Ta'e ta'ato'a nu'u kī mai: "E tō'oku Pū'oko Haka Tere ē", mo o'o ki roto i te haka tere iña 'āpī o tō'oku Matu'a 'i te rañi; te nu'u mau nō mo o'o he nu'u aña i tā'ana me'e haña. ²² 'I te mahana o tā'ana ture hope'a,

nu'u rahi te nu'u ka kī mai ena: “E te mātou Pū'oko Haka Tere ē, i haka 'ite i oho rō mātou hai 'īŋoa ō'ou i te vānaŋa haka 'ite mai e te 'Atua, i haka e'a rō i te tātane mai roto i te taŋata 'e i aŋa tako'a rō me'e rahi nō atu mana hai 'īŋoa ō'ou”.²³ 'I rā hora ka pāhono ena e au: “Kai māhani a au i a kōrua. ¡Ka haka tapa mai muri i a au, e te nu'u aŋa i te me'e ta'e tano ē!”.

Te nu'u ha'atura 'e ta'e ha'atura

(Marko 1.22; Ruka 6.47-49)

²⁴ »Te nu'u haka roŋo 'e aŋa i tā'aku me'e kī pa he taŋata mana'u riva-riva aŋa i tō'ona hare 'i ruŋa i te kona hio-hio. ²⁵ He hoa te 'ua, he rahi he oho te vai o roto i te rio, he hetu ki rā hare 'e he puhi pūai te tokerau a ruŋa, 'e 'ina kai marere 'i te aŋa 'i te kona hio-hio.

²⁶ »'E te nu'u ŋaro'a 'e ta'e ha'atura ki tā'aku me'e kī pa he taŋata ma'a-ma'a aŋa i tō'ona hare 'i ruŋa i te 'one. ²⁷ He hoa te 'ua, he rahi he oho te vai o roto i te rio, he hetu ki rā hare 'e he puhi pūai te tokerau a ruŋa, 'e he marere tahi rā hare. ¡He 'ati nui-nui e tahi!».

²⁸ I oti era 'a Ietū te vānaŋa, he māere tahi te nu'u 'i te huru o te hāpī iŋa ō'ona; ²⁹ e hāpī era pa he taŋata i a ia mau 'ā te parau, ta'e 'ō pa he [ma'ori o te haka tere hūrio].

He haka ora iŋa o Ietū i te taŋata rēpera

(Marko 1.40-45; Ruka 5.12-16)

8 I topa era a Ietū mai ruŋa i te ma'uŋa, me'e rahi nu'u i oho 'i muri i a ia. ² He haka hāhine ia e tahi taŋata māui-ui i te rēpera, he tū-turi 'i mu'a 'e he kī:

—E Ietū, mo haŋa ō'ou, i a koe te ora o tō'oku māui-ui nei.

³ He haka puā e Ietū hai rima 'e he kī:

—Ko haŋa 'ana a au. ¡Ka ora!

'I tū hora mau era 'ā he ma'itaki te rēpera o tū taŋata era. ⁴ He kī haka 'ou e Ietū:

—'Ina ko 'a'amu e tahi nu'u. Ka oho koe ka haka take'a i a koe ki te [oromatu'a]. E ma'u te me'e mo tūtia ki te 'Atua haka 'ite mai e [Mōtē] mo tu'u [haka ma'itaki], ki tūtia ai e te oromatu'a 'e ki haka 'ite ai ki te taŋata ko ora 'ana tu'u māui-ui.

He haka ora iŋa o Ietū i te tāvini o te kape rōmano

(Ruka 7.1-10; Iovani 4.43-54)

⁵ I tu'u era a Ietū ki Kaperenāū, he haka hāhine e tahi taŋata he kape o te va'ehau rōmano, ⁶ he ani:

—E Ietū, 'ai tō'oku kona hare era tō'oku tāvini ko māui-ui 'ā, 'ina he makenu te hakari koia ko rahi te mamae.

⁷ He pāhono e Ietū:

—'I a au he oho atu he haka ora.

⁸ He kī e tū kape era:

—E Ietū, ūko ai a au mo uru atu ō'ou ki roto i tō'oku hare? Ka kī nō koe i ta'a vānaŋa 'e he ora rō 'ai tō'oku tāvini. ⁹ A au mau nei 'ā e ai rō 'ana te kope 'ata hau rō atu te tōro'a ki a au, 'e pē ira tako'a 'ana e ai rō 'ana te va'ehau ko au te kape o rāua. Mo kī ō'oku e tahi o rāua: “¡Ka oho!”; he oho; 'e mo kī ō'oku ki te rua: “¡Ka oho mai!”; he oho mai; 'e mo uŋa ō'oku i tō'oku tāvini mo aŋa e tahi me'e, he aŋa.

¹⁰ I ŋaro'a era e Ietū i tū me'e era he māere rō atu 'ai, 'e he kī ki te nu'u oho 'i muri i a ia:

—Te parauti'a, kai piri mai 'ana e tahi taŋata o Itaraera haka moe i tō'ona mana'u 'i ruŋa i a au pa he taŋata nei. ¹¹ 'I a au he kī atu: nu'u rahi te nu'u ta'e he [hūrio] o te e'a iŋa 'e o te ŋaro iŋa o te ra'ā ka noho ka kai ena 'i muri i a ['Aparahama], i a Ita'ata 'e i a Hāko-vo 'i te [haka tere iŋa 'āpī o te 'Atua]. ¹² 'E te hūrio, nu'u mau era mo rāua rā haka tere iŋa, he tute ki roto i te pōhāhā, he kona 'i ira te taŋi 'e te 'au-'au ra'a niho.

¹³ I oti era he kī e Ietū ki tū kape rōmano era:

—Ka oho koe ki tu'u hare, 'e ka ai pa he me'e haka moe ena e koe i te mana'u.

'I tū hora mau era 'ana he ora rō 'ai tū tāvini era.

He haka ora iŋa o Ietū i te huŋavai o Pētero

(Marko 1.29-31; Ruka 4.38-39)

¹⁴ He e'a he oho a Ietū ki te hare o Pētero. 'I ira he take'a i te māmā huŋavai o Pētero e moe rō 'ana ko hū 'ā te hakari 'i te māui-ui. ¹⁵ He haka puā e Ietū ki te rima o rā vi'e, he kore rō 'ai tū māui-ui era. He e'a ia ki ruŋa he va'ai hai kai mā Ietū.

He haka ora iŋa o Ietū me'e rahi nu'u māui-ui

(Marko 1.32-34; Ruka 4.40-41)

¹⁶ I pō era he ma'u ki a Ietū me'e rahi nō atu nu'u ko o'o 'ana e te tātane 'e, e tahi nō re'o o Ietū e kī era, he e'a rō 'ai te tātane mai roto. 'E, tako'a, he haka ora i te nu'u māui-ui ta'ato'a.

¹⁷ Te me'e nei i topa ai tano ki te me'e haka 'ite e te perofeta era ko 'Itaia 'i te hora kī: «'Ā'ana mau 'ā i 'amo i te tātou ma'i 'e i te tātou māui-ui».

Te nu'u mo taŋata hāpī 'a Ietū

(Ruka 9.57-62)

¹⁸ I u'i era e Ietū ko putu-putu 'ana te taŋata 'i muri i a ia, he kī ki tā'ana nu'u hāpī mo oho o rāua ki te rua pā'iŋa o te vai. ¹⁹ He haka hāhine ia te taŋata ma'ori e tahi o te haka tere hūrio he kī:

—E te Ma'ori, kona nō ena ō'ou ka oho ena, he oho atu a au 'i muri i a koe mo taŋata hāpī 'ā'au.

²⁰ He pāhono e Ietū:

—Te kurī manu e ai rō 'ana te karava mo noho, te manu he hakapupa, 'e te [Poki o te taŋata] 'ina he kona mo noho.

²¹ E tahi ia o roto o tā'ana nu'u hāpī he kī:

—E Ietū, ka haka rē mai koe ki mate 'e ki tanu a au i tō'oku matu'a tane ana oho iho atu a au 'i muri i a koe.

²² He pāhono e Ietū:

—Ka haka rē mo te nu'u mate e tanu i te rāua nu'u mate; † 'e a koe ka oho mai 'i muri i a au mo taŋata hāpī 'ā'aku.

Te tokerau 'e te pari he ha'atura ki a Ietū

(Marko 4.35-41; Ruka 8.22-25)

²³ He eke ia a Ietū ki ruŋa i te vaka koia ko tā'ana nu'u hāpī. ²⁴ E oho nō 'ā he puhi pūai te tokerau, he ketu te pari 'e he ha'amata he 'ī te vaka e te vai. 'E a Ietū e ha'uru 'ā. ²⁵ He oho e tū nu'u era 'ā'ana he haka 'ara he kī:

—Ī E Ietū, ka hā'ū'ū mai koe! Ī'ī tātou he emu!

²⁶ He pāhono e Ietū:

—Ī He aha rā kōrua e ri'a-ri'a ena, e te nu'u ta'e haka moe riva-riva i te mana'u 'i ruŋa i a au ē?

I kī era i rā me'e, he e'a ki ruŋa, e tahi nō re'o i kī ai ki te tokerau 'e ki te vaikava; he noho te tokerau 'e he māria rō 'ai te vaikava. ²⁷ He māere tū nu'u era 'e he 'ui ki a rāua 'ā:

—Ī Ko ai mau te kope nei? Ī'Ātā te tokerau 'e te pari e ha'atura ki a ia!

E rua kope o Kārara ko o'o 'ā e te tātane

(Marko 5.1-20; Ruka 8.26-39)

²⁸ I tu'u era a Ietū ki te rua pā'īŋa o te vai ki te henua o te kārara, he haka hāhine e rua ŋāŋata ko o'o 'ana e te tātane. Te ŋāŋata nei mai roto i te menemā i e'a ai. 'E, 'i te me'e era ko haka taehae 'ā i a rāua e te tātane, 'ina he vari te taŋata a ira. ²⁹ He ha'amata e te tātane he ohu:

—Ī E te Poki o te 'Atua ē! Ī He aha ta'a me'e haŋa i a mātou? Ī I oho mai ai koe mo tōtōā mai kai tano hia 'ā te hora?

³⁰ E hāhine rō 'ana ki ira me'e rahi oru e kai 'ana.

³¹ He ani ia e te tātane ki a Ietū:

—Mo haka e'a ō'ou i a mātou mai roto i te ŋāŋata nei, ka ha'ati'a mai mo uru ki roto i te ŋā oru era.

³² He kī e Ietū:

—Ka oho ka uru.

He e'a rā ŋā tātane mai roto i tū ŋāŋata era he uru ki roto i te oru. 'I tū hora mau era 'ā he huata a te 'ōpata, he vī-viri ki roto i te vai 'e he mā-mate tahi rō 'ai.

³³ Te nu'u hāpa'o i te oru he e'a he tē-tere. I tu'u era ki te kona taŋata he 'a'amu i tū me'e ta'ato'a topa era ki tū ŋā kope o'o era e te tātane. ³⁴ He paka tahi te nu'u ki te kona era 'i ira a Ietū. I take'a era he ani mo e'a mo oho rō 'ai mai ira.

He haka ora iŋa o Ietū i te taŋata hakari ta'e makenu

(Marko 2.1-12; Ruka 5.17-26)

⁹ I oti era rā me'e, he eke a Ietū ki ruŋa i te vaka he oho ki te rua pā'īŋa o te vai 'e he tu'u ki te kona noho ō'ona. ² 'I ira te nu'u i ma'u ai ki a ia i te taŋata hakari ta'e makenu e moe rō 'ana 'i ruŋa i te raŋo. I take'a era i te rahi o te haka moe iŋa o te mana'u o rā nu'u 'i ruŋa i a ia mo ora o rā māui-ui, he kī e Ietū ki tū taŋata hakari ta'e makenu era: «Ī Kiahio koe, e haŋu ē! Ko haka kore 'ā e au i tu'u hara».

³ Tētahi [ma'ori o te haka tere hūrio] he mana'u: «Te me'e kī era e te kope era vānaŋa ta'e tano mo te 'Atua».

⁴ 'I te 'ite o Ietū i te mana'u o rā nu'u, he 'ui: «Ī He aha kōrua e mana'u rake-rake ena? ⁵ Ki a kōrua, Ī'ata aŋarahi mo haka kore i te hara ki te haka ora i te māui-ui? Ī Ta'e 'ō hai parau nō o te 'Atua te ŋā me'e nei e aŋa ena? ⁶ 'E 'ī he haka take'a atu pē nei ē: i a au i te [Poki o te taŋata] te parau mo haka kore i te hara 'i te ao nei».

He kī ia ki tū taŋata hakari ta'e makenu era: «Ka e'a koe ki ruŋa, ka to'o tu'u raŋo, ka e'a ka oho ki tu'u hare».

⁷ He e'a ki ruŋa tū taŋata hakari ta'e makenu era 'e he oho ki tō'ona hare. ⁸ I take'a era e te nu'u i tū me'e era, he ri'a-ri'a 'e he ha'ahana-hana ki te 'Atua 'o te va'ai i te pūai pē ira ki te taŋata.

He to'o iŋa o Ietū i a Māteo mo taŋata hāpī 'ā'ana

(Marko 2.13-17; Ruka 5.27-32)

⁹ He oho ia a Ietū mai tū kona era, he take'a i te taŋata e tahi te 'īŋoa ko Māteo e noho rō 'ana 'i tō'ona kona aŋa. A ia he kope haka 'auhau i te taŋata hai moni mo te rōmano. He kī: «Ka oho mai koe mo taŋata hāpī 'ā'aku».

He e'a a Māteo he oho 'i muri.

¹⁰ Ko hora atu 'ā e kai 'ana a kuā Ietū 'i te hare o Māteo. Me'e rahi te [nu'u haka 'auhau i te taŋata hai moni mo te rōmano] 'e te tētahi haka 'ou atu nu'u hara i tu'u i kai ananake ko kuā Ietū. ¹¹ I take'a era i rā me'e e te [fariseo], he 'ui ki te nu'u hāpī 'a Ietū:

† Te nu'u mate ra'e ena he nu'u ta'e haka roŋo 'e ta'e haka moe i te mana'u 'i ruŋa i te 'Atua. 'E te rua nu'u mate ena he nu'u mate mau 'ā.

—ĶHe aha te kōrua ma'ori e kai ena ananake ko te nu'u haka 'auhau i te taŋata hai moni mo te rōmano 'e ananake ko te tētahi haka 'ou atu nu'u hara?

¹²I ŋaro'a era e Ietū i rā vānaŋa, he kī:

—Ta'e mo te nu'u ta'e māui-ui te taote, mo te nu'u māui-ui. ¹³Ka haka topa te ha'aaura'a o te vānaŋa nei: «Tā'aku me'e haŋa ta'e he tūtia mai o kōrua, he ai o kōrua he nu'u māhatu 'aroha». Ta'e, pa'i, ki te nu'u ta'e hara a au i oho mai ai, ki te nu'u hara.

He tapu iŋa o te kai

(Marko 2.18-22; Ruka 5.33-39)

¹⁴Te nu'u hāpī 'a Iovani Papatito he haka hāhine ki a Ietū 'e he 'ui:

—A mātou 'e te fariseo e tapu rahi rō 'ā i te kai. ĶHe aha ta'a nu'u hāpī e ta'e tapu ena?

¹⁵He pāhono e Ietū:

—ĶE ta'e koa 'e e ta'e kai mau rō te nu'u 'i te ŋoŋoro hāipo-ipo 'i te hora 'i muri i a rāua te kope ō'ona te hāipo-ipo? Nā, pa'i, e tano rō te hora he to'o i rā kope mai muri i a rāua; 'i rā hora ka tapu iho era.

¹⁶»'Ina e tahi kope hono i te kahu rū'au hai parehe tapa kahu 'āpī; te hono 'āpī he hiki 'e he paihi tū kahu rū'au era 'e he 'ata nui-nui rō atu 'ai te more.

¹⁷»'E 'ina tako'a he ha'a'ī i te vino 'āpī ki roto i te ipu i aŋa hai kiri ko rū'au 'ā. Mo aŋa pē ira he paihi rā ipu, he māu'a te 'ava 'e pē ira tako'a 'ā te ipu. 'O ira, e ha'a'ī te 'ava 'āpī ki roto i te ipu kiri 'āpī 'o māu'a rā ŋā me'e.

He poki 'a Hairo 'e he vi'e māui-ui

(Marko 5.21-43; Ruka 8.40-56)

¹⁸E vānaŋa nō 'ana a Ietū ki te nu'u, he tu'u e tahi taŋata hōnui o te [hūrio], he tū-turi 'i mu'a 'e he kī: «Mate iho nō tā'aku poki vahine; mo oho mai ō'ou mo haka puā i tu'u rima ki a ia, he ora haka 'ou».

¹⁹He e'a a Ietū he oho 'i muri i tū taŋata era ananake ko tā'ana nu'u hāpī.

²⁰E tahi ia vi'e, ka ho'e 'ahuru mā piti matahiti 'ina he noho haka 'ou tō'ona māui-ui vahine, he haka hāhine a tu'a i a Ietū he haka puā ki te titi o te kahu ²¹hai mana'u: mo haka puā nō ō'ona ki te kahu o Ietū, he ora a ia. ²²He hāru i he u'i a Ietū a tu'a, he take'a i rā vi'e 'e he kī: «Ķiahio koe, e vovo ē. He haka moe ō'ou i tu'u mana'u 'i ruŋa i a au i ora ena tu'u māui-ui».

'E mai rā hora he ora rō 'ai rā vi'e.

²³I tu'u era a Ietū ki te hare o tū taŋata hōnui era, he take'a i te nu'u haka taŋi puhī e puhī 'ā i te hīmene pā-paku, 'e i te tētahi nu'u e ki-kiu e taŋi 'ā. ²⁴He kī: «Ka e'a kōrua ka oho mai nei. 'Ina he poki kai mate, e ha'uru 'ā».

He ka-kata te taŋata ²⁵'e i haka e'a nō e Ietū. He uru ki roto i te piha 'i ira rā poki, he 'a-'aru a te rima 'e he e'a rō 'ai rā poki ki ruŋa.

²⁶'I te ta'ato'a nō kona o ira i 'ite ai o ruŋa i tū parau 'āpī era.

He ŋāŋata matapō e rua

²⁷'I e'a era a Ietū mai tū hare era, 'i tu'a i oho ai e rua matapō koia ko oho:

—ĶE Ietū, e te Hakaara o [Tāvita] ē, ka haka 'aroha koe i a māua!

²⁸I tu'u era a Ietū ki te hare ki ira e oho era, he uru ki roto. He haka hāhine tū ŋāŋata era 'e he 'ui e Ietū:

—Ki te kōrua mana'u, Ķi a au te parau mo aŋa i te me'e ena?

—'Ē-ē, e Ietū ē —i pāhono ai.

²⁹He haka puā ia a Ietū i tō'ona rima ki te mata 'e he kī:

—Ka ai pa he me'e haka moe ena e kōrua i te mana'u 'i ruŋa i a au.

³⁰He ora rō 'ai te mata o tū ŋāŋata era. 'E he kī e Ietū:

—E u'i 'o 'ite e te nu'u.

³¹'E, ka ai atu pē ira, te me'e ra'e i aŋa i e'a ai mai rā kona, he 'a'amu a te kona ta'ato'a i tū me'e aŋa era e Ietū.

He taŋata ta'e vānaŋa e tahi

³²Ka e'a ka oho tū ŋāŋata era, ka tu'u tētahi nu'u e ma'u rō 'ā ki a Ietū i te taŋata ko o'o 'ana e te tātane 'e 'ina he vānaŋa haka 'ou. ³³I haka e'a era e Ietū i rā tā-tane, he ha'amata he vānaŋa rā taŋata. Te nu'u ko māere atu 'ā e kī era: «Ķ'Ina kai take'a 'ā ki te hora hope'a i te me'e tu'u pē nei 'i Itaraera!».

³⁴'E he kī e te fariseo: «O te pū'oko haka tere mau 'ā o te tātane i va'ai ki a ia i te mana mo haka e'a i te tā-tane».

Te to'o iŋa i te taŋata mo te 'Atua pa he kato iŋa o te kai

³⁵A te kona ta'ato'a e hāpī e oho era e Ietū 'i roto i te [hare pure hūrio], e haka 'ite 'ā o ruŋa i te roŋo riva-ri-va o te [haka tere iŋa 'āpī o te 'Atua] 'e e haka ora 'ā me'e rahi nō atu huru o te māui-ui. ³⁶I u'i era e Ietū i te taŋata, he haka 'aroha; e tu'u rō 'ana pa he māmoe 'ina he taŋata mo hāpa'o i a rāua, ko rohi-rohi 'ana 'e 'ina he haŋu toe.

³⁷He kī ia ki tā'ana nu'u hāpī: «Te parauti'a, nu'u rahi te nu'u mo to'o mo roto i te haka tere iŋa 'āpī o te 'Atua, pa he kato iŋa o te kai, 'e nu'u ta'e rahi te nu'u o rāua te kato. ³⁸'O ira, ka ani ki te kope 'ā'ana te kai, he 'Atua, mo 'ata uŋa hai nu'u mo kato».

He to'o iŋa o Ietū i te nu'u mo ['āpōtoro]

(Marko 3.13-19; Ruka 6.12-16)

10 He kī e Ietū mo haka hāhine o tā'ana ho'e 'ahuru mā piti nu'u hāpī 'e he va'ai i te parau mo haka e'a i te tātane mai roto i te taŋata 'e mo haka ora huru era huru era o te māui-ui.

² He 'īŋoa nei o rā ŋā 'āpōtoro: te ra'e ko Tīmona, e kī tako'a era ko Pētero; he taina ō'ona, ko Antarea; ko [Tanatiako] 'e ko [Iovani], he ŋā poki 'a Tevereō; ³ ko Feripe, ko Torometi, ko Tōmā, ko Māteo, kope haka 'auhau i te taŋata hai moni mo te rōmano; ko Tanatiako, poki 'a Arafeo; ko Tāreo, ⁴ ko Tīmona, kope o roto i te nūna'a taŋata he [kananeo], 'e ko Hura Ikariote, ho'o era i a Ietū.

He uŋa iŋa o Ietū i te 'āpōtoro

(Marko 6.7-13; Ruka 9.1-6)

⁵ He uŋa ia e Ietū i te nu'u nei e ho'e 'ahuru mā piti koia ko kī:

«'Ina kōrua ko oho ki te kona noho o te nu'u ta'e he hūrio 'e ki te kona ta'ato'a o te tāmāria. ⁶ Ki te tātou taŋata he itaraera a kōrua ana oho. A rāua, pa'i, pa he māmoē ŋaro mai muri i te kope 'ā'ana te hāpa'o.

⁷ »Ka oho ka haka 'ite: "Te [haka tere iŋa 'āpī o te 'Atua] nā ko hāhine mai 'ā".

⁸ »Ka haka ora te nu'u māui-ui, ka haka ora te nu'u mate, ka haka ora te nu'u rēpera, ka haka e'a te tātane mai roto i te taŋata. Te mana ai i a kōrua, ta'e i 'auhau; 'o ira, 'ina tako'a ko haka 'auhau i te taŋata 'o te kōrua me'e mo aŋa.

⁹ »'Ina ko ma'u te moni ¹⁰ 'e te pūtē 'i roto te me'e mo te ara. 'Ina ko ma'u te kahu 'e te kiriva'e mo mono 'e 'ina ko ma'u te toko-toko. Te taŋata aŋa, pa'i, e hāpa'o rō 'ā.

¹¹ »E tu'u 'ana kōrua ki te kona nūna'a hare e tahi, e kimi hai kope riva haŋa mo to'o i a kōrua ki tō'ona hare, 'e 'i rā hare kōrua ana noho 'ātā ka oho rō mai ira. ¹² Ka uru ena kōrua ki roto i te hare, e 'aroha ki te nu'u noho o ira pē nei ē: "Ka ai 'i ruŋa i a kōrua te haumārū o te 'Atua". ¹³ Mo hāpa'o riva-riva atu te nu'u o rā hare, he tano te kōrua 'aroha; 'e mo ta'e ai pē ira, e ko ai 'i ruŋa i a rāua te haumārū o te 'Atua.

¹⁴ »'E mo ta'e haŋa mo to'o i a kōrua ki te rāua hare 'e mo ta'e haka roŋo atu i te kōrua vānaŋa, ka e'a mai rā hare 'o mai te kona era 'i ira a kōrua 'e 'ai ka tū-tū rō te puŋa'ehu mai ruŋa i te kōrua va'e mo haka 'ite ki te nu'u o rā kona: ka topa era 'i ruŋa i a rāua te ūtu'a o te 'Atua, he hape o rāua mau 'ā. ¹⁵ 'I a au he kī atu: 'i te mahana o te ture hope'a, te ūtu'a mo te nu'u o rā kona 'ata hau rō atu ki te ūtu'a topa 'i ruŋa i te nu'u hara o [Tōroma] 'e o [Kōmora].

E tōtōā rō i te nu'u aŋa ki te 'Atua

¹⁶ »He uŋa a au i a kōrua pa he māmoē ki vāeŋa o te paiheŋa taehae. E ai kōrua nu'u mārama-rama 'ite mo hāpa'o 'o topa atu te 'ati. E ai tako'a kōrua he nu'u

māŋaro pa he pāroma, ta'e aŋa i te me'e ta'e tano ki te rua.

¹⁷ »E u'i kōrua e hāpa'o. E va'ai rō, pa'i, i a kōrua ki te rima o te nu'u ra-rahi 'e he tiŋa'i atu 'i roto i te [hare pure hūrio]. ¹⁸ 'E 'ātā he ma'u i a kōrua ki mu'a o te suerekao 'e o te 'ariki 'o te ai o kōrua 'ā'aku. Pē ira ka haka 'ite ena kōrua o ruŋa i a au 'i mu'a o rā nu'u 'e o te tētahi nu'u ta'e he hūrio.

¹⁹ »'I te hora va'ai i a kōrua ki te nu'u ra-rahi, 'ina ko mana'u rahi he aha te me'e mo vānaŋa 'e pē hē kōrua ka kī ena. Ka tu'u ena te hora mo vānaŋa, mo te 'Atua e va'ai atu i te vānaŋa mo kī. ²⁰ 'I rā hora, ta'e hai mana'u o kōrua ka vānaŋa era, mo te [Vārua Maitai] o tu'u Matu'a e haka vānaŋa i a kōrua.

²¹ »'I rā ŋā mahana, te taina he va'ai i tō'ona taina ki te mate, 'e te matu'a i tā'ana poki; 'e te ŋā poki he haka 'āriŋa 'e he va'ai tako'a i te rāua matu'a ki te mate. ²² Te nu'u o te henua ta'ato'a e riri taparahi-ta'ata rō 'o te ai o kōrua 'ā'aku. 'E te kope haka noho i tō'ona mana'u 'i ruŋa i a au 'ātā ki te hora hope'a he rava'a i te ora 'āpī 'ina he hope'a ra'a va'ai e te 'Atua.

²³ »Mo tute mo tōtōā atu i a kōrua 'i te kona nūna'a hare e tahi, ka tere ki te rua. 'I a au he kī atu: te [Poki o te taŋata] 'i ra'e ka hoki mai ena ki te oti o te kōrua aŋa 'i te kona ta'ato'a o Itaraera.

²⁴ »Te kope e hāpī 'ā ta'e 'ata hau ki tō'ona ma'ori hāpī, 'e te tāvini ta'e 'ata hau ki te taŋata haka aŋa i a ia. ²⁵ Te me'e topa ki te ma'ori hāpī e ko ta'e topa tako'a ki tā'ana nu'u hāpī, 'e te me'e topa ki te taŋata 'ā'ana te haka aŋa e ko ta'e topa tako'a ki tō'ona tāvini. Mo kī mai e te nu'u ki a au ko [Veresepupa], pē ira tako'a 'ā ka kī atu ena ki a kōrua ki tā'aku nu'u hāpī.

I te 'Atua mau nō te parau

(Ruka 12.2-7)

²⁶ »'Ina kōrua ko ri'a-ri'a 'i te taŋata. Te me'e na'a 'e ta'e haka 'ite e te 'Atua 'i mu'a 'ā o ruŋa i tō'ona haka tere iŋa 'āpī e haka 'ite 'e e haka aŋi-aŋi rō. ²⁷ 'O ira, te me'e kī atu e au ki a kōrua nō ka 'a'amu ki te nu'u ta'ato'a; 'e te me'e kī koro'iti atu e au ka tātara ka haka 'ite ki te nu'u ta'ato'a. ²⁸ 'Ina kōrua ko ri'a-ri'a 'i te nu'u he hakari nō te me'e o rāua mo rava'a mo tiŋa'i mo haka mate, ta'e he vārua o kōrua; ka ri'a-ri'a 'i te 'Atua, he kope i a ia te parau mo hoa i te hakari ararua ko te vārua ki roto i te pō'auahi.

²⁹ »Ko 'ite 'ana e kōrua e ho'o rō 'ā e rua manu riki-riki hai tara 'aurī ta'e hauha'a rahi. Ka ai atu pē ira, 'ina e ko mate korohaŋa e tahi mo ta'e ai ko ha'ati'a hia 'ā e te kōrua Matu'a o te raŋi. ³⁰ 'E a kōrua ta'ato'a mau ena 'ā, 'ātā ki te kōrua rau'oho pū'oko i tatakū tahi ai e ia. ³¹ 'O ira, 'ina ko ri'a-ri'a; a kōrua mo te 'Atua 'ata hau rō atu 'i te hauha'a ki te manu.

Te haŋa 'e te ta'e haŋa ki a Ietū

(Ruka 12.8-9)

³² »Mo kī e tahi kope 'i mu'a o te taŋata e haŋa rō mai 'ana a ia ki a au, pē ira tako'a 'ana ka kī ena e au mō'ona 'i mu'a o tō'oku Matu'a 'i te raŋi. ³³ 'E te kope

kī 'i mu'a o te taŋata 'ina he haŋa mai a ia ki a au, pē ira tako'a 'ana a au ka kī ena mō'ona 'i mu'a o tō'oku Matu'a 'i te raŋi.

Hai Ietū e ha'ata'a ena te taŋata

(Ruka 12.51-53; 14.26-27)

³⁴ »Ina kōrua ko mana'u i oho mai nei a au e ma'u mai 'ana i te haumārū ki ruŋa i te henua; hai tu'u mai, pa'i, ō'oku, ka moto ena te taŋata. ³⁵ 'I tō'oku tu'u mai he riri te poki tane ki tō'ona matu'a tane, te poki vahine ki tō'ona matu'a vahine 'e te hunoŋa vahine ki tō'ona māmā huŋava'i. ³⁶ Pē ira te nu'u ta'e haŋa mai ka 'enemī ena mo te nu'u [haka moe i te mana'u] 'i ruŋa i a au, ka ai atu rā nu'u he hua'ai mau 'ā o rāua.

³⁷ »Mo ai o te kope 'ata hau rō atu te haŋa ki tō'ona matu'a tane, ki tō'ona matu'a vahine 'o ki tā'ana ŋā poki ki te haŋa mai ki a au, e ko tano mo taŋata hāpī 'ā'aku. ³⁸ 'E te kope ta'e haŋa mo 'amo i tō'ona tātau-rō, te aura'a, mo va'ai i a ia 'ātā mo mate mo aŋa i tā'aku me'e haŋa, e ko tano tako'a mo taŋata hāpī 'ā'aku. ³⁹ Te kope hāru'i i a au 'e i tā'aku hāpī hai tua'ivi mo hāpa'o i a ia 'o mate 'e mo aŋa i tā'ana me'e nō era i haŋa e ko ai i a ia te ora 'āpī 'ina he hope'a ra'a va'ai e te 'Atua. 'E te kope haka rē i tā'ana me'e haŋa mo ha'atura mai ki a au he rava'a e ia i rā ora.

Te me'e mo haka koa

(Marko 9.41)

⁴⁰ »Te kope to'o hāpa'o i a kōrua e to'o 'ā i a au; 'e te kope to'o i a au e to'o 'ana i te kope uŋa mai i a au.

⁴¹ »Te kope to'o hāpa'o i te perofeta 'o te ai he perofeta, he va'ai ki a ia i te me'e mo koa pa he me'e haka koa va'ai ki te perofeta.

»'E te kope to'o hāpa'o i te taŋata mo'a 'e ha'atura ki te 'Atua 'o te ai he taŋata mo'a 'e ha'atura ki te 'Atua, he va'ai ki a ia te me'e mo koa pa he me'e haka koa va'ai ki te kope mo'a 'e ha'atura ki te 'Atua.

⁴² »'I a au he ki atu: te taŋata va'ai ka ai atu he hapa'ina vai mau nō ki te kope e tahi o roto o tā'aku nu'u hāpī 'o te ai o rā kope 'ā'aku, pe mu'a ka oho ena e ko ta'e va'ai e te 'Atua ki rā taŋata hai me'e mo haka koa».

11 I oti era a Ietū te uŋa 'e te kī i te me'e mo aŋa e tū ho'e 'ahuru mā piti nu'u hāpī era 'ā'ana, he oho he hāpī 'e he haka 'ite i te [rono riva-riva o te 'Atua] 'i te kona ta'ato'a o ira.

Ko Iovani Papatito 'e ko Ietū

(Ruka 7.18-35)

² E puru rō 'ā a Iovani 'i roto i te hare ma'u'aurī i 'ite ai o ruŋa i te me'e aŋa e te [Kiritō]. He uŋa ia i tā'ana nu'u hāpī ³ mo 'ui ki a Ietū hoki ko ia mau 'ā te Kiritō, he kope era mo tu'u māi, 'o e tiaki nō ki te rua.

⁴ He kī e Ietū: «Ka oho ka kī ki a Iovani i te me'e take'a 'e ŋaro'a e kōrua. ⁵ Ka 'a'amu:

“Ko mā'eha 'ā te mata o te nu'u matapō;

ko ha'ere 'ana te nu'u va'e koke.

Ko ora 'ā te nu'u māui-ui 'i te rēpera; ko ŋaro'a 'ana te vānaŋa e te tariŋa pō.

Ko ora 'ā te nu'u mai te mate, 'e ko haka 'ite 'ā i te ronō riva-riva o te 'Atua ki te nu'u veve”.

⁶ »'E, ko te koa i te taŋata ta'e haka tapa i tō'ona haka moe iŋa i te mana'u mai ruŋa i a au!».

⁷ I hoki era tū nu'u uŋa era e Iovani, he ha'amata a Ietū he vānaŋa ki te nu'u o ruŋa i a Iovani Papatito, he kī:

«Hora oho u'i era o kōrua i te kope tātara 'i te kona 'one ta'e noho e te taŋata, ūpē hē te huru o rā kope i mana'u ai e kōrua? ūHe taŋata ta'e tī-tika o te mana'u, haka rē i a ia mo haka tere e te rua pa he 'ohe e ue-ue ena e te tokerau? ⁸ 'E mo ta'e ai pē ira, ūpē hē? ūHe taŋata uru i te kahu hope'a o te riva-riva? Ko 'ite 'ana, pa'i, e kōrua: te nu'u uru i te kahu hope'a o te riva-riva 'i te hare o te 'ariki. ⁹ I hope'a ai, ūhe aha tū taŋata oho u'i era e kōrua? ūHe perofeta? He aŋi 'ā, he perofeta; 'e, tako'a, 'ata hau atu ki te perofeta. ¹⁰ Ko ia te ma'uroŋo kī era e te 'Atua ki tā'ana Poki 'i ruŋa i te [Pāpa'i Mo'a] pē nei ē:

“He uŋa a au i te taŋata ma'uroŋo 'i ra'e ki a koe mo haka riva-riva i te ara mō'ou”.

¹¹ He kī haka 'ou e Ietū:

«'Ina e tahi taŋata o roto i te taŋata ta'ato'a 'ata hōnu'i ki a Iovani; 'e, ka ai atu pē ira, te taŋata haka rē i a ia mo haka tere e te 'Atua i hau rō atu ki a Iovani, ka ai atu he taŋata hauha'a-'ore ki te mata o te taŋata.

¹² »Mai te hora ha'amata o Iovani i te tātara 'e i te [papatito] ki 'aŋarīnā, pe te 'ata rahi nō te nu'u o'o ki roto i te [haka tere iŋa 'āpī o te 'Atua], ka ai atu e ai rō 'ana te nu'u taparahi-ta'ata aŋa mo haka kore i rā haka tere iŋa. ¹³ Te me'e pāpa'i e [Mōtē] 'e e te perofeta ta'ato'a 'i ruŋa i te Pāpa'i Mo'a e haka 'ite māi 'ā, 'ātā ki te tu'u iŋa mai o Iovani, o ruŋa i te kope mo oho mai, he [Kiritō]. ¹⁴ 'E te parauti'a, a Iovani ko te perofeta era ko [Ēria] mo tu'u mai 'i ra'e ki te Kiritō. ¹⁵ Te nu'u haŋa mo aŋi-aŋi ka haka topa te mana'u.

¹⁶ »'I a au he ha'aura'a atu i te huru o te tētahi taŋata o te hora nei. A rāua pa he ŋā poki ko-kori 'i te kona e tahi. He oho e te tētahi o rā ŋā poki ki te tētahi atu o rāua pē nei ē:

¹⁷ “Ko haka taŋi atu 'ana a mātou i te peho reka, 'ina a kōrua he 'ori.

Ko hīmene atu 'ana a mātou i te hīmene haka 'aroha, 'ina tako'a a kōrua kai ta-taŋi”.

¹⁸ »Te aura'a: ko tu'u mai 'ana a Iovani Papatito e tapu rō 'ana i te kai 'e 'ina he unu i te 'ava; i kī ai e kōrua ko

o'o 'ana e te tātane. ¹⁹ He tu'u mai ia te [Poki o te taŋata], e kai rō 'ana 'e e unu rō 'ā; he kī e kōrua i te rava kai 'e i te rava unu, 'e he repahoa o te nu'u hara 'e o te [nu'u haka 'auhau i te taŋata hai moni mo te rōmano]. Ka ai atu pē ira, te haka tere iŋa hai mana'u o te 'Atua e take'a ena he me'e tano hai nu'u haka tere i a rāua pa he me'e haŋa 'ā'ana».

He ture iŋa o Ietū

(Ruka 10.13-15)

²⁰ He ha'amata a Ietū he ture ki te nu'u o te kona aŋa e ia i te rahi ra'a o te mana 'o te ta'e huri o te mana'u ki ruŋa i te 'Atua. Pē nei i kī ai ki rā nŋa kona:

²¹ «ĶKo te 'aroha i a kōrua, e Koratini 'e e Vetetaira ē! 'Āhani 'i Tiro 'e 'i Tīrone i aŋa ai i te mana aŋa atu ki a kōrua, ko [huri nō era 'ana te nu'u o ira i te rāua mana'u ki te 'Atua] 'e ko haka take'a nō mai era 'ā hai uru i te kahu aŋa hai pūtē tore 'e hai pī-pī i te 'eo-'eo a ruŋa i te rāua pū'oko. ²² 'Ī ia a au he kī atu: 'i te mahana o te ture hope'a o te 'Atua, te ūtu'a mo kōrua 'ata hau rō atu ki te ūtu'a mo te nu'u o Tiro 'e o Tīrone.

²³ »E a koe, e Kaperenāū ē, ŋe mana'u ena koe pē nei ē: e ma'u rō i a koe ki te raŋi? ĶKi raro nui era o te pō'auahi ka ava ena i a koe! 'Āhani ki te nu'u o [Tōroma] i aŋa ai i te mana aŋa atu ki a koe, ko te ai iŋa 'ā te kona era 'ātā ki te hora nei. ²⁴ 'Ī ia a au he kī atu: 'i te mahana o te ture hope'a, te ūtu'a mō'ou 'ata hau rō atu ki te ūtu'a topa ki te nu'u o Tōroma».

He Poki mau nō te me'e i 'ite ko ai te Matu'a

(Ruka 10.21-22)

²⁵ 'I rā hora i pure i kī ai e Ietū:

«He ha'ahana-hana atu a au ki a koe, e Koro, e te 'Atua o te raŋi 'e o te henua ē, 'o te ta'e haka take'a ō'ou i ta'a me'e na'a ki te nu'u mana'u ko rāua mau nō te nu'u 'ite 'e mārama-rama, 'e ki te nu'u pa he nŋa poki a koe i haka take'a ai. ²⁶ 'Ē-ē, pē ira mau 'ā a koe i haŋa ai, e Koro ē».

²⁷ He kī ia e Ietū ki te nu'u:

«Ko va'ai tahi mai 'ana te me'e ta'ato'a e tō'oku Matu'a. 'Ina e tahi taŋata i 'ite ko ai te Poki, he Matu'a mau nō; 'e 'ina e tahi taŋata i 'ite ko ai te Matu'a, he Poki 'e he nu'u haŋa mau nō e te Poki mo haka 'ite.

²⁸ »Te nu'u ta'ato'a rohi-rohi 'o te 'amo i te me'e paŋaha'a e oho mai ki a au; mā'aku e haka kore i te rohi-rohi. ²⁹ E aŋa tā'aku me'e kī atu 'e e riro kōrua he nu'u hāpī 'ā'aku. A au, pa'i, he kope riva, ta'e riri-riri tahaŋa 'e ta'e mana'u i hau rō atu ki te rua. Pē ira he ŋaro'a e kōrua te ora. ³⁰ He me'e ta'e paŋaha'a te me'e haŋa 'ā'aku mo aŋa e kōrua pa he nu'u hāpī 'ā'aku».

He mo-more iŋa i te tariko 'i te [mahana haka ora]

(Marko 2.23-28; Ruka 6.1-5)

12 'I te mahana haka ora e tahi, e oho nō 'ā a kuā Ietū a te kona 'oka kai, he maruaki tā'ana nu'u hāpī 'e he ha'amata he more-more i te tariko he kai. ² He take'a e te nu'u [fariseo] 'e he kī ki a Ietū:

—Ka u'i ta'a nu'u hāpī; e aŋa 'ana i te me'e ta'e ha'ati'a mo aŋa 'i te mahana haka ora.

³ He pāhono e Ietū:

—ĶKai tai'o 'ana 'ō kōrua i te me'e aŋa e [Tāvita] 'i te hora maruaki ō'ona ananake ko te nu'u oho 'i muri i a ia? ⁴ I uru nō ki roto i te Kona Ha'amuri 'Atua, he kai i te haraoa e tapu rō 'ā, he haraoa ta'e ha'ati'a mo kai e rāua, mo te [oromatu'a] mau nō. ⁵ 'E ŋta'e 'ō ko tai'o 'ana a kōrua 'i ruŋa i te [haka tere iŋa 'a Mōtē]: 'ina te oromatu'a he haka ora mai te rāua aŋa o roto i te [Kona Ha'amuri 'Atua] 'i te mahana haka ora 'e, ka ai atu pē ira, 'ina he hara? ⁶ 'Ī a au he kī atu: 'i nei te me'e 'ata hau rō atu 'i te hauha'a ki te Kona Ha'amuri 'Atua. ⁷ A kōrua kai aŋi-aŋi 'ā i te ha'aaura'a o te vānaŋa nei o te 'Atua: «Tā'aku me'e haŋa ta'e he tūtia o kōrua, he ai o kōrua nu'u māhatu 'aroha». 'Āhani i aŋi-aŋi e kōrua, e ko kī e hape rō 'ā te nu'u 'ina kai aŋa hia i te me'e ta'e tano. ⁸ 'Ī a au he kī atu: i a au i te [Poki o te taŋata] te parau o te mahana haka ora mo kī i te me'e ha'ati'a 'e i te me'e ta'e ha'ati'a mo aŋa.

He haka ora iŋa o Ietū i te taŋata rima rehe-rehe

(Marko 3.1-6; Ruka 6.6-11)

⁹ He oho a Ietū mai rā kona 'oka tariko era 'e he uru ki roto i te hare pure o ira. ¹⁰ 'I roto e tahi taŋata rima rehe-rehe. 'I roto tako'a te nu'u e u'i 'ā i te 'ōtohe mo tuhi i te hape o Ietū, he 'ui:

—E Ietū, ŋe ha'ati'a rō 'ana mo haka ora i te taŋata māui-ui 'i te mahana haka ora?

¹¹ He pāhono e Ietū:

—ĶKo ai o kōrua, mo viri o tā'ana māmoē ki roto i te pū 'i te mahana haka ora, e ko oho e ko to'o? ¹² 'E te taŋata 'ata hauha'a rō atu ki te māmoē. 'O ira 'i te mahana haka ora e ha'ati'a rō 'ā mo aŋa i te me'e riva-riva.

¹³ He kī ia ki tū taŋata rima rehe-rehe era: «Ka haka toro mai tu'u rima». He haka toro i tū rima era ō'ona 'e he ora rō 'ai pa he rua rima. ¹⁴ I e'a era tū nu'u fariseo era, he ha'amata he u'i i te rāve'a mo tiŋa'i mo haka mate i a Ietū.

He haka tano iŋa i te me'e kī e te perofeta

¹⁵ 'I te era a Ietū, he e'a he oho mai tū kona era, 'e me'e rahi nu'u i oho 'i muri. He haka ora i te nu'u ta'ato'a māui-ui, ¹⁶ 'e he kī mo ta'e vānaŋa o ruŋa i a ia 'i te

kona taŋata. ¹⁷ Pē nei i tano ai te me'e haka 'ite e te perofeta era ko 'Itaia 'i te hora kī pē nei ē:

¹⁸ «'I tō'oku tāvini ha'ata'a e au, kope haŋa rahi 'ā'aku, 'i ruŋa i a ia tō'oku koa. Ki a ia ka va'ai nei e au i tō'oku Vārua, 'e he haka 'ite e ia ki te taŋata o te ao pē hē a rāua ana tano ki tō'oku mata.

¹⁹ E ko tātake a ia 'e e ko ohu-ohu; e ko ŋaro'a e te nu'u i tō'ona pōŋeha iŋa 'i te ara.

²⁰ E ko riri ki te nu'u ta'e haka moe rahi i te mana'u 'i ruŋa i a ia,

'e e ko riri ki te nu'u 'aka-'aka o te mana'u.

E aŋa e oho nō 'ātā ka haka tano tahi rō i te me'e haŋa 'ā'aku.

²¹ 'E te nu'u o te henua ta'ato'a he ŋatu te haŋu 'i ruŋa i a ia».

Te mana o Ietū e kī era o [Veresepupa]

(Marko 3.20-30; Ruka 11.14-23; 12.10)

²² He ma'u ia ki a Ietū i te taŋata ko keva 'ā te mata 'e 'ina he vānaŋa 'i te o'o e te tātane, 'e he haka ora e Ietū. ²³ Te nu'u ta'ato'a he māere he 'ui ki a rāua 'ā: «¿Ko te Hakaara era hō rā o Tāvita?».

²⁴ I ŋaro'a era e te fariseo, he kī: «'A Veresepupa, pū'oko o te tātane, i va'ai ki a ia i te mana mo haka e'a mai roto i te taŋata i te tātane».

²⁵ 'I te 'ite o Ietū i te me'e mana'u e te fariseo, he kī:

«Te henua tama'i ki a rāua 'ā e tōtōā 'ana i a rāua 'ā; te nu'u o te kona nūna'a hare 'e te hua'ai moto ki a rāua 'ā e ko roa he ha'ata'a. ²⁶ Pē ira tako'a, mo haka e'a e Rukifero i a ia mau 'ana, e ha'ata'a 'ana i a ia 'ā, 'e te pūai o tō'ona haka tere iŋa he ŋaro. ²⁷ A kōrua e kī ena e haka e'a nei a au i te tātane hai pūai o Veresepupa; 'e mo aŋa ia o'oku pē ira, ¿'a 'ai te va'ai i te pūai ki te nu'u hāpī o kōrua mo haka e'a i te tātane mai roto i te taŋata? E take'a ena te hape o te kōrua mana'u hai me'e aŋa e te kōrua nu'u hāpī. ²⁸ 'E mo haka e'a o'oku i te tātane mai roto i te taŋata hai pūai o te [Vārua Maitai], ko tu'u mai 'ana ia te [haka tere iŋa 'āpī o te 'Atua] ki a kōrua.

²⁹ »¿Pē hē te kope e tahi ana uru ana to'o i te me'e o roto i te hare o te 'aito, mo ta'e here-here 'i ra'e i rā 'aito? Pē ira mau nō, pa'i, ana rava'a i te me'e o roto i rā hare.

³⁰ »Te kope ta'e pe'e mai 'ina he haŋa mai; 'e te kope ta'e hā'ū'ū mai mo haka taka-taka i te taŋata mo te 'Atua e haka mira-mira 'ā i tā'aku aŋa.

³¹ »'O ira, 'I a au he kī atu: te 'Atua e haka kore nō i te hara ta'ato'a 'e i te me'e ta'e tano kī e te taŋata. 'E te hara mau nō mo ta'e haka kore e ia: he kī i te vānaŋa ta'e tano mo te Vārua Maitai. ³² Te 'Atua, pa'i, e haka kore nō 'ātā i te hara o te taŋata kī i te vānaŋa ta'e tano mo te Poki o te taŋata; 'e, te kope kī i te vānaŋa ta'e tano mo te Vārua Maitai, e ko haka kore e te 'Atua i tō'ona hara 'i te ao nei 'e 'i te ao ka tu'u mai ena.

Te tumu e aŋi-aŋi ena hai hua iŋa o'ona

(Ruka 6.43-45)

³³ »Mo riva-riva o te tumu, he hua te me'e riva-riva; 'e mo rake-rake, me'e rake-rake. Te huru o te tumu e aŋi-aŋi ena hai huru o tā'ana me'e hua. ³⁴ ;E te hua'ai o te kōreha veneno ē! ¿Pē hē kōrua, te nu'u aŋa i te me'e ta'e tano, ana kī i te me'e riva-riva? Hai me'e rahi o roto i te māhatu, te haha e vānaŋa ena. ³⁵ Te taŋata riva he me'e riva-riva te me'e kī, he mana'u riva-riva tō'ona; 'e te taŋata aŋa i te me'e ta'e tano he me'e ta'e tano te me'e kī, he mana'u rake-rake tō'ona. ³⁶ 'I a au he kī atu: 'i te mahana o te ture hope'a, e tahi e tahi ka kī ena ki te 'Atua i te tumu o tā'ana vānaŋa ta'e tano kī. ³⁷ Hai ta'a vānaŋa mau 'ā ka ture atu ena pē nei ē: ko hape 'ana koe 'o 'ina koe kai hape».

He ani iŋa ki a Ietū mo haka take'a i te mana

(Marko 8.12; Ruka 11.29-32)

³⁸ Tētahi o te nu'u fariseo 'e o te nu'u [ma'ori o te haka tere hūrio] he kī ki a Ietū:

—E te Ma'ori, e haŋa rō 'ana a mātou mo take'a i te aŋa iŋa o'ou i te mana.

³⁹ He kī a Ietū:

—A kōrua, te nu'u mana'u ta'e tano haka tapa mai te ara parauti'a o te 'Atua e haŋa 'ā mo aŋa o'oku i te mana; 'e te me'e mau nō mo take'a e kōrua he tāpa'o tu'u pa he me'e topa ki te perofeta era ko [Hōnā]. ⁴⁰ Pa he noho iŋa e toru mahana o Hōnā 'i roto i te ika nui-nui, pē ira tako'a te Poki o te taŋata ka noho ena e toru mahana 'i te kona muraki i a ia. ⁴¹ 'I te mahana o te ture hope'a, hora ture i te nu'u ta'ato'a, he e'a te nu'u o Nīnive, 'e hai rāua ka take'a ena te hape o te nu'u o te hora nei. Te nu'u o ira, pa'i, i ŋaro'a era i te vānaŋa 'a Hōnā, he haka moe tahi i te mana'u 'i ruŋa i te 'Atua. 'E 'i te kona nei te kope 'ata hau ki a Hōnā.

⁴² »Pē ira tako'a te 'ariki vahine o Tāvā ka e'a ena 'i te mahana o te haka ūtu'a 'e hai ia ka take'a ena te hape o kōrua; i oho nō mai, pa'i, mai te henua hope'a o te roa mo haka roŋo i te vānaŋa mārama-rama o te 'ariki era ko [Toromono]. 'E 'i te kona nei te kope 'ata hau ki a Toromono.

Te hoki iŋa o te tātane ki roto i te taŋata

(Ruka 11.24-26)

⁴³ »Te tātane e haka e'a ena mai roto i te taŋata he oho he kimi a te kona 'one ta'e noho taŋata hai kona mo haka ora; 'e mo ta'e rava'a, ⁴⁴ he mana'u: "'I a au he hoki ki te hare mai ira a au i haka e'a mai ai".

»Ka hoki era he take'a i rā taŋata pa he hare 'ina he nu'u noho o ira ko purumu ko haka riva-riva 'ana. ⁴⁵ He oho rā tātane he tari ki ira e hitu tātane 'ata hau 'i te taparahi-ta'ata ki a ia, he uru he noho tahi 'i roto i tū taŋata era, 'e he 'ata 'ati rā taŋata ki te hora ra'e era.

Pē ira ka topa tako'a ena ki te nu'u o te hora nei, he nu'u aŋa i te me'e ta'e tano.

He matu'a vahine 'e he taina o Ietū

(Marko 3.31-35; Ruka 8.19-21)

⁴⁶ E vānaŋa nō 'ā a Ietū ki te nu'u, he tu'u tō'ona matu'a vahine 'e te n̄ā taina ō'ona, e haŋa 'ā mo vānaŋa ki a ia. 'E, 'i te noho 'i haho o te hare, ⁴⁷ he oho e te kope e tahi he kī ki a Ietū:

—'Ai haho tu'u matu'a vahine ananake ko tu'u n̄ā poki taina e haŋa 'ā mo vānaŋa atu ki a koe.

⁴⁸ He kī e Ietū:

—ĶKo 'ite 'ana a kōrua ko ai te nu'u he matu'a vahine 'e he taina tako'a ō'oku?

⁴⁹ He tuhi ia hai rima ki tā'ana nu'u hāpī 'e he kī:

—Ko rāua tako'a tō'oku matu'a vahine 'e tō'oku taina. ⁵⁰ Te nu'u aŋa, pa'i, i te me'e haŋa o tō'oku Matu'a o te raŋi he hua'ai tako'a ō'oku.

He 'a'amu ha'aaura'a o te taŋata 'oka kai e tahi

(Marko 4.1-9; Ruka 8.4-8)

13 'I rā mahana mau 'ā, he e'a a Ietū mai te hare noho o rāua he oho he noho 'i te taha-taha o te vai. ² 'I te rahi o te taŋata e taka-taka era, he eke a Ietū he noho 'i ruŋa i te vaka, 'ai ka hāpī i te nu'u o 'uta. ³ Me'e rahi te me'e e hāpī era e Ietū hai 'a'amu ha'aaura'a, 'e he kī:

«He taŋata e tahi e 'oka 'ā i tā'ana kai. ⁴ I pī i oho era i te karu, he vī-viri te tētahi a te ara; he tu'u e te manu he kai.

⁵ »Tētahi karu i marere a te kona papa 'ō'one ta'e rahi 'e kai roa i tupu ai. ⁶ 'I te ta'e hio-hio o te aka 'e 'i te pūai o te ra'ā, he paka-paka.

⁷ »I ai rō te karu i marere a te kona mauku pū-pū. 'I te taiko o rā n̄ā mauku, he 'api i te karu tupu he vavau 'e 'ina kai hua.

⁸ »I ai tako'a rō te karu i marere a te kona 'ō'one riva-riva. I tupu era he taiko. Mai rā n̄ā karu i hua 'e i puŋa ai e ho'e hānere, e ono 'ahuru 'e e toru 'ahuru karu mai te karu nō e tahi.

⁹ »Te nu'u haŋa mo aŋi-aŋi ka haka topa te mana'u».

He aha a Ietū e hāpī era hai 'a'amu ha'aaura'a

(Marko 4.10-12; Ruka 8.9-10)

¹⁰ He haka hāhine ia ki a Ietū te nu'u hāpī 'ā'ana 'e he 'ui he aha e vānaŋa era ki te nu'u hai 'a'amu ha'aaura'a. ¹¹ He pāhono e Ietū:

«Kī a kōrua te 'Atua e haka 'ite atu ena i te me'e ta'e 'ite e te taŋata o ruŋa o te haka tere iŋa 'āpī 'ā'ana, 'e ki a rāua 'ina he haka 'ite. ¹² Te kope aŋi-aŋi 'e to'o mō'ona i te parauti'a o te 'Atua he haka 'ata aŋi-aŋi. 'E te kope 'ina he to'o i rā me'e mō'ona, 'ātā ki te me'e 'i-

ti-'iti 'ite e ia o ruŋa i te 'Atua ka to'o ena. ¹³ 'O ira a au e vānaŋa nei ki te nu'u hai 'a'amu ha'aaura'a; e u'i rō 'ā a rāua 'e 'ina he take'a; e haka roŋo rō 'ana 'e 'ina he aŋi-aŋi. ¹⁴ 'I ruŋa i a rāua he tano te me'e kī e te perofeta era ko 'Itaia:

“Ka rahi atu te haka roŋo, e ko aŋi-aŋi, ka rahi atu te u'i iŋa, e ko take'a.

¹⁵ Te mana'u, pa'i, o te nu'u nei ko mira-mira 'ā, ko puru 'ana te tariŋa, 'e ko puru 'ā te mata, 'o ŋaro'a 'e 'o take'a, 'o aŋi-aŋi, 'o huri te mana'u ki ruŋa i a au, 'o haka kore e au i te rāua hara”.

¹⁶ »'E, ko te koa i a kōrua 'o te ai te kōrua mata e take'a rō 'ā, 'e te kōrua tariŋa e ŋaro'a rō 'ā. ¹⁷ 'I a au he kī atu: me'e rahi perofeta 'e me'e rahi taŋata tano ki te mata o te 'Atua i haŋa rō mo take'a i te me'e take'a e kōrua, 'e 'ina kai take'a, 'e i haŋa rō mo ŋaro'a i te me'e ŋaro'a e kōrua, 'e 'ina e rāua kai ŋaro'a.

He haka 'ite iŋa o Ietū i te ha'aaura'a o rā 'a'amu

(Marko 4.13-20; Ruka 8.11-15)

¹⁸ »Ka haka roŋo mai. Te aura'a o tū 'a'amu era o te taŋata 'oka kai ko te me'e nei: ¹⁹ E ai rō 'ā te nu'u pa he kona ara era 'ā a ira i vī-viri ai te karu: e haka roŋo ena i te roŋo o ruŋa i te [haka tere iŋa 'āpī o te 'Atua] 'ina he aŋi-aŋi; he tu'u ia e Rukifero he to'o i rā roŋo 'o tupu 'i roto i te rāua māhatu.

²⁰ »E ai tako'a rō 'ā te nu'u pa he kona papa 'ō'one ta'e rahi vī-viri era o te karu: e haka roŋo ena i te roŋo o te 'Atua he to'o mo rāua hai koa. ²¹ Te me'e 'ino nō, he haka moe i te rāua mana'u 'i ruŋa i rā roŋo mo te hora nō e tahi; ka riri era te nu'u mo rāua o ruŋa o te vānaŋa o te 'Atua 'o ka topa rō era te 'ati 'i te hora haka 'atu i a rāua, he rehu rā roŋo, pa he ta'e hio-hio iŋa o te aka 'i te kona 'ō'one ta'e rahi.

²² »Te kona mauku pū-pū vī-viri era o te karu he nu'u haka roŋo i te roŋo o te 'Atua, 'e, 'i te pūai o te haŋa ki te me'e o te ao nei 'e ki te 'ono he mira-mira te mana'u. Ta'ato'a me'e nei he haka vavau i te vānaŋa o te 'Atua 'e 'ina e ko haka rē mo hua 'i roto i a rāua.

²³ »'E te kona 'ō'one riva-riva vī-viri era o te karu he nu'u haka roŋo 'e aŋi-aŋi i te roŋo o te 'Atua. Mai i a rāua he hua me'e rahi nō atu me'e haŋa e te 'Atua, pa he n̄ā karu ena 'ā mai ruŋa i hua ai e ho'e hānere, e ono 'ahuru 'e e toru 'ahuru karu».

He 'a'amu ha'aaura'a o te mauku rake-rake

²⁴ He 'a'amu tako'a e Ietū i te 'a'amu ha'aaura'a nei:

«Te me'e topa 'i te haka tere iŋa 'āpī o te 'Atua e tu'u rō 'ā pa he me'e topa ki te taŋata pī i te karu tariko 'i roto i tō'ona henua. ²⁵ E ha'uru nō 'ā rā taŋata 'e te nu'u ta'ato'a o tō'ona hare, he tu'u e tahi kope ta'e haŋa ki rā taŋata, he pī tako'a 'i rā kona hai mauku rake-rake 'e he e'a he oho.

²⁶ »I nui-nui era te tariko he hua 'e he tupu tako'a tū mauku rake-rake era. ²⁷ He oho ia he kī e te nu'u aņa ki tū taņata era ō'ona te henua: "Ē, karu tariko ta'a karu 'oka era, ǰpē hē ia i tupu mai ai te mauku rake-rake?"

²⁸ »He pāhono e rā taņata: "O te kope ta'e haņa mai ki a au i aņa i te me'e era".

»He 'ui e tū nu'u aņa era: "ǰE haņa rō koe mo o'i-o'i o mātou i te űā mauku era?"

²⁹ »He kī e rā taņata: "Ina, 'o o'i-o'i rō kōrua i te tariko hora ena o kōrua ka o'i ena i te mauku. ³⁰ Ka haka rē nō pē nā. Ki tu'u te 'āva'e mo hore i te tariko, he uņa a au, 'i ra'e, i te nu'u he haka here-here hai ruru i rā mauku mo tutu. Ki oti he hāpa'o i te tariko 'i roto i te hare ha'aputu tariko"».

He ha'aaura'a iņa hai karu mostasa

(Marko 4.30-32; Ruka 13.18-19)

³¹ He 'a'amu tako'a e Ietū i te 'a'amu ha'aaura'a nei:

«Te haka tere iņa 'āpī o te 'Atua pa he karu mostasa 'oka e te taņata e tahi 'i 'uta. ³² Te karu nei karu hope'a o te 'iti-'iti; 'e, ka tupu ka nui-nui ka oho era, he 'ata nui-nui ki te tētahi me'e o roto i te ha'a'apu, 'ātā he tu'u pa he tumu 'e, 'i te nui-nui, he aņa te manu i te rāua hakapupa 'i ruņa i te maņa».

He 'a'amu ha'aaura'a o te revaura

(Ruka 13.20-21)

³³ He 'a'amu tako'a i te 'a'amu ha'aaura'a nei:

«Te haka tere iņa 'āpī o te 'Atua pa he 'apa 'iti-'iti revaura hoa e te vi'e ki roto i te haraoa mata mo haka ahu tahi».

He haka tano iņa o te [Pāpa'i Mo'a]

(Marko 4.33-34)

³⁴ E vānaņa era a Ietū ki te rahi ra'a o te nu'u o ruņa i te me'e ta'ato'a nei o te haka tere iņa 'āpī o te 'Atua hai 'a'amu ha'aaura'a, 'e mo ta'e ai hai 'a'amu ha'aaurara'a, 'ina he vānaņa o ruņa. ³⁵ Pē ira i tano ai te me'e kī e te perofeta pē nei ē:

«Hai 'a'amu ha'aaura'a a au ka vānaņa nei; e kī rō a au i te me'e 'ina kai 'ite e te taņata mai te hora aņa era 'ā e te 'Atua i te ao».

He ha'aaura'a o tū 'a'amu era o te mauku rake-rake

³⁶ He haka marere ia e Ietū i te taņata 'e he oho he uru ki roto i te hare. He haka hāhine tā'ana nu'u hāpī 'e he ani mo haka aņi-aņi i tū 'a'amu ha'aaura'a era o te mauku rake-rake. ³⁷ He pāhono e Ietū:

«Te kope 'oka era i te karu riva-riva he [Poki o te taņata], ³⁸ 'e te henua ko te ao nei. Te karu riva-riva era he nu'u o roto i te haka tere iņa 'āpī o te 'Atua, 'e te mauku rake-rake he nu'u haka tere e Rukifero. ³⁹ 'E tū kope ta'e haņa era ki te taņata era ō'ona te henua, pī

era i te mauku rake-rake ko Rukifero. Te hora era o te hore he pa'o o te ao, 'e te nu'u aņa he merahi.

⁴⁰ »Pa he mauku rake-rake hoa mo tutu 'i roto i te ahi, pē ira tako'a ka topa ena 'i te pa'o iņa o te ao.

⁴¹ He uņa e te Poki o te taņata i tā'ana merahi mo to'o mai roto o te haka tere iņa 'āpī o te 'Atua i te nu'u haka hara i te rua 'e i te nu'u aņa i te me'e ta'e tano.

⁴² He to'o he hoa ki roto i te rona e hū rō 'ā, he kona 'i ira te ta-taņi 'e te 'au-'au ra'a niho. ⁴³ 'E te nu'u tano ki te mata o te 'Atua he 'uira pa he ra'ā 'i te ao haka tere e te rāua Matu'a o te raņi.

»Te nu'u haņa mo aņi-aņi ka haka topa te mana'u.

He 'a'amu ha'aaura'a o te hauha'a e na'a rō 'ā

⁴⁴ »Te haka tere iņa 'āpī o te 'Atua pa he hauha'a o roto i te henua e tahi. He tu'u e tahi kope he rava'a, 'e he na'a haka 'ou 'i rā kona mau 'ā. Ko koa atu 'ana, he oho he ho'o i tō'ona me'e ta'ato'a ki te nu'u, 'e he ho'o i rā henua mō'ona.

He 'a'amu ha'aaura'a o te poe hope'a o te hauha'a

⁴⁵ »Te haka tere iņa 'āpī o te 'Atua pa he taņata ho'o tao'a kimi i te poe riva-riva 'e nehe-nehe. ⁴⁶ I rava'a era i te poe hope'a o te hauha'a, he oho he ho'o tahi i tā'ana me'e, 'e he ho'o i rā poe mō'ona.

He 'a'amu ha'aaura'a o te kūpeņa

⁴⁷ »Te haka tere iņa 'āpī o te 'Atua pa he kūpeņa hoa ki roto i te vaikava 'e to'o me'e rahi nō atu huru o te ika. ⁴⁸ Ki 'ī te kūpeņa, he haro ki 'uta, he noho he vae i te ika riva-riva he hāpa'o 'i roto i te kānato 'e he hoa i te ika ta'e au mo kai. ⁴⁹ 'I te pa'o iņa o te ao, pē ira ka ai ena: he e'a te merahi he ha'ata'a i te taņata aņa i te me'e ta'e tano mai roto i te nu'u aņa i te me'e tano, ⁵⁰ 'e he hoa i rā nu'u aņa era i te me'e ta'e tano ki roto i te rona e hū rō 'ā, he kona 'i ira te taņi 'e te 'au-'au ra'a niho».

Te me'e 'āpī 'e te me'e rū'au

⁵¹ He 'ui e Ietū:

—ǰKo aņi-aņi tahi 'ana e kōrua i te me'e nei?

—'Ē-ē —i pāhono ai.

⁵² He kī ia e Ietū:

—Te [ma'ori o te haka tere hūrio] 'ite 'e aņi-aņi tako'a o ruņa i te haka tere iņa 'āpī o te 'Atua e tano rō 'ā mo hāpī o ruņa i te me'e 'āpī 'e o ruņa i te me'e tuai, pa he hoa hare 'ite mo to'o mai roto i tā'ana me'e rahi hāpa'o i te me'e 'āpī 'e i te me'e rū'au.

'I Nātāreta a Ietū

(Marko 6.1-6; Ruka 4.16-30)

⁵³ I oti era te 'a'amu e Ietū i tū 'a'amu ha'aaura'a era, he e'a he oho mai ira ki tō'ona kāiņa ko Nātāreta. ⁵⁴ I

tu'u era ki ira, he ha'amata he hāpī 'i roto i te [hare pure hūrio]. Te taŋata, ko māere atu 'ā, e kī era: «¿I he te kope era i 'ite ai i te me'e ta'ato'a era? ¿Pē hē e rava'a ena mo aŋa i te mana? ⁵⁵ ¿Ta'e 'ō a ia ko te poki era o te tāmuta, 'e ko [Māria] tō'ona matu'a vahine? ¿Ta'e 'ō he taina o [Tanatiako], o [Kōsē], o Tīmona 'e o Hura? ⁵⁶ 'E ¿ta'e 'ō tō'ona ŋā taina vahine ena e noho rō 'ana 'i roto i a tātou? ¿O hē tō'ona mārāma-rama 'e tō'ona pūai?».

⁵⁷ 'E 'ina he nu'u o tō'ona kāiŋa i [haka moe i te man-a'u] 'i ruŋa i a ia. He kī e Ietū: «'Ina e tahi perofeta mo'a e tō'ona hua'ai 'e e te nu'u o tō'ona kāiŋa. O te nu'u o te tētahi atu kona te mo'a i a ia».

⁵⁸ 'E 'ina kai rahi te mana i aŋa e Ietū 'i ira he ta'e haka moe o te mana'u o te nu'u o ira 'i ruŋa i a ia.

He aha i tiŋa'i ai i a Iovani Papatito

(Marko 6.14-29; Ruka 9.7-9)

14 'I rā noho iŋa, a [Erore], 'ariki haka tere o Karirea, he ŋaro'a i te vānaŋa o ruŋa i a Ietū, ² 'e he kī ki te nu'u aŋa ki a ia: «Te kope era ko Iovani Papatito ko ora haka 'ou mai 'ana. 'O ira e pūai era mo aŋa i te mana».

³ I kī ai pē ira e 'Erore 'o te ai 'ā'ana i uŋa i haka puru i a Iovani hai 'Eroria, vi'e [hāipo-ipo] o tō'ona taina ko Firipo ⁴ 'o te rava ture e Iovani pē nei ē: «Ko hape 'ā a koe i to'o ai i a 'Eroria mo vi'e 'ā'au».

⁵ A 'Erore e haŋa rō 'ā mo tiŋa'i i a Iovani. Te me'e nō, e ri'a-ri'a rō 'ā 'i te nu'u; ta'ato'a nō, pa'i, e mana'u era a Iovani he perofeta.

⁶ 'I te ŋoŋoro o te mahana poreko o 'Erore, he e'a te poki vahine 'a 'Eroria he 'ori ki te nu'u ta'ato'a o rā ŋoŋoro. 'I te nehe-nehe o te 'ori o rā uka he koa a 'Erore. ⁷ He hōrea he va'ai e ia i te me'e nō era mo no-no'i. ⁸ 'I te hatu e tō'ona matu'a vahine, he kī ki a 'Erore: «Ka va'ai mai 'i ruŋa i te maretī te pū'oko o Iovani Papatito».

⁹ He māui-ūi te māhatu, he haka kiva-kiva a 'Erore; 'e, 'i te ai ko hōrea 'ana 'i mu'a o te nu'u oho ki rā ŋoŋoro, he uŋa ki te va'e hau mo va'ai. ¹⁰ He kī mo oho ki roto i te hare ma'u'aurī 'e mo pa'o i te pū'oko o Iovani. ¹¹ I oti era he ma'u i rā pū'oko 'i ruŋa i te maretī he va'ai ki rā uka, 'e o rā uka i va'ai ki tō'ona matu'a vahine.

¹² He tu'u ia te nu'u hāpī 'a Iovani, he to'o i te hakari 'e he ma'u he tanu. I oti era he oho he haka 'ite ki a Ietū.

He hāŋai iŋa o Ietū i te nu'u rahi

(Marko 6.30-44; Ruka 9.10-17; Iovani 6.1-14)

¹³ I 'ite era e Ietū o ruŋa i rā 'ati, he e'a he oho a ruŋa i te vaka ki te kona 'ina he taŋata. I 'ite nō e te nu'u, 'e he e'a mai te rāua kona ta'ato'a noho he oho a ruŋa i te henua ki te kona 'i ira a Ietū.

¹⁴ I topa era a Ietū mai ruŋa i te vaka, he take'a i te rahi o te nu'u; he haka 'aroa i a rāua 'e he haka ora i te nu'u māui-ūi ma'u ki a ia.

¹⁵ I ha'amata era mo pō, he haka hāhine tā'ana nu'u hāpī he kī:

—E Ietū, ko ahi-ahi 'ana, 'e kona nei, kona ta'e noho taŋata. Ka u'i te nu'u ena ka haka oho ki te kona mo ho'o i te rāua me'e mo kai.

¹⁶ He pāhono e Ietū:

—'Ina ko haka oho; ka va'ai e kōrua hai me'e mo kai.

¹⁷ He kī e rā nu'u:

—Te me'e ai nō o mātou he haraoa e rima 'e he ika e rua.

¹⁸ He kī e Ietū:

—Ka ma'u mai.

¹⁹ He kī tako'a ki te taŋata ta'ato'a mo no-noho 'i ruŋa i te mauku. I oti era he to'o i tū haraoa era e rima 'e i tū ika era e rua, he u'i a te raŋi, he māuru-uru ki te 'Atua. He more-more ia i tū ŋā me'e era, he va'ai ki te nu'u hāpī 'ā'ana, 'e he tuha'a e rāua ki te taŋata.

²⁰ Ta'ato'a nō taŋata i kai ai 'ātā ka mākona rō 'e i ha'a'i rō ki te 'i e ho'e 'ahuru mā piti kātato o te kai topa. ²¹ Te nu'u i kai, mo tatakū i te ŋāŋata nō, e pae ta'utini 'e 'ina kai tatakū te ŋā vi'e 'e te ŋā poki.

He ha'ere iŋa o Ietū 'i ruŋa i te vai

(Marko 6.45-52; Iovani 6.16-21)

²² I oti era te me'e nei, he kī e Ietū ki tā'ana nu'u hāpī mo eke ki ruŋa i te vaka mo oho 'i ra'e ki a ia ki te rua pā'iŋa o te vai; ko ia mo noho mo haka oho i te taŋata.

²³ I haka oho tahi era a Ietū i te taŋata, he eke ki ruŋa i te ma'uŋa he pure. Hoko tahi nō 'i rā kona i pō ai, ²⁴ 'e te vaka 'i ruŋa tā'ana nu'u hāpī ko 'ava-'ava 'ā e oho era mai te henua. 'I te ai o te tokerau 'i mu'a o rāua, he tiŋa'i tū vaka era e te pari.

²⁵ 'I te popohaŋa he ha'ere he oho a Ietū a ruŋa i te vai ki te kona era 'i ira te nu'u hāpī era 'ā'ana. ²⁶ I take'a era e rā nu'u i te me'e e ha'ere 'ā a ruŋa i te vai, he matakū 'e he kī:

—iHe vārua!

²⁷ He me'e e Ietū:

—iKiahio kōrua! iKo au nei! i'Ina ko matakū!

²⁸ He pāhono e Pētero:

—E Ietū, hoki ko koe mau 'ana, ka kī mai mo oho atu ō'oku ki muri i a koe a ruŋa i te vai.

²⁹ —Ka oho mai —i kī ai e Ietū.

He topa a Pētero mai ruŋa i te vaka, he ha'amata he ha'ere a ruŋa i te vai pe te kona era 'i ira a Ietū. ³⁰ 'I te ŋaro'a i te pūai o te tokerau, he ri'a-ri'a. 'E i ha'amata i emu i oho era, he ohu:

—;Ka hā'ū'ū mai koe, e Ietū ē!

³¹ 'I tū hora 'ā he 'a'-aru e Ietū a te rima he kī:

—;Pē nā te haka moe iŋa ō'ou i te mana'u 'i ruŋa i a au? ;He aha rā koe i 'aka-'aka ai?

³² I eke era ararua ki ruŋa i te vaka, he haumārū rō 'ai te tokerau. ³³ Te nu'u o ruŋa i te vaka he ha'amuri ki a Ietū he kī:

—;He parauti'a mau 'ana he Poki koe o te 'Atua!

He nu'u māui-ui o Henetareta (Marko 6.53-56)

³⁴ He vari ia ananake a ruŋa i te vaka ki te rua pā'iŋa 'e he tu'u ki te kona e tahi te 'iŋoa ko Henetareta. ³⁵ He aŋi-aŋi e te nu'u i a Ietū, 'e kai roa i tu'u ai te parau 'āpī ki te kona ta'ato'a o ira. He ma'u i te rāua nu'u māui-ui ki a Ietū, ³⁶ 'e he ani mo haka rē i a rāua mo haka puā korohaŋa ki te titi o tō'ona kahu; 'e ta'ato'a nu'u haka puā, he ora te māui-ui.

He me'e haka ta'e tano i te taŋata ki te 'Atua (Marko 7.1-23)

15 E tahi mahana tētahi nu'u [fariseo] 'e tētahi [ma'ori o te haka tere hūrio] tu'u mai Hērutarema he haka hāhine ki a Ietū he 'ui:

² —;He aha ta'a nu'u hāpī e ta'e aŋa ena i te me'e kī e te tātou tupuna mo aŋa? ;He aha e kai ena kai [haka ma'itaki] hia i te rima hai hopu haŋa māhani aŋa e tātou e te [hūrio]?

³ He 'ui e Ietū:

—'E a kōrua, ;he aha e haka rehu ena i te roŋo o te 'Atua mo ma'u i te haka tere iŋa o te taŋata? ⁴ Te kī o te 'Atua: "E mo'a koe i tu'u matu'a tane 'e i tu'u matu'a vahine" 'e, "Te kope kī i te vānaŋa ta'e tano mo tō'ona matu'a te ūtu'a he mate".

⁵ »Ka ai atu pē ira, e kī rō 'ana e kōrua e tano nō te kope e tahi mo kī ki tō'ona matu'a: "Te me'e ai 'ā'aku mo hā'ū'ū atu ko ha'ata'a 'ā e au mo te 'Atua". ⁶ Pē ira te kope aŋa i rā me'e ka ta'e mo'a ena i tō'ona matu'a hai ta'e hā'ū'ū ki a rāua. Hai kī iŋa era e ta'e haka hauha'a ena e kōrua i te roŋo o te 'Atua mo ma'u i te kōrua haka tere iŋa.

⁷ »;E te nu'u riva a te haho ē! He parauti'a mau 'ana 'ō te me'e kī o ruŋa i a kōrua e te perofeta era ko 'Itaia hora kī pē nei ē:

⁸ "Te nu'u nei hai ŋutu mau nō e ha'amuri mai nei, 'e te rāua māhatu 'i te kona kē nō atu.

⁹ 'E te rāua ha'amuri iŋa mai 'ina e tahi hauha'a; e hāpī rō 'ana, pa'i, i te me'e taŋata pa he roŋo 'ā'aku".

¹⁰ He raŋi e Ietū ki te nu'u mo haka hāhine 'e he kī:

—Ka haka roŋo tahi mai kōrua 'e e aŋi-aŋi tā'aku vānaŋa ka kī atu ena: ¹¹ Ta'e hai me'e o'o a roto i te haha e haka ta'e tano ena i te taŋata ki te mata o te 'Atua, hai me'e kī e'a mai roto i te haha.

¹² He haka hāhine ia ki a Ietū tā'ana nu'u hāpī he 'ui:

—;Ko 'ite 'ana rō koe: te fariseo ko ta'e au 'ā mo ta'a vānaŋa ena?

¹³ He kī e Ietū:

—Te tumu ta'e 'oka e tō'oku Matu'a mai tō'ona aka ka o'i era. ¹⁴ Ka haka rē nō. A rāua he matapō e uŋa 'ā i te tētahi matapō. 'E te taŋata matapō e tahi mo uŋa i te rua matapō, ararua ka vī-viri era ki roto i te pū.

¹⁵ He kī ia e Pētero ki a Ietū:

—Ka ha'aaura'a mai ta'a me'e kī era.

¹⁶ He pāhono e Ietū:

—;Ātā ki a kōrua kai aŋi-aŋi 'ā? ¹⁷ ;Kai 'ite 'ā e kōrua: te me'e o'o a roto i te haha he turu ki roto i te kōpū 'e he e'a mai roto i te hakari? ¹⁸ Te me'e haka ta'e tano i te taŋata ki te mata o te 'Atua he me'e kī e'a mai te haha, he me'e mai roto i te taŋata e e'a ena. ¹⁹ Mai roto i te māhatu o te taŋata, pa'i, e e'a ena te mana'u rake-rake, te tiŋa'i te haka mate i te taŋata, te tai'ata, te piri tane ta'ato'a ta'e ha'ati'a e te 'Atua, te toke, te reo-reo, 'e te vā-vā. ²⁰ He me'e ta'ato'a nei te me'e haka ta'e tano i te taŋata ki te mata o te 'Atua, ta'e 'ō he kai 'ina kai haka ma'itaki hia i te rima hai hopu haŋa māhani aŋa e tātou e te hūrio.

He vi'e ta'e hūrio e tahi (Marko 7.24-30)

²¹ He e'a ia a Ietū mai ira he oho ki te kona hāhine ki Tiro 'e ki Tīrone. ²² E tahi vi'e tō'ona noho iŋa e hāhine rō 'ā ki rā ŋā kona, vi'e o te kona kī 'i mu'a 'ā ko [Kana'ana], he haka hāhine a muri koia ko ohu:

—;E Ietū, e te Hakaara o [Tāvita] ē, ka haka 'aroha koe i a au! ;Ko o'o 'ana tā'aku poki vahine e te tātane he haka māui-ui nō te aŋa i a ia!

²³ 'Ina kai pāhono e Ietū. He haka hāhine ia tā'ana nu'u hāpī 'e he ani:

—Ka hā'ū'ū te vi'e era ki hoki ai ki tō'ona hare 'o ohu 'o oho nō mai 'i tu'a o tātou.

²⁴ He kī e Ietū:

—I uŋa mai ai i a au e te 'Atua ki te itaraera mau nō. A rāua pa he māmo'e 'ā ko ŋaro 'ana.

²⁵ Ka ai atu pē ira, i oho nō rā vi'e he tū-turi 'i mu'a i a Ietū 'e he kī:

—Ka hā'ū'ū mai koe!

²⁶ He pāhono e Ietū:

—Me'e ta'e tano mo hiko i te haraoa mai te nā poki mo va'ai ki te paiheŋa.

²⁷ He kī e tū vi'e era:

—He anjī 'ā tā'au, e Ietū ē. Ka ai atu pē ira, te paiheŋa e kai tako'a rō 'ā i te pārehe-rehe haraoa vī-viri mai ruŋa i te 'amurama'a o te kope 'ā'ana rā nā paiheŋa.

²⁸ He kī ia e Ietū:

—Ko te pūai i tu'u haka moe iŋa i te mana'u 'i ruŋa i a au! Ka ai pa he me'e haŋa ena e koe.

'E 'i rā hora mau 'ā he ora tū poki era.

He haka ora iŋa o Ietū me'e rahi nu'u māui-ui

²⁹ He e'a he oho a Ietū mai tū kona era, he tu'u ki te taha-taha o te vai o Karirea 'e he eke ki ruŋa i te reva-
reva e tahi he noho. ³⁰ Me'e rahi te nu'u i taka-taka 'i rā
kona. E ma'u rō 'ana i te nu'u va'e koke, i te matapō, i
te nu'u rima rehe-rehe, i te nu'u ta'e vānaŋa, 'e me'e
rahi haka 'ou atu nu'u māui-ui he haka topa a te va'e o
Ietū, 'e he haka ora e ia. ³¹ He māere te taŋata 'i te
take'a i te nu'u ta'e vānaŋa ko vānaŋa 'ā, i te nu'u rima
rehe-rehe ko ora 'ana, i te nu'u va'e koke ko ha'ere 'ā
'e i te nu'u matapō ko take'a 'ana. 'E he ha'amata rō 'ai
he ha'ahana-hana ki te 'Atua o te itaraera.

He hāŋai iŋa haka 'ou o Ietū i te nu'u rahi

(Marko 8.1-10)

³² He raŋi e Ietū ki tā'ana nu'u hāpī 'e he kī:

—Ko haka 'aroha 'ana a au i te nu'u nei. Ka toru ma-
hana o rāua 'i muri i a tātou 'e 'ina he me'e toe o rāua
mo kai. Kai haŋa a au mo haka oho ki te rāua hare kai
kai hia 'o re-rehu rō 'i te ara.

³³ He kī e tū nu'u hāpī era 'ā'ana:

—Pē hē ia a tātou ana rava'a i te kai mo te rahi nei 'i
te kona tu'u pē nei 'ina he noho e te taŋata?

³⁴ He 'ui e Ietū:

—E hia haraoa o kōrua?

—E hitu, 'e he 'apa ika riki-riki —i pāhono ai e tū nu'u
era.

³⁵ He uŋa ia e Ietū mo haka no-noho i te taŋata. ³⁶ He
to'o i tū nā haraoa era e hitu 'e i tū nā ika era, he māu-
ru-uru ki te 'Atua, he more-more he va'ai ki tā'ana
nu'u hāpī, 'e o rāua i tuha'a ki te taŋata.

³⁷ Ta'ato'a i kai ai ki te mākona, 'e i ha'a'ī rō ki te 'i e
hitu kānato o te kai i topa. ³⁸ Te rahi i kai ai, mo tatakū i

te nāŋata nō, e maha ta'utini. 'Ina kai tatakū i te nā
vi'e 'e i te nā poki.

³⁹ I oti era he haka oho e Ietū i te nu'u ki te rāua
hare, he eke ki ruŋa i te vaka 'e he oho ki te kona ko
Makarana.

He tāpa'o tu'u pa he me'e topa ki a [Hōnā]

(Marko 8.11-13; Ruka 12.54-56)

16 Te nu'u [fariseo] 'e te nu'u [saruseo] he oho he
u'i i a Ietū mo haka 'atu. He kī mo aŋa e tahi
mana ki 'ite ai e te nu'u he anjī mau 'ā o te 'Atua a ia i
uŋa mai. ² He kī e Ietū:

«'I te ahi-ahi ki topa te ra'ā, e kī ena e kōrua: "He ri-
va-riva te mahana āpō 'o te ai ko mea-mea 'ā te raŋi";
³ 'e, 'i te pō'ā, he kī e kōrua: "'Arīnā he rake-rake te ma-
hana 'o te ai ko mea-mea 'ā 'e ko pōhāhā 'ana te raŋi".

»Mo ai ia ko 'ite 'ana e kōrua mo ha'aura'a i te huru
o te raŋi, ūpē hē e ta'e anjī-anjī ena i te ha'aura'a o te
me'e topa o te hora nei? ⁴ A kōrua, te nu'u mana'u ta'e
tano haka tapa mai te ara parauti'a o te 'Atua, e haŋa
'ā mo aŋa ō'oku i te mana, 'e, te me'e mau nō mo
take'a e kōrua he tāpa'o tu'u pa he me'e topa ki te
perofeta era ko Hōnā».

He haka rē ia a Ietū i rā nu'u 'e he e'a he oho mai ira.

Te revaura o te fariseo

(Marko 8.14-21)

⁵ I vari era a kuā Ietū ki te rua pā'iŋa o te vai o
Karirea, ko rehu 'ā mo ma'u i te rāua haraoa. ⁶ He kī e
Ietū ki tā'ana nu'u hāpī:

—E u'i kōrua e te revaura o te fariseo 'e o te saruseo.

⁷ He ha'amata ia tū nu'u hāpī era 'a Ietū he vānaŋa 'i
roto i a rāua 'ā 'e he kī: «'I kī mai ena i te vānaŋa ena 'o
te 'ite kai ma'u mai tātou i te haraoa». ⁸ He anjī-anjī e
Ietū 'e he kī:

—E hia kōrua e vānaŋa ena o ruŋa i te haraoa?
Kai haka moe riva-riva mai 'ā kōrua i te mana'u 'i ruŋa
i a au! ⁹ Kai anjī-anjī 'ana 'ō e kōrua? Ko rehu 'ā i a
kōrua te haraoa era e rima hāŋai era e pae ta'utini
taŋata, 'e e hia kānato i ha'a'ī ai o te kai topa? ¹⁰ Ko re-
hu tako'a 'ana i a kōrua te haraoa era e hitu hāŋai era
e maha ta'utini taŋata, 'e e hia kānato i ha'a'ī ai o te
kai topa? ¹¹ E hia kōrua e ta'e anjī-anjī ena: ta'e o
ruŋa i te haraoa a au e vānaŋa atu ena? Tā'aku kī: e u'i
kōrua e te revaura o te fariseo 'e o te saruseo.

¹² He anjī-anjī ia e rā nu'u: a Ietū ta'e e kī 'ana o ruŋa i
te revaura era mo aŋa o te haraoa, e kī 'ana e u'i a
rāua e te hāpī o te fariseo 'e o te saruseo.

Mo Pētero a Ietū he [Kiritō]

(Marko 8.27-30; Ruka 9.18-21)

¹³ I tu'u era a kuā Ietū ki Tētārea o Fīriipo, he 'ui ki
tā'ana nu'u hāpī:

—Ķko ai te [Poki o te taŋata] e kī ena e te nu'u?

14 He pāhono e rā nu'u:

—E ai rō 'ā te nu'u kī ko Iovani Papatito, e ai tako'a rō 'ana te nu'u kī ko te perofeta era ko 'Ēria, 'e e ai haka 'ou rō 'ā te nu'u kī ko Heremia 'o he perofeta haka 'ou e tahi o mu'a 'ā.

15 —'E, ki te kōrua kī, Ķko ai a au?

16 He pāhono ia e Tīmona, e kī tako'a era ko Pētero:

—A koe he Kiritō, he Poki o te 'Atua ora.

17 He kī e Ietū:

—Ķko te koa i a koe, e Tīmona, poki 'a Hōnā ē! Te me'e 'ite ena e koe ta'e o te taŋata i haka 'ite atu, o tō'oku Matu'a o te raŋi. ¹⁸ 'I a au he kī atu: a koe ko Pētero, te ha'aaura'a: «he mā'ea»; 'e pa he mā'ea hai ia e ha'amata e titi ena i te hare, hai koe a au ka ha'amata ka haka rahi ena i te nu'u [haka moe i te mana'u] 'i ruŋa i a au, 'e 'ina e ko ai 'i ruŋa i a rāua te pūai o te mate. ¹⁹ He va'ai atu au i te tāviri o te [haka tere iŋa 'āpī o te 'Atua]; te me'e mo ta'e ha'ati'a e koe 'i te ao nei, ko ta'e ha'ati'a tako'a 'ā 'i te raŋi, 'e te me'e mo ha'ati'a 'i te ao nei, ko ha'ati'a tako'a 'ā 'i te raŋi.

²⁰ 'E he kī ia e Ietū ki tā'ana nu'u hāpī mo ta'e 'a'amu e tahi nu'u he Kiritō a ia.

He haka 'ite iŋa o Ietū i tō'ona mate

(Marko 8.31–9.1; Ruka 9.22–27)

²¹ Mai rā hora he ha'amata a Ietū he vānaŋa ki tā'ana nu'u hāpī o ruŋa i te me'e ka topa era ki a ia pē nei ē: «E oho a au ki Hērutarema, 'e 'i ira ka tōtōā mai ena i a au e te nu'u pū'oko haka tere hūrio, e te [oromatu'a ra-rahi] 'e e te [ma'ori o te haka tere hūrio]. E ŋaro'a rō e au i te māui-ui ki roto i te ivi. E tiŋa'i e haka mate rō i a au 'e, 'i te toru mahana, e ora haka 'ou rō mai a au».

²² He to'o e Pētero a te tapa he ha'amata he ture:

—'Ina e ko ha'ati'a e te 'Atua, e Ietū ē! ĶTe me'e ena e ko topa atu ki a koe!

²³ He rori e Ietū he kī ki a Pētero:

—ĶKa haka tapa koe mai muri i a au! ĶE haka 'aka-'a-ka 'ā koe i tō'oku mana'u pē Rukifero 'ā! 'Ina koe he mana'u pa he mana'u o te 'Atua, a koe e mana'u ena hai mana'u taŋata.

²⁴ He kī ia e Ietū ki tū nu'u ta'ato'a hāpī era 'ā'ana:

«Te kope haŋa mo riro o'ona he taŋata hāpī 'ā'aku e haka rehu i a ia mau 'ā, 'ai ka 'amo rō i tō'ona tātaurō, te aura'a, e va'ai i a ia 'ātā mo mate 'i te aŋa iŋa i tā'aku me'e haŋa.

²⁵ »Te kope hāru i a au 'e i tā'aku hāpī hai tua'ivi mo hāpa'o i a ia 'o mate 'e mo aŋa i tā'ana me'e nō era i haŋa e ko ai i a ia te ora 'āpī 'ina he hope'a ra'a va'ai e te 'Atua. 'E te kope haka rē i tā'ana me'e haŋa mo ha'atura mai ki a au he rava'a e ia i rā ora.

²⁶ »'Ina e tahi aura'a mo te taŋata ai i tā'ana me'e ta'ato'a haŋa o te ao nei 'e 'ina i a ia te ora 'āpī 'ina he hope'a ra'a. 'Ina e tahi me'e mo va'ai 'o mo aŋa e te taŋata mo 'auhau ki te 'Atua mo rava'a i rā ora. ²⁷ Te Poki o te taŋata, pa'i, e oho rō mai e 'ana-'ana rō 'ana 'i te pūai o tō'ona Matu'a, 'i muri i a ia tā'ana merahi, 'e e 'auhau rō i te taŋata, e tahi e tahi, e haka tano ki te rāua me'e aŋa. ²⁸ 'E 'I a au he kī atu: tētahi nu'u o te kona nei e ko mate hia ka take'a rō ena te oho iŋa mai o te Poki o te taŋata 'i ruŋa i a ia te parau mo haka tere».

He huru kē iŋa o Ietū

(Marko 9.2–13; Ruka 9.28–36)

¹⁷ E ono mahana haka 'ou pe mu'a, he to'o e Ietū i a Pētero, i a [Tanatiako] 'e i a [Iovani], taina o Tanatiako, he iri ko rāua mau nō ki ruŋa i te ma'uŋa ruŋa nui e tahi. ² 'I rā kona, 'i mu'a o rā nu'u, he huru kē te 'āriŋa o Ietū, he 'uira pa he ra'ā 'e he rito-rito te kahu pa he mōrī. ³ 'I tū hora 'ā, he take'a a [Mōtē] ararua ko ['Ēria] e vānaŋa 'ā ki a Ietū.

⁴ He kī ia e Pētero: «E Ietū, Ķhe riva nō 'ō i ai ai a tātou 'i nei! Mo haŋa o'ou, he aŋa atu e au e toru pae-pae: e tahi mō'ou, e tahi mo Mōtē 'e e tahi mo 'Ēria».

⁵ E vānaŋa nō 'ana a Pētero, i noho ai 'i ruŋa i a rāua te raŋi tea-tea 'uira e tahi, 'e mai roto i e'a ai e tahi re'o e kī era: «He Poki nā 'ā'aku, Poki haŋa rahi; 'i ruŋa i a ia tō'oku koa. E ha'atura kōrua ki a ia».

⁶ I ŋaro'a era e tū nu'u hāpī era hoko toru, he tū-turi he noi te 'āriŋa a ruŋa i te 'ō'one, ko hope'a atu 'ā te ri'a-ri'a. ⁷ He haka hāhine a Ietū ki a rāua, he haka puā hai rima he kī: «Ka e'a kōrua ki ruŋa; 'ina ko ri'a-ri'a».

⁸ I e'a era te 'āriŋa a ruŋa, he take'a hoko tahi nō 'ō a Ietū. ⁹ E turu nō 'ana ananake mai ruŋa i te ma'uŋa, he kī e Ietū:

—'Ina ko 'a'amu te me'e take'a ena e kōrua 'ātā ki te ora iŋa mai te mate o te [Poki o te taŋata].

¹⁰ He 'ui ia e kuā Pētero ki a Ietū:

—ĶHe aha te [ma'ori o te haka tere hūrio] e kī ena: 'i ra'e a 'Ēria ka tu'u mai ena?

¹¹ He pāhono e Ietū:

—He aŋi 'ā, 'i ra'e a 'Ēria ana tu'u mai; mā'ana e haka riva-riva i te me'e ta'ato'a. ¹² 'E, 'I a au he kī atu: a 'Ēria ko tu'u mai 'ā, 'e 'ina e rāua kai aŋi-aŋi. I aŋa nō i te rāua me'e nō era i haŋa 'i ruŋa i a ia. Pē ira tako'a te Poki o te taŋata hai rāua ka ŋaro'a ena i te māui-ui ki roto i te ivi.

¹³ He aŋi-aŋi ia e rā nu'u: a Ietū o ruŋa i a Iovani Papatito e vānaŋa era.

He haka e'a iŋa o Ietū i te tātane

(Marko 9.14-29; Ruka 9.37-43)

¹⁴ I tu'u era a kuā Ietū ki te kona 'i ira te nu'u, he haka hāhine te taŋata e tahi, he tū-turi 'i mu'a i a Ietū 'e he kī:

¹⁵ —E Ietū, ka haka 'aroha koe i tā'aku poki: e kiki-kiki rō 'ā 'e he taparahi-ta'ata te 'ati topa ki a ia. E rahi rō 'ā tō'ona viri iŋa a roto i te ahi 'e a roto i te vai. ¹⁶ 'I ko ma'u mai 'ā e au ki ta'a nu'u hāpī nei 'e kai rava'a e rāua mo haka ora.

¹⁷ He kī e Ietū:

—E te nu'u pū'oko hio-hio mana'u ta'e tano 'e ta'e [haka moe i te mana'u] 'i ruŋa i te 'Atua ē! ;Pa he me'e ena: ka ai ka oho nō atu a au 'i muri i a kōrua 'ātā ki te pa'o iŋa o te ao, ko te ta'e haka moe iŋa mai 'ā kōrua i te mana'u 'i ruŋa i a au! ;'Ātā ki hē rā nei ka ha'aoro-ma'i ka oho nō nei i a kōrua? Ka ma'u mai te poki.

¹⁸ He ture e Ietū ki te tātane 'i roto i te poki 'e he haka e'a. 'I rā hora mau 'ā he ora rō 'ai tū poki era.

¹⁹ 'I te hora ko rāua nō, he 'ui e te nu'u hāpī 'a Ietū:

—E te Ma'ori, ;he aha i ta'e rava'a ai e mātou mo haka e'a i rā tātane?

²⁰ He pāhono e Ietū:

—He ta'e rahi o te kōrua haka moe iŋa mai i te mana'u 'i ruŋa i a au. 'I a au he kī atu: 'āhani te kōrua haka moe iŋa o te mana'u 'i ruŋa i a au korohaŋa pa he 'iti-'iti ena 'ā o te karu mostasa, e tano nō kōrua mo kī ki te ma'uŋa era: «;Ka oho koe mai nā ki te rua kona!», 'e he oho mai te kona era. 'E 'ina e tahi me'e mo ta'e rava'a e kōrua mo aŋa. [²¹ 'E, te tātane ta'ato'a pūai pē rā, hai pure nō ki te 'Atua 'e hai tapu i te kai ana haka e'a.]

He haka 'ite iŋa haka 'ou o Ietū i tō'ona mate

(Marko 9.30-32; Ruka 9.43-45)

²² 'I te mahana e tahi 'i Karirea he kī e Ietū ki tā'ana nu'u hāpī: «Te Poki o te taŋata e va'ai rō ki te rima o te taŋata, ²³ e tiŋa'i e haka mate rō 'e, 'i te toru mahana, he ora haka 'ou».

I ŋaro'a era i rā vānaŋa, he māui-ui te māhatu he haka kiva-kiva ananake.

He moni mo te Kona Ha'amuri 'Atua

²⁴ I tu'u era a Ietū ananake ko tā'ana nu'u hāpī ki Kaperenāū, te nu'u haka 'auhau i te taŋata hai moni mo te [Kona Ha'amuri 'Atua] he oho he u'i i a Pētero, 'e he 'ui:

—;E 'auhau rō 'ā tu'u ma'ori i te moni mo te Kona Ha'amuri 'Atua?

²⁵ —'Ē-ē, e 'auhau rō 'ā —i pāhono ai e Pētero.

I uru era a Pētero ki roto i te hare, he kī rō 'ai e Ietū:

—Ki tu'u mana'u, e Tīmona ē, ;ko ai te nu'u haka 'auhau e te 'ariki o te ao nei i te moni mō'ona: he hua'ai o'ona 'o he nu'u ta'e he hua'ai o'ona?

²⁶ He pāhono e Pētero:

—He nu'u ta'e he hua'ai o'ona.

He kī haka 'ou e Ietū:

—He aŋi 'ā tā'au, te hua'ai o te 'ariki 'ina he 'auhau. ²⁷ Ka ai atu pē ira, 'o riri tā'ue te nu'u era, ka oho ki taha tai, ka hoa te hau ki roto. Te ika ra'e ka ra'u atu ena, nā 'i te haha te tara 'aurī e tahi, te hauha'a he pe'e mo 'auhau i a tāua, 'e he ma'u e koe he 'auhau.

;Ko ai te kope 'ata hōnui mo te 'Atua?

(Marko 9.33-37; Ruka 9.46-48)

18 'I rā mahana mau 'ā, he haka hāhine tā'ana nu'u hāpī 'e he 'ui ki a Ietū:

—;Ko ai te kope 'ata hōnui 'i roto i te [haka tere iŋa 'āpī o te 'Atua]?

² He raŋi e Ietū ki te poki e tahi, he haka māroa 'i vāeŋa o rāua ³ 'e he kī:

—'I a au he kī atu: mo ta'e huri o te kōrua mana'u pa he ŋā poki, e ko o'o kōrua ki roto i te haka tere iŋa 'āpī o te 'Atua. ⁴ Te kope hope'a o te hōnui o roto i te haka tere iŋa 'āpī o te 'Atua he kope mana'u i hau rō atu te rua ki a ia, 'e tō'ona mana'u pa he ŋā poki. ⁵ 'E te kope to'o 'e hāpa'o hai 'iŋoa o'oku i te rua, ka ai atu i te poki e tahi pa he poki nei, e to'o 'ana i a au.

E u'i kōrua 'o hara

(Marko 9.42-48; Ruka 17.1-2)

⁶ »Te ūtu'a o te 'Atua mo te taŋata haka hara i te kope ta'e pūai rahi o te haka moe iŋa i tō'ona mana'u 'i ruŋa i a au he ūtu'a 'ata taparahi-ta'ata ki te ūtu'a he here hai mā'ea paŋaha'a ki te ŋao 'ai ka hoa ki raro i te parera o te vaikava.

⁷ »He 'ati e tahi mo te nu'u o te ao te ai me'e rahi nō atu me'e ūŋa i te taŋata ki roto i te hara. Rā ŋā me'e 'ina e ko ta'e ai. Ka ai atu pē ira, ;ko te 'aroha 'i te kope haka hara i te rua!

⁸ »'O ira, mo haka hara atu i a koe e tu'u rima e tu'u va'e, ka hore, 'ai ka hoa rō a kōnui era. E hau rō atu 'i te tano mo rava'a i te ora 'āpī 'ina he hope'a ra'a va'ai e te 'Atua e tahi mau nō rima 'o e tahi mau nō va'e, ki te ai ararua u'u rima 'e ararua u'u va'e 'e he hoa i a koe ki roto i te ahi 'ina he mate ki te hora hope'a. ⁹ 'E

mo haka hara atu i a koe e tu'u mata, ka ka-karo 'e 'ai ka hoa rō a kōnui era. E hau rō atu 'i te tano mo rava'a i te ora 'āpī 'ina he hope'a ra'a e tahi nō u'u mata, ki te ai ararua mata 'e he hoa i a koe ki roto i te pō'auahi.

He 'a'amu ha'aura'a o te māmoe ŋaro

(Ruka 15.3-7)

¹⁰ »'Ina kōrua ko ta'e haka au i te nu'u ta'e pūai rahi o te haka moe iŋa i te mana'u 'i ruŋa i a au. 'Ī a au he kī atu: te merahi hāpa'o i te nu'u era 'ai te raŋi 'i mu'a o tō'oku Matu'a. [¹¹ Te [Poki o te taŋata], pa'i, i oho mai ai mo haka e'a mai roto i te ūtu'a o te hara i te taŋata oho a te ara ta'e tano 'e mo va'ai ki a rāua i te ora 'āpī 'ina he hope'a ra'a.]

¹² »Mo ai e tahi taŋata e ai rō 'ana e ho'e hānere māmoe 'e he ŋaro e tahi, ʒe ko haka rē hō 'i ruŋa i te ma'uŋa 'ā i te māmoe era e iva 'ahuru mā iva mo oho mo kimi i rā māmoe ŋaro era? ¹³ 'E mo rava'a, 'ata hau rō atu te koa ki rā māmoe ki te ŋā māmoe ta'e ŋaro era e iva 'ahuru mā iva. ¹⁴ Pē ira tako'a 'ā, te Matu'a o kōrua o te raŋi e ko haŋa mo ŋaro 'o mo 'ati e tahi o te nu'u nei, nu'u ta'e pūai rahi o te haka moe iŋa i te mana'u 'i ruŋa i a au.

Pē hē ana haka kore i te riri mo te taina

(Ruka 17.3)

¹⁵ »Mo aŋa atu o tu'u taina e tahi me'e ta'e tano ki a koe, ka vānaŋa kōrua hoko rua nō 'e 'ai ka haka aŋi-aŋi rō i tō'ona hape. Mo haka roŋo atu, ko rava'a haka 'ou 'ana e koe i tu'u taina. ¹⁶ 'E mo ta'e haka roŋo atu, ka ma'u e tahi 'o e rua taŋata 'i muri i a koe mo mata'ite, mo haka tano ki te haka tere iŋa o te 'Atua pāpa'i e [Mōtē] pē nei ē: hai vānaŋa o te mata'ite e rua 'o e toru he tī-tika te ture ta'ato'a. ¹⁷ 'E mo ta'e haka roŋo ki rā ŋā mata'ite, ka kī ki te nūna'a taŋata ta'ato'a o rā kona [haka moe i te mana'u] 'i ruŋa i te 'Atua. 'E mo ta'e haka roŋo ki rā nu'u, ka ha'ariro pa he taŋata kai 'ite ko ai te 'Atua parauti'a 'o pa he [nu'u haka 'auhau i te taŋata hai moni mo te rōmano].

¹⁸ »Ī a au he kī atu: te me'e mo ta'e ha'ati'a e kōrua 'i te ao nei, ko ta'e ha'ati'a tako'a 'ā 'i ruŋa i te raŋi, 'e te me'e mo ha'ati'a e kōrua 'i te ao nei, ko ha'ati'a tako'a 'ā 'i te raŋi.

¹⁹ »He kī atu a au: mo ha'a'au 'i te ao nei hoko rua o kōrua mo no-no'i e tahi me'e hai pure, he va'ai atu e tō'oku Matu'a o te raŋi. ²⁰ Mo taka-taka e rua 'o e toru taŋata hai 'iŋoa o'oku, 'i vāeŋa o rāua a au.

²¹ He oho ia e Pētero he 'ui ki a Ietū:

—ʒE hia hape o tō'oku taina mo haka rehu e au ana aŋa ana oho nō mai i te me'e ta'e tano? ʒE hitu?

²² He pāhono e Ietū:

—'Ina a au e ko kī atu e hitu; tā'aku kī: ta'ato'a nō hape mo aŋa atu.

He kope ta'e haka rehu i te hape o te rua

²³ »Te haka tere iŋa 'āpī o te 'Atua pa he haka tere iŋa o te 'ariki e tahi haŋa mo 'auhau e tā'ana nu'u aŋa i te tārahu mō'ona.

²⁴ »I ha'amata era mo haka 'auhau i rā nu'u, he ma'u he haka māroa 'i mu'a i a ia i te kope e tahi rahi ri'a-ri'a te tārahu mō'ona. ²⁵ 'I te ta'e ai o te moni o rā kope mo 'auhau, he kī e te 'ariki mo ho'o pa he 'ekaravo koia ko tā'ana vi'e, ko tā'ana ŋā poki, 'e he me'e ta'ato'a 'ā'ana; pē ira ana 'auhau i tō'ona tārahu.

²⁶ »He tū-turi rā kope he ani ki te 'ariki: "Ka ha'aoroma'i mai koe; e 'auhau tahi rō atu e au".

²⁷ »He haka 'aroha te 'ariki, he haka rehu i rā tārahu 'e he haka rē mo oho.

²⁸ »I e'a i oho era rā kope he piri te hokorua e tahi e ai rō 'ā te tārahu 'iti-'iti o rā hokorua mō'ona. He 'a-'aru he ŋatu i te ŋao 'ai ka kī e rā kope: "ʒKa 'auhau mai tu'u tārahu!".

²⁹ »He tū-turi rā hokorua he ani: "Ka ha'aoroma'i mai koe; e 'auhau tahi rō atu e au".

³⁰ »'Ina rā kope kai haŋa. He to'o mai he haka puru 'ātā ka 'auhau tahi rō i rā tārahu.

³¹ »Te tētahi atu nu'u aŋa mo te 'ariki he ŋaro'a i te māui-ui ki roto i te māhatu 'i tū me'e topa era ki rā hokorua, 'e he oho he 'a'amu tahi ki te 'ariki.

³² »He uŋa ia e te 'ariki mo oho o tū kope era ki a ia 'e he ture: "ʒE te taparahi-ta'ata ē! Ko haka rehu tahi 'ana a au i tu'u tārahu, he ani mai o'ou. ³³ 'E i ani atu era tu'u hokorua, kai haka 'aroha a koe i a ia, pa he haka 'aroha iŋa atu era o'oku i a koe".

³⁴ »'E, 'i te riri o te 'ariki, he kī mo haka ūtu'a 'ātā ka 'auhau tahi rō i tū tārahu era o'ona.

³⁵ He kī haka 'ou e Ietū: «Pē ira tako'a tō'oku Matu'a o te raŋi ka aŋa atu ena mo ta'e haka rehu o kōrua hai māhatu i te me'e ta'e tano aŋa atu e te kōrua taina».

'Ina ko ha'ata'a te me'e haka piri e te 'Atua

(Marko 10.1-12; Ruka 16.18)

19 I oti era te kī i te ŋā me'e nei, he e'a he oho a Ietū mai Karirea 'e he tu'u ki te kona o Hūrea o te rua pā'iŋa o te rio era ko Horotana, pā'iŋa mai ira e e'a era te ra'ā. ² Nu'u rahi te nu'u i vari 'i muri, 'e 'i ira i haka ora ai e Ietū i te māui-ui o te nu'u.

³ Tētahi nu'u [fariseo] he haka hāhine ki a Ietū, he haka 'atu koi'ite e kī rō i te me'e ta'e tano ki te rāua haka tere iŋa, he 'ui:

—ʒE ha'ati'a rō 'ana mo ha'ata'a o te kenu mai tā'ana vi'e [hāipo-ipo] 'o te me'e nō era he me'e?

⁴ He pāhono e Ietū:

—ʒKai tai'o 'ō a kōrua 'i te kona hā'aki 'i ruŋa i te [Pāpa'i Mo'a] pē nei ē: te Kope aŋa era i a rāua 'i te ha'amata iŋa o te ao «he tane 'e he vahine i aŋa ai», ⁵ 'e te kona hā'aki tako'a: «'O ira te taŋata ka haka rē ena i

tō'ona matu'a tane 'e matu'a vahine mo hāipo-ipo ki tā'ana vi'e 'e he riro rō 'ai e tahi nō hakari?»⁶ E ko ai haka 'ou hoko rua, e tahi mau nō a rāua. 'O ira, 'ina ko ha'ata'a te taŋata i te me'e haka piri e te 'Atua.

⁷ He 'ui haka 'ou e tū nu'u fariseo era:

—ĶHe aha ia te [haka tere iŋa 'a Mōtē] e ha'ati'a ena i te kenu mo ha'ata'a mai tā'ana vi'e hāipo-ipo e va'ai e te kenu i te parau ha'ata'a ki rā vi'e?

⁸ He kī e Ietū:

—He pū'oko hio-hio o kōrua i haka rē ai e Mōtē mo ha'ata'a mai te kōrua vi'e hāipo-ipo; 'e ta'e pē ira 'i te ha'amata iŋa o te ao. ⁹ 'Ī a au he kī atu: te kope ha'ata'a mai tā'ana vi'e, ka ai atu kai tai'ata hia rā vi'e, 'e he hāipo-ipo ki te rua, e tai'ata 'ā rā kope.

¹⁰ He kī ia e tā'ana nu'u hāpī:

—Mo ai 'ina he ha'ati'a i te taŋata 'e i te vi'e hāipo-ipo mo ha'ata'a, 'ata hau rō atu ia 'i te tano mo ta'e hāipo-ipo.

¹¹ He pāhono e Ietū:

—Ta'e ta'ato'a nu'u 'ite pē hē te ma'u iŋa o te me'e he ta'e hāipo-ipo, te aura'a, he noho iŋa 'ina he piri tane; te nu'u 'ite mo ma'u i te me'e nei he nu'u hā'ū'ū e te 'Atua. ¹² Rauhuru te tumu o te me'e ena he noho 'ina he piri tane: mo te tētahi he me'e poreko, mo te tētahi atu ko pātehe 'ana, 'e mo te tētahi haka 'ou atu he haŋa mo tāvini ki te 'Atua 'e mo haka 'ite o ruŋa i te haka tere iŋa 'āpī 'ā'ana e tahi mau nō mana'u. Te kope 'ite mo ma'u i te noho iŋa nei, e ma'u.

He ha'amaitai iŋa e Ietū i te ŋā poki

(Marko 10.13-16; Ruka 18.15-17)

¹³ I oho era he ma'u e te nu'u i te ŋā poki ki a Ietū mo haka puā hai rima 'e mo pure mo rā ŋā poki. I take'a era e tā'ana nu'u hāpī, he ture ki rā nu'u. ¹⁴ He kī ia e Ietū: «E haka rē kōrua i te ŋā poki mo oho mai ki a au. Te [haka tere iŋa 'āpī o te 'Atua], pa'i, mo te nu'u pa he ŋā poki».

¹⁵ He haka puā e Ietū i tō'ona rima ki ruŋa i tū ŋā poki era he ha'amaitai, 'e he e'a he oho mai ira.

Ko Ietū ararua ko te repa 'ono e tahi

(Marko 10.17-31; Ruka 18.18-30)

¹⁶ He oho te repa e tahi he u'i i a Ietū, 'e he 'ui:

—E te Ma'ori, Ķhe aha tā'aku me'e riva-riva mo aŋa mo rava'a e au i te ora 'āpī 'ina he hope'a ra'a va'ai e te 'Atua?

¹⁷ He pāhono e Ietū:

—ĶHe aha rā koe e 'ui mai ena o ruŋa i te me'e he riva-riva? Te kope riva e tahi mau nō: he 'Atua. 'E mo

haŋa ō'ou mo rava'a i te ora 'āpī 'ina he hope'a ra'a va'ai e te 'Atua, e ha'atura tā'ana roŋo.

¹⁸ —ĶKo roŋo hē? —i 'ui ai e rā kope.

He kī e Ietū:

—'Ina ko mate te taŋata i a koe, 'ina ko tai'ata, 'ina ko toke, 'ina ko reo-reo mo 'ati o te rua, ¹⁹ e mo'a tu'u matu'a tane 'e matu'a vahine, 'e e haŋa koe ki te rua pa he haŋa iŋa ena 'ā ō'ou ki a koe mau 'ā.

²⁰ —Te me'e ta'ato'a ena ko haka tano tahi 'ana e au —i kī ai e rā kope—. ĶHe aha tā'aku me'e toe mo aŋa?

²¹ He pāhono e Ietū:

—Mo haŋa ō'ou mo riro he taŋata 'ina e tahi hape, ka oho ka ho'o tahi tu'u hauha'a 'e 'ai ka va'ai rō te moni mo te nu'u veve. Pē ira he ai tu'u hauha'a 'i te raŋi. 'E 'ai koe ka oho iho mai 'i muri i a au mo taŋata hāpī 'ā'aku.

²² I ŋaro'a era e rā repa i tū vānaŋa era, he māui-ui rō atu 'ai te māhatu, 'e i haka kiva-kiva i e'a i oho ai 'i te rahi o tō'ona hauha'a.

²³ He me'e ia e Ietū ki tā'ana nu'u hāpī:

—'Ī a au he kī atu: aŋa ri'a-ri'a te taŋata 'ono mo o'o ki roto i te haka tere iŋa 'āpī o te 'Atua. ²⁴ 'E he kī haka 'ou atu a au: i hau rō atu 'i te aŋarahi mo te taŋata 'ono mo haka rē i a ia mo haka tere e te 'Atua, ki te o'o o te kameio a roto i te mata o te ivi.

²⁵ I ŋaro'a era, he 'ata māere rō atu 'ai tā'ana nu'u hāpī, 'e he 'ui:

—Mo ai pē ira, Ķko ai ia te me'e mo e'a mai roto i te ūtu'a o te hara 'e mo rava'a i te ora 'āpī 'ina he hope'a ra'a va'ai e te 'Atua?

²⁶ He u'i riva-riva e Ietū 'e he pāhono:

—E ko rava'a, ki te hora hope'a, e te kope e tahi mo haka e'a i a ia mau 'ā mai roto i te ūtu'a o te hara. Mo te 'Atua mau nō e haka e'a. 'Ina, pa'i, e tahi me'e mo ta'e rava'a e ia mo aŋa.

²⁷ He kī ia e Pētero:

—A mātou ko haka rē tahi 'ana i te mātou me'e mo nu'u hāpī 'ā'au. ĶHe aha ia te mātou me'e mo rava'a?

²⁸ He pāhono e Ietū:

—'Ī a au he kī atu: 'i te hora haka 'āpī i te me'e ta'ato'a 'e noho o te [Poki o te taŋata] 'i ruŋa i te pepe 'ariki o te 'Atua, a kōrua, te nu'u oho mai 'i muri i a au, he noho tako'a 'i ruŋa i te pepe 'ariki e ho'e 'ahuru mā piti mo ture i te ŋā ho'e 'ahuru mā piti mata o te itaraera. ²⁹ 'E te nu'u ta'ato'a haka rē hai au i te rāua

hare, i te rāua taina tane, taina vahine, i te rāua matu'a tane, matu'a vahine, i te rāua nā poki, 'e i te rāua henua, he va'ai e te 'Atua e tahi hānere haka 'ou o te me'e, 'e i te ora 'āpī 'ina he hope'a ra'a. ³⁰ 'I a au he kī atu: me'e rahi nu'u ko rāua te ra'e 'i te hora nei, pe mu'a ka oho ena ko rāua te hope'a; 'e me'e rahi nu'u ko rāua te hope'a 'i te hora nei, pe mu'a ka oho ena ko rāua te ra'e.

He nu'u aŋa 'i te kona 'oka vino

20 »Te me'e topa 'i te [haka tere iŋa 'āpī o te 'Atua] pa he me'e topa ki te taŋata e ai rō 'ana tō'ona henua 'oka vino. 'I te pō era 'ā he e'a he kimi hai nu'u mo aŋa 'i tū kona era o'ona. ² He ha'a'au ki rā nu'u mo 'auhau hai moni tano mo te mahana aŋa e tahi, 'e he uŋa he haka aŋa 'i tū kona vino era.

³ »'I te hora iva o te pō'ā, he e'a haka 'ou tū taŋata era 'e he take'a, 'i te kona haka ora taŋata, i te nu'u e noho tahaŋa 'ā. ⁴ He kī: "Ka oho kōrua ka aŋa 'i tō'oku kona vino era. He 'auhau atu a au i te moni tano". He e'a rā nu'u he oho.

⁵ »He e'a haka 'ou ia rā taŋata 'i te hora kai 'e 'i te hora toru o te ahi-ahi, 'e he aŋa pē tū nā me'e ra'e era.

⁶ 'E pe te hora pae o te ahi-ahi, he hoki ki tū kona haka ora taŋata era, 'e he piri ki te nu'u haka 'ou e no-noho tahaŋa 'ā. He 'ui: "¿He aha kōrua e no-noho tahaŋa ena 'i nei mai te pō'ā ki te pō 'ina e tahi me'e aŋa?"

⁷ »He pāhono e rā nu'u: "'Ina e tahi taŋata i va'ai mai i a mātou hai aŋa".

»He kī e rā taŋata: "Ka oho ia kōrua ka aŋa 'i tō'oku kona vino era".

⁸ »'I pō era, he kī e rā taŋata ki te kope ko ia te pū'oko o te aŋa: "Ka kī ki te nu'u aŋa mo oho mai, 'e 'ai ka 'auhau rō; ana ha'amata mai te nu'u o'o hope'a mai era ki te aŋa 'e ana haka oti a te nu'u o'o ra'e era".

⁹ »He tu'u ia te nu'u o'o 'i te hora pae o te ahi-ahi, 'e ki te ta'ato'a i 'auhau ai hai moni o te mahana aŋa e tahi. ¹⁰ 'I te hora hope'a, he topa ki te nu'u o'o ra'e. He mana'u 'ata rahi te moni ka 'auhau era ki a rāua, 'e i 'auhau tako'a ai hai moni o te mahana aŋa e tahi.

¹¹ »'I 'auhau era, he ha'amata he hēŋu'i-nju'i 'i roto i a rāua 'ā o ruŋa o tū taŋata era o'ona te 'āua vino, ¹² 'ai ka kī ki rā taŋata: "Te nu'u tu'u hope'a mai ena e tahi nō hora i aŋa ai, 'e i 'auhau ai e koe pē mātou 'ana haka 'uhu oho i te aŋa 'e i te ve'a-ve'a mai te pō'ā ki te pō".

¹³ »He pāhono e tū taŋata era ki te kope e tahi o rā nu'u hēŋu'i-nju'i era: "E hoa, ta'e a au e aŋa atu 'ana i te me'e ta'e tano. ¿'Ina 'ō tāua kai ha'a'au o ruŋa o te moni tano mo 'auhau atu mo te mahana aŋa e tahi?"

¹⁴ Ka tō'o tu'u moni 'e 'ai koe ka e'a ka oho rō. Mo haŋa o'oku mo 'auhau ki te kope o'o hope'a mai ki te aŋa pa he me'e 'auhau atu ena e au ki a koe, ¹⁵ he kape a au o tō'oku moni mo aŋa i tā'aku me'e i haŋa. ¿'O ko hū 'ana koe 'o te ai taŋata riva a au?"

¹⁶ He kī ia e Ietū: «Pē ira te haka tere iŋa 'āpī o te 'Atua ka ai ena: te nu'u ko rāua te hope'a 'i te hora nei,

pe mu'a ka oho ena ko rāua te ra'e; 'e te nu'u ko rāua te ra'e 'i te hora nei, pe mu'a ka oho ena ko rāua te hope'a».

He toru haka 'ite iŋa e Ietū i tō'ona mate

(Marko 10.32-34; Ruka 18.31-34)

¹⁷ E oho nō 'ana a Ietū a te ara ki Hērutarema, he tō'o a te tapa i tā'ana nu'u hāpī e ho'e 'ahuru mā piti 'e he kī:

¹⁸ «Nā ko 'ite 'ā e kōrua: 'I tātou e oho 'ana ki Hērutarema, he kona 'i ira ka va'ai ena i te [Poki o te taŋata] ki te rima o te nā [oromatu'a ra-rahi] era, 'e ki te [ma'ori o te haka tere hūrio]. E ha'a'au rō 'i roto i a rāua: te ūtu'a mō'ona he mate, ¹⁹ 'e e va'ai rō ki te nu'u ta'e he hūrio mo haka ka-kata, mo tiŋa'i hai 'uaka 'e mo veo 'i ruŋa i te tātaurō; 'e, 'i te toru mahana, he ora haka 'ou».

Te me'e haŋa e te matu'a o [Tanatiako] 'e o [Iovani]

(Marko 10.35-45)

²⁰ Te vi'e 'a Tevere'o 'e te nā poki hoko rua o rāua he haka hāhine ki a Ietū. He tū-turi ia rā vi'e mo no-no'i e tahi me'e. ²¹ He 'ui e Ietū:

—¿He aha ta'a me'e haŋa?

He kī e tū vi'e era:

—'I te hora o tu'u 'ariki iŋa, e haŋa rō 'ana a au mo noho atu tā'aku nā poki nei 'i muri i a koe, e tahi 'i te pā'iŋa mata'u 'e e tahi 'i te pā'iŋa maui.

²² He pāhono e Ietū:

—Kai 'ite kōrua he aha te kōrua me'e e no-no'i mai ena. ¿'E 'ite rō kōrua mo ha'aoroma'i i te 'ati pē au ka ha'aoroma'i nei i te 'ati ka topa mai ena?

He kī e rā nā kope:

—'Ē-ē, e ha'aoroma'i nō e māua.

²³ He pāhono e Ietū:

—He aŋi 'ā. Nā e 'amo tako'a rō e kōrua i te 'ati pē au, 'e, te me'e ko ai te kope mo noho 'i tō'oku pā'iŋa mata'u 'e 'i tō'oku pā'iŋa maui, ta'e he me'e mā'aku e va'ai. Ka va'ai ena ki te nu'u ko ha'ata'a era 'ā e tō'oku Matu'a.

²⁴ 'I ŋaro'a era i rā me'e e tū tētahi nu'u hāpī era 'a Ietū e ho'e 'ahuru, he riri rō atu 'ai mo rā nā taina.

²⁵ He raŋi ia e Ietū ki te ta'ato'a o rā nu'u hāpī era 'ā'ana mo haka hāhine ki muri i a ia 'e he kī:

«E 'ite rō 'ana e kōrua: nā 'i roto i te nu'u ta'e he hūrio e ai rō 'ā te nu'u pū'oko haka tere mana'u e tano rō 'ā a rāua mo haka aŋa i te taŋata pa he pua'a, 'e te nu'u 'ata ra-rahi he haka 'ite nō te aŋa ki te nu'u ko ai

a rāua. ²⁶ 'I roto i a kōrua 'ina ko ai te me'e tu'u pē ira. Te tano mau: te kope haŋa mo hōnui o roto i a kōrua, e tāvini mo te ta'ato'a, ²⁷ 'e te kope haŋa mo ra'e o roto i a kōrua, e 'ekaravo mo te ta'ato'a. ²⁸ Te Poki o te taŋata, pa'i, ta'e mo tāvini ki a ia e te rua i oho mai ai, mo tāvini ō'ona ki te rua 'e mo va'ai i a ia ki te mate, he 'auhau iŋa mo haka e'a me'e rahi taŋata mai roto i te ūtu'a o te hara».

He nāŋata matapō e rua
(Marko 10.46-52; Ruka 18.35-43)

²⁹ I e'a era ananake mai Herikō, nu'u rahi te nu'u i oho 'i muri i a kuā Ietū. ³⁰ 'E 'i te tapa o te ara e noho rō 'ā e rua nāŋata matapō. I ŋaro'a era ko Ietū te me'e vari a ira, he ohu: «ĶI Ietū, e te Hakaara o [Tāvita] ē, ka haka 'aroha koe i a māua!».

³¹ He ture e te nu'u mo mou, 'e 'ai rā nāŋata e 'ata ohu pūai era: «ĶI Ietū, e te Hakaara o Tāvita ē, ka haka 'aroha mai koe i a māua!».

³² He noho ia a Ietū, he raŋi ki tū ŋā matapō era mo haka hāhine 'e he 'ui:

—ĶHe aha te kōrua me'e haŋa mo aŋa atu?

³³ He pāhono e tū ŋā kope era:

—He ora o te māua mata.

³⁴ He haka 'aroha a Ietū i tū nu'u era, he haka puā hai rima ki te mata, 'e he ora rō 'ai. I oti era he e'a he oho 'i muri i a Ietū.

He tu'u iŋa o Ietū ki Hērutarema
(Marko 11.1-11; Ruka 19.28-40; Iovani 12.12-19)

21 Ko hāhine 'ana ki Hērutarema 'e ko tu'u 'ā ki Vetefāhē, he kona 'i muri i te Ma'uŋa o te 'Ōrivo, he ŋa e Ietū e rua o tā'ana nu'u hāpī ² koia ko kī:

«Ka oho kōrua ki te kona o mu'a era ai. Nā 'i ira te muni vahine e here rō 'ana koia ko tā'ana muni 'iti-'iti. Ka kume 'e 'ai ka ma'u rō mai ararua. ³ Mo kī atu e tahi me'e e te nu'u, e kī: “O te mātou Pū'oko Haka Tere ko Ietū i kī mai, 'e e ko roa he haka hoki atu”».

⁴ Te me'e nei i topa ai mo tano ki te me'e kī e te perofeta 'i te hora pāpa'i pē nei ē:

⁵ «Ka kī ki te nu'u o te kona ena ko [Tione], kī tako'a ko Hērutarema:

“Ka u'i tu'u 'Ariki e oho mai ena, pa he taŋata ta'e hōnui, e eke rō 'ana 'i ruŋa i te muni, he poki o te muni ma'u tao'a”».

⁶ He oho rā nu'u hāpī era he aŋa i tū me'e ŋa era e Ietū. ⁷ He ma'u i tū ŋā muni era ararua, he pu'a hai kahu o rāua i rā muni 'iti-'iti era, 'e he eke a Ietū.

⁸ Nu'u rahi te nu'u o ira. Tētahi i hēriki i oho i te rāua kahu a te ara, 'e tētahi atu i hēriki i oho hai raupā miro

i hati-hati mai ruŋa i te tumu. ⁹ Te nu'u ta'ato'a oho 'i mu'a 'e 'i tu'a o Ietū 'ai e ohu era:

«ĶI ha'ahana-hana tātou i te Hakaara o te 'ariki era ko [Tāvita]!»

«ĶTaŋata ha'amaitai e te 'Atua te taŋata oho mai nei hai 'iŋoa ō'ona!»

«Ķ[Osana] ki te 'Atua o te raŋi!».

¹⁰ I o'o era a Ietū ki Hērutarema, he mira-mira rō atu 'ai te mana'u o te nu'u ta'ato'a o ira koia ko 'ui:

—ĶKo ai te kope ena?

¹¹ 'E he pāhono e te nu'u oho 'i muri i a Ietū:

—Ko Ietū, he perofeta o Nātāreta, he kona e tahi o Karirea.

He tū-tute iŋa o Ietū i te nu'u
(Marko 11.15-19; Ruka 19.45-48; Iovani 2.13-22)

¹² He uru a Ietū ki roto i te [Kona Ha'amuri 'Atua] 'e he ha'amata he tū-tute i te nu'u ta'ato'a ho'o o roto. He to'o mai he huri i te 'amurama'a ta'ato'a o te nu'u tau'i moni 'e pē ira tako'a 'ā i te pepe o te nu'u ho'o pāroma, ¹³ 'e he kī: «Nā 'i ruŋa i te [Pāpa'i Mo'a] e hā'aki ena te vānaŋa o te 'Atua pē nei ē: “Tō'oku hare e kī rō: 'he hare mo pure”, 'e e haka riro rō 'ā e kōrua he 'ana o te toke-toke».

¹⁴ He haka hāhine ia te nu'u matapō 'e te nu'u va'e koke ki a Ietū 'i roto, 'e he haka ora e ia.

¹⁵ I take'a era e te nu'u [oromatu'a ra-rahi] 'e e te [ma'ori o te haka tere hūrio] i te mana e aŋa era e Ietū, 'e i ŋaro'a era i te ŋā poki e ohu 'ā 'i ira: «ĶKa ha'ahana-hana i te Hakaara o te 'ariki era ko Tāvita!», he riri rō atu 'ai ¹⁶ 'e he kī ki a Ietū:

—ĶE ŋaro'a rō 'ana e koe te me'e e ohu ena e te ŋā poki?

He pāhono e Ietū:

—'Ē-ē, 'i e au e ŋaro'a mai nei. 'E, ŷta'e 'ō ko tai'o 'ā e kōrua 'i ruŋa i te Pāpa'i Mo'a te kī iŋa o ruŋa i te me'e ena? Pē nei e kī ena:

«'Ā'au i haŋa mo ai mai te haha o te ŋā poki riki-riki 'e o te ŋā poki e 'omo-'omo nō 'ā i te ū te ha'ahana-hana tano mō'ou».

¹⁷ He haka rē ia a Ietū i rā nu'u, he e'a mai ira 'e he oho ki Vētānia. 'I ira i noho ai 'i rā pō.

Ko Ietū 'e he tumu pika e tahi
(Marko 11.12-14,20-26)

¹⁸ 'I te pō'ā e hoki e oho 'ana a Ietū ki Hērutarema, he ŋaro'a ko maruaki 'ā. ¹⁹ He take'a i te tumu pika e tahi 'i te ara. He haka hāhine, he u'i 'e 'ina kai rava'a e

tahi me'e, he raupā nō. He kī ia ki tū tumu pika era: «Kī te hora hope'a e ko ai haka 'ou ta'a pika!».

Kai roa he paka-paka tū tumu era. ²⁰ Te nu'u hāpī 'ā'ana, i take'a era i rā me'e, he māere rō atu 'ai 'e he 'ui ki a Ietū:

—ĶPē hē te tumu era kai roa i paka-paka rō ai?

²¹ He pāhono e Ietū:

—Te parauti'a, mo haka moe o kōrua i te mana'u 'i ruŋa i te 'Atua 'e 'ina e ko 'aka-'aka, te me'e o kōrua mo aŋa ta'e nō 'ō ko te me'e aŋa era e au ki te tumu pika. Mo kī o kōrua ki te ma'uŋa nei: «Ka 'oi mai nā 'e ka rere ki roto i te vaikava», pē ira ka ai era. ²² 'E te me'e ta'ato'a o kōrua mo no-no'i 'i roto i te pure e haka moe rō 'ana i te mana'u 'i ruŋa i te 'Atua, he rava'a e kōrua.

Ķ'A 'ai i va'ai ki a Ietū i te parau mo aŋa i te me'e aŋa e ia?

(Marko 11.27-33; Ruka 20.1-8)

²³ I oti era te me'e nei, he uru a Ietū ki roto i te Kona Ha'amuri 'Atua. E hāpī nō 'ana 'i roto, he haka hāhine te nu'u oromatu'a ra-rahi 'e te nu'u pū'oko haka tere hūrio 'e he 'ui:

—Ķ'A 'ai i va'ai atu i te parau mo aŋa ō'ou i te nā me'e ena e koe e aŋa ena?

²⁴⁻²⁵ He kī e Ietū:

—Ī a au he 'ui tako'a atu: Ķ'A 'ai i uŋa mai i a Iovani mo [papatito], o te 'Atua 'o o te taŋata? Mo pāhono mai o kōrua, he kī atu e au hai parau o 'ai a au e aŋa nei.

He ha'amata rā nu'u he tātake ki a rāua 'ā e kī era: «Mo kī o tātou: "O te 'Atua i uŋa mai", pē nei ka kī mai era: "ĶHe aha ia a kōrua i ta'e haka roŋo ai i tā'ana vā-naŋa?". ²⁶ 'E, e ko tano tātou mo kī: "O te taŋata i uŋa mai". E ri'a-ri'a rō 'ana, pa'i, a tātou 'i te nu'u; a rāua ta'ato'a e mana'u ena a Iovani he perofeta». ²⁷ He pāhono ia ki a Ietū:

—Kai 'ite a mātou 'a 'ai.

He kī e Ietū:

—'Ina tako'a ia a au e ko kī atu 'a 'ai i va'ai mai i te parau mo aŋa i te me'e aŋa e au.

He 'a'amu ha'aaura'a o te nā poki hoko rua

²⁸ He 'ui e Ietū:

—ĶHe aha te kōrua mana'u o ruŋa o te me'e nei? He taŋata e tahi e rua 'ā'ana poki, 'e ki te poki ra'e i kī ai: "E haŋu, ka oho koe 'arīnā ka aŋa 'i roto i te 'āua vino era".

²⁹ »He pāhono e rā poki: "Ķ'Ina a au kai haŋa mo oho!".

»I hini era he mana'u haka 'ou rā poki, he e'a he oho.

³⁰ »He kī e te matu'a ko tū me'e 'ā ki te rua poki. He pāhono e rā poki: "Ko tano 'ā, e oho rō a au".

»'E 'ina rā poki kai oho. ³¹ ĶKo ai o roto i te nā poki era i aŋa i te me'e haŋa o tō'ona matu'a?

—He kope ra'e era —i pāhono ai e rā nu'u.

'E he kī e Ietū:

—Te parauti'a, te [nu'u haka 'auhau i te taŋata hai moni mo te rōmano] 'e te nā vi'e tai'o 'i ra'e ka o'o ena ki a kōrua ki roto i te [haka tere iŋa 'āpī o te 'Atua]. ³² A Iovani Papatito, pa'i, i oho mai ai mo hāpī atu pē hē kōrua ana tano ki te mata o te 'Atua 'e 'ina e kōrua kai haka roŋo. O te nu'u haka 'auhau i te taŋata hai moni mo te rōmano 'e o te nā vi'e tai'o i haka roŋo 'e i ha'atura. 'E, ka ai atu i take'a rō e kōrua i te me'e ta'ato'a nei, 'ina kōrua kai huri te mana'u ki ruŋa i te 'Atua, 'e mo kōrua te me'e kī e Iovani ta'e he parauti'a.

He nu'u hāpa'o i te kona 'oka vino

(Marko 12.1-12; Ruka 20.9-19)

³³ »Ka haka roŋo mai te 'a'amu ha'aaura'a haka 'ou nei: He taŋata e tahi, e ai rō 'ana tō'ona henua nui-nui. He 'oka i te vino, he puru hai 'āua, he aŋa i te kona mo aŋa o te 'ava, 'e he haka tu'u i te kona ruŋa nui mo 'auario. I oti era he ha'a'au ananake ko te nu'u 'oka kai mo aŋa e rā nu'u i rā henua 'e mo 'auhau ki a ia i te 'apa vino tano mā'ana mo te hoa henua. He haka rē ia ki rā nu'u, 'e he e'a he oho rō 'ai.

³⁴ »I tano era te 'āva'e mo kato, he uŋa i tō'ona tāvini mo kī ki tū nu'u 'oka kai era mo haka ma'u i te 'apa vino tano mā'ana. ³⁵ He to'o mai e rā nu'u he 'a-'aru i tū nā tāvini era: he tiŋa'i i te kope e tahi ki te pi'i-pi'i, he tiŋa'i he haka mate i te rua, 'e i te toru he tama'i hai mā'ea.

³⁶ »He uŋa haka 'ou e tū taŋata era ō'ona rā henua me'e rahi atu tāvini. He to'o mai e rā nu'u 'oka kai era he tōtōā pē tū nu'u ra'e era 'ā.

³⁷ »I te hope'a, he uŋa i tā'ana poki mau 'ā, he mana'u e mo'a rō e rā nu'u. ³⁸ I take'a era i rā poki, he kī e tū nu'u era ki a rāua 'ā: "Ko te kope era te kope ki a ia ka topa ena te henua nei; ki tiŋa'i ki haka mate, ki topa ai te kona nei mo tātou".

³⁹ »He 'a-'aru, he to'o ki haho mai roto i tū 'āua vino era 'e he tiŋa'i he haka mate.

⁴⁰ »Iā. Ki te kōrua mana'u, hora era mo oho mai o te taŋata era ō'ona te henua, Ķhe aha te me'e ka aŋa era ki tū nu'u 'oka kai era?

⁴¹ He pāhono e rā nu'u:

—He tiŋa'i he haka mate i rā nā taparahi-ta'ata; e ko haka 'aroha. He va'ai i rā henua ki te tētahi nu'u 'oka kai, he nu'u e va'ai rō i te 'apa vino tano mo te hoa henua 'i te 'āva'e o te kato.

42 He kī ia e Ietū:

—ĶKai tai'o 'ana 'ō kōrua i te me'e hā'aki 'i ruŋa i te Pāpa'i Mo'a? Pē nei e kī ena:

“Te mā'ea ta'e haŋa era e te nu'u aŋa hare ko riro 'ana he mā'ea matu'a haka noho hare. O te 'Atua i aŋa pē ira, 'e ki te mātou mata he me'e nui-nui e tahi”.

43 »Te me'e 'a'amu atu ena e au o ruŋa i te haka tere iŋa 'āpī o te 'Atua. Nā e to'o rō, mai i a kōrua, 'e he va'ai ki te nu'u aŋa i tā'ana me'e haŋa 'e ha'atura ki a ia. 44 'E tū mā'ea kī atu ena e au, te kope viri a ruŋa he 'ota-'ota; 'e mo viri o rā mā'ea ki ruŋa, he pi'i-pi'i tahi.

45 Te ŋā oromatu'a ra-rahi era 'e te nu'u [fariseo], i ŋaro'a era i tū 'a'amu ha'aura'a era 'a Ietū, he 'ite e vānaŋa 'ana o ruŋa i a rāua. 46 He haŋa mo 'a-'aru i a Ietū 'e, 'i te ri'a-ri'a 'i te taŋata, 'ina kai 'a-'aru. Te taŋata, pa'i, e mana'u era a Ietū he perofeta.

He 'a'amu ha'aura'a o te ŋoŋoro hāipo-ipo
(Ruka 14.15-24)

22 He ha'amata haka 'ou a Ietū he vānaŋa hai 'a'amu ha'aura'a 'e he kī:

2 »Te me'e topa 'i te [haka tere iŋa 'āpī o te 'Atua] pa he me'e topa ki te 'ariki e tahi aŋa i te ŋoŋoro hāipo-ipo mo tā'ana poki tane. 3 He uŋa ki tō'ona tāvini hā'a-ki ki te nu'u era mo oho ki rā ŋoŋoro mo oho o rāua, 'e 'ina rā ŋā nu'u kai haŋa. 4 He uŋa haka 'ou ki tētahi tāvini he kī: “Ka kī ki te nu'u era mo oho mai: ko oti 'ā te haka riva-riva o te kai, ko haka tiŋa'i 'ana a au i te pua'a 'e i te tētahi 'animare porio, 'e ko oti tahi 'ana te aŋa; ka oho mai a rāua ki te ŋoŋoro”.

5 »'Ina kai tapa atu e rā nu'u. E tahi o rāua i oho ki 'u-ta ki tō'ona kona 'oka kai, te rua i oho ki tā'ana aŋa he ho'o me'e, 6 'e tētahi atu he 'a-'aru i tū ŋā tāvini era he tōtōā 'ātā ka mate rō.

7 »He riri rō atu 'ai tū 'ariki era, 'e he kī ki tā'ana va'e-hau mo tiŋa'i mo haka mate i rā nu'u taparahi-ta'ata era, 'e, tako'a, mo tutu i te kona noho o rā nu'u. 8 I oti era he kī ki tō'ona tāvini: “Ko oti 'ana te kai te aŋa, 'e te nu'u hā'aki era e au mo oho mai, he nu'u ta'e tano mau 'ā mo te ŋoŋoro nei. 9 Ka oho kōrua ki te ara, ka kī ki te nu'u ta'ato'a nō era o kōrua mo take'a mo oho mai ki te ŋoŋoro”.

10 »He e'a ia tū nu'u tāvini era ki te ara he haka takatata i te nu'u ta'ato'a nō era i take'a, 'e he 'i rō atu 'ai rā hare e te taŋata.

11 »I uru era te 'ariki u'i i te nu'u tu'u, he take'a i te taŋata e tahi 'ina he uru i te kahu tano mo te ŋoŋoro hāipo-ipo. 12 He kī: “E hoa, Ķpē hē koe i uru mai ai ki roto nei 'ina he uru i te kahu tano mo te ŋoŋoro hāipo-ipo?”.

13 »I mou nō tū kope era. 13 He kī ia e te 'ariki ki te nu'u ma'u kai: “Ka here-here a te va'e a te rima, 'e 'ai ka hoa

rō ki haho ki roto i te pōhāhā, kona 'i ira te taŋi 'e te 'au-'au ra'a niho”.

14 »Nu'u rahi, pa'i, te nu'u kī e te 'Atua mo o'o ki roto i te haka tere iŋa 'āpī ō'ona, 'e nu'u ta'e rahi te nu'u i ha'ata'a e ia mo o'o».

He kimi iŋa i te 'ōtohe mo 'a-'aru i a Ietū
(Marko 12.13-17; Ruka 20.20-26)

15 I oti era te me'e nei, he oho te [fariseo] he ha'a'au mo u'i i te rāve'a mo kī o Ietū i te me'e ta'e tano ki te rāua haka tere iŋa mo rava'a 'ōtohe mo tuhi iŋa ai i te hape. 16 He uŋa ki a Ietū i te rāua nu'u hāpī ananake ko te nu'u pe'e ki a [Erore] kī:

—E te Ma'ori, ko 'ite 'ana a mātou: ta'a me'e vānaŋa he parauti'a, e hāpī rō 'ana koe i te ara parauti'a o te 'Atua, 'e 'ina koe he haka tano i ta'a vānaŋa ki te man-a'u o te taŋata; ta'e, pa'i, mo haka koa i a rāua koe e vānaŋa ena. 17 Ki tu'u mana'u, Ķe tano mau rō 'ā a tā-tou e 'auhau nei i te moni kī mo 'auhau ki te 'ariki o te rōmano?

18 'I te aŋi-aŋi e Ietū i te mana'u rake-rake o rā nu'u, he kī:

—E te nu'u riva a te haho ē, Ķhe aha kōrua e kimi ena i te rāve'a mo pāhono hape atu ō'oku? 19 Ka haka take'a mai rā te tara 'aurī ena e 'auhau ena ki te rōmano.

He ma'u he va'ai e tahi [renario] 20 'e he 'ui e Ietū:

—ĶO 'ai te 'āriŋa nei 'e te 'iŋoa pāpa'i o ruŋa?

21 He pāhono e rā nu'u:

—O te 'ariki o te rōmano.

He kī e Ietū:

—Ka va'ai ia ki te 'ariki te me'e o te 'ariki, 'e ki te 'Atua te me'e o te 'Atua.

22 I ŋaro'a era i rā me'e, he māere rō atu 'ai tū nu'u era. He haka rē ia i a Ietū 'e he e'a he oho rō 'ai.

ĶE ora haka 'ou rō te nu'u mate?
(Marko 12.18-27; Ruka 20.27-40)

23 'I rā mahana mau 'ana, he oho tētahi nu'u [saruseo] u'i i a Ietū. Ki te rāua kī 'ina he taŋata he ora haka 'ou mai te mate. I tu'u era he kī:

24 —E te Ma'ori, pē nei a [Mōtē] i kī ai: mo mate o te kope e tahi 'ina kai ai te poki ararua ko tā'ana vi'e, e hāipo-ipo tō'ona taina ki te hove o rā kope mo ai o te poki mo ma'u i te 'iŋoa o rā taina mate era 'e mo ai o tō'ona hakaara.

25 »I mu'a 'ā i ai rō e hitu taina. He hāipo-ipo te kope ra'e, 'e i oho era he mate kai ai hia te poki. He hāipo-ipo ia te rua taina ki rā hove 26 'e kai ai tako'a te poki i

mate rō ai. Ko tū me'e 'ā te me'e i topa ki te toru, 'e 'ātā ki te ta'ato'a o rā nā taina. ²⁷ I oho era he mate tako'a rā vi'e.

²⁸ »Iā. 'I te hora o te taŋata mo ora mai te mate, ana topa tā'ue rā me'e, o tū nā taina era hoko hitu ō'a 'ai mau rā vi'e? Ta'ato'a nō, pa'i, i hāipo-ipo ai ki a ia.

²⁹ He pāhono e Ietū:

—Ki te hape i te kōrua mana'u pē nei ē: 'ina he taŋata mate he ora haka 'ou, he ta'e 'ite o kōrua i te me'e hā'aki o ruŋa i te [Pāpa'i Mo'a] 'e i te roa o te pūai o te 'Atua! ³⁰ Ka ora ena te taŋata mai te mate, he noho pa he merahi o te raŋi, 'ina he hāipo-ipo. ³¹ 'E te ora o te taŋata mai te mate, ō'a 'e ko tai'o 'ā e kōrua te kona kī e te 'Atua: ³² "A au he 'Atua, kope ki a ia e ha'amuri ena e te kōrua tupuna ko ['Aparahama], ko Itā'ata 'e ko Hākovo"? I kī ai i te vānaŋa nei ko mate era 'ā rā nu'u. iTe 'Atua he 'Atua o te nu'u ora!

³³ I ŋaro'a era e te nu'u i te me'e nei, he māere rō atu 'ai 'i te vānaŋa 'a Ietū.

Te roŋo hope'a o te nui-nui

(Marko 12.28-34)

³⁴ I 'ite era e te fariseo ko 'api 'ana te haha o te saruseo i a Ietū, he haka taka-taka 'e he oho he u'i. ³⁵ E tahi o rā nu'u, [ma'ori o te haka tere hūrio], 'i te haŋa mo haka 'atu i a Ietū, he 'ui:

³⁶ —E te Ma'ori, ō'a roŋo hē te roŋo hope'a o te nui-nui o te haka tere iŋa o te 'Atua pāpa'i e Mōtē?

³⁷ He kī e Ietū:

—«E haŋa koe ki te 'Atua hai haŋu ta'ato'a o tu'u māhatu, o tu'u vārua 'e o tu'u mana'u». ³⁸ He roŋo nei te roŋo hope'a o te nui-nui. ³⁹ 'E e ai tako'a rō 'ana te rua, pa he roŋo nei 'ā te nui-nui: «E haŋa koe ki te rua pa he haŋa iŋa ena 'ā ō'ou ki a koe». ⁴⁰ Te roŋo ta'ato'a era 'a Mōtē 'e te me'e pāpa'i e te perofeta e tano tahi nō mo ha'atura ki te roŋo nō nei e rua.

Ō'a i a ai ka haka ara mai ena te [Kiritō]?

(Marko 12.35-37; Ruka 20.41-44)

⁴¹ E taka-taka nō 'ana te fariseo, ⁴² he 'ui e Ietū:

—Ō'a hē te kōrua mana'u o ruŋa o te Kiritō? Ō'a i a ai ana haka ara?

He pāhono e rā nu'u:

—Mai i a [Tāvita].

⁴³ He kī e Ietū:

—Ō'a hē ia a Tāvita i kī ai te Kiritō he Pū'oko Haka Tere ō'ona 'i te hora haka vānaŋa era e te [Vārua Maitai]? Pē nei, pa'i, i kī ai:

⁴⁴ "A Iehoha te 'Atua i kī rō ki tō'oku Pū'oko Haka Tere:

'Ka noho koe 'i tō'oku pā'iŋa mata'u

'ātā ka haka rē rō e au i te nu'u ta'e haŋa atu ki a koe 'i raro o tu'u va'e".

⁴⁵ »Hai kī o Tāvita i te vānaŋa nei mo te Kiritō, e 'ite nei e tātou: te Kiritō ta'e nō he hakaara o Tāvita.

⁴⁶ 'Ina e tahi o rā nu'u i ai o te vānaŋa mo pāhono, 'e mai rā mahana he ri'a-ri'a rō 'ai ananake mo 'ui haka 'ou e tahi me'e.

Te huru o te [fariseo] 'e o te [ma'ori o te haka tere hūrio]

(Marko 12.38-40; Ruka 11.37-54; 20.45-47)

23 He kī ia e Ietū ki te nu'u taka-taka o ira 'e ki tā'ana nu'u hāpī:

² «I te ma'ori o te haka tere hūrio 'e i te fariseo te parau mo hāpī i te taŋata o ruŋa i te [haka tere iŋa 'a Mōtē]. ³ 'O ira, e ha'atura 'e e aŋa kōrua i te me'e ta'ato'a kī atu; 'e, 'ina kōrua ko ai pē rāua: he kī e tahi me'e, 'e te me'e aŋa me'e kē.

⁴ »Te aŋa o te nu'u nei he 'ata va'ai i te roŋo mo ha'atura e te taŋata, he me'e e ko rava'a mo 'amo 'i te paŋaha'a, 'e a rāua mau 'ā 'ina he aŋa e tahi me'e mo haka rehe 'iti i te paŋaha'a. ⁵ Te me'e ta'ato'a aŋa e rāua mo take'a nō e te taŋata. 'E te me'e haŋa rahi mo aŋa he 'ata haka nui-nui i te 'avahata here 'i ruŋa i te tira 'e i te rima 'i roto te parau pāpa'i hai me'e o ruŋa i te [Pāpa'i Mo'a]. 'E te me'e haŋa tako'a he uru i te kahu ko kumi ko kumi te vere-verē, ⁶ he noho 'i te kona hope'a o te riva-riva 'i te ŋoŋoro 'e 'i te pepe o te nu'u hōnui o roto i te [hare pure hūrio]. ⁷ Te me'e haŋa tako'a ananake he 'aroha e te taŋata 'i te ara pa he 'ariki 'e he kī ki a rāua: "e te ma'ori".

⁸ »A kōrua, 'ina ko ha'ati'a mo kī atu e tahi taŋata: "e te ma'ori". A kōrua ta'ato'a, pa'i, he taina 'e e tahi mau nō kōrua Ma'ori. ⁹ 'E 'ina e tahi kope o ruŋa i te henua mo kī e kōrua: "e matu'a". E tahi nō, pa'i, kōrua Matu'a: he 'Atua o te raŋi. ¹⁰ 'Ina tako'a kōrua ko haŋa mo kī atu e te nu'u: "e tō'oku pū'oko haka tere ē". Ko au mau nō, pa'i, he [Kiritō], te Pū'oko Haka Tere o kōrua. ¹¹ Te kope hope'a o te hōnui o roto i a kōrua e tāvini ki te ta'ato'a. ¹² Te kope haka paka, pa'i, i a ia, pe mu'a ka oho ena, e haka ka-kata 'e e haka ha'amā rō. 'E te kope ta'e haka paka i a ia, pe mu'a ka oho ena e haka hōnui rō.

¹³ »Ki te 'aroha i a kōrua, e te ma'ori o te haka tere hūrio 'e e te fariseo ē, he nu'u riva a te haho nō! E puru rō 'ana kōrua i te 'ōpani 'o o'o te taŋata ki roto i te [haka tere iŋa 'āpī o te 'Atua]. 'E a kōrua mau ena 'ā 'ina he o'o, 'e 'ina he haka rē mo o'o i te nu'u haŋa mo uru.

[¹⁴ »Ki te 'aroha i a kōrua, e te ma'ori o te haka tere hūrio 'e e te fariseo ē, he nu'u riva a te haho nō! E hiko ena kōrua i te hare o te ŋā vi'e hove, 'e mo haka tu'u

he me'e ta'e 'ati, he haka roa-roa e kōrua i te kōrua pure mo take'a e te taŋata. 'O ira, 'ata paŋaha'a te ūtu'a ka topa ena 'i ruŋa i a kōrua.]

¹⁵ »jKo te 'aroha i a kōrua, e te ma'ori o te haka tere hūrio 'e e te fariseo ē, he nu'u riva a te haho nō! E oho ena kōrua ki kona era ki kona era e kimi 'ā hai kope mo haka rori i te mana'u ki te haka tere iŋa hūrio, 'e ki rava'a, hai hāpī ena o kōrua e haka riro ena i rā kope he kope ko 'ata hape 'ā ki a kōrua 'e ko 'ata tano 'ā mo haka ūtu'a 'i roto i te pō'auahi ki a kōrua mau ena 'ā.

¹⁶ »jKo te 'aroha i a kōrua, e te pū'oko haka tere matapō ē! E kī ena kōrua: "Te kope hōrea hai Kona Ha'amuri 'Atua e ko 'ati mo ta'e haka tano i tā'ana hōrea; 'e, mo hōrea hai pīru o rā kona, e haka tano ki tā'ana hōrea". ¹⁷ jE te nu'u ma'a-ma'a 'e matapō ē! jHe aha te me'e 'ata hauha'a: he pīru o te [Kona Ha'amuri 'Atua], 'o rā kona mau era 'ā ō'ona? Te Kona Ha'amuri 'Atua 'ata hauha'a ki te pīru, 'e o rā kona te haka hauha'a i rā pīru.

¹⁸ »E kī tako'a rō 'ā kōrua: "Te taŋata hōrea hai [fata] 'i te Kona Ha'amuri 'Atua 'ina he 'ati mo ta'e haka tano; 'e mo hōrea hai tūtia haka rē 'i ruŋa, e haka tano ki tā'ana hōrea". ¹⁹ jE te matapō ē! jHe aha te me'e hope'a o te hauha'a: he tūtia 'o he fata, kona 'i ira te tūtia e tutu ena? Te tūtia e hauha'a ena 'o te ai nō 'i ruŋa i te fata. ²⁰ Te kope hōrea hai fata, ta'e hai rā kona nō i hōrea ai, hai me'e ta'ato'a o ruŋa i hōrea tako'a ai; ²¹ 'e te kope hōrea hai Kona Ha'amuri 'Atua, ta'e hai rā kona nō i hōrea ai, hai 'Atua noho 'i ira i hōrea tako'a ai. ²² 'E te kope hōrea hai raŋi, e hōrea 'ana hai pepe 'ariki o te 'Atua, 'e hai 'Atua, he kope noho 'i ruŋa.

²³ »jKo te 'aroha i a kōrua, e te ma'ori o te haka tere hūrio 'e e te fariseo ē, he nu'u riva a te haho nō! O roto o te ho'e 'ahuru 'apa o te me'e haka 'eo kai, he ha'ata'a e tahi o rā nā 'apa mo te 'Atua pa he me'e kī 'i ruŋa i te haka tere iŋa 'a Mōtē. Ka ai atu pē ira, 'ina kōrua he ha'atura ki te hāpī hope'a o te nui-nui mo te 'Atua o ruŋa i rā haka tere iŋa. Rā nā me'e: he aŋa i te me'e tano ki te mata o te 'Atua, he ai o te māhatu 'aroha, 'e he ta'e haka rē ki te hora hope'a mo haka tano i te me'e haŋa e te 'Atua. He nā me'e nei te me'e o kōrua mo aŋa 'e 'ina ko ta'e aŋa te me'e ra'e era. ²⁴ jA kōrua pa he nu'u matapō uŋa i te nu'u! Te aŋa he u'i 'o hape kōrua 'i te me'e 'iti-'iti 'e, 'i te rava aŋa i rā me'e, he hape i te me'e hope'a o te nui-nui, pa he kope kora i te nao-nao 'e horo i te kameio.

²⁵ »jKo te 'aroha i a kōrua, e te ma'ori o te haka tere hūrio 'e e te fariseo ē, he nu'u riva a te haho nō! E haka tu'u ena i a kōrua pa he nu'u tano ki te mata o te 'Atua 'e te kōrua roto e 'i rō 'ā e te fil'i 'e e te mana'u ki te moni nō, pa he hapaina 'o pa he mareti ko tata 'ā e kōrua a te haho 'e te roto ko te 'i iŋa 'ā e te 'ō'one. ²⁶ jE te fariseo matapō ē, ka haro'i te roto o te hapaina 'i ra'e, 'e pē ira ana ma'itaki tako'a te haho!

²⁷ »jKo te 'aroha i a kōrua, e te ma'ori o te haka tere hūrio 'e e te fariseo ē, he nu'u riva a te haho nō! A kōrua pa he kona tanu pāpaku ko paru ko haka tea-tea 'ā 'e ko haka nehe-nehe 'ana a te haho, 'e te roto

ko 'i 'ana e te ivi o te nu'u mate 'e me'e rahi atu me'e hano-hano. ²⁸ Pē ira a kōrua: e haka tu'u rō 'ana i a kōrua pa he nu'u 'ina e tahi hape, 'e te parauti'a mau nu'u reo-reo 'e mana'u rake-rake.

²⁹ »jKo te 'aroha i a kōrua, e te ma'ori o te haka tere hūrio 'e e te fariseo ē, he nu'u riva a te haho nō! Te aŋa o kōrua he haka riva-riva 'e he haka nehe-nehe i te kona tanu o te perofeta o mu'a 'ā 'e o te nu'u aŋa i te me'e tano ki te mata o te 'Atua ³⁰ koia ko kī: "Āhani mātou i ai 'i te hora era o te tupuna, e ko pe'e mātou ki te nu'u tiŋa'i i te perofeta". ³¹ 'E hai vānaŋa nei e haka 'ite ena: he hakaara a kōrua o rā nu'u tiŋa'i era i te perofeta. ³² j'O ira, ka haka mao te aŋa ha'amata era e te kōrua tupuna!

³³ »jE te hua'ai o te kōreha veneno ē! Nā kōrua he viri ki roto i te ūtu'a o te pō'auahi. ³⁴ 'O ira, 'i a au he uŋa atu hai perofeta, hai ma'ori 'e hai nu'u 'ite i te haka topa i te mana'u. Te tētahi o te nu'u nei he tiŋa'i he haka mate e kōrua 'e he veo 'i ruŋa i te tātaurō, 'e te tētahi atu o rāua he tiŋa'i e kōrua 'i roto i te hare pure hūrio 'e he kimi ki kona era ki kona era mo tōtōā. ³⁵ 'O ira ka topa atu ena 'i ruŋa i a kōrua te ūtu'a o te toto tehe ta'ato'a o te nu'u 'ina he rāua me'e ta'e tano i aŋa, mai i a [Āvere], kope e tano rō 'ā ki te mata o te 'Atua, 'ātā ki a Taharia, poki 'a Verekia, tiŋa'i haka mate e kōrua 'i te o'o iŋa o te [Kona Mo'a] o te Kona Ha'amuri 'Atua 'i tu'a o te fata. ³⁶ 'I a au he kī atu: te ūtu'a o te aŋa i te me'e ta'ato'a nei ka topa ena 'i ruŋa i te nu'u o te hora nei.

He taŋi iŋa o Ietū mo Hērutarema

(Ruka 13.34-35)

³⁷ »jE Hērutarema ē, e Hērutarema tiŋa'i i te perofeta, 'e tama'i hai mā'ea i te nu'u uŋa e te 'Atua ē! jKa hia rā nei mahana ō'oku i haŋa mo haka taka-taka i ta'a nā poki pa he haka taka-taka iŋa o te 'uha i tā'ana mā'aŋa 'i raro i te karā, 'e 'ina a koe he haŋa! ³⁸ 'E pe mu'a ka oho ena tu'u hare e ko noho haka 'ou e te taŋata. ³⁹ 'I a au he kī atu: e ko take'a haka 'ou e kōrua i a au 'ātā ki te mahana mo kī e kōrua: "jKī ha'ahana-hana te taŋata uŋa mai e te 'Atua hai 'iŋoa ō'ona!"».

Te [Kona Ha'amuri 'Atua] e haka marua tahi rō

(Marko 13.1-2; Ruka 21.5-6)

24 He e'a a Ietū mai roto i te Kona Ha'amuri 'Atua. E oho nō 'ā he haka hāhine tā'ana nu'u hāpī he ha'amata he aŋa mo u'i o Ietū i te nehe-nehe o rā kona. ² He kī e Ietū: «E u'i riva-riva te kona ta'ato'a ena. 'I a au he kī atu: pe mu'a ka oho ena e ko ai haka 'ou e tahi mā'ea 'i ruŋa i te rua mā'ea. E haka marua tahi rō».

He 'ati mo topa

(Marko 13.3-23; Ruka 21.7-24; 17.22-24)

³ He iri ia a kuā Ietū ki ruŋa i te Ma'uŋa o te 'Ōrivo. I tu'u era he noho a Ietū, 'e he haka hāhine tā'ana nu'u hāpī, he 'ui koro'iti mo rāua 'ā:

—E haŋa rō 'ana a mātou mo kī mai ō'ou a hē ka topa tū me'e era. 2 He aha te taŋa ka topa ena mo 'ite ko hāhine 'ā tu'u hoki iŋa mai 'e te pa'o iŋa o te ao?

4 He pāhono e Ietū:

—E u'i kōrua 'o haka ma'a-ma'a rō atu. 5 Nu'u rahi te nu'u ka tu'u atu ena he kī atu ko au a rāua. Pē nei ka kī atu ena: “He Kiritō au”, 'e nu'u rahi te nu'u ka haka ma'a-ma'a ena.

6 »E ŋaro'a rō e kōrua i te parau 'āpī o te tama'i o henua nei o henua era; 'e, 'ina ko ri'a-ri'a. He topa mau 'ā te me'e era, 'e, ka ai atu pē ira, kai hāhine 'ā te hope'a o te ao nei. 7 Te nu'u o te henua e tahi e moto rō ki te nu'u o te rua henua, 'e he tama'i te 'ariki o te kona e tahi ki te 'ariki o te rua kona. 'E me'e rahi kona he maruaki 'e he mākenu-kenu te henua. 8 He ha'ama-ta iŋa iho rā o te 'ati mo topa mai.

9 »E va'ai rō i a kōrua ki te nu'u mo tōtōā; e tiŋa'i e haka mate rō, 'e e ma'u rō te riri mo kōrua e te taŋata o te hau ta'ato'a, he haka moe o kōrua i te mana'u 'i ruŋa i a au. 10 'I rā ŋā mahana me'e rahi nu'u ka ta'e haka moe haka 'ou ena i te mana'u 'i ruŋa i te 'Atua; te taŋata e ma'u rō i te riri mo te rua 'e e va'ai rō e te kope e tahi i te rua ki te rima o te taŋata ta'e haŋa ki rā rua kope era. 11 He ai me'e rahi nō atu te perofeta reo-reo, 'e nu'u rahi te nu'u ka haka mana'u ena he parauti'a te rāua me'e kī. 12 'I rā ŋā mahana, 'i te rahi o te me'e ta'e tano aŋa, he kore te haŋa mo te rua o te rahi ra'a mau o te taŋata. 13 'E te kope haka moe oho nō i tō'ona mana'u 'ātā ki te hope'a, he rava'a i te ora 'āpī 'ina he hope'a ra'a va'ai e te 'Atua. 14 Te roŋo riva-riva o te [haka tere iŋa 'āpī o te 'Atua] e haka 'ite rō 'i te kona ta'ato'a mo 'ite tahi o te taŋata o te ao; ki oti ka tu'u iho mai ena te hope'a o te ao.

15 »Te perofeta era ko Taniera ko pāpa'i 'ana o ruŋa o te kope ko ia te me'e ka hano-hano 'e ka 'enemī ena e te 'Atua. Ka take'a ena e kōrua te māroa iŋa o rā kope 'i te kona mo'a, te aura'a, 'i te Kona Ha'amuri 'Atua (te kope tai'o, je aŋi-aŋi!), 16 'i rā hora te nu'u noho o Hūrea e tē-tere a te kona ma'uŋa; 17 'e te kope 'i haho o tō'ona hare e tere, 'ina ko uru ko to'o e tahi me'e mai roto; 18 'e te kope 'i 'uta, 'ina ko hoki ki te hare ni mo to'o i tō'ona paratoa. 19 'I rā ŋā mahana ko te 'aroha 'i te hānautama 'e 'i te ŋā vi'e e haka 'omo-'omo nō 'ā i te rāua ŋā poki! 20 E ani kōrua ki te 'Atua mo ta'e ai 'i te toŋa 'o 'i te [mahana haka ora] te mahana era mo tē-tere. 21 Te 'ati ka topa era 'i rā ŋā mahana he taparahi-ta'ata, he me'e kai topa 'ā mai te hora aŋa e te 'Atua i te ao ki 'aŋarīnā, 'e 'ina e ko ai haka 'ou te me'e tu'u pē ira ki te hora hope'a. 22 'E mo ta'e haka poto e te 'Atua 'i rā ŋā mahana, 'ina e tahi taŋata mo ora; 'e, he haka poto e ia 'i te haŋa ki te nu'u ha'ata'a mā'ana.

23 »Mo kī atu e te kope e tahi 'i rā ŋā mahana: “'I te [Kiritō] 'i a'a” 'o “'Ai te Kiritō 'ai rā”, 'ina kōrua ko haka roŋo. 24 Nā e tu'u rō mai te kiritō 'e te perofeta ta'e parauti'a; e aŋa rō i te mana mo haka ma'a-ma'a i te

mana'u o te taŋata, 'ātā i te mana'u o te nu'u ha'ata'a e te 'Atua mā'ana, ana rava'a e rāua. 25 E u'i e hāpa'o kōrua. Nā ko haka 'ite atu 'ana e au 'i ra'e ki te topa iŋa mai o rā ŋā me'e. 26 'O ira, mo kī atu ki a kōrua: “Ka u'i, 'ai rā 'i te kona 'one ta'e noho taŋata te Kiritō”, 'ina kōrua ko oho; 'e mo kī atu: “Ka u'i mai, 'i nei e piko atu ena”, e u'i 'o haka roŋo rō. 27 Pa he 'ana-'ana o te 'uira e take'a ena mai te pā'iŋa e'a o te ra'ā ki te pā'iŋa topa, pē ira ka take'a ena e te nu'u te hoki iŋa mai o te [Poki o te taŋata]. 28 'E pa he 'ite iŋa e tātou 'i te kona ai o te me'e mate hai taka-taka 'i rā kona o te manu kai i te me'e mate, pē ira ka 'ite ena, hai topa iŋa o te ŋā me'e ta'ato'a nei, ko hāhine 'ā te hoki iŋa mai o te Poki o te taŋata.

He hoki iŋa mai o te Poki o te taŋata

(Marko 13.24-37; Ruka 17.26-30,34-36; 21.25-33)

29 »Ki oti te mahana o rā ŋā 'ati, he pōhāhā te ra'ā, e ko mā'eha haka 'ou te māhina, he vī-viri te hetu'u, 'e he rurū tahi te me'e o te raŋi. 30 'I rā hora he take'a 'i te raŋi te tāpa'o o te hoki iŋa mai o te Poki o te taŋata. Te nu'u ta'ato'a o te ao he to'o te taŋi 'i te ri'a-ri'a, 'e he take'a i te turu iŋa mai o te Poki o te taŋata 'i ruŋa i te raŋi e tahi, 'i ruŋa i a ia te pūai 'e te 'ana-'ana o te 'Atua. 31 Hai puhī pūai o te koneta ka uŋa era i tā'ana merahi mo haka taka-taka i te nu'u ha'ata'a mā'ana mai te pā'iŋa era a ha-hā o te ao, mai te potu nei o te raŋi ki te potu era.

32 He kī haka 'ou e Ietū:

—E haka topa te kōrua mana'u 'i ruŋa i te tumu pika: ki ai tō'ona maŋa 'āpī, 'e ki pipi tō'ona raupā, he aŋi-aŋi e kōrua ko hāhine 'ā a hora. 33 Pē ira 'ā, ka take'a ena i te ŋā me'e ta'ato'a nei, e 'ite kōrua ko hāhine 'ā te hoki iŋa mai o te Poki o te taŋata. 34 'I a au he kī atu: te taŋata o te hora nei e ko ŋaro hia ka topa tahi rō ena te ŋā me'e nei. 35 E ŋaro rō te raŋi 'e te henua, 'e tā'aku vānaŋa nei e ko ŋaro; e tano tahi rō.

36 »Te mahana 'e te hora o tō'ona hoki iŋa mai 'ina e tahi taŋata i 'ite. Kai 'ite e te merahi o te raŋi, 'e pē ira tako'a 'ā e te Poki; he Matu'a mau nō te me'e i 'ite.

37 »Te noho iŋa o te taŋata 'i te ŋā mahana era ko hāhine 'ā mo hoki mai o te Poki o te taŋata pa he noho iŋa 'ā o te nu'u 'i te hora o Nōē. 38 'I te ŋā mahana era kai topa 'ā te 'ati o te 'ua 'ātā ki te mahana eke o Nōē ki ruŋa i te pahī, te taŋata e kai nō 'ana, e unu nō 'ā 'e e [hāipo-ipo] nō 'ā. 39 'E 'ina kai mana'u hia i topa rō ai te 'ati o te 'ua 'e he mā-mate tahi rō 'ai. Pē ira tako'a 'ā ka topa ena 'i te hora o te hoki iŋa haka 'ou mai o te Poki o te taŋata. 40 'I rā hora, o te ŋāŋata hoko rua e aŋa 'ana 'i 'uta, e tahi ka to'o ena, e tahi ka haka rē ena. 41 'E o te ŋā vi'e hoko rua e oro 'ā i te tariko, e tahi ka to'o ena, e tahi ka haka rē ena.

42 »'O ira, e veveri e 'ara te mata. Kai 'ite kōrua a hē ka tu'u mai te Pū'oko Haka Tere nei o kōrua. 43 Ka haka roŋo mai kōrua i te me'e nei: 'āhani e 'ite rō e te hoa hare i te hora mo tu'u o te toke-toke, e ko ha'uru 'o o'o

'o toke 'i tō'ona hare. ⁴⁴ 'O ira, e haka rito kōrua; te Poki o te taŋata e ko aŋi-aŋi hia e kōrua ka tu'u rō atu ena.

Te tāvini ha'atura 'e te tāvini ta'e ha'atura

(Ruka 12.41-48)

⁴⁵ »E ai kōrua pa he tāvini ha'atura 'e haka roŋo, kope haka pū'oko e te taŋata haka aŋa i a ia mo tuha'a i te kai 'i tō'ona hora ki te tētahi tāvini o te hare. ⁴⁶ ;Ko te koa i te tāvini ka tu'u era te taŋata 'ā'ana te haka aŋa, e aŋa 'ana i te me'e ta'ato'a kī mo aŋa! ⁴⁷ 'Ī a au he kī atu: te taŋata era 'ā'ana te haka aŋa e haka rē rō ki rā tāvini i tō'ona hauha'a ta'ato'a mo hāpa'o.

⁴⁸ »E mo ai he tāvini taparahi-ta'ata mana'u e ko hōrou e ko tu'u te taŋata haka aŋa i a ia, ⁴⁹ he ha'ama-ta he tōtōā i te tētahi tāvini 'e he piri ki te nu'u ta'ero he ka-kai 'e he unu ananake, ⁵⁰ 'i te hora 'e 'i te mahana e ko 'ite hia e rā kope, ka tu'u era tū taŋata haka aŋa era i a ia, ⁵¹ he haka ūtu'a pa he haka ūtu'a iŋa i te nu'u riva a te haho nō. He to'o ia te taŋi 'e te 'au-'au ra'a niho o rā tāvini.

He 'a'amu ha'aura'a o te uka e ho'e 'ahuru

25 »Te me'e topa 'i te [haka tere iŋa 'āpī o te 'Atua] pa he me'e topa i te ŋoŋoro hāipo-ipo e tahi. E ho'e 'ahuru uka he to'o i te rāua hakari'i 'e he e'a he oho mo hokorua i te kope era mo hāipo-ipo ki te kona era 'i ira te ŋoŋoro. ² E rima o rā ŋā uka, uka 'ite mo haka topa i te mana'u, 'e e rima ta'e pē ira. ³ Tū ŋā uka ta'e 'ite era mo haka topa i te mana'u he ma'u i te rāua hakari'i 'e 'ina kai ma'u i te mōrī mo ha'a'ī. ⁴ 'E te ŋā uka haka 'ou era e rima i ma'u rō i te rāua ipu mōrī koia ko te hakari'i.

⁵ »'I te ta'e tu'u hōrou o te kope era mo hāipo-ipo, he pohe rā ŋā uka mo ha'uru 'e he hā'uru. ⁶ Pe te 'ahuru mā piti o te pō, he ŋaro'a i te re'o pūai e ohu 'ā: "jNā ka pū rō mai te kope era mo hāipo-ipo! jKa e'a kōrua ka hokorua mai!"

⁷ »He e'a tū ŋā uka ta'ato'a era he haka riva-riva i te rāua hakari'i. ⁸ Tū ŋā uka era e rima ta'e 'ite era mo haka topa i te mana'u he kī ki tū ŋā uka haka 'ou era: "Ka va'ai mai e tahi 'apa o te kōrua mōrī ena, 'ī te mātou hakari'i he mate".

⁹ »He pāhono e rā ŋā uka: "'Ina, 'o ta'e tano rō mo mātou 'e mo kōrua. Ka oho kōrua ka ho'o mai to kōrua o te mōrī".

¹⁰ »Ko oho 'ana ia tū ŋā uka era ho'o i te rāua mōrī, 'ī ko tu'u 'ā te kope era mo hāipo-ipo, 'e tū ŋā uka 'ite era mo haka topa i te mana'u he uru 'i muri i rā kope ki te hāipo-ipo 'e he puru te 'ōpani. ¹¹ I oho era he tu'u tū ŋā uka oho era ki te rāua mōrī ho'o 'e he ohu: "jĒ, ka mātaki mai!"

¹² »He pāhono e tū kope era mo hāipo-ipo: "Te pa-rauti'a, kai 'ite a au ko ai a kōrua".

¹³ He kī ia e Ietū:

—E veveri e 'ara te kōrua mata; 'ina, pa'i, kōrua kai 'ite i te hora 'e i te mahana o tō'oku hoki iŋa mai.

He 'a'amu ha'aura'a o ruŋa i te moni

(Ruka 19.11-27)

¹⁴ »Te me'e topa 'i te haka tere iŋa 'āpī o te 'Atua pa he me'e topa ki te taŋata ko tano 'ā tō'ona hora mo oho ki te rua henua. He uŋa mo oho o tō'ona tāvini ki a ia 'e he va'ai i tō'ona moni ki rā ŋā tāvini mo haka aŋa. ¹⁵ Ki te tāvini ra'e i va'ai ai e pae ta'utini tara 'aurī, ki te rua e rua ta'utini 'e ki te toru e tahi ta'utini, i haka tano ki te rāua haka kē mo aŋa. I oti era he e'a rā taŋata he oho.

¹⁶ »Te kope era i a ia te pae ta'utini he haka aŋa i rā moni 'e he rava'a e pae ta'utini haka 'ou. ¹⁷ Pē ira tako'a 'ana tū kope era i a ia te rua ta'utini, he rava'a e rua ta'utini haka 'ou. ¹⁸ 'E te kope era i a ia e tahi ta'utini he kerī i te pū 'e he na'a i rā moni.

¹⁹ »Ko roa atu 'ana he hoki tū taŋata haka aŋa era i rā ŋā tāvini 'e he u'i e hia moni i rava'a o tū ŋā moni va'ai era e ia. ²⁰ 'I ra'e i tu'u ai te kope ki a ia i va'ai ai e pae ta'utini. He va'ai ki te taŋata era ō'ona te moni i tū pae ta'utini era koia ko kī: "E pae ta'utini koe i va'ai mai ai. He haka aŋa e au, 'e 'ī e pae ta'utini haka 'ou 'ī a'a".

²¹ »He kī e tū taŋata era: "He tāvini ha'atura 'e riva koe; 'o te ha'atura ō'ou 'i te me'e 'iti-'iti nei, he va'ai atu e au 'ata rahi te me'e mo hāpa'o e koe. Ka uru mai ki koa tāua".

²² »He tu'u ia te tāvini era ki a ia i va'ai ai e rua ta'utini 'e he kī: "E rua ta'utini koe i va'ai mai ai. He haka aŋa e au, 'e nā e rua ta'utini haka 'ou".

²³ »He kī e tū taŋata era: "He tāvini ha'atura 'e riva koe; 'o te ha'atura ō'ou 'i te me'e 'iti-'iti nei, he va'ai atu e au 'ata rahi te me'e mo hāpa'o e koe. Ka uru mai ki koa tāua".

²⁴ »I tu'u era te kope era ki a ia i va'ai ai e tahi ta'utini tara 'aurī, he kī ki tū taŋata era ō'ona te moni: "Ē, ko 'ite 'ana a au: taŋata haŋa koe mo aŋa e tu'u tāvini i ta'a me'e kī 'e mo rava'a me'e rahi atu me'e haka 'ou mai ta'a me'e va'ai. Pē ira tako'a 'ana koe 'i te hora haka 'oka i te kai. ²⁵ 'E, 'i te ri'a-ri'a ō'oku 'o ŋaro o rā moni era ō'ou, he ma'u e au he na'a 'i raro i te 'ō'one. 'Ī a au he haka hoki atu".

²⁶ »He pāhono e tū taŋata era: "He tāvini rake-rake 'e hupe-hupe koe. Mo ai ko 'ite riva-riva 'ana koe pē hē tō'oku huru, ²⁷ ;he aha tō'oku moni i ta'e ma'u ai ki roto i te hare hāpa'o moni mo 'ata rahi hora era ō'oku ka tu'u haka 'ou mai era?"

²⁸ »He kī ia e rā taŋata ki te nu'u o ira: "Ka hiko mai kōrua i te ho'e ta'utini tara ena 'e 'ai ka va'ai rō ki te kope era i a ia e ho'e 'ahuru ta'utini. ²⁹ Te kope, pa'i, 'ata rahi i a ia te me'e, 'ata rahi te me'e ka va'ai ena, 'e 'ātā he topa; 'e te kope 'ina e tahi 'ā'ana me'e, 'ātā ki te me'e 'iti-'iti mana'u e ia 'ā'ana ka hiko ena. ³⁰ 'E te tāvini hupe-hupe nei, ka tute ki haho ki roto i te pōhāhā, he kona 'i ira te taŋi 'e te 'au-'au ra'a niho".

He ha'ata'a iŋa o te 'Atua i te taŋata o te ao

³¹ »Ka hoki mai ena te [Poki o te taŋata] ko 'Ariki 'ā e haka vari tahi rō 'ā e te merahi ta'ato'a ō'ona, e te 'ana-'ana 'e e te pūai o te 'Atua, he noho 'i ruŋa i tō'ona pepe 'ariki. ³² Te nu'u o te henua ta'ato'a he taka-taka 'i mu'a i a ia, 'e he ha'ata'a e ia e tahi e tahi pa he taŋata hāpa'o māmoē e ha'ata'a 'ā i te vato-vato mai muri i te māmoē. ³³ He haka rē i te māmoē 'i tō'ona pā'iŋa mata'u 'e i te vato-vato 'i te pā'iŋa mauī. ³⁴ E kī rō e te 'Ariki ki te nu'u o tō'ona pā'iŋa mata'u: "Ka oho mai kōrua, e te nu'u ha'amaitai e tō'oku Matu'a ē; ka koa kōrua 'i te ao va'ai atu e te 'Atua haka riva-riva e ia mo kōrua mai te hora ha'amata aŋa e ia i te ao. ³⁵ I maruaki rō, pa'i, a au he va'ai mai e kōrua hai kai; i pohe rō ki te vai, he va'ai mai e kōrua hai vai; i ai rō a au he taŋata o te rua henua 'ina he kona mo noho, he to'o e kōrua ki roto i te kōrua hare. ³⁶ I noho rō a au 'ina e tahi kahu mo uru, o kōrua i va'ai mai; i māui-ui rō, he oho atu kōrua he hāpa'o i a au; i puru rō 'i roto i te hare ma'u'aurī, he oho tako'a atu kōrua he u'i i a au".

³⁷ »I rā hora ka 'ui era e tū nu'u tano era ki te mata o te 'Atua: "E te 'Ariki, 'i 'aŋahē a mātou i take'a ai i a koe e maruaki rō 'ana 'e he va'ai atu hai kai? 'i 'aŋahē a mātou i take'a ai i a koe ko pohe 'ana ki te vai, 'e he va'ai atu? ³⁸ 'i 'aŋahē a mātou i take'a ai i a koe he taŋata o te rua henua 'ina he kona mo noho 'e he to'o ki te mātou hare? 'i 'aŋahē a mātou i take'a ai 'ina u'u kahu mo uru 'e he va'ai atu? ³⁹ 'i 'aŋahē a mātou i take'a ai ko māui-ui 'ā 'o ko puru 'ā a koe 'i roto i te hare ma'u'aurī 'e he oho atu e mātou he u'i?"

⁴⁰ »E pāhono rō e te 'Ariki: "Te parauti'a, te me'e ta'a-to'a aŋa e kōrua mo te tētahi o tō'oku taina hope'a o te ta'e hōnuī e aŋa 'ā e kōrua mō'oku".

⁴¹ »Ki oti ka kī era e te 'Ariki ki te nu'u o tō'ona pā'iŋa mauī: "Ka haka tapa kōrua mai muri i a au 'e ka oho, e te nu'u tohu e te 'Atua ē, ki roto i te ahi 'ina he mate ki te hora hope'a aŋa mo Rukifero koia ko tā'ana tātane. ⁴² I maruaki rō, pa'i, a au, 'e 'ina e kōrua kai va'ai mai hai kai; i pohe rō ki te vai, 'e kai va'ai mai e kōrua; ⁴³ i ai rō a au he taŋata o te rua henua 'ina he kona mo noho, 'e kai to'o e kōrua i a au ki te kōrua hare; i take'a rō e kōrua 'ina ō'oku kahu uru, 'e kai va'ai mai e kōrua hai kahu; i māui-ui 'e i puru rō a au 'i roto i te hare ma'u'aurī, 'e 'ina kōrua kai oho atu u'i i a au".

⁴⁴ »I rā hora ka 'ui era e rā nu'u: "i 'aŋahē a mātou i take'a ai i a koe e maruaki rō 'ana, 'o e pohe rō 'ā ki te vai, 'o he taŋata o te rua henua 'ina he kona mo noho, 'o 'ina he kahu 'o e māui-ui rō 'ana, 'o e puru rō 'ā 'i roto i te hare ma'u'aurī 'e 'ina kai hā'ū'ū atu e mātou?"

⁴⁵ »E pāhono rō e te 'Ariki: "Te parauti'a, te me'e ta'e aŋa e kōrua mo te tētahi o tō'oku taina hope'a o te ta'e hōnuī e ta'e aŋa 'ā e kōrua mō'oku".

⁴⁶ He kī ia e Ietū:

—Te hope'a mo te nu'u o te pā'iŋa mauī he ūtu'a 'ina he hope'a ra'a, 'e mo te nu'u o te pā'iŋa mata'u tano ki te mata o te 'Atua he ora 'ina he hope'a ra'a.

He ha'a'au iŋa mo 'a-'aru i a Ietū

(Marko 14.1-2; Ruka 22.1-2; Iovani 11.45-53)

26 I oti era a Ietū te vānaŋa i te ŋā me'e ta'ato'a nei, he kī ki tā'ana nu'u hāpī: ² «Ko 'ite 'ana a kōrua: e rua mahana toe mo te [ŋoŋoro o te Pakate], 'e te [Poki o te taŋata] he va'ai ki te rima o te nu'u mo veo 'i ruŋa i te tātaurō».

³ I rā hora mau 'ā 'i te hare o Kaifā, he [oromatu'a hope'a o te ra-rahi], he taka-taka tahi te oromatu'a ra-rahi 'e te nu'u pū'oko haka tere [hūrio] ⁴ 'e he ha'a'au mo 'a-'aru i a Ietū hai reo-reo mo tiŋa'i mo haka mate. ⁵ 'E tētahi o rāua e kī era: «'Ina ko 'a-'aru 'i te ŋā mahana ena o te ŋoŋoro, 'o tātake 'e 'o moto te taŋata».

He huri iŋa i a Ietū hai mano'i

(Marko 14.3-9; Iovani 12.1-8)

⁶ A Ietū ia 'i Vētānia, 'i te hare o Tīmona, e kī tako'a era ko Rēpera. ⁷ He haka hāhine e tahi vi'e e ma'u rō 'ana i te ipu aŋa hai mā'ea nehe-nehe ko 'i 'ana e te mano'i hope'a o te hauha'a. E noho nō 'ā a Ietū 'i ruŋa i te 'amurama'a, he huri e rā vi'e hai rā mano'i a ruŋa i te pū'oko.

⁸ I take'a era e te nu'u hāpī 'a Ietū, he riri rō atu 'ai 'e he ha'amata he hēŋu'i-ŋu'i:

—i Mo te aha i haka māu'a ai i te mano'i era? ⁹ Māu'a 'ō i ta'e ho'o ai mo hā'ū'ū ki te nu'u veve. Te mano'i era, pa'i, e hauha'a rahi rō 'ā.

¹⁰ He 'ite e Ietū 'e he kī:

—i He aha kōrua e hēŋu'i-ŋu'i ena mo te vi'e nei? 'i e aŋa mai 'ā i te me'e riva-riva mō'oku. ¹¹ Te nu'u veve e ko ŋaro mai muri i a kōrua ki te hora hope'a, 'e a au e ko noho e ko oho nō atu 'i muri i a kōrua. ¹² Te me'e aŋa mai nei e nei vi'e hai huri mai i te mano'i ki ruŋa i tō'oku hakari e haka riva-riva 'ana i a au mo tō'oku hora tanu. ¹³ 'i a au he kī atu: 'i te kona ta'ato'a o te ao haka 'ite i te [roŋo riva-riva o te 'Atua], he vānaŋa tako'a o ruŋa i te me'e aŋa mai nei e ia; pē ira ka ta'e rehu ena a ia.

He ho'o iŋa o Hura i a Ietū

(Marko 14.10-11; Ruka 22.3-6)

¹⁴ E tahi o te ho'e 'ahuru mā piti nu'u hāpī 'a Ietū, ko Hura Ikariote, he oho he u'i i te nu'u oromatu'a ra-rahi ¹⁵ 'e he kī: «i E hia moni o kōrua mo va'ai mai mo va'ai atu ō'oku i a Ietū?».

He 'auhau e rā nu'u e toru 'ahuru tara 'aurī. ¹⁶ 'E mai rā hora i u'i ai e Hura i te hora tano mo va'ai i a Ietū.

He kai iŋa hope'a

(Marko 14.12-25; Ruka 22.7-23; Iovani 13.21-30; 1 Kōrinto 11.23-26)

¹⁷ I te mahana ra'e o te [ŋoŋoro kai i te haraoa 'ina he revaura], he haka hāhine tā'ana nu'u hāpī ki a Ietū he 'ui:

—Ā i hē mātou ana aŋa i te tātou kai mo te Pakate?

¹⁸ He pāhono e Ietū:

—Ka oho ki Hērutarema, ki te hare o te kope ko 'ite 'ā e kōrua ko ai, 'ai ka kī rō: «Te kī o te Ma'ori: “Ko hāhine 'ana tō'oku hora. 'Ī a au he oho atu ki tu'u hare ananake ko tā'aku nu'u hāpī mo aŋa i te ŋoŋoro o te Pakate”».

¹⁹ He oho ia te nu'u hāpī 'a Ietū, he aŋa i tū me'e kī era, he haka riva-riva i te kai mo te Pakate.

²⁰ I pō era, 'i ruŋa i te 'amurama'a a Ietū ananake ko tā'ana ho'e 'ahuru mā piti nu'u hāpī. ²¹ E ka-kai nō 'ana he kī:

—'Ī a au he kī atu: e tahi o roto o kōrua nā he va'ai i a au ki te nu'u.

²² He māui-ui rō atu 'ai te māhatu o tū nu'u era, 'e he ha'amata he 'ui e tahi e tahi:

—E Ietū, ġko au hō nā me'e?

²³ He pāhono e Ietū:

—He kope o roto o kōrua haka ruku i tā'ana haraoa 'i roto i te maretī haka ruku tako'a 'ā'aku. ²⁴ 'Ī a au he kī atu: te me'e ta'ato'a hā'aki 'i ruŋa i te [Pāpa'i Mo'a] mo topa ki te Poki o te taŋata e ko ta'e topa; 'e, ġko te 'aroha i te kope mā'ana e va'ai ki te nu'u! I hau 'i te riva mō'ona 'āhani i ta'e poreko.

²⁵ A Hura, he kope mā'ana e va'ai i a Ietū, he 'ui:

—E te Ma'ori, ġko au hō nā kope?

—'Ā'au mau 'ā i kī —i pāhono ai e Ietū.

²⁶ E ka-kai nō 'ana ananake, he to'o e Ietū i te haraoa e tahi, he māuru-uru ki te 'Atua, he more-more, he tuha'a ki tā'ana nu'u hāpī 'e he kī:

«Ka kai kōrua i te haraoa ena; he hakari ō'oku».

²⁷ I oti era he to'o i te hapaina vino, he māuru-uru ki te 'Atua, he va'ai ki tā'ana nu'u hāpī 'e he kī:

«Ka unu kōrua ta'ato'a mai roto i te hapaina ena.

²⁸ He toto nā ō'oku ka tehe ena mo te riva-riva o te taŋata, mo haka kore o te rāua hara. Hai nā toto ka tāpa'o ena i te [haka tere iŋa 'āpī o te 'Atua ananake ko te taŋata]. ²⁹ 'Ī a au he kī atu: e ko unu haka 'ou a au i

te vino 'ātā ki te mahana ka unu ena tātou i te vino 'āpī 'i te ao haka tere e tō'oku Matu'a».

He haka rehu iŋa i a Ietū

(Marko 14.26-31; Ruka 22.31-34; Iovani 13.36-38)

³⁰ He hīmene ia ananake mo ha'ahana-hana ki te 'Atua. I oti era he e'a a kuā Ietū he oho ki te Ma'uŋa era o te 'Ōrivo. ³¹ I te ara he kī e Ietū:

—A kōrua ta'ato'a he haka rehu i a au 'i te pō nei. Pē ira, pa'i, e hā'aki ena 'i ruŋa i te Pāpa'i Mo'a 'i te vānaŋa kī e te 'Atua pē nei ē:

“He tiŋa'i a au i te taŋata hāpa'o māmoe, 'e he maraŋa tahi tā'ana māmoe”.

³² »'E, ka ai atu pē ira, ki ora a au mai te mate, he piri a tātou 'i Karirea.

³³ He kī e Pētero:

—Mo haka rehu i a koe e te nu'u ta'ato'a ena, mā'aku koe e ta'e haka rehu.

³⁴ He kī e Ietū:

—'Arīnā mau nei 'ā 'i te pō, e ko 'o'oa hia te moa, ka kī ena koe ki te nu'u e toru kī iŋa kai 'ite koe ko ai a au.

³⁵ He kī haka 'ou e Pētero:

—ġKa ai atu he mate a au 'i muri i a koe, e ko kī au ki te hora hope'a kai 'ite a au ko ai a koe!

'E 'ai te tētahi nu'u hāpī 'a Ietū e kī tako'a era pē ira.

He pure iŋa o Ietū 'i Hetesēmānī

(Marko 14.32-42; Ruka 22.39-46)

³⁶ He oho ia a Ietū ananake ko tā'ana nu'u hāpī ki te kona te 'iŋoa ko Hetesēmānī 'i te Ma'uŋa era o te 'Ōrivo 'e he kī: «Ka noho nō kōrua 'i nei, 'Ī a au he oho he pure».

³⁷ He ma'u 'i muri i a ia i a Pētero 'e i te ŋā poki e rua 'a Tevere. He o'o ia te māui-ui ki roto i te māhatu o Ietū, he haka kiva-kiva, 'e he ŋaro'a 'ina ō'ona haŋu toe mo 'amo i te rahi o te 'ati ka topa era ki a ia. ³⁸ He kī: «E rahi rō 'ana te māui-ui ŋaro'a e au 'i roto i tō'oku māhatu 'i te 'ati ka topa mai ena. Ka no-noho kōrua 'i nei; e u'i 'o hā'uru rō».

³⁹ He haka 'ava-'ava a Ietū pe mu'a, he tū-turi he noi 'ātā ka puā rō te tira ki te 'ō'one, he pure: «E Koro ō'oku ē, ana tano ki a koe, ka to'o te 'ati nei mai ruŋa i a au. 'E, ka ai atu 'Ī 'ā'aku me'e haŋa, ka haka tano hai me'e 'ā'au i haŋa 'e ta'e hai me'e 'ā'aku».

⁴⁰ He hoki ia ki tū kona era 'i ira a kuā Pētero, he u'i ko hā'uru 'ana. He me'e ki a Pētero: «ġKai rava'a hia ka tahi hora o te hokorua mai o kōrua i hā'uru rō ai? ⁴¹ E 'a-'ara e pure 'o hara. Nā 'i roto i a kōrua te haŋa mo aŋa i te me'e riva-riva, te 'ino nō he ta'e pūai o kōrua».

⁴² He hoki ia a Ietū he pure: «E Koro ō'oku ē, mo kore o te rāve'a mo ta'e 'amo ō'oku 'i te 'ati ka topa mai ena, ka aŋa ta'a me'e nō era i haŋa».

⁴³ I hoki era ki muri i a kuā Pētero, ko hā'uru haka 'ou 'ā ananake 'i te rohi-rohi. ⁴⁴ He haka rē ia i rā nu'u, he hoki he pure te toru pure iŋa, 'e ko tū vānaŋa 'ā i kī ai.

⁴⁵ He hoki ia ki te kona 'i ira tū nu'u era 'e he kī: «¿E hā'uru 'ana a kōrua e haka ora 'ā? Ko tano 'ā te hora o te Poki o te taŋata mo va'ai ki te rima o te nu'u hara.

⁴⁶ Ka e'a ki ruŋa ki oho rō tātou. Nā ko hāhine mai 'ā tū kope era mo va'ai i a au ki te rima o te nu'u ra-rahi».

He 'a-'aru iŋa i a Ietū

(Marko 14.43-50; Ruka 22.47-53; Iovani 18.2-11)

⁴⁷ E vānaŋa nō 'ā a Ietū ki tū nu'u era, i tu'u ai a Hura, he kope o roto o te ho'e 'ahuru mā piti nu'u hāpī 'ā'ana. 'I muri i oho tako'a ai me'e rahi taŋata e ma'u-ma'u rō 'ā i te hoe 'e i te miro, i uŋa e te nu'u oromatu'a ra-rahi 'e e te nu'u pū'oko haka tere hūrio.

⁴⁸ Ko ha'a'au era 'ā e Hura ki rā nu'u pē nei ē: «Ka u'i atu ena kōrua i te kope ko hoŋi 'ā e au, ko ia rā taŋata. Ka 'a-'aru».

⁴⁹ He haka hāhine a Hura ki a Ietū he 'ui:

—¿Pē hē koe, e te Ma'ori ē?

'E he hoŋi a te 'āriŋa.

⁵⁰ He kī e Ietū:

—E hoa, ka haka mao ta'a aŋa.

He haka hāhine te tētahi o tū nu'u era he 'a-'aru i a Ietū. ⁵¹ E tahi kope o roto o te nu'u 'a Ietū he kume i tā'ana hoe, he pa'o i te tariŋa o te tāvini o te oromatu'a hope'a o te ra-rahi. ⁵² He kī e Ietū:

—Ka haka hoki ta'a hoe ena ki tō'ona kona. Te taŋata ta'ato'a moto hai hoe hai hoe ka mate ena. ⁵³ ¿Kai 'ite 'ō koe mo ani ō'oku ki tō'oku Matu'a, he uŋa mai e ia, 'i te hora mau nei 'ā, ka ta'utini ka ta'utini te merahi?

⁵⁴ Mo aŋa ō'oku pē ira, ¿pē hē ia ana haka tano te me'e hā'aki 'i ruŋa i te Pāpa'i Mo'a kī pē ira ana topa?

⁵⁵ He 'ui ia e Ietū ki tū nu'u ta'ato'a era:

—¿He toke-toke 'ō a au i oho mai ai kōrua e ma'u-ma'u rō 'ana i te hoe 'e i te miro mo 'a-'aru i a au? Pau-rō te mahana, pa'i, a au e hāpī era 'i te Kona Ha'amuri 'Atua, 'e 'ina kōrua kai 'a-'aru i a au. ⁵⁶ Te me'e ta'ato'a nei i topa ai mo tano ki te me'e kī e te perofeta 'i ruŋa i te Pāpa'i Mo'a.

'I tū hora mau era 'ā, he hoa i a Ietū e tā'ana nu'u hāpī ta'ato'a 'e he tē-tere.

Ko Ietū 'i mu'a o te nu'u hūrio ra-rahi

(Marko 14.53-65; Ruka 22.54-55,63-71; Iovani 18.12-14,19-24)

⁵⁷ He ma'u i a Ietū e tū nu'u 'a-'aru era i a ia, he oho ki te hare o Kaifā, he oromatu'a hope'a o te ra-rahi. E

taka-taka rō 'ā 'i ira te [ma'ori o te haka tere hūrio] 'e te nu'u pū'oko haka tere hūrio. ⁵⁸ A Pētero ia i haka 'a-va-'ava i oho ai 'i tu'a o rā nu'u 'ātā ka tu'u rō ki tū hare era. He uru ki te kona o haho 'ā, he noho 'i muri i te 'auario mo u'i pē hē rā me'e ka hope'a era.

⁵⁹ Te nu'u oromatu'a ra-rahi 'e tū ŋāŋata ta'ato'a haka 'ou era o te [nūna'a i a rāua te kī iŋa hope'a o te haka tere hūrio] e u'i 'ana i te 'ōtohe mo haka ūtu'a i a Ietū hai mate hai reo-reo o te nu'u mata'ite, ⁶⁰ 'e 'ina e rāua he rava'a, ka ai atu nu'u rahi te nu'u i tu'u i reo-reo o ruŋa i a Ietū.

I hope'a i tu'u ai e rua kope haka 'ou ⁶¹ he kī: «Te taŋata nei i kī rō pē nei ē: "E rava'a nō e au mo haka ŋaŋa 'e mo haka tu'u haka 'ou e toru nō mahana i te Kona Ha'amuri 'Atua'».

⁶² He māroa ia te oromatu'a hope'a o te ra-rahi he 'ui ki a Ietū:

—¿'Ina 'ō 'a'a pāhono? ¿He aha te me'e e kī mai nei o ruŋa ō'ou?

⁶³ I mou nō a Ietū. He kī e rā oromatu'a:

—Mo ai koe he [Kiritō], he Poki o te 'Atua, ka kī mai koe hai 'iŋoa o te 'Atua ora.

⁶⁴ He pāhono e Ietū:

—Nā e koe ko kī 'ā. 'E 'i a au he kī tako'a atu: e take'a rō e kōrua i te Poki o te taŋata e noho rō 'ā 'i te pā'iŋa mata'u o te 'Atua, i a ia te pūai ta'ato'a, 'e i tō'ona topa iŋa mai 'i ruŋa i te ranj e tahi.

⁶⁵ I ŋaro'a era i te vānaŋa 'a Ietū e rā oromatu'a, he ihi i tō'ona kahu mo haka take'a i tō'ona riri 'e he kī:

—¿Te vānaŋa o te taŋata nei he vānaŋa ta'e tano mo te 'Atua! ¿Mo aha nō o tātou te mata'ite haka 'ou? Nā ko ŋaro'a 'ana e kōrua i te kī iŋa mai i te vānaŋa ta'e tano. ⁶⁶ ¿Pē hē te kōrua kī?

He pāhono e rā nu'u:

—Ko hape 'ana a ia, ka tiŋa'i ka haka mate.

⁶⁷ He 'anu-'anu e te tētahi o rā nu'u a te 'āriŋa o Ietū 'e he pu'a. He puru i te mata hai kahu e te tētahi atu 'e he haka eke hai rima ki te 'āriŋa ⁶⁸ koia ko kī: «Mo ai koe he Kiritō, ¿ka kī mai 'a 'ai i pu'a atu!».

He kī iŋa o Pētero kai 'ite a ia ko ai a Ietū

(Marko 14.66-72; Ruka 22.56-62; Iovani 18.15-18,25-27)

⁶⁹ E noho nō 'ana a Pētero 'i haho o te hare o tū oromatu'a hope'a era o te ra-rahi, he haka hāhine e tahi vi'e tāvini he kī:

—Ē, a koe o roto i te nu'u oho 'i muri i a Ietū era o Karirea.

⁷⁰ 'I mu'a o te ta'ato'a a Pētero i 'ina ai 'e he kī:

—Kai 'ite a au he aha ta'a me'e e kī mai ena.

⁷¹ I hini 'iti era he oho ki muri i te 'ōpani. 'I ira i take'a ai i a Pētero e te rua vi'e tāvini he kī ki te tētahi nu'u:

—Te taŋata era o muri o kuā Ietū era o Nātāreta.

⁷² I hōrea, i 'ina haka 'ou ai e Pētero:

—Kai 'ite a au ko ai te taŋata ena!

⁷³ Ko hini atu 'ā, he haka hāhine ki a Pētero te nu'u māroa o rā kona he kī:

—He parauti'a mau 'ā a koe o roto o rā nu'u; hai huru o tu'u vānaŋa iŋa e aŋi-aŋi ena.

⁷⁴ He kī e Pētero:

—He hōrea atu au hai 'iŋoa o te 'Atua, kai 'ite a au ko ai te taŋata ena, 'e ka hoa a au ki roto i te pō'auahi mo ai e reo-reo atu 'ana a au!

'I rā hora mau 'ana he 'o'oa te moa. ⁷⁵ He topa te mana'u o Pētero ki tū me'e kī era e Ietū: «E ko 'o'oa hia te moa ka kī rō ena e koe e toru kī iŋa kai 'ite koe ko ai a au». He e'a ia a Pētero he oho mai tū kona era, 'e he to'o rō atu 'ai te taŋi.

He va'ai iŋa i a Ietū ki a Pirato

(Marko 15.1; Ruka 23.1-2; Iovani 18.28-32)

27 'I te pō era 'ā o te rua mahana, he ha'a'au te [oromatu'a ra-rahi] ta'ato'a 'e te nu'u pū'oko haka tere [hūrio] mo haka tiŋa'i i a Ietū. ² He ma'u ia i a Ietū e here-here rō 'ana he va'ai ki a Pirato, he suerekao rōmano.

He mate iŋa o Hura

³ A Hura, taŋata ho'o era i a Ietū, i 'ite era ko haka ūtu'a 'ana i a Ietū hai mate, he o'o te mamae ki roto i te māhatu. He oho he haka hoki i tū tara 'aurī era e toru 'ahuru ki te nu'u oromatu'a ra-rahi 'e ki te nu'u pū'oko haka tere hūrio, ⁴ he kī:

—Ko hara 'ana a au 'o te va'ai atu i te taŋata 'ina e tahi ō'ona hape mo tiŋa'i mo haka mate.

He pāhono e rā nu'u:

—Ta'e he me'e o mātou. ĩō'ou 'ā tu'u 'ati!

⁵ He ava e Hura i rā nā tara 'aurī a roto i te Kona Ha'amuri 'Atua. Ki oti he oho he tau reva-reva i a ia.

⁶ He runu e rā nā oromatu'a i tū nā tara 'aurī era 'e he kī: «Te moni nei ko 'ō'one 'ana 'i te toto, he moni 'auhau mo haka tiŋa'i i te taŋata; e ko tano tātou mo ha-ha'o ki roto i te 'avahata moni ha'ata'a mo te 'Atua».

⁷ He ha'a'au ia mo ho'o hai rā moni i te henua kī «He Henua o te Taŋata Aŋa i te Me'e hai 'Ō'one», mo ai o te kona mo tanu o te nu'u o te rua henua. ⁸ Pē ira rā kona i nape ai «He Henua Toto» 'e pē ira e kī ena 'ātā ki te hora nei. ⁹ Pē nei i tano ai te me'e kī e te perofeta era ko Heremia:

«He to'o i rā toru 'ahuru tara 'aurī era, he moni ha'a'au e te itaraera mo 'auhau mo rā taŋata,

¹⁰ 'e hai rā moni i ho'o ai i te henua o te taŋata aŋa i te me'e hai 'ō'one, pa he me'e kī mai era e te 'Atua».

A Ietū 'i mu'a o Pirato

(Marko 15.2-5; Ruka 23.3-5; Iovani 18.33-38)

¹¹ He haka māroa i a Ietū 'i mu'a o tū suerekao era ko Pirato, 'e 'ā'ana i 'ui:

—ĴHe 'ariki koe o te hūrio?

—'Ā'au i kī —i pāhono ai e Ietū.

¹² Te nu'u oromatu'a ra-rahi 'e te nu'u pū'oko haka tere hūrio 'ai e tuhi era i te me'e mo rāua he hape o Ietū, 'e 'ina he pāhono e Ietū. ¹³ 'O ira i 'ui haka 'ou ai e Pirato:

—Ĵ'Ina 'ō he ŋaro'a e koe te me'e ta'ato'a e tuhi atu ena?

¹⁴ 'Ina e tahi vānaŋa i kī e Ietū 'e he māere rō atu 'ai te suerekao.

Kai haŋa a Pirato mo haka ūtu'a i a Ietū hai mate

(Marko 15.6-20; Ruka 23.13-25; Iovani 18.38-19.16)

¹⁵ 'I te [ŋoŋoro o te Pakate], e ai rō 'ā te me'e rava māhani aŋa e te suerekao, he haka e'a e tahi taŋata mai roto i te hare ma'u'aurī, he kope haŋa nō era e te nu'u. ¹⁶ 'I roto i te hare ma'u'aurī te taŋata e tahi te 'iŋoa ko Ietū Varavā, he kope o ruŋa i a ia e vānaŋa rahi era te taŋata. ¹⁷ I taka-taka era te nu'u, he 'ui e Pirato: «ĴKo ai te me'e haŋa o kōrua mo haka e'a atu: ko Ietū Varavā, 'o ko Ietū kī he [Kiritō]?».

¹⁸ A Pirato, pa'i, ko 'ite 'ā i va'ai ai i a Ietū ki a ia e tū nu'u ra-rahi era o te hūrio he mākota 'o te ai e haka roŋo rō 'ā e te taŋata.

¹⁹ E noho nō 'ā a Pirato 'i te kona ture, i tu'u ai te roŋo o tā'ana vi'e pē nei ē: «'Ina koe ko aŋa e tahi me'e ki te taŋata ta'e hara ena. I moe vārua rō, pa'i, a au o ruŋa i a ia 'i te pō'ā 'e he huru kē rō atu 'ai a au».

²⁰ 'O haka e'a e Pirato i a Ietū, tū nu'u oromatu'a era 'e tū nu'u pū'oko haka tere era o te hūrio ko aŋa 'ā mo pe'e o te taŋata ki a rāua mo ani mo haka e'a i a Varavā 'e mo tiŋa'i mo haka mate i a Ietū.

²¹ He 'ui haka 'ou e te suerekao:

—ĴKo ai o te nā kope nei haŋa e kōrua mo haka e'a atu?

He kī e te nu'u:

—;Ko Varavā!

²² He 'ui ia e Pirato:

—;He aha tā'aku me'e mo aŋa ki a Ietū kī he Kiritō?

He pāhono tahi:

—;Ka veo 'i ruŋa i te tātaurō!

²³ He kī e Pirato:

—;He aha tā'ana me'e ta'e tano i aŋa?

He kī haka 'ou e tū nu'u era i 'ata haka pūai te re'o:

—;Ka veo 'i ruŋa i te tātaurō!

²⁴ I u'i era e Pirato 'ina he rāve'a toe 'ā'ana mo haka huri i te rāua mana'u 'e pe te 'ata pūai nō e pōŋeha era, he uŋa hai vai, he hopu i tō'ona rima 'i mu'a i te ta'ato'a, 'e 'ai ka kī:

—Ta'e ō'oku te hape o te mate o te taŋata nei; he me'e o kōrua.

²⁵ He pāhono e te taŋata ta'ato'a:

—;Mo mātou ia 'e mo te mātou ŋā poki te hape o te mate o te taŋata ena!

²⁶ He uŋa ia e Pirato he haka e'a i a Varavā, 'e he haka tiŋa'i i a Ietū hai 'uaka. I oti era he va'ai ki te va'e-hau i a Ietū mo ma'u mo veo 'i ruŋa i te tātaurō.

²⁷ He ma'u he ra'e e te va'e-hau i a Ietū ki te kona e tahi o roto i te hare o te suerekao. 'I ira i haka takataka ai i te va'e-hau 'e he haka vari tahi i a Ietū. ²⁸ He patu ananake i te kahu o Ietū 'e he pu'a hai kapa mea-me'a. ²⁹ He huki a te pū'oko hai hei i aŋa hai maŋa-maŋa o te tiare pū-pū 'e he va'ai e tahi miro ki te rima mata'u. I oti era he tū-turi te va'e-hau 'i mu'a o Ietū 'e he haka me'e-me'e he kī: «;Pē hē te 'Ariki o te hūrio?!».

³⁰ He 'anu-'anu tako'a e rā nu'u, 'e hai tū miro mau era 'ā o te rima e haka eke era ki te pū'oko. ³¹ I oti era te haka me'e-me'e pē ira, he patu ananake i tū kapa mea-me'a era, he haka uru haka 'ou i tō'ona kahu 'e he ma'u mo veo 'i ruŋa i te tātaurō.

He veo iŋa i a Ietū 'i ruŋa i te tātaurō

(Marko 15.21-32; Ruka 23.26-43; Iovani 19.17-27)

³² I e'a era mai ira, he piri ki te taŋata e tahi o Tīrene te 'iŋoa ko Tīmona. He haka 'amo ki a ia i te tātaurō o Ietū.

³³ I tu'u era ki te kona te 'iŋoa ko Korokota (te aura'a o te 'iŋoa nei: «kona o te pakahera taŋata mate»), ³⁴ he haka unu hai vino 'āno'i hai me'e maŋeo 'o ŋaro'a rahi

e ia i te mamae. I haka 'atu era e Ietū, 'ina kai haŋa mo unu.

³⁵ I oti era te veo 'i ruŋa i te tātaurō, he pere e te va'e-hau i te kahu o Ietū mo u'i ki a ai ki a ai ana topa.

³⁶ I oti era he no-noho 'i ira he 'auario. ³⁷ A ruŋa o tō'ona pū'oko i huki ai e tahi miro pararaha e pāpa'i rō 'ana he aha te tumu o tō'ona ūtu'a. E hā'aki era: «Ko Ietū nei, he 'Ariki o te hūrio».

³⁸ 'I te pā'iŋa mata'u 'e 'i te pā'iŋa mau i o Ietū te tātaurō haka 'ou 'i ruŋa i veo ai e rua toke-toke.

³⁹ Te nu'u vari a ira 'ai e vā-vā era koia ko ue-ue i te rāua pū'oko ⁴⁰ e kī era: «;Ta'e 'ō ko koe tū me'e kī era he haka hiŋa i te [Kona Ha'amuri 'Atua] 'e e toru mahana he haka tu'u haka 'ou e koe? ;Mo ai, ho'i, ō'ou he Poki o te 'Atua, ka haka e'a koe i a koe mai te 'ati ena 'e ka topa mai ruŋa i te tātaurō!».

⁴¹ Te nu'u oromatu'a ra-rahi, te [ma'ori o te haka tere hūrio] 'e te nu'u pū'oko haka tere hūrio 'ai e haka me'e-me'e tako'a era:⁴² «Ko haka e'a 'ana i te tētahi taŋata mai roto i te rāua 'ati, 'e, ;e ko rava'a mo haka ora i a ia mau era 'ā? ;Ta'e 'ō he 'Ariki o te itaraera? ;Mo topa mai ō'ona mai ruŋa i te tātaurō, he haka moe mātou i te mana'u 'i ruŋa i a ia!⁴³ Te kope ena e haka moe rō 'ana i tō'ona mana'u 'i ruŋa i te 'Atua. ;Ka haka ora ia e te 'Atua 'i te hora ena, ana ai e haŋa mau rō 'ā ki a ia! ;Ta'e 'ō ko kī mai 'ana he Poki a ia o te 'Atua?».

⁴⁴ 'E, tako'a, i vā-vā rō i a Ietū e tū ŋā toke-toke veo era 'i tupu'aki ō'ona.

He mate iŋa o Ietū

(Marko 15.33-41; Ruka 23.44-49; Iovani 19.28-30)

⁴⁵ I tano era te hora kai, he pōhāhā tahi te henua 'ātā ki te hora toru o te ahi-ahi. ⁴⁶ 'I rā hora, i a'u a Ietū i te re'o i ohu ai: *Elí, Elí, ;lemá sabactani?* (Te ha'aaura'a o te vānaŋa nei: «E tō'oku 'Atua ē, e tō'oku 'Atua ē, ;he aha koe i haka rē ai i a au hoko tahi nō?»).

⁴⁷ Tētahi o te nu'u o rā kona he ŋaro'a he kī: «Te kope nei e ohu 'ā ki te perofeta era ko 'Ēria».

⁴⁸ He tahuti ia e tahi o rā nu'u, he to'o i te me'e tu'u pa he vavai, he haka ruku ki roto i te vino maŋeo, he huki ki ruŋa i te miro 'e he ma'u he haka puā ki te ŋutu o Ietū mo 'omo-'omo. ⁴⁹ He kī e te tētahi: «Ka haka rē ki u'i tātou hoki e tu'u rō mai a [Ēria] e to'o rō i a ia 'o mate».

⁵⁰ He ohu pūai haka 'ou a Ietū, 'e he mate. ⁵¹ 'I rā hora mau 'ā te korotina o roto i te Kona Ha'amuri 'Atua he paihi mai ruŋa ki raro 'e he topa e rua pā'iŋa. † He mākenu-kenu te henua, 'e he ŋā'aha-'aha te mā'ea, ⁵² te kona ha-ha'o pāpaku he ha-hata, 'e me'e rahi nu'u [haka moe i te mana'u] 'i ruŋa i te 'Atua, ko māmate era 'ana, i ora haka 'ou ⁵³ 'e he e'a mai te kona

† Te korotina paihi topa era e rua pā'iŋa 'i te hora mate era o Ietū, kahu hio-hio, te peŋo-peŋo e haka pā e rua maŋa-maŋa tumu. Hai rā kahu e puru era i te kona hope'a o te mo'a o roto o te Kona Ha'amuri 'Atua o Hērutarema. He oromatu'a hope'a o te ra-rahi mau nō te me'e uru ki roto e tahi mahana 'i te matahiti. Te topa o rā korotina e rua pā'iŋa te aura'a: hai mate iŋa era o Ietū i ha-hata ai te ara mo tu'u o te taŋata hai ia ki muri i te 'Atua, 'e, tako'a, ta'e hai tūtia.

ha-ha'o i a rāua. I ora era a Ietū mai te mate, he oho rā nu'u ora haka 'ou era ki Hērutarema, 'e nu'u rahi te nu'u i take'a i a rāua 'i ira.

⁵⁴ I take'a era e te kape o te va'ehau ananake ko te nu'u va'ehau 'ā'ana 'auario i a Ietū 'i ruŋa i te tātaurō i te mākenu-kenu iŋa o te henua 'e i te me'e ta'ato'a topa, he to'o rō atu 'ai te ri'a-ri'a 'e he kī: «ĶHe anĶi mau 'ana 'ō te taŋata nei he Poki o te 'Atua!».

⁵⁵ 'I rā kona, mai kōnui 'ā, e u'i era me'e rahi nō atu ŋā vi'e oho ananake ko kuā Ietū mai Karirea hā'ū'ū ki a ia. ⁵⁶ 'I roto o rā ŋā vi'e a Māria Matarena, a Māria, matu'a o [Tanatiako] ararua ko [Kōsē], 'e te matu'a vahine o te ŋā poki 'a Tevereō.

He haka rē iŋa i te hakari o Ietū

(Marko 15.42-47; Ruka 23.50-56; Iovani 19.38-42)

⁵⁷ Ko hāhine 'ā mo pō, te taŋata 'ono e tahi te 'iŋoa ko Kōsē o te kona ko Ārimatea, he kope hāpī tako'a 'a Ietū, ⁵⁸ he oho he u'i i a Pirato 'e he ani mo va'ai i te hakari o Ietū. He kī e Pirato ki te va'ehau mo oho mo va'ai.

⁵⁹ He to'o ia e Kōsē i te hakari o Ietū, he viri hai tāvana rino ma'itaki. ⁶⁰ I a ia e ai rō 'ā e tahi kona 'āpī haka rē pāpaku, kona i haka ka-karo 'i te mā'ea pa he piha. He ma'u ia e Kōsē i te hakari o Ietū he haka rē 'i roto. I puru era i rā kona hai mā'ea nui-nui taka-taka, he e'a he oho.

⁶¹ 'I mu'a o rā kona e no-noho rō 'ā a Māria Matarena ararua ko te rua Māria.

He 'auario iŋa i te kona haka rē i te hakari o Ietū

⁶² 'I te rua mahana, he [mahana haka ora], te nu'u oromatu'a ra-rahi 'e te [fariseo] he oho he u'i i a Pirato, ⁶³ he kī:

—E te suerekao, ko mana'u 'ana a mātou ki te vānaŋa kī e tū reo-reo era 'i te hora e ora nō 'ā pē nei ē: 'i te toru mahana he ora haka 'ou a ia. ⁶⁴ 'O ira, ka uŋa koe ka haka 'auario i te kona haka rē era i te hakari o Ietū 'ātā ka tano rō te toru mahana, 'o oho e tā'ana nu'u hāpī 'o toke 'e ki oti he kī ki te nu'u ko ora 'ā mai te mate. Mo topa pē ira, 'ata hau rō atu te 'ati o te reo-reo hope'a nei ki te reo-reo ra'e era.

⁶⁵ He kī e Pirato:

—Nā te va'ehau nā. Ka oho ka aŋa hai rāve'a mana'u e kōrua 'o mātaki i rā kona.

⁶⁶ He oho ia ananake ki tū kona era, he tāpa'o i te mā'ea puru o rā kona mo 'ite ana haka makenu, 'e he haka 'auario ki te va'ehau.

He haka 'ite i te ora iŋa o Ietū mai te mate

(Marko 16.1-8; Ruka 24.1-12; Iovani 20.1-10)

28 I oti era tū [mahana haka ora] era, 'e i ha'amata era te mahana ra'e o te tāpati, he mahana tā-

pati, he oho a Māria Matarena ararua ko te rua Māria u'i i tū kona haka rē era i te hakari o Ietū.

² 'I rā hora he mākenu-kenu pūai te henua. He merahi e tahi o te 'Atua tū me'e era ko topa 'ana mai te raŋi. He haka hāhine ki te kona haka rē i te hakari o Ietū, he kume i te mā'ea puru, 'e he eke he noho 'i ruŋa. ³ Rā merahi me'e pura atu pa he 'uira, te kahu me'e rito-rito atu. ⁴ I take'a era e te va'ehau, he rurū rō atu 'ai 'i te ri'a-ri'a 'e he re-rehu. ⁵ He kī ia e te merahi ki tū ŋā vi'e era:

«'Ina kōrua ko ri'a-ri'a. Ko 'ite 'ana a au e kimi 'ana kōrua i a Ietū veo era 'i ruŋa i te tātaurō. ⁶ 'Ina a ia o nei, ko ora 'ana mai te mate pa he me'e kī era e ia. Ka oho mai rā ka u'i. ⁷ Ka hōrou kōrua, ka oho ka kī ki te nu'u hāpī 'ā'ana: "Ko ora haka 'ou 'ana a Ietū, 'e 'ai he oho ki Karirea; 'i ira ka piri ena ananake". He me'e nei tā'aku me'e mo kī atu».

He haka take'a iŋa o Ietū i a ia

⁸ He oho tū ŋā vi'e era mai rā kona e horo-horou rō 'ā koia ko ri'a-ri'a 'e ko koa haka 'ite i tū parau 'āpī era ki te nu'u hāpī 'a Ietū. ⁹ E oho nō 'ā ararua i māroa rō ai a Ietū 'i mu'a 'e he 'aroha. He haka hāhine tū ŋā vi'e era, he ha'amuri 'e he ha'i a te va'e. ¹⁰ He kī e Ietū: «'Ina kōrua ko ri'a-ri'a. Ka oho ka kī ki tō'oku ŋā taina era: "Ka oho ki Karirea; 'i ira a mātou ana piri"».

He 'auhau iŋa i te va'ehau 'o kī i te parauti'a

¹¹ E oho nō 'ana tū ŋā vi'e era, tētahi o te va'ehau 'auario i te kona haka rē i te hakari o Ietū he oho ki Hērutarema he 'a'amu ki te nu'u [oromatu'a ra-rahi] i te me'e ta'ato'a i topa. ¹² He oho ia tū ŋā oromatu'a era he vānaŋa ki te nu'u pū'oko haka tere hūrio mo ha'a'au he aha te rāua me'e mo aŋa. I oti era he 'auhau ki rā ŋā va'ehau hai moni ri'a-ri'a ¹³ 'e he hatu:

«E 'a'amu: e hā'uru nō 'ana a kōrua i tu'u atu ai te nu'u hāpī 'a Ietū, he mātaki i te kona haka rē pāpaku, he toke i te hakari. ¹⁴ 'E mo ŋaro'a tā'ue e te suerekao o ruŋa i te 'a'amu nei, mo mātou e vānaŋa ki a ia 'o 'ati kōrua».

¹⁵ He to'o ia tū ŋā va'ehau era i te moni, 'e he e'a he oho he aŋa pē rā me'e kī era e rā nu'u. 'E pē ira e 'a'amu ena e te [hūrio] 'ātā ki 'aŋarīnā.

He me'e mo aŋa e te nu'u hāpī 'a Ietū

(Marko 16.14-18; Ruka 24.36-49; Iovani 20.19-23)

¹⁶ Te ho'e 'ahuru mā ho'e nu'u hāpī 'a Ietū he e'a he oho ki Karirea, ki ruŋa o te ma'uŋa kī e ia. ¹⁷ I take'a era i a Ietū he ha'amuri, ka ai atu tētahi o rāua e 'aka-aka rō 'ā te mana'u.

¹⁸ He haka hāhine a Ietū ki muri i rā nu'u 'e he kī:

«Ko va'ai tahi mai 'ana te 'Atua i te parau mo haka tere i te me'e o te raŋi 'e o te ao nei. ¹⁹ Ka oho kōrua ka haka 'ite ki te nu'u o te kona ta'ato'a o ruŋa i a au, ki

riro ai a rāua he nu'u hāpī 'ā'aku, 'e 'ai ka [papatito] rō
hai 'īŋoa o te Matu'a, o te Poki 'e o te [Vārua Maitai].
²⁰ E hāpī mo ha'atura i te me'e ta'ato'a hāpī atu e au ki

a kōrua. 'E 'ina ko rehu: 'i muri i a kōrua a au paurō te
mahana 'ātā ki te hope'a iŋa o te ao».

MARKO

Te me'e 'ite mai o ruŋa i a Marko: 'ā'ana i hokorua i a Pauro 'i te ara ra'e oho ō'ona mo haka 'ite i te [roŋo riva-riva o te 'Atua] ki te nu'u ta'e he hūrio (Aŋa o te 'Āpōtoro 12.25). Te 'evaneria nei 'a Marko he 'evaneria hope'a o te poto-poto o ruŋa i te Pīpīria. Ka ai atu pē ira, hauha'a ri'a-ri'a te me'e i pāpa'i o ruŋa.

A Marko 'ina kai pāpa'i o ruŋa i te poreko iŋa o Ietū. Hai parau 'āpī riva-riva pē nei ē: a Ietū he [Kiritō], Poki o te 'Atua, i ha'amata ai i tā'ana 'evaneria (1.1). Ki oti i haka 'ite mai ai o ruŋa i a Iovani Papatito 'e o te [papatito] iŋa i a Ietū (1.2–11).

I oti era te haka 'ite mai o ruŋa i te papatito o Ietū, he 'a'amu he oho mai he aha he aha te me'e i aŋa e Ietū mai rā hora pe mu'a. 'Ina a Marko kai pāpa'i rahi o ruŋa i te hāpī 'a Ietū. Mō'ona, hai me'e aŋa e Ietū, hai huru o tō'ona noho iŋa 'i te ao nei 'e hai mate iŋa ō'ona 'i ruŋa i te tātaurō he 'ite e te nu'u: a Ietū i oho mai ai 'e ka ai atu mo aŋa i rā me'e e mate a ia (10.45). 'I ruŋa i te tētahi kona o tā'ana puka nei e haka aŋi-aŋi mai ena: e haka ke'o-ke'o e hā'aki ki te taŋata ta'ato'a o te ao i te parauti'a o ruŋa i a Ietū.

'I ruŋa nei e haka 'ite mai ena e Marko pē nei ē: i rahi rō te haka 'ite iŋa o Ietū ko ai mau a ia ki tō'ona taŋata he [hūrio], 'e, ka ai atu pē ira, 'ina e rāua kai aŋi-aŋi. O te taŋata kē nō atu o te rua henua, he va'e hau o te rōmano, i kī pē nei ē: (15.39).

He haka riva-riva iŋa i te ara mo te [Kiritō]

(Māteo 3.1-12; Ruka 3.1-9,15-17; Iovani 1.19-28)

¹ Te [roŋo riva-riva o ruŋa i a Ietū] he [Kiritō], Poki o te 'Atua, i ha'amata ai ² pe he me'e haka 'ite e te perofeta era ko 'Itaia 'i ruŋa i tā'ana puka 'i te vānaŋa kī e te 'Atua ki tā'ana Poki:

«'I a au he uŋa i tā'aku taŋata ma'uroŋo 'i ra'e ki a koe mo haka riva-riva i te ara mō'ou.

³ Tō'ona re'o e ŋaro'a rō 'i te kona 'one ta'e noho taŋata:

“iKa haka riva-riva te ara mo te Kiritō; ka mātaki e tahi ara tī-tika!”».

⁴ Pē ira i tu'u i tātara ai a Iovani Papatito 'i te kona 'one ta'e noho taŋata. Tā'ana tātara: e [papatito] te taŋata mo take'a ko [huri 'ana te rāua mana'u ki te 'Atua], pē ira he haka kore e te 'Atua i te rāua hara.

⁵ E rahi rō 'ā te taŋata e oho era mai Hērutarema 'e mai te kona ta'ato'a o Hūrea haka roŋo i tā'ana vānaŋa. Te nu'u pinitinia i te rāua hara i papatito tahi rō e Iovani 'i roto i te rio ko Horotana.

⁶ Te kahu uru o Iovani i aŋa ai hai huru-huru kameio 'e hai pena kiri e here era. Hai manu tu'u pa he perete'i 'e hai meri rava'a o rā kona e kai era.

⁷ 'I roto i tā'ana tātara e kī tako'a rō 'ā: «'I tu'a ō'oku ka oho mai ena te kope 'ata hau 'i te pūai ki a au; 'ātā e ko tano a au mo kume i te hau o tō'ona kiriva'e. ⁸ A au e papatito atu ena hai vai; 'e, a ia ka papatito ena i a kōrua hai [Vārua Maitai]».

He papatito iŋa i a Ietū

(Māteo 3.13-17; Ruka 3.21-22)

⁹ 'I te mahana e tahi he e'a a Ietū mai Nātāreta, he kona o Karirea, he oho ki tū rio era ko Horotana 'e he papatito e Iovani. ¹⁰ I e'a era a Ietū mai roto i te vai, he take'a ko ha-hata 'ā te raŋi 'e mai ruŋa i topa ai te Vārua Maitai ki ruŋa i a ia tu'u pa he pāroma. ¹¹ He ŋaro'a i te re'o mai te raŋi ka kī: «A koe he Poki 'ā'aku, Poki haŋa rahi; 'i ruŋa i a koe tō'oku koa».

He haka 'atu iŋa i a Ietū

(Māteo 4.1-11; Ruka 4.1-13)

¹² I oti era rā ŋā me'e, he ma'u e te Vārua Maitai i a Ietū ki roto atu era o tū kona 'one ta'e noho taŋata era. ¹³ E maha 'ahuru mahana i noho ai 'i ira, 'e he haka 'atu e Rukifero mo hara o Ietū; 'i muri i te manu'ino e noho era 'e o te merahi te hāpa'o i a ia.

He ha'amata iŋa o Ietū i tā'ana aŋa

(Māteo 4.12-17; Ruka 4.14-15)

¹⁴ I puru era 'i roto i te hare ma'u'aurī e [Erore] i a Iovani, he hoki a Ietū ki Karirea he ha'amata he haka 'ite i te [roŋo riva-riva o te 'Atua]. ¹⁵ Pē nei e kī era: «Nā ko hāhine mai 'ā te [haka tere iŋa 'āpī o te 'Atua]; ko tano 'ana, pa'i, te hora kī era mo tu'u mai. 'O ira, ka huri te kōrua mana'u ki a ia, ka haka tapa mai roto i te hara, 'e 'ai ka haka moe rō te kōrua mana'u 'i ruŋa i te roŋo riva-riva o te 'Atua, ki o'o ai a kōrua ki roto i te haka tere iŋa 'āpī ō'ona».

Ko Ietū 'e he nānata hī ika

(Māteo 4.18-22; Ruka 5.1-11)

¹⁶ E ha'ere e oho nō 'ā a Ietū a te taha-taha o te vai ko Karirea, he take'a e rua kope hī ika ko Tīmona 'e he taina ō'ona ko Antarea, e tuku 'ā. ¹⁷ He kī e Ietū: «Ka oho mai kōrua mo nu'u hāpī 'ā'aku. 'Ī a au he haka riro i a kōrua he nu'u hī taŋata mo te 'Atua».

¹⁸ 'I tū hora 'ā i haka rē ai i te rāua kūpeŋa 'e he e'a he oho 'i muri i a Ietū.

¹⁹ Pe mu'a 'iti he take'a i a [Tanatiako] ararua ko tō'ona taina ko [Iovani], he nā poki 'a Tevereō, 'i ruŋa i te rāua vaka e haka riva-riva 'ana i te kūpeŋa. ²⁰ He kī e Ietū ki tū nā kope era mo oho 'i muri i a ia. 'I tū hora 'ā he e'a ararua mai muri i te rāua matu'a tane 'e nu'u aŋa o rāua, 'e he oho 'i muri i a Ietū.

He taŋata uru e te tātane

(Ruka 4.31-37)

²¹ He oho ia a Ietū ananake ko tū nu'u era ki Kaperenāū. I tano era te [mahana haka ora], he uru a Ietū ki roto i te [hare pure hūrio] he hāpī i te taŋata. ²² I ŋaro'a era i a Ietū, he māere tahi 'i te pūai o te hāpī iŋa; e hāpī era pa he taŋata i a ia te parau o te me'e ta'ato'a 'e ta'e pa he hāpī iŋa o te [ma'ori o te haka tere hūrio].

²³ E hāpī nō 'ā a Ietū, he o'o e tahi taŋata ko uru 'ā e te tātane, he ohu:

²⁴ —ĶHe aha ta'a me'e haŋa i a mātou, e Ietū o Nātāreta ē? ĶE oho mai 'ana koe mo haka kore i a mātou? Ko 'ite 'ana a au ko ai koe: he kope mo'a uŋa mai e te 'Atua.

²⁵ He kī e Ietū ki tū tātane era:

—ĶKa mou 'e ka e'a koe mai roto i te taŋata ena!

²⁶ He haka kiki-kiki i rā taŋata, 'ai ka e'a mai roto koia ko ki-kiu.

²⁷ He ri'a-ri'a te nu'u ta'ato'a koia ko 'ui ki a rāua 'ā: «ĶHe aha nei? ĶTe huru o tō'ona hāpī iŋa huru 'āpī! ĶTe pūai 'ātā he ha'atura e te tātane!».

²⁸ 'E kai roa te parau 'āpī o ruŋa i a Ietū i tu'u ai ki te kona ta'ato'a o Karirea.

He haka ora iŋa o Ietū i te huŋavai o Tīmona

(Māteo 8.14-15; Ruka 4.38-39)

²⁹ I e'a era a kuā Ietū mai roto i te hare pure, he oho koia ko Tanatiako 'e ko Iovani ki te hare o Tīmona 'e o Antarea. I tu'u era he uru ananake. ³⁰ Te māmā huŋavai o Tīmona e moe rō 'ana 'i ruŋa i te ro'i, e vera pūai rō 'ā te hakari 'i te māui-ūi. He haka 'ite ki a Ietū. ³¹ He haka hāhine a Ietū ki tū vi'e era, he 'a-'aru a te rima 'e he haka e'a ki ruŋa. 'I tū hora 'ā he ora rō 'ai te māui-ūi, 'e he ha'amata rā vi'e he va'ai hai kai mo kuā Ietū.

He haka ora iŋa o Ietū me'e rahi nu'u māui-ūi

(Māteo 8.16-17; Ruka 4.40-41)

³² I ahi-ahi pō era, he ma'u ki a Ietū i te nu'u māui-ūi ta'ato'a o ira 'e i te nu'u o'o e te tātane. ³³ Pē ira i taka-taka ai te nu'u ta'ato'a o rā kona 'i haho o te hare.

³⁴ Rauhuru māui-ūi i haka ora 'e me'e rahi tātane i haka e'a mai roto i te taŋata, 'e 'ina he ha'ati'a e Ietū mo vānaŋa o rā nā tātane 'o te 'ite ko ai a ia.

He haka 'ite iŋa o Ietū i te roŋo o te 'Atua

(Ruka 4.42-44)

³⁵ 'I te rua mahana, e pō'uri nō 'ā, he e'a a Ietū mai Kaperenāū he oho he pure 'i te kona 'ina he taŋata.

³⁶ He e'a a kuā Pētero he kimi. ³⁷ I rava'a era he kī:

—Nā te nu'u ta'ato'a e kimi 'ā i a koe.

³⁸ He kī ia e Ietū:

—Mai tātou ki oho hai kona taŋata hāhine mai ki haka 'ite a au i te roŋo o te 'Atua 'i rā nā kona tako'a. Mo ira, pa'i, a au i oho mai ai.

³⁹ 'I roto i te hare pure hūrio o te kona ta'ato'a o Karirea e haka 'ite era a Ietū i te roŋo, 'e, tako'a, e haka e'a era i te tātane mai roto i te taŋata.

He haka ora iŋa o Ietū i te taŋata rēpera e tahi

(Māteo 8.1-4; Ruka 5.12-16)

⁴⁰ 'I te mahana e tahi he haka hāhine ki a Ietū te taŋata māui-ūi 'i te rēpera, he noi he tū-turi 'ai ka kī:

—Mo haŋa ō'ou, i a koe te ora o tō'oku māui-ūi.

⁴¹ He haka 'aroha a Ietū i tū taŋata era; he haka puā hai rima he kī:

—Ko haŋa 'ana a au.

⁴² 'I tū hora 'ā he kore te māui-ūi 'e he ora rō 'ai. ⁴³ I me'e era he haka oho e Ietū 'ai ka kī:

⁴⁴ —'Ina koe ko 'a'amu e tahi nu'u. Ka oho ka haka take'a i a koe ki te [oromatu'a]. E ma'u te me'e mo tūtia haka 'ite mai e [Mōtē] mo tu'u [haka ma'itaki] mo 'ite e te oromatu'a 'e pē ira tako'a 'ā e te taŋata ko ora 'ana tu'u māui-ūi.

⁴⁵ Kai mou rā kope; i 'a'amu nō ki te ta'ato'a. 'O ira 'ina he tano haka 'ou a Ietū mo tu'u ki te kona nūna'a hare e 'ite rō 'ana e te nu'u 'o putu-putu 'i muri. Te aŋa ia 'a Ietū he noho a te kona 'ina he rahi e te taŋata. 'E, ka ai atu pē ira, ko te tu'u iŋa 'ā ki a ia te nu'u māi te kona ta'ato'a.

He haka ora iŋa o Ietū i te taŋata hakari ta'e makenu (Māteo 9.1-8; Ruka 5.17-26)

2 He tu'u ki te mahana e tahi, he hoki a Ietū ki Kaperenāū. I 'ite era e te taŋata ko hoki 'ā, ² he 'I e te nu'u te hare 'i ira a ia 'ātā ki haho. He vānaŋa e Ietū o ruŋa i te [roŋo riva-riva o te 'Atua].

³ He tu'u ia hoko hā taŋata e tupa rō 'ana i te raŋo 'i ruŋa te taŋata hakari ta'e makenu. ⁴ 'I te rahi o te nu'u 'ina he rāve'a mo haka hāhine ki a Ietū. He ma'u he iri i tū raŋo era ki ruŋa o te hare, he mātaki i te ruŋa tī-tika ki tū kona era 'i ira a Ietū, 'e he haka topa i tū raŋo era.

⁵ I take'a era e Ietū te haka moe iŋa o rā nu'u i te rāua mana'u 'i ruŋa i a ia mo te ora o tū māui-ui era, he kī ki rā kope: «E haŋu, ko haka kore 'ā tu'u hara».

⁶ E no-noho rō 'ana 'i rā kona tētahi [ma'ori o te haka tere hūrio] he māere 'ai ka 'ui 'i roto i a rāua 'ā: ⁷ «¿Pē hē te kope era i mana'u ai mo kī pē rā? Vānaŋa ta'e tano te vānaŋa era mo te 'Atua. Ko ia mau nō, pa'i, te me'e haka kore i te hara».

⁸ 'I te 'ite o Ietū i te mana'u o rā nu'u he 'ui: «¿He aha e mana'u ena pē nā? ⁹ Ki a kōrua, ¿'ata aŋarahi mo haka kore i te hara ki te haka ora i te māui-ui? ¿Ta'e 'ō hai parau nō o te 'Atua te ŋā me'e nei e aŋa ena? ¹⁰ 'I he haka take'a atu pē nei ē: i a au, i te [Poki o te taŋata], te parau mo haka kore i te hara 'i te ao nei».

He kī ia ki tū taŋata hakari ta'e makenu era: ¹¹ «'I a au he kī atu: ka e'a koe ki ruŋa, ka ma'u tu'u raŋo, ka oho ki tu'u hare».

¹² 'I tū hora 'ā, e u'i nō 'ā te taŋata ta'ato'a, he māroa tū kope era, he to'o i te raŋo, he e'a he oho rō 'ai. He māere tahi tū nu'u era 'e he ha'amata he ha'ahana-hana ki te 'Atua e kī era: «¿Kai take'a 'ā e mātou te me'e ra'e tu'u pē nei!».

Ko Ietū 'e ko [Rēvī] (Māteo 9.9-13; Ruka 5.27-32)

¹³ 'I te mahana e tahi he hoki a Ietū ki te taha-taha o te vai era ko Karirea. E ha'ere nō 'ana, he piri te taŋata 'e he hāpī he oho e Ietū.

¹⁴ E oho nō 'ā he take'a i a Rēvī, he poki 'a Arafeo, e noho rō 'ana 'i tō'ona kona aŋa. A ia he kope haka 'auhau i te taŋata hai moni mo te rōmano. He kī e Ietū: «Ka oho mai koe mo taŋata hāpī 'ā'aku».

He māroa a Rēvī he e'a he oho 'i muri.

¹⁵ Kai roa, a Ietū ananake ko tā'ana nu'u hāpī e kai 'ā 'i te hare o Rēvī. 'I ira 'i ruŋa i te 'amurama'a tako'a me'e rahi [nu'u haka 'auhau i te moni mo te rōmano], 'e pē ira 'ana tētahi atu nu'u hara. E rahi rō 'ana, pa'i, te nu'u hara oho 'i muri i a Ietū.

¹⁶ Tētahi [fariseo], ma'ori o te haka tere hūrio, i take'a rō i a Ietū e kai 'ana ananake ko tū nu'u era. 'O ira i kī ai ki te nu'u hāpī 'a Ietū:

—¿Pē hē i mana'u ai te kōrua ma'ori mo kai 'i muri i te nu'u haka 'auhau hai moni mo te rōmano 'e 'i muri i te nu'u hara?

¹⁷ I ŋaro'a era e Ietū, he kī ki tū nu'u fariseo era:

—Te taote mo te māui-ui, ta'e mo te nu'u 'ina he māui-ui. A au i oho mai ai ki te nu'u hara mo huri i te rāua mana'u ki te 'Atua, ta'e ki te nu'u tano ki te mata o te 'Atua.

He tapu iŋa o te kai (Māteo 9.14-17; Ruka 5.33-39)

¹⁸ He tu'u te mahana he tapu te nu'u hāpī 'a Iovani Papatito 'e te nu'u fariseo i te kai, he rāve'a o te rāua haka tere iŋa mo haka koa o te 'Atua. He oho ia e te tē-tahi he kī ki a Ietū:

—Te nu'u hāpī 'a Iovani 'e o te fariseo e tapu 'ā i te kai. ¿He aha ta'a nu'u hāpī e ta'e tapu ena?

¹⁹ He pāhono e Ietū:

—¿E tapu mau rō i te kai te nu'u 'i te ŋoŋoro hāipo-ipo 'i te hora 'i muri i a rāua te kope ō'ona te hāipo-ipo? E ko tapu. ²⁰ 'E, nā e tano rō te mahana e to'o rō i rā kope mai roto i a rāua; ki tu'u rā mahana, ka tapu iho ena.

²¹ »'Ina he nu'u he hono i te kahu ko rū'au 'ā hai tapa kahu 'āpī; te hono 'āpī, pa'i, he hiki 'e he paihi te kahu rū'au, 'e he 'ata nui-nui te more.

²² »'E, tako'a, 'ina he huri i te 'ava 'āpī ki roto i te ipu kiri tuai, 'o paihi rā ipu 'e he māu'a te 'ava 'e pē ira tako'a 'ā te ipu. 'O ira te 'ava 'āpī ana ha'a'i ki roto i te ipu kiri 'āpī».

He mo-more iŋa i te tariko 'i te [mahana haka ora] (Māteo 12.1-8; Ruka 6.1-5)

²³ 'I te mahana haka ora e tahi, e vari e oho rō 'ā a kuā Ietū a te kona 'oka tariko. Te nu'u hāpī 'ā'ana he more-more i te tariko he kai he oho. ²⁴ He 'ui ia e te fariseo ki a Ietū:

—Ē, ¿he aha te nu'u hāpī 'ā'au e aŋa ena i te me'e ta'e ha'ati'a mo aŋa 'i te mahana haka ora?

²⁵ He pāhono e Ietū:

—¿Kai tai'o 'ana 'ō e kōrua i te me'e aŋa e [Tāvita] ananake ko te nu'u oho 'i muri i a ia 'i te mahana maruaki o rāua? ²⁶ ¿Ta'e 'ō 'i te hora era ko Aviatara te [oromatu'a hope'a o te ra-rahi] o te [hūrio], a Tāvita 'e te nu'u oho 'i muri i a ia i kai nō i te haraoa e tapu rō 'ā o roto i te Kona Ha'amuri 'Atua, ka ai atu he oromatu'a mau nō te me'e ha'ati'a mo kai i rā haraoa?

²⁷ He kī haka 'ou a Ietū:

—Ta'e mo te riva-riva o te mahana haka ora i aŋa ai e te 'Atua i te taŋata; he mahana haka ora te me'e i aŋa mo te riva-riva o te taŋata. ²⁸ 'E, i a au i te Poki o te taŋata te parau o te mahana haka ora mo kī i te me'e ha'ati'a 'e i te me'e ta'e ha'ati'a mo aŋa.

He haka ora iŋa o Ietū i te taŋata rima rehe-rehe

(Māteo 12.9-14; Ruka 6.6-11)

3 'I te mahana haka ora haka 'ou e tahi, he oho a Ietū ki te [hare pure hūrio]. 'I roto e tahi taŋata rima rehe-rehe.

² 'I roto tako'a te nu'u u'i hoki e haka ora rō a Ietū i te rima o tū taŋata era 'i rā mahana, mo rava'a 'ōtohe mo tuhi ko aŋa 'ā i te me'e ta'e tano ki te rāua haka tere iŋa.

³ He kī e Ietū ki tū taŋata rima rehe-rehe era: «Ka māroa rā koe 'i vāeŋa».

⁴ He 'ui ia e Ietū ki tū nu'u era: «¿He aha te me'e ha'ati'a mo aŋa 'i te mahana haka ora: he me'e riva-riva 'o he me'e rake-rake? ¿He haka ora i te taŋata 'o he tiŋa'i he haka mate?».

'Ina e tahi o rā nu'u i pāhono. ⁵ I riri a Ietū i u'i ai ki tū nu'u era koia ko haka 'aroha 'i te hio-hio o te rāua māhatu. He kī ia ki tū taŋata rima rehe-rehe era: «Ka haka toro mai tu'u rima».

I haka toro era he ora rō 'ai tū rima era.

⁶ I e'a era tū nu'u [fariseo] era, he ha'amata he ha'a'au ananake ko te nu'u pe'e ki a ['Erore] mo tiŋa'i mo haka mate i a Ietū.

Me'e rahi nō atu te nu'u i oho ki a Ietū

⁷ E tahi mahana he oho a Ietū ananake ko tā'ana nu'u hāpī ki te taha-taha o te vai era ko Karirea. 'I muri i a rāua i oho ai me'e rahi taŋata noho hāhine ki ira. ⁸ I 'ite era e te nu'u o ruŋa i te mana ta'ato'a aŋa e Ietū, he pae tako'a mai Hūrea, mai Hērutarema, mai Irumea, mai te rua pā'iŋa o te rio era ko Horotana, mai Tiro 'e mai Tīrone.

⁹ 'O ira a Ietū i kī ai ki tā'ana nu'u hāpī mo haka riva-riva e tahi vaka mo eke ō'ona 'o rei-rei i a ia e te taŋata. ¹⁰ 'I te rahi o te nu'u haka ora e ia, 'ai e rere era te nu'u māui-ui ta'ato'a ki ruŋa mo haka puā.

¹¹ 'E te tātane o'o ki roto i te hakari o te nu'u, e take'a era i a Ietū, he haka tū-turi i rā nu'u 'i mu'a o Ietū koia ko kī pūai: «¿Ko koe te Poki o te 'Atua!».

¹² Te aŋa nō 'a Ietū he ture pē nei ē: «'Ina kōrua ko haka 'ite haka 'ou ko ai a au».

He to'o iŋa o Ietū i te nāŋata mo ['āpōtoro]

(Māteo 10.1-4; Ruka 6.12-16)

¹³ He iri ia a Ietū ki ruŋa i te ma'uŋa ananake ko te nu'u i haŋa e ia. I taka-taka era 'i ruŋa, ¹⁴ he to'o mai roto e ho'e 'ahuru mā piti taŋata mo hā'u'ū ki a ia 'e mo haka 'ite o ruŋa i te [roŋo riva-riva o te 'Atua]. Kī rā nu'u i kī ai he 'āpōtoro, ¹⁵ 'e he va'ai ki a rāua i te parau mo haka e'a mai roto i te taŋata i te tātane.

¹⁶ He nu'u nei te nu'u i to'o e Ietū: ko Tīmona, nape e Ietū ko Pētero; ¹⁷ ko [Tanatiako] 'e ko [Iovani], ararua e kī era e Ietū ko Voanéreke (te aura'a: «he nā poki o te pātiri»). A rāua he nā poki 'a Tevere. ¹⁸ Te me'e tako'a i to'o: ko Antarea, ko Feripe, ko Torometi, ko Māteo, ko Tōmā, ko Tanatiako, poki 'a Arafeo, ko Tāreo, ko Tī-

mona, o roto i te nūna'a he [kananeo], ¹⁹ 'e ko Hura Ikariote, ho'o era i a Ietū.

Te mana o Ietū e kī era o [Veresepupa]

(Māteo 12.22-32; Ruka 11.14-23; 12.10)

²⁰ I hoki era a kuā Ietū ki te hare noho o rāua, he taka-taka haka 'ou te taŋata 'i ira. 'I te rahi, 'ina he rava'a te hora mo kai o rāua. ²¹ I 'ite era e te hua'ai o Ietū i tā'ana me'e aŋa, he oho mo to'o 'e mo ma'u 'i muri i a rāua; e kī era, pa'i, ko ma'a-ma'a 'ana.

²² 'E o te [ma'ori o te haka tere hūrio] tu'u mai Hērutarema te kī: «Ko o'o 'ā a Veresepupa, pū'oko o te tātane, ki roto i te kope era 'e ko va'ai 'ā i te parau mo haka e'a i te tātane mai roto i te taŋata».

²³ He kī e Ietū ki rā nu'u mo haka hāhine ki muri i a ia 'e he ha'aaura'a hai vānaŋa nei:

«¿Pē hē a Rukifero ana haka e'a i a ia mau 'ā? ²⁴ Te henua tama'i ki a rāua 'ā e ko roa he ŋaro, ²⁵ 'e te hua'ai moto ki a rāua 'ā e ko roa he ha'ata'a. ²⁶ Pē ira tako'a, mo moto o Rukifero 'e o tā'ana tātane ki a rāua 'ā, te pūai o tō'ona haka tere iŋa he ŋaro.

²⁷ »'Ina e tahi kope mo uru mo to'o i te me'e o roto i te hare o te 'aito mo ta'e here-here 'i ra'e i rā 'aito. Pē ira mau nō, pa'i, ana rava'a i te me'e o roto i rā hare.

²⁸ »'I a au he kī atu: te 'Atua e haka kore nō i te hara ta'ato'a 'e i te me'e ta'e tano kī e te taŋata. ²⁹ Te hara mau nō mo ta'e haka kore e te 'Atua: he kī i te vānaŋa ta'e tano mo te [Vārua Maitai]. Te hara nei e ko kore ki te hora hope'a».

³⁰ I kī ai a Ietū i te me'e nei 'o te kī e rā nu'u ko o'o 'ā a ia e te tātane.

He matu'a vahine 'e he taina o Ietū

(Māteo 12.46-50; Ruka 8.19-21)

³¹ He tu'u ia te matu'a vahine 'e te taina o Ietū. He no-noho 'i haho 'e he uŋa i te roŋo mo e'a. ³² He kī e te nu'u o muri i a Ietū:

—Ē, 'ai tu'u matu'a vahine 'e tu'u nā taina era 'ai haho ki a koe.

³³ He kī e Ietū:

—¿Ko 'ite 'ana a kōrua ko ai te nu'u he matu'a 'e he taina tako'a ō'oku?

³⁴ He u'i riva-riva ki te nu'u o tū kona era, 'ai ka kī haka 'ou:

—'I nei tako'a te nu'u he matu'a vahine 'e he taina ō'oku. ³⁵ Te nu'u aŋa, pa'i, i te me'e haŋa o te 'Atua he hua'ai tako'a ō'oku.

He 'a'amu ha'aaura'a o te taŋata 'oka kai e tahi

(Māteo 13.1-9; Ruka 8.4-8)

4 He oho haka 'ou a Ietū he hāpī 'i te taha-taha o te vai era ko Karirea. 'I te rahi o te taŋata e taka-taka

era, he eke he noho 'i ruŋa i te vaka o roto i te vai, 'ai ka hāpī i te nu'u o 'uta.

² Me'e rahi te me'e e hāpī era e Ietū hai 'a'amu ha'aaaura'a. E hāpī nō 'ā he kī:

³ «Ka haka roŋo mai te 'a'amu nei: He taŋata e tahi e 'oka 'ā i tā'ana kai. ⁴ I pī i oho era i te karu, he vī-viri te tētahi a te ara; he tu'u e te manu he kai.

⁵ »Tētahi o tū karu era i marere a te kona papa 'ō'one ta'e rahi 'e kai roa i tupu ai. ⁶ 'I te ta'e hio-hio o te aka 'e 'i te pūai o te ra'ā, he paka-paka.

⁷ »Kē karu i marere a te kona mauku pū-pū. 'I te taiko o rā nā mauku, he 'api i te karu tupu, he vavau 'e 'ina kai hua.

⁸ »Kē rō atu te karu i marere a te kona 'ō'one riva-riva. I tupu era he taiko. Mai rā nā karu i hua 'e i puŋa ai e toru 'ahuru, e ono 'ahuru, 'e 'ātā e ho'e hānere karu mai te karu nō e tahi».

⁹ I oti era he kī: «Te nu'u haŋa mo aŋi-aŋi ka haka topa te mana'u».

He aha a Ietū e hāpī era hai 'a'amu ha'aaaura'a

(Māteo 13.10-17; Ruka 8.9-10)

¹⁰ I marere i oho era te rahi ra'a o rā nu'u, he topa a Ietū ananake ko tā'ana nāŋata hāpī e ho'e 'ahuru mā piti 'e he tētahi nu'u haka 'ou. He 'ui e rā nā nu'u i te aura'a o tū 'a'amu era. ¹¹ He kī e Ietū:

«Kī a kōrua te 'Atua e haka 'ite ena i te me'e ta'e 'ite e te taŋata o ruŋa o tō'ona haka tere iŋa 'āpī. 'E ki te nu'u ta'e o roto i rā haka tere iŋa e vānaŋa ena hai 'a'amu ha'aaaura'a, ¹² kī ai ai ka u'i era, 'ina e ko take'a 'e ka haka roŋo era, 'ina e ko aŋi-aŋi, 'o huri te rāua mana'u ki te 'Atua 'e 'o haka kore i te rāua hara».

He haka 'ite iŋa o Ietū i te ha'aaaura'a o rā 'a'amu

(Māteo 13.18-23; Ruka 8.11-15)

¹³ He kī e Ietū:

«Mo ta'e aŋi-aŋi e kōrua i rā 'a'amu, ʔpē hē ia ka aŋi-aŋi ena i te tētahi 'a'amu ha'aaaura'a?

¹⁴ »Te taŋata 'oka kai era he kope haka 'ite i te roŋo o te 'Atua. ¹⁵ E ai rō 'ana te nu'u pa he kona ara era a ira i vī-viri ai te karu: e haka roŋo rō 'ana i te vānaŋa o te 'Atua, 'e, ka ai atu pē ira, e tu'u nō e Rukifero he to'o i rā vānaŋa mai roto i te māhatu.

¹⁶ »E ai tako'a rō 'ana te nu'u pē tū kona papa 'ō'one ta'e rahi era: a rāua e haka roŋo rō 'ana i te vānaŋa o te 'Atua 'e e to'o rō 'ā mo rāua hai koa. ¹⁷ Te me'e 'ino nō, 'i te ta'e raro nui o te aka, 'ina he hio-hio. Ka riri era te nu'u mo rāua o ruŋa o te vānaŋa o te 'Atua 'o ka topa era te 'ati, e ko haka noho haka 'ou i te mana'u 'i ruŋa i te 'Atua.

¹⁸ »E ai rō 'ana tētahi nu'u pē tū kona tupu era e te mauku pū-pū: e haka roŋo rō 'ana i te vānaŋa o te 'Atua. ¹⁹ Te me'e 'ino nō, 'i te taiko o te mauku pū-pū, te aura'a, 'i te pūai o te haŋa ki te me'e o te ao nei, ki te

'ono 'e ki te me'e ta'ato'a, te vānaŋa o te 'Atua he vavau, 'e e ko hua 'i roto i a rāua te me'e haŋa e te 'Atua.

²⁰ »'E nā e ai rō 'ana te nu'u pē rā kona 'ō'one riva-riva era: e haka roŋo rō 'ā 'e e hāpa'o rō 'ana i te vānaŋa o te 'Atua 'i roto i te rāua māhatu, 'e mai i a rāua e hua ena me'e rahi me'e haŋa e te 'Atua, pa he nā karu era 'ā mai ruŋa i hua ai e toru 'ahuru, e ono 'ahuru, 'e 'ātā e ho'e hānere karu mai te karu mau nō e tahi».

He ha'aaaura'a iŋa hai hakari'i i te vānaŋa o te 'Atua

(Ruka 8.16-18)

²¹ He kī tako'a e Ietū:

«'Ina ko na'a te [roŋo riva-riva o te 'Atua] pa he kope haka pura i te hakari'i 'ai ka ha-ha'o ki raro i te 'avahata 'o ki raro i te ro'i. E haka 'ite pa he kope haka rē i te hakari'i 'i te kona ruŋa nui mo mā'eha. ²² Pē ira ka haka aŋi-aŋi ena i te me'e ta'e haka 'ite 'i mu'a 'ā 'e ka ma'u ena ki roto i te mā'eha i te me'e na'a o ruŋa i te [haka tere iŋa 'āpī o te 'Atua].

²³ »Te nu'u haŋa mo aŋi-aŋi e haka topa te mana'u».

²⁴ He kī haka 'ou e Ietū:

«E u'i e haka topa riva-riva te kōrua mana'u o ruŋa i te hāpī 'ā'aku. Pa he hāito iŋa ena 'ā o te kōrua haka roŋo 'e ha'atura ki te 'Atua, ka hāito tako'a atu ena e ia i te me'e mo 'ite e kōrua o ruŋa 'ō'ona, 'e 'ātā e 'ata haka 'ite nō atu. ²⁵ Te kope aŋi-aŋi 'e to'o mō'ona i te parauti'a o te 'Atua he haka 'ata aŋi-aŋi. 'E te kope 'ina he to'o i rā me'e mō'ona, 'ātā ki te me'e 'iti-'iti 'ite e ia o ruŋa i te 'Atua ka to'o ena».

He ha'aaaura'a iŋa hai karu i te haka tere iŋa 'āpī o te 'Atua

²⁶ He kī tako'a e Ietū:

«Te haka tere iŋa 'āpī o te 'Atua pa he karu 'oka 'ā e te kope e tahi. ²⁷ Ka ha'uru 'o ka 'ara, ka pō 'o ka 'ōtea, mā te ta'e 'ite e ia pē hē, he tupu te karu 'e he nui-nui he oho te tumu. ²⁸ O te 'ō'one, pa'i, te aŋa he haka tupu, he haka nui-nui 'e he haka hua; te me'e ra'e he tupu, te rua he e'a te kāhui 'e te toru, he puŋa. ²⁹ Ki puŋa, he kato 'o te ai ko tano 'ā te hora mo to'o».

He 'a'amu ha'aaaura'a o te karu mostasa

(Māteo 13.31-32; Ruka 13.18-19)

³⁰ He kī haka 'ou e Ietū:

«ʔPa he aha 'ā te haka tere iŋa 'āpī o te 'Atua? ʔHai aha a au ana ha'aaaura'a atu? ³¹ Hai karu mostasa, karu hope'a o te 'iti-'iti. ³² Ka 'oka era, he tupu he nui-nui he oho 'e, ka hope'a era, i hau 'i te nui-nui ki te tētahi me'e o roto o te kona 'oka kai 'e, 'i te nui-nui 'e 'i te pa'va o te maŋa-maŋa, e tano nō mo aŋa o te manu i te rāua hakapupa».

Hai 'a'amu ha'aura'a e hāpī era a Ietū
(Māteo 13.34-35)

³³ A Ietū e haka 'ite e oho era i te vānaŋa o te 'Atua hai me'e rahi nō atu 'a'amu ha'aura'a pa he ŋā 'a'amu ha'aura'a nei. E hāpī era ki te roa nō mo aŋi-aŋi e te nu'u. ³⁴ 'Ina e tahi me'e i hāpī e Ietū i ta'e ai hai 'a'amu ha'aura'a, 'e ki topa ananake ko tā'ana nu'u hāpī, e haka 'ite tahi era e ia i te aura'a o rā ŋā 'a'amu.

Te tokerau 'e te pari he ha'atura ki a Ietū
(Māteo 8.23-27; Ruka 8.22-25)

³⁵ 'I rā mahana 'ā, 'i te ahi-ahi pō, he kī e Ietū ki tā'ana nu'u hāpī: «Mai ki oho tātou ki te rua pā'iŋa o te vai».

³⁶ He haka rē i tū nu'u ta'ato'a era 'e he oho ananake a ruŋa i te vaka era mai ruŋa i hāpī ai. 'I muri tako'a i oho ai te tētahi vaka.

³⁷ E oho nō 'ana ananake, he puhi pūai te tokerau, he ketu te pari, 'e he 'ī he oho te vaka e te vai. ³⁸ 'E a Ietū e ha'uru 'ana 'i tu'a o te vaka e raŋo rō 'ā i tō'ona pū'oko hai ŋaru'a. He haka 'ara e tū nu'u era 'ā'ana he kī:

—E te Ma'ori, ō'ina 'ō koe he tapa atu 'ī tātou e emu nei?

³⁹ He e'a a Ietū ki ruŋa he kī ki te tokerau 'e ki te pari: «Ō'Ka mou! Ō'Ka noho!».' I tū hora 'ā he kiva-kiva te tokerau 'e he māria te vai. ⁴⁰ I oti era he kī e Ietū ki tū nu'u hāpī era 'ā'ana:

—Ō'He aha a kōrua e ri'a-ri'a ena? Ō'Ina 'ana 'ō kōrua kai haka moe 'ā i te mana'u 'i ruŋa i a au?

⁴¹ He ri'a-ri'a rō atu 'ai ananake, 'ai ka kī ki a rāua 'ā: «Ō'Ko ai mau te kope nei? Ō'Ātā te tokerau 'e te pari e ha'atura rō 'ā ki a ia!».

He taŋata e tahi ko o'o 'ā e te tātane
(Māteo 8.28-34; Ruka 8.26-39)

5 He tomo ia ananake ki te rua pā'iŋa, ki te henua o te hērata. ¹² I topa era a Ietū mai ruŋa i te vaka, he haka hāhine e tahi taŋata e'a mai roto i te menemā ko o'o 'ā e te tātane. ³ Rā taŋata 'i roto i te menemā e noho era. 'E te nu'u o rā henua 'ina he rava'a haka 'ou mo haka noho i a ia, ka ai atu e here-here hai vivi. ⁴ Ko rahi 'ana, pa'i, te here-here iŋa o te rima 'e o te va'e 'e he motu-motu nō te aŋa i te vivi. 'Ina he rava'a mo haka māŋaro. ⁵ Ka pō ka 'ōtea e ha'ere era a ruŋa i te ma'uŋa 'e a te menemā koia ko ohu-ohu 'e ko tiŋi-tiŋi i a ia hai mā'ea.

⁶ I take'a era mai kōnui 'ā ko Ietū, he tahuti he tū-turi 'i mu'a, ⁷ 'e, i to'o te re'o ki roto era, i kī ai:

—Ō'Ka haka rē koe i a au, e Ietū, e te Poki o te 'Atua o te raŋi ē! Ō'Ka haka 'aroha koe i a au; 'ina koe ko tōtōā mai!

⁸ I kī ai pē ira e te tātane 'o te kī e Ietū: «Ō'Ka e'a koe mai roto i te taŋata ena!».

⁹ He 'ui e Ietū:

—Ō'Ko ai tu'u 'iŋoa?

He pāhono:

—Ko Ta'utini, 'i te me'e rahi ri'a-ri'a a mātou.

¹⁰ 'E he ani e rā tātane ki a Ietū mo ta'e tū-tute i a rāua mai tū henua era.

¹¹ 'I te tapa o te ma'uŋa, hāhine ki tū kona era 'i ira ananake, te nūna'a nui-nui o te oru e kai 'ā. ¹² He ani ia e tū ŋā tātane era ki a Ietū:

—Ka ha'ati'a mai koe i a mātou mo uru ki roto i te ŋā oru era.

¹³ He ha'ati'a ia e Ietū. He e'a rā ŋā tātane mai roto i rā taŋata 'e he uru ki roto i tū ŋā oru era. He huata a te 'ōpata, he vī-viri ki roto i te vai 'e he emu tahi rō 'ai. E piti ta'utini rā ŋā oru.

¹⁴ Te nu'u hāpa'o i rā ŋā oru he e'a he tē-tere ki te kona nūna'a hare. He 'a'amu 'i ira 'e 'i te kona ta'ato'a o 'uta o ruŋa i tū me'e take'a era e rāua. 'E he pae te taŋata he u'i.

¹⁵ I tu'u era ki tū kona era 'i ira a kuā Ietū, he take'a i te kope o'o era e te tātane ko riva-riva 'ā, e uru rō 'ana i te kahu 'e e noho rō 'ā 'i muri i a Ietū. He ri'a-ri'a ananake.

¹⁶ Te nu'u take'a i rā me'e he haka 'ite riva-riva ki te nu'u tu'u iho he aha te me'e i topa ki te taŋata o'o era e te tātane 'e ki te oru. ¹⁷ He ani ia e te nu'u o tū kona era ki a Ietū mo oho rō 'ai mai rā henua.

¹⁸ I hoki era a Ietū ki ruŋa i te vaka, he ani e tū taŋata o'o era e te tātane mo oho ō'ona 'i muri. ¹⁹ Kai ha'ati'a e Ietū; i kī nō:

—Ka oho koe ki tu'u hare 'e ka 'a'amu tahi ki tu'u hua'ai i te me'e aŋa atu e te 'Atua 'i te 'aroha i a koe.

²⁰ He oho ia tū taŋata era, he 'a'amu he oho a te kona ta'ato'a o Rēkāpori i te me'e riva-riva aŋa e Ietū ki a ia, 'e he māere tahi rō atu 'ai te nu'u.

He poki 'a Hairo 'e he vi'e māui-ui
(Māteo 9.18-26; Ruka 8.40-56)

²¹ I hoki haka 'ou era a Ietū a ruŋa i te vaka ki te rua pā'iŋa, he taka-taka me'e rahi taŋata. He topa a Ietū 'e he noho 'i te taha-taha o te vai.

²² He tu'u ia e tahi o te nu'u pū'oko haka tere o te [hare pure hūrio] te 'iŋoa ko Hairo. I take'a era i a Ietū, he tū-turi 'i mu'a ²³ 'e he ani:

—E Ietū ē, he mate tā'aku poki. Ka oho mai koe ka haka puā i tu'u rima ki a ia mo ora o tō'ona māui-ui o mate.

† Te 'iŋoa haka 'ou o te HĒRATA he kārara.

²⁴ He e'a a Ietū he oho 'i muri i a Hairo, 'e me'e rahi nu'u i oho tako'a. 'E 'i te rahi, ko piri 'ā e oho era ananake. ²⁵ 'I roto i rā nu'u e tahi vi'e ka ho'e 'ahuru mā piti matahiti o te 'amo i tō'ona 'ati, he toto tehe 'i-na he noho. ²⁶ He ma'u nō te aña 'i roto i a ia i te ma-mae o te me'e aña e taote era e taote era. Ko pau tahi 'ana, pa'i, tō'ona hauha'a 'i te u'i iña i te rāve'a mo ora o tū māui-ui era. 'E 'ina kai ora; pe te 'ata hau nō.

²⁷ I ŋaro'a era e rā vi'e i te vānaŋa o ruŋa i a Ietū, he oho he haka hāhine a tu'a, 'i roto i te rahi 'ā o te taŋata, he haka puā ki te kahu. ²⁸ Tō'ona mana'u, pa'i: hai haka puā nō ki te kahu o Ietū, he ora rā māui-ui. ²⁹ 'I tū hora 'ā he noho te toto 'e he ŋaro'a rō 'ai te ora.

³⁰ I ŋaro'a era e Ietū ko e'a 'ana te mana haka ora māui-ui mai ruŋa i a ia, he hāruī he u'i a ruŋa i te taŋata 'e he 'ui:

—Ķ'A 'ai tō'oku kahu i haka puā mai?

³¹ He pāhono e tā'ana nu'u hāpī:

—Ķ'Ina 'ō he take'a te taŋata e ŋatu mai nei, 'e nā koe e 'ui mai ena 'a 'ai koe i haka puā atu?

³² Ko te u'i iña 'ā a Ietū 'a 'ai a ia i haka puā. ³³ Tū vi'e era, ko rurū 'ana 'i te ri'a-ri'a 'e ko 'ite riva-riva 'ā ko ora 'ana tō'ona māui-ui 'i tū me'e aña era e ia, he oho he tū-turi 'i mu'a o Ietū 'e he kī tahi i te parauti'a.

³⁴ He kī e Ietū:

—E vovo, i ora ena koe he haka moe ō'ou i tu'u man-a'u 'i ruŋa i a au. Ka oho riva-riva; ko oti 'ā tu'u 'ati.

³⁵ E vānaŋa nō 'ā a Ietū ki rā vi'e, he tu'u te nu'u mai te hare o Hairo he kī ki a ia:

—Ko mate 'ana ta'a poki. ĶKi te aha nō a Ietū ana oho atu?

³⁶ Kai tapa atu a Ietū ki te vānaŋa o rā nu'u, i kī nō ki a Hairo:

—'Ina koe ko ri'a-ri'a; ka haka moe nō tu'u mana'u 'i ruŋa i a au.

³⁷ 'Ina kai ha'ati'a e Ietū i te taŋata mo oho 'i muri i a ia ki te hare o Hairo. Te nu'u nō i ma'u ko Pētero, ko [Tanatiako] 'e ko [Iovani], taina o Tanatiako. ³⁸ I tu'u era ki ira, he take'a e Ietū i te nu'u e ki-kiu e taŋi 'ā ki tū poki era. ³⁹ He uru ki roto 'e he kī:

—ĶHe aha a kōrua e ta-taŋi ena 'e e pōŋeha ena pē nā? 'Ina he poki kai mate; 'ai e ha'uru 'ā.

⁴⁰ He ka-kata tū nu'u era mo Ietū. He haka e'a i tū nu'u ta'ato'a era e Ietū ki haho, he to'o i te matu'a o rā poki 'e i tū ŋā kope era hoko toru, 'e he uru ki roto o te piha 'i ira rā poki. ⁴¹ He 'a-'aru i te rima o tū poki era ko mate 'ā 'e he kī:

—*Talita, kumi.*[†]

Te aura'a o te vānaŋa nei: «E vovo, ki a koe a au e kī atu ena: ka e'a ki ruŋa».

⁴² 'I tū hora 'ā he e'a ki ruŋa he ha'ere rā poki. He māere tahi rō atu 'ai ananake. Te matahiti o tū poki era e ho'e 'ahuru mā piti. ⁴³ He kī ia e Ietū:

—Ta'e kōrua mo 'a'amu i te me'e nei ki te hora hope'a.

'E he kī tako'a:

—Ka va'ai hai kai ki te poki.

'I Nātāreta a Ietū

(Māteo 13.53-58; Ruka 4.16-30)

6 He hoki a Ietū ki tō'ona kāiŋa ko Nātāreta. 'I muri i a ia i oho ai tā'ana nu'u hāpī. ² I tano era te [mahana haka ora], he ha'amata he hāpī 'i roto i te [hare pure hūrio]. Nu'u rahi i ŋaro'a i a Ietū 'e he 'ui ki a rāua 'ā koia ko māere:

—Ķ'I hē te kope nei i 'ite ai i te me'e ta'ato'a era? ĶO hē tō'ona mārama-rama 'e te pūai mo aña i te mana aña e ia? ³ ĶTa'e 'ō te kope nei he tāmuta, he poki 'a [Māria], 'e he taina o [Tanatiako], o [Kōsē], o Hura 'e o Tīmona? ĶTa'e 'ō 'i nei tako'a e noho ena tō'ona ŋā taina vahine ena?

'E te nu'u o ira he riri rō atu 'ai mo Ietū, 'e kai haka moe i te rāua mana'u 'i ruŋa i a ia. ⁴ He kī ia e Ietū:

—'Ina e tahi perofeta mo'a e tō'ona hua'ai 'e e te nu'u o tō'ona kāiŋa. O te nu'u o te tētahi kona te mo'a i a ia.

⁵ 'E kai rahi te mana i aña e Ietū 'i Nātāreta, he ta'e haka moe o te nu'u o rā kona i te mana'u 'i ruŋa i a ia. Te mana nō i aña he haka ora i te tētahi nu'u māui-ui i haka puā hai rima. ⁶ 'E a Ietū ko māere 'ā 'i te nu'u o ira 'i te ta'e [haka moe i te mana'u] 'i ruŋa i a ia.

He uŋa iña e Ietū i tā'ana nu'u hāpī

(Māteo 10.5-15; Ruka 9.1-6)

He e'a ia a Ietū he oho ki kona era ki kona era e hāpī 'ā i te taŋata. ⁷ E tahi mahana he haka taka-taka e Ietū i tā'ana nu'u hāpī e ho'e 'ahuru mā piti, 'e he uŋa hoko rua hoko rua koia ko va'ai i te parau 'e i te pūai mo haka e'a i te tātane o'o ki roto i te taŋata. ⁸ He kī mo ta'e ma'u e tahi me'e pa he pūtē, haraoa 'e moni mo te ara. Te me'e mau nō mo ma'u he toko-toko. ⁹ E riva nō mo oho e uru rō 'ā i te kiriva'e, 'e te me'e mo ta'e ma'u tako'a he kahu mo mono. ¹⁰ He kī e Ietū:

[†] Te vānaŋa nei, he TALITA KUMI, he vānaŋa arameo, he 'arero vānaŋa o kuā Ietū.

«Ki tu'u kōrua ki te kona nūna'a hare e tahi, e noho 'i te hare ra'e nō era mo to'o i a kōrua 'ātā ki te kōrua oho iŋa mai ira. ¹¹ 'E mo tu'u kōrua ki te kona 'ina he haŋa atu 'e 'ina he haka roŋo atu te nu'u o ira, e tū-tū te puŋa'ehu mai te kōrua va'e mo haka 'ite ki rā nu'u: ka topa era 'i ruŋa i a rāua te ūtu'a o te 'Atua, he hape o rāua mau 'ā, 'e 'ai kōrua ka oho rō mai ira».

¹² He e'a he oho ia tū nu'u hāpī era 'a Ietū he kī ki te nu'u mo [huri i te mana'u ki te 'Atua], ki tano ai te rāua noho iŋa ki a ia. ¹³ 'E, tako'a, i haka e'a rō mai roto i te taŋata me'e rahi nō atu tātane, 'e me'e rahi nu'u māui-ui i paru 'iti-'iti hai mōrī 'e i haka ora.

He aha i tiŋa'i ai i a Iovani Papatito

(Māteo 14.1-12; Ruka 9.7-9)

¹⁴ Te 'ariki ko ['Erore] ko ŋaro'a 'ā i te vānaŋa o ruŋa i a Ietū. 'I te kona ta'ato'a, pa'i, e vānaŋa era te nu'u o ruŋa. Tētahi e kī era: «Ko Iovani Papatito ko ora 'ā mai te mate, 'o ira e pūai era mo aŋa i te mana». ¹⁵ He kī e te tētahi: «Ko te perofeta era o mu'a 'ā ko 'Ēria». 'E o te tētahi haka 'ou atu te kī: «He perofeta e tahi, pa he ŋā perofeta era o mu'a 'ā».

¹⁶ I ŋaro'a era i tū ŋā me'e era e 'Erore, he kī: «Ko Iovani te me'e era. 'Ā'aku i uŋa i haka pa'o i tō'ona pū'oko, 'e, hora nei, ko ora haka 'ou 'ā».

¹⁷ Hai 'Eroria a 'Erore i uŋa i haka 'a-'aru ai i a Iovani 'e he haka here-here hai vivi 'i roto i te hare ma'u'aurī. A 'Eroria he vi'e [hāipo-ipo] 'a Fīripo, taina o 'Erore, 'e a 'Erore i hāipo-ipo nō ki rā vi'e. ¹⁸ A Iovani te aŋa nō he ture ki a 'Erore: «Ko hape 'ā a koe i to'o ai i te vi'e o tu'u taina mo vi'e 'ā'au».

¹⁹ 'O ira a 'Eroria e ma'u era i te riri mo Iovani, 'e he haŋa mo tiŋa'i. Te me'e nō, 'ina he rava'a pē hē. ²⁰ A 'Erore e ri'a-ri'a rō 'ana i a Iovani. Ko 'ite 'ana he taŋata mo'a 'e aŋa i te me'e tī-tika ki te mata o te 'Atua. 'O ira e hāpa'o era. He mira-mira nō te mana'u o 'Erore e ŋaro'a era i te vānaŋa 'a Iovani. 'E, ka ai atu pē ira, ko te haka roŋo iŋa 'ā hai māhatu.

²¹ 'I te mahana e tahi, he u'i e 'Eroria ko ai 'ana 'ō te rāve'a mo tiŋa'i i a Iovani. 'I te mahana poreko o 'Erore, he aŋa i te ŋoŋoro mo koa ananake ko te kō-mana, ko te kape 'e ko te nu'u hōnu'i o Karireia. ²² 'I rā ŋoŋoro i 'ori ai te poki vahine 'a 'Eroria. 'I te nehe-nehe o rā uka 'e o tō'ona 'ori iŋa he koa tahi te nu'u o rā ŋoŋoro. He kī ia e te 'ariki ko 'Erore ki tū uka era:

—Ka no-no'i nō mai ta'a me'e haŋa, he va'ai atu e au.

²³ He hōrea ki rā uka e va'ai nō e ia i te me'e nō i haŋa ka ai atu he pā'iŋa o te henua haka tere e ia.

²⁴ He oho tū uka era he 'ui ki tō'ona matu'a vahine:

—ŌHe aha tā'aku me'e ka no-no'i nei?

He pāhono:

—Ka kī mo va'ai atu i te pū'oko o Iovani Papatito.

²⁵ He hoki tū uka era ki mu'a o te 'ariki, he kī:

—Tā'aku me'e haŋa he va'ai mai ō'ou, 'i te hora mau ena 'ā, i te pū'oko o Iovani 'i ruŋa i te mareti.

²⁶ He haka kiva-kiva 'e he māui-ui rō atu 'ai te māhatu o te 'ariki. 'E, 'i te me'e ko hōrea 'ā 'i mu'a o tū nu'u ta'ato'a era, he 'ē-ē rō atu 'ai 'o ha'amā 'i te ta'e haka tano i tā'ana vānaŋa.

²⁷ He uŋa, 'i rā hora mau 'ā, ki te va'ehau e tahi mo ma'u i te pū'oko o Iovani. He oho tū va'ehau era ki roto i te hare ma'u'aurī, he pa'o i te pū'oko o Iovani, ²⁸ 'e 'i ruŋa i te mareti i ma'u ai. He va'ai ki tū uka era, 'e o rā uka i va'ai ki tō'ona matu'a vahine.

²⁹ 'I 'ite era e te nu'u hāpī 'a Iovani, he oho he to'o i te hakari 'e he ma'u he tanu.

He hāŋai iŋa o Ietū i te nu'u rahi

(Māteo 14.13-21; Ruka 9.10-17; Iovani 6.1-14)

³⁰ Tū nu'u ['āpōtoro] uŋa era e Ietū, i hoki era, he taka-taka 'i muri i a Ietū 'e he 'a'amu i te rāua me'e i aŋa 'e i hāpī ki te nu'u. ³¹ He kī e Ietū: «Mai ki oho ki haka ora tātou 'i te kona 'ina he taŋata».

I kī ai i te me'e nei 'o te ai pē rā 'ā te taŋata e tu'u 'e e oho era 'e 'ina he rava'a i te hora mo kai o rāua. ³² He oho ia a kuā Ietū 'i ruŋa i te vaka ki te kona mo noho ko rāua nō.

³³ Me'e rahi nō atu nu'u i take'a i te oho iŋa, 'e ko aŋi-aŋi 'ā ko ai rā nu'u. 'O ira, mai te kona ta'ato'a i tāhuti i oho ai te taŋata ki te kona ki ira e oho era a kuā Ietū, 'e 'i ra'e 'ā i tu'u ai.

³⁴ I topa era a Ietū mai ruŋa i te vaka, he take'a i te rahi o te taŋata e tiaki 'ā ki a ia. He haka 'aroa 'i rā nu'u; e tu'u rō 'ana, pa'i, pa he māmo'e 'ina he taŋata mo hāpa'o. He ha'amata ia a Ietū he hāpī me'e rahi nō atu me'e o ruŋa i te [haka tere iŋa 'āpī o te 'Atua].

³⁵ Pe te ahi-ahi, he haka hāhine ki a Ietū tū nu'u hāpī era 'ā'ana he kī:

—E Ietū, ko ahi-ahi 'ā 'e te kona nei kona ta'e noho taŋata. ³⁶ Ka haka oho te nu'u ena a te kona hāhine mai mo ho'o hai me'e mo kai o rāua.

³⁷ He kī e Ietū:

—Ka va'ai e kōrua hai me'e mo kai.

He pāhono e rā nu'u:

—ŌPē hē ia a mātou ana ho'o mai i te kai mo te nu'u ta'ato'a nei? Ka ai atu i a mātou te tara 'auhau o te piti hānere mahana aŋa, 'ina 'ā e ko tano mo hāŋai i te rahi ena.

³⁸ He 'ui ia e Ietū:

—ŌHe aha te me'e ai mo kai? Ka oho rā ka u'i.

I u'i era he kī:

—E rima nō haraoa 'e e rua ika.

³⁹ He uŋa e Ietū mo kī ki te nu'u mo no-noho 'i ruŋa i te mauku e haka nūna'a. ⁴⁰ Pē ira i no-noho ai e pae 'ahuru 'e e ho'e hānere taŋata ka tahi nūna'a. ⁴¹ He to'o ia e Ietū i tū haraoa era e rima 'e i tū ika era e rua, he u'i a te raŋi, he māuru-uru ki te 'Atua. I oti era, he more-more i te haraoa, he va'ai ki tā'ana nu'u hāpī mo tuha'a ki te taŋata. 'E he tuha'a tako'a i tū ika era.

⁴² He ka-kai tahi tū nu'u ta'ato'a era ka mākona rō.

⁴³ I oti era he ha'a'i e ho'e 'ahuru mā piti kānato o te pārehe-rehe topa. ⁴⁴ Te nu'u i kai e pae ta'utini ŋāŋata.

He ha'ere iŋa o Ietū 'i ruŋa i te vai

(Māteo 14.22-27; Iovani 6.16-21)

⁴⁵ I oti era te me'e nei he kī e Ietū ki tā'ana nu'u hāpī mo eke ki ruŋa i te vaka 'e mo oho 'i ra'e ki a ia ki Vete-taira; ko ia mo noho mo haka oho i te nu'u.

⁴⁶ I haka oho tahi era, he iri ki ruŋa i te ma'uŋa he pure. ⁴⁷ I pō era, 'i vāeŋa tini o te vai tū vaka era, 'e a Ietū hoko tahi nō 'i 'uta. ⁴⁸ He take'a aŋa ri'a-ri'a tū nu'u era 'ā'ana e hoe era i te vaka 'o te ai 'i mu'a te tokerau.

'I te popohaŋa he ha'ere he oho a Ietū a ruŋa i te vai a te kona era 'i ira rā nu'u. Ko oho 'ā mo oŋa pe mu'a o tū vaka era, ⁴⁹ he take'a e rā nu'u i te kope e tahi e ha'ere e oho 'ana a ruŋa i te vai. He veveri 'e he haka kiva-kiva 'o te mana'u he vārua; ⁵⁰ ta'ato'a, pa'i, i take'a ai 'e he ri'a-ri'a rō atu 'ai. He kī ia e Ietū: «¡Kiahio kōrua! Ko au nei. ¡'Ina ko matakū!».

⁵¹ He eke ia a Ietū ki ruŋa i te vaka 'e he noho rō 'ai te tokerau. He māere tū nu'u era. ⁵² Ka ai atu, pa'i, ko take'a 'ana i te mana aŋa mo haka rahi i te haraoa 'e i te ika, 'ina 'ā he aŋi-aŋi ko ai mau a Ietū 'i te ta'e haka moe riva-riva i te rāua mana'u 'i ruŋa i a ia.

He haka ora iŋa o Ietū i te nu'u māui-ui o Henetareta

(Māteo 14.34-36)

⁵³ He oho ia ananake ki te kona ko Henetareta. 'I ira 'i te taha-taha i here ai i te rāua vaka. ⁵⁴ Kai roa te rāua tomo ki 'uta i aŋi-aŋi rō ai e te nu'u i a Ietū. ⁵⁵ He tāhuti he haka 'ite a te kona ta'ato'a o ira, 'e he ha'amata te taŋata he tari i te rāua māui-ui a ruŋa i te raŋo ki te kona ŋaro'a 'i ira a Ietū. ⁵⁶ Kona nō era 'i ira a Ietū, ka ai atu 'i 'uta 'o 'i te kona nūna'a hare, 'ai te taŋata e haka rē era i te rāua māui-ui a te kona a ira ka vari era. 'E, e vari e oho era a Ietū, he ani e te māui-ui mo ha'ati'a i a rāua mo haka puā ka ai atu ki te titi o tō'ona kahu; 'e ta'ato'a taŋata haka puā, he ora te rāua māui-ui.

He me'e haka ta'e tano i te taŋata ki te mata o te 'Atua

(Māteo 15.1-20)

7 E tahi mahana he haka hāhine ki a Ietū te nu'u [fariseo] 'e tētahi [ma'ori o te haka tere hūrio] tu'u mai Hērutarema. ² He take'a i te tētahi nu'u hāpī 'a Ietū e kai 'ā kai hopu hia i te rima pa he huru o te hopu iŋa o rāua o te [hūrio]. ³ (Te hūrio ta'ato'a, pa'i, 'e

te fariseo e ko kai, ki te hora hope'a, mo ta'e hopu 'i ra'e i te rima pa he rāve'a kī e te rāua tupuna pē hē ana aŋa. ⁴ 'E mo hoki o te hūrio mai te kona ho'o, he hopu tako'a pē ira i te rāua rima 'i ra'e ki te haka puā ki te me'e mo kai. E ai tako'a rō 'ā me'e rahi haka 'ou haka tere iŋa o rāua pa he [haka ma'itaki] iŋa i te ha-paina, i te karo, i te pani 'e i te kona moe mo kai). ⁵ 'O ira te fariseo ananake ko te nu'u ma'ori o te haka tere hūrio i 'ui ai ki a Ietū:

—¿He aha ta'a nu'u hāpī e ta'e aŋa ena i te me'e kī e te tātou tupuna mo aŋa? ¿He aha e kai ena kai haka ma'itaki hia i te rima?

⁶ He pāhono e Ietū:

—He aŋi 'ana 'ō tū me'e kī era e te 'Atua o ruŋa i te nu'u riva a te haho 'ā, pē kōrua, 'i te hora haka pāpa'i ki te perofeta era ko 'Itaia pē nei ē:

“Te nu'u nei hai ŋutu mau nō e ha'amuri mai nei, 'e te rāua māhatu 'i te kona kē nō atu.

⁷ 'E te rāua ha'amuri iŋa mai 'ina e tahi hauha'a; e hāpī rō 'ana, pa'i, i te me'e taŋata pa he roŋo 'ā'aku”.

⁸ »A kōrua he haka rehu nō te aŋa i te haka tere iŋa o te 'Atua mo haka tere hai me'e taŋata.

⁹ He kī haka 'ou e Ietū:

—Ko ha'ariro 'ana a kōrua i te haka tere iŋa o te taŋata pa he me'e ra'e mo kōrua, 'e ko haka tapa 'ā i te haka tere iŋa o te 'Atua. ¹⁰ 'Ī a au he ha'aaura'a atu. A [Mōtē] i kī rō: «E mo'a koe i tu'u matu'a tane 'e i tu'u matu'a vahine»; 'e i kī tako'a rō: «Kope kī i te vānaŋa ta'e tano mo tō'ona matu'a, te ūtu'a he mate». ¹¹ Ka ai atu pē ira, e kī rō 'ana e kōrua e tano nō te kope e tahi mo kī ki tō'ona matu'a: «Te me'e ai 'ā'aku mo hā'ū'ū atu ko ha'ata'a 'ā e au mo te 'Atua». ¹² Hai kī iŋa era e ha'ati'a 'ā e kōrua i te nu'u era mo ta'e hā'ū'ū ki te rāua matu'a 'e pē ira ka ta'e mo'a era. ¹³ Hai haka tere iŋa ena 'e hai haka 'ite ki kope era ki kope era, e ta'e haka hauha'a ena e kōrua i te roŋo o te 'Atua. E rahi rō 'ā te me'e tu'u pē nei aŋa e kōrua.

¹⁴ I oho era he raŋi e Ietū ki te nu'u mo haka taka-taka 'e he kī: «Ka haka roŋo tahi mai kōrua 'e e aŋi-aŋi tā'aku vānaŋa ka kī atu ena: ¹⁵ 'Ina e tahi me'e mo kai e te taŋata mo haka ta'e tano i a ia ki te mata o te 'Atua. Te me'e mo haka ta'e tano i a ia he me'e rake-rake e'a mai roto i te māhatu. [¹⁶ Te nu'u haŋa mo aŋi-aŋi ka haka topa te mana'u.]»

¹⁷ I haka rē era a Ietū i te taŋata 'e i uru era ki roto i te hare, he 'ui e tā'ana nu'u hāpī i te aura'a o rā vānaŋa. ¹⁸ He kī e Ietū: «¿Kai aŋi-aŋi tako'a 'ō e kōrua? ¿Kai 'ite 'ana 'ō 'ina he me'e mo kai e te taŋata mo haka ta'e tano i a ia ki te 'Atua? ¹⁹ 'Ina, pa'i, he kai he o'o

ki roto ki te māhatu; ki roto ki te kōpū e o'o ena 'e mai roto e e'a ena».

Hai vānaŋa nei i haka 'ite ai e Ietū: ta'ato'a nō huru o te kai e tano nō mo kai e te taŋata. ²⁰ He kī tako'a:

«He me'e rake-rake e'a mai roto i te māhatu te me'e haka ta'e tano i te taŋata ki te mata o te 'Atua. ²¹ Mai roto, pa'i, e e'a ena te nā me'e nei: he mana'u rake-rake, he piri tane ta'ato'a ta'e ha'ati'a e te 'Atua, † he toke, he tiŋa'i he haka mate i te taŋata, ²² he tai'ata, he nou-nou, he aŋa i te me'e ta'e tano, he reo-reo, he pohe ki te vi'e ki te tane ta'e 'ā'ana, he mākota i te me'e o te rua, he ha'a'ino, he haka paka i a ia 'e he aŋa i te me'e ma'a-ma'a. ²³ Te me'e ta'e tano ta'ato'a nei mai roto i te taŋata e e'a ena 'e e haka ta'e tano ena i te māhatu ki te mata o te 'Atua».

He vi'e ta'e hūrio e tahi

(Māteo 15.21-28)

²⁴ Mai ira i oho ai a Ietū ki Tiro. He uru ki roto i te hare e tahi 'e 'ina he haŋa mo 'ite e te taŋata 'i ira a ia. Ka ai atu pē ira, i 'ite nō.

²⁵ E tahi vi'e e ai rō 'ana tā'ana poki vahine ko o'o 'ana e te tātane. I 'ite era 'i ira a Ietū, he oho he tū-turi a te va'e. ²⁶ He ani ki a Ietū mo haka e'a i te tātane mai roto i tā'ana poki. Te vi'e nei ta'e he hūrio, a ia o te kona ko Tirofenitia o Tīria. ²⁷ 'O ira a Ietū i pāhono ai hai ha'aura'a nei:

—Me'e ta'e tano mo hiko i te haraoa mai te nā poki mo va'ai ki te paiheŋa. E haka rē 'i ra'e ki kai ki mākona te nā poki. ††

²⁸ He pāhono e rā vi'e:

—He aŋi 'ā tā'au, e Ietū ē. Ka ai atu pē ira, te paiheŋa e kai tako'a rō 'ā i te pārehe-rehe haraoa o raro o te 'a-murama'a haka mārere-rere e te nā poki.

²⁹ He kī e Ietū:

—'O te kī mai ō'ou pē nā, ka oho riva-riva koe. Te tātane 'ai ko e'a 'ā mai roto i ta'a poki.

³⁰ I tu'u era rā vi'e ki tō'ona hare, he take'a 'i ruŋa i te ro'i i tū poki era; te tātane ko e'a 'ā mai roto i a ia.

He haka ora iŋa o Ietū i te taŋata tariŋa pō

³¹ He e'a ia a Ietū mai Tiro, he oho ki Tīrone, 'e mai ira i oho ai ki te kona vai o Karirea, ki te pā'iŋa o Rēkā-pori. ³² 'I ira i ma'u ai e te nu'u ki a Ietū i te taŋata tariŋa pō 'arero poto-poto, 'e he kī mo haka puā hai rima. ³³ He to'o e Ietū i rā taŋata a te tapa mo haka 'ava-ava mai muri i te nu'u. He ha-ha'o i tō'ona maŋa-maŋa rima ki roto i te tariŋa o tū kope era, 'e he haka rari hai 'ā-'anu i tō'ona maŋa-maŋa rima, 'ai ka haka puā ki te

† Te piri tane ha'ati'a mau nō e te 'Atua he piri o te kenu ki tā'ana vi'e hāipo-ipo. †† Hai ha'aura'a nei e haka aŋi-aŋi 'ā a Ietū: 'i ra'e a ia ana hā'ū'ū ki tō'ona hau he hūrio.

'arero o rā kope. ³⁴ He u'i a te raŋi koia ko puhi te haŋu 'e he kī ki rā taŋata: *¡Efata!* (te aura'a: «¡Ka mātaki!»).

³⁵ 'I tū hora mau era 'ā he ha-hata te tariŋa o tū taŋata era, 'e he ha'amata he vānaŋa riva-riva rō 'ai. ³⁶ He kī e Ietū ki te nu'u mo ta'e vānaŋa o ruŋa o tū me'e era, 'e, ka ai atu i rahi rō tō'ona kī iŋa, ko te 'a'amu iŋa 'ā e te nu'u. ³⁷ Ko māere atu 'ā rā nu'u e kī era: «Ta'ato'a me'e aŋa e ia me'e riva-riva. ¡'Ātā e haka ha-hata nō i te tariŋa o te taŋata tariŋa pō 'e e haka vānaŋa nō i te taŋata 'ina he vānaŋa!».

He hāŋai iŋa haka 'ou o Ietū i te nu'u rahi

(Māteo 15.32-39)

8 'I te mahana e tahi ko taka-taka haka 'ou 'ā te taŋata 'i muri i a Ietū, 'e 'ina he me'e toe o rāua mo kai. He raŋi e Ietū ki tā'ana nu'u hāpī mo haka hāhine 'e he kī:

² —Ko haka 'aroha 'ana a au 'i te nu'u nei; ka toru mahana o rāua 'i muri i a tātou 'e 'ina he me'e toe o rāua mo kai. ³ Mo haka hoki ō'oku i te nu'u nei ki te rāua hare 'ina kai hāŋai hia, he re-rehu 'i te ara; e ai rō 'ana, pa'i, te nu'u mai te kona roa-roa i oho mai ai.

⁴ He pāhono e tā'ana nu'u hāpī:

—¿Mai hē ia a tātou ana to'o mai i te kai mo hāŋai i a rāua 'i te kona tu'u pē nei, kona ta'e noho taŋata?

⁵ He 'ui e Ietū:

—¿E hia haraoa o kōrua?

—E hitu —i pāhono ai.

⁶ He hāru e Ietū, he kī ki te nu'u ta'ato'a o ira mo nonoho ki raro. He to'o i rā nā haraoa, he māuru-uru ki te 'Atua, 'e he more-more he va'ai ki tā'ana nu'u hāpī mo tuha'a ki te taŋata, 'e pē ira i aŋa ai.

⁷ E ai tako'a rō 'ā i rā nu'u hāpī era 'ā'ana te 'apa ika riki-riki. He māuru-uru tako'a a Ietū i rā nā ika ki te 'Atua, 'e he va'ai ki rā nu'u mo tuha'a.

⁸ Ta'ato'a i kai ai ki te mākona, 'e 'ātā i ha'a'ī rō e hitu kānato o te kai i topa. ⁹ Te rahi i kai ai pa he me'e ena ē: e maha ta'utini.

I oti era he haka hoki i rā nu'u ki te rāua hare. ¹⁰ He eke ia a Ietū ki ruŋa i te vaka ananake ko tā'ana nu'u hāpī, he oho ki te kona ko Raramanuta.

He kī iŋa o te [fariseo] mo aŋa o Ietū i te mana

(Māteo 16.1-4; Ruka 12.54-56)

¹¹ He tu'u ia te nu'u fariseo ki te kona 'i ira a kuā Ietū he ha'amata he haka tātaka ki a ia. 'I te haŋa mo rava'a i te reo-reo o Ietū pē nei ē: o te 'Atua a ia i uŋa mai, he kī mo aŋa e tahi mana. ¹² 'I te ta'e au o tū vānaŋa era ki a Ietū he puhi te haŋu 'e he kī: «¿Ki roa toe nō hē a kōrua e haŋa ena mo aŋa ō'oku i te mana? 'Ī a au he kī atu: 'ina e tahi mana mo aŋa atu e au».

¹³ He haka rē ia e Ietū i tū nu'u era, he hoki ki ruŋa i te vaka 'e he oho ki te rua pā'iŋa.

Te revaura o te fariseo
(Māteo 16.5-12)

¹⁴ Te nu'u hāpī 'a Ietū ko rehu 'ana mo ma'u hai me'e mo kai; te me'e mau nō o ruŋa i te vaka he haraoa e tahi. ¹⁵ He kī e Ietū ki tā'ana nu'u hāpī:

—E u'i e hāpa'o kōrua e te revaura o te fariseo 'e e te revaura 'a ['Erore]. †

¹⁶ He kī ia rā nu'u ki a rāua 'ā: «Te vānaŋa ena e kī mai ena he 'ite: e tahi nō haraoa ma'u o tātou».

¹⁷ 'I te 'ite o Ietū o ruŋa i te me'e o rā nu'u e vānaŋa era, he kī:

—ĶHe aha kōrua e vānaŋa ena o ruŋa i te haraoa? ĶKai anĶi-anĶi 'ana 'ō e kōrua? ĶKa kī 'ō e puru rō 'ā te kōrua māhatu? ¹⁸ ĶTe kōrua mata 'ina he take'a, 'e te kōrua tariŋa 'ina he ŋaro'a? Ķ'Ina 'ō kōrua he mana'u ki te me'e aŋa era e au? ¹⁹ I tuha'a era i te haraoa e rima ki te taŋata e pae ta'utini, Ķe hia kānato i 'ī e te pārehe-rehe topa?

He pāhono e rā nu'u:

—E ho'e 'ahuru mā piti.

²⁰ —'E te haraoa e hitu tuha'a era e au ki te taŋata e maha ta'utini, Ķe hia kānato i 'ī e te kai topa?

He pāhono:

—E hitu.

²¹ He kī e Ietū:

—'E, Ķkai anĶi-anĶi 'ā e kōrua?

He haka ora iŋa o Ietū i te taŋata matapō

²² He tu'u ia a kuā Ietū ki Vetetaira. 'I ira i ma'u ai e te nu'u i te taŋata matapō ki a Ietū, he ani mo haka puā hai rima mo ora o tō'ona mata.

²³ He 'a-'aru e Ietū i tū taŋata era a te rima he hā'ere he oho ararua ki haho o Vetetaira. He haka rari i te mata hai 'ā-'anu 'e he haka puā hai rima. I oti era he 'ui e Ietū:

—ĶE take'a rō 'ā koe i te me'e?

²⁴ He u'i tū matapō era 'e he kī:

—'Ī e take'a mai nei i te taŋata. E tu'u rō 'ana pa he tumu e hā'ere 'ā.

²⁵ He haka puā haka 'ou e Ietū i tō'ona rima ki te mata. He u'i haka 'ou tū taŋata era ana take'a riva-riva e ia 'e he anĶi-anĶi ko ora 'ā tō'ona mata. Ko take'a riva-riva 'ā i te me'e ta'ato'a.

²⁶ I oti era he haka oho e Ietū ki tō'ona hare 'e he kī:

—Ka hoki ena koe, 'ina ko hipa ki Vetetaira.

He kī iŋa e Pētero a Ietū he [Kiritō]
(Māteo 16.13-20; Ruka 9.18-21)

²⁷ He oho ia a Ietū ananake ko tā'ana nu'u hāpī ki te ŋā kona era o Tētārea o Fīripo. 'I te ara he 'ui e Ietū ki rā nu'u:

—ĶKo ai a au e kī ena e te nu'u?

²⁸ He pāhono:

—E ai rō 'ā te nu'u kī ko Iovani Papatito a koe. E ai tako'a rō 'ā te nu'u kī ko te perofeta era ko 'Ēria. 'E e ai rō 'ā te nu'u kī he perofeta e tahi o roto o te ŋā perofeta era o mu'a 'ā.

²⁹ He 'ui haka 'ou e Ietū ki tū nu'u era:

—'E ki te kōrua kī, Ķko ai a au?

He pāhono e Pētero:

—A koe he Kiritō.

³⁰ 'E he kī e Ietū ki tā'ana nu'u hāpī mo ta'e haka 'ite ki te taŋata.

He haka 'ite iŋa o Ietū i tō'ona mate
(Māteo 16.21-28; Ruka 9.22-27)

³¹ He ha'amata he haka 'ite e Ietū ki tū nu'u hāpī era 'ā'ana: te [Pokī o te taŋata] e tōtōā rō, e o'o rō e te māui-ui ki roto i te ivi, 'e e ko haŋa e te nu'u pū'oko haka tere hūrio, e te [oromatu'a ra-rahi] 'e e te [ma'ori o te haka tere hūrio]. I haka 'ite tako'a rō pē nei ē: e tiŋa'i e haka mate rō i a ia 'e, 'i te toru mahana, he ora haka 'ou. ³² Te me'e ta'ato'a nei i haka anĶi-anĶi riva-riva rō e Ietū.

I ŋaro'a era e Pētero he ma'u i a Ietū a te tapa he ture 'o vānaŋa haka 'ou pē ira. ³³ He hāru i Ietū, he u'i a ruŋa i tā'ana nu'u hāpī 'e he teka he ture ki a Pētero pē nei ē: «ĶKa haka tapa koe mai muri i a au, e Rukiferō ē! 'Ina koe he mana'u pa he mana'u o te 'Atua, a koe e mana'u ena hai mana'u taŋata».

³⁴ 'I tū hora mau era 'ā he ranĶi e Ietū ki tā'ana nu'u hāpī 'e ki te nu'u haka 'ou o muri mo haka hāhine 'e he kī:

«Te kope haŋa mo riro ō'ona he taŋata hāpī 'ā'aku e haka rehu i a ia mau 'ā, 'ai ka 'amo rō i tō'ona tātaurō, te aura'a, e va'ai i a ia 'ātā mo mate 'i te aŋa iŋa i tā'aku me'e haŋa. ³⁵ Te kope hāru i a au 'e i tā'aku hāpī hai tua'ivi mo hāpa'o i a ia 'o mate 'e mo aŋa i

† Te me'e era 'a Ietū e haŋa era mo 'ite e tā'ana nu'u hāpī hai ha'aaura'a o te revaura ko te me'e nei: e hāpa'o a rāua 'o ma'u tako'a i te mana'u ta'e tano o 'Erore 'e i te hāpī ta'e parauti'a o te fariseo. Pa he ahu iŋa ena 'ā, pa'i, o te haraoa mata 'i te revaura mo 'ata hau, pē ira tako'a 'ā te me'e ta'e tano 'a 'Erore 'e o te fariseo e 'ata hau e oho ena 'i roto i te kope nei 'e 'i roto o te kope era.

tā'ana me'e nō era i haŋa e ko ai i a ia te ora 'āpī 'ina he hope'a ra'a va'ai e te 'Atua. 'E te kope haka rē i tā'ana me'e haŋa mo ha'atura mai ki a au 'e mo haka 'ite o ruŋa i te [roŋo riva-riva o te 'Atua] he rava'a e ia i rā ora.

³⁶ »; He aha ia te hauha'a mo te kope e tahi te ai i a ia te me'e ta'ato'a o te ao, 'e 'ina i a ia te ora 'āpī 'ina he hope'a ra'a? ³⁷ ; E ai rō 'ana hō te rāve'a o te taŋata mo 'auhau ki te 'Atua mo rā ora?

³⁸ »Te taŋata o te hora nei taŋata hara 'e 'ina he haŋa mai. Te kope ta'e to'o i a au 'e i tā'aku hāpī mā'ana 'o ha'amā 'i te nu'u, a au, te Poki o te taŋata, e ko to'o tako'a i a ia mā'aku 'i te hora hoki mai ō'oku ananake mātou ko te merahi 'i ruŋa i a au te pūai 'ana-'ana o tō'oku Matu'a».

9 He kī tako'a e Ietū:

—Tētahi nu'u o te kona nei e take'a rō i te tu'u iŋa mai hai pūai o te [haka tere iŋa 'āpī o te 'Atua] 'i ra'e ki te rāua mate.

He huru kē iŋa o Ietū

(Māteo 17.1-13; Ruka 9.28-36)

² E ono mahana pe mu'a mai tū me'e era, he iri a Ietū ki ruŋa i te ma'uŋa ruŋa nui e tahi. Te nu'u nō i ma'u 'i muri i a ia ko Pētero, ko [Tanatiako] 'e ko [Io-vani]. 'I ira i huru kē ai a Ietū 'i mu'a i rā nu'u. ³ He 'uira he tea-tea tō'ona kahu. Te tea-tea pē ira e ko rava'a e te taŋata ki te hora hope'a ka rahi atu te tata iŋa. ⁴ He take'a e tū ŋā kope era i a ['Ēria] 'e i a [Mōtē] e vānaŋa 'ana ki a Ietū.

⁵ He kī e Pētero ki a Ietū: «E te Ma'ori, ihe riva nō 'ō i ai ai a tātou 'i nei! Ki aŋa e toru pae-pae: e tahi mō'ou, e tahi mo Mōtē 'e e tahi mo 'Ēria».

⁶ Tū nu'u era 'a Ietū ko ri'a-ri'a atu 'ā, 'e a Pētero kai aŋi-aŋi he aha tā'ana me'e i kī.

⁷ E no-noho nō 'ā rā nu'u, i puru rō ai e te raŋi 'e mai roto te re'o i kī ai: «He Poki nā 'ā'aku, Poki haŋa rahi; e ha'atura kōrua ki a ia».

⁸ He u'i-u'i ia rā nu'u a te tapa 'i rā hora 'e 'ina e tahi me'e o muri i a rāua, ko Ietū mau nō.

⁹ I turu i oho era ananake mai ruŋa i rā ma'uŋa, he kī e Ietū mo ta'e 'a'amu e tahi nu'u o tū me'e take'a era e rāua 'ātā ki te ora iŋa haka 'ou mai te mate o te [Poki o te taŋata]. ¹⁰ Pē ira i ta'e haka 'ite ai i tū me'e era, ka ai atu 'ai e 'ui era ki a rāua 'ā he aha te aura'a o tū me'e kī era e Ietū o ruŋa i te ora iŋa haka 'ou o te Poki o te taŋata mai te mate. ¹¹ He 'ui ia e kuā Pētero ki a Ietū:

—; He aha te [ma'ori o te haka tere hūrio] e kī ena: 'i ra'e a 'Ēria ka tu'u mai ena?

12 He kī e Ietū:

—He aŋi 'ā 'i ra'e a 'Ēria ana tu'u mai; mā'ana e haka riva-riva i te me'e ta'ato'a. ; Ta'e 'ō e hā'aki rō 'ā 'i ruŋa i te [Pāpa'i Mo'a]: te Poki o te taŋata e ta'e haŋa rō e te nu'u, 'e, tako'a, e o'o rō te māui-ui ki roto i te ivi? ¹³ 'I a au he kī haka 'ou atu: ko tu'u mai 'ā a 'Ēria, 'e ko aŋa

'ana e te taŋata i te me'e nō era o rāua i haŋa 'i ruŋa i a ia, pa he me'e hā'aki 'i ruŋa i te Pāpa'i Mo'a mo topa ki a ia.

He haka e'a iŋa o Ietū i te tātane

(Māteo 17.14-21; Ruka 9.37-43)

¹⁴ I hoki era ki te kona 'i ira tā'ana nu'u hāpī, he take'a me'e rahi nō atu nu'u e taka-taka rō 'ā 'i muri, 'e tētahi ma'ori o te haka tere hūrio e tātane 'ana ki rā nu'u.

¹⁵ I take'a era i a Ietū e te nu'u ta'ato'a, he māere 'e he tāhuti ki muri he 'aroha.

¹⁶ He 'ui e Ietū:

—; He aha rā te me'e o kōrua e tātane ena?

¹⁷ He kī ia e te kope e tahi o rā kona:

—E te Ma'ori, ko ma'u mai 'ā a au i tā'aku poki; ko o'o 'ā e te tātane 'e 'ina he vānaŋa haka 'ou. ¹⁸ Ta'ato'a hora haka tere i a ia e te tātane, he ava ki ruŋa i te 'ō'one, he hoa te kuta-kuta a te haha, he kiki-kiki 'e he ŋau i tō'ona niho. Ko ani 'ā a au ki te nu'u hāpī nei 'ā'au mo haka e'a i te tātane mai roto i a ia, 'e 'ina e rāua kai rava'a.

¹⁹ He kī e Ietū:

—; E te nu'u ta'e [haka moe i te mana'u] 'i ruŋa i te 'Atua ē! ; Pa he me'e ena: ka ai ka oho nō atu a au 'i muri i a kōrua 'ātā ki te pa'o iŋa o te ao, ko te ta'e haka moe iŋa mai 'ā kōrua i te mana'u 'i ruŋa i a au! ; 'Ātā ki hē rā nei ka ha'aoroma'i ka oho nō nei i a kōrua? Ka ma'u mai te poki.

²⁰ He ma'u ia i tū poki era. I take'a era e te tātane i a Ietū, he haka kiki-kiki i rā poki, he haka hiŋa ki raro, he haka teka-teka koia ko hoa i te kuta-kuta mai roto i te haha.

²¹ He 'ui e Ietū ki te matu'a tane o rā poki:

—; Mai 'aŋahē te me'e nei i ha'amata ai?

He pāhono e tū matu'a era:

—Mai te 'iti-'iti iŋa 'ā. ²² I rahi rō te mahana i to'o mai e te tātane ena i tā'aku poki he haka hoa ki roto i te ahi 'e ki roto i te vai mo haka mate. 'O ira, mo rava'a e koe mo haka ora i a ia, ka haka 'aroha ia koe i a māua 'e ka hā'ū'ū mai.

²³ He kī e Ietū:

—; He aha te vānaŋa ena: «mo ai e rava'a rō e koe»? ; Ta'ato'a me'e e rava'a nō e te kope haka moe i te mana'u 'i ruŋa i te 'Atua!

²⁴ He kī ia e te matu'a o tū poki era hai re'o pūai:

—E haka moe rō 'ana a au i tō'oku mana'u 'i ruŋa i te 'Atua. Ka haka haŋu mai koe i a au mo 'ata haka moe ō'oku i te mana'u 'i ruŋa i a ia.

²⁵ 'I te u'i o Ietū ko 'ata rahi ko oho 'ā te taŋata, he ture ki tū tātane era he kī:

—E te tātane ta'e ha'ati'a mo vānaŋa 'e mo ŋaro'a ē, ka e'a koe mai roto i te poki ena, 'e 'ina koe ko uru haka 'ou ki roto.

²⁶ He ki-kiu tū tātane era, he haka kiki-kiki haka 'ou i tū poki era. I oti era he e'a mai roto; i haka rē ai e tu'u rō 'ā pa he me'e ena ē: ko mate 'ā. 'E me'e rahi nu'u i kī ko mate 'ā. ²⁷ Ka ai atu pē ira, he 'a-'aru e Ietū i te rima, he haka e'a ki ruŋa, 'e he māroa rō 'ai rā poki.

²⁸ I hini 'iti era he uru a Ietū ki roto i te hare e tahi. I topa era ko rāua nō ko tā'ana nu'u hāpī, he 'ui e rā nu'u ki a Ietū:

—¿He aha a mātou i ta'e rava'a ai mo haka e'a i rā tā-tane?

²⁹ He pāhono e Ietū:

—Te tātane ta'ato'a pūai pē rā hai pure nō ki te 'Atua ana haka e'a.

He haka 'ite iŋa haka 'ou o Ietū i tō'ona mate

(Māteo 17.22-23; Ruka 9.43-45)

³⁰ I oho era ananake mai rā kona, he vari he oho a Karirea. A Ietū 'ina kai haŋa mo 'ite e te nu'u 'ai ira a ia ³¹ 'o te ai e hāpī 'ana i tā'ana nu'u. E kī era: «Te Poki o te taŋata e va'ai rō ki te rima o te taŋata, e tiŋa'i e haka mate rō 'e, 'i te toru mahana, he ora haka 'ou».

³² 'Ina he aŋi-aŋi ananake i te aura'a o tū vānaŋa era 'a Ietū 'e, 'i te ri'a-ri'a, 'ina he haŋa mo 'ui.

¿Ko ai te kope 'ata hōnui ki te mata o te 'Atua?

(Māteo 18.1-5; Ruka 9.46-48)

³³ He tu'u ananake ki Kaperenāū. I uru era ki roto i te hare, he 'ui e Ietū: «¿He aha te kōrua me'e e tātake e oho mai era 'i te ara?».

³⁴ He haka kiva-kiva ananake 'o te ai e tātake 'ā ko ai te me'e 'ata hōnui o roto i a rāua.

³⁵ He noho ia a Ietū, he raŋi ki tū nu'u hāpī era 'ā'ana e ho'e 'ahuru mā piti mo haka hāhine, 'e he kī: «Te kope haŋa mo ra'e ka ha'ariro i a ia mo hope'a 'e mo tāvini o te ta'ato'a».

³⁶ He haka māroa ia e Ietū i te poki e tahi 'i muri i a ia 'i vāeŋa o te ta'ato'a; he hapai 'e he kī: ³⁷ «Te kope to'o 'e hāpa'o hai 'iŋoa ō'oku i te rua, ka ai atu i te poki e tahi pa he poki nei, e to'o 'ana i a au; 'e te kope to'o i a au, ta'e e to'o 'ā i a au nō, e to'o tako'a 'ana i te kope uŋa mai i a au».

Te kope ta'e haka hape i te aŋa e hā'ū'ū 'ā

(Māteo 10.42; Ruka 9.49-50)

³⁸ He kī e Iovani:

—E te Ma'ori, ko take'a 'ā e mātou i te kope e haka e'a 'ana i te tātane mai roto i te taŋata hai 'iŋoa ō'ou. I kī rō e mātou mo ta'e aŋa haka 'ou. Ta'e, pa'i, a ia o roto i a tātou.

³⁹ He pāhono e Ietū:

—E haka rē kōrua i a ia. 'Ina e tahi kope aŋa i te mana hai 'iŋoa ō'oku kī i te vānaŋa ta'e tano o ruŋa i a au. ⁴⁰ Te kope 'ina i a ia te haŋa mo haka hape i te tā-tou aŋa e hā'ū'ū mai 'ana.

⁴¹ »'I a au he kī atu: te taŋata va'ai atu, korohaŋa he hapaina vai mau nō 'o te ai o kōrua o te [Kiritō], pe mu'a ka oho ena e ko ta'e va'ai e te 'Atua ki rā taŋata hai me'e mo haka koa.

E u'i kōrua 'o hara

(Māteo 18.6-9; Ruka 17.1-2)

⁴² »Te ūtu'a o te 'Atua mo te taŋata haka hara i te kope ta'e pūai rahi o te haka moe iŋa i tō'ona mana'u 'i ruŋa i a au he ūtu'a 'ata taparahi-ta'ata ki te ūtu'a he here hai mā'ea paŋaha'a ki te ŋao 'ai ka hoa ki roto i te vaikava.

⁴³ »Mo haka hara i a koe e tu'u rima e tahi, ka hore ka haka topa mai ruŋa i a koe; e hau rō atu, pa'i, mō'ou te rava'a i te ora 'āpī 'ina he hope'a ra'a va'ai e te 'Atua e tū-tuma rō 'ā e tahi rima, ki te hoa i a koe ki roto i te pō'auahi, kona 'ina he mate te ahi, e ai rō 'ā ararua u'u rima. [⁴⁴ Kona 'ina he mate te o'i-o'i 'e 'ina he mate te ahi.]

⁴⁵ »'E mo haka hara i a koe e tu'u va'e e tahi, ka hore ka haka topa mai ruŋa i a koe; e hau rō atu, pa'i, mō'ou te rava'a i te ora 'āpī 'ina he hope'a ra'a va'ai e te 'Atua hai va'e e tahi, ki te hoa i a koe ki roto i te pō'auahi e ai rō 'ā ararua u'u va'e. [⁴⁶ Kona 'ina he mate te o'i-o'i 'e 'ina he mate te ahi.]

⁴⁷ »'E mo haka hara i a koe e tu'u mata e tahi, ka karo ka hoa mai ruŋa i a koe; e hau rō atu, pa'i, mō'ou te o'o ki roto i te ao haka tere e te 'Atua e tahi nō mata, ki te ai ararua u'u mata 'e he hoa i a koe ki roto i te pō'auahi, ⁴⁸ kona 'ina he mate te o'i-o'i 'e 'ina he mate te ahi.

⁴⁹ »Te nu'u ta'ato'a ka haka 'atu ena hai ahi, te au-ra'a, hai 'ati, mo 'ata haka pūai i te rāua haka moe iŋa i te mana'u 'i ruŋa i a au, pa he hoa iŋa i te kai hai miti mo haka nene. ⁵⁰ Te miti, pa'i, me'e riva-riva; 'e mo ta'e maŋeo, ¿pē hē ia ana haka riva-riva haka 'ou? A kōrua e hāpa'o 'o kore te kōrua maŋeo, 'e e noho hai haumārū 'i roto i a kōrua.

Te me'e haka piri e te 'Atua 'ina ko ha'ata'a

(Māteo 19.1-12; Ruka 16.18)

10 He e'a a Ietū mai Kaperenāū, he oho ki Hūrea 'e ki te rua pā'iŋa o te rio ko Horotana. 'I ira te taŋata i taka-taka haka 'ou ai, 'e he ha'amata a Ietū he hāpī, pa he me'e rava aŋa e ia.

² He haka hāhine ia ki a Ietū te tētahi nu'u [fariseo] 'e, mo haka 'atu koi'ite e kī rō i te me'e ta'e tano, he 'ui hoki e tano rō te kenu [hāipo-ipo] mo ha'ata'a mai tā'ana vi'e. ³ He kī e Ietū:

—¿He aha te me'e i pāpa'i e [Mōtē] o ruņa i te ha'ata'a o te nu'u hāipo-ipo?

⁴ He pāhono e rā nu'u:

—Te [haka tere iņa 'a Mōtē] e ha'ati'a rō 'ā mo ha'ata'a o te kenu mai tā'ana vi'e e va'ai e te kenu i te parau ha'ata'a ki rā vi'e.

⁵ He kī ia e Ietū:

—He pū'oko hio-hio o kōrua i haka rē atu ai e Mōtē i te roņo ena. ⁶ I aņa era e te 'Atua i te ao, he aņa tako'a i te taņata 'e i te vi'e mo kenu mo vi'e. ⁷ 'O ira te taņata e haka rē ena i tō'ona matu'a tane 'e i tō'ona matu'a vahine mo noho 'i muri i tā'ana vi'e, ⁸ 'e he riro rō 'ai a rāua e tahi nō hakari. E ko ai haka 'ou hoko rua, e tahi mau nō a rāua. ⁹ 'O ira, 'ina ko ha'ata'a te taņata i te me'e haka piri e te 'Atua.

¹⁰ I hoki era a kuā Ietū ki te hare noho o rāua, he 'ui e tā'ana nu'u hāpī o ruņa o rā vānaņa. ¹¹ He kī e Ietū: «Te kope ha'ata'a mai tā'ana vi'e 'e he hāipo-ipo ki te rua e tai'ata 'ā. ¹² 'E te vi'e haka rē i tā'ana kenu 'e he hāipo-ipo ki te rua kope e tai'ata tako'a 'ā».

He ha'amaitai iņa e Ietū i te nā poki (Māteo 19.13-15; Ruka 18.15-17)

¹³ E tahi mahana he ma'u e te nu'u i te nā poki ki a Ietū mo ha'amaitai, 'e te nu'u hāpī 'ā'ana he ture ki rā nu'u.

¹⁴ I take'a era e Ietū, he riri 'e he kī:

«Ka haka rē kōrua i te nā poki mo oho mai ki a au. Te [haka tere iņa 'āpī o te 'Atua] mo te nu'u pa he nā poki. ¹⁵ 'I a au he kī atu: te kope ta'e haka rē mo haka tika i a ia e te 'Atua, pa he haka rē iņa o te nā poki mo haka tika i a rāua e te rua, e ko o'o ki roto i te haka tere iņa 'āpī 'ā'ana».

¹⁶ He ha'i ia e Ietū i tū nā poki era. I oti era he haka eke i te rima ki ruņa 'e he ha'amaitai.

Ko Ietū 'e he taņata 'ono e tahi (Māteo 19.16-30; Ruka 18.18-30)

¹⁷ I e'a era a Ietū mo oho 'i tō'ona ara, he tu'u e tahi taņata e tahuti rō 'ā, he tū-turi 'i mu'a 'e he 'ui:

—E te Ma'ori riva ē, ¿he aha tā'aku me'e mo aņa mo rava'a e au i te ora 'āpī 'ina he hope'a ra'a va'ai e te 'Atua?

¹⁸ He pāhono e Ietū:

—¿He aha koe e kī mai ena he taņata riva a au? E tahi mau nō kope riva: he 'Atua. ¹⁹ A koe ko 'ite 'ana i tā'ana roņo: 'Ina ko mate te taņata i a koe, 'ina ko tai'ata, 'ina ko toke, 'ina ko reo-reo, 'e e mo'a te matu'a tane, te matu'a vahine.

²⁰ He kī e tū taņata era:

—E te Ma'ori, te nā me'e ta'ato'a ena ko aņa ko oho mai era 'ā e au mai tō'oku 'āpī iņa 'ana.

²¹ He u'i a Ietū a ruņa i rā kope 'e he koa. He kī:

—E tahi a'a me'e toe mo aņa: ka oho ka ho'o tahi tu'u hauha'a, 'e 'ai ka va'ai rō te moni mo te nu'u veve. Pē ira he ai tu'u hauha'a 'i ruņa i te raņi. 'E 'ai koe ka oho iho mai 'i muri i a au mo taņata hāpī 'ā'aku.

²² I ŋaro'a era e rā taņata i tū me'e era, he māui-ui rō atu 'ai te māhatu, 'e i haka kiva-kiva i e'a i oho ai 'i te rahi o tō'ona hauha'a.

²³ He u'i a Ietū a ruņa o te nu'u o muri i a ia, 'ai ka kī ki tā'ana nu'u hāpī:

—¿Ko te aņa ri'a-ri'a 'ō mo te nu'u 'ono mo o'o ki roto i te haka tere iņa 'āpī o te 'Atua!

²⁴ He māere rō atu 'ai tū nu'u era 'i rā vānaņa. He kī haka 'ou e Ietū:

—E kuā haņu ē, ¿ko te aņa ri'a-ri'a mo o'o ki roto i te haka tere iņa 'āpī o te 'Atua! ²⁵ I hau rō atu 'i te aņarahi mo te taņata 'ono mo haka rē i a ia mo haka tere e te 'Atua, ki te o'o o te kameio a roto i te mata o te ivi.

²⁶ I ŋaro'a era i rā vānaņa, he 'ata māere rō atu 'ai rā nu'u 'e he 'ui ki a rāua 'ā:

—¿Ko ai ia te me'e mo e'a mai roto i te ūtu'a o te hara 'e mo rava'a i te ora 'āpī 'ina he hope'a ra'a va'ai e te 'Atua?

²⁷ He u'i riva-riva e Ietū a ruņa i tū nu'u era, 'ai ka kī:

—E ko rava'a ki te hora hope'a e te kope e tahi mo haka e'a i a ia mau 'ā mai roto i te ūtu'a o te hara. Mo te 'Atua mau nō e haka e'a. 'Ina, pa'i, e tahi me'e mo ta'e rava'a e ia mo aņa.

²⁸ He kī ia e Pētero:

—Ko haka rē tahi 'ā a mātou i te mātou me'e mo riro he nu'u hāpī 'ā'au.

²⁹ He pāhono e Ietū:

—'I a au he kī atu: te nu'u haka rē i te rāua hare, i te rāua taina tane, taina vahine, i te rāua matu'a tane, matu'a vahine, i te poki 'e i te rāua henua, mo aņa i tā'aku me'e haņa 'e mo haka 'ite i te [roņo riva-riva o te 'Atua], ³⁰ 'ata rahi te hare, te taina, te matu'a, te po-

ki, te henua ka va'ai era e te 'Atua 'i te ao nei, ka tōtōā atu i a rāua e te nu'u 'o te ai 'ā'aku, 'e pe mu'a ka oho ena he va'ai i te ora 'āpī 'ina he hope'a ra'a. ³¹ Me'e rahi nu'u ko rāua te ra'e 'i te hora nei, pe mu'a ka oho ena ko rāua te hope'a; 'e me'e rahi nu'u ko rāua te hope'a 'i te hora nei, pe mu'a ka oho ena ko rāua te ra'e.

He toru haka 'ite iŋa o Ietū i tō'ona mate

(Māteo 20.17-19; Ruka 18.31-34)

³² 'I te ara ki Hērutarema, 'i mu'a o tā'ana nu'u hāpī e oho era a Ietū. Ko māere 'ā tū nu'u era 'ā'ana, 'e te nu'u oho o tu'a o rāua e ri'a-ri'a rō 'ā. He to'o e Ietū a te tapa i tū nu'u hāpī era 'ā'ana e ho'e 'ahuru mā piti 'e he ha'amata he vānaŋa haka 'ou o ruŋa i te me'e ka topa era ki a ia:

³³ «Nā ko 'ite 'ā e kōrua: 'ī tātou e oho 'ana ki Hērutarema. 'I ira ka va'ai ena i te [Poki o te taŋata] ki te rima o te nu'u [oromatu'a ra-rahi] 'e ki te nu'u [ma'ori o te haka tere hūrio]. E ha'a'au rō 'i roto i a rāua te ūtu'a mō'ona he mate, 'e e va'ai rō ki te rima o te nu'u ta'e he hūrio. ³⁴ E haka ka-kata rō, e 'ā-'anu rō, e tiŋa'i rō hai 'uaka, 'e e tiŋa'i e haka mate rō; 'e, 'i te toru mahana, he ora haka 'ou».

Ko [Tanatiako] 'e ko [Iovani]

(Māteo 20.20-28)

³⁵ He haka hāhine ki a Ietū te nŋa poki 'a Tevere ko Tanatiako 'e ko Iovani, he kī:

—E te Ma'ori, e haŋa rō 'ana a māua mo va'ai mai ō'ou i te me'e nei ka no-no'i atu ena.

³⁶ He 'ui ia e Ietū:

—ŷHe aha te kōrua me'e haŋa mo va'ai atu?

³⁷ He kī:

—Pe mu'a ka oho ena, 'i te ao haka tere e koe, e ha'ati'a mai mo noho atu o māua 'i muri i a koe, e tahi 'i te pā'iŋa mata'u, e tahi 'i te pā'iŋa maui.

³⁸ He pāhono e Ietū:

—Kai 'ite kōrua he aha te kōrua me'e ena e no-no'i mai ena. ŷE 'ite rō kōrua mo ha'aoroma'i i te 'ati ena ka topa mai ena 'i ruŋa i a au? ŷE haka kē rō kōrua mo mate pē au ka mate nei?

³⁹ He pāhono e rā nŋa kope:

—'Ē-ē, e me'e nō e māua.

He kī e Ietū:

—He aŋi 'ā. E 'amo tako'a rō e kōrua i te 'ati pē au, 'e e mate tako'a rō. ⁴⁰ 'E, te me'e ko ai te kope mo noho i tō'oku pā'iŋa mata'u 'e i tō'oku pā'iŋa maui ta'e he

me'e mā'aku e va'ai atu. Ka va'ai ena ki te nu'u ko ha'ata'a era 'ā e te 'Atua.

⁴¹ I ŋaro'a era i rā me'e e tū tētahi nu'u hāpī era 'a Ietū e ho'e 'ahuru, he riri rō atu 'ai mo Tanatiako ararua ko Iovani. ⁴² He raŋi ia e Ietū ki te ta'ato'a o rā nu'u hāpī era 'ā'ana mo haka hāhine ki muri i a ia 'e he kī:

—E 'ite rō 'ana e kōrua, nā 'i roto i te nu'u ta'e he hūrio e ai rō 'ā te nu'u pū'oko haka tere mana'u e tano rō 'ā a rāua mo haka aŋa i te taŋata pa he pua'a, 'e te nu'u 'ata ra-rahi he haka 'ite nō te aŋa ki te nu'u ko ai a rāua. ⁴³ 'I roto i a kōrua 'ina ko ai te me'e tu'u pē ira. Te tano mau: te kope haŋa mo hōnui o roto i a kōrua e tāvini mo te ta'ato'a, ⁴⁴ 'e te kope haŋa mo ra'e o roto i a kōrua e 'ekaravo mo te ta'ato'a. ⁴⁵ Te Poki o te taŋata, pa'i, ta'e mo tāvini ki a ia e te rua i oho mai ai, mo tāvini ō'ona ki te rua 'e mo va'ai i a ia ki te mate, he 'auhau iŋa mo haka e'a me'e rahi taŋata mai roto i te ūtu'a o te hara.

He haka ora iŋa o Ietū i te taŋata matapō

(Māteo 20.29-34; Ruka 18.35-43)

⁴⁶ He tu'u ia a kuā Ietū ki Herikō. I e'a era mai ira ananake ko tā'ana nu'u hāpī 'e me'e rahi haka 'ou atu nu'u, 'i te tapa o te ara e noho rō 'ā te 'ōtare matapō e tahi ko Varatīmeo, poki 'a Tīmeo, e no-no'i 'ā hai moni. ⁴⁷ I ŋaro'a era ko Ietū o Nātāreta te me'e vari a ira, he ha'amata he ohu:

—ŷE Ietū, e te Hakaara o [Tāvita] ē, ka haka 'aroha koe i a au!

⁴⁸ Nu'u rahi te nu'u i ture mo mou, 'e 'ai rā taŋata e 'ata ohu pūai era:

—ŷE te Hakaara o Tāvita ē, ka haka 'aroha koe i a au!

⁴⁹ He noho ia a Ietū, 'e he kī:

—Ka kī kōrua mo oho mai.

He kī ia e te nu'u ki tū matapō era:

—Kiahio koe. Ka e'a ki ruŋa; 'ai e kī mai era mo oho ō'ou.

⁵⁰ A ruŋa i rere ai tū kope era, he hoa i tō'ona kapa, 'e he haka hāhine. ⁵¹ He 'ui e Ietū:

—ŷHe aha ta'a me'e haŋa mo aŋa atu e au?

He pāhono e tū matapō era:

—E te Ma'ori, e haŋa rō 'ana a au mo take'a.

⁵² He kī e Ietū:

—Ka oho nō koe; 'i te haka moe ō'ou i tu'u mana'u 'i ruŋa i a au i ora ena tu'u mata.

'I rā hora mau 'ā he ha'amata he take'a e tū taŋata era i te me'e, 'e he oho tako'a 'i tu'a i a Ietū.

He tu'u iŋa o Ietū ki Hērutarema
(Māteo 21.1-11; Ruka 19.28-40; Iovani 12.12-19)

11 'I te ara oho o kuā Ietū ki Hērutarema, i hāhine era ki Vetefāhē 'e ki Vētānia, he kona o muri i te Ma'uŋa o te 'Ōriwo, he uŋa e Ietū e rua o tā'ana nu'u hāpī ² koia ko kī:

«Ka oho kōrua ki te kona o mu'a era ai. Nā 'i ira e tahi muni e here rō 'ā, kai eke 'ā e te taŋata. Ka kume, 'ai ka ma'u rō mai. ³ Mo 'ui atu e te nu'u mo aha e kume ena, e kī: “O te mātou Pū'oko Haka Tere ko Ietū i kī mai, 'e e ko roa he haka hoki atu”».

⁴ He oho ia rā nu'u, he take'a i tū muni era 'i te ara e here rō 'ā 'i muri i te 'ōpani e tahi 'e he kume.

⁵ I take'a era e te nu'u o tū kona era, he 'ui: «¿E aha 'ā kōrua? ¿He aha rā kōrua i kume ai i te muni?».

⁶ He pāhono e tū nu'u hāpī era pa he me'e kī era e Ietū, 'e he ha'ati'a e rā nu'u mo to'o. ⁷ He ma'u he oho i tū muni era, he pu'a hai kahu o rāua, 'e he eke a Ietū.

⁸ Me'e rahi te taŋata i hēriki i te rāua kahu 'i te ara a te kona ka vari era a Ietū, 'e tētahi i hore-hore hai raupā miro i hēriki ai. ⁹ Te nu'u ta'ato'a oho 'i mu'a 'e 'i tu'a ō'ona 'ai e oho e oho era:

«[Osana]!»

«[Taŋata ha'amaitai e te 'Atua te taŋata oho mai nei hai 'iŋoa ō'ona!»

¹⁰ «[Ka ha'amaitai te 'Atua i a ia, he hakaara o te tātou tupuna ko [Tāvita], oho mai mo haka tere i a tātou!»

«[Osana! ;Ko te nui-nui i te 'Atua o te raŋi!].»

¹¹ He uru ia a Ietū ki Hērutarema 'e he oho ki te Kona Ha'amuri 'Atua. He u'i he oho ka vari tahi rō. I oti era he e'a he oho ki Vētānia ananake ko tā'ana ho'e 'ahu-ru mā piti nu'u hāpī 'o te ai ko ahi-ahi 'ana.

Ko Ietū 'e he tumu pika e tahi
(Māteo 21.18-19)

¹² 'I te rua mahana 'i te hora e'a mai Vētānia, he maruaki a Ietū. ¹³ Mai kōnui i take'a ai i te tumu pika e ai rō 'ā te raupā. He haka hāhine he u'i ana ai te pika o ruŋa, 'e 'ina e tahi me'e i rava'a. He raupā mau nō te me'e o ruŋa; ta'e, pa'i, he 'āva'e o te pika. ¹⁴ He kī e Ietū ki tū tumu pika era: «'Ina e ko kai haka 'ou te taŋata i te pika o ruŋa ō'ou!».

He ŋaro'a ia e tā'ana nu'u hāpī.

He tū-tute iŋa o Ietū i te nu'u
(Māteo 21.12-17; Ruka 19.45-48; Iovani 2.13-22)

¹⁵ I tu'u era ki Hērutarema, he uru a Ietū ki roto i te [Kona Ha'amuri 'Atua] 'e he ha'amata he tū-tute ki ha-ho i te nu'u ho'o o roto. He to'o mai he huri i te 'amurama'a ta'ato'a o te nu'u tau'i moni, 'e pē ira tako'a 'ā i te pepe o te nu'u ho'o pāroma, ¹⁶ 'e 'ina he ha'ati'a mo vari haka 'ou o te nu'u a ira e tari rō 'ana i te rāua me'e. ¹⁷ He ha'amata ia a Ietū he hāpī: «Nā 'i ruŋa i te [Pāpa'i Mo'a] e hā'aki ena te vānaŋa o te 'Atua pē nei ē: “Tō'oku hare e kī rō: 'he hare mo pure mo te hau ta'ato'a”, 'e ko haka riro 'ā e kōrua he 'ana o te toke-toke».

¹⁸ I ŋaro'a era i te me'e nei e te nu'u [oromatu'a rarahi] 'e e te nu'u [ma'ori o te haka tere hūrio], he u'i i te rāve'a mo tiŋa'i mo haka mate i a Ietū. A rāua, pa'i, e ri'a-ri'a rō 'ana 'o te ai he haka roŋo te taŋata i te me'e hāpī e Ietū.

¹⁹ I pō era he e'a haka 'ou a Ietū koia ko tā'ana nu'u hāpī mai Hērutarema.

E haka moe te mana'u 'i ruŋa i te 'Atua
(Māteo 21.20-22)

²⁰ 'I te pō'ā o te rua mahana, he vari a kuā Ietū a muri i tū tumu pika era, he take'a ko paka-paka tahi 'ā 'ātā ki te aka. ²¹ He mana'u a Pētero ki tū me'e kī era e Ietū, 'e he kī:

—E te Ma'ori, ka u'i rā tū tumu pika tohu era e koe; ko paka-paka tahi 'ā.

²² He kī e Ietū:

—E haka moe te kōrua mana'u 'i ruŋa i te 'Atua. ²³ 'I a au he kī atu: te kope kī ki te ma'uŋa nei: “[Ka oho koe mai nā, ka rere ki roto i te vaikava!”, mo ta'e 'aka-'aka o rā kope 'e mo [haka moe i te mana'u] 'i ruŋa i te 'Atua he topa rā me'e kī era, pē ira mau 'ā ka topa era. ²⁴ 'O ira 'i a au he kī atu: te me'e ta'ato'a no-no'i e kōrua hai pure, e mana'u: nā ko ai 'ā i a kōrua rā me'e 'e he va'ai atu.

²⁵ »Hora ena o kōrua e pure 'ā, e haka rehu kōrua 'i ra'e i te me'e ta'e tano aŋa atu e te rua, ki haka kore ai e te Matu'a o te raŋi i te kōrua hara. [²⁶ Mo ta'e haka rehu o kōrua i te hape o te rua, pē ira tako'a 'ā te Matu'a o te raŋi ka ta'e haka rehu ena i te kōrua hara.]

¿'A 'ai i va'ai ki a Ietū i te parau mo aŋa i te me'e aŋa e ia?

(Māteo 21.23-27; Ruka 20.1-8)

²⁷ He tu'u haka 'ou a kuā Ietū ki Hērutarema. E ha'ere nō 'ana a Ietū 'i te Kona Ha'amuri 'Atua, he haka hāhine te nu'u oromatu'a rarahi, te nu'u ma'ori o te haka tere hūrio 'e pē ira 'ā te nu'u pū'oko haka tere hūrio. ²⁸ He 'ui ki a Ietū:

—ʻA 'ai i va'ai atu i te parau mo aña ō'ou i te nā me'e ena e koe e aña ena?

²⁹⁻³⁰ He kī e Ietū:

—Ī a au he 'ui tako'a atu: ʻA 'ai i uña mai i a Iovani mo [papatito], o te 'Atua 'o o te taŋata? Mo pāhono mai o kōrua, he kī atu e au hai parau o 'ai a au e aña nei.

³¹ He ha'amata rā nu'u he tātake ki a rāua 'ā e kī era: «Mo kī e tātou: o te 'Atua i uña mai, pē nei ka kī mai era: “ʻHe aha ia a kōrua i ta'e haka roŋo ai i tā'ana vānaŋa?”. ³² 'E, tako'a, e ko tano tātou mo kī: o te taŋata i uña mai».

Rā nu'u ra-rahi era, pa'i, e ri'a-ri'a rō 'ā 'i te taŋata 'o te ai te nu'u ta'ato'a e mana'u era he perofeta a Iovani. ³³ He pāhono ia ki a Ietū:

—Kai 'ite a mātou.

He kī e Ietū:

—'Ina tako'a ia a au e ko kī atu 'a 'ai i va'ai mai i te parau mo aña i te me'e aña e au.

Te nu'u hāpa'o i te kona 'oka vino

(Māteo 21.33-46; Ruka 20.9-19)

12 He ha'amata a Ietū he vānaŋa hai 'a'amu ha'aa'ura'a. He kī:

«E tahi taŋata he 'oka i te vino 'e he puru hai 'āua. He aña i te kona mo aña o te 'ava 'e he haka tu'u i te kona ruŋa nui mo 'auario. I oti era he ha'a'au ananake ko te nu'u 'oka kai mo aña e rā nu'u i rā henua 'e mo 'auhau ki a ia i te 'apa vino tano mā'ana mo te hoa henua. He haka rē ia ki rā nu'u 'e he e'a he oho rō 'ai.

² »I tano era te 'āva'e mo kato, he uña e tū taŋata era i te tāvini ki rā kona mo kī ki rā nu'u mo va'ai i tū 'apa vino era 'ā'ana. ³ He to'o mai e rā nu'u 'oka kai hāpa'o era i te vino he tiŋa'i ka pi'i-pi'i rō i rā tāvini, 'e 'ai ka haka hoki 'ina he me'e ma'u o te rima.

⁴ »He uña e tū taŋata era i te tāvini haka 'ou e tahi. He vā-vā e tū nāŋata 'oka kai era 'e he tiŋa'i he ŋa'aha te pū'oko.

⁵ »He uña ia i te toru kope. He tiŋa'i he haka mate. Me'e rahi nō atu tāvini i uña haka 'ou; tētahi i tiŋa'i, 'e tētahi atu i tiŋa'i i haka mate e rā nu'u.

⁶ »E tahi nō ia kope toe o rā taŋata mo uña: he poki 'ā'ana, poki haŋa rahi. 'I te hora hope'a he uña i rā poki koia ko mana'u: “He mo'a rā i tā'aku poki”.

⁷ »I take'a era e tū nu'u 'oka kai hāpa'o vino era i rā poki, he kī ki a rāua 'ā: “Ko te kope era te kope ki a ia ka topa ena te henua nei; ki tiŋa'i ki haka mate, ki topa rō mai ai te kona nei mo tātou”.

⁸ »He 'a-'aru ia i tū poki era, he tiŋa'i he haka mate 'e he hoa i te hakari ki haho o tū kona 'oka vino era.

⁹ »Iā. Ki te kōrua mana'u, ʻhe aha te me'e ka aña era ki rā nu'u e te taŋata era ō'ona rā henua? 'Ī a au he kī

atu: he tiŋa'i i rā nu'u he haka mate, 'e he va'ai i rā henua ki te tētahi nu'u mo hāpa'o.

¹⁰ »ʻKai tai'o 'ana 'ō kōrua i te me'e hā'aki 'i ruŋa i te [Pāpa'i Mo'a]? Pē nei e kī ena:

“Te mā'ea ta'e haŋa era e te nu'u aña hare ko riro 'ana he mā'ea matu'a haka noho hare.

¹¹ O te 'Atua i aña pē ira, 'e ki te mātou mata he me'e nui-nui e tahi”».

¹² 'I te 'ite e te nu'u ra-rahi o te [hūrio] o ruŋa i a rāua rā 'a'amu, he haŋa mo 'a-'aru mo puru i a Ietū. 'E, 'i te ri'a-ri'a 'i te nu'u, kai 'a-'aru; he e'a he oho rō 'ai rā nu'u ra-rahi era.

He kimi iŋa i te 'ōtohe mo 'a-'aru i a Ietū

(Māteo 22.15-22; Ruka 20.20-26)

¹³ He uña ia e rā nu'u i te tētahi [fariseo] 'e i te nu'u 'a ['Erore] ki muri i a Ietū mo u'i i te rāve'a mo kī e Ietū i te vānaŋa ta'e tano mo te rāua haka tere iŋa; pē ira he rava'a e rāua i te 'ōtohe mo tuhi i te hape. ¹⁴ He kī e rā nu'u:

—E te Ma'ori, ko 'ite 'ana a mātou: ta'a me'e kī he parauti'a. 'Ina koe he haka tano i a koe ki te vānaŋa kī e te nu'u, 'e 'ina koe he vānaŋa mo haka koa i a rāua. Te me'e hāpī 'ā'au he ara parauti'a o te 'Atua. Ki tu'u mana'u, ʻko tano mau 'ā a tātou e 'auhau nei i te moni kī mo 'auhau ki te 'ariki o te rōmano? ʻE 'auhau 'o 'ina?

¹⁵ 'I te 'ite e Ietū: rā nu'u he nu'u riva a te haho nō, he kī:

—ʻHe aha kōrua e aña mai ena i te me'e mo kī atu ō'oku i te vānaŋa hape? Ka ma'u mai rā e tahi [re-nario].

¹⁶ He ma'u i tū tara 'aurī era 'e he kī e Ietū:

—ʻO 'ai te 'āriŋa nei 'e te 'iŋoa pāpa'i nei o ruŋa?

He pāhono e rā nu'u:

—O te 'ariki o te rōmano.

¹⁷ He kī ia e Ietū:

—Ka va'ai ki te 'ariki rōmano te me'e o te 'ariki rōmano, 'e ki te 'Atua te me'e o te 'Atua.

'E he māere ananake 'i tū pāhono era.

ʻE ora haka 'ou rō te nu'u mate?

(Māteo 22.23-33; Ruka 20.27-40)

¹⁸ He oho ia te tētahi nu'u [saruseo] mo vānaŋa ki a Ietū. Ki te rāua kī 'ina he taŋata he ora haka 'ou mai te mate. 'O ira i kī ai ki a Ietū i te me'e nei:

¹⁹ —E te Ma'ori, pē nei a [Mōtē] i pāpa'i ai: mo mate o te taŋata [hāipo-ipo] e tahi 'e 'ina kai ai te poki

ararua ko tā'ana vi'e, te taina tane o rā kope e hāipo-ipo ki rā vi'e mo ai o te poki mo ma'u i te 'īroa o rā taina mate era 'e mo ai o tō'ona hakaara.

²⁰ »I mu'a 'ā i ai rō e hitu taina tane. Te kope ra'e he hāipo-ipo 'e, kai ai te poki, i mate rō ai. ²¹ He hāipo-ipo te rua ki tū hove era, 'e he mate tako'a kai ai hia te poki. Pē tū me'e 'ā i topa ai ki te toru, ²² 'e ki te ta'ato'a o rā nā taina: he hāipo-ipo ki rā vi'e 'e he mā-mate 'ina kai ai te poki. I oho era he mate tako'a rā vi'e.

²³ »Iā. 'I te hora o te taŋata mo ora mai te mate, ana topa tā'ue rā me'e, o roto o rā nā taina, ¿'a 'ai mau rā vi'e? A hi-hitu, pa'i, i hāipo-ipo ai ki tū vi'e 'ā.

²⁴ He pāhono e Ietū:

—E hape rō 'ā te kōrua mana'u ena pē nei ē: 'ina he taŋata mate he ora haka 'ou, he ta'e 'ite o kōrua i te me'e hā'aki 'i ruŋa i te Pāpa'i Mo'a 'e i te roa o te pūai o te 'Atua. ²⁵ Ka ora ena te taŋata mai te mate, he noho pa he merahi o te raŋi, 'ina he hāipo-ipo.

²⁶ »E te ora o te taŋata mai te mate, ¿ta'e 'ō ko tai'o 'ā e kōrua 'i ruŋa i te puka pāpa'i e Mōtē o ruŋa o te tumu ura 'i te ahī? Pē nei i kī ai e te 'Atua ki a Mōtē mai roto i rā tumu: "A au he 'Atua, kope ki a ia e ha'amuri ena e te kōrua tupuna ko ['Aparahama], ko Ita'ata 'e ko Hākovo". I kī ai i te vānaŋa nei ko mate era 'ā rā nu'u. ²⁷ Te 'Atua, pa'i, he 'Atua o te nu'u ora. 'O ira ko hape riva-riva 'ā te kōrua mana'u ena.

He roŋo hope'a o te nui-nui

(Māteo 22.34-40)

²⁸ E tahi [ma'ori o te haka tere hūrio] ŋaro'a i tū vānaŋa era, i u'i era ko tano riva-riva 'ā te pāhono 'a Ietū, he haka hāhine he 'ui:

—¿Ko roŋo hē o te 'Atua te roŋo hope'a o te nui-nui?

²⁹ He pāhono e Ietū:

—Te roŋo hope'a o te nui-nui o roto o te roŋo ta'a-to'a ko te me'e kī era e Mōtē 'i ruŋa i te Pāpa'i Mo'a: «E te itaraera ē, e tahi mau nō 'Atua, ko Iehoha, Pū'oko Haka Tere o tātou. ³⁰ 'O ira, e haŋa koe ki tu'u 'Atua hai haŋu ta'ato'a o tu'u māhatu, o tu'u vārua, o tu'u man-a'u 'e o tu'u pūai». ³¹ 'E te rua roŋo hope'a o te nui-nui: «E haŋa koe ki te rua pa he haŋa iŋa ena 'ā ō'ou ki a koe». 'Ina he roŋo haka 'ou i hau 'i te nui-nui kī te ŋā roŋo nei.

³² He kī e tū ma'ori era:

—He aŋi 'ā tā'au, e te Ma'ori ē. He parauti'a ta'a me'e kī mai ena: e tahi mau nō 'Atua, 'ina he rua. ³³ 'E te haŋa iŋa ki te 'Atua hai haŋu ta'ato'a o te māhatu, o te mana'u, 'e o te pūai, 'e te haŋa ki te rua pa he haŋa iŋa ena 'ā ō'ou ki a koe, i hau rō atu i te hauha'a ki te me'e ta'ato'a tutu 'e tūtia ki te 'Atua.

³⁴ I ŋaro'a era e Ietū hai mana'u riva-riva i pāhono ai e tū ma'ori era, he kī:

—Ko hāhine 'ā koe mo o'o ki roto i te [haka tere iŋa 'āpī o te 'Atua].

'E, 'i te tano o te pāhono 'a Ietū, 'ina e tahi kope i 'ui haka 'ou e tahi me'e.

¿Mai i a ai ka haka ara mai ena te [Kiritō]?

(Māteo 22.41-46; Ruka 20.41-44)

³⁵ E hāpī nō 'ā a Ietū 'i te Kona Ha'amuri 'Atua, he kī:

«Ko 'ite 'ana a kōrua: te ma'ori o te haka tere hūrio e kī rō 'ana: mai i a [Tāvita] te Kiritō ka haka ara ena.

³⁶ 'E, ka ai atu pē ira, i kī rō e Tāvita 'i te hora haka vānaŋa i a ia e te [Vārua Maitai] pē nei ē:

“A Iehoha te 'Atua i kī rō ki tō'oku Pū'oko Haka Tere: 'Ka noho koe 'i tō'oku pā'iŋa mata'u 'ātā ka haka rē rō e au i te nu'u ta'e haŋa atu ki a koe 'i raro o tu'u va'e”.

³⁷ »Hai kī o Tāvita i te vānaŋa era mo te Kiritō, e 'ite nei e tātou: te Kiritō ta'e nō he hakaara o Tāvita».

'E nu'u rahi te nu'u o ira i haka roŋo hai koa i te vānaŋa 'a Ietū.

Te huru o te ma'ori o te haka tere hūrio

(Māteo 23.1-36; Ruka 11.37-54; 20.45-47)

³⁸ E hāpī nō 'ā a Ietū ki te nu'u he kī:

«E u'i kōrua 'o riro pa he ma'ori o te haka tere hūrio, nu'u haŋa mo hā'ere e uru rō 'ā i te kahu ro-roa mo haka tu'u pa he nu'u hōnui 'e mo 'aroha e te taŋata 'i te ara pa he 'ariki. ³⁹ He u'i nō te aŋa mo noho e rāua i te pepe o te nu'u hōnui o roto i te [hare pure hūrio] 'e o te kona ŋoŋoro. ⁴⁰ He to'o nō te aŋa i te hauha'a o te ŋā vi'e hove mo rāua, 'e mo na'a i rā me'e ta'e tano aŋa era e rāua, he haka roa-roa te pure iŋa 'i mu'a o te taŋata mo haka tu'u i a rāua pa he nu'u riva. 'I a au he kī atu: 'ata paŋaha'a te ūtu'a ka topa ena ki rā ŋā nu'u».

Te tara va'ai e te vi'e veve mo te 'Atua

(Ruka 21.1-4)

⁴¹ 'I te mahana e tahi e noho rō 'ā a Ietū 'i mu'a o te 'avahata ha-ha'o moni 'i te Kona Ha'amuri 'Atua, e u'i 'ā pē hē te nu'u e ha-ha'o era i te moni. He take'a me'e rahi nu'u 'ono e ha-ha'o 'ā me'e rahi nō atu moni.

⁴² E noho e u'i nō 'ā a Ietū i tu'u rō ai e tahi vi'e hove veve, he ha-ha'o e rua tara 'aurī ta'e hauha'a rahi.

⁴³ He raŋi ia e Ietū ki tā'ana nu'u hāpī mo haka hāhine 'e he kī:

—'I a au he kī atu: i hau rō atu 'i te hauha'a, ki te 'Atua, te moni va'ai e te vi'e hove veve era ki te moni va'ai e te tētahi nu'u era. ⁴⁴ Te nu'u ta'ato'a era, pa'i, hai tara e topa rō 'ā i a rāua i va'ai ai; 'e te vi'e era, 'i roto i tō'ona veve, te tara ai mo tō'ona ora i va'ai tahi nō mo te 'Atua.

Te [Kona Ha'amuri 'Atua] e haka marua tahi rō

(Māteo 24.1-2; Ruka 21.5-6)

13 I oho era a kuā Ietū mo e'a mai roto i te Kona Ha'amuri 'Atua, he kī e tahi o tā'ana nu'u hāpī:

—ĪE te Ma'ori, ka u'i rā koe i te nu-nui 'e i te nehe-nehe o te mā'ea o te hare o te kona nei!

² He kī e Ietū:

—E u'i riva-riva te nā hare ena. Pe mu'a ka oho ena e ko ai haka 'ou e tahi mā'ea 'i ruŋa i te rua mā'ea. E haka marua tahi rō.

Te 'ati era mo topa

(Māteo 24.3-28; Ruka 21.7-24; 17.22-24)

³ He oho ia a kuā Ietū ki te Ma'uŋa o te 'Ōrivo, o mu'a o te Kona Ha'amuri 'Atua. I noho era a Ietū, he haka hāhine a Pētero, a [Tanatiako], a [Iovani] 'e a Antarea, 'e he 'ui e rā nu'u ki a Ietū mo 'ite e rāua nō ⁴ a hē ka topa tū me'e era, 'e pē hē ana anjī-anjī ko hāhine 'ā te hora mo topa. ⁵ He kī e Ietū:

«E u'i kōrua 'o haka ma'a-ma'a rō atu. ⁶ Nu'u rahi te nu'u ka tu'u atu ena he kī atu ko au a rāua. Pē nei ka kī atu ena: "He Kiritō au". E rahi rō te nu'u ka haka ma'a-ma'a ena.

⁷ »Ka ŋaro'a ena e kōrua i te parau 'āpī ko tama'i 'ā a nei 'e a rā, 'ina kōrua ko ri'a-ri'a. He topa mau 'ā te me'e ena. 'E, ka ai atu pē ira, kai hāhine 'ā te hope'a o te ao nei. ⁸ Te nu'u o te henua e tahi e moto rō ki te nu'u o te rua henua, 'e he tama'i te 'ariki o te kona e tahi ki te 'ariki o te rua kona. 'E me'e rahi nō atu kona ka mākenū-kenū ena te henua, 'e he ai te maruaki. He ha'amata iŋa iho rā o te 'ati mo topa mai.

⁹ »E hāpa'o kōrua i a kōrua 'ā. Nā e va'ai rō i a kōrua ki te rima o te nu'u ra-rahi o tātou o te [hūrio] 'e e tōtōā rō i a kōrua 'i roto i te hare pure. E ma'u rō mo ture e te suerekao 'e e te 'ariki 'o te ai o kōrua he nu'u hāpī 'ā'aku. 'I rā hora ka haka 'ite ena kōrua ki a rāua o ruŋa i a au. ¹⁰ Te [rono riva-riva o te 'Atua], pa'i, e haka 'ite e oho rō ki te taŋata o te henua ta'ato'a 'i ra'e ki te tu'u iŋa mai o te hope'a o te ao.

¹¹ »Hora era ko va'ai 'ā i a kōrua ki te rima o te nu'u ra-rahi, 'ina ko mana'u he aha te me'e mo kī. Ka kī nō kōrua i te vānaŋa ka haka 'ite atu ena e te 'Atua 'i rā hora; ta'e ko kōrua, pa'i, te me'e ka vānaŋa era, he [Vārua Maitai].

¹² »'I rā nā mahana, e va'ai rō e te taina i tō'ona taina ki te rima o te nu'u mo tiŋa'i mo mate, 'e pē ira 'ana te matu'a i te rāua nā poki. 'E te nā poki e 'enemī rō mo te rāua matu'a 'e e va'ai rō ki te nu'u mo tiŋa'i mo mate. ¹³ Te taŋata o te henua ta'ato'a e ma'u rō i te riri mo kōrua he haka moe o kōrua i te mana'u 'i ruŋa i a au. 'E te kope haka moe oho nō i tō'ona mana'u 'ātā ki te hope'a he rava'a i te ora 'āpī 'ina he hope'a ra'a va'ai e te 'Atua.

¹⁴ »Nā e tu'u rō te mahana te kope ko ia te me'e ka hano-hano 'e ka 'enemī ena e te 'Atua he oho he noho 'i te [Kona 'Ata Mo'a] o te Kona Ha'amuri 'Atua, he kona 'ina a ia ko ai 'i ira. (Te kope tai'o i te me'e nei e anjī-anjī riva-riva).

»Ka topa ena te me'e nei, te nu'u noho o Hūrea e tētere a te kona ma'uŋa; ¹⁵ 'e te kope 'i haho o tō'ona hare, 'ina ko uru ko to'o e tahi me'e mai roto; ¹⁶ 'e te kope 'i 'uta, 'ina ko hoki ki te hare ni mo to'o i tō'ona paratoa.

¹⁷ »'I rā nā mahana ko te 'aroha 'i te hānautama 'e 'i te nā vi'e e haka 'omo-'omo nō 'ā i te rāua nā poki! ¹⁸ E ani ki te 'Atua mo ta'e topa o te me'e nei 'i te 'āva'e o te toŋa. ¹⁹ Te 'ati ka topa era 'i rā nā mahana he taparahi-ta'ata, he me'e kai topa 'ā mai te hora aŋa e te 'Atua i te ao ki 'anarīnā, 'e 'ina e ko ai haka 'ou te me'e tu'u pē ira ki te hora hope'a. ²⁰ Mo ta'e haka poto e te 'Atua i rā nā mahana, 'ina e tahi taŋata mo ora. 'E, ko haka poto 'ā 'i te haŋa ki te nu'u ha'ata'a e ia mā'ana.

²¹ »Mo kī atu e te kope e tahi 'i rā nā mahana: "Ī te [Kiritō] 'i a'a" 'o "Ī te Kiritō 'ai rā", 'ina kōrua ko haka roŋo. ²² Nā e tu'u rō mai te kiritō 'e te perofeta ta'e parauti'a; e aŋa rō i te mana mo haka ma'a-ma'a i te mana'u o te taŋata, 'ātā i te mana'u o te nu'u ha'ata'a e te 'Atua mā'ana ana rava'a e rāua. ²³ Nā ko haka 'ite atu 'ana e au 'i ra'e ki te topa iŋa mai o rā nā me'e. 'O ira, e u'i e hāpa'o kōrua.

He hoki iŋa mai o te [Poki o te taŋata]

(Māteo 24.29-35,42,44; Ruka 21.25-36)

²⁴ »Ki oti te mahana o rā nā 'ati, he pōhāhā te ra'ā 'e e ko mā'eha haka 'ou te māhina; ²⁵ he vī-viri te hetu'u 'e he rurū tahi te me'e o te raŋi.

²⁶ »'I rā hora ka take'a ena i te Poki o te taŋata ka topa mai 'i ruŋa i te raŋi e tahi 'i ruŋa i a ia te pūai 'e te 'ana-'ana o te 'Atua. ²⁷ He uŋa i te merahi mo haka taka-taka i te nu'u ha'ata'a mā'ana mai te kona ta'ato'a o te ao, mai te kona hope'a mau era o te henua 'ātā ki te kona hope'a era o te raŋi».

²⁸ He kī haka 'ou ia e Ietū:

«E haka topa te kōrua mana'u 'i ruŋa i te tumu pika: Ki ai tō'ona maŋa 'āpī, 'e ki pipi tō'ona raupā, he anjī-anjī e kōrua ko hāhine 'ā a hora. ²⁹ Pē ira 'ā, ka take'a ena e kōrua ko topa 'ā te nā me'e nei, e 'ite: ko hāhine 'ā te hoki iŋa mai o te Poki o te taŋata. ³⁰ 'Ī a au he kī atu: te taŋata o te hora nei e ko ŋaro hia ka topa rō mai ena te nā me'e nei. ³¹ E ŋaro rō te raŋi 'e te henua. 'E, tā'aku vānaŋa nei e ko ŋaro; e tano tahi rō.

³² »Te mahana 'e te hora o tō'ona hoki iŋa mai 'ina e tahi taŋata i 'ite, kai 'ite e te merahi o te raŋi, 'e pē ira tako'a 'ā te Poki; he Matu'a mau nō te me'e i 'ite.

³³ »'O ira, e veveri e 'ara te mata; 'ina, pa'i, kōrua kai 'ite a hē te me'e nei ka topa. ³⁴ Te hoki iŋa mai o'ona ka ai ena pa he hoki iŋa ki tō'ona hare o te kope oho ki te rua henua.

»Te kope nei, 'i ra'e ki tō'ona oho, he haka hāpa'o i tō'ona hare ki te nu'u tāvini 'e ki rā nu'u i kī ai i te rāua me'e mo aŋa. Ki te kope ko ia te 'auario o te 'ōpani i kī ai: «E u'i koe 'o ha'uru rō».

³⁵ »Pē ira tako'a 'ā a kōrua, e u'i 'o hā'uru rō; 'ina, pa'i, kōrua kai 'ite a hē ka tu'u mai tū kope era ō'ona te hare, te aura'a, te Poki o te taŋata. E tano nō 'i te ahi-ahi pō, 'i te 'ahuru mā piti o te pō, 'i te hora 'o'oa o te moa 'o 'i te pō'ā. ³⁶ E u'i 'o tu'u rō atu he ma'urima i a kōrua e hā'uru 'ā. ³⁷ Te me'e nei e au e kī atu ena ki a kōrua, ki te ta'ato'a tako'a a au e kī nei: jE veveri e 'ara te mata!».

He ha'a'au iŋa mo 'a-'aru i a Ietū

(Māteo 26.1-5; Ruka 22.1-2; Iovani 11.45-53)

14 E rua mahana toe mo te [ŋoŋoro he Pakate], ŋoŋoro kai i te haraoa 'ina he revaura. Te [oro-matu'a ra-rahi] ananake ko te [ma'ori o te haka tere hūrio] e kimi 'ana i te rāve'a mo 'a-'aru hai reo-reo i a Ietū 'e mo tiŋa'i mo haka mate. ²I ai rō tētahi o rā nu'u i kī mo ta'e 'a-'aru 'i rā ŋā mahana era o te ŋoŋoro 'o tātake 'e 'o moto te taŋata.

He huri iŋa i a Ietū hai mano'i

(Māteo 26.6-13; Iovani 12.1-8)

³A Ietū ia 'i Vētānia, 'i te hare o Tīmona, e kī tako'a era ko Rēpera. E noho nō 'ā a Ietū 'i ruŋa i te 'amura-ma'a, he tu'u e tahi vi'e e ma'u rō 'ā e tahi ipu aŋa hai mā'ea nehe-nehe ko 'i 'ā e te mano'i he *nardo*, mano'i hope'a o te hauha'a. He tī-tiŋi e rā vi'e i te pu'a o rā ipu mo ha-hata, 'ai ka huri a ruŋa i te pū'oko o Ietū.

⁴I ai rō te nu'u o rā kona i riri, i kī ki a rāua 'ā: «¿He aha i haka māu'a ai i te mano'i? ⁵Māu'a 'ō i ta'e ho'o ai mo hā'ū'ū ki te veve. Te moni, pa'i, o te mano'i era ko te tara ena mo 'auhau e toru hānere mahana aŋa».

He ture ia e rā nu'u ki rā vi'e.

⁶He kī e Ietū:

«¿Ka haka rē! ¿He aha kōrua e ture ena ki a ia? Nā e aŋa 'ana i te me'e riva-riva mō'oku. ⁷Te nu'u veve e ko ŋaro mai muri i a kōrua ki te hora hope'a. Hora nō era o kōrua i haŋa e tano nō mo hā'ū'ū ki a rāua. 'E, a au e ko noho e ko oho nō atu 'i muri i a kōrua. ⁸'E te vi'e nei ko aŋa 'ā i tā'ana me'e i tano mo aŋa: 'i ko haka 'eo era 'ā i tō'oku hakari mo tō'oku hora tanu. ⁹'I a au he kī atu: 'i te kona ta'ato'a o te ao haka 'ite i te [roŋo riva-riva o te 'Atua], he vānaŋa tako'a o ruŋa i te me'e aŋa mai nei e ia; pē ira ka ta'e rehu ena a ia».

He ho'o iŋa o Hura i a Ietū

(Māteo 26.14-16; Ruka 22.3-6)

¹⁰A Hura Ikariote, he kope o roto o te ho'e 'ahuru mā piti nu'u hāpī 'a Ietū, he oho he vānaŋa ki te nu'u oromatu'a ra-rahi mo va'ai e ia i a Ietū. ¹¹I ŋaro'a era e rā nu'u i te vānaŋa 'a Hura, he koa rō atu 'ai 'e he kī mo 'auhau e rāua hai moni. Pē ira a Hura i ha'amata i u'i ai i te hora tano mo va'ai i a Ietū ki rā nu'u.

He kai iŋa hope'a

(Māteo 26.17-29; Ruka 22.7-23; Iovani 13.21-30; 1 Kōrinto 11.23-26)

¹²'I te mahana ra'e o te ŋoŋoro kai i te haraoa 'ina he revaura, he mahana tiŋa'i i te māmo'e mo te Pakate, he 'ui e tā'ana nu'u hāpī ki a Ietū:

—¿'I hē mātou ana aŋa i te tātou kai mo te Pakate?

¹³He uŋa ia e Ietū e rua o tā'ana nu'u hāpī:

—Ka oho ki Hērutarema. 'I ira ka take'a ena e kōrua i te taŋata e tahi e ma'u rō 'ā i te karo vai. He oho kōrua 'i tu'a. ¹⁴'E, a te kona ō'ona ka uru era, he uru tako'a kōrua he kī ki te taŋata ō'ona te hare: «Ko uŋa mai 'ā e te Ma'ori mo 'ui atu: ¿'I piha hē ka kai ena a ia i te kai o te Pakate ananake ko tā'ana nu'u hāpī?». ¹⁵Mā'ana e haka take'a atu i te piha nui-nui o ruŋa ko haka riva-riva era 'ā. 'I roto a kōrua ana aŋa i te tātou kai.

¹⁶He e'a ia tū ŋā kope era he oho ki Hērutarema. I tu'u era he take'a ko tano tahi 'ā pē tū me'e kī era e Ietū, 'e he aŋa i tū kai era o te Pakate. I oti era he hoki ki muri i a kuā Ietū.

¹⁷Ko ahi-ahi pō 'ā i tu'u ai a Ietū ki rā hare ananake ko te ho'e 'ahuru mā piti nu'u hāpī 'ā'ana. ¹⁸E ka-kai nō 'ā he kī e Ietū:

—'I a au he kī atu: e tahi o roto o kōrua e kai mai ena 'i muri i a au, nā he va'ai i a au ki te nu'u.

¹⁹He māui-ui rō atu 'ai te māhatu o tū nu'u era 'ā'ana, 'e he ha'amata he 'ui e tahi e tahi ki a Ietū:

—¿Ko au hō nā me'e?

²⁰He pāhono e Ietū:

—He kope e tahi o roto o kōrua haka ruku tako'a i tā'ana haraoa 'i roto i te maretī haka ruku 'ā'aku. ²¹Te me'e ta'ato'a hā'aki 'i ruŋa i te [Pāpa'i Mo'a] mo topa ki te [Poki o te taŋata] e ko ta'e topa; 'e, jko te 'aroha 'i te kope mā'ana e va'ai ki te nu'u! I hau 'i te riva mō'ona 'āhani i ta'e poreko.

²²E ka-kai nō 'ā, he to'o e Ietū i te haraoa, he māuru-uru ki te 'Atua, he more-more 'e he tuha'a ki tā'ana nu'u hāpī he kī:

«Ka kai kōrua i te haraoa ena; he hakari ō'oku».

²³I oti era he to'o i te hapaina vino, he māuru-uru ki te 'Atua, he va'ai ki tū nu'u era 'e ta'ato'a i unu ai. ²⁴'E he kī:

«He toto nā ō'oku ka tehe ena mo te riva-riva o te taŋata; hai nā toto ka tāpa'o ena te [haka tere iŋa 'āpī o te 'Atua ananake ko te taŋata] [haka moe i te man-a'u] 'i ruŋa i a au. ²⁵'I a au he kī atu: e ko unu haka 'ou

a au i te vino 'ātā ki te mahana ka unu nei a au i te vino 'āpī 'i te ao haka tere e te 'Atua».

He haka rehu i a Ietū

(Māteo 26.30-35; Ruka 22.31-34; Iovani 13.36-38)

²⁶ He hīmene ia ananake mo ha'ahana-hana ki te 'Atua. I oti era he e'a a kuā Ietū he oho ki te Ma'uŋa o te 'Ōrivo. ²⁷ 'I te ara he kī e Ietū:

—A kōrua ta'ato'a he haka rehu i a au 'i te pō nei. Pē ira, pa'i, e hā'aki ena 'i ruŋa i te Pāpa'i Mo'a 'i te vānaŋa kī e te 'Atua pē nei ē:

“E tiŋa'i rō a au i te taŋata hāpa'o māmoē,
'e he maraŋa tahi tā'ana māmoē”.

²⁸ »'E, ka ai atu he topa pē ira, ki ora a au mai te mate, he piri a tātou 'i Karirea.

²⁹ He kī e Pētero:

—Mo haka rehu i a koe e te nu'u ta'ato'a ena, mā'aku koe e ta'e haka rehu.

³⁰ He kī e Ietū:

—'Arīnā mau nei 'ā 'i te pō, e ko 'o'oa hia te rua 'o'oa iŋa o te moa, ka kī rō ena koe ki te nu'u e toru kī iŋa kai 'ite koe ko ai a au.

³¹ He kī haka 'ou ia e Pētero:

—;Ka ai atu he mate a au 'i muri i a koe, e ko kī au, ki te hora hope'a, kai 'ite a au ko ai a koe!

'E 'ai te tētahi nu'u hāpī 'a Ietū e kī tako'a atu era pē ira.

He pure iŋa o Ietū 'i Hetesēmānī

(Māteo 26.36-46; Ruka 22.39-46)

³² I oho era he tu'u a kuā Ietū ki te kona te 'iŋoa ko Hetesēmānī 'i te Ma'uŋa era o te 'Ōrivo. He kī ki te rahi ra'a o tā'ana nu'u hāpī: «Ka noho nō kōrua 'i nei; 'i a au he oho he pure».

³³ He ma'u ia e Ietū 'i muri i a ia i a Pētero, i a [Tanatiako] 'e i a Iovani. E oho nō 'ā ananake he o'o te ri'a-ri'a ki a Ietū 'i te mana'u ki te 'ati ka topa era ki a ia 'e he ŋaro'a 'ina ō'ona haŋu toe mo 'amo i rā 'ati. ³⁴ He kī ki tū ŋā kope era: «E rahi rō 'ana te māui-ui ŋaro'a e au 'i roto i tō'oku māhatu 'i te 'ati ka topa mai ena. Ka noho nō mai kōrua 'i nei; e u'i 'o hā'uru rō».

³⁵ He haka 'ava-'ava a Ietū a mu'a, he tū-turi, he noi 'ātā ka puā rō te tira ki te 'ō'one, 'e he ani ki te 'Atua mo ta'e topa o tū 'ati era. ³⁶ Pē nei i kī ai: «E Koro ō'oku ē, 'ina e tahi me'e mo ta'e rava'a e koe. Ka to'o te 'ati nei mai ruŋa i a au. 'E, ka ai atu pē nei tō'oku mana'u, ka haka tano koe hai me'e nō ena 'ā'au i haŋa, 'e ta'e hai me'e haŋa 'ā'aku».

³⁷ He hoki ia ki tū kona era 'i ira a kuā Pētero, he u'i ko hā'uru 'ana. He kī ki a Pētero:

«E Tīmona, e ha'uru 'ā a koe? e Kai rava'a hia ka tahi hora 'e ko paŋaha'a 'ā koe 'i te ha'uru? ³⁸ E 'a-'ara e pure kōrua 'o hara. Nā 'i roto i a kōrua te haŋa mo aŋa i te me'e riva-riva, te 'ino nō, he pūai kore o kōrua».

³⁹ He oho haka 'ou a Ietū he pure pē tū hora ra'e era. ⁴⁰ I hoki haka 'ou era, ko hā'uru haka 'ou 'ā tū nu'u era 'i te rohi-rohi. I 'a-'ara era, 'ina kai 'ite he aha te me'e mo kī.

⁴¹ 'I te toru hoki iŋa o Ietū mai te pure iŋa, he kī ki tū nu'u era: «e hā'uru 'ana a kōrua? e haka ora 'ā? Ka haka oti te kōrua rava ha'uru. Ko tano 'ā te hora o te Poki o te taŋata mo va'ai ki te rima o te nu'u hara. ⁴² Ka e'a ki ruŋa ki oho rō tātou. Nā ko hāhine mai 'ā tū kope era mo va'ai i a au ki te rima o te nu'u ra-rahi».

He 'a-'aru iŋa i a Ietū

(Māteo 26.47-56; Ruka 22.47-53; Iovani 18.2-11)

⁴³ E vānaŋa nō 'ā a Ietū ki tū nu'u era i tu'u rō ai a Hura, he kope o roto o te ho'e 'ahuru mā piti nu'u hāpī 'ā'ana. 'I muri i oho tako'a ai me'e rahi taŋata e ma'u-ma'u rō 'ā i te hoe 'e i te miro i uŋa e te nu'u oromatu'a ra-rahi, e te ma'ori o te haka tere hūrio 'e e te nu'u pū'oko haka tere hūrio. ⁴⁴ Ko ha'a'au era 'ana e Hura ki tū nu'u era pē nei ē: «Ka u'i atu ena kōrua i te kope ko hoŋi 'ā e au, ko ia rā taŋata. Ka 'a-'aru ka ma'u ka oho; e u'i 'o tere rō».

⁴⁵ He haka hāhine a Hura ki a Ietū he kī: «e Pē hē koe, e te Ma'ori ē?». 'E he hoŋi a te 'āriŋa.

⁴⁶ 'I tū hora 'ā he 'a-'aru e tū nu'u era i a Ietū. ⁴⁷ E tahi kope o roto o te nu'u 'a Ietū he kume i tā'ana hoe, he pa'o i te tariŋa o te tāvini o te oromatu'a hope'a o te ra-rahi.

⁴⁸ He 'ui ia e Ietū ki tū nu'u tu'u era:

—e He toke-toke 'ō a au i oho mai ai kōrua e ma'u-ma'u rō 'ana i te hoe 'e i te miro mo 'a-'aru i a au?

⁴⁹ Paurō te mahana 'i muri i a kōrua e noho e hāpī era a au 'i te Kona Ha'amuri 'Atua 'e 'ina a kōrua kai 'a-'aru i a au. I ai ai pē nei e haka tano 'ā ki te me'e hā'aki 'i ruŋa i te Pāpa'i Mo'a.

⁵⁰ 'I tū hora mau era 'ā he hoa i a Ietū e tā'ana nu'u hāpī he tē-tere. ⁵¹ He kope 'āpī mau nō e tahi i oho 'i tu'a e viri rō 'ā i a ia hai tāvana. He moko e te nu'u he 'a-'aru a te kahu. ⁵² He haka pako'o e tū kope era i rā kahu 'e he e'a he tere 'ina e tahi me'e uru.

Ko Ietū 'i mu'a o te nu'u hūrio ra-rahi

(Māteo 26.57-68; Ruka 22.54-55,63-71; Iovani 18.12-14,19-24)

⁵³ He ma'u ia e tū nu'u era i a Ietū ki te hare o te oromatu'a hope'a o te ra-rahi. He taka-taka 'i ira te nūna'a taŋata ta'ato'a i a rāua te kī iŋa hope'a o te haka tere hūrio: he nu'u oromatu'a ra-rahi, he nu'u pū'oko haka tere hūrio, 'e he nu'u ma'ori o te haka tere hūrio.

⁵⁴ A Pētero ia e haka 'ava-'ava rō 'ā i a ia i oho ai 'i tu'a 'ātā ka tu'u rō ki rā hare. He noho 'i haho he haka mahana i a ia ki te ahi 'i muri i te nu'u mūto'i.

⁵⁵ Tū nūna'a taŋata era i a rāua te kī iŋa hope'a o te haka tere hūrio e u'i 'ā i te 'ōtohe mo haka ūtu'a i a Ietū hai mate 'e 'ina kai rava'a ⁵⁶ 'o te ta'e ai e rua 'o e toru mata'ite i kī ko tū me'e 'ā, ki tano ai ki te rāua haka tere iŋa, ka ai atu nu'u rahi i mata'ite hai reo-reo o ruŋa i a Ietū.

⁵⁷ He e'a ia tētahi nu'u ki ruŋa he reo-reo tako'a: ⁵⁸ «Ko ŋaro'a 'ā e mātou te kī iŋa ō'ona he haka hiŋa e ia i te [Kona Ha'amuri 'Atua] aŋa e te taŋata 'e, 'i te toru mahana, ko haka tu'u haka 'ou 'ā e tahi ta'e e aŋa e te taŋata». ⁵⁹ 'E, ka ai atu pē ira, te rāua me'e kī ta'e ko tū me'e 'ā.

⁶⁰ He māroa ia te oromatu'a hope'a o te ra-rahi 'i vāeŋa o tū nu'u ta'ato'a era he 'ui ki a Ietū:

—'I Ina 'ō a'a pāhono? 'I He aha te me'e e kī mai nei o ruŋa ō'ou?

⁶¹ I mou nō a Ietū; 'ina kai pāhono. He 'ui haka 'ou e tū oromatu'a hope'a era o te ra-rahi:

—'I He Kiritō koe, he Poki o te 'Atua?

⁶² He pāhono e Ietū:

—'E-ē, ko au. 'E a kōrua e take'a rō i te Poki o te taŋata e noho rō 'ana 'i te pā'iŋa mata'u o te 'Atua 'e i tō'ona topa iŋa mai 'i ruŋa i te raŋi e tahi.

⁶³ I ŋaro'a era e rā oromatu'a i tū vānaŋa era 'a Ietū, he ihī i tō'ona kahu mo haka take'a i tō'ona riri 'e he kī:

—'I Mo aha nō o tātou te mata'ite haka 'ou? ⁶⁴ Nā ko ŋaro'a 'ana e kōrua i te kī iŋa mai i te vānaŋa 'ina he tano mo te 'Atua. 'I Pē hē te kōrua kī?

Ta'ato'a i kī ai ko hape 'ā, 'e ka tiŋa'i ka haka mate.

⁶⁵ He ha'amata ia e te tētahi nu'u he 'anu-'anu 'i te 'āriŋa o Ietū. He puru i te mata he haka eke-eke hai rima koia ko kī: «'I Ka kī mai rā 'a 'ai a koe i pu'a atu!».

'E he haka eke-eke tako'a e te mūto'i hai rima ki te 'āriŋa.

He kī iŋa o Pētero kai 'ite a ia ko ai a Ietū
(Māteo 26.69-75; Ruka 22.56-62; Iovani 18.15-18,25-29)

⁶⁶ E noho nō 'ana a Pētero 'i haho o rā hare i tu'u ai te vi'e tāvini e tahi o te oromatu'a hope'a o te ra-rahi. ⁶⁷ I take'a era i a Pētero e haka mahana 'ā 'i muri i te ahi, he noho he u'i riva-riva 'e he kī:

—'E, a koe o roto i te nu'u oho 'i muri i a Ietū era o Nātāreta.

⁶⁸ He kī e Pētero:

—'I Ina a au kai 'ite ko ai te kope ena, 'e kai 'ite a au he aha ta'a me'e e vānaŋa mai ena.

He oho a Pētero ki muri i te 'ōpani. He 'o'oa ia te re'o o te moa.

⁶⁹ I oho era he take'a haka 'ou e tū tāvini era i a Pētero 'e he kī ki te nu'u o ira:

—Te kope era o rā nu'u.

⁷⁰ He 'ina haka 'ou e Pētero.

Ko hini 'ā he kī haka 'ou e te nu'u o tū kona era:

—He parauti'a, a koe o te nu'u oho 'i muri i a Ietū. O Karirea tako'a, pa'i, koe.

⁷¹ He kī e Pētero ki rā nu'u:

—He hōrea atu a au hai 'iŋoa o te 'Atua, kai 'ite a au ko ai te taŋata ena, 'e ka hoa a au ki roto i te pō'auahi mo ai e reo-reo atu 'ana a au.

⁷² He 'o'oa haka 'ou ia te moa 'i rā hora, 'e he topa te mana'u o Pētero ki tū me'e kī era e Ietū: «E ko 'o'oa hia te rua 'o'oa iŋa o te moa ka kī ena e koe e toru kī iŋa kai 'ite koe ko ai a au». 'E he to'o rō atu 'ai te taŋi o Pētero.

Ko Ietū 'i mu'a o Pirato

(Māteo 27.1-2,11-14; Ruka 23.1-5; Iovani 18.28-38)

15 'I te pō era 'ā, i oti era te ha'a'au o te [nūna'a taŋata i a rāua te kī iŋa hope'a o te haka tere hūrio]: he nu'u [oromatu'a ra-rahi], he nu'u pū'oko haka tere hūrio 'e he [ma'ori o te haka tere hūrio], he ma'u i a Ietū e here-here rō 'ā, 'e he va'ai ki a Pirato, he suerekao rōmano. ² He 'ui ia e Pirato ki a Ietū:

—'I He 'Ariki koe o te [hūrio]?

He pāhono e Ietū:

—'Ā'au i kī.

³ Me'e rahi te me'e i tuhi e te nu'u oromatu'a ra-rahi o ruŋa i a Ietū. ⁴ 'O ira i 'ui haka 'ou ai e Pirato ki a Ietū:

—'I Ina 'ō a'a me'e mo kī? 'I Ina koe he ŋaro'a i te rahi o te me'e e tuhi atu ena o ruŋa ō'ou?

⁵ Kai pāhono e Ietū, 'e he māere a Pirato.

Te ūtu'a mo Ietū he mate

(Māteo 27.15-31; Ruka 23.13-25; Iovani 18.38-19.16)

⁶ 'I te [ŋoŋoro he Pakate], e haka e'a rō 'ā a Pirato e tahi taŋata mai roto i te hare ma'u'aurī, taŋata nō era o te hūrio i haŋa. ⁷ 'I roto te kope e tahi te 'iŋoa ko Var-avā. E puru rō 'ā ananake ko te tētahi atu nu'u 'o te haka tumu i te ture ki te nu'u ra-rahi rōmano 'e 'o te mate o te taŋata i a rāua.

⁸ He haka hāhine ia te nu'u, he ha'amata he ani ki a Pirato mo haka e'a e tahi taŋata mai roto i te hare

ma'u'aurī pa he me'e aŋa e ia paurō te matahiti. ⁹ He 'ui ia e Pirato:

—ĶE haŋa rō kōrua mo haka pako'o e au i te 'Ariki o te hūrio?

¹⁰ I 'ui ai pē ira e Pirato 'i te 'ite he mākota o tū nu'u oromatu'a ra-rahi era i va'ai ai i a Ietū ki a ia. ¹¹ He kī ia e rā ŋā oromatu'a ki te nu'u mo ohu ki a Pirato ko Varavā te me'e mo haka e'a.

¹² He 'ui haka 'ou e Pirato:

—ĶHe aha te kōrua me'e haŋa mo aŋa e au ki te taŋata nei e kī ena e kōrua he 'Ariki o te hūrio?

¹³ He raŋi e tū nu'u era:

—ĶKa veo 'i ruŋa i te tātaurō!

¹⁴ He 'ui e Pirato:

—ĶHe aha tā'ana me'e ta'e tano i aŋa?

He 'ata ohu e rā nu'u:

—ĶKa veo 'i ruŋa i te tātaurō!

¹⁵ I te haŋa o Pirato mo riva-riva ō'ona ki tū nu'u era, he haka e'a i a Varavā. 'E ko Ietū i haka tiŋa'i hai 'uaka. I oti era he va'ai ki te va'ehau 'e he kī mo veo 'i ruŋa i te tātaurō.

¹⁶ He ma'u ia e te va'ehau i a Ietū ki te kona e tahi o roto i te hare o Pirato, 'e 'i ira i haka taka-taka ai i te va'ehau. ¹⁷ He to'o mai e te va'ehau he patu i te kahu o Ietū 'e he haka pu'a hai kapa mea-mea 'uri, 'e ki te pū'oko i huki ai hai hei i aŋa hai maŋa-maŋa o te tiare pū-pū. ¹⁸ I oti era he ha'amata he haka me'e-me'e: «ĶPē hē te 'Ariki o te hūrio!».

¹⁹ 'E he pu'a-pu'a hai miro ki te pū'oko koia ko 'anu-'anu, 'ai ka noi ananake ka tū-turi pa he me'e ena ē: e ha'atura 'ā a rāua ki te 'ariki. ²⁰ I oti era te haka me'e-me'e, he patu i tū kapa era, he haka uru haka 'ou i tō'ona kahu, 'e he ma'u he oho mo veo 'i ruŋa i te tātaurō.

He veo iŋa i a Ietū 'i ruŋa i te tātaurō
(Māteo 27.32-44; Ruka 23.26-43; Iovani 19.17-27)

²¹ E ma'u e oho nō 'ā i a Ietū a te ara he piri te taŋata e tahi o te kona ko Tīrene te 'iŋoa ko Tīmona, matu'a tane o Arehantaro ararua ko Rufo, e hoki 'ā mai 'uta. He to'o mai e te va'ehau he haka 'amo i te tātaurō 'amo e Ietū.

²² He uŋa he oho ia i a Ietū ki te kona te 'iŋoa ko Korokota (te aura'a o te 'iŋoa nei: «kona o te pakahera taŋata mate»). ²³ I tu'u era ki ira, he va'ai e te va'ehau i te 'ava ko 'āno'i 'ana hai *mirra* 'o ŋaro'a rahi e ia i te mamae, 'e, kai haŋa e Ietū mo unu. ²⁴ He to'o mai he veo 'i ruŋa i te tātaurō. I oti era he noho te va'ehau he pere i te kahu o Ietū mo u'i ki a ai ki a ai ka topa era.

²⁵ Hora iva o te pō'ā i veo ai i a Ietū 'i ruŋa i te tātaurō. ²⁶ I te pū'oko o rā tātaurō i huki ai te miro e hā'aki rō 'ā: «He 'Ariki o te hūrio», he haka 'ite iŋa i te tumu o tō'ona ūtu'a. ²⁷ I te pā'iŋa mata'u 'e 'i te pā'iŋa mau i Ietū te tātaurō haka 'ou 'i ruŋa i veo ai e rua toke-toke. [²⁸ Pē ira i haka tano ai ki te me'e kī 'i ruŋa i te [Pāpa'i Mo'a]: «E tatau rō 'i roto i te nu'u taparahi-ta'ata».]

²⁹ Te nu'u vari a ira 'ai e vā-vā era koia ko ue-ue i te rāua pū'oko e kī era: «ĶĒ! ĶTa'e 'ō ko koe tū me'e kī era he haka hiŋa i te [Kona Ha'amuri 'Atua] 'e e toru mahana he haka tu'u haka 'ou e koe? ³⁰ ĶKa haka e'a, ho'i, koe i a koe mai roto i te 'ati ena 'e ka topa mai mai ruŋa i te tātaurō!».

³¹ Te nu'u oromatu'a ra-rahi 'e te ma'ori o te haka tere hūrio 'ai e haka ka-kata era: «Ko haka e'a 'ana i te tētahi taŋata mai roto i te rāua 'ati, 'e, Ķe ko rava'a mo haka e'a i a ia mau 'ā? ³² ĶKa topa, ho'i, te [Kiritō], te 'Ariki o Itaraera, mai ruŋa i te tātaurō, ki take'a mai 'e ki haka moe ai te mātou mana'u 'i ruŋa i a ia!».

'E, tako'a, i vā-vā rō i a Ietū e tū ŋā kope veo era 'i tupu'aki ō'ona.

He mate iŋa o Ietū

(Māteo 27.45-56; Ruka 23.44-49; Iovani 19.28-30)

³³ I tano era te hora kai, he pōhāhā tahi te henua 'ātā ki te hora toru o te ahi-ahi. ³⁴ I rā hora i a'u a Ietū i te re'o i ohu ai: *Eloí, Eloí, Ķlemá sabactani?* (Te ha'aaura'a o te vānaŋa nei: «E tō'oku 'Atua ē, e tō'oku 'Atua ē, Ķhe aha a koe i haka rē ai i a au hoko tahi nō?»).

³⁵ He ŋaro'a e te nu'u o tū kona era he kī: «Ka haka roŋo rā kōrua, e ohu 'ā ki te perofeta era ko 'Ēria».

³⁶ He tahuti e tahi o roto o rā nu'u, he to'o i te me'e tu'u pa he vavai, he haka ruku ki roto i te vino maŋe, he huki ki ruŋa i te miro, 'e he ma'u he haka puā ki te ŋutu o Ietū mo 'omo-'omo. He kī e rā kope ki te nu'u o rā kona: «ĶKi haka rē nō, ki u'i tātou hoki e tu'u rō mai a [Ēria] e haka topa rō i a ia mai ruŋa i te tātaurō!».

³⁷ He a'u haka 'ou a Ietū i te re'o, he puhi te haŋu hope'a 'e he mate. ³⁸ I rā hora mau 'ā te korotina puru i te kona hope'a o te mo'a o roto i te Kona Ha'amuri 'Atua he paihi mai ruŋa ki raro he topa e rua pā'iŋa. †

³⁹ I mu'a o Ietū e tahi kape o te va'ehau rōmano. I take'a era i te huru o tō'ona mate iŋa he kī:

«He aŋi mau 'ana 'ō te taŋata nei he Poki o te 'Atua».

⁴⁰ I rā kona tako'a te ŋā vi'e e u'i era mai kōnuī. 'I roto o rā ŋā vi'e a Māria Matarena, a [Māria], matu'a vahine o [Kōsē] ararua ko [Tanatiako] 'Iti-'iti, 'e a Taromē. ⁴¹ O te ŋā vi'e nei te hā'ū'ū i a Ietū 'i Karirea. 'I

† Te korotina paihi topa era e rua pā'iŋa 'i te hora mate era o Ietū, kahu hio-hio, te peŋo-peŋo e haka pā e rua maŋa-maŋa tumu. Hai rā kahu e puru era i te kona hope'a o te mo'a o roto o te Kona Ha'amuri 'Atua o Hērutarema. He oromatu'a hope'a o te ra-rahi mau nō te me'e uru ki roto e tahi mahana 'i te matahiti. Te topa o rā korotina e rua pā'iŋa te aura'a: hai mate iŋa era o Ietū i ha-hata ai te ara mo tu'u o te taŋata hai ia 'ā ki muri i te 'Atua, 'e, tako'a, ta'e hai tūtia.

muri o rā nā vi'e me'e rahi haka 'ou atu nā vi'e oho 'i muri i a Ietū ki Hērutarema.

He haka rē ija i te hakari o Ietū
(Māteo 27.57-61; Ruka 23.50-56; Iovani 19.38-42)

⁴² Ko ahi-ahi 'ā rā mahana, 'e 'o te ai he mahana haka riva-riva mo te rua mahana he [mahana haka ora],
⁴³ he oho, kai ri'a-ri'a, a [Kōsē], he taŋata o Ārimatea, he kī ki a Pirato mo va'ai i te hakari o Ietū. Te taŋata nei he taŋata hōnui e tahi o roto o te nūna'a taŋata i a rāua te kī ija hope'a o te haka tere hūrio. A ia tako'a e tiaki 'ā ki te tu'u ija mai o te [haka tere ija 'āpī o te 'Atua].

⁴⁴ I ŋaro'a era e Pirato ko mate 'ā a Ietū he māere. He uŋa ia mo oho o tū kape era o te va'ehau 'e he 'ui e Pirato ki rā kape hoki ko mate mau 'ā. ⁴⁵ I kī era he parauti'a, he ha'ati'a e Pirato mo to'o e Kōsē i te hakari o Ietū.

⁴⁶ He oho ia a Kōsē he ho'o e tahi tāvana rino, he haka topa i te hakari o Ietū mai ruŋa i te tātaurō, 'e he viri hai rā tāvana. I oti era he ma'u he haka rē 'i roto i te kona i ka-karo 'i te mā'ea pa he piha mo te pāpaku 'e 'ai ka puru 'i rā kona hai mā'ea nui-nui taka-taka.

⁴⁷ 'E a Māria Matarena ararua ko Māria matu'a vahine o Kōsē 'ai e u'i era 'i hē i haka rē ai i te hakari o Ietū.

He haka 'ite i te ora ija o Ietū mai te mate
(Māteo 28.1-10; Ruka 24.1-12; Iovani 20.1-10)

16 I oti era te [mahana haka ora], he ho'o a Māria Matarena, a [Māria], matu'a vahine o kuā [Tana-tiako], 'e a Taromē i te mano'i mo paru i te hakari o Ietū. ² 'I te pō era 'ā o te mahana tāpati, mahana ra'e o te tāpati, e 'a iho nō 'ā te ra'ā, he oho ananake ki tū kona haka rē era i te hakari o Ietū ³ koia ko 'ui ki a rāua 'ā mā 'ai e tono e haka tapa i te mā'ea puru o rā kona. ⁴ Rā mā'ea, pa'i, mā'ea nui-nui paŋaha'a.

I tu'u era te nā vi'e nei ki ira, he take'a ko haka tapa era 'ā. ⁵ I uru era ki roto i tū kona haka rē pāpaku era, he take'a e noho rō 'ā 'i te pā'iŋa mata'u e tahi taŋata 'āpī e uru rō 'ā i te kahu tea-tea. He ri'a-ri'a rō atu 'ai rā nā vi'e. ⁶ He kī e rā taŋata:

«'Ina ko ri'a-ri'a. A kōrua e kimi 'ana i a Ietū era o Nātāreta, kope veo era 'i ruŋa i te tātaurō. A ia ko ora haka 'ou 'ā; 'ina o nei. Ka u'i nō a te kona haka rē era i a ia».

⁷ He kī haka 'ou e tū taŋata era:

«Ka oho kōrua ka kī ki a Pētero 'e ki te nu'u hāpī haka 'ou era e ho'e 'ahuru: a Ietū 'i ra'e ki a rāua ka oho ena ki Karirea 'e 'i ira ka piri ena, pa he me'e kī e ia».

⁸ I oti era he 'e rā nā vi'e, he tē-tere mai tū kona era ko rurū 'ana 'i te ri'a-ri'a. 'E 'i te ara 'ina kai 'a'amu i tū me'e era.

He haka take'a ija o Ietū i a ia ki a Māria Matarena
(Iovani 20.11-18)

[⁹ I ora era a Ietū mai te mate 'i te popohaŋa o te mahana ra'e o te tāpati, he haka take'a i a ia 'i ra'e ki a Māria Matarena, he vi'e mai roto i haka e'a ai e Ietū e hitu tātane.

¹⁰ He oho ia rā vi'e he haka 'ite ki te nu'u hāpī 'a Ietū e ta-taŋi 'ā 'i te koromaki, ¹¹ ko ora haka 'ou 'ā a Ietū 'e ko take'a 'ana e ia. He mana'u e rā nu'u ta'e he parauti'a.

He haka take'a ija o Ietū i a ia ki te kope hoko rua
(Ruka 24.13-35)

¹² 'I te ahi-ahi o rā mahana, e oho nō 'ā e rua kope hāpī 'a Ietū mai Hērutarema ki te rua kona, he piri a Ietū ta'e hai huru rava māhani take'a e rāua. ¹³ I aŋi-aŋi era e rā nā kope ko Ietū 'ō rā me'e, he oho he 'a'a-mu ki te tētahi nu'u hāpī 'a Ietū. 'E mo rā nu'u ta'e 'ā he parauti'a.

Te me'e mo aŋa e te nu'u hāpī 'a Ietū
(Māteo 28.16-20; Ruka 24.36-49; Iovani 20.19-23)

¹⁴ E no-noho nō 'ā te nu'u hāpī 'a Ietū e ho'e 'ahuru mā ho'e 'i ruŋa i te 'amurama'a, he haka take'a a Ietū i a ia. He ture ia 'o te ta'e haka roŋo ki te nu'u take'a ra'e i a ia ko ora haka 'ou 'ā mai te mate, he pū'oko hio-hio o rāua 'e he ta'e [haka moe i te mana'u] 'i ruŋa i a ia. ¹⁵ I oho era he kī:

«E oho kōrua e haka 'ite i te [roŋo riva-riva o te 'Atua] a te henua ta'ato'a. ¹⁶ Te kope haka moe i te mana'u 'i ruŋa i a au 'e haka [papatito] i a ia he 'e'a mai roto i te ūtu'a o te hara 'e he rava'a i te ora 'āpī 'ina he hope'a ra'a va'ai e te 'Atua. 'E te kope ta'e haka moe i te mana'u 'i ruŋa i a au, he haka ūtu'a e te 'Atua. ¹⁷ Te nu'u haka moe i te mana'u 'i ruŋa i a au e aŋa rō i te me'e ka take'a era e te taŋata he aŋi-aŋi: i rā nu'u te mana o te 'Atua. Te nu'u nei e haka e'a rō i te tātane mai roto i te taŋata hai 'iŋoa ō'oku, 'e e vānaŋa rō i te 'arero kē ta'e i hāpī e rāua. ¹⁸ Mo 'a-'aru tā'ue i te kōre-ha veneno, 'e mo unu tā'ue i te veneno, e ko 'ati a rāua. 'E 'ātā e ai rō te mana va'ai e te 'Atua, ka haka puā era hai rima ki te nu'u māui-ui, he ora rō 'ai».

He iri ija o Ietū ki te raŋi
(Ruka 24.50-53)

¹⁹ I oti era a Ietū te vānaŋa, he ma'u he iri e te 'Atua ki te raŋi. He noho ia a Ietū 'i te pā'iŋa mata'u o te 'Atua.

²⁰ 'E tū nu'u hāpī era 'a Ietū he 'e'a he haka 'ite he oho a te kona ta'ato'a i te roŋo riva-riva o te 'Atua, 'e 'a Ietū te hā'ū'ū i rā nu'u. 'E hai mana aŋa e rā nu'u hai ia e take'a era e te taŋata: te roŋo haka 'ite oho e rāua he parauti'a.]

RUKA

A Ruka he taote [kirieko] e tahi hokorua i a Pauro 'i tō'ona ara oho haka 'ite i te [ronjo riva-riva o ruŋa i a Ietū] ki te nu'u ta'e he hūrio (Kōrosa 4.14). Te 'evaneria nei 'ā'ana i pāpa'i ki tō'ona repahoa ko Teofiro mo 'ite riva-riva i te parauti'a o ruŋa i a Ietū (1.1–4).

Me'e rahi nō atu me'e o ruŋa i a Ietū e'a 'i ruŋa i te 'evaneria nei i pāpa'i tako'a e Marko 'e e Māteo 'e kē me'e i ta'e pāpa'i e kuā Marko. Pē ira e topa kē ena te puka nei 'a Ruka. Te aura'a: 'ata rahi te haka 'ite iŋa mai ō'ona o ruŋa i te poreko iŋa o Ietū ki a Māteo (1–2), 'e ko ia mau nō te kope i haka 'ite mai o ruŋa i te poreko iŋa o Iovani Papatito.

E ai rō 'ana tētahi hāpī 'a Ietū e'a 'i ruŋa o te 'evaneria nō nei. O rā nā hāpī, he 'a'amu ha'aaura'a o te matu'a koa 'o te hoki iŋa o tā'ana poki tākere i tō'ona hauha'a (15.11–32), 'e he 'a'amu o te kope o [Tāmāria] haka 'aroha 'i te taŋata [hūrio] topa e te 'ati (10.25–37). Hai nā hāpī nei 'a Ietū e haka aŋi-aŋi mai e Ruka: te 'Atua e haŋa tako'a rō 'ana ki te nu'u ta'e he hūrio, 'e te nu'u nei 'ata hau rō atu i te 'ite mo māuru-uru ki te 'Atua ki te hūrio mau era (17.11–19).

Me'e rahi te me'e pāpa'i e Ruka o ruŋa i te oho iŋa hope'a era o Ietū ki Hērutarema (9.51–19.27). Mo Ruka, a Ietū ko haka tika nō mai era 'ana i a ia, 'ātā e tu'u rō 'ana pa he me'e ena ē: mai te nā poki iŋa 'ā i haka tano i oho rō mai ai i a ia mo mate 'i ruŋa i te tātaurō (23.33). Ka ai atu pē ira, i haka aŋi-aŋi tako'a rō mai e Ruka pē nei ē: a Ietū mau 'ana i haŋa mo oho ki Hērutarema 'i te me'e era ko hāhine 'ana a ia mo iri ki te raŋi (9.51), 'e pē ira mau 'ā i topa ai. 'I Hērutarema a Ietū i mate ai i veo 'i ruŋa i te tātaurō, i ora haka 'ou ai mai te mate, 'e i iri ai ki te raŋi (24.51). 'E hai parauti'a nei i haka hope'a ai a Ruka i tā'ana 'evaneria.

He ha'amata

1 I rahi rō te nu'u i u'i mo pāpa'i i te tī-tika mau o te me'e i aŋa e Ietū 'i roto i te taŋata, ² me'e haka 'ite mai e te nu'u he mata'ite mai te ha'amata iŋa o rā nā me'e. Ki a rāua i va'ai ai mo ma'u i te aŋa nei he haka 'ite i te [ronjo riva-riva o te 'Atua].

³ 'E, a au, e tō'oku repahoa hōnui ko Teofiro ē, i rara tahi rō, mai te ha'amata ki te hope'a, hē mau te parauti'a o te me'e ta'ato'a topa era, 'e ki tō'oku mana'u me'e riva-riva mo pāpa'i atu ō'oku i te tī-tika mau, ⁴ ki aŋi-aŋi riva-riva ai e koe i te parauti'a o te me'e hāpī atu era.

Ko Taharia 'e he merahi era ko Kapiriera

⁵ 'I te hora ko ['Erore] te 'ariki o Hūrea, e ai rō 'ā e tahi [oromatu'a] te 'iŋoa ko Taharia o roto o te nūna'a oromatu'a hakaara o 'Āvia. Te 'iŋoa o tā'ana vi'e ko Itapera, he hakaara o te oromatu'a o mu'a 'ā ko ['Ārone]. ⁶ A rāua nu'u tano ki te mata o te 'Atua; e ha'atura rō 'ana ki te roŋo 'e ki tā'ana haka tere iŋa ko te ha'atura iŋa ena 'ina he hape. ⁷ A rāua 'ina kai ai te poki, he pa'a o Itapera 'e he rahi o te rāua matahiti.

⁸ He tu'u ki te mahana e tahi, he topa ki te nūna'a oromatu'a hakaara o 'Āvia mo ma'u i te aŋa 'i te Kona Ha'amuri 'Atua. ⁹ He u'i ia, pa he me'e rava aŋa e rāua, ki a ai ana topa mo uru ki roto i te [Kona Mo'a] mo tu-tu i te *inciense*, 'e i topa ai ki a Taharia. ¹⁰ 'I te hora e tutu 'ā i te *inciense*, te nu'u taka-taka o haho e pure 'ana.

¹¹ E aŋa nō 'ā a Taharia i tū me'e era, he take'a i te merahi e tahi o te 'Atua e māroa rō 'ā 'i te pā'iŋa mata'u o te kona [fata] tutu *inciense*. ¹² I take'a era he veveri koia ko ri'a-ri'a. ¹³ He kī e tū merahi era:

—E Taharia, 'ina koe ko ri'a-ri'a. Ko ŋaro'a 'ana e te 'Atua i ta'a pure, 'e nā he poreko mai roto i ta'a vi'e te poki mā'au. Ki poreko, he nape koe i te 'iŋoa ko Iovani. ¹⁴ A koe e ŋaro'a rō i te koa ki roto i te māhatu, 'e me'e rahi nu'u ka koa tako'a ena 'o te poreko o nā poki. ¹⁵ E riro rō a ia he kope hōnui e tahi ki te mata o te 'Atua. 'Ina e ko unu i te 'ava, 'e mai te hora 'i roto i te manava 'ā, ka ai ena 'i ruŋa i a ia te pūai o te [Vārua Maitai].

¹⁶ »E rahi rō te itaraera ka haka huri ena e ia i te manava'u ki a Iehoha, ki te 'Atua. ¹⁷ E oho rō 'i mu'a i te [Kiritō] hai haŋu 'e hai pūai tu'u pa he haŋu 'e pa he pūai o te perofeta era ko 'Ēria, mo haka hoki o te haŋa o te matu'a ki tā'ana poki 'e o te poki ki tō'ona matu'a, 'e mo 'ite o te nu'u ta'e haka roŋo mo ha'atura. Pē ira ka haka riva-riva ena i te taŋata mo te tu'u iŋa mai o te Kiritō.

¹⁸ He 'ui e Taharia:

—¿Pē hē a au ana aŋi-aŋi e topa rō mai te me'e ena? Ko korohu'a 'ana a au, 'e ko rū'au 'ā tā'aku vi'e.

¹⁹ He pāhono e tū merahi era:

—A au ko Kapiriera, e aŋa nei ki te 'Atua; 'ā'ana i uŋa mai i a au mo vānaŋa atu 'e mo haka 'ite atu i te parau 'āpī riva-riva nei. ²⁰ 'E, 'i tu'u ta'e haka roŋo ki te me'e

kī atu e au, nā he kore tu'u re'o 'e e ko vānaŋa haka 'ou koe 'ātā ka tano tahi rō, 'i tō'ona hora, te me'e ta'ato'a kī atu ena e au.

²¹ 'Ai ia te taŋata e tiaki nō 'ana 'i haho ki a Taharia koia ko 'ui he aha e ta'e hōrou e ta'e e'a era. ²² 'E, i e'a ai, 'ina he re'o toe. He aŋi-aŋi e te nu'u ko haka take'a 'ā e te 'Atua i te me'e 'i roto i tū Kona Mo'a era. I haka 'ite ai a Taharia i tā'ana vānaŋa i ha'aaura'a hai rima, 'e pē ira i noho ai.

²³ I oti era te aŋa o tū ŋā mahana era 'i roto i te Kona Ha'amuri 'Atua, he e'a he oho rō 'ai a Taharia ki tō'ona hare. ²⁴ 'E, kai roa, he tupu te poki 'a Itapera. E rima 'ā-va'e i noho ai 'i roto i tō'ona hare 'ina he e'a koia ko mana'u: ²⁵ «Te 'Atua i aŋa mai ai i te me'e nei 'o ha'amā haka 'ou a au 'i te nu'u he poki kore 'ā'aku».

Ko Māria 'e he merahi era ko Kapiriera

²⁶ Ka ono 'āva'e o te tupu o Iovani, he uŋa e te 'Atua i te merahi era ko Kapiriera ki Nātāreta, he kona e tahi o Karirea. ²⁷ 'I ira e noho era a Māria, he uka e tahi kai noho 'ā ki te taŋata, ko ha'amo'a-mo'a 'ā mo [hāipo-ipo] ararua ko te taŋata te 'iŋoa ko [Kōsē] o te hakaara o te 'ariki era ko [Tāvita].

²⁸ I tu'u era rā merahi, he uru ki roto i te kona era 'i ira a Māria he kī:

—'Iorana koe, e te vovo here o te 'Atua ē. Ararua kōrua ko te 'Atua.

²⁹ He māere a Māria 'i tū vānaŋa era 'e he 'ui ki a ia 'ā: «¿He aha hō te aura'a o te vānaŋa era?».

³⁰ He kī e tū merahi era:

—E Māria, 'ina koe ko ri'a-ri'a. 'I ruŋa i a koe te koa o te 'Atua. ³¹ Nā he tupu ta'a poki; he poreko poki tane. He nape koe i te 'iŋoa ko Ietū. ³² E riro rō a ia he taŋata hōnui; e kī rō he Poki o te 'Atua. 'E, pa he haka 'ariki iŋa era o te 'Atua i tō'ona tupuna i a Tāvita, ka haka 'ariki tako'a ena i a ia. ³³ He haka tere i te itaraera 'ātā ki te hope'a ra'a 'e tō'ona haka tere iŋa 'ina he hope'a ra'a.

³⁴ He 'ui e Māria ki tū merahi era:

—¿Pē hē te me'e tu'u pē nā ana topa mai ki a au? 'I-na, pa'i, e tahi taŋata noho 'ā'aku.

³⁵ He pāhono e te merahi:

—E topa rō atu te Vārua Maitai, 'e 'i ruŋa i a koe ka noho ena te mana o te 'Atua. 'O ira te poki ka poreko ena 'ina e ko rava'a e te hara; e kī rō he Poki o te 'Atua. ³⁶ Pē ira tako'a 'ana tu'u hua'ai ko Itapera, e kī ena he pa'a, ka ai atu he rū'au, 'ai ko tupu 'ana tā'ana poki ka ono 'āva'e, poki tane. ³⁷ Mo te 'Atua, pa'i, 'ina e tahi me'e mo ta'e rava'a mo aŋa.

³⁸ He kī e Māria:

—A au he tāvini o te 'Atua; ka aŋa 'i ruŋa i a au tā'ana me'e ena e koe e kī mai ena.

I oti era te me'e nei, he ŋaro rō 'ai tū merahi era.

He oho iŋa o Māria u'i i a Itapera

³⁹ 'I rā ŋā mahana, he e'a he oho a Māria e hōrou rō 'ana ki te kona e tahi o te ma'uŋa era o Hūrea. ⁴⁰ He tu'u ia ki te hare o Taharia. I uru era he 'aroha ki a Itapera.

⁴¹ I ŋaro'a era e Itapera i te 'aroha 'a Māria, he mākenu-kenu te poki o roto i a ia 'e he 'i rō 'ai a Itapera e te pūai o te Vārua Maitai. ⁴² 'O ira i haka pūai te re'o i kī ai:

—¿E Māria, 'ata ha'amaitai koe e te 'Atua ki te ta'ato'a ŋā vi'e, 'e ko ha'amaitai tako'a 'ana i ta'a poki! ⁴³ ¿Ko ai a au i oho mai ai te matu'a vahine o te Kiritō u'i i a au? ⁴⁴ I ŋaro'a era e au i ta'a 'aroha, he mākenu-kenu tā'aku poki 'i te koa. ⁴⁵ ¿Ko te koa 'ō i a koe e haka noho ena i te mana'u e topa tahi rō atu te me'e haka 'ite atu era e te 'Atua!

⁴⁶ He kī ia e Māria:

«Hai māhatu a au e ha'ahana-hana nei i te 'Atua; ⁴⁷ te koa o tō'oku vārua i a ia, 'Atua haka e'a i a au mai te ūtu'a o te hara.

⁴⁸ Te 'Atua ko mana'u 'ā ki a au, he tāvini ō'ona, 'e mai te hora nei ki te hope'a ra'a e kī rō e te nu'u he vi'e ha'amaitai a au e te 'Atua.

⁴⁹ Ko aŋa 'ana, pa'i, 'i ruŋa i a au i te me'e hope'a o te nui-nui e te 'Atua mo'a, i a ia te pūai ta'ato'a.

⁵⁰ E ko kore te 'aroha ō'ona mo te nu'u ha'amuri ki a ia.

⁵¹ Ko haka take'a 'ana i tō'ona pūai; kai haka tano i te mana'u o te nu'u kī i hau rāua ki te tētahi.

⁵² Ko hiko 'ana i te tōro'a 'ariki mai te 'ariki, 'e ko haka nui-nui 'ā i te nu'u tōro'a kore.

⁵³ Ko ha'a'i 'ā hai tao'a i te nu'u me'e kore, 'e ko haka oho 'ana i te nu'u 'ono 'ina e tahi me'e ma'u o te rima.

⁵⁴ I hā'ū'ū rō i te itaraera, he tāvini ō'ona, he ta'e rehu o tā'ana hōrea mo haka 'aroha i a rāua.

⁵⁵ Pē ira, pa'i, i hōrea ai ki te tātou tupuna ko ['Aparahama] 'e ki tō'ona hakaara pe mu'a ka oho ena».

⁵⁶ E toru 'āva'e tūma'a i noho ai a Māria 'i muri i a Itapera, 'ai ka hoki iho ki tō'ona hare.

He poreko iņa o Iovani Papatito

⁵⁷ I tano era te mahana mo poreko o tū poki era 'a Itapera, he poreko poki tane. ⁵⁸ Te hua'ai o Itapera 'e te nu'u o te hare ta'ato'a hāhine ki te hare ō'ona, i 'ite era pē hē te 'Atua i haka take'a ai i tō'ona riva rahi ki a Itapera, he koa tahi rō 'ai.

⁵⁹ I tano era te va'u mahana o te poki, he ma'u he haka tāpa'o i te tāpa'o iņa o rāua o te [hūrio], he hore i te kiri o te kinōja. Te nu'u e haņa rō 'ana mo nape i te 'iņoa ko Taharia, he 'iņoa o tō'ona matu'a tane. ⁶⁰ He kī e te vi'e matu'a o te poki:

—Te 'iņoa mō'ona ko Iovani.

⁶¹ He pāhono e tū nu'u era:

—'Ina e tahi o roto o tu'u hua'ai ai o te 'iņoa ena.

⁶² He 'ui ia ki te matu'a tane, i ha'aaura'a hai rima, mo 'ite ko ai te 'iņoa haņa 'ā'ana mo nape. ⁶³ He ha'aaura'a e Taharia mo va'ai e tahi miro pararaha mo pāpa'i, 'e he pāpa'i 'i ruņa: «Te 'iņoa mo te poki ko Iovani». 'E he māere tū nu'u ta'ato'a era. ⁶⁴ 'I rā hora i vānaņa haka 'ou ai a Taharia, 'e he ha'amata he ha'ahana-hana ki te 'Atua.

⁶⁵ I u'i era e rā nu'u ko vānaņa haka 'ou 'ā, he ri'a-ri'a tahi rō 'ai, 'e te nu'u ta'ato'a noho o te kona ma'uņa o Hūrea i 'ite tako'a rō i rā me'e. ⁶⁶ Te nu'u ta'ato'a ŋaro'a i rā parau 'āpī he 'ui ki a rāua 'ā: «¿Ko ai hō te poki era ka nui-nui ena?», 'i te 'ite pē nei ē: 'i ruņa i rā poki te mata o te 'Atua.

He hīmene ha'ahana-hana 'a Taharia

⁶⁷ A Taharia, te matu'a tane o rā poki, ko o'o 'ana e te pūai o te Vārua Maitai, he ha'amata he vānaņa hai me'e i haka vānaņa e te 'Atua, he kī:

⁶⁸ «¿Ko te nui-nui i te 'Atua o te itaraera 'o te oho mai mo to'o i tō'ona taņata mai roto i te rake-rake!

⁶⁹ Ko uņa mai 'ana i te kope pūai e tahi mo haka e'a i a tātou mai roto i te ūtu'a o te hara 'e mo va'ai mai i te ora 'āpī 'ina he hope'a ra'a, he hakaara o tō'ona tāvini ko Tāvita, ⁷⁰ mo haka tano tahi i tā'ana me'e hōrea mai 'i mu'a 'ā, haka 'ite mai e tā'ana ŋā perofeta mo'a era pē nei ē: ⁷¹ e haka e'a rō i a tātou mai roto i te rima o te nu'u ta'e haņa mai 'e mai roto i te rima o te nu'u ta'ato'a riri mo tātou, ⁷² e haka 'aroha rō i te tātou tupuna, 'e e ko rehu i a ia ki te hora hope'a tā'ana hōrea mo'a ⁷³ va'ai ki te tātou tupuna ko 'Aparahama ⁷⁴ ki ai ai te tātou noho iņa 'ina he me'e mo ri'a-ri'a 'e ki ta'e ai haka 'ou ai 'i roto i te rima o te nu'u ta'e haņa mai,

ki aņa riva-riva ai tātou ki a ia ⁷⁵ hai māhatu ma'itaki, 'e hai aņa i te me'e tī-tika 'i mu'a ō'ona paurō te mahana 'ātā ki te tātou mate iņa».

⁷⁶ He vānaņa ia a Taharia ki tā'ana poki:

«E haņu 'ā'aku ē, e kī rō i a koe he perofeta o te 'Atua, 'o te ai mā'au e haka riva-riva i te ara o te Kiritō ⁷⁷ 'e e haka 'ite ki tō'ona taņata e rava'a nō e rāua i te ora 'āpī 'ina he hope'a ra'a hai haka kore e te 'Atua i te rāua hara.

⁷⁸ 'I te rahi o tō'ona haņa 'e riva ki a tātou, he uņa mai mai te raņi i te kope tu'u pa he ra'ā ⁷⁹ mo haka mā'eha i a tātou e noho nei 'i roto i te pōhāhā o te hara, 'e mo haka tika mo oho a te ara o te haumārū».

⁸⁰ 'E, ko nui-nui ko oho 'ā tū poki era koia ko te pūai ko te oho tō'ona vārua. 'I te kona 'one ta'e noho taņata i noho ai 'ātā ka tano rō te mahana mo haka 'ite i a ia ki te itaraera.

He poreko iņa o Ietū
(Māteo 1.18-25)

2 'I rā noho iņa, he kī e Akutino, 'ariki o te rōmano, mo haka pāpa'i i te nu'u o te henua ta'ato'a ko ia te 'ariki mo 'ite e hia taņata. ² Te pāpa'i ra'e nei i aņa ai 'i te hora era ko Kīrino te suerekao o Tīria. ³ Te taņata ta'ato'a ana haka pāpa'i 'i te kāiņa o te rāua hakaara.

⁴ He e'a ia a [Kōsē] mai Nātāreta, he kona o Karirea, he oho ki Vērene 'i Hūrea, he kona poreko o tō'ona hakaara ko [Tāvita], ⁵ mo haka pāpa'i i a rāua ko [Māria], vi'e 'ā'ana, e hānautama rō 'ā.

⁶ E noho nō 'ana 'i Vērene he tano te mahana o tū poki era mo poreko. ⁷ He poreko poki tane, poki 'atariki 'a Māria. He ha'ī hai kahu 'e he haka moe 'i roto i te me'e hāņai pua'a. A rāua, pa'i, 'i te kona hāpa'o pua'a, 'i te me'e ko 'ī tahi 'ā te hare e te taņata.

He nu'u hāpa'o māmoe o 'uta

⁸ 'I te kona e tahi o 'uta hāhine ki Vērene e noho rō 'ā te nu'u e hāpa'o 'ana i te rāua māmoe 'i te pō. ⁹ 'I ka u'i atu ena ko te merahi e tahi, 'e te mana o te 'Atua ko 'ana-'ana 'ā e haka vari era i a rāua. He mate rō atu 'ai ananake 'i te ri'a-ri'a.

¹⁰ He kī e te merahi: «'Ina kōrua ko ri'a-ri'a. E ma'u mai 'ana a au i te parau 'āpī riva-riva mo kōrua, he me'e hope'a o te nui-nui mo koa o te taņata ta'ato'a. ¹¹ 'I 'aņarīnā, 'i te kona poreko o Tāvita ko Vērene, i poreko ai te [Kiritō], he Pū'oko Haka Tere o tātou; mā'ana e haka e'a i te taņata mai roto i te ūtu'a o te hara 'e e va'ai i te ora 'āpī 'ina he hope'a ra'a o te 'Atua. ¹² Mo aņi-aņi e kōrua ko ai, he poki e tahi e ha'ī rō 'ana hai kahu 'e e haka moe rō 'ā 'i roto i te me'e hāņai pua'a».

¹³ 'I tū hora 'ā he take'a e rā nu'u me'e rahi atu merahi 'i muri i tū merahi era e ha'ahana-hana tahi 'ā ki te 'Atua pē nei ē:

¹⁴ «ĶKo te nui-nui 'e ko te pūai i a koe, e te 'Atua ē! ĶKa ai te haumārū 'i roto i te taŋata ta'ato'a o te ao 'i ruŋa i a rāua te koa o te 'Atua!».

¹⁵ I hoki era te merahi ki te raŋi, he kī tū nu'u hāpa'o māmoē era: «Matu ki oho tātou ki Vērene ki u'i i te me'e haka 'ite mai ena e te 'Atua».

¹⁶ He oho ananake, i ke'o-ke'o te va'e, ki rā kona. He take'a i a Māria, i a Kōsē, 'e i te poki e moē rō 'ā 'i roto i te me'e hāŋai pua'a.

¹⁷ I take'a era he haka 'ite i tū me'e kī era e te merahi o ruŋa i rā poki. ¹⁸ Te nu'u ŋaro'a i rā me'e 'a'amu e tū nu'u hāpa'o māmoē era he māere tahi. ¹⁹ 'E, a Māria e ma'u tahi rō 'ana i rā ŋā me'e 'i roto i a ia, 'e e mana'u rahi rō 'ana o ruŋa.

²⁰ He hoki he oho tū nu'u hāpa'o māmoē era koia ko ha'ahana-hana i te 'Atua o ruŋa i te me'e ŋaro'a 'e take'a e rāua; ko tano tahi 'ana, pa'i, pa he me'e kī era e te merahi.

He ma'u iŋa i a Ietū ki te Kona Ha'amuri 'Atua

²¹ 'I te va'u mahana o te poreko o tū poki era, he ma'u he haka tāpa'o i te tāpa'o iŋa [hūrio], he hore i te kiri o te kinōŋa, 'e he nape i te 'iŋoa o te poki ko Ietū, he 'iŋoa kī e te merahi ki a Māria mo nape 'i te hora era kai tupu 'ā te poki.

²² I tu'u era te mahana mo haka tano i te me'e kī 'i ruŋa i te [haka tere iŋa 'a Mōtē] o ruŋa i te [haka ma'i-taki] iŋa o te vi'e poreko poki, he e'a a Kōsē ararua ko Māria he ma'u i tū poki era ki Hērutarema ki mu'a o te 'Atua. ²³ I aŋa ai pē ira 'o te ai e hā'aki rō 'ana 'i ruŋa i te [haka tere iŋa o te 'Atua haka pāpa'i ki a Mōtē] pē nei ē: «Ta'ato'a poki 'atariki tane e ha'ata'a mo te 'Atua». ²⁴ 'O ira a rāua i oho ai mo va'ai i te tūtia kī e te 'Atua: e rua manu pa he pāroma 'o e rua pāroma taŋa.

²⁵ 'I rā noho iŋa e ai rō 'ana e tahi taŋata noho 'i Hērutarema te 'iŋoa ko Timione, taŋata tano ki te mata o te 'Atua, ha'amuri 'e mo'a ki a ia; he tiaki nō te aŋa ki te mahana mo haka koa e te 'Atua i te itaraera hai uŋa i te Kiritō. 'I ruŋa i a Timione te [Vārua Maitai] 'e ²⁶ ko haka 'ite era 'ā ki a ia 'ina e ko mate 'ātā ki te take'a iŋa i te Kiritō kī e te 'Atua e uŋa rō mai e ia.

²⁷ He haka oho ia e te Vārua Maitai ki te Kona Ha'amuri 'Atua, 'e 'i tū nu'u matu'a era o Ietū ko ma'u tako'a 'ana i te poki ki ira mo haka tano ki te haka tere iŋa 'a Mōtē. ²⁸ I take'a era e Timione, he hapai i tū poki era he ha'ahana-hana ki te 'Atua pē nei ē:

²⁹ «Te me'e hōrea mai era e koe, e te 'Atua ē, ko tano tahi 'ā.

Hora nei ko tano 'ā tu'u tāvini nei mo mate.

³⁰ Ko take'a 'ana, pa'i, e au te kope i a ia te mātou ora

³¹ uŋa mai e koe mo take'a e te hau ta'ato'a,

³² he mōrī haka mā'eha i te taŋata o te ao

'e hai ia ka nui-nui ena te itaraera».

³³ Tū nu'u matu'a era o Ietū he māere 'i te vānaŋa kī e Timione. ³⁴ He ha'amaitai ia e Timione i a rāua 'e 'ai ka kī ki a Māria:

«Hai poki nei me'e rahi nō atu nu'u o Itaraera ka haka ūtu'a ena 'e me'e rahi nō atu nu'u ka rava'a ena i te ora 'āpī 'ina he hope'a ra'a. Mo rā me'e i ha'ata'a rō ai e te 'Atua i te poki nei. E riro rō a ia pa he tāpa'o haka take'a i te me'e haŋa o te 'Atua, 'e me'e rahi nu'u ka ta'e haŋa ena ki a ia. ³⁵ Pē ira ka take'a ena i te huru mau o te mana'u o te taŋata. 'E te me'e ta'ato'a nei, e Māria ē, ka ai ena mō'ou pa he mamae ena 'ā o te hoe 'o-'oka i tu'u māhatu».

³⁶ 'I te [Kona Ha'amuri 'Atua] tako'a te vi'e perofeta te 'iŋoa ko 'Ana, he poki 'a Penuera o te nūna'a hakaara o 'Ātere. A ia ko rū'au atu 'ā. E 'āpī nō 'ana i [hāipo-ipo] ai, 'e e hitu nō matahiti i noho ai ararua ko tā'ana kenu. ³⁷ 'E, ki rā hora, ka va'u 'ahuru mā maha matahiti o tō'ona hove. Te aŋa mau nō 'ā'ana, ka pō ka 'ōtea, he noho 'i te Kona Ha'amuri 'Atua, he pure 'e he tapu i te kai.

³⁸ He tu'u rā vi'e 'i rā hora mau 'ā ki te kona 'i ira a kuā Māria. He ha'amata ia he māuru-uru ki te 'Atua 'e he vānaŋa o ruŋa i rā poki ki te nu'u ta'ato'a o ira e ŋatu rō 'ā te haŋu ki te e'a iŋa o Hērutarema mai roto i te me'e ta'e tano.

He hoki iŋa ki Nātāreta

³⁹ I oti era te aŋa i te me'e ta'ato'a hā'aki o ruŋa i te haka tere iŋa 'a Mōtē, he hoki a kuā Kōsē ki Karirea ki te kona noho o rāua ko Nātāreta. ⁴⁰ He nui-nui he oho ia a Ietū koia ko pūai 'e ko mārama-rama, 'e 'i ruŋa i a ia te riva rahi 'e te haŋa o te 'Atua.

'I te Kona Ha'amuri 'Atua a Ietū

⁴¹⁻⁴² Paurō te matahiti e oho era a Kōsē ararua ko Māria ki Hērutarema ki te [ŋoŋoro o te Pakate], pa he me'e rava aŋa e te hūrio 'i rā ŋoŋoro. I tano era te ho'e 'ahuru mā piti matahiti o Ietū, he ma'u tako'a e kuā Kōsē 'i muri i a rāua.

⁴³ I oti era te ŋoŋoro, he hoki he oho a kuā Kōsē ki te rāua hare. Mā te ta'e 'ite, a Ietū ko noho 'ā 'i Hērutarema; ⁴⁴ e mana'u era 'ai e oho era 'i muri i te tētahi nu'u. 'I te ahi-ahi o te mahana ra'e o te rāua oho, he kimi a roto i te nu'u hua'ai 'e a muri i te nu'u māhani. ⁴⁵ 'E 'ina kai take'a i a Ietū. 'O ira i hoki i kimi ai a Hērutarema.

⁴⁶ 'I te toru mahana i take'a iho ai 'i te Kona Ha'amuri 'Atua e noho rō 'ana 'i muri i te nu'u [ma'ori o te haka tere hūrio] e haka roŋo 'ana koia ko 'ui. ⁴⁷ He māere tahi te nu'u ŋaro'a 'i te mārama-rama 'e 'i te huru o tā'ana vānaŋa e pāhono era. ⁴⁸ I take'a era e tō'ona nu'u matu'a, he māere 'e he kī e te matu'a vahine:

—E haŋu, ʒhe aha koe i aŋa mai ai i te me'e pē nā? Ko poto 'ā te māua haŋu 'i te kimi iŋa atu i a koe.

⁴⁹ He kī e Ietū:

—ʒHe aha rā kōrua i kimi mai ai? ʒKai 'ite 'ana 'ō kōrua: mā'aku e aŋa i te aŋa o tō'oku Matu'a?

⁵⁰ Kai aŋi-aŋi e tū nā matu'a era i te ha'aura'a o rā vānaŋa.

⁵¹ He hoki ia a Ietū ki Nātāreta 'i muri i tō'ona matu'a 'e he ha'atura ki te rāua me'e kī. Te nā me'e ta'ato'a nei e ma'u tahi rō 'ā e tō'ona matu'a vahine 'i roto i a ia. ⁵² He nui-nui he oho a Ietū koia ko pūai ko oho te mārama-rama. E haŋa rahi rō 'ā e te 'Atua 'e e te taŋata ta'ato'a.

Ko Iovani Papatito 'i 'uta

(Māteo 3.1-12; Marko 1.1-8; Iovani 1.19-28)

3 'I te ho'e 'ahuru mā pae matahiti o te haka tere o te 'ariki rōmano ko Tiverio, ko Pontio Pirato te suerekao o Hūrea. 'A ['Erore] te haka tere a Karirea, 'a Feripe, taina 'ō'ona, a Iturea 'e a Tarakonite, 'e 'a Ritania te haka tere te kona era ko Avirene. ² Te [oro-matu'a hope'a o te ra-rahi] ko 'Ānā ararua ko Kaifā.

'I rā noho iŋa i vānaŋa rō te 'Atua ki a Iovani, he poki 'a Taharia, 'i te kona 'one ta'e noho taŋata. ³ 'E a Iovani i ha'ere rō a te kona ta'ato'a o te rio ko Horotana e kī e oho era ki te taŋata mo huri o te mana'u ki te 'Atua 'e mo haka [papatito], pē ira ana haka kore e te 'Atua i te rāua hara.

⁴ Te me'e ta'ato'a topa nei pa he me'e pāpa'i era 'ā e te perofeta era ko 'Itaia:

«E tahi re'o e ohu 'ā 'i te kona 'one ta'e noho taŋata: "Ka haka riva-riva te ara o te [Kiritō]; ka mātaki e tahi ara tī-tika.

⁵ Ka tanu te vaha ta'ato'a o te kona ma'uŋa, 'e te kona ruŋa nui ka tonu ka haka pararaha. Te ara pōteko-teko ka haka tī-tika, 'e te ara pū-pū ka tanu ka haka riva-riva.

⁶ Pē ira ka take'a ena te taŋata ta'ato'a o te ao i te ora uŋa mai e te 'Atua'».

⁷ I tu'u era te taŋata mo papatito i a rāua, he kī e Iovani:

—E te hua'ai o te kōreha veneno ē! ʒ'A 'ai i kī atu e ora rō kōrua mai roto i te 'ati he ūtu'a nā e oho mai ena? ⁸ Ka haka tī-tika te kōrua noho iŋa ki take'a riva-riva ai he parauti'a mau 'ā ko [huri 'ana te kōrua mana'u ki te 'Atua]. 'E, e u'i 'o kī rō 'i roto i a kōrua 'ā pē nei ē: "ʒA mātou he hakaara o ['Aparahama]; 'o ira e tano rō 'ā a mātou ki te mata o te 'Atua!'. 'Ī a au he kī atu: te 'Atua e tano nō mo haka riro i te nā mā'ea nei he hakaara o 'Aparahama. ⁹ 'E 'ī a au he kī tako'a atu: 'ai te 'ōhio ko rito 'ā mo pa'o i te tumu mai tō'ona aka. Te

tumu ta'ato'a ta'e hua o te me'e riva-riva he pa'o 'e he hoa ki roto i te ahi.

¹⁰ He 'ui e te nu'u:

—ʒHe aha te mātou me'e mo aŋa?

¹¹ He pāhono e Iovani:

—Te taŋata ai e rua 'ō'ona kahu, ka va'ai e tahi ki te taŋata 'ina he kahu; 'e te taŋata e ai rō 'ā tā'ana kai, ka va'ai to te taŋata 'ina 'ā'ana kai.

¹² Tētahi o te [nu'u haka 'auhau i te taŋata hai moni mo te rōmano] he haka hāhine tako'a mo papatito i a rāua 'e he 'ui:

—E te Ma'ori, ʒhe aha te mātou me'e mo aŋa?

¹³ He kī e Iovani:

—'Ina ko haka 'auhau i te taŋata 'ata hau ki te moni mau era mo 'auhau.

¹⁴ He 'ui tako'a e te tētahi va'ehau:

—'E, 'a mātou, ʒhe aha te mātou me'e mo aŋa?

He pāhono e Iovani:

—'Ina ko to'o i te me'e o te rua hai haka ri'a-ri'a, 'e 'i-na ko tuhi reo-reo i te me'e kai aŋa e te rua. Ka koa nō kōrua 'i te moni 'auhau atu.

¹⁵ 'I te huru o te vānaŋa 'a Iovani, te taŋata e mana'u era: te Kiritō tiaki e rāua e te [hūrio] e ko roa he tu'u, 'e 'i roto i te rāua māhatu 'ai e mana'u era koi'ite ko Iovani te Kiritō. ¹⁶ 'O ira i kī ai e Iovani:

—Te parauti'a, a au e papatito nei hai vai; 'e nā e oho mai ena te kope mo papatito atu hai [Vārua Maitai] 'e hai ahi. 'Ata hau a ia ki a au; 'ātā e ko tano au mo kume i te hau o tō'ona kiriva'e. ¹⁷ A ia e ma'u rō 'ana i tā'ana me'e tu'u pa he pātia mo ha'ata'a i te kave-kave paka-paka mai roto i te tariko. Te tariko e hāpa'o rō 'i roto i te hare ha'aputu tariko, 'e te kave-kave e tutu rō 'i roto i te ahi ta'e mate ki te hora hope'a.

¹⁸ Hai me'e nei 'e hai tētahi atu vānaŋa e haka 'ite e oho era a Iovani ki te taŋata i te [rono riva-riva o te 'Atua].

¹⁹ I ture tako'a rō ki a 'Erore, kope haka tere o rā kona, 'o te noho ki a 'Eroria, he vi'e [hāipo-ipo] o te taina o 'Erore, 'e 'o te tētahi atu me'e rake-rake aŋa e ia. ²⁰ 'E, a 'Erore, ki tā'ana me'e rake-rake ta'ato'a aŋa, he 'āmui e tahi haka 'ou: he puru i a Iovani 'i roto i te hare ma'u'aurī.

He papatito ija i a Ietū
(Māteo 3.13-17; Marko 1.9-11)

²¹ E papatito nō 'ā a Iovani i te nu'u, he papatito tako'a i a Ietū. E pure nō 'ana a Ietū 'i rā hora, he hahata te ranjī, ²² he turu te Vārua Maitai ki ruŋa i a ia tu'u pa he pāroma, 'e he ŋaro'a e tahi re'o 'i te ranjī e kī era: «A koe he Poki 'ā'aku, Poki haŋa rahi; 'i ruŋa i a koe tō'oku koa».

He nu'u mai i a rāua i haka ara mai ai a Ietū
(Māteo 1.1-17)

²³ Ka toru 'ahuru matahiti o Ietū i ha'amata ai i tā'ana aŋa. Ki te kī o te nu'u, a Ietū he poki 'a Kōsē.

- A Kōsē he poki 'a 'Ērī.
- ²⁴ A 'Ērī he poki 'a Matā.
- A Matā he poki 'a Rēvī.
- A Rēvī he poki 'a Merekī.
- A Merekī he poki 'a Hanaī.
- A Hanaī he poki 'a Kōsē.
- ²⁵ A Kōsē he poki 'a Matatia.
- A Matatia he poki 'a 'Āmō.
- A 'Āmō he poki 'a Nāū.
- A Nāū he poki 'a 'Ēteri.
- A 'Ēteri he poki 'a Nākai.
- ²⁶ A Nākai he poki 'a Mā'ata.
- A Mā'ata he poki 'a Matatia.
- A Matatia he poki 'a Tēmei.
- A Tēmei he poki 'a Kōteke.
- A Kōteke he poki 'a Hūrā.
- ²⁷ A Hūrā he poki 'a Hoanana.
- A Hoanana he poki 'a Rētā.
- A Rētā he poki 'a Torovāvere.
- A Torovāvere he poki 'a Taratiere.
- A Taratiere he poki 'a Nērī.
- ²⁸ A Nērī he poki 'a Merekī.
- A Merekī he poki 'a 'Ārī.
- A 'Ārī he poki 'a Kōtama.
- A Kōtama he poki 'a Eremārama.
- A Eremārama he poki 'a 'Era.
- ²⁹ A 'Era he poki 'a Ietū.
- A Ietū he poki 'a Erietere.
- A Erietere he poki 'a Hōrima.
- A Hōrima he poki 'a Matā.
- A Matā he poki 'a Rēvī.
- ³⁰ A Rēvī he poki 'a Timione.
- A Timione he poki 'a Hura.
- A Hura he poki 'a Kōsē.
- A Kōsē he poki 'a Hōnama.
- A Hōnama he poki 'a Eriatime.
- ³¹ A Eriatime he poki 'a Mere'ā.
- A Mere'ā he poki 'a Mēnā.
- A Mēnā he poki 'a Matatā.
- A Matatā he poki 'a Nātana.
- A Nātana he poki 'a [Tāvita].
- ³² A Tāvita he poki 'a Hētē.
- A Hētē he poki 'a 'Ōveti.

- A 'Ōveti he poki 'a Vō.
- A Vō he poki 'a Tera.
- A Tera he poki 'a Nātone.
- ³³ A Nātone he poki 'a 'Aminarava.
- A 'Aminarava he poki 'a 'Aramī.
- A 'Aramī he poki 'a 'Ārani.
- A 'Ārani he poki 'a 'Eterone.
- A 'Eterone he poki 'a Pare.
- A Pare he poki 'a Hūrā.
- ³⁴ A Hūrā he poki 'a Hākovo.
- A Hākovo he poki 'a Ita'ata.
- A Ita'ata he poki 'a 'Aparahama.
- A 'Aparahama he poki 'a Tere.
- A Tere he poki 'a Nāhorō.
- ³⁵ A Nāhorō he poki 'a Teruko.
- A Teruko he poki 'a Rākau.
- A Rākau he poki 'a Pereke.
- A Pereke he poki 'a 'Ēvere.
- A 'Ēvere he poki 'a Tera.
- ³⁶ A Tera he poki 'a Kainā.
- A Kainā he poki 'a 'Arapakata.
- A 'Arapakata he poki 'a Teme.
- A Teme he poki 'a Nōē.
- A Nōē he poki 'a Rāmeke.
- ³⁷ A Rāmeke he poki 'a Matutarema.
- A Matutarema he poki 'a 'Ēnoko.
- A 'Ēnoko he poki 'a Hārete.
- A Hārete he poki 'a Mārārē.
- A Mārārē he poki 'a Kainā.
- ³⁸ A Kainā he poki 'a 'Ēnō.
- A 'Ēnō he poki 'a Tē.
- A Tē he poki 'a ['Ātamu],
- 'e a 'Ātamu he taŋata aŋa e te 'Atua.

He haka 'atu ija o Rukifero i a Ietū mo hara
(Māteo 4.1-11; Marko 1.12-13)

4 He e'a ia a Ietū mai te kona rio era ko Horotana, ko 'ī 'ā e te pūai o te [Vārua Maitai], 'e he oho ki te kona 'one ta'e noho taŋata, i haka oho e te Vārua Maitai. ² E maha 'ahuru mahana i noho ai 'i ira 'e he haka 'atu e Rukifero.

'Ina e tahi me'e i kai a Ietū 'i rā ŋā mahana 'e i oho era he maruaki. ³ He kī e Rukifero:

—Ē, a koe he Poki o te 'Atua, ŋhe aha rā koe e ta'e haka riro ena i te ŋā mā'ea nei he haraoa?

⁴ He pāhono e Ietū:

—Ē, pē nei e kī ena 'i ruŋa i te [Pāpa'i Mo'a]: «Ta'e hai haraoa nō te taŋata e ora ena».

⁵ He ma'u ia e Rukifero ki ruŋa i te ma'uŋa ruŋa nui, he haka take'a hai minuti i te henua ta'ato'a o te ao, ⁶ 'e he kī:

—Te henua ta'ato'a ena ō'oku, 'e i a au te parau mo va'ai ki te kope 'ā'aku i haŋa. Hora nei he va'ai tahi atu

e au koia ko tō'ona hauha'a ⁷ mo tū-turi 'e mo ha'amuri mai ō'ou ki a au.

⁸ He pāhono e Ietū:

—Pē nei tako'a e kī ena 'i ruŋa i te Pāpa'i Mo'a: «E ha'amuri koe ki a Iehoha ki tu'u 'Atua 'e ki a ia mau nō koe ana tāvini».

⁹ I oti era he ma'u e Rukifero i a Ietū ki Hērutarema ki ruŋa i te kona hope'a o te ruŋa nui o te [Kona Ha'amuri 'Atua] 'e he kī:

—He Poki koe o te 'Atua. Ka rere mai ruŋa nei ki raro. ¹⁰ Nā, pa'i, e hā'aki rō 'ā 'i ruŋa i te Pāpa'i Mo'a:

“E uŋa rō atu te 'Atua i tā'ana merahi mo hāpa'o i a koe.

¹¹ Hai rima o rāua ka ma'u ena i a koe a ruŋa 'o hetu ki te mā'ea”.

¹² He pāhono e Ietū:

—E hā'aki tako'a rō 'ana 'i ruŋa: «'Ina koe ko haka 'atu i tu'u 'Atua, 'ina ko aŋa e tahi me'e ma'a-ma'a hai mana'u pē nei ē: e haka e'a rō koe e te 'Atua mai rā me'e».

¹³ I u'i era e Rukifero 'ina he rāve'a toe mo haka 'atu i a Ietū, he e'a he oho mai muri 'ātā ki te mahana mo hoki.

He hoki iŋa o Ietū ki Karirea

(Māteo 4.12-17; Marko 1.14-15)

¹⁴ He hoki ia a Ietū ki Karirea ko 'ī 'ā e te pūai o te Vārua Maitai. 'I ira 'e 'i te kona ta'ato'a hāhine e vānaŋa rō 'ā te nu'u o ruŋa i a Ietū. ¹⁵ E hāpī era 'i te [hare pure hūrio] o te kona ta'ato'a tu'u. Te nu'u ta'ato'a o rā ŋā kona e ha'ahana-hana rō 'ā i a ia.

'I Nātāreta a Ietū

(Māteo 13.53-58; Marko 6.1-6)

¹⁶ He oho ia a Ietū ki Nātāreta ki te kona 'i ira i nui-nui ai. I tano era te [mahana haka ora], he oho ki te hare pure hūrio, pa he me'e rava aŋa e ia 'i te mahana haka ora, 'e he māroa mo tai'o i te Pāpa'i Mo'a. ¹⁷ He puka o te perofeta era ko 'Ītaia te me'e i va'ai. He mā-taki 'i te kona e hā'aki rō 'ā pē nei ē:

¹⁸ «'I ruŋa i a au te Vārua o te 'Atua, 'o te ai ko ha'ata'a 'ana i a au mo ma'u i te roŋo riva-riva 'ā'ana ki te nu'u veve. Ko uŋa mai 'ā mo haka 'ite ki te nu'u puru e ai rō 'ā te rāve'a mo e'a o rāua mai roto i te 'ati. Ko uŋa tako'a mai 'ana i a au mo haka mā'eha i te mata o te nu'u matapō, mo haka e'a i te nu'u mai te rima o te nu'u tōtōā i a rāua,

¹⁹ 'e mo haka 'ite pē nei ē:

ko tano 'ā te hora mo ha'amaitai e te 'Atua i te taŋata».

²⁰ He puru a Ietū i tū puka era, he va'ai ki te taŋata hā'ū'ū 'i te aŋa o roto i te hare pure 'e he noho. Te nu'u ta'ato'a o ira ko te u'i iŋa 'ana a ruŋa. ²¹ He ha'amata ia a Ietū he vānaŋa: «'I 'aŋarīnā te me'e tai'o atu ena e au o ruŋa i te Pāpa'i Mo'a i tano ai».

²² Te nu'u ta'ato'a o ira e koa rō 'ā e vānaŋa era o ruŋa i a Ietū 'e ko māere tahi 'ana 'i te me'e nehe-nehe kī e ia. He 'ui ki a rāua 'ā:

—ĶPē hē ia te me'e nei? Ko tū poki era 'a [Kōsē], pa'i, te kope nei.

²³ He kī haka 'ou e Ietū:

—Ko 'ite 'ana a au e kī rō mai kōrua i te vānaŋa nei: «E te taote, ka haka ora koe i a koe 'ā». E tako'a: «Te me'e aŋa e koe 'i Kaperenāu ka aŋa tako'a 'i nei 'i tu'u kāiŋa».

²⁴ Ko te vānaŋa iŋa 'ana ia a Ietū:

—'Ī a au he kī atu: te taŋata 'ina he haŋa ki te perofeta o te rāua kāiŋa mau 'ā. ²⁵ Te parauti'a, 'i tū matahiti era e toru 'e te 'afa ta'e hoa era o te 'ua, rahi era o te maruaki 'i ruŋa i te henua, ŋā mahana era ko [Ēria] te perofeta, i ai rō 'i Itaraera me'e rahi ŋā vi'e hove. ²⁶ 'E 'ina he 'Atua kai uŋa i a 'Ēria mo hā'ū'ū ki rā ŋā vi'e; i haka oho ai ki te vi'e hove ta'e he hūrio o te kona era ko Tarapeta, he kona hāhine ki Tīrone.

²⁷ »I ai tako'a rō me'e rahi nu'u rēpera o Itaraera 'i te ŋā mahana era ko Eriteo te perofeta, 'e 'ina e tahi o rā nu'u i haka ora; he taŋata mau nō e tahi ta'e he hūrio te 'iŋoa ko Nāmana o te kona era ko Tīria te me'e i haka ora.

²⁸ I ŋaro'a era e te nu'u ta'ato'a o roto i te hare pure hūrio i te vānaŋa 'a Ietū, he riri tahi rō 'ai. ²⁹ He moko he 'a-'aru i a Ietū he ma'u he iri ki te kona hope'a o te ruŋa nui o Nātāreta mo ava ki raro. ³⁰ He huri ia a Ietū, he hoki a vāeŋa o rā ŋā nu'u 'e he e'a he oho rō 'ai.

He taŋata e tahi ko o'o 'ana e te tātane

(Marko 1.21-28)

³¹ He e'a a Ietū he oho ki Kaperenāu, he kona haka 'ou o Karirea, 'e 'i te mahana haka ora e hāpī era 'i roto i te hare pure hūrio. ³² He māere te nu'u 'i te huru o tō'ona hāpī iŋa; e vānaŋa era pa he taŋata i a ia te parau o te me'e ta'ato'a.

³³ 'I roto i rā hare pure e tahi taŋata ko o'o 'ā e te tātane, he ohu pūai:

³⁴ —ĶHe aha ta'a me'e haŋa i a mātou, e Ietū o Nātāreta ē? ĶE oho mai 'ana koe mo haka kore i a mātou? Ko 'ite 'ana a au ko ai koe: he kope mo'a uŋa mai e te 'Atua.

³⁵ He ture ia e Ietū ki tū tātane era:

—Ĵka mou 'e ka e'a koe mai roto i te taŋata ena!

He haka 'amo e tū tātane era i rā kope ki raro e u'i nō atu 'ana te nu'u ta'ato'a o tū kona era. He e'a rā tātane mai roto 'e 'ina e tahi me'e 'ino i aŋa.

³⁶ He ri'a-ri'a tahi tū nu'u era koia ko kī ki a rāua 'ā: «Ĵko ŋaro'a 'ā e kōrua te vānaŋa o te kope era? I kī era ki te tātane ka e'a, he e'a rō 'ai».

³⁷ 'E he 'ata rahi rō 'ai te vānaŋa o ruŋa i a Ietū 'i te kona ta'ato'a hāhine ki ira.

He haka ora iŋa o Ietū i te huŋavai o Tīmona

(Māteo 8.14-15; Marko 1.29-31)

³⁸ He e'a a Ietū mai tū hare pure era, he oho ki te hare o Tīmona. Te māmā huŋavai o Tīmona e māui-ui rō 'ā, ko hū 'ā te hakari 'i te māui-ui. He ani e te nu'u ki a Ietū mo haka ora. ³⁹ He noi a Ietū a ruŋa i rā vi'e, he kī ki te māui-ui mo kore, 'e he kore rō 'ai. 'I tū hora 'ā he e'a rā vi'e ki ruŋa he ha'amata he va'ai hai kai mo rāua.

He haka ora iŋa o Ietū me'e rahi nu'u

(Māteo 8.16-17; Marko 1.32-34)

⁴⁰ I ŋaro era te ra'ā o rā mahana haka ora era, he e'a te taŋata ta'ato'a ai o te rāua nu'u māui-ui he ma'u ki a Ietū. 'E, ka ai atu huru kē huru kē te rāua māui-ui, he haka puā e Ietū hai rima 'e he ora rō 'ai.

⁴¹ I rahi rō te nu'u o rā nu'u māui-ui era mai roto tako'a i e'a ai te tātane koia ko ohu:

—ĴHe Poki koe o te 'Atua!

He ture e Ietū ki rā ŋā tātane 'e, 'i te 'ite o rāua a ia he [Kiritō], 'ina he haka rē e Ietū mo vānaŋa.

He haka 'ite iŋa o Ietū i te roŋo o te 'Atua

(Marko 1.35-39)

⁴² I 'ōtea era he e'a a Ietū he oho mai tū kona era ki te kona 'ina he taŋata. He kimi he oho e te nu'u ka rava'a rō. Te haŋa mo ta'e oho o Ietū mai muri i a rāua. ⁴³ He kī e Ietū: «Te aŋa 'ā'aku he haka 'ite tako'a ki te taŋata o te tētahi kona i te roŋo riva-riva o ruŋa i te [haka tere iŋa 'āpī o te 'Atua]; ki ira a au i uŋa mai ai».

⁴⁴ Pē ira a Ietū e haka 'ite e oho era i te [roŋo riva-riva o te 'Atua] 'i te hare pure hūrio ta'ato'a o tō'ona henua.

He 'ī te kūpeŋa e te ika

(Māteo 4.18-22; Marko 1.16-20)

5 E tahi mahana e noho nō 'ā a Ietū 'i te taha-taha o te vai ko Henetareta, he ŋaro'a ko pi-piri 'ā a ia 'i te rahi o te taŋata oho mo haka roŋo i te [roŋo riva-riva o te 'Atua]. ² He take'a ia e Ietū e rua vaka ko tomo 'ā ki 'uta. Te nu'u hī ika o rā ŋā vaka ko topa 'ana mo tata i te rāua kūpeŋa. ³ He turu a Ietū he eke ki ruŋa i

te vaka o Tīmona 'e he kī mo haka 'ava-'ava 'iti-'iti mai te taha-taha. He noho 'e mai ruŋa i ha'amata i hāpī ai i te taŋata. ⁴ I oti era te vānaŋa, he kī ki a Tīmona:

—Ka ma'u te vaka ki te kona parera 'e 'ai ka haka topa rō te kōrua kūpeŋa.

⁵ He pāhono e Tīmona:

—E te Ma'ori, i aŋa nō mai a mātou i te aŋa ena 'i 'aŋapō ka 'ōtea rō 'e 'ina e tahi ika i rava'a mai. 'E, 'o te ai nō 'ā'au i kī mai, ka haka topa haka 'ou nei a mātou i te kūpeŋa.

⁶ I haka topa era i te kūpeŋa, ka 'ī ka 'ī te ika i o'o ai. I haro mai era he ha'amata he mō-more 'i te rahi. ⁷ He rapu ki te nu'u o ruŋa i te rua vaka mo oho mo hā'ū'ū. I puā era he ha'a'ī i rā ŋā vaka hai ika ki te 'ī, 'ātā ka oho rō mo emu.

⁸ I take'a era e Tīmona, kī tako'a ko Pētero, i tū me'e era, he tū-turi 'i mu'a o Ietū he kī:

—ĴE Ietū, ka oho koe mai muri i a au; he taŋata hara a au!

⁹ A Tīmona ananake ko te nu'u ta'ato'a o muri i a ia ko ri'a-ri'a atu 'ana o ruŋa i te rahi o tū ika rava'a era. ¹⁰ Pē ira 'ana a [Tanatiako] ararua ko [Iovani], poki 'a Tevereo, he nu'u aŋa tako'a ananake ko kuā Tīmona. He kī ia e Ietū ki a Tīmona:

—'Ina koe ko ri'a-ri'a; mai te hora nei pe mu'a he hī taŋata mo te 'Atua ta'a aŋa.

¹¹ I oho era he hoki ananake ki ruŋa i te henua, he haro i tū ŋā vaka era ki 'uta, he haka rē tahi i te rāua me'e 'e he oho rō 'ai 'i muri i a Ietū.

He haka ora iŋa o Ietū i te rēpera

(Māteo 8.1-4; Marko 1.40-45)

¹² 'I te kona e tahi a Ietū, he tu'u te taŋata māui-ui 'i te rēpera. I take'a era i a Ietū, he tū-turi he haka puā i tō'ona tira ki ruŋa i te 'ō'one he ani:

—E Ietū ē, mo haŋa ō'ou, i a koe te ora o tō'oku māui-ui nei.

¹³ He haka puā ia e Ietū i tō'ona rima koia ko kī:

—Ko tano 'ā. Ko ora 'ā a koe.

'I tū hora mau era 'ā he ora rō 'ai tū māui-ui era. ¹⁴ He kī e Ietū:

—'Ina koe ko 'a'amu i te me'e ena e tahi kope. Te me'e nō, ka oho ka haka take'a i a koe ki te [oromatu'a]. E ma'u te me'e mo tūtia haka 'ite mai era e [Mōtē] mo tu'u [haka ma'itaki] mo 'ite e te oromatu'a 'e pē ira tako'a 'ana e te taŋata ko ora 'ā tu'u māui-ui.

¹⁵ Pe te 'ata hau nō te vānaŋa o ruŋa o Ietū e ŋaro'a era e te taŋata, 'e he 'ata rahi te nu'u e taka-taka era mo haka roŋo i tā'ana vānaŋa 'e mo haka ora e ia i te rāua māui-ui. ¹⁶ 'E a Ietū e haka tapa rō 'ā i a ia a te kona 'ina he taŋata mo pure ō'ona.

He haka ora iŋa o Ietū i te taŋata hakari ta'e makenu
(Māteo 9.1-8; Marko 2.1-12)

¹⁷ E tahi mahana e hāpī 'ā a Ietū i te nu'u. 'E, 'i te hare 'i ira a ia, e no-noho rō 'ā tētahi [fariseo] 'e tētahi [ma'ori o te haka tere hūrio] tu'u mai te kona ta'ato'a o Karirea, o Hūrea 'e o Hērutarema. Te pūai o te 'Atua 'i ruŋa i a Ietū mo haka ora i te māui-ui.

¹⁸ He tu'u ia te ŋāŋata e tupa rō 'ana i te raŋo 'i ruŋa te taŋata hakari ta'e makenu. Te haŋa ananake mo ma'u i rā taŋata ki mu'a i a Ietū 'i roto i te hare, ¹⁹ 'e, 'i te rahi o te taŋata, 'ina he rava'a mo uru. 'O ira i eke ai ki ruŋa o te hare, he mātaki e tahi kona, he haka topa i tū māui-ui era 'i ruŋa i te raŋo a vāeŋa o te taŋata ki mu'a o Ietū.

²⁰ I take'a era e Ietū i te rahi o te rāua haka moe iŋa i te mana'u 'i ruŋa i a ia mo te ora o tū taŋata era, he kī ki tū māui-ui era: «E hoa, ko haka kore 'ā tu'u hara».

²¹ He ha'amata ia te nu'u ma'ori o te haka tere hūrio 'e te fariseo he mana'u: «¿Ko ai a ia mo kī i te vānaŋa ta'e tano mo te 'Atua? He 'Atua mau nō te me'e haka kore i te hara».

²² He aŋi-aŋi e Ietū i te me'e mana'u e rāua 'e he 'ui: «¿He aha a kōrua e mana'u ena pē nā? ²³ Ki a kōrua, ¿'ata aŋarahi mo haka kore i te hara ki te haka ora i te māui-ui? ¿Ta'e 'ō hai parau nō o te 'Atua te ŋā me'e nei e aŋa ena? ²⁴ 'E, 'i a au he haka take'a atu: i a au i te [Poki o te taŋata] te parau 'i te ao nei mo haka kore i te hara».

He kī haka 'ou ia ki tū taŋata māui-ui era: «Kī a koe a au e kī atu ena, ka e'a ki ruŋa, ka ma'u tu'u raŋo 'e 'ai ka oho rō ki tu'u hare».

²⁵ 'I tū hora 'ā he e'a ki ruŋa tū taŋata hakari ta'e makenu era 'i mu'a o te nu'u ta'ato'a. He ma'u ia i tō'ona raŋo 'e koia ko ha'ahana-hana ki te 'Atua he oho ki tō'ona hare.

²⁶ He māere te nu'u ta'ato'a o rā kona koia ko ri'a-ri'a; he ha'ahana-hana ki te 'Atua 'e he kī: «'I 'aŋarīnā i take'a ai e tātou i te me'e hope'a o te nui-nui!».

Ko Ietū 'e ko [Rēvī]
(Māteo 9.9-13; Marko 2.13-17)

²⁷ I oti era te me'e nei, he e'a a Ietū he oho mai tū kona era. He take'a i te taŋata e tahi e haka 'auhau 'ana i te nu'u hai moni mo te rōmano te 'Iŋoa ko Rēvī. Te taŋata nei e noho rō 'ana 'i muri i tō'ona 'amura-ma'a aŋa. He kī e Ietū: «Ka oho mai koe mo taŋata hāpī 'ā'aku».

²⁸ He e'a ia a Rēvī ki ruŋa, he haka rē i te me'e ta'ato'a 'e he oho 'i muri i a Ietū.

²⁹ I oho era he aŋa e Rēvī i te ŋoŋoro nui-nui mā Ietū 'i tō'ona hare. Me'e rahi taŋata haka 'auhau i te nu'u hai moni mo te rōmano koia ko te tētahi atu nu'u e no-

ho rō 'ana 'i ruŋa i te 'amurama'a ananake ko kuā Ietū. ³⁰ Te fariseo 'e te ma'ori o te haka tere hūrio he ha'amata he hēŋu'i-ŋu'i 'e he kī ki te nu'u hāpī 'a Ietū:

—¿He aha a kōrua e kai 'e e unu ena 'i muri i te [nu'u haka 'auhau i te taŋata hai moni mo te rōmano] 'e 'i muri i te tētahi nu'u hara?

³¹ He kī e Ietū:

—Ta'e mo te nu'u ta'e māui-ui te taote, mo te nu'u māui-ui. ³² A au i oho mai ai ta'e ki te nu'u ta'e hara; ki te nu'u hara a au i oho mai ai mo haka huri i te mana'u ki te 'Atua.

He tapu iŋa o te kai
(Māteo 9.14-17; Marko 2.18-22)

³³ He kī ia ki a Ietū:

—Te nu'u hāpī 'a Iovani 'e o te fariseo nu'u rava tapu i te kai 'e rava pure, 'e ta'a nu'u hāpī he kai 'e he unu nō te aŋa, 'ina he tapu.

³⁴ He pāhono e Ietū:

—¿Ka kī 'ō e tano rō 'ā a kōrua mo kī ki te nu'u 'i te ŋoŋoro hāipo-ipo: «Ka tapu te kai», ka ai atu 'i muri i a rāua te kope ō'ona te hāipo-ipo? ³⁵ 'I a au he kī atu: e tu'u rō te mahana he to'o i rā taŋata hāipo-ipo era mai muri i a rāua; ki tano rā mahana, ka tapu iho era.

³⁶ He 'a'amu ia e Ietū i te 'a'amu ha'aura'a nei:

«'Ina he nu'u hore i te vata 'āpī mo hono i te kahu rū'au. Mo aŋa pē ira, he rake-rake te vata, 'e te tapa 'āpī era e ko tano 'i ruŋa i te kahu rū'au.

³⁷ »'E 'ina tako'a he huri i te 'ava 'āpī ki roto i te ipu kiri tuai, 'o paihi te ipu 'i te 'ava 'āpī. He māu'a ia te ipu 'e pē ira 'ā te 'ava. ³⁸ 'O ira te 'ava 'āpī e ha'a'ī ki roto i te ipu kiri 'āpī.

³⁹ »'Ina he nu'u unu i te 'ava tuai mo haŋa haka 'ou mo unu i te 'ava 'āpī. Pē nei, pa'i, e kī ena: "I hau rō atu te 'ava tuai 'i te nene ki te 'ava 'āpī'».

He mo-more iŋa i te tariko 'i te [mahana haka ora]
(Māteo 12.1-8; Marko 2.23-28)

6 'I te mahana haka ora e tahi, e oho nō 'ā a kuā Ietū a te kona 'oka tariko, 'ai te nu'u hāpī 'ā'ana e more-more e oho era i te karu tariko koia ko hure-hure, 'ai ka kai. ² He 'ui ia e te tētahi nu'u [fariseo]:

—¿He aha kōrua e aŋa ena i te me'e ta'e ha'ati'a mo aŋa 'i te mahana haka ora?

³ He pāhono e Ietū:

—¿Kai tai'o 'ana 'ō a kōrua i te me'e aŋa e Tāvita 'i te hora maruaki ananake ko te nu'u oho 'i muri i a ia? ⁴ I uru nō ki roto i te Kona Ha'amuri 'Atua, he to'o i te haraoa e tapu rō 'a, he kai 'e he tuha'a ki tā'ana nu'u,

ka ai atu he [oromatu'a] mau nō te me'e ha'ati'a mo kai i rā haraoa.

⁵ He kī haka 'ou e Ietū:

—I a au i te [Poki o te taŋata] te parau o te mahana haka ora mo kī i te me'e ha'ati'a 'e i te me'e ta'e ha'ati'a mo aŋa.

He haka ora iŋa o Ietū i te taŋata rima rehe-rehe

(Māteo 12.9-14; Marko 3.1-6)

⁶ I te mahana haka ora haka 'ou e tahi, he uru a Ietū ki roto i te [hare pure hūrio] he ha'amata he hāpī. 'I roto e tahi taŋata e rehe-rehe rō 'ā te rima mata'u.

⁷ Te nu'u [ma'ori o te haka tere hūrio] 'e te fariseo 'ai e u'i era hoki e haka ora rō e Ietū i rā taŋata 'i te mahana haka ora, mo rava'a 'ōtohe mo tuhi e rāua i tō'ona hape.

⁸ 'E, a Ietū, 'i te me'e ko aŋi-aŋi 'ana i te mana'u o rā nu'u, he kī ki tū taŋata rima rehe-rehe era: «Ka e'a koe ki ruŋa ka māroa 'i vāeŋa».

He e'a tū taŋata era he māroa. ⁹ He kī ia e Ietū ki rā nu'u: «'I a au he 'ui atu e tahi me'e: "¿He aha te me'e tano mo aŋa 'i te mahana haka ora: he me'e riva-riva 'o he me'e rake-rake? ¿He haka ora i te taŋata 'o he tiŋa'i he haka mate?"».

¹⁰ He u'i ki te nu'u ta'ato'a o muri i a ia, 'e he kī ki tū taŋata era: «Ka haka toro mai tu'u rima».

He aŋa e tū taŋata era pē ira 'e he ora rō 'ai.

¹¹ He riri tū nu'u ma'ori era 'e te nu'u fariseo 'e he ha'amata he tātake he aha te rāua me'e mo aŋa ki a Ietū.

He to'o iŋa o Ietū i te ŋāŋata mo 'āpōtoro

(Māteo 10.1-4; Marko 3.13-19)

¹² 'I rā ŋā mahana, he iri a Ietū ki ruŋa i te ma'uŋa e tahi mo pure 'e i pure ai ka 'ōtea rō. ¹³ 'I 'ōtea era he haka taka-taka i tā'ana nu'u hāpī. He to'o mai roto e ho'e 'ahuru mā piti 'e he nape he 'āpōtoro. ¹⁴ Ko te nu'u nei rā ŋā 'āpōtoro: ko Tīmona, nape e Ietū ko Pētero; ko Antarea, taina o Tīmona; ko [Tanatiako], ko [Iovani], ko Feripe, ko Torometi, ¹⁵ ko Māteo, ko Tōmā, ko Tanatiako, poki 'a Arafeo; ko Tīmona, e kī era he [sērote]; ¹⁶ ko Hura, poki 'a Tanatiako, 'e ko Hura Ikariote, ho'o era i a Ietū.

He hāpī iŋa o Ietū me'e rahi nu'u

(Māteo 4.23-25)

¹⁷ He turu a Ietū mai ruŋa i te ma'uŋa ananake ko tū nu'u era. I topa era he no-noho 'i te kona pararaha e tahi. Ko taka-taka era 'ā 'i rā kona me'e rahi nu'u hāpī haka 'ou 'ā'ana 'e me'e rahi nu'u o te kona ta'ato'a o Hūrea, o Hērutarema, o Tiro 'e o Tīrone. ¹⁸ I tu'u tahi ai rā nu'u mo haka roŋo i te vānaŋa 'a Ietū 'e mo haka ora e ia i te rāua māui-ui. 'E te nu'u o'o e te tātane i haka ora tako'a rō e Ietū. ¹⁹ Ta'ato'a e u'i era i te rāve'a mo haka puā ki a Ietū; he ora, pa'i, te rāua māui-ui 'i te mana e'a mai ruŋa i a ia.

He ha'amaitai o te 'Atua

(Māteo 5.1-12)

²⁰ He u'i a Ietū a ruŋa i tā'ana nu'u hāpī 'e he kī:

«Ko te koa i a kōrua, e te nu'u veve mana'u pē nei ē: 'ina e tahi kōrua aura'a mo kore o te 'Atua; a kōrua o roto i te [haka tere iŋa 'āpī o te 'Atua].

²¹ Ko te koa i a kōrua, e te nu'u maruaki ki te me'e o te 'Atua ē; e mākona rō kōrua.

Ko te koa i a kōrua, e te nu'u taŋi o te hora nei ē; e koa rō kōrua.

²² »Ko te koa i a kōrua ka tute ena e te nu'u mai muri i a rāua, ka riri, ka vā-vā 'e ka ta'e haka au ena 'i te ai o kōrua o te Poki o te taŋata. ²³ Ki topa atu rā ŋā me'e, e koa kōrua; e va'ai rō atu, pa'i, e te 'Atua i te me'e hope'a o te nui-nui mo kōrua 'i te raŋi. Te tupuna o te nu'u era i aŋa tako'a rō pē ira ki te ŋā perofeta era o mu'a 'ā.

²⁴ »Ko te 'aroha i a kōrua, e te nu'u 'ono mana'u pē nei ē: 'i te hauha'a mau nō o te ao nei te koa; he oti mau 'ā te koa mo rava'a e kōrua.

²⁵ Ko te 'aroha i a kōrua, e te nu'u mākona 'i te me'e o te ao nō nei ē; nā e maruaki rō kōrua ki te me'e o te 'Atua.

Ko te 'aroha i a kōrua, e te nu'u koa o te hora nei ē; he ta-taŋi kōrua.

²⁶ Ko te 'aroha i a kōrua mo ha'ahana-hana atu e te nu'u ta'ato'a; te tupuna o rā nu'u i ha'ahana-hana tako'a rō pē ira ki te perofeta reo-reo.

E haŋa ki te nu'u ma'u i te riri mo kōrua

(Māteo 5.38-48; 7.12)

²⁷ »Ki a kōrua ki te nu'u haka roŋo mai, 'i a au he kī atu: E haŋa ki te nu'u te rāua mana'u mau nō he tōtōā atu. E aŋa te me'e riva-riva ki te nu'u ma'u i te riri mo kōrua. ²⁸ E ha'amaitai te nu'u taro-taro atu, 'e e pure mo te nu'u vā-vā atu i a kōrua. ²⁹ Mo pu'a atu e tahi kope i tu'u pā'iŋa 'āriŋa, e va'ai te rua pā'iŋa; 'e mo hiko e te kope e tahi i tu'u paratoa, e va'ai tako'a tu'u kamita. ³⁰ Mo no-no'i atu te nu'u e tahi me'e, e va'ai, 'e mo hiko i ta'a me'e, 'ina ko kī mo haka hoki atu. ³¹ E aŋa koe ki te rua i te me'e haŋa e koe mo aŋa atu e te rua.

³² »Mo haŋa o kōrua ki te nu'u nō e haŋa rō atu 'ā, ¿he aha ia te kōrua me'e riva-riva i aŋa? Te nu'u hara pē ira tako'a e aŋa ena. ³³ 'E mo aŋa o kōrua i te me'e riva-riva ki te nu'u aŋa nō atu i te me'e riva-riva ki a kōrua, ¿he aha ia te kōrua me'e riva-riva i aŋa? Te nu'u

hara pē ira tako'a e aṅa ena. ³⁴ Mo tārahu o kōrua i te me'e ki te nu'u mau nō ko 'ite 'ā e kōrua e haka hoki rō atu, ǎhe aha ia te kōrua me'e riva-riva i aṅa? Pē ira te nu'u hara e tārahu ena i te me'e ki te tētahi nu'u hara koia ko tiaki mo haka hoki.

³⁵ »E haṅa kōrua ki te nu'u te rāua mana'u mau nō he tōtōā atu 'e e aṅa tako'a te me'e riva-riva ki a rāua. 'E mo no-no'i atu mo haka tārahu, e va'ai 'e 'ina kōrua ko tiaki mo haka hoki atu. Pē ira he ai te me'e hope'a o te nui-nui o te 'Atua mo haka koa i a kōrua, 'e hai me'e nei ka take'a ena: he ṅā poki mau 'ā kōrua o te 'Atua. A ia, pa'i, 'Atua riva tako'a ki te nu'u ta'e 'ite i te māuru-uru ki a ia 'e ki te nu'u aṅa i te me'e ta'e tano. ³⁶ E haka 'aroha kōrua i te nu'u pa he haka 'aroha iṅa ena 'ā o te 'Atua, he Matu'a o kōrua.

'Ina ko mana'u rake-rake mo te rua
(Māteo 7.1-5)

³⁷ »'Ina ko mana'u: i a kōrua te parau mo kī i te tano 'e i te ta'e tano o te me'e aṅa e te rua, 'o kī tako'a atu e te 'Atua i te tano 'e i te ta'e tano o te kōrua me'e aṅa. 'Ina ko mana'u: te me'e tano mo te rua he ūtu'a o te 'Atua, 'o kī rō atu e te 'Atua mo kōrua. E haka rehu te hape o te rua ki haka kore ai e te 'Atua i te kōrua hape. ³⁸ E va'ai kōrua ki te tētahi, ki va'ai tako'a atu ai e te 'Atua ki a kōrua. Ka ha'a'i atu ena, pa'i, i te kōrua pūtē ki te 'ī, ka rū-rū ena ko 'ī riva-riva 'ā. Pa he hāito iṅa ena 'ā o kōrua mo va'ai ki te rua, pē ira ka hāito tako'a ena e te 'Atua mo va'ai atu ki a kōrua».

³⁹ He 'ui ia e Ietū: «ǎHoki e tano mau rō te taṅata matapō mo ma'u i te rua matapō a te ara? ǎE ko vī-viri hō ararua ki roto i te pū? ⁴⁰ Te kope hāpī ta'e i hau ki tō'ona ma'ori; ki oti i te hāpī, ka ai era pē tō'ona ma'ori.

⁴¹ »ǎHe aha koe e u'i ena i te pua mauku o roto i te mata o tu'u taina 'e 'ina koe he take'a i te pou o roto i tu'u mata? ⁴² Mo ta'e take'a e koe i te pou o roto i tu'u mata, ǎpē hē koe i mana'u ai mo kī ki tu'u taina: "E te taina, ka haka rē mai koe ki to'o atu a au i te pua mauku mai roto i tu'u mata"? ǎE te taṅata riva a te ha-ho ē!, ka to'o koe 'i ra'e i te pou mai roto i tu'u mata, ki take'a riva-riva ai e koe i te pua mauku 'i roto i te mata o tu'u taina.

Te tumu e aṅi-aṅi ena hai tō'ona hua iṅa
(Māteo 7.17-20; 12.34-35)

⁴³ »'Ina e tahi tumu riva-riva mo hua o te me'e rake-rake, 'e 'ina e tahi tumu rake-rake mo hua o te me'e riva-riva. ⁴⁴ Te huru o te tumu e aṅi-aṅi ena 'i tō'ona hua iṅa: ta'e mai ruṅa i te miro pū-pū te pika e mo-more ena, 'e ta'e mai ruṅa i te tumu tūava te vino e mo-more ena. ⁴⁵ Te taṅata riva-riva he vānaṅa i te me'e riva-riva 'i te ai māhatu riva-riva tō'ona, 'e te taṅata rake-rake he vānaṅa i te me'e rake-rake 'i te ai māhatu rake-rake tō'ona. O te me'e e rahi rō 'ana 'i roto i te māhatu te haka vānaṅa i te haha.

E haka tu'u te hare 'i te kona hio-hio
(Māteo 7.24-27)

⁴⁶ »ǎHe aha kōrua e kī ena he Pū'oko Haka Tere a au o kōrua, 'e 'ina kōrua he aṅa i tā'aku me'e kī? ⁴⁷ 'Ī a au he kī atu: te taṅata oho mai ki a au, haka roṅo 'e aṅa i tā'aku me'e kī, ⁴⁸ e tu'u rō 'ana pa he taṅata haka tu'u i tō'ona hare i u'i 'i ra'e i te kona hio-hio 'ai ka aṅa iho. Ka hetu era te a'a ki rā hare, 'ina e ko makenu 'i te haka tu'u 'i rā kona. ⁴⁹ 'E te taṅata haka roṅo i tā'aku vānaṅa 'e 'ina he aṅa pa he me'e kī e au, e tu'u rō 'ā pa he taṅata haka tu'u i tō'ona hare 'i te kona ta'e hio-hio. Ka hetu era te a'a ki rā hare, 'i te pūai he to-toi 'e he marere tahi».

He haka ora iṅa o Ietū i te tāvini o te kape rōmano
(Māteo 8.5-13; Iovani 4.43-54)

7 I oti era a Ietū te vānaṅa ki te nu'u, he e'a he oho ki Kaperenāū. ² 'I ira e noho era e tahi taṅata he kape o te va'ehau rōmano e ai rō 'ana e tahi tō'ona tāvini haṅa rahi. Te taṅata tāvini nei ko rahi 'ana te māui-ui 'e ko hāhine 'ā mo mate.

³ 'I 'ite era e rā kape o ruṅa i a Ietū, he uṅa ki te tētahi nu'u pū'oko haka tere hūrio mo ani ki a Ietū mo oho mo haka ora i rā tāvini. ⁴ I tu'u era rā nu'u ki muri i a Ietū, he kī: «E Ietū, te kape rōmano uṅa mai i a mātou he taṅata e tano rō 'ā mo hā'ū'ū e koe. ⁵ A ia e haṅa rahi rō mai 'ana ki a tātou ki te itaraera; 'ā'ana i haka aṅa i te tātou [hare pure hūrio]».

⁶ He e'a a Ietū he oho 'i muri i tū nu'u era. Ko hāhine 'ana mo tu'u ananake ki te hare o tū kape era o te va'ehau rōmano, he piri te nu'u repahoa o rā kape i uṅa mo kī pē nei ē: «E Ietū, 'ina koe ko haka rohi-rohi ko oho mai; ǎko ai, pa'i, a au mo uru mai tō'ou ki roto i tō'oku hare? ⁷ 'O ira i ta'e oho atu ai e au mau 'ā. Ko 'ite 'ana e au mo kī tō'ou: "Ka ora", he ora tō'oku tāvini. ⁸ A au mau nei e ai rō 'ana te taṅata 'ata hau rō atu te tōro'a ki a au, 'e pē ira tako'a 'ā e ai rō 'ana te va'ehau ko au te kape. Mo kī tō'ou: "Ka oho", he oho; 'e mo kī tō'ou mo oho mai, he oho mai; 'e mo kī tō'ou ki tō'oku tāvini mo aṅa e tahi me'e, he aṅa».

⁹ He māere a Ietū 'i tū vānaṅa era. He u'i ki te nu'u oho 'i muri i a ia, he kī: «'Ī a au he kī atu: kai take'a 'ā e au e tahi taṅata o Itaraera haka moe i tō'ona mana'u 'i ruṅa i a au pa he taṅata nei».

¹⁰ I hoki era ia tū nu'u uṅa era, he take'a ko ora 'ana rā tāvini.

He haka ora iṅa o Ietū i te poki ko mate 'ā

¹¹ 'I te rua mahana, he oho a Ietū ki te kona te 'iṅoa ko Nāina. 'I muri i a ia i oho tako'a ai tā'ana nu'u hāpī 'e me'e rahi atu te nu'u. ¹² I hāhine era ki rā kona, he take'a e ma'u 'ā te nu'u i te pāpaku mo tanu, he kope ko ia mau nō te poki o te vi'e hove e tahi. Me'e rahi te nu'u o rā kona oho 'i muri i rā vi'e.

¹³ I take'a era e Ietū i rā vi'e, he haka 'aroha 'e he kī: «'Ina koe ko taṅi». ¹⁴ He haka hāhine ia ki te pāpaku,

he 'a-'aru i te ranjo 'e he noho te nu'u tupa. He kī e Ietū ki tū kope mate era: «E haŋu, ki a koe a au e kī atu ena: ¡Ka e'a ki ruŋa!».

¹⁵ He e'a ia tū kope era ki ruŋa he noho 'e he ha'amata he vānaŋa. He haka hoki e Ietū ki tō'ona matu'a vahine.

¹⁶ I take'a era e te nu'u i tū me'e era, he māere ananake 'e he ha'ahana-hana i te 'Atua he kī: «'I te perofeta nui-nui e tahi 'i roto i a tātou». 'E he kī tako'a: «Ko tu'u mai 'ana te 'Atua mo hā'ū'ū ki tō'ona taŋata».

¹⁷ Te taŋata ta'ato'a o Hūrea 'e o te kona ta'ato'a hāhine ki ira he 'ite o ruŋa i tū me'e aŋa era e Ietū.

He 'ui 'a Iovani Papatito
(Māteo 11.2-6)

¹⁸ A Iovani i 'ite ai, hai nu'u hāpī 'ā'ana, o ruŋa i te me'e ta'ato'a aŋa e Ietū. He uŋa ia mo oho ki a ia e rua o tū nu'u hāpī era 'ā'ana ¹⁹ 'e he haka uŋa mo 'ui ki a Ietū hoki ko ia mau 'ā te [Kiritō], kope era mo tu'u mai, 'o e tiaki nō ki te rua.

²⁰ I tu'u era tū ŋā kope era he haka hāhine ki a Ietū, he kī:

—'A Iovani Papatito a māua i uŋa mai mo 'ui atu hoki ko koe mau 'ā te me'e era mo tu'u mai 'o e tiaki a mā-tou ki te kope haka 'ou e tahi.

²¹ 'I rā hora e haka ora 'ana e Ietū me'e rahi māui-ui 'e ma'li o te nu'u, e haka e'a 'ā i te tātane, 'e e haka ora 'ā i te mata o te nu'u matapō. ²² He kī e Ietū ki tū nu'u uŋa era e Iovani:

—Ka hoki ka 'a'amu ki a Iovani i te me'e take'a 'e ŋaro'a e kōrua:

Ko mā'eha 'ā te mata o te nu'u matapō,
ko ha'ere riva-riva 'ā te nu'u va'e koke.

Ko ora 'ana te nu'u māui-ui rēpera,
ko ŋaro'a 'ana te vānaŋa e te nu'u tariŋa pō.

Ko ora mai 'ā te nu'u mai te mate,
'e ko haka 'ite 'ana i te [roŋo riva-riva o te 'Atua] ki te nu'u veve.

²³ E kī tako'a: «¡Ko te koa i te taŋata 'ina he 'aka-'aka e haka moe ena i te mana'u 'i ruŋa i a au!».

He vānaŋa a Ietū o ruŋa i a Iovani Papatito
(Māteo 11.7-19)

²⁴ I hoki era tū nu'u uŋa era e Iovani, he ha'amata a Ietū he vānaŋa ki te nu'u o ruŋa i a Iovani Papatito, he kī:

«Hora oho u'i era o kōrua i te kope tātara 'i te kona 'one ta'e noho e te taŋata, ¿pē hē te huru o rā kope i mana'u ai e kōrua? ¿He taŋata ta'e tī-tika o te mana'u, haka rē i a ia mo haka tere e te rua, pa he 'ohe e ue-ue ena e te tokerau? ²⁵ 'E mo ai ta'e pē ira, ¿pē hē? ¿He

taŋata uru i te kahu hope'a o te riva-riva? Ko 'ite 'ana, pa'i, e kōrua: te nu'u uru i te kahu hope'a o te riva-riva 'e 'ina e tahi rāua me'e haŋa toe e noho ena 'i te hare o te 'ariki. ²⁶ Ki te kōrua kī, ¿he aha te kōrua me'e oho u'i era? ¿He perofeta? He aŋi 'ā. 'E 'i a au he kī atu: he kope 'ata hau ki te perofeta. ²⁷ A Iovani Papatito he ma'uroŋo kī era e te 'Atua ki tā'ana Poki 'i ruŋa i te [Pāpa'i Mo'a] pē nei ē:

“He uŋa au i te taŋata ma'uroŋo 'i ra'e ki a koe mo haka riva-riva i te ara mō'ou».

²⁸ He kī haka 'ou e Ietū:

«'Ina e tahi taŋata o roto i te taŋata ta'ato'a 'ata hōnui ki a Iovani; 'e, ka ai atu pē ira, te taŋata haka rē i a ia mo haka tere e te 'Atua i hau rō atu ki a Iovani, ka ai atu he taŋata hauha'a-'ore ki te mata o te taŋata.

²⁹ »Te nu'u ta'ato'a ŋaro'a i a Iovani, 'ātā ki te [nu'u haka 'auhau i te nu'u hai moni mo te rōmano], i haka [papatito] rō i a rāua ki a Iovani mo haka tano ki te me'e hā'aki e te 'Atua. ³⁰ Te nu'u [fariseo] 'e te nu'u [ma'ori o te haka tere hūrio] kai haka papatito i a rāua he ta'e haŋa ki te me'e haka 'ite e te 'Atua mo te rāua riva-riva.

³¹ »'I a au he ha'aaura'a atu i te huru o te tētahi taŋata o te hora nei. ³² A rāua pa he ŋā poki ko-kori 'i te kona e tahi. He oho e tētahi o rā ŋā poki ki te tētahi atu o rāua pē nei ē:

“Ko haka taŋi atu 'ana a mātou i te peho reka,
'ina a kōrua kai 'ori.
Ko hīmene atu 'ana a mātou i te hīmene haka 'aroha,
'ina tako'a a kōrua kai ta-taŋi”.

³³ »Te aura'a: ko tu'u mai 'ana a Iovani Papatito e tapu rō 'ana i te kai 'e 'ina he unu i te 'ava; i kī ai e kōrua ko o'o 'ana e te tātane. ³⁴ He tu'u mai ia te [Poki o te taŋata] e kai rō 'ana 'e e unu rō 'ā; he kī e kōrua i te rava kai 'e i te rava unu, 'e he repahoa o te nu'u hara 'e o te nu'u haka 'auhau i te taŋata hai moni mo te rōmano. ³⁵ Ka ai atu pē ira, te haka tere iŋa hai mana'u o te 'Atua e take'a ena he me'e tano hai nu'u haka tere i a rāua pa he me'e haŋa 'ā'ana».

Ko Ietū 'e he vi'e hara e tahi

³⁶ E tahi mahana he kī ki a Ietū e te fariseo e tahi mo oho mo kai 'i tō'ona hare. He oho ia a Ietū.

E noho nō 'ā 'i ruŋa i te 'amurama'a, ³⁷ he tu'u te vi'e tai'o o rā kona 'i te 'ite e kai 'ā a Ietū 'i rā hare. E ma'u rō 'ā rā vi'e i te ipu aŋa hai mā'ea nehe-nehe ko 'i 'ā e te mano'i.

³⁸ I puā era ki a Ietū, he taŋi a te va'e. He ha'amata he haka rari he oho i te va'e hai matavai. I oti era he haro'i hai tō'ona rau'oho koia ko hoŋi 'e ko huri hai mano'i.

³⁹ I take'a era e tū taŋata fariseo era, tē rā ka mana'u: «'Āhani te kope era he perofeta, ko aŋi-aŋi 'ana: te vi'e era he vi'e hara». ⁴⁰ He kī e Ietū ki tū fariseo era:

—E Tīmona, e ai rō 'ana tā'aku me'e mo kī atu.

He pāhono e tū kope era:

—Ka kī nō mai, e te Ma'ori ē.

⁴¹ He kī ia e Ietū:

—E rua taŋata e ai rō 'ā te tārahu ki te taŋata e tahi: e tahi i tārahu ai e pae hānere [renario] 'e te rua e pae 'ahuru. ⁴² 'I te me'e 'ina he moni o rāua mo haka hoki o tū tārahu era, he haka rehu e rā taŋata va'ai era i te moni. Kī tu'u mana'u, e Tīmona ē, ζko ai o roto i te ŋāŋata era mo 'ata haŋa ki te taŋata haka tārahu era i te moni?

⁴³ He pāhono e Tīmona:

—Kī tō'oku mana'u, ko te taŋata 'ata rahi era o te tārahu.

He kī e Ietū:

—He aŋi 'ā tā'au.

⁴⁴ He u'i ia a Ietū a ruŋa i rā vi'e, 'e he kī ki a Tīmona:

—ζKo take'a 'ā e koe te vi'e nei? I uru mai era a au, kai va'ai mai koe hai vai mo hopu o tō'oku va'e; 'e te vi'e nei, ko haka hopu mai 'ana i tō'oku va'e hai matavai 'e 'ai ka haro'i hai rau'oho ō'ona. ⁴⁵ 'Ina koe kai 'aroha mai hai hoŋi, 'e te vi'e nei, 'i te hora ta'ato'a ō'oku 'i nei, e hoŋi e oho nō mai nei i tō'oku va'e. ⁴⁶ Kai paru mai koe i tō'oku pū'oko hai mōrī 'eo, 'e o te vi'e nei i huri mai i tō'oku va'e hai mano'i. ⁴⁷ 'I a au he kī atu: te hara rahi o te vi'e nei ko haka kore 'ana, he rahi o tō'ona haŋa mai. Te kope ta'e rahi te hara haka kore, ta'e rahi tō'ona haŋa ki te 'Atua.

⁴⁸ He kī ia ki tū vi'e era: «Ko haka kore 'ana tu'u hara».

⁴⁹ Te tētahi atu nu'u noho o ruŋa i te 'amurama'a he ha'amata he 'ui ki a rāua 'ā: «ζKo ai hō te kope nei, 'ātā e haka kore rō 'ā i te hara?».

⁵⁰ He 'ata kī ki rā vi'e e Ietū: «Ko e'a 'ana a koe mai roto i te hara, he haka moe ō'ou i te mana'u 'i ruŋa i a au. Ka oho riva-riva».

He ŋā vi'e hā'ū'ū ki a Ietū

8 I oti era he oho a Ietū me'e rahi kona haka 'ite oho i te roŋo riva-riva o ruŋa o te [haka tere iŋa 'āpī o te 'Atua]. I oho rō 'i muri i a ia tā'ana nu'u ['āpōtoro] e ho'e 'ahuru mā piti ² 'e tētahi ŋā vi'e haka ora e ia i te māui-ui 'e tētahi haka e'a i te tātane mai roto. 'I roto o rā ŋā vi'e a [Māria], kī tako'a ko Matarena, vi'e mai roto i haka e'a ai e hitu tātane; ³ a Huana, vi'e [hāipo-ipo] 'a Kuta, taŋata 'ā'ana te haka tere i te hauha'a o ['Erore]; a Tūtana; 'e me'e rahi haka 'ou atu te ŋā vi'e e hā'ū'ū e oho era hai me'e ai o rāua.

He 'a'amu ha'aaura'a o te taŋata 'oka kai e tahi

(Māteo 13.1-9; Marko 4.1-9)

⁴ Me'e rahi te nu'u i e'a mai te rāua kona noho mo oho mo u'i i a Ietū, pē ira i taka-taka ai me'e rahi taŋata. He ha'amata ia a Ietū he 'a'amu i te 'a'amu ha'aaura'a nei:

⁵ «E tahi taŋata 'oka kai he e'a he pī i tā'ana karu. I pī era he vī-viri te tētahi a te ara, he rei-rei e te nu'u 'e he kai e te manu.

⁶ »Tētahi i vī-viri a te kona papa 'ō'one ta'e rahi. I tupu era kai roa i paka-paka rō ai 'i te vai kore o rā kona.

⁷ »Tētahi o rā ŋā karu i vī-viri a te kona mauku pū-pū. I tupu era he vavau 'e he mate 'i te taiko o te mauku pū-pū.

⁸ »E tētahi atu i vī-viri a te kona 'ō'one riva-riva. He tupu he nui-nui 'e mai te karu e tahi i hua ai 'ātā e ho'e hānere karu».

He me'e nei te me'e i 'a'amu e Ietū. 'E he kī haka 'ou i haka pūai te re'o: «ζTe nu'u haŋa mo aŋi-aŋi ka haka topa te mana'u!».

He aha a Ietū e hāpī era hai 'a'amu ha'aaura'a

(Māteo 13.10-17; Marko 4.10-12)

⁹ He 'ui ia ki a Ietū e tā'ana nu'u hāpī i te aura'a o tū 'a'amu ha'aaura'a era. ¹⁰ He kī e Ietū: «Kī a kōrua te 'Atua e haka aŋi-aŋi atu ena i te me'e ta'e 'ite e te taŋata o ruŋa o tō'ona haka tere iŋa 'āpī. 'E, ki te tētahi nu'u e vānaŋa nei hai 'a'amu ha'aaura'a; pē ira ka 'ata u'i atu, e ko take'a, 'e ka 'ata haka roŋo atu, e ko aŋi-aŋi.

He haka 'ite iŋa o Ietū i te ha'aaura'a o rā 'a'amu

(Māteo 13.18-23; Marko 4.13-20)

¹¹ »Pē nei te aura'a o te 'a'amu ha'aaura'a nei: Rā ŋā karu he [roŋo riva-riva o te 'Atua], 'e te ŋā kona era a ira i vī-viri ai te karu he taŋata.

¹² »Te kona ara era he tētahi nu'u ŋaro'a i rā roŋo, 'e, ka ai atu pē ira, e to'o nō e Rukifero mai roto i te rāua māhatu, pa he kai iŋa era e te manu i te karu, 'o [haka moe i te mana'u] 'i ruŋa 'e 'o rava'a i te ora 'āpī 'ina he hope'a ra'a va'ai e te 'Atua.

¹³ »Te kona papa 'ō'one ta'e rahi era he tētahi nu'u ŋaro'a i te roŋo riva-riva o te 'Atua to'o hai koa i rā roŋo ki roto i te rāua māhatu. Te 'ati nō, he haka moe o rāua i te mana'u 'i ruŋa i rā roŋo mo te hora nō e tahi 'e, 'i te hora o te haka 'atu, he rehu, pa he ta'e hiohio iŋa ena o te aka 'i te kona 'ō'one ta'e rahi.

¹⁴ »Te kona mauku pū-pū era he tētahi nu'u haka roŋo i te roŋo riva-riva o te 'Atua. Te 'ino nō, 'i te taiko o te mauku pū-pū, te aura'a, 'i te pūai o te haŋa ki te me'e o te ao nei, ki te 'ono 'e ki te me'e ta'ato'a, he vavau te roŋo o te 'Atua 'e 'ina e ko hua 'i roto i a rāua te me'e haŋa o te 'Atua.

¹⁵ »Te kona 'ō'one riva-riva era he nu'u haka roŋo 'e ha'atura hai māhatu ki te roŋo o te 'Atua, 'e ma'u hiohio 'i roto i a rāua. Mai roto i a rāua e e'a ena me'e rahi me'e riva-riva, pa he karu hua era me'e rahi karu haka 'ou mai ruŋa.

He ha'aura'a iŋa hai hakari'i i te vānaŋa o te 'Atua
(Marko 4.21-25)

¹⁶ »'Ina ko na'a te roŋo riva-riva o te 'Atua pa he kope haka pura i te hakari'i 'ai ka pu'a hai pahu 'o he ha-ha'o ki raro i te ro'i. E haka 'ite pa he kope haka rē i te hakari'i 'i te kona ruŋa nui mo haka mā'eha i te nu'u uru ki roto i te hare. ¹⁷ Pē nei ka haka aŋi-aŋi riva-riva ena i te me'e ta'e haka 'ite 'i mu'a 'ā 'e ka ma'u ena ki roto i te mā'eha i te me'e na'a o ruŋa i te haka tere iŋa 'āpī o te 'Atua.

¹⁸ »'O ira, e u'i e haka roŋo riva-riva tā'aku hāpī. Te kope aŋi-aŋi 'e to'o mō'ona i te parauti'a o te 'Atua he 'ata haka aŋi-aŋi e te 'Atua. 'E te kope 'ina he to'o mō'ona, 'ātā ki te me'e mana'u ko 'ite 'ā e ia ka to'o ena».

He matu'a vahine 'e he taina o Ietū
(Māteo 12.46-50; Marko 3.31-35)

¹⁹ E tahi mahana he oho te matu'a vahine 'e te taina o Ietū ki te kona 'i ira a ia 'e, 'i te rahi o te taŋata, 'ina he rava'a ananake mo hāhine ki muri. ²⁰ He oho e tahi kope he kī ki a Ietū:

—E Ietū, 'ai haho tu'u matu'a vahine koia ko tu'u ŋā poki taina e haŋa rō 'ā mo vānaŋa atu ki a koe.

²¹ He kī e Ietū:

—Te nu'u haka roŋo 'e haka tere i a rāua hai vānaŋa o te 'Atua he hua'ai tako'a ō'oku.

Te tokerau 'e te pari he ha'atura ki a Ietū
(Māteo 8.23-27; Marko 4.35-41)

²² 'I te mahana e tahi he eke a Ietū koia ko tā'ana nu'u hāpī ki ruŋa i te vaka 'ai ka kī: «Matu tātou ki oho ki te rua pā'iŋa». 'E he oho.

²³ E oho nō 'ana ananake he ha'uru a Ietū. He hu-hū ia te tokerau 'e he ketu te pari. He ha'amata he 'ī te vaka e te vai 'e he oho mo emu. ²⁴ He haka hāhine rā nu'u he haka 'ara i a Ietū 'e he kī:

—E te Ma'ori! ;E te Ma'ori! ;Ka 'ara koe! ;He emu tā-tou!

He e'a ia a Ietū ki ruŋa, he kī ki te tokerau 'e ki te pari mo noho, 'e he māria rō 'ai. ²⁵ I oti era he kī ki tā'ana nu'u hāpī:

—;Ina 'ana 'ō a kōrua kai haka moe 'ā i te mana'u 'i ruŋa i a au?

Ko ri'a-ri'a 'ā 'e ko māere atu 'ana rā nu'u he 'ui ki a rāua 'ā: «;Ko ai mau te kope nei? ;'Ātā te tokerau 'e te pari e ha'atura rō 'ā ki a ia!».

He taŋata e tahi o Hērata ko o'o 'ā e te tātane

(Māteo 8.28-34; Marko 5.1-20)

²⁶ He tomo ia ananake ki te rua pā'iŋa ki te henua ko Hērata, † he kona o mu'a o Karirea. ²⁷ I topa era a Ietū mai ruŋa i te vaka, he haka hāhine e tahi taŋata o tū kona era ko o'o 'ā e te tātane. Rā taŋata ko roa 'ā te mahana o te ta'e uru i te kahu 'e o te ta'e noho 'i te hare; e noho era 'i roto i te menemā. ²⁸ I take'a era i a Ietū, he tū-turi 'i mu'a koia ko ohu:

—;Ka haka rē koe i a au, e Ietū, e te Poki o te 'Atua o te raŋi ē! ;Ka haka 'aroha koe i a au; 'ina koe ko tōtōā mai!

²⁹ I kī ai i te me'e nei 'o te ai ko kī 'ana e Ietū ki tū tā-tane era mo e'a mai roto i rā taŋata. E rahi rō 'ana te mahana e haka taehae era 'e, ka ai atu e here-here rō 'ana e te nu'u i te rima 'e i te va'e hai vivi mo haka noho, e motu-motu nō 'ā, 'ai ka haka oho e rā tātane a te kona 'ina he taŋata. ³⁰ He 'ui e Ietū:

—;Ko ai tu'u 'iŋoa?

He pāhono:

—Tō'oku 'iŋoa ko Ta'utini.

I pāhono ai pē ira 'o te ai me'e rahi tātane 'i roto i rā taŋata. ³¹ He ani ia ki a Ietū e rā ŋā tātane mo ta'e tūtute i a rāua ki roto i te pō'auahi.

³² Hāhine ki rā kona, 'i ruŋa i te ma'uŋa, e kai 'ana me'e rahi oru. He ani ia e tū ŋā tātane era ki a Ietū mo ha'ati'a i a rāua mo uru ki roto i rā ŋā oru. He ha'ati'a e Ietū. ³³ He e'a tū ŋā tātane era mai roto i rā taŋata 'e he uru ki roto i te oru. 'I tū hora 'ā he huata, he vī-viri ki roto i te vai 'e he mā-mate tahi rō 'ai te oru.

³⁴ I take'a era i rā me'e e te nu'u hāpa'o oru, he tāhuti he turu he 'a'amu ki te taŋata o te kona ta'ato'a o ira. ³⁵ He e'a he oho te nu'u mo u'i i rā me'e. I tu'u era ki te kona 'i ira a Ietū, he take'a e noho rō 'ana 'i tō'ona va'e rā taŋata e'a era o te tātane, e uru rō 'ana i te kahu 'e ko riva-riva 'ā. He ri'a-ri'a tahi rō 'ai tū nu'u era.

³⁶ Te nu'u take'a i rā me'e he 'a'amu ki te taŋata pē hē a Ietū i haka ora ai i tū taŋata era. ³⁷ He ha'amata he ani e te nu'u ta'ato'a o Hērata ki a Ietū mo oho mai rā kona, he ri'a-ri'a o rāua. He eke ia a Ietū ki ruŋa ki te vaka 'e he e'a he oho rō 'ai.

³⁸ Te taŋata e'a era o te tātane i ani rō ki a Ietū mo ha'ati'a i a ia mo oho 'i muri. Kai ha'ati'a e Ietū 'ai ka kī:

³⁹ —Ka hoki ki tu'u hare 'e ka 'a'amu te me'e ta'ato'a aŋa atu e te 'Atua mō'ou.

He e'a rā taŋata he oho 'e he 'a'amu ki te nu'u ta'ato'a o tū kona era i te me'e aŋa e Ietū 'i ruŋa i a ia.

† Te 'iŋoa haka 'ou o HĒRATA Kārara.

He poki 'a Hairo 'e he vi'e māui-ui
(Māteo 9.18-26; Marko 5.21-43)

⁴⁰ I hoki haka 'ou era a Ietū ki te rua pā'īņa, ki Karirea, he to'o rō atu 'ai te koa o te taŋata; e tiaki 'ana, pa'i, ananake. ⁴¹ He tu'u ia e tahi taŋata te 'īŋoa ko Hairo, he pū'oko haka tere o te [hare pure hūrio], ki tū kona era. He tū-turi 'i mu'a o Ietū 'e he ani mo oho ki tō'ona hare ⁴² mo u'i i tā'ana poki vahine mau nō e tahi, ka ho'e 'ahuru mā piti matahiti, ko hāhine 'ā mo mate.

E oho era a Ietū 'i muri i rā taŋata ko pi-piri 'ā 'i te rahi o te nu'u oho 'i muri. ⁴³ 'I roto i rā nu'u e ai rō 'ā e tahi vi'e māui-ui; te māui-ui he toto tehe. Ka ho'e 'ahuru mā piti matahiti o te 'amo i tū 'ati era 'e, ko pau tahi 'ana tō'ona hauha'a 'i te 'auhau iŋa i te taote mo haka ora i a ia. 'E 'ina e tahi taote i rava'a mo haka ora. ⁴⁴ He haka hāhine te vi'e nei a tu'a o Ietū he haka puā ki te titi o te kahu. 'I tū hora 'ā he noho te tehe o te toto. ⁴⁵ He 'ui a Ietū:

—'A 'ai a au i haka puā mai?

'I te ai ta'ato'a nō e kī era 'ina a rāua kai haka puā, he kī e Pētero:

—E te Ma'ori, nā te taŋata e ŋatu e tonono mai ena.

⁴⁶ 'Ai e kī era e Ietū:

—Nā ko haka puā mai 'ā te kope e tahi; ko ŋaro'a 'ā e au ko e'a 'ā te mana mai ruŋa i a au.

⁴⁷ I anjī-anjī era e rā vi'e ko ma'urima 'ana i a ia, he oho, ko rurū 'ā 'i te ri'a-ri'a, he tū-turi 'i mu'a o Ietū, 'e he kī 'o te aha a ia i haka puā ai 'e pē hē i ora ai tō'ona māui-ui 'i tū hora 'ā. I kī ai rā vi'e i te me'e nei 'i mu'a o te taŋata ta'ato'a.

⁴⁸ He kī e Ietū:

—E vovo, a koe i ora ena 'o te haka moe ō'ou i te mana'u 'i ruŋa i a au. Ka oho riva-riva.

⁴⁹ E vānaŋa nō 'ana a Ietū i tu'u ai te roŋo 'e he kī ki tū taŋata pū'oko haka tere era o te hare pure hūrio:

—Ko mate 'ana ta'a poki; 'ina ko ma'u tahaŋa te Ma'ori.

⁵⁰ I ŋaro'a era e Ietū he kī:

—'Ina ko ri'a-ri'a; ka haka moe nō mai koe i tu'u mana'u 'i ruŋa i a au he ora ta'a poki.

⁵¹ I tu'u era ananake ki te hare o Hairo, te nu'u nō i ha'ati'a e Ietū mo uru 'i muri i a ia ki roto i te piha 'i ira te poki ko Pētero, ko [Tanatiako], ko [Iovani] 'e he matu'a tane 'e vahine o te poki.

⁵² Te nu'u ta'ato'a o roto i rā hare e ta-taŋi 'ana 'i te haka 'aroha 'i te poki. He kī e Ietū: «'Ina kōrua ko ta-taŋi; 'ina he poki kai mate, e ha'uru nō 'ā». ⁵³ He ka-ka-ta tū nu'u era mo Ietū 'o te 'ite ko mate 'ā te poki. ⁵⁴ He 'a-'aru ia e Ietū i te rima o rā poki he kī i haka pūai i te re'o: «jE vovo, ka e'a koe ki ruŋa!».

⁵⁵ He ora ia tū poki era. 'I tū hora 'ā he e'a ki ruŋa. He kī ia e Ietū mo va'ai hai me'e mo kai. ⁵⁶ Ko māere 'ana te matu'a o te poki 'i tū me'e era, 'e he kī e Ietū mo ta'e 'a'amu e tahi nu'u.

He uŋa iŋa o Ietū i tā'ana nu'u hāpī
(Māteo 10.5-15; Marko 6.7-13)

9 E tahi mahana he haka taka-taka e Ietū a ho-ho'e 'ahuru mā piti nu'u hāpī 'ā'ana, 'e he va'ai i te pūai 'e i te parau mo haka e'a i te tātane mai roto i te taŋata 'e mo haka ora rauhuru māui-ui. ² He uŋa mo haka 'ite o ruŋa o te [haka tere iŋa 'āpī o te 'Atua] 'e mo haka ora i te nu'u māui-ui. ³ He kī:

«Ka oho ena kōrua, 'ina ko ma'u e tahi me'e; 'ina ko ma'u te toko-toko, te pūtē, te haraoa, te moni 'e te kahu mo mono. ⁴ Hare nō ena o kōrua ka tu'u ena, 'i ira ana noho 'ātā ki te oho iŋa o kōrua mai rā kona. ⁵ E tu'u 'ā kōrua ki te kona nūna'a hare 'ina he nu'u o ira he haŋa atu, e tū-tū te puŋa'ehu mai te kōrua va'e mo haka 'ite ki rā nu'u: ka topa era 'i ruŋa i a rāua te ūtu'a o te 'Atua, he hape o rāua mau 'ā, 'e 'ai kōrua ka oho rō mai rā kona».

⁶ He e'a ia tū nu'u hāpī era he haka 'ite he oho i te [roŋo riva-riva o te 'Atua] 'i te kona ta'ato'a koia ko haka ora i te māui-ui o te taŋata.

He mira-mira iŋa o te mana'u o ['Erore]
(Māteo 14.1-12; Marko 6.14-29)

⁷ He ŋaro'a e te 'ariki era ko 'Erore i te vānaŋa o ruŋa o te me'e ta'ato'a aŋa e Ietū, 'e he mira-mira te mana'u 'o te ai o te nu'u kī: a Ietū ko [Iovani] ko ora 'ā mai te mate, ⁸ 'e tētahi nu'u kī: ko te perofeta era o mu'a 'ā ko 'Ēria, 'e te tētahi atu nu'u kī: he perofeta haka 'ou e tahi o rā ŋā perofeta ko ora 'ā mai te mate. ⁹ He kī e 'Erore: «'Ā'aku i haka pa'o i te ŋao o Iovani. jKo ai hō te kope era? E ko pau te 'a'amu o ruŋa i a ia».

He haŋa ia a 'Erore mo oho mo u'i i a Ietū.

He hāŋai iŋa o Ietū i te nu'u rahi
(Māteo 14.13-21; Marko 6.30-44; Iovani 6.1-14)

¹⁰ I hoki tahi era te ['āpōtoro] uŋa e Ietū, he 'a'amu ki a ia i te rāua me'e ta'ato'a i aŋa. He to'o e Ietū i rā nu'u 'e he oho ananake ki te kona hāhine ki Vetetaira mo noho ko rāua nō. ¹¹ I 'ite era e te taŋata, he e'a he oho tako'a ki ira. He noho ia a Ietū he vānaŋa o ruŋa o te haka tere iŋa 'āpī o te 'Atua 'e he haka ora i te nu'u māui-ui.

¹² I ahi-ahi era, he haka hāhine ki a Ietū te nu'u hāpī 'ā'ana e ho'e 'ahuru mā piti 'e he kī:

—Ka kī koe ki te taŋata mo oho mo u'i hai kai 'e hai kona mo hā'uru o rāua a te kona hāhine mai; 'ina, pa'i, e tahi me'e o nei.

¹³ He kī e Ietū:

—Ka va'ai e kōrua hai me'e mo kai.

He pāhono e rā nu'u:

—Te me'e nō o mātou he haraoa e rima 'e he ika e rua. Ki ta'a kī, ōki oho hō mātou ki ho'o mai hai kai mo te taŋata ta'ato'a nei?

¹⁴ 'I rā kona, mo tataku i te ŋāŋata nō, e pae ta'utini. Ka ai atu pē ira i kī nō e Ietū ki tā'ana nu'u hāpī:

—Ka haka no-noho te taŋata e pae 'ahuru ka tahi nū-na'a.

¹⁵ He aŋa pē ira 'e he no-noho tahi te taŋata. ¹⁶ He to'o ia a Ietū i tū haraoa era e rima 'e i tū ika era e rua, he u'i a te raŋi, he māuru-uru ki te 'Atua, he more-more 'e he va'ai ki tā'ana nu'u hāpī mo tuha'a.

¹⁷ He ka-kai tahi tū nu'u era ki te mākona, 'e i runu era i te pārehe-rehe topa, he 'ī e ho'e 'ahuru mā piti kānato.

He kī iŋa o Pētero a Ietū he [Kiritō]

(Māteo 16.13-19; Marko 8.27-29)

¹⁸ E tahi mahana e pure 'ana a Ietū, 'e 'i muri i a ia tā'ana nu'u hāpī. He 'ui ki rā nu'u:

—Ōko ai a au e kī ena e te taŋata?

¹⁹ He pāhono e rā nu'u:

—E ai rō 'ā te nu'u kī ko Iovani Papatito, e ai rō 'ana te tētahi nu'u kī ko 'Ēria, 'e e ai tako'a rō 'ana te nu'u kī he perofeta haka 'ou e tahi o te ŋā perofeta era o mu'a 'ā ora mai mai te mate.

²⁰ He 'ui haka 'ou:

—'E, ki te kōrua kī, ōko ai a au?

He pāhono e Pētero:

—A koe he Kiritō ūŋa mai e te 'Atua.

²¹ 'E he ani e Ietū ki tā'ana nu'u hāpī mo ta'e 'a'amu ki te tētahi nu'u o ruŋa o tū me'e pāhono era e Pētero.

He haka 'ite iŋa o Ietū i tō'ona mate

(Māteo 16.20-28; Marko 8.30-9.1)

²² He kī ia e Ietū ki tā'ana nu'u hāpī: «Te [Poki o te taŋata] e ŋaro'a rō i te māui-ui ki roto i te ivi, 'e e ko haŋa e te nu'u pū'oko haka tere hūrio, e te [oromatu'a ra-rahi] 'e e te [ma'ori o te haka tere hūrio]. E tiŋa'i e

haka mate rō i a ia 'e, 'i te toru mahana, he ora haka 'ou».

²³ 'I oti era he kī ki te ta'ato'a:

«Te kope haŋa mo riro ō'ona he taŋata hāpī 'ā'aku e haka rehu i a ia mau 'ā, 'ai ka 'amo rō, paurō te mahana, i tō'ona tātaurō, te aura'a, e va'ai i a ia 'ātā mo mate 'i te aŋa iŋa i tā'aku me'e haŋa. ²⁴ Te kope hāru i a au 'e i tā'aku hāpī hai tua'ivi mo hāpa'o i a ia 'o mate 'e mo aŋa i tā'ana me'e nō era i haŋa e ko ai i a ia te ora 'āpī 'ina he hope'a ra'a va'ai e te 'Atua. 'E te kope haka rē i tā'ana me'e haŋa mo ha'atura mai ki a au he rava'a e ia i rā ora. ²⁵ ŌHe aha ia te hauha'a mo te kope e tahi te ai i a ia te me'e ta'ato'a o te ao, 'e 'ina i a ia te ora 'āpī 'ina he hope'a ra'a?

²⁶ »Te kope ta'e to'o i a au 'e i tā'aku hāpī mā'ana 'o ha'amā 'i te nu'u, a au, te Poki o te taŋata, e ko to'o tako'a i a ia mā'aku 'i te hora hoki mai ō'oku 'i ruŋa i a au tō'oku pūai 'e te pūai 'ana-'ana o tō'oku Matu'a e haka vari tahi rō 'ana e te merahi. ²⁷ 'Ī a au he kī atu: tētahi nu'u o te kona nei e take'a rō i te haka tere iŋa 'āpī o te 'Atua 'i ra'e ki te rāua mate».

He huru kē iŋa o Ietū

(Māteo 17.1-8; Marko 9.2-8)

²⁸ Ka va'u mahana pe mu'a mai te mahana kī i tū vānaŋa era, he iri a Ietū ki ruŋa i te ma'uŋa mo pure. He ma'u 'i muri i a ia i a Pētero, i a [Tanatiako] 'e i a Iovani. ²⁹ E pure nō 'ā he huru kē te 'āriŋa o Ietū, 'e te kahu he rito-rito 'e he 'uira. ³⁰ He tu'u ia, 'i rā hora, e rua taŋata ki muri i a Ietū: ko [Mōtē] 'e ko 'Ēria. ³¹ A to-toru ko haka vari tahi 'ana e te pūai 'ana-'ana o te 'Atua 'e e vānaŋa 'ana o ruŋa o te mate o Ietū, he me'e mo topa ki a ia 'i Hērutarema mo haka tano i te me'e kī e te 'Atua.

³² A kuā Pētero ia e hā'uru 'ā. I 'ara era he take'a i te pūai 'ana-'ana o Ietū 'e i tū ŋā kope era hoko rua. ³³ 'I 'ava-'ava era rā ŋā kope mai muri i a Ietū, he kī e Pētero: «E te Ma'ori, jhe riva nō 'ō i ai ai a tātou 'i nei! Ki aŋa e toru pae-pae: e tahi mō'ou, e tahi mo Mōtē 'e e tahi mo 'Ēria». ('Īna a Pētero kai aŋi-aŋi he aha tā'ana me'e kī era).

³⁴ E vānaŋa nō 'ā a Pētero i noho ai e tahi raŋi 'i ruŋa. I take'a era ko viri tahi 'ana i a rāua e tū raŋi era, he ri'a-ri'a. ³⁵ 'E mai roto te re'o i kī ai: «He Poki nā 'ā'aku, ko tāmo'e-moe era 'ā e au mo tā'aku aŋa. E ha'atura kōrua ki a ia».

³⁶ 'I te hora ŋaro'a i rā re'o, ko oho era 'ā tū ŋā kope era e rua mai muri i a Ietū. Te me'e ta'ato'a nei i na'a nō e kuā Pētero; 'ina kai 'a'amu 'i rā ŋā mahana e tahi nu'u.

He haka e'a iŋa o Ietū i te tātane

(Māteo 17.14-21; Marko 9.14-29)

³⁷ 'I te rua mahana, i hoki era a kuā Ietū mai ruŋa i te ma'uŋa, he piri ki a rāua me'e rahi nō atu nu'u. ³⁸ He ohu e te taŋata e tahi mai roto o rā nu'u, i haka pūai te re'o:

—E te Ma'ori, ka hā'ū'ū mai koe i tā'aku poki e tahi mau nō. ³⁹ Ko o'o 'ā e te tātane; 'ā'ana te haka ohu-ohu, te haka kiki-kiki 'e te haka e'a i te kuta-kuta a roto i te haha. He tōtōā nō te aŋa 'e 'ina he haka rē. ⁴⁰ Ko ani 'ana a au ki ta'a nu'u hāpī nei mo haka e'a 'e 'ina kai rava'a.

⁴¹ He kī ia e Ietū ki te ta'ato'a:

—;Ko te pū'oko hio-hio i a kōrua, e te nu'u mana'u ta'e tano 'e ta'e [haka moe i te mana'u] 'i ruŋa i te 'Atua ē! ;Pa he me'e ena: ka ai ka oho nō atu a au 'i muri i a kōrua 'ātā ki te pa'o iŋa o te ao, ko te ta'e haka moe iŋa mai 'ā kōrua i te mana'u 'i ruŋa i a au! ;'Ātā ki hē rā nei ka ha'aoroma'i ka oho nō nei i a kōrua? Ka ma'u mai te poki.

⁴² I hāhine i oho era te poki ki a Ietū, he haka hiŋa e te tātane, he haka kiki-kiki. He ture he haka e'a e Ietū i rā tātane 'e he ora tū poki era. I oti era he haka hoki e Ietū ki tō'ona matu'a.

⁴³ 'E he māere tahi te nu'u 'i te nui-nui o te pūai o te 'Atua.

He haka 'ite iŋa haka 'ou o Ietū i tō'ona mate
(Māteo 17.22-23; Marko 9.30-32)

E māere nō 'ana te nu'u 'i te me'e ta'ato'a aŋa e Ietū, he kī e Ietū ki tā'ana nu'u hāpī: ⁴⁴ «Ka haka roŋo riva-riva mai te me'e nei 'e e u'i 'o rehu rō: te Poki o te taŋata e va'ai rō ki te rima o te nu'u ta'e haŋa ki a ia».

⁴⁵ 'Ina ia he aŋi-aŋi e rā nu'u i te aura'a o rā me'e kī era e Ietū, he ta'e haka mā'eha riva-riva e te 'Atua i te rāua mana'u, 'e he ri'a-ri'a tako'a mo 'ui ki a Ietū i te ha'aaura'a o rā vānaŋa.

;Ko ai te kope 'ata hōnui mo te 'Atua?
(Māteo 18.1-5; Marko 9.33-37)

⁴⁶ I oho era he ha'amata he tātake te nu'u hāpī 'a Ietū ko ai te kope 'ata hōnui o roto i a rāua. ⁴⁷ 'I te aŋi-aŋi e Ietū i te mana'u o rā nu'u, he to'o i te poki e tahi ki muri i a ia ⁴⁸ 'e he kī ki rā nu'u: «Te kope to'o 'e hā-pa'o i te poki nei hai 'iŋoa o'oku e to'o 'ana i a au; 'e te kope to'o i a au e to'o tako'a 'ana i te kope uŋa mai i a au. 'E te kope 'ata hōnui 'i roto i a kōrua, he kope tō'ona mana'u mau nō he tāvini ki te ta'ato'a».

Te kope ta'e haka hape i te aŋa e hā'ū'ū 'ā
(Marko 9.38-40)

⁴⁹ He kī e Iovani:

—E te Ma'ori, ko take'a 'ā e mātou te kope e haka e'a 'ana i te tātane mai roto i te taŋata hai 'iŋoa o'ou. I kī rō e mātou mo ta'e aŋa haka 'ou. Ta'e, pa'i, a ia o roto o tātou.

⁵⁰ He pāhono e Ietū:

—E haka rē nō kōrua i a ia. Te kope 'ina i a ia te haŋa mo haka hape i te tātou aŋa e hā'ū'ū mai 'ana.

He ture iŋa o Ietū ki a [Tanatiako] ararua ko Iovani

⁵¹ I hāhine era te mahana o Ietū mo iri ki te raŋi, he ŋatu mau rō 'ai te haŋu mo tu'u ki Hērutarema. ⁵² He uŋa ia e Ietū 'i mu'a o rāua i te nu'u ma'uroŋo ki te kona nūna'a hare e tahi o [Tāmāria] mo u'i hai kona mo noho o rāua. ⁵³ Te nu'u o rā kona, 'i te aŋi-aŋi: te ara o kuā Ietū ki Hērutarema, 'ina kai haŋa mo noho o kuā Ietū 'i ira.

⁵⁴ 'Ite era e Tanatiako 'e e [Iovani] i rā me'e, he kī: «E Ietū, mo haŋa o'ou, he ani māua ki te 'Atua mo haka topa hai ahi mo tutu tahi i te nu'u era».

⁵⁵ He rori e Ietū he ture. ⁵⁶ I oti era he e'a ananake he oho ki te rua kona.

He nu'u mo taŋata hāpī 'a Ietū
(Māteo 8.19-22)

⁵⁷ E oho nō 'ana ananake 'i te ara, he kī e te taŋata e tahi ki a Ietū:

—E Ietū, kona nō ena o'ou ka oho ena, he oho atu a au 'i muri i a koe mo taŋata hāpī 'ā'au.

⁵⁸ He pāhono e Ietū:

—Te kurī manu e ai rō 'ā te karava mo noho, 'e te manu he haka pupa; 'e te Poki o te taŋata 'ina he kona mo noho.

⁵⁹ 'E ki te rua kope i kī ai:

—Ka oho mai koe 'i muri i a au mo taŋata hāpī 'ā'aku.

He kī e rā taŋata:

—E Ietū, ka haka rē mai koe ki mate 'e ki tanu a au 'i ra'e i tō'oku matu'a tane ana oho iho atu a au 'i muri i a koe.

⁶⁰ He pāhono e Ietū:

—Ka haka rē mo te nu'u mate e tanu i te rāua nu'u mate; † 'e a koe ka oho ka haka 'ite o ruŋa i te haka tere iŋa 'āpī o te 'Atua.

⁶¹ He kī e te toru kope:

—E Ietū, 'i a au he oho atu 'i muri i a koe. Te me'e nō, ka haka rē mai koe ki oho a au 'i ra'e ki 'aroha ki te nu'u o tō'oku hare.

⁶² He pāhono e Ietū:

† Te nu'u mate ra'e ena he nu'u ta'e haka roŋo 'e ta'e haka moe i te mana'u 'i ruŋa i te 'Atua. 'E te rua nu'u mate ena he nu'u mate mau 'ā.

—Te kope 'ārote i tō'ona 'āua u'i o te mata a tu'a 'ina e tahi aura'a mo roto i te haka tere iŋa 'āpī o te 'Atua.

He uŋa iŋa o Ietū i tā'ana nu'u hāpī

10 I oti era he ha'ata'a e Ietū e hitu 'ahuru mā piti nu'u hāpī haka 'ou 'ā'ana, 'ai ka uŋa hoko rua hoko rua 'i ra'e ki a ia ki te kona ta'ato'a o'ona ka tu'u era ² koia ko kī:

«Te parauti'a, nu'u rahi te nu'u mo to'o mo roto i te [haka tere iŋa 'āpī o te 'Atua], pa he kato iŋa o te kai, 'e nu'u ta'e rahi te nu'u o rāua te kato. 'O ira, ka ani ki te kope 'ā'ana te kai, he 'Atua, mo 'ata uŋa hai nu'u mo kato. ³ Ka oho; e 'ite: e uŋa 'ana a au i a kōrua pa he māmoē ki roto i te nūna'a paiheŋa taehae.

⁴ »'Ina ko ma'u i te moni, i te kiriva'e mo mono, 'e hai me'e mo te ara, 'e 'ina ko noho ana 'aroha ki te nu'u 'i te ara. ⁵ Hare era o kōrua mo tu'u, te me'e ra'e, e 'aroha pē nei ē: "Ka ai te haumārū 'i te hare nei". ⁶ 'E mo ai o te nu'u haumārū o nā hare, te kōrua 'aroha he tano; 'e mo ta'e ai pē ira, e ko hauha'a te kōrua 'aroha.

⁷ Hare era mo to'o i a kōrua, e noho 'i ira, 'e 'ina ko oho ki hare era ki hare era. E kai 'e e unu i te me'e mo va'ai atu; te taŋata aŋa, pa'i, e 'auhau rō 'ā.

⁸ »Ka tu'u ena kōrua ki te kona e haŋa rō atu 'ana te nu'u, e kai te me'e mo va'ai atu. ⁹ E haka ora te nu'u māui-ūi o nā kona 'e 'ai ka kī rō: "Te haka tere iŋa 'āpī o te 'Atua nā ko hāhine mai 'ā".

¹⁰ »'E, ka tu'u ena kōrua ki te kona 'ina he nu'u o ira he haŋa mo haka roŋo atu, ka e'a ki te ara 'ai ka kī rō: ¹¹ "iTe puŋa'ehu o te kona nei puhia mai ki ruŋa i te mātou va'e 'i e mātou he tū-tū mo 'ite e kōrua pē nei ē: te ūtu'a o te 'Atua ka topa atu ena, i a kōrua 'ā! 'E, e 'ite tako'a: te haka tere iŋa 'āpī o te 'Atua nā ko hāhine mai 'ana". ¹² 'I a au he kī atu: te ūtu'a mo rā nu'u, 'i te mahana o te haka ūtu'a, 'ata hau rō atu ki te ūtu'a mo te nu'u ta'e tano o [Tōroma].

He ture iŋa o Ietū

(Māteo 11.20-24)

¹³ »iKo te 'aroha i a kōrua, e te nu'u o Koratini ē, 'e o Vetetaira ē! 'Āhani 'i Tiro 'e 'i Tīrone i take'a ai te mana aŋa atu era ki a kōrua, ko [huri nō era 'ana te nu'u o ira i te rāua mana'u ki te 'Atua] 'e ko haka take'a nō era 'ā hai noho 'i roto i te 'eo-'eo e uru rō 'ana i te kahu i aŋa hai pūtē tore. ¹⁴ 'E, 'i te mahana o te ture hope'a o te 'Atua, te ūtu'a mo kōrua 'ata hau rō atu ki te ūtu'a mo te nu'u o Tiro 'e o Tīrone.

¹⁵ »'E a kōrua, e te nu'u o Kaperenāū ē, ζe mana'u ena e ma'u rō i a kōrua ki te raŋi? iKi raro nui era o te pō'auahi ka ava ena!».

¹⁶ He kī ia e Ietū ki tā'ana nu'u hāpī: «Te nu'u haka roŋo atu e haka roŋo mai 'ana; te nu'u ta'e haŋa atu e ta'e haŋa mai 'ana; 'e te nu'u ta'e haŋa mai e ta'e haŋa 'ana ki te kope uŋa māi i a au».

He hoki iŋa o tū nu'u era e hitu 'ahuru mā piti

¹⁷ Tū nu'u era e hitu 'ahuru mā piti e koa rō 'ana i hoki ai, he kī:

—iE Ietū, 'ātā ki te tātane i haka roŋo mai ai 'i te hora kī o mātou mo e'a mai roto i te taŋata hai 'iŋoa o'ou!

¹⁸ He kī e Ietū:

—'Ē-ē, i take'a rō e au i a Rukifero te viri iŋa mai te raŋi pa he 'uira. ¹⁹ I va'ai rō atu a au i te pūai mo ha'ere o kōrua a ruŋa i te kōreha veneno 'e a ruŋa i te ver-'i'ārahu. I va'ai tako'a rō atu a au i te pūai mo rē o kōrua ki te me'e ta'ato'a aŋa atu e Rukifero. Pē ira i ta'e topa atu ai e tahi 'ati. ²⁰ 'E, ka ai atu pē ira, te me'e o kōrua mo koa: ko pāpa'i 'ā te kōrua 'iŋoa 'i te raŋi, ta'e 'ō ko haka roŋo atu 'ā te tātane.

He Poki mau nō te me'e 'ite ko ai te Matu'a

(Māteo 11.25-27; 13.16-17)

²¹ 'I rā hora, 'i te 'i o Ietū e te [Vārua Maitai], he to'o rō atu 'ai te koa 'e he kī:

«He ha'ahana-hana atu a au ki a koe, e Koro, e te 'Atua o te raŋi 'e o te henua ē, 'o te ta'e haka take'a o'ou i ta'a me'e na'a ki te nu'u mana'u ko rāua mau nō te nu'u 'ite 'e mārama-rama, 'e ki te nu'u pa he nā poki a koe i haka take'a ai. 'Ē-ē, pē ira mau 'ā koe i haŋa ai, e Koro ē».

²² He kī ia e Ietū ki te nu'u: «Ko va'ai tahi mai 'ana te me'e ta'ato'a e tō'oku Matu'a. 'Ina e tahi taŋata i 'ite ko ai te Poki, he Matu'a mau nō, 'e 'ina e tahi taŋata i 'ite ko ai te Matu'a, he Poki 'e he nu'u haŋa mau nō e te Poki mo haka 'ite».

²³ I oti era he hāru i he u'i a ruŋa i tā'ana nu'u hāpī 'e he kī ki rā nu'u nō: «Ko te koa i te nu'u take'a i te me'e take'a ena e kōrua. ²⁴ 'I a au he kī atu: me'e rahi perofeta 'e 'ariki i haŋa mo take'a i te me'e take'a e kōrua, 'e 'ina kai take'a; i haŋa mo ŋaro'a i te me'e ŋaro'a e kōrua 'e 'ina kai ŋaro'a».

He taŋata riva e tahi o [Tāmāria]

²⁵ He oho e tahi [ma'ori o te haka tere hūrio] he vānaŋa ararua ko Ietū mo haka 'atu pē hē ka pāhono era, he 'ui:

—E te Ma'ori, ζhe aha tā'aku me'e mo aŋa mo rava'a e au i te ora 'āpī 'ina he hope'a ra'a va'ai e te 'Atua?

²⁶ He pāhono e Ietū:

—ζPē hē e hā'aki ena 'i ruŋa i te me'e pāpa'i e [Mōtē]? ζHe aha ta'a me'e i tai'o?

²⁷ He pāhono e tū taŋata era:

—«E haŋa koe ki tu'u 'Atua hai haŋu ta'ato'a o tu'u māhatu, o tu'u vārua, o tu'u pūai 'e o tu'u mana'u ta'ato'a»; 'e «e haŋa ki te rua taŋata pa he haŋa iŋa ena 'ā ō'ou ki a koe mau 'ā».

²⁸ He kī e Ietū:

—Ko tano 'ā ta'a pāhono. Mo aŋa ō'ou pē ira, he rava'a e koe te ora 'āpī 'ina he hope'a ra'a.

²⁹ 'E, 'i te haŋa o tū kope era mo haka take'a i a ia pa he taŋata tano, he 'ui ki a Ietū:

—¿Ko ai hō te rua taŋata mo haŋa e au?

³⁰ He pāhono e Ietū:

«E tahi taŋata [hūrio] he e'a he oho a te ara mai Hērutarema ki Herikō. He piri te nu'u toke-toke, he toke i tā'ana me'e ta'ato'a koia ko te kahu uru. He to'o mai he tiŋa'i ki te pi'i-pi'i. I oti era he hoa 'e he e'a he tē-tere.

³¹ »I oho era he vari te [oromatu'a] hūrio e tahi a rā kona. I take'a era i rā taŋata, 'ina kai hā'ū'ū; he haka tapa 'e he e'a he oho rō 'ai. ³² He tu'u tako'a ki rā kona e tahi taŋata [rēvita], i u'i tako'a nō, 'e he e'a he oho rō 'ai.

³³ »He vari ia te taŋata e tahi o Tāmāria. I take'a era i rā kope he haka 'aroha. ³⁴ He haka hāhine ki tū taŋata era, he rā'au hai 'ava 'e hai mōrī, 'e he viri hai tapa kahu i te more. I oti era he haka eke ki ruŋa i te muni, he ma'u he oho ki te hare e tahi 'e he noho he hāpa'o.

³⁵ »I te rua mahana, he va'ai ki te taŋata era ō'ona rā hare e rua [renario], he kī: «Ka hāpa'o koe i te taŋata nei. Mo 'ata pau ō'ou, mā'aku e 'auhau atu ki hoki haka 'ou mai a au'».

³⁶ He 'ui ia e Ietū:

—Ki ta'a kī, ¿ko ai o roto o te ŋāŋata era hoko toru i haŋa ki tū taŋata toke era e te nu'u?

³⁷ He pāhono e tū taŋata ma'ori haka tere hūrio era:

—Ko te taŋata haka 'aroha era i a ia.

He kī e Ietū:

—Ka oho ia koe ka aŋa tako'a pē ira.

A Ietū 'i te hare o Maratuka

³⁸ He oho ia a Ietū 'i tō'ona ara 'ātā ka tu'u rō ki te kona e tahi 'i ira e noho era te vi'e ko Maratuka te 'iŋoa. He haka noho e rā vi'e i a Ietū 'i tō'ona hare.

³⁹ A Maratuka e ai rō 'ā tō'ona taina vahine ko [Māria] te 'iŋoa. A ia i noho ai 'i te va'e o Ietū e haka roŋo 'ana i tā'ana vānaŋa. ⁴⁰ 'E, a Maratuka, 'i te rahi o te aŋa, he haka hāhine ki a Ietū, he kī:

—E Ietū, ¿'ina 'ō koe he haka 'aroha i a au? Tō'oku taina ena ko haka rē tahi mai 'ana i te aŋa ki a au. Ka kī mo hā'ū'ū mai.

⁴¹ He pāhono e Ietū:

—E Maratuka, ko te 'aroha i a koe. ¿He aha e haka ŋāruru-ruru tahaŋa ena i tu'u pū'oko hai ŋā me'e ta'ato'a ena? ⁴² E tahi mau nō me'e hope'a o te riva-riva, 'e ko rā me'e te me'e haŋa 'a Māria, 'e 'ina e tahi kope mo rava'a mo to'o i rā me'e mai i a ia.

He hāpī iŋa o Ietū i te pure

(Māteo 6.9-15; 7.7-11)

11 E tahi mahana e pure 'ana a Ietū. I oti era he kī e tahi o roto o tā'ana nu'u hāpī:

—E Ietū, ka hāpī mai koe i a mātou pē hē ana pure; a Iovani Papatito, pa'i, i hāpī rō i te pure ki tā'ana nu'u hāpī.

² He kī e Ietū:

—Pē nei a kōrua ana pure:

«E te Matu'a o mātou ē, te me'e haŋa he mo'a o te taŋata ta'ato'a i tu'u 'iŋoa, 'e he haka rē atu mo haka tere ō'ou i a rāua.

³ E va'ai mai koe, e te 'Atua ē, hai kai paurō te mahana.

⁴ E haka kore koe i te mātou hara, pa he haka rehu iŋa o mātou i te me'e 'ino aŋa mai e te rua.

'E, 'i te hora o te haka 'atu mai, 'ina koe ko haka rē i a mātou mo viri ki roto i te hara».

⁵ He kī tako'a e Ietū:

«He 'a'amu nō nei e tahi: 'Ahuru mā piti o te pō, e tahi taŋata he e'a he oho ki te hare o tō'ona repahoa 'e he kī: «E hoa, ka va'ai mai koe e toru haraoa. ⁶ Ko tu'u mai 'ana ki tō'oku hare te repahoa e tahi, 'e 'ina 'ā'aku me'e mo va'ai'».

⁷ »He pāhono e rā hoa mai roto: «Ka e'a koe ka oho. 'Ī a mātou ko te ŋā poki e hā'uru 'ana 'e ko puru 'ā tō'oku 'ōpani. E ko e'a e ko va'ai atu a au e tahi me'e'».

⁸ »Ī a au he kī atu: ka ai atu rā hoa e ko haŋa mo e'a mo va'ai i te me'e ki tō'ona repahoa, pē tū e'a iŋa 'ana 'i te ta'e haka rē i a rāua mo hā'uru, 'e he va'ai i te me'e haŋa. ⁹ 'O ira, e no-no'i ki te 'Atua, he va'ai atu; e kimi, he haka take'a atu; e pātōtō te 'ōpani, he mātaki atu. ¹⁰ Ki te kope no-no'i, pa'i, he va'ai; ki te kope kimi, he haka take'a; 'e ki te kope pātōtō, he mātaki ki a ia.

¹¹ »¿Ko matu'a hē te matu'a o roto i a kōrua mo va'ai hai kōreha veneno ki tā'ana poki ana no-no'i hai ika; ¹² 'o hai veri'ārahu ana no-no'i hai māmari? ¹³ Mo 'ite ia a kōrua mo va'ai i te me'e riva-riva ki te kōrua ŋā poki, ka ai atu kōrua he nu'u hara, ¿e ko ta'e va'ai hō e te

Matu'a o te ranji i te [Vārua Maitai] ki te nu'u no-no'i ki a ia?».

Te mana o Ietū e kī era o [Veresepupa]

(Māteo 12.22-30; Marko 3.20-27)

¹⁴ A Ietū e haka e'a 'ana i te tātane mai roto i te taŋata e tahi, taŋata ko haka mou 'ana i te re'o e rā tātane. I e'a era tū tātane era, he ha'amata rā taŋata he vānaŋa haka 'ou.

He māere te nu'u 'i tū me'e era. ¹⁵ He kī e te tētahi: «A Veresepupa, pū'oko o te tātane, i va'ai i te mana ki te taŋata ena mo haka e'a i te tātane».

¹⁶ 'E tētahi atu, 'i te haŋa mo haka 'atu mo u'i pē hē ka me'e era a Ietū, he kī mo aŋa e tahi mana. ¹⁷ 'I te 'ite o Ietū i te mana'u o rā nu'u he kī:

«Te henua tama'i ki a rāua 'ā e tōtōā 'ana i a rāua 'ā; 'e te hua'ai moto ki a rāua 'ā e ha'ata'a 'ana. ¹⁸ Pē ira tako'a, mo moto o Rukifero 'e o tā'ana tātane ki a rāua 'ā, te pūai o tō'ona haka tere iŋa he ŋaro.

»A au e kī atu ena i te me'e nei he kī o kōrua e haka e'a nei a au i te tātane hai pūai o Veresepupa. ¹⁹ Mo ai pē ira, ō'a 'ai te va'ai i te pūai ki te nu'u hāpī o kōrua mo haka e'a i te tātane mai roto i te taŋata? E take'a ena te hape o te kōrua mana'u hai me'e aŋa e te kōrua nu'u hāpī. ²⁰ 'E, mo haka e'a ō'oku i te tātane mai roto i te taŋata hai pūai o te 'Atua, ko tu'u mai 'ana ia te [haka tere iŋa 'āpī o te 'Atua] ki a kōrua.

²¹ »Mo ai o te 'aito e ma'u rō 'ā i tā'ana me'e mo moto 'e e 'auario 'ana i tō'ona hare, 'ina e tahi kope mo rava'a mo to'o i te me'e o roto. ²² Ka ai atu pē ira, mo tu'u o te rua 'aito 'ata hau 'i te haka kē 'e he rē ki a ia, he hiko ia i rā me'e ma'u era 'ā'ana mo 'auario, he to'o i te me'e ta'ato'a ai o rā hare, 'e he tuha'a ki tō'ona repahoa.

²³ »'I a au he kī atu: te kope ta'e [haka moe i te mana'u] 'i ruŋa i a au 'ina he haŋa mai, 'e te kope ta'e hā'ū'ū mai mo aŋa i tā'aku aŋa e haka hape 'ā i tā'aku aŋa.

Te hoki iŋa o te tātane ki roto i te taŋata

(Māteo 12.43-45)

²⁴ »Te tātane e haka e'a ena mai roto i te taŋata he oho he kimi a te kona 'one ta'e noho taŋata hai kona mo noho. 'I te ta'e rava'a, he mana'u: "I a au he hoki ki te hare mai ira a au i haka e'a mai ai".

²⁵ »Ka hoki era rā tātane, he take'a i rā taŋata pa he hare e riva rō 'ā mo noho, ko purumu ko haka riva-riva 'ana. ²⁶ He oho rā tātane he tari ki ira e hitu tātane 'ata hau 'i te taparahi-ta'ata ki a ia, he uru he noho tahi 'i roto i tū taŋata era, 'e he 'ata 'ati rō atu 'ai rā taŋata ki te hora ra'e era».

Ko ai mau te nu'u koa

²⁷ E kī e oho nō 'ā a Ietū i te ŋā me'e nei, he ohu e te vi'e e tahi mai roto i te nu'u:

—iKo te koa i te vi'e haka poreko 'e hāpa'o i a koe!

²⁸ He pāhono e Ietū:

—iTe koa mau tā'au i te nu'u ŋaro'a 'e ha'atura i te vānaŋa o te 'Atua!

Te taŋata o te hora nei

(Māteo 12.38-42; Marko 8.12)

²⁹ Ko 'ata rahi 'ana te nu'u e taka-taka e oho era. He ha'amata haka 'ou ia a Ietū he kī:

«Te taŋata o te hora nei taŋata mana'u ta'e tano. E haŋa 'ana mo aŋa ō'oku i te mana, 'e, te me'e mau nō mo take'a e rāua he tāpa'o tu'u pa he me'e topa ki te perofeta era ko [Hōnā]. ³⁰ Te me'e topa, pa'i, ki a ia i aŋa ai mo 'ite e te nu'u o Nīnive: o te 'Atua i uŋa i a ia. Pē ira tako'a, te me'e ka topa ena ki te [Poki o te taŋata] mo haka 'ite ki te nu'u ta'ato'a o te hora nei: o te 'Atua a ia i uŋa mai.

³¹ »'I te mahana o te haka ūtu'a, hora era mo ture ki te taŋata ta'ato'a, he e'a te 'ariki vahine o Tāvā 'e hai ia ka take'a ena te hape o kōrua; i oho nō mai, pa'i, mai te henua hope'a o te roa mo haka roŋo i te vānaŋa mārama-rama o te 'ariki era ko [Toromono]. 'E 'i te kona nei te kope 'ata hau ki a Toromono.

³² »Pē ira tako'a, te nu'u o Nīnive ka e'a ena 'i te mahana o te haka ūtu'a, 'e hai rāua ka take'a ena te hape o kōrua; te nu'u o ira, pa'i, i ŋaro'a era i te vānaŋa 'a Hōnā, he haka moe tahi i te mana'u 'i ruŋa i te 'Atua. 'E 'i te kona nei te kope 'ata hau ki a Hōnā.

Te mata pa he mōrī mo te hakari

(Māteo 5.15; 6.22-23)

³³ »'Ina e tahi taŋata haka pura i te hakari'i mo haka rē 'i raro i te 'avahata. E haka rē ena 'i te kona ruŋa nui o roto i te hare mo haka mā'e'ha o te taŋata. ³⁴ Te mata pa he mōrī haka mā'e'ha i te hakari 'e pē ira te mana'u o te taŋata. Mo riva-riva, he ha'ere a roto i te mā'e'ha; 'e mo rake-rake, a roto i te pōhāhā.

³⁵ »E u'i 'o ai he pōhāhā te me'e o roto i a koe 'e he mana'u e koe he mōrī. ³⁶ Mo ai he mōrī nō te me'e o roto i tu'u hakari, he haka mā'e'ha i tu'u mana'u mo take'a riva-riva i te me'e ta'ato'a, pa he take'a iŋa o te me'e 'i te mā'e'ha o te hakari'i».

Te huru o te [fariseo] 'e o te [ma'ori o te haka tere hūrio]

(Māteo 23.1-36; Marko 12.38-40; Ruka 20.45-47)

³⁷ I oti era te vānaŋa 'a Ietū, he kī e te taŋata fariseo e tahi mo oho mo kai 'i tō'ona hare. I tu'u era a Ietū, he uru he noho 'i ruŋa i te 'amurama'a. ³⁸ He māere tū fariseo era o te ta'e aŋa o Ietū i te me'e rava māhani aŋa e te [hūrio] mo haka tano ki te rāua haka tere iŋa, he hopu i te rima 'i ra'e 'e 'ai ka noho iho 'i ruŋa i te 'a-murama'a mo kai. ³⁹ He kī ia e Ietū:

—A kōrua te fariseo e haka tu'u rō 'ana pa he nu'u tano ki te mata o te 'Atua, 'e te parauti'a, te kōrua roto

e 'i rō 'ā e te me'e 'ino 'e e te pohe mo toke, pa he hapa'ina 'o pa he maretī tata e kōrua a te haho nō.

⁴⁰ »;E te ma'a-ma'a ē! ¿Kai 'ite 'ana 'ō kōrua: o te kope 'ā'ana i a'ā i te haho i a'ā tako'a i te roto? ⁴¹ 'O ira, e va'ai ki te nu'u veve i te me'e hai mana'u riva-riva; pē ira ana take'a i te ma'itaki o te roto 'e o te haho.

⁴² »;Ko te 'aroha i a kōrua, e te fariseo ē! O roto o te ho'e 'ahuru 'apa o te me'e haka 'eo kai 'e o te tētahi atu me'e 'oka mo kai, e ha'ata'a ena e tahi o rā nā 'apa mo te 'Atua, pa he me'e kī 'i ru'ā i te [haka tere i'ā 'a Mōtē]. Ka ai atu pē ira, 'ina kōrua he a'ā i te me'e ha'ā mau e ia, ko te me'e ena: he a'ā i te me'e tī-tika 'e he ha'ā ki a ia. He nā me'e nei te me'e o kōrua mo a'ā, 'e 'ina ko ta'e a'ā te me'e ra'e era.

⁴³ »;Ko te 'aroha i a kōrua, e te fariseo ē! Nu'u ha'ā kōrua mo noho 'i ru'ā i te pepe o te nu'u ra-rahi o roto o te [hare pure hūrio], ha'ā tako'a mo 'aroha e te ta'āta 'i te ara pa he 'ariki.

⁴⁴ »;Ko te 'aroha i a kōrua! Pa he kona tanu pāpaku kōrua rei-rei e te ta'āta 'i te ta'e tāpa'o 'e 'i te ta'e 'ite 'i raro e ai rō 'ana te me'e piro.

⁴⁵ He kī ia e te ma'ori e tahi o te haka tere hūrio:

—E te Ma'ori, ta'a me'e kī ena e ta'e haka au mai 'ā i a mātou tako'a.

⁴⁶ He kī e Ietū:

—;Ko te 'aroha i a kōrua tako'a, e te ma'ori o te haka tere hūrio ē! E 'ata haka 'amo ena e kōrua i te ro'ā ki te nu'u mo ha'atura, he me'e e ko rava'a mo 'amo 'i te pa'āha'a, 'e a kōrua 'ina he a'ā e tahi me'e mo haka rehe 'iti i te pa'āha'a.

⁴⁷ »;Ko te 'aroha i a kōrua! E haka nehe-nehe ena i te kona tanu i te perofeta ti'ā'i e te kōrua tupuna. ⁴⁸ Pē ira e 'ite ena e tano mau rō 'ā mo kōrua te me'e a'ā e rāua; o rāua, pa'i, i ti'ā'i, 'e o kōrua i haka nehe-nehe i te kona tanu.

⁴⁹ »'O ira te 'Atua hai mārama-rama i kī ai: "E u'ā rō au i te perofeta 'e i te ['āpōtoro], 'e e ti'ā'i e haka mate rō e rāua i te tētahi 'e i te tētahi atu e tū-tute rō mo tōtōā". ⁵⁰ Ki te nu'u o te hora nei ka haka 'auhau ena e te 'Atua i te toto ra'ā o te perofeta ta'ato'a mai te ha'amata i'ā o te ao, ⁵¹ mai te toto o ['Āvere] 'ātā ki te toto o Taharia ti'ā'i haka mate i te o'o i'ā o te [Kona Mo'a] o te Hare o te 'Atua 'i tu'a o te fata. 'Ī a au he kī atu: te mate era o rā nu'u e haka 'auhau tahi rō e te 'Atua ki te nu'u o te hora nei.

⁵² »;Ko te 'aroha i a kōrua, e te ma'ori o te haka tere hūrio ē!, to'o mo kōrua i te tāviri mātaki i te 'ōpani uru ki te ara parauti'a o te 'Atua. 'E, a kōrua mau ena 'ā 'ina he uru 'e, tako'a, 'ina he haka rē mo uru i te ta'āta e ha'ā rō 'ā mo uru.

⁵³ I e'a era a Ietū mai ira, he riri rō atu 'ai te nu'u ma'ori o te haka tere hūrio 'e te fariseo. 'E mai rā mahana he ha'amata e rā nu'u he haka tāika hai haka 'ui-

'ui ki a Ietū ⁵⁴ mo rava'a, hai vāna'ā kī e ia, i te 'ōtohe mo 'a-'aru.

Te nu'u riva a te haho nō

(Māteo 10.26-27)

12 I oho era he taka-taka te ta'āta ka ta'utini ka ta'utini; 'i te rahi, he rei-rei i a rāua 'ā. 'E a Ietū 'i ra'e i ha'amata i vāna'ā ai ki tā'ana nu'u hāpī pē nei ē:

«E hāpa'o 'o riro kōrua nu'u riva a te haho nō pa he [fariseo]. Te huru o rāua 'i roto i te ta'āta pa he revaura e haka ahu ena i te haraoa mata. ² 'Ī a au he kī atu: 'ina e tahi me'e ta'e ha'ā mo 'ite mo ta'e 'ite, 'e 'ina e tahi me'e na'a mo ta'e take'a. ³ Te kōrua me'e vāna'ā 'i te pō, ka 'ōtea ena, e 'ite tahi rō, 'e te kōrua me'e vāna'ā 'i roto i te hare 'o 'ite e te ta'āta, mai te kona ru'ā nui ka ohu ka haka 'ite ena.

I a ai a kōrua ana ri'a-ri'a

(Māteo 10.28-31)

⁴ »He kī atu a au, e kuā repahoa ē: 'ina kōrua ko ri'a-ri'a 'i te nu'u te me'e mau nō o rāua mo ti'ā'i mo haka mate he hakari. ⁵ 'Ī a au he kī atu ko ai mau te me'e o kōrua mo ri'a-ri'a: e ri'a-ri'a 'i te kope ta'e nō i a ia te parau mo ti'ā'i i te hakari, i a ia tako'a te parau mo hoa i te vārua ki roto i te pō'auahi. Ko rā kope te me'e o kōrua mo ri'a-ri'a.

⁶ »;Ina 'ō he ho'o e rima manu riki-riki hai tara 'aurī e rua? Ka ai atu pē ira, 'ina e tahi o rāua he rehu i te 'Atua. ⁷ 'E a kōrua ta'ato'a mau ena 'ā, 'ātā ki te rau'oho i tatau tahi ai e ia. 'O ira, 'ina ko ri'a-ri'a; a kōrua, mo te 'Atua, 'ata hau rō atu 'i te hauha'a ki te manu.

Te ha'ā 'e te ta'e ha'ā ki a Ietū

(Māteo 10.32-33; 12.32; 10.19-20)

⁸ »'Ī a au he kī atu: te kope kī 'i mu'a i te ta'āta e ha'ā rō mai 'ana ki a au, pē ira tako'a 'ana a au, te [Poki o te ta'āta], ka kī ena mō'ona 'i mu'a o te merahi o te 'Atua. ⁹ 'E te kope kī: 'ina a ia he ha'ā mai, pē ira tako'a 'ana a au ka kī ena mo rā kope 'i mu'a o te merahi o te 'Atua.

¹⁰ »Te 'Atua e haka kore nō i te hara o te nu'u vāna'ā ta'e tano mo te Poki o te ta'āta; 'e, te nu'u vāna'ā ta'e tano mo te [Vārua Maitai] e ko haka kore e te 'Atua i te hara.

¹¹ »'I te hora mo ma'u i a kōrua ki roto i te [hare pure hūrio], ki mu'a o te pū'oko haka tere o te hare ture 'e o te nu'u ra-rahi, 'ina ko ri'a-ri'a pē hē a kōrua ka vāna'ā ena mo e'a mai roto i te 'ati 'e he aha te kōrua me'e mo kī. ¹² Ka tu'u ena te hora mo vāna'ā o kōrua, mo te Vārua Maitai e kī atu pē hē ana kī».

Te ta'e au o te me'e he 'ono

¹³ E tahi ta'āta o roto o te nu'u he kī ki a Ietū:

—E te Ma'ori, ka kī ki tō'oku taina mo vahi mai tō'oku o te hauha'a haka rē mai e te māua matu'a.

¹⁴ He pāhono e Ietū:

—E hoa, ζ'a 'ai i va'ai mai i te parau mo vahi ō'oku i te kōrua hauha'a?

¹⁵ 'E he kī tako'a:

—E hāpa'o kōrua e te nou-nou; ta'e, pa'i, 'i te rahi o te hauha'a te ora o te taŋata.

¹⁶ He 'a'amu ia i te 'a'amu ha'aaura'a nei:

«E tahi taŋata 'ono, i 'oka era i tō'ona henua, he topa te mau. ¹⁷ He noho rā taŋata he haka topa i tō'ona mana'u: "ζ'He aha tā'aku me'e ka aŋa nei? ζ'I hē a au ka hāpa'o nei i tā'aku kai rahi nei?". ¹⁸ He kī ia ki a ia 'ā: "iKo 'ite 'ana a au i tā'aku me'e mo aŋa! He haka marere a au i tā'aku nā karapone era mo aŋa i te karapone 'ata nu-nui mo hāpa'o tahi o te kai 'e o tā'aku me'e ta'ato'a. ¹⁹ Ki oti ka kī nei a au ki a au 'ā: E hoa, me'e rahi ta'a me'e hāpa'o ena mo te rahi o te matahiti. Ka haka ora 'i te hora ena, ka kai, ka unu 'e ka koa".

²⁰ »He kī ia e te 'Atua: "Ko te ma'a-ma'a i a koe. 'Arīnā mau nei 'ā 'i te pō ka mate koe; 'e ta'a me'e ta'ato'a hāpa'o ena, ζmā 'ai ka hope'a ena?"

²¹ »Pē ira e topa ena ki te taŋata ha'aputu mō'ona mau nō i te hauha'a 'e 'ina he mana'u ki te me'e haŋa o te 'Atua».

Te 'Atua e hāpa'o rō 'ana i tā'ana nā poki

(Māteo 6.25-34)

²² He kī ia a Ietū i te me'e nei ki tā'ana nu'u hāpī:

«'Ina ko mana'u rahi kōrua o ruŋa o te me'e mo kai 'e o ruŋa o te kahu mo uru. ²³ Ta'e 'i te kai 'e 'i te kahu te taŋata e ora ena.

²⁴ »E u'i rā te manu: 'ina he 'oka 'e 'ina he kato i te kai, 'e 'ina tako'a he karapone o rāua mo ha'aputu 'e mo hāpa'o o te kai. Ka ai atu pē ira, e va'ai rō 'ana e te 'Atua hai kai. 'E, a kōrua, mo te 'Atua, 'ata hau rō atu 'i te hauha'a ki te manu.

²⁵ »Ka mana'u rahi atu te taŋata mo hāpa'o i a ia 'o mate, ζe rava'a mau rō hō mo haka roa 'iti i tō'ona noho iŋa 'i te ao nei? ²⁶ Mo ta'e rava'a mo aŋa i rā me'e, he me'e hope'a o te 'iti-'iti, ζhe aha ia e mana'u rahi ena ki te tētahi atu me'e?

²⁷ »E u'i rā pē hē e nu-nui e oho ena te tiare: 'ina he aŋa 'e 'ina he hiro i te hau mo aŋa i tō'ona kahu. 'E, ka ai atu pē ira, 'ina kai ai 'ana te kope, 'ātā te 'ariki era ko [Toromonō], 'i tō'ona hauha'a rahi era, i uru i te kahu nehe-nehe pa he tiare.

²⁸ »Mo ai pē ira te 'Atua e haka nehe-nehe ena i te tiare o 'uta 'ūa'a 'i 'aŋarīnā 'e mae-mae āpō, ζpē hē ana ta'e haka uru atu i a kōrua hai kahu, e te nu'u ta'e haka moe riva-riva i te mana'u 'i ruŋa i te 'Atua ē?

²⁹ »'Ina kōrua ko mana'u rahi o ruŋa i te me'e mo kai 'e o ruŋa i te me'e mo unu. ³⁰ Ko te nā me'e ena te me'e mana'u rahi e te taŋata o te ao, 'e a kōrua e ai rō 'ana te kōrua Matu'a, 'e e 'ite rō 'ana mo hāpa'o atu.

³¹ »'O ira, e va'ai tahi te kōrua māhatu mo haka tere atu e te 'Atua, 'e mā'ana e va'ai atu i rā nā me'e.

He hauha'a 'i ruŋa i te ranj

(Māteo 6.19-21)

³² »E te māmo'e 'ā'aku ē, 'ina ko ri'a-ri'a 'o te ta'e rahi o kōrua. 'I te riva rahi o te Matu'a ko ha'ata'a 'ana i a kōrua mo haka tere 'i muri i a ia 'i tō'ona haka tere iŋa 'āpī. ³³ Te kōrua me'e e ho'o 'e e va'ai te moni ki te veve. Pē ira he ai te kōrua hauha'a e ko pau 'i ruŋa i te ranj, kona pa he pūtē ena 'ā ka 'ī atu, e ko paihi ki te hora hope'a, kona e ko tu'u te toke-toke 'e te manu'ino e ko kai. ³⁴ Kona ena, pa'i, 'i ira te kōrua hauha'a, 'i ira tako'a te kōrua māhatu.

E haka riva-riva kōrua

³⁵⁻³⁶ »E ai kōrua pa he nu'u tāvini haka pura i te hakari'i 'ai ka tiaki ki te hoki iŋa o te taŋata haka aŋa i a rāua mai te ŋoŋoro hāipo-ipo, e rito rō 'ā mo mātaki i te 'ōpani ka pātōtō era. ³⁷ iKo te koa 'ō i te tāvini, ka tu'u era te taŋata 'ā'ana te haka aŋa, e 'a-'ara tahi nō 'ā! 'I a au he kī atu: mo te taŋata mau era 'ā 'ā'ana te haka aŋa, e haka noho i rā nu'u 'i ruŋa i te 'amurama'a 'e e ao e va'ai hai kai. ³⁸ iKo te koa 'ō i a rāua ka ai atu 'ahuru mā piti o te pō 'o 'i te popohaŋa e 'a-'ara nō 'ā ka tu'u era te taŋata 'ā'ana te haka aŋa!

³⁹ »Ka haka roŋo mai kōrua i te me'e nei: 'āhani e 'ite rō e te hoa hare 'i te hora mo tu'u o te toke-toke, e ko ha'uru 'o o'o 'o toke 'i tō'ona hare. ⁴⁰ 'O ira, e haka rito kōrua; te Poki o te taŋata e ko aŋi-aŋi hia e kōrua ka tu'u rō atu ena».

He tāvini ha'atura 'e he tāvini ta'e ha'atura

(Māteo 24.45-51)

⁴¹ He 'ui ia e Pētero:

—E Ietū, ζte 'a'amu ha'aaura'a 'a'amu mai ena e koe mo mātou nō, 'o mo te ta'ato'a?

⁴² He kī e Ietū:

—E ai kōrua pa he tāvini ha'atura 'e haka roŋo, haka pū'oko e te taŋata haka aŋa i a ia mo tuha'a i te kai, 'i tō'ona hora, ki te tētahi tāvini o te hare. ⁴³ iKo te koa i rā tāvini ka tu'u era te taŋata 'ā'ana te haka aŋa, e aŋa 'ana i te me'e ta'ato'a kī mo aŋa! ⁴⁴ 'I a au he kī atu: te taŋata era 'ā'ana te haka aŋa e haka rē rō ki rā tāvini i tō'ona hauha'a ta'ato'a mo hāpa'o.

⁴⁵ »'E mo ha'amata mo tōtōā e rā tāvini i te tētahi tāvini, mo noho mo kai 'e mo unu ka ta'ero rō 'i te mana'u iŋa pē nei ē: e ko hōrou e ko tu'u te taŋata era 'ā'ana te haka aŋa, ⁴⁶ he kī atu a au: 'i te hora 'e 'i te mahana e ko 'ite hia e rā tāvini, ka tu'u era rā taŋata haka aŋa era i a ia, he haka ūtu'a hai ūtu'a ena mo te tāvini ta'e haka roŋo.

⁴⁷ »Te tāvini 'ite i te me'e haŋa o te taŋata haka aŋa i a ia 'e 'ina he ha'atura he aŋa i te me'e haŋa o rā taŋata e tiŋa'i e haka ūtu'a rahi rō. ⁴⁸ Te tāvini aŋa i te me'e

ta'e tano 'i te ta'e 'ite he aha mau te me'e haŋa o te taŋata haka aŋa i a ia e ko haka ūtu'a rahi. Te kī: mo ai 'i ruŋa i te kope e tahi te riva rahi o te 'Atua, e rahi tako'a tō'ona tāvini iŋa ki te 'Atua. 'E mo ai 'ata rahi te riva rahi o te 'Atua, e 'ata rahi tako'a tō'ona tāvini iŋa ki a ia.

E ha'ata'a rō te taŋata hai Ietū
(Māteo 10.34-36)

⁴⁹ »I oho mai nei a au mo tutu i te henua hai ahi; 'e j'āhani 'ō 'ī e hū mai nei! ⁵⁰ E piri rō mai te 'ati nui-nui, 'e jko te mamae e ma'u nei 'ātā ka haka tano tahi rō rā 'ati! ⁵¹ Ki te kōrua mana'u, ζi oho mai nei au e ma'u mai 'ana i te haumārū ki ruŋa i te henua? Ta'e pē ira. Hai au ka ha'ata'a ena te taŋata. ⁵² 'E mai te hora nei pe mu'a ka oho ena, te nu'u hoko rima o te hua'ai e tahi e ha'ata'a rō, hoko toru ka moto ena ki te nā kope era hoko rua, 'e hoko rua ka moto ena ki te nā kope era hoko toru. ⁵³ Te matu'a tane e moto rō ki tā'ana poki tane, te poki tane ki tō'ona matu'a tane; te matu'a vahine e moto rō ki tā'ana poki vahine, te poki vahine ki tō'ona matu'a vahine; te māmā huŋavai e moto rō ki tō'ona hunoŋa vahine, te hunoŋa vahine ki tō'ona māmā huŋavai.

E aŋi-aŋi te me'e aŋa e te 'Atua
(Māteo 16.1-4; Marko 8.11-13)

⁵⁴ He kī haka 'ou a Ietū ki te taŋata:

«E take'a ena e kōrua ko e'a 'ā te raŋi mai te pā'iŋa ŋaro o te ra'ā, he kī e kōrua he hoa te 'ua, 'e he hoa. ⁵⁵ 'E mo puhi o te tokerau mai te rua kona, he kī e kōrua he ve'a-ve'a, 'e he ve'a-ve'a mau 'ā. ⁵⁶ jE te taŋata riva a te haho ē! Mo aŋi-aŋi e kōrua i te me'e o te raŋi 'e o te henua, ζhe aha ia e ta'e aŋi-aŋi ena i te me'e aŋa e te 'Atua 'i te hora nei?

E haka riva-riva kōrua ki te 'Atua
(Māteo 5.25-26)

⁵⁷ »ζHe aha a kōrua e ta'e u'i ena koi'ite i hau 'i te tano mo haka riva-riva i a kōrua ki te 'Atua mai ai 'ā te hora? ⁵⁸ Pa he hora o te kope horo atu i a koe. E oho 'ana a kōrua ki te hare ture, e u'i i te rāve'a mo haka kore i rā ture, 'o tu'u kōrua ki mu'a o te pū'oko haka tere o te hare ture 'e 'o va'ai i a koe ki te mūto'i mo pu-ru. ⁵⁹ 'I a au he kī atu: e ko e'a koe mai rā kona 'ātā ki te 'auhau tahi iŋa ō'ou i rā me'e».

Te riva o te me'e he huri o te mana'u ki te 'Atua

13 'I rā nā mahana, i oho i 'a'amu rō e te nu'u ki a Ietū: a Pirato i haka tiŋa'i i haka mate rō i te tētahi taŋata o Karirea 'i te hora e tūtia 'ana rā nu'u i te 'animare ki te 'Atua. ² He 'ui ia e Ietū:

«ζKi te kōrua mana'u, te me'e topa era ki rā nu'u 'o te ai 'ata hau a rāua 'i te hara ki te tētahi nu'u o Karirea? ³ Ta'e pē ira. A kōrua mau ena 'ā, mo ta'e huri

o te mana'u ki te 'Atua, he mate 'e he ha'ata'a mau rō 'āvai mai muri i a ia.

⁴ »'E te nāŋata era e ho'e 'ahuru mā va'u mā-mate era he viri o te hare ruŋa nui ko Tiroē ki ruŋa i a rāua, ki te kōrua mana'u, ζhe ai i hau rō atu a rāua 'i te hara ki te tētahi atu nu'u o Hērutarema? ⁵ Ta'e pē ira. A kōrua mau ena 'ā, mo ta'e huri o te mana'u ki te 'Atua, he mate 'e he ha'ata'a mau rō 'āvai mai muri i a ia».

He 'a'amu ha'aaura'a o te tumu pika ta'e hua

⁶ He 'a'amu ia e Ietū i te 'a'amu ha'aaura'a nei:

«He taŋata e tahi e ai rō 'ana e tahi tumu pika 'i roto i tō'ona 'āua 'oka vino. 'I te mahana e tahi he oho he u'i koi'ite ko hua 'ā, 'e 'ina kai rava'a e tahi pika. ⁷ He kī ki te taŋata hāpa'o vino: "ζKo 'ite 'ā koe? Ka toru matahiti o te oho mai ō'oku o te u'i a ruŋa i te tumu nei hai pika, 'e 'ina e tahi. Ka pa'o ki raro. He māu'a henua te tumu ena, 'ina he me'e hua".

⁸ »He pāhono e tū taŋata era 'ā'ana te hāpa'o i rā kona: "Ka haka rē nō koe i te tumu ena e tahi matahiti haka 'ou. 'I a au he haka heu 'e he huri hai me'e mo haka taiko. ⁹ Pē ira pēaha ana hua; 'e mo ta'e hua, 'i rā hora ana pa'o iho"».

He haka ora iŋa o Ietū i te vi'e māui-ui

¹⁰ 'I te [mahana haka ora] e tahi e hāpī 'ā a Ietū i te nu'u 'i roto i te [hare pure hūrio]. ¹¹ 'I ira e tahi vi'e ka ho'e 'ahuru mā va'u matahiti o tō'ona māui-ui: o te tā-tane i haka piko-piko i te tua'ivi; 'o ira 'ina he māroa riva-riva.

¹² 'I take'a era e Ietū he raŋi mo oho 'e he kī: «E nua, he ora tu'u māui-ui ena». ¹³ He haka eke a Ietū i tō'ona rima ki ruŋa o rā vi'e. 'I tū hora 'ā he māroa riva-riva 'e he ha'amata he ha'ahana-hana ki te 'Atua.

¹⁴ Te taŋata pū'oko haka tere o tū hare pure hūrio era he riri rō atu 'ai 'o te haka ora e Ietū i tū vi'e era 'i te mahana haka ora, 'e he kī ki te nu'u: «E ono mahana e ai ena mo aŋa. E oho mai kōrua 'i rā nā mahana mo haka ora atu, ta'e 'ō pē nei ē: 'i te mahana haka ora».

¹⁵ He pāhono e Ietū: «E te taŋata riva a te haho ē, ζ'i-na 'ō kōrua he ve-vete i te 'uei 'o i te muni 'i te mahana haka ora 'e he ma'u he haka unu hai vai? ¹⁶ 'E te vi'e nei, he hakaara o ['Aparahama], ko here-here 'ana hai māui-ui e te tātane ka ho'e 'ahuru mā va'u matahiti, ζe ko tano hō mo haka ora i a ia ka ai atu he mahana haka ora?».

¹⁷ 'I kī era e Ietū i tū vānaŋa era, he ha'amā rō atu 'ai te nu'u riri mō'ona. 'E te nu'u haka 'ou o roto he koa 'i te take'a i te me'e nui-nui aŋa e Ietū.

He 'a'amu ha'aaura'a o te karu mostasa
(Māteo 13.31-32; Marko 4.30-32)

¹⁸ He kī tako'a e Ietū:

«ζPa he aha 'ā te [haka tere iŋa 'āpī o te 'Atua]? ζHai aha a au ana haka ha'aaura'a atu? ¹⁹ Hai karu mostasa 'iti-'iti: ka 'oka era e te taŋata 'i 'uta, he tupu, he nui-

nui, he riro he tumu 'e he aŋa e te manu i te rāua hakapupa 'i ruŋa».

He 'a'amu ha'aaura'a o te revaura
(Māteo 13.33)

²⁰ He kī haka 'ou e Ietū:

«ǂHai aha a au ana haka ha'aaura'a atu i te haka tere iŋa 'āpī o te 'Atua? ²¹ Hai 'apa 'iti-'iti revaura hoa e te vi'e ki roto i te haraoa mata mo haka ahu tahi».

Te 'ōpani vako-vako
(Māteo 7.13-14,21-23)

²² 'I te ara o Ietū ki Hērutarema, he hāpī te aŋa i te nu'u o te kona tu'u. ²³ He 'ui e te kope e tahi:

—E Ietū, ǂnu'u ta'e rahi te nu'u ka rava'a ena i te ora 'āpī 'ina he hope'a ra'a va'ai e te 'Atua?

He pāhono e Ietū:

²⁴ «E u'i kōrua e uru a roto i te 'ōpani vako-vako. 'Ī a au he kī atu: nu'u rahi te nu'u haŋa mo uru ki roto i te ao haka tere e te 'Atua 'e nu'u ta'e rahi ka o'o ena. ²⁵ Ki puru te 'ōpani e te kope era ō'ona rā kona, ka ohu pūai ena kōrua: "Ei, ka mātaki mai te 'ōpani". He pāhono atu e rā kope: "Kai 'ite a au ko ai kōrua 'e o hē kōrua". ²⁶ He ha'amata ia he kī e kōrua: "Ananake tātou i kai ai, i unu ai, 'e 'i te mātou ara koe i hāpī ai". ²⁷ He pāhono haka 'ou atu e rā kope: "Kai 'ite a au ko ai kōrua. ǂKa mahiti ka oho kōrua mai nei, e te nu'u aŋa i te me'e ta'e tano ē!"

²⁸ »'I rā hora mau 'ā a kōrua ka taŋi ka 'au-'au ra'a niho ena 'i te take'a i a 'Aparahama, i a Ita'ata, i a Hāko-vo 'e i te perofeta ta'ato'a 'i te ao haka tere e te 'Atua, 'e 'i haho a kōrua. ²⁹ Mai te pā'iŋa ta'ato'a, pa'i, ka oho mai ena te nu'u mo noho 'e mo kai 'i roto i te ao haka tere e te 'Atua. ³⁰ Te nu'u ko rāua te hope'a 'i te hora nei, pe mu'a ka oho ena ko rāua te ra'e; 'e te nu'u ko rāua te ra'e 'i te hora nei, pe mu'a ka oho ena ko rāua te hope'a».

He taŋi iŋa o Ietū mo Hērutarema
(Māteo 23.37-39)

³¹ He tu'u ia te tētahi nu'u [fariseo] he kī ki a Ietū:

—Ka oho koe mai nei. Te 'ariki era ko ['Erore] e haŋa rō 'ana mo tiŋa'i i a koe.

³² He pāhono e Ietū:

—Ka oho ka kī ki te ha'amā'ore era: "Arīnā 'e āpō he haka ora a au i te māui-ui 'e he haka e'a i te tātane mai roto i te taŋata. 'E āpō era ka oti iho tā'aku aŋa". ³³ 'Ī a au he kī atu: e ko ta'e oho a au 'arīnā, āpō 'e āpō era a te ara ō'oku mo oho; te perofeta, pa'i, e ko tano mo mate mo ta'e ai 'i Hērutarema.

³⁴ »ǂE Hērutarema ē, e Hērutarema tiŋa'i i te perofeta, 'e tama'i hai mā'ea i te nu'u uŋa e te 'Atua ē! ǂKa

hia rā nei mahana ō'oku i haŋa mo haka taka-taka i ta'a ŋā poki, pa he haka taka-taka iŋa o te 'uha i tā'ana mā'aŋa 'i raro i te karā, 'e 'ina koe he haŋa! ³⁵ Nā e tu'u rō te mahana te kōrua hare e ko noho haka 'ou e te taŋata. 'Ī a au he kī atu: e ko take'a haka 'ou au e kōrua 'ātā ki te mahana mo kī e kōrua: "ǂKi ha'ahana-hana te taŋata uŋa mai e te 'Atua hai 'iŋoa ō'ona!"

He haka ora iŋa o Ietū i te taŋata māui-ui

14 'I te [mahana haka ora] e tahi, he oho a Ietū he kai 'i te hare o te [fariseo] ra-rahi e tahi, 'e tētahi nu'u fariseo 'ai e u'i era koi'ite e aŋa rō a Ietū i te me'e 'ina he tano ki te rāua haka tere iŋa. ² 'I rā kona tako'a te taŋata e tahi te māui-ui he ahu o te va'e 'e o te rima.

³ He 'ui ia e Ietū ki te [ma'ori o te haka tere hūrio] 'e ki te fariseo: «ǂE ha'ati'a rō 'ana mo haka ora i te taŋata māui-ui 'i te mahana haka ora?».

⁴ Kai pāhono e tū nu'u era. He to'o e Ietū i tū taŋata era, he haka ora i te māui-ui 'e he kī mo e'a mo oho rō 'ai. ⁵ He kī ia ki tū nu'u fariseo era: «ǂKo ai o kōrua, mo viri o te poki 'e o te 'uei ki roto i te pū mo ta'e to'o, 'i tū hora 'ā, ka ai atu he mahana haka ora?».

⁶ 'Ina kai ai e tahi vānaŋa o tū nu'u era mo pāhono.

Te nu'u kī mo oho ki te ŋoŋoro hāipo-ipo

⁷ 'I u'i era e Ietū i te nu'u e rotu 'ana i te pepe noho o te nu'u hōnui 'i tū kona 'amurama'a era, he kī pē nei ē:

⁸ «Mo kī atu o te taŋata e tahi mo oho ō'ou ki te ŋoŋoro hāipo-ipo, 'ina koe ko noho 'i ruŋa i te pepe o te nu'u hōnui 'o tu'u rō atu te kope 'ata hau te ra-rahi ki a koe ⁹ 'e mo te taŋata era 'ā'ana i hā'aki atu mo oho ō'ou e kī atu mo va'ai i rā pepe ki tū kope 'ata ra-rahi era. 'I rā hora he ha'amā koe, he e'a kora'iti 'e he oho koe he noho 'i ruŋa i te pepe hope'a.

¹⁰ »Te tano mau: mo kī atu mo oho ō'ou ki te ŋoŋoro, e noho koe 'i ruŋa i te pepe hope'a o tu'a ki ai ki vari te taŋata era 'ā'ana i kī atu mo oho ki rā ŋoŋoro he kī atu pē nei ē: "E hoa, ka oho mai koe ka noho 'i ruŋa i te pepe mo te nu'u ra-rahi". Pē ira he take'a e te nu'u noho 'i muri i a koe he taŋata hōnui koe. ¹¹ 'Ī a au he kī atu: te kope haka paka i a ia mau 'ā e haka ka-kata 'e e haka ha'amā rō; 'e te kope ta'e haka paka i a ia pe mu'a ka oho ena e haka hōnui rō».

¹² He kī e Ietū ki te hoa hare:

«Mo aŋa ō'ou i te kai, 'ina koe ko kī ki tu'u repahoa, ki tu'u taina, ki tu'u hua'ai 'e ki te nu'u 'ono māhani e koe mo oho atu ki te kai. Mo kī ō'ou ki rā nu'u, pē ira tako'a 'ana a rāua ka kī atu ena mo oho mo kai i te rāua hare. 'E, ka hope'a era, e haka hoki atu 'ana i tu'u rima.

¹³ »Ana aŋa koe i te kai, ko te koa i a koe mo kī ki te nu'u veve, ki te nu'u va'e koke, ki te nu'u hakari ta'e makenu 'e ki te nu'u matapō mo oho atu. ¹⁴ A rāua, pa'i, 'ina e tahi me'e ai mo haka hoki atu. 'E, 'i te ma-

hana ora mai te mate o te nu'u tano ki te mata o te 'Atua, ka 'auhau atu ena 'o te me'e aña ta'ato'a e koe».

He 'a'amu ha'aaura'a o te ʻŋoʻoro nui-nui
(Māteo 22.1-10)

¹⁵ I ʻŋaro'a era i rā vānaña e te taŋata e tahi o ruŋa o tū 'amurama'a era, he kī ki a Ietū:

—ʻKo te koa 'ō i te kope ka kai era 'i te ao haka tere e te 'Atua!

¹⁶ He pāhono e Ietū ki rā kope:

—E tahi taŋata he aña i te ʻŋoʻoro, 'e nu'u rahi te nu'u i kī mo oho. ¹⁷ I tano era te hora o te kai, he uña i te tāvini mo kī ki rā nu'u: “Ka oho mai kōrua; ko rito 'ā te kai”.

¹⁸ »Ta'ato'a nō i kī ai e ai rō 'ana te rāua me'e mo aña. He kī e te kope ra'e: “Ho'o iho nō mai a au e tahi henua, 'e 'i a au he oho he u'i. E kī: 'ina ko riri mō'oku”.

¹⁹ »He kī e te rua: “Ko ho'o mai 'ana a au e ho'e 'ahuru 'uei, 'e 'i he iri he haka 'atu hoki e tano rō 'ā mo 'ārote. E kī: 'ina ko riri mō'oku”.

²⁰ »E he kī e te toru: “Hāipo-ipo iho nō a au; e ko riva mo oho atu”.

²¹ »He hoki rā tāvini he kī i tū me'e ta'ato'a era ki te taŋata uña era i a ia. He riri rō atu 'ai rā taŋata. He kī ia ki tū tāvini era: “Ka e'a koe ka oho a te ara, ka u'i i te nu'u veve, i te nu'u va'e koke, i te nu'u hakari ta'e makenu, 'e i te nu'u matakeva, 'ai ka tari ka oho rō mai”.

²² »I hini era he kī haka 'ou e rā tāvini: “Ko aña 'ana a au i ta'a me'e kī mai, 'e e topa nō 'ā te pepe”.

²³ »He kī haka 'ou e tū taŋata era ki rā tāvini: “Ka oho koe a te ara 'e a 'uta ka haka koni ki te nu'u mo oho mai ki 'i ai tō'oku hare. ²⁴ 'I a au he kī atu: 'ina e tahi o te nu'u kī ra'e era e au mo kai i tā'aku kai”.

Te kope tano mo taŋata hāpī 'a Ietū
(Māteo 10.37-38)

²⁵ E tahi mahana e rahi rō 'ā te nu'u oho 'i tu'a i a Ietū. He rori ia he kī:

²⁶ «Mo ai e tahi o kōrua e oho mai ena ki a au i hau 'i te haŋa ki tō'ona matu'a tane, ki tō'ona matu'a vahine, ki tā'ana vi'e, ki tā'ana ŋā poki, ki tō'ona taina 'e, tako'a, ki a ia mau 'ā ki te haŋa mai ō'ona ki a au, e ko tano mo taŋata hāpī 'ā'aku. ²⁷ 'E te kope ta'e haŋa mo 'amo i tō'ona tātaurō, te aura'a, mo va'ai i a ia ki te mate mo aña i tā'aku me'e haŋa 'e mo oho mai 'i muri i a au, e ko tano tako'a mo taŋata hāpī 'ā'aku.

²⁸ »'I a au he kī atu: mo haŋa e tahi o kōrua mo aña i te hare ruŋa nui e tahi, ʻe ko mana'u hō, 'i ra'e, hoki e tano rō te tara mo aña o rā hare? ²⁹ Mo ta'e aña pē ira, ka ha'amata ka aña era, e ko oti, 'e te nu'u ta'ato'a ka take'a era, he ha'amata he haka me'e-me'e. ³⁰ Pē nei ka kī era: “Te taŋata nei i ha'amata i aña era i te hare, 'ina kai ai te moni mo haka mao”.

³¹ »'E, te 'ariki e tahi mo tama'i ki te rua 'ariki, ʻe ko mana'u hō, 'i ra'e, hoki e tano rō e ho'e 'ahuru ta'utini va'ehau mo tama'i ki te piti 'ahuru ta'utini va'ehau o tū rua 'ariki era? ³² 'E mo ta'e tano mo tama'i ki tū 'ariki era, mai kōnui 'ā ka uña era e te 'ariki ra'e era i te va'ehau mo kī: “ʻE ko riva 'ō te tama'i mo haka kore?”.

³³ »Ko tū me'e 'ā mo kōrua. Mo haŋa o kōrua mo riro he nu'u hāpī 'ā'aku, e mana'u, 'i ra'e, ana tano kōrua mo 'amo i te paŋaha'a. Kope nō ena o roto i a kōrua mo ta'e haka rē i tā'ana me'e haŋa ta'ato'a, e ko tano mo taŋata hāpī 'ā'aku.

He ha'aaura'a o te miti
(Māteo 5.13; Marko 9.50)

³⁴ »Te miti he me'e riva-riva. 'E, mo kore rō o tō'ona maŋeo, 'ina he rāve'a mo haka maŋeo haka 'ou. ³⁵ E ko hauha'a haka 'ou korohaŋa mo 'āno'i ararua ko te 'ō'one mo haka taiko o te me'e 'oka. Te me'e mau nō mo rā miti he hoa ki haho. Te nu'u haŋa mo anji-anji ka haka topa te mana'u».

He taŋata rava'a haka 'ou i tā'ana māmoē
(Māteo 18.10-14)

15 Te [nu'u haka 'auhau i te taŋata hai moni mo te rōmano] 'e tētahi atu nu'u aña i te me'e ta'e tano e haka hāhine rō 'ā ki a Ietū mo haka roŋo i tā'ana vānaña. ² Te [fariseo] 'e te nu'u [ma'ori o te haka tere hūrio] e vānaña ta'e au rō 'ā mo Ietū pē nei ē: «Te me'e haŋa o te kope era he piri ki te nu'u hara 'e he kai 'i muri».

³ He 'a'amu ia e Ietū i te 'a'amu ha'aaura'a nei ki rā nu'u:

⁴ «Mo ai e tahi o kōrua e ai rō 'ana e ho'e hānere māmoē 'e he ʻŋaro e tahi, ʻe ko haka rē hō 'i 'uta i te iva 'ahuru mā iva māmoē mo oho mo kimi i rā māmoē ʻŋaro era? ⁵ 'E, ka rava'a era, he to'o rō atu 'ai te koa, he 'amo ki te tua'ivi he ma'u he oho. ⁶ Ki tu'u ki tō'ona hare, he haka taka-taka i tō'ona repahoa he kī: “Ki koa tātou; ko rava'a haka 'ou mai 'ana e au tū māmoē ʻŋaro era”.

⁷ »'I a au he kī atu: 'ata hau rō atu te koa 'i te raŋi mo te taŋata hara e tahi huri i tō'ona mana'u ki te 'Atua ki te iva 'ahuru mā iva taŋata mana'u e tano rō 'ana a rāua ki te mata o te 'Atua.

He vi'e rava'a haka 'ou i tō'ona tara 'aurī

⁸ »E tahi 'a'amu haka 'ou nei. Mo ai e tahi vi'e e ai rō 'ā e ho'e 'ahuru tara 'aurī 'e he ʻŋaro e tahi, ʻe ko ta'e haka pura hō i te hakari'i mo haka mā'eha 'e 'ai ka purumu 'i te kona ta'ato'a o roto i te hare 'ātā ka rava'a rō rā tara? ⁹ 'E, ka rava'a era, he haka taka-taka i tō'ona repahoa he kī: “Ki koa tātou; ko rava'a haka 'ou mai 'ā e au tū tara 'aurī ʻŋaro era”.

¹⁰ »'I a au he kī atu: pē ira tako'a 'ana ka koa ena te merahi o te 'Atua mo te kope hara huri o te mana'u ki te 'Atua».

He matu'a tane rava'a haka 'ou i tā'ana poki

11 He 'a'amu tako'a e Ietū i te 'a'amu ha'aaaura'a nei:

«E tahi taŋata e rua 'ā'ana poki tane. 12 He kī e te poki haŋupotu: “E koro, ka vahi te hauha'a ena ō'ou mo māua 'e 'ai ka va'ai rō mai te 'apa era mō'oku”. He vahi-vahi ia e rā taŋata ki tū ŋā poki era.

13 »Kai rahi hia te mahana, he ho'o e te poki haŋupotu i tō'ona hauha'a, 'e hai rā moni i oho ai ki te rua henua. 'I ira i noho i tākere tahi ai ki te me'e ta'e tano.

14 »Ka pau te moni o rā poki, ka topa 'i rā henua te 'ati nui-nui, he kai kore. He ha'amata tū poki era he maruaki. 15 He oho he no-no'i hai aŋa ki te taŋata e tahi o tū kona era. He uŋa e rā taŋata ki 'uta mo hāpa'o i te oru. 16 'E, 'i te ta'e va'ai e te nu'u o ira hai kai, he pohe mo kai i te kai o te oru.

17 »I oho era he mana'u: “ĴE topa nō 'ana te kai o te nu'u haka aŋa o tō'oku matu'a tane, 'e 'ī a au 'i nei e mate atu ena 'i te maruaki! 18 'Ī a au he hoki ki te hare o tō'oku matu'a, 'e pē nei a au ka kī nei: 'E koro ō'oku ē, ko hara 'ana a au ki te 'Atua 'e ki a koe tako'a. 19 E ko tano haka 'ou a au mo raŋi mai ō'ou: e poki 'ā'aku ē. Hora nei ka haka tu'u koe i a au pa he taŋata aŋa nō e tahi”. 20 Pē ira, he hoki he oho ki te hare o tō'ona matu'a tane.

»I kōnui era 'ā i take'a ai e tū taŋata matu'a era ka pū mai tū poki era 'ā'ana, 'e he haka 'aroha rō atu 'ai. He veu he oho, he ha'i, 'ai ka hoŋi. 21 He kī e tū poki era: “E koro ō'oku ē, ko hara 'ana a au ki te 'Atua 'e ki a koe tako'a. E ko tano haka 'ou a au mo raŋi mai ō'ou: e poki 'ā'aku ē”.

22 »I rā hora mau 'ā he kī e rā matu'a ki tō'ona tāvini: “Ka hōrou, ka ma'u mai te kahu hope'a o te riva-riva 'ai ka haka uru rō; ka huki tako'a e tahi tāpe'a ki te rima 'e 'ai ka haka uru rō hai kiriva'e. 23 Ka ma'u mai te tēnero hope'a o te porio ka tiŋa'i. 'Ī tātou he aŋa i te ŋoŋoro. 24 Tā'aku poki nei, pa'i, i tu'u rō pa he me'e ko mate 'ā 'e 'ī ko ora haka 'ou mai 'ana; ko ŋaro 'ā 'e 'ī ko rava'a haka 'ou mai 'ana”.

»E he ha'amata rō 'ai te ŋoŋoro.

25 »Ī ia tū taina 'atariki era 'i 'uta. I hoki i turu era, he ŋaro'a i te peho 'e i te taŋata e koa 'ana 'i te kona hare era. 26 He raŋi ki te tāvini e tahi he 'ui: “ĴO te aha te me'e era?”.

27 »He kī e tū tāvini era: “Ko tu'u haka 'ou mai 'ana tu'u taina. Ko haka tiŋa'i 'ā e tu'u matu'a i te tēnero hope'a o te porio 'o te tu'u haka 'ou mai ō'ona e riva-riva nō 'ā”.

28 »He riri rō atu 'ai tū taina 'atariki era, 'e 'ina kai haŋa mo uru. He e'a te taŋata matu'a he ani mo uru. 29 He kī e tū poki 'atariki era: “E koro, ka hia ō'oku matahiti e aŋa nō atu ena, 'ina kai pāto'i atu 'ā, 'e kai va'ai mai 'ana koe korohaŋa e tahi vato-vato mo aŋa o te ŋoŋoro ananake mātou ko tō'oku repahoa. 30 'E 'i te hora nei, ko tu'u mai 'ā ta'a poki tākere era i tu'u moni ki te tai'o, he to'o mai e koe he haka tiŋa'i i te tēnero hope'a o te porio”.

31 »He kī e tū matu'a tane era: “E haŋu, a koe 'i muri i a au 'ā e noho ena, 'e te me'e ta'ato'a nei ō'oku ō'ou.

32 E tano nō 'ā i aŋa nei i te ŋoŋoro mo koa o tātou 'o te hoki haka 'ou mai o tu'u taina. A ia i tu'u rō pa he me'e ko mate 'ā 'e 'ī ko ora haka 'ou mai 'ana; ko ŋaro 'ā 'e 'ī ko rava'a haka 'ou mai 'ana”.

He tāvini hāpa'o hauha'a o te taŋata 'ono

16 He 'a'amu tako'a e Ietū i te 'a'amu ha'aaaura'a nei ki tā'ana nu'u hāpī:

«He taŋata 'ono e tahi e ai rō 'ana ō'ona tāvini he pū'oko haka tere o tō'ona hauha'a. He kī e te nu'u: “Tu'u tāvini haka tere hauha'a e tākere rō 'ana i tu'u hauha'a”.

2 »He uŋa e rā taŋata ki tū tāvini era mo oho 'e he 'ui: “ĴHe aha te me'e kī mai nei e te nu'u o ruŋa ō'ou? Ka haka 'ite tahi mai pē hē koe i haka tere ai i tō'oku hauha'a. E ko aŋa haka 'ou e koe i te aŋa era”.

3 »He noho ia rā tāvini he mana'u: “ĴHe aha tā'aku me'e ka aŋa nei ka haka e'a nei i a au mai te aŋa? 'Īna ō'oku haŋu toe mo aŋa i te aŋa paŋaha'a, 'e he ha'amā au mo oho mo no'i-no'i. 4 'Ā! Ko 'ite 'ana 'ō a au 'i te hora nei he aha tā'aku me'e mo aŋa ki ai ai te nu'u mo to'o i a au ki te rāua hare ka haka e'a ena i a au mai te aŋa”.

5 »He ha'amata he kī mo oho ki a ia e tahi e tahi o te nu'u e ai rō 'ana te rāua tārahu mo tū taŋata 'ono era. He 'ui ki te kope ra'e: “ĴE hia u'u tārahu mo te kope haka aŋa mai nei i a au?”. 6 He pāhono e tū kope era: “E tahi hānere tura mōrī”. He kī e tū tāvini era: “'Ī tu'u parau tārahu 'ī a'a. Ka noho koe, ka aŋa mai e tahi parau haka 'ou mo te pae 'ahuru nō tura mōrī”.

7 »He 'ui ki te rua: “E a koe, Ĵe hia u'u tārahu?”. He pāhono e tū rua kope era: “E ho'e hānere pūtē tariko”. He kī e tū tāvini era: “'Ī tu'u parau tārahu 'ī a'a. Ka aŋa mai e tahi parau haka 'ou mo te va'u 'ahuru nō pūtē”.

8 »I 'ite era i rā me'e e tū taŋata 'ono era he kī: “ĴKo te mārāma-rama i te kope aŋa i te me'e tu'u pē rā!”.

He kī haka 'ou e Ietū:

«He aŋi 'ā, 'ata hau 'i te 'ite te nu'u ta'e [haka moe i te mana'u] 'i ruŋa i te 'Atua mo aŋa i te me'e mo te rāua riva-riva ki te nu'u haka moe i te mana'u 'i ruŋa i te 'Atua. 9 'O ira 'ī a au he kī atu: te hauha'a o kōrua o te nu'u haka moe i te mana'u 'i ruŋa i te 'Atua e va'ai mo hā'ū'ū ki te rua ki ai ai te kōrua repahoa 'i te ao nei, 'e ki ai ai, 'i te hora o te kōrua mate, te kōrua repahoa 'i te raŋi mo to'o i a kōrua.

10 »Te kope aŋa tī-tika i te aŋa 'iti-'iti, pē ira 'ā ka aŋa tī-tika era i te aŋa nui-nui; 'e te kope ta'e aŋa tī-tika i te aŋa 'iti-'iti, pē ira 'ā ka ta'e aŋa tī-tika era i te aŋa nui-nui. 11 Mo ta'e aŋa tī-tika o kōrua i te hauha'a o te ao nei, Ĵko ai ia te me'e mo va'ai atu mo aŋa e kōrua i te hauha'a parauti'a o te raŋi? 12 'E mo ta'e hāpa'o riva-riva o kōrua i te me'e o te rua kope, Ĵko ai ia te me'e mo va'ai atu i te hauha'a mo kōrua?

¹³ »Te taŋata e tahi e ko riva mo tāvini ki te kope e rua; ki te kope e tahi ka haŋa era 'e ki te rua ka riri era. He ha'atura ki te kope e tahi 'e ki te rua e ko ha'atura. Te aura'a: e ko tano kōrua mo tāvini ki te 'Atua 'e ki te moni».

¹⁴ I ŋaro'a era i tū me'e ta'ato'a era e te [fariseo], he nu'u nou-nou moni, he haka ka-kata i a Ietū. ¹⁵ He kī e Ietū ki rā nu'u:

«A kōrua e haka take'a ena ki te taŋata he nu'u aŋa i te me'e tī-tika. Ka ai atu pē ira, te 'Atua ko 'ite riva-riva 'ā i te huru o te kōrua mana'u. E rahi rō 'ā, pa'i, te me'e, ki te mana'u taŋata, he me'e hope'a o te riva-riva, 'e ki te mata o te 'Atua, he me'e hope'a o te rake-rake.

He roŋo 'e he haka tere iŋa 'āpī o te 'Atua

¹⁶ »Hai roŋo o te 'Atua pāpa'i e [Mōtē] 'e e te perofeta te taŋata e haka tere era i a rāua 'ātā ki te hora o Iovani Papatito. Mai rā hora e haka 'ite e oho nei i te parau 'āpī riva-riva o ruŋa o te [haka tere iŋa 'āpī o te 'Atua], 'e nu'u rahi te nu'u haŋa mo o'o o rāua ki roto o rā haka tere iŋa 'e mo haka tere i a rāua e te 'Atua.

¹⁷ »Ka ai atu pē ira, 'i ra'e te raŋi 'e te henua ana ŋaro, ki te ŋaro o te vānaŋa hope'a o te 'iti-'iti o ruŋa o te roŋo o te 'Atua pāpa'i e Mōtē.

O ruŋa i te nu'u ha'ata'a
(Māteo 19.1-12; Marko 10.1-12)

¹⁸ »He ha'aura'a nei e tahi: mo ha'ata'a o te taŋata mai tā'ana vi'e [hāipo-ipo] 'e he hāipo-ipo ki te rua, e tai'ata 'ana. E tai'ata tako'a 'ana te taŋata hāipo-ipo ki te vi'e ha'ata'a.

Te taŋata 'ono 'e te taŋata veve

¹⁹ »E ai rō 'ā e tahi taŋata 'ono; e uru era hai kahu hope'a o te riva-riva. Paurō te mahana e aŋa era i te ŋoŋoro nui-nui. ²⁰ E ai tako'a rō 'ana e tahi taŋata veve te 'iŋoa ko Rātaro, tō'ona hakari e 'i rō 'ana e te 'eka-'eka, 'e 'i haho o te 'ōpani o te hare o tū taŋata 'ono era e haka rē era e tō'ona repahoa. ²¹ Te haŋa o rā veve he kai i te pārehe-rehe me'e vī-viri mai ruŋa i te 'amurama'a o tū taŋata era. 'E te paiheŋa te aŋa he oho nō he amo-amo i tō'ona 'eka-'eka.

²²⁻²³ »He tu'u ki te mahana e tahi he mate tū 'ōtare era, he ma'u e te merahi ki te raŋi ki muri i a [Aparahama]. He mate tako'a tū taŋata 'ono era. He ma'u he tanu, 'e 'i roto i te pō'auahi i hope'a ai. 'E mai roto i rā 'ati i hāru i ai te mata, he u'i ko 'Aparahama 'i kōnui era, 'e 'i muri e noho rō 'ā a Rātaro.

²⁴ »He raŋi ia: “E koro ko 'Aparahama ē, ka haka 'aroha koe i a au. Ka uŋa a Rātaro ka haka rari i te potu o tō'ona maŋa-maŋa rima hai vai mo haka take'o i tō'oku 'arero; 'i a au e 'ati atu ena 'i roto i te ahi nei”.

²⁵ »He pāhono e 'Aparahama: “E mana'u koe, e haŋu ē: ko koe te me'e riva-riva 'i te hora e ora nō 'ā, 'e ko Rātaro te me'e noho rake-rake. 'I te hora nei ko ia te

me'e riva-riva, 'e ko koe 'i roto i te rake-rake. ²⁶ 'E ta'e nō 'ō 'o ira, e ai tako'a rō 'ana 'i vāeŋa o tātou e tahi vaha nui-nui e ha'ata'a ena i a kōrua mai i a mātou. E ko tu'u atu te nu'u mo oho atu ki nā, 'e mai nā ki nei”.

²⁷ »He ani e rā 'ono: “E koro ko 'Aparahama ē, ka uŋa ia koe i a Rātaro ki te hare o tō'oku matu'a tane ²⁸ mo haka 'ite ki tō'oku taina hoko rima o ruŋa i te 'ati nei o'oku 'i roto i te pō'auahi, ki haka riva-riva ai i te rāua māhatu, 'o tu'u tako'a mai ki te kona nei”.

²⁹ He kī e 'Aparahama: “Te me'e pāpa'i e Mōtē 'e e te perofeta e tai'o rō 'ā 'i roto i te hare pure paurō te [mahana haka ora]: je haka roŋo 'e 'ai ka ha'atura rō!”.

³⁰ »He pāhono e tū 'ono era: “E ko tano pē ira, e koro ē. Mo oho e tahi taŋata e ora haka 'ou mai te mate mo vānaŋa ki a rāua, he haka roŋo 'e he [huri te mana'u ki te 'Atua]”.

³¹ »He kī e 'Aparahama: “Mo ta'e haka roŋo 'e mo ta'e ha'atura i te me'e pāpa'i e Mōtē 'e e te perofeta, pē ira 'ā ka ta'e haka roŋo tako'a era ka ai atu he ora haka 'ou te taŋata mai te mate”».

E u'i kōrua 'o hara
(Māteo 18.6-7,21-22; Marko 9.42)

17 He kī e Ietū ki tā'ana nu'u hāpī:

«I te ao nei e ko ta'e ai te me'e mo uŋa i te taŋata a roto i te hara; 'e, jko te 'aroha 'i te kope haka hara i te rua! ² Te ūtu'a o te 'Atua mo te taŋata haka hara i te kope ta'e pūai rahi o te haka moe iŋa i tō'ona mana'u 'i ruŋa i a au he ūtu'a 'ata taparahi-ta'ata ki te ūtu'a he here hai mā'ea paŋaha'a ki te ŋao 'ai ka hoa ki roto i te vaikava. ³ 'i'O ira, e u'i kōrua!

»Mo hara o tu'u taina, e ture; 'e mo haka roŋo atu 'e mo haka tapa mai roto, e haka rehu tō'ona hara. ⁴ Ka ai atu 'i te mahana mau nō e tahi e hitu hara iŋa atu o'ona, 'e e hitu kī iŋa atu e ko aŋa haka 'ou e ia, e haka rehu tahi koe».

Te pūai o te me'e he [haka moe i te mana'u] 'i ruŋa i te 'Atua

⁵ He ani ia e te [āpōtoro] ki a Ietū mo haka pūai i te rāua haka moe iŋa i te mana'u 'i ruŋa i te 'Atua. ⁶ He pāhono e Ietū:

«'Āhani te kōrua haka moe iŋa o te mana'u 'i ruŋa i te 'Atua korohaŋa pa he 'iti-'iti ena 'ā o te karu mostasa, e tano nō kōrua mo kī ki te tumu nei: “Ka o'i tu'u aka, 'ai ka oho ka 'oka rō 'i roto i te vaikava”, 'e he ha'atura atu.

He tāvini iŋa ki te 'Atua

⁷ »Mo ai e tahi o roto o kōrua e ai rō 'ana tō'ona tāvini e hoki mai 'ā mai 'uta mai te 'ārote iŋa 'o mai te hāpa'o iŋa i te māmo'e, ze kī mau rō ki rā tāvini: “Ka uru mai ka noho, ki ao atu tā'au o te kai”? ⁸ E ko kī pē ira. Pē nei ka kī era: “Ka uru ka tunu mai tā'aku o te kai. E kai 'ana a au, e tiaki 'iti-'iti mai koi'ite e ai nō 'ā tā'aku me'e haŋa. Ki oti koe ana kai”. ⁹ 'E rā taŋata 'ina he

māuru-uru ki te tāvini; he aŋa mau 'ā, pa'i, o te tāvini.

¹⁰ »Pē ira tako'a 'ā mo kōrua. Ka oti ena te aŋa ta'ato'a kī atu e te 'Atua mo aŋa, e mana'u kōrua: "A mā-tou he tāvini. Te me'e mau nō o mātou i aŋa he ha'atua-ra 'e he aŋa i te me'e kī mai e ia; 'o te aha nō ana māuru-uru mai"».

He nāŋata e ho'e 'ahuru māui-ui 'i te rēpera

¹¹ 'I te ara oho o Ietū ki Hērutarema i vari ai a te tīta'a henua vahi i Karirema mai [Tāmāria]. ¹² I tu'u era ki te kona e tahi, he haka hāhine e ho'e 'ahuru taŋata māui-ui 'i te rēpera, 'e mai kōnui ¹³ i ohu ai:

—E Ietū, e te Ma'ori ē, ka haka 'aroha koe i a mātou!

¹⁴ I take'a era e Ietū, he kī:

—Ka oho ka haka take'a i a kōrua ki te [oromatu'a].

E oho nō 'ā tū nu'u rēpera era he ora rō 'ai te rāua māui-ui. ¹⁵ E tahi o rā nu'u, i take'a era ko ora 'ā a ia, he hoki he oho koia ko te ha'ahana-hana i te 'Atua hai re'o pūai. ¹⁶ He tū-turi 'i mu'a o Ietū, he noi 'ātā ka puā rō te tira ki ruŋa i te 'ō'one mo māuru-uru. Rā taŋata o Tāmāria.

¹⁷ He kī e Ietū: «E ho'e 'ahuru kope i haka ora e au. ĶHē ia te tētahi nu'u era? ¹⁸ O rā nā nu'u, Ķhe taŋata kē nō nei i hoki mai ha'amuri ki te 'Atua?».

¹⁹ He kī ia e Ietū ki tū taŋata era: «Ka e'a koe ki ruŋa ka oho. 'I te haka moe ō'ou i te mana'u 'i ruŋa i te 'Atua i ora ena tu'u māui-ui».

ĶA hē ka ha'amata te [haka tere iŋa 'āpī o te 'Atua]?
(Māteo 24.23-28,36-41)

²⁰ He 'ui e te nu'u [fāriseo] ki a Ietū:

—ĶA hē ka ha'amata te haka tere iŋa 'āpī o te 'Atua vānaŋa mai e koe?

He pāhono e Ietū:

—Te tu'u iŋa mai o te haka tere iŋa 'āpī o te 'Atua ta'e he me'e mo take'a e te mata. ²¹ E ko kī atu pē nei ē: "Ķ a'a" 'o "Ķ ai rā"; te haka tere iŋa 'āpī o te 'Atua nā ko ai era 'ā 'i roto i te māhatu o te taŋata.

²² He kī ki tā'ana nu'u hāpī:

«Nā e tu'u rō te mahana e topa rō te 'ati taparahi-ta'ata, 'e a kōrua e pohe rō mo noho 'i muri i te [Poki o te taŋata] ka ai atu mo te mahana nō e tahi. 'E, 'i rā hora, e ko tano vave kōrua mo noho 'i muri i a ia. ²³ Tē-tahi e kī rō pē nei ē: "Ķ te Poki o te taŋata 'i a'a 'o 'ai rā". E u'i kōrua 'o haka roŋo rō. ²⁴ Pa he mā'eha iŋa o te 'uira e take'a ena e te taŋata 'i te kona ta'ato'a, pē ira ka take'a ena e te nu'u te hoki iŋa mai o te Poki o te taŋata. ²⁵ Ka ai atu pē ira, 'i ra'e te Poki o te taŋata ka 'amo ena i te 'ati 'e i te mamae 'i roto i tō'ona māhatu, he ta'e haŋa e te nu'u o te hora nei.

²⁶ »E te noho iŋa o te taŋata 'i te nā mahana era ko hāhine 'ā mo hoki mai o te Poki o te taŋata, pa he noho iŋa 'ā o te nu'u 'i te hora o Nōē. ²⁷ E kai nō 'ana, e unu nō 'ā 'e e [hāipo-ipo] nō 'ana te taŋata i tano rō ai te hora o Nōē mo uru ki roto i te pahī, 'e he ha'amata he hoa te 'ua 'e he mā-mate tahi rō 'ai.

²⁸ »Pē ira tako'a 'ā te noho iŋa o te nu'u 'i te hora o [Rota]: e kai 'ā, e unu 'ā, e ho'o 'ā, e ho'o mai 'ā, e 'oka 'ā i te kai 'e e aŋa 'ana i te hare. ²⁹ 'E, i e'a era a Rota mai [Tōroma], he hoa mai mai te raŋi te ahi 'e te *azufre*, 'e he mā-mate tahi rō 'ai te nu'u o ira.

³⁰ »Pē ira tako'a 'ā 'i te mahana ka tu'u haka 'ou mai ena te Poki o te taŋata. ³¹ 'I rā mahana te kope 'i haho o te hare, e u'i 'o hoki ki roto ki te me'e to'o mai; 'e te kope aŋa 'i 'uta, e u'i 'o hoki ki tō'ona hare. ³² E mana'u ki te me'e topa ki te vi'e 'a Rota, hora u'i era a tu'a.

³³ »Ķ a au he kī atu: te kope hāru i a au 'e i tā'aku hāpī hai tua'ivi mo hāpa'o i a ia 'o mate 'e mo aŋa i tā'ana me'e nō era i haŋa, e ko ai i a ia te ora 'āpī 'ina he hope'a ra'a va'ai e te 'Atua. 'E, te kope haka rē i tā'ana me'e haŋa mo ha'atura mai ki a au, he rava'a e ia rā ora.

³⁴ »Ķ a au he kī haka 'ou atu: 'i rā pō, o te kope e rua 'i ruŋa i tū ro'i 'ā, e tahi ka to'o ena, e tahi ka haka rē ena. ³⁵ 'E o te vi'e e rua e oro 'ana i te tariko mo te haraoa mata, e tahi ka to'o ena, e tahi ka haka rē ena. [36 'E o te taŋata e rua aŋa 'i 'uta, e tahi ka to'o ena, e tahi ka haka rē ena.]»

³⁷ He 'ui ia ki a Ietū:

—ĶI hē te me'e ena ka topa ena?

He pāhono e Ietū:

—E 'ite nei e tātou i te kona ai o te me'e mate hai taka-taka 'i rā kona o te manu kai i te me'e mate. Pē ira ka 'ite tako'a ena ko hāhine 'ā te hoki iŋa mai o te Poki o te taŋata hai topa iŋa o te nā me'e ta'ato'a nei.

He vi'e hove 'e he pū'oko haka tere o te hare ture

18 Hai 'a'amu ha'aa'ura'a i hāpī ai e Ietū ki te nu'u mo pure mo oho ki te 'Atua 'e mo ta'e haka hōriŋa. ² He kī:

«E ai rō 'ana te taŋata pū'oko haka tere o te hare ture o te kona e tahi, 'ina he mo'a i te 'Atua, 'e 'ina he haŋa ki te taŋata. ³ 'I rā kona tako'a te vi'e hove e tahi horo i tā'ana ture ki rā taŋata mo u'i i te rāve'a mo haka ūtu'a i te kope ararua i ture ai.

⁴ »Me'e rahi te mahana o rā vi'e i oho mo vānaŋa ki rā taŋata, 'e 'ina he haŋa mo haka roŋo i tā'ana ture. He mana'u ia e rā taŋata: "Kope ta'e mo'a a au i te 'Atua 'e ta'e haŋa ki te taŋata. ⁵ Ka ai atu pē ira, 'i te ta'e haka rē i a au e te vi'e nei, 'i a au he hā'ū'ū 'o hoki mai 'o haka nāru-ruru nō mai i tō'oku pū'oko"».

⁶ He kī e Ietū:

«Ka haka topa rā kōrua i te mana'u ki te pū'oko haka tere ta'e tano era o te hare ture. ⁷ Mo ai pē ira e mana'u era, ζe ko hā'ū'ū hō te 'Atua ki te nu'u ha'ata'a e ia mā'ana pure ki a ia paurō te mahana? ζE haka tiaki mau rō e te 'Atua? ⁸ 'Ī a au he kī atu: e ko roa he hā'ū'ū. 'E, hora era o te [Poki o te taŋata] ka tu'u haka 'ou mai ena, ζe ai nō 'ana hō te taŋata [haka moe i te mana'u] 'i ruŋa i te 'Atua?».

He pure iŋa o te kope hoko rua

⁹ He 'a'amu tako'a e Ietū i te 'a'amu ha'aura'a nei mo te nu'u mana'u ko rāua nō te nu'u aŋa i te me'e tī-tika ki te mata o te 'Atua 'e te tētahi nu'u 'ina:

¹⁰ «He oho e rua taŋata he pure 'i te Kona Ha'amuri 'Atua: e tahi he [fariseo], 'e te rua he taŋata haka 'auhau i te nu'u hai moni mo te rōmano.

¹¹ »He māroa rā fariseo he pure a roto i a ia 'ā: “E te 'Atua ē, he māuru-uru atu a au 'o te ta'e ai ō'oku pa he tētahi nu'u: he toke-toke, he taparahi-ta'ata, he tai'ata; 'e, tako'a, 'o te ta'e ai ō'oku pa he taŋata era ai, haka 'auhau i te nu'u hai moni mo te rōmano. ¹² A au e tapu rō 'ana i te kai e rua mahana 'i te tāpati 'e e ha'ata'a rō 'ana e tahi tara mō'ou o roto o te ho'e 'ahuru tara 'auhau mai o tā'aku aŋa, pa he me'e kī e [Mōtē]”.

¹³ »E tū kope haka 'auhau moni era mo te rōmano, i haka 'ava-'ava i māroa ai 'e a raro 'ā te mata e u'i era, he tiŋi-tiŋi koro'iti i tō'ona uma koia ko kī: “ζE te 'Atua ē! ζKa haka 'aroha mai koe; he taŋata hara a au!”.

¹⁴ »Ī a au he kī atu: te taŋata haka 'auhau era i te nu'u hai moni mo te rōmano, i hoki era ki tō'ona hare, ko haka kore tahi 'ana e te 'Atua i tō'ona hara, 'e te taŋata fariseo era, kai haka kore e te 'Atua i te hara. Te taŋata haka paka i a ia, pe mu'a ka oho ena, e haka kakata 'e e haka ha'amā rō; 'e te taŋata ta'e haka paka i a ia, pe mu'a ka oho ena, e haka hōnui rō».

He ha'amaitai iŋa o Ietū i te nā poki

(Māteo 19.13-15; Marko 10.13-16)

¹⁵ 'I te mahana e tahi he ma'u e te nu'u i te nā poki mo ha'amaitai e Ietū. I take'a era e te nu'u hāpī 'ā'ana, he ture ki rā nu'u. ¹⁶ He raŋi e Ietū ki tū nā poki era mo oho, 'e he kī ki tā'ana nu'u hāpī:

«Ka haka rē kōrua i te nā poki mo oho mai ki a au. Te [haka tere iŋa 'āpī o te 'Atua] mo te nu'u pa he nā poki. ¹⁷ 'Ī a au he kī atu: te kope ta'e haka rē mo haka tika i a ia e te 'Atua pa he haka rē iŋa o te nā poki mo haka tika i a rāua e te rua, e ko o'o ki roto i te haka tere iŋa 'āpī ō'ona».

Ko Ietū 'e he kope 'ono e tahi

(Māteo 19.16-30; Marko 10.17-31)

¹⁸ He 'ui e te taŋata ra-rahi [hūrio] e tahi ki a Ietū:

—E te Ma'ori riva ē, ζhe aha tā'aku me'e mo aŋa mo rava'a i te ora 'āpī 'ina he hope'a ra'a va'ai e te 'Atua?

¹⁹ He pāhono e Ietū:

—ζHe aha koe e kī mai ena he taŋata riva a au? E tahi mau nō kope riva: he 'Atua. ²⁰ A koe ko 'ite 'ana i tā'ana roŋo: 'Ina ko tai'ata, 'ina ko mate te taŋata i a koe, 'ina ko toke, 'ina ko reo-reo 'e e mo'a te matu'a tane 'e te matu'a vahine.

²¹ He kī e rā taŋata:

—Te nā me'e ta'ato'a ena ko aŋa ko oho mai era 'ā e au mai tō'oku 'āpī iŋa 'ana.

²² I ŋaro'a era e Ietū, he kī:

—E tahi a'a me'e toe mo aŋa: ka oho ka ho'o tahi tu'u hauha'a, 'e 'ai ka va'ai rō te moni mo te nu'u veve. Pē ira he ai tu'u hauha'a 'i ruŋa i te raŋi. 'E 'ai koe ka oho iho mai 'i muri i a au mo taŋata hāpī 'ā'aku.

²³ I ŋaro'a era i rā vānaŋa, he māui-ui te māhatu 'e he haka kiva-kiva 'i te rahī o tō'ona 'ono.

²⁴ I take'a era e Ietū ko haka kiva-kiva 'ā, he kī:

—ζKo te aŋa ri'a-ri'a 'ō mo te nu'u 'ono mo o'o ki roto i te haka tere iŋa 'āpī o te 'Atua! ²⁵ I hau rō atu 'i te aŋarahi mo te taŋata 'ono mo haka rē i a ia mo haka tere e te 'Atua ki te o'o o te kameio a roto i te mata o te ivi.

²⁶ Te nu'u ŋaro'a i rā me'e he 'ui ki a Ietū:

—Mo ai pē ira, ζko ai ia te me'e mo e'a mai roto i te ūtu'a o te hara 'e mo rava'a i te ora 'āpī 'ina he hope'a ra'a va'ai e te 'Atua?

²⁷ He pāhono e Ietū:

—E ko rava'a, ki te hora hope'a, e te kope e tahi mo haka e'a i a ia mau 'ā mai roto i te ūtu'a o te hara. Mo te 'Atua mau nō e haka e'a. 'Ina, pa'i, e tahi me'e mo ta'e rava'a e ia mo aŋa.

²⁸ He kī e Pētero:

—E Ietū, ko haka rē tahi 'ana a mātou i te mātou me'e 'e ko oho atu 'ā 'i muri i a koe.

²⁹ He pāhono e Ietū:

—Ī a au he kī atu: te nu'u haka rē i te hare, i te vi'e, i te taina, matu'a 'o nā poki mo tāvini ki te 'Atua, ³⁰ 'ata rahī te me'e mo va'ai e te 'Atua 'i te ao nei 'e, pe mu'a ka oho ena, he va'ai i te ora 'āpī 'ina he hope'a ra'a.

He toru haka 'ite iŋa o Ietū i tō'ona mate

(Māteo 20.17-19; Marko 10.32-34)

³¹ He to'o ia e Ietū i tā'ana nu'u hāpī, he haka tapa koia ko kī: «Nā ko 'ite 'ā e kōrua: 'Ī tātou e oho 'ana ki Hērutarema. 'Ī ira ka topa tahi ena te me'e pāpa'i e te

perofeta o ruŋa o te Poki o te taŋata. ³² E va'ai rō i a ia ki te rima o te nu'u ta'e he hūrio, e haka ka-kata rō, e vā-vā rō 'e e 'anu-'anu rō. ³³ E tiŋa'i rō hai 'uaka 'e e tiŋa'i e haka mate rō; 'e, 'i te toru mahana, he ora haka 'ou».

³⁴ E tū nu'u era 'ina he aŋi-aŋi, 'e 'ina he 'ite he aha te me'e e vānaŋa era e Ietū; rā me'e he me'e mo ta'e aŋi-aŋi vave e rāua 'i rā hora.

He haka ora iŋa o Ietū i te taŋata matapō

(Māteo 20.29-34; Marko 10.46-52)

³⁵ I hāhine era a Ietū ki te kona e tahi te 'iŋoa ko Herikō, 'i te ara te taŋata matapō e tahi e noho rō 'ā e no-no'i 'ana hai moni. ³⁶ I ŋaro'a era i te rahi o te taŋata, he 'ui he aha te aura'a o rā me'e. ³⁷ He pāhono e te nu'u:

—Ko Ietū era o Nātāreta e vari 'ana a nei.

³⁸ He ohu ia e tū taŋata matapō era: «jE Ietū, e te Hakaara o [Tāvita] ē, ka haka 'aroha koe i a au!».

³⁹ He ture e te nu'u o mu'a mo mou, 'e 'ai rā taŋata e 'ata ohu pūai era: «jE te Hakaara o Tāvita ē, ka haka 'aroha koe i a au!».

⁴⁰ He noho a Ietū 'e he uŋa mo ma'u i tū taŋata era. I puā era rā taŋata he 'ui:

⁴¹ —jHe aha ta'a me'e haŋa mo aŋa atu e au?

He pāhono e tū taŋata matapō era:

—E Ietū, e haŋa rō 'ana a au mo ora o tō'oku mata.

⁴² He kī e Ietū:

—jNā he ora tu'u mata 'o te haka moe ō'ou i te man-a'u 'i ruŋa i te 'Atua!

⁴³ 'I tū hora mau era 'ā he ora rō 'ai te mata o tū taŋata era. He oho ia 'i muri i a Ietū koia ko ha'ahana-hana ki te 'Atua. Te nu'u ta'ato'a take'a i tū me'e era he ha'ahana-hana tako'a ki te 'Atua.

He piri iŋa o Tākeo ki a Ietū

19 I tu'u era a Ietū ki Herikō, he uru he oho a ira.

² 'I rā kona e noho era te taŋata 'ono e tahi te 'iŋoa ko Tākeo, he pū'oko haka tere o te [nu'u haka 'auhau i te taŋata hai moni mo te rōmano]. ³ Rā taŋata e haŋa rō 'ana mo take'a i a Ietū 'e, 'i tō'ona poto-poto 'e 'i te rahi o te taŋata, 'ina he take'a e oŋa e u'i era. ⁴ 'O ira i tahuti i oho ai a mu'a, he eke ki ruŋa i te tumu pika o te tapa o te ara o te kona a ira ka vari era a Ietū.

⁵ 'I vari era a ira, he hira a ruŋa he u'i 'e he kī e Ietū: «E Tākeo, ka topa koe mai ruŋa ena. 'Arīnā 'i tu'u hare a au ka noho ena».

⁶ 'I tū hora 'ā he topa a Tākeo, ko to'o atu 'ā te koa, he ma'u he oho i a Ietū.

⁷ 'I take'a era e te taŋata, he ha'amata he hēŋu'i-ŋu'i o ruŋa i a Ietū pē nei ē: «Ko oho 'ā noho 'i te hare o te taŋata hara».

⁸ 'E, 'i te kona hare era, he e'a a Tākeo ki ruŋa he kī ki a Ietū:

—jKo 'ite 'ā koe? 'Ī a au he vahi a vāeŋa i tō'oku hauha'a ta'ato'a, 'e he va'ai e tahi pā'iŋa ki te nu'u veve. 'E mo ai, hora haka 'auhau era e au i te nu'u hai moni mo te rōmano i 'ata haka 'auhau rō ki rava'a tako'a mai ai tō'oku, hora nei he haka hoki e au e hā tara mo te tara ka tahi toke e au.

⁹ He kī e Ietū:

—'I 'aŋarīnā te nu'u o te hare nei i e'a ai mai roto i te ūtu'a o te hara 'e i rava'a ai i te ora 'āpī 'ina he hope'a ra'a va'ai e te 'Atua; te taŋata nei, 'i te huri 'e 'i te haka moe i tō'ona mana'u 'i ruŋa i te 'Atua, i haka take'a mai ai he hakaara mau 'ā o ['Aparahama]. ¹⁰ Te [Poki o te taŋata], pa'i, i oho mai ai mo kimi i te taŋata oho a te ara ta'e tano mo haka huri i te mana'u ki te 'Atua, ki e'a ai mai roto i te ūtu'a o te hara 'e ki rava'a ai i te ora 'āpī 'ina he hope'a ra'a.

He 'a'amu ha'aura'a o te tāvini riva-riva

(Māteo 25.14-30)

¹¹ 'I te hāhine ia o Ietū ki Hērutarema, 'e 'i te mana'u o te nu'u era e haka roŋo era ki a ia pē nei ē: te [haka tere iŋa 'āpī o te 'Atua] nā he topa, he 'a'amu e Ietū i te 'a'amu ha'aura'a nei. ¹² He kī:

«E ai rō 'ā te taŋata hōnui e tahi ko oho 'ā ki te henua roa-roa mo haka 'ariki 'e 'ai ka hoki mai. ¹³ 'I ra'e ki te oho, he uŋa ki tō'ona tāvini e ho'e 'ahuru mo oho ki a ia, 'e he va'ai me'e rahi moni e tahi e tahi o rā ŋā tāvini 'e he kī: “E u'i te rāve'a mo haka aŋa i te moni ena 'ātā ki tō'oku hoki iŋa mai”.

¹⁴ »Te nu'u o rā henua 'ina he haŋa ki rā taŋata. He uŋa ia 'i tu'a 'ā i te nu'u mo kī ki te kope mā'ana e haka 'ariki: “Kai haŋa a mātou ki te taŋata ena mo 'ariki o mātou”.

¹⁵ »I haka 'ariki nō i tū taŋata era, 'e he hoki ki tō'ona henua. I tu'u era he uŋa mo oho o tū nu'u tāvini era mo 'ite e hia moni i rava'a o tū moni va'ai era.

¹⁶ »He tu'u te kope ra'e, he kī: “E te 'ariki, o te moni va'ai mai era e koe, hora nei e ho'e 'ahuru rahi haka 'ou”. ¹⁷ He pāhono e tū 'ariki era: “Ko tano 'ā. Tāvini riva-riva mau 'ā a koe. He ha'atura ō'ou 'i te me'e 'iti-'iti pē nā, he haka suerekao koe e au o te kona e ho'e 'ahuru”.

¹⁸ »He tu'u te rua, he kī: “E te 'ariki, o te moni va'ai mai era e koe, hora nei e rima rahi haka 'ou”. ¹⁹ He kī tako'a ki tū rua tāvini era: “He haka suerekao koe e au o te kona e rima”.

²⁰ »He vari ia te tāvini haka 'ou e tahi, he kī: “E te 'ariki, 'i tu'u moni 'i a'a. Ko hāpa'o 'ana e au 'i roto i te haro'i, ²¹ he ri'a-ri'a ō'oku i a koe. Ko 'ite 'ana, pa'i, a au: taŋata haŋa koe mo aŋa e tu'u tāvini i ta'a me'e kī

'e mo rava'a me'e rahi atu me'e haka 'ou mai ta'a me'e va'ai. Pē ira tako'a 'ana koe 'i te hora haka 'oka i te kai".

²² »He kī e tū 'ariki era: "E te tāvini ta'e tano ē, hai ta'a vānaŋa mau ena 'ā ka haka ūtu'a ena koe e au. Mo ai e 'ite riva-riva rō 'ā e koe pē hē tō'oku huru, ²³ ǰhe aha ia koe i ta'e ma'u ai i tō'oku moni ki roto i te hare hāpa'o moni mo haka hoki haka 'ou mai e rahi rō 'ana 'i te hora tu'u mai ō'oku?"

²⁴ »He kī e tū 'ariki era ki te nu'u ta'ato'a o ira: "Ka hiko kōrua i te moni mai te taŋata ena, 'e 'ai ka va'ai rō ki te kope rava'a era e ho'e 'ahuru haka 'ou". ²⁵ He kī e tū nu'u era: "E te 'ariki, ǰ'ai i a ia e ho'e 'ahuru rahi haka 'ou o te moni!"

²⁶ »He pāhono e tū 'ariki era: "Te kope 'ata rahi o te me'e, 'ata rahi ka va'ai ena; 'e te kope 'ina e tahi 'ā'ana me'e, 'ātā ki te me'e mana'u e ia 'ā'ana ka hiko ena.

²⁷ 'E te nu'u ta'e haŋa era mo 'ariki ō'oku, ka ma'u mai 'ai ka tiŋa'i ka haka mate rō 'i mu'a i a au"».

He tu'u iŋa o Ietū ki Hērutarema
(Māteo 21.1-11; Marko 11.1-11; Iovani 12.12-19)

²⁸ I oti era te kī i te me'e nei, he e'a he oho haka 'ou a Ietū 'i tō'ona ara ki Hērutarema. ²⁹ I hāhine era ki Vete-fāhē 'e ki Vētānia, he kona o muri o te ma'uŋa kī o te 'Ōrivo, he ūŋa e Ietū e rua o tā'ana nu'u hāpī ³⁰ koia ko kī: «Ka oho kōrua ki te kona o mu'a era ai. Nā 'i ira te muni e here rō 'ā, kai eke 'ā e te taŋata. Ka kume, 'ai ka ma'u rō mai. ³¹ Mo 'ui atu e te nu'u mo aha kōrua e kume ena, e kī: "O te mātou Pū'oko Haka Tere ko Ietū i kī mai"».

³² He oho tū nu'u hāpī era 'e pa he me'e kī mau era 'ā e Ietū i topa ai. ³³ E kume nō 'ana i tū muni era he 'ui e te nu'u o rāua rā muni pē nei ē:

—ǰHe aha rā kōrua e kume ena i te muni?

³⁴ He pāhono e tū nu'u hāpī era:

—O te mātou Pū'oko Haka Tere ko Ietū i kī mai.

³⁵ He ha'ati'a e rā nu'u. He ma'u ia i tū muni era, he pu'a hai kahu o rāua, 'e he eke a Ietū.

³⁶ E oho era a Ietū a te ara 'i ruŋa i rā muni, 'i mu'a e hēriki e oho era e te taŋata hai kahu o rāua, he mo'a iŋa ki a ia. ³⁷ I hāhine era ki te hakaturu o te Ma'uŋa o te 'Ōrivo, te nu'u ta'ato'a oho 'i muri i a ia, 'i te koa, he ha'amata he 'eha 'ai ka ha'ahana-hana i te 'Atua 'o te mana ta'ato'a take'a e rāua. ³⁸ Pē nei e kī era:

«ǰTaŋata ha'amaitai e te 'Atua
te 'Ariki oho mai nei hai 'iŋoa ō'ona!»

«ǰKa ai te haumārū o te 'Atua i tō'ona taŋata!»

«ǰKi ha'ahana-hana tahi tātou ki te 'Atua 'i te raŋi!».

³⁹ 'I roto i tū nūna'a taŋata era te tētahi [fariseo] e kī era:

—E te Ma'ori, ka ture ka haka mou te nu'u era.

⁴⁰ He pāhono e Ietū:

—Mo mou o te nu'u era, he 'eha e te mā'ea.

He taŋi iŋa o Ietū mo Hērutarema

⁴¹ I hāhine i oho era a Ietū ki Hērutarema, 'e i take'a riva-riva era, he taŋi mo rā kona. ⁴² He kī:

«'Āhani 'ō ko 'ite 'ā a koe, ka ai atu 'i 'aŋarīnā, i te me'e mo va'ai atu i te haumārū. Hora nei ko na'a 'ā e te 'Atua 'o tu'u ta'e haŋa mai. ⁴³ Nā e ai rō te mahana ta'e au mō'ou. Te nu'u ta'e haŋa atu e puru e haka vari tahi rō i a koe 'e e tama'i rō atu; e ko rava'a koe mo tere. ⁴⁴ E haka pararaha rō i a koe, e tiŋa'i rō i ta'a ŋā poki, 'e te mā'ea ta'ato'a titi i a koe e haka marere tahi rō, he ta'e aŋi-aŋi ō'ou i te hora tu'u mai o te 'Atua mo haka ora atu i a koe».

He tū-tute iŋa o Ietū i te nu'u
(Māteo 21.12-17; Marko 11.15-19; Iovani 2.13-22)

⁴⁵ He uru a Ietū ki roto i te Kona Ha'amuri 'Atua, 'e mai roto i tū-tute tahi ai i te nu'u ho'o i te rāua me'e 'i roto ⁴⁶ 'e he kī: «Nā 'i ruŋa i te [Pāpa'i Mo'a] e hā'aki ena te vānaŋa o te 'Atua pē nei ē: "Tō'oku hare e kī rō: 'he hare mo pure", 'e ko haka riro 'ā e kōrua he 'ana o te toke-toke».

⁴⁷ Paurō te mahana e hāpī era a Ietū 'i te Kona Ha'amuri 'Atua. Te nu'u ra-rahi o te [oromatu'a], te nu'u [ma'ori o te haka tere hūrio], 'e te nu'u ra-rahi o rā kona e kimi rō 'ā i te rāve'a mo tiŋa'i mo haka mate i a Ietū. ⁴⁸ 'E, 'o te ai he taka-taka nō te aŋa o te taŋata mo haka roŋo i tā'ana vānaŋa, 'ina he rava'a.

ǰ'A 'ai i va'ai ki a Ietū i te parau mo aŋa i te me'e aŋa e ia?

(Māteo 21.23-27; Marko 11.27-33)

20 E tahi mahana, e haka 'ite 'ana a Ietū i te [roŋo riva-riva o te 'Atua] ki te taŋata 'i te Kona Ha'amuri 'Atua, he tu'u te nu'u ra-rahi o te [oromatu'a], te [ma'ori o te haka tere hūrio] 'e te nu'u pū'oko haka tere hūrio, ² he 'ui:

—ǰ'A 'ai i va'ai atu i te parau mo aŋa ō'ou i te ŋā me'e ena e koe e aŋa ena?

³ He kī e Ietū:

—'Ī a au he 'ui tako'a atu; e pāhono mai. ⁴ ǰ'A 'ai i ūŋa mai i a Iovani mo [papatito], o te 'Atua, 'o o te taŋata?

⁵ He ha'amata tū nu'u era he tātake ki a rāua 'ā: «Mo kī o tātou: "O te 'Atua i ūŋa mai", pē nei ka kī mai era: "ǰHe aha ia a kōrua i ta'e haka roŋo ai i tā'ana vānaŋa?" ⁶ 'E, e ko tano mo kī o tātou: "O te taŋata i ūŋa mai", 'o tama'i mai e te nu'u hai mā'ea ki te mate. Ki te rāua mana'u, pa'i, a Iovani he perofeta». ⁷ 'O ira i

pāhono ai ki a Ietū 'ina a rāua kai 'ite 'a 'ai a Iovani i uŋa mai mo papatito. ⁸ He kī e Ietū:

—'Ina tako'a ia a au e ko kī atu 'a 'ai i va'ai mai i te parau mo aŋa i te me'e aŋa e au.

Te nu'u hāpa'o i te kona 'oka vino
(Māteo 21.33-44; Marko 12.1-11)

⁹ He ha'amata a Ietū he 'a'amu ki te taŋata i te 'a'a-mu ha'aaura'a nei:

«E tahi taŋata he 'oka i tō'ona 'āua hai vino. I oti era he ha'a'au ananake ko te nu'u 'oka kai mo aŋa i rā henua 'e mo 'auhau ki a ia i te 'apa vino tano mā'ana mo te hoa henua. I oti era he e'a he oho ki te rua henua.

¹⁰ »I tano era te 'āva'e mo kato, he uŋa e tū taŋata era i te tāvini ki rā kona mo kī ki tū nu'u 'oka kai era mo va'ai i te 'apa vino ha'a'au era ananake. He to'o mai e rā nu'u he tiŋa'i ka pi'i-pi'i rō i rā tāvini, 'e 'ai ka haka hoki 'ina e tahi me'e ma'u o te rima.

¹¹ »He uŋa e tū taŋata era i te tāvini haka 'ou e tahi; pē ira tako'a 'ana i me'e ai e tū nu'u era: he tiŋa'i koia ko vā-vā, 'e he haka hoki 'ina e tahi me'e ma'u o te rima. ¹² He uŋa ia i te toru kope, he tiŋa'i 'e he tute tako'a e rā nu'u.

¹³ »He kī ia ki a ia 'ā tū taŋata era ō'ona rā henua: “ĶHōra nei he aha tā'aku me'e mo aŋa? 'Ī a au he uŋa i tā'aku poki haŋa rahi nei; pē ira pēaha ana mo'a”.

¹⁴ »I take'a era e tū nu'u hāpa'o vino era i rā poki, he kī ki a rāua 'ana: “Ko te kope era te kope ki a ia ka topa ena te henua nei. Ki to'o mai ki tiŋa'i ki haka mate mo topa rō mai 'ai mo tātou”.

¹⁵ »He to'o ia e tū nu'u era i rā poki mai roto i rā henua, he ma'u he oho he tiŋa'i he haka mate».

—Ki te kōrua mana'u ia, Ķhe aha te me'e ka aŋa era ki rā nu'u e te taŋata era ō'ona rā henua? ¹⁶ He oho he tiŋa'i i rā nu'u he haka mate 'e he va'ai i rā henua ki te tētahi nu'u mo hāpa'o.

I ŋaro'a era e te nu'u i rā vānaŋa he kī:

—ĶPē hiva 'ā ana ta'e topa te me'e tu'u pē nā!

¹⁷ He rori a Ietū he u'i ki tū nu'u era he kī:

—ĶHe aha ia te aura'a o te vānaŋa nei o ruŋa i te [Pāpa'i Mo'a]:

“Te mā'ea ta'e haŋa era e te nu'u aŋa hare ko riro 'ana he mā'ea matu'a haka noho hare”?

¹⁸ »Te kope viri a ruŋa i rā mā'ea he 'ota-'ota; 'e mo viri o rā mā'ea ki ruŋa, he pi'i-pi'i tahi.

¹⁹ Tū ŋā oromatu'a ra-rahi era 'e te ma'ori o te haka tere hūrio i haŋa rō mo 'a-'aru i a Ietū 'i rā hora mau 'ā, he aŋi-aŋi: rā 'a'amu ha'aaura'a era mo rāua. 'E, 'i te ri'a-ri'a 'i te taŋata, i ta'e 'a-'aru ai.

He kimi iŋa i te 'ōtohe mo 'a-'aru i a Ietū
(Māteo 22.15-22; Marko 12.13-17)

²⁰ He uŋa e tū nu'u ra-rahi era o te hūrio i te ŋāŋata, e haka tu'u rō 'ana pa he ŋāŋata riva, haka 'ui ki a Ietū mo u'i i te rāve'a mo kī e Ietū i te vānaŋa ta'e tano mo te rāua haka tere iŋa; pē ira he rava'a e rāua i te 'ōtohe mo 'a-'aru 'e mo va'ai ki te rima o te suerekao rōmano mo haka ūtu'a. ²¹ Pē nei rā nu'u i 'ui ai:

—E te Ma'ori, ko 'ite 'ana a mātou: ta'a me'e kī 'e ta'a me'e hāpī he parauti'a. 'Ina koe he haka tano i te vānaŋa mo haka koa i te taŋata. Te me'e hāpī 'ā'au he ara mau 'ana o te 'Atua. ²² Ki tu'u mana'u, Ķko tano mau 'ā a tātou e 'auhau nei i te moni kī mo 'auhau ki te 'ariki o te rōmano?

²³ 'I te aŋi-aŋi e Ietū i te mana'u rake-rake o rā nu'u, he kī:

²⁴ —Ka haka take'a mai rā e tahi [renario].

I haka take'a era e te nu'u he 'ui:

—ĶO 'ai te 'āriŋa 'e te 'īŋoa ena e pāpa'i ena o ruŋa?

He pāhono e rā nu'u:

—O te 'ariki o te rōmano.

²⁵ He kī e Ietū:

—Ka va'ai ia ki te 'ariki rōmano te me'e o te 'ariki rōmano, 'e ki te 'Atua te me'e o te 'Atua.

²⁶ 'Ina e tahi me'e i rava'a e rā nu'u o tū vānaŋa era 'a Ietū 'i mu'a o te taŋata mo tano mo 'a-'aru i a ia. 'I te māere 'i tū vānaŋa era, he mo-mou rō 'ai.

ĶE ora haka 'ou rō te nu'u mate?
(Māteo 22.23-33; Marko 12.18-27)

²⁷ 'I oho era he haka hāhine ki a Ietū tētahi nu'u [saruseo]. Ki te rāua kī 'ina he taŋata he ora haka 'ou mai te mate. 'O ira i kī ai ki a Ietū i te me'e nei:

²⁸ —E te Ma'ori, pē nei a [Mōtē] i pāpa'i ai: mo mate o te taŋata [hāipo-ipo] e tahi 'e 'ina kai ai te poki ararua ko tā'ana vi'e, te taina tane o rā kope e hāipo-ipo ki rā vi'e mo ai o te poki mo ma'u i te 'īŋoa o rā taina mate era 'e mo ai o tō'ona hakaara.

²⁹ »'I mu'a 'ā i ai rō e hitu taina tane. Te kope ra'e he hāipo-ipo, 'e kai ai te poki i mate rō ai. ³⁰ Te rua ³¹ 'e te toru he hāipo-ipo ki tū vi'e 'ā, pē ira tako'a 'ana tū tētahi taina era. Rā ŋā taina, kai ai hia te poki, i mā-mate rō ai. ³² 'I oho era he mate tako'a tū vi'e era.

³³ »Iā. 'I te hora o te taŋata mo ora mai te mate, ana topa tā'ue rā me'e, o roto o rā ŋā taina, Ķ'a 'ai mau rā vi'e? A hi-hitu, pa'i, i hāipo-ipo ai ki tū vi'e 'ā.

³⁴ He pāhono e Ietū:

—Te taŋata 'e te vi'e 'i te ao nei e hāipo-ipo rō 'ā. ³⁵ 'E te nu'u tano ki te 'Atua mo ora mai te mate 'e mo o'o ki te ao haka tere e ia e ko hāipo-ipo ³⁶ 'i te me'e era e ko mate haka 'ou a rāua pa he merahi, 'e he riro rō 'ai he ŋā poki o te 'Atua 'o te ai ko haka ora 'ā mai te mate. ³⁷ 'E te ora o te taŋata mai te mate: a Mōtē mau 'ana i haka 'ite mai o ruŋa 'i te kona pāpa'i e ia o te tumu ura 'i te ahi. Pē nei, pa'i, i kī ai e te 'Atua 'i rā kona ki a Mōtē: «A au he 'Atua, kope ki a ia e ha'amuri ena e te kōrua tupuna ko ['Aparahama], ko Ita'ata, 'e ko Hākovo». I kī ai i te vānaŋa nei ko mate era 'ā rā nu'u. ³⁸ ;Te 'Atua, pa'i, he 'Atua o te nu'u ora; mō'ona e ora tahi rō 'ā!

³⁹ He kī ia e te tētahi ma'ori o te haka tere hūrio:

—Ko tano mau 'ā ta'a vānaŋa, e te Ma'ori ē.

⁴⁰ 'I te huru o te pāhono iŋa o Ietū, 'ina kai haŋa haka 'ou rā nu'u mo 'ui e tahi me'e.

¿Mai i a ai ka haka ara mai ena te [Kiritō]?

(Māteo 22.41-46; Marko 12.35-37)

⁴¹ He 'ui e Ietū:

—¿He aha kōrua e kī ena: te Kiritō mai i a [Tāvita] ka haka ara mai ena? ⁴² I pāpa'i ai e Tāvita 'i ruŋa i te puka o te Hīmene: †

“A Iehoha te 'Atua i kī rō ki tō'oku Pū'oko Haka Tere: 'Ka noho koe 'i tō'oku pā'iŋa mata'u, ⁴³ 'ātā ka haka rē rō e au i te nu'u ta'e haŋa atu ki a koe 'i raro o tu'u va'e”.

⁴⁴ »Hai kī o Tāvita i te vānaŋa era mo te Kiritō, e 'ite nei e tātou: te Kiritō ta'e nō he hakaara o Tāvita.

Te huru o te ma'ori o te haka tere hūrio

(Māteo 23.1-36; Marko 12.38-40; Ruka 11.37-54)

⁴⁵ E noho e haka roŋo tahi 'ā te taŋata, he kī e Ietū ki tā'ana nu'u hāpī:

⁴⁶ «E u'i kōrua 'o riro pa he ma'ori o te haka tere hūrio, nu'u haŋa mo hā'ere e uru rō 'ā i te kahu ro-roa mo haka tu'u pa he nu'u hōnui 'e mo 'aroha e te taŋata 'i te ara pa he 'ariki. He u'i nō te aŋa mo noho e rāua i te pepe o te nu'u hōnui o roto i te [hare pure hūrio] 'e o te kona ŋoŋoro. ⁴⁷ He hiko nō te aŋa i te hare o te ŋā vi'e hove mo rāua, 'e mo na'a i rā me'e ta'e tano aŋa era e rāua, he haka roa-roa te pure iŋa 'i mu'a o te taŋata mo haka tu'u i a rāua pa he nu'u riva. 'Ī a au he kī atu: 'ata paŋaha'a te ūtu'a ka topa ena ki rā ŋā nu'u».

Te tara va'ai e te vi'e veve mo te 'Atua

(Marko 12.41-44)

21 E noho nō 'ā a Ietū 'i te Kona Ha'amuri 'Atua, he take'a pē hē te nu'u 'ono e ha-ha'o era i te moni ki roto i te 'avahata. ² He take'a tako'a i te vi'e hove veve e tahi e ha-ha'o 'ā e rua tara 'aurī ta'e hauha'a rahi. ³ He kī e Ietū:

«'Ī a au he kī atu: i hau rō atu 'i te hauha'a, ki te 'Atua, te moni va'ai e te vi'e hove veve era ai ki te moni va'ai e te tētahi nu'u era. ⁴ Te nu'u ta'ato'a era, pa'i, hai tara e topa rō 'ā i a rāua i va'ai ai; 'e te vi'e era, 'i roto i tō'ona veve, te tara ai mo tō'ona ora i va'ai tahi nō mo te 'Atua».

Te [Kona Ha'amuri 'Atua] e haka marua tahi rō

(Māteo 24.1-2; Marko 13.1-2)

⁵ E ai rō 'ana te tētahi nu'u vānaŋa o ruŋa o te Kona Ha'amuri 'Atua, o ruŋa o te tau o tō'ona mā'ea, 'e o te me'e haka nehe-nehe i rā kona va'ai e te nu'u. He kī e Ietū: ⁶ «O te me'e ta'ato'a ena e take'a ena e kōrua e ai rō te mahana e ko ai haka 'ou e tahi mā'ea 'i ruŋa i te rua mā'ea. E haka marua tahi rō».

He 'ati era mo topa

(Māteo 24.3-28; Marko 13.3-23)

⁷ He 'ui ia e te nu'u:

—E te Ma'ori, ¿a hē ka topa te me'e ena? ¿Pē hē ka haka aŋi-aŋi mai ena ko hāhine 'ā te me'e ta'ato'a ena mo topa?

⁸ He pāhono e Ietū:

—E u'i kōrua 'o haka ma'a-ma'a rō atu. Nu'u rahi te nu'u ka tu'u atu ena he kī atu ko au a rāua. Pē nei ka kī atu ena: «He Kiritō au» 'e «Rā hora ko te hora nei». 'Ina kōrua ko haka roŋo. ⁹ Ka ŋaro'a ena kōrua i te parau 'āpī 'o ruŋa i te tama'i 'e o te nu'u haka tumu i te ture ki te rāua nu'u ra-rahi, 'ina kōrua ko ri'a-ri'a; 'i ra'e, pa'i, te ŋā me'e nei ka topa ena. Ka ai atu pē ira, e ŋe'i rō te tu'u iŋa mai o te hope'a o te ao nei.

¹⁰ He kī haka 'ou e Ietū:

«Te nu'u o te henua e tahi e moto rō ki te nu'u o te rua henua, 'e he tama'i te 'ariki o te kona e tahi ki te 'ariki o te rua kona. ¹¹ He mākenu-kenu te henua, 'e me'e rahi nō atu kona he ai te maruaki 'e te māui-ui, 'e he take'a te me'e taparahi-ta'ata 'e te taipe nui-nui 'i ruŋa i te raŋi.

¹² »'I ra'e ki te topa o te ŋā me'e nei, he tute i a kōrua mo 'a-'aru mo tōtōā. He ma'u mo ture 'i roto i te [hare pure hūrio], 'e he puru 'i roto i te hare ma'u'aurī. E ma'u tako'a rō i a kōrua ki mu'a o te 'ariki 'e o te suerekao o ruŋa ō'oku.

¹³ »Pē ira ka ai ena te hora mo haka 'ite e kōrua o ruŋa i a au. ¹⁴ 'Ina ko mana'u rahi hai vānaŋa mo kī mo

† Te puka o te HĪMENE he puka e tahi o te Pīpīria kī 'i te tire he Salmos. 'I ruŋa me'e rahi nō atu hīmene ha'ahana-hana ki te 'Atua. O te 'ariki era ko Tāvita i pāpa'i me'e rahi o te ŋā hīmene nei.

te kōrua ora. ¹⁵ Mā'aku e va'ai atu i te vānaŋa māramarama mo pāhono ki rā nu'u 'o rava'a e tahi me'e mo kī i te kōrua reo-reo e te nu'u te rāua mana'u mau nō he tōtōā i a kōrua.

¹⁶ »I rā nā mahana 'ātā te kōrua matu'a, taina, hua'ai 'e repahoa he va'ai i a kōrua ki te rima o te nu'u ta'e haŋa atu. 'E tētahi o kōrua e tiŋa'i e haka mate rō. ¹⁷ Te taŋata ta'ato'a e ma'u rō i te riri mo kōrua he haka moe o kōrua i te mana'u 'i ruŋa i a au. ¹⁸ Ka ai atu pē ira, e ko ŋaro korohaŋa e tahi rau'oho pū'oko o kōrua. ¹⁹ 'O ira, e haka noho nō te kōrua mana'u 'i ruŋa i a au ki rava'a ai e kōrua i te ora 'āpī 'ina he hope'a ra'a va'ai e te 'Atua.

²⁰ »Ka take'a ena e kōrua ko haka vari tahi 'ā a Hērutarema e te va'ehau o te rua henua, e 'ite: ko hāhine 'ā te hora he haka pararaha i rā kona. ²¹ 'I rā hora, te nu'u 'i te kona ta'ato'a o Hūrea e tē-tere a te kona ma'uŋa. Te nu'u 'i Hērutarema e e'a, 'e te nu'u 'i 'uta 'ina ko hoki ki ira.

²² »Rā nā mahana he mahana o te ūtu'a, he mahana haka tano i te me'e ta'ato'a kī 'i ruŋa i te [Pāpa'i Mo'a]. ²³ E ŋaro'a rō i te māui-ūi ki roto i te ivi 'i te 'ati ka topa era, he ūtu'a hope'a o te nui-nui mo te itaraera. 'i'E, ko te 'aroha 'i te hānautama 'e 'i te nā vi'e e haka 'omo-'omo nō 'ā i te rāua nā poki 'i rā nā mahana! ²⁴ E ai rō te nu'u o ira ka mate ena 'i te hoe, 'e tētahi atu he 'a-'aru he ma'u ki te rua henua; he tōtōā i a Hērutarema 'e he haka tere e te nu'u ta'e he hūrio 'ātā ki te roa o te mahana i ha'ati'a e te 'Atua.

He hoki iŋa mai o te [Poki o te taŋata]

(Māteo 24.29-35,42-44; Marko 13.24-37)

²⁵ »E ai rō te ta'ipe 'i ruŋa i te ra'ā, 'i ruŋa i te māhina 'e 'i ruŋa i te hetu'u, 'e te taŋata ta'ato'a o te ao e mira-mira rō te mana'u 'e e ri'a-ri'a rō 'i te heruru taparahi-ta'ata o te vave 'e o te vaikava. ²⁶ Te nu'u e re-rehu rō 'i te ri'a-ri'a he mana'u ki te me'e ka topa era ki te ao; te me'e o te raŋi, pa'i, e rū-rū tahi rō.

²⁷ »'I rā hora he take'a i te Poki o te taŋata ka topa mai 'i ruŋa i te raŋi e tahi 'i ruŋa i a ia te pūai 'e te 'ana-'ana o te 'Atua. ²⁸ Hora era mo ha'amata o te nā me'e nei, e haka hio-hio te kōrua mana'u, e ma'u te 'āriŋa a ruŋa; e ko roa, pa'i, te 'Atua he haka e'a i a kōrua mai roto i te ūtu'a o te hara 'e he va'ai atu i te ora 'āpī 'ina he hope'a ra'a».

²⁹ He 'a'amu tako'a e Ietū i te me'e nei:

«E mana'u kōrua i te tumu pika 'o i te tētahi tumu. ³⁰ E take'a ena e kōrua ko pipi 'ā, he anji-anji ko hāhine 'ana a hora. ³¹ Pē ira tako'a 'ā, ka take'a ena e kōrua ko topa 'ana te nā me'e nei, e 'ite: ko hāhine mai 'ā te [haka tere iŋa 'āpī o te 'Atua].

³² »'I a au he kī atu: te taŋata o te hora nei e ko ŋaro hia ka topa rō mai ena te nā me'e nei. ³³ E kore rō te raŋi 'e te henua, 'e tā'aku vānaŋa nei e ko ŋaro; e tano tahi rō.

³⁴ »E u'i kōrua 'o haka rehe-rehe ki te me'e ta'e au, ki te 'ava unu 'e ki te mana'u ki te me'e o te ao nei, 'o tu'u rō mai te mahana o te ture hope'a ³⁵ 'ina kai anji-anji hia he ma'urima i a kōrua. Rā mahana mo te ta'ato'a nō taŋata ka tu'u mai ena. ³⁶ 'O ira, 'i te hora ta'ato'a, e 'ara te kōrua mata 'e e pure mo pūai o kōrua 'i te hora o te 'ati ka tu'u mai ena e haka moe nō 'ana i te mana'u 'i ruŋa i te 'Atua, 'o ha'amā kōrua 'i te hora 'i mu'a o te Poki o te taŋata».

³⁷ Te aŋa 'a Ietū he hāpī i te taŋata 'i te Kona Ha'amuri 'Atua 'i te 'ōtea; 'i te pō, he iri he noho 'i ruŋa i te ma'uŋa kī o te 'Ōrivo. ³⁸ 'E, 'i te pō era 'ā, te taŋata ta'ato'a e oho era ki te Kona Ha'amuri 'Atua haka roŋo i a Ietū.

He ha'a'au iŋa mo 'a-'aru i a Ietū

(Māteo 26.1-5,14-16; Marko 14.1-2,10-11; Iovani 11.45-53)

22 Ko hāhine 'ana te [ŋoŋoro kai i te haraoa 'ina he revaura], he [ŋoŋoro o te Pakate]. ² Te [oro-matu'a ra-rahi] ananake ko te [ma'ori o te haka tere hūrio] e u'i 'ana i te rāve'a pē hē ana tiŋa'i ana haka mate i a Ietū ta'e e 'ite e te taŋata he ri'a-ri'a 'i a rāua.

³ He o'o a Rukifero ki roto i a Hura, he kope o roto o te ho'e 'ahuru mā piti nu'u hāpī 'a Ietū, kī ko Ikariote. ⁴ Pē ira nei kope i oho i u'i ai i te nu'u oromatu'a rarahi 'e i te kape o te mūto'i 'auario i te [Kona Ha'amuri 'Atua] mo ha'a'au pē hē ana va'ai i a Ietū ki a rāua. ⁵ He koa rō atu 'ai tū nu'u era 'e he kī he 'auhau hai moni. ⁶ «Ko tano 'ā» — i kī ai e Hura. 'E he u'i ia hai hora 'ina he taŋata rahi mo va'ai i a Ietū.

He kai iŋa hope'a

(Māteo 26.17-29; Marko 14.12-25; Iovani 13.21-30; 1 Kōrinto 11.23-26)

⁷ I tu'u era te mahana o te ŋoŋoro kai i te haraoa 'ina he revaura, he mahana mo tiŋa'i i te māmo'e mo rā ŋoŋoro, ⁸ he uŋa e Ietū i a Pētero ararua ko [Iovani] 'e he kī:

—Ka oho kōrua ka haka riva-riva i te kai mo tātou mo te ŋoŋoro o te Pakate.

⁹ He 'ui e tū nu'u era:

—'I hē māua ana aŋa i nā kai?

¹⁰ He pāhono e Ietū:

—Ka tu'u ena ki Hērutarema, he take'a e kōrua e tahi taŋata e ma'u rō 'ana i te karo vai. E oho kōrua 'i tu'a. 'E, a te kona ō'ona ka uru era, he uru tako'a kōrua, ¹¹ he kī ki te taŋata ō'ona te hare: "Ko uŋa mai 'ā e te Ma'ori mo 'ui atu: 'i piha hē ka kai ena a ia i te kai o te Pakate ananake ko tā'ana nu'u hāpī". ¹² 'E mā'ana e haka take'a atu i te piha nui-nui o ruŋa ko haka riva-riva era 'ā. 'I roto kōrua ana aŋa i te tātou kai.

¹³ He oho rā nu'u 'e he topa pa he me'e kī mau era 'ā e Ietū. He aŋa ia i tū kai era o te Pakate.

¹⁴ I tano era te hora, he noho a Ietū mo kai ananake ko tā'ana ['āpōtoro]. ¹⁵ He kī e Ietū:

«Kō pohe era 'ana a au mo tu'u mai o te mahana nei mo kai o tātou i te kai o te Pakate 'i ra'e ki tō'oku mate! ¹⁶ 'Ī a au he kī atu: e ko kai haka 'ou a au i te kai nei 'ātā ki te tu'u iŋa mai o te [haka tere iŋa 'āpī o te 'Atua]».

¹⁷ He to'o ia i te hapaina vino ki tō'ona rima. I oti era te māuru-uru ki te 'Atua, he kī:

«Ka to'o te me'e nei 'e 'ai ka va'ai ka oho rō ki te ta'a-to'a o kōrua mo unu. ¹⁸ 'Ī a au he kī atu: e ko unu haka 'ou a au i te vino 'ātā ki te tu'u iŋa mai o te haka tere iŋa 'āpī o te 'Atua».

¹⁹ He to'o ia i te haraoa. I oti era te māuru-uru ki te 'Atua, he more-more he tuha'a ki tū nu'u era koia ko kī:

«Te haraoa ena he hakari ō'oku va'ai ki te mate mo te riva-riva o kōrua. E aŋa te me'e nei mo mana'u o kōrua ki a au».

²⁰ I oti era te kai he to'o haka 'ou a Ietū i te hapaina vino 'e he kī:

«Te me'e nei he toto ō'oku ka tehe ena mo te riva-riva o kōrua, he tāpa'o o te [haka tere iŋa 'āpī o te 'Atua ananake ko te taŋata].

²¹ »E, te kope mā'ana e va'ai i a au ki te nu'u ta'e haŋa mai 'i ruŋa i te 'amurama'a nei. ²² Te me'e ta'a-to'a kī mo topa 'i ruŋa i te [Poki o te taŋata] e haka tano tahi rō, 'e jko te 'aroha 'i te kope mā'ana e va'ai!».

²³ He ha'amata ia tū nu'u era he 'ui-'ui ki a rāua 'ā ko ai rā kope.

¿Ko ai te kope hōnui?

²⁴ He tātake ia tū nu'u hāpī era 'a Ietū ko ai te kope hōnui o roto i a rāua. ²⁵ He kī e Ietū:

«I roto i te nu'u ta'e he hūrio e ai rō 'ā te nu'u pū'oko haka tere mana'u e tano rō 'ā a rāua mo haka aŋa i te taŋata pa he pua'a. 'E, 'i ruŋa 'ana, e haŋa rō 'ā mo mana'u o te nu'u e hā'ū'ū rō 'ana a rāua ki te taŋata.

²⁶ »A kōrua 'ina ko tu'u pē ira. Te kope hope'a o te hōnui o roto o kōrua e haka riro i a ia pa he kope hope'a o te ta'e hōnui, te kope ko ia te pū'oko haka tere e haka riro i a ia pa he tāvini.

²⁷ »Ki te kōrua mana'u, ¿ko ai te kope 'ata hōnui, he kope noho 'i ruŋa i te 'amurama'a mo kai, 'o he kope 'ā'ana te ma'u i te kai? ¿Ta'e 'ō he kope noho 'i ruŋa i te 'amurama'a? 'E, 'ī a au pa he tāvini 'i muri i a kōrua».

²⁸ He kī haka 'ou e Ietū:

«A kōrua, i topa mai era te 'ati, 'i muri i a au 'ā. ²⁹ 'O ira, pa he haka tōro'a iŋa mai e tō'oku Matu'a mo haka tere pa he 'ariki, 'ī a au he haka tōro'a i a kōrua ³⁰ ki riva ai mo kai 'e mo unu 'i muri i a au 'i te hora haka tere ō'oku pa he 'ariki. 'E a kōrua e noho rō 'i ruŋa i te pepe noho 'ariki mo haka tere i te ho'e 'ahuru mā piti mata o te itaraera».

A Pētero e kī rō kai 'ite a ia ko ai a Ietū

(Māteo 26.31-35; Marko 14.27-31; Iovani 13.36-38)

³¹ He kī e Ietū:

—E Tīmona, ka haka roŋo mai. Ko kī mai 'ā a Rukif-ero mo ha'ati'a ō'oku mo rū-rū i a kōrua pa he tariko. ³² Ka ai atu pē ira, ko ani 'ana a au mō'ou ki te 'Atua, 'o kore tu'u haka moe iŋa i te mana'u 'i ruŋa i a au. Ki huri haka 'ou mai koe, e hā'ū'ū ki tā'aku nu'u hāpī mo haka hio-hio tako'a i te rāua mana'u 'i ruŋa i a au.

³³ He kī e Tīmona:

—E Ietū, mo ma'u i a koe mo puru 'i roto i te hare ma'u'aurī, 'i muri i a koe 'ana a au; 'e mo mate ō'ou, 'ātā e va'ai nō a au i a au mo mate 'i muri i a koe.

³⁴ He pāhono e Ietū:

—E Pētero, 'ī a au he kī atu: 'arīnā mau nei 'ā, e ko 'o'oa hia te moa, ka kī ena e koe e toru kī iŋa kai 'ite koe ko ai a au.

³⁵ I oho era he 'ui e Ietū:

—I uŋa era a au i a kōrua 'ina e tahi me'e ma'u mo te ara, ¿i hape rō te kōrua me'e?

He pāhono e tū nu'u era:

—'Ina.

³⁶ He kī ia e Ietū:

—Iā. Hora nei te kope ai o te moni 'e o te pūtē mo ha-ha'o o tā'ana me'e, e ma'u; 'e te kope 'ina 'ā'ana hoe tu'u pa he hoe o te va'ehau, ka ho'o tō'ona para-toa 'e 'ai ka ho'o rō e tahi.

³⁷ »'Ī a au he kī atu: e tano rō te me'e kī 'i ruŋa i te [Pāpa'i Mo'a] o ruŋa i a au pē nei ē: "I tatau rō 'i roto i te nu'u taparahi-ta'ata". 'Ē-ē, e haka tano tahi rō rā ŋā me'e pāpa'i era o ruŋa i a au.

³⁸ He kī e rā nu'u:

—E Ietū, 'ī e rua hoe 'i 'ā.

He pāhono e Ietū:

—Ko oti 'ā. Ka mou rō 'ai.

He pure iŋa o Ietū 'i Hetesēmānī

(Māteo 26.36-46; Marko 14.32-42)

³⁹ He e'a a Ietū he oho ki te Ma'uŋa era o te Ōrivo, pa he me'e rava aŋa e ia. 'I tu'a i iri tako'a ai tā'ana nu'u hāpī.

⁴⁰ I tu'u era ki rā kona he kī e Ietū: «Ka pure 'o aŋa kōrua i te me'e ta'e tano 'i te hora ka haka 'atu atu ena».

⁴¹ He haka 'ava-'ava ia mai muri i tū nu'u era, he tū-turi he pure. ⁴² He kī: «E Koro, mo haŋa ō'ou, ka to'o te 'ati nei mai ruŋa i a au. 'E, ka ai atu pē nei tō'oku mana'u, ka aŋa koe hai me'e nō ena 'ā'au i haŋa 'e ta'e hai me'e haŋa 'ā'aku».

[⁴³ E pure nō 'ā, he māroa 'i muri e tahi merahi mo haka haŋu i a ia. ⁴⁴ 'I te rahi o te māui-ui 'i roto i te māhatu, ko 'ata hau 'ā e pure era, 'e 'ai te nu-nui o te pa'ahia e toto rō 'ā e viri era.]

⁴⁵ I oti era te pure, he hoki ki te kona 'i ira tū nu'u hāpī era 'ā'ana. I tu'u era ko hā'uru 'ā 'i te rahi o te māui-ui 'i roto i te māhatu. ⁴⁶ He kī: «¿He aha kōrua i hā'uru ai? Ka e'a ki ruŋa ka pure, 'o aŋa kōrua i te me'e ta'e tano 'i te hora ka haka 'atu atu ena».

He 'a-'aru iŋa i a Ietū

(Māteo 26.47-56; Marko 14.43-50; Iovani 18.2-11)

⁴⁷ E vānaŋa nō 'ā a Ietū i tu'u ai me'e rahi nu'u. Te me'e o mu'a ko Hura, he kope o roto o te ho'e 'ahuru mā piti nu'u hāpī 'ā'ana. He haka hāhine ki a Ietū he hoŋi. ⁴⁸ He kī e Ietū: «E Hura, ¿hai hoŋi koe i ho'o ai i te Poki o te taŋata?».

⁴⁹ I anji-anji era e te nu'u o muri i a Ietū i te me'e ka topa era, he 'ui:

—E Ietū, 'ī e ai rō 'ā te mātou hoe. ¿E moto rō e mātou?

⁵⁰ E tahi o roto o rā nu'u hāpī era he pa'o i te tariŋa mata'u o te tāvini o te oromatu'a hope'a o te ra-rahi. ⁵¹ He kī e Ietū:

—¿Ē, 'ina ko moto!

He haka puā ia a Ietū i te rima ki te tariŋa o tū tāvini era 'e he ora rō 'ai. ⁵² I oho era he kī ki te nu'u oromatu'a ra-rahi, ki te ŋāŋata he kape o te mūto'i o te Kona Ha'amuri 'Atua 'e ki te nu'u pū'oko haka tere o te hūrio oho mo 'a-'aru i a ia: «¿He toke-toke 'ō a au i oho mai ai kōrua e ma'u-ma'u rō 'ana i te hoe 'e i te miro mo 'a-'aru i a au? ⁵³ Paurō te mahana 'i muri i a kōrua 'ana a au 'i te Kona Ha'amuri 'Atua, 'e 'ina kōrua he 'a-'aru i a au. 'E, hora mau nei 'ā he pō, he hora o kōrua, he hora o Rukifero».

He kī iŋa o Pētero kai 'ite a ia ko ai a Ietū

(Māteo 26.57-58,69-75; Marko 14.53-54,66-72; Iovani 18.12-18,25-27)

⁵⁴ He 'a-'aru ia i a Ietū, he ma'u he oho ki te hare o te oromatu'a hope'a o te ra-rahi. 'E a Pētero, e haka 'ava-'ava rō 'ā, e oho era 'i tu'a.

⁵⁵ 'I haho o rā hare, e hū rō 'ā te ahi 'e e no-noho rō 'ā te nu'u 'i te kao-kao. He oho a Pētero he noho 'i muri i rā nu'u. ⁵⁶ 'I te mā'eha o te ahi he take'a e te vi'e tāvini e tahi i a Pētero. He noho he u'i riva-riva 'e he kī:

—Te kope nei o roto o te nu'u oho 'i muri i a Ietū.

⁵⁷ He kī e Pētero:

—Kai 'ite a au ko ai te kope ena.

⁵⁸ I hini era he take'a e te rua kope he kī ki a Pētero:

—A koe o roto i rā nu'u.

He pāhono e Pētero:

—Ē, ta'e a au o te nu'u era.

⁵⁹ Ko roa 'ana te hora, he kī e te toru kope:

—¿Ko 'ite 'ā kōrua? Te io nei o muri i a Ietū. O Karirea tako'a, pa'i, a ia.

⁶⁰ He kī haka 'ou e Pētero:

—Ē, kai 'ite a au he aha ta'a me'e ena e kī mai ena.

'I tū hora mau era 'ana, e vānaŋa nō 'ā a Pētero, he 'o'oa te moa. ⁶¹ He hāru i a Ietū he u'i ki a Pētero. He topa te mana'u o Pētero ki tū me'e kī era e Ietū: «'Arīnā mau nei 'ā, e ko 'o'oa hia te moa, ka kī rō ena e koe e toru kī iŋa kai 'ite koe ko ai a au». ⁶² He e'a ia a Pētero he oho mai tū kona era 'e he to'o rō atu 'ai te taŋi.

He haka me'e-me'e iŋa i a Ietū

(Māteo 26.67-68; Marko 14.65)

⁶³ Te nu'u 'auario i a Ietū he haka me'e-me'e koia ko tiŋa'i. ⁶⁴ He puru i te mata, 'ai ka 'ui: «¿Ka kī mai rā 'a 'ai koe te pu'a atu!».

⁶⁵ He vā-vā koia ko kī i te tētahi huru o te vānaŋa ta'e tano.

Ko Ietū 'i mu'a o te nu'u hūrio ra-rahi

(Māteo 26.59-66; Marko 14.55-64; Iovani 18.19-24)

⁶⁶ I 'ōtea era he taka-taka tahi te [nūna'a taŋata i a rāua te kī iŋa hope'a o te haka tere hūrio]: he nu'u pū'oko haka tere hūrio, he oromatu'a ra-rahi, 'e he ma'ori o te haka tere hūrio. He ma'u ia i a Ietū ki mu'a o rā nūna'a. 'I ira i kī ai:

⁶⁷ —Mo ai ō'ou he [Kiritō], ka kī mai.

He me'e ia e Ietū:

—Mo kī atu ō'oku 'ē-ē, e ko haka roŋo mai e kōrua.
⁶⁸ 'E mo 'ui atu ō'oku e tahi me'e, e ko pāhono mai e kōrua.
⁶⁹ Tā'aku me'e nō mo kī atu: e ko roa ka noho rō ena te Poki o te taŋata 'i te pā'iŋa mata'u o te 'Atua, i a ia te pūai ta'ato'a.

⁷⁰ He 'ui e tū nu'u ta'ato'a era:

—Ki ta'a kī, ǰhe Poki mau 'ā koe o te 'Atua?

He pāhono e Ietū:

—Nā e kōrua ko kī 'ā.

⁷¹ He me'e e rā nu'u:

—ǰMo aha nō o tātou te mata'ite? Mai tō'ona haha mau 'ā i ŋaro'a nei e tātou a ia he Poki o te 'Atua.

A Ietū 'i mu'a o Pirato

(Māteo 27.1-2,11-14; Marko 15.1-5; Iovani 18.28-38)

23 He e'a tahi tū nu'u era he ma'u he oho i a Ietū ki mu'a o Pirato. ² He kī:

—E Pirato, i rava'a ai e mātou i te taŋata nei e haka tumu 'ana i te ture. E kī 'ā 'ina ko 'auhau ki te 'ariki rōmano i te moni kī mo 'auhau, 'e pē nei tako'a i kī ai: ko ia te [Kiritō] 'e te 'Ariki.

³ He 'ui e Pirato:

—ǰHe 'Ariki koe o te [hūrio]?

He pāhono e Ietū:

—'Ā'au i kī.

⁴ He kī ia e Pirato ki tū ŋā [oromatu'a ra-rahi] era 'e ki te taŋata ta'ato'a 'i ira:

—Ki tō'oku u'i, 'ina e tahi me'e rake-rake o te taŋata nei i aŋa ki tano ai mo haka ūtu'a.

⁵ He 'ata kī e tū nu'u era:

—Hai hāpī 'ā'ana e haka tumu ena i te ture 'i roto i te taŋata. I ha'amata ai 'i Karirea, 'e, hora nei, 'I e aŋa 'ā 'i Hūrea.

'I mu'a i a ['Erore] a Ietū

⁶ I ŋaro'a era e Pirato i te me'e kī e rā nu'u, he 'ui hoki a Ietū o Karirea, kona haka tere e 'Erore. ⁷ He pāhono e rā nu'u: «'Ē-ē, o rā kona».

I ŋaro'a era e Pirato, he kī mo ma'u ki a 'Erore 'i te ai 'i Hērutarema a 'Erore 'i rā ŋā mahana.

⁸ I take'a era e 'Erore i a Ietū, he to'o rō atu 'ai te koa 'i te me'e i rahi rō te mahana i pohe mo māhani ki a Ietū, he rava ŋaro'a i te vānaŋa o ruŋa i a ia. Te haŋa o

'Erore mo take'a i te mana aŋa e Ietū. ⁹ Me'e rahi te me'e i 'ui, 'e, 'ina kai pāhono e Ietū.

¹⁰ 'I muri i a 'Erore te oromatu'a ra-rahi 'e te [ma'ori o te haka tere hūrio] 'ai e kī era: a Ietū e aŋa rō 'ana i te me'e ta'e tano. ¹¹ He ha'amata ia a 'Erore ananake ko tā'ana mūto'i he vā-vā 'e he haka me'e-me'e i a Ietū. He haka uru hai kahu hope'a o te tau, 'ai ka haka hoki haka 'ou ki a Pirato. ¹² 'I rā mahana i riro ai a 'Erore ararua ko Pirato he repahoa; 'i mu'a 'ana he moto nō te aŋa o rāua.

Te ūtu'a mo Ietū he mate

(Māteo 27.15-26; Marko 15.6-15; Iovani 18.39-19.16)

¹³ He haka taka-taka e Pirato i te oromatu'a ra-rahi, i te nu'u ra-rahi 'e i te taŋata ta'ato'a o ira ¹⁴ he kī:

—A kōrua i ma'u mai i te kope nei koia ko kī mai e haka moto 'ā i te taŋata. I 'ui rō e au 'i mu'a i a kōrua 'e 'ina he hape ō'ona e au i rava'a o te me'e ta'ato'a kī mai e kōrua. ¹⁵ Pē ira 'ā a 'Erore, 'e nā ko haka hoki haka 'ou mai 'ā. 'Ī a au he kī atu: kai rava'a e au e tahi hape o te taŋata nei ki haka ūtu'a ai hai mate. ¹⁶ 'Ī he haka tiŋa'i hai 'uaka, ki oti he haka rē i a ia mo oho. [¹⁷ 'I te [ŋoŋoro he Pakate], e ai rō 'ā te me'e rava aŋa e Pirato, he haka e'a e tahi kope puru mo haka koa o te taŋata.]

¹⁸ He ohu ia e te nu'u:

—ǰKa haka kore te kope ena 'e ka haka e'a mai a Varavā!

¹⁹ Te taŋata nei i puru ai 'o te haka tumu i te ture ki te nu'u ra-rahi o te rōmano 'e 'o te tiŋa'i 'o te haka mate i te taŋata e tahi.

²⁰ A Pirato, 'i te haŋa mo haka e'a i a Ietū, he vānaŋa haka 'ou ki te taŋata. ²¹ 'E 'ina he haka roŋo e te nu'u; 'ai e 'ata ohu era:

—ǰKa veo 'i ruŋa i te tātaurō!

²² He toru kī iŋa nei o Pirato ki te nu'u:

—ǰHe aha tā'ana me'e ta'e tano i aŋa? 'Ina e tahi me'e rake-rake e au i take'a mo haka ūtu'a i a ia hai mate. 'Ī a au he haka tiŋa'i. Ki oti he haka rē mo oho.

²³ 'E te taŋata, 'ai e 'ata ohu era:

—ǰKa veo 'i ruŋa i te tātaurō!

'I te rahi o te ohu-ohu iŋa, he haka roŋo e Pirato. ²⁴ He aŋa ia i tū me'e ohu era. ²⁵ He haka e'a i a Varavā, taŋata puru era 'o te haka tumu i te ture 'e 'o te tiŋa'i 'o te haka mate i te taŋata e tahi, 'e he va'ai i a Ietū ki te va'e hau mo aŋa i tū me'e ohu era e te taŋata.

He veo iŋa i a Ietū 'i ruŋa i te tātaurō
(Māteo 27.32-44; Marko 15.21-32; Iovani 19.17-27)

²⁶ I ma'u i oho era i a Ietū mo tiŋa'i 'i ruŋa i te tātaurō, 'i te ara te taŋata e tahi o te kona ko Tīrene, te 'iŋoa ko Tīmona, e vari 'ana a ira mai 'uta. He to'o mai e te va'ehau i rā taŋata, he haka 'amo i te tātaurō 'amo e Ietū 'e he haka oho 'i tu'a.

²⁷ Me'e rahi te nu'u oho 'i tu'a o Ietū, 'e 'i roto te nā vi'e e ta-taŋi 'ā 'i te 'aroha i a ia. ²⁸ He hāruī he u'i e Ietū 'e he kī:

«E te nā vi'e o Hērutarema ē, 'ina kōrua ko ta-taŋi mō'oku. Ka ta-taŋi mo te kōrua nā poki 'e mo kōrua mau 'ā. ²⁹ Nā e tu'u rō te mahana e kī rō: “iKo te koa i te nā vi'e pa'a, i te nā vi'e kai a'u i te poki 'e i te nā vi'e kai matu'a vahine!” ³⁰ 'I rā nā mahana e kī tako'a rō e te nu'u: “E te ma'uŋa ē, ka tanu mai koe i a mātou”.

³¹ Mo ai 'i e aŋa mai 'ana i te nā me'e nei 'i ruŋa i a au, he tumu ta'e paka-paka, zhe aha rā nei te me'e ka aŋa atu ena ki a kōrua ki te tumu paka-paka?».

³² I ma'u tako'a rō e rua kope taparahi-ta'ata mo tiŋa'i 'i ruŋa i te tātaurō 'i muri i a Ietū. ³³ I tu'u era ki te kona kī Kona o te Pakahera Taŋata Mate, he veo i a Ietū 'i ruŋa i te tātaurō 'e i tū nā kope era hoko rua 'i ruŋa i to rāua, e tahi 'i te pā'iŋa mata'u 'e te rua 'i te pā'iŋa mau. [³⁴ He kī a Ietū: «E Koro, ka haka rehu koe i te me'e aŋa mai e te nu'u nei; kai 'ite e aha 'ā a rāua».]

Te va'ehau ia ko no-noho ko pere 'ā i te kahu o Ietū mo u'i ki a ai ki a ai ana topa. ³⁵ 'I ira te nu'u e u'i 'ana; 'e te nu'u ra-rahi e haka ka-kata 'ā: «Ko haka e'a 'ana i te tētahi taŋata mai roto i te rāua 'ati. Mo ai he [Kiritō] mau 'ā 'e o te 'Atua i ŋa mai, ka haka ora i a ia 'ā 'i te hora nei».

³⁶ Te va'ehau tako'a e haka me'e-me'e 'ana ki a Ietū hai va'ai hai 'ava moni ta'e rahi ³⁷ 'e hai kī pē nei ē: «iMo ai ō'ou he 'Ariki o te hūrio, ka haka ora koe i a koe 'ā!».

³⁸ 'I ruŋa i te pū'oko o te tātaurō o Ietū e tau rō 'ā e tahi miro pararaha e hā'aki rō 'ana: «He 'Ariki o te hūrio».

³⁹ E tahi o tū nā taparahi-ta'ata veo era 'i muri i a Ietū pē rā 'ā e kī era:

—Mo ai ō'ou he Kiritō, zka haka ora koe i a koe 'e pē ira 'ā i a māua!

⁴⁰ He ture e tū rua kope era o muri i a Ietū he kī:

—z'Ina ō koe he ri'a-ri'a 'i te 'Atua, ka ai atu 'i tāua ko haka ūtu'a 'ā pa he haka ūtu'a iŋa ena i a ia? ⁴¹ Te ūtu'a nei e tano rō 'ā mo tāua, he 'auhau o te me'e ta'e tano aŋa. 'E te taŋata ena 'ina e tahi ō'ona hape.

⁴² He kī haka 'ou e tū kope era:

—E Ietū, e mana'u koe ki a au 'i te hora o tu'u haka tere iŋa pa he 'ariki.

⁴³ He pāhono e Ietū:

—'I a au he kī atu: 'arīnā mau nei 'ā 'i muri i a au koe 'i te kona o tō'oku Matu'a.

He mate iŋa o Ietū

(Māteo 27.45-56; Marko 15.33-41; Iovani 19.28-30)

⁴⁴ Mai te hora kai ki te hora toru o te ahi-ahi i pōhāhā tahi ai te henua. ⁴⁵ Kai mā'eha haka 'ou te ra'ā, 'e te kahu puru i te kona hope'a o te mo'a o roto i te [Kona Ha'amuri 'Atua] he paihi a vāeŋa. ⁴⁶ 'E a Ietū i haka pūai i oho ai: «iE Koro ō'oku ē, 'i a au he va'ai atu, 'i te hora nei, i tō'oku vārua ki tu'u rima!».

I oti era te kī i te me'e nei he mate.

⁴⁷ I take'a era e te kape o te rōmano i rā me'e, he ha'ahana-hana ki te 'Atua 'e he kī: «He aŋi 'ā tū taŋata nei taŋata hape kore».

⁴⁸ Te nu'u ta'ato'a take'a i rā me'e he e'a he oho mai ira ko 'aroha atu 'ā. ⁴⁹ Te repahoa ta'ato'a o Ietū 'e te nā vi'e oho mai Karirea 'i muri i a ia mai kōnuī 'ā e noho e u'i era.

He haka rē iŋa i te hakari o Ietū

(Māteo 27.57-61; Marko 15.42-47; Iovani 19.38-42)

⁵⁰⁻⁵¹ E ai rō 'ana e tahi taŋata riva aŋa i te me'e tī-tika te 'iŋoa ko [Kōsē] o te kona ko Ārimatea, he kona o Hūrea. A ia o roto o te [nūna'a taŋata i a rāua te kī iŋa hope'a o te haka tere hūrio]. A Kōsē e tiaki 'ā ki te tu'u iŋa mai o te haka tere iŋa 'āpī o te 'Atua, 'e 'ina kai pe'e ki tū me'e aŋa era ki a Ietū e tū nūna'a taŋata era.

⁵² He oho ki a Pirato he ani mo va'ai i te hakari o Ietū. ⁵³ I haka topa era mai ruŋa i te tātaurō, he viri hai tāvana rino, 'ai ka ma'u ka haka rē 'i roto i te kona pa he piha i ka-karo 'i roto i te mā'ea mo te pāpaku, kona kai haka rē 'ā te pāpaku ra'e. ⁵⁴ Rā mahana he mahana haka riva-riva mo te rua mahana he [mahana haka ora].

⁵⁵ Te nā vi'e tu'u 'i muri i a Ietū mai Karirea he oho he u'i i tū kona era 'e pē hē i haka rē ai i te hakari o Ietū.

⁵⁶ I oti era he hoki ki te hare, he aŋa he haka rito i te mano'i 'e i te me'e haka 'ou mo paru o te hakari o Ietū. 'E, 'i te ai ko tano 'ā te mahana haka ora, he haka ora rā nā vi'e, pa he me'e kī e te rāua haka tere iŋa.

He haka 'ite i te ora iŋa o Ietū mai te mate

(Māteo 28.1-10; Marko 16.1-8; Iovani 20.1-10)

24 'I te mahana ra'e o te tāpati, he mahana tāpati, 'i te pō era 'ā, he hoki rā nā vi'e ki te kona haka rē i te hakari o Ietū e ma'u rō 'ana i te mano'i haka rito

† Te korotina paihi topa era e rua pā'iŋa 'i te hora mate era o Ietū, kahu hio-hio, te peŋo-peŋo e haka pā e rua maŋa-maŋa tumu. Hai rā kahu e puru era i te kona hope'a o te mo'a o roto o te Kona Ha'amuri 'Atua o Hērutarema. He oromatu'a hope'a o te ra-rahi mau nō te me'e uru ki roto e tahi mahana 'i te matahiti. Te topa o rā korotina e rua pā'iŋa te aura'a: hai mate iŋa era o Ietū i ha-hata ai te ara mo tu'u o te taŋata hai ia 'ā ki muri i te 'Atua, 'e, tako'a, ta'e hai tūtia.

e rāua mo paru o tō'ona hakari. ²I tu'u era ananake, he take'a ko haka tapa 'ā te mā'ea puru o rā kona. ³He uru 'e 'ina kai take'a i te hakari o Ietū, ⁴'e 'ina he anjani he aha te aura'a o tū me'e era.

He take'a ia ka māroa 'i muri i a rāua e rua taŋata e uru rō'ana i te kahu e 'uira rō 'ā. ⁵I take'a era, he tū-turi he noi he haka puā i te rāua tira ki ruŋa i te 'ō'one ko mate 'ana 'i te ri'a-ri'a. He kī e tū nā kope era:

«¿He aha kōrua e kimi ena i te taŋata ora a te kona o te taŋata mate? ⁶'Ina o nei, ko ora haka 'ou 'ā. E man-a'u kōrua i te me'e kī atu e ia 'i te hora 'i Karirea 'ana: ⁷Te [Poki o te taŋata] e va'ai rō ki te rima o te nu'u hara, e tiŋa'i rō 'i ruŋa i te tātaurō 'e 'i te toru mahana he ora haka 'ou».

⁸He topa te mana'u o tū nā vi'e era ki rā vānaŋa. ⁹I hoki era mai rā kona, he 'a'amu i tū me'e ta'ato'a era ki te ho'e 'ahuru mā ho'e ['āpōtoro] 'e ki te nu'u ta'ato'a o ira. ¹⁰Te 'iŋoa o rā nā vi'e ko Māria Matarena, ko Huana, ko [Māria], matu'a o [Tanatiako], 'e he tētahi atu nā vi'e. ¹¹Te mana'u o te 'āpōtoro he 'a'amu e tahi o rā nā vi'e, 'e 'ina he haka roŋo.

¹²Ka ai atu pē ira, he tahuti he oho a Pētero ki tū kona haka rē era i te hakari o Ietū. I noi i oŋa era, he tāvana nō te me'e i take'a. He hoki ki te hare koia ko māere 'i tū me'e era.

'I te ara ki Emaū

(Marko 16.12-13)

¹³'I rā mahana mau 'ā, he e'a he oho e rua nu'u hāpī 'a Ietū ki te kona te 'iŋoa ko Emaū. Te roa o rā kona mai Hērutarema e rua hora tūma'a mo ha'ere. ¹⁴E 'a'amu e oho 'ana ararua 'i te ara o ruŋa o tū me'e ta'ato'a topa era ki a Ietū.

¹⁵E vānaŋa nō 'ana, he haka hāhine a Ietū ki muri, he hā'ere he oho ananake. ¹⁶Ka ai atu 'i muri i a rāua, 'ina he anjani he ta'e ha'ati'a mo 'ite ko Ietū 'ō rā me'e.

¹⁷He 'ui e Ietū:

—¿He aha rā te kōrua me'e e vānaŋa ena?

He māroa rā nā kope ko koromaki atu 'ā. ¹⁸E tahi o rāua te 'iŋoa ko Kereofa i pāhono:

—¿Ko koe mau nō te taŋata 'i Hērutarema i ta'e 'ite he aha te me'e i topa 'i ira 'i tū nā mahana nei?

¹⁹He 'ui e Ietū:

—¿He aha rā te me'e i topa?

He kī e rā nu'u:

—He me'e i topa ki a Ietū o Nātāreta. A ia he perofeta pūai e tahi ki te mata o te 'Atua 'e ki te taŋata ta'ato'a hai me'e aŋa 'e vānaŋa e ia. ²⁰'E, i to'o nō e te [oromatu'a] 'e e te nu'u ra-rahi he va'ai mo haka ūtu'a 'e mo tiŋa'i 'i ruŋa i te tātaurō. ²¹I mana'u ai a mātou

mā'ana e haka e'a i te itaraera mai roto i te 'ati. Ka toru mahana a tu'a o te topa o te me'e nei.

²²»'E, i māere rō mātou 'i te vānaŋa kī mai e te tētahi nā vi'e o mātou. I oho rō rāua, 'i te pō era 'ā, ki te kona haka rē era i te hakari o Ietū, ²³'e kai take'a i tō'ona hakari. I hoki mai era ananake, he 'a'amu mai ko take'a 'ā e rāua e rua merahi, 'e i kī rō ko ora 'ā a Ietū mai te mate. ²⁴I oho rō te tētahi nu'u haka 'ou o mātou mo u'i 'e he take'a i rā kona pa he me'e kī e rā nā vi'e, 'e kai take'a tako'a i a Ietū.

²⁵He kī ia e Ietū:

—¿Ko te aŋa ri'a-ri'a i a kōrua mo [haka moe i te mana'u] 'i ruŋa i te me'e ta'ato'a pāpa'i e te perofeta o ruŋa i te [Kiritō]! ²⁶¿Ta'e 'ō 'i ra'e te nā me'e ta'ato'a ena ana topa ki a ia, 'e 'ai ka va'ai iho e te 'Atua i te tōro'a he Pū'oko Haka Tere o te me'e ta'ato'a?

²⁷He ha'amata ia he haka anjani he oho ki tū nā kope era i te me'e ta'ato'a pāpa'i o ruŋa i a ia 'i ruŋa i te [Pāpa'i Mo'a], i ha'amata ai mai te nā puka pāpa'i era e [Mōtē] ki te puka ta'ato'a pāpa'i e te perofeta.

²⁸I tu'u era ananake ki te kona ki ira e oho era, he haka tu'u a Ietū pa he me'e: he oho rō 'ai a ia. ²⁹He kī e tū nu'u era:

—Ka noho mai koe. Nā ko ahi-ahi 'ā 'e pe te 'ata pō e oho ena.

He uru ia a Ietū ki roto i te hare he noho ananake. ³⁰I noho era 'i ruŋa i te 'amurama'a mo kai, he to'o e Ietū i te haraoa ki tō'ona rima, he māuru-uru ki te 'Atua, he mo-more 'e he va'ai ki rā nā kope. ³¹'I rā hora i ha'ati'a iho ai e te 'Atua mo anjani ko Ietū 'ō rā me'e. 'I tū hora mau era 'ā i ŋaro ai a Ietū.

³²He kī e tū nā kope era ki a rāua 'ā: «¿'O ira mau 'ana 'ō tāua e ŋaro'a era i te ora 'i roto i te māhatu e haka anjani mai era e ia 'i te ara o ruŋa i te Pāpa'i Mo'a!».

³³'I rā hora 'ā he e'a ararua he hoki ki Hērutarema. I tu'u era he take'a e taka-taka rō 'ana tū nu'u 'āpōtoro era e ho'e 'ahuru mā ho'e 'e tētahi nu'u haka 'ou o rāua. ³⁴He kī e rā nu'u ki tū nā kope era hoko rua: «¿He parauti'a ko ora haka 'ou 'ana a Ietū; ko haka take'a 'ā i a ia ki a Timona!».

³⁵He 'a'amu ia e tū nā kope era i tū me'e topa era 'i te ara, 'e pē hē i anjani ai e rāua i a Ietū 'i te hora mo-more i te haraoa.

He haka take'a iŋa o Ietū i a ia

(Māteo 28.16-20; Marko 16.14-18; Iovani 20.19-23)

³⁶E vānaŋa nō 'ana ananake i o'o ai a Ietū ki vāeŋa o rāua he 'aroha: «Ka ai 'i ruŋa i a kōrua te haumārū o te 'Atua».

³⁷He ri'a-ri'a tū nu'u era. Pē nei e mana'u era: ko take'a 'ana e rāua i te vārua. ³⁸He kī e Ietū: «¿He aha rā kōrua e ri'a-ri'a ena 'e e 'aka-'aka ena te mana'u?

³⁹Ka u'i mai rā tō'oku rima 'e tō'oku va'e. Ka hāhā mai

rā: 'ina he ivi 'e he hakari o te vārua pa he me'e ena o kōrua e u'i mai ena. Ko au mau 'ā te me'e nei».

⁴⁰ I oti era te kī i tū vānaŋa era, he haka take'a i tō'ona rima 'e i tō'ona va'e. ⁴¹ He māere tū nu'u era koia ko koa, 'e, ka ai atu pē ira, ko te 'aka-'aka iŋa 'ana te mana'u pē nei ē: ko Ietū 'ō rā me'e. 'O ira i 'ui ai e Ietū: «¿'Ina 'ō kōrua me'e mo kai?».

⁴² He va'ai e rā nu'u e tahi parehe ika i tunuahi. ⁴³ He to'o e Ietū 'e he kai mo aŋi-aŋi e rāua ta'e a ia he vārua.

⁴⁴ I oti era he kī: «Te me'e topa mai nei he me'e ko haka 'ite atu era 'ā e au 'i mu'a 'ā pē nei ē: te me'e ta'ato'a pāpa'i e Mōtē, e te perofeta 'e 'i ruŋa i te puka o te hīmene o ruŋa i a au e haka tano tahi rō».

⁴⁵ He haka aŋi-aŋi ia ki tū nu'u era 'ā'ana i te ha'aau-ra'a o te me'e pāpa'i 'i ruŋa i te Pāpa'i Mo'a o ruŋa i a ia, ⁴⁶ he kī:

«Pē nei i pāpa'i ai: e mate rō te Kiritō, e ora haka 'ou rō 'i te toru mahana, ⁴⁷ 'e hai 'iŋoa ō'ona ka haka 'ite

ka oho ena ki te nu'u, mai Hērutarema ki te henua ta'ato'a o te ao, mo huri o te mana'u ki te 'Atua ki haka kore ai i te hara.

⁴⁸ »E haka 'ite kōrua i te me'e ta'ato'a nei 'o te ai he mata'ite kōrua. ⁴⁹ 'E a au e haka turu rō mai ki ruŋa i a kōrua i te [Vārua Maitai] hōrea atu e tō'oku Matu'a. Ka noho kōrua 'i nei 'i Hērutarema 'ātā ki te topa iŋa atu ō'ona ki ruŋa i a kōrua».

He iri iŋa o Ietū ki te raŋi

(Marko 16.19-20)

⁵⁰ He oho ia a Ietū ananake ko tū nu'u era ki Vētānia. I tu'u era he ma'u a Ietū i tō'ona rima a ruŋa he ha'amaitai i rā nu'u. ⁵¹ E ha'amaitai nō 'ana he ha'amata he iri he oho ki te raŋi. ⁵² He ha'amuri ia rā nu'u ki a Ietū.

I oti era he hoki tahi ki Hērutarema ko koa atu 'ana. ⁵³ Te aŋa ananake he noho 'i te [Kona Ha'amuri 'Atua] 'e he ha'ahana-hana ki a ia.

IOVANI

O te nā 'evaneria ena e hā o ruŋa i te Pīpīria, te 'evaneria haka aŋi-aŋi riva-riva mai: a Ietū Kiritō he 'Atua 'ina ō'ona ha'amata 'e 'ina ō'ona hope'a ko te 'evaneria nei 'a [Iovani]. Te kope nei ko Iovani he 'āpōtoro 'a Ietū Kiritō ararua ko tō'ona taina ko [Tanatiako].

'I te ha'amata iŋa o te puka nei 'a Iovani e haka 'ite mai ena pē nei ē: 'i ra'e ki te aŋa i te ao 'e i te me'e ta'ato'a, ko ai era 'ana te Vānaŋa (1.1), 'e he haka 'ite tako'a mai: rā Vānaŋa i noho rō 'i roto i a tātou pa he taŋata (1.14). Hai vānaŋa ta'e aŋarahi mo aŋi-aŋi i haka 'ite mai ai e Iovani: rā Vānaŋa ko Ietū, Poki o te 'Atua 'e 'Ariki o Itaraera (1.49).

Ki oti te haka aŋi-aŋi mai i te parauti'a nei, he 'a'amu mai e Iovani i te mana aŋa e Ietū mo haka aŋi-aŋi ki te nu'u ko ai mau a ia. Rā nā mana ko te nā mana nei: he haka riro iŋa i te vai he vino (2.1–11); he haka ora iŋa i te poki o te kape o te rōmano (4.46–54); he haka ha'ere iŋa i te kope hakari ta'e makenu (5.1–18); he hāŋai iŋa i te nu'u e pae ta'utini (6.1–14); he ha'ere iŋa a ruŋa i te vaikava (6.16–21); he haka ora iŋa i te mata o te taŋata matapō (9.1–12); 'e he haka ora iŋa i te taŋata mai te mate (11.1–44).

'E, ki haka mao te 'a'amu mai o ruŋa i te mana aŋa e Ietū, he haka 'ite mai e Iovani o ruŋa i te me'e i vānaŋa e Ietū ananake ko tā'ana nu'u hāpī mo māhani riva-riva o rāua ki a ia, 'e mo aŋi-aŋi e rāua he aha te me'e mo topa pe mu'a ka oho ena (12–17). E vānaŋa era e Ietū ki rā nu'u ta'e toe pa he ma'ori hāpī o rāua, e vānaŋa era pa he repahoa (15.15). 'O ira e vānaŋa tī-tika tahi era i te me'e ki rā nu'u (16.25–30), 'e e no-no'i era ki te 'Atua Matu'a mo hāpa'o 'e mo haka riro i te nu'u nei e tahi nō mana'u pē rāua ko te 'Atua (17.1–26).

Rauhuru te me'e topa kē o te 'evaneria nei 'a Iovani ki te tētahi atu 'evaneria. E tahi o rā nā me'e he huru o te haka 'ite iŋa o Ietū ko ai a ia. E kī era i a ia: he haraoa va'ai i te ora (6.35); he mōrī haka mā'eha i te taŋata o te ao nei (8.12); he taŋata hāpa'o riva-riva i te māmoē (10.11); he kope va'ai i te ora 'e haka ora haka 'ou i te nu'u mate (11.25); he ara, he parauti'a, 'e he ora (14.6); 'e he tumu vino parauti'a (15.1).

Te parauti'a ta'ato'a nei 'e te tētahi haka 'ou atu parauti'a o ruŋa i a Ietū 'i ruŋa i te 'evaneria nei. 'E te vānaŋa 'ata nehe-nehe ko te vānaŋa kī mau era 'ā e Ietū pē nei ē: (3.16). I pāpa'i ai a Iovani o ruŋa i te haŋa o te 'Atua ki te taŋata ta'ato'a o te ao ki aŋi-aŋi ai e te ta'ato'a e haŋa rō 'ā te 'Atua mo e'a o te taŋata mai roto i te ūtu'a o te hara 'e mo rava'a i te ora 'āpī 'ina he hope'a ra'a hai haka moe i te mana'u 'i ruŋa i a Ietū, he [Kiritō], he Poki o te 'Atua (20.31).

He ha'amata

1 'I te hora era kai aŋa 'ā te ao,
ko ai era 'ana te Vānaŋa,
'e rā Vānaŋa ararua ko te 'Atua
'e a ia he 'Atua.

² Ko ai nō era 'ana te Vānaŋa 'i rā hora ararua ko te 'Atua.

³ 'E hai Vānaŋa te 'Atua i aŋa ai i te me'e ta'ato'a;
'ina e tahi me'e i ai i ta'e aŋa hai ia.

⁴ Mai i a ia e rava'a ena te ora parauti'a
'e rā ora pa he mōrī haka mā'eha i te mana'u o te taŋata.

⁵ Te mōrī nei e mā'eha rō 'ana 'i roto i te pō'uri,
'e e ko rava'a e te pō'uri mo haka pōhāhā.

⁶ I ai rō e tahi taŋata i uŋa mai e te 'Atua te 'Ūŋoa ko [Iovani]. ⁷ I oho mai ai pa he mata'ite mo vānaŋa o ruŋa i rā mōrī mo haka moe o te taŋata ta'ato'a i te rāua mana'u 'i ruŋa i rā mōrī hai vānaŋa era 'ā'ana.

⁸ Ta'e ko Iovani te mōrī; a ia he kope uŋa nō mai mo

haka 'ite mai ko ai rā mōrī. ⁹ 'E, te mōrī haka mā'eha i te taŋata ta'ato'a e ko roa he oho mai ki te ao.

¹⁰ I noho rō te Vānaŋa 'i ruŋa i te henua,
'e, ka ai atu hai ia te 'Atua i aŋa ai i te ao,
kai 'ite e te taŋata ko ai a ia.

¹¹ Ki te ao aŋa era e ia i oho mai ai,
'e kai tapa atu e te rahi ra'a o tō'ona taŋata.

¹² 'E te nu'u to'o 'e haka moe i te mana'u 'i ruŋa i a ia,
ki a rāua i va'ai ai i te parau mo riro he nā poki o te 'Atua.

¹³ A rāua he nā poki o te 'Atua
ta'e 'ō 'o te poreko mai roto i te vi'e ararua ko te taŋata,
'o te ai ko poreko haka 'ou 'ā mai te 'Atua.

¹⁴ Tū Vānaŋa era i riro rō he taŋata
'e i noho rō 'i muri i a tātou.
Ko take'a 'ana e tātou tō'ona pūai,
pūai va'ai e te 'Atua Matu'a ki tā'ana Poki era e tahi mau nō.

Te haŋa o te 'Atua mo tātou
'e te parauti'a o ruŋa ō'ona
i haka take'a mai ai 'i ruŋa i a ia.

¹⁵ I vānaŋa rō a Iovani o ruŋa i a ia 'e pē nei i kī ai:
«Ko ia tā'aku me'e kī atu era: "I tu'a ō'oku ka oho mai
ena e tahi taŋata 'ata hōnui ki a au 'o te ai 'i ra'e ki
tō'oku poreko iŋa ko ai era 'ana a ia"».

¹⁶ 'E, 'i te riva rahi ō'ona, he ha'amaitai nō mai te aŋa
i a tātou. ¹⁷ Hai [Mōtē] te 'Atua i haka 'ite mai ai i
tā'ana roŋo mo tātou, 'e hai Ietū Kiritō i haka 'ite mai
ai i tō'ona haŋa mo tātou 'e i te parauti'a o ruŋa i a ia.
¹⁸ 'Ina e tahi taŋata i take'a i te 'Atua; o tā'ana Poki nō
era e tahi, he 'Atua, noho 'i muri i a ia, i take'a 'e i haka
'ite mai o ruŋa.

He vānaŋa iŋa o Iovani Papatito o ruŋa i te Kiritō (Māteo 3.11-12; Marko 1.7-8; Ruka 3.15-17)

¹⁹ He vānaŋa nei 'a Iovani 'i te hora uŋa e te nu'u
hōnui [hūrio] i te [oromatu'a] 'e i te [rēvita] mai
Hērutarema mo 'ite ko ai mau a Iovani. He 'ui e rā
nu'u:

—ĶHe Kiritō rō koe?

²⁰ He pāhono e Iovani:

—Ta'e a au he [Kiritō].

²¹ He 'ui haka 'ou:

—ĶKo ai ia a koe? ĶKo te perofeta era ko 'Ēria?

He kī e Iovani:

—Ta'e a au ko ia.

He 'ata 'ui e tū nu'u era:

—ĶKo koe ia te perofeta era mo oho mai?

He pāhono:

—'Ina.

²² He kī:

—ĶKo ai ia a koe? Ka hoki nei, pa'i, mātou e ai te mā-
tou me'e mo kī o ruŋa ō'ou ki te nu'u uŋa mai. ĶE ai rō
'ana ta'a me'e mo kī mai o ruŋa i a koe?

²³ He pāhono e Iovani:

—A au he re'o e ohu 'ana 'i te kona 'one ta'e noho
taŋata: «Ka mātaki e tahi ara tī-tika mo te Kiritō», pa
he kī iŋa era e te perofeta era ko 'Itaia.

²⁴ Tētahi o tū nu'u uŋa era mo vānaŋa ki a Iovani he
[fariseo]. ²⁵ He 'ui e rā nu'u:

—Mo ai ia ta'e koe he Kiritō, ta'e koe ko 'Ēria, 'e ta'e
tako'a koe he perofeta, Ķhe aha ia koe e [papatito]
ena?

²⁶ He kī e Iovani:

—A au e papatito nei hai vai; 'e, nā 'i roto i a kōrua te
kope e tahi kai 'ite 'ā e kōrua ko ai mau a ia. ²⁷ I tu'a i a
au ka tu'u mai ena. 'E, 'i tō'ona hōnui, e ko tano a au
mo noi mo kume i te hau o tō'ona kiriva'e.

²⁸ Te me'e ta'ato'a nei i topa ai 'i te kona te 'iŋoa ko
Vētānia, 'i te rua pā'iŋa o te rio era ko Horotana, he
kona 'i ira a Iovani e papatito era.

A Ietū he Māmoe o te 'Atua

²⁹ 'I te rua mahana, he take'a e Iovani i a Ietū ka pū e
oho atu era. He kī ki te nu'u o ira:

«ĶKa u'i rā kōrua i te taŋata era ai! ĶA ia he Māmoe o
te 'Atua, he tūtia mo haka kore i te hara o te taŋata!
³⁰ O ruŋa i a ia tā'aku vānaŋa kī atu era pē nei ē: "E ko
roa ka tu'u mai ena te taŋata 'ata hōnui ki a au 'i te
me'e era 'i ra'e ki tō'oku poreko iŋa ko ai era 'ana a ia".
³¹ 'I mu'a 'ā 'ina a au kai 'ite ko ai a ia. E papatito e oho
nei a au hai vai mo haka 'ite ki te itaraera ko ai a ia».

³² He kī haka 'ou e Iovani:

«Ko take'a 'ana e au te topa iŋa o te [Vārua Maitai]
mai te ranji pa he pāroma, 'e te noho iŋa 'i ruŋa i a ia.
³³ 'I rā hora kai 'ite hia 'ana a au ko ai rā kope. O te 'At-
ua uŋa mai era i a au mo papatito hai vai i kī mai:
"Taŋata ena ka take'a ena e koe ko topa 'ana te Vārua
Maitai 'e ko noho 'ana 'i ruŋa i a ia, mā'ana e papatito
hai Vārua Maitai". ³⁴ Ko take'a 'ana e au i rā me'e, 'e ko
au te mata'ite: a ia he Poki o te 'Atua».

He nu'u hāpī ra'e 'a Ietū

³⁵ 'I te rua mahana, 'i rā kona haka 'ou 'ā a Iovani
ananake ko tā'ana nu'u hāpī e rua. ³⁶ 'I take'a era ka
vari a Ietū, he kī e Iovani: «ĶKa u'i, he Māmoe rā o te
'Atua!».

³⁷ 'I ŋaro'a era i rā vānaŋa, he e'a he oho rā ŋā kope 'i
tu'a. ³⁸ He hāru i a Ietū, he take'a e oho atu 'ana 'i
tu'a i a ia, 'e he 'ui:

—ĶHe aha te kōrua me'e haŋa?

He kī e rā nu'u:

—E te Ma'ori, e haŋa rō 'ā a māua mo 'ite 'i kona hē
koe e noho ena.

³⁹ He pāhono e Ietū:

† Te nu'u hūrio, 'i mu'a 'ā, e tūtia rō 'ā i te māmoe ki te 'Atua mo
haka kore i te rāua hara. 'E a Ietū i oho mai ai ki te ao nei mo riro ko
ia te tūtia hope'a. 'O ira e kī ena i a ia: Māmoe o te 'Atua.

—Ka oho mai ka u'i 'i kona hē.

He oho ia he u'i e rā nā kope i tō'ona kona noho, 'e he noho 'i muri i a Ietū mai te hora maha o te ahi-ahi 'ātā ki te pō.

⁴⁰ E tahi o rā nā kope nāro'a era i te vānaŋa 'a Iovani oho era 'i muri i a Ietū ko Antarea, taina o Tīmona Pētero. ⁴¹ Te me'e ra'e 'a Antarea i aŋa he kimi i tū taina era o'ona ko Tīmona. I piri era he kī: «Ko māhani 'ana a māua i te [Mētia]». (Mo huri i te vānaŋa nei Mētia ki te [kirieko]: Kiritō).

⁴² He ma'u ia e Antarea i a Tīmona ki tū kona era 'i ira a Ietū. I take'a era e Ietū, he kī: «A koe ko Tīmona, poki 'a Iovani. Tu'u 'iŋoa 'i te hora nei ko Tefa (te aura'a, ko Pētero)».

He to'o iŋa o Ietū i a Feripe 'e i a Natanaera

⁴³ 'I te rua mahana, he e'a he oho a Ietū ki Karirea. 'I ira i piri ai ki a Feripe 'e he kī: «Ka oho mai koe mo taŋata hāpī 'ā'aku».

⁴⁴ A Feripe o te kona e tahi o Karirea te 'iŋoa ko Vetetaira, he kona tako'a o Pētero ararua ko Antarea. ⁴⁵ He e'a he oho a Feripe ki a Natanaera 'e he kī:

—Ko 'ite 'ana a mātou, 'i te hora nei, ko ai te kope haka 'ite mai era e Mōtē 'i ruŋa i te nā puka pāpa'i era e ia, 'e haka 'ite tako'a mai era e te perofeta. Ko Ietū rā kope, he poki 'a [Kōsē] era o Nātāreta.

⁴⁶ He kī e Natanaera:

—ĶE e'a mau rō mai e tahi me'e riva-riva mai Nātāreta?

He pāhono e Feripe:

—Ka oho mai, ka u'i e koe mau 'ā hai mata.

⁴⁷ I u'i era e Ietū ka hāhine mai a Natanaera, he kī:

—'I mau te kope he itaraera parauti'a, e ko kī e tahi reo-reo.

⁴⁸ He 'ui e Natanaera:

—ĶPē hē koe i 'ite ai i tō'oku huru?

He pāhono e Ietū:

—Kai piri atu 'ana a Feripe i take'a rō ai koe e au 'i raro i te tumu pika.

⁴⁹ He kī e Natanaera:

—E te Ma'ori, Ķko koe te Poki o te 'Atua, ko koe te 'Ariki o Itaraera!

⁵⁰ He kī e Ietū ki a Natanaera:

—ĶHe haka moe rō mai 'ai 'ō koe i tu'u mana'u 'i ruŋa i a au 'o te kī nō atu o'oku ko take'a 'ana koe e au 'i raro i te tumu pika? 'I a au he kī atu: nā e nāro'a rō 'e e take'a rō e koe me'e rahi nō atu me'e 'ata hau 'i te nui-nui ki te me'e ena.

⁵¹ He kī ia ki te ta'ato'a: «'I a au he kī atu: e riro rō kōrua he mata'ite o nei nā me'e, 'e te nui-nui e tu'u rō pa he me'e ena: e ha-hata rō 'ā te raŋi, 'e e iri 'e e topa rō mai 'ā te merahi o te 'Atua 'i ruŋa i a au i te [Poki o te taŋata]».

He ŋoŋoro hāipo-ipo 'i Kānā

² 'I te toru mahana he ai e tahi ŋoŋoro hāipo-ipo 'i Kānā, he kona e tahi o Karirea. 'I rā ŋoŋoro te matu'a vahine o Ietū. ² 'I ira tako'a a Ietū ananake ko tā'ana nu'u hāpī. ³ I oti era te vino, he kī e te matu'a vahine o Ietū:

—E haŋu, 'ina he 'ava toe.

⁴ He pāhono e Ietū:

—E nua, Ķhe aha koe e kī mai ena i te me'e ena? Kai tano 'ana, pa'i, tō'oku hora.

⁵ He kī ia e te matu'a vahine o Ietū ki te tāvini o ira: «E aŋa kōrua i te me'e ta'ato'a ka kī atu ena e ia».

⁶ 'I rā kona e ono pāria nu-nui aŋa hai mā'ea, pāria ha'aputu vai o te [hūrio] mo [haka ma'itaki] o rāua mo haka tano ki te rāua haka tere iŋa tupuna. Te rahi o te vai mo 'i o rā nā pāria mai te va'u 'ahuru ki te ho'e hānere ritoro ka tahi. ⁷ He kī e Ietū ki tū nā tāvini era: «Ka ha'a'i te nā pāria ena hai vai».

He ha'a'i e tū nu'u era ki te 'i. ⁸ He kī haka 'ou e Ietū: «Hora ena ka 'u-'utu e tahi 'apa 'ai ka ma'u rō ki te taŋata 'ā'ana te ŋoŋoro i aŋa».

Pē ira i aŋa ai. ⁹ He haka 'atu e tū taŋata era i rā vai ko riro 'ā he vino, 'e 'ina kai 'ite mai hē rā 'ava i e'a mai ai; he tāvini mau nō i 'ite 'o te ai o rāua rā vai i 'u-'utu.

He raŋi mo oho o te taŋata era o'ona te hāipo-ipo ¹⁰ 'e he kī: «Ta'ato'a taŋata 'i ra'e e va'ai ena i te 'ava riva-riva mo unu. Ki rahi te unu o te taŋata, e va'ai iho ena i te 'ava ta'e riva-riva rahi. 'E, a koe ko hāpa'o 'ana i te 'ava hope'a o te riva-riva mo te hora nei».

¹¹ Te me'e aŋa nei e Ietū 'i Kānā o Karirea he mana ra'e aŋa e ia. Pē ira i take'a ai i tō'ona nui-nui 'e he haka moe rō 'ai tā'ana nu'u hāpī i te mana'u 'i ruŋa i a ia.

¹² I oti era te me'e nei he e'a he oho a Ietū ki Kaperenāu koia ko tō'ona matu'a vahine, ko tō'ona nā poki taina 'e ko tā'ana nu'u hāpī. 'Ina kai rahi te rāua mahana i noho ai 'i ira.

He tū-tute iŋa o Ietū i te nu'u

(Māteo 21.12-13; Marko 11.15-18; Ruka 19.45-46)

¹³ 'I te me'e era ko hāhine 'ana te [ŋoŋoro o te hūrio he Pakate], he e'a he oho a Ietū ki Hērutarema. ¹⁴ He take'a 'i roto i te [Kona Ha'amuri 'Atua] i te nu'u ho'o

pua'a, māmoē 'e manu, 'e i te nu'u tauī moni e no-no-ho rō 'ana.

¹⁵ I take'a era e Ietū, he to'o mai i te taura, he haka pā mo 'uaka, 'ai ka tū-tute tahi i tū nu'u era mai roto koia ko te rāua pua'a 'e ko te rāua māmoē. He haka marere tahi e Ietū i te tara 'aurī o te nu'u tauī moni koia ko huri-huri i te 'amurama'a. ¹⁶ 'E ki te nu'u ho'o manu i kī ai: «jKa to'o te me'e ena mai nei! j'Ina ko ha'ariri te kona ha'amuri ki tō'oku Matu'a he kona ho'o me'e o kōrua!».

¹⁷ He topa ia te mana'u o te nu'u hāpī 'ā'ana o ruŋa i te vānaŋa kī 'i ruŋa i te [Pāpa'i Mo'a] pē nei ē: «Tō'oku haŋa mo te kona ha'amuri atu pa he ahi hū 'i roto i tō'oku māhatu».

¹⁸ He kī e te nu'u hūrio ra-rahi:

—Ka aŋa mai koe e tahi mana, ki 'ite ai mātou i a koe 'ō te parau mo aŋa i te ŋā me'e ena.

¹⁹ He pāhono e Ietū:

—Ka haka marere rā te kona nei, 'e e toru nō mahana ko haka tu'u haka 'ou 'ā e au.

²⁰ He kī e te hūrio:

—E maha 'ahuru mā ono matahiti i aŋa ai te kona nei, 'e, jī a koe e toru nō mahana ko tu'u haka 'ou 'ā?

²¹ 'Ina he aŋi-aŋi e rā nu'u pē nei ē: te kona kī era e Ietū ko tō'ona hakari mau era 'ā. ²² 'I te hora ia ko ora 'ana a Ietū mai te mate, i topa iho ai te mana'u o tā'ana nu'u hāpī ki tū vānaŋa era 'ā'ana 'e he 'ite rā nu'u: te me'e hā'aki 'i ruŋa i te Pāpa'i Mo'a 'e te me'e kī era e Ietū o ruŋa o tō'ona ora iŋa mai te mate he parauti'a mau 'ā.

A Ietū e 'ite rō 'ana i te huru o te taŋata

²³ 'I te hora o Ietū 'i Hērutarema mo te ŋoŋoro o te Pakate, nu'u rahi te nu'u i [haka moe i te mana'u] 'i ruŋa i a ia 'o te take'a i te mana e aŋa era. ²⁴ 'E, a Ietū 'ina he va'ai i a ia ki te mana'u o rā nu'u 'o te ai ko 'ite 'ā pē hē te huru o te taŋata ta'ato'a. ²⁵ Mo Ietū e topa nō 'ā te me'e ena he kī ō'ou o ruŋa i te huru o te taŋata. Ko 'ite riva-riva 'ana, pa'i, pē hē te rāua māhatu.

Ko Ietū 'e ko Nikoremo

3 E tahi [fariseo] te 'iŋoa ko Nikoremo, taŋata hōnuī e tahi o te [hūrio], ² he oho 'i te pō e tahi u'i i a Ietū 'e he kī:

—E te Ma'ori, ko 'ite 'ana a mātou o te 'Atua a koe i uŋa mai mo hāpī i te taŋata; 'ina, pa'i, e tahi kope aŋa i te mana aŋa e koe mo kore o te 'Atua o muri.

³ He pāhono e Ietū:

—'Ī a au he kī atu: te taŋata mo ta'e poreko haka 'ou, 'ina e ko o'o ki roto i te [haka tere iŋa 'āpī o te 'Atua].

⁴ He 'ui e Nikoremo:

—jPē hē ia te taŋata pa'ari ana poreko haka 'ou? jE tano mau rō mo uru haka 'ou ki roto i te manava o tō'ona matu'a vahine 'e 'ai ka poreko haka 'ou mai?

⁵ He pāhono e Ietū:

—'Ī a au he kī atu: te taŋata mo ta'e poreko mai roto i te vai 'e mai te [Vārua Maitai], e ko o'o ki roto i te haka tere iŋa 'āpī o te 'Atua. ⁶ Te me'e poreko mai roto i te taŋata he taŋata mau 'ā, 'e te me'e poreko hai pūai o te Vārua Maitai he poki o te 'Atua. ⁷ 'Ina koe ko māere ana kī atu au: e poreko haka 'ou te taŋata ta'ato'a. ⁸ Te tokerau e puhi ena a te kona ta'ato'a nō; ka ŋaro'a atu e koe, e ko 'ite koe mai hē 'e kī hē ka oho era. Pē ira te aŋa iŋa o te Vārua Maitai 'i ruŋa i te taŋata poreko haka 'ou hai pūai ō'ona.

⁹ He 'ui haka 'ou e Nikoremo:

—jPē hē ia te me'e ena?

¹⁰ He pāhono e Ietū:

—jHe ma'ori koe o te itaraera 'e kai 'ite koe i te ŋā me'e ena? ¹¹ 'Ī a au he kī atu: e vānaŋa atu ena o ruŋa i te me'e ko 'ite 'ā 'e ko take'a 'ā e au; 'e, a kōrua 'ina he haka roŋo mai. ¹² Mo ta'e haka roŋo mai o kōrua ki tā'aku me'e e kī atu ena o te ao nei, jPē hē ia kōrua ana haka roŋo mai mo vānaŋa atu ō'oku o ruŋa i te me'e o te raŋi?

¹³ »'Ina 'ā he kope ra'e i iri ki te raŋi, he kope topa nō mai era mai ruŋa, he [Poki o te taŋata]. ¹⁴ Pa he haka tu'u iŋa e [Mōtē] i te pou 'i ruŋa te kōreha 'i te kona 'one ta'e noho taŋata, pē ira tako'a 'ana ka haka tu'u ena i te tātaurō 'i ruŋa te Poki o te taŋata, ¹⁵ ki rava'a ai e te nu'u ta'ato'a [haka moe i te mana'u] 'i ruŋa i a ia te ora 'āpī 'ina he hope'a ra'a va'ai e te 'Atua.

¹⁶ »'I te haŋa rahi o te 'Atua ki te taŋata ta'ato'a o te ao, he va'ai i tā'ana Poki mau nō era e tahi mo mate, 'e nu'u nō era mo haka moe i te mana'u 'i ruŋa, e ko haka tapa e te 'Atua mai muri i a ia 'e e ko haka ūtu'a; he va'ai i te ora 'āpī 'ina he hope'a ra'a. ¹⁷ Te 'Atua 'ina kai uŋa i tā'ana Poki ki te ao mo haka ūtu'a i te taŋata; i uŋa ai mo haka e'a i a rāua mai roto i te ūtu'a o te hara 'e mo va'ai i te ora 'āpī 'ina he hope'a ra'a.

¹⁸ »Te taŋata haka moe i tō'ona mana'u 'i ruŋa i te Poki o te 'Atua e ko haka ūtu'a; 'e te taŋata ta'e haka moe i te mana'u 'i ruŋa i a ia ko ai era 'ana te ūtu'a mō'ona 'o te ta'e haka moe i te mana'u 'i ruŋa i te Poki mau nō era e tahi o te 'Atua. ¹⁹ Te 'Atua ka haka ūtu'a ena i te taŋata 'o te me'e nei: i oho mai era te mōrī ki te ao, 'ina kai haŋa e te taŋata. Te me'e i haŋa he pōhāhā, ta'e he mā'eha, 'o te ai te rāua me'e aŋa he me'e ta'e tano. ²⁰ Te nu'u ta'ato'a aŋa i te me'e ta'e tano, me'e ta'e haŋa o rāua he mōrī, 'e 'ina he haka hāhine a muri 'o ma'urima te rāua me'e aŋa. ²¹ 'E te nu'u noho 'i roto i te parauti'a aŋa i te me'e tī-tika e

haka hāhine rō 'ana ki te mōrī mo take'a pē nei ē: te rāua me'e ta'ato'a aṅa hai pūai o te 'Atua.

E vānaṅa haka 'ou 'ā a Iovani Papatito o ruṅa i a Ietū

²² Ko oti atu 'ana te me'e nei, he oho a Ietū ananake ko tā'ana nu'u hāpī ki Hūrea. He noho 'i ira me'e rahi mahana he [papatito] i te taṅata. ²³ A Iovani e papatito tako'a 'ā 'i 'Ēnono, he kona e rahi rō 'ā te vai hāhine ki Tārima. Te taṅata e oho rō 'ana 'e he papatito 'i ira. ²⁴ 'I rā hora kai puru 'ā a Iovani.

²⁵ Tētahi o te nu'u hāpī 'ā'ana he ha'amata he tātake ki te hūrio e tahi o ruṅa i te [haka ma'itaki] iṅa o rāua. ²⁶ He oho ia rā nu'u he kī ki a Iovani:

—E te Ma'ori, tū kope era 'i muri i a koe 'i te rua pā'iṅa o te rio era ko Horotana, haka 'ite mai era e koe o ruṅa i a ia, 'ai e papatito 'ana, 'e e rahi rō 'ā te nu'u oho ki a ia.

²⁷ He kī e Iovani:

—Mo ai rō o te pūai o te taṅata e tahi, o te 'Atua i va'ai. ²⁸ Ko ṅaro'a 'ana e kōrua i tō'oku kī iṅa ta'e a au he [Kiritō], he taṅata nō au e tahi uṅa mai 'i mu'a i a ia.

²⁹ »'I te ṅoṅoro hāipo-ipo, pa'i, te taṅata i a ia te vi'e mo hāipo-ipo ko ia te me'e ka hāipo-ipo era. 'E te repa-hoa o muri, ka ṅaro'a era i te re'o o rā kope e hāipo-ipo 'ana, he to'o te koa. Pē ira tako'a tō'oku koa mo rahi o te taṅata oho ki a ia. ³⁰ He pūai he oho a ia 'e he ṅaro he oho a au.

³¹ »Te kope turu mai mai te raṅi 'ata hau rō atu ki te taṅata ta'ato'a. Te taṅata o te ao nei o te ao mau nei 'ā, 'e te me'e vānaṅa he me'e o te ao nō nei. 'E te kope turu mai mai te raṅi 'ata hau rō atu ki te ta'ato'a ³² 'e e haka 'ite mai 'ana o ruṅa o tā'ana me'e i ṅaro'a 'e i take'a, 'e taṅata ta'e rahi te taṅata i haka roṅo ki tā'ana vānaṅa. ³³ Te taṅata haka roṅo ki a ia he 'ite: he aṅi mau 'ana te vānaṅa o te 'Atua. ³⁴ Te kope uṅa mai e te 'Atua e haka 'ite 'ana i te vānaṅa o te 'Atua; i a ia, pa'i, te pūai o te Vārua Maitai i va'ai ai e te 'Atua.

³⁵ »E haṅa rahi rō 'ana te Matu'a ki tā'ana Poki, 'e ko va'ai 'ana ki a ia i te parau o te me'e ta'ato'a. ³⁶ Te kope haka moe i te mana'u 'i ruṅa i te Poki o te 'Atua he rava'a i te ora 'āpī 'ina he hope'a ra'a va'ai e te 'Atua. 'E te kope ta'e haka moe i te mana'u 'i ruṅa i a ia e ko rava'a i rā ora; te me'e mo rava'a he ūtu'a 'ina he hope'a ra'a.

Ko Ietū 'e he vi'e o [Tāmāria]

4 'I 'ite era ia a Ietū ko 'ite 'ana te [fariseo] 'ata rahi tā'ana nu'u hāpī 'e 'ata rahi te nu'u papatito e ia ki a [Iovani] ² (ka ai atu o tā'ana nu'u hāpī mau era 'ā te papatito, ta'e 'a Ietū), ³ he e'a he oho mai Hūrea ki Karireā.

⁴ 'I tō'ona oho iṅa i vari ai a Tāmāria. ⁵ He tu'u ia ki te kona e tahi o Tāmāria te 'iṅoa ko Tīkara hāhine ki te henua va'ai e [Hākovo], 'i mu'a 'ā, ki tā'ana poki ko

[Kōsē]. ⁶ 'I rā kona te pū vai e tahi e kī era He Pū Vai 'a Hākovo.

A Ietū, 'i te rohi-rohi 'i te roa o te ara, he noho 'i muri i tū pū vai era. Ko hāhine 'ā rā hora ki te hora kai, ⁷⁻⁸ 'e te nu'u hāpī 'ā'ana ko oho ko u'i 'ā hai kona mo ho'o mai hai me'e mo kai.

He tu'u ia ki rā kona pū vai era te vi'e tāmāria e tahi, 'e he kī e Ietū:

—Ka va'ai mai koe hai vai.

⁹ 'I te me'e era 'ina he [hūrio] he vānaṅa ki te nu'u o Tāmāria, he pāhono e rā vi'e:

—'Pē hē ia koe te hūrio e no-no'i mai ena ki a au ki te vi'e tāmāria mo va'ai atu hai vai?

¹⁰ He pāhono e Ietū:

—'Āhani 'ō e 'ite rō 'ā koe he aha te me'e haṅa o te 'Atua mo va'ai atu, 'e 'āhani tako'a e 'ite rō 'ā koe ko ai te me'e nei e no-no'i atu ena ki te vai, ko no-no'i 'ana ia e koe ki a ia hai vai, 'e he va'ai atu i te vai va'ai i te ora 'āpī 'ina he hope'a ra'a.

¹¹ He kī e rā vi'e:

—Raro nui rahi te pū nei 'e 'ina e tahi a'a me'e mo 'u-'utu mai. 'Māi hē ia koe ka va'ai mai ena i te vai ora ena? ¹² Te mātou tupuna ko Hākovo ko haka rē mai 'ana ki a mātou i te pū vai nei. 'I nei e unu era i te vai, pē ira tako'a 'ana tā'ana ṅā poki 'e tā'ana animare. 'Ata hau 'ō koe ki a ia?

¹³ He pāhono e Ietū:

—Te nu'u ta'ato'a unu i te vai nei he pohe haka 'ou ki te vai; ¹⁴ 'e, te kope unu i te vai va'ai e au, e ko pohe haka 'ou. Te vai va'ai e au 'i roto i a ia pa he kona tehe vai 'ina he oti 'e mai ira he rava'a e ia i te ora 'āpī 'ina he hope'a ra'a va'ai e te 'Atua.

¹⁵ He kī e rā vi'e:

—'Ē, ka va'ai mai tā'aku o te vai ena 'o pohe haka 'ou a au ki te vai 'e 'o hoki haka 'ou mai au ki nei.

¹⁶ He kī e Ietū:

—Ka oho ka uṅa mai ta'u kenu.

¹⁷ He pāhono e rā vi'e:

—'Ina 'ā'aku kenu.

He kī e Ietū:

—He aṅi 'ā tā'au, 'ina mau 'ā a'u kenu. ¹⁸ E rima, pa'i, a'u kenu [hāipo-ipo] i ai, 'e te kope ena 'i muri i a koe ta'e he kenu 'ā'au. He parauti'a mau 'ā tā'au.

¹⁹ I ŋaro'a era e rā vi'e i tū me'e era, he pāhono:

—Ki tō'oku u'i he perofeta koe. ²⁰ Te mātou tupuna 'i ruŋa o te ma'uŋa nei i ha'amuri ai ki te 'Atua, 'e a kōrua te hūrio e kī ena: 'i Hērutarema te kona tano mo ha'amuri ki te 'Atua.

²¹ He pāhono e Ietū:

—Ka haka roŋo mai. Nā ko hāhine 'ā te mahana e ko tātake haka 'ou 'i hē te kona tano mo ha'amuri ki te 'Atua, hoki 'i nei 'o 'i Hērutarema. ²² A kōrua, te nu'u o Tāmāria, 'ina he 'ite ki a ai e ha'amuri ena. 'E, a mātou e 'ite rō 'ana ki a ai; mai i a mātou, pa'i, mai te hūrio, ka ai ena te rāve'a mo te taŋata mo e'a mai roto i te ūtu'a o te hara 'e mo rava'a i te ora 'āpī 'ina he hope'a ra'a va'ai e te 'Atua. ²³ E tu'u rō te hora, ko te hora mau nei 'ā, te nu'u ha'amuri parauti'a ki te 'Atua e ha'amuri rō hai māhatu 'e hai hā'ū'ū o te [Vārua Maitai]. Pē ira te ha'amuri haŋa mau o te 'Atua Matu'a. ²⁴ Te 'Atua he Vārua mau nō, 'ina ō'ona hakari; te nu'u ha'amuri ki a ia e ha'amuri hai pūai o te Vārua Maitai 'e tano ki te parauti'a o ruŋa i a ia.

²⁵ He kī e rā vi'e:

—Ko 'ite 'ana a au nā e tu'u rō mai te [Mētia] (te au-ra'a, te [Kiritō]); ki tu'u mai, mā'ana e haka aŋi-aŋi tahi mai.

²⁶ He kī e Ietū:

—Ko au rā kope, ko te kope nei e vānaŋa atu ena.

²⁷ E vānaŋa nō 'ana ararua i tu'u rō atu ai te nu'u hāpī 'ā'ana. He māere 'o te ai e vānaŋa 'ana a Ietū ararua ko te vi'e e tahi. 'E, 'ina e tahi i haŋa mo 'ui he aha tā'ana me'e haŋa, 'e he aha e vānaŋa era ki rā vi'e.

²⁸ He haka rē ia rā vi'e i tā'ana karo, he e'a he oho ki te kona noho ō'ona, he kī ki te taŋata o ira: ²⁹ «Ka oho mai kōrua ka u'i i te taŋata e tahi ko kī tahi mai 'ana i tā'aku me'e aŋa ki 'aŋarīnā. He Kiritō 'ō pēaha».

³⁰ He e'a tahi te taŋata mai te rāua kona noho he oho ki te kona era 'i ira a Ietū. ³¹ 'I rā kona, te nu'u hāpī 'ā'ana e haka koni 'ā:

—E te Ma'ori, ka kai tā'au o te me'e.

³² He pāhono e Ietū:

—E ai rō 'ana tā'aku kai ta'e 'ite e kōrua.

³³ He ha'amata tū nu'u hāpī era he kī ki a rāua 'ana: «¿Ko ma'u mai 'ana 'ō pēaha e te nu'u hai me'e mā'ana mo kai?». ³⁴ He kī e Ietū:

«Tā'aku kai he aŋa 'e he haka oti i te me'e kī mai e te kope uŋa mai i a au.

³⁵ »A kōrua e kī ena: «E hā 'āva'e toe mo kato iho o te kai". Tā'aku kī: «Ko tano 'ana mo kato". Ka u'i rā kōrua i

te nu'u e pae mai ena: a rāua pa he kai 'oka ena 'ā ko tano riva-riva 'ana te rāua hora mo kato.

³⁶ »Te nu'u kato i te kai e 'auhau rō 'ā, 'e te kai kato era he rava'a e rāua i te ora 'āpī 'ina he hope'a ra'a. Pē ira te nu'u 'oka (te aura'a, te nu'u haka 'ite i te vānaŋa o te 'Atua) ka koa ena ananake ko te nu'u o rāua i kato i te nu'u [haka moe i te mana'u] 'i ruŋa i a au.

³⁷ »Pa he me'e kī: «O te tētahi te 'oka, 'e o te tētahi atu te kato". ³⁸ Ko uŋa 'ana a au i a kōrua mo kato i te kai mai te kona ta'e o kōrua i 'oka, o te tētahi. O rāua i ha'amata te aŋa he haka 'ite i te vānaŋa o te 'Atua, 'e o kōrua i haka mao i te aŋa he kato i te nu'u haka moe i te mana'u 'i ruŋa i a au».

³⁹ I rahi rō te nu'u o rā kona o Tāmāria i haka moe i te mana'u 'i ruŋa i a Ietū 'o tū me'e kī era e rā vi'e pē nei ē: «Ko kī tahi mai 'ana i tā'aku me'e i aŋa ki 'aŋarīnā». ⁴⁰ I tu'u era rā nu'u, he ani ki a Ietū mo noho 'i muri i a rāua, 'e he noho 'i ira e rua mahana.

⁴¹ I ŋaro'a era mai i a ia mau 'ā i tā'ana me'e kī, ko 'a-ta rahi atu 'ana te nu'u haka moe i te mana'u 'i ruŋa i a ia. ⁴² 'E he kī e te nu'u ki rā vi'e: «Hora nei ko haka moe 'ana a mātou i te mana'u 'i ruŋa i a ia, ta'e nō 'ō 'o tū me'e kī mai era e koe, 'o te ai tako'a ko ŋaro'a 'ana e mātou mau 'ana i a ia, 'e ko 'ite 'ā e mātou ko ia mau 'ā te kope mo haka e'a i a tātou i te taŋata mai roto i te ūtu'a o te hara 'e mo va'ai mai i te ora 'āpī 'ina he hope'a ra'a».

He haka ora iŋa o Ietū i te poki o te kape va'ehau

(Māteo 8.5-13; Ruka 7.1-10)

⁴³ I oti era tū mahana era e rua, he e'a a Ietū mai Tāmāria he oho ki Karirea, ⁴⁴ ka ai atu ko kī era 'ā e ia mau 'ā: 'ina e ko mo'a te perofeta e te nu'u o tō'ona kāiŋa.

⁴⁵ I tu'u era ki Karirea, he koa e te nu'u o ira 'o te ai i oho tako'a rō a rāua ki Hērutarema mo te [ŋoŋoro o te Pakate] 'e 'i ira i take'a ai i te me'e ta'ato'a aŋa e Ietū.

⁴⁶ He hoki ia a Ietū ki Kānā era o Karirea, kona haka riro era i te vai he 'ava. 'I ira te taŋata hōnui e tahi aŋa ki te 'ariki rōmano ko māui-ui 'ana tā'ana poki 'i Kaperenāū. ⁴⁷ 'I 'ite era e rā taŋata ko tu'u 'ana a Ietū ki Karirea mai Hūrea, he oho he u'i 'e he ani mo oho ki tō'ona hare mo haka ora i te māui-ui o tā'ana poki ko hāhine 'ā mo mate. ⁴⁸ He kī a Ietū:

—A kōrua, mo ta'e take'a i te mana, e ko haka moe i te mana'u 'i ruŋa i te 'Atua.

⁴⁹ He kī e tū taŋata hōnui era:

—E Ietū, ka hōrou koe mai ta'e mate tā'aku poki.

⁵⁰ He kī ia e Ietū:

—Ka hoki koe ki tu'u hare; ta'a poki ko ora 'ana.

He haka moe rā taŋata i tō'ona mana'u ki tū vānaŋa kī era e Ietū 'e he e'a he oho rō 'ai. ⁵¹ E oho nō 'ana ki

tō'ona hare he piri tā'ana nu'u tāvini 'i te ara 'e he kī: «Kō ora 'ana te māui-ui o te poki!».

⁵² He 'ui e tū taŋata era: «ĶHōra aha i ha'amata i ora ai te māui-ui?» He pāhono e rā nu'u: «I 'aŋataiahi pe te hora ho'e o te ahi-ahi i kore ai te vera o te hakari».

⁵³ He aŋi-aŋi ia e rā taŋata ko tū hora kī mau era 'ā e Ietū: «Kō ora 'ana te māui-ui o ta'a poki». 'E he haka moe rō 'ai te mana'u 'i ruŋa i a Ietū, 'e pē ira 'ā te nu'u ta'ato'a o tō'ona hare.

⁵⁴ He rua aŋa iŋa nei o Ietū i te mana 'i Karirea mai tō'ona hoki iŋa mai mai Hūrea.

Ko Ietū 'i te kona puna vai ko Vetesātā

5 Ko rahi atu 'ana te mahana, he hoki a Ietū ki Hērutarema ki te ŋoŋoro e tahi o te [hūrio]. ² 'I muri i te 'ōpani uru ki ira e kī era O te Māmoe, te puna vai e tahi te [ŋoa 'i te [e'vereo] ko Vetesātā. 'I te kao-kao o rā puna e rima kona mo haka kohu. ³ 'I raro o rā kona me'e rahi nu'u matapō, va'e koke, māui-ui 'e hakari ta'e makenu e mo-moe rō 'ana [e tiaki 'ā ki te haka makenu iŋa o te vai. ⁴ Te kī: e topa rō 'ana te merahi 'i tō'ona hora mo haka mākenu-kenu i rā vai, 'e te kope ra'e mo o'o ki roto ki oti te haka makenu he ora tō'ona māui-ui.]

⁵ 'I roto i rā nu'u māui-ui era te taŋata e tahi ka toru 'ahuru mā va'u matahiti o tō'ona māui-ui. ⁶ 'I take'a era e Ietū i rā taŋata e moe rō 'ana, 'e 'i te 'ite ko rahi 'ana te matahiti o tō'ona ai pē ira, he 'ui:

—ĶHaŋa rō 'ā koe mo ora o tu'u māui-ui?

⁷ He pāhono e rā taŋata:

—Ē, 'ina e tahi kope mo ha-ha'o i a au ki roto i te puna e haka makenu ena i te vai. E haŋa nei a au mo uru, 'i ra'e 'ana te rua e o'o rō ena.

⁸ He kī e Ietū:

—Ka e'a ki ruŋa, ka to'o tu'u hēriki, 'e 'ai koe ka e'a ka oho rō.

⁹ 'I rā hora mau 'ana he ora te māui-ui o rā taŋata, he to'o i tū hēriki era o'ona 'e he ha'amata he ha'ere. 'E, 'i te me'e era he [mahana haka ora], ¹⁰ he kī e te hūrio ra-rahi ki tū kope era:

—Mahana nei he mahana haka ora; 'ina he ha'ati'a mo 'amo i te hēriki.

¹¹ He pāhono e rā taŋata:

—Pē nei te kope haka ora mai era i a au i kī mai ai: «Ka to'o tu'u hēriki ka e'a ka oho».

¹² He 'ui e tū nu'u era:

—ĶKo ai te kope kī atu era: «Ka to'o tu'u hēriki ka e'a ka oho?»

¹³ Kai 'ite ia e rā taŋata 'a 'ai a ia i haka ora 'o te ai ko ŋaro 'ana a Ietū 'i roto i te rahi o te taŋata.

¹⁴ 'I oho era he piri haka 'ou a Ietū ki rā kope 'i te [Kona Ha'amuri 'Atua] 'e he kī: «Ka haka roŋo mai. Nā ko ora 'ā tu'u māui-ui. 'Ina koe ko hara haka 'ou 'o topa atu te 'ati 'ata paŋaha'a».

¹⁵ He oho ia rā taŋata he 'a'amu ki te hūrio ra-rahi: a Ietū a ia i haka ora. ¹⁶ He riri ia rā nu'u mo Ietū 'o te haka ora i te nu'u māui-ui 'i te mahana haka ora. ¹⁷ Ka ai atu pē ira, he kī e Ietū ki tū nu'u hūrio ra-rahi era: «Tō'oku Matu'a e aŋa e oho nō 'ā, 'e pē ira tako'a 'ana a au».

¹⁸ Hai me'e nei i 'ata riri ai rā nu'u mo Ietū 'e he haŋa mo tiŋa'i, ta'e nō 'ō 'o te ta'e mo'a i te mahana haka ora, 'o te kī tako'a: te 'Atua he Matu'a o'ona, 'e hai rā kī iŋa i haka tu'u ai he 'Atua mau 'ā a ia.

Mai i a ai te parau o Ietū

¹⁹ He kī ia e Ietū:

«Ī a au he kī atu: Te Poki o te 'Atua e ko aŋa e tahi me'e hai mana'u o'ona hoko tahi nō; te me'e aŋa 'ā'ana he me'e take'a mai tō'ona Matu'a. Te me'e ta'ato'a aŋa e te Matu'a he aŋa tako'a e te Poki. ²⁰ Te Matu'a e haŋa rahi rō 'ana ki tā'ana Poki 'e e haka take'a tahi rō 'ana i tā'ana me'e aŋa. Pe mu'a ka oho ena, he haka take'a ki a ia i te me'e 'ata nui-nui 'e, ka aŋa ena, he māere kōrua.

²¹ »Pa he va'ai iŋa e te Matu'a ki te taŋata mate i te ora, pē ira tako'a te Poki ka va'ai ena i te ora ki te kope nō era 'ā'ana i haŋa. ²² Te Matu'a 'ina he kī i te me'e tano 'e i te me'e ta'e tano o te taŋata; ki tā'ana Poki i va'ai ai i te parau mo aŋa i rā me'e, ²³ ki ha'amuri ai te taŋata ta'ato'a ki te Poki pa he ha'amuri iŋa ki te Matu'a. Te kope ta'e mo'a i te Poki 'ina he mo'a i te Matu'a uŋa mai i a ia.

²⁴ »Ī a au he kī atu: te kope haka roŋo i tā'aku vā-naŋa 'e haka moe i tō'ona mana'u 'i ruŋa i te kope uŋa mai i a au, i a ia te ora 'āpī 'ina he hope'a ra'a, 'e 'ina he ūtu'a mō'ona. Ko haka e'a 'ana, pa'i, e te 'Atua mai te ara o te mate 'e ko haka noho 'ana 'i roto i te ara o te ora.

²⁵ »Nā e tu'u rō te hora, ko te hora mau nei 'ā, e ŋaro'a rō i te re'o o te Poki o te 'Atua e te nu'u mate, te aura'a, e te nu'u ta'e tano ki te mata o te 'Atua. 'E nu'u nō era mo haka moe i te mana'u 'i ruŋa i a ia 'e 'i ruŋa i tā'ana vānaŋa he rava'a i te ora 'āpī 'ina he hope'a ra'a. ²⁶ Te 'Atua he tumu o te ora 'āpī 'e pē ira 'ā te Poki; ko ha'ati'a hia 'ā, pa'i, 'e te 'Atua. ²⁷ Te 'Atua i va'ai rō mai ki a au, ki te [Poki o te taŋata], i te parau mo kī i te me'e tano 'e i te me'e ta'e tano o te taŋata.

²⁸ »E u'i kōrua 'o māere rō 'i te me'e nei. Nā e tu'u rō te hora he ŋaro'a e te nu'u mā-mate ta'ato'a i tō'ona re'o ²⁹ 'e he e'a tahi mai mai te rāua kona tanu. Te nu'u aŋa i te me'e riva-riva ki te mata o te 'Atua he ora haka 'ou mai mo noho 'ina he hope'a ra'a 'i muri i te 'Atua; 'e te nu'u aŋa i te me'e ta'e tano ki tō'ona mata he ora haka 'ou mai mo haka ūtu'a e te 'Atua.

He haka 'ite iņa o Ietū i a ia te parau

³⁰ »E ko tano a au mo aņa e tahi me'e hai mana'u nō ō'oku. E ture nei au hai me'e kī mai e te Matu'a, 'e tō'oku ture iņa e tano rō 'ā 'o te ai ta'e hai me'e haņa 'ā'aku e ture nei, hai me'e haņa o te kope uņa mai i a au.

³¹ »Mo ai ko au mau nō te kope kī i te vānaņa riva-riva o ruņa i a au, e ko hauha'a mo kore o te mata'ite mo haka aņi-aņi hoki he aņi 'ā 'o 'ina. ³² 'E, nā e ai rō 'ana te mata'ite vānaņa riva-riva o ruņa i a au, he Matu'a ō'oku, 'e ko 'ite 'ana e au: tā'ana vānaņa he aņi mau 'ā.

³³ »A kōrua i uņa i haka 'ui rō ki a [Iovani], 'e 'ā'ana i kī atu i te parauti'a o ruņa i a au. ³⁴ 'Ina he 'ati mo ta'e vānaņa riva-riva e te taņata o ruņa i a au. E haka mana'u nō atu 'ā tā'au i te me'e kī e [Iovani] ki haka moe ai kōrua i te kōrua mana'u 'i ruņa i a au, ki e'a ai mai roto i te ūtu'a o te hara 'e ki rava'a ai i te ora 'āpī 'ina he hope'a ra'a va'ai e te 'Atua.

³⁵ »Te me'e hāpī e Iovani pa he hakari'i haka mā'eha i te kōrua mana'u, 'e i koa rō kōrua 'i rā hāpī 'i te nā mahana haka 'ite atu era. ³⁶ Ka ai atu pē ira, e ai rō 'ana te me'e 'ata hau o te nui-nui ki te me'e haka 'ite atu e Iovani mo haka take'a atu i te parauti'a o ruņa ō'oku. 'E ko rā me'e tā'aku me'e aņa, he me'e kī mai e te Matu'a mo aņa 'e nei me'e he mata'ite: he aņi mau 'ā 'ā'ana a au i uņa mai.

³⁷ »E tō'oku Matu'a uņa mai era i vānaņa tako'a rō o ruņa i a au, ka ai atu 'ina kōrua kai ŋaro'a 'ā i tō'ona re'o 'e kai take'a 'ā i a ia. ³⁸ 'E, 'ina kōrua he ma'u hiohio i tā'ana vānaņa 'i te ta'e [haka moe i te mana'u] 'i ruņa i te kope uņa mai e ia. ³⁹ He rara nō te aņa o kōrua o ruņa i te me'e hā'aki 'i ruņa i te [Pāpa'i Mo'a] he mana'u e kōrua pē ira ana rava'a i te ora 'āpī 'ina he hope'a ra'a va'ai e te 'Atua. 'E, ka ai atu 'ai ruņa e vānaņa rō 'ana o ruņa i a au, ⁴⁰ 'ina a kōrua he haņa mo haka moe i te mana'u 'i ruņa i a au ki rava'a ai e kōrua i rā ora.

⁴¹ »Te ha'ahana-hana mai o te taņata tu'u pē kōrua mō'oku 'ina e tahi hauha'a. ⁴² Ko 'ite 'ana, pa'i, a au pē hē te kōrua huru 'e ko 'ite tako'a 'ana a au 'ina kōrua he haņa ki te 'Atua. ⁴³ A au i oho mai ai hai 'iņoa o tō'oku Matu'a, 'e 'ina kōrua he haņa mai. 'E, mo oho mai e tahi kope hai 'iņoa mau 'ā ō'ona, ki rā kope kōrua ka haka roņo ena. ⁴⁴ ĶPē hē ia a kōrua ana haka moe i te mana'u 'i ruņa i a au? Te me'e haņa rahi o kōrua he vānaņa riva-riva atu e te rua o ruņa i a kōrua, 'e 'ina kōrua he tapa atu ana mana'u riva-riva te 'Atua o ruņa i a kōrua.

⁴⁵ »'Ina kōrua ko mana'u he hā'aki kōrua e au ki tō'oku Matu'a; te kōrua hape ko tuhi era 'ana e te me'e pāpa'i era e [Mōtē]. A kōrua e mana'u ena: hai haka moe i te mana'u 'i ruņa i rā me'e he rava'a e kōrua i te ora. ⁴⁶ 'Āhani 'ō kōrua e haka moe parauti'a rō 'ana i te mana'u 'i ruņa i te me'e pāpa'i e Mōtē, he haka moe tako'a kōrua i te mana'u 'i ruņa i a au; ko pāpa'i era 'ana, pa'i, e ia o ruņa i a au. ⁴⁷ 'E mo ta'e ha-

ka moe o kōrua i te mana'u 'i ruņa i te me'e pāpa'i e ia, Ķpē hē ia kōrua ana haka moe i te mana'u 'i ruņa i te me'e kī atu e au?».

He hāņai iņa o Ietū i te nu'u rahi (Māteo 14.13-21; Marko 6.30-44; Ruka 9.10-17)

6 I oti era te me'e nei, he e'a he oho a Ietū ki te rua pā'iņa o te kona vai e kī era Vai o Karirea, e kī tako'a era Vai o Tivēria. ² Nu'u rahi te nu'u i oho 'i muri 'o te take'a i te mana aņa e ia, he haka ora i te māui-ui. ³ He iri ia a Ietū ki ruņa i te ma'uņa e tahi he noho ananake ko tā'ana nu'u hāpī. ⁴ Te [ņoņoro o te Pakate] ko hāhine 'ā. ⁵ I u'i era a Ietū i te rahi o te taņata oho 'i tu'a i a ia, he 'ui ki a Feripe:

—ĶMai hē tātou ka to'o mai ena i te haraoa mo hāņai o te nu'u ta'ato'a ena?

⁶ I 'ui ai e Ietū mo u'i pē hē a Feripe ka pāhono era, ka ai atu ko 'ite riva-riva 'ana a Ietū i tā'ana me'e mo aņa. ⁷ He pāhono e Feripe:

—Ka ai atu te moni o te piti hānere mahana aņa, e ko pe'e te haraoa mo te rahi ena, korohaņa ka pārehe-rehe riki-riki atu.

⁸ He kī ia e Antarea, taina o Pētero, kope hāpī haka 'ou 'a Ietū:

⁹ —'I e tahi poki 'i nei e ma'u rō 'ana e rima haraoa sevara 'e e rua ika. Ka ai atu pē ira, Ķhe aha te me'e era mo te rahi ra'a ena o te taņata?

¹⁰ He pāhono e Ietū:

—Ka kī ki te ta'ato'a mo no-noho.

E rahi rō 'ana te mauku o rā kona 'e he no-noho. Mo tatakū i te nāņata nō, e pae ta'utini. ¹¹ He to'o ia e Ietū i tū haraoa era ki te rima 'e ki oti te māuru-uru ki te 'Atua, he tuha'a ki te nu'u ta'ato'a. Pē ira tako'a i aņa ai i te ika, 'e he va'ai ki te ta'ato'a rahi nō era o rāua i haņa.

¹² I mākona tahi era, he kī e Ietū ki tā'ana nu'u hāpī: «Ka runu tahi mai te pārehe-rehe topa ena 'o māu'a rō».

¹³ He runu e rā nu'u, 'e i ha'a'i ai e ho'e 'ahuru mā piti kānato o te pārehe-rehe topa o tū haraoa sevara era e rima. ¹⁴ I take'a era e te taņata i tū mana aņa era e Ietū he kī: «He aņi mau 'ana 'ō ko te kope ena te perofeta era mo oho mai ki te ao nei».

¹⁵ 'E, 'i te 'ite o Ietū ko haņa 'ana rā nu'u mo 'a-'aru i a ia mo ma'u mo haka 'ariki, he e'a he iri ki ruņa era o te ma'uņa hoko tahi nō.

He ha'ere iņa o Ietū 'i ruņa i te vai (Māteo 14.22-27; Marko 6.45-52)

¹⁶ I ahi-ahi pō era he turu te nu'u hāpī 'a Ietū ki te taha-taha tai, ¹⁷ he tiaki ki a Ietū. Ko pōhāhā 'ana 'ina

kai tu'u 'ā. He eke ia tū nu'u era ki ruŋa i te vaka, he e'a he oho ki Kaperenāū. ¹⁸ E oho nō 'ana he ha'amata he pari 'i te pūai o te tokerau. ¹⁹ Ko roa atu 'ana e oho era e pae ta'utini tūma'a mētera, he take'a ka hāhine atu a Ietū e ha'ere e oho atu era a ruŋa i te vai 'e he ri'a-ri'a rō atu 'ai tū nu'u era. ²⁰ He kī e Ietū: «jKo au nei, 'ina kōrua ko ri'a-ri'a!».

²¹ He koa rō 'ai ananake 'e he haka eke ki ruŋa i te vaka. 'E 'ina kai roa ko tomo ko oti 'ā ki Kaperenāū.

He kimi iŋa o te taŋata i a Ietū

²² 'I te rua mahana te nu'u taka-taka era 'i te rua pā'iŋa o te vai he 'ite ko oho 'ana te nu'u hāpī 'a Ietū 'i ruŋa i te vaka hope'a o ira, 'e 'ina a Ietū kai oho 'i muri. ²³ 'I ia te tētahi nu'u o Tivēria ko tu'u 'ā a ruŋa i te vaka ki te kona e tahi hāhine ki tū kona kai era i te haraoa ki oti a Ietū te māuru-uru ki te 'Atua. ²⁴ 'I u'i era e tū nu'u era 'ina a Ietū 'e 'ina tā'ana nu'u hāpī, he eke tahi ki ruŋa i te rāua vaka he e'a he oho he kimi i a Ietū a Kaperenāū.

A Ietū he haraoa va'ai i te ora

²⁵ 'I tu'u era rā nu'u ki te rua pā'iŋa, he rava'a i a Ietū 'e he 'ui:

—E te Ma'ori, j'i 'aŋahē koe i oho mai ai?

²⁶ He kī e Ietū:

—Te parauti'a, a kōrua e kimi mai ena ta'e 'o te aŋi-aŋi i te mana aŋa e au, 'o te ai i kai ai kōrua ka mākona rō. ²⁷ 'Ina kōrua ko aŋa ki te kai ena e pau rō 'ā, ki te kai 'ina e ko pau va'ai i te ora 'āpī 'ina he hope'a ra'a kōrua ana aŋa. Ko te kai ena te kai mo va'ai atu e te [Poki o te taŋata] 'o te ai te 'Atua, he Matu'a, ko va'ai 'ana ki a ia i te parau mo va'ai atu.

²⁸ He 'ui e tū nu'u era:

—jHe aha te me'e haŋa o te 'Atua mo aŋa e mātou ki tano ai ki a ia?

²⁹ He pāhono e Ietū:

—Te me'e haŋa nō o te 'Atua he haka moe o kōrua i te mana'u 'i ruŋa i te kope uŋa mai e ia.

³⁰ He kī e rā nu'u:

—Mo aŋa mai ō'ou e tahi mana mo take'a e mātou, he haka moe atu mātou i te mana'u 'i ruŋa i a koe. jHe aha ta'a mana ka aŋa mai ena? ³¹ Te tātou tupuna i kai rō i te me'e kī he [mānā] 'i te kona 'one ta'e noho taŋata. E hā'aki rō 'ana, pa'i, 'i ruŋa i te [Pāpa'i Mo'a]: "I hāŋai rō hai haraoa o te raŋi".

³² He pāhono e Ietū:

—'I a au he kī atu: ta'e 'a [Mōtē] i va'ai i te haraoa o te raŋi, o tō'oku Matu'a. 'E mā'ana e va'ai atu i te haraoa parauti'a o te raŋi. ³³ Te haraoa parauti'a va'ai e te 'Atua he kope topa mai mai te raŋi va'ai i te ora 'āpī 'ina he hope'a ra'a ki te taŋata.

³⁴ He no-no'i ia e rā nu'u:

—E Ietū, ka va'ai mai koe paurō te mahana i te haraoa ena.

³⁵ He kī e Ietū:

—Ko au te haraoa va'ai i te ora. Te kope oho mai ki a au e ko maruaki haka 'ou; 'e te kope haka moe i tō'ona mana'u 'i ruŋa i a au e ko pohe haka 'ou ki te vai. ³⁶ 'E, a kōrua, ka ai atu ko take'a 'ana i tō'oku aŋa iŋa i te mana, 'ina kōrua he [haka moe i te mana'u] 'i ruŋa i a au, pa he me'e kī mau atu era 'ā e au. ³⁷ Te taŋata ta'a-to'a va'ai mai e tō'oku Matu'a he oho tahi mai ki a au. 'E te kope oho mai e ko haka tapa e au mai muri i a au.

³⁸ »I topa mai ai a au mai te raŋi ta'e mo aŋa i tā'aku me'e haŋa, mo aŋa i te me'e haŋa o tō'oku Matu'a uŋa mai i a au. ³⁹ 'E tā'ana me'e haŋa he ta'e ŋaro e tahi o te nu'u va'ai mai e ia, 'e he haka ora e au i a rāua mai te mate 'i te mahana o te ture hope'a. ⁴⁰ Te haŋa o tō'oku Matu'a: he ai o te ora 'āpī 'ina he hope'a ra'a i te nu'u ta'ato'a 'ite ko ai te Poki nei o te 'Atua 'e haka moe i te mana'u 'i ruŋa i a ia; 'e he haka ora tahi e au 'i te mahana o te ture hope'a.

⁴¹ He ha'amata ia te hūrio ra-rahi he hēŋu'i-ŋu'i o ruŋa o Ietū 'o te kī ko ia te haraoa topa mai era mai te raŋi. ⁴² He kī e rā nu'u: «jTa'e 'ō nei ko Ietū, he poki era 'a [Kōsē]? Ko māhāni 'ana a tātou i tō'ona matu'a tane 'e i tō'ona matu'a vahine. jPē hē ia e kī mai ena mai te raŋi a ia i topa mai ai?».

⁴³ He kī e Ietū:

—Ē, ka haka kore te hēŋu'i-ŋu'i. ⁴⁴ 'Ina e tahi kope mo oho mai ki a au i ta'e uŋa mai e te Matu'a uŋa mai era i a au, 'e he haka ora e au 'i te mahana o te ture hope'a. ⁴⁵ E kī rō 'ana, pa'i, 'i ruŋa i te puka o te perofeta: "Te 'Atua e hāpī rō i te taŋata ta'ato'a". Te nu'u haka roŋo 'e 'ite i te me'e hāpī e tō'oku Matu'a, ko rāua te me'e oho mai ki a au.

⁴⁶ »Tā'aku kī ta'e 'ō pē nei ē: ko take'a 'ā e te kope e tahi i te Matu'a. Te kope mau nō i take'a ko te kope oho mai era mai muri i a ia. ⁴⁷ 'I a au he kī atu: te nu'u haka moe i te mana'u 'i ruŋa i a au i a rāua te ora 'āpī 'ina he hope'a ra'a va'ai e te 'Atua.

⁴⁸ »'E te haraoa va'ai i te ora 'āpī 'ina he hope'a ra'a ko au. ⁴⁹ Te kōrua tupuna i kai rō i te mānā 'i te kona 'one ta'e noho taŋata 'e, ka ai atu pē ira, i mā-mate nō. ⁵⁰ 'E, a au e vānaŋa atu ena o ruŋa o te haraoa parauti'a topa mai era mai te raŋi; te nu'u kai i nei haraoa i a rāua te ora 'āpī 'ina he hope'a ra'a va'ai e te 'Atua. ⁵¹ Ko au mau 'ana te haraoa ora topa mai era

mai te ranji; te kope kai i te haraoa nei he rava'a i te ora 'āpī 'ina he hope'a ra'a. 'E nei haraoa he hakari mau nei 'ā ō'oku. He va'ai e au mo rava'a e te taŋata o te henua ta'ato'a i te ora 'āpī».

⁵² He ha'amata ia te hūrio he tātake ki a rāua 'ā: «¿Pē hē te kope nei ana va'ai mai i tō'ona hakari mo kai e tātou?».

⁵³ He kī e Ietū:

—'Ī a au he kī atu: mo ta'e kai o kōrua i te hakari 'e mo ta'e unu i te toto o te Poki o te taŋata, e ko rava'a e kōrua i te ora 'āpī 'ina he hope'a ra'a va'ai e te 'Atua.

⁵⁴ Te kope kai i tō'oku hakari 'e unu i tō'oku toto he rava'a i te ora 'āpī 'ina he hope'a ra'a, 'e he haka ora e au 'i te mahana o te ture hope'a. ⁵⁵ Tō'oku hakari he kai parauti'a, 'e tō'oku toto he vai parauti'a. ⁵⁶ Te kope kai i tō'oku hakari 'e unu i tō'oku toto e ko haka rē i a au, 'e a au i a ia.

⁵⁷ »Te Matu'a uŋa mai era i a au e ora rō 'ana, 'e hai ia a au e ora nei. Pē ira tako'a, te kope kai i a au he ora hai au. ⁵⁸ E vānaŋa atu ena a au o ruŋa o te haraoa parauti'a topa mai mai te ranji. Te tupuna i kai rō i te mātā 'e, ka ai atu pē ira, i mā-mate rō. 'E te kope mo kai i te haraoa nei he ora mau rō 'āvai».

⁵⁹ I hāpī ai a Ietū i te ŋā me'e nei 'i roto i te [hare pure hūrio] o Kaperenāu.

He vānaŋa va'ai i te ora 'āpī 'ina he hope'a ra'a

⁶⁰ I ŋaro'a era i te me'e nei e te nu'u oho 'i muri i a Ietū, nu'u rahi i kī:

—Tū me'e kī mai nei me'e ta'e au. ¿Ko ai ia te me'e mo haka roŋo?

⁶¹ I 'ite era a Ietū o ruŋa i te aha e hēŋu'i-ŋu'i era, he kī:

—¿Ko ta'e au 'ana 'ō kōrua 'i te me'e ena? ⁶² ¿Pē hē ia mo take'a i te Poki o te taŋata e iri 'ana ki te kona era mai ira i turu mai ai? ⁶³ 'Ī a au he kī atu: o te [Vārua Maitai] te va'ai i te ora 'āpī; ta'e hai haŋu taŋata ana rava'a. Te me'e vānaŋa atu era e au o te Vārua Maitai, 'e hai rā vānaŋa e va'ai ena e ia i te ora 'āpī ki te taŋata. ⁶⁴ Ka ai atu pē ira, e ai nō 'ana tētahi o kōrua 'ina he haka moe i te mana'u 'i ruŋa i a au.

Mai mu'a 'ā, pa'i, a Ietū i 'ite rō ai ko ai ko ai te me'e ka ta'e haka moe era i te mana'u 'i ruŋa i a ia, 'e ko ai te kope ka ho'o era i a ia. ⁶⁵ 'E he kī haka 'ou:

—'O ira a au e kī nō atu ena: 'ina e tahi kope mo oho mai ki a au mo ta'e ai o tō'oku Matu'a i haka poreko 'i roto i a ia i te haŋa mo oho mai.

⁶⁶ 'E mai rā hora me'e rahi nu'u oho 'i muri i a Ietū i neke a tu'a 'e 'ina kai oho haka 'ou 'i muri. ⁶⁷ He 'ui ia e Ietū ki tā'ana nu'u hāpī era e ho'e 'ahuru mā piti:

—¿Ko haŋa tako'a 'ana a kōrua mo oho?

⁶⁸ He pāhono e Tīmona, kī tako'a ko Pētero:

—E Ietū, ¿ki a ai era a mātou ana oho? I a koe mau nō, pa'i, te vānaŋa mo rava'a i te ora 'āpī 'ina he hope'a ra'a va'ai e te 'Atua. ⁶⁹ 'E a mātou e haka moe rō 'ana i te mana'u 'i ruŋa i a koe 'e ko 'ite 'ā: he kope mo'a uŋa mai koe e te 'Atua.

⁷⁰ He kī ia e Ietū:

—'Ā'aku mau 'ā a kōrua a ho-ho'e 'ahuru mā piti i to'o mai. 'E, ka ai atu pē ira, e tahi o roto i a kōrua he tātane.

⁷¹ A Ietū i kī ai i te me'e nei mo Hura, poki 'a Tīmona Ikariote 'o te ai pe mu'a ka oho era he ho'o e Hura i a Ietū, ka ai atu a Hura o roto i te ho'e 'ahuru mā piti nu'u hāpī 'a Ietū.

He haka me'e-me'e i a Ietū

7 I oti era he oho a Ietū ki kona era ki kona era o Karirea. Kai haŋa mo oho ki Hūrea 'i te me'e era te nu'u [hūrio] ra-rahi o ira e haŋa 'ā mo tiŋa'i i a ia. ² 'E, 'i te me'e ko hāhine 'ā te [ŋoŋoro o te rāmā], ³ he kī e tō'ona ŋā poki taina:

—'Ina koe ko noho mai 'i nei. Ka e'a koe ka oho ki Hūrea mo take'a tako'a e te nu'u o ira haka moe i te mana'u 'i ruŋa i a koe i ta'a me'e aŋa. ⁴ Te kope haŋa mo 'ite e te nu'u o ruŋa i a ia 'ina he na'a i tā'ana me'e aŋa. 'O ira, ka oho koe ka aŋa ta'a me'e ena koe e aŋa ena 'i mu'a o te taŋata ta'ato'a.

⁵ Te ŋā kope nei, ka ai atu he taina o Ietū, 'ina he haka moe i te rāua mana'u 'i ruŋa. ⁶ He kī e Ietū:

—Kai tano 'ā tō'oku hora mo oho, 'e mo kōrua ta'ato'a nō hora e tano rō 'ā. ⁷ Te taŋata o te ao nei 'ina he riri mo kōrua; mō'oku e riri ena 'o te haka take'a e au: te rāua me'e aŋa me'e ta'e tano. ⁸ Ka oho nō kōrua ki te ŋoŋoro. 'Ina a au e ko oho vave atu; kai tano 'ana tō'oku hora.

⁹ Pē ira a Ietū i kī ai 'e he noho 'i Karirea.

A Ietū 'i te ŋoŋoro o te rāmā

¹⁰ Ko oho atu 'ā tū ŋā taina era i oho iho ai a Ietū hoko tahi nō 'o 'ite e te taŋata. ¹¹ Te nu'u hūrio ra-rahi ia e kimi 'ana i a Ietū a roto i te nu'u o tū kona ŋoŋoro era koia ko kī: «¿'I hē ia tū taŋata era?».

¹² Te nu'u o ira e vānaŋa rahi rō 'ana o ruŋa i a Ietū. Tētahi e kī era: «He taŋata riva»; e tētahi atu e kī era: «Taŋata ta'e riva; e reo-reo 'ana ki te taŋata».

¹³ Ka ai atu ta'ato'a nō e vānaŋa era o ruŋa i a Ietū, te nu'u mana'u he taŋata riva 'ina he haka ŋaro'a i te rāua vānaŋa era e kī era he ri'a-ri'a 'i te nu'u ra-rahi o te hūrio.

¹⁴ E hitu mahana o rā ŋoŋoro era he rāmā. 'I vāeŋa o rā ŋā mahana, he oho a Ietū he uru ki roto i te [Kona Ha'amuri 'Atua] he ha'amata he hāpī. ¹⁵ Te nu'u ra-rahi o te hūrio ko māere atu 'ana e kī era: «¿Pē hē ia te kope ena, kai hāpī ia, i 'ite rō ai i te ŋā me'e ta'ato'a ena?».

¹⁶ He kī e Ietū:

—Te me'e nei e au e hāpī nei ta'e 'ā'aku, o te kope uŋa mai i a au. ¹⁷ Te kope haŋa mo aŋa i te me'e haŋa o te 'Atua he aŋi-aŋi hoki tā'aku hāpī nei mai te 'Atua 'o he vānaŋa 'ā'aku mau 'ā. ¹⁸ Te kope vānaŋa hai me'e 'ā'ana mau 'ā e haŋa 'ana mo haka nui-nui i a ia; 'e te kope haŋa mo haka nui-nui i te kope uŋa i a ia, ko rā kope te me'e kī i te parauti'a 'e 'ina he ha'avare.

¹⁹ »¿Ta'e 'ō ko va'ai atu 'ana a [Mōtē] i te haka tere iŋa o te hūrio? 'E, 'ina e tahi o kōrua i ha'atura. ¿He aha ia a kōrua e haŋa ena mo tiŋa'i mai i a au?

²⁰ He pāhono e te taŋata:

—¿Ko o'o 'ana koe e te tātane! ¿Ko ai te me'e haŋa mo tiŋa'i atu i a koe?

²¹ He kī e Ietū:

—A kōrua ta'ato'a e ta'e au ena 'i te me'e nō e tahi aŋa e au 'i te [mahana haka ora]. ²² 'E, a kōrua, ka ai atu he mahana haka ora, ko te hore iŋa 'ana i te kiri o te kīnoŋa mo ha'atura ki te roŋo 'a Mōtē (ka ai atu rā roŋo ta'e mai i a Mōtē i oho mai ai, mai te nu'u era o mu'a 'ana). ²³ Mo hore ia o kōrua i te kiri o te kīnoŋa o te poki 'i te mahana haka ora 'o hape ki te [haka tere iŋa 'a Mōtē], ¿he aha ia kōrua e riri ena mō'oku 'o te haka ora i te māui-ui o te taŋata 'i te mahana haka ora? ²⁴ 'Ina kōrua ko kī i te tano 'e i te ta'e tano o te me'e e tahi hai me'e nō ena e kōrua e take'a ena. A kōrua ana ture hai parauti'a.

He haka 'ite iŋa o Ietū o hē a ia

²⁵ Tētahi o te nu'u noho o Hērutarema he ha'amata he 'ui:

«¿Ta'e 'ō rā ko tū kope era e kimi mai ena mo tiŋa'i? ²⁶ 'Ai 'ō e vānaŋa 'ā 'i te kona era ai, 'e 'ina e tahi kope kī e tahi me'e! ¿Ka kī 'ō te nu'u ra-rahi e mana'u ena he [Kiritō] mau 'ana a ia? ²⁷ ¿Pē hē te me'e tu'u pē rā? Ko 'ite 'ana, pa'i, e tātou o hē a ia; 'e, hora ena mo oho mai o te Kiritō, 'ina e tahi kope mo 'ite o hē a ia».

²⁸ A Ietū e hāpī 'ana 'i te Kona Ha'amuri 'Atua. I ŋaro'a era i tū me'e era, he haka pūai i te re'o 'ai ka kī:

«¿Ko 'ite mau 'ana 'ō kōrua ko ai a au 'e mai hē a au i oho mai ai? Ta'e hai mana'u o'oku au i oho mai ai, hai

mana'u o te kope uŋa mai i a au, kope aŋa i tā'ana me'e kī, 'e 'ina kōrua kai māhani i a ia. ²⁹ Ko au te me'e i māhani; mai i a ia, pa'i, a au i oho mai ai, 'e 'ā'ana a au i uŋa mai».

³⁰ He haŋa ia tū nu'u era mo 'a-'aru i a Ietū, 'e, 'ina e tahi o rāua i rao i 'a-'aru 'o te ai kai tano 'ana tō'ona hora. ³¹ Ka ai atu pē ira, me'e rahi nu'u i haka moe i te mana'u 'i ruŋa i a ia, 'e e kī era: «Ka oho mai ena te Kir-itō, ¿e aŋa rō hō i te me'e 'ata hau rō atu ki te me'e aŋa e ia?».

He nu'u ra-rahi e haŋa 'ā mo 'a-'aru i a Ietū

³² He ŋaro'a e te fariseo i te vānaŋa o tū nu'u era o ruŋa i a Ietū. He uŋa ia e rā ŋā fariseo ananake ko te [oromatu'a ra-rahi] i te mūto'i o te Kona Ha'amuri 'Atua mo 'a-'aru i a Ietū. ³³ 'E a Ietū ko te vānaŋa iŋa 'ā ki te nu'u e kī era: «E ko roa a au ka noho atu ena 'i muri i a kōrua. Ki oti he hoki a au ki muri i te kope uŋa mai i a au. ³⁴ E kimi rō mai kōrua i a au, 'e 'ina e ko rava'a; e ko tu'u atu, pa'i, kōrua ki te kona era o'oku ka oho nei».

³⁵ He ha'amata ia te hūrio he 'ui ki a rāua 'ana:

«¿Kī hē te kope nei ka oho ena ka ta'e rava'a ena e tātou? ¿He oho hō he noho 'i muri i te hūrio 'i te henua kē, 'e he hāpī i te nu'u ta'e 'ite ko ai te 'Atua parauti'a? ³⁶ ¿He aha te aura'a o te me'e ena e kī mai ena: "e kimi rō mai kōrua i a au 'e 'ina e ko rava'a", 'e, "a kōrua e ko tu'u atu ki te kona 'i ira a au ka noho era"?».

He vānaŋa iŋa o Ietū o ruŋa i te [Vārua Maitai]

³⁷⁻³⁸ Te mahana hope'a o tū ŋoŋoro era, he mahana 'ata hau o te nui-nui. 'I rā mahana he māroa a Ietū he kī pūai:

«Te kope pohe ki te vai e oho mai ki a au, 'e te kope haka moe i tō'ona mana'u 'i ruŋa i a au e unu. Pa he me'e kī 'i ruŋa i te [Pāpa'i Mo'a]: mai roto i rā kope ka tehe ena pa he rio te vai va'ai i te ora 'āpī 'ina he hope'a ra'a o te 'Atua».

³⁹ Hai me'e nei i haka 'ite ai e Ietū e tu'u e noho rō te Vārua Maitai 'i roto i te nu'u haka moe i te mana'u 'i ruŋa i a ia; te me'e nō, 'i rā hora kai uŋa hia 'ana e te 'Atua i te Vārua Maitai 'i te me'e era kai hoki 'ana a Ietū ki te raŋi.

He mana'u iŋa kē-kē o ruŋa i a Ietū

⁴⁰ E ai rō 'ana te taŋata, i ŋaro'a era i te vānaŋa nei, he kī: «Te taŋata era he perofeta mau era 'ā mo tu'u mai». ⁴¹ Tētahi e kī era: «Te kope era he Kiritō». 'E tētahi atu e kī era: «'Ina. Ta'e, pa'i, o te kona era ko Karirea te Kiritō. ⁴² Pē nei e kī ena 'i ruŋa i te Pāpa'i Mo'a: te Kiritō he hakaara o te 'ariki ko [Tāvita], 'e ka oho mai ena mai Vērene, he kona o Tāvita».

⁴³ Pē ira i mana'u kē ai te taŋata o ruŋa o Ietū. ⁴⁴ Tētahi e haŋa rō 'ana mo 'a-'aru mo ma'u mo puru, 'e, 'ina e tahi o rāua i rao i 'a-'aru.

Te nu'u ra-rahi 'ina he haka moe i te rāua mana'u 'i ruŋa i a Ietū

⁴⁵ Tū ŋā mūto'i era o te Kona Ha'amuri 'Atua he hoki he oho ki te kona era 'i ira te oromatu'a ra-rahi 'e te fariseo. He 'ui e rā nu'u:

—ĶHe aha kōrua i ta'e ma'u mai ai i a Ietū?

⁴⁶ He pāhono e tū ŋā mūto'i era:

—ĶKai ai 'ā e tahi taŋata vānaŋa pē ia!

⁴⁷ He kī ia e te fariseo:

—ĶKo haka roŋo tako'a 'ana kōrua ki tā'ana reo-reo? ⁴⁸ ĶE ai rō 'ana 'ō e tahi o te nu'u ra-rahi 'e o te fariseo i haka moe i te mana'u 'i ruŋa i a ia? ⁴⁹ Te nu'u haka moe i te rāua mana'u 'i ruŋa i a ia he nu'u ta'e aŋi-aŋi i te haka tere hūrio, 'e pe mu'a ka oho ena he haka ūtu'a e te 'Atua.

⁵⁰ He kī e Nikoremo, he fariseo oho u'i i a Ietū 'i te mahana e tahi:

⁵¹ —Ki te tātou haka tere iŋa, e ko tano mo haka ūtu'a i te taŋata 'ina kai haka roŋo hia ki tā'ana vānaŋa 'e 'ina kai 'ite hia he aha tā'ana me'e i aŋa.

⁵² He pāhono e rā nu'u:

—ĶA koe tako'a o Karirea? Ka hāpī i te me'e hā'aki 'i ruŋa i te Pāpa'i Mo'a 'e he take'a e koe mau 'ā 'ina he perofeta o Karirea.

[⁵³ He e'a ia tū nu'u ta'ato'a era he oho ki te rāua hare.

He vi'e tai'ata e tahi

8 He e'a a Ietū he iri ki ruŋa i te Ma'uŋa o te 'Ōrivo. ² 'I te rua mahana 'i te pō era 'ā, he hoki ki te Kona Ha'amuri 'Atua. He haka hāhine ia te taŋata, 'e he noho a Ietū he hāpī.

³ Te nu'u [ma'ori o te haka tere hūrio] 'e te [fariseo] he ma'u i te vi'e e tahi ko ma'urima 'ā e tai'ata 'ana. He haka māroa 'i vāeŋa o te ta'ato'a, ⁴ 'e he kī ki a Ietū:

—E te Ma'ori, te vi'e nei ko ma'urima 'ana e mātou e tai'ata 'ā. ⁵ 'I ruŋa i te [haka tere iŋa 'a Mōtē] e hā'aki ena: e tama'i hai mā'ea ki te mate i te ŋā vi'e tu'u pē nei. ĶPē hē ki ta'a kī?

⁶ 'I ui ai i te me'e nei mo u'i pē hē a Ietū ka pāhono era, pē ira a rāua ana rava'a i te rāve'a mo aŋa i te ture mō'ona. Kai pāhono a Ietū; he noi he pāpa'i hai maŋa-maŋa rima 'i ruŋa i te 'ō'one. ⁷ 'E, 'i te rava 'ui nō e tū nu'u era, he e'a te 'āriŋa a ruŋa he kī:

—Mo ai e tahi taŋata o roto i a kōrua 'ina he hara, ka tau e ia i te mā'ea ra'e.

⁸ 'E he noi he pāpa'i haka 'ou 'i ruŋa i te 'ō'one. ⁹ 'I ŋaro'a era i rā me'e e tū nu'u era, he ha'amata he maraŋa he oho, te nu'u ra'e i oho he nu'u 'ata pa'ari. I topa era ararua ko rā vi'e ¹⁰ he e'a haka 'ou te 'āriŋa o Ietū a ruŋa he 'ui:

—Ē, Ķhē tū nu'u era? Ķ'Ina e tahi o rāua i haka ūtu'a atu i a koe?

¹¹ He pāhono e tū vi'e era:

—'Ina.

He kī e Ietū:

—'Ina tako'a a au e ko haka ūtu'a atu. Ka e'a koe ka oho, 'e 'ina ko hara haka 'ou.]

A Ietū he mōrī o te ao

¹² Ko roa atu 'ā te hora he vānaŋa haka 'ou a Ietū ki te taŋata, he kī pē nei ē:

—A au he mōrī haka mā'eha i te mana'u o te taŋata o te ao; te kope oho mai ki a au e ko oho a roto i te pōhāhā. He ai i a ia te mōrī va'ai i te ora 'āpī 'ina he hope'a ra'a.

¹³ He kī e te fariseo:

—Ko koe nō te kope vānaŋa riva-riva o ruŋa i a koe, 'o ira 'ina e tahi hauha'a o ta'a vānaŋa ena.

¹⁴ He pāhono e Ietū:

—Ka ai atu mā'aku mau 'ā e kī i te vānaŋa riva-riva o ruŋa i a au, e hauha'a rō 'ana 'o te ai ko 'ite 'ana a au mai hē a au i oho mai ai 'e ki hē a au ka oho nei, he me'e kai 'ite e kōrua. ¹⁵ Hai mana'u taŋata a kōrua e kī ena i te tano 'e i te ta'e tano ō'oku. 'E a au, 'ina he kī i te tano 'e i te ta'e tano o te taŋata. ¹⁶ 'E, mo kī tā'ue ō'oku, he parauti'a mau 'ā 'o te ai ta'e hoko tahi nō a au ka kī era, ararua māua ko tō'oku Matu'a uŋa mai era i a au. ¹⁷ 'I te haka tere iŋa o kōrua e hā'aki rō 'ā: mo ai hoko rua mata'ite kī i tū vānaŋa 'ana, e hauha'a rō 'ana te rāua me'e kī. ¹⁸ Iā, ko au mau 'ana ia tō'oku mata'ite, 'e he Matu'a uŋa mai i a au tō'oku rua mata'ite.

¹⁹ He 'ui ia e rā nu'u:

—Ķ'I hē tu'u matu'a?

He pāhono e Ietū:

—A kōrua 'ina kai 'ite ko ai a au, 'e ko ai tō'oku Matu'a. 'Āhani e 'ite rō 'ana e kōrua ko ai a au, ko 'ite tako'a 'ana ko ai tō'oku Matu'a.

²⁰ Te me'e nei i kī ai e Ietū 'i te hora hāpī 'i te Kona Ha'amuri 'Atua, hāhine ki te 'avahata haka rē moni. 'E, 'ina e tahi nu'u i 'a-'aru i a Ietū 'i te me'e era kai tano 'ā tō'ona hora.

He ta'e anji-anji i te vānaŋa 'a Ietū

²¹ He kī haka 'ou e Ietū:

—E ko roa a au ka oho rō nei 'e he kimi mai kōrua i a au. 'E, a kōrua e ko tu'u atu ki te kona nei ō'oku ka oho nei 'o te ai e ko haka kore hia e te 'Atua i te kōrua hara ka mā-mate rō ena.

²² He kī e te hūrio ra-rahi:

—Ā mana'u 'ana 'ō pēaha te kope era mo tiŋa'i i a ia, 'o ira e kī mai ena e ko tu'u tātou ki te kona ena ō'ona ka oho ena?

²³ He kī e Ietū:

—O raro nei a kōrua, 'e o ruŋa era a au; o te ao nei a kōrua; 'e ta'e a au o te ao nei. ²⁴ Te tumu o tā'aku vānaŋa era: "he mā-mate kōrua e ko haka kore hia e te 'Atua i te kōrua hara" ko te me'e nei: mo ta'e ai he parauti'a mau 'ā mo kōrua pē nei ē: a au he kope nei e au e kī atu ena, he mā-mate kōrua 'i te kōrua hara.

²⁵ He 'ui e rā nu'u:

—Ā Ko ai ia koe?

He pāhono e Ietū:

—A au ko tū kope kī mau atu era 'ā e au mai te hora ha'amata hāpī i te taŋata ki te hora nei. ²⁶ E rahi rō 'ā te me'e mo kī atu ō'oku o ruŋa i a kōrua, mo ture 'e mo haka ūtu'a. Ka ai atu pē ira, tā'aku me'e kī nō ki te taŋata o te ao he me'e kī mai e te kope uŋa mai i a au. He parauti'a mau nō, pa'i, tā'ana me'e kī.

²⁷ 'E, 'ina e rā nu'u he anji-anji pē nei ē: te kope era e kī era e Ietū he 'Atua Matu'a. ²⁸ 'O ira i kī ai e Ietū:

—Hora ena o kōrua ka veo ena i te [Poki o te taŋata] 'i ruŋa i te tātaurō, ka 'ite iho ena e kōrua: a au ko tū kope kī mau atu era 'ā e au, tā'aku me'e aŋa ta'e hai mana'u ō'oku, 'e tā'aku me'e kī mau nō he me'e hāpī mai e tō'oku Matu'a. ²⁹ Ararua māua ko te kope uŋa mai i a au; 'ina a ia he haka rē i a au hoko tahi nō 'o te ai te me'e aŋa mau nō 'ā'aku he me'e haŋa 'ā'ana.

³⁰ I kī era a Ietū i te me'e nei, i rahi rō te nu'u i haka moe i te rāua mana'u 'i ruŋa i a ia.

He nā poki o te 'Atua 'e he 'ekaravo o te hara

³¹ He kī e Ietū ki te hūrio [haka moe i te mana'u] 'i ruŋa i a ia:

—Mo haka roŋo 'e mo ha'atura mo oho nō kōrua ki tā'aku vānaŋa, he nu'u hāpī mau 'ana ia kōrua 'ā'aku; ³² he 'ite kōrua i te parauti'a, 'e hai nā parauti'a he e'a kōrua mai te rima o te me'e haka 'ekaravo atu i a kōrua.

³³ He pāhono e rā nu'u:

—A mātou he hakaara o [Aparahama], 'e 'ina mātou kai ai 'ā he 'ekaravo. Ā Pē hē ia koe e kī mai ena he e'a a mātou mai te rima o te kope haka 'ekaravo i a mātou?

³⁴ He kī e Ietū:

—Ī a au he kī atu: te taŋata hara oho nō he 'ekaravo o te hara. ³⁵ Te 'ekaravo o te hua'ai e tahi e ko noho mau rō 'ai ananake ko rā hua'ai. Te nā poki o rā hua'ai ta'e pē ira; a rāua, pa'i, he noho mau rō 'ai 'i roto i rā hua'ai. ³⁶ Mo haka e'a i a kōrua e te Poki o te 'Atua mai te rima o te me'e haka 'ekaravo i a kōrua, he e'a mau rō 'ai.

³⁷ »Ko 'ite 'ana a au he hakaara kōrua o 'Aparahama 'e ko 'ite tako'a 'ana e haŋa rō 'ana kōrua mo tiŋa'i i a au, he ta'e haŋa o kōrua ki tā'aku vānaŋa haka 'ite atu. ³⁸ A au e vānaŋa nei hai me'e i haka 'ite 'e i haka take'a mai e tō'oku Matu'a. A kōrua tako'a e aŋa ena i te me'e i take'a 'e i ŋaro'a mai te kōrua matu'a.

³⁹ He kī e rā nu'u:

—Ā Te mātou matu'a ko 'Aparahama!

He pāhono e Ietū:

—Āhāni kōrua he nā poki mau 'ā 'a 'Aparahama, te kōrua me'e aŋa he me'e aŋa e ia. ⁴⁰ Ka ai atu ko kī atu 'ana a au i te parauti'a hāpī mai e te 'Atua, e haŋa nō 'ana a kōrua mo tiŋa'i i a au. Ā 'Aparahama kai aŋa i te me'e pē nā! ⁴¹ Te me'e aŋa o kōrua pa he me'e aŋa e te kōrua matu'a.

He kī e rā nu'u:

—Ā Ta'e a mātou he mōrore; e tahi nō mātou Matu'a, he 'Atua!

⁴² He pāhono e Ietū:

—Mo ai he parauti'a mau 'ā he 'Atua te kōrua matu'a, e haŋa rō mai 'ana ia kōrua ki a au; mai te 'Atua mau nō, pa'i, a au i oho mai ai. I oho mai ai a au ta'e hai mana'u ō'oku 'ā, o te 'Atua a au i uŋa mai.

⁴³ »Ā He aha kōrua e ta'e anji-anji ena i tā'aku me'e haka 'ite atu? He ta'e tano o kōrua mo haka roŋo mai.

⁴⁴ Te kōrua matu'a ko Rukifero; 'ā'ana kōrua, 'e te kōrua me'e haŋa mo aŋa he me'e haŋa 'ā'ana. A ia he taparahi-ta'ata tiŋa'i i te taŋata mai mu'a 'ā. 'Ina he noho 'i roto i te parauti'a, 'e 'ina e tahi parauti'a kī. E reo-reo ena, e vānaŋa 'ā i tā'ana me'e i 'ite. A ia he reo-reo 'e he matu'a o te reo-reo.

⁴⁵ »A kōrua e ta'e haka roŋo mai ena he kī ō'oku i te parauti'a. ⁴⁶ ¿Ko ai o roto i a kōrua mo haka take'a mai e hara rō 'ana a au? Mo ai he parauti'a tā'aku me'e kī, ¿he aha ia kōrua e ta'e haka roŋo mai ena? ⁴⁷ Te ŋā po-ki o te 'Atua e haka roŋo rō 'ana ki te vānaŋa o te 'Atua. 'E, 'i te me'e era ta'e a kōrua o te 'Atua, 'ina he haka roŋo mai.

Te Kiritō ko ai era 'ana ki a 'Aparahama

⁴⁸ He kī ia e te hūrio ra-rahi:

—¿Ko take'a 'ā? He aŋi mau 'ā te mātou me'e kī: o [Tāmāria] koe 'e 'i roto i a koe te tātane.

⁴⁹ He pāhono e Ietū:

—'Ina e tahi tātane o roto i a au. He mo'a mau nō tā'aku aŋa i tō'oku Matu'a, 'e te aŋa o kōrua he vānaŋa ta'e tano nō mō'oku. ⁵⁰ 'Ina a au he kimi mo haka nui-nui i a au e te taŋata. Ka ai atu pē ira, e ai rō 'ana te kope haŋa ki rā me'e mō'oku, 'e 'ā'ana te kī i te me'e tano 'e i te me'e ta'e tano o te taŋata. ⁵¹ 'Ī a au he kī atu: te kope haka roŋo i tā'aku vānaŋa e ko mate ki te hora hope'a.

⁵² He pāhono e te hūrio:

—Ko tano mau 'ā te mana'u o mātou: nā 'i roto i a koe te tātane. A 'Aparahama, pa'i, ananake ko te perofeta ta'ato'a ko mā-mate tahi 'ana, 'e, ¿nā koe e kī 'ā te kope haka roŋo i ta'a vānaŋa, 'ina e ko mate? ⁵³ ¿'Ata hau 'ō koe ki te mātou matu'a ko 'Aparahama? A ia, pa'i, ko mate 'ana; pē ira tako'a 'ana te perofeta. ¿Ko ai ia koe e kī ena i te me'e tu'u pē nā?

⁵⁴ He pāhono e Ietū:

—Mo haka nui-nui ō'oku i a au mau 'ā, 'ina e tahi hauha'a. 'E te kope haka nui-nui i a au he Matu'a ō'oku, he kope kī e kōrua he 'Atua o kōrua. ⁵⁵ 'E, 'ina kai māhani a kōrua i a ia. Ko au te me'e i māhani. Mo kī atu ō'oku kai māhani a au i a ia, pē kōrua 'ā tō'oku reo-reo. Te parauti'a, pa'i, ko māhani 'ana e au i a ia; e haka roŋo 'e e ha'atura rō 'ana a au ki tā'ana vānaŋa. ⁵⁶ Te tupuna era o kōrua ko 'Aparahama ko 'ite 'ā e uŋa rō mai i a au ki te ao nei 'e e tiaki era ki rā mahana hai koa.

⁵⁷ He kī e te hūrio ki a Ietū:

—Kai tano 'ā tu'u pae 'ahuru matahiti, 'e, ¿nā koe e kī mai ena ko take'a 'ana e koe a 'Aparahama?

⁵⁸ He pāhono e Ietū:

—'Ī a au he kī atu i te parauti'a: ko ai era 'ana a au i poreko mai ai a 'Aparahama.

⁵⁹ He to'o ia e rā nu'u i te mā'ea mo tama'i ki a Ietū. 'E, kai take'a ia e rā nu'u i e'a i oho rō ai mai te Kona Ha'amuri 'Atua.

He haka ora iŋa o Ietū i te taŋata matapō

9 I e'a era a Ietū, he take'a i te taŋata mai tō'ona poreko iŋa 'ana e pō rō 'ā te mata. ² He 'ui e tā'ana nu'u hāpī:

—E te Ma'ori, ¿he aha te taŋata ena i poreko ai pē nā: e pō rō 'ā te mata? ¿He hara o tō'ona matu'a, 'o he hara ō'ona?

³ He pāhono e Ietū:

—I ai ena pē nā mo haka take'a 'i ruŋa i a ia i te pūai o te 'Atua, ta'e 'ō he hara ō'ona, 'e ta'e he hara o tō'ona matu'a. ⁴ E 'ōtea nō 'ana, te aura'a, e ora nō 'ā, he aŋa a tātou i te aŋa o te kope uŋa mai i a au. 'E, ka pō ena, te aura'a, ka mate ena, e ko riva haka 'ou te taŋata mo aŋa. ⁵ Hora nei ō'oku 'i te ao he mōrī haka mā'eha a au i te mana'u o te taŋata.

⁶ I kī era a Ietū i te me'e nei, he 'ā-'anu i te 'ō'one mo haka vai-vai, he to'o mai he oi-oi 'e he paru ki te mata o tū taŋata matapō era. ⁷ I oti era he kī: «Ka oho ka hopu tu'u mata 'i te puna era ko Tiroē». (Te ha'aura'a o rā 'iŋoa: «he kope uŋa»).

He oho tū taŋata matapō era he hopu. I hoki haka 'ou era ko take'a 'ā i te me'e. ⁸ Te nu'u e hāhine rō 'ā te rāua hare ki te hare o rā taŋata 'e te nu'u rava take'a e no-no'i 'ana ki te moni he 'ui: «¿Ta'e 'ō rā ko te kope era e noho e no-no'i era ki te moni?». ⁹ He kī e te tē-tahi: «'Ē-ē, ko ia». 'E tētahi atu e kī era: «'Ina, ta'e ko ia, ka ai atu pē ia 'ā te huru». He kī e rā kope: «'Ē-ē, ko au mau 'ā». ¹⁰ He 'ui ia:

—¿Pē hē i ai ena ko take'a 'ā e koe i te me'e 'i te hora ena?

¹¹ He pāhono e rā kope:

—O te taŋata ena e kī ena ko Ietū i aŋa i te rare-rare, 'ai ka paru mai ki tō'oku mata, 'e he kī mai: «Ka oho koe ki te puna era ko Tiroē, ka hopu». He e'a a au he oho. I oti era te hopu i tō'oku mata, he mā'eha rō 'ai.

¹² He 'ui haka 'ou e rā nu'u:

—¿'I hē te taŋata ena?

He kī e rā kope:

—Kai 'ite au.

He fariseo 'e ko tū kope matapō era

¹³⁻¹⁴ Te mahana aŋa era e Ietū i te rare-rare 'e haka ora era i te mata o tū taŋata era he [mahana haka

ora]. 'O ira i ma'u ai e te nu'u i rā taŋata ki te [fariseo].
¹⁵ He 'ui ia e te fariseo:

—ĶPē hē i ai ai ko take'a 'ana e koe i te me'e 'i te hora ena?

He pāhono e rā taŋata:

—Ko paru mai 'ana i tō'oku mata hai rare-rare, ko hopu 'ā e au, 'e he mā'eha rō 'ai.

¹⁶ He kī e te tētahi fariseo: «Te kope aŋa i te me'e ena ta'e o te 'Atua he ta'e mo'a i te mahana haka ora». 'E o te tētahi atu i kī: «ĶPē hē te taŋata hara ana aŋa i te mana tu'u pē nā?». He mana'u kē-kē rō atu 'ai rā ŋā fariseo ¹⁷ 'e he 'ui haka 'ou ki tū taŋata era:

—Ki tu'u mana'u, Ķko ai rā taŋata? Nā, pa'i, ko haka ora atu 'ana i tu'u mata.

He pāhono e rā taŋata:

—Mō'oku he perofeta.

¹⁸ Mo te [hūrio] ra-rahi ta'e he parauti'a: rā taŋata i ai rō 'ō he matapō, 'ātā i haka uŋa rō ki tō'ona matu'a mo oho ki ira ¹⁹ 'e he 'ui:

—ĶHe poki nei o kōrua? ĶHe parauti'a i poreko ai e matapō rō 'ā? ĶPē hē ia e take'a ena 'i te hora nei?

²⁰ He pāhono e te matu'a:

—Ko 'ite 'ana e māua he poki mau 'ā a ia o māua, 'e i poreko ai e matapō rō 'ana. ²¹ Te me'e o māua i ta'e 'ite pē hē a ia e take'a ena 'i te hora nei, 'e 'ina kai 'ite tako'a a māua 'a 'ai i haka ora i tō'ona mata. Ka 'ui ki a ia 'ā; ko pa'ari 'ana, 'e mā'ana mau 'ā e kī atu.

²² I kī ai i te me'e nei e tō'ona ŋā matu'a era he ri'a-ri'a 'o te 'ite: te nu'u hūrio ra-rahi ko ha'a'au era 'ana mo haka e'a mau rō 'ai mai roto i te hare pure i te nu'u kī: a Ietū he [Kiritō]. ²³ 'O ira i kī ai: «Ka 'ui ki a ia 'ā; ko pa'ari 'ana, 'e mā'ana mau 'ā e kī atu».

²⁴ He haka uŋa haka 'ou e rā nu'u ra-rahi era mo oho o tū taŋata ora era o te mata, he kī:

—Ka hōrea 'i mu'a o te 'Atua he kī mai koe i te parauti'a o ruŋa i tū taŋata haka ora atu era i a koe. E 'ite rō 'ana, pa'i, e mātou he taŋata hara a ia.

²⁵ He pāhono e rā taŋata:

—Mo ai a ia he taŋata hara, kai 'ite au. Tā'aku me'e i 'ite: a au he taŋata matakeva 'i mu'a 'ā, 'e, hora nei, ko take'a 'ana e au i te me'e.

²⁶ He 'ui haka 'ou:

—ĶHe aha te me'e i aŋa atu? ĶHe aha te me'e i aŋa mo haka ora atu i tu'u mata?

²⁷ He pāhono e rā taŋata:

—Ko kī atu 'ana e au, 'e 'ina kōrua he haka roŋo mai. ĶHe aha kōrua e haŋa ena mo kī haka 'ou atu ō'oku i tū me'e 'ā? ĶKa kī 'ō e haŋa tako'a rō 'ana kōrua mo riro he nu'u hāpī 'ā'ana?

²⁸ He ha'amata ia tū nu'u era he vā-vā i rā kope, 'e he kī:

—Ko koe 'ā ta'a me'e he taŋata hāpī o te taŋata era; a mātou he nu'u hāpī 'a [Mōtē]. ²⁹ Ko 'ite 'ana a mātou i vānaŋa rō te 'Atua ki a Mōtē, 'e te kope ena, kai 'ite a mātou mai hē i e'a mai ai.

³⁰ He pāhono e rā taŋata:

—ĶKo te me'e huru kē! 'Ina a kōrua he 'ite mai hē a ia i e'a mai ai, ka ai atu ko haka ora 'ana i tō'oku mata.

³¹ Ko 'ite riva-riva 'ā a tātou: te 'Atua 'ina he haka roŋo ki te nu'u hara; e haka roŋo ena ki te nu'u ha'amuri ki a ia 'e aŋa i tā'ana me'e haŋa. ³² Mai te ha'amata iŋa 'ā o te ao kai ŋaro'a mai 'ana o ruŋa o te taŋata haka ora i te mata o te kope i poreko ai e matapō rō 'ā. ³³ Mo ta'e ai o te taŋata era mai te 'Atua i oho mai ai, e ko rava'a e ia mo aŋa e tahi me'e tu'u pa he me'e nei.

³⁴ He kī ia e tū nu'u era:

—A koe, mai tu'u poreko iŋa 'ā ki te hora nei, he taŋata hara, 'e, Ķe haŋa 'ā koe mo hāpī mai i a mātou?

He to'o ia e tū nu'u ra-rahi era i rā taŋata he haka e'a mau rō 'ai mai roto i te [hare pure hūrio].

He nu'u matapō mo te me'e o te 'Atua

³⁵ He ŋaro'a e Ietū ko haka e'a mau 'ana i tū taŋata matapō era mai te hare pure hūrio. I piri era ki rā kope he 'ui:

—ĶE haka moe rō 'ana koe i tu'u mana'u 'i ruŋa i te [Poki o te taŋata]?

³⁶ He pāhono e rā kope:

—Ka kī mai koe ko ai nā me'e ki haka moe ai au i tō'oku mana'u 'i ruŋa i a ia.

³⁷ He pāhono e Ietū:

—Nā ko take'a 'ā e koe: ko au mau nei 'ā e vānaŋa atu ena.

³⁸ He kī ia e tū taŋata era:

—'I te hora nei ko haka moe 'ana a au i tō'oku mana'u 'i ruŋa i a koe.

'E he tū-turi he ha'amuri.

³⁹ He kī e Ietū: «A au i oho mai ai ki te ao nei mo kī i te me'e tano 'e i te me'e ta'e tano o te taŋata. Te nu'u e keva rō 'ā te mata mo te me'e o te 'Atua e haka mā'eha rō e au i te rāua mana'u. 'E te nu'u kī ko 'ite 'ā a rāua o ruŋa i te 'Atua e haka aŋi-aŋi rō e au e keva rō 'ana te rāua mata mo te me'e o te 'Atua».

⁴⁰ I ŋaro'a era i rā me'e e te fariseo o muri, he kī:

—ĀTa'a kī: e matapō rō 'ana a mātou?

⁴¹ He pāhono e Ietū:

—'Āhani kōrua he nu'u matapō mau 'ā mo te me'e o te 'Atua, e ko paŋaha'a rahi te ūtu'a o te kōrua hara. 'E, 'i te kī e 'ite rō 'ana kōrua i te me'e o ruŋa i te 'Atua, 'ata paŋaha'a te ūtu'a o te kōrua hara.

He taŋata hāpa'o māmoe 'e he māmoe 'ā'ana

10 He kī ia e Ietū:

«He parauti'a te me'e nei: Te kope ta'e uru a roto i te 'ōpani ki roto i te 'āua māmoe he toke-toke. ² 'E te kope uru a roto he taŋata hāpa'o māmoe. ³ Te kope 'auario i te 'ōpani he mātaki i te 'ōpani ki te taŋata hāpa'o māmoe. He raŋi e rā taŋata ki tā'ana māmoe e tahi e tahi hai 'iŋoa 'e he aŋi-aŋi e te māmoe i tō'ona re'o. He to'o ia e rā taŋata i tā'ana māmoe mai roto i te 'āua puru.

⁴ »I e'a tahi era, he ha'ere rā taŋata 'i mu'a 'e 'i tu'a ka oho tahi atu era te māmoe 'i te aŋi-aŋi i te re'o. ⁵ Te māmoe e ko oho 'i tu'a o te taŋata kai māhani e rāua; he tē-tere mai muri 'o te ta'e aŋi-aŋi i te re'o».

⁶ I 'a'amu era e Ietū i te 'a'amu ha'aaura'a nei, kai aŋi-aŋi e te nu'u he aha tā'ana me'e e haŋa era mo haka 'ite.

A Ietū he taŋata hāpa'o māmoe riva-riva

⁷ He kī haka 'ou e Ietū:

«He parauti'a te me'e nei: He 'ōpani a au a ira te māmoe e uru ena. ⁸ Te nu'u tu'u ra'e māi ki a au haka tu'u i a rāua pa he nu'u hāpa'o māmoe he toke-toke, 'e kai oho te māmoe 'i tu'a i a rāua. ⁹ A au he 'ōpani: te kope uru a roto i a au he e'a mai roto i te ūtu'a o te hara 'e he rava'a i te ora 'āpī 'ina he hope'a ra'a va'ai e te 'Atua. He riro pa he māmoe e o'o e e'a ena, 'e he rava'a mauku.

¹⁰ »Te toke-toke e oho mai ena mo toke, mo tiŋa'i mo haka mate 'e mo tōtōā; 'e, a au i oho mai ai mo rava'a e kōrua i te ora 'āpī 'ina he hope'a ra'a, 'e mo noho o kōrua e koa rō 'ā 'e e ha'amaitai rō 'ā e te 'Atua. ¹¹ A au he taŋata hāpa'o riva-riva i te māmoe. Te taŋata hāpa'o riva-riva i te māmoe he va'ai i a ia ki te mate mo tā'ana māmoe. ¹² 'E te kope 'auhau mo 'auario i te māmoe ta'e he taŋata hāpa'o māmoe parauti'a 'e ta'e 'ā'ana rā ŋā māmoe. Ka take'a era i te paiheŋa taehae, he hoa i te māmoe, he e'a he tere. 'E he rere ia e te

paiheŋa, he ŋau i te māmoe 'e he huata te tētahi a te kona ta'ato'a. ¹³ Nei taŋata he e'a he tere 'o te ai he taŋata 'auhau nō 'e 'ina he tapa atu i te māmoe.

¹⁴⁻¹⁵ »He taŋata hāpa'o riva-riva a au i te māmoe. Pa he 'ite iŋa ena 'ā o tō'oku Matu'a ko ai a au 'e a au ko ai a ia, pē ira tako'a 'ana a au e 'ite nei ko ai ko ai tā'aku māmoe, 'e rā ŋā māmoe e 'ite rō 'ana ko ai a au. 'E he va'ai a au i a au mau 'ā ki te mate mo tā'aku māmoe.

¹⁶ »E ai tako'a rō 'ana tā'aku māmoe ta'e o roto o te 'āua nei; e haka taka-taka tako'a a au i a rāua. E haka roŋo rō a rāua ki tō'oku re'o 'e he riro mau rō 'āvai e tahi nō nūna'a māmoe, 'e e tahi nō taŋata hāpa'o māmoe.

¹⁷ »Te Matu'a e haŋa rō mai 'ana ki a au 'o te va'ai ō'oku i a au mo mate mo te rua 'e 'o te ora haka 'ou ō'oku mai te mate. ¹⁸ Ta'e hai pūai taŋata a au ka mate ena; mā'aku mau 'ā e va'ai i a au mo mate. I a au mau 'ana, pa'i, te parau mo va'ai i a au mo mate 'e mo ora haka 'ou. Ko te me'e nei tā'aku me'e mo aŋa i kī mai ai e tō'oku Matu'a».

¹⁹ I ŋaro'a era e te [hūrio] i te vānaŋa nei, he mana'u kē-kē haka 'ou ananake o ruŋa i a Ietū. ²⁰ Nu'u rahi te nu'u o rāua i kī: «ĀHe aha kōrua e haka roŋo ena? Ko o'o 'ana, ho'i, rā e te tātane 'e ko ma'a-ma'a 'ana».

²¹ 'E, o tētahi atu te kī: «'Ina e tahi kope o'o e te tātane vānaŋa pē nei. ĀE rava'a rō hō e te tātane mo haka ora i te mata o te taŋata matapō?».

Te hūrio ra-rahi 'ina he haŋa ki a Ietū

²² Rā hora he toŋa, 'e 'i Hērutarema e aŋa 'ana i te [ŋoŋoro o te ha'amo'a], ŋoŋoro haka mana'u ki te mahana ha'amo'a i te Kona Ha'amuri 'Atua. ²³ 'I ira a Ietū e ha'ere 'ā a te kona kī he Taupe'a o [Toromono]. ²⁴ He haka vari e te hūrio 'e he 'ui:

—ĀTā ki hē koe ka haka mira-mira nō mai ena i te mātou mana'u? Hoki he [Kiritō] mau 'ā koe, ka kī rō mai 'ai.

²⁵ He pāhono e Ietū:

—Ko kī atu era 'ana e au, 'e 'ina kōrua he haka roŋo mai. Hai me'e aŋa e au hai pūai o tō'oku Matu'a, e haka take'a atu ena, ²⁶ 'e 'ina kōrua he [haka moe i te mana'u] 'i ruŋa i a au, he ta'e ai o kōrua he māmoe 'ā'aku. ²⁷ Tā'aku māmoe, pa'i, e aŋi-aŋi rō 'ana i tō'oku re'o, 'e ko 'ite 'ana e au ko ai ko ai. A rāua e oho rō mai 'ana 'i muri i a au. ²⁸ Mā'aku e va'ai ki a rāua i te ora 'āpī 'ina he hope'a ra'a, 'o haka tapa e te 'Atua i a rāua mai muri i a ia 'e 'o haka ūtu'a. 'E 'ina e tahi kope mo hiko i a rāua mai i a au. ²⁹ O tō'oku Matu'a i va'ai mai i a rāua. A ia he kope hope'a o te pūai, 'e 'ina e tahi kope mo hiko i a rāua mai tō'ona rima. ³⁰ 'E, a māua ko te Matu'a e tahi mau nō.

³¹ He to'o haka 'ou e te hūrio i te mā'ea mo tau ki a Ietū, ³² 'e he me'e e Ietū:

—Hai pūai o tō'oku Matu'a i aña ai a au me'e rahi atu me'e riva-riva 'i mu'a o kōrua. ʔ'O me'e hē ia o rā nā me'e ka tama'i mai ena kōrua i a au hai mā'ea?

³³ He pāhono e te hūrio:

—E ko tama'i atu a mātou i a koe hai mā'ea 'o ta'a me'e riva-riva aña. Ka tama'i atu ena 'o tu'u vānaña ta'e tano mo te 'Atua. He haka tu'u ō'ou i a koe he 'Atua; a koe, pa'i, he taŋata mau ena.

³⁴ He kī e Ietū:

—'I ruŋa i te [Pāpa'i Mo'a] e hā'aki rō 'ana te vānaña kī e te 'Atua ki te tētahi nu'u ra-rahi pē nei ē: "A kōrua he 'atua". ³⁵ 'E a tātou ko 'ite riva-riva 'ana 'ina e tahi me'e o ruŋa i te Pāpa'i Mo'a mo haka kore. 'E mo ai i kī rō te 'Atua ki rā nu'u pē ira, ³⁶ ʔhe aha ia a kōrua e kī ena ko kī 'ana a au i te vānaña ta'e tano mo te 'Atua hora kī era ō'oku he Poki au o te 'Atua? 'Ā'ana, pa'i, a au i ha'ata'a mo te aña nei 'e i uŋa mai ki te ao nei.

³⁷ »Mo ta'e aña ō'oku i te me'e aña e tō'oku Matu'a, 'ina ia kōrua ko haka moe i te mana'u 'i ruŋa i a au. ³⁸ 'E, mo aña ō'oku i te me'e aña e tō'oku Matu'a, ka ai atu 'ina kōrua he haka moe i te mana'u 'i ruŋa i a au, ka haka moe ia kōrua i te mana'u 'i ruŋa i tā'aku me'e aña ki 'ite ai a kōrua: te 'Atua Matu'a 'e a au e tahi mau nō.

³⁹ He moko tū nu'u era mo 'a-'aru i a Ietū, 'e 'ina kai rava'a.

⁴⁰ He e'a ia a Ietū, he hoki ki te rua pā'iŋa o te rio era ko Horotana ki te kona [papatito] era e Iovani i te taŋata 'e he noho 'i ira. ⁴¹ I rahi rō te taŋata i oho i u'i i a Ietū, 'e he kī ki a rāua 'ana: «Ka ai atu kai aña a Iovani e tahi mana, te me'e ta'ato'a kī era e ia o ruŋa o te taŋata nei he parauti'a».

⁴² E nu'u rahi te nu'u o rā kona i haka moe i te rāua mana'u 'i ruŋa i a Ietū.

He mate o Rātaro

11 He taŋata māui-ui e tahi te 'iŋoa ko Rātaro. E noho era 'i Vētānia ananake ko tō'ona taina ko [Māria] 'e ko Maratuka. ² Ko te Māria nei te Māria huri era i te va'e o Ietū hai mano'i 'e 'ai ka haro'i hai rau'oho. ³ I māui-ui era a Rātaro, he uŋa e te nā taina nei mo kī ki a Ietū: te repahoa haŋa rahi era ō'ona ko Rātaro ko māui-ui 'ā.

⁴ I 'ite era e Ietū i tū parau 'āpī era he kī: «Te hope'a o te māui-ui era ta'e he mate; he me'e nō mo haka take'a i te pūai o te 'Atua 'e, tako'a, i te pūai o te Poki o te 'Atua».

† 'I te Hīmene (Salmos

'atua. Te vānaña nei i kī ai 'o te ai 'i mu'a 'ā i ha'ata'a rō e te 'Atua i te nāŋata mo kī i te tano 'e i te ta'e tano o te hūrio 'e mo ma'u tako'a i tā'ana vānaña 'i mu'a i a rāua, te kī, mo hāpa'o pē ia 'ā pe he 'Atua i tā'ana taŋata.

⁵ Ka ai atu e haŋa rahi rō 'ana a Ietū ki a Maratuka, ki a Māria 'e ki a Rātaro, ⁶ i kī era ko māui-ui 'ana, he noho e rua mahana haka 'ou 'i te kona 'i ira a ia. ⁷ I oti era he kī ki tā'ana nu'u hāpī:

—Mai ki hoki haka 'ou tātou ki Hūrea.

⁸ He kī e te nu'u hāpī era:

—E te Ma'ori, 'i tū nā mahana era e haŋa 'ā te [hūrio] ra-rahi o ira mo tama'i i a koe hai mā'ea, 'e, ʔe haŋa nō 'ā a koe mo hoki ki ira?

⁹ He kī e Ietū:

—ʔTa'e 'ō e ho'e 'ahuru mā piti hora o te 'ōtea? Te taŋata ha'ere 'i te 'ōtea 'ina e ko tu-tuki 'o te ai e mā'e-ha rō 'ā. ¹⁰ 'E, mo ha'ere 'i te pō, he tu-tuki 'i te ta'e mā'e-ha.

¹¹ He kī haka 'ou e Ietū:

—Ko ha'uru 'ā te tātou repahoa ko Rātaro, 'e 'i e au he oho he haka 'ara.

¹² He kī e tā'ana nu'u hāpī:

—E te Ma'ori, mo ai e ha'uru 'ana, ka kī 'ō he ora tō'ona māui-ui.

¹³ Te aura'a o tū vānaña era 'a Ietū: ko mate 'ā a Rātaro. 'E, e mana'u era e rā nu'u e vānaña 'ā o ruŋa i te ha'uru mau 'ana. ¹⁴ He haka aŋi-aŋi riva-riva ia e Ietū he kī pē nei ē:

—Ko mate 'ā a Rātaro. ¹⁵ 'E, ko koa 'ana a au 'o tō'oku ta'e ai 'i ira. He me'e riva-riva, pa'i, mo kōrua ki 'ata haka moe ai te kōrua mana'u 'i ruŋa i a au. Mai ki oho tātou ki u'i.

¹⁶ He kī ia e Tōmā, kī tako'a ko Hauā, ki te tētahi nu'u hāpī o rāua: «Mai ki oho tako'a a tātou ki mā-mate 'i muri i a Ietū».

I a Ietū te ora

¹⁷ I tu'u era a Ietū ki Vētānia he 'ite ka hā mahana o te tanu o Rātaro. ¹⁸ Te kona nei e hāhine rō 'ana ki Hērutarema: e toru 'ahuru tūma'a minuti mo ha'ere, ¹⁹ 'e nu'u rahi te nu'u hūrio i oho i u'i i a Māria ararua ko Maratuka mo 'aroha 'e mo hokorua 'i te rāua 'ati.

²⁰ I 'ite era a Maratuka 'i ko tu'u 'ā a Ietū, he e'a he oho mo to'o mai; ko Māria i noho 'i te kona hare era. ²¹ He kī e Maratuka ki a Ietū:

—E Ietū, 'āhani a koe 'i nei, e ko mate tō'oku taina. ²² 'E, ka ai atu pē ira, ko 'ite 'ana e au e va'ai nō atu e te 'Atua 'i te hora nei i ta'a me'e nō era mo kī.

²³ He pāhono e Ietū:

—He ora tu'u taina.

²⁴ He kī e Maratuka:

—'Ē-ē, ko 'ite 'ana e au e ora haka 'ou rō 'i te hora haka ora i te nu'u mate 'i te mahana o te ture hope'a.

²⁵ He kī ia e Ietū:

—Ko au te me'e haka ora i te taŋata mai te mate. 'E ko au te me'e va'ai i te ora. Te taŋata [haka moe i te mana'u] 'i ruŋa i a au, ka mate atu, e ora haka 'ou nō. ²⁶ 'E te taŋata ora haka moe i te mana'u 'i ruŋa i a au, ki te hora hope'a e ko haka tapa mai muri i te 'Atua. ²⁷ 'E haka moe rō 'ana koe i tu'u mana'u 'i ruŋa i te me'e nei?

²⁷ He pāhono e Maratuka:

—'Ē-ē. Mō'oku, a koe he [Kiritō], he Poki o te 'Atua mo oho mai ki te ao nei.

He taŋi iŋa o Ietū

²⁸ I oti era a Maratuka i te kī i te me'e nei, he hoki ki muri i tū taina era ō'ona ko Māria 'e he hā'umu-umu: «'Ī te Ma'ori 'i nei. Ko kī mai 'ana mo oho ō'ou».

²⁹ I ŋaro'a era e Māria i tū vānaŋa era, he e'a he oho ki te kona era 'i ira a Ietū. ³⁰ A Ietū ia kai o'o 'ana ki Vētānia; ko te noho iŋa 'ā 'i tū kona piri era ki a Maratuka.

³¹ I take'a era e te nu'u hūrio o ira e hōrou rō 'ā a Māria i e'a ai, he e'a he oho 'i tu'a 'i te mana'u he oho he taŋi 'i te kona tanu o Rātaro.

³² I tu'u era a Māria ki tū kona era 'i ira a Ietū, he tū-turi he kī:

—E te Ma'ori, 'āhani koe 'i nei, e ko mate tō'oku taina.

³³ I take'a era e Ietū i te rahi o te taŋi o Māria ananake ko te nu'u hūrio o muri, he o'o te māui-ui ki roto i te māhatu 'e he haka 'aroha rō atu 'ai. ³⁴ He 'ui ia:

—'I hē tō'ona hakari?

He pāhono e kuā Māria:

—Mai ki oho ki haka take'a atu.

³⁵ He pariŋi te matavai o Ietū. ³⁶ He kī ia e te hūrio: «'Ka u'i rā kōrua: e haŋa rahi rō 'ā ki rā kopel!». ³⁷ He kī e te tētahi o rā nu'u: «O te taŋata era i haka ora i te mata o te taŋata matapō. 'E kai ai hō tā'ana rāve'a mo ta'e mate o Rātaro?».

He haka ora iŋa i a Rātaro

³⁸ He haka hāhine ia a Ietū ki te kona era 'i ira te hakari o Rātaro koia ko haka 'aroha. Te kona nei he

'ana e puru rō 'ā hai mā'ea nui-nui e tahi. ³⁹ He kī e Ietū:

—Ka ketu te mā'ea ena.

He pāhono e Maratuka:

—E Ietū, ka hā mahana o te mate; ko piro atu 'ā e noho mai ena.

⁴⁰ He kī haka 'ou e Ietū:

—'E kai kī atu 'ō e au, mo haka moe mai ō'ou i tu'u mana'u 'i ruŋa i a au, he take'a e koe i te pūai o te 'Atua?

⁴¹ He ketu ia e te nu'u i rā mā'ea. He u'i a Ietū a te raŋi 'e he kī:

«E Koro ō'oku ē, he māuru-uru atu a au 'o tu'u haka roŋo mai. ⁴² 'E 'ite rō 'ana e au e haka roŋo rō mai 'ā koe i tā'aku vānaŋa. E kī atu ena a au i te me'e nei mo te riva-riva o te nu'u nei, mo aŋi-aŋi e rāua: 'ā'au a au i uŋa mai».

⁴³ I oti era te kī i tū me'e era, he ohu: «'E Rātaro, ka e'a mai koe mai nā!». ⁴⁴ He e'a ia a Rātaro ko ora haka 'ou 'ā, ko te viri iŋa 'ana te hakari 'e te 'āriŋa hai kahu viri o te nu'u mate. He kī ia e Ietū: «Ka kume-kume te kahu 'ai ka haka rē rō i a ia ki ha'ere».

He ha'a'au iŋa mo 'a-'aru i a Ietū

(Māteo 26.1-5; Marko 14.1-2; Ruka 22.1-2)

⁴⁵ Me'e rahi o tū nu'u hūrio oho era 'i muri i a kuā Māria, i take'a era i tū me'e aŋa era e Ietū, he haka moe rō 'ai i te mana'u 'i ruŋa i a ia. ⁴⁶ Ka ai atu pē ira, he e'a he oho te tētahi o rā nu'u he 'a'amu i rā me'e ki te [fariseo]. ⁴⁷ Te fariseo 'e te [oromatu'a] ra-rahi he haka taka-taka tahi i te [nūna'a taŋata i a rāua te kī iŋa hope'a o te haka tere hūrio] 'e he kī:

—'E aha te tātou me'e ka aŋa nei? Ko rahi 'ā te mana aŋa e te taŋata era. ⁴⁸ Mo haka rē nō o tātou mo aŋa mo oho i tā'ana me'e ena e aŋa mai ena, te taŋata ta'ato'a he haka moe i te mana'u 'i ruŋa i a ia, 'e te nu'u ra-rahi o te rōmano he oho mai he haka marere i te tātou [Kona Ha'amuri 'Atua] 'e he haka kore i te tā-tou haka tere iŋa.

⁴⁹ E tahi o rā nu'u ko Kaifā, he oromatu'a hope'a o te ra-rahi o rā matahiti, he kī:

—A kōrua e vānaŋa tahaŋa nō 'ā. ⁵⁰ 'E kai aŋi-aŋi 'ana 'ō i hau rō atu 'i te tano mo mate o te taŋata e tahi mo te ta'ato'a ki te haka kore e te rōmano i a tātou 'e i te tātou haka tere iŋa?

⁵¹ I kī ai i rā me'e e Kaifā ta'e hai mana'u ō'ona. 'O te ai he oromatu'a hope'a o te ra-rahi o rā matahiti, i haka vānaŋa ai e te 'Atua pa he perofeta mo haka 'ite pē

nei ē: e mate rō a Ietū mo te hūrio ta'ato'a. ⁵² 'E ta'e mo te hūrio nō ka mate era, tako'a mo haka taka-taka tahi i te n̄a poki o te 'Atua 'i te henua ta'ato'a.

⁵³ Mai rā mahana te nu'u ra-rahi o te hūrio i ha'amata i kī ai mo tiŋa'i mo haka mate i a Ietū. ⁵⁴ 'O ira a Ietū i ta'e ha'ere haka 'ou ai a te kona rahi o te taŋata o Hūrea. He oho ki te kona e tahi hāhine ki te kona 'one ta'e noho taŋata te 'iŋoa ko Efaraine. 'I ira i noho ai ananake ko tā'ana nu'u hāpī.

⁵⁵ Mahana ta'e rahi nō te mahana toe mo te [ŋoŋoro o te Pakate], 'e me'e rahi taŋata e oho era ki Hērutarema mo [haka ma'itaki] i a rāua pa he me'e kī e te rāua haka tere iŋa, he me'e ra'e o rāua mo aŋa ki te tu'u iŋa mai o rā ŋoŋoro. ⁵⁶ Te nu'u ia e kimi 'ana i a Ietū, 'e 'i te Kona Ha'amuri 'Atua e 'ui era ki a rāua 'ā: «¿Pē hē ki te kōrua kī? ¿E tu'u rō mai ki te ŋoŋoro nei 'o 'ina?». ⁵⁷ Ko kī era 'ana, pa'i, e te fariseo 'e e te n̄a oromatu'a ra-rahi era: kope nō era mo take'a i a Ietū e haka 'ite ki a rāua mo haka 'a-'aru mo haka puru.

He huri iŋa hai mano'i i te va'e o Ietū

12 E ono mahana toe mo te [Pakate], he oho a Ietū ki Vētānia, he kona noho o Rātaro, he kope haka ora e ia. ² 'I ira i aŋa ai e tahi kai nui-nui mā Ietū. A Maratuka e tuha'a 'ā i te kai, 'e a Rātaro 'i ruŋa i te 'amurama'a e kai 'ā ananake ko kuā Ietū.

³ He ma'u ia e [Māria] e tahi 'apa o te mano'i he *nardo*, mano'i hope'a o te karo, he huri a ruŋa i te va'e o Ietū 'e 'ai ka haro'i hai rau'oho ō'ona. He puneki rō atu 'ai te 'eo o tū hare era. ⁴ He kī ia e Hura Ikariote, he kope mā'ana e ho'o i a Ietū:

⁵ —¿He aha te mano'i i ta'e ho'o ai mo hā'ū'ū ki te veve? Te moni, pa'i, o te mano'i era, 'āhani i ho'o, ko te tara ena mo 'auhau e toru hānere mahana aŋa.

⁶ I kī ai i te me'e nei e Hura ta'e 'o te haka 'aroha 'i te veve, he toke-toke. 'Ā'ana, pa'i, te hāpa'o i te rāua pūtē moni, 'e he toke nō te aŋa. ⁷ He kī e Ietū:

—;Ka haka rē koe i a Māria! E hāpa'o era i te mano'i ena mo paru i tō'oku hakari 'i te mahana o tō'oku mate. ⁸ Te nu'u veve e ko ŋaro mai muri i a kōrua ki te hora hope'a; 'e, a au e ko noho e ko oho nō atu 'i muri i a kōrua.

He ha'a'au iŋa mo tiŋa'i i a Rātaro

⁹ Me'e rahi nō atu nu'u i 'ite: 'i Vētānia a Ietū, 'e he e'a he oho ki ira, ta'e nō ki a Ietū u'i, ki a Rātaro tako'a, kope haka ora era e Ietū mai te mate. ¹⁰ He ha'a'au ia e te nu'u [oromatu'a ra-rahi] mo tiŋa'i mo haka mate tako'a i a Rātaro ¹¹ 'o te ai me'e rahi nu'u 'ina he haka roŋo haka 'ou ki a rāua, 'e ko haka moe 'ā i te rāua mana'u 'i ruŋa i a Ietū hai tū me'e topa era ki a Rātaro.

He tu'u iŋa o Ietū ki Hērutarema (Māteo 21.1-11; Marko 11.1-11; Ruka 19.28-40)

¹² Me'e rahi taŋata i oho ki Hērutarema ki te [ŋoŋoro he Pakate] 'e, 'i te rua mahana, i 'ite ai he tu'u a Ietū.

¹³ He ha-hati ia i te raupā niu 'e he e'a he oho ki a Ietū mo hokorua mo oho mai koia ko 'eha e oho era:

«[Osana]!»

«[Taŋata ha'amaitai e te 'Atua te taŋata oho mai nei hai 'iŋoa ō'ona, he 'Ariki o Itaraera!].»

¹⁴ He rava'a e Ietū e tahi muni 'e he eke ki ruŋa, pa he me'e kī 'i ruŋa i te [Pāpa'i Mo'a]:

¹⁵ «'Ina ko ri'a-ri'a, e te nu'u o [Tione] ē. Ka u'i, nā ka pū rō mai te kōrua 'Ariki e eke rō 'ana 'i ruŋa i te muni.»

¹⁶ 'I rā hora, 'ina kai aŋi-aŋi e tā'ana nu'u hāpī i te au-ra'a o rā n̄a me'e. Ki ora haka 'ou a Ietū mai te mate, 'e ki hoki ki te raŋi, i haka topa iho ai te mana'u: te me'e ta'ato'a topa era ki a Ietū he me'e ko hā'aki era 'ā 'i ruŋa i te Pāpa'i Mo'a.

¹⁷ Te nu'u o muri i a Ietū 'i te hora haka ora i a Rātaro, te aŋa he 'a'amu nō i tū me'e take'a era e rāua.

¹⁸ 'O ira te taŋata i e'a ai ki a Ietū, he 'ite o ruŋa i rā mana aŋa era e ia. ¹⁹ He kī e te [fariseo] ki a rāua 'ana: «Ko 'ati 'ana a tātou. 'Ina he me'e toe o tātou mo aŋa 'o oho tahi te taŋata 'i muri i a ia».

He [kirieko] e haŋa 'ā mo māhani i a Ietū

²⁰ 'I roto o te nu'u oho ki Hērutarema mo ha'amuri ki te 'Atua 'i te Pakate te nu'u kirieko. ²¹ He haka hāhine rā nu'u ki a Feripe, he kope o Vetetaira, kona o Karireia, he ani: «Ē, e haŋa rō 'ana a mātou mo māhani ki a Ietū».

²² He oho a Feripe he kī ki a Antarea, 'e ararua i oho i kī ai ki a Ietū. ²³ He kī ia e Ietū:

«Ko tano 'ā te hora mo haka take'a i te pūai 'e i te nui-nui o te [Poki o te taŋata]. ²⁴ 'Ī a au he kī atu: te karu tariko mo ta'e tanu 'i roto i te 'ō'one, 'ina e ko tupu, he topa he karu mau nō e tahi. 'E mo tanu 'i roto i te 'ō'one, he tupu, 'e he rahi mai te kai. †

²⁵ »Te kope haŋa mo aŋa i tā'ana me'e nō era i haŋa ta'e tapa i te 'Atua e ko rava'a i te ora 'āpī 'ina he hope'a ra'a, 'e te kope haka rē i tā'ana me'e haŋa mo ha'atura ki te 'Atua he rava'a. ²⁶ Te kope haŋa mo aŋa mai ki a au ka oho mai 'i muri i a au. 'E 'i te kona era 'i ira a au, 'i ira tako'a a ia. Te kope aŋa mai ki a au he haka nui-nui e tō'oku Matu'a.

† Te vānaŋa era 'a Ietū o ruŋa i te karu mō'ona mau 'ā. Te kī: hai mate ō'ona, me'e rahi nō atu nu'u he rava'a i te ora 'āpī 'ina he hope'a ra'a.

He haka 'ite iņa o Ietū i tō'ona mate

²⁷ »;Ko ɲaro'a mai 'ana 'ō e au i te māui-ui hope'a o te nui-nui 'i roto i tō'oku māhatu! ǀPē hē ia a au ana kī: "E Koro, ka haka kore atu koe i te 'ati ena 'o topa mai ki ruŋa i a au"? E ko tano a au mo kī pē ira. I oho mai ai, pa'i, a au mo te me'e mau nei 'ā. ²⁸ Te me'e mau 'ā'aku mo kī: "E Koro, ka haka take'a tu'u pūai ki te taŋata ki ha'amuri atu ai ki a koe"».

He ɲaro'a ia i te re'o e tahi mai te raŋi e kī 'ana: «Ko haka take'a era 'ana e au, 'e 'I a au he haka take'a haka 'ou».

²⁹ Te nu'u ɲaro'a 'i rā me'e he kī he pātiri. 'E o te tē-tahi te kī: «He merahi e vānaŋa 'ā ki a ia». ³⁰ He kī e Ietū:

«Ta'e ki a au te re'o era; e haka ɲaro'a atu 'ā ki a kōrua. ³¹ He hora era nei mo kī i te ūtu'a mo te taŋata ta'ato'a o te ao 'e mo rē o te 'Atua ki te kope 'ā'ana te haka tere i te ao nei ko Rukifero. ³² Ka veo ena i a au 'i ruŋa i te tātaurō, he uto tahi mai e au i te taŋata ta'a-to'a».

³³ Hai me'e nei i haka aŋi-aŋi ai e Ietū pē hē a ia ka mate era. ³⁴ He kī e te taŋata:

—E hā'aki ena 'i ruŋa i te Pāpa'i Mo'a: te [Kiritō] e ko mate ki te hora hope'a. ǀPē hē ia a koe e kī mai ena e veo rō i te Poki o te taŋata 'i ruŋa i te tātaurō? ǀKo ai ia nā Poki ena o te taŋata?

³⁵ He kī e Ietū:

—Mahana ta'e rahi te mahana toe ka noho atu ena 'i roto i a kōrua te mōrī haka mā'eha i te kōrua mana'u. 'O ira, ka hā'ere 'i roto i te mā'eha mai ai atu 'ana te mōrī, 'o rava'a a kōrua e te pōhāhā. Te kope ha'ere, pa'i, a roto i te pōhāhā, 'ina he take'a a hē a ia e oho ena. ³⁶ Ka haka moe kōrua i te mana'u 'i ruŋa i te mōrī nei mai ta'e ɲaro, ki ai ai a kōrua o nei mōrī.

I oti era a Ietū i te kī i te ɲā me'e nei, he oho he haka ɲaro 'o take'a e rā nu'u.

He aha e ta'e haka moe era i te mana'u 'i ruŋa i a Ietū

³⁷ A Ietū i aŋa rō i te mana hope'a o te nui-nui 'i mu'a i te taŋata 'e, ka ai atu pē ira, me'e rahi nō atu nu'u 'ina he haka moe i te rāua mana'u 'i ruŋa i a ia. ³⁸ Hai me'e nei i tano ai te me'e pāpa'i e te perofeta era ko 'I-taia pē nei ē:

«E te 'Atua, ǀe ai rō 'ana hō te nu'u haka roŋo 'e ha'atura ki te tāua roŋo?

ǀE ai rō 'ana hō te nu'u haŋa mo aŋi-aŋi: he pūai ō'ou te me'e take'a ena e rāua?».

³⁹ 'I te ta'e haka moe i te rāua mana'u 'i ruŋa i a Ietū i tano tako'a ai te me'e pāpa'i era e 'Itaia pē nei ē:

⁴⁰ «Te nu'u hāru i te 'Atua hai tua'ivi ko haka keva 'ā e ia i te mata 'o take'a, 'e ko haka mira-mira 'ana i te mana'u 'o aŋi-aŋi; 'o huri mai te rāua mana'u a ruŋa i a au 'e 'o haka ora e au».

⁴¹ I kī ai a 'Itaia i te vānaŋa nei 'i te me'e era ko haka take'a era 'ā e te 'Atua ki a ia 'i mu'a 'ā i te pūai o Ietū; 'o ira i vānaŋa ai o ruŋa.

⁴² Ka ai atu pē ira, me'e rahi hūrio ra-rahi i [haka moe i te mana'u] 'i ruŋa i a Ietū, 'ātā te tētahi nu'u hope'a o te ra-rahi. Te me'e nō, 'ina he haka 'ite 'i mu'a o te taŋata he ri'a-ri'a 'i te fariseo, 'o haka e'a mau rō 'āvai i a rāua mai roto i te [hare pure hūrio]. ⁴³ I hau rō atu, pa'i, te haŋa mo vānaŋa riva-riva o te taŋata o ruŋa i a rāua ki te ai o te mana'u riva-riva o te 'Atua mo rāua.

A Ietū i oho mai ai mo va'ai i te ora 'āpī

⁴⁴ He kī pūai e Ietū:

«Te kope haka moe mai i tō'ona mana'u e haka moe tako'a 'ana i te mana'u 'i ruŋa i te Kope uŋa mai i a au. ⁴⁵ 'E te kope take'a i a au te me'e take'a he kope uŋa mai i a au. ⁴⁶ I oho mai ai a au ki te ao nei pa he mōrī haka mā'eha i te mana'u o te taŋata 'o noho te nu'u haka moe i te mana'u 'i ruŋa i a au 'i roto i te pōhāhā.

⁴⁷ »Te kope ɲaro'a i tā'aku vānaŋa 'e 'ina he ha'atura, ta'e mā'aku e haka ūtu'a. Ta'e, pa'i, a au i oho mai ai mo haka ūtu'a i te taŋata o te ao; i oho mai ai mo haka e'a mai roto i te ūtu'a o te hara 'e mo va'ai i te ora 'āpī 'ina he hope'a ra'a. ⁴⁸ Te kope ta'e haŋa mai 'e ta'e ha'atura ki tā'aku vānaŋa ko ai era 'ana te me'e mo haka ūtu'a i a ia: he vānaŋa kī era e au. Hai rā vānaŋa ka haka ūtu'a ena 'i te mahana o te ture hope'a.

⁴⁹ »E vānaŋa atu era, pa'i, a au ta'e hai mana'u ō'oku 'ā; o te Matu'a uŋa mai i a au i kī mai i tā'aku me'e mo haka 'ite 'e mo hāpī. ⁵⁰ 'E ko 'ite 'ana e au: o tā'ana roŋo te va'ai i te ora 'āpī 'ina he hope'a ra'a. 'O ira, tā'aku me'e kī atu he me'e kī mau mai era 'ā e tō'oku Matu'a mo haka 'ite atu».

He haka hopu iņa o Ietū i te va'e o tā'ana nu'u hāpī

13 Te [Pakate] kai ha'amata 'ā, 'e a Ietū ko 'ite era 'ana ko tano 'ā tō'ona hora mo haka rē i te ao nei 'e mo hoki ki muri i tō'ona Matu'a. Te aŋa 'ā'ana he haka take'a he oho nō i tō'ona haŋa ki tā'ana nu'u, 'e pē ira i aŋa i oho ai 'ātā ki te hope'a.

²⁴ Ka ai atu pē ira, ko ai era 'ā 'i roto i te māhatu o Hura, poki 'a Timona Ikariote, te mana'u o Rukifero mo ho'o i a Ietū. 'E a Ietū, 'i te 'ite: mai te 'Atua a ia i oho mai ai 'e ki a ia ka hoki era, 'e 'i te 'ite tako'a ko va'ai 'ana ki a ia e tō'ona Matu'a i te parau o te me'e ta'ato'a o te ao, e kai nō 'ā he māroa mai ruŋa i te 'a-murama'a, he patu i te paratoa 'e he here i te pānio pa he pena. ⁵ He to'o i te vātōrio 'e he ha'a'ī hai vai. He ha'amata ia he haka hopu i te va'e o tā'ana nu'u hāpī 'e he haro'i hai tū pānio era.

⁶I oho era mo haka hopu i te va'e o Tīmona, kī tako'a ko Pētero, he kī:

—E Ietū, ¿He haka hopu mai a koe i tō'oku va'e?

⁷He pāhono e Ietū:

—'Ina he anjī-anjī e koe, 'i te hora nei, he aha a au e anjā nei i te me'e nei; pe mu'a ka oho ena he anjī-anjī e koe.

⁸He kī e Pētero:

—E ko ha'ati'a atu e au ki te hora hope'a mo haka hopu mai ō'ou i tō'oku va'e!

He pāhono e Ietū:

—Mo ta'e haka hopu atu ō'oku i tu'u va'e, ta'e ia a koe 'ā'aku.

⁹He kī e Pētero:

—Mo ai ia pē ira, ta'e nō he va'e ta'a me'e mo haka hopu mai; ka haka hopu tako'a mai tō'oku rima 'e tō'oku pū'oko!

¹⁰He pāhono e Ietū:

—Te tanjata hopu iho, ¿mo aha 'ā ana hopu haka 'ou? E ma'itaki rō 'ā, pa'i. He va'e nō te me'e mo hopu. 'E a kōrua e ma'itaki rō 'ana, ka ai atu e tahi o roto o kōrua ta'e pē ira.

¹¹Te vānaŋa kī era e Ietū: «ta'e ta'ato'a o kōrua e ma'itaki rō 'ā», 'o te 'ite ko ai te kope ka ho'o era i a ia.

¹²I oti era te haka hopu i te va'e, he uru haka 'ou a Ietū i tō'ona paratoa, he noho haka 'ou 'i ruŋa i te 'a-murama'a, 'e he 'ui:

«¿E anjī-anjī rō 'ana e kōrua tā'aku me'e anjā atu ena?

¹³A kōrua e kī mai ena: “e te Ma'ori”, 'e, tako'a, “e te Pū'oko Haka Tere ē”. Ko tano 'ana, he anjī mau 'ā to kōrua. ¹⁴Mo ai a au, te Ma'ori 'e te Pū'oko Haka Tere o kōrua, ko haka hopu atu 'ana i te kōrua va'e, pē ira tako'a 'ana a kōrua ana anjā 'i roto i a kōrua.

¹⁵»Hai me'e anjā ena e au, i haka take'a atu ai he aha te kōrua me'e mo anjā. ¹⁶'I a au he kī atu: 'ina he tāvini 'ata hau ki te kope haka anjā i a ia, 'e 'ina he kope ma'uroŋo 'ata hau ki te kope haka anjā i a ia. ¹⁷Mo anjī-anjī o kōrua i tā'aku me'e hāpī atu ena 'e mo anjā i rā ŋā me'e, he ha'amaitai kōrua e te 'Atua.

¹⁸»Te me'e kī atu ena e au ta'e mo kōrua ta'ato'a. Ko 'ite riva-riva 'ana e au ko ai ko ai tā'aku me'e i to'o mo tanjata hāpī 'ā'aku. I anjā ai pē ira mo tano ki te me'e kī 'i ruŋa i te [Pāpa'i Mo'a] pē nei ē:

“Te kope kai ararua māua,
ko hāruī mai 'ā i a au hai tua'ivi”.

¹⁹»E kī atu ena a au i te me'e nei mo anjī-anjī riva-riva e kōrua, 'i te hora ena ka topa ena rā me'e, pē nei ē: a au he kope mau nei 'ā e au e kī atu ena. ²⁰'I a au he kī atu: Te kope here 'i roto i tō'ona māhatu i te kope anjā e au e here tako'a 'ana i a au 'i roto i tō'ona māhatu, 'e te kope here i a au 'i roto i tō'ona māhatu e here tako'a 'ana i te kope anjā mai i a au».

He haka 'ite iŋa o Ietū he ho'o i a ia

(Māteo 26.20-25; Marko 14.17-21; Ruka 22.21-23)

²¹I oti era i te kī i te me'e nei, he ŋaro'a e Ietū i te māui-ui 'i roto i tō'ona māhatu, 'e he kī: «Nā e tahi o kōrua he va'ai i a au ki te nu'u».

²²He ha'amata ia te nu'u hāpī 'a Ietū he u'i-u'i ki a rāua 'ā; 'ina he anjī-anjī o ruŋa i a ai e vānaŋa era. ²³E tahi o rā nu'u, he kope haŋa rahi 'a Ietū, e kai 'ana 'i muri. ²⁴I ha'aaura'a atu e Pētero hai rima mo 'ui ki a Ietū o ruŋa i a ai e vānaŋa era. ²⁵He 'ata haka hāhine rā kope ki muri i a Ietū, he 'ui:

—E Ietū, ¿ko ai nā me'e?

²⁶He pāhono e Ietū:

—'I a au he haka ruku e tahi parehe haraoa; kope era ki a ia a au ka va'ai nei, ko ia.

'I tū hora 'ā he haka ruku a Ietū e tahi parehe haraoa 'e he va'ai ki a Hura, he poki 'a Tīmona Ikariote. ²⁷'I te hora to'o mau era 'ā e Hura i te haraoa i o'o ai ki roto i tō'ona māhatu a Rukifero.

He kī ia e Ietū: «Ta'a me'e mana'u ena mo anjā, ka ke'o-ke'o ka anjā rō 'ai».

²⁸'Ina e tahi o rā nu'u kai era ananake ko kuā Ietū i anjī-anjī he aha e kī era i rā me'e ki a Hura. ²⁹'E, 'i te ai 'a Hura te hāpa'o i te rāua pūtē moni, he mana'u e te tētahi o rā nu'u e kī 'ā a Ietū mo ho'o hai me'e mo te ŋoŋoro, 'o mo va'ai hai moni mo te veve.

³⁰I to'o era e Hura i rā haraoa he e'a he oho. Ko pō 'ana ia te mahana.

He roŋo 'āpī

³¹I e'a era a Hura he kī a Ietū:

—E ko roa he take'a te pūai 'e te nui-nui o te [Poki o te tanjata], 'e hai ia ka take'a tako'a ena te pūai 'e te nui-nui o te 'Atua. ³²'E mo ai hai Poki o te tanjata e haka take'a ena i te pūai 'e i te nui-nui o te 'Atua, pē ira tako'a 'ana e haka take'a ena e te 'Atua i te pūai 'e i te nui-nui o te Poki. Te me'e nei ka topa ena e ko roa hia.

³³»E kuā ŋā poki 'ā'aku ē, e ko noho haka 'ou atu a au 'i muri i a kōrua. E kimi rō mai kōrua. 'E pa he me'e kī e au ki te nu'u [hūrio] ra-rahi ka kī tako'a atu ena a au 'i te hora nei: e ko tu'u atu kōrua ki te kona nei ō'oku ka oho nei.

³⁴»He haka rē atu au i te roŋo 'āpī nei: E haŋa kōrua ki te rua. Pa he haŋa nei ō'oku mo kōrua, pē ira kōrua

ana haŋa 'i roto i a kōrua. ³⁵ Mo haŋa o kōrua pē ira, he 'ite e te taŋata: he nu'u hāpī kōrua 'ā'aku.

A Pētero e kī rō kai 'ite a ia ko ai a Ietū
(Māteo 26.31-35; Marko 14.27-31; Ruka 22.31-34)

³⁶ He 'ui e Pētero ki a Ietū:

—E Ietū, ¿ki hē koe ka oho ena?

He pāhono e Ietū:

—Te kona nei ō'oku ka oho nei, e ko tano mo oho atu ō'ou 'i te hora nei; ki tano tu'u hora he oho atu koe.

³⁷ He kī e Pētero:

—E Ietū, ¿he aha a au ana ta'e oho atu 'i te hora nei? ¿E va'ai nō a au i a au ki te mate mō'ou!

³⁸ He pāhono e Ietū:

—¿He parauti'a mau 'ā e va'ai rō koe i a koe ki te mate mō'oku? 'Ī a au he kī atu: e ko 'o'oa hia te moa ka kī ena e koe e toru kī iŋa kai 'ite koe ko ai a au.

Ko Ietū mau nō te ara ki te 'Atua Matu'a

14 «'Ina kōrua ko mana-mana'u 'o māui-ui te kōrua māhatu. Ka haka moe nō te kōrua mana'u 'i ruŋa i te 'Atua 'e 'i ruŋa i a au. ² 'Ī te hare o tō'oku Matu'a e rahi rō 'ana te kona mo noho. 'Āhani ta'e pē ira, e ko kī tahaŋa atu a au e haka riva-riva rō a au i te kona mo kōrua. ³ Ki oho au ki haka riva-riva, he hoki mai a au he to'o i a kōrua mo noho tahi o tātou 'i te kona era 'i ira a au. ⁴ A kōrua e 'ite rō 'ana ko ara hē te ara mo tu'u ki te kona ki ira a au ka iri nei».

⁵ He kī e Tōmā:

—E Ietū, 'ina a mātou kai 'ite ki hē koe ka oho ena. ¿Pē hē ia a mātou ana 'ite i te ara?

⁶ He pāhono e Ietū:

—Ko au te ara, te parauti'a, 'e te ora. Hai au mau nō kōrua ana tu'u ki te 'Atua Matu'a. ⁷ Mo 'ite o kōrua ko ai a au, he 'ite tako'a ko ai te Matu'a. 'E mai te hora nei ka 'ite ena a kōrua ko ai a ia; ko take'a ko oho nō mai era 'ā, pa'i, e kōrua i a ia.

⁸ He kī ia e Feripe:

—E Ietū, te me'e haŋa o mātou he haka take'a mai ō'ou i te Matu'a.

⁹ He pāhono e Ietū:

—E Ripe, 'i muri i a kōrua 'ana a au, 'e, ¿kai anji-anji 'ā e koe ko ai a au? Te kope take'a i a au ko take'a 'ā i te Matu'a. ¿He aha ia a koe e kī mai ena mo haka take'a

atu ō'oku i te Matu'a? ¹⁰ ¿Kai anji-anji 'ana 'ō e koe a māua ko te 'Atua Matu'a e tahi mau nō? Te me'e nei e au e kī atu ena ta'e he me'e i mana'u e au. O te Matu'a nei 'i roto i a au te aŋa i tā'ana me'e mana'u mo aŋa.

¹¹ »E 'ite kōrua: a māua ko te 'Atua Matu'a e tahi mau nō. Mo ta'e ai he parauti'a mo kōrua te me'e nei, ka haka topa nō te kōrua mana'u 'i ruŋa i tā'aku mana aŋa oho mai ena. ¹² 'E 'Ī a au he kī atu: te kope haka moe i tō'ona mana'u 'i ruŋa i a au, e aŋa tako'a rō i te me'e aŋa e au, 'e he aŋa tako'a i te me'e 'ata hau rō atu hai oho ō'oku ki te kona era 'i ira te Matu'a. ¹³ 'E te me'e ta'ato'a mo no-no'i hai 'Īŋoa ō'oku he haka tano e au, ki ai ai hai Poki ka take'a ena te pūai 'e te nui-nui o te Matu'a. ¹⁴ Te me'e ta'ato'a no-no'i mai hai 'Īŋoa ō'oku he haka tano e au.

He hōrea iŋa o Ietū he uŋa mai i te [Vārua Maitai]

¹⁵ »Mo haŋa mai o kōrua, he ha'atura kōrua ki tā'aku roŋo. ¹⁶⁻¹⁷ Ka iri nei a au, he no-no'i ki te Matu'a mo uŋa mai i te kope tā'ana me'e aŋa he hā'ū'ū, he Vārua Maitai hāpī i te Parauti'a, mo noho mau rō atu 'ai 'i roto i a kōrua. Te Vārua Maitai e ko ai i te nu'u o te ao nei ta'e [haka moe i te mana'u] 'i ruŋa i a au, he ta'e 'ite 'e he ta'e anji-anji ko ai a ia. Ko kōrua te me'e i anji-anji; a ia, pa'i, nā 'i muri i a kōrua 'e pe mu'a ka oho ena 'i roto i a kōrua mau 'ana ka noho ena.

¹⁸ »E ko haka rē a au i a kōrua pa he ŋā poki 'ina he matu'a; e hoki rō mai a au ki a kōrua. ¹⁹ Mahana ta'e rahi nō te mahana toe mo take'a i a au e te nu'u o te ao nei ta'e haka moe i te mana'u 'i ruŋa i a au. Mo kōrua nō a au e take'a, 'e he ora kōrua 'i te ai e ora rō 'ana a au. ²⁰ 'Ī rā mahana ka anji-anji ena e kōrua: a māua ko te Matu'a e tahi mau nō, a au o kōrua, 'e a kōrua 'ā'aku.

²¹ »Te kope haka roŋo 'e ha'atura ki tā'aku roŋo, ko ia te kope haŋa parauti'a mai. Tō'oku Matu'a he haŋa ki a ia 'e he haŋa tako'a e au, 'e ki a ia a au ka haka take'a ena pē hē tō'oku huru.

²² He 'ui e Hura era ta'e ko Hura Ikariote:

—E Ietū, ¿he aha ka ai ena ki a mātou nō koe ka haka take'a mai ena 'e ta'e ki te nu'u ta'ato'a o te ao?

²³ He pāhono e Ietū:

—Te kope haŋa mai ki a au he haka roŋo 'e he ha'atura ki tā'aku vānaŋa. He haŋa e tō'oku Matu'a 'e he oho a māua ko te Matu'a he noho tahi mātou. ²⁴ Te kope ta'e haŋa mai ki a au 'ina he haka roŋo 'e he ha'atura ki tā'aku vānaŋa. Te vānaŋa kī atu e au ta'e 'ā'aku, o te Matu'a uŋa mai i a au.

²⁵ »Mai ai atu 'ana a au 'i muri i a kōrua e kī atu ena a au i te me'e ta'ato'a nei. ²⁶ 'E, ki oho mai te kope hā'ū'ū era, he Vārua Maitai uŋa mai e te Matu'a hai 'Īŋoa ō'oku, he hāpī atu i te me'e ta'ato'a 'e he haka mana'u tahi atu i tā'aku vānaŋa kī atu era.

²⁷ »Ina ko mana-mana'u 'e 'ina ko ri'a-ri'a kōrua. He haka rē atu a au i te haumārū: ta'e ko te haumārū ena mo va'ai atu e te nu'u o te ao nei ta'e haka moe i te mana'u 'i ruŋa i a au, he haumārū mā'aku mau nō e va'ai atu. ²⁸ Ko ŋaro'a 'ana e kōrua i tō'oku kī iŋa atu he oho a au 'e he hoki haka 'ou mai ki a kōrua. 'Āhani e haŋa parauti'a rō mai 'ana a kōrua, ko koa tako'a 'ana 'o te 'ite he oho a au ki te Matu'a; a ia, pa'i, 'ata hau rō atu ki a au.

²⁹ »E kī atu ena a au i te me'e nei mo 'ite e kōrua, hora era ka topa era: he parauti'a mau 'ā tā'aku me'e kī atu era. ³⁰ 'Ina a au e ko vānaŋa rahi haka 'ou atu; nā, pa'i, e oho mai ena te kope 'ā'ana te ao nei te haka tere. 'E, ka ai atu 'ā'ana te haka tere, ta'e i a ia te parau o'oku. ³¹ Te me'e ta'ato'a nei he me'e mau 'ā mo topa, mo 'ite e te taŋata ta'ato'a e haŋa rahi rō 'ana a au ki te Matu'a 'e e aŋa rō 'ana a au i tā'ana me'e kī mai. »E, hora nei, ka e'a kōrua ki ruŋa ki oho rō tātu.

Te tumu vino parauti'a

15 »He tumu vino parauti'a a au; o tō'oku Matu'a te haka heu 'e te hāpa'o. ² Mo ta'e hua e tahi maŋa o'oku, he ko-koti; 'e mo hua, he to-tope mo 'ata hua. ³ A kōrua, 'i te [haka moe i te mana'u] 'i ruŋa i tā'aku vānaŋa, ko ma'itaki 'ana pa he ŋā maŋa era ko tope-tope riva-riva 'ana.

⁴ »'Ina kōrua ko haka topa mai muri i a au, pa he ta'e haka topa iŋa nei o'oku i a au mai muri i a kōrua. Te maŋa vino e tahi e ko hua mo ko-koti mo haka topa mai te tumu. Pē ira 'ana kōrua, mo topa mai muri i a au e ko hua, te aura'a, e ko riva kōrua mo aŋa i te me'e haŋa e te 'Atua.

⁵ »Ko au te tumu vino, ko kōrua te maŋa. Mo ra'u nō mai o kōrua 'i ruŋa i a au 'e a au ki a kōrua, he 'ata rahi te hua iŋa; 'e mo kore o'oku, e ko rava'a e kōrua mo aŋa i te me'e tano ki te mata o te 'Atua. ⁶ Te kope haka topa i a ia mai muri i a au pa he maŋa ko ko-koti ko hoa 'ā. He paka-paka, he runu 'e he tutu 'i roto i te ahi.

⁷ »Mo noho nō mai o kōrua 'i muri i a au, 'e mo ma'u riva-riva i tā'aku hāpī nei, te me'e mo no-no'i mai e kōrua he va'ai atu. ⁸ Mo hua rahi o kōrua, te aura'a, mo aŋa i te me'e tī-tika ki te mata o te 'Atua, e ha'a-hana-hana 'ā ki te 'Atua Matu'a, 'e he riro ia a kōrua he nu'u hāpī parauti'a 'ā'aku. ⁹ E haŋa rahi rō atu 'ana a au ki a kōrua, pa he haŋa iŋa mai ena o te Matu'a ki a au. E ma'u 'i roto i te kōrua māhatu te haŋa nei o'oku ki a kōrua. ¹⁰ Mo ha'atura o kōrua ki tā'aku roŋo, e ko kore tō'oku haŋa mo kōrua, pa he ta'e kore iŋa ena 'ā o te haŋa o tō'oku Matu'a ki a au 'o te ha'atura o'oku ki tā'ana roŋo.

¹¹ »E kī atu ena a au i te me'e nei mo rahi o te kōrua koa pa he koa iŋa nei o'oku. ¹² Tā'aku roŋo: e haŋa kōrua ki te rua pa he haŋa iŋa nei o'oku ki a kōrua. ¹³ Te haŋa hope'a o te nui-nui he va'ai o te kope e tahi i a ia ki te mate mo tō'ona repahoa. ¹⁴ Mo aŋa kōrua i tā'aku me'e nei e kī atu ena, he repahoa parauti'a mau 'ā kōrua o'oku. ¹⁵ E ko kī haka 'ou atu a au he tāvini kōrua; te tāvini, pa'i, 'ina he 'ite i te mana'u o te kope

haka aŋa i a ia. Mō'oku a kōrua he repahoa; ko haka 'ite tahi atu 'ana, pa'i, a au i te me'e kī mai e tō'oku Matu'a.

¹⁶ »Ta'e hai haŋa o kōrua i ai ena he nu'u hāpī 'ā'aku. 'Ā'aku kōrua i ha'ata'a 'e ko uŋa 'ā mo 'ata rahi te kōrua hua iŋa, te aura'a, mo 'ata rahi te kōrua me'e riva-riva aŋa, 'e mo ta'e ŋaro nā me'e ki te hora hope'a. 'E te me'e no-no'i e kōrua hai 'iŋoa o'oku he va'ai atu e te Matu'a. ¹⁷ Tā'aku me'e nei e kī atu ena: e haŋa kōrua ki te rua.

He ma'u iŋa i te riri mo Ietū 'e mo tā'ana nu'u hāpī

¹⁸ »Mo ai e ma'u rō 'ā i te riri mo kōrua te taŋata o te ao nei ta'e haka moe i te mana'u 'i ruŋa i a au, e 'ite: 'i ra'e te nu'u era i ma'u ai i te riri mō'oku. ¹⁹ 'Āhani kōrua o te nu'u era 'ā, ko te haŋa iŋa atu 'ana, pa he haŋa iŋa ki te rāua nu'u. 'Ā'aku kōrua i ha'ata'a mai mai roto i a rāua, 'o ira e ma'u ena i te riri mo kōrua, 'o te ta'e ai haka 'ou kōrua o rāua.

²⁰ »E u'i 'o rehu tā'aku me'e kī atu: "Ina e tahi tāvini 'ata hau rō atu ki te kope haka aŋa i a ia". Mo ai, pa'i, i tute rō mai i a au mo tōtōā, he tute tako'a atu i a kōrua; 'e mo ai i haka roŋo rō ki tā'aku vānaŋa, he haka roŋo tako'a atu ki a kōrua. ²¹ 'O te ai a kōrua 'ā'aku, he aŋa tahi atu i te me'e nei 'i ruŋa i a kōrua, he ta'e aŋi-aŋi e rā nu'u ko ai mau te kope uŋa mai era i a au.

²² »'Āhani a au i ta'e tu'u mai 'e i ta'e haka 'ite i te parauti'a, e ko ai te rāua hape 'o te hāru mai i a au 'e i tā'aku vānaŋa hai tua'ivi. 'E, hora nei, 'ina he 'ōtohe toe mo te rāua hara. ²³ Te nu'u ma'u i te riri mō'oku e ma'u tako'a rō 'ā i te riri mo tō'oku Matu'a. ²⁴ 'E, 'āhani i ta'e aŋa e au i te mana kai aŋa 'ā e te rua kope, e ko ai te rāua hape 'o te hāru mai i a au hai tua'ivi. A rāua ko take'a 'ana i tō'oku aŋa iŋa i te ŋā me'e nei 'e, ka ai atu pē ira, ko te ma'u iŋa 'ā i te riri mō'oku 'e mo tō'oku Matu'a. ²⁵ Hai oho iŋa nei o rāua e haka tano ena te me'e kī 'i ruŋa i te [Pāpa'i Mo'a] pē nei ē: "E ma'u tahaŋa nō 'ana i te riri mō'oku".

²⁶ »Kī tu'u mai tū kope hā'ū'ū era, he [Vārua Maitai] hāpī i te Parauti'a mo uŋa mai e au mai tō'oku Matu'a, ko ia te mata'ite mo kī atu i te parauti'a o ruŋa i a au. ²⁷ 'E a kōrua he mata'ite tako'a o'oku; 'i muri i a au 'ana, pa'i, kōrua mai te hora ha'amata hāpī era 'ā o'oku.

16 »A au e kī atu ena i te ŋā me'e nei 'o 'aka-'aka te kōrua haka moe iŋa i te mana'u 'i ruŋa i a au. ² A kōrua nā he haka e'a mau rō 'ai mai roto i te [hare pure hūrio]; 'e 'ātā e tu'u rō te mahana te kope nō era mo tiŋa'i mo haka mate i a kōrua he mana'u e aŋa 'ana i te me'e haŋa e te 'Atua. ³ Te ŋā me'e nei ka aŋa atu ena ki a kōrua 'o te ta'e 'ite ko ai a au 'e ko ai te Matu'a. ⁴ E haka 'ite atu ena au i te me'e nei mo haka topa o te kōrua mana'u, hora ena ka topa atu ena rā me'e, ko kī atu era 'ana e au.

Te me'e aña e te [Vārua Maitai]

»Kai kī atu a au i te me'e nei 'i tū hora ra'e era 'o te ai 'i muri i a kōrua 'ana a au. ⁵ Hora nei he hoki a au ki te kope 'ā'ana a au i uña mai, 'e 'ina 'ā e tahi o kōrua i 'ui mai ki hē au ka oho nei. ⁶ Te me'e nō, ko mamae 'ana te kōrua māhatu 'o te kī atu ō'oku i te me'e nei. ⁷ Te parauti'a, i hau 'i te riva mo kōrua mo oho ō'oku. Mo ta'e oho ō'oku, e ko tu'u mai tū kope hā'ū'ū era, he Vārua Maitai, mo noho 'i roto i a kōrua; 'e mo oho ō'oku, he uña mai e au.

⁸»Ki tu'u mai a ia, he haka 'ite ki te taŋata o te ao nei ko ai te kope hara, ko ai te kope 'ina e tahi hape, 'e 'i ruŋa i a ai ka topa ena te ture o te 'Atua. ⁹ Te kope hara: he taŋata ta'e [haka moe i te mana'u] 'i ruŋa i a au; ¹⁰ te kope 'ina e tahi hape: ko au mau nei 'ā ka iri nei ki te Matu'a, 'e e ko take'a haka 'ou e kōrua; ¹¹ 'e te kope 'i ruŋa i a ia ka topa ena te ture o te 'Atua: ko te kope ena 'ā'ana te ao te haka tere, te aura'a, ko Rukifero, he kope ko ai era 'ā tō'ona ūtu'a.

¹²»E rahi nō 'ana tā'aku me'e mo kī atu; 'e, mo kī atu ō'oku 'i te hora nei, e ko aŋi-aŋi e kōrua. ¹³ Ki tu'u mai te Vārua o te parauti'a, he haka aŋi-aŋi he oho atu i te parauti'a ta'ato'a o te 'Atua. Ta'e hai mana'u ō'ona 'ā ka vānaŋa atu ena, hai me'e i ŋaro'a e ia, 'e he haka 'ite tako'a atu he aha te me'e ka topa ena.

¹⁴»He haka nui-nui i a au hai to'o i tō'oku mana'u 'e hai haka 'ite atu ki a kōrua. ¹⁵ Te mana'u ta'ato'a o te 'Atua Matu'a i a au. 'O ira i kī atu ai e au: mai i a au ka 'ite ena e te Vārua Maitai i tō'oku mana'u 'e mā'ana e haka 'ite atu.

¹⁶»'Ina he hora toe he ŋaro a au. 'E pe mu'a 'iti he take'a haka 'ou e kōrua i a au.

Te taŋi o kōrua e riro rō he koa

¹⁷Tētahi o te nu'u hāpī 'a Ietū he 'ui ki a rāua 'ā:

«¿He aha te aura'a o te me'e kī mai era pē nei ē: 'ina he hora toe he ŋaro a ia, 'e pe mu'a 'iti he take'a haka 'ou? 'E, tako'a, ¿he aha te aura'a o te me'e kī mai ena he oho a ia ki te Matu'a? ¹⁸ ¿He aha te ha'aura'a o te vānaŋa ena: "'ina he hora toe"? 'Ina he aŋi-aŋi mai he aha tā'ana me'e ena e vānaŋa mai ena».

¹⁹ He aŋi-aŋi ia e Ietū e haŋa rō 'ā rā nu'u mo 'ui ki a ia, 'e he kī:

—Ko kī atu 'ana a au 'ina he hora toe he ŋaro a au, 'e pe mu'a 'iti he take'a haka 'ou e kōrua i a au. ¿He ha'aura'a o te me'e nei te me'e haŋa o kōrua mo 'ite? ²⁰ 'I a au he kī atu: e ta-taŋi rō 'e e koromaki rō kōrua, 'e te nu'u o te ao nei ta'e haka moe i te mana'u 'i ruŋa i a au e koa rō. 'E, ka ai atu e koromaki rō kōrua, te koromaki era e huri rō ki te koa.

²¹»E hāhine ena te poki mo poreko, he mamae te vi'e. I poreko era he rehu rō atu 'ai rā mamae 'i te rahi o te koa mo te poki ko poreko 'ā. ²² Pē ira tako'a 'ana te kōrua mamae ena. Ki piri haka 'ou a tātou, he koa te

kōrua māhatu, ko te koa ena 'ina he rua kope mo hiko.

²³»'I rā mahana e ko 'ui haka 'ou mai kōrua e tahi me'e. 'E 'I a au he kī atu: he va'ai atu e te Matu'a i te me'e ta'ato'a o kōrua ka no-no'i ena hai 'Iŋoa ō'oku. ²⁴ Ki te hora nei, kai no-no'i 'ana kōrua e tahi me'e hai 'Iŋoa ō'oku; ka no-no'i, he va'ai atu ki koa riva-riva ai kōrua.

A Ietū ko rē 'ā ki te kope haka tere i te ao nei

²⁵»Ki te hora nei e vānaŋa atu ena a au hai 'a'amu ha'aura'a. 'E, 'I ko hāhine 'ā te hora mo ta'e vānaŋa haka 'ou atu pē ira. Hai vānaŋa mo aŋi-aŋi riva-riva e kōrua ka haka 'ite atu ena o ruŋa o te 'Atua Matu'a. ²⁶ 'I rā mahana he no-no'i kōrua hai 'Iŋoa ō'oku. ¿Mo aha 'ana a au ana no-no'i ki te Matu'a mo kōrua? Mo kōrua mau 'ā e no-no'i. ²⁷ Te Matu'a, pa'i, e haŋa rahi rō 'ana ki a kōrua. E haŋa atu ena 'o te haŋa mai o kōrua ki a au 'e 'o te ai he parauti'a mau 'ana mo kōrua: a au i oho mai ai mai i a ia. ²⁸ Mai te Matu'a a au i oho mai ai ki te ao nei, 'e, hora nei, he haka rē a au i te ao 'e he hoki a au ki a ia.

²⁹ He kī ia ki a Ietū e tā'ana nu'u hāpī:

—E vānaŋa mai ena koe 'i te hora nei hai vānaŋa mo aŋi-aŋi riva-riva e mātou, 'e ta'e hai 'a'amu ha'aura'a. ³⁰ A mātou ko 'ite 'ana 'i te hora nei: a koe ko 'ite tahi 'ana i te me'e, 'ātā ki te mātou me'e mana'u mo 'ui atu. 'O ira he parauti'a mau 'ā mo mātou: a koe mai te 'Atua i oho mai ai.

³¹ He pāhono e Ietū:

—¿He aŋi mau 'ā he parauti'a mo kōrua? ³² Nā he tu'u mai te hora, ko te hora mau nei 'ā, he maraŋa tahi kōrua ki te kōrua kona, 'e he haka rē kōrua i a au hoko tahi nō. Nōatu. Ta'e a au hoko tahi nō; ararua māua ko te Matu'a. ³³ E kī atu ena au i te me'e ta'ato'a nei mo noho kōrua 'i roto i te haumārū 'o te ai o kōrua 'ā'aku. 'I te ao nei e 'amo rō kōrua i te 'ati. Kiahio kōrua; ko rē 'ana, pa'i, a au ki te kope 'ā'ana te haka tere i te ao.

He pure iŋa o Ietū mo tā'ana nu'u hāpī

17 I oti era te kī i te ŋā me'e nei, he u'i a Ietū a te raŋi he kī:

«E Koro, ko tano 'ā te hora. Ka haka take'a te pūai 'e te nui-nui o ta'a Poki mo haka take'a tako'a e ia i tu'u pūai 'e i tu'u nui-nui.

²»Ko va'ai 'ana a koe ki ta'a Poki i te parau mo haka tere i te taŋata ta'ato'a o te ao 'e mo va'ai i te ora 'āpī 'ina he hope'a ra'a ki te nu'u ha'ata'a e koe mā'ana.

³ Te me'e he ora 'āpī 'ina he hope'a ra'a ko te me'e nei: he 'ite e rāua ko ai mau a koe, he 'Atua parauti'a e tahi mau nō, 'e ko ai a au a Ietū Kiritō, he kope uña mai e koe.

⁴»Ko haka take'a 'ana a au i tu'u pūai 'i te ao nei hai aŋa 'e hai haka tano tahi i ta'a me'e kī mai. ⁵ 'E, 'i te

hora nei, e Koro ē, ka haka take'a haka 'ou koe i tō'oku pūai 'e i tō'oku nui-nui ai i a au 'i te hora era o'oku 'i mu'a i a koe 'ā, hora kai aña 'ana i te ao.

⁶»E Koro, ki te nu'u va'ai mai e koe o te ao nei i haka 'ite ai e au ko ai mau a koe. 'Ā'au rā nu'u, 'e 'ā'au i va'ai mai, 'e, ko haka roŋo 'ana ki ta'a vānaŋa. ⁷Ko 'ite 'ana a rāua 'i te hora nei: te me'e kī 'e te me'e aña ta'a-to'a e au mai i a koe e oho mai ena. ⁸Ko haka 'ite 'ana e au i ta'a roŋo va'ai mai era, 'e he aŋi mau 'ana mo rāua. Ko 'ite 'ana he parauti'a mau 'ā mai i a koe a au i oho mai ai 'e 'ā'au a au i uŋa mai.

⁹»He ani atu au mo rāua, ta'e mo te nu'u o te ao nei ta'e [haka moe i te mana'u] 'i ruŋa i a au, mo te nu'u va'ai mai era e koe 'o te ai 'ā'au rāua. ¹⁰Te nu'u ta'a-to'a 'ā'au 'ā'aku tako'a, 'e te nu'u 'ā'aku 'ā'au tako'a, 'e hai rāua e take'a ena te pūai 'e te nui-nui o'oku.

¹¹»E ko noho haka 'ou au 'i te ao nei; ko rāua te me'e ka noho ena. He hoki atu a au ki muri i a koe. E Koro Mo'a ē, e hāpa'o koe i a rāua hai pūai ena o'ou, pūai va'ai mai era e koe, mo riro o rāua e tahi mau nō pē tā-tou. ¹²Hora ta'ato'a o'oku 'i muri i a rāua 'i te ao nei, e hāpa'o nei e au hai pūai va'ai mai e koe 'o ha'ata'a mai muri i a koe. 'E 'ina a rāua kai ha'ata'a, he kope mau nō era ko tāpa'o era 'ā mo te pō'auahi mo tano o te me'e kī 'i ruŋa i te [Pāpa'i Mo'a].

¹³»Ī a au he oho atu ki a koe ena. Hora nei o'oku 'i te ao nei 'ā e kī nei e au i te ŋā me'e nei mo te rāua riva-riva, mo koa o rāua pa he koa ri'a-ri'a nei o'oku. ¹⁴Ko haka 'ite 'ana e au ki a rāua i ta'a vānaŋa, 'e te nu'u o te ao nei ta'e haka moe i te mana'u 'i ruŋa i a au e ma'u rō 'ana i te riri mo rāua 'o te ta'e ai haka 'ou te nu'u nei o rāua, pa he ta'e ai iŋa tako'a nei o'oku o rāua.

¹⁵»Ta'e a au e ani atu 'ā mo to'o o'ou i a rāua mai te ao nei. E kī atu ena mo hāpa'o nō o'ou i a rāua 'o rava'a e Rukifero. ¹⁶A rāua ta'e o te nu'u o te ao nei ta'e haka moe i te mana'u 'i ruŋa i a au, pa he ta'e ai iŋa tako'a nei o'oku o rā nu'u. ¹⁷Hai 'ite o te nu'u nei i te parauti'a o ruŋa i a koe e ha'ata'a mā'au, mo tāvini mau nō atu ki a koe; ta'a vānaŋa ena, pa'i, he parauti'a.

¹⁸»Pa he uŋa iŋa mai era o'ou i a au ki te nu'u o te ao nei ta'e haka moe i te mana'u 'i ruŋa i a au, pē ira tako'a 'ana a au ka uŋa ena i a rāua ki rā ŋā nu'u. ¹⁹Mo te riva-riva o rāua, he ha'ata'a a au i a au mo tāvini atu ki a koe, ki ha'ata'a parauti'a atu ai a rāua mo tāvini atu ki a koe.

²⁰»Ta'e nō a au e ani atu ena mo rāua, mo te nu'u tako'a ka haka moe ena i te rāua mana'u 'i ruŋa i a au, he haka roŋo 'e he ha'atura ki te roŋo riva-riva o ruŋa i a au ka hāpī era e rāua. ²¹Tā'aku me'e haŋa, e Koro ē: mo here mo oho nō o rāua 'i roto i a rāua pē tāua 'ā, 'e mo ta'e ha'ata'a o rāua mai muri i a tāua, pa he ta'e ha'ata'a iŋa nei o'oku mai muri i a koe, ki 'ite ai e te taŋata o te ao nei ta'e haka moe i te mana'u 'i ruŋa i a au: 'ā'au a au i uŋa mai.

²²»Te nu'u va'ai mai era e koe ko haka nui-nui 'ana e au pa he haka nui-nui iŋa mai era o'ou i a au, mo riro o

rāua e tahi mau nō pē tātou. ²³A au i a rāua, 'e a koe i a au, pē ira tātou ta'ato'a e tahi mau nō, ki 'ite ai te taŋata o te ao nei ta'e haka moe i te mana'u 'i ruŋa i a au: 'ā'au a au i uŋa mai, 'e e haŋa rō 'ana koe ki te nu'u va'ai mai e koe, pa he haŋa iŋa mai ena 'ā o'ou ki a au.

²⁴»E Koro, 'ā'au a rāua i va'ai mai, 'e e haŋa rō 'ana a au mo noho atu o rāua 'i te kona 'i ira a au ka noho nei, ki take'a ai i te pūai 'e i te nui-nui va'ai mai e koe, he haŋa mai o'ou mai te hora era 'ā kai aña 'ana i te ao.

²⁵»E Koro riva ē, te taŋata o te ao nei ta'e haka moe i te mana'u 'i ruŋa i a au kai 'ite ko ai koe, ko au te me'e i 'ite. Te nu'u hāpī nei 'ā'aku ko 'ite 'ā: 'ā'au a au i uŋa mai. ²⁶Ko haka 'ite 'ana e au ko ai koe, 'e ko te haka 'ite ko te oho iŋa 'ana a au, ki ai ai te haŋa ai i a koe mō'oku i a rāua tako'a, 'e ki ai ai a au 'i roto i a rāua».

He 'a-'aru iŋa i a Ietū

(Māteo 26.47-56; Marko 14.43-50; Ruka 22.47-53)

18 I oti era te kī i te me'e nei, he e'a a Ietū ananake ko tā'ana nu'u hāpī he oho ki te rua pā'iŋa o te vai era te 'iŋoa ko Tererone. 'I ira e tahi kona e rahi rō 'ana te tumu 'ōrivo 'e he oho a kuā Ietū ki rā kona.

²A Hura, kope ho'o era i a Ietū, ko 'ite 'ana i rā kona; i rahi rō, pa'i, te mahana i taka-taka 'i ira ananake ko kuā Ietū. ³He tu'u ia a Hura e uŋa rō 'ana 'i muri i a ia i te nūna'a va'ehau rōmano 'e i te tētahi 'auario o te [Kona Ha'amuri 'Atua] uŋa e te nu'u [oromatu'a rarahi] 'e e te fariseo. Te nu'u nei e ma'u-ma'u rō 'ana i te hoe 'e i te tētahi atu me'e mo moto koia ko hakari'i 'e ko rama.

⁴'I te 'ite o Ietū i te me'e ka topa era ki a ia, i take'a era i rā nu'u he haka hāhine he 'ui:

—Ķi a ai rā kōrua e kimi ena?

⁵He pāhono e rā nu'u:

—Kī a Ietū era o Nātāreta.

He kī e Ietū:

—Ko au nā kope.

'I muri i rā nu'u e māroa rō 'ā a Hura, ho'o era i a Ietū. ⁶I kī era e Ietū: «Ko au nā kope», he neke tahi a tu'a 'e he hī-hiŋa rō atu 'ai. ⁷He 'ui haka 'ou e Ietū:

—Ķi a ai rā kōrua e kimi ena?

He kī haka 'ou e rā nu'u:

—Kī a Ietū era o Nātāreta.

⁸He pāhono haka 'ou e Ietū:

—Ko kī atu 'ana a au ko au nā kope. 'E mo ai o kōrua ki a au e kimi mai ena, ka haka rē te nu'u nei ki oho.

⁹ Te me'e nei i topa ai mo haka tano o te me'e kī e Ietū: «E Koro, te nu'u va'ai mai era e koe, 'ina a rāua kai ha'ata'a mai muri i a koe».

¹⁰ A Pētero e ma'u rō 'ana e tahi hoe. He to'o mai he pa'o i te tarija mata'u o te kope e tahi te 'īŋoa ko Marko, he tāvini o te oromatu'a hope'a o te ra-rahi.

¹¹ He kī e Ietū ki a Pētero:

—Ka haka hoki koe i te hoe ena ki tō'ona kona. Mo va'ai mai e te Matu'a i te 'ati nei mo 'amo, ki ta'a kī, ō'ina a au ko 'amo?

'I mu'a o 'Ānā a Ietū

(Māteo 26.57-58; Marko 14.53-54; Ruka 22.54)

¹² Te va'ehau ananake ko tō'ona kape 'e te 'auario [hūrio] o te Kona Ha'amuri 'Atua he 'a-'aru he here-here i a Ietū. ¹³ 'I ra'e i ma'u ai ki te hare o 'Ānā, huŋavai o Kaifā. A Kaifā he oromatu'a hope'a o te ra-rahi o rā matahiti. ¹⁴ Te Kaifā nei ko te Kaifā kī era ki te hūrio ra-rahi i hau rō atu 'i te tano mo mate o te taŋata e tahi ki te mate o te ta'ato'a.

He kī iŋa o Pētero kai 'ite a ia ko ai a Ietū

(Māteo 26.69-70; Marko 14.66-68; Ruka 22.55-57)

¹⁵ A Pētero ararua ko te kope hāpī haka 'ou e tahi 'i tu'a 'ā o Ietū i oho ai. Tū rua kope era e māhani rō 'ana ki te oromatu'a hope'a o te ra-rahi, pē ira i o'o ai 'i muri i a Ietū ki rā hare, ¹⁶ 'e ko Pētero i noho 'i te ara. He e'a rā kope māhani era ki rā oromatu'a he vānaŋa ki te vi'e hāpa'o 'ōpani, 'e he haka uru i a Pētero. ¹⁷ He 'ui e rā vi'e ki a Pētero:

—Ō Ta'e 'ō koe tako'a o roto o te nu'u hāpī e te taŋata era?

He pāhono e Pētero:

—Ē, ta'e a au o roto.

¹⁸ 'I te take'o, te nu'u tāvini o rā hare 'e te 'auario o te Kona Ha'amuri 'Atua ko haka hū 'ana i te ahi 'i haho mo haka mahana o rāua. A Pētero 'i muri i rā nu'u tako'a e haka mahana 'ā i a ia.

Ko Ietū 'e he oromatu'a hope'a o te ra-rahi

(Māteo 26.59-66; Marko 14.55-64; Ruka 22.66-71)

¹⁹ He ha'amata ia te oromatu'a hope'a o te ra-rahi he haka 'ui-'ui ki a Ietū o ruŋa i tā'ana nu'u 'e o ruŋa o tā'ana me'e hāpī. ²⁰ He kī e Ietū:

—I vānaŋa ai a au 'i mu'a o te nu'u ta'ato'a: he hāpī tā'aku aŋa 'i roto i te [hare pure hūrio] 'e 'i te Kona Ha'amuri 'Atua, he kona 'i ira e taka-taka ena te hūrio ta'ato'a. 'Ina e tahi 'ā'aku vānaŋa i ta'e kī 'i mu'a o te taŋata. ²¹ ō He aha koe e 'ui mai ena ki a au? Ka haka 'ui ki te nu'u haka roŋo mai era; mo rāua e kī atu he aha tā'aku me'e i vānaŋa.

²² I kī era a Ietū i te me'e nei, he to'o mai e te 'auario e tahi he haka eke hai rima ki te 'āriŋa koia ko kī:

—Ō Pē nā mau koe ana pāhono ki te oromatu'a hope'a o te ra-rahi?

²³ He pāhono e Ietū:

—Mo ai ko kī 'ana a au i te me'e ta'e tano, ka kī mai he aha rā me'e. 'E mo ai e tano rō 'ā tā'aku me'e kī atu, ō he aha ia koe i pu'a mai ai?

²⁴ He to'o mai ia e 'Ānā, he haka ma'u i a Ietū e here-here rō 'ā ki a Kaifā, he oromatu'a hope'a o te ra-rahi.

He kī iŋa haka 'ou o Pētero kai 'ite a ia ko ai a Ietū

(Māteo 26.71-75; Marko 14.69-72; Ruka 22.58-62)

²⁵ 'Ī ia a Pētero 'i tū kona era 'ā e haka mahana 'ana ki te ahi. He 'ui e te nu'u o rā kona:

—Ō Ta'e 'ō he kope hāpī tako'a koe o tū taŋata era?

He kī e Pētero:

—Ē, ta'e ko au.

²⁶ I hini 'iti era he 'ui ki a Pētero e te tāvini e tahi o te oromatu'a hope'a o te ra-rahi, hua'ai o te taŋata pa'o era e Pētero i te tarija:

—Ō Ta'e 'ō ko take'a 'ana koe e au 'i muri i a ia 'i tū kona era e rahi rō 'ā te tumu 'ōrivo?

²⁷ Ta'e ko ia rā me'e i kī haka 'ou ai e Pētero. 'E 'i rā hora mau 'ā i 'o'oa ai te moa.

A Ietū 'i mu'a o Pirato

(Māteo 27.1-2,11-14; Marko 15.1-5; Ruka 23.1-5)

²⁸ He ma'u ia i a Ietū mai te hare o Kaifā ki te hare o Pirato, he suerekao rōmano. I tu'u era ko hāhine 'ana mo 'ōtea. Te nu'u hūrio, 'o hape ki te rāua haka tere iŋa o ruŋa i te haka ma'itaki 'e 'o ta'e tano mo kai i te kai o te Pakate, kai uru ki roto. ²⁹ 'O ira a Pirato i e'a i vānaŋa ai 'i haho ki rā nu'u. He 'ui:

—Ō He aha te hape o te taŋata nei?

³⁰ He pāhono e rā nu'u:

—'Āhani a ia ta'e he taŋata taparahi-ta'ata, e ko ma'u mai e mātou ki a koe.

³¹ He kī e Pirato:

—Ka ma'u e kōrua, 'ai ka ture rō hai haka tere iŋa mau ena 'ā o kōrua.

He pāhono e te nu'u ra-rahi hūrio:

—A mātou te hūrio 'ina he parau mo tiŋa'i mo haka mate i te taŋata.

³² Te me'e nei i topa ai ki tano ai te me'e kī e Ietū pē hē a ia ka mate era.

³³ He uru ia a Pirato ki roto i te hare, he kī ki te va'e-hau mo ma'u i a Ietū ki mu'a i a ia, 'e he 'ui:

—¿He 'Ariki koe o te hūrio?

³⁴ He pāhono e Ietū:

—Te me'e ena 'ā'au e 'ui mai ena, ¿he mana'u ō'ou, 'o he mana'u o te rua?

³⁵ He pāhono e Pirato:

—Ta'e a au he hūrio ki mana'u ai i te me'e tu'u pē nei. O tu'u hau mau ena 'ā koia ko te kōrua oromatu'a ra-rahi i ma'u mai i a koe ki mu'a i a au mo ture atu. ¿He aha ta'a me'e i aña?

³⁶ He pāhono e Ietū:

—Tō'oku haka tere iña ta'e o te ao nei. 'Āhani o te ao nei, ko ai 'ana tā'aku tañata mo moto ki te nā hūrio ra-rahi ena mō'oku, 'o topa a au 'i te rāua rima. Tō'oku haka tere iña, e kī atu ena, ta'e o te ao nei.

³⁷ He 'ui ia e Pirato:

—¿Ka kī 'ō he 'ariki mau 'ā a koe?

He pāhono e Ietū:

—Nā e koe ko kī 'ā: he 'ariki au. I oho mai ai 'e i poreko ai a au 'i te ao nei mo haka 'ite i te parauti'a. Te nu'u ta'ato'a o te parauti'a he haka roŋo mai.

³⁸ He 'ui e Pirato:

—¿He aha te me'e he parauti'a?

Te ūtu'a mo Ietū he mate

(Māteo 27.15-31; Marko 15.6-20; Ruka 23.13-25)

I oti era te 'ui i te me'e nei, he e'a haka 'ou a Pirato he vānaŋa ki te hūrio, he kī:

—Kai rava'a e au e tahi hape o te tañata nei mo haka ūtu'a i a ia. ³⁹ 'E, nā e ai rō 'ā te haka tere iña o kōrua: he haka e'a i te tañata puru e tahi 'i te [ŋoŋoro o te Pakate]. ¿E haŋa rō 'ā kōrua mo haka e'a atu ō'oku i te 'Ariki nei o kōrua o te hūrio?

⁴⁰ He ohu atu e te ta'ato'a:

—¿Ko Varavā te me'e mo haka e'a mai, ta'e ko ia!

A Varavā he tañata taparahi-ta'ata e tahi.

19 He uŋa ia e Pirato mo ma'u i a Ietū mo tiŋa'i hai 'uaka. ² I oti era he 'ato e te va'ehau e tahi hei hai maŋa tiare pū-pū, he huki ki te pū'oko, 'e he haka pu'a hai kahu mea-mea 'uri mo haka tu'u pa he 'ariki.

³ E tahi e tahi e oho e haka me'e-me'e era: «¿Pē hē te 'Ariki o te [hūrio]!».'E he haka eke-eke hai rima ki te 'āriŋa.

⁴ He e'a haka 'ou a Pirato, he vānaŋa ki tū nu'u ma'u era i a Ietū 'e he kī: «¿I a au ko ma'u haka 'ou mai 'ana i a ia mo 'ite e kōrua: 'ina e tahi me'e ta'e tano ō'ona i rava'a e au».

⁵ He e'a ia a Ietū e huki rō 'ana i tū hei pū-pū era 'e e pu'a rō 'ana i tū kahu mea-mea 'uri era. He kī e Pirato:

—¿Nā tū tañata era nā!

⁶ I take'a era e te nu'u [oromatu'a ra-rahi] 'e e te 'auario o te Kona Ha'amuri 'Atua, he ha'amata he ohu:

—¿Ka veo 'i ruŋa i te tātaurō! ¿Ka veo 'i ruŋa i te tā-taurō!

He kī e Pirato:

—Ka ma'u ka veo e kōrua mau 'ā; kai rava'a, pa'i, e au e tahi me'e ta'e tano ō'ona.

⁷ He pāhono e te nu'u hūrio ra-rahi:

—E ai rō 'ana te haka tere iña e tahi o mātou, 'e, ki rā haka tere, te kī o te kope e tahi he Poki a ia o te 'Atua he hape taparahi-ta'ata. Te ūtu'a mo te hape nei he tiŋa'i he haka mate.

⁸ I ŋaro'a era i te me'e nei e Pirato, he 'ata ri'a-ri'a rō atu 'ai. ⁹ He uru haka 'ou ki roto i te hare he 'ui ki a Ietū:

—¿O hē mau koe?

Kai pāhono e Ietū. ¹⁰ He 'ui haka 'ou e Pirato:

—¿E ko pāhono mai koe? ¿Kai 'ite 'ō koe i a au te parau mo veo i a koe 'i ruŋa i te tātaurō 'o mo haka e'a i a koe?

¹¹ He pāhono e Ietū:

—E ko ai i a koe te parau o ruŋa ō'oku 'āhani i ta'e ha'ati'a atu e te 'Atua. 'O ira te kope va'ai atu era i a au ki a koe 'ata hau 'i te hara ki a koe.

¹² Mai rā hora i u'i ai a Pirato i te rāve'a mo haka e'a i a Ietū. Ka ai atu pē ira, he ohu e te hūrio:

—¿Mo haka e'a ō'ou i a ia, ta'e a koe he repahoa o te 'ariki rōmano! ¿Te kope haka 'ariki i a ia 'ā he kope ta'e mo'a i te tōro'a o te 'ariki rōmano!

¹³ I ŋaro'a era e Pirato, he haka ma'u i a Ietū ki haho, 'e he oho he noho 'i ruŋa i te pepe 'i te kona 'i ira e ture era te 'iŋoa ko Te Kona Papa hai Mā'ea, 'i te 'arero [evereo] ko Kavata. ¹⁴ Ko hāhine 'ā ia ki te hora kai. Te mahana nei he mahana haka riva-riva o te hūrio i te me'e mo te [Pakate]. He kī e Pirato ki te hūrio:

—;Nā te kōrua 'ariki nā!

¹⁵ He ohu atu e tū nu'u era:

—;Ka haka kore! ;Ka veo 'i ruŋa i te tātaurō!

He 'ui e Pirato:

—;E haŋa 'ā a kōrua mo veo ō'oku i te kōrua 'ariki 'i ruŋa i te tātaurō?

He pāhono e te nu'u oromatu'a ra-rahi:

—;E tahi mau nō mātou 'ariki: he 'ariki ena o te rōmano!

¹⁶ He to'o mai ia e Pirato he haka ma'u ki te va'ehau i a Ietū mo veo 'i ruŋa i te tātaurō.

He veo iŋa i a Ietū 'i ruŋa i te tātaurō

(Māteo 27.32-44; Marko 15.21-32; Ruka 23.26-43)

¹⁷ He haka e'a ia i a Ietū mai tū kona era e 'amo rō 'ana i tō'ona tātaurō mo oho ki te kona e kī era ko Korokota, te aura'a 'i te 'evereo: «Kona o te Pakahera Taŋata Mate». ¹⁸ 'I ira i veo ai i a Ietū 'i ruŋa i te tātaurō, 'e he veo tako'a 'i ruŋa i te rāua tātaurō i te kope haka 'ou e rua, e tahi i te pā'iŋa mata'u 'e e tahi 'i te pā'iŋa mau i o Ietū.

¹⁹ 'I ruŋa i te miro pararaha i pāpa'i ai e Pirato: «Ko Ietū era o Nātāreta, he 'Ariki o te hūrio» 'e he uŋa he haka huki 'i ruŋa i te tātaurō. ²⁰ Me'e rahi nō atu hūrio i tai'o i tū me'e era 'o te ai i pāpa'i ai hai 'arero 'evereo, rātini 'e [kirieko], 'e 'o te ai tako'a e hāhine rō 'ana ki Hērutarema. ²¹ 'O ira te oromatu'a ra-rahi o te hūrio i oho i kī ai ki a Pirato:

—Kai tano a koe i pāpa'i ai: «He 'Ariki o te hūrio». Te me'e tano mo pāpa'i: «E kī era e ia: A au he 'Ariki o te hūrio».

²² He pāhono e Pirato:

—Te me'e pāpa'i era e au he noho pē rā mau 'ā.

²³ I oti era i te veo i a Ietū 'i ruŋa i te tātaurō, he to'o e te va'ehau i te kahu he vahi-vahi mo te hoko hā; hoko hā, pa'i, a rāua. He to'o tako'a i te kahu roa-roa uru o roto, 'e, 'i te ai e tahi mau nō, ²⁴ he kī e tū rŋa va'ehau era ki a rāua 'ā: «'Ina tātou ko ihi-ihī. Mai ki pere ki u'i ki a ai ana topa».

Pē ira i tano ai te me'e hā'aki 'i ruŋa i te [Pāpa'i Mo'a] pē nei ē:

«Ko tuha'a 'ana ki a rāua 'ā i tō'oku kahu, 'e ko pere 'ana i tō'oku kahu roa-roa».

He me'e nei te me'e i aŋa e te va'ehau.

²⁵ 'I muri i te tātaurō o Ietū tō'ona matu'a vahine, te taina vahine o tō'ona matu'a vahine, te vi'e 'a Kereofa

ko [Māria], 'e a Māria Matarena. ²⁶ I take'a era e Ietū i tū matu'a era ō'ona, 'e 'i muri te kope hāpī haŋa rahi 'ā'ana, he kī: «E nua, nā ta'a poki nā; mā'ana koe e hāpa'o atu». ²⁷ 'E ki tū kope hāpī era 'ā'ana i kī ai: «Nā tu'u matu'a vahine nā; mā'au a ia e hāpa'o». 'E mai rā hora i hāpa'o ai e rā kope i te matu'a vahine o Ietū.

He mate iŋa o Ietū

(Māteo 27.45-56; Marko 15.33-41; Ruka 23.44-49)

²⁸ 'E, 'i te 'ite o Ietū ko aŋa tahi 'ana a ia i tā'ana me'e mo aŋa, 'e 'i te haŋa mo haka tano i te me'e hā'aki o ruŋa o te Pāpa'i Mo'a, he kī: «Ko pohe 'ana a au ki te vai».

²⁹ 'I rā kona e tahi karo ko 'ī 'ā e te vino maŋeo. He to'o mai he haka ruku hai me'e tu'u pa he vavai, he here ki ruŋa i te maŋa miro 'ītopo 'e he haka hāhine ki te ŋutu. ³⁰ He 'omo-'omo e Ietū 'e he kī: «Ko aŋa tahi 'ana a au i tā'aku me'e mo aŋa». He noi ia te 'āriŋa a raro 'e he mate.

He 'o-'oka iŋa i a Ietū

³¹ 'I te me'e era ko hāhine 'ā te Pakate, 'ina he haŋa te hūrio mo noho o te taŋata mate 'i ruŋa i te tātaurō 'i rā mahana; he [mahana haka ora] 'ata mo'a, pa'i, mo rāua. 'O ira i no-no'i ai ki a Pirato mo uŋa mo hati-hati i te va'e o tū nu'u era o ruŋa i te tātaurō ki hōrou ki mate ai, mo to'o rō 'ai o te hakari mai ira.

³² He oho ia te va'ehau, he ha-hati i te va'e o te kope ra'e, 'e o te rua kope tau o muri i a Ietū. ³³ I tu'u era ki a Ietū he take'a ko mate 'ā. 'O ira i ta'e ha-hati ai i tō'ona va'e.

³⁴ Ka ai atu pē ira, i 'o-'oka nō hai ransa e te va'ehau e tahi a te rehe-rehe o Ietū 'e, 'i tū hora 'ā, i tehe ai te toto koia ko te vai. ³⁵ O te kope 'ā'ana i take'a i 'a'amu i te me'e nei, 'e he parauti'a tā'ana vānaŋa. Ko 'ite riva-riva 'ana e kī 'ā a ia i te parauti'a, ki riro ai te me'e ta'-to'a nei he parauti'a tako'a mo kōrua.

³⁶ Te rŋa me'e nei i topa ai mo haka tano o te me'e kī 'i ruŋa i te Pāpa'i Mo'a pē nei ē: «E ko ha-hati e tahi ivi». ³⁷ 'E 'i te rua kona e hā'aki rō 'ā: «E u'i rō a ruŋa i te kope era ko 'o-'oka 'ā».

He haka rē iŋa i te hakari o Ietū

(Māteo 27.57-61; Marko 15.42-47; Ruka 23.50-56)

³⁸ I oti era te me'e nei, he oho a [Kōsē] era o Āri-matea he no-no'i ki a Pirato mo va'ai i te hakari o Ietū. A Kōsē he taŋata hāpī 'a Ietū, 'e, ka ai atu pē ira, 'ina he haka 'ite ki te nu'u, he ri'a-ri'a 'i te nu'u hūrio ra-rahi. He ha'ati'a ia e Pirato, 'e he oho a Kōsē he to'o i te hakari o Ietū.

³⁹ A Nikoremo, he taŋata oho era 'i te pō mo vānaŋa ki a Ietū, he tu'u ki te kona era 'i ira a Kōsē e ma'u rō 'ana e toru 'ahuru kiro o te me'e 'eo i aŋa hai *mirra* 'e hai āroe. ⁴⁰ Pē ira a Kōsē ararua ko Nikoremo i viri tahi ai i te hakari o Ietū hai kahu i haka ruku ki roto i tū me'e 'eo era, pa he me'e rava māhāni aŋa e rāua e te hūrio.

⁴¹ 'I tū kona veo era i a Ietū 'i ruŋa i te tātaurō te kona tumu e tahi. 'I ira te kona haka rē pāpaku, kona i ka-karo 'i roto i te mā'ea pa he piha, kona kai haka rē 'ā i te pāpaku ra'e. ⁴² 'I roto i haka rē ai i te hakari o Ietū 'o te ai o rā kona e hāhine rō 'ā 'e 'o te ai 'ina he hora toe mo ha'amata o te mahana haka ora.

'Ina he hakari o Ietū

(Māteo 28.1-10; Marko 16.1-8; Ruka 24.1-12)

20 'I te mahana ra'e o te tāpati, mahana tāpati, 'i te pō era 'ana kai 'ōtea 'ā, he oho a Māria Matarena ki te kona haka rē i te hakari o Ietū. He take'a ko haka tapa 'ā te mā'ea puru o rā kona. ² 'I take'a era e Māria 'ina he hakari o Ietū, he tahuti he oho ki te kona 'i ira a Pētero ararua ko te kope hāpī haŋa rahi 'a Ietū he kī: «*Ķ*ko to'o 'ana te hakari o Ietū mai tū kona era, 'e kai 'ite mai 'i hē i haka rē ai!».

³ He e'a ia a Pētero ararua ko tū kope hāpī tako'a era 'a Ietū he oho ki tū kona era. ⁴ Ararua i tāhuti i oho ai; ko tū rua kope era te me'e 'ata hōrou ki a Pētero 'e 'i ra'e i tu'u ai ki rā kona. ⁵ He noi he oŋa a roto, he take'a i te kahu viri era i te hakari o Ietū; 'e, 'ina rā kope kai uru.

⁶ 'I tu'a 'ā i tu'u ai a Pētero, he uru ki roto. He take'a i rā kahu, ⁷ 'e he take'a tako'a i te kahu viri i te pū'oko o Ietū e hatu-hatu e haka rē rō 'ana 'i te rua kona, ta'e 'i muri i te kahu viri i te hakari. ⁸ He uru tako'a ia tū kope tu'u ra'e era. 'I take'a era i rā me'e, mō'ona ko ora haka 'ou 'ā a Ietū, ⁹ ka ai atu 'i mu'a 'ā 'ina kai aŋi-aŋi i te me'e hā'aki 'i ruŋa i te [Pāpa'i Mo'a] pē nei ē: e ora haka 'ou rō a Ietū mai te mate. ¹⁰ He e'a ia ararua he hoki ki te rāua hare.

He haka take'a iŋa o Ietū i a ia ki a Māria Matarena

(Marko 16.9-11)

¹¹ He hoki ia a Māria Matarena, he noho he taŋi 'i ha-ho o tū kona haka rē pāpaku era. E taŋi nō 'ā he noi he oŋa a roto, ¹² he take'a i te merahi e rua e uru rō 'ana i te kahu tea-tea e no-noho rō 'ana 'i te kona haka rē i te hakari o Ietū, e tahi 'i te pū'oko 'e te rua 'i te va'e. ¹³ He 'ui e tū ŋā merahi era:

¿He aha rā koe e taŋi ena?

He kī e Māria:

—He to'o, ho'i, i te hakari o tō'oku Ma'ori, 'e kai 'ite a au 'i hē i haka rē ai.

¹⁴ 'I kī era i te me'e nei, he hāru i a tu'a he take'a i te taŋata e tahi 'i rā kona, 'e, 'ina kai aŋi-aŋi ko Ietū 'ō rā me'e. ¹⁵ He 'ui e Ietū:

—¿He aha rā koe e taŋi ena? ¿Ki a ai rā koe e kimi ena?

'I te mana'u o Māria Matarena he taŋata hāpa'o o rā kona, he kī:

—Mo ai 'ā'au i to'o i tō'ona hakari, ka hā'aki mai 'i hē koe i haka rē ai mo oho o'oku mo to'o mai.

¹⁶ He kī ia e Ietū:

—ĶE Māria!

He hāru i riva-riva ia a Māria, he u'i ko Ietū 'ō rā me'e 'e he kī hai 'arero ['evereo]:

—Ķ*Rabuni!* (te aura'a: «*Ķ*E te Ma'ori!»).

¹⁷ He kī e Ietū:

—Ē, 'ina koe ko haka noho mai i a au. Kai iri 'ana, pa'i, a au ki tō'oku Matu'a. Ka oho ka kī ki te tētahi nu'u 'ā'aku: «He iri a au ki tō'oku Matu'a, Matu'a tako'a o kōrua, ki tō'oku 'Atua, 'Atua tako'a o kōrua».

¹⁸ He oho ia a Māria Matarena he 'a'amu ki tū nu'u era ko take'a 'ana e ia i a Ietū, 'e he 'a'amu tako'a i tū me'e kī era e Ietū.

He haka take'a iŋa o Ietū ki tā'ana nu'u hāpī

(Māteo 28.16-20; Marko 16.14-18; Ruka 24.36-49)

¹⁹ 'I te ahi-ahi o rā mahana ra'e era o te tāpati, e taka-taka rō 'ana te nu'u hāpī 'a Ietū 'i roto i te hare e tahi e tāma'u rō 'ā te 'ōpani he ri'a-ri'a 'i te nu'u ra-rahi o te [hūrio]. E no-noho nō 'ana he māroa atu a Ietū 'i vāeŋa o rāua he 'aroha: «Ka ai 'i ruŋa i a kōrua te haumārū o te 'Atua».

²⁰ 'I kī era i te me'e nei, he haka take'a i tō'ona rima 'e i tō'ona rehe-rehe. He to'o rō atu 'ai te koa o tū nu'u era 'o te take'a haka 'ou i a Ietū. ²¹ He kī haka 'ou ia e Ietū: «*Ķ*Ka ai 'i ruŋa i a kōrua te haumārū o te 'Atua! Pa he uŋa iŋa mai era e te Matu'a i a au, pē ira a au ka uŋa nei i a kōrua».

²² 'E he puhi i tō'ona haŋu a ruŋa i tū nu'u era koia ko kī: «Ka ai i a kōrua te [Vārua Maitai]. ²³ Te nu'u hāru i te rāua mana'u ki te 'Atua 'e haka tapa mai roto i te hara, i a kōrua te parau mo kī ki a rāua, ko haka kore 'ana e te 'Atua i te rāua hara. 'E te nu'u 'ina, i a kōrua tako'a te parau mo kī, kai haka kore e te 'Atua i te rāua hara».

He take'a iŋa e Tōmā i a Ietū

²⁴ A Tōmā, kī tako'a he Hauā, kope o roto i te ho'e 'ahuru mā piti nu'u hāpī 'a Ietū, 'ina o muri o rā nu'u i tu'u ai a Ietū 'i rā mahana. ²⁵ He 'a'amu ia e te tētahi nu'u hāpī:

—Ko take'a 'ana e mātou i a Ietū.

He pāhono e Tōmā:

—Mo ta'e take'a e au te pū o te veo 'i tō'ona rima, 'e mo ta'e haka puā e au hai maŋa-maŋa rima ki rā kona 'e ki tō'ona rehe-rehe, ta'e he parauti'a mō'oku te 'a'amu ena o kōrua.

²⁶ Ka va'u mahana pe mu'a, he taka-taka haka 'ou te nu'u hāpī 'a Ietū 'i te hare e tahi. 'I rā mahana 'i muri i a rāua a Tōmā. E tāma'u rō 'ana te 'ōpani o rā hare, he māroa atu a Ietū 'i vāeņa o rā nu'u 'e he 'aroha: «Ka ai 'i ruņa i a kōrua te haumārū o te 'Atua».

²⁷ He kī ia e Ietū ki a Tōmā:

—Ka oho mai ka u'i tō'oku rima. Ka ha-ha'o hai maņa-maņa rima ena ō'ou 'e 'ai ka haka toro rō mai tu'u rima ki roto i tō'oku rehe-rehe. 'Ina ko 'aka-'aka haka 'ou te mana'u; ko au mau 'ā te me'e nei!

²⁸ I 'auē a Tōmā i kī ai:

—E te Pū'oko Haka Tere ō'oku ē, e te 'Atua ō'oku ē!

²⁹ He kī e Ietū:

—I haka moe mai ena koe i tu'u mana'u he take'a ō'ou i a au. 'Ko te koa 'ō i te nu'u kai take'a hia 'ā i a au i haka moe rō ai i te rāua mana'u 'i ruņa i a au!

Te aura'a o te puka nei

³⁰ A Ietū i aņa tako'a rō 'i mu'a o tā'ana nu'u hāpī me'e rahi haka 'ou nō atu mana 'e 'ina kai pāpa'i 'i ruņa i te puka nei. ³¹ 'E te nā me'e nei i pāpa'i ai mo haka aņi-aņi atu: a Ietū he [Kiritō], he Poki o te 'Atua, 'e, tako'a, mo rava'a e kōrua i te ora 'āpī 'ina he hope'a ra'a hai [haka moe i te mana'u] 'i ruņa i a ia.

Ko Ietū 'e he nu'u hāpī 'ā'ana e hitu

21 'I te mahana haka 'ou e tahi, he haka take'a a Ietū i a ia ki tā'ana nu'u hāpī 'i te taha-taha o te kona vai e kī era ko Tivēria, 'e pē nei i topa ai: ² 'I rā kona a Tīmona, kī tako'a ko Pētero, a Tōmā, kī he Hauā, a Natanaera o Kānā, he kona e tahi o Karirea, he nā poki e rua 'a Tevereo 'e he kope haka 'ou hoko rua o roto o rā nūna'a hāpī era 'a Ietū. ³ I oho era he kī e Pētero:

—'I a au he oho he hoa i tā'aku kūpeņa.

He pāhono e tū nu'u era:

—He oho tako'a atu a mātou.

He eke-eke ia ananake ki ruņa i te vaka he e'a he oho, 'e 'ina e tahi me'e i rava'a 'i rā pō. ⁴ Ko hāhine 'ana mo 'ōtea, he māroa atu a Ietū 'i te taha-taha o tū kona vai era, 'e 'ina kai aņi-aņi e rā nu'u hāpī era 'ā'ana ko ia 'ō rā me'e. ⁵ He oho atu e Ietū:

—E kuā hoa, 'ina 'ō kōrua ika?

He pāhono e rā nu'u:

—'Ina.

⁶ He kī e Ietū:

—Ka haka topa te kūpeņa a te pā'iņa mata'u o te vaka, he rava'a ika kōrua.

Pē ira i aņa ai, 'e i haro mai era 'ina he nāe'i te kūpeņa 'i te rahi o te ika. ⁷ 'I tū hora 'ā i aņi-aņi ai e te kope haņa rahi 'a Ietū 'e he kī ki a Pētero: «'Ko Ietū te me'e era!».

I 'ite era e Pētero ko Ietū tū me'e era, he uru i tō'ona kahu, he rere ki roto i te vai he kau he oho ki 'uta. ⁸ Tū tētahi nu'u era kai roa i tomo ai 'i ruņa i te vaka e to-toi rō 'ana i te kūpeņa ko 'i 'ā e te ika. E pae 'ahuru nō māroa, pa'i, o te 'ava-'ava mai te taha-taha tai.

⁹ I topa era ki 'uta, he take'a i te ahi e hū rō 'ā, 'i ruņa e tahi ika 'e he haraoa. ¹⁰ He kī e Ietū: «Ka ma'u mai hai ika to'o iho mai ena e kōrua».

¹¹ He eke ia a Pētero ki ruņa i te vaka he to-toi he oho mai i tū kūpeņa era ki 'uta ko 'i 'ana e te ika ko tetu ko tetu, e ho'e hānere e pae 'ahuru mā toru ika; 'e 'ina kai mō-more tū kūpeņa era 'i te rahi.

¹² He kī a Ietū: «Ka oho mai kōrua ka kai».

'I te ha'amā 'ina e tahi o rāua i haņa mo 'ui ko ai a ia 'i te me'e era e 'ite riva-riva rō 'ana ko Ietū rā me'e.

¹³ He haka hāhine ia a Ietū, he to'o i te haraoa 'e i te ika he tuha'a ki tū nu'u era.

¹⁴ He toru haka take'a iņa nei o Ietū i a ia ki tā'ana nu'u hāpī mai tō'ona ora iņa mai te mate.

Ko Ietū 'e ko Pētero

¹⁵ I oti era i te kai, he 'ui e Ietū ki a Pētero:

—E Tīmona, e te poki 'a [Iovani] ē, 'i hau rō atu tu'u haņa mai ki a au ki te nu'u nei?

He pāhono e Pētero:

—Ko 'ite 'ana koe, e Ietū ē, e haņa rō atu 'ana a au.

He kī ia e Ietū:

—E hāpa'o koe i tā'aku māmoe.

¹⁶ He 'ui haka 'ou e Ietū:

—E Tīmona, e te poki 'a Iovani ē, 'e haņa rō mai 'ana koe?

He pāhono e Pētero:

—Ko 'ite 'ā e koe, e Ietū ē, e haņa rō atu 'ana a au.

He kī e Ietū:

—E hāpa'o koe i tā'aku māmoe.

¹⁷ He 'ui haka 'ou ia e Ietū:

—E Tīmona, e te poki 'a Iovani ē, 'e haņa rō mai 'ana koe?

He o'o te māui-ui 'i roto i te māhatu o Pētero 'o te 'ui haka 'ou o Ietū i tū vānaņa era, 'e he pāhono:

—E Ietū, e 'ite tahi rō 'ana a koe i te me'e, 'e ko 'ite tako'a 'ana koe e haņa rō atu 'ana a au.

He kī haka 'ou e Ietū:

—E hāpa'o koe i tā'aku māmoē. ¹⁸ I a au he kī atu: 'i te hora ō'ou e 'āpī nō 'ā, 'ā'au 'ā te here i tu'u pena 'e te oho ki te kona nō era 'ā'au i haņa. 'E, ka korohu'a ena, he haka toro i tu'u rima, he here-here atu 'e he ma'u i a koe ki te kona 'ina e ko haņa e koe mo oho.

¹⁹ I kī ai e Ietū i te me'e nei, e haka aņi-aņi 'ā pē hē ka mate era a Pētero, 'e pē hē te mate era o Pētero ka haka nui-nui era i te 'Atua. I oti era he kī:

—E aņa e oho koe i tā'aku me'e kī atu mo aņa!

Te kope haņa rahi 'a Ietū

²⁰ He hāruī ia a Pētero a tu'a, he take'a ka tata atu tū kope haņa rahi era 'a Ietū, kope noho 'i muri i a Ietū 'i

te [ņoņoro era o te Pakate] 'ui era pē nei ē: «E te Ma'ori, ζko ai te me'e ena ka ho'o ena i a koe?». ²¹ I take'a era e Pētero, he 'ui:

—E Ietū, ζhe aha te me'e ka topa ena ki te kope era?

²² He pāhono e Ietū:

—Mo haņa ō'oku mo ta'e mate ō'ona 'ātā ki tō'oku hoki iņa mai, ta'e he me'e 'ā'au. Ka aņa ka oho nō koe i tā'aku me'e kī atu.

²³ O ira i rahi ai te 'a'amu 'i roto i te nu'u taina [haka moe i te mana'u] 'i ruņa i a Ietū: rā kope e ko mate. 'E ta'e pē ira te kī 'a Ietū. Te kī: «Mo haņa ō'oku mo ta'e mate ō'ona 'ātā ki tō'oku hoki iņa mai, ta'e he me'e 'ā'au».

²⁴ Ko te kope mau nei 'ā te kope e haka 'ite atu ena o ruņa i te rā me'e nei, 'e 'ā'ana mau 'ā i pāpa'i. 'E a tā-tou e 'ite rō 'ā he parauti'a tā'ana me'e kī.

²⁵ I aņa rō a Ietū me'e rahi haka 'ou nō atu me'e. 'Āhani i pāpa'i tahi 'i ruņa i te puka, 'i te rahi, 'ina he kona o te ao mo hue.

AŅA O TE 'ĀPŌTORO

Te puka nei 'a Ruka i pāpa'i 'e he rua puka i pāpa'i e ia mo tō'ona repahoa ko Teofiro he haŅa mo haka 'ite ki a ia i te me'e ta'ato'a o ruŅa i a Ietū Kiritō (1.1; Ruka 1.1–4). E 'a'amu 'ana pē hē te nu'u hāpī 'a Ietū i haka 'ite i oho ai i te [roŅo riva-riva o te 'Atua] a te kona ta'ato'a, pa he me'e kī era e Ietū.

'I te ha'amata e haka 'ite 'ā e Ruka o ruŅa i te topa iŅa mai o te [Vārua Maitai] hōrea e Ietū (1.5–8). I topa mai ai 'i te mahana o te [Peneketote], 'e he haka riro i te nu'u hāpī 'a Ietū he 'aito 'i te haka 'ite iŅa o ruŅa i te ora iŅa o Ietū mai te mate (2.1–47), he va'ai ki a rāua i te mana mo haka ora i te māui-ui (3.1–10; 5.12–16), 'e he va'ai i te pūai mo aŅa mo oho i te me'e haŅa o te 'Atua 'ina he ri'a-ri'a. O te Vārua Maitai i haka aŅi-aŅi ki te nu'u nei pē nei ē: te [roŅo riva-riva o ruŅa i a Ietū Kiritō] ta'e mo te nu'u [hūrio] nō, mo te taŅata ta'ato'a o te ao, ka hūrio, ka ta'e hūrio (10.34–35).

E haka 'ite tako'a 'ā e Ruka 'i ruŅa i te puka nei pē hē a Sauro, kī tako'a ko Pauro, i māhani ai ki a Ietū 'e pē hē i huri ai i tō'ona mana'u ki ruŅa i a ia (8.1–4; 9.1–6). Mai rā mahana i riro ai he 'āpōtoro 'a Ietū Kiritō. 'E o te nu'u ta'ato'a haka 'ite i te roŅo riva-riva o ruŅa i a Ietū ko Pauro te kope 'ata hōnui.

E hā ara o Pauro i oho i haka 'ite i te roŅo riva-riva o ruŅa i a Ietū ki kona era ki kona era o te henua ta'ato'a haka tere e te rōmano, 'e 'ātā ki Roma mau 'ā. I hokorua rō i a ia 'i te Ņā ara nei e Verenāvē, e Tira, e Timoteo 'e te tētahi haka 'ou atu nu'u. E tu'u rō 'ana pa he me'e: i hokorua tako'a rō e Ruka, kope pāpa'i era i te puka nei. 'I ruŅa nei, pa'i, e vānaŅa e oho nō 'ā o ruŅa i a Pauro 'e o te nu'u hokorua i a ia, he o'o tako'a a Ruka 'i roto i te 'a'amu (16.10–17; 20.5–15; 21.1–19; 27.1–28.16).

E haka mao ena te puka nei o ruŅa i te noho iŅa o Pauro 'i Roma 'e e kī ena o ruŅa i a ia pē nei ē: ki te hope'a 'i-na he ri'a-ri'a e haka 'ite era o ruŅa i a Ietū 'e o ruŅa i te [haka tere iŅa 'āpī o te 'Atua 'i roto i te māhatu o te taŅata], 'e 'ina e tahi taŅata i haka mou i a ia (28.31).

He uŅa iŅa mai o te [Vārua Maitai]

1 'I ruŅa i tā'aku puka pāpa'i ra'e, e tō'oku repahoa hōnui ko Teofiro ē, i pāpa'i ai a au o ruŅa i te me'e ta'ato'a aŅa 'e hāpī e Ietū mai te mahana ha'amata i tā'ana aŅa ² 'ātā ki te mahana iri ō'ona ki te raŅi. Kai iri 'ā i haka 'ite rō ai hai Vārua Maitai ki tā'ana nu'u ha'ata'a he [āpōtoro] i te me'e o rāua mo aŅa. ³ I ora era mai te mate, he haka take'a i a ia ki rā nu'u mo aŅi-aŅi e rāua ko ora 'ā a ia. E maha 'ahuru mahana i haka take'a i oho ai a Ietū i a ia 'e i vānaŅa ai o ruŅa i te [haka tere iŅa 'āpī o te 'Atua].

⁴ I rā Ņā mahana noho era o Ietū 'i muri i tā'ana 'āpōtoro i kī tako'a rō ki rā nu'u mo ta'e e'a mai Hērutarema. He kī:

«Ka noho kōrua ka tiaki 'i nei 'ātā ka tano rō te me'e hōrea atu e tō'oku Matu'a, he me'e vānaŅa atu era e au. ⁵ A [Iovani] hai vai i [papatito] ai; 'e, e ko roa te mahana, nā he papatito atu te 'Atua i a kōrua hai Vārua Maitai, te aura'a, he uŅa i te Vārua Maitai mo noho mau rō 'āvai 'i roto i a kōrua.»

He iri iŅa o Ietū ki te raŅi

⁶ I te mahana e tahi he 'ui e te nu'u taka-taka 'i muri i a ia:

—E Ietū, Ņhe to'o koe, 'i te hora nei, i te tātou henua mai te rima o te rōmano mo haka tere haka 'ou e tā-tou e te itaraera?

⁷ He pāhono e Ietū:

—Ta'e he me'e mo kōrua e 'ite; i te Matu'a nō te parau mo kī i te hora 'e i te mahana o rā me'e. ⁸ Ka turu mai ena ki ruŅa i a kōrua te Vārua Maitai, he ai te kōrua pūai mo e'a mo vānaŅa i te parauti'a o ruŅa i a au 'i Hērutarema, 'i te kona ta'ato'a o Hūrea 'e o [Tāmāria], 'e 'ātā ki te Ņā kona hope'a ena o te roa.

⁹ I kī era i te me'e nei, he iri he oho a Ietū a ruŅa, e u'i nō 'ā e tū nu'u era, he viri e te raŅi e tahi 'e he Ņaro rō 'ai. ¹⁰ E u'i nō 'ana tū nu'u era a ruŅa pē hē a Ietū i Ņaro ai, i māroa ai 'i muri e rua taŅata e uru rō 'ā i te kahu tea-tea. ¹¹ He kī: «E te taŅata o Karirea ē, Ņhe aha rā i no-noho i u'i rō ai a te raŅi? A Ietū noho atu era 'i muri i a kōrua, iri ena ki te raŅi, ko ia 'ā nā ka hoki mai ena. Pa he iri iŅa ena ō'ona take'a ena e kōrua, pē ira 'ana tō'ona hoki iŅa mai.»

He to'o iŅa i a Mātia mo 'āpōtoro

¹² He hoki ia tū Ņā 'āpōtoro era ki Hērutarema mai ruŅa i te ma'uŅa kī o te 'Ōrivo, he kona e hāhine rō 'ā, he roa tano o te haka tere hūrio mo ha'ere 'i te [mahana haka ora]. ¹³ I tu'u era ki Hērutarema, he eke ananake ki te piha o ruŅa o te hare 'i ira e noho era. Te

nu'u nei ko Pētero, ko Iovani, ko [Tanatiako], ko Antarea, ko Feripe, ko Tōmā, ko Torometi, ko Māteo, ko Tanatiako poki 'a Arafeo, ko Tīmona he [sērote], ko Hura poki 'a Tanatiako. ¹⁴ Te anā o rāua he haka taka-taka mo pure ananake ko te taina o Ietū, ko [Māria] matu'a o'ona 'e ko te tētahi atu nā vi'e.

¹⁵ 'I rā nā mahana he vānaŋa a Pētero ki te nu'u taka-taka [haka moe i te mana'u] 'i ruŋa i a Ietū e ho'e hānere piti 'ahuru, he kī:

¹⁶ «Pē ira mau 'ā te me'e nei ana topa, e tō'oku taina ē, mo haka tano ki te me'e kī e te Vārua Maitai 'i ruŋa i te [Pāpa'i Mo'a] pāpa'i e [Tāvita] o ruŋa i a Hura, kope uŋa era i te nu'u mo 'a-'aru i a Ietū. ¹⁷ A Hura he kope e tahi o mātou, 'e 'i muri i a mātou e anā era. ¹⁸ (Hai moni 'auhau o te me'e ta'e tano anā e ia i ho'o ai i te henua e tahi. 'E mai te kona ruŋa nui o ira i viri ai hai pū'oko 'e he nā'aha-'aha tahi te kōkoma ki haho. ¹⁹ I 'ite era o ruŋa o rā me'e e te nu'u ta'ato'a o Hērutarema, he nape i te 'iŋoa o rā kona ko Āteretama, te aurā'a 'i te rāua 'arero: "He Henua Toto")».

²⁰ He kī haka 'ou e Pētero: «Nā e kī rō 'ana 'i ruŋa i te puka o te hīmene pē nei ē:

"E o'o rō tō'ona hare e te tokerau, 'e 'ina e tahi me'e mo noho 'i ira".

»E, tako'a:

"Mo te rua taŋata e ma'u i tō'ona tōro'a 'e e anā i tā'ana anā".

²¹ »I roto i a tātou te nāŋata e noho mai ena 'i te hora ta'ato'a o Ietū 'i muri i a tātou, ²² mai te hora papatito i a ia e Iovani 'ātā ki te hora iri ki te raŋi. Ki u'i ki to'o mai e tahi o rāua mo mata'ite tako'a ananake ko mātou pē nei ē: a Ietū ko ora 'ā mai te mate».

²³ E rua 'iŋoa i kī ai: ko [Kōsē], e kī era ko Varasāvā, kī tako'a ko Huto, 'e te rua ko Mātia. ²⁴ He pure ia ananake:

«E te 'Atua ē, ko koe i 'ite i te huru o te māhatu o te taŋata ta'ato'a. Ka haka 'ite mai koe ko ai o roto o te nāŋata nei e rua i haŋa e koe ²⁵ mo ma'u i te anā he 'āpōtoro, anā e Hura 'ātā ki te hora hara o'ona 'e 'ai ko oho 'ā ki te kona tano mō'ona».

²⁶ I u'i era he topa ki a Mātia; 'e mai rā hora he riro rō 'ai o roto o te nūna'a 'āpōtoro.

He topa iŋa o te [Vārua Maitai]

2 I tano era te [ŋoŋoro o te Peneketote], e tahi nō kona i taka-taka tahi ai te nu'u ta'ato'a [haka moe i te mana'u] 'i ruŋa i a Ietū. ² E no-noho nō 'ā he ŋaro'a i te heruru mai te raŋi pa he hu-hū tokerau pūai, 'e he heruru tahi tū hare era 'i ira a rāua. ³ 'I ka u'i atu ena ko te me'e tu'u pa he ura ahi ka topa a ruŋa i te ta'ato'a e tahi ka tahi o rāua. ⁴ He 'i ia ananake e te pūai o

te Vārua Maitai 'e he ha'amata he vānaŋa 'arero kē 'arero kē, hai 'arero haka vānaŋa e te Vārua Maitai.

⁵ 'I Hērutarema te [hūrio] ha'amuri 'e ha'atura ki te 'Atua o te kona ta'ato'a o te ao. ⁶ I heruru era rā hare, he pae me'e rahi nu'u ki rā kona, 'e 'ina he anj-anj he aha te aura'a, he ŋaro'a i te nu'u haka moe i te mana'u 'i ruŋa i a Ietū e vānaŋa 'ā i te 'arero o rāua o te nu'u pae ki ira. ⁷ 'I te māere o rā nu'u he kī:

«¿Ta'e 'ō te nu'u ta'ato'a era e vānaŋa mai era ai o Karirea? ⁸ ¿Pē hē ia e ŋaro'a mai nei e vānaŋa 'ā hai 'arero kē-kē o tātou o te nu'u taka-taka o nei? ⁹ 'I roto i a tātou, pa'i, te nu'u o Paratia, o Mēria, o 'Ērama, o Mētōpōtāmia, o Hūrea, o Kāpārōtia, o Ponotō, o 'Ātia, ¹⁰ o Firihiā, o Panafiria, o Ehipto, 'e o te nā kona era o Rivia hāhine ki Tīrene. E ai tako'a rō 'ana te nu'u o Roma 'i nei, ¹¹ tētahi he hūrio ma'u i te rāua haka tere iŋa mai te poreko iŋa 'ā 'e tētahi atu he nu'u o'o ki roto i te haka tere iŋa o te hūrio. 'E 'i roto tako'a te nu'u o Kereta 'e o Aravia. 'I'E, 'i e ŋaro'a mai nei i te nu'u era e vānaŋa 'ā o ruŋa i te me'e ta'ato'a nui-nui anā e te 'Atua hai 'arero kē-kē vānaŋa e te nu'u o te kona nei!».

¹² Ko māere tahi 'ā ananake. 'Ina he 'ite pē hē ana mana'u, 'e he 'ui ki a rāua 'ā: «¿He aha te ha'aaura'a o te nā me'e ta'ato'a nei?».

¹³ 'I ia te tētahi o rā nu'u e haka me'e-me'e era pē nei ē: «¿Ko ta'ero tahi 'ana!».

He tātara iŋa o Pētero

¹⁴ He māroa ia a Pētero ananake ko te tētahi nā [āpōtoro] era e ho'e 'ahuru mā ho'e, 'e hai re'o pūai he kī:

«E te hūrio 'e e te nu'u ta'ato'a noho o Hērutarema ē, ka 'ite kōrua i te nā me'e nei, 'e 'ai ka haka roŋo riva-riva rō mai tā'aku vānaŋa ka kī atu ena. ¹⁵ Kai ta'ero te nu'u nei, pa he me'e mana'u e kōrua; hora iva iho o te pō'ā nei. ¹⁶ Te parauti'a, te me'e take'a ena 'e ŋaro'a ena e kōrua ko te me'e haka 'ite era e te perofeta era ko Hōere pē nei ē:

¹⁷ "I te nā mahana hope'a era, i kī ai e te 'Atua, e va'ai rō e au i tō'oku Vārua Maitai ki te taŋata ta'ato'a.

Te nā poki o kōrua e haka 'ite rō i te roŋo haka 'ite e au ki a rāua,

te nā poki 'āpī e take'a rō i te me'e haka take'a e au, 'e te nu'u korohu'a e moe vārua rō.

¹⁸ 'E, 'i rā nā mahana, e haka topa tako'a rō e au i tō'oku Vārua Maitai ki ruŋa i tō'oku tāvini, ka ai he taŋata 'o he vi'e, 'e e vānaŋa rō rāua i te me'e haka vānaŋa e au.

¹⁹ E haka take'a rō e au a ruŋa i te raŋi i te me'e nui-nui;

'e 'i ruŋa i te henua he toto, he ahi 'e he 'au.

²⁰ Te ra'ā e pōhāhā rō,

'e te māhina e riro rō pa he toto
'i ra'e ki te tu'u iŋa mai o te mahana nui-nui o te 'Atua.

²¹ 'E te nu'u ta'ato'a ani hai 'iŋoa o te [Kiritō],
he e'a mai roto i te ūtu'a o te hara
'e he rava'a i te ora 'āpī 'ina he hope'a ra'a va'ai e te
'Atua".

²² »E te itaraera ē, ka haka roŋo mai te me'e nei ka kī
atu ena: A kōrua ko 'ite riva-riva 'ana: hai me'e nu-nui
aŋa e Ietū 'e hai mana aŋa e ia i haka take'a atu ai e te
'Atua: a Ietū o Nātāreta he taŋata uŋa mai e ia. ²³ I
va'ai atu ai ki a kōrua mo haka tano o te aŋa mana'u
'ā'ana 'i mu'a 'ā; pē ira kōrua i haka tiŋa'i ai 'i ruŋa i te
tātaurō hai rima o te taŋata ta'e he hūrio. ²⁴ I oho era
he haka ora e te 'Atua, he haka e'a mai te 'ati o te
mate i a Ietū; ta'e, pa'i, te mate mo rē ki a ia. ²⁵ Te 'ariki
era ko [Tāvita] i pāpa'i rō o ruŋa i a Ietū pē nei ē:

“Te aŋa nō he take'a e au i tō'oku Pū'oko Haka Tere 'i
muri i a au;
'i te ai mai ō'ona 'i tō'oku pā'iŋa mata'u, 'ina he me'e
mo haka hiŋa i a au.

²⁶ 'O ira tō'oku māhatu e koa nei, 'e hai ŋutu ō'oku e
ha'ahana-hana nei i a ia.

Ko 'ite riva-riva 'ana, pa'i, e au: te mate e ko rē mai.

²⁷ E ko haka rē koe i tō'oku vārua 'i muri i te nu'u
mate

'e e ko ha'ati'a koe mo piro o te hakari o tu'u tāvini
ha'ata'a 'e ha'atura ki a koe.

²⁸ Ko haka take'a mai 'ana koe i te ara o te ora 'āpī 'i-
na he hope'a ra'a va'ai e te 'Atua,

'e e rahi rō 'ana tō'oku koa 'o tu'u ai mai 'i muri i a
au".

²⁹ »E te taina, ko 'ite tahi 'ā a tātou: te tātou tupuna
ko Tāvita ko mate 'ā, 'e 'i muri i a tātou tō'ona kona
tanu. ³⁰ A Tāvita he perofeta; ko 'ite era 'ana e ia ko
hōrea 'ā e te 'Atua e haka 'ariki rō e tahi taŋata o roto
o tō'ona hakaara. ³¹ 'E ko 'ite tako'a 'ā a ia pē nei ē: te
Kiritō e ora haka 'ou rō mai te mate. 'O ira a Tāvita i
pāpa'i ai i te vānaŋa nei: e ko haka rē i tō'ona vārua 'i
muri i te nu'u mate 'e e ko ha'ati'a mo piro o tō'ona
hakari.

³² »Te 'Atua ko haka ora 'ā i a Ietū mai te mate 'e he
mata'ite a mātou ta'ato'a o rā me'e. ³³ Ko ma'u 'ā te
'Atua i a Ietū ko haka noho 'ana 'i tō'ona pā'iŋa mata'u
mo haka tere ararua, 'e ko va'ai 'ā ki a ia i te Vārua
Maitai hōrea e ia e te Matu'a. 'E a Ietū ko haka topa
mai 'ā i te Vārua Maitai ki ruŋa i a mātou, he me'e
ŋaro'a 'e take'a ena e kōrua.

³⁴ »Ta'e ko Tāvita rā me'e iri era ki te raŋi; 'ā'ana mau
'ā, pa'i, i kī:

“A Iehoha te 'Atua i kī rō ki tō'oku Pū'oko Haka Tere:
'Ka noho mai koe 'i tō'oku pā'iŋa mata'u,

³⁵ 'ātā ka haka riro rō e au i te nu'u ta'e haŋa atu ki a
koe he me'e raŋo o tu'u va'e".

³⁶ »E te taŋata o Itaraera, e 'ite riva-riva kōrua: a Ietū,
veo era e kōrua 'i ruŋa i te tātaurō, ko haka Pū'oko Ha-
ka Tere 'ā e te 'Atua o te me'e ta'ato'a 'e ko haka Kiritō
'ā».

³⁷ I ŋaro'a era i rā me'e e te nu'u taka-taka 'i tū kona
era, he o'o te mamae ki roto i te māhatu, 'e he 'ui ki a
Pētero 'e ki te tētahi 'āpōtoro:

—E kuā taina, ŷhe aha te mātou me'e mo aŋa?

³⁸ He pāhono e Pētero:

—Ka huri te kōrua mana'u ki te 'Atua, ka haka tapa
mai roto i te hara 'e 'ai ka haka [papatito] rō hai 'iŋoa
o Ietū Kiritō mo haka 'ite ko haka moe 'ā i te mana'u 'i
ruŋa i a Ietū, ki haka kore ai e te 'Atua i te kōrua hara.
Pē ira he va'ai atu e ia i te Vārua Maitai. ³⁹ Te hōrea era
o ruŋa o te Vārua Maitai mo kōrua, mo te kōrua ŋā po-
ki, 'e mo te nu'u e roa rō 'ana, te aura'a, mo te nu'u
ta'ato'a kī e te 'Atua mo oho ki a ia.

⁴⁰ Hai ŋā vānaŋa nei 'e hai vānaŋa haka 'ou atu i hāpī
ai 'e i hatu ai e Pētero ki te taŋata: «ŷE haka tapa kōrua
mai muri i te nu'u aŋa i te me'e ta'e tano 'o haka ūtu'a
tako'a atu te 'Atua i a kōrua!».

⁴¹ Te nu'u i haka roŋo hai māhatu ki tū ŋā me'e kī era
e Pētero 'e i haka moe i te mana'u 'i ruŋa, he haka pa-
patito i a rāua. Pē ira, 'i rā mahana mau 'ā, i 'ata rahi ai
te nūna'a taŋata haka moe i te mana'u 'i ruŋa i a Ietū
e toru ta'utini haka 'ou taŋata. ⁴² 'E a rāua e ma'u e
oho nō 'ana i te me'e ta'ato'a hāpī e te 'āpōtoro, 'e te
aŋa tako'a he haka taka-taka mo pure 'e mo mo-more
i te haraoa mo mana'u i te mate iŋa o Ietū.

He nu'u [kiritiano] ra'e

⁴³ He māere te ta'ato'a 'i te rahi o te mana 'e o te
me'e nui-nui haka aŋa e te 'Atua ki te 'āpōtoro. ⁴⁴ Te
nu'u ta'ato'a haka moe i te mana'u 'i ruŋa i a Ietū, e
here rō 'ā 'e e tuha'a rō 'ana 'i roto i a rāua i te rāua
me'e ai. ⁴⁵ He ho'o i te henua 'e i te me'e ta'ato'a o
rāua, 'e 'ai ka tuha'a i te moni ki te nu'u e hape rō 'ana
te rāua me'e. ⁴⁶ Paurō te mahana e haka taka-taka era
'i te Kona Ha'amuri 'Atua. 'E 'i te rāua hare e mo-more
era i te haraoa 'e hai koa 'e hai māhatu riva-riva e ka-
kai era. ⁴⁷ E ha'ahana-hana rō 'ana ki te 'Atua, 'e e
haŋa rahi rō 'ana e te nu'u. Te mahana te mahana e 'a-
ta haka rahi era e te 'Atua i tū nūna'a taŋata era hai
nu'u e'a mai roto i te ūtu'a o te hara 'e rava'a i te ora
'āpī 'ina he hope'a ra'a.

He haka ora iŋa i te va'e o te taŋata e tahi

3 E tahi mahana he oho a Pētero ararua ko [Iovani]
ki te [Kona Ha'amuri 'Atua] ki te pure o te hora
toru o te ahi-ahi. ² 'I ira e noho rō 'ā e tahi taŋata va'e
rehe-rehe mai tō'ona poreko iŋa 'ā. Paurō te mahana e

ma'u e haka rē era i a ia 'i muri i te 'ōpani te 'iŋoa ko Nehe-nehe mo no-no'i hai me'e tara ki te nu'u uru.

³I take'a era e tū taŋata va'e rehe-rehe era i a Pētero ararua ko Iovani e oho 'ā mo uru ki roto, he no-no'i hai moni. ⁴He noho ararua he u'i ki tū taŋata era, 'e he kī e Pētero: «Ka u'i mai rā koe». ⁵He u'i e tū taŋata era, e mana'u era he va'ai hai moni. ⁶He kī ia e Pētero: «'Ina ō'oku moni 'e 'ina ō'oku piru. Tā'aku me'e ai 'ī e au he va'ai atu: hai 'iŋoa o Ietū Kiritō o Nātāreta, ka māroa koe ka ha'ere».

⁷I kī era a Pētero i te me'e nei, he 'a-'aru a te rima mata'u mo haka e'a ki ruŋa. 'I tū hora 'ā he ora rō 'ai te va'e o tū taŋata era. ⁸I rere a ruŋa i māroa ai 'e he ha'amata he ha'ere. He uru ki roto i te Kona Ha'amuri 'Atua 'i muri i a kuā Pētero hai va'e mau 'ā ō'ona koia ko rere-rere e ha'ahana-hana era ki te 'Atua.

⁹Te nu'u ta'ato'a take'a i rā taŋata e ha'ere 'ā 'e e ha'ahana-hana 'ana ki te 'Atua ¹⁰he māere 'i tū me'e era 'o te anjī-anjī ko tū taŋata no-no'i era i te moni 'i te kona 'ōpani era ko Nehe-nehe.

E tātara 'ā a Pētero 'i te Taupe'a o [Toromono]

¹¹Rā taŋata va'e rehe-rehe era kai haŋa mo oho mai muri i a Pētero ararua ko Iovani. Te nu'u ta'ato'a, 'i te māere 'i tū me'e topa era, he tāhuti ki te kona 'i ira o kuā Pētero, he kona kī he Taupe'a o Toromono o te Kona Ha'amuri 'Atua. ¹²I take'a era e Pētero, he kī:

«¿He aha rā kōrua i māere ai, e te itaraera ē? ¿He aha e u'i mai ena pa he me'e ena ē: o māua i haka ha'ere i te taŋata nei hai mana mau 'ā o māua, 'o 'o te rava mo'a 'e ha'atura o māua ki te 'Atua? ¹³Te 'Atua o [Aparahama], o Ita'ata, o Hākovo, tupuna o tātou, ko haka nui-nui 'ā i tō'ona tāvini ko Ietū va'ai e kōrua ki te nu'u ra-rahi 'e ta'e haŋa e kōrua 'i te hora haŋa e Pirato mo haka e'a. ¹⁴Kai haŋa a kōrua mo kī mo haka e'a i te taŋata aŋa i te me'e tī-tika 'e 'ina he hara; he taŋata taparahi-ta'ata i haŋa e kōrua mo haka e'a.

¹⁵»Pē ira a kōrua i tiŋa'i i haka mate ai i te taŋata va'ai mai i te ora 'āpī 'ina he hope'a ra'a. 'E, ka ai atu pē ira, ko haka ora 'ā e te 'Atua mai te mate; a māua he mata'ite. ¹⁶Te me'e i haka ora i te taŋata take'a ena e kōrua he [haka moe i te mana'u] 'i ruŋa i a Ietū. 'E, 'o te haka moe i te mana'u 'i ruŋa i a Ietū, i ora tahi ai tō'ona māui-ui, pa he me'e take'a ena e kōrua.

¹⁷»E kuā taina ē, ko 'ite 'ana a au hora tiŋa'i era e kōrua 'e e te kōrua nu'u ra-rahi i a Ietū, 'ina kōrua kai anjī-anjī he aha te kōrua me'e i aŋa. ¹⁸Pē ira te 'Atua i haka tano ai i te me'e kī 'i mu'a 'ā ki tā'ana perofeta ta'ato'a mo haka 'ite: tā'ana Kiritō e mate rō.

¹⁹»O ira, [ka huri te mana'u ki te 'Atua] 'e 'ai ka haka tapa rō mai roto i te hara, ki haka kore atu ai e ia i te kōrua hara. ²⁰Mo aŋa pē ira, e tu'u rō te hora he ŋaro'a e kōrua i te haka haŋu iŋa o te 'Atua i te kōrua vārua hai uŋa atu i a Ietū, he kope ha'ata'a mai te hora ra'e era 'ā mo Kiritō o kōrua.

²¹»E mo te hora nō nei a Ietū Kiritō ana noho 'i te ranjī 'ātā ki te haka riva-riva iŋa e te 'Atua i te me'e

ta'ato'a, pa he me'e haka 'ite mai hai tā'ana ŋā perofeta era o mu'a 'ā. ²²I haka 'ite rō e [Mōtē] ki te tātou tupuna: «Te 'Atua e ha'ata'a rō mai roto i a kōrua i te perofeta e tahi pa he ha'ata'a iŋa nei i a au. E ha'atura te me'e ta'ato'a ka kī atu ena. ²³Te nu'u ta'ato'a ta'e haka roŋo ki nei perofeta, he haka kore mai roto i te nu'u haka tere e te 'Atua».

²⁴»Te perofeta ta'ato'a, mai a [Tamuere] pe mu'a, i vānaŋa tako'a rō o ruŋa i te ŋā mahana nei. ²⁵A kōrua he hakaara o rā ŋā perofeta, 'e mo kōrua rā hōrea kī era e te 'Atua ki te tātou tupuna ko 'Aparahama pē nei ē:

«E ha'amaitai rō e au te hau ta'ato'a o te ao hai hakaara ō'ou».

²⁶»Ki a tātou ki te itaraera i uŋa ra'e mai ai e te 'Atua i te tāvini ha'ata'a era ō'ona, mo ha'amaitai mai e ia hai haka e'a i a tātou mai roto i te hara».

'I mu'a o te nu'u ra-rahi a Pētero ararua ko [Iovani]

⁴E vānaŋa nō 'ana a Pētero ararua ko [Iovani] 'i tū kona era i tu'u ai te nu'u [oromatu'a] ananake ko te kape o te mūto'i o te [Kona Ha'amuri 'Atua] 'e he nu'u [saruseo]. ²Ko riri atu 'ana ananake mo kuā Pētero 'o te hāpī 'e 'o te kī ki te nu'u: te ora o te taŋata mai te mate ko haka take'a 'ana hai haka ora e te 'Atua i a Ietū. ³He 'a-'aru ia i a Pētero ararua ko Iovani 'e, 'i te me'e era ko ahi-ahi 'ana, he ma'u he puru 'i roto i te hare ma'u'aurī 'ātā ki te rua mahana.

⁴O te nu'u haka roŋo i te rāua vānaŋa nu'u rahi i [haka moe i te mana'u] 'i ruŋa i a Ietū. Pē ira i 'ata rahi ai rā nu'u; mo tataku i te ŋāŋata nō he hāhine ki te pae ta'utini.

⁵'I te rua mahana i taka-taka tahi ai 'i Hērutarema te nu'u i a rāua te kī iŋa hope'a o te haka tere [hūrio], te nu'u pū'oko haka tere 'e te nu'u ma'ori o te rāua haka tere iŋa. ⁶'I rā kona a 'Ānā, he oromatu'a hope'a o te ra-rahi, a Kaifā, a Iovani, a Arehantaro 'e te tētahi hua'ai o te oromatu'a hope'a o te ra-rahi. ⁷He uŋa mo ma'u i a Pētero ararua ko Iovani ki mu'a o rāua 'e he 'ui:

—¿Hai 'iŋoa 'e hai mana o 'ai a kōrua i aŋa ai i te me'e ena?

⁸He pāhono e Pētero, ko 'ī 'ā e te pūai o te [Vārua Maitai]:

—E te nu'u ra-rahi 'e e te nu'u pū'oko haka tere o Itaraera ē: ⁹a kōrua e 'ui mai 'ā o ruŋa o te me'e riva-riva aŋa ki te taŋata va'e rehe-rehe nei mo 'ite o kōrua pē hē i ora ai. ¹⁰'I a māua he kī atu 'i mu'a i a kōrua 'e 'i mu'a i te taŋata ta'ato'a o Itaraera: te taŋata nei e māroa atu ena 'i mu'a o kōrua i ora ai hai 'iŋoa o Ietū Kiritō o Nātāreta tiŋa'i e kōrua 'i ruŋa i te tātaurō, 'e haka ora e te 'Atua mai te mate.

¹¹ »A Ietū ko te mā'ea ta'e haŋa era e kōrua e te nu'u aŋa hare, 'e, hora nei, ko riro 'ana he mā'ea matu'a haka noho i te hare. ¹² Te e'a mai roto i te ūtu'a o te hara 'e te ai o te ora 'āpī 'ina he hope'a ra'a va'ai e te 'Atua, mai i a Ietū mau nō ana rava'a. Te 'Atua, pa'i, 'ina kai va'ai ki te rua kope i te aŋa nei.

¹³ I take'a era e tū nu'u ra-rahi era i te haka kē o Pētero ararua ko Iovani e vānaŋa era, 'e i 'ite era he nu'u 'ina he hāpī, he māere ananake 'e he aŋi-aŋi: he nu'u hāpī e Ietū. ¹⁴ 'I muri i a kuā Pētero tū kope haka ora era, 'o ira kai tano rā nu'u mo tuhi e tahi me'e.

¹⁵ He haka e'a ia i a kuā Pētero ki haho, 'e he noho he ha'a'au ananake. ¹⁶ He kī ki a rāua ā: «¿He aha te tātou me'e mo aŋa ki te nŋaŋata era? Ko 'ite tahi 'ana te taŋata ta'ato'a o Hērutarema o ruŋa o te mana aŋa e rāua, 'e 'ina a tātou e ko tano mo kī ta'e he parauti'a. ¹⁷ 'O ira, 'o 'ata hau 'o oho te vānaŋa o ruŋa i a Ietū, mai ki haka ri'a-ri'a mo ta'e vānaŋa haka 'ou o ruŋa i a ia».

¹⁸ Pē ira i uŋa ai mo haka uru haka 'ou, 'e he haka ri'a-ri'a mo ta'e vānaŋa 'e mo ta'e hāpī haka 'ou o ruŋa i a Ietū. ¹⁹ He pāhono e Pētero ararua ko Iovani:

—Ka kī mai rā kōrua: ¿'Ata tano ki te mata o te 'Atua mo ha'atura atu o māua ki a kōrua 'o ki a ia? ²⁰ A māua, pa'i, e ko tano mo ta'e vānaŋa o ruŋa o te me'e take'a 'e ŋaro'a e māua.

²¹ 'E, 'i te ta'e 'ite o tū nu'u ra-rahi era pē hē a rāua ana haka ūtu'a i a kuā Pētero 'o riri te nu'u, he haka ri'a-ri'a haka 'ou 'e 'ai ka haka e'a. Te taŋata ta'ato'a, pa'i, e ha'ahana-hana 'ana ki te 'Atua o ruŋa o tū me'e topa era, 'o ira te nu'u ra-rahi e ri'a-ri'a era. ²² E maha 'ahuru tūma'a matahiti o tū taŋata haka ora era.

He pure iŋa ki te 'Atua

²³ I e'a era a Pētero ararua ko Iovani mai tū kona era, he oho he piri ki te rāua nu'u, 'e he 'a'amu i te me'e ta'ato'a kī e tū nu'u ra-rahi era. ²⁴ I oti era rā nu'u i te haka roŋo, he pure ananake ko kuā Pētero ki te 'Atua pē nei ē:

«E te 'Atua ē, 'ā'au i aŋa i te raŋi, i te henua, i te vaikava, 'e i te me'e ta'ato'a o rā ŋā kona, ²⁵ 'e 'ā'au tako'a i kī hai Vārua Maitai ki tu'u tāvini ko [Tāvita], tupuna o mātou pē nei ē:

“¿He aha rā te nu'u ta'e he hūrio e riri ena 'e e haka 'āriŋa ena?

'E ¿he aha te hūrio e ha'a'au tahaŋa ena i te me'e 'ina e ko rava'a mo aŋa?

²⁶ Te 'ariki 'e te nu'u haka tere henua, pa'i, ko haka piri tahi 'ā mo aŋa i te me'e ta'e tano ki te 'Atua 'e ki tā'ana Kiritō”.

²⁷ »He aŋi mau 'ā a [Erore], a Pontio Pirato, te nu'u ta'e he hūrio, 'e te itaraera i haka piri tahi rō 'i nei 'i Hērutarema mo aŋa i te me'e ta'e tano ki tu'u tāvini mo'a ko Ietū, ha'ata'a e koe mo Kiritō. ²⁸ Hai rā me'e i haka tano ai a rāua i te me'e ta'ato'a kī e koe mo topa.

²⁹ »E te 'Atua ē, ko 'ite 'ana koe pē hē te nu'u era i haka ri'a-ri'a mai ai. 'O ira, ka va'ai mai koe ki tu'u ŋā tāvini nei hai pūai mo ta'e ri'a-ri'a ana haka 'ite ana oho i ta'a vānaŋa, ³⁰ koia ko haka take'a i tu'u pūai hai haka ora i te māui-ui 'e hai aŋa i te mana hai 'iŋoa o tu'u tāvini mo'a ko Ietū».

³¹ I oti era te pure ananake, he makenu tū kona era 'i ira a rāua, he 'i tahi ananake e te pūai o te Vārua Maitai, 'e he ha'amata he haka 'ite he oho i te vānaŋa o te 'Atua 'ina he ri'a-ri'a.

Te me'e ta'ato'a mo te ta'ato'a

³² Te nu'u ta'ato'a haka moe i te mana'u 'i ruŋa i a Ietū, pē tū huru tahi 'ana te mana'u. 'Ina e tahi o rāua he kī: tō'ona me'e ai, mō'ona nō; mo te ta'ato'a e kī era.

³³ Hai haŋu 'e hai pūai e 'ata vānaŋa e oho era te [‘āpōtoro] o ruŋa i te ora o Ietū mai te mate, 'e 'i ruŋa i a rāua ta'ato'a te mata o te 'Atua. ³⁴ 'Ina e tahi taŋata o rāua hape o te me'e; te nu'u ai, pa'i, o te henua 'e o te hare he ho'o 'e te moni rava'a ³⁵ he va'ai ki te 'āpōtoro mo tuha'a ki te nu'u kore o te me'e.

³⁶ Pē ira i aŋa ai e te taŋata [rēvita] e tahi te 'iŋoa ko [Kōsē] o te motu ko Tīpere, nape e te 'āpōtoro ko Verenāvē (te aura'a: «he kope hā'ū'ū i te rua»). ³⁷ Te taŋata nei e ai rō 'ā e tahi ō'ona henua; he ho'o 'e he va'ai tahi i te moni ki te 'āpōtoro.

Te hara o 'Ānānia ararua ko Sāfira

5 I ai rō te taŋata ko 'Ānānia te 'iŋoa 'e tā'ana vi'e ko Sāfira. He ho'o i te rāua henua e tahi, ² 'e he ha'a'au mo haka rē i te 'apa o te moni mo rāua 'e mo va'ai i te rua 'apa ki te [‘āpōtoro]. He ma'u i tū moni era 'e he kī:

—He moni ta'ato'a nā o tō'oku henua i ho'o.

³ He kī e Pētero:

—E 'Ānānia, ¿he aha koe i ha'ati'a ai i a Rukifero mo haka tere atu? Ko reo-reo 'ā koe ki te [Vārua Maitai] hai haka rē e tahi 'apa o te moni mō'ou. ⁴ ¿Ta'e 'ō ō'ou rā henua? I ho'o era, ¿ta'e 'ō ō'ou rā moni? ¿He aha koe i aŋa ai i te me'e ena? Ta'e ki te taŋata koe i reo-reo ai, ki te 'Atua.

⁵ I ŋaro'a era e 'Ānānia, he 'amo ki raro he mate, i haka ūtu'a e te 'Atua. He ri'a-ri'a rō atu 'ai te nu'u ta'ato'a 'ite o ruŋa i rā me'e. ⁶ He oho e te nŋaŋata 'āpī o tū kona era, he viri hai kahu i te hakari 'e he ma'u he tanu.

⁷ Ka toru hora a tu'a o te topa o tū me'e era i tu'u ai te vi'e 'a 'Ānānia, mā te ta'e 'ite o ruŋa o tū me'e era.

⁸ He 'ui e Pētero:

—Ka kī mai rā koe, ¿tū henua ho'o era o kōrua ki te moni, ko te moni kī mau mai era 'ā e 'Ānānia?

He pāhono e tū vi'e era:

—'Ē-ē, ko rā moni.

⁹ He kī e Pētero:

—ĶHe aha a kōrua i ha'a'au ai mo haka 'atu i te Vārua o te 'Atua? Nā 'i haho o te 'ōpani te nānata 'āpī ma'u tanu era i ta'a kenu 'e, 'i te hora nei, ko koe te me'e ka ma'u ka tanu ena.

¹⁰ 'I tū hora mau era 'ā he 'amo ki raro a Sāfira 'e he mate 'i mu'a o Pētero. I uru era tū nānata 'āpī era, he take'a ko mate tako'a 'ā te vi'e 'a 'Ānānia. He ma'u ia he tanu 'i muri i tā'ana kenu. ¹¹ Te nūna'a taŅata ta'ato'a [haka moe i te mana'u] 'i ruŅa i a Ietū he ri'a-ri'a rō atu 'ai, 'e pē ira tako'a 'ā te nu'u ta'ato'a 'ite o ruŅa i rā me'e.

Hai 'āpōtoro e aŅa era e te 'Atua i te mana

¹²⁻¹⁴ Te aŅa o te nu'u ta'ato'a haka moe i te mana'u 'i ruŅa i a Ietū he taka-taka 'i ruŅa i te taupe'a o te [Kona Ha'amuri 'Atua] kī he Taupe'a o [Toromono]. Te nu'u ta'e haka moe i te mana'u 'i ruŅa i a Ietū e ri'a-ri'a rō 'ana 'o piri rāua ki te nā nu'u nei. Ka ai atu pē ira e mo'a rō 'ana i rā nu'u. 'E pe te 'ata rahi nō e oho era te nā vi'e te nānata haka moe i te mana'u 'i ruŅa i a Ietū. Te 'Atua, pa'i, hai 'āpōtoro e aŅa era me'e rahi nō atu mana 'i roto i te taŅata.

¹⁵ Te aŅa o te taŅata he ma'u i te māui-ui ki te ara e haka moe rō 'ana 'i ruŅa i te ro'i 'e 'i ruŅa i te raŅaria, koi'ite ka vari era a Pētero he ora te māui-ui hai kohu ō'ona. ¹⁶ 'E mai te kona ta'ato'a hāhine ki Hērutarema e ma'u tako'a era i te māui-ui 'e i te taŅata ko o'o 'ā e te tātane, 'e ta'ato'a nō e ora era.

He kimi iŅa i te 'āpōtoro mo tōtōā

¹⁷ Te [oromatu'a hope'a o te ra-rahi] 'e te nu'u [saruseo] o muri i a ia, 'i te mākota, ¹⁸ he haka 'a-'aru i te 'āpōtoro 'e he haka ma'u he puru 'i roto i te hare ma'u'aurī.

¹⁹ He tu'u ia te merahi e tahi o te 'Atua 'i te pō, he mātaki i te 'ōpani o tū hare ma'u'aurī era, he haka e'a i rā nu'u 'ai ka kī: ²⁰ «E oho kōrua ki roto i te Kona Ha'amuri 'Atua e haka 'ite e oho nō i te me'e ta'ato'a o ruŅa i te ora 'āpī 'ina he hope'a ra'a va'ai e te 'Atua».

²¹ Mo haka tano ki tū me'e kī era e te merahi, 'i te pō era 'ā o te rua mahana, he oho ananake ki te Kona Ha'amuri 'Atua, he ha'amata he haka 'ite i rā me'e.

Te oromatu'a hope'a o te ra-rahi ananake ko te nu'u o muri he hā'aki ki te [nūna'a taŅata i a rāua te kī iŅa hope'a o te haka tere hūrio] 'e ki te nu'u pū'oko haka tere ta'ato'a o te itaraera mo taka-taka o rāua, 'e he uŅa mo ma'u i tū nā 'āpōtoro era mai roto i te hare ma'u'aurī.

²² I tu'u era te mūto'i o te Kona Ha'amuri 'Atua ki te hare ma'u'aurī, 'ina tū nu'u era o roto. He hoki ananake he hā'aki i tū parau 'āpī era ²³ he kī: «I tu'u

era a mātou ki te hare ma'u'aurī, e puru riva-riva nō 'ā te 'ōpani, 'e te 'auario e māroa rō 'ana 'i mu'a. 'E, i mā-taki era, 'ina e tahi nu'u o roto».

²⁴ I Ņaro'a era i rā me'e e te kape o te 'auario o te Kona Ha'amuri 'Atua 'e e te nu'u oromatu'a ra-rahi, he kī ki a rāua 'ā: «ĶPē hē ka hope'a ena te me'e nei?». ²⁵ 'I tū hora era 'ā he tu'u e tahi taŅata he kī: «Te nu'u puru era e kōrua 'i nei tako'a 'i te Kona Ha'amuri 'Atua e hāpī 'ā i te taŅata».

²⁶ He e'a ia te kape o te mūto'i ananake ko tā'ana va'e'au, he oho he 'a-'aru i rā nu'u. Kai tōtōā 'i te ri'a-ri'a 'o tama'i rō e te taŅata i a rāua hai mā'ea. ²⁷ I tu'u era he haka māroa 'i mu'a o te nūna'a taŅata i a rāua te kī iŅa hope'a o te haka tere hūrio, 'e he kī e te oromatu'a hope'a o te ra-rahi:

²⁸ —Ko kī atu 'ana a mātou mo ta'e hāpī haka 'ou o kōrua e tahi me'e o ruŅa i te taŅata era ko Ietū. 'E, Ķhe aha te kōrua me'e i aŅa? He 'ata haka 'ite he oho o ruŅa i a ia ki te taŅata ta'ato'a 'i nei 'i Hērutarema, 'e ko haŅa tako'a 'ana a kōrua mo tuhi mai i tō'ona mate ki a mātou.

²⁹ He pāhono e Pētero ananake ko te tētahi 'āpōtoro:

—'I ra'e a mātou ana ha'atura ki te 'Atua, ki te ha'atura ki te taŅata. ³⁰ Te 'Atua o te tātou tupuna ko haka ora 'ā i a Ietū tiŅa'i era e kōrua 'i ruŅa i te tātau-rō. ³¹ Ko haka nui-nui 'ā hai haka noho i a ia 'i tō'ona pā'iŅa mata'u pa he 'ariki 'e pa he kope haka e'a i te taŅata mai roto i te ūtu'a o te hara, mo hā'ū'ū ki te itaraera mo huri o te mana'u ki te 'Atua ki haka kore ai e ia i te rāua hara. ³² Ko 'ite riva-riva 'ana a mātou ko topa 'ā te nā me'e nei ki a Ietū. 'O ira e vānaŅa e haka 'ite nei e mātou ki te taŅata. 'E te Vārua Maitai, uŅa mai e te 'Atua ki te nu'u ha'atura ki a ia, e haka 'ite tako'a rō 'ā he parauti'a mau 'ā.

³³ I Ņaro'a era i te me'e nei e tū nu'u ra-rahi era, he 'ata riri rō atu 'ai, 'e he haŅa ananake mo tiŅa'i mo haka mate i tū nu'u era. ³⁴ 'I roto i rā nu'u te [fariseo] e tahi te 'iŅoa ko Kamariera. A ia he [ma'ori o te haka tere hūrio], 'e e mo'a rahi rō 'ā e te taŅata. He māroa he kī mo haka e'a 'iti-'iti i tū nā 'āpōtoro era mai rā kona. ³⁵ I oti era he kī ki tū tētahi nu'u ra-rahi era:

—E te itaraera ē, e u'i tātou i te me'e ka aŅa ena ki te nu'u era. ³⁶ Ka mana'u: ka hia rā nei matahiti a tu'a i ai rō te taŅata te 'iŅoa ko Teura, he kī nō te aŅa a ia he taŅata hōnui. E maha hānere taŅata i oho 'i muri i a ia. I tiŅa'i i haka mate era i rā taŅata, he maraŅa tahi te nu'u oho 'i muri. Pē ira i oti ai.

³⁷ »I oho haka 'ou mai era pe mu'a, 'i te nā mahana era o te haka pāpa'i mo tatakou o te nu'u, i ai rō te taŅata e tahi o Karirea te 'iŅoa ko Hura, 'e i oho rō te taŅata 'i muri. I tiŅa'i i haka mate era i rā kope, he maraŅa tako'a te nu'u oho o muri.

³⁸ »'O ira, ka haka rē kōrua i te nu'u ena; 'ina ko aŅa e tahi me'e. Mo ai he me'e o te taŅata, e Ņaro tahaŅa

nō; ³⁹ 'e mo ai he me'e o te 'Atua, e ko rē kōrua ki te hora hope'a. E u'i kōrua 'o anā i te me'e mo ta'e haka tano i te me'e haŋa o te 'Atua.

He haka roŋo e tū nu'u era. ⁴⁰ He raŋi mo ma'u haka 'ou i tū nā 'āpōtoro era, he haka tiŋa'i hai 'uaka, 'e he kī mo ta'e vānaŋa haka 'ou hai 'iŋoa o Ietū. I oti era he haka e'a.

⁴¹ He oho ia tū nā 'āpōtoro era mai mu'a o rā nu'u ko to'o 'ā te koa, he 'ite ko haka nui-nui 'ā a rāua e te 'Atua 'i te haka rē mo 'amo i te 'ati 'o te ai o rāua 'a Ietū.

⁴² 'E, ko te hāpī ko te oho iŋa 'ā ki te nu'u, te mahana te mahana 'i te Kona Ha'amuri 'Atua 'e 'i hare era 'i hare era, i te [roŋo riva-riva o ruŋa i a Ietū], te [Mētia].

He nāŋata mo hā'ū'ū ki te ['āpōtoro]

6 'I rā nā mahana ko 'ata rahi ko oho 'ā te nu'u [haka moe i te mana'u] 'i ruŋa i a Ietū. He ha'amata te nu'u [hūrio] vānaŋa [kirieko] he hēŋu'i-ŋu'i o ruŋa o te nu'u hūrio vānaŋa ['evereo] e kī era: 'i te hora tuha'a o te kai, 'ina he tuha'a riva-riva ki te rāua nā vi'e hove.

² He haka taka-taka ia e te 'āpōtoro i te nu'u ta'ato'a haka moe i te mana'u 'i ruŋa i a Ietū 'e he kī:

«E ko tano a mātou mo haka rē i te anā he haka 'ite i te vānaŋa o te 'Atua mo noho mo tuha'a i te kai 'e i te moni ki te taŋata. ³ 'O ira, e te nā taina ē, ka u'i a roto o kōrua e hitu taŋata riva-riva 'i te te pūai o te [Vārua Maitai] mo ma'u i te anā ena. ⁴ A mātou, pa'i, he ma'u i te anā he pure 'e he haka 'ite i te vānaŋa o te 'Atua».

⁵ Ta'ato'a i pe'e ai ki tū me'e kī era e te 'āpōtoro. He to'o i a 'Ēteva, taŋata haka moe rahi i tō'ona mana'u 'i ruŋa i a Ietū 'e 'i te te pūai o te Vārua Maitai, i a Feripe, i a Porokoro, i a Nikanoro, i a Tīmono, i a Paramena, 'e i a Nikorao, taŋata o Antiokia, he kona e tahi o te henua ko Tīria. A Nikorao 'i mu'a 'ā i o'o rō ki te haka tere iŋa hūrio. ⁶ He ma'u e tū nā taina era i rā nāŋata ki mu'a o te 'āpōtoro. He pure ia e te 'āpōtoro koia ko haka eke i te rima ki ruŋa 'e he ha'amaitai.

⁷ Te [roŋo riva-riva o te 'Atua] pe te 'ata rahi nō e oho era, 'e te nu'u haka moe i te mana'u 'i ruŋa i a Ietū ko 'ata rahi 'ā 'i Hērutarema. 'E me'e rahi [oromatu'a] hūrio i haka moe tako'a i te rāua mana'u 'i ruŋa i a Ietū.

He 'a-'aru iŋa i a 'Ēteva

⁸ A 'Ēteva, he taŋata ha'amaitai 'e 'i te te pūai o te 'Atua, e anā rō 'ā i te mana 'e i te tētahi me'e nu-nui ki te nu'u o rā kona. ⁹ Te tētahi nu'u o te [hare pure hūrio] te 'iŋoa «O te 'Ekaravo Haka E'a Mai te Rima o te Rāua Taŋata Haka Anā» koia ko te tētahi nu'u o Tīrene, o Arehantāria, o Tiritia 'e o 'Ātia, he tātake ki a 'Ēteva.

¹⁰ 'E, 'ina he rava'a i a ia; e vānaŋa era, pa'i, hai mārama-rama o te Vārua Maitai.

¹¹ He 'auhau ia e tū nā nu'u era i te taŋata mo reo-reo pē nei ē: ko ŋaro'a 'ana e rāua i a 'Ēteva e kī 'ā i te

vānaŋa ta'e tano mo [Mōtē] 'e mo te 'Atua. ¹² Pē ira i haka riri ai i te taŋata, i te nu'u pū'oko haka tere hūrio 'e i te [ma'ori o te haka tere hūrio]. 'O ira i 'a-'aru ai i a 'Ēteva 'e he ma'u ki mu'a o te [nūna'a taŋata i a rāua te kī iŋa hope'a o te haka tere hūrio]. ¹³ He ma'u tako'a i te mata'ite reo-reo, 'e o rā nu'u i kī: «Te taŋata ena he vānaŋa nō te anā i te vānaŋa ta'e tano mo te [Kona Ha'amuri 'Atua] 'e mo te hāpī 'a Mōtē. ¹⁴ Ko ŋaro'a 'ā e mātou e kī 'ana: te Ietū era o Nātāreta he haka hiŋa i te kona mo'a nei o te 'Atua 'e he huri tako'a i te hāpī haka rē mai e Mōtē».

¹⁵ Te nu'u ra-rahi 'e te nu'u ta'ato'a 'i tū kona era, i u'i era a ruŋa i a 'Ēteva, he take'a i te 'āriŋa pa he 'āriŋa merahi 'ā.

He tātara iŋa o 'Ēteva

7 He 'ui e te [oromatu'a hope'a o te ra-rahi] ki a 'Ēteva:

—Ā He parauti'a te me'e kī nei o ruŋa i a koe?

² He pāhono e 'Ēteva:

—E te taina ē, e kuā koro ē, ka haka roŋo mai rā: Te tātou 'Atua, i a ia te 'ana-'ana o te pūai ta'ato'a, ko haka take'a 'ana i a ia ki te tātou tupuna ko ['Aparahama] 'i Mētōpōtāmia, 'i te hora kai oho kai noho 'ā a 'Aparahama 'i Hārana, ³ 'e i kī rō: “Ka haka rē tu'u kāiŋa 'e tu'u hua'ai 'e ka oho ki te henua ka haka take'a atu ena e au”.

⁴ »He e'a ia a 'Aparahama mai te henua o te kārea he oho he noho 'i Hārana. 'I ira i mate ai tō'ona matu'a tane. He ma'u mai ia e te 'Atua i a 'Aparahama ki te henua nei e kōrua e noho atu ena.

⁵ »I tu'u mai era, kai va'ai e te 'Atua, 'i rā hora, e tahi parehe henua mō'ona, korohaŋa e tahi parehe 'iti-'iti. Ka ai atu pē ira, i hōrea rō e te 'Atua e va'ai rō ki a ia mo tō'ona hakaara. ('I rā hora kai ai 'ana te poki 'a 'Aparahama). ⁶ 'E i kī tako'a rō e te 'Atua: tō'ona hakaara e noho rō 'i te henua kē pa he taŋata o te rua henua, e riro rō he 'ekaravo o te nu'u o rā henua, 'e e rave'ino rō i a rāua e maha hānere matahiti.

⁷ »I kī tako'a rō pē nei ē: “E haka ūtu'a rō e au i te hau haka 'ekaravo i tō'oku taŋata. Ki oti rā ūtu'a, he e'a tō'oku taŋata mai rā henua mo tāvini mai ki a au 'i te kona nei”. ⁸ 'I te ha'a'au iŋa o te 'Atua ararua ko 'Aparahama, i kī ai e te 'Atua ki a 'Aparahama: mā'ana e hāpa'o i a ia 'e i tō'ona hakaara, 'e mo kuā 'Aparahama e ha'amuri 'e e ha'atura ki a ia. Pa he tāpa'o o rā ha'a'au he kī e te 'Atua: e hore te kiri o te kionoŋa o te nā poki mo tāpura he taŋata 'ā'ana.

»'O ira a 'Aparahama, 'i te va'u mahana o te poreko o tā'ana poki ko Ita'ata, i hore ai i te kiri o te kionoŋa. Pē ira tako'a i anā ai e Ita'ata ki tā'ana poki ko Hākovo, 'e e Hākovo ki tā'ana nā poki, he matu'a o te ho'e 'ahuru mā piti hua'ai o te itaraera.

⁹ »Te nā poki ra'e 'a Hākovo, 'i te mākota 'i te rāua taina ko [Kōsē], he to'o mai he ho'o ki te nu'u mo

'ekaravo, 'e he ma'u e rā nu'u ki Ehipto. 'E, 'i te ai 'i ruŋa i a Kōsē te mata o te 'Atua, ¹⁰ he haka e'a te anā i a ia mai roto i te 'ati ta'ato'a 'e he va'ai i te mārama-rāma. 'O ira te 'ariki o Ehipto i haŋa ai ki a Kōsē, he haka suerekao 'e he haka riro he pū'oko haka tere o tō'ona me'e ta'ato'a.

¹¹ »He topa ia te oŋe 'e te 'ati 'i Ehipto 'e 'i [Kana'ana]: he kore te me'e mo kai o te tātou tupuna. ¹² I 'ite era a Hākovo ko Ehipto te kona i ha'aputu i te kai, he uŋa i tā'ana nā poki, he tupuna o tātou, mo oho mo ho'o mai hai kai. He oho iŋa ra'e nei o rāua.

¹³ »I te rua oho iŋa ki Ehipto i haka 'ite iho ai a Kōsē ki tō'ona taina ko ai mau a ia, 'e pē ira te 'ariki i 'ite ai he aha te hau o Kōsē. ¹⁴ I oho era he uŋa e Kōsē mo oho o tō'ona matu'a 'e o tō'ona hua'ai ta'ato'a. Rā nā nu'u e hitu 'ahuru mā pae. ¹⁵ Pē ira a Hākovo i tu'u i noho ai 'i Ehipto; 'i ira i mate ai, 'e 'i ira tako'a i māmate ai tā'ana nā poki, tupuna o tātou. ¹⁶ Te hakari o Hākovo i ma'u i hoki rō ki Tikeme; 'i ira i tanu ai 'i te henua ho'o e 'Aparahama mai te nā poki 'a 'Āmoro.

¹⁷ »I hāhine era mo tano o te hōrea kī e te 'Atua ki a 'Aparahama, ko 'ata rahi 'ana te itaraera 'i Ehipto. ¹⁸ He o'o ia te 'ariki 'āpī o rā henua ta'e māhani ki a Kōsē. ¹⁹ Te 'ariki nei i tōtōā rō i te tātou taŋata; 'i te haŋa mo haka kore i a rāua, he haka hoa i te nā poki poreko iho mo mā-mate.

²⁰ »I rā noho iŋa i poreko ai a [Mōtē], poki hope'a o te nehe-nehe. E toru 'āva'e i na'a i hāpa'o ai 'i te hare. ²¹ I tu'u era te mahana 'ina he rāve'a toe mo na'a mo oho nō i tū poki era 'i ira, he ma'u he na'a 'i te kona kē. He rava'a ia e te poki vahine o te 'ariki 'e he hāpa'o pa he poki mau 'ā 'ā'ana. ²² Pē ira a Mōtē i hāpī ai hai haka tere iŋa o te ehipto, 'e he riro he taŋata hōnu'i 'i tā'ana me'e anā 'e 'i tā'ana me'e kī.

²³ »I tano era te maha 'ahuru matahiti o Mōtē, he oho he u'i i tō'ona hau, he itaraera. ²⁴ I take'a era e tōtōā 'ā e te ehipto i te itaraera e tahi, he to'o mai he tiŋa'i he haka mate i tū ehipto era. ²⁵ Ki tō'ona mana'u e anī-anī rō e tō'ona taina he itaraera: hai ia te 'Atua ka haka e'a era i a rāua mai roto i te 'ati, 'e 'ina kai anī-anī.

²⁶ »I te rua mahana, he take'a e Mōtē e rua itaraera e moto 'ā. 'I te haŋa mo ta'e moto haka 'ou o rā nāŋata he kī: "He taina kōrua; ħhe aha rā e moto ena?". ²⁷ Te kope era 'ā'ana te 'ata pu'a i te rua he tonu i a Mōtē 'e he kī: "ħ'A 'ai koe i haka pū'oko o mātou? ²⁸ ħE haŋa 'ā koe mo tiŋa'i mo haka mate mai i a au pa he tiŋa'i iŋa ō'ou i tū ehipto era o 'aŋataiahi?".

²⁹ »I ŋaro'a era e Mōtē i rā vānaŋa he ri'a-ri'a. He e'a he tere ki te rua henua te 'iŋoa ko Mariana. 'I ira i noho ai, he [hāipo-ipo] 'e he poreko e rua 'ā'ana poki.

³⁰ »Ko rava'a 'ā ka maha 'ahuru matahiti 'i ira he haka take'a te merahi i a ia ki a Mōtē 'i te kona 'one ta'e noho taŋata hāhine ki te ma'uŋa ko [Tinai], 'i roto i te ura ahi o te tumu e hū rō 'ā. ³¹ He māere a Mōtē 'i tū me'e era 'e he haka hāhine mo u'i riva-riva. He ŋaro'a i te re'o o te 'Atua ka kī ki a ia: ³² "A au he 'Atua o tu'u tupuna. He 'Atua o 'Aparahama, o Ita'ata 'e o Hākovo".

»He rurū ia a Mōtē 'i te ri'a-ri'a, 'e 'ina he haŋa mo u'i. ³³ He kī e te 'Atua: "Ka patu tu'u kiriva'e; te kona ena koe e māroa ena kona mo'a. ³⁴ Ko take'a 'ana e au te mamae 'e te māui-ui o tō'oku taŋata ta'ato'a 'i Ehipto. Ko ŋaro'a tako'a 'ana e au i te rāua taŋi. 'O ira a au i topa mai nei mo haka e'a i a rāua mai te rāua 'ati. 'E 'i a au he uŋa i a koe ki Ehipto".

³⁵ »Ko te Mōtē ta'e haŋa era nei e te itaraera, 'ui era: "ħ'A 'ai koe i haka pū'oko o mātou?", ko ia te kope i uŋa e te 'Atua mo pū'oko haka tere o te itaraera 'e mo haka e'a i a rāua mai roto i te 'ati hai merahi haka take'a i a ia 'i roto i te ura ahi. ³⁶ 'Ā'ana i to'o i te tātou tupuna mai Ehipto i anā i te mana 'i rā henua, 'i te kona ko Vaikava Mea-mea 'e pē ira 'ana 'i te kona 'one ta'e noho taŋata 'i roto i te maha 'ahuru matahiti o rāua 'i ira.

³⁷ »Ko te Mōtē mau nei 'ā te me'e kī era ki te itaraera: "E ha'ata'a rō e te 'Atua mai roto i a kōrua e tahi perofeta pa he ha'ata'a iŋa nei i a au". ³⁸ 'E, tako'a, hora era 'ā 'i te kona 'one ta'e noho taŋata te itaraera, ko Mōtē te me'e i vānaŋa ararua ko te merahi 'i ruŋa i te ma'uŋa ko Tinai 'e i ma'u i te vānaŋa ki te tātou tupuna. Ki a Mōtē e haka 'ite era e te merahi i te vānaŋa o te 'Atua va'ai i te ora 'ina he hope'a ra'a mo haka 'ite mai ki a tātou ki te itaraera.

³⁹ »'E, te tātou tupuna 'ina he haŋa mo ha'atura ki a Mōtē; he riri nō te anā mō'ona, 'e te me'e haŋa he hoki haka 'ou o rāua ki Ehipto. ⁴⁰ Hora era ō'ona 'i ruŋa i te ma'uŋa i kī ai e te tupuna ki a [Ārone], taina o Mōtē: "Ka anā hai 'atua mo haka tere i a tātou. Kai 'ite mai, pa'i, ko aha 'ā a Mōtē".

⁴¹ »He anā ia i te 'atua tu'u pa he tēnero. He tūtia 'e he anā i te ŋoŋoro ki rā 'atua, 'e he koa 'i tū me'e anā era. ⁴² 'O ira te 'Atua i hāru'i ai i te itaraera hai tua'ivi 'e he haka rē mo ha'amuri ki te ra'ā, ki te māhina 'e ki te hetu'u ha'ariro e rāua he 'atua. Pē nei, pa'i, e pāpa'i ena 'i ruŋa i te puka o te perofeta:

"E te itaraera ē,

'i roto i te maha 'ahuru matahiti o kōrua 'i te kona 'one ta'e noho taŋata,

ħi tiŋa'i rō kōrua i te 'animare mo tūtia mai?

⁴³ 'Ina. Te me'e nō o kōrua i anā

he ma'u i te karapā pure o te 'atua reo-reo ko Mo-roko,

'e i te 'ītoro tu'u pa he hetu'u ko Rēfana,

'ītoro anā e kōrua mo ha'amuri.

'O ira a au ka to'o ena i a kōrua mai te kōrua henua ka hoa ena ki rā atu era o [Vāvīrōnia]."

⁴⁴ »I te hora era o te tātou tupuna 'i te kona 'one ta'e noho taŋata, e ai rō 'ana te rāua [Karapā Mo'a] haka anā e te 'Atua ki a Mōtē pa he me'e haka take'a e ia, mo haka mana'u ki tō'ona taŋata: a ia 'i muri i a rāua. ⁴⁵ O te tātou tupuna i ma'u mai i rā karapā ki nei 'i te hora tu'u mai ananake ko kuā [Kosue] to'o i te henua nei mai te rima o te hau i he-he'i e te 'Atua. I noho ai rā karapā 'i nei 'ātā ki te ta'u o te 'ariki era ko [Tāvita], ⁴⁶ kope 'i ruŋa i a ia te mata o te 'Atua.

»He ani e Tāvita ki te 'Atua mo ha'ati'a i a ia mo haka tu'u i te hare e tahi mo ha'amuri o rāua o te hakaara o Hākovo ki a ia. ⁴⁷ I hope'a ai, 'a [Toromono], poki 'a Tāvita, i anā i te Kona Ha'amuri 'Atua.

⁴⁸ »Te parauti'a, 'ina he noho te 'Atua i te hare anā hai rima o te taŋata. Pē nei, pa'i, e hā'aki ena 'i ruŋa i te puka pāpa'i e te perofeta:

⁴⁹ "Te raŋi he pepe ō'oku,
'e te henua he kona raŋo o tō'oku va'e.
¿Pē hē ia te hare ka anā mai ena mō'oku?, i 'ui ai e te 'Atua,
¿hē te kona mo haka ora ō'oku?
⁵⁰ ¿Ta'e 'ō 'ā'aku i anā i te me'e ta'ato'a ena?"

⁵¹ Ko te vānaŋa iŋa 'ana ia a 'Ēteva he me'e:

—E te pū'oko hio-hio ē, 'ina kōrua he haŋa mo haka roŋo 'e mo ha'atura ki te 'Atua, pa he nu'u ta'e 'ite ko ai te 'Atua parauti'a. Te anā o kōrua he anā i te me'e ta'e tano ki te [Vārua Maitai]. Te kōrua huru pa he huru 'ā o te kōrua tupuna. ⁵² ¿Ko ai o roto o te perofeta ta'ato'a i ta'e tōtōā e te kōrua tupuna? 'Ātā ko tiŋa'i ko haka mate 'ana e rāua i te nu'u vānaŋa o ruŋa i te tu'u iŋa mai o te taŋata anā i te me'e tī-tika 'e 'ina he hape, 'e ko tu'u mai 'ā rā taŋata.

»I tu'u mai era, he to'o mai e kōrua he va'ai ki te rima o te nu'u ta'e haŋa ki a ia 'e he haka tiŋa'i he haka mate. ⁵³ Ki a kōrua i haka 'ite atu ai e te merahi i te roŋo o te 'Atua; 'e, 'ina kōrua he ha'atura ki rā roŋo.

He mate iŋa o 'Ēteva

⁵⁴ I ŋaro'a era i te me'e ta'ato'a nei e rā nu'u, he ŋuŋu te niho mo 'Ēteva. ⁵⁵ 'E, a 'Ēteva, ko 'i 'ana e te pūai o te Vārua Maitai, he u'i a te raŋi he take'a i te 'ana-'ana o te 'Atua 'e i a Ietū e māroa rō 'ana 'i te pā'iŋa mata'u. ⁵⁶ He kī ia: «¿Ē, ka u'i rā kōrua! 'Ī e take'a mai nei i te raŋi e ha-hata rō 'ā, 'e i te [Poki o te taŋata] 'i te pā'iŋa mata'u o te 'Atua».

⁵⁷ 'O ŋaro'a i tū vānaŋa era, he puru tū nu'u era i te rāua tariŋa hai rima 'e he ohu-ohu mo haka pōŋeha. He moko ananake he 'a-'aru i a 'Ēteva. ⁵⁸ He to-toi he oho mai tū kona era 'e he tama'i hai mā'ea. Tū nu'u mata'ite reo-reo era ki te kope 'āpī te 'iŋoa ko Sauro i haka hāpa'o ai i te rāua paratoa.

⁵⁹ E tama'i era i a 'Ēteva hai mā'ea 'ai e pure era: «E Ietū ē, ka to'o koe i tō'oku vārua». ⁶⁰ He tū-turi ia he ohu pūai: «¿E Ietū, 'ina koe ko tapa atu i te hara nei o te nu'u nei!».

I oti era te kī i te me'e nei, he mate.

8 'E a Sauro e pe'e rō 'ā ki tū me'e anā era ki a 'Ēteva.

He kimi iŋa o Sauro i te nu'u mo tōtōā

He ha'amata ia, 'i rā mahana mau 'ā, he kimi mo tōtōā i te nu'u [haka moe i te mana'u] 'i ruŋa i a Ietū o Hērutarema. Pē ira rā nu'u i maraŋa ai ki kona era ki kona era o Hūrea 'e o [Tāmāria]; he [l'āpōtoro] nō te

nu'u i ta'e oho mai ira. ² O te ŋāŋata mo'a 'e ha'atura i te 'Atua i ma'u i tanu i a 'Ēteva koia ko taŋi ki a ia.

³ 'E a Sauro e kimi 'ana i te nu'u haka moe i te mana'u 'i ruŋa i a Ietū mo tōtōā. Ki hare era, ki hare era, e uru e to-toi era i te taŋata 'e i te vi'e mo haka puru 'i roto i te hare ma'u'aurī.

He haka 'ite iŋa i te vānaŋa o te 'Atua 'i Tāmāria

⁴ Te nu'u tē-tere era mai Hērutarema he haka 'ite i te [roŋo riva-riva o te 'Atua] ki te nu'u o te kona ta'ato'a o rāua e tu'u era. ⁵ A Feripe, he kope e tahi o rā nu'u. 'Ā'ana i oho ki Tāmāria, 'e 'i ira i ha'amata i vānaŋa ai o ruŋa i te [Kiritō].

⁶ I rahi rō te taŋata i taka-taka ai 'e i haka roŋo ai hai māhatu i te vānaŋa 'a Feripe, he take'a i te mana anā era ia. ⁷ Me'e rahi taŋata uru e te tātane i haka ora e Feripe, i kiki-kikiu i e'a ai rā ŋā tātane. 'E, tako'a, me'e rahi nu'u hakari ta'e makenu 'e va'e koke i haka ora e ia. ⁸ Hai me'e nei i 'ata koa ai te taŋata o rā kona.

⁹ I ai rō 'i ira e tahi taŋata te 'iŋoa ko Tīmona. Te anā 'ā'ana 'i mu'a 'ā he tahu-tahu 'e he reo-reo ki te taŋata o Tāmāria pē nei ē: a ia he taŋata hōnui. ¹⁰ Mai te nu'u ta'e hōnui ki te nu'u hōnui e haka roŋo riva-riva era i tā'ana vānaŋa koia ko kī: «Ko te kope kī era nei "he pūai mau 'ā o te 'Atua"».

¹¹ Ko rahi 'ana te matahiti e anā e oho era i te tahu-tahu 'e he māere te taŋata 'i rā me'e. 'O ira e haka roŋo era ki a ia. ¹² I ha'amata i haka moe era te nu'u i te rāua mana'u 'i ruŋa i te roŋo riva-riva haka 'ite e Feripe o te [haka tere iŋa 'āpī o te 'Atua] 'e o ruŋa o Ietū Kiritō, mai te vi'e ki te taŋata i haka [papatito] ai i a rāua.

¹³ Rā taŋata era ko Tīmona i haka moe tako'a rō i tō'ona mana'u 'i ruŋa i a Ietū, i haka papatito rō i a ia 'e i oho rō 'i muri i a Feripe koia ko māere 'i te mana take'a e ia.

¹⁴ I 'ite era te 'āpōtoro 'i Hērutarema ko to'o 'ana te nu'u o Tāmāria i te vānaŋa o te 'Atua mo rāua, he uŋa ki ira i te 'āpōtoro era ko Pētero ararua ko [Iovani]. ¹⁵ I tu'u era he pure mo te nu'u haka moe i te mana'u 'i ruŋa i a Ietū mo noho o te [Vārua Maitai] 'i roto i a rāua. ¹⁶ Te nu'u nei ko papatito 'ā hai 'iŋoa o Ietū Kiritō 'i te hora haka moe i te mana'u 'i ruŋa i a ia, 'e te Vārua Maitai kai topa 'ā ki ruŋa i a rāua. ¹⁷ He haka eke ia a Pētero 'e a [Iovani] i te rāua rima ki te pū'oko, 'e pē ira i topa ai te Vārua Maitai 'i ruŋa i a rāua.

¹⁸ I take'a era e Tīmona hai haka eke o te 'āpōtoro i te rima ki ruŋa i te taŋata he va'ai e te 'Atua i te Vārua Maitai, he haka toro i te moni ki a kuā Pētero ¹⁹ 'e he kī:

—Ka ho'o mai kōrua i te mana ena ki topa tako'a ai te Vārua Maitai ki ruŋa i te kope nō era mo haka eke ō'oku i te rima.

²⁰ He pāhono e Pētero:

—Ka oho kōrua ko tu'u moni ki roto i te pō'auahi 'o te mana'u ō'ou mo ho'o i te me'e va'ai e te 'Atua! ²¹ E ko tano mo ai i a koe te me'e nei; ki te mata o te 'Atua me'e māhatu ta'e tano koe. ²² Ka haka rē tu'u mana'u ta'e tano 'e ka pure ki te 'Atua koi'ite e haka kore rō e ia i tu'u hara 'o te mana'u pē nā. ²³ E u'i atu ena, pa'i, a au ko here 'ana tu'u māhatu e te me'e ta'e tano.

²⁴ He kī e Tīmona:

—Ka pure ia ki te 'Atua mo ta'e topa mai te 'ati kī mai ena e kōrua.

²⁵ I oti era o kuā Pētero te vānaŋa o ruŋa i a Ietū 'e te haka 'ite i te roŋo riva-riva o te 'Atua 'i rā kona, he haka 'ite he oho tako'a i te roŋo o te 'Atua 'i te me'e rahi nō atu kona o Tāmāria, 'e 'ai ka hoki ka oho ararua ki Hērutarema.

Ko Feripe 'e he taŋata e tahi o Etiopia

²⁶ I oti era te me'e nei, he kī e te merahi ki a Feripe: «Ka e'a koe ka oho ki te ara oho mai Hērutarema ki Kasa». Te ara nei e vari era a roto i te kona 'one ta'e noho taŋata.

²⁷ He e'a a Feripe he oho; 'i rā ara he piri ki te taŋata etiopia e tahi. A ia he taŋata ra-rahi hāpa'o moni o te 'ariki vahine o Etiopia. Rā kope, mai te ha'amuri iŋa ki te 'Atua 'i Hērutarema, ²⁸ e hoki e oho 'ā 'i ruŋa i te pere'oa ki tō'ona henua koia ko tai'o i te puka o te perofeta era ko 'Itaia.

²⁹ He kī ia e te Vārua Maitai ki a Feripe: «Ka oho koe ka haka hāhine ki te pere'oa era». ³⁰ I hāhine era a Feripe, he ŋaro'a e tai'o 'ā tū taŋata etiopia era i te puka 'a 'Itaia. He 'ui ia:

—ĶE aŋi-aŋi rō 'ā e koe i ta'a me'e e tai'o ena?

³¹ He pāhono e tū taŋata era:

—ĶPē hē a au ana aŋi-aŋi 'ina he taŋata mo ha'aau-ra'a mai?

He kī ia ki a Feripe mo eke mo noho 'i muri i a ia.

³² Te kona o rā puka e tai'o era he kona kī:

«I ma'u ai i a ia pa he māmoe ki te kona tiŋa'i mā-moe;

'e pa he māmoe 'iti-'iti haka kiva-kiva 'i mu'a o te nu'u varu māmoe, kai rere te re'o.

³³ I haka ha'amā rō i a ia 'e ta'e hai parauti'a i ture ai. ĶMā 'ai e vānaŋa o ruŋa o tō'ona hakaara? Ko to'o 'ā, pa'i, i a ia mai ruŋa 'i te henua nei».

³⁴ He 'ui ia e tū taŋata etiopia era ki a Feripe:

—Ka kī mai koe, Ķo ruŋa i a ai e vānaŋa nei te perofeta: o ruŋa ō'ona mau 'ā 'o o ruŋa o te rua taŋata?

³⁵ He ha'amata ia a Feripe he haka 'ite, mai tū kona tai'o mau era 'ā, i te [roŋo riva-riva o ruŋa i a Ietū]. ³⁶ E oho nō 'ā a te ara, he tu'u ki te kona vai e tahi 'e he kī e tū taŋata etiopia era:

—Nā te vai nā. ĶE ai rō 'ā hō te me'e mo ta'e ha'ati'a mo papatito i a au?

[³⁷ He kī e Feripe:

—Mo haka moe parauti'a ō'ou i tu'u mana'u 'i ruŋa i a Ietū, 'ina he me'e mo ta'e ha'ati'a atu.

He pāhono e tū taŋata era:

—Mō'oku a Ietū Kiritō he Poki o te 'Atua.]

³⁸ He kī mo haka noho i tū pere'oa era. He topa ararua ki raro, he oho he uru ki roto i te vai, 'e he papatito e Feripe. ³⁹ I e'a era mai roto i te vai, he to'o e te Vārua o te 'Atua i a Feripe, 'e 'ina kai take'a haka 'ou e tū taŋata era. Rā kope, ko to'o atu 'ā te koa, he e'a he oho rō 'ai.

⁴⁰ I hope'a ai, 'i te kona ko 'Āsoto i topa ai a Feripe, 'e ki kona era, ki kona era e hāpī e oho era i te roŋo riva-riva o ruŋa i a Ietū 'ātā ka tu'u rō ki Tētārea.

He huri iŋa o te mana'u o Sauro

(Aŋa o te 'Āpōtoro 22.6-16; 26.12-18)

9 A Sauro ia he haka ri'a-ri'a te aŋa hai mate i te nu'u [haka moe i te mana'u] 'i ruŋa i a Ietū. 'O ira i oho ai ki te [oromatu'a hope'a o te ra-rahi] ² kī mo va'ai hai parau mo haka take'a ki te nu'u pū'oko haka tere o te [hare pure hūrio] ta'ato'a o Rāmako e hā'aki rō 'ana 'i ruŋa ko ha'ati'a 'ā i a ia mo 'a-'aru i te taŋata 'e i te vi'e o rā kona ma'u i te [Ara 'Āpī] hāpī e Ietū mo ma'u ki Hērutarema mo puru.

³ He e'a ia he oho a Sauro ki Rāmako. I hāhine era ki ira, he pura e tahi mōrī mai te raŋi he haka mā'eha ka vari rō i a ia. ⁴ He hiŋa a Sauro, 'e he ŋaro'a i te re'o e tahi e kī 'ā:

—E Sauro, e Sauro, Ķhe aha koe e kimi mai ena i a au mo tōtōā?

⁵ He 'ui e Sauro:

—ĶKo ai koe?

He pāhono e tū re'o era:

—Ko Ietū, kope mau ena 'ā e koe e kimi ena mo tōtōā. ⁶ Ka e'a ki ruŋa ka oho ki Rāmako; 'i ira ka kī atu ena i ta'a me'e mo aŋa.

⁷ Te nu'u oho 'i muri i a Sauro ko ri'a-ri'a atu 'ana 'i te ŋaro'a i tū re'o era 'e 'i te ta'e take'a ko ai te me'e i vānaŋa. ⁸ He e'a ia a Sauro ki ruŋa. I 'ara era te mata, 'ina kai take'a haka 'ou. He 'a-'aru e tū nu'u era a te rima he ma'u he oho ki Rāmako. ⁹ I ira i noho ai e toru ma-

hana 'ina e tahi me'e take'a, 'ina e tahi me'e kai, 'e 'ina e tahi me'e unu.

¹⁰ I Rāmako e noho era e tahi taŋata haka moe i te mana'u 'i ruŋa i a Ietū te 'iŋoa ko 'Ānānia. Ki a ia i vānaŋa ai e Ietū, 'i roto i te me'e tu'u pa he moe vārua haka take'a e te 'Atua, he kī:

—ĪE 'Ānānia!

He pāhono:

—Ī a au, e Ietū ē.

¹¹ He kī e Ietū:

—Ka e'a koe ka oho ki te ara te 'iŋoa ko Tī-tika, 'e 'i te hare o Hura ana 'ui ki te nu'u o ira ki te taŋata o Taraso te 'iŋoa ko Sauro. 'Ai a ia e pure 'ā, ¹² 'e 'i roto i te me'e haka take'a e te 'Atua i take'a ai i a koe, e 'Ānānia ē, e uru e haka eke 'ā i te rima ki ruŋa i a ia mo mā'eha o te mata mo take'a haka 'ou.

¹³ I ŋaro'a era e 'Ānānia i te me'e nei, he kī:

—E Ietū, ko rahi 'ana te nu'u i vānaŋa mai o ruŋa i te taŋata ena 'e o te me'e ta'e tano ta'ato'a aŋa e ia ki tu'u taŋata 'i Hērutarema. ¹⁴ 'E hora ena, nā ko tu'u mai 'ā ki nei hai parau o te ŋā oromatu'a ra-rahi era mo 'a-'aru mo haka puru i te nu'u ta'ato'a ha'amuri ki a koe.

¹⁵ He kī haka 'ou e Ietū:

—Ka oho nō koe. Ko ha'ata'a 'ana e au i te taŋata era mo vānaŋa o ruŋa i a au ki te nu'u o te rua henua, ki te rāua 'ariki 'e pē ira tako'a 'ā ki te itaraera. ¹⁶ E haka take'a rō e au i te rahi o te 'ati ka topa ena 'i ruŋa i a ia 'o te haka 'ite 'o te oho o ruŋa i a au.

¹⁷ He e'a ia he oho a 'Ānānia ki tū hare era 'i ira a Sauro. I uru era he haka eke i tō'ona rima ki ruŋa he kī: «E te taina, ko uŋa mai 'ana a au e Ietū take'a era e koe 'i te ara, mo haka ora atu i tu'u mata 'e mo 'i ō'ou e te pūai o te [Vārua Maitai]».

¹⁸ 'I tū hora mau era 'ā he vī-viri te me'e tu'u pa he 'ūnahi mai te mata o Sauro, 'e he take'a haka 'ou. He e'a ki ruŋa he haka [papatito] i a ia. ¹⁹ I oti era he kai 'e he haŋu haka 'ou. He noho ia 'i Rāmako 'i muri i te nu'u haka moe i te mana'u 'i ruŋa i a Ietū.

He tātara iŋa o Sauro 'i Rāmako

²⁰ Pē ira a Sauro i ha'amata i haka 'ite ai 'i roto i te hare pure hūrio o rā kona: a Ietū he Poki o te 'Atua. ²¹ Te nu'u ŋaro'a he māere tahi 'e he kī: «ĪTa'e 'ō a ia he taŋata kimi i te nu'u o Hērutarema ha'amuri ki a Ietū mo tōtōā? ĪTa'e 'ō ko ia mau 'ā te me'e oho mai era mo 'a-'aru i te nu'u ha'amuri ki a Ietū mo va'ai ki te ŋā oromatu'a ra-rahi era?».

²² 'E a Sauro pe te 'ata haŋu nō e vānaŋa e haka aŋi-aŋi era: a Ietū he [Kiritō], 'e, 'i te tano o tā'ana vānaŋa, te [hūrio] o Rāmako 'ina he rava'a i te vānaŋa mo pāhono.

He tere iŋa o Sauro mai te hūrio

²³ Ko rahi 'ā te mahana o Sauro 'i Rāmako, he ha'a'au te nu'u hūrio ra-rahi o ira mo tiŋa'i mo haka mate, ²⁴ 'e he 'ite e Sauro. Ka pō ka 'ōtea e noho era rā nu'u 'i te 'ōpani ta'ato'a o Rāmako mo rava'a e rāua. ²⁵ 'O ira i ha-ha'o ai i a ia e tā'ana nu'u hāpī ki roto i te kānato nui-nui 'e he haka topa 'i te pō ki haho o te 'āua ruŋa nui puru o Rāmako. Pē ira a Sauro i tere ai.

A Sauro 'i Hērutarema

²⁶ He oho ia a Sauro ki Hērutarema. I tu'u era he haŋa mo piri ki te nu'u haka moe i te mana'u 'i ruŋa i a Ietū. 'E, rā nu'u e ri'a-ri'a rō 'ana i a Sauro. Mo rāua ta'e he taŋata haka moe parauti'a i te mana'u 'i ruŋa i a Ietū.

²⁷ Ka ai atu pē ira, i ma'u nō e Verenāvē i a Sauro he haka māhani ki te ['āpōtoro]. He 'a'amu pē hē a Sauro i take'a ai i a Ietū 'i te ara 'e pē hē i vānaŋa ai a Ietū ki a ia, 'e he 'a'amu tako'a pē hē a Sauro i vānaŋa ai hai pūai o ruŋa i a Ietū 'i Rāmako.

²⁸ He noho ia a Sauro 'i Hērutarema 'i muri i rā nu'u, 'e hai pūai e vānaŋa era o ruŋa i a Ietū. ²⁹ I vānaŋa 'e i tātake rō a Sauro ananake ko te tētahi hūrio vānaŋa [kirioko], 'e rā nu'u e u'i rō 'ā i te rāve'a mo tiŋa'i mo haka mate. ³⁰ I aŋi-aŋi era e te nu'u haka moe i te mana'u 'i ruŋa i a Ietū i tū me'e era, he ma'u i a Sauro ki Tētārea, 'e mai ira i haka oho ai ki Taraso.

³¹ 'I rā hora, 'i te ta'e kimi haka 'ou e te taŋata mo tōtōā, he ŋaro'a te ora e te nu'u haka moe i te mana'u 'i ruŋa i a Ietū o te kona ta'ato'a o Hūrea, o Karirea 'e o [Tāmāria], 'e he haka hio-hio he oho i te rāua mana'u 'i ruŋa i a Ietū. He mo'a nō te aŋa i te 'Atua, 'e, hai hā'ū'ū o te Vārua Maitai, e 'ata rahi e oho era a rāua.

He ora iŋa o te māui-ui o 'Ēnea

³² A Pētero e oho era ki kona era ki kona era u'i i te nu'u haka moe i te mana'u 'i ruŋa i a Ietū. 'I tō'ona ara he hipa tako'a ki Rira. ³³ 'I ira i take'a ai i te taŋata ko 'Ēnea, ka va'u matahiti o te moe 'i ruŋa i te ro'i 'ina he makenu te hakari.

³⁴ He kī e Pētero: «E 'Ēnea, ka e'a koe ki ruŋa ka hēriki tu'u ro'i. Ko haka ora 'ā koe e Ietū».

'I tū hora 'ā i e'a ai a 'Ēnea ki ruŋa. ³⁵ He take'a e te nu'u ta'ato'a o Rira 'e o Tārone, 'e he haka moe tahi rō 'ai i te mana'u 'i ruŋa i a Ietū.

He haka ora iŋa o Pētero i a Rorokā

³⁶ 'I te kona e tahi ko Hope i ai rō te vi'e haka moe i te mana'u 'i ruŋa i a Ietū te 'iŋoa ko Tavitā, 'i te vānaŋa kirioko ko Rorokā. Te aŋa o te vi'e nei he hā'ū'ū i te nu'u veve 'e i te tētahi nu'u. ³⁷ 'E, 'i te ŋā mahana era 'i Rira a Pētero, he māui-ui tū vi'e era ko Rorokā he

mate. He haro'i e te nu'u i tō'ona hakari 'e he ma'u he haka rē 'i roto i te piha e tahi o ruņa.

³⁸ Te kona nei ko Hope e hāhine rō 'ā ki Rira. I 'ite era e te nu'u haka moe i te mana'u 'i ruņa i a Ietū: 'i rā kona a Pētero, he uņa e rua taņata mo kī: «Ka horo-horou koe ka oho mai ki Hope».

³⁹ He oho a Pētero 'i muri. I tu'u era he uņa ki roto i te piha 'i ira tū hakari era. Te nā vi'e hove o roto he haka vari tahi i a Pētero 'e, e ta-taņi nō 'ā, he haka take'a i te kahu aņa e Rorokā mo tuha'a ki te nu'u.

⁴⁰ He haka e'a tahi e Pētero ki haho, 'e he tū-turi he pure. He u'i a ruņa i tū vi'e mate era he kī: «jE Tavitā, ka e'a koe ki ruņa!».

He 'ara te mata o tū vi'e era. I take'a era i a Pētero, he e'a ki ruņa he noho. ⁴¹ He 'a-'aru e Pētero a te rima he haka māroa. He ohu ki te nu'u haka moe i te mana'u 'i ruņa i a Ietū 'e ki tū nā vi'e hove era, he haka take'a ko ora haka 'ou 'ā a Tavitā.

⁴² Te me'e nei i 'ite rō e te nu'u ta'ato'a o Hope, 'e me'e rahi taņata i haka moe i te mana'u 'i ruņa i a Ietū.

⁴³ A Pētero i rahi rō te mahana i noho ai 'i Hope 'i te hare o te taņata aņa kiri e tahi te 'iņa ko Tīmona.

Ko Pētero ararua ko Koronerio

10 'I te kona ko Tētārea e noho era te taņata e tahi te 'iņa ko Koronerio, he kape o te va'ehau rō-mano kī Nūna'a Va'ehau o 'Ītāria. ² Rā kope he taņata mo'a 'e ha'atura ki te 'Atua, 'e ananake ko te nu'u ta'ato'a o tō'ona hare e ha'amuri e ha'ahana-hana era ki te 'Atua. 'E, tako'a, e hā'ū'ū rō 'ana hai moni mo te [hūrio], 'e e pure rō 'ā ki te 'Atua.

³ E tahi mahana pe te hora toru o te ahi-ahi, he take'a i te me'e i haka take'a e te 'Atua: he merahi e tahi e uru 'ā ki te kona 'i ira a ia 'e he kī: «jE Koronerio!». ⁴ He noho he u'i a Koronerio ki tū merahi era koia ko ri'a-ri'a 'e he 'ui: «jHe aha rā ta'a me'e haņa?».

He kī e te merahi:

«Ko nāro'a 'ana e te 'Atua i ta'a pure 'e e take'a rō 'ana i tu'u hā'ū'ū iņa ki te veve. ⁵ Ka uņa hai taņata ki Hope mo kī ki te taņata e tahi te 'iņa ko Tīmona, kī tako'a ko Pētero, mo oho mai. ⁶ Nā e noho rō 'ā 'i te hare o te taņata aņa kiri te 'iņa tako'a ko Tīmona, tō'ona hare 'i te taha-taha tai».

⁷ I e'a i oho era te merahi, he raņi e Koronerio ki tā'ana nāņata aņa e rua 'e ki te va'ehau e tahi hā'ū'ū ki a ia, mo'a 'e ha'atura ki te 'Atua. ⁸ He 'a'amu i tū me'e ta'ato'a era, 'e he uņa ki Hope.

He me'e haka take'a e te 'Atua ki a Pētero

⁹ 'I te rua mahana, pe te hora kai, tū nu'u era ko te oho iņa 'ā 'i te rāua ara 'e ko hāhine 'ā ki Hope. A Pētero ia ko eke 'ā ki ruņa i te kona haka ora o ruņa i te hare mo pure. ¹⁰ He maruaki 'e he pohe mo kai. Te nu'u o rā hare e tunu 'ā i te kai.

E tunu nō 'ana rā nu'u i te kai, he take'a e Pētero i te me'e i haka take'a e te 'Atua: ¹¹ te ha-hata iņa o te raņi

'e te topa iņa o te me'e tu'u pa he tāvana e here-here rō 'ā a ha-hā pini hai taura. ¹² 'I roto i rā me'e rauhuru huru o te 'animare, ki te haka tere iņa o te hūrio, e ko tano mo kai e rāua. ¹³ He nāro'a ia i te re'o ka kī: «E Pētero, ka tiņa'i e tahi o te nā 'animare ena, 'ai ka kai rō».

¹⁴ He pāhono e Pētero: «Kai kai 'ana a au i te me'e ta'e ha'ati'a ki a mātou ki te hūrio mo kai».

¹⁵ He kī haka 'ou e tū re'o era: «Te me'e kī e te 'Atua e tano rō 'ā ta'e mo kī e koe he me'e ta'e tano».

¹⁶ E toru topa iņa o tū me'e era. I oti era he nāro mau rō 'ai ki te raņi.

¹⁷ E noho e mana'u nō 'ā a Pētero he aha te ha'au-ra'a o tū me'e take'a era e ia, i tu'u rō ai tū nu'u uņa era e Koronerio ki te 'ōpani o tū hare era o Tīmona. I 'ite ai 'i hē rā hare i 'ui-'ui. ¹⁸ I tu'u era i ohu i 'ui ai hoki 'i ira e noho era a Tīmona, kī tako'a ko Pētero.

¹⁹ E mana'u nō 'ana a Pētero o ruņa i tū me'e take'a era e ia, i kī rō ai e te [Vārua Maitai]: «Nā te taņata e toru e kimi 'ana i a koe. ²⁰ Ka e'a koe ki ruņa, ka topa. 'Ina ko 'aka-'aka tu'u mana'u. E oho koe 'i muri i a rāua; 'ā'aku te nu'u ena i uņa atu».

²¹ He topa ia a Pētero he kī ki tū nu'u era:

—Ki a au kōrua e 'ui ena. jHe aha te kōrua me'e haņa i a au?

²² He pāhono e tū nu'u era:

—A mātou o te kape va'ehau ko Koronerio i uņa mai. A ia he taņata aņa i te me'e tī-tika, ha'amuri ki te 'Atua 'e te hūrio e haņa rahi rō 'ā ki a ia. O te merahi e tahi i kī mo uņa mai ki a koe, mo oho o'ou ki tō'ona hare mo haka roņo atu o'ona i ta'a me'e ka kī ena.

²³ He haka uru ia e Pētero i tū nu'u era ki roto i te hare, 'e 'i ira i haka ha'uru ai 'i rā pō. 'I te rua mahana, he oho a Pētero 'i muri i rā nu'u, 'e pē ira 'ana te tētahi nu'u o Hope [haka moe i te mana'u] 'i ruņa i a Ietū.

He vānaņa iņa o Pētero ki a kuā Koronerio

²⁴ I tu'u era 'i te rua mahana ki Tētārea, e tiaki 'ā ki rā nu'u a Koronerio ananake ko tō'ona hua'ai 'e repahoa o'ona uņa e ia mo oho ki tō'ona hare. ²⁵ I tu'u era a Pētero ki rā hare, he e'a a Koronerio, he 'aroha 'e he noi he tū-turi 'i mu'a mo ha'amuri. ²⁶ He haka māroa e Pētero 'e he kī: «Ē, he taņata tako'a a au pē koe 'ā».

²⁷ E vānaņa nō 'ā ararua i o'o ai ki roto i te hare. He take'a e Pētero ko te nu'u rahi e taka-taka rō 'ana.

²⁸ He kī:

—Ko 'ite 'ana a kōrua: te mātou haka tere iņa 'ina he ha'ati'a i te hūrio mo piri ki te hau kē 'o mo uru ki te rāua hare. 'E, te 'Atua ko haka aņi-aņi mai 'ā: 'ina a au ko u'i i te taņata o te hau kē pa he taņata ta'e tano mo repahoa o'oku. ²⁹ 'O ira, i kī mai era e ia mo oho mai o'oku, he oho mai a au. 'E hora nei, ko haņa 'ana a au mo 'ite he aha kōrua i uņa atu ai.

³⁰ He pāhono e Koronerio:

—Ka hā mahana a tu'a, pa he hora mau nei 'ā, 'i nei a au 'i tō'oku hare e pure 'ā i te pure o te hora toru o te ahi-ahi, he take'a e au e tahi taŋata e uru rō 'ana i te kahu ko 'uira atu 'ā. ³¹ He kī mai: “E Koronerio, ko ŋaro'a 'ana e te 'Atua i ta'a pure, 'e e mana'u rō 'ana i ta'a me'e aŋa mo hā'ū'ū ki te nu'u veve. ³² Ka uŋa ki te kona era ko Hope mo kī mo oho mai o te taŋata e tahi te 'iŋoa ko Tīmona, kī tako'a ko Pētero. Nā e noho rō 'ā 'i te hare o te kope aŋa kiri te 'iŋoa tako'a ko Tīmona, tō'ona hare 'i te taha-taha tai”.

³³ »'O ira a au i uŋa atu ai 'i rā hora mau 'ā mo oho mai ō'ou, 'e he riva ō'ou, a koe i oho mai ena. 'I tātou ta'ato'a 'i te hora nei 'i mu'a i te 'Atua, 'e e haŋa rō 'ā a mātou mo haka roŋo atu i te me'e ta'ato'a kī atu e ia mo haka 'ite mai e koe ki a mātou.

³⁴ He ha'amata ia a Pētero he vānaŋa:

—Hora nei ko 'ite 'ana a au 'ina he 'Atua he u'i i te taŋata hoki he hūrio 'o ta'e he hūrio; mō'ona te hau ta'ato'a pē tū huru tahi 'ā. ³⁵ Te taŋata o te henua ta'ato'a ha'amuri ki a ia 'e aŋa i te me'e riva-riva e tano rō 'ā ki tō'ona mata.

³⁶ »Te 'Atua i haka 'ite rō mai ki a mātou ki te itaraera o ruŋa i te rāve'a pē hē ana riva-riva haka 'ou te taŋata ki a ia hai Ietū Kiritō, he Pū'oko Haka Tere o te ta'ato'a nō taŋata. ³⁷ A kōrua ko 'ite 'ā o ruŋa i te me'e i topa 'i te kona ta'ato'a o te mātou henua. I ha'amata ai 'i Karirea 'i te hora ko oti 'ā te kī e [Iovani] mo [papatito] o te taŋata. ³⁸ Ko 'ite tako'a 'ana a kōrua pē hē te 'Atua i va'ai ai i te Vārua Maitai 'e i te pūai ki a Ietū era o Nātāreta, 'e pē hē e aŋa e oho era i te me'e riva-riva, e haka ora e oho era i te nu'u ta'ato'a māui-ui 'i a Rukifero. Te me'e nei i aŋa ai e Ietū 'i te me'e era 'i muri i a ia te 'Atua.

³⁹ »'E a mātou he mata'ite o te me'e ta'ato'a aŋa e Ietū 'i Hērutarema 'e 'i te tētahi kona o Itaraera. I oho era he tiŋa'i he haka mate e te nu'u i veo 'i ruŋa i te tā-taurō. ⁴⁰ 'I te toru mahana i haka ora ai e te 'Atua, 'e he haka take'a mai ki a mātou. ⁴¹ Kai haka take'a ki te taŋata ta'ato'a, ki a mātou nō ki te nu'u ko ha'ata'a era 'ā e te 'Atua mo mata'ite i haka take'a mai ai. I kai rō 'e i unu rō mātou 'i te hora era ko ora mai 'ā mai te mate. ⁴² 'E ko uŋa mai 'ā i a mātou mo haka 'ite ki te taŋata ko va'ai 'ā e te 'Atua i te parau ki a ia mo ture ki te nu'u ora 'e ki te nu'u mate.

⁴³ »Te perofeta ta'ato'a o mu'a 'ā ko vānaŋa era 'ana o ruŋa i a Ietū, 'e ko kī era 'ā: hai me'e ka aŋa era e ia, te hara o te nu'u ta'ato'a haka moe i te mana'u 'i ruŋa i a ia ka haka kore ena e te 'Atua.

He topa iŋa o te Vārua Maitai

⁴⁴ E vānaŋa nō 'ā a Pētero i topa ai te Vārua Maitai ki ruŋa i te nu'u ta'ato'a o te hare o Koronerio haka roŋo i tā'ana vānaŋa. ⁴⁵ Te nu'u hūrio haka moe i te mana'u 'i ruŋa i a Ietū tu'u 'i muri i a Pētero he māere 'o te

topa o te Vārua Maitai 'i ruŋa i te nu'u ta'e he hūrio. ⁴⁶ He ŋaro'a e vānaŋa 'ana hai 'arero huru kē huru kē 'e e ha'ahana-hana 'ana ki te 'Atua.

⁴⁷ He kī ia e Pētero: «'E ai rō 'ā hō te me'e mo ta'e ha'ati'a mo papatito i te nu'u nei? 'I, pa'i, ko va'ai tako'a 'ana ki a rāua i te Vārua Maitai pē tātou 'ā».

⁴⁸ 'E he kī mo papatito i tū nu'u era hai 'iŋoa o Ietū Kiritō, mo haka 'ite ko haka moe 'ā i te mana'u 'i ruŋa i a Ietū. I oti era he ani e rā nu'u ki a Pētero mo 'ata noho 'i muri i a rāua.

He hoki iŋa o Pētero ki Hērutarema

11 He 'ite ia te nu'u [l'āpōtoro] ananake ko te nu'u [hūrio] [haka moe i te mana'u] 'i ruŋa i a Ietū o Hūrea i tū parau 'āpī era: te nu'u ta'e he hūrio ko to'o 'ā 'e ko ma'u tako'a 'ā mo rāua i te vānaŋa o te 'Atua. ² I hoki haka 'ou era a Pētero ki Hērutarema, he ture e te tētahi hūrio haka moe i te mana'u 'i ruŋa i a Ietū. ³ He 'ui:

—'E aha rō koe i oho i uru ai ki roto i te hare o te nu'u ta'e he hūrio, 'e i kai ai 'i muri?

⁴ He 'a'amu ia e Pētero mai te ha'amata o tū me'e ta'ato'a topa era:

⁵ —'I Hope a au e pure 'ā i take'a ai e au i te me'e haka take'a mai e te 'Atua: he me'e tu'u pa he tāvana e here-here rō 'ā a ha-hā pini hai taura ka topa mai mai ruŋa i te raŋi ki tū kona era 'i ira a au. ⁶ He u'i riva-riva a au ki te me'e 'i roto, he take'a mai ta'ato'a nō huru o te 'animare, ki te haka tere iŋa o tātou, e ko tano mo kai. ⁷ 'E he ŋaro'a e au i te re'o ka kī mai: “E Pētero, ka e'a ki ruŋa, ka tiŋa'i e tahi o te ŋā 'animare ena, 'ai ka kai rō”.

⁸ »He pāhono e au: “Kai kai 'ana a au i te me'e ta'e ha'ati'a ki a mātou ki te hūrio mo kai”.

⁹ »I oho era he vānaŋa haka 'ou mai tū re'o era mai te raŋi: “Te me'e kī atu e te 'Atua e tano rō 'ā, ta'e mo kī e koe he me'e ta'e tano”.

¹⁰ »E toru topa iŋa o te me'e nei. I oti era he ŋaro mau rō 'ai ki te raŋi. ¹¹ 'I rā hora i tu'u atu ai ki te hare 'i ira a au te ŋāŋata hoko toru uŋa mai ki a au mai Tētārea. ¹² O te [Vārua Maitai] i kī mai: “'Ina ko 'aka-'a-ka tu'u mana'u. Ka oho koe 'i muri i te ŋāŋata ena”. I oho rō atu 'i muri i a au te ŋā taina nei hoko ono.

»I tu'u era ki Tētārea he uru a mātou ki roto i te hare o te taŋata 'ā'ana i uŋa atu ki a au. ¹³ He 'a'amu mai pē hē a ia i take'a ai 'i roto i tō'ona hare i te merahi e tahi e māroa rō 'ā 'ai ka kī ki a ia: “Ka uŋa hai taŋata ki te kona era ko Hope mo kī ki a Tīmona, kī tako'a ko Pētero, mo oho mai. ¹⁴ Mā'ana e kī atu pē hē a koe 'e te nu'u ta'ato'a o tu'u hare ana e'a mai te ūtu'a o te hara 'e ana rava'a i te ora 'āpī 'ina he hope'a ra'a va'ai e te 'Atua”.

¹⁵ »I ha'amata i vānaŋa era a au, he turu mai te Vārua Maitai ki ruŋa i a rāua pa he topa iŋa mai era ki ruŋa i a tātou 'i mu'a 'ā. ¹⁶ He topa mai ia te mana'u ki tū

me'e kī mai era e Ietū: "He anjī mau 'ā a [Iovani] e [papatito] era hai vai, 'e a kōrua he papatito e te 'Atua hai Vārua Maitai".

¹⁷ »Mo ai ia ko va'ai tako'a 'ana e te 'Atua ki te nu'u era i te me'e va'ai mai e ia ki a tātou, ki te hūrio haka moe i te mana'u 'i ruŋa i a Ietū Kiritō, ʒko ai a au mo haka noho i te me'e anjā e te 'Atua?

¹⁸ I ŋaro'a era e te taina ta'ato'a o Hērutarema i te ŋā me'e nei, 'ina kai ai haka 'ou te vānaŋa mo kī 'e he ha'amata he haka nui-nui i te 'Atua e kī era: «Kō te riva i te 'Atua i va'ai tako'a ai ki te nu'u ta'e he hūrio i te rāve'a mo huri o te mana'u ki a ia 'e mo rava'a e rāua i te ora 'āpī 'ina he hope'a ra'a!».

Te nu'u taina o Antiokia

¹⁹ 'I te kimi mo tōtōā i te nu'u haka moe i te mana'u 'i ruŋa i a Ietū ki oti mai te mate era o 'Ēteva, i maraŋa ai mai Hūrea te tētahi o rā nu'u ki Fenitia, ki te motu ko Tīpere 'e ki Antiokia. 'I rā ŋā kona i haka 'ite i oho ai i te [roŋo riva-riva o te 'Atua] ki te nu'u hūrio nō.

²⁰ Ka ai atu pē ira, tētahi nu'u o Tīpere 'e o Tīrene haka moe i te mana'u 'i ruŋa i a Ietū, i tu'u era ki Antiokia, he haka 'ite he oho tako'a i te roŋo riva-riva o ruŋa o Ietū Kiritō ki te nu'u ta'e he hūrio. ²¹ 'I ruŋa i rā nu'u tu'u era te pūai o te 'Atua, 'e me'e rahi nu'u o ira i haka rē i te haka tere iŋa o rāua 'e he haka moe i te mana'u 'i ruŋa i a Ietū.

²² 'I 'ite era i rā parau 'āpī e te nu'u o Hērutarema haka moe i te mana'u 'i ruŋa i a Ietū, he uŋa i a Verenāvē ki Antiokia. ²³ 'I tu'u era he take'a pē hē i ha'amaitai ai e te 'Atua i rā nu'u. He to'o rō atu 'ai te koa 'e he haka haŋu he oho i rā nu'u mo haka hio-hio mo oho nō i te mana'u 'i ruŋa i a Ietū. ²⁴ A Verenāvē he taŋata riva, ko 'T'ana e te pūai o te Vārua Maitai 'e e haka moe rahi rō 'ana i te mana'u 'i ruŋa i a Ietū. 'O ira me'e rahi haka 'ou nu'u i haka moe tako'a i te mana'u 'i ruŋa i a Ietū.

²⁵ Mai Antiokia i oho ai a Verenāvē kimi i a Sauro 'i Taraso. ²⁶ 'I rava'a era he hoki ararua ki Antiokia. 'I ira i noho ai e tahi matahiti 'i muri i te nu'u haka moe i te mana'u 'i ruŋa i a Ietū e hāpī 'ana me'e rahi nō atu nu'u. 'E, 'i ira 'i Antiokia, i nape iho ai i te nu'u hāpī 'a Ietū he [kiritiano].

²⁷ 'I rā ŋā mahana, i oho ai te tētahi nu'u perofeta mai Hērutarema ki Antiokia. ²⁸ E tahi o roto o rāua te 'Iŋoa ko Ākapo, hai pūai o te Vārua Maitai, i e'a i kī ai e topa rō te oŋe 'i te henua ta'ato'a. Te 'ati nei i topa ai 'i te ta'u o te 'ariki rōmano ko Karaurio.

²⁹ Te nu'u haka moe i te mana'u 'i ruŋa i a Ietū o Antiokia he haŋa mo hā'ū'ū ki te taina o Hūrea hai tara ai nō o rāua. ³⁰ Pē ira i anjā ai, 'e he va'ai i tū tara era ki te rima o Verenāvē ararua ko Sauro mo ma'u mo va'ai ki te nu'u pū'oko haka tere o te nūna'a taŋata haka moe i te mana'u 'i ruŋa i a Ietū o Hūrea.

He mate o [Tanatiako] 'e he puru iŋa o Pētero

12 'I rā noho iŋa, he ha'amata he haka kimi e te 'ariki ko ['Erore 'Akiripa] i te nu'u [haka moe i te

mana'u] 'i ruŋa i a Ietū mo tōtōā. ² He kī mo tiŋa'i mo haka mate hai hoe i a Tanatiako, taina o [Iovani]. ³ 'I u'i era ko koa 'ana te nu'u [hūrio] ra-rahi 'i te mate o Tanatiako, he haka 'a-'aru tako'a i a Pētero. Te me'e ta'ato'a nei i topa ai 'i te ŋā mahana era o te [ŋoŋoro kai i te haraoa 'ina he revaura].

⁴ 'I 'a-'aru era i a Pētero, he haka puru e 'Erore 'i roto i te hare ma'u'aurī 'e he haka 'auario hai nūna'a va'e-hau e hā, e hā va'ehau ka tahi nūna'a. Te mana'u: ki oti te ŋoŋoro o te Pakate ana ture 'i mu'a i te taŋata ta'ato'a. ⁵ A Pētero ia 'i roto i te hare ma'u'aurī e 'auario rō 'ā e te va'ehau, 'e te nu'u haka moe i te mana'u 'i ruŋa i a Ietū hai māhatu e pure era mō'ona.

He haka e'a iŋa o te merahi i a Pētero

⁶ 'I te pō era mo 'ōtea ki te mahana mo ma'u i a Pētero e 'Erore ki mu'a i te taŋata, 'i vāeŋa o te va'e-hau e rua e ha'uru 'ā a Pētero, e here rō 'ā ki ruŋa i rā ŋā va'ehau hai vivi. Te tētahi va'ehau e 'auario 'ana 'i te 'ōpani o te hare ma'u'aurī.

⁷ He māroa ia te merahi e tahi 'i roto i tū hare ma'u'aurī era 'e he mā'eha tahi. He haka puā ki a Pētero a te kao-kao, he haka 'ara, he kī: «Kā e'a koe ki ruŋa 'i te hora mau ena 'ā!». 'I tū hora 'ā he pāko'o-ko'o 'e he vī-viri te vivi mai te rima o Pētero.

⁸ He kī haka 'ou e rā merahi: «Ka uru riva-riva tu'u kahu, 'e 'ai ka uru rō tu'u kiriva'e». Pē ira a Pētero i anjā ai 'e he kī haka 'ou e rā merahi: «Ka uru tu'u paratoa 'e 'ai ka oho rō mai».

⁹ He oho ia a Pētero 'i muri i tū merahi era, 'ina he anjā-anjā hoki he parauti'a 'o he me'e haka take'a nō e te 'Atua tū me'e era. ¹⁰ He vari ararua a muri i te nu'u 'auario ra'e, 'e a muri o te rua nu'u 'auario 'ātā ka tu'u rō ki te 'ōpani o te ara anjā hai 'aurī. 'I tu'u era he hahata tū 'ōpani era e ia 'ā. He e'a he oho ararua a te ara. Ko roa 'iti 'ā he ŋaro tū merahi era 'e he topa a Pētero hoko tahi nō.

¹¹ He anjā-anjā ia e Pētero 'e he kī ki a ia 'ā: «'Ā! Ko 'ite 'ana 'ō a au 'i te hora nei ko uŋa mau mai 'ā e te 'Atua i tā'ana merahi mo haka e'a i a au mai te rima o 'Erore 'e mai te me'e rake-rake ta'ato'a haŋa e te nu'u hūrio ra-rahi mo anjā mai ki a au».

¹² 'I anjā-anjā era e Pētero i tū me'e era, he oho ki te hare o [Māria], matu'a o Iovani, kī tako'a ko Marko. 'I ira e taka-taka rō 'ana me'e rahi nu'u e pure 'ā. ¹³ He pātōtō a Pētero i te 'ōpani o te ara. He e'a te vi'e tāvini e tahi te 'iŋoa ko Rore mo 'ui ko ai rā me'e. ¹⁴ 'I te ŋaro'a o Pētero te re'o, he koa rō atu 'ai. Kai mātaki i te 'ōpani, 'e a roto i te hare i tahuti i hoki ai, 'ai ka kī: «'Ai a Pētero 'i te 'ōpani».

¹⁵ He kī e tū nu'u era: «KīĒ, ko ma'a-ma'a 'ā koe!». 'Ai tū vi'e era e kī era he parauti'a 'e 'ai tū nu'u era e kī era: «Tā'e ko ia, koi'ite he merahi hāpa'o i a ia».

¹⁶ A Pētero ia ko te pātōtō iŋa 'ana i te 'ōpani. 'I māta-ki era, he take'a ko ia mau 'ā 'e he māere rō atu 'ai ananake.

¹⁷ He ha'aaura'a e Pētero hai rima mo mo-mou, 'e he 'a'amu pē hē i haka e'a ai i a ia e te 'Atua mai roto i te

hare ma'u'aurī, 'ai ka kī: «E 'a'amu kōrua i te me'e nei ki a Tanatiako † 'e ki te tētahi atu taina o tātou». I oti era he e'a he oho a Pētero ki te rua kona.

¹⁸ I 'ōtea era he mira-mira te mana'u o te nā va'ehau 'auario era i a Pētero 'i te ta'e anjī-anjī 'i hē a ia. ¹⁹ He uŋa e 'Erore he haka kimi. 'I te ta'e rava'a, he anjā i te ture mo rā nā va'ehau 'ai ka haka ma'u ka haka tiŋa'i mo mate.

I oti era te me'e nei, he e'a a 'Erore mai Hūrea, he oho ki Tētārea, 'e 'i ira i noho ai.

He mate iŋa o 'Erore 'Akiripa

²⁰ Te 'ariki ko 'Erore e riri rō 'ā mo te nu'u o Tiro 'e o Tirone, 'e te nu'u o rā nā kona he u'i nō te anjā i te rāve'a mo haka kore i te riri; mai te henua o rā 'ariki, pa'i, e rava'a era e rāua i te me'e mo kai.

He haka māhani ia rā nu'u i a rāua ki te taŋata rarahi anjā ki rā 'ariki te 'iŋoa ko Vāratu ki riva ai mo hā'ū'ū ki a rāua. Pē ira a Vāratu i vānaŋa ai ki te 'ariki o ruŋa i rā nu'u 'e he ani hai mahana mo taka-taka ananake. ²¹ He hā'aki ia e 'Erore 'i te mahana.

I tano era rā mahana he uru i tō'ona kahu ŋoŋoro, he noho 'i ruŋa i tō'ona pepe 'ariki o roto i te hare ture 'e he tātara ki te nu'u. ²² He ha'amata te taŋata he ohu-ohu: «iTe kope ena e vānaŋa mai ena ta'e he taŋata, he 'atua!». ²³ 'I rā hora mau 'ā he haka māui-ui i a 'Erore e te merahi e tahi, 'o te ha'ati'a i te taŋata mo ha'ahana-hana ki a ia 'e ta'e ki te 'Atua, 'e kai roa i mate ai i kai e te o'i-o'i.

²⁴ 'E te roŋo riva-riva ia o te 'Atua pe te 'ata rahi nō e haka 'ite e oho era ki te kona ta'ato'a.

²⁵ A Verenāvē ararua ko Sauro, i oti era te rāua anjā 'i Hērutarema, he hoki he oho ki Antiokia. 'I muri i a rāua i oho ai a Iovani, kī tako'a ko Marko.

He uŋa iŋa i a Sauro 'e i a Verenāvē

13 'I roto i te nūna'a taŋata o Antiokia [haka moe i te mana'u] 'i ruŋa i a Ietū te perofeta 'e te ma'ori hāpī: ko Verenāvē, ko Tīmona, kī tako'a ko 'Uri-uri, ko Rūtio o Tīrene, ko Sauro, 'e ko Menaheme, hāŋai e te matu'a o ['Erore Antipa]. (O te 'Erore nei te haka tere a Karīrea).

² 'I te mahana e tahi, e ha'amuri nō 'ā ananake ki te 'Atua 'e e tapu 'ana i te kai, he kī e te [Vārua Maitai]: «Ka ha'ata'a kōrua i a Verenāvē ararua ko Sauro; e ai rō 'ā tā'aku anjā mo rāua».

³ I oti era te pure 'e te tapu i te kai, he haka eke i te rima ki ruŋa i te pū'oko o Verenāvē 'e o Sauro 'e he ha'amaitai. I oti era he haka oho.

'I Tīpere a Verenāvē 'e a Sauro

⁴ He oho ia a Verenāvē ararua ko Sauro ki Tereutia, i uŋa e te Vārua Maitai. 'I ira i eke ai ki ruŋa i te pahī mo oho ki te motu ko Tīpere. ⁵ I tu'u era ki Taramina, he kona o Tīpere, he ha'amata he haka 'ite i te [roŋo riva-

† Te TANATIAKO nei he taina o Ietū, 'e he pū'oko haka tere o te nu'u haka moe i te mana'u 'i ruŋa i a Ietū o Hērutarema 'i rā hora.

riva o te 'Atua] 'i te [hare pure hūrio] ta'ato'a o ira. I oho tako'a rō a [Iovani] 'i muri i a rāua mo hā'ū'ū.

⁶ Ki te kona ta'ato'a o tū motu era i oho ai 'ātā ka tu'u rō ki te kona te 'iŋoa ko Pafo. 'I ira i take'a ai i te taŋata tahu-tahu [hūrio] te 'iŋoa ko Vara Ietū, he perofeta reo-reo e tahi. ⁷ Te tahu-tahu nei he repahoa o te suerekao ko Serhio Pauro, taŋata mārama-rama. He uŋa e nei suerekao mo kī mo oho o Verenāvē ararua ko Sauro 'i te haŋa mo haka roŋo i te roŋo riva-riva o te 'Atua.

⁸ Tū taŋata tahu-tahu era, 'i te [kirieko] te 'iŋoa ko Erima, 'ina he haŋa mo haka moe o te suerekao i te mana'u 'i ruŋa i a Ietū. 'O ira i u'i ai i te rāve'a 'o haka roŋo e te suerekao i te vānaŋa o kuā Sauro. ⁹ A Sauro, kī tako'a ko Pauro, ko 'ī 'ā e te pūai o te Vārua Maitai, he noho he u'i riva-riva a ruŋa i rā tahu-tahu ¹⁰ he kī: «iE te poki 'a Rukiferō, 'ī e te reo-reo, e te me'e rake-rake, 'e ta'e haŋa ki te ta'ato'a me'e riva-riva ē! iHe aha koe e haka pōteko-teko ena i te ara o te 'Atua?

¹¹ Nā he haka ūtu'a i a koe e te 'Atua 'i te hora ena: he keva tu'u mata, 'e e ko take'a haka 'ou e koe i te mā'e-ha o te ra'ā 'ātā ki te mahana haŋa e te 'Atua».

'I tū hora mau era 'ā he pōhāhā te mata o tū taŋata era ko Erima. 'I te ta'e take'a, he hāhā he oho mā 'ai e ma'u i a ia.

¹² I take'a era e te suerekao i tū me'e topa era, he haka moe i tō'ona mana'u 'i ruŋa i a Ietū koia ko māere 'i te me'e hāpī e kuā Sauro o ruŋa i a Ietū.

'I Antiokia a Pauro ararua ko Verenāvē

¹³ He eke ia a Pauro ananake ko te nu'u o muri i a ia ki ruŋa i te pahī 'e he oho mai Pafo ki Perehē, he kona e tahi o Panafiria. 'I ira i haka rē ai e Iovani i rā nu'u 'e he hoki he oho ki Hērutarema. ¹⁴ Mai Perehē i hipa ai a kuā Pauro ki Antiokia, he kona e tahi o Pitiria.

'I ira, 'i te [mahana haka ora], he uru ki roto i te hare pure hūrio he no-noho. ¹⁵ I oti era te tai'o i te kona o ruŋa o te puka pāpa'i e [Mōtē] 'e i te kona o te puka pāpa'i e te perofeta, he kī e te nu'u pū'oko haka tere o tū hare pure era: «E kuā taina, mo ai o te kōrua me'e mo kī mo haka pūai i te mana'u o te nu'u nei, ka vānaŋa».

¹⁶ He māroa ia a Pauro, he ha'aaura'a hai rima mo mo-mou o tū nu'u era, 'e he kī:

«Ka haka roŋo mai kōrua, e te itaraera 'e e te nu'u ta'e he hūrio mo'a i te 'Atua ē. ¹⁷ Te 'Atua o mātou o te itaraera i ha'ata'a rō mā'ana i te mātou tupuna, i haka rahi rō 'e i haka pūai rō i a rāua 'i te hora noho pa he hau kē 'i Ehipto. 'E hai pūai ō'ona i haka e'a ai i a rāua mai rā henua.

¹⁸ »I ha'aoroma'i nō te 'Atua i te me'e rake-rake anjā e rāua e maha 'ahuru matahiti 'i roto i te kona 'one ta'e noho taŋata, ¹⁹ 'e e hitu hau o te henua ko [Kana'ana] i haka kore e ia mo va'ai i rā henua mo te tātou tupuna. ²⁰ Te me'e ta'ato'a nei i topa ai 'i roto i te maha hānere pae 'ahuru matahiti.

»I oti era he va'ai e te 'Atua hai taŋata mo pū'oko haka tere o rāua 'ātā ki te ta'u o te perofeta era ko [Tamuere].²¹ He no-no'i ia e rā nu'u hai 'ariki mo haka tere i a rāua. He va'ai e te 'Atua i a Sauro, poki 'a Kisi o te mata o [Mēhāmina], mo 'ariki e maha 'ahuru matahiti.

²² »I oho era he haka e'a e te 'Atua i a Sauro 'e he haka 'ariki i a [Tāvita]. 'E mo Tāvita i kī ai e te 'Atua: "A Tāvita, poki 'a Hētē, he kope e tano rō 'ā ki tō'oku mata; e aŋa rō i tā'aku me'e haŋa ta'ato'a".²³ Mai i a Tāvita i haka ara ai a Ietū. A ia he kope hōrea 'e uŋa mai era e te 'Atua mo haka e'a i a tātou mai roto i te ūtu'a o te hara.

²⁴ »Kai ha'amata kai hāpī 'ā e Ietū i te taŋata i haka 'ite rō ai e Iovani i te roŋo o te 'Atua ki te itaraera ta'ato'a e kī era: e [huri te mana'u ki te 'Atua] 'e e haka [papatito].²⁵ I hāhine era a Iovani mo haka mao i rā aŋa, he kī: "Ta'e ko au te taŋata ena e kōrua e mana'u ena. Nā e tu'u rō mai e tahi kope 'ata hau rō atu ki a au, 'ātā e ko tano a au ni mo kume nō i te hau o tō'ona kiriva'e".

²⁶ »E tō'oku taina haka ara tako'a mai i a [Aparahama] 'e e te taŋata o te rua henua mo'a i te 'Atua ē: te roŋo riva-riva o te e'a iŋa o te taŋata mai roto i te ūtu'a o te hara 'e te rava'a iŋa i te ora 'āpī 'ina he hope'a ra'a mo tātou ta'ato'a.²⁷ Te hūrio noho 'i Hērutarema, 'e te nu'u ra-rahi o rāua, 'ina kai aŋi-aŋi ko ai mau a Ietū, 'e 'ina kai aŋi-aŋi tako'a i te vānaŋa pāpa'i e te perofeta tai'o 'i roto i te hare pure hūrio 'i te mahana haka ora. Pē ira, 'i te hora haka ūtu'a i a Ietū i haka tano ai e rāua i te me'e haka 'ite e te perofeta 'i mu'a 'ā.²⁸ Ka ai atu 'ina e tahi hape i rava'a mo haka ūtu'a i a Ietū hai mate, i kī nō e rā nu'u ki a Pirato mo tiŋa'i.²⁹ 'E, i oti tahi era te aŋa i te me'e kī o ruŋa ō'ona 'i ruŋa i te [Pāpa'i Mo'a], he haka topa mai ruŋa i te tātaurō, he ma'u he tanu.³⁰ 'E, te 'Atua ko haka ora 'ā i a ia mai te mate.³¹ I rahi rō te mahana o Ietū i haka take'a i a ia ki te nu'u oho ananake mai Karirea ki Hērutarema. 'E, hora nei, ko rāua te mata'ite haka 'ite o ruŋa i a ia ki te taŋata ta'ato'a.

³² »'E 'i e mātou e haka 'ite atu ena ki a kōrua i te roŋo riva-riva nei: te hōrea kī era e te 'Atua ki te mātou tupuna, he hūrio,³³ 'i ko haka tano 'ā 'i te tātou ta'u nei hai haka ora e ia i a Ietū mai te mate. 'I te puka o te hīmene 'i te rua hīmene i pāpa'i ai o ruŋa i te me'e nei pē nei ē:

"A koe he poki 'ā'aku;
'e 'i te hora nei ko haka 'ite mau 'ā e au
ko au tu'u Matu'a".

³⁴ »Te 'Atua ko haka 'ite era 'ā e haka ora rō e ia i a Ietū 'o piro te hakari, 'i te hora kī 'i ruŋa i te Pāpa'i Mo'a:

"E aŋa rō e au 'i ruŋa i a koe
te me'e kī e au ki a Tāvita".

³⁵ »E hā'aki tako'a rō 'ana 'i ruŋa i te Pāpa'i Mo'a te vānaŋa nei:

"E ko ha'ati'a e koe mo piro
i te hakari o tu'u tāvini ha'ata'a 'e ha'atura ki a koe".

³⁶ »A Tāvita, pa'i, i tāvini rō ki te 'Atua 'i tō'ona noho iŋa. I oti era he mate 'e he tanu, pa he oho iŋa o tō'ona tupuna, 'e tō'ona hakari i piro rō.³⁷ 'E, te hakari o te kope haka ora era e te 'Atua mai te mate 'ina kai piro.

³⁸⁻³⁹ »'O ira, e kuā taina ē, e 'ite: hai Ietū e haka kore ena e te 'Atua i te hara. Te nu'u ta'ato'a haka moe i te mana'u 'i ruŋa i a Ietū, he nu'u tano ki te mata o te 'Atua, 'e, ko haka kore 'ā e ia i te rāua hara, he me'e ta'e rava'a hai ha'atura ki te [haka tere iŋa 'a Mōtē].⁴⁰ E hāpa'o 'o topa rō atu 'i ruŋa i a kōrua te me'e pāpa'i e te perofeta pē nei ē:

⁴¹ "Ka haka roŋo mai, e te nu'u haka ka-kata 'i te me'e kī e te 'Atua ē,
e māere rō 'e e mā-mate rō kōrua.
'I te kōrua noho iŋa, e aŋa rō e au i te me'e, ka 'a'a-mu atu ena e te nu'u,
he mana'u kōrua ta'e he parauti'a".

⁴² I oti era te vānaŋa 'a Pauro, he e'a mai roto i te hare pure ananake ko te nu'u oho 'i muri i a ia. He ani e nu'u era e nu'u era hoki e tano rō mo vānaŋa haka 'ou ō'ona o ruŋa 'i rā me'e 'i te mahana haka ora o te rua tāpati.⁴³ I maraŋa era te taŋata mai te hare pure, me'e rahi nu'u hūrio 'e nu'u ma'u tako'a i te haka tere iŋa hūrio i oho 'i muri i a Pauro ararua ko Verenāvē. 'E he hatu e kuā Pauro mo haka noho mo oho nō i te mana'u 'i ruŋa i te riva rahi o te 'Atua.

⁴⁴ 'I te mahana haka ora o te rua tāpati, me'e rahi taŋata o rā kona i taka-taka mo haka roŋo i te vānaŋa o ruŋa i a Ietū.⁴⁵ I take'a era e te hūrio ra-rahi i te rahi o te taŋata, he mākota. He ha'amata ia he vā-vā 'e he kī he reo-reo te vānaŋa 'a Pauro.⁴⁶ A Pauro 'e a Verenāvē, 'ina he ri'a-ri'a, he pāhono:

«Te vānaŋa o te 'Atua 'i ra'e a māua ana haka 'ite atu ki a kōrua ki te hūrio. I ta'e haŋa ena e kōrua ki tā'ana vānaŋa, e take'a ena: a kōrua he nu'u 'ina he tano mo te ora 'āpī 'ina he hope'a ra'a va'ai e te 'Atua. 'O ira, hora nei he oho a māua ki te nu'u ta'e he hūrio.⁴⁷ Ki te me'e nei a māua i uŋa mai ai e te 'Atua. Ko kī era 'ana, pa'i, e ia:

"Ko ha'ata'a 'ana a au i a koe
pa he mōrī haka mā'eha i te mana'u o te nu'u o te
henua ta'ato'a,
mo haka 'ite mo oho 'ātā ki te kona hope'a era o te
roa
i te roŋo o te e'a iŋa mai roto i te ūtu'a o te hara
'e o te rava'a iŋa i te ora 'āpī 'ina he hope'a ra'a va'ai
e te 'Atua".

⁴⁸ I ŋaro'a era i te me'e nei e te nu'u ta'e he hūrio, he koa rō atu 'ai 'e he ha'amata he kī: te vānaŋa o te 'At-

ua vānaŅa riva-riva. 'E o roto i rā nu'u he haka moe i te mana'u 'i ruŅa i a Ietū te nu'u ta'ato'a ko ha'ata'a era 'ā e te 'Atua mo rava'a i te ora 'āpī 'ina he hope'a ra'a.

⁴⁹ Pē ira te roŅo riva-riva o te 'Atua i haka 'ite i oho ai a te kona ta'ato'a o Pitiria. ⁵⁰ 'E, tū Ņā hūrio ra-rahi era i vānaŅa ta'e tano rō mo kuā Pauro ki te Ņā vi'e hōnui 'e ha'atura ki te haka tere iŅa 'a Mōtē, 'e ki te ŅāŅata hōnui tako'a o rā kona mo riri mo kuā Pauro, 'e he tute mai ira.

⁵¹ He tū-tū ia a kuā Pauro i te puŅa'ehu mai te rāua va'e mo haka 'ite ki rā nu'u: ka haka ūtu'a era i a rāua e te 'Atua, i a rāua 'ana, 'e he e'a ararua he oho ki Īkōnio.

⁵² 'E, te nu'u haka moe i te mana'u 'i ruŅa i a Ietū haka rē e kuā Pauro 'i Antiokia o Pitiria ko koa atu 'ana 'e ko 'Ī 'ā e te pūai o te Vārua Maitai.

E tātara 'ā a kuā Pauro 'i Īkōnio

14 I tu'u era a Pauro ararua ko Verenāvē ki Īkōnio, he hāpī 'i roto i te [hare pure hūrio] o ruŅa i a Ietū. 'I te huru o te rāua vānaŅa iŅa o ruŅa ō'ona, me'e rahi nu'u [hūrio] 'e ta'e hūrio o rā kona i [haka moe i te mana'u] 'i ruŅa i a Ietū.

² Te hūrio ta'e haka moe i te mana'u 'i ruŅa i a Ietū he haka tumu i te ture mo riri o te nu'u ta'e he hūrio mo kuā Pauro. ³ Ka ai atu pē ira, i rahi rō te mahana i noho ai ararua 'i Īkōnio 'e, 'i te hio-hio o te rāua mana'u 'i ruŅa i a Ietū, 'ina he ri'a-ri'a e vānaŅa era o ruŅa i a ia. 'E te 'Atua, hai pūai va'ai ki a kuā Pauro mo aŅa i te mana, e haka take'a e oho era: he parauti'a mau 'ā te me'e kī e rāua o ruŅa i tō'ona riva rahi.

⁴ Te nu'u o tū kona era ko vahi 'ā e rua pā'iŅa: e tahi i haka roŅo ki te hūrio haka tumu i te ture, 'e te rua i haka roŅo ki te ['āpōtoro] ko kuā Pauro. ⁵ Te tētahi nu'u hūrio 'e ta'e hūrio ananake ko te nu'u ra-rahi he ha'a'au mo tōtōā 'e mo tama'i hai mā'ea i tū Ņā 'āpōtoro era. ⁶ 'I 'ite era ararua, he tē-tere mai Īkōnio ki Rītara 'e ki Reve, he kona tako'a o Rīkāōnia, 'e ki te tētahi kona hāhine. ⁷ 'I rā Ņā kona i haka 'ite tako'a ai i te [roŅo riva-riva o te 'Atua].

Te nu'u o Rītara e haŅa 'ā mo ha'amuri i a kuā Pauro

⁸ 'I te kona era ko Rītara e tahi taŅata 'ina he ha'ere mai tō'ona poreko iŅa 'ā, he va'e rehe-rehe. ⁹ Te taŅata nei e haka roŅo 'ā i te vānaŅa 'a Pauro. He pupura ia e Pauro 'e he aŅi-aŅi e haka moe rahi rō 'ana rā taŅata i te mana'u 'i ruŅa i te 'Atua mo tō'ona ora. ¹⁰ He kī pūai e Pauro: «ĶKa e'a koe ka māroa tī-tika!».

I rere a ruŅa tū taŅata era i māroa ai, 'e he ha'amata he ha'ere. ¹¹ I take'a era e te nu'u i tū me'e aŅa era e Pauro, he ha'amata he ohu-ohu hai 'arero rīkāōnia: «ĶĪ ko topa mai 'ā e rua 'atua o tātou pa he taŅata!».

¹² He kī ia i a Verenāvē he 'atua ko Seu [†] 'e i a Pauro he 'atua ko 'Ēreme ^{††} 'o te ai ko ia te me'e vānaŅa. ¹³ Te hare pure o te rāua 'atua ko Seu 'i te o'o iŅa 'ā o Rī-

[†] A SEU he 'iŅoa o te me'e ha'amuri e te kirieko pa he 'atua. Kī te rāua mana'u, a Seu he 'atua hope'a o te nui-nui. Kī a ia e kī tako'a era ko Hupitere. ^{††} A 'ĒREME, he 'iŅoa o te rua me'e ha'amuri e rāua

tara. He ma'u ki ira e te oromatu'a o rā hare pure i te pua'a e haka tau tahi rō 'ā hai hei tiare, he haŅa ananake ko te nu'u o rā kona mo aŅa i te tūtia mo kuā Pauro.

¹⁴ I aŅi-aŅi era e nei Ņā 'āpōtoro i rā me'e, he ihi i te rāua kahu mo haka take'a: me'e ta'e tano mo rāua rā me'e. He uru ki vāeŅa o te nu'u taka-taka 'i ira koia ko ohu:

¹⁵ «ĶHe aha rā kōrua e aŅa ena i te me'e tu'u pē nā? A māua he taŅata pē kōrua 'ā. I oho mai nei a māua mo haka 'ite atu i te roŅo riva-riva o te 'Atua, ki haka rē ai a kōrua i te ha'amuri iŅa ki te me'e ta'e he 'atua parauti'a, 'e ki huri ai te kōrua mana'u ki te 'Atua ora, aŅa i te raŅi, i te henua, i te vaikava, 'e i te me'e ta'ato'a ai o te ao.

¹⁶ »'I te hora tuai era te 'Atua i haka rē nō i te taŅata mo u'i i te rāua ara i haŅa. ¹⁷ Ka ai atu pē ira, kai ta'e haka 'ite ko ai a ia hai me'e riva-riva aŅa; 'ā'ana, pa'i, te haka hoa i te 'ua, te haka riva-riva i te kai 'oka, 'e te va'ai ki te taŅata ka 'Ī rō te me'e mo kai 'e mo koa».

¹⁸ O kuā Pauro, ka ai atu i kī tahi rō i te Ņā me'e nei, aŅa ri'a-ri'a i rava'a ai 'o aŅa ki a rāua e rā nu'u i te tūtia.

¹⁹ He tu'u ia te nu'u hūrio mai Antiokia o Pitiria 'e mai Īkōnio, 'e hai vānaŅa o rāua, i haka riri ai i te nu'u o ira mo kuā Pauro. 'O ira i tama'i ai i a Pauro hai mā'ea 'e, 'i te mana'u ko mate 'ā, he to-toi he oho ki haho o tū kona era ko Rītara. ²⁰ I taka-taka era 'i tō'ona kao-kao te nu'u haka moe i te mana'u 'i ruŅa i a Ietū, he e'a a Pauro ki ruŅa he hoki ki Rītara 'e, 'i te rua mahana, he oho ararua ko Verenāvē ki Reve.

²¹ 'I ira i haka 'ite ai i te roŅo riva-riva o te 'Atua 'e me'e rahi nu'u i haka moe i te mana'u 'i ruŅa i a Ietū. I oti era he hoki a kuā Pauro ki Rītara, ki Īkōnio 'e ki Antiokia o Pitiria ²² he haka pūai he oho i te mana'u o te nu'u haka moe i te mana'u 'i ruŅa i a Ietū o rā Ņā kona. He hatu mo haka hio-hio mo oho i te rāua mana'u 'i ruŅa i a Ietū, 'e he kī: «E ko ta'e piri mai ki a tātou ki te nu'u haka moe i te mana'u 'i ruŅa i a Ietū te 'ati 'i te ao nei 'i ra'e ki te o'o ki te ao haka tere e te 'Atua pe mu'a ka oho ena».

²³ He ha'ata'a ia e kuā Pauro, 'i te Ņā kona nei a to-toru, i te ŅāŅata mo pū'oko haka tere o te nūna'a haka moe i te mana'u 'i ruŅa i a Ietū. He pure 'e he tapu i te kai koia ko rā nu'u ta'ato'a. I oti era he ani e kuā Pauro ki a Ietū, he kope 'i ruŅa e haka moe tahi era i te mana'u, mo hāpa'o i a rāua.

He hoki iŅa o kuā Pauro ki Antiokia o Tīria

²⁴ I vari era a kuā Pauro a te Ņā kona era o Pitiria he tu'u ki Panafiria. ²⁵ 'I ira, 'i te kona ko Pehē i haka 'ite ai i te roŅo riva-riva o te 'Atua. I oti era he oho ki 'Ātāria, he kona tako'a o Panafiria. ²⁶ 'I 'Ātāria, 'i te oti o te aŅa uŅa era i a rāua, he eke a kuā Pauro ki ruŅa i

pa he 'atua. Kī te rāua mana'u, a 'Ēreme he ma'uroŅo o Seu 'e o te tētahi atu me'e kī e rāua he 'atua.

te pahī mo hoki ki Antiokia o Tīria, he kona 'i ira i pure i va'ai ai i a rāua ararua e te nu'u haka moe i te mana'u 'i ruŋa i a Ietū ki te rima o te 'Atua mo tū anā oti era.

²⁷ I tu'u era a Pauro ararua ko Verenāvē ki Antiokia, he haka taka-taka i te nu'u haka moe i te mana'u 'i ruŋa i a Ietū 'e he 'a'amu i tū me'e ta'ato'a anā era e te 'Atua hai rāua, 'e pē hē te 'Atua i mātaki ai i te 'ōpani mo haka moe tako'a o te nu'u ta'e he hūrio i te rāua mana'u 'i ruŋa i a Ietū. ²⁸ I rahi rō te 'āva'e i noho ai a Pauro ararua ko Verenāvē 'i muri i te nu'u taina o ira.

He vānaŋa o ruŋa i te [haka tere iŋa 'a Mōtē]

15 'I rā nā mahana, te tētahi nu'u [haka moe i te mana'u] 'i ruŋa i a Ietū he oho mai Hūrea ki Antiokia o Tīria, he ha'amata he hāpī ki te taina o ira e ko e'a a rāua mai roto i te ūtu'a o te hara 'e e ko rava'a i te ora 'āpī 'ina he hope'a ra'a mo ta'e hore o te kiri o te kinonŋa mo haka tano ki te me'e kī e Mōtē. ² He tātake ia a Pauro 'e a Verenāvē ki rā nu'u, he ta'e tano o rā hāpī ki a rāua. 'O ira he to'o e te taina o Antiokia i a Pauro 'e i a Verenāvē ananake ko te tētahi nu'u 'e he haka oho ki Hērutarema mo vānaŋa o ruŋa i rā hāpī ki te nu'u ['āpōtoro] 'e ki te tētahi atu nu'u pū'oko haka tere o ira.

³ Te nu'u uŋa nei e te taina o Antiokia, i vari era a te kona o Fenitia 'e o [Tāmāria], he 'a'amu he oho pē hē te nu'u ta'e he hūrio i haka rē ai i te rāua haka tere iŋa mo haka moe i te mana'u 'i ruŋa i a Ietū. He koa rō atu 'ai te taina ta'ato'a 'i tū parau 'āpī era.

⁴ I tu'u era a Pauro ararua ko Verenāvē ki Hērutarema, he koa te nūna'a taŋata haka moe i te mana'u 'i ruŋa i a Ietū, pē ira 'ana te rāua nu'u pū'oko haka tere 'e te 'āpōtoro. He 'a'amu e kuā Pauro i te me'e ta'ato'a anā e te 'Atua hai rāua ki te nu'u ta'e he hūrio. ⁵ He māroa ia te tētahi o te nu'u [fariseo] haka moe i te mana'u 'i ruŋa i a Ietū he kī: «Te me'e tako'a ia mo te nu'u ta'e he hūrio haka moe i te mana'u 'i ruŋa i a Ietū he hore i te kiri o te kinonŋa 'e he ha'atura ki te [haka tere iŋa 'a Mōtē]».

⁶ He haka taka-taka ia te 'āpōtoro ananake ko te tētahi nu'u pū'oko haka tere mo vānaŋa o ruŋa i rā me'e. ⁷ 'I roto i te rahi o te tātake, he māroa a Pētero he kī:

«E te taina, ko 'ite ā a kōrua: te 'Atua ko ha'ata'a era 'ana i a au mai roto i a kōrua mo haka 'ite i te [ronŋo riva-riva o te 'Atua] ki te nu'u ta'e he hūrio mo haka moe tako'a i te rāua mana'u 'i ruŋa i a Ietū. ⁸ Te 'Atua, me'e 'ite i te huru o te māhatu o te taŋata, ko haka take'a 'ana, pa'i, i tō'ona haŋa ki a rāua hai va'ai i te [Vārua Maitai], pa he va'ai iŋa mai era ki a tātou. ⁹ Mō'ona te nu'u ta'e he hūrio pē tātou 'ā. Ko haka ma'itaki 'ana e ia i te rāua māhatu pa he haka ma'itaki iŋa mai era i a tātou 'o te haka moe i te mana'u 'i ruŋa i a Ietū.

¹⁰ »Mo ai pē ira, ŋhe aha ia a kōrua e haŋa ena mo haka riri i te 'Atua hai haka 'amo ki te nu'u era i te haka tere iŋa 'a Mōtē, he me'e kai 'ite mo 'amo e tātou 'e

e te tātou tupuna? ¹¹ A tātou ko 'ite riva-riva 'ā: hai riva rahi mau nō o Ietū e e'a ena a tātou mai roto i te ūtu'a o te hara 'e e rava'a ena i te ora 'āpī 'ina he hope'a ra'a va'ai e te 'Atua, 'e pē ira tako'a 'ana a rāua».

¹² He haka kiva-kiva ia ananake 'e he haka ronŋo ki a Pauro ararua ko Verenāvē e vānaŋa era o ruŋa o te mana anā e rāua ki te nu'u ta'e he hūrio hai pūai va'ai e te 'Atua. ¹³ I oti era te vānaŋa, he kī e [Tanatiako]:

«Ka haka ronŋo mai, e kuā taina ē: ¹⁴ Ko 'a'amu mai 'ā e Pētero o ruŋa i te haka take'a iŋa ra'e o te 'Atua i tō'ona riva rahi ki te taŋata ta'e he hūrio, 'e pē hē te 'Atua i ha'ata'a ai mā'ana i te nu'u mai roto. ¹⁵ Te me'e nei e haka tano 'ā ki te me'e pāpa'i e te perofeta 'i ruŋa i te [Pāpa'i Mo'a] pē nei ē:

¹⁶ «Nā he tu'u te mahana he hoki mai a au, he haka tu'u haka 'ou i te hare o [Tāvita].

¹⁷ Pē ira te nu'u ta'e he hūrio ha'ata'a e au mā'aku ka [huri mai ena te mana'u] ki ruŋa i a au.

¹⁸ He vānaŋa nei o te 'Atua; 'ā'ana i haka 'ite mai mai mu'a 'ā».

¹⁹ »Ki tō'oku mana'u, e ko tano a tātou mo haka 'amo i te haka tere iŋa 'a Mōtē ki te nu'u ta'e he hūrio haka rē i te rāua haka tere iŋa mo huri ki te 'Atua. ²⁰ Ki pāpa'i ki haka 'ite ki rā nu'u i te me'e mo ta'e anā e rāua: he kai i te kiko tūtia ki te 'ītoro, he ta'e piri tane ki te kope ta'e he kenu 'e he vi'e 'ā'ana, he kai i te kiko o te 'animare 'ina kai haka hiho i te toto, 'e he kai i te toto. ²¹ Mai te hora tuai era 'ā, pa'i, e tai'o e haka 'ite ena i te nŋa ronŋo nei o te haka tere iŋa 'a Mōtē 'i te kona ta'ato'a 'i roto i te [hare pure hūrio] 'i te [mahana haka ora]».

He ronŋo mo te nu'u ta'e he hūrio

²² He mana'u e te 'āpōtoro, e te nu'u pū'oko haka tere 'e e te nu'u ta'ato'a haka moe i te mana'u 'i ruŋa i a Ietū mo to'o, mai roto i a rāua, i te nu'u mo uŋa ki Antiokia 'i muri i a Pauro ararua ko Verenāvē. He to'o ia i a Hura, kī tako'a ko Varasāvā, 'e i a Tira, he nŋata hōnu i rāua. ²³ Ki a rāua i haka ma'u ai i te ronŋo e pāpa'i rō 'ā pē nei ē:

«A mātou te 'āpōtoro 'e te nu'u pū'oko haka tere, he 'aroha atu mai Hērutarema ki a kōrua ki te taina ta'e he hūrio noho 'i Antiokia, 'i Tīria 'e 'i Tiritia. ²⁴ Ko 'ite 'ana a mātou i tu'u rō atu te tētahi nu'u mai nei, ta'e o mātou i uŋa atu, 'e ko haka mira-mira 'ā i te kōrua mana'u hai vānaŋa o rāua. ²⁵ 'O ira a mātou ta'ato'a i mana'u ai mo to'o i te nu'u mai roto i a mātou 'e mo uŋa atu 'i muri i te tātou taina haŋa rahi ko Pauro ararua ko Verenāvē mo u'i i a kōrua. ²⁶ A Pauro ararua ko Verenāvē he nŋata va'ai i a rāua ki te 'ati mo haka 'ite o ruŋa i te tātou Pū'oko Haka Tere ko Ietū Kiritō. ²⁷ I uŋa atu ena i a Hura ararua ko Tira mo vānaŋa 'e mo haka anji-anji riva-riva atu i te me'e ta'ato'a o ruŋa i te ronŋo nei.

²⁸ »Ki te Vārua Maitai 'e ki a mātou e ko tano mo haka 'amo atu ki a kōrua i te roŋo ta'ato'a o te haka tere iŋa hūrio. Te roŋo nō mo ma'u e kōrua ko te ŋā me'e nei: ²⁹ 'ina ko kai i te kiko o te 'animare tūtia ki te 'ītoro, 'ina ko kai i te toto 'e i te kiko o te 'animare kai haka hiho i te toto, 'e 'ina ko piri tane mo ta'e ai he kenu he vi'e. Mo mo'a i te ŋā roŋo nei, e aŋa 'ana kōrua i te me'e tī-tika. 'Iorana kōrua».

³⁰ He 'aroha ia tū nu'u ta'ato'a era ki te taina o Hērutarema 'e he e'a he oho ananake ki Antiokia. I tu'u era he haka taka-taka i te nūna'a taŋata haka moe i te mana'u 'i ruŋa i a Ietū, 'e he va'ai i tū roŋo era. ³¹ I tai'o era he 'ata pūai te mana'u o te taina ta'ato'a, 'e he to'o rō atu 'ai te koa. ³² 'E, a Hura ararua ko Tira he 'ata haka koa 'e he 'ata haka haŋu i rā ŋā taina hai vānaŋa i haka vānaŋa e te 'Atua.

³³ 'I ira i noho ai me'e rahi atu mahana. I oti era he kī e te taina o Antiokia mo hoki o Hura 'e o Tira ki Hērutarema ki muri i te nu'u uŋa era i a rāua 'e he 'aroha he kī: «Ka oho riva-riva hai haumārū o te 'Atua». [³⁴ Ka ai atu pē ira, i noho nō a Tira 'i ira, 'e ko Hura i hoki ki Hērutarema.] ³⁵ A Pauro 'e a Verenāvē he noho ia 'i Antiokia 'e ananake ko te tētahi nu'u he hāpī he haka 'ite ki te taŋata i te [roŋo riva-riva o ruŋa i a Ietū Kiritō].

He ha'ata'a iŋa o Pauro mai i a Verenāvē

³⁶ Ko rahi 'ana te mahana, he kī e Pauro ki a Verenāvē: «Mai ki hoki tāua ki u'i i te taina o te ŋā kona ta'ato'a haka 'ite era e tāua i te roŋo riva-riva o te 'Atua».

³⁷ He haŋa ia a Verenāvē mo ma'u i a [Iovani], kī tako'a ko Marko, 'i muri i a rāua. ³⁸ 'E, 'ina a Pauro kai haŋa 'o te hoa o Marko i a rāua 'i Panafiria 'e 'o te ta'e oho nō 'i muri i a rāua mo hā'ū'ū 'i te aŋa.

³⁹ 'I te pūai o te tātaka o ruŋa i a Marko, he ha'ata'a ararua. He to'o e Verenāvē i a Marko he reva ararua 'i ruŋa i te pahī ki te motu ko Tīpere. ⁴⁰ He to'o ia a Pauro i a Tira mo hokorua i a ia. 'E te taina o Antiokia he pure ki te 'Atua mo hāpa'o i a rāua ararua 'i te kona ta'ato'a ka oho era. ⁴¹ Ko Pauro ararua ko Tira i oho ki kona era ki kona era o Tīria 'e o Tiritia e haka haŋu e oho era i te taŋata ta'ato'a haka moe i te mana'u 'i ruŋa i a Ietū.

He hokorua iŋa o Timoteo i a kuā Pauro

16 He oho ia a Pauro ki Reve 'e mai ira ki Rītara. 'I Rītara i māhani ai ki te taŋata [haka moe i te mana'u] 'i ruŋa i a Ietū te 'īŋoa ko Timoteo. A ia he poki o te vi'e [hūrio] haka moe i te mana'u 'i ruŋa i a Ietū 'e tō'ona matu'a tane he [kirieko]. ² Te taina o Rītara 'e o Īkōnio e vānaŋa riva-riva rō 'ana o ruŋa i a Timoteo. ³ He haŋa ia e Pauro mo ma'u 'i muri i a rāua. 'I ra'e i haka tāpa'o ai i a Timoteo hai tāpa'o iŋa hūrio, he hore i te kiri o te kinona, 'o riri te nu'u hūrio o te kona o rāua ka tu'u era. A rā nu'u, pa'i, ko 'ite 'ā: te matu'a tane o Timoteo he kirieko.

⁴ 'I te kona ta'ato'a tu'u o kuā Pauro, he haka 'ite he oho ki te taina i te me'e kī e te ['āpōtoro] 'e e te nu'u pū'oko haka tere o Hērutarema. ⁵ 'E te nu'u haka moe i te mana'u 'i ruŋa i a Ietū o rā ŋā kona ia, pe te 'ata hio-hio nō te mana'u, 'e paurō te mahana pe te 'ata rahi nō e oho era.

Te me'e haka take'a e te 'Atua ki a Pauro

⁶ 'I te ta'e ha'ati'a e te [Vārua Maitai] mo haka 'ite i te [roŋo riva-riva o te 'Atua] 'i te ŋā kona era o 'Ātia, he vari a kuā Pauro a te ŋā kona era o Firihiā 'e o Karatia, ⁷ 'e he tu'u ki te tīta'a henua o Mītia. Mai ira i mana'u ai mo oho ki te ŋā kona era o Vītīnia, 'e 'ina kai ha'ati'a tako'a e te Vārua Maitai. ⁸ 'O ira i ta'e hipa ai a ira.

He oho ia ananake a Mītia 'e he tu'u ki Toroare, he kona 'i ira te 'uahu nui-nui. ⁹ 'E 'i te pō e tahi i take'a ai e Pauro i te me'e i haka take'a e te 'Atua: he taŋata o te kona ko Mātērōnia e māroa rō 'ana 'ai ka ani ki a ia: «Ka oho mai koe ki Mātērōnia ka hā'ū'ū mai ki a mā-tou». ¹⁰ I take'a era e Pauro i rā me'e, he 'a'amu mai 'e he haka riva-riva a mātou mo oho ki Mātērōnia, he 'ite e mātou e kī mai 'ana te 'Atua mo oho mo haka 'ite i tā'ana roŋo riva-riva 'i ira.

'I Firipo a kuā Pauro

¹¹ 'I Toroare i eke ai a mātou ki ruŋa i te pahī, 'e he oho tī-tika ki te motu ko Tamotaratia. 'I te rua mahana i reva ai ki Nēāpori. ¹² Mai ira i oho ai ki Firipo, he kona hōnui o te rōmano 'i Mātērōnia. Mahana ta'e rahi te mātou mahana noho 'i ira.

¹³ I tano era te [mahana haka ora], he e'a a mātou he oho ki haho o Firipo ki te taha-taha o te rio, he 'ite o mātou he kona pure o te hūrio. He noho ia a mātou 'i ira, he vānaŋa o ruŋa i te roŋo riva-riva o te 'Atua ki te ŋā vi'e taka-taka atu.

¹⁴ E tahi o rā ŋā vi'e te 'īŋoa ko Riria o te kona ko Tiatira; tā'ana aŋa he ho'o kahu hope'a o te riva-riva kōrore moana 'apa mea. Te vi'e nei vi'e ha'amuri ki te 'Atua. E haka roŋo nō 'ā rā vi'e ki a Pauro, i haka mā'e-ha ai e te 'Atua i tō'ona mana'u mo aŋi-aŋi i te aura'a o rā vānaŋa 'e mo haka moe i te mana'u 'i ruŋa i a Ietū.

¹⁵ I haka [papatito] rō i a ia ananake ko te nu'u ta'ato'a o tō'ona hare. I oti era he kī mai: «Mo ai a au he vi'e haka moe parauti'a i te mana'u 'i ruŋa i a Ietū mo kōrua, ka oho mai ia kōrua ka noho 'i tō'oku hare». He haka koni he oho mai 'ātā ka oho rō a mātou 'i muri.

¹⁶ E tahi mahana, e oho nō 'ana a mātou ki tū kona era mo pure, he piri mai e tahi poki vahine 'āpī, he 'ekaravo, ko uru 'ana e te tātane. O rā tātane te haka 'ite ki rā poki he aha te me'e mo topa. 'E hai me'e haka 'ite e rā poki ki te nu'u 'auhau ki a ia, e rava'a era me'e rahi moni mo te nu'u 'ā'ana rā 'ekaravo. ¹⁷ Te aŋa o nei poki he oho mai 'i tu'a o mātou ko kuā Pauro koia ko ohu: «iTe ŋāŋata nei he tāvini o te 'Atua, kope haka tere i te me'e ta'ato'a o te ao. E haka 'ite atu 'ā i te ara mo e'a o kōrua mai roto i te ūtu'a o te hara 'e mo rava'a i te ora 'āpī 'ina he hope'a ra'a va'ai e te 'Atua!».

¹⁸ Me'e rahi mahana e ohu-ohu era 'ātā ka 'e'ete rō te manava o Pauro. He teka ia he kī ki te tātane o roto o tū poki era: «ĶHai 'Ķŋoa o Ietū Kiritō he kī atu au: ka e'a koe mai roto i te poki ena!». 'I tū hora mau era 'ā he e'a tū tātane era mai roto.

¹⁹ Te nu'u haka aŅa i rā poki, i u'i era 'ina he rāve'a toe mo rava'a haka 'ou e rāua i te moni hai rā poki, he 'a-'aru i a Pauro ararua ko Tira, he ma'u ki mu'a o te nu'u ra-rahi 'i te kona taka-taka o te taŅata, ²⁰ 'e ki mu'a o te nu'u pū'oko o te hare ture he kī: «Te Ņā hūrio nei e haka mira-mira 'ana i te tātou kāiŅa, ²¹ 'e e hāpī 'ana i te haka tere iŅa kē ta'e ha'ati'a mo aŅa e tā-tou e te rōmano».

²² He pe'e te taŅata ta'ato'a ki rā nu'u era o rāua rā 'ekaravo mo tōtōā i a Pauro ararua ko Tira. Tū nu'u pū'oko haka tere era o te hare ture he ihi-ihī i te kahu o kuā Pauro 'e he kī mo tiŅa'i hai 'uaka. ²³ I oti era te tiŅa'i, he ma'u he puru 'i roto i te hare ma'u'aurī, 'e he kī ki te pū'oko o te hare ma'u'aurī mo 'auario riva-riva. ²⁴ I kī era i te me'e nei, he ma'u e tū taŅata era he puru 'i te kona hope'a o te raro nui o roto i te hare ma'u'aurī 'ai ka ha-ha'o i te va'e o kuā Pauro ki roto i te me'e i aŅa hai miro 'o mākenu-kenu.

²⁵ Pe te 'ahuru mā piti o te pō, e pure 'e e hīmene nō 'ā a Pauro ararua ko Tira ki te 'Atua 'e te tētahi nu'u puru e haka roŅo 'ana ki a rāua, ²⁶ he ha'amata he mākenu-kenu te henua 'e he rurū tū hare ma'u'aurī era. 'I rā hora 'ā he ha-hata tahi te 'ōpani 'e he pāko'o-ko'o te vivi mai ruŅa i te nu'u puru ta'ato'a.

²⁷ 'I ara era te pū'oko o te hare ma'u'aurī, 'e i take'a era ko ha-hata tahi 'ā te 'ōpani, he kume i tā'ana hoe mo tiŅa'i i a ia 'i te mana'u ko tē-tere tahi 'ā te nu'u puru. ²⁸ He ohu ia e Pauro: «Ķ'Ina koe ko tiŅa'i i a koe; 'I a mātou ta'ato'a 'i 'ā!».

²⁹ He kī e tū taŅata era ki te nu'u 'auario mo va'ai i te mōrī. I tahuti i uru ai e rurū rō 'ā 'i te ri'a-ri'a, he tū-turi a te va'e o Pauro ararua ko Tira. ³⁰ He to'o i a rāua mai roto i tū kona hope'a era o te raro nui 'e he 'ui:

—ĶHe aha tā'aku me'e mo aŅa mo e'a mai roto i te ūtu'a o te hara?

³¹ He pāhono e kuā Pauro:

—Mo haka moe kōrua i te mana'u 'i ruŅa i a Ietū, he e'a a koe 'e te nu'u o tu'u hare mai roto i te ūtu'a o te hara 'e he rava'a i te ora 'āpī 'ina he hope'a ra'a va'ai e te 'Atua.

³² He vānaŅa ia e Pauro ararua ko Tira o ruŅa o te roŅo riva-riva o te 'Atua ki tū taŅata era 'e ki te nu'u ta'ato'a o tō'ona hare. ³³ 'I rā pō mau 'ā he haka hopu e rā taŅata i te more o Pauro 'e o Tira, 'e he haka papatito i a ia 'e i te nu'u ta'ato'a o tō'ona hare. ³⁴ I oti era he va'ai hai kai. Rā taŅata ananake ko tū nu'u ta'ato'a era ko koa atu 'ana 'o te haka moe i te mana'u 'i ruŅa i te 'Atua.

³⁵ 'I te rua mahana 'i te pōā, he uŅa e te nu'u pū'oko haka tere o te hare ture i te 'auario mo kī ki te taŅata

pū'oko o te hare ma'u'aurī mo haka e'a i a Pauro ararua ko Tira. ³⁶ He kī e tū taŅata era ki a Pauro: «Ko uŅa mai 'ana e te nu'u pū'oko haka tere o te hare ture mo haka e'a i a kōrua. 'O ira, ka e'a kōrua ka oho».

³⁷ He kī ia e Pauro ki tū nu'u era:

«Ena, i to'o nō mai i a māua i te rōmano, he haka tiŅa'i 'i mu'a o te taŅata ta'ato'a kai aŅa hia mai e tahi ture, he haka puru 'i roto i te hare ma'u'aurī; 'e, Ķ'i te hora ena ko haŅa 'ā mo haka e'a kiva-kiva? E ko e'a a māua. Ka oho mai e rāua mau 'ā ka kī mai».

³⁸ He haka 'ite e te 'auario i tū me'e era ki te nu'u pū'oko haka tere o te hare ture. I 'ite era e rā nu'u he rōmano a kuā Pauro, he ri'a-ri'a rō atu 'ai. ³⁹ He oho he kī e rā nu'u ki a Pauro ararua ko Tira mo haka rehu i tū me'e aŅa era e rāua. He haka e'a ia mai roto i te hare ma'u'aurī 'e he ani mo oho rō 'ai mai Fīripo.

⁴⁰ 'I e'a era a Pauro ararua ko Tira, he oho ki te hare o tū vi'e era ko Riria. I oti era te u'i, te haka koa, 'e te haka haŅu i te nu'u taina o rā hare, he e'a he oho mai Fīripo.

He me'e i topa 'i Tētārōnika

17 'I te ara oho o Pauro ararua ko Tira i vari ai a te kona ko Antipori 'e ko Āpōrōnia. He tu'u ki Tētārōnika, he kona 'i ira te [hare pure hūrio] e tahi. ² 'I te [mahana haka ora], he oho ararua ki roto i rā hare pure pa he me'e rava aŅa e rāua. 'I ira i vānaŅa ai ananake ko te ŅāŅata taka-taka o roto o ruŅa i te [Kiritō] hai me'e o ruŅa i te [Pāpa'i Mo'a]. I aŅa ai pē ira e toru tāpati. ³ He haka aŅi-aŅi e Pauro i te me'e kī 'i ruŅa i te Pāpa'i Mo'a pē nei ē: te Kiritō e mate rō 'e ki mate, e ora haka 'ou rō. He kī: «Te Kiritō ko te Ietū nei e au e haka 'ite atu ena».

⁴ I ai rō te nu'u [hūrio] i [haka moe i te mana'u] 'i ruŅa i a Ietū 'e he riro e tahi nō mana'u ananake ko kuā Pauro. Me'e rahi nu'u [kirieko] ha'amuri ki te 'Atua 'e Ņā vi'e ra-rahi o ira i haka moe tako'a i te rāua mana'u 'i ruŅa i a Ietū.

⁵ Hai me'e nei i mākota ai te hūrio ta'e haka moe i te mana'u 'i ruŅa i a Ietū. He haka taka-taka ia i te nu'u hupe-hupe o te ara aŅa i te me'e ta'e tano, 'e hai rā nu'u i haka riri ai i te nu'u o Tētārōnika mo kuā Pauro.

Te nu'u hupe-hupe nei i tu'u i uru nō ki roto i te hare o Hātō kimi i a Pauro ararua ko Tira mo 'a-'aru mo va'ai ki tū nu'u riri era. ⁶ 'I te ta'e rava'a i a kuā Pauro, he 'a-'aru he to-toi i a Hātō ananake ko te tētahi taina ki mu'a o te nu'u ra-rahi o Tētārōnika koia ko kī:

«ĶTe nu'u haka tātake i te mana'u o te taŅata o te ao 'I ko tu'u mai 'ā ki nei, ⁷ 'e a Hātō i to'o ki tō'ona hare! Ķā rāua ta'ato'a ko hape 'ā ki te haka tere iŅa o te tātou 'ariki rōmano hai kī e ai rō 'ā te rua 'ariki te 'Ķŋoa ko Ietū!».

⁸ 'I Ņaro'a era i te me'e nei e te taŅata 'e e te nu'u ra-rahi o Tētārōnika, he ta'e au rō atu 'ai. ⁹ A Hātō ia

ananake ko tū nā taina era, 'o puru i a rāua 'i roto i te hare ma'u'aurī, he 'auhau i te moni kī era mo 'auhau, 'e he haka rē e rā nu'u ra-rahi era mo oho.

'I Vērea a Pauro

¹⁰ I pō era, he haka oho e te nu'u taina o Tētārōnika i a Pauro ararua ko Tira ki Vērea. I tu'u era he oho tī-tika ki te hare pure hūrio. ¹¹ Te hūrio o te kona nei 'ata hau te riva-riva o te mana'u ki te nu'u hūrio o Tētārōnika. A rāua, pa'i, e haka roŋo rō 'ā hai māhatu i te vānaŋa o te 'Atua, 'e e tai'o rō 'ā paurō te mahana i te Pāpa'i Mo'a mo u'i hoki he parauti'a te me'e kī e kuā Pauro. ¹² Me'e rahi o te nu'u hūrio nei i haka moe i te mana'u 'i ruŋa i a Ietū 'e me'e rahi tako'a te kirieko, mai te nā vi'e ra-rahi ki te taŋata.

¹³ I 'ite era e te nu'u hūrio ra-rahi o Tētārōnika e haka 'ite 'ā a kuā Pauro i te [roŋo riva-riva o te 'Atua] 'i Vērea, he oho ki ira he haka tumu i te ture 'e he haka riri i te taŋata mo kuā Pauro. ¹⁴ 'I rā hora mau 'ā he ma'u i a Pauro e te taina o Vērea ki taha tai mo eke ki ruŋa i te pahī. 'E a Tira ararua ko Timoteo 'i ira 'ā i noho ai. ¹⁵ Te taina reva 'i muri i a Pauro 'ātā ki te kona ko 'Ātena i tu'u ai. Mai ira i hoki ai ki Vērea e ma'u 'ā i te roŋo ki a Tira ararua ko Timoteo mo horo-horou mo oho mo piri ki a Pauro 'i 'Ātena.

'I 'Ātena a Pauro

¹⁶ E tiaki nō 'ana a Pauro ki a Tira 'e ki a Timoteo, he u'i ko 'ī 'ā tū kona era ko 'Ātena e te 'ītoro 'e he māui- ui rō atu 'ai te māhatu. ¹⁷ 'O ira i oho ai ki te hare pure hūrio mo vānaŋa ki te nu'u hūrio 'e ki te tētahi nu'u ha'amuri ki te 'Atua.

Te mahana te mahana e vānaŋa tako'a era ki te nu'u 'i te kona rava taka-taka o te taŋata. ¹⁸ He haka tātake ia ki a Pauro e te tētahi nu'u ma'ori o te hāpī he ēpikureo † 'e o te hāpī he ētōiko. †† 'E, 'i te huru o te vānaŋa 'a Pauro, he 'ui ki a rāua 'ā: «¿He aha te me'e vānaŋa e te reo-reo era?». 'E o te tētahi te kī: «Pa he me'e ena: a ia he taŋata haka 'ite o ruŋa i te 'atua o te rua henua».

E kī era i te me'e nei 'o te haka 'ite o Pauro i te [roŋo riva-riva o ruŋa i a Ietū] 'e o ruŋa i te ora o te taŋata mai te mate. ¹⁹ He ma'u ia i a Pauro ki mu'a o te nūna'a taŋata ra-rahi o rā kona, he Areopako, ‡ 'e he kī: «E haŋa rō 'ana a mātou mo vānaŋa mai ō'ou o ruŋa i te hāpī 'āpī haka 'ite oho e koe. ²⁰ E ai rō 'ā ta'a me'e kī 'ina he anjī-anjī e mātou, 'e, ko haŋa 'ā a mātou mo 'ite i te aura'a o rā me'e».

† Te nu'u he *ΕΠΙΚΥΡΕΟ* he nu'u ma'u i te hāpī o te taŋata e tahi ko *Επικυρο* te 'īŋoa. Tā'ana hāpī: 'ina he me'e he 'Atua 'e 'ina he taŋata he ora haka 'ou mai te mate. Te me'e hauha'a mau nō mo te taŋata he noho iŋa koa, 'ina e tahi mamae 'e 'ina e tahi me'e mo ri'a-ri'a.

†† Te nu'u he *ΕΤΩΙΚΟ* he nu'u ma'u i te hāpī o te taŋata ko Tēnō te 'īŋoa. Tā'ana hāpī: te taŋata ana haka tere e haka topa riva-riva i te mana'u, e 'ite mo haka noho i te me'e pohe nō o te hakari, 'e 'ina ko ha'ati'a mo rē o te mamae. ‡ *ΑΡΕΟΠΑΚΟ* he 'īŋoa o te ma'urū e tahi o 'Ātena, he kona 'i ira te nu'u pū'oko haka tere e ma'u era i te rāua ture, 'e he 'īŋoa nape ki rā nu'u.

²¹ Te nu'u, pa'i, o 'Ātena 'e pē ira tako'a 'ana te nu'u kē noho o ira, te anja, 'i te rāua hora topa, he 'a'amu o ruŋa i te me'e 'āpī ŋaro'a e rāua.

²² He māroa ia a Pauro 'i vāeŋa o rā nu'u Areopako era, he kī:

«E te taŋata o 'Ātena ē: e u'i nei a au he nu'u rava ha'amuri kōrua ki te kōrua 'atua. ²³ I u'i i oho era a au i te kona anja o kōrua i te tūtia, he take'a e au e tahi o rā nā kona e pāpa'i rō 'ā 'i ruŋa: "Ki te 'atua ta'e 'ite mai ko ai a ia". 'E, ka ai atu kai 'ite hia a kōrua ko ai, ko ha'amuri ko oho nō mai era 'ā kōrua ki a ia. Hora nei, 'I a au he haka 'ite atu ko ai a ia.

²⁴ »O te 'Atua era i anja i te ao 'e i te me'e ta'ato'a e ai ena; a ia he Pū'oko Haka Tere o te raŋi 'e o te henua. 'Ina he noho 'i roto i te hare pure anja e te taŋata. ²⁵ 'I- na e tahi 'ā'ana me'e hape ki no-no'i ai ki te taŋata; 'ā'ana, pa'i, te va'ai ki te ta'ato'a i te ora, i te tokerau ena e haŋu-haŋu ena, 'e i te tētahi atu huru o te me'e.

²⁶ »Mai te taŋata e tahi i anja ai e ia i te hau ta'ato'a o te ao mo noho 'i ruŋa i te henua; te hora 'e te kona mo noho o rāua i ai ai hai haŋa ō'ona. ²⁷ I anja ai e te 'Atua pē ira mo haŋa o te taŋata ta'ato'a mo kimi 'e mo rava'a i a ia, ka ai atu e hāhā, te aura'a, mo 'ite ko ai mau a ia. 'E te parauti'a mau: te 'Atua ta'e 'i kōnui; nā 'i muri i a tātou. ²⁸ Hai 'Atua, pa'i, a tātou e ora nei, e makenu nei 'e e ai nei 'i ruŋa i te henua. Pē nei te tētahi nu'u pāpa'i pāta'u-ta'u o kōrua i kī ai: "He poki a tātou o te 'Atua". ²⁹ 'E a tātou he nā poki mau 'ā o te 'Atua; 'ā'ana, pa'i, a tātou i anja.

»'O ira, 'ina a tātou ko mana'u i a ia he me'e tarai 'e anja e te taŋata hai 'oro, hai parata, hai mā'ea 'e hai tētahi atu me'e. ³⁰ Ko haka rehu 'ā e te 'Atua te me'e anja e te taŋata 'i mu'a 'ā, he ta'e anjī-anjī e rāua. 'E, hora nei, 'I e haka 'ite 'ā i tā'ana roŋo ki te taŋata 'i te kona ta'ato'a mo huri o te mana'u ki a ia 'e mo haka rē i te rāua ara ta'e tano. ³¹ Te 'Atua ko u'i era 'ana i te mahana mo ture e te kope ha'ata'a e ia i te taŋata ta'ato'a o te ao hai tī-tika 'e hai parauti'a. 'E hai haka ora i rā kope mai te mate i haka anjī-anjī ai e te 'Atua ki te nu'u ta'ato'a ko ai rā kope».

³² I ŋaro'a era i te vānaŋa o ruŋa o te ora iŋa mai te mate e te nu'u taka-taka 'i ira, tētahi he haka ka-kata i a Pauro, 'e tētahi atu i kī: «E haŋa rō 'ana a mātou mo haka roŋo haka 'ou, 'i te tētahi mahana, i ta'a vānaŋa».

³³ He e'a ia he oho a Pauro mai muri i tū nu'u era. ³⁴ I oho rō tētahi o rā nu'u 'i muri i a ia 'e i haka moe rō i te mana'u 'i ruŋa i a Ietū. Te nu'u o roto he taŋata o te nūna'a he Areopako te 'īŋoa ko Rionitio, he vi'e e tahi ko Tāmari, 'e he tētahi atu nu'u.

'I Kōrinto a Pauro

18 I oti era he e'a a Pauro mai 'Ātena he oho ki Kōrinto. ² 'I ira i māhani ai ki te taŋata [hūrio] te 'īŋoa ko 'Ākira o te kona ko Ponotō, tu'u iho mai 'Ītāria ararua ko tā'ana vi'e ko Pirisira. Mai ira a rāua i oho mai ai 'o te kī e te 'ariki ko Karaurio mo e'a o te hūrio

ta'ato'a mai Roma. He oho ia a Pauro he u'i. ³I te me'e era te anā 'a Pauro pa he anā 'ā o rā nu'u, he anā karapā, he noho 'i muri mo anā ananake.

⁴Paurō te [mahana haka ora] e oho era a Pauro ki te [hare pure hūrio]. 'I ira e vānaŋa 'e e tātake era ananake ko te nu'u hūrio 'e ta'e hūrio, he haŋa mo anā-anā e rā nu'u he parauti'a tā'ana me'e hāpī o ruŋa i a Ietū.

⁵I tu'u era a Tira ararua ko Timoteo mai Mātērōnia, he noho mau rō 'ai a Pauro he haka 'ite i te [ronjo riva-riva o te 'Atua] 'e he haka anā-anā ki te hūrio o Kōrinto: a Ietū he [Kiritō]. ⁶He ha'amata rā nu'u he riri 'e he vā-vā i a Pauro. He tū-tū ia a Pauro i te puŋa'ehu mai ruŋa i tō'ona kahu mo haka 'ite ki rā nu'u: ta'e o'ona te hape mo haka ūtu'a i a rāua e te 'Atua, o rāua 'ā. 'E he kī: mai rā hora pe mu'a he oho a ia ki te nu'u ta'e he hūrio.

⁷He e'a ia a Pauro mai roto i te hare pure, he oho ki te hare o te taŋata ta'e he hūrio te 'Iŋoa ko Titio Huto, taŋata ha'amuri ki te 'Atua, tō'ona hare 'i muri i rā hare pure. ⁸A Kīripo, pū'oko haka tere o te hare pure nei, kai roa, he [haka moe i te mana'u] 'i ruŋa i a Ietū ananake ko te nu'u ta'ato'a o tō'ona hare. 'E me'e rahi nu'u haka 'ou o Kōrinto ŋaro'a i te ronjo riva-riva o te 'Atua he haka moe tako'a i te rāua mana'u 'i ruŋa i a Ietū, 'e he haka [papatito] i a rāua.

⁹I te pō e tahi he kī e te 'Atua ki a Pauro 'i roto i te me'e haka take'a e te 'Atua: «'Ina koe ko ri'a-ri'a 'e 'ina koe ko mou. Ka haka 'ite ka oho nō tā'aku ronjo. ¹⁰'I, pa'i, a au 'i muri i a koe, 'e 'ina e tahi kope mo tōtōā atu. Nu'u rahi, pa'i, te nu'u o nei i ha'ata'a e au mā'aku». ¹¹'O ira a Pauro i noho ai e tahi matahiti 'e te 'afa 'i Kōrinto e hāpī e oho 'ā i te ronjo riva-riva o te 'Atua ki te nu'u o ira.

¹²'I te hora ko Karione te suerekao o Ākāia, he 'a-'aru i a Pauro e te nu'u hūrio ta'e haka moe i te mana'u 'i ruŋa i a Ietū 'e he ma'u ki te hare ture pa he me'e ha'a'au e rāua. ¹³He kī ki a Karione:

—Te kope nei e hāpī e oho 'ana ki te taŋata mo ha'amuri ki te 'Atua hai oho iŋa ta'e tano ki te mātou haka tere iŋa.

¹⁴Ka oho a Pauro mo vānaŋa ka kī e tū suerekao era ki te hūrio:

—'Āhani te kōrua ture o ruŋa o te me'e ta'e tano 'e o ruŋa o te me'e rake-rake anā e ia, ko haka ronjo atu 'ā a au. ¹⁵I ai ena he me'e o te haka tere iŋa o kōrua, o ruŋa o te vānaŋa 'e o te 'iŋoa, ka haka tī-tika e kōrua 'ā. 'Ina a au e ko ture i te kōrua me'e.

¹⁶'E he tū-tute e Karione i tū nu'u era mai roto i te hare ture. ¹⁷He 'a-'aru ia e te nu'u taka-taka o haho o rā kona i a Tōtene, he pū'oko haka tere e tahi o te hare pure hūrio, he tiŋa'i ki te pi'i-pi'i 'i mu'a o tū hare ture mau era 'ā, 'e kai tapa atu e te suerekao.

He hoki iŋa o Pauro ki Antiokia o Tīria

¹⁸Ka ai atu pē ira, i noho nō a Pauro me'e rahi haka 'ou atu mahana 'i Kōrinto. I tano era te mahana mo oho o'ona mai ira, he 'aroha ki te nu'u taina, 'e he oho ananake ko kuā 'Ākira ki Tenekerea mo eke ki ruŋa i te pahī mo oho ki Tīria. 'I ira i haka varu ai a Pauro i tō'ona pū'oko ka māreŋo rō mo haka 'ite ko oti 'ā tā'ana hōrea anā ki te 'Atua, 'ai ka eke iho ki ruŋa i te pahī.

¹⁹I tu'u era ki Ēfeto 'i tū ara era ki Tīria, he haka rē e Pauro i a Pīrisira ararua ko 'Ākira 'i ira. 'E, 'i ra'e ki tō'ona reva haka 'ou, he oho he vānaŋa ananake ko te nu'u hūrio 'i roto i te rāua hare pure. ²⁰He ani e rā nu'u mo 'ata noho o Pauro 'e 'ina kai haŋa. ²¹He 'aroha he kī ki rā nu'u: «Mo haŋa o te 'Atua, e hoki haka 'ou rō mai a au».

I oti era he eke ki ruŋa i te pahī he oho mai Ēfeto. ²²I tomo era te pahī ki Tētārea, he oho a Pauro ki Hērutarema mo 'aroha ki te nūna'a taŋata o ira haka moe i te mana'u 'i ruŋa i a Ietū, 'e mai ira i oho ai ki Antiokia.

He e'a he oho haka 'ou a Pauro mo haka haŋu i te nu'u taina

²³I oti era te noho 'i ira me'e rahi mahana, he e'a haka 'ou he oho ki kona era ki kona era o Karatia 'e o Firi-hia, e haka haŋu e oho era i te nu'u taina ta'ato'a o rā ŋā kona mo haka moe mo oho i te rāua mana'u 'i ruŋa i a Ietū.

He tātara iŋa o 'Āporo 'i Ēfeto

²⁴'I rā ŋā mahana, he tu'u ki Ēfeto te taŋata hūrio e tahi te 'iŋoa ko 'Āporo o te kona ko Arehantāria. Te taŋata nei ko 'ite riva-riva 'ā mo vānaŋa 'e ko 'ite riva-riva 'ana i te me'e o ruŋa 'i te [Pāpa'i Mo'a]. ²⁵Ko hāpī 'ā o ruŋa o te ara o te 'Atua. E vānaŋa era hai māhatu 'e hai tī-tika o ruŋa i a Ietū, ka ai atu tā'ana me'e 'ite ko te me'e hāpī nō era e [Iovani] hora papatito era i te taŋata.

²⁶He ha'amata ia he vānaŋa a 'Āporo hai pūai 'i roto i te hare pure hūrio. He ŋaro'a ia e Pīrisira ararua ko 'Ākira. I oti era tā'ana tātara, he to'o a te tapa 'e he 'ata haka anā-anā e kuā Pīrisira o ruŋa i te ara o te 'Atua.

²⁷I haŋa era a 'Āporo mo oho ki Ākāia, he hā'ū'ū e te nu'u taina hai pāpa'i ki te nu'u haka moe i te mana'u 'i ruŋa i a Ietū o rā kona mo hāpa'o riva-riva. I tu'u era a 'Āporo ki Ākāia, hai hāpī 'ā'ana i 'ata haka haŋu ai i te nu'u ko haka moe era 'ana, hai riva rahi o te 'Atua, i te rāua mana'u 'i ruŋa i a Ietū. ²⁸'I mu'a i te nu'u ta'ato'a, e haka 'ite e oho era a 'Āporo i te hape o te me'e kī e te hūrio, 'e hai me'e pāpa'i 'i ruŋa i te Pāpa'i Mo'a e haka take'a era: he parauti'a a Ietū he Kiritō.

'I Ēfeto a Pauro

19 'I te hora o 'Āporo 'i Kōrinto 'ā, he kona o Ākāia, 'ai a Pauro e oho era a te kona ma'uŋa 'ātā ka

tu'u rō ki Ēfeto. ¹I ira i piri ai ki te tētahi nu'u [haka moe i te mana'u] 'i ruŋa i te 'Atua. ²He 'ui ki rā nu'u:

—I haka moe era a kōrua i te mana'u 'i ruŋa i te 'Atua, ʒi topa rō atu te [Vārua Maitai] ki ruŋa i a kōrua?

He pāhono e rā nu'u:

—Kai ŋaro'a 'ā e mātou i te vānaŋa o ruŋa o te Vārua Maitai.

³He 'ui haka 'ou e Pauro:

—I [papatito] era i a kōrua, ʒ'i ruŋa i te aha kōrua i haka noho ai i te mana'u?

He pāhono e rā nu'u:

—'I ruŋa i te hāpī 'a Iovani Papatito.

⁴He kī e Pauro:

—He anjī 'ā, a Iovani i papatito rō i te nu'u huri i te rāua mana'u ki te 'Atua haka tapa mai roto i te me'e ta'e tano. 'E i kī tako'a rō e ia mo haka moe i te mana'u 'i ruŋa i te kope 'i tu'a i a ia ka tu'u era, te aura'a, ko Ietū.

⁵I ŋaro'a era i te ŋā me'e nei, he haka papatito i a rāua hai 'iŋoa o Ietū Kiritō mo haka 'ite ko haka moe 'ā a rāua i te mana'u 'i ruŋa i a Ietū. ⁶I haka puā era e Pauro i te rima, he turu tako'a ki ruŋa i rā nu'u te Vārua Maitai 'e he ha'amata he vānaŋa hai 'arero kē-kē, 'e he kī i te me'e i haka vānaŋa e te 'Atua. ⁷Te nu'u nei ko roto i te ho'e 'ahuru mā piti ŋāŋata.

⁸'I roto i te 'āva'e e toru te aŋa 'a Pauro he oho ki te [hare pure hūrio], he haka 'ite i te [roŋo riva-riva o te 'Atua] 'ina he ri'a-ri'a. He vānaŋa 'e he tātāke ananake ko te ŋāŋata o ira 'i te haŋa mo anjī-anjī e rāua o ruŋa i te [haka tere iŋa 'āpī o te 'Atua].

⁹'I rā kona te tētahi nu'u pū'oko hio-hio 'ina he haŋa mo haka moe i te mana'u 'i ruŋa i a Ietū. Te aŋa nō he vānaŋa rake-rake 'i mu'a o te taŋata o ruŋa i te [Ara 'Āpī] hāpī e Ietū. 'O ira a Pauro i haka tapa ai mai muri i rā nu'u, 'e he ma'u i te nu'u haka moe i te mana'u 'i ruŋa i a Ietū ki te hare hāpī o te taŋata te 'iŋoa ko Tirano. 'I ira e vānaŋa era o ruŋa i te 'Atua paurō te mahana. ¹⁰Pē ira i aŋa ai e rua matahiti. Hai me'e nei te nu'u ta'ato'a noho 'i te ŋā kona era o 'Ātia, [hūrio] 'e ta'e hūrio, i 'ite ai o ruŋa i te roŋo riva-riva o te 'Atua.

¹¹Te 'Atua e aŋa era i te mana hai Pauro ta'e ko te mana ena e take'a rahi rō 'ā. ¹²E ora rō 'ā, pa'i, te māui-ui 'e e e'a rō 'ā te tātāne mai roto i te nu'u hai ma'u nō ki a rāua e te tētahi i te haro'i 'e i te kahu puā e te hakari o Pauro.

¹³I ai rō te tētahi nu'u hūrio te aŋa he oho ki kona era ki kona era he haka e'a he oho i te tātāne mai roto i te nu'u. 'I te haŋa mo haka e'a i te tātāne hai 'iŋoa o Ietū he me'e: «ʒiHe kī atu a mātou hai Ietū, kope haka 'ite e Pauro, ka e'a kōrua ki haho!».

¹⁴He me'e nei te me'e i aŋa e te ŋāŋata e hitu, he ŋā poki o te taŋata hūrio ko 'Ēkeva, he [oromatu'a rarahi] e tahi. ¹⁵I tano era te mahana he pāhono e te tātāne e tahi: «Ko 'ite 'ana e au ko ai a Ietū 'e ko ai a Pauro; 'e, ʒko ai ia a kōrua?».

¹⁶'I tū hora 'ā he rere ki ruŋa i tū ŋā poki era tū taŋata uru era e te tātāne 'e he tiŋa'i ki te pi'i-pi'i. He e'a ia he tē-tere tū ŋā kope era mai te hare 'i ira a rāua ko 'ota-'ota riva-riva 'ā 'e 'ina e tahi kahu uru. ¹⁷He 'ite tahi tū me'e era e te nu'u ta'ato'a o Ēfeto, ka hūrio 'e ka ta'e hūrio, 'e he ri'a-ri'a tahi rō atu 'ai. Pē ira i 'ata 'ite ai 'e i 'ata mo'a ai i te 'iŋoa o Ietū.

¹⁸Me'e rahi nu'u haka moe iho i te mana'u 'i ruŋa i a Ietū i haka 'ite, 'i mu'a o te taŋata, i te rāua me'e ta'e tano ta'ato'a aŋa. ¹⁹'E me'e rahi nu'u i aŋa i te tahu-tahu i ma'u i te rāua puka i tutu 'i mu'a o te taŋata ta'ato'a. Te hauha'a o tū puka ta'ato'a era e pae 'ahuru ta'utini tara 'aurī. ²⁰Pē ira i 'ata 'ite 'e i 'ata pūai ai te vānaŋa o te 'Atua.

²¹I oti era te ŋā me'e nei, he mana'u a Pauro mo oho ki Mātērōnia 'e ki Ākāia, 'e mai ira ki Hērutarema. He kī: «Kī tu'u a au ki Hērutarema he oho a au ki Roma».

²²He uŋa ia ki Mātērōnia e rua taŋata hā'ū'ū ki a ia ko Timoteo ararua ko Erato, 'e ko ia i 'ata noho 'i 'Ātia.

He haka tumu iŋa i te ture 'i Ēfeto

²³'I rā ŋā mahana i ai rō te ture nui-nui 'i Ēfeto o ruŋa o te Ara 'Āpī hāpī e Ietū, ²⁴o te taŋata ko Temeterio, taŋata aŋa i te me'e hai parata i haka tumu. Te me'e aŋa 'ā'ana he hare pure riki-riki pa he hare pure o te 'atua vahine o rāua ko Aratemita. † Hai rā aŋa e rahi era te moni rava'a e te nu'u aŋa 'i te parata. ²⁵He haka taka-taka e Temeterio i te nu'u aŋa ki a ia ananake ko te tētahi nu'u te rāua aŋa pa he aŋa era 'ā 'ā'ana he kī:

«Ko 'ite 'ana kōrua a tātou e riva-riva ena hai aŋa nei. ²⁶Ke ŋaro'a 'ana 'e ko take'a 'ā e kōrua te taŋata ena ko Pauro nā e kī e oho 'ana: te me'e aŋa e te taŋata mo 'atua ta'e he 'atua. I rahi rō te taŋata i haka roŋo 'e i mana'u pē ira, ta'e nō 'i nei 'i Ēfeto, 'i te kona ta'ato'a o 'Ātia. ²⁷Te me'e era he 'ati e tahi. E ko rava'a moni haka 'ou tātou, 'e te hare pure o te tātou 'atua nui-nui ko Aratemita, ha'amuri 'i te kona ta'ato'a o 'Ātia 'e 'i te henua ta'ato'a, e ko hauha'a haka 'ou 'e e ko ha'amuri haka 'ou ki a ia».

²⁸I ŋaro'a era i te ŋā me'e nei, he riri tahi rō atu 'ai ananake 'e he ohu-ohu: «ʒiKo te nui-nui te 'atua o tātou o te Ēfeto ko Aratemita!».

²⁹Kai roa he 'ite te nu'u ta'ato'a o rā kona o ruŋa i tū me'e era 'e he mira-mira rō atu 'ai te mana'u. He 'a-'aru ia i a Kāio ararua ko Aritarako, he ŋāŋata o Mātērōnia oho 'i muri i a Pauro, he to-toi he oho ki te kona nui-nui e tahi aŋa mo taka-taka o te taŋata.

† ARATEMITA he 'iŋoa o te 'itoro kī e te nu'u o 'Ātia he 'atua. Te 'iŋoa haka 'ou o Aratemita ko Riana.

³⁰ A Pauro i haŋa rō mo māroa 'e mo vānaŋa 'i mu'a i te taŋata o rā kona, 'e kai ha'atī'a e te nu'u haka moe i te mana'u 'i ruŋa i a Ietū. ³¹ 'I roto i te nu'u ra-rahi o 'Ātia te nu'u repahoa o Pauro; o rāua i haka uŋa i kī mo ta'e uru ki rā kona.

³² Te nu'u taka-taka 'i roto ko mira-mira atu 'ana te mana'u. Me'e kē e kī era e te nūna'a e tahi 'e me'e kē e kī era e te rua, 'e te rahi ra'a 'ina he 'ite he aha te tumu o rāua i taka-taka ai.

³³ I oho era he haka 'ite e te tētahi nu'u i te tumu o tū ture era ki a Arehantaro. A ia he taŋata i tono e te hūrio ki mu'a o te ta'ato'a mo vānaŋa. He ha'aaura'a ia e Arehantaro hai rima mo mo-mou tahi ki riva ai a ia mo vānaŋa mo te riva-riva o te hūrio. ³⁴ 'I 'ite era e rā nu'u he hūrio tako'a a ia, e rua hora tūma'a i ohu-ohu ai: «jKo te nui-nui te 'atua o tātou o te ēfeto ko Aratemīta!».

³⁵ He e'a ia te taŋata ra-rahi e tahi o Ēfeto he haka haumārū i te nu'u taka-taka 'i ira 'e he kī:

«E te taŋata o Ēfeto ē, ko 'ite tahi 'ana te nu'u ta'ato'a pē nei ē: o te taŋata o nei te hāpa'o i te hare pure o te 'atua hōnui o tātou ko Aratemīta 'e i te me'e mo'a tu'u pē ia viri mai mai te raŋi. ³⁶ 'Ina e tahi taŋata mo kī ta'e he parauti'a te me'e nei. 'O ira, ka noho; 'ina ko aŋa e tahi me'e kai mana'u riva-riva hia. ³⁷ Te nāŋata ma'u mai nei e kōrua, 'ina kai aŋa i te me'e ta'e tano ki te hare pure o te tātou 'atua ko Aratemīta 'e kai kī i te vānaŋa rake-rake mō'ona.

³⁸ »Mo ai o te ture o kuā Temeterio mo te taŋata e tahi, nā te hare ture nā 'e te nāŋata pū'oko haka tere o ira; ka horo te ture mo u'i i a ai te parauti'a. ³⁹ 'E mo ai o te kōrua me'e kē mo vānaŋa, e kī 'i te nā mahana ha'ata'a era e tātou mo vānaŋa o ruŋa i te tātou me'e. ⁴⁰ Te me'e topa nei 'i aŋarīnā e tano nō mo tuhi mai e te rōmano he nu'u haka tumu ture a tātou, 'e mo 'ui tā'ue mai, 'ina e tahi me'e o tātou mo kī he aha te tumu o nei riri».

I oti era he kī ki te taŋata mo o-oho rō 'ai.

He oho iŋa o Pauro ki Mātērōnia 'e ki Keretia

20 I oti era tū ture era, he to'o e Pauro a te tapa i te nu'u [haka moe i te mana'u] 'i ruŋa i a Ietū 'e he hatu mo haka pūai mo oho nō i te mana'u. He 'aroha ia ki rā nu'u 'e he e'a he oho ki Mātērōnia. ² 'I te kona ta'ato'a tu'u o'ona e haka haŋu e oho era i te taina hai vānaŋa 'ā'ana. He tu'u ia 'i tō'ona ara ki Keretia, ³ 'e 'i ira i noho ai e toru 'āva'e.

E oho 'ā ia a Pauro mo eke ki ruŋa i te pahī mo oho ki Tīria i 'ite ai e haŋa rō 'ā te tētahi nu'u [hūrio] ra-rahi mo aŋa i te me'e rake-rake ki a ia. 'O ira i mana'u ai mo oho a ruŋa i te henua 'ā, 'e a Mātērōnia i vari ai.

⁴ 'I muri i a Pauro i oho tako'a ai a Topatere o Vērea, poki 'a Piro; a Aritarako 'e a Sekuntano o Tētārōnika, a Kāio o Reve, a Timoteo, a Tīkiko 'e a Toropimo o 'Ātia. ⁵ I tu'u era ki Fīripo, he nā taina nei i oho ra'e a ruŋa i te pahī ki Toroare, 'e 'i ira i tiaki mai ai.

⁶ A māua, ki oti te [ŋoŋoro kai i te haraoa 'ina he re-vaura], i oho iho ai mai Fīripo 'i ruŋa i te pahī 'e, 'i te rima mahana, i piri tahi ai a mātou 'i Toroare. 'I ira i noho ai a mātou e hitu mahana.

'I Toroare a Pauro

⁷ 'I te mahana ra'e o te tāpati, he mahana tāpati, he taka-taka a mātou mo kai i te haraoa, he me'e mo mana'u ki te mate iŋa o Ietū, 'e ko Pauro i noho i vānaŋa ki te nu'u haka moe i te mana'u 'i ruŋa i a Ietū. 'I te ai he oho 'i te rua mahana, he 'ata haka roa-roa i tā'ana vānaŋa 'ātā ki te 'ahuru mā piti o te pō. ⁸ I taka-taka ai a mātou 'i roto 'i te piha e tahi o ruŋa e mā'eha rō 'ā 'i te rahi o te hakari'i.

⁹ E tahi poki tane 'āpī te 'iŋoa ko Eutiko e noho rō 'ana 'i te titi o te ventana. 'I te roa o tū vānaŋa era 'a Pauro, he paŋaha'a 'i te ha'uru 'e he viri mai tū piha era 'i te toru kāuŋa o ruŋa. I ma'u era a ruŋa i tū poki era, he take'a ko mate 'ā. ¹⁰ He topa ia a Pauro, he moe a ruŋa 'e he ha'i i rā poki. He kī ki tū nu'u taina era: «'Ina kōrua ko ri'a-ri'a; ko ora haka 'ou mai 'ā».

¹¹ I oti era he hoki tahi ananake ko kuā Pauro ki roto i tū piha era, he mo-more i te haraoa, he ka-kai, 'e he vānaŋa he oho haka 'ou a Pauro 'ātā ki te rua mahana. I 'ōtea era he e'a he oho rō 'ai.

¹² Ko to'o atu 'ā te koa, he ma'u e te tētahi o rā nu'u i tū poki era e ora rō 'ā ki tō'ona hare.

He oho iŋa o kuā Pauro mai Toroare ki Mīreto

¹³ 'I te haŋa o Pauro mo oho atu a ruŋa i te henua, 'i ra'e a mātou i oho ai a ruŋa i te pahī ki Ātō, pa he me'e ha'a'au e mātou. 'I ira ana piri haka 'ou. ¹⁴ I piri era a mātou ki a Pauro 'i Ātō, he eke mai ki ruŋa i te pahī 'e mai ira i oho ai ki Mitirene. ¹⁵ Mai ira i reva ai 'e, 'i te rua mahana o te oho, he vari a mātou a mu'a o te motu ko Kio. 'I te toru mahana i tu'u ai ki te kona 'uahu o te motu ko Tamo. 'E 'i te hā mahana i tu'u ai ki Mīreto. ¹⁶ I aŋa ai pē nei he ta'e haŋa o Pauro mo oho ki Ēfeto 'o noho rahi 'i 'Ātia; e haŋa rō 'ana, pa'i, mo tu'u hōrou ki Hērutarema ki te mahana o te [Peneketote].

He vānaŋa iŋa o Pauro ki te nu'u o Ēfeto

¹⁷ 'I Mīreto a mātou, he uŋa e Pauro ki Ēfeto mo oho mai o te nāŋata he pū'oko haka tere o te nu'u haka moe i te mana'u 'i ruŋa i a Ietū. ¹⁸ I tu'u atu era ananake he kī e Pauro:

«A kōrua e 'ite rō 'ana pē hē a au e noho era 'i muri i a kōrua mai te mahana ra'e tu'u atu o'oku ki 'Ātia. ¹⁹ Te mahana te mahana i noho atu ai a au 'i roto i a kōrua e aŋa 'ā i te aŋa o te 'Atua pa he kope ta'e mana'u i hau rō atu ki te rua koia ko pariŋi tō'oku matava'i. I ha'aoroma'i rō au i te rahi o te 'ati topa mai, he rava aŋa mai o te hūrio ra-rahi i te me'e rake-rake. ²⁰ 'E i ha-ka 'ite tahi rō atu a au i te me'e mo te kōrua riva-riva; 'ina kai na'a e tahi me'e. E hāpī atu era 'i mu'a i te taŋata ta'ato'a 'e 'i te kōrua hare. ²¹ Ki te hūrio 'e ki te

nu'u ta'e he hūrio e kī era e au mo huri o te mana'u ki te 'Atua 'e mo haka moe i te mana'u 'i ruŋa i te tātou Pū'oko Haka Tere ko Ietū.

²² »E hora nei, 'i a au he oho ki Hērutarema, o te [Vārua Maitai] i kī mai, 'e kai 'ite riva-riva a au he aha he aha te me'e ka topa mai era 'i ira. ²³ Te me'e nō 'ā'aku i 'ite: 'i te kona ta'ato'a oho ō'oku, e haka 'ite rō mai 'ana e te Vārua Maitai: te me'e tiaki mai 'i Hērutarema he hare ma'u'aurī 'e he rauhuru haka 'ou atu o te 'ati. ²⁴ Te me'e era 'ina e au he tapa atu, ka ai atu he mate a au. Te me'e haŋa nō 'ā'aku he haka oti tahi hai koa i te aŋa va'ai mai e Ietū, he haka 'ite he oho i te roŋo riva-riva o ruŋa i te riva rahi o te 'Atua.

²⁵ »Ko 'ite 'ana e au, 'i te hora nei, 'ina e tahi o kōrua o te nu'u haka 'ite atu e au o ruŋa o te [haka tere iŋa 'āpī o te 'Atua] mo take'a haka 'ou i a au. ²⁶ 'O ira i haŋa ai a au mo kī atu 'i 'aŋarīnā: mo haka ūtu'a e tahi o kōrua e te 'Atua, ta'e ō'oku te hape. ²⁷ Ko haka 'ite tahi atu 'ana, pa'i, a au i te me'e haŋa o te 'Atua; 'ina kai na'a atu e tahi me'e.

²⁸ »'O ira, e u'i 'o haka tapa kōrua mai te hāpī pa-rauti'a o te 'Atua, 'e e hāpa'o te nu'u ta'ato'a haka moe i te mana'u 'i ruŋa i a Ietū va'ai atu e te Vārua Maitai ki a kōrua ki te nu'u pū'oko haka tere o te nu'u ha'ata'a e te 'Atua mā'ana, mo hāpī riva-riva e kōrua. A rāua, pa'i, he nu'u ho'o e ia hai toto mau era 'ā ō'ona.

²⁹ »Ko 'ite 'ana e au ka oho nei a au, e tu'u rō mai tē-tahi taŋata e haŋa rō 'ā mo haka kore i te nu'u haka moe i te mana'u 'i ruŋa i a Ietū pa he haka kore iŋa o te paiheŋa taehae i te māmoē. ³⁰ Mai roto i a kōrua mau 'ā ka e'a tako'a mai ena tētahi nu'u he hāpī i te me'e reo-reo, mo oho o te nu'u haka moe i te mana'u 'i ruŋa i a Ietū 'i muri i a rāua.

³¹ »'O ira, e u'i 'o haka tapa kōrua mai te hāpī pa-rauti'a o te 'Atua. E mana'u pē hē a au e hāpī atu era e tahi e tahi o kōrua, te pō te 'ōtea, 'i roto i te matahiti e toru. 'E i rahi rō te mahana i taŋi ai a au mo kōrua.

³² »Hora nei, e kuā taina ē, he va'ai a au i a kōrua ki te rima o te 'Atua mo hāpa'o, 'e he ani atu mo ma'u mo oho nō kōrua i te roŋo hāpī atu era e au o ruŋa i te riva rahi o te 'Atua. 'I te roŋo nei te pūai mo 'ata haka hio-hio i te kōrua mana'u 'i ruŋa i a Ietū ki rava'a ai i te me'e ta'ato'a hōrea e te 'Atua mo te nu'u ha'ata'a mā'ana.

³³ »Ki te hora hope'a kai fi'i'i a au ki te moni 'e ki te kahu o tētahi. ³⁴ A kōrua e 'ite riva-riva rō 'ana: hai rima mau nei 'ā ō'oku e aŋa era mo rava'a i te me'e mo mātou ko te nu'u o muri i a au. ³⁵ Hai haka tere iŋa nei ō'oku e haka 'ite atu era pē hē tātou ana aŋa mo rava'a mai o te me'e, ki riva ai a tātou mo hā'ū'ū ki te nu'u 'ina e tahi rāve'a. E haka topa te kōrua mana'u ki te vānaŋa kī e Ietū: "I hau te rahi o te koa mo va'ai ō'ou ki te rua ki te to'o mai ana va'ai atu".

³⁶ I oti era te kī i te ŋā me'e nei, he tū-turi a Pauro ananake ko tū nu'u ta'ato'a era he pure. ³⁷ He ta-taŋi tahi rō atu 'ai ananake, he ha'i i a Pauro he hoŋi ³⁸ ko more manava tahi 'ana 'o te kī e Pauro e ko take'a ha-

ka 'ou e rāua i a ia. I oti era he uŋa tahi i a Pauro ki te kona pahī era.

He oho iŋa o Pauro ki Hērutarema

21 I hoki era tū ŋā taina era, he eke a mātou ki ruŋa i te pahī 'e he oho tī-tika ki Kō. 'I te rua mahana i oho ai ki Rora, 'e mai ira ki Pātara. ² 'I Pātara a mātou i 'ite ai he e'a te pahī e tahi ki Fenitia. He eke a mātou ki ruŋa he oho.

³ 'I te oho iŋa he take'a mai te motu era ko Tīpere 'i te pā'iŋa mai, 'e ko te oho iŋa 'ā a mātou ki te henua era ko Tīria. 'I te ai o te me'e o ruŋa o te pahī mo haka topa 'i Tiro, he tomo 'i ira.

⁴ He piri ia a mātou ki te nu'u [haka moe i te mana'u] 'i ruŋa i a Ietū o ira, 'e he noho 'i muri i a rāua e hitu mahana. He kī e rā nu'u ki a Pauro, hai vānaŋa i haka 'ite e te [Vārua Maitai], mo ta'e oho ki Hērutarema.

⁵ I oti era te ŋā mahana nei, he e'a a mātou mo oho. Te nu'u taina ta'ato'a ananake ko te rāua ŋā vi'e 'e ŋā poki he uŋa i a mātou 'ātā ka tu'u rō ki te taha-taha o te tai. 'I ira a mātou i tū-turi i pure tahi ai. ⁶ I oti era te 'aroha, he eke a mātou ki ruŋa i te pahī, 'e he hoki rā nu'u ki te rāua hare.

⁷ Mai Tiro i reva ai a mātou ki Toremaira. I tu'u era he 'aroha ki te nu'u taina, 'e he noho 'i muri i a rāua e tahi mahana.

⁸ 'I te rua mahana he e'a a mātou mai ira he oho ki Tētārea ki te hare o Feripe, 'e 'i muri i a ia i noho ai. A Feripe he taŋata haka 'ite i te [roŋo riva-riva o te 'Atua]. A ia o roto o te ŋāŋata hoko hitu hā'ū'ū i te aŋa o te ['āpōtoro]. ⁹ A Feripe e hā 'ā'ana ŋā poki vahine tau-re'a-re'a. Rā ŋā poki he perofeta, e vānaŋa rō 'ana i te me'e haka 'ite e te 'Atua.

¹⁰ Ko rahi atu 'ā te mahana o mātou 'i Tētārea i tu'u atu ai mai Hūrea te perofeta e tahi te 'iŋoa ko Ākapo.

¹¹ I piri mai era ki a mātou, he to'o i te pena o Pauro, he here-here i tō'ona rima i tō'ona va'e 'e he kī: «O te Vārua Maitai i haka 'ite mai e here-here rō pē nei e te [hūrio] 'i Hērutarema i te taŋata ō'ona te pena nei, 'e 'ai ka va'ai ki te rima o te hau kē».

¹² I ŋaro'a era e mātou 'e e te nu'u o Tētārea i te me'e nei, he ani ki a Pauro mo ta'e oho ki Hērutarema. ¹³ He pāhono mai e Pauro: «¿He aha rā a kōrua e haka mae ena i tō'oku māhatu hai taŋi o kōrua? Ta'e nō mo here-here a au e noho atu ena, 'ātā mo mate tako'a 'i Hērutarema o ruŋa i a Ietū, he Pū'oko Haka Tere o tātou».

¹⁴ 'I te ta'e rava'a mo haka noho i a Pauro, he haka rē e mātou 'ai ka kī: «Ka ai pe he me'e o te 'Atua i haŋa».

¹⁵ I oti era te mātou mahana 'i Tētārea, he haka riva-riva 'e he e'a he oho ki Hērutarema. ¹⁶ I oho tako'a rō atu 'i muri i a mātou te tētahi nu'u o Tētārea haka moe i te mana'u 'i ruŋa i a Ietū. O rāua a mātou i ma'u ki te hare o te taŋata e tahi o Tīpere te 'iŋoa ko Nātone, taŋata haka moe tako'a i te mana'u 'i ruŋa i a Ietū mai mu'a 'ā, 'e 'ā'ana i va'ai mai hai kona mo moe 'i tō'ona hare.

He oho a Pauro he u'i i a kuā Tanatiako

¹⁷ I tu'u era a mātou ki Hērutarema, he oho atu te taina ta'ato'a, e koa rō 'ā, he to'o mai i a mātou. ¹⁸ I te rua mahana he ma'u e Pauro i a mātou 'i muri i a ia mo u'i i a [Tanatiako] 'e i te tētahi atu nu'u pū'oko haka tere o te nūna'a taŋata haka moe i te mana'u 'i ruŋa i a Ietū o Hērutarema.

¹⁹ I piri era a mātou ki rā nu'u, he 'aroha e Pauro, 'e he 'a'amu i te me'e ta'ato'a aŋa e te 'Atua hai ia ki te nu'u ta'e he hūrio. ²⁰ I ŋaro'a era i tū vānaŋa era, he ha'ahana-hana tahi ananake ki te 'Atua. He kī ia e tū nu'u era ki a Pauro:

«E te taina, ko 'ite 'ana e koe ka ta'utini ka ta'utini te nu'u hūrio haka moe i te mana'u 'i ruŋa i a Ietū, 'e ta'ato'a e kī rō 'ana mo ma'u mo oho nō o tātou i te [haka tere iŋa 'a Mōtē]. ²¹ I ŋaro'a rō e rāua e hāpī e oho 'ana koe ki te hūrio ta'ato'a noho i te tētahi henua mo ta'e ha'atura haka 'ou ki te haka tere iŋa 'a Mōtē, mo ta'e hore o te kiri o te kionoŋa o te ŋā poki, 'e mo ta'e ma'u haka 'ou i te tātou haka tere iŋa. ²² He aha te tātou me'e mo aŋa 'o mana'u he parauti'a mau 'ā te rāua me'e ŋaro'a era? E 'ite nō, pa'i, e te nu'u 'i koe ko tu'u mai 'ā.

²³ »; Ko 'ite 'ā koe? 'I roto i a mātou te ŋāŋata hoko hā 'i he haka mao i te rāua hōrea. Te me'e 'ā'au mo aŋa: ²⁴ ka ma'u 'i muri i a koe, ka [haka ma'itaki] kōrua mo haka tano ki te haka tere iŋa o tātou o te hūrio. E 'auhau te rāua me'e mo tūtia, ki riva ai a rāua mo haka varu i te pū'oko mo haka take'a ko oti 'ā te rāua hōrea. Pē ira te nu'u taina hūrio ka u'i ena he reo-reo te vānaŋa kī o ruŋa i a koe, 'e he 'ite ko te ha'atura iŋa 'ā a koe i te haka tere iŋa 'a Mōtē.

²⁵ »E, a koe ko 'ite 'ana ko pāpa'i ko haka 'ite 'ā a mātou ki te nu'u ta'e he hūrio haka moe i te mana'u 'i ruŋa i a Ietū i te mātou mana'u: te rāua me'e nō mo ma'u o te haka tere iŋa 'a Mōtē ko te ŋā me'e nei: 'ina ko kai i te kiko tūtia ki te 'ītoro, i te toto, 'e i te kiko o te 'animare kai haka hihi i te toto, 'e 'ina ko piri tane mo ta'e ai he kenu he vi'e».

He 'a-'aru iŋa i a Pauro

²⁶ He ma'u ia e Pauro i tū ŋāŋata era hoko hā 'i muri i a ia. 'I te rua mahana he oho ananake he ha'amata he haka ma'itaki, pa he me'e kī 'i ruŋa i te rāua haka tere iŋa. He uru ia ananake ki te [Kona Ha'amuri 'Atua], he haka 'ite ki te [oromatu'a] a hē ka tano te hitu mahana o te rāua haka ma'itaki, he mahana mo va'ai i te rāua tūtia.

²⁷ I hāhine era mo tano o tū hitu mahana era, he take'a e te tētahi nu'u hūrio o 'Ātia i a Pauro 'i te Kona Ha'amuri 'Atua 'e he haka riri i te nu'u. He rere he 'a-'aru i a Pauro, ²⁸ koia ko ohu:

«ĪE te itaraera ē, ka hā'ū'ū mai kōrua! O te taŋata nei te hāpī te oho ki te nu'u 'i te kona ta'ato'a i te me'e 'i-na he tano ki a tātou ki te hūrio, ki te haka tere iŋa 'a

Mōtē 'e ki te Kona Ha'amuri 'Atua. 'E 'ātā i ma'u rō mai, 'i te mahana e tahi, i te nu'u ta'e he hūrio ki roto i te kona o te hare nei o te 'Atua ta'e ha'ati'a ki te nu'u ta'e he hūrio, 'e hai rā me'e i aŋa ai i te me'e ta'e tano mo te kona mo'a nei».

²⁹ I kī ai pē ira he take'a i a Pauro 'i te rua kona 'i muri i a Torofimo, taŋata o Ēfeto. He mana'u e rā nu'u i ma'u rō e Pauro i rā taŋata ki roto i te Kona Ha'amuri 'Atua.

³⁰ Te nu'u o te kona ta'ato'a o Hērutarema, i 'ite era i tū me'e era, he riri rō atu 'ai 'e i tāhuti i oho ai ki ira. He 'a-'aru i a Pauro, he to-toi he oho ki haho o te Kona Ha'amuri 'Atua, 'e he puru i te 'ōpani. ³¹ E oho 'ana ia rā nu'u mo tiŋa'i mo haka mate i a Pauro 'i ko tu'u 'ā ki te kōmana o te va'ehau rōmano te parau 'āpī pē nei ē: te nu'u ta'ato'a o Hērutarema ko riri 'ana. ³² He haka taka-taka te kōmana i tā'ana va'ehau 'e i te nu'u kape, he tāhuti he oho ki tū kona era 'i ira rā nu'u.

I take'a era ananake i te kōmana 'e i te va'ehau, he haka rē i a Pauro, 'ina kai tiŋa'i haka 'ou. ³³ He haka hāhine tū kōmana era, he 'a-'aru i a Pauro, he kī mo here-here hai vivi e rua. I oti era he 'ui ko ai a ia 'e he aha tā'ana me'e i aŋa.

³⁴ Me'e kē me'e kē e kī era e te nu'u. 'Ina he aŋi-aŋi e tū kōmana era i te tī-tika o tū ture era 'i te rahi o te pōŋeha. 'O ira i haka ma'u ai i a Pauro ki te kona noho o te va'ehau.

³⁵ Ko hāhine 'ana mo eke ki ruŋa i te ara o rā kona he 'amo a ruŋa e te va'ehau i a Pauro 'o tōtōā e te nu'u ³⁶ 'o te ai 'i tu'a e oho era koia ko ohu-ohu: «ĪKa tiŋa'i ki te mate!».

He tātara iŋa o Pauro ki te taŋata

³⁷ Ka oho mo ha-ha'o i a Pauro ki roto i tū hare era o te va'ehau, ka 'ui e Pauro ki tū kōmana era:

—ĪE tano rō au mo vānaŋa 'iti-'iti atu?

He pāhono e tū kōmana era:

—ĪKo 'ite 'ana 'ō koe i te vānaŋa [kirieko]? ³⁸ ĪTa'e 'ō koe he ehipto haka tumu era i te ture 'i mu'a 'ā oho ki roto i te kona 'one ta'e noho taŋata e ma'u rō 'ā e ma-ha ta'utini taŋata taparahi-ta'ata mo te tama'i?

³⁹ He pāhono e Pauro:

—A au he hūrio o te kona era ko Taraso o Tiritia, he taŋata o te kona ta'e 'iti-'iti. He ani atu au mo ha'ati'a mai 'ō'ou mo vānaŋa 'ō'oku ki te taŋata.

⁴⁰ He ha'ati'a ia e tū kōmana era. He māroa a Pauro 'i ruŋa i tū ara era, he ha'aaura'a hai rima mo mou o te taŋata. I mo-mou era he vānaŋa hai 'arero ['evereo], he kī:

22 «E kuā koro, e kuā taina ē, ka haka roŋo mai tā'aku me'e ka kī atu ena».

²I ŋaro'a era e rā nu'u e vānaŋa 'ana a Pauro hai 'arero [‘evereo], he mo-mou rō 'ai. 'E ko te vānaŋa iŋa 'ā a Pauro:

³»A au he [hūrio]. I poreko ai 'i Taraso, he kona o Tiritia, 'e 'i nei 'i Hērutarema i nui-nui ai. A Kamariera i hāpī mai i a au hai haka tere iŋa o te tātou tupuna, 'e tā'aku me'e aŋa he ha'atura hai māhatu i te me'e o te 'Atua, pa he oho iŋa ena o kōrua. ⁴'I mu'a 'ā, he kimi nō tā'aku aŋa mo tiŋa'i mo haka mate i te nu'u oho a te [Ara 'Āpī] hāpī e Ietū. Ka ai atu he vi'e 'o he taŋata i 'a-'aru i haka puru rō e au 'i roto i te hare ma'u'aurī. ⁵He [oromatu'a hope'a o te ra-rahi] 'e he nu'u pū'oko haka tere hūrio ta'ato'a te mata'ite o te ŋā me'e nei. O rāua, pa'i, i va'ai mai i te parau mo te hūrio ra-rahi o Rāmako 'i ruŋa e pāpa'i era ko ha'ati'a 'ā i a au mo aŋa i rā me'e. I oho rō a au ki ira kimi i te nu'u [haka moe i te mana'u] 'i ruŋa i a Ietū mo ma'u mai ki nei ki Hērutarema mo haka ūtu'a.

⁶»E, e oho 'ā a au 'i rā ara era ki Rāmako, pe te hora kai, ko hāhine 'ā mo tu'u ki ira, he pura mai e tahi mōrī mai te raŋi, he haka mā'eha i te kona 'i ira a au, ⁷'e he 'amo a au ki raro. He ŋaro'a ia e au i te re'o e tahi e kī mai 'ā: “E Sauro, e Sauro, ūhe aha koe e kimi mai ena i a au mo tōtōā?”.

⁸»He 'ui e au: “ŪKo ai koe?”.

»He pāhono mai e tū re'o era: “Ko Ietū o Nātāreta, kope ena e kimi 'ā e koe mo tōtōā”.

⁹»Te nu'u oho atu 'i muri i a au i take'a rō i rā mōrī, 'e, 'ina kai ŋaro'a i te me'e kī mai. ¹⁰He 'ui ia e au ki a Ietū: “ŪHe aha tā'aku me'e mo aŋa?”.

»He kī mai: “Ka e'a koe ki ruŋa, ka oho nō ki Rāmako. 'I ira ka kī atu ena i ta'a me'e ta'ato'a mo aŋa”.

¹¹»I te keva o tō'oku mata 'i tū mōrī era, he 'a-'aru i tō'oku rima e te nu'u oho 'i muri i a au, he ma'u he oho ki Rāmako. ¹²'I ira e tahi taŋata te 'iŋoa ko 'Ānānia, taŋata mo'a 'e ha'atura ki te [haka tere iŋa 'a Mōtē]. Te hūrio ta'ato'a o rā kona e vānaŋa riva-riva rō 'ā o ruŋa i a ia.

¹³»He oho atu ia rā taŋata he u'i i a au. I tu'u atu era he kī mai: “E te taina ko Sauro ē, he mā'eha tu'u mata”. 'I tū hora mau era 'ā he mā'eha, 'e he take'a e au i a ia.

¹⁴»He kī haka 'ou mai: “Te 'Atua o te tātou tupuna ko ha'ata'a 'ā i a koe mo 'ite ō'ou i tā'ana me'e haŋa, mo take'a ō'ou i a Ietū, kope tano ki tō'ona mata, mo ŋaro'a i tō'ona re'o, ¹⁵'e mo 'a'amu, 'i mu'a o te taŋata ta'ato'a o te ao, pa he mata'ite ō'ona, i ta'a me'e take'a 'e i ta'a me'e ŋaro'a mai i a ia. ¹⁶'Ina koe ko tiaki haka 'ou. Ka e'a ka haka [papatito] i a koe koia ko ani ki a Ietū mo haka kore i tu'u hara”.

¹⁷»I hoki mai era a au ki Hērutarema, he oho a au he pure 'i te [Kona Ha'amuri 'Atua], 'e he take'a e au i te me'e i haka take'a mai e ia. ¹⁸Ko Ietū rā me'e e kī mai 'ana: “Ka hōrou koe ka oho mai Hērutarema; e ko haka roŋo atu te taŋata o nā i ta'a me'e ena ka kī ena o ruŋa ō'oku”.

¹⁹»He kī e au: “E Ietū ē, ko 'ite tahi 'ana te nu'u i tā'aku aŋa o mu'a 'ā he oho ki te [hare pure hūrio]

ta'ato'a he 'a-'aru 'e he tiŋa'i he tōtōā i te nu'u haka moe i te mana'u 'i ruŋa i a koe 'e 'ai ka ma'u ka puru 'i roto i te hare ma'u'aurī. ²⁰'E hora tiŋa'i haka mate era i tu'u mata'ite ko 'Ēteva, 'i rā kona a au 'e mō'oku i tano rō rā me'e, 'e 'ātā i hāpa'o rō e au i te kahu o te nu'u tiŋa'i i a ia”.

²¹»He kī mai e Ietū: “Ka oho nō; 'i a au he uŋa i a koe ki te nu'u ta'e he hūrio noho 'i te ŋā henua ena e roa rō 'ā mai nei”.

'I te rima o te kōmana a Pauro

²²Ki te kona nō nei i haka roŋo ai e te nu'u i te tātara 'a Pauro. I oho era he ha'amata he ohu-ohu: «'I'Ina te taŋata ena ko ora! ūKa haka kore mai te ao!».

²³'I te ohu-ohu nō 'e 'i te tā-tā i te rāua kahu koia ko hoa-hoa i te 'ō'one a ruŋa, ²⁴he kī e te kōmana mo ma'u i a Pauro ki roto i tū kona era o te va'ehau 'e mo tiŋa'i hai 'uaka, ki kī ai e Pauro he aha te taŋata e riri era mō'ona.

²⁵Ko here-here ko oti 'ana mo tiŋa'i, he 'ui e Pauro ki te kape o te va'ehau 'i rā kona:

—ŪE ai rō 'ā te kōrua parau mo tiŋa'i i te taŋata rōmano kai aŋa hia e tahi ture?

²⁶I ŋaro'a era te me'e nei e te kape o te va'ehau, he oho he kī ki te kōmana:

—E u'i riva-riva koe he aha ta'a me'e ka aŋa ena. Te taŋata era he rōmano.

²⁷He haka hāhine ia tū kōmana era ki a Pauro he 'ui:

—ŪHe parauti'a mau 'ā he rōmano koe?

He pāhono e Pauro:

—'Ē-ē.

²⁸He kī e te kōmana:

—I rahi rō tō'oku moni i pau ai mo riro ō'oku he rōmano.

He kī e Pauro:

—'E, a au mai tō'oku poreko iŋa 'ā he rōmano.

²⁹'I tū hora mau era 'ā te nu'u oho mo tiŋa'i i a Pauro he haka 'ava-'ava tahi mai muri. 'E tū kōmana era ko ri'a-ri'a atu 'ā 'o te haka here-here i te taŋata rōmano hai vivi.

A Pauro 'i mu'a o te nu'u hūrio ra-rahi

³⁰'I te rua mahana, 'i te haŋa o te kōmana mo 'ite riva-riva he aha te hūrio e riri era mo Pauro, he uŋa he haka taka-taka i te oromatu'a ra-rahi 'e i te [nūna'a taŋata ta'ato'a i a rāua te kī iŋa hope'a o te haka tere

hūrio]. He kume ia i tū vivi here-here era i a Pauro, 'e he ma'u he haka māroa 'i mu'a o rā nu'u.

23 He u'i riva-riva ia a Pauro a ruŋa i tū nu'u era 'e he kī:

—E kuā taina ē, ki 'aŋarīnā he u'i nō tā'aku aŋa mo tano o tō'oku noho iŋa ki te mata o te 'Atua, 'e ki tō'oku mana'u, 'ina a au kai hape.

² He kī ia e te [oromatu'a hope'a o te ra-rahi] ko 'Ānānia ki te nu'u hāhine ki a Pauro mo haka eke hai rima ki te ŋutu. ³ He kī e Pauro:

—iHe 'ō'otu koe 'i te 'Atua, e te taŋata riva a te haho ē! Mo ai a koe e noho mai ena 'i te kona ena mo ture mai hai haka tere iŋa o te hūrio, ihe aha ia koe i haka poteko ai i nā haka tere iŋa hai kī ō'ou mo pu'a mai i a au?

⁴ He pohi e te nu'u o tū kona era:

—iPē nā koe e vānaŋa ena ki te oromatu'a hope'a o te ra-rahi?

⁵ He kī e Pauro:

—E te taina, 'ina a au kai 'ite: a ia 'ō he oromatu'a hope'a o te ra-rahi; nā, pa'i, e kī rō 'ana 'i ruŋa i te [Pā-pa'i Mo'a]: «'Ina koe ko kī i te vānaŋa ta'e tano mo te taŋata ko ia te pū'oko haka tere o te kōrua henua».

⁶ I aŋi-aŋi era e Pauro: 'i roto i tū nu'u ra-rahi era te nu'u [saruseo] 'e te nu'u [fariseo], he kī haka 'ou i haka pūai i te re'o:

—E te taina, he fariseo a au, pa he oho iŋa o tō'oku tupuna. Te māroa atu ō'oku 'i mu'a o kōrua 'i 'aŋarīnā 'o te ai he parauti'a mau 'ā mō'oku te 'Atua e haka ora rō i te taŋata mai te mate pe mu'a ka oho ena.

⁷ I kī era a Pauro i te me'e nei, he ha'amata te saruseo ananake ko te fariseo he tātake ki a rāua 'ā, 'e he topa kē-kē rō 'ai te mana'u o tū nu'u ta'ato'a era.

⁸ Te kī o te saruseo: 'ina he taŋata he ora haka 'ou mai te mate, 'ina he me'e he merahi, 'e 'ina tako'a te me'e he vārua; 'e te kī o te fariseo: e ai tahi rō 'ā te ŋā me'e nei. ⁹ Ta'ato'a e pōŋeha era. He māroa ia te tētahi [ma'ori o te haka tere hūrio], he fariseo, he kī: «Te taŋata nei 'ina kai aŋa e tahi me'e rake-rake; o te vārua 'o o te merahi pēaha i vānaŋa ki a ia».

¹⁰ I 'ata pūai era te ture, he ri'a-ri'a te kōmana 'o tiŋa'i e te nu'u i a Pauro ki te pi'i-pi'i. 'O ira i kī ai ki te va'ehau mo to'o i a Pauro 'e mo ma'u haka 'ou ki tū kona hare era o rāua.

¹¹ 'I te pō o rā mahana, he haka take'a a Ietū i a ia ki a Pauro 'e he kī: «Ka haka hio-hio koe. Pa he mata'ite iŋa ena 'ā ō'ou i a au 'i nei 'i Hērutarema, pē ira tako'a 'ana koe ka mata'ite ena o ruŋa i a au 'i Roma».

He ha'a'au iŋa mo tiŋa'i i a Pauro

¹² 'I te rua mahana he ha'a'au te tētahi [hūrio] mo tiŋa'i mo haka mate i a Pauro, 'e he hōrea mo ta'e kai 'e mo ta'e unu haka 'ou o rāua 'ātā ka rava'a rō mo tiŋa'i. ¹³ E maha 'ahuru tūma'a taŋata i hōrea ai. ¹⁴ He oho ia mo vānaŋa ki te nu'u oromatu'a ra-rahi 'e ki te nu'u pū'oko haka tere o te hūrio 'e he kī:

—Ko hōrea 'ā a mātou mo ta'e kai haka 'ou e tahi me'e 'ātā ka tiŋa'i rō e mātou i a Pauro. ¹⁵ Hora ena, ka kī e kōrua e te nu'u i a rāua te kī iŋa hope'a o te haka tere hūrio, ki te kōmana mo ma'u mai āpō i a Pauro ki mu'a o kōrua; te 'ōtohe mo u'i mo haka tī-tika riva-riva i te ture. Ki hāhine mai ki nei, he tiŋa'i e mātou 'i te ara.

¹⁶ He ŋaro'a tū vānaŋa era e te poki o te vi'e taina o Pauro, he oho ki te kona noho o te va'ehau he hā'aki ki a Pauro. ¹⁷ He raŋi ia e Pauro ki te kape e tahi o te va'ehau he kī:

—Ka ma'u koe i te poki ena ki te kōmana; nā e ai rō 'ā tā'ana me'e mo kī.

¹⁸ He ma'u ia e tū kape era i rā poki ki te kōmana 'e he kī:

—O te taŋata puru era te 'iŋoa ko Pauro i kī mai mo ma'u mai ō'oku i te poki nei; nā e ai rō 'ana tā'ana me'e mo kī atu.

¹⁹ He 'a-'aru ia i te rima o tū poki era e te kōmana, he ma'u a te tapa, he 'ui:

—iHe aha ta'a me'e mo kī mai?

²⁰ He kī e tū poki era:

—Ko ha'a'au 'ana te nu'u hūrio mo kī atu ki a koe mo ma'u haka 'ou ō'ou āpō i a Pauro ki mu'a i te [nūna'a taŋata i a rāua te kī iŋa hope'a o te haka tere hūrio], hai 'ōtohe mo u'i mo haka tī-tika riva-riva i te ture. ²¹ 'I-na koe ko haka roŋo. E maha 'ahuru tūma'a taŋata o rāua e piko mai era ko hōrea 'ana mo ta'e kai 'e mo ta'e unu 'ātā ka rava'a ka tiŋa'i ka haka mate rō e rāua i a Pauro, 'e 'ai e tiaki era; te me'e toe nō he 'ē-ē ō'ou.

²² He haka oho i tū poki era e te kōmana, he kī mo ta'e vānaŋa ki te nu'u o ruŋa o tū me'e 'a'amu era ki a ia.

He haka ma'u iŋa i a Pauro ki te suerekao

²³ He raŋi ia e te kōmana ki te kape e rua o te va'ehau, 'e he uŋa mo haka riva-riva e piti hānere va'ehau a raro 'ā, e hitu 'ahuru a ruŋa i te hoi 'e e piti hānere haka 'ou e ma'u-ma'u rō 'ana i te ransa, mo oho 'i te hora iva o te pō ki Tētārea. ²⁴ I uŋa i haka riva-riva tako'a rō hai hoi mo eke o Pauro, 'e he kī mo ma'u ki

te suerekao ko Fēriki 'e mo hāpa'o 'o topa ki a ia e tahi 'ati. ²⁵ I haka ma'u tako'a rō e tahi parau ki a Fēriki e hā'aki rō 'ā pē nei ē:

²⁶ «A Karaurio Rītia mo te suerekao ko Fēriki: 'Iorana. ²⁷ »Te taŅata ena ko 'a-'aru 'ana e te hūrio mo tiŅa'i mo haka mate. I 'ite era a au he rōmano, he oho a au ananake ko te nu'u va'ehau 'ā'aku he to'o mai mai i a rāua. ²⁸ 'I te haŅa ō'oku mo 'ite he aha te tumu o te rāua ture, he ma'u e au ki mu'a o te nūna'a taŅata i a rāua te kī iŅa hope'a o te haka tere hūrio. ²⁹ Te ture mō'ona o ruŅa o te rāua haka tere iŅa. 'Ina he hape i rava'a ki tano ai mo haka ūtu'a hai mate, 'e korohaŅa mo puru 'i roto i te hare ma'u'aurī. ³⁰ I haka ma'u atu ena e au 'o te 'ite ō'oku ko ha'a'au 'ā te hūrio mo tiŅa'i mo haka mate i a ia, 'e, ko kī 'ā a au ki te nu'u o rāua i haka tumu i te ture mo horo atu ki a koe».

³¹ Pē ira te va'ehau i ma'u ai i a Pauro 'i te pō ki Anati-patari, pe he me'e kī era mo aŅa. ³² 'I te rua mahana, he hoki tū Ņā va'ehau oho era a raro 'ā ki te kona noho o rāua 'i Hērutarema. 'E o te va'ehau oho 'i ruŅa i te hoi i ma'u i a Pauro ki Tētārea.

³³ I tu'u era he va'ai i tū parau era ki te suerekao 'e he va'ai tako'a i a Pauro. ³⁴ I oti era te tai'o i rā parau, he 'ui e te suerekao o kona hē a Pauro. I 'ite era o Tiritia, ³⁵ he kī: «Ki tu'u mai te nu'u horo i a koe, ka haka roŅo ena a au i te rāua ture mō'ou».

He kī ia mo puru i a Pauro 'i roto i te hare aŅa e ['Erore] 'e mo 'auario.

He u'i iŅa o Pauro i tō'ona ora

24 'I te rima mahana o te tu'u o Pauro ki Tētārea, he tu'u tako'a a 'Ānānia, he [oromatu'a hope'a o te ra-rahi] ananake ko te tētahi pū'oko haka tere hūrio 'e he taŅata e tahi te 'iŅoa ko Tereturo, tā'ana aŅa he vānaŅa mo te ora o te rua taŅata. He oho ia te nu'u nei ki mu'a o te suerekao ko Fēriki mo haka 'ite i te hape o Pauro. ² I ma'u era i a Pauro ki mu'a o rā nu'u, he ha'amata a Tereturo he vānaŅa o ruŅa o tū ture era 'e he kī:

—Māuru-uru ki a koe, e te suerekao ē, e riva-riva nei te mātou noho iŅa, 'e hai mārama-rama ō'ou pe te 'a-ta riva-riva nō te mātou henua. ³ Te me'e nei e take'a rō 'ana e mātou paurō te mahana 'i te kona ta'ato'a 'e e māuru-uru rō 'ā e noho nei, e te suerekao hōnui ko Fēriki ē.

⁴ »'O māu'a tu'u hora, he ani atu a au mo haka roŅo 'iti-'iti mai ō'ou. ⁵ Ki te mātou u'i te taŅata ena he 'ati e tahi: he oho nō te aŅa a te kona ta'ato'a haka tumu i te ture 'i roto i te [hūrio]. A ia he pū'oko haka tere e tahi o te nu'u ma'u i te hāpī reo-reo o tū kope era o Nātārea. ⁶ 'E, tako'a, i aŅa rō i te me'e ta'e tano mo te Kona Ha'amuri 'Atua. 'O ira i 'a-'aru ai e mātou mo haka puru. [⁷ Te haŅa mo ture hai haka tere iŅa o mātou. He tu'u atu ia te kōmana ko Rītia, he hiko i a ia mai i a mātou, 'e i kī rō ki te nu'u ai o te rāua ture mo te taŅata

ena mo horo atu ki a koe.] ⁸ Mā'au e haka 'ui ki a ia mo aŅi-aŅi e koe he parauti'a mau 'ā te mātou me'e ta'ato'a nei e kī atu ena.

⁹ Tū nu'u hūrio tu'u era ananake ko kuā Tereturo 'ai e kī era he parauti'a mau 'ā rā me'e. ¹⁰ He ha'aura'a ia e te suerekao ki a Pauro mo vānaŅa, 'e he kī e Pauro:

—Hai koa a au ka kī atu ena i te vānaŅa mo tō'oku ora. Ko 'ite 'ana a au ko rahi 'ā tu'u matahiti o te ma'u i te ture o te itaraera pa he pū'oko haka tere o te hare ture. ¹¹ Mā'au mau 'ā e 'ui ki a rāua mo 'ite ō'ou i te parauti'a; tu'u iho nō, pa'i, a au ki Hērutarema ka ho'e 'ahuru mā piti mahana a tu'a mo ha'amuri ki te 'Atua. ¹² 'E kai take'a e rāua i tō'oku haka tātake 'e haka riri iŅa i te nu'u 'i te Kona Ha'amuri 'Atua, 'i roto i te [hare pure hūrio] 'e i te tētahi kona o ira. ¹³ 'Ina e tahi me'e o te nu'u ena mo haka take'a atu he parauti'a te rāua ture e kī atu ena o ruŅa i a au.

¹⁴ »Te me'e nō 'ā'aku mo kī atu: e aŅa nei a au ki te 'Atua o te mātou tupuna hai haka tere iŅa o te [Ara 'Āpī] hāpī e Ietū, e kī ena e te nu'u ena he hāpī reo-reo. Ka ai atu pē ira, e haka moe rō 'ana a au i tō'oku mana'u ki te me'e ta'ato'a pāpa'i 'i ruŅa i te puka pāpa'i e [Mōtē] 'e e te perofeta. ¹⁵ Tō'oku mana'u pa he mana'u 'ā o rāua: mo mātou he parauti'a mau 'ana te 'Atua e haka ora rō i te taŅata mai te mate ka ai atu he taŅata aŅa i te me'e riva-riva 'o he taŅata aŅa i te me'e ta'e tano. ¹⁶ 'I te mana'u ō'oku pē ira, e u'i nei a au, paurō te mahana, mo tano o tō'oku noho iŅa ki te mata o te 'Atua 'e 'i mu'a o te taŅata.

¹⁷ »Ko matahiti atu 'ā o tō'oku oho a te tētahi henua i hoki haka 'ou ai ki Hērutarema mo va'ai i te moni ki te nu'u veve o tō'oku hau 'e, tako'a, mo aŅa i te tūtia mo te 'Atua. ¹⁸⁻¹⁹ E aŅa nō 'ana a au i rā me'e 'i te Kona Ha'amuri 'Atua i take'a ai i a au e te tētahi hūrio o 'Ātia. 'I rā hora ko oti 'ana tō'oku [haka ma'itaki], pa he haka tere iŅa o mātou o te hūrio. Nu'u ta'e rahi nō te nu'u o roto; 'ina he nu'u riri, 'e 'ina he nu'u tātake. O rā nu'u hūrio era o 'Ātia i haka tumu i te ture o ruŅa i a au, 'e mo rāua e oho mai e horo atu koi'ite e ai mau rō 'ā te rāua ture mō'oku. ²⁰ 'E mo ta'e ai pē ira, mo te nu'u ena e kī atu hoki i rava'a rō e tahi hape ō'oku 'i te hora 'i mu'a o te [nūna'a taŅata i a rāua te kī iŅa hope'a o te haka tere hūrio]. ²¹ Koi'ite te rāua riri 'o te ai hora era ō'oku 'i muri i a rāua i kī pūai rō a au pē nei ē: "E māroa atu ena a au 'i mu'a o kōrua 'i 'aŅarīnā 'i te me'e era he parauti'a mau 'ā mō'oku te 'Atua e haka ora rō i te taŅata mai te mate pe mu'a ka oho ena".

²² I Ņaro'a era e Fēriki i rā vānaŅa, he haka rē i tū ture era mo te tētahi atu mahana 'i te me'e era ko 'ite riva-riva 'ana o ruŅa o te Ara 'Āpī hāpī e Ietū. He kī: «Ki tu'u mai te kōmana era ko Rītia, ka u'i riva-riva ena a au i te kōrua ture».

²³ He kī ia e Fēriki ki te kape o te va'ehau mo 'auario nō i a Pauro, 'e he kī tako'a mo haka rē mo hā'ere-'ere a ira 'e mo ha'ati'a i tō'ona repahoa mo piri 'e mo hā'ū'ū ki a ia.

²⁴ 'I te mahana haka 'ou e tahi he tu'u a Fēriki ararua ko Rusira, he vi'e [hāipo-ipo] 'ā'ana, he hūrio. He uŅa mo kī mo oho o Pauro, 'e he no-noho he haka roŅo i tā'ana vānaŅa o ruŅa o te haka moe iŅa o te mana'u 'i ruŅa i a Ietū Kiritō. ²⁵ I vānaŅa era a Pauro o ruŅa o te noho iŅa tano ki te mata o te 'Atua, o ruŅa i te haŅa o te 'Atua mo 'ite o te taŅata mo hāito i te rāua me'e kī 'e i te rāua me'e aŅa, 'e o ruŅa o te ture hope'a o te 'Atua pe mu'a ka oho ena, he ri'a-ri'a rō atu 'ai a Fēriki 'e he kī: «ĶKo oti 'ā! Ka e'a koe ka oho. 'I tō'oku hora topa he hā'aki atu a au mo hoki mai ō'ou mo vānaŅa o tāua».

²⁶ A Fēriki e haŅa 'ā mo 'auhau o Pauro ki a ia hai moni, 'ai ka haka rē iho mo oho. 'O ira e rahi rō 'ā te mahana e uŅa e kī era ki a Pauro mo oho mo vānaŅa ararua. ²⁷ Pē ira i aŅa ai e Fēriki e rua matahiti. I oho era he e'a mai te suerekao, 'e he o'o te taŅata e tahi te 'iŅoa ko Porotio Feto. 'E, 'i te haŅa o Fēriki mo riva-riva nō ō'ona ki te mata o te hūrio, 'ina kai haka e'a i a Pauro.

A Pauro 'i mu'a o te suerekao ko Feto

25 He tu'u ia tū suerekao rōmano era ko Feto ki Tētārea, 'e 'i te toru mahana i oho ai ki Hērutarema. ² 'I ira i horo ai ki a ia e te nu'u [oromatu'a ra-rahi] 'e e te nu'u hūrio ra-rahi i te ture mo Pauro. ³ He ani e rā nu'u mo haka ma'u i a Pauro ki Hērutarema. Te mana'u mo rava'a e rāua 'i te ara mo tiŅa'i mo haka mate.

⁴ He pāhono ia e Feto: «'I Tētārea 'ā a Pauro ka noho ena. Ko mana'u 'ana, pa'i, a au mo hoki ki ira 'ina ko roa hia». ⁵ He kī haka 'ou: «E oho atu te nu'u ra-rahi o kōrua 'i muri i a au ki Tētārea, 'e mo ai o te taŅata era ko aŅa 'ā i te me'e ta'e tano, 'i ira ana horo mai i te ture».

⁶ I noho ai a Feto 'i Hērutarema e va'u 'o e ho'e 'ahuru mahana, 'e 'ai ka e'a ka hoki ki Tētārea. 'I te rua mahana o tō'ona tu'u ki ira, he uru ki roto i te hare ture, he noho mo ma'u i te ture horo ki a ia 'e he uŅa mo ma'u i a Pauro.

⁷ I uru era a Pauro, he haka hāhine ki muri te nu'u [hūrio] oho mai Hērutarema 'e he tuhi me'e rahi nō atu hape taparahi-ta'ata, ka ai atu 'ina e tahi rāua me'e mo haka take'a he parauti'a mau 'ā te me'e tuhi era e rāua. ⁸ 'Ai ia a Pauro e vānaŅa era mo tō'ona ora he kī:

—'Ina e tahi 'ā'aku me'e ta'e tano i aŅa ki te haka tere hūrio, ki te Kona Ha'amuri 'Atua, 'e ki te 'ariki rōmano.

⁹ 'I te haŅa o Feto mo riva-riva ō'ona ki te mata o te hūrio, he 'ui ki a Pauro:

—ĶE haŅa rō koe mo oho ki Hērutarema, 'i ira a au ana u'i i te ture o ruŅa i a koe?

¹⁰ He pāhono e Pauro:

—A au e noho atu ena 'i mu'a o te kona ture o te 'ariki rōmano, he kona 'i ira ana ture mai. A koe e 'ite riva-riva rō 'ā 'ina e tahi 'ā'aku me'e ta'e tano i aŅa ki te hūrio. ¹¹ Mo ai tā'ue ko aŅa 'ana a au i te me'e ta'e tano ki tano ai kōrua mo haka ūtu'a mai i a au hai mate, e tano nō ia mo mate ō'oku. 'E, mo ai ta'e he parauti'a te rāua me'e tuhi mai, 'ina e tahi taŅata i a ia te parau mo va'ai i a au ki a rāua. Tā'aku me'e haŅa: mo te 'ariki rōmano mau 'ā e ture mai i a au.

¹² He 'ui ia e Feto ki te nu'u hā'ū'ū ki a ia pē hē te rāua mana'u, 'e i oti era he kī ki a Pauro:

—'I te ani mai ō'ou mo te 'ariki koe e ture, ki Roma ki te 'ariki koe e au ka uŅa ena.

A Pauro 'i mu'a o te 'ariki hūrio

¹³ Kai rahi hia te mahana mai tū mahana ture era, he oho te 'ariki hūrio ko 'Akiripa ararua ko tō'ona taina ko Verenise ki Tētārea 'aroa ki a Feto. ¹⁴ 'I te rahi o te mahana i noho ai o kuā 'Akiripa 'i ira, he 'a'amu e Feto ki tū 'ariki era o ruŅa i te ture o Pauro he kī:

—'I nei te taŅata e tahi e puru rō 'ā 'a Fēriki i haka rē mai. ¹⁵ 'I Hērutarema a au i tu'u atu ai te nu'u oromatu'a ra-rahi 'e te nu'u pū'oko haka tere o te hūrio horo mai i te rāua ture o ruŅa i nei taŅata. He kī mai mo tiŅa'i mo haka mate, 'e ¹⁶ he pāhono e au: 'ina he haka tere rōmano he tiŅa'i i te taŅata mo ta'e ai 'i ra'e ana haka vānaŅa mo tō'ona ora 'i mu'a i te nu'u horo i a ia. ¹⁷ 'I te rua mahana 'ā o te tu'u mai o rā nu'u ki nei, he uru a au he noho 'i roto i te hare ture mo ma'u i te ture horo mai e rāua 'e he uŅa e au mo ma'u mai i rā taŅata. ¹⁸ 'E, te me'e horo mai era e rā nu'u o ruŅa i a ia ta'e he 'ati taparahi-ta'ata pa he me'e mana'u e au. ¹⁹ Te rāua me'e kī mo rā taŅata he me'e o ruŅa o te rāua hāpī, 'e o ruŅa o te taŅata e tahi te 'iŅoa ko Ietū, ko mate 'ana 'e e kī era e ia e ora nō 'ā. ²⁰ 'I te ta'e 'ite ō'oku pē hē ana aŅa, he 'ui e au ki rā kope ana haŅa a ia mo oho ki Hērutarema 'i ira a au ana ma'u i te ture o te me'e horo e te nu'u o ruŅa i a ia. ²¹ 'E he pāhono mai: mo te tātou 'ariki rōmano a ia e ture. 'O ira i haka rē ai e au. Ki tano te mahana he haka ma'u ki Roma.

²² He kī ia e 'Akiripa ki a Feto:

—Ko haŅa tako'a 'ana a au mo haka roŅo i te vānaŅa o te taŅata ena.

He pāhono e Feto:

—Āpō mau ena 'ā he haka roŅo koe i a ia.

²³ 'I te rua mahana he tu'u a 'Akiripa ararua ko Verenise ki tū hare ture era 'e he uru koro'iti ki roto, pa he oho iŅa o te 'ariki. 'I muri i a rāua i uru tako'a ai te nu'u pū'oko haka tere o te va'ehau 'e te nu'u ra-rahi o Tētārea. He kī ia e Feto mo ma'u i a Pauro. ²⁴ I tu'u era he kī e Feto:

—E te 'ariki ko 'Akiripa ē, 'e e te nu'u ta'ato'a o roto nei ē: nā tū taŋata era nā. Te hūrio ta'ato'a o Hērutarema 'e o Tētārea ko horo mai 'ana i te ture mō'ona. A rāua he ohu nō mai te aŋa mo tiŋa'i mo haka mate i a ia. ²⁵ Ki tō'oku u'i, 'ina a ia kai aŋa i te me'e ta'e tano ki tano ai mo tiŋa'i. 'E, 'i te kī mai ō'ona mo ture i a ia e te tātou 'ariki 'i Roma, i mana'u ai e au mo haka ma'u ki a ia. ²⁶ Te me'e nō, 'ina e tahi 'ā'aku me'e mo pāpa'i o ruŋa i a ia ki tō'oku 'ariki 'i Roma. 'O ira i ma'u mai nei ki mu'a ō'ou, e te 'ariki ko 'Akiripa ē, 'e ki mu'a o te ta'ato'a o kōrua, koi'ite ki oti e kōrua te haka 'ui, he rava'a e au i te me'e mo pāpa'i. ²⁷ E ko tano, pa'i, mo haka ma'u i te taŋata puru 'ina he hā'aki he aha te tu-mu ō'ona i puru ai.

He vānaŋa iŋa o Pauro ki te 'ariki

26 He kī e 'Akiripa ki a Pauro:

—Ka vānaŋa mai koe 'i te hora ena pē hē, ki ta'a kī, te ture nei.

He ma'u a Pauro i tō'ona rima a ruŋa 'e he ha'amata he vānaŋa:

²—Ko koa 'ana a au, e te 'ariki ko 'Akiripa ē, 'o te ai ō'oku 'i mu'a i a koe 'i 'aŋarīnā mo vānaŋa atu o ruŋa o te me'e ta'ato'a tuhi mai e te [hūrio] ra-rahi. ³ A koe, pa'i, ko 'ite 'ana i te haka tere iŋa ta'ato'a o tātou o te hūrio 'e o ruŋa i te aha a mātou e rava tātake nei. 'O ira he ani atu a au mo haka roŋo riva-riva mai ō'ou.

⁴»Te hūrio ta'ato'a ko 'ite riva-riva 'ā pē hē te noho iŋa ō'oku mai tō'oku 'āpī iŋa 'ā 'i tō'oku kāiŋa 'e 'i Hērutarema. ⁵ A rāua tako'a e 'ite rō 'ā pē nei ē: mai tō'oku 'āpī iŋa 'ā a au he [fariseo], he nūna'a taŋata ha'atura 'ātā ki te me'e hope'a o te 'iti-'iti o te tātou haka tere iŋa. 'E mo te nu'u mau ena 'ā e kī atu he pa-rauti'a, ana haŋa a rāua.

⁶»Ko horo 'ana a au e rāua 'o te ai he parauti'a mau 'ā mō'oku te 'Atua e haka tano rō i te hōrea kī ki te tā-tou tupuna pē nei ē: e ora rō te taŋata mai te mate. ⁷ A tātou, te ho'e 'ahuru mā piti mata o te itaraera, ko te ŋatu iŋa 'ana i te haŋu mo take'a i te haka tano iŋa o rā hōrea. 'O ira e ha'amuri 'e e ha'atura ena a tātou ki te 'Atua te pō te 'ōtea. 'E, ka atu pē ira, o ruŋa o te me'e nei, e te 'ariki ko 'Akiripa ē, i horo ai i a au e te hūrio ra-rahi. ⁸ »He aha ia a kōrua e aŋarahi ena mo mana'u: te 'Atua e haka ora rō i te taŋata mai te mate?

⁹»E mana'u era a au 'i mu'a 'ā: te aŋa i te me'e ta'e tano ki te nu'u [haka moe i te mana'u] 'i ruŋa i a Ietū o Nātāreta he me'e mau 'ā 'ā'aku mo aŋa, ¹⁰ 'e pē ira i aŋa ai e au 'i Hērutarema. Me'e rahi nu'u haka moe i te mana'u 'i ruŋa i a Ietū i haka puru e au 'i roto i te hare ma'u'auri, o te nu'u [oromatu'a ra-rahi] i ha'ati'a mai. 'E, hora tiŋa'i haka mate era i rā nu'u, i tano rō ki a au. ¹¹ Paurō te mahana e tōtōā era e au i rā nu'u mo ta'e haka moe haka 'ou i te mana'u 'i ruŋa i a Ietū. Te ŋā me'e nei i aŋa ai e au 'i roto i te [hare pure hūrio].

'E, 'i te rahi o tō'oku riri mo rāua, e kimi e oho era e au 'ātā ki te tētahi henua.

¹²»Ki ira tō'oku ara i oho ai ki Rāmako e ma'u rō 'ana a au i te parau 'i ruŋa i ha'ati'a mai ai e te nu'u oromatu'a ra-rahi mo aŋa i rā ŋā me'e. ¹³ 'E, 'i te ara, pe te hora kai, e te 'ariki ē, he take'a e au e tahi mōrī mai te raŋi 'ata mā'eha ki te ra'ā. He haka vari tahi i a au 'e i te nu'u oho atu 'i muri i a au e rā mōrī. ¹⁴ Ta'ato'a a mātou i hī-hiŋa ai, 'e he ŋaro'a e au e tahi re'o ka kī mai hai 'arero [‘evereo]: “E Sauro, e Sauro, »he aha koe e kimi mai ena i a au mo tōtōā? E rave'ino 'ā koe i a koe 'ā e riri ena mō'oku”.

¹⁵»He 'ui ia e au: “»Ko ai koe?”.

»He pāhono mai: “A au ko Ietū, kope mau ena 'ā e koe e kimi mai ena mo tōtōā. ¹⁶ Ka e'a koe ki ruŋa. I haka take'a atu ena a au i a au ki a koe mo aŋa mai ō'ou, 'e, tako'a, mo mata'ite i te me'e take'a ena e koe 'e i te me'e ka haka take'a ka oho atu ena e au. ¹⁷ 'E mā'aku e haka e'a i a koe mai te rima o te hūrio 'e mai te rima o te nu'u ta'e he hūrio, nu'u ki a rāua koe ka uŋa ena e au 'i te hora ena. ¹⁸ Ta'a me'e ka aŋa ena he haka 'ara i te rāua mata, ki e'a ai mai roto i te pōhāhā ki roto i te mā'eha, 'e mai te rima o Rukifero ki te rima o te 'Atua, ki haka moe ai i te rāua mana'u 'i ruŋa i a au. Pē ira te 'Atua ana haka kore i te rāua hara, 'e he o'o a rāua ki roto i te nūna'a taŋata ha'ata'a e te 'Atua mā'ana”.

¹⁹»E a au, e te 'ariki ko 'Akiripa ē, kai ta'e aŋa i te me'e kī mai e Ietū 'i roto i te me'e haka take'a mai e ia. ²⁰ 'I ra'e a au i haka 'ite ai i te [roŋo riva-riva o te 'Atua] ki te nu'u o Rāmako, ki oti ki te nu'u o Hērutarema 'e o te kona ta'ato'a o Hūrea, 'e, tako'a, ki te nu'u ta'e he hūrio. He kī e au mo haka tapa mai roto i te me'e ta'e tano, mo huri o te mana'u ki te 'Atua, 'e mo aŋa i te me'e mo take'a e te nu'u he aŋi mau 'ā ko [huri 'ana te rāua mana'u ki a ia].

²¹»O ruŋa o te me'e nei i 'a-'aru ai i a au e te hūrio 'i te [Kona Ha'amuri 'Atua] 'e i oho rō mo tiŋa'i mo haka mate mai i a au. ²² 'E, hai hā'ū'ū o te 'Atua, e hio-hio e oho nō nei a au ki 'aŋarīnā, 'e e vānaŋa nei o ruŋa i a ia ki te nu'u ta'ato'a, ka hōnui ka ta'e hōnui. 'Ina a au he haka 'ite, ki te hora hope'a, i te rua vānaŋa mo ta'e ai he vānaŋa o ruŋa i te me'e mo topa kī e te perofeta 'e e [Mōtē] pē nei ē: ²³ e mate rō te [Kiritō], 'e ko ia te ra'e ka ora ena mai te mate, ki haka mā'eha ai pa he mōrī i te mana'u o te hūrio 'e o te nu'u ta'e he hūrio hai haka 'ite ki a rāua i te rāve'a pē hē te 'Atua ana haka e'a i te taŋata mai roto i te ūtu'a o te hara 'e ana va'ai i te ora 'āpī 'ina he hope'a ra'a.

He pāhono iŋa ki a Pauro

²⁴ I oti era a Pauro i te kī i tū vānaŋa era, he kī e Feto, i haka pūai te re'o:

—»Ko ma'a-ma'a 'ā a koe, e Pauro ē! A koe i ma'a-ma'a ena he rahi o tu'u hāpī.

²⁵ He pāhono e Pauro:

—'Ina a au kai ma'a-ma'a, e te suerekao ē. Te me'e nei 'ā'aku e kī atu ena e tano rō 'ā 'e he parauti'a. ²⁶ Nā te 'ariki ena ko 'Akiripa nā ko anjī-anjī riva-riva 'ana i te nā me'e nei. 'O ira a au e ta'e ri'a-ri'a ena mo vānaŋa atu 'i mu'a i a ia. Ko 'ite 'ana a au e 'ite rō 'ana e ia i te nā me'e ta'ato'a nei; ta'e, pa'i, he me'e i topa 'i te kona mo ta'e take'a.

²⁷ He hāruī ia a Pauro he kī ki te 'ariki:

Ki ta'a kī, ǀhe parauti'a te me'e kī e te perofeta? Ko 'ite 'ana e au he parauti'a mō'ou.

²⁸ He pāhono e 'Akiripa:

—ǀKai roa hia koe i mana'u rō ai mo haka [kiritiano] i a au?

²⁹ He kī e Pauro:

—Ka roa 'o ka ta'e roa, 'ī a au e ani rō 'ā ki te 'Atua mo riro ō'ou 'e o te nu'u ta'ato'a haka roŋo mai 'i 'aŋarīnā he nu'u haka moe i te mana'u 'i ruŋa i a Ietū pē au 'ā. Te me'e haŋa nō 'ā'aku he ta'e puru 'e he ta'e here-here i a kōrua hai vivi pē au.

³⁰ He māroa ia te 'ariki, te suerekao koia ko Verenise 'e te nu'u ta'ato'a no-noho ananake, ³¹ he haka tapa mai rā kona mo vānaŋa o ruŋa o tū me'e era. He kī ki a rāua 'ā: «Te taŋata nei kai anjī i te me'e ta'e tano ki haka ūtu'a ai hai mate, 'e korohaŋa mo puru 'i roto i te hare ma'u'aurī».

³² He kī ia e 'Akiripa ki a Feto:

—'Āhani i ta'e kī atu mo ture i a ia e te 'ariki rōmano, e tano nō koe mo haka e'a i a ia.

He haka ma'u iŋa i a Pauro ki Roma

27 I tano era te mahana mo haka ma'u i a Pauro ki 'Ītāria, he va'ai e Feto i a Pauro 'e i te tētahi nu'u puru ki te kope te 'iŋoa ko Hurio, he kape o te nūna'a va'ehau e kī era O te 'Ariki. ² I eke ai a mātou ki ruŋa i te pahī e tahi ko hāhine 'ā mo reva ki 'Ātia tu'u atu mai te kona 'uahu era o Ataramītio. 'I muri i a mātou i oho tako'a atu ai te taŋata e tahi te 'iŋoa ko Aritarako o Tētārōnika, he kona o Mātērōnia.

³ 'I te rua mahana i tu'u ai a mātou ki te 'uahu o Tīrone, he kona 'i ira i ha'ati'a ai e Hurio i a Pauro mo oho mo u'i i tō'ona nu'u repahoa 'e mo hā'ū'ū e rā nu'u ki a ia.

⁴ I reva era a mātou mai Tīrone, he oho a te taha-taha o te motu ko Tīpere mo haka pava mai te tokerau 'o te ai 'i mu'a o mātou. ⁵ A te taha-taha o Tiritia 'e o Panafiria i haka vari i oho ai a mātou, 'e he tomo ki Mira, he kona e tahi o Rītia.

⁶ 'I ira i take'a ai e te kape o te va'ehau i te pahī o Arehantāria he oho ki 'Ītāria, 'e he haka eke i a mātou ki ruŋa. ⁷ Ko rahi 'ā te mahana kora'iti nō a mātou e

oho era 'i te ai o te tokerau 'i mu'a, 'e, anjā ri'a-ri'a i vari ai ki mu'a o te kona era ko Niro. 'I te ai ko te noho iŋa mai 'ana te tokerau 'i mu'a, he vari a mātou a mu'a o Taramona 'e he haka vari tahi i te motu era ko Kereta. ⁸ 'I te pūai o te tokerau he oho a mātou a te taha-taha 'ā 'ātā ka tu'u rō ki te kona e tahi te 'iŋoa ko 'Uahu Riva-riva hāhine ki Rātea.

⁹ 'I te ta'e hōrou o tū pahī era 'i te tokerau puhī mai mai mu'a, 'e 'i te hāhine o te toŋa, ko ta'e au 'ā tū ara era o mātou mo oho nō a roto i te vaikava. 'O ira i kī ai e Pauro ki te nu'u ta'ato'a o ruŋa i te pahī: ¹⁰ «E kuā hoa, te ara nei o tātou rake-rake ka oho ena. He emu te pahī 'e te me'e ta'ato'a nei o ruŋa, 'e korohaŋa 'ātā he mā-mate a tātou».

¹¹ Kai haka roŋo te kape o te va'ehau ki a Pauro. Ki te taŋata ma'u i te huira 'e ki te taŋata era ō'ona te pahī i haka roŋo ai. ¹² 'I te ta'e au o te 'uahu o rā kona mo noho o te pahī 'i te toŋa, te rahi ra'a o te nu'u o ruŋa he mana'u i hau 'i te riva mo u'i i te rāve'a mo reva mai ira ki Fēnise, he 'uahu haka 'ou e tahi o Kereta e pava rō 'ā i te tokerau mo noho 'i ira 'i rā nā 'āva'e.

He rake-rake iŋa o te vaikava

¹³ 'I te puhī mai o te tokerau kora'iti nō mai te pā'iŋa era o Ehipto, he mana'u ananake mo oho nō 'i tū ara era ki Fēnise. He reva ia te pahī he oho a te taha-taha 'ā o Kereta. ¹⁴ Kai roa i puhī mai ai te tokerau pūai pa he tokerau era ko te Pakakina he tiŋa'i i te pahī, ¹⁵ 'e he puhia he oho. 'I te ta'e rava'a e mātou mo haka tī-tika i te pōihu-ihu a roto i te tokerau, he haka rē i te pahī ki te tokerau. ¹⁶ A tu'a o te motu 'iti-'iti e tahi te 'iŋoa ko Kāura a mātou i vari ai i puhia 'i te tokerau. 'I rā kona, 'i te rehe 'iti o te tokerau, anjā ri'a-ri'a i rava'a i haka eke mai ai i te vaka 'iti-'iti o te pahī. ¹⁷ I oti era te haka eke mai i te vaka, he to'o mai he here-here i te pahī hai taura mo haka hio-hio. 'E, 'i te ri'a-ri'a 'o ma'u-ma'u te pahī 'i te kona o vāeŋa o te vaikava te 'iŋoa ko Tirite, he kona taka-taka o te 'one 'i te 'au 'e 'i te vave, he hoa hai me'e mo 'aka e raŋa-raŋa rō 'ā mo haka rehe i te tere o te pahī e puhia era 'e 'ai ka haka rē ki te tokerau. ¹⁸ 'I te rua mahana, ko te pūai iŋa 'ā tū tokerau era, 'e he ha'amata he hoa-hoa i te me'e tari o ruŋa i te pahī. ¹⁹ 'I te toru mahana, he hoa-hoa tako'a i te me'e o te pahī. ²⁰ 'I te rahi o te mahana o te ta'e take'a mai o te ra'ā 'e o te hetu'u, 'e 'i te pūai o te tokerau e hetu atu era, he mana'u mātou e ko e'a mai tū 'ati era.

²¹ 'I te rahi o te mahana o te ta'e kai, he māroa a Pauro 'i vāeŋa o te ta'ato'a he kī:

«E kuā hoa ē, 'āhani a kōrua i haka roŋo mai mo ta'e e'a o tātou mai Kereta, e ko topa mai te 'ati nei. ²² 'E, hora nei, 'ina kōrua ko ri'a-ri'a. Te pahī nei e emu rō, 'e, ka ai atu pē ira, e ko mate e tahi o kōrua. ²³ Te 'Atua, kope ki a ia a au e anjā nei 'e 'ā'ana a au, i uŋa mai i te merahi e tahi 'i 'aŋapō ²⁴ mo kī mai: "'Ina koe ko ri'a-ri'a, e Pauro ē. E ko ta'e tu'u koe ki mu'a o te 'ariki rōmano. Hai koe te 'Atua ka haka ora ena i te nu'u ta'ato'a o ruŋa i te pahī nei". ²⁵ 'O ira, e kuā hoa ē, 'ina

kōrua ko ri'a-ri'a. A au e haka moe rō 'ā i tō'oku man-a'u 'i ruŋa i te 'Atua 'e ko 'ite riva-riva 'ana e au: te me'e nei ka hope'a ena pa he me'e kī mau mai era 'ā e te merahi. ²⁶ 'E, nā a tātou he ma'u-ma'u 'i te motu e tahi».

²⁷ 'I te pō o te ho'e 'ahuru mā maha mahana mai te ha'amata iŋa o tū 'ati era i topa ai a mātou, i puhia 'i te tokerau, 'i roto i te vaikava ko Atiriatico. Pe te 'ahuru mā piti o te pō he aŋi-aŋi e te matarua ko hāhine 'ā a mātou ki te henua. ²⁸ He hāhaŋa i te parera o te vai, e piti 'ahuru māroa. Pe mu'a 'iti i hāhaŋa haka 'ou ai, e ho'e 'ahuru mā pae. ²⁹ 'I te ri'a-ri'a 'o hetu te pahī ki te mā'ea, he hoa e hā 'aka a tu'a, 'e te mana'u mau nō he hōrou he 'ōtea. ³⁰ Te matarua ko haŋa 'ana mo tē-tere mai ruŋa i te pahī. He to'o mai ia i te vaka, he ha'amata he haka topa, i haka tu'u pa he me'e: e hoa 'ā a rāua i te 'aka o mu'a o te pahī. ³¹ He kī e Pauro ki tū kape era ko Hurio 'e ki tā'ana va'ehau: «Mo ta'e noho mai o te nu'u era 'i ruŋa i te pahī, e ko ora a kōrua».

³² He hore ia e tū ŋā va'ehau era i te taura o te vaka 'e he haka rē mo viri ki roto i te vai.

³³ 'I te popohaŋa, he ani e Pauro ki te ta'ato'a mo kai, 'e he kī: «Ka rua tāpati o te ta'e kai o kōrua 'i te tiaki iŋa mo u'i he aha te me'e ka topa ena. ³⁴ He ani atu a au: ka ka-kai kōrua i te haraoa nei ki ai ai te kōrua haŋu. 'Ina e tahi o tātou mo ta'e tomo riva-riva ki 'u-ta».

³⁵ I kī era i te me'e nei, he to'o a Pauro i te haraoa ki tō'ona rima, he māuru-uru ki te 'Atua 'i mu'a o tū nu'u ta'ato'a era, he mo-more 'e he ha'amata he kai. ³⁶ He kore ia te ri'a-ri'a o rā nu'u 'e he ha'amata he kai tako'a. ³⁷ A mātou 'i ruŋa i tū pahī era e piti hānere hitu 'ahuru mā ono taŋata. ³⁸ I mākona tahi era mātou, he hoa i te tariko topa ki roto i te vaikava mo haka re-he i te paŋaha'a o te pahī.

He emu iŋa o te pahī

³⁹ 'I 'ōtea era he take'a e te matarua i te henua ta'e 'ite e rāua. He take'a tako'a i te haŋa 'one, 'e he u'i i te rāve'a mo haka hāhine i te pahī ki ira. ⁴⁰ He hore i te taura o tū ŋā 'aka era 'e he hoa 'i rā kona. He haka re-he-rehe i te taura here o te huira mo haka tika i te pahī 'e he haro i te kahu o mu'a. He ha'amata tū pahī era he hāhine ki 'uta. ⁴¹ He ma'u-ma'u ia te pōihu-ihu 'i te kona taka-taka o te 'one 'i te 'au 'e 'i te vave, 'e kai makenu haka 'ou; he tu'a i ha'amata i ha-hati 'i te vave.

⁴² 'O tē-tere te nu'u puru, he haŋa te va'ehau mo tiŋa'i mo haka mate. ⁴³ 'E, 'i te ta'e haŋa o te kape o te va'ehau mo mate o Pauro, kai ha'ati'a. He kī: te nu'u 'ite i te kau ka rere ki roto i te vai ka kau ki 'uta, ⁴⁴ 'e te tētahi ka u'i te rāve'a mo oho atu a ruŋa i te miro 'o a ruŋa i te pārehe-rehe pahī. Pē ira a mātou i tu'u ai ki 'uta e ora tahi nō 'ā.

A Pauro 'i te motu ko Marata

²⁸ Ki tomo tahi mātou i 'ite mai ai: te 'iŋoa 'ō o rā motu ko Marata. ² I hā'ū'ū rō mai te nu'u o ira. 'I te hoa o te 'ua 'e 'i te take'o, he haka hū e rā nu'u i te ahi 'e he kī mai mo haka hāhine mo haka mahana.

³ A Pauro e runu 'ā i te huka-huka 'e e ni'o 'ana i te ahi. Mai ruŋa i te huka-huka hoa e ia ki roto i te ahi i rere ai te kōreha veneno, he ŋau 'e he haka hihi 'i ruŋa i te rima. ⁴ I take'a era e te nu'u o rā motu i te kōreha ko taka 'ā 'i te rima o Pauro, he kī ki a rāua 'ā: «Pe he me'e ena ē: te kope era kope taparahi-ta'ata tiŋa'i haka mate i te rua; ka ai atu ko ora 'ā mai te 'ati o roto i te vaikava, 'ina he haka rē e te 'atua mo ora».

⁵ He tū-tū ia a Pauro i tū kōreha era mai ruŋa i tō'ona rima ki roto i te ahi, 'e 'ina e tahi me'e i topa ki a ia. ⁶ E mana'u era te nu'u o rā kona he ahu a Pauro 'o he mate. I u'i era 'ina e tahi me'e i topa, he huri te man-a'u 'e he ha'amata he kī: a Pauro he 'atua.

⁷ E hāhine nō atu 'ā ki rā kona te 'āua o te taŋata pū'oko haka tere o tū motu era te 'iŋoa ko Puvirio; 'ā'ana i hāpa'o i a mātou hai koa e toru mahana. ⁸ Te matu'a tane o nei taŋata e moe rō 'ana 'i ruŋa i te ro'i, ko māui-ui 'ā 'i te māui-ui he hū o te hakari 'e he hī. He oho e Pauro he u'i. He pure ia ki te 'Atua mo te ora o rā taŋata, he haka puā hai rima, 'e he ora rō 'ai tō'ona māui-ui.

⁹ 'I 'ite era e te taŋata o ruŋa i te me'e nei, he pae tahi atu te māui-ui o rā motu ki a Pauro, 'e he haka ora i te rāua māui-ui. ¹⁰ 'I te haŋa rahi mai o te nu'u o rā motu, hai koa i hāpa'o mai ai. I tano era te mahana mo reva a mātou 'i ruŋa i te pahī, he va'ai mai e rā nu'u hai me'e mo te mātou ara.

He tu'u iŋa o Pauro ki Roma

¹¹ E toru 'āva'e i noho ai a mātou 'i tū motu era. I oti era te toŋa, he reva a mātou 'i ruŋa i te pahī o Arehan-tāria noho 'i ira 'i tū ŋā 'āva'e era o te toŋa. 'I mu'a o te pōihu-ihu o rā pahī e tarai rō 'ā e rua taina ko Kātoro 'e ko Pōruki, he hauā, ki te mana'u o te matarua he 'at-ua.

¹² He tomo a mātou ki Tirakuta. He noho 'i ira e toru mahana, ¹³ 'e mai ira i reva ai 'ātā ka tu'u rō ki Rēhio. I 'ōtea era ki te rua mahana, he ha'amata he puhi mai te tokerau mā tu'a, 'e he tu'u a mātou 'i te toru mahana ki Potuori. ¹⁴ 'I ira i piri mai ai te nu'u taina. He kī mai mo noho o mātou 'i muri i a rāua e tahi tāpati. I oti era rā tāpati he hā'ere he oho a mātou ki Roma.

¹⁵ Te nu'u taina o Roma ko 'ite 'ā i te parau 'āpī ko tomo 'ana a mātou. 'O ira i oho atu ai 'ātā ka tu'u rō ki te Mātete te 'iŋoa ko 'Āpio 'e ki te kona ko Te Toru Hare mo tiaki mai ki a mātou. I take'a era e Pauro i tū nu'u era, he māuru-uru ki te 'Atua 'e he ŋaro'a ko ai haka 'ou 'ā tō'ona haŋu. ¹⁶ I tu'u era a mātou ki Roma, he ha'ati'a i a Pauro mo noho 'i te hare e tahi koia ko haka 'auario hai va'ehau e tahi.

'I Roma a Pauro

¹⁷ Ka toru mahana o te tu'u o mātou ki Roma, he uŋa e Pauro mo oho o te nu'u [hūrio] ra-rahi o ira. I taka-taka tahi era, he ki:

—E kuā taina, 'ina a au kai aŋa e tahi me'e rake-rake ki te tātou taŋata he hūrio 'e ki te haka tere iŋa o te tupuna. Ka ai atu pē ira, i va'ai nō i a au 'i Hērutarema ki te rōmano. ¹⁸ I oti era te haka 'ui mai e te rōmano, he haŋa mo haka e'a i a au mai roto i te hare ma'u'aurī 'o te ta'e rava'a e tahi me'e mo haka ūtu'a mai hai mate. ¹⁹ 'E, kai haŋa e te hūrio ra-rahi o Hērutarema mo haka e'a i a au e te suerekao. Te me'e toe nō 'i rā hora mō'oku he ani ki te suerekao mo ture mai e te 'ariki rōmano. Ka ai atu pē ira, 'ina e tahi 'ā'aku horo mo tō'oku taŋata. ²⁰ I uŋa atu ena a au mo oho mai o kōrua mo vānaŋa-naŋa o tātou 'e mo haka 'ite atu: i here-here nei a au hai vivi 'o te ai he parauti'a mō'oku te [Kiritō] tiaki e tātou e te itaraera i tu'u rō mai.

²¹ He kī e tū nu'u era:

—'Ina e tahi parau i tu'u mai mai Hūrea o ruŋa ō'ou, 'e 'ina e tahi taina hūrio tu'u mai mai ira i kī mai e tahi vānaŋa ta'e tano o ruŋa i a koe. ²² E haŋa rō 'ā a mātou mo 'ite i tu'u mana'u o ruŋa i te hāpī [kiritiano] 'o te ai ko 'ite 'ā e mātou: 'i te kona ta'ato'a e vānaŋa ta'e tano rō 'ā o ruŋa.

²³ He ha'a'au ia a Pauro ananake ko tū nu'u era i te mahana mo piri haka 'ou o rāua. I tu'u era ki rā mahana, he oho me'e rahi nu'u ki te hare 'i ira e noho era a Pauro. Mai te pō'ā ki te ahi-ahi i vānaŋa ai a Pauro o

ruŋa i te [haka tere iŋa 'āpī o te 'Atua]. E u'i 'ana mo haka aŋi-aŋi riva-riva ki rā nu'u o ruŋa i a Ietū hai me'e pāpa'i e [Mōtē] 'e e te perofeta.

²⁴ Tētahi nu'u i haka roŋo ki tū vānaŋa era 'a Pauro, 'e tētahi atu i ta'e haka roŋo. ²⁵ 'E, 'i te ai mana'u kē-kē ananake, he ha'amata he oho mai rā kona. Te me'e hope'a i kī e Pauro ki rā nu'u:

«He parauti'a te me'e haka 'ite e te [Vārua Maitai] ki te kōrua tupuna hai perofeta era ko 'Itaia pē nei ē:

²⁶ “Ka oho ka kī ki tu'u taŋata:

Ka rahi atu te haka roŋo, e ko aŋi-aŋi;
ka rahi atu te u'i iŋa, e ko take'a.

²⁷ Te mana'u, pa'i, o te nu'u nei ko mira-mira 'ā.

Ko puru 'ana te tariŋa, 'e ko puru 'ā te mata,
'o ŋaro'a, 'o take'a, 'o aŋi-aŋi;
'o huri te mana'u ki ruŋa i a au
'o haka kore e au i te rāua hara”.

²⁸ »E 'ite kōrua: mai te hora nei pe mu'a ka oho ena, te 'Atua he haka 'ite tako'a ki te nu'u ta'e he hūrio i te roŋo pē hē te taŋata ana e'a mai roto i te ūtu'a o te hara 'e ana rava'a i te ora 'āpī 'ina he hope'a ra'a va'ai e te 'Atua, 'e ko rāua te nu'u ka haka roŋo ena».

[²⁹ I oti era a Pauro te kī i te me'e nei, he e'a he oho tū nu'u era koia ko tātake ki a rāua 'ā.]

³⁰ E rua matahiti o Pauro i noho ai 'i te hare e 'auhau e ia. Kī ira te nu'u ta'ato'a e oho era mo u'i. ³¹ 'Ina he ri'a-ri'a e haka 'ite era a Pauro o ruŋa o te haka tere iŋa 'āpī o te 'Atua 'e e hāpī era ki te nu'u o ruŋa o Ietū Kiritō, 'e 'ina e tahi nu'u i kī mo ta'e aŋa pē ira.

RŌMANO

Me'e rahi te parau i pāpa'i e Pauro, [ʼāpōtoro] ʼa Ietū Kiritō, ki te nūna'a taŋata [haka moe i te mana'u] ʼi ruŋa i a Ietū mo haka ʼite ki a rāua i te hāpī parauti'a o te ʼAtua. O te parau ta'ato'a, ko te parau pāpa'i nei ki te taina o Roma te parau ʼata haka ʼite mai o ruŋa i te hāpī hōhonu o te ʼAtua.

Tētahi o rā ŋā hāpī ko te ŋā hāpī nei e toru. Te ra'e: te taŋata ta'ato'a o te ao, ka hūrio ka ta'e hūrio, ko hara tahi ʼana ʼe ko ai era ʼana te ūtu'a o te ʼAtua mo te ta'ato'a pe mu'a ka oho ena (1.18–3.19). E haka ʼite mai ʼā e Pauro pē nei ē: hai hara o [ʼĀtamu] i hara tahi ai te taŋata ʼe i tu'u mai ai te mate ki ruŋa i te ta'ato'a (5.12–14).

Te rua hāpī: ʼina e tahi taŋata mo tano ki te mata o te ʼAtua hai ha'atura ki te [haka tere iŋa ʼa Mōtē]. Pē nei, pa'i, e kī ena: (3.20).

ʼE te toru hāpī: te taŋata haŋa mo haka riva-riva i a ia ki te mata o te ʼAtua e haka moe i te mana'u ʼi ruŋa i a Ietū. E haka ʼite mai ʼana e Pauro pē nei ē: hai me'e i aŋa e Ietū e ai ena te rāve'a mo e'a o te taŋata mai roto i te ūtu'a o te hara ʼe mo rava'a i te ora ʼāpī ʼina he hope'a ra'a (5.15–21). ʼE he haka ʼite tako'a mai e Pauro pē hē te haka tere iŋa tano o te nu'u i a rāua te ora ʼāpī nei (12.1–15.6).

ʼI ruŋa i te parau tako'a nei e vānaŋa mai ʼā a Pauro o ruŋa i tō'ona taŋata he hūrio ʼe he aha te hauha'a te ai he hūrio. He haka ʼite mai e māui-ui rō ʼana tō'ona māhatu ʼo te hāru i te rahi ra'a o tō'ona taŋata hai tua'ivi ki te ʼAtua, ʼe e ŋatu rō ʼā tō'ona haŋu ki te mahana mo huri haka ʼou ki te ʼAtua ʼe mo haka moe i te rāua mana'u ʼi ruŋa i a Ietū (9–11).

Mo haka oti i te parau nei he ʼaroha a Pauro ki te me'e rahi nō atu taina, ʼe he kī pē nei ē: (16.27).

He ʼaroha

1 He ʼaroha atu a au, a Pauro, tāvini o Ietū Kiritō, ha'ata'a e ia mo ʼāpōtoro mo haka ʼite mo oho i te [roŋo riva-riva o te ʼAtua] ² haka ʼite ʼi mu'a ʼā ki tā'ana perofeta mo pāpa'i ʼi ruŋa i te [Pāpa'i Mo'a]. ³⁴ Te roŋo riva-riva nei o ruŋa o tā'ana Poki ko Ietū Kiritō, he Pū'oko Haka Tere o tātou. I poreko ai mai te hakaara o [Tāvita], ʼe hai ora iŋa haka ʼou o'ona mai te mate, i haka aŋi-aŋi ai e te [Vārua Maitai] ki te taŋata: he Poki o te ʼAtua ʼe i a ia te pūai.

⁵ A Ietū Kiritō, hai riva rahi o'ona, i ha'ata'a ai i a au mo aŋa ki a ia pa he ʼāpōtoro, ki ai ai ʼi te henua ta'ato'a te taŋata ha'atura ʼe haka moe i te mana'u ʼi ruŋa i a ia. ⁶⁷ ʼI roto i rā nu'u a kōrua tako'a. Te ʼAtua, pa'i, e haŋa rahi rō atu ʼana ki a kōrua ki te nu'u o Roma. Hai haŋa o'ona e ai ena a kōrua he taŋata ʼa Ietū Kiritō ʼe e ai tako'a ena o roto i te nūna'a taŋata ha'ata'a mā'ana. Ka ai ʼi ruŋa i a kōrua te riva rahi ʼe te haumārū o te ʼAtua, he Matu'a o tātou, ʼe o Ietū Kiritō, he Pū'oko Haka Tere o tātou.

He māuru-uru

⁸ Te me'e ra'e, he māuru-uru a au ki te ʼAtua hai Ietū Kiritō mo kōrua ta'ato'a ʼo te ai te haka moe iŋa o kōrua i te mana'u ʼi ruŋa i a Ietū e ʼite rō ʼana ʼi te kona ta'ato'a. ⁹ A au e aŋa nei ki te ʼAtua hai māhatu ʼi te haka ʼite iŋa ki te taŋata i te roŋo riva-riva o ruŋa o tā'ana Poki. ʼE he ʼAtua te mata'ite: e mana'u rō atu ʼana a au ki a kōrua, ¹⁰ ʼe ʼi roto i tā'aku pure he ani nō tā'aku aŋa ki a ia mo oho atu o'oku mo u'i i a kōrua, ana

haŋa a ia. ¹¹ E haŋa rō ʼā a au mo ai atu o'oku ʼi muri i a kōrua mo haka ʼite atu i te me'e hāpī mai e te Vārua Maitai, ki ʼata pūai ai te kōrua mana'u ʼi ruŋa i te ʼAtua. ¹² Te kī: ki haka pūai tātou i a tātou ʼā ʼi te haka moe iŋa i te mana'u ʼi ruŋa i a Ietū.

¹³ E te taina, e haŋa rō ʼana a au mo ʼite o kōrua e rahi rō ʼā te mahana pohe o'oku mo oho atu mo u'i i a kōrua, ʼe ʼātā ki te hora nei, ʼi e piri nō mai ʼā te me'e mo ta'e tu'u atu o'oku. Te me'e haŋa ʼā'aku he take'a mai ʼi roto i a kōrua me'e rahi nu'u e pūai rō ʼā te mana'u ʼi ruŋa i te hāpī parauti'a o te ʼAtua, ʼe, tako'a, he ʼata rahi o te nu'u haka ʼou haka moe i te mana'u ʼi ruŋa i a Ietū, pa he me'e topa ʼi te tētahi atu kona o te nu'u ta'e hūrio tu'u hāpī e au.

¹⁴ Ki te taŋata ta'ato'a a au ana haka ʼite i te roŋo riva-riva o te ʼAtua, ka ai atu he nu'u ai o te hāpī ʼo ta'e ai o te hāpī, he nu'u mārama-rama, ʼo ta'e mārama-rama. ¹⁵ ʼO ira a au e haŋa nei mo oho atu ki Roma mo haka ʼite ʼi nā i te roŋo nei.

Te pūai o te roŋo riva-riva o te ʼAtua

¹⁶ ʼIna a au he ri'a-ri'a mo haka ʼite i te [roŋo riva-riva o ruŋa i a Ietū]. Te roŋo nei, pa'i, he rāve'a pūai o te ʼAtua mo e'a o te nu'u ta'ato'a haka moe i te mana'u ʼi ruŋa i a Ietū mai roto i te ūtu'a o te hara. Te roŋo nei i haka ʼite ra'e ai ki te [hūrio] ʼe, tako'a, ki te nu'u ta'e he hūrio. ¹⁷ Hai roŋo nei te ʼAtua e haka ʼite ena pē hē te taŋata haŋa mo haka hāhine ki a ia e tano ena ki tō'ona mata: hai haka moe i te mana'u ʼi ruŋa i a Ietū, he oti mau ʼā. E hā'aki ena, pa'i, ʼi ruŋa i te Pāpa'i Mo'a: «Te taŋata tano ki te mata o te ʼAtua ʼi te haka

moe i te mana'u 'i ruŋa i a ia he rava'a i te ora 'āpī 'ina he hope'a ra'a».

O te ta'ato'a nō te hape

¹⁸ Mai te raŋi 'ā te 'Atua e haka 'ite mai ena i tō'ona riri mo te taŋata aŋa i te me'e ta'e tano, he nu'u hai me'e ta'e tano aŋa e rāua e nā'a ena i te parauti'a 'o 'ite e te taŋata. ¹⁹ Te me'e mo 'ite o ruŋa i te 'Atua, e ko ta'e 'ite e rāua; ko haka take'a nō era 'ana, pa'i, e ia mau 'ā.

²⁰ Ka ai atu te huru o te 'Atua ta'e he me'e mo take'a hai mata, mai te aŋa iŋa era 'ā o te ao te 'Atua e haka 'ite nō mai ena i tō'ona huru hai tā'ana me'e aŋa. 'E te taŋata haka topa i te mana'u o ruŋa i te me'e ta'ato'a aŋa e te 'Atua he aŋi-aŋi: te kope aŋa era i rā ŋā me'e he 'Atua, i a ia te pūai 'ina he hope'a ra'a. 'O ira 'ina he 'ōtohe toe o te nu'u era mo aŋa i te rāua me'e ta'e tano. ²¹ A rāua ko 'ite 'ana ko ai te 'Atua 'e, ka ai atu pē ira, 'ina he mo'a 'e 'ina he māuru-uru. Te me'e mana'u nō he me'e ma'a-ma'a 'e, 'i te ta'e haŋa mo haka topa riva-riva i te mana'u, 'ina he aŋi-aŋi haka 'ou i te parauti'a. ²² E kī ena he nu'u mārama-rama a rāua, 'e te parauti'a nu'u ta'e mārama-rama, ²³ he ta'e ha'amuri ki te 'Atua parauti'a. E ha'amuri ena ki te 'ītoro aŋa e rāua pa he taŋata, pa he manu rere, pa he manu va'e e hā 'e pa he manu to-toro 'i ruŋa i te 'ō'one.

²⁴ 'O ira i va'ai ai e te 'Atua ki te rima o te me'e ta'e tano pohe e rāua. He noho mau rō 'ai ia rā nu'u he aŋa hai hakari i te rāua me'e ta'e tano haŋa mo aŋa 'i roto i a rāua 'ā, 'ātā ki te me'e hope'a ena o te hano-hano.

²⁵ Te nu'u nei 'ina he haŋa ki te parauti'a o te 'Atua; he reo-reo te me'e haŋa. E ha'amuri 'e e ha'ahana-hana ena ki te me'e o te ao aŋa e te 'Atua, ta'e ki te 'Atua, kope aŋa i rā ŋā me'e, kope ki a ia ana ha'amuri 'e ana ha'ahana-hana e te ta'ato'a 'ātā ki te hope'a ra'a.

²⁶ 'O ira i haka rē atu ai e te 'Atua ki te me'e ta'e tano pohe e te hakari. He noho rō atu 'ai ia rā nu'u he aŋa i te rāua me'e nō era i haŋa, he me'e hope'a o te hano-hano. 'Ātā te ŋā vi'e o rāua 'ina he haŋa haka 'ou ki te taŋata; ko pohe 'ana ki te vi'e 'ā. ²⁷ Pē ira tako'a 'ana te taŋata 'ina he haŋa haka 'ou ki te vi'e; ko pohe 'ana ki te taŋata 'ā. Te taŋata ararua ko te taŋata ko aŋa 'ā i te me'e hope'a o te hano-hano. Pē ira e topa ena 'i ruŋa i a rāua te ūtu'a tano 'o te aŋa i rā ŋā me'e.

²⁸ 'I te haka rehu e te nu'u nei i te 'Atua, he haka rē mau rō 'ai e te 'Atua ki te rāua mana'u ta'e au mo aŋa mo oho nō i te me'e ta'e tano. ²⁹ Te me'e aŋa mau nō he me'e rake-rake pa he nou-nou, tōtōā i te rua taŋata, pohe ki te me'e o te rua, tiŋa'i haka mate i te rua taŋata, haka tumu i te ture, reo-reo, mura-mura ³⁰ 'e rava ha'a'ino. Te nu'u nei nu'u ta'e haŋa ki te 'Atua, nu'u haka 'āriŋa, haka paka 'e te'o-te'o, kimi i te me'e ta'e tano mo aŋa ki te rua, ta'e ha'atura ki te rāua matu'a, ³¹ ta'e haka topa i te mana'u, ta'e aŋa i te rāua me'e kī, ta'e haka 'aroha 'i te nu'u 'e ta'e haŋa ki te rua. ³² Te nu'u nei e 'ite riva-riva rō 'ana pē nei ē: te 'Atua ko kī 'ā: te ūtu'a mo te nu'u aŋa i te ŋā me'e nei he mate; 'e, ka ai atu pē ira, ko te aŋa ko te oho iŋa 'ā, 'e

'ātā e koa rō 'ana mo take'a i te rua e aŋa 'ana i nei ŋā me'e.

Te 'Atua e ture ena hai parauti'a

² 'O ira 'ina he 'ōtohe toe mō'ou, e te kope tuhi i te hape o te rua ē, ka ai nō atu ko ai koe. Mo tuhi 'ō'ou i te hape o te tētahi, e tuhi tako'a 'ana koe i tu'u hape; te me'e aŋa, pa'i, e rā nu'u, e aŋa tako'a rō 'ana e koe. ² Ko 'ite riva-riva 'ana a tātou: te 'Atua e ture ena hai parauti'a 'i te hora haka ūtu'a i te nu'u aŋa i te me'e tu'u pē ira.

³ 'E a koe, e te kope tuhi i te hape o te rua 'e aŋa tako'a i te me'e aŋa e rā kope ē, 'ina ko mana'u he ora koe mai te ūtu'a o te 'Atua. ⁴ 'Ina koe he tapa atu i te riva rahi ta'e pau o te 'Atua, tō'ona ha'aoroma'i iŋa, 'e tō'ona huru haumārū mo tiaki mai. 'Ina e koe he 'ite: te 'Atua e haka take'a atu ena i tō'ona riva rahi 'i te haŋa 'ō'ona mo huri 'ō'ou i tu'u mana'u ki a ia. ⁵ 'E, 'i tu'u pū'oko hio-hio, 'ina koe he huri i tu'u mana'u ki te 'Atua. Nā koe e ha'aputu e oho 'ana i te riri o te 'Atua mō'ou mo te mahana o te haka ūtu'a, he mahana mo tu'u mai 'ō'ona mo kī i te ūtu'a tano mo te taŋata hara ta'ato'a.

⁶ Te 'Atua e va'ai rō ki te ta'ato'a i te me'e e tano ki te rāua me'e aŋa. ⁷ Ki te nu'u aŋa oho i te me'e riva-riva 'i te mana'u ki te mahana era mo haka koa 'e mo haka nui-nui i a rāua e te 'Atua, 'e 'i te haŋa mo ai 'i muri i a ia pe mu'a ka oho ena, ki a rāua ka va'ai ena e te 'Atua i te ora 'āpī 'ina he hope'a ra'a. ⁸ 'E ki te nu'u haka tere hai mana'u o rāua mau nō, ta'e haŋa ki te parauti'a, aŋa i te me'e ta'e tano, te ūtu'a o te 'Atua mo rāua e paŋaha'a rō. ⁹ E o'o rō te māui-ui ki roto i te ivi o te nu'u ta'ato'a aŋa i te me'e ta'e tano, te ra'e he [hūrio] 'e, tako'a, he nu'u ta'e he hūrio. ¹⁰ 'E te nu'u ta'ato'a aŋa i te me'e riva-riva e haka nui-nui rō e te 'Atua 'e e va'ai rō i te haumārū, ki te hūrio he ra'e, 'e ki te nu'u ta'e he hūrio tako'a. ¹¹ A ia, pa'i, e kī ena i te me'e riva-riva 'e i te me'e ta'e tano o te taŋata 'ina he u'i hoki he hūrio 'o ta'e he hūrio.

Te [haka tere iŋa 'a Mōtē]

¹² Te nu'u ta'ato'a hara ta'e 'ite o ruŋa i te haka tere iŋa 'a Mōtē 'e te nu'u ta'ato'a hara 'ite o ruŋa e ko ta'e haka ūtu'a e te 'Atua, 'e te ūtu'a mo rāua ta'ato'a he haka tapa mau rō 'āvai mai muri i a ia. Te me'e nō, te nu'u hara ta'e 'ite o ruŋa i rā haka tere iŋa, ta'e hai rā haka tere iŋa ka haka ūtu'a ena e te 'Atua, 'e te nu'u hara 'ite o ruŋa, hai rā haka tere iŋa mau 'ā ka haka ūtu'a ena. ¹³ Ta'e he nu'u tano ki te mata o te 'Atua te nu'u haka roŋo nō i te haka tere iŋa 'a Mōtē. Te nu'u tano ki tō'ona mata he nu'u haka roŋo 'e ha'atura ki rā haka tere iŋa.

¹⁴ Hora ena o te nu'u ta'e he hūrio e aŋa e oho ena, pa he me'e poreko o rāua, i te me'e kī e te haka tere iŋa 'a Mōtē, e take'a ena: 'i roto i a rāua te haka tere iŋa haka 'ite he aha te me'e tano 'e ta'e tano ki te mata o te 'Atua, ka ai atu 'ina i a rāua te haka tere iŋa 'a

Mōtē. ¹⁵ Hai me'e aña e te nu'u nei e take'a ena e ma'u rō 'ā 'i roto i a rāua te hāpī o te haka tere iña 'a Mōtē. 'I roto i te rāua mana'u, pa'i, te me'e kī i te tano 'e ta'e tano o te rāua me'e aña. 'E mo rā me'e mau 'ā e tuhi i te rāua hape 'o e kī i te rāua ta'e hape ¹⁶ 'i te mahana ture e te 'Atua hai Ietū Kiritō i te ta'ato'a me'e aña 'e mana'u e te taŋata, 'ātā i te me'e ta'e 'ite e te rua. He me'e nei te me'e haka 'ite 'i ruŋa i te [roŋo riva-riva o te 'Atua] hāpī e au.

¹⁷ A koe, pa he hūrio, e kī ena e haka moe rō 'ana koe i tu'u mana'u 'i ruŋa i te haka tere iña 'a Mōtē. E haka paka ena koe 'o te ai he nu'u ha'ata'a e te 'Atua mā'ana, ¹⁸ 'e e 'ite rō 'ana i tā'ana me'e haŋa 'e he aha te me'e riva-riva mo aña; 'o te haka tere iña era 'a Mōtē, pa'i, te haka 'ite atu. ¹⁹ E mana'u ena e koe e tano rō 'ā koe mo hāpī i te nu'u ta'e 'ite o ruŋa o te 'Atua, mo haka mā'eha i te mana'u o te nu'u oho a roto i te pōhāhā, ²⁰ 'e mo hāpī i te nu'u ta'e oho a te ara o te 'Atua 'e i te nu'u oho iho a nei ara. E mana'u ena koe pē ira 'i te ai i a koe te haka tere iña 'a Mōtē, 'e 'i ruŋa e hā'aki ena te parauti'a 'e te hāpī o te 'Atua.

²¹ Iā. Mo ai he hāpī koe i te tētahi, ūhe aha ia a koe e ta'e hāpī ena i a koe mau 'ā? Mo ai e kī rō 'ana koe 'ina ko toke, ūhe aha ia a koe e toke ena? ²² 'E mo ai e kī tako'a rō 'ana koe 'ina ko tai'ata, ūhe aha ia a koe e tai'ata ena? Mo ai e riri rō 'ana koe mo te 'ītoro, ūhe aha ia a koe e toke ena i te hauha'a mai roto i te hare pure o te 'ītoro? ²³ E mana'u ena koe: 'i te ai i a koe te haka tere iña 'a Mōtē i hau rō atu koe ki te rua, 'e, 'i te ta'e ha'atura ō'ou ki te me'e hā'aki o ruŋa, e ta'e mo'a ena i te 'Atua. ²⁴ 'O ira mau 'ā e kī ena 'i ruŋa i te [Pāpa'i Mo'a]: «He ta'e ha'atura o kōrua o te hūrio, te nu'u ta'e he hūrio e vānaŋa ta'e tano ena mo te 'Atua».

²⁵ Te me'e he hore i te kiri o te kinōŋa e hauha'a rō 'ana mo te nu'u hūrio ha'atura ki te haka tere iña 'a Mōtē. 'E, mo te nu'u hūrio ta'e ha'atura ki rā roŋo, te hore o te kiri o te kinōŋa 'ina e tahi hauha'a. ²⁶ Te kope ta'e he hūrio ha'atura ki te haka tere iña 'a Mōtē pa he taŋata ko hore 'ā te kiri o te kinōŋa ka ai atu 'ina kai hore. ²⁷ Hai noho iña tano o te kope ta'e he hūrio ha'atura i te haka tere iña 'a Mōtē e tuhi ena i te hape o te nu'u hūrio 'ite o ruŋa i rā haka tere iña 'e 'ina he ha'atura, ka ai atu ko hore 'ana te kiri o te kinōŋa.

²⁸ Te me'e he hūrio parauti'a, pa'i, ta'e he me'e o te haho nō, 'e pē ira tako'a te me'e he hore o te kiri o te kinōŋa, ta'e he me'e o te hakari nō. ²⁹ Te aura'a: te ai ō'ou he taŋata ha'ata'a parauti'a e te 'Atua mā'ana he me'e o te māhatu, 'e pē ira 'ā te hore i te kiri o te kinōŋa. Te hore parauti'a o te kinōŋa he haka kore i te me'e ta'e tano mai roto i te māhatu, he me'e aña e te [Vārua Maitai] mau nō, 'e ta'e he me'e rava'a hai ma'u 'e hai ha'atura ki te haka tere iña 'a Mōtē. Te kope pē nei e ha'ahana-hana rō 'ā e te 'Atua ka ai atu 'ina he ha'ahana-hana e te taŋata.

3 Mo ai pē ira, ūhe aha ia te me'e riva-riva o te ai he [hūrio] 'e o te hore i te kiri o te kinōŋa? ² Me'e rahi nō atu. E tahi o rā ŋā me'e: he haka 'ite o te 'Atua i

tā'ana vānaŋa ki te hūrio. ³ Te parauti'a, tētahi nu'u hūrio 'ina he aña i te rāua me'e kī mo aña. I ai era a rāua pē ira, ūte aura'a hō, te 'Atua e ko aña tako'a i tā'ana me'e kī mo aña? ⁴ Ta'e pē ira. Te 'Atua e aña ena i tā'ana me'e ta'ato'a hai parauti'a, ka ai atu he reo-reo nō te aña o te taŋata ta'ato'a. 'E nā 'i ruŋa i te [Pāpa'i Mo'a] e kī ena mo te 'Atua:

«E kī rō e te taŋata: ta'a vānaŋa he parauti'a 'e, 'i te hora o te ture, i a koe te rē».

⁵ Nā pēaha te nu'u hai mana'u taŋata mau nō ka kī ena pē nei ē: «Mo ai hai me'e ta'e tano aña e tātou e take'a ena: te me'e ta'ato'a aña e te 'Atua he me'e tī-tika, e ko tano ia te 'Atua mo haka ūtu'a i a tātou». ⁶ Te vānaŋa tu'u pē rā e hape rō 'ā. Mo ai, pa'i, e aña rō 'ā te 'Atua i te me'e ta'e tano, ūpē hē ia ana tano mo ture i te hape o te taŋata?

⁷ Nā pēaha te nu'u tako'a ka kī ena: «Mo ai hai reo-reo 'ā'aku e 'ata haka nui-nui ena i te parauti'a o te 'Atua, ūhe aha ia e ture mai ena he taŋata hara a au? ⁸ 'E, mo ai pē ira, ūhe aha ia ana ta'e aña i te me'e ta'e tano ki ai ai te me'e riva-riva?».

O ruŋa i te kī iña nei te tētahi nu'u e vānaŋa ta'e tano ena mō'oku. Pē nei e kī ena: 'ā'aku te hāpī pē ira. Te nu'u ena ko tano riva-riva 'ā mo haka ūtu'a e te 'Atua.

Ta'ato'a nō i hara ai

⁹ ūPē hē ia te me'e nei? ū'Ata hau hō tātou te hūrio ki te mata o te 'Atua ki te nu'u ta'e he hūrio? Ta'e pē ira. Nā ko haka 'ite atu 'ana pē nei ē: ka hūrio, ka ta'e hūrio, ta'ato'a nō he nu'u hara. ¹⁰ Pē nei e kī ena 'i ruŋa i te Pāpa'i Mo'a:

«'Ina e tahi kope tano ki te mata o te 'Atua.

¹¹ 'Ina e tahi kope aŋi-aŋi i te parauti'a o ruŋa i a ia. 'E 'ina tako'a e tahi kope haŋa hai māhatu mo 'ite o ruŋa ō'ona.

¹² Ta'ato'a taŋata ko oho 'ā a te ara ta'e tano; 'ina e tahi o rāua i aña i te me'e tī-tika.

;'Ina e tahi kope aña i te me'e riva-riva, korohaŋa e tahi!

¹³ Te rāua vānaŋa te kakara pa he pāpaku ena 'ā ko rahi 'ā te mahana; te 'arero ko peŋo-peŋo riva-riva 'ā 'i te reo-reo, 'e mai roto i te rāua haha e e'a ena te vānaŋa pa he veneno ena 'ā o te kōreha.

¹⁴ He tohu nō te aña 'e te maŋeo o te rāua vānaŋa he taparahi-ta'ata.

¹⁵ Te me'e he tiŋa'i he haka mate i te taŋata ta'e he parau 'āpī mo te nu'u nei.

¹⁶ Kona era mo tu'u te me'e ma'u he 'ati 'e he tōtōā,

¹⁷ 'e 'ina kai 'ite mo noho 'i muri i te tētahi 'i roto i te haumārū.

¹⁸ Ki te hora hope'a
'ina he mana'u e mo'a te 'Atua».

¹⁹ Pē ira e hā'aki ena 'i ruŋa i te Pāpa'i Mo'a. 'E ko 'ite 'ana e tātou: ta'ato'a me'e kī o ruŋa e kī ena mo te nu'u ki a rāua i va'ai ai, 'o 'ōtohe pē nei ē: 'ina rāua hara, 'e 'o ta'e 'ite pē nei ē: te taŋata ta'ato'a e hape rō 'ā 'e ko tano 'ā mo haka ūtu'a e te 'Atua. ²⁰ 'Ina e tahi kope mo tano ki te mata o te 'Atua hai ha'atura ki te [haka tere iŋa 'a Mōtē] 'i te me'e era e ko rava'a te haka tere iŋa era mo ha'atura tahi. Te 'Atua i va'ai mai ai i rā roŋo mo haka 'ite mai: a tātou ta'ato'a he nu'u hara.

Pē hē te taŋata ana tano ki te mata o te 'Atua

²¹ 'E, 'i te hora nei, ko haka aŋi-aŋi mai 'ana e te 'Atua i te me'e hā'aki o ruŋa i te haka tere iŋa 'a Mōtē 'e o ruŋa i te me'e pāpa'i e te perofeta: pē hē te 'Atua e haka tano ena i te taŋata ki tō'ona mata, 'e rā me'e ta'e hai ha'atura ki te haka tere iŋa 'a Mōtē, ²² hai [haka moe i te mana'u] 'i ruŋa i a Ietū Kiritō. Mo te 'Atua ta'ato'a taŋata haka moe i te mana'u 'i ruŋa i a Ietū he taŋata tano ki tō'ona mata. Mō'ona te nu'u, ka hūrio ka ta'e hūrio, ko tū me'e 'ā: ²³ ko hara tahi 'ana 'e ko haka tapa tahi 'ana mai te ara haŋa e ia mo rāua. ²⁴ 'E, hai riva rahi mau nō ō'ona, e kī ena e te 'Atua e tano rō 'ana ki tō'ona mata te taŋata haka moe i te mana'u 'i ruŋa i a Ietū, ta'e 'ō pē nei ē: e aŋa tātou e tahi me'e mo 'auhau ki a ia. E ai ena pē ira 'o te ai ko 'amo 'ana e Ietū 'i ruŋa i a ia i te ūtu'a o te tātou hara. ²⁵⁻²⁶ I uŋa mai ai, pa'i, e te 'Atua i te [Kiritō] pa he tūtia mo haka kore i tō'ona riri mo te tātou hara hai toto tehe era 'i ruŋa i te tātaurō. 'E, hai haka moe i te mana'u 'i ruŋa i te me'e aŋa era e te Kiritō, e haka kore ena e te 'Atua i te tātou hara. Hai me'e nei i haŋa ai te 'Atua mo haka aŋi-aŋi mai: a ia kope aŋa i te me'e tī-tika. Hora era kai tu'u mai 'ana te Kiritō, kai tapa atu e te 'Atua i te hara o te taŋata, 'e i tu'u rō pa he me'e ena ē: 'ina he tano tā'ana me'e aŋa. I aŋa ai pē ira 'o te ai a ia kope 'ite i te ha'aoroma'i, 'e i ha'aoroma'i ai i te hara o rā nu'u 'ātā ki te hora mo 'amo e Ietū i te hara o te ta'ato'a. Pē ira e 'ite nei: te 'Atua he kope aŋa i te me'e tano, 'e e tano rō 'ā a ia mo kī: te nu'u ta'ato'a haka moe i te mana'u 'i ruŋa i a Ietū, he nu'u tano ki tō'ona mata.

²⁷ Mo ai ia pē ira, e riva rō tātou mo te'o-te'o 'i mu'a o te 'Atua o ruŋa i te tātou me'e aŋa? 'Ina. e 'O te aha? 'O te ai hai haka moe nō o tātou i te mana'u 'i ruŋa i a Ietū te 'Atua e kī ena e tano rō 'ana tātou ki tō'ona mata, ta'e 'ō hai ha'atura ki te haka tere iŋa 'a Mōtē. ²⁸ Pē ira a tātou i tu'u ai ki te roa: he tano te taŋata 'i mu'a o te 'Atua hai haka moe i te mana'u 'i ruŋa i a Ietū, 'e ta'e 'ō hai ha'atura ki te haka tere iŋa 'a Mōtē.

²⁹ Hai me'e nei e 'ite ena: te 'Atua ta'e nō o te hūrio, o te nu'u ta'e he hūrio tako'a, te aura'a, te 'Atua o te taŋata ta'ato'a o te ao. ³⁰ E tahi mau nō, pa'i, 'Atua, he 'Atua kī pē nei ē: te taŋata haka moe i te mana'u 'i

ruŋa i a Ietū he taŋata tano ki tō'ona mata, ka hore 'o ka ta'e hore te kiri o te kinoŋa. ³¹ Mo tano ia te taŋata ki te mata o te 'Atua hai haka moe mau nō i te mana'u 'i ruŋa i a Ietū, e ka kī 'ō ia 'ina he hauha'a toe o te haka tere iŋa 'a Mōtē? e Ta'e pē ira! E hauha'a rō 'ana 'i te me'e era hai haka moe i te mana'u 'i ruŋa i a Ietū e rava'a iho ena e tātou mo ha'atura i rā haka tere iŋa.

He ha'aura'a iŋa hai 'Aparahama

⁴ Ka mana'u rā kōrua ki a [Aparahama], tupuna o mātou o te [hūrio]. ² 'Āhani hai me'e i aŋa e 'Aparahama i kī ai e te 'Atua a 'Aparahama he kope tano ki tō'ona mata, e tano nō ia a 'Aparahama mo haka paka i a ia, ka ai atu ta'e 'i mu'a o te 'Atua. ³ 'E ta'e, pa'i, pē ira. E hā'aki ena 'i ruŋa i te [Pāpa'i Mo'a]:

«'I te haka moe o 'Aparahama i te mana'u 'i ruŋa i te me'e kī e te 'Atua,
i kī ai e te 'Atua: a 'Aparahama he taŋata tano 'i mu'a i a ia».

⁴ Te kope e tahi e aŋa ena, te moni 'auhau ki a ia ta'e he moni va'ai tahaŋa nō, he moni 'auhau o tā'ana aŋa. ⁵ 'E te me'e he tano ki te mata o te 'Atua ta'e pē ira. Te taŋata hara, pa'i, [haka moe i te mana'u] 'i ruŋa i te 'Atua, hai riva rahi mau nō o te 'Atua e kī ena he kope tano ki tō'ona mata 'e ta'e 'ō hai me'e aŋa e rā kope. ⁶ A [Tāvita] i vānaŋa rō mo te kope kī e te 'Atua he taŋata tano ki tō'ona mata ta'e 'ō hai tā'ana me'e i aŋa. ⁷ Pē nei a Tāvita i kī ai:

«iKo te koa i te nu'u haka rehu e te 'Atua i te rāua hara
'e haka kore i te rāua me'e ta'e tano aŋa!

⁸ iKo te koa i te kope ta'e tapa haka 'ou e te 'Atua i tō'ona hara!».

⁹ e Mo te nu'u hore i te kiri o te kinoŋa nō 'ō te ha'a-maitai o te 'Atua, 'o tako'a mo te nu'u kai hore te kiri o te kinoŋa? I kī rō mātou: a 'Aparahama i haka moe rō i te mana'u 'i ruŋa i te 'Atua 'e 'o ira i kī ai e te 'Atua he taŋata tano ki tō'ona mata.

¹⁰ e 'I aŋahē i kī ai? e Hora era ko hore 'ana te kiri o te kinoŋa, 'o kai hore 'ā? 'I te hora era kai hore 'ā. ¹¹ Te parauti'a, ko kī era 'ā te 'Atua i rā me'e i hore iho ai te kiri o te kinoŋa o 'Aparahama, pa he tāpa'o o tū me'e kī era e te 'Atua o ruŋa i a ia.

Pē ira a 'Aparahama i ai ai he matu'a o te nu'u ta'ato'a haka moe i te mana'u 'i ruŋa i te 'Atua, nu'u e tano tako'a rō 'ā ki te mata o te 'Atua, ka ai atu kai hore te kiri o te kinoŋa. ¹² A 'Aparahama he matu'a tako'a o te nu'u hore o te kiri o te kinoŋa haka moe i te mana'u 'i ruŋa i te 'Atua, te rāua haka moe iŋa i te mana'u pa he haka moe iŋa o te mana'u o te mātou tupuna ko 'Aparahama 'i te hora kai hore 'ana te kiri o te kinoŋa.

He hōrea o te 'Atua mo te hakaara o 'Aparahama

¹³ Hora hōrea era e te 'Atua ki a 'Aparahama 'e ki tō'ona hakaara: pe mu'a ka oho ena mo rāua te ao nei, i hōrea ai ta'e 'o te ha'atura o 'Aparahama ki te [haka tere iŋa 'a Mōtē], 'o te tano ō'ona ki te mata o te 'Atua, he haka moe i tō'ona mana'u 'i ruŋa. ¹⁴ 'Āhani te ao nei i hōrea ai mo te nu'u ha'atura ki te haka tere iŋa 'a Mōtē, 'ina ia he hauha'a toe o te haka moe i te mana'u 'i ruŋa i te 'Atua, 'e o te hōrea o te 'Atua. ¹⁵ Te me'e rava'a, pa'i, mai te haka tere iŋa 'a Mōtē, he ūtu'a 'o te ai 'ina e tahi kope mo rava'a mo ha'atura tahi i rā haka tere iŋa. 'E mo ta'e ai o te haka tere iŋa mo ha'atura, 'ina ia he me'e mo kī mai ko hape 'ā a tātou.

¹⁶ 'O ira, te hōrea kī e te 'Atua ki a 'Aparahama mo hauha'a mo oho nō mo tō'ona hakaara ta'ato'a, e ai he me'e va'ai nō e te 'Atua hai riva rahi ō'ona, hai haka moe nō i te mana'u 'i ruŋa i a ia. Te aura'a: te hōrea mo te nu'u ta'ato'a haka moe i te mana'u 'i ruŋa i te 'Atua, pē 'Aparahama, ka ai atu e ma'u rō 'ā 'o 'ina he ma'u i te haka tere iŋa 'a Mōtē. Pē ira a 'Aparahama i ai ai he matu'a o tātou ta'ato'a. ¹⁷ Pa he me'e kī 'i ruŋa i te Pāpa'i Mo'a: «Ko ha'ata'a 'ana a au i a koe mo tupuna o te me'e rahi nō atu hau o te ao». Te hōrea nei i va'ai ai ki a 'Aparahama 'o te haka moe i tō'ona mana'u 'i ruŋa i te 'Atua, 'Atua i a ia te pūai mo haka ora i te taŋata mai te mate 'e mo aŋa i te me'e kai ai 'ana.

¹⁸ 'I te hora e tu'u rō 'ā pa he me'e ena ē: 'ina he rāve'a toe mo topa o tū me'e kī era e te 'Atua, i 'ata haka hio-hio i oho nō a 'Aparahama i tō'ona mana'u 'i ruŋa i te 'Atua, 'e i 'ata tiaki nō ki te mahana mo haka tano e te 'Atua i rā me'e hōrea era ki a ia. Pē ira i ai ai «he tupuna o te me'e rahi nō atu hau o te ao», pa he me'e kī e te 'Atua: «Pa he rahi ena 'ā o te hetu'u o te ranjī te rahi o tu'u hakaara ka ai ena». ¹⁹ Ka ai atu ko hāhine 'ā te ho'e hānere matahiti o 'Aparahama 'e tā'ana vi'e ko [Tara] he pa'a, kai 'aka-'aka te mana'u. ²⁰ 'I haka noho i oho nō i te mana'u 'i ruŋa i te hōrea o te 'Atua. 'I 'ata haka pūai nō i te haka moe iŋa i te mana'u 'i ruŋa i te 'Atua 'e he ha'ahana-hana, ²¹ 'o te 'ite riva-riva pē nei ē: i te 'Atua te pūai mo haka tano i tā'ana me'e hōrea. ²² 'O ira te 'Atua i kī ai: a 'Aparahama he taŋata tano ki tō'ona mata.

²³ Te vānaŋa: «Te taŋata e tano rō 'ā ki te mata o te 'Atua hai haka moe i te mana'u 'i ruŋa i a ia», i pāpa'i ai ta'e mo 'Aparahama nō, ²⁴ mo tātou tako'a. Te 'Atua e kī ena he taŋata tano a tātou ki tō'ona mata hai haka moe o tātou i te mana'u 'i ruŋa i a ia, kope haka ora mai mai te mate i a Ietū, Pū'oko Haka Tere o tātou, ²⁵ va'ai era ki te mate mo te tātou hara, 'e haka ora haka 'ou era mai te mate mo riro o tātou he taŋata tano ki te mata o te 'Atua.

Pē hē a tātou ana 'ite: te 'Atua e haŋa rō mai 'ana

5 'I te ai o tātou 'i te hora nei he taŋata tano ki te mata o te 'Atua 'o te [haka moe i te mana'u] 'i

ruŋa i a Ietū, e riva-riva nei a tātou ko te 'Atua hai me'e aŋa era e te tātou Pū'oko Haka Tere ko Ietū Kir-itō. ² 'E, tako'a, hai haka moe i te mana'u 'i ruŋa i a Ietū e 'ite nei a tātou o ruŋa i te riva rahi o te 'Atua, 'e e noho nei 'i roto. E koa rahi nei a tātou 'o te ai, pe mu'a ka oho ena, i a tātou te huru riva o te 'Atua, he roa haŋa 'ā'ana mo tātou. ³ 'E ta'e nō 'o ira a tātou e koa nei, 'o te 'amo tako'a i te 'ati; 'i te 'amo iŋa, pa'i, i te 'ati e 'ite nei a tātou i te ha'aoroma'i hai pūai. ⁴ 'I te 'ite o tātou 'i te ha'aoroma'i hai pūai, e koa ena te 'Atua. 'E hai koa o te 'Atua mo tātou, e 'ata pūai ena te tā-tou mana'u 'i ruŋa i a ia. ⁵ 'E, 'i te 'ata pūai o te tātou mana'u 'i ruŋa i te 'Atua, e 'ite nei e tātou e ko ta'e aŋa e ia i tā'ana me'e kī. Ko haka take'a mai 'ana, pa'i, i te rahi o tō'ona haŋa hai va'ai mai i te [Vārua Maitai] mo ŋaro'a e tātou i rā haŋa 'i roto i te māhatu.

⁶ Hora era 'ina he rāve'a toe o tātou o te taŋata mo e'a mai roto i te hara, i mate ai te [Kiritō] mo tātou, hora kī mau era 'ā mo mate. ⁷ 'I roto i te taŋata, ta'e pau-rō te mahana e take'a ena i te kope haŋa mo va'ai i a ia ki te mate mo te taŋata aŋa i te me'e tī-tika. Ka ai atu pē ira, e ai rō pēaha te kope haŋa mo va'ai i a ia ki te mate mo te taŋata riva 'e māhatu 'aroha hā'ū'ū ki a ia. ⁸ Oho iŋa kē ia to te 'Atua; hora era 'i roto i te hara 'ana a tātou, i uŋa nō mai i te Kiritō mo mate mo 'auhau o te tātou hara. Pē ira i haka take'a mai ai ki a tātou i tō'ona haŋa.

⁹ Mo ai hai Ietū Kiritō 'e hai haka moe o tātou i te mana'u 'i ruŋa i te me'e aŋa era e ia mo tātou 'i ruŋa i te tātaurō i kī ai e te 'Atua e tano rō 'ana a tātou ki tō'ona mata, e 'ite riva-riva nei: hai ia ka e'a ena tātou mai roto i te ūtu'a o te hara 'i te hora o te haka ūtu'a. ¹⁰ 'E, i ai era ko haka riva-riva 'ā e te 'Atua i a tātou ki a ia hai mate o tā'ana Poki 'i te hora e 'enemī rō 'ā a tā-tou mō'ona, hora nei ia, he hora e riva-riva rō 'ana a tātou ko te 'Atua, e 'ite nei a tātou e ko ta'e haka e'a e te 'Atua i a tātou mai roto i te ūtu'a o te hara 'i te ai e ora rō 'ana tā'ana Poki. ¹¹ 'E, tako'a, e koa nei a tātou 'o te ai 'i te hora nei 'i roto i te haumārū e noho nei ananake ko te 'Atua hai me'e aŋa era e te tātou Pū'oko Haka Tere ko Ietū Kiritō.

Ko 'Ātamu 'e ko Ietū Kiritō

¹² Hai [Ātamu], taŋata mau nō e tahi, i ai ai te hara 'i te ao, 'e hai hara i ai ai te mate. Pē ira te mate i ai ai mo te ta'ato'a 'i te ai ko hara tahi 'ana te taŋata. ¹³ Ko ai era 'ana te hara 'i te hora 'ina kai ai 'ā e tahi haka tere iŋa mo ha'atura. Te me'e nō, 'ina he tapa atu i te hara mo ta'e ai o te haka tere iŋa kī i te hape 'e i te ta'e hape o te taŋata. ¹⁴ Mai te hora o 'Ātamu ki te hora o [Mōtē], te me'e mo te nu'u hara he mate, ka ai atu te rāua hara ta'e he ta'e ha'atura ki te me'e kī e te 'Atua mo aŋa, pa he hara o 'Ātamu, kope pa he kope era mo oho mai ko Ietū Kiritō. †

† A 'Ātamu pē Ietū Kiritō 'ā 'i te me'e era hai me'e i aŋa e 'Ātamu i hara tahi ai te taŋata, 'e hai me'e i aŋa e Ietū i rava'a ai te rāve'a mo e'a o te taŋata mai roto i te ūtu'a o te hara.

¹⁵ Te hara o 'Ātamu 'e te me'e va'ai mai e te 'Atua me'e kē me'e kē. Hai hara, pa'i, o te kope mau nō e tahi i mate ai te taŋata. 'E te me'e va'ai mai e te 'Atua hai riva rahi o te taŋata mau nō e tahi ko Ietū Kiritō, he me'e hope'a o te nui-nui mo te riva-riva o te taŋata ta'ato'a. ¹⁶ Te hara o 'Ātamu me'e kē, 'e te me'e va'ai mai e te 'Atua me'e kē. Te me'e i rava'a mai te hara o 'Ātamu he kī iŋa o te 'Atua pē nei ē: «ko hape 'ā te taŋata», 'e te me'e i rava'a mai te me'e va'ai e te 'Atua, he rāve'a mo kī e ia: «'ina he hape», ka ai atu e rahi rō 'ā te hara. ¹⁷ Hai hara o te kope mau nō e tahi e mate ena te taŋata ta'ato'a, 'e hai me'e aŋa e te taŋata mau nō e tahi ko Ietū Kiritō, e ai ena te me'e nui-nui. Hai ia, pa'i, e ai ena, i te nu'u ta'ato'a tano ki te mata o te 'Atua, te ora 'āpī 'ina he hope'a ra'a hai riva rahi ō'ona ta'e e 'auhau, 'e a rāua ka haka tere ena 'i muri i a Ietū.

¹⁸ Hai me'e ta'e tano aŋa e 'Ātamu i ai ai te ūtu'a 'i ruŋa i te taŋata ta'ato'a, 'e hai me'e riva-riva aŋa e Ietū Kiritō i ai ai te rāve'a mo te taŋata ta'ato'a mo kī e te 'Atua: «'ina rāua hape», ki rava'a ai i te ora 'āpī 'ina he hope'a ra'a. ¹⁹ O te ta'e ha'atura o te taŋata mau nō e tahi i hara tahi ai te taŋata, 'e 'o te ha'atura o te taŋata mau nō e tahi me'e rahi nō atu taŋata ka ai ena he nu'u e tano rō 'ana ki te mata o te 'Atua.

²⁰ Te 'Atua i va'ai ai i te [haka tere iŋa 'a Mōtē] mo aŋi-aŋi e te taŋata he aŋi mau 'ana e rahi rō 'ana te rāua hara. 'E, ka ai atu e rahi rō 'ā te hara, te 'Atua i haka 'ite rō mai: 'ata hau rō atu ki te hara tō'ona riva rahi. ²¹ Te me'e rava'a e te taŋata mai te hara he mate, he ha'ata'a mau rō 'āvai mai te 'Atua. 'E te me'e rava'a mai te riva rahi o te 'Atua he tano ki tō'ona mata 'e he ora 'āpī 'ina he hope'a ra'a hai me'e aŋa era 'i ruŋa i te tātaurō e te tātou Pū'oko Haka Tere ko Ietū Kiritō.

Ko mate 'ā i a tātou te hara

6 ¿He aha ia te tātou me'e mo kī? ¿He aŋa he oho mau rō 'ai i te me'e ta'e tano mo 'ata haka take'a mai o te 'Atua i tō'ona riva rahi? ² ¿Ta'e pē ira! Ko mate 'ā i a tātou te hara. ¿He aha ia a tātou ana noho nō 'i roto i te hara? ³ ¿Kai 'ite 'ō kōrua i haka moe era i te mana'u 'i ruŋa i a Ietū 'e i papatito era, he riro a tātou 'a Ietū Kiritō, 'e he tu'u pa he me'e: i mate rō 'i muri i a ia? ⁴ 'I te papatito e tu'u ena pa he me'e: i mate rō 'e i tanu rō a tātou 'i muri i a Ietū. 'E pa he haka ora iŋa e te 'Atua i a Ietū mai te mate hai pūai nui-nui ō'ona, i haka e'a tako'a ai i a tātou 'i muri i a ia ki ai ai te tātou noho iŋa 'āpī.

⁵ 'I te ai i mate rō a tātou 'i muri i te Kiritō hai mate iŋa era ō'ona mo tātou, e 'ite nei a tātou: te 'Atua e ko ta'e va'ai mai i te noho iŋa 'āpī pa he va'ai iŋa era i te ora 'āpī ki a Ietū 'i te hora haka ora i a ia mai te mate. ⁶ Ko 'ite 'ana a tātou: te huru era o tātou o mu'a 'ana ko mate 'ā hora mate era o Ietū 'i ruŋa i te tātaurō. Pē ira i kore ai te pūai o te hara mai ruŋa i a tātou, 'o haka tere haka 'ou i a tātou e te hara. ⁷ E mate ena, pa'i, a tātou, he kore te pūai o te hara mai ruŋa i a tātou.

⁸ 'I te ai o tātou ko mate 'ana 'i muri i te Kiritō, e 'ite nei: ananake tātou ko kuā Ietū e noho nei. ⁹ E 'ite tako'a rō 'ana a tātou pē nei ē: i ai ena ko haka ora 'ā e te 'Atua i a Ietū mai te mate, e ko mate haka 'ou ia ki te hora hope'a. 'Ina he pūai toe o te mate 'i ruŋa i a ia. ¹⁰ I mate ai, pa'i, te Kiritō mo rē mau rō 'āvai ki te pūai o te hara, 'e, hora nei, tō'ona ora iŋa 'āpī mo haka nui-nui mau nō i te 'Atua.

¹¹ 'E a kōrua, e mana'u pē nei ē: ko mate tako'a 'ā i a kōrua te pūai o te hara, 'e te ora 'āpī o kōrua o te hora nei mo aŋa, hai Ietū Kiritō, i te me'e haŋa o te 'Atua. ¹² O ira, 'ina ko ha'ati'a ki te hara mo haka aŋa mo oho nō atu i a kōrua hai me'e ta'e tano pohe e te hakari. ¹³ 'Ina ko va'ai i te kōrua hakari ki te hara, 'o riro te hakari he me'e mo aŋa o te me'e ta'e tano. Te me'e o kōrua mo aŋa, pa he taŋata ora haka 'ou mai te mate, he va'ai i a kōrua ki te 'Atua mo haka tere atu, 'e te kōrua hakari pa he me'e mo aŋa o te me'e tī-tika 'i mu'a ō'ona. ¹⁴ Pē ira e ko ai haka 'ou 'i ruŋa i a kōrua te pūai o te hara. Te kōrua ora, pa'i, 'i te riva rahi o te 'Atua 'e ta'e 'i te ha'atura ki te [haka tere iŋa 'a Mōtē].

¿He tāvini koe o te hara 'o o te 'Atua?

¹⁵ ¿He aha ia te tātou me'e mo aŋa 'i te hora nei? ¿He hara he oho rō 'ai 'i te ai o te tātou ora 'i te riva rahi o te 'Atua 'e ta'e 'i te ha'atura ki te haka tere iŋa 'a Mōtē? ¿Ta'e pē ira! ¹⁶ ¿Kai 'ite 'ō kōrua pē nei ē: mo ha'atura mo oho o kōrua ki te me'e e tahi, he riro kōrua he 'ekaravo o rā me'e? He parauti'a te vānaŋa nei ka ai atu he hara 'o he 'Atua te me'e ha'atura o kōrua. Te me'e nō, te hara he me'e ma'u i a kōrua ki te mate, 'e te ha'atura ki te 'Atua he me'e ma'u i a kōrua mo haka tere hai me'e tī-tika.

¹⁷ 'I mu'a 'ā, a kōrua he 'ekaravo o te hara. 'E, māuruuru ki te 'Atua, hora nei, e ha'atura rō 'ana hai māhatu ki te hāpī parauti'a haka 'ite atu. ¹⁸ Te 'Atua ko haka e'a 'ā i a kōrua mai roto i te pūai o te hara, 'e ko haka riro 'ā i a kōrua he tāvini 'ā'ana, mo aŋa i te me'e tī-tika 'i mu'a i a ia. ¹⁹ (E ha'aaura'a atu ena a au hai 'ekaravo he aŋa ri'a-ri'a o kōrua mo aŋi-aŋi i te ŋā me'e nei). 'O ira, pa he va'ai iŋa o kōrua i te hakari mo aŋa i te me'e ta'e tano 'i mu'a 'ā, pē ira tako'a 'ā ana va'ai 'i te hora nei i te hakari mo aŋa i te me'e riva-riva ki te mata o te 'Atua, ki ai ai te kōrua huru 'e te kōrua noho iŋa e tano rō 'ā ki a ia.

²⁰ Hora era 'ā he tāvini a kōrua o te hara, 'ina rō atu kōrua he mana'u mo aŋa i te me'e riva-riva ki te mata o te 'Atua. ²¹ 'I rā hora, ¿i rava'a rō hō e kōrua i te me'e riva-riva o te hara, me'e haka ha'amā i a kōrua 'i te hora nei 'e ma'u i a kōrua ki te mate? ²² A kōrua 'i te hora nei ta'e he tāvini toe o te hara, he tāvini o te 'Atua. Te me'e nei mo te kōrua riva-riva mau 'ā; pē ira he tano he oho te kōrua noho iŋa ki te mata o te 'Atua, 'e, 'i te hora hope'a, he rava'a i te ora 'āpī 'ina he hope'a ra'a va'ai e ia. ²³ Te me'e va'ai mai e te hara he mate, he ha'ata'a mau rō 'āvai mai muri i te 'Atua. 'E te me'e va'ai mai e te 'Atua he ora 'āpī 'ina he hope'a ra'a 'i

muri i a ia 'i te ai o tātou 'a Ietū Kiritō, Pū'oko Haka Tere o tātou.

He ha'aaura'a iŋa hai hāipo-ipo

7 E te taina, ko 'ite riva-riva 'ana a kōrua o ruŋa i te [haka tere iŋa 'a Mōtē] 'e, ko 'ite tako'a 'ā: 'ina e tahi pūai o te haka tere iŋa nei 'i ruŋa i te taŋata mate. ² Pē nei te aura'a: te vi'e [hāipo-ipo] ki te taŋata e tahi he vi'e mau rō 'ai o rā taŋata 'i te hora e ora nō 'ā. 'E, mo mate o rā kenu, ta'e rā vi'e vi'e hāipo-ipo toe. ³ Mo noho ki te rua taŋata e ora nō 'ā tā'ana kenu, e tai'ata 'ā. 'E, mo mate, e tano nō rā vi'e mo hāipo-ipo haka 'ou ki te rua taŋata, 'e ta'e e tai'ata 'ā 'i te ai ta'e a ia he vi'e hāipo-ipo toe.

⁴ Pē ira tako'a a kōrua, e te taina ō'oku ē. 'Ina he pūai toe o te haka tere iŋa 'a Mōtē 'i ruŋa i a kōrua. I mate era a Ietū mo tātou, ko mate tako'a 'ā a tātou 'i muri. Pē ira i kore ai te pūai o rā haka tere iŋa mai ruŋa i a tātou, 'e 'i te hora nei te me'e i a tātou he pūai o te kope ora haka 'ou mai era mai te mate mo aŋa o tātou i te me'e haŋa o te 'Atua.

⁵ Hora era 'i roto i te hara 'ana a tātou, te aŋa o te haka tere iŋa 'a Mōtē he haka poreko 'i roto i a tātou rauhuru atu mana'u ta'e tano, 'e te me'e mau nō i rava'a mai rā ŋā me'e he mate. ⁶ 'E hora nei, 'ina he pūai toe o te haka tere iŋa 'a Mōtē 'i ruŋa i a tātou. Ko tano 'ana ia a tātou 'i te hora nei mo aŋa i te me'e haŋa o te 'Atua, ta'e 'ō hai oho iŋa tuai ha'atura ki te haka tere iŋa 'a Mōtē, hai oho iŋa 'āpī hā'ū'ū mai e te [Vārua Maitai].

Te haka tere iŋa 'a Mōtē

⁷ Ka kī 'ō te haka tere iŋa era 'a Mōtē me'e rake-rake? iTa'e pē ira! 'Āhani 'ina he haka tere iŋa era 'a Mōtē, e ko 'ite mai he aha te me'e he hara, te aura'a, e ko 'ite mai he aha te me'e he nou-nou 'āhani i ta'e haka 'ite mai: «'Ina ko nou-nou». ⁸ Mo ta'e ai, pa'i, o te haka tere iŋa mo ha'atura, te hara he me'e mate. Te 'ati nō, he to'o mai e te huru hara ō'oku i te roŋo nei «'ina ko nou-nou», he haka poreko 'i roto i a au i te nou-nou mo te me'e rahi nō atu me'e.

⁹ 'I te hora kī 'ite 'ana a au o ruŋa i te haka tere iŋa 'a Mōtē e riva-riva rō 'ana a au e noho era, ki tō'oku mana'u. 'E, i 'ite era a au o ruŋa, 'i rā hora i aŋi-aŋi iho ai e au he taŋata hara 'ō tū au era ¹⁰ 'e e 'ava-'ava rō 'ana e noho era mai te 'Atua. Pē ira, te haka tere iŋa nei 'a Mōtē, he me'e mo ma'u i a tātou a te ara o te ora, i roto ai he me'e mo ma'u i a tātou ki te mate. ¹¹ Pē nei te aura'a: ko to'o mai 'ā e te huru hara o te taŋata i te haka tere iŋa 'a Mōtē, ko ha'ariro 'ā pa he me'e 'ā'ana, mo reo-reo mai pē nei ē: mo ha'atura ō'oku ki rā haka tere iŋa, he rava'a e au i te ora 'āpī 'ina he hope'a ra'a. 'E, i hope'a ai, hai rā haka tere iŋa mau 'ā, i ha'ata'a ai i a au mai muri i te 'Atua 'i te ta'e rava'a e au mo ha'atura tahi.

¹² Te parauti'a mau, te haka tere iŋa 'a Mōtē 'e te roŋo hā'aki o ruŋa he me'e riva-riva, tano 'e hope'a o

te mo'a. ¹³ Te kī ia: o te me'e riva-riva nei i ma'u i a au ki te mate? iTa'e pē ira! O te huru hara o tātou te ma'u i a tātou ki te mate, 'e i me'e ai hai me'e riva-riva. Hai haka tere iŋa, pa'i, 'a Mōtē e aŋi-aŋi ena i te taparahi-ta'ata o te me'e ena he hara.

¹⁴ A tātou e 'ite rō 'ana: te haka tere iŋa 'a Mōtē me'e riva-riva, he me'e va'ai e te Vārua o te 'Atua. 'E a au pa he taŋata 'ina ō'oku pūai 'i mu'a o te hara. E tu'u rō 'ana a au pa he 'ekaravo o te hara. ¹⁵ E tano rō 'ā te mahana e māere rō 'ana a au i tā'aku me'e aŋa. 'Ina, pa'i, a au he aŋa i tā'aku me'e riva-riva haŋa mo aŋa. He me'e hope'a o tō'oku ta'e haŋa tā'aku me'e aŋa.

¹⁶ 'I te ta'e haŋa ō'oku mo aŋa i te me'e ta'e tano aŋa e au, e take'a ena pē nei ē: e pe'e rō 'ana a au ki te haka tere iŋa 'a Mōtē, 'e e 'ite rō 'ana e au me'e riva-riva.

¹⁷ 'E ta'e ko au toe te me'e aŋa i rā me'e, he huru hara nei o roto i a au. ¹⁸ Ko 'ite 'ana a au 'ina he me'e riva-riva poreko mai roto i tō'oku huru hara. Ka haŋa atu, pa'i, a au mo aŋa i te me'e riva-riva, 'ina ō'oku pūai mo aŋa i rā me'e. ¹⁹ 'Ina a au he aŋa i te me'e riva-riva haŋa e au mo aŋa. He me'e rake-rake ta'e haŋa e au mo aŋa tā'aku me'e aŋa. ²⁰ Mo aŋa ia ō'oku i te me'e 'ina e au he haŋa, ta'e ko au toe ia te me'e aŋa i rā me'e, he huru hara nei o roto i a au.

²¹ Hora nei ko aŋi-aŋi 'ana e au: ka haŋa atu a au mo aŋa i te me'e riva-riva, te me'e rava'a nō mo aŋa he me'e rake-rake. ²² Hai māhatu a au e haŋa nei ki te [haka tere iŋa o te 'Atua haka pāpa'i ki a Mōtē]. ²³ Ka ai atu pē ira, 'i roto i a au te me'e haka tātake i tō'oku mana'u riva-riva: he huru hara o roto ō'oku, ma'u i a au pa he taŋata puru 'ā'ana.

²⁴ iKo te 'ati 'ō i a au! iMā 'ai au e haka e'a mai roto i te rima o te huru hara ma'u i a au ki te mate? ²⁵ Mo te 'Atua mau nō e haka e'a hai Ietū Kiritō, he Pū'oko Haka Tere o tātou, 'e ki a ia a au e māuru-uru nei. Hora nei e aŋi-aŋi riva-riva rō 'ana e au: tā'aku me'e haŋa he ha'atura ki te haka tere iŋa o te 'Atua haka pāpa'i ki a Mōtē, 'e, 'i te me'e 'ina ō'oku pūai, he ha'atura nō tā'aku aŋa ki te hara.

He noho iŋa 'āpī hai [Vārua Maitai]

8 Hora nei 'ina he ūtu'a toe mo tātou mo te nu'u 'a Ietū Kiritō, nu'u [haka moe i te mana'u] 'i ruŋa i a ia, ² 'i te me'e era te Vārua Maitai, va'ai i te ora ki te nu'u 'a Ietū Kiritō, haka tere i a tātou 'i te hora nei, ko haka e'a 'ana i a tātou mai roto i te pūai o te hara ma'u i a tātou ki te mate. ³ Te 'Atua ko aŋa 'ā i te me'e ta'e rava'a e te [haka tere iŋa 'a Mōtē] mo aŋa, 'i te pūai kore o te taŋata. Ko haka kore 'ā i te pūai o te hara mai ruŋa i te taŋata hai uŋa mai i tā'ana Poki pa he taŋata 'e pa he tūtia mo 'amo e tō'ona hakari i te ūtu'a o te tātou hara. ⁴ I aŋa ai i te me'e nei ki tano ai a tātou, te nu'u ta'e haka tere haka 'ou hai mana'u taŋata, haka tere hai Vārua Maitai, mo ha'atura ki te me'e kī 'i ruŋa i te haka tere iŋa 'a Mōtē.

⁵ Te nu'u haka tere i a rāua hai mana'u taŋata, te me'e haŋa mau nō mo aŋa he me'e ta'e tano. 'E te nu'u haka tere hai Vārua Maitai, te me'e haŋa mau nō

mo aŋa he me'e o te Vārua Maitai. ⁶ Te nu'u aŋa i te me'e ta'e tano, te me'e mo rava'a he mate. 'E te nu'u aŋa i te me'e haŋa o te Vārua Maitai, te me'e mo rava'a he haumārū 'e he ora 'ina he hope'a ra'a. ⁷ Te nu'u haka tere i a rāua hai mana'u taŋata, he nu'u riri mo te 'Atua. Te nu'u nei 'ina he haŋa mo ha'atura ki te [haka tere iŋa o te 'Atua haka pāpa'i ki a Mōtē], 'e, tako'a, 'ina mau 'ā e ko rava'a e rāua mo ha'atura. ⁸ Te nu'u haka tere i a rāua hai mana'u taŋata e ko rava'a, ki te hora hope'a, mo haka koa i te 'Atua.

⁹ 'E, a kōrua 'ina he haka tere haka 'ou hai mana'u taŋata; e haka tere ena hai Vārua Maitai 'o te ai nā 'i roto i a kōrua te Vārua o te 'Atua. Te nu'u 'ina he Vārua o te [Kiritō] o roto i a rāua, ta'e o te Kiritō. ¹⁰ 'E, mo ai rō o te Kiritō 'i roto i a kōrua, he ora te kōrua vārua. Ko haka tano 'ana, pa'i, e te 'Atua i a kōrua ki tō'ona mata, ka ai atu e mate rō te kōrua hakari, he ūtu'a o te hara. ¹¹ Mo ai nā 'i roto i a kōrua te Vārua o te 'Atua haka ora i a Ietū mai te mate, mā'ana tako'a e haka ora i te kōrua hakari mai te mate hai Vārua ō'ona 'i roto o kōrua.

¹² 'O ira, e te taina ē, e ai rō 'ana te tātou me'e mo aŋa, 'e rā me'e ta'e he aŋa he oho i te me'e pohe nō e te hakari. ¹³ Mo noho mo aŋa o kōrua i nā me'e, he mate kōrua 'e he ha'ata'a mau rō 'āvai mai muri i te 'Atua. 'E, mo ta'e ha'atura haka 'ou o kōrua ki te me'e pohe nō e te hakari hai hā'ū'ū o te Vārua Maitai, te me'e mo rava'a he ora 'āpī 'ina he hope'a ra'a.

¹⁴ Te nu'u ta'ato'a haka tere e te Vārua Maitai, he nā poki o te 'Atua. ¹⁵ Te Vārua va'ai mai e te 'Atua ta'e he vārua haka riro i a tātou he 'ekaravo ri'a-ri'a 'i te kope haka aŋa i a ia, he Vārua haka riro i a tātou he nā poki o te 'Atua. Hai ia e kī ena a tātou ki te 'Atua: «'E koro ō'oku ē!». ¹⁶ O te Vārua mau nei 'ā te haka 'ite mai ki a tātou pē nei ē: he nā poki tātou o te 'Atua. ¹⁷ 'E, 'i te me'e era he nā poki tātou o te 'Atua, mo tātou tako'a te hauha'a ena ka va'ai ena e te 'Atua ki a Ietū, hauha'a hōrea e te 'Atua mo tā'ana nā poki. Te me'e nō, e ha'aoroma'i tātou, 'i te hora nei, i te 'ati topa mai 'o te ai o tātou 'ā'ana, ki ai ai a tātou, pe mu'a ka oho ena, 'i roto i tō'ona nui-nui, te aura'a, ki ai tako'a ai i a tātou tō'ona huru riva.

Te haka noho iŋa i te mana'u ki te me'e hōrea mai

¹⁸ Ki tō'oku mana'u, te 'ati 'amo e tātou 'i te hora nei ta'e 'ā he me'e ki te me'e hope'a o te nui-nui ka take'a ena e tātou pe mu'a ka oho ena. ¹⁹ 'E te me'e ta'ato'a aŋa e te 'Atua ko te tiaki iŋa 'ana ki te hora mo haka take'a e ia: he nā poki tātou 'ā'ana, ²⁰ 'o te ai te me'e ta'ato'a aŋa e te 'Atua i haka ūtu'a tako'a rō 'i te hora haka ūtu'a i a [Ātamu], 'e 'ina he ai haka 'ou pa he me'e haŋa e te 'Atua. 'E ta'e he me'e i haŋa e rā nā me'e, he me'e i haka rē e te 'Atua mo topa pē ira. 'E, ka ai atu pē ira, ko te noho iŋa 'ana te me'e kī e ia: ²¹ he haka kore i te 'ati mai ruŋa ki ai tako'a ai mo rā nā me'e te ora 'āpī nui-nui ena i te nā poki o te 'Atua. ²² Ko 'ite 'ana, pa'i, a tātou: 'ātā ki te hora nei te me'e

ta'ato'a aŋa e te 'Atua e 'au-auē rō 'ana 'i te mamae pa he vi'e 'i te hora poreko o te poki.

²³ 'E ta'e ko rāua nō te me'e māui-ui pē ira, ko tātou tako'a, he nu'u haka moe i te mana'u 'i ruŋa i a Ietū, ka ai atu i a tātou te Vārua Maitai, he me'e ra'e i va'ai mai o te me'e mo va'ai mai e te 'Atua. 'I roto i a tātou e taŋi nei ki te hora mo haka take'a e te 'Atua: he nā poki mau 'ā 'ā'ana 'e he haka e'a e ia i te tātou hakari mai roto i te 'ati. ²⁴ Ko te nā me'e nei te me'e tiaki e tātou mai te hora haka moe i te mana'u 'i ruŋa i a Ietū.

'Āhani i a tātou te nā me'e nei, 'ina e ko tiaki haka 'ou. 'E, ko ai, pa'i, te kope tiaki ki te me'e ko ai era 'ana? ²⁵ I ai ena e tiaki 'ana a tātou ki te me'e 'ina kai topa mai 'ā, ki tiaki ki oho nō ia tātou koia ko ha'aoroma'i hai pūai.

²⁶ He kore o te tātou pūai, e hā'ū'ū mai ena te Vārua Maitai. 'E, 'i te ta'e 'ite o tātou pē hē ana pure, 'ā'ana mau 'ā te ani ki te 'Atua mo tātou hai taŋi, taŋi ena 'ina he vānaŋa mo ha'aaura'a. ²⁷ 'E, te 'Atua, kope 'ite i te huru o te māhatu o te taŋata, ko 'ite 'ana he aha te me'e ani e te Vārua Maitai 'o te ai e ani 'ana e te Vārua Maitai ki te me'e haŋa e te 'Atua mo te taŋata haka moe i te mana'u 'i ruŋa i a Ietū.

Te haŋa o te 'Atua mo tātou

²⁸ Ko 'ite 'ana a tātou pē nei ē: te 'Atua e haka tano tahi rō 'ana i te me'e mo te riva-riva o te nu'u haŋa ki a ia, nu'u ha'ata'a e te 'Atua tano ki te me'e haŋa e ia mo rāua. ²⁹ Te mana'u, pa'i, ō'ona mo rāua mai mu'a 'ā: mo ai o te māhatu pa he māhatu o tā'ana Poki, ki ai ai rā Poki he 'atariki o te me'e rahi nō atu taina. ³⁰ Ki te nu'u ha'ata'a e te 'Atua mā'ana i kī rō mo haka moe i te mana'u 'i ruŋa i a ia. 'E ta'e nō ko te me'e ena, i haka tano rō i a rāua ki tō'ona mata 'e i hōrea rō pē nei ē: pe mu'a ka oho ena a rāua 'i roto i tō'ona nui-nui, te aura'a, i a rāua tako'a te huru riva ō'ona.

³¹ 'Ina ia he vānaŋa toe mo kī. I ai rō nei te 'Atua 'i te tātou pā'iŋa, 'ina e tahi kope mo rē mai ki a tātou. ³² I ai era i va'ai nō mai i tā'ana Poki mo mate mo tātou, 'e pē hē ia ana ta'e va'ai tako'a mai i te me'e ta'ato'a? ³³ 'E, ko ai ia te kope mo tuhi i te hape o te nu'u ha'ata'a e te 'Atua? 'Ā'ana, pa'i, te haka tano i a rāua ki tō'ona mata. ³⁴ 'E, mā 'ai e kī i te ūtu'a mo rāua? Ko Ietū Kiritō, pa'i, te me'e i mate mo rāua koia ko ora mai te mate 'e 'ai te pā'iŋa mata'u o te 'Atua e noho ena e ani 'ana mo tātou. ³⁵ I ai era pē ira, 'e he aha te me'e mo haka kore i te haŋa o Ietū Kiritō mai ruŋa i a tātou? 'E, he mamae? 'E, he 'ati? 'E, he tōtōā e te nu'u? 'E, he maruaki? 'E, he oŋe o te kahu? 'E, he topa o te me'e rake-rake 'o he mate 'i te rima o te rua? ³⁶ Te 'ati tu'u pa he nā 'ati nei e topa tā'ue rō mai pēaha ki a tātou. Nā, pa'i, e hā'aki rō 'ana 'i ruŋa i te [Pāpa'i Mo'a] pē nei ē:

«'O te ai o mātou 'ā'au, paurō te mahana he oho nō mai te aŋa o te taŋata mo tiŋa'i i a mātou; 'e, ko ha'ariro 'ā i a mātou he māmoe mo ma'u mo tiŋa'i».

³⁷ Ka ai atu e topa rō mai 'ana te nā 'ati ta'ato'a nei, 'ina he rē mai ki a tātou; e e'a nei, pa'i, a tātou hai koa mai roto i te 'ati hai pūai o te kope haŋa rahi mai. ³⁸ 'E hora nei, ko aŋi-aŋi riva-riva 'ana e au pē nei ē: 'ina e tahi me'e mo haka kore i te haŋa o te 'Atua mai ruŋa i a tātou. 'Ina e ko haka kore e te mate 'e e te ora, e te merahi 'e e te tātane, e te me'e o te hora nei 'e e te me'e pe mu'a ka oho ena, ³⁹ e te me'e o te kona hope'a o te ruŋa nui 'e e te me'e o te kona hope'a o te raro nui, 'e e te tētahi atu me'e aŋa e te 'Atua. 'Ina mau 'ā e tahi me'e mo haka kore mai ruŋa i a tātou i te haŋa o te 'Atua haka take'a mai hai Ietū Kiritō, he Pū'oko Haka Tere o tātou.

Ta'e ta'ato'a he nā poki o te 'Atua

9 Pa he taŋata haka moe au i te mana'u 'i ruŋa i a Ietū Kiritō, he parauti'a tā'aku me'e nei ka kī atu ena, ta'e he reo-reo. O te [Vārua Maitai] te 'ata haka aŋi-aŋi mai he parauti'a mau 'ā tō'oku mana'u: ² ka pō ka 'ōtea e ma'u nei a au i te māui-ui 'i roto i tō'oku māhatu ³ mo tō'oku taina he itaraera. 'Āhani hai va'ai ō'oku i a au mo haka ūtu'a e te 'Atua, 'e hai ha'ata'a ō'oku i a au mai te [Kiritō] he riva a au mo hā'ū'ū ki a rāua mo [haka moe i te mana'u] 'i ruŋa i a Ietū, ko me'e era 'ana e au. ⁴ A rāua, pa'i, he hakaara tako'a o Hākovo, kī tako'a ko [Itaraera]. I ha'ata'a tako'a rō, pa'i, i a rāua e te 'Atua mo nā poki 'ā'ana. Ki a rāua i haka take'a ai i te 'ana-'ana o tō'ona pūai, 'e i haka 'ite ai e ha'amaitai rō. Ki a rāua tako'a i va'ai ai i te [haka tere iŋa 'a Mōtē], 'e pē ira 'ā i te rāve'a pē hē ana mo'a 'e ana ha'amuri ki te 'Atua, 'e i te hōrea mo rāua. ⁵ Ko rāua te hakaara o te tātou tupuna, 'e mai i a rāua i poreko ai te Kiritō. A ia, pa'i, he 'Atua o te me'e ta'ato'a 'e ki a ia ana ha'ahana-hana 'ātā ki te hope'a ra'a. [Āmene].

⁶ Ka ai atu me'e rahi nō atu nu'u [hūrio] i ta'e haŋa ki te Kiritō, e ko tano a tātou mo kī 'ina kai haka tano te 'Atua i te hōrea kī era ki a rāua. Tā'aku kī: ta'e ta'ato'a hakaara o Itaraera, te aura'a, o Hākovo, he itaraera parauti'a. ⁷ 'E ta'e ta'ato'a hakaara o Aparahama he nā poki parauti'a 'ā'ana ki te mata o te 'Atua. Ko kī era 'ana, pa'i, e ia: «Te hakaara parauti'a ō'ou mai i a Itā'ata ka e'a ena». ⁸ Pē ira 'ana te nā poki o te 'Atua. Ta'e ta'ato'a taŋata he nā poki parauti'a 'ā'ana. Te nā poki parauti'a mau o te 'Atua he nā poki poreko mai tā'ana hōrea, he nu'u haka moe i te mana'u 'i ruŋa i te me'e hōrea e ia, pa he poreko iŋa o Itā'ata he haka moe o [Aparahama] i tō'ona mana'u 'i ruŋa i te hōrea kī e te 'Atua. ⁹ Pē nei, pa'i, i hōrea ai e te 'Atua ki a Aparahama: «Matahiti ena, 'e 'i roto i te nā 'āva'e nei 'ā, ka hoki mai nei au, ko poreko 'ana te poki o kōrua ko Tara».

¹⁰ 'E ta'e hai ha'aura'a nō nei o Aparahama e take'a ena pē hē te 'Atua e ha'ata'a ena i tā'ana nu'u. Te hauā poreko era 'a Rēveka † mai te tātou tupuna ko Itā'ata i haka ara mai ai. ¹¹⁻¹³ 'E, 'i te hora kai poreko 'ana rā nā

† A RĒVEKA he vi'e 'a Itā'ata, poki 'a Aparahama, 'e matu'a vahine o te hauā ko Etaū 'e ko Hākovo.

poki 'e kai aŋa 'ā i te me'e tano 'e i te me'e ta'e tano, i haka 'ite rō ai e te 'Atua ki a Rēveka pē nei ē: «Te 'atariki e tāvini rō ki te haŋupotu», he haka tano iŋa ki te me'e hā'aki 'i ruŋa i te [Pāpa'i Mo'a] pē nei ē: «I haŋa rahi rō a au ki a [Hākovo] 'e i ta'e haŋa rō a au ki a [Etaū]». Hai me'e nei e 'ite nei e tātou e ai rō 'ana te parau o te 'Atua mo ha'ata'a i te taŋata mā'ana tano ki tā'ana me'e mana'u mo aŋa 'e 'ina he tapa atu i te me'e aŋa e rāua.

I te 'Atua te parau mo aŋa i tā'ana me'e haŋa

¹⁴ I ai ena pē ira, ūka kī 'ō e aŋa 'ana te 'Atua i te me'e ta'e tano? I Ta'e pē ira! ¹⁵ Te 'Atua i haka 'ite rō ki a Mōtē pē nei ē: «E hā'ū'ū rō a au i te nu'u haŋa e au mo hā'ū'ū, 'e e haka 'aroha rō a au i te nu'u haŋa e au mo haka 'aroha». ¹⁶ Te aura'a: ta'e hai haŋa 'o hai me'e aŋa e te taŋata e ha'ata'a ena e te 'Atua i te taŋata mā'ana, hai haŋa mau 'ā ō'ona.

¹⁷ 'I ruŋa i te Pāpa'i Mo'a i kī ai te 'Atua ki te 'ariki o Ehipto: «I haka 'ariki ai a au i a koe mo haka take'a ō'oku 'i ruŋa i a koe i tō'oku pūai 'e mo haka take'a ki te taŋata ta'ato'a ko ai a au». ¹⁸ Hai me'e nei e 'ite ena e tātou: te nu'u haŋa e te 'Atua mo haka 'aroha, he haka 'aroha, 'e te nu'u haŋa mo haka hio-hio i te mana'u, he haka hio-hio e ia i te mana'u.

¹⁹ Mo ai pē ira, ūhe aha ia te 'Atua e riri ena 'i te hape o te taŋata? 'Ina, pa'i, e tahi kope mo huri i te me'e haŋa o te 'Atua. ²⁰ 'E, ūko ai a tātou te taŋata mo 'ui iŋa ki te 'Atua o ruŋa i te me'e haŋa 'e aŋa e ia? ūKa kī 'ō e tano rō mo kī e te pani aŋa hai 'ō'one ki te kope aŋa i a ia pē nei ē: «ūHe aha koe i aŋa mai ai i a au pē nei?» ²¹ Te kope aŋa me'e hai 'ō'one i a ia te parau mo aŋa i tā'ana me'e nō era 'ā'ana i haŋa, 'e mai te 'apa 'ō'one mau nō e tahi e tano nō mo aŋa e tahi pani riva-riva mo te mahana ŋoŋoro 'e i te pani haka 'ou e tahi mo te tētahi mahana.

²² Pē ira tako'a, i te 'Atua te parau mo aŋa i tā'ana me'e i haŋa. I haŋa rō mo haka take'a i tō'ona riri 'e i tō'ona pūai ki te taŋata. 'E, ka ai atu pē ira, i ha'aoro-ma'i nō hai haumārū i te nu'u haka riri i a ia, he nu'u e tano mau rō 'ā mo haka ūtu'a. ²³ I haŋa tako'a rō mo haka take'a i te nui-nui o tō'ona riva rahi 'i ruŋa i a tātou, he nu'u e haka 'aroha rō 'ana e ia. 'E, ko haka riva-riva era 'ā e te 'Atua mo ai o tātou pe mu'a ka oho ena 'i roto i tō'ona nui-nui, te aura'a, mo ai tako'a i a tātou te huru riva ō'ona. ²⁴ A tātou ta'ato'a, pa'i, he nu'u ha'ata'a mā'ana ka hūrio 'e ka ta'e hūrio. ²⁵ Pa he kī iŋa 'i ruŋa i te puka pāpa'i e te perofeta era ko 'Ōtea:

«Ki te nu'u era ta'e he nu'u 'ā'aku ka kī ena e au he nu'u 'ā'aku.

'E ki te kope ta'e haŋa era e au, ka kī ena: "E haŋarahi 'ā'aku ē".

²⁶ 'E 'i te kona kī mau era 'ā: "Ta'e kōrua he taŋata 'ā'aku",

ka kī ena: "He nā poki o te 'Atua ora a kōrua".

²⁷ 'E i kī rō e te perofeta era ko 'Itaia o ruŋa i te itaraera:

«Ka ai atu pa he rahi o te 'one o te vaikava te hakaara o Itaraera, te aura'a, o Hākovo, nu'u ta'e rahi te nu'u ka e'a ena mai roto i te ūtu'a o te hara.

²⁸ E ko roa, pa'i, te 'Atua he haka tano i tā'ana me'e ta'ato'a kī mo aŋa 'i ruŋa i te henua».

²⁹ Pa he kī iŋa tako'a e 'Itaia 'i mu'a 'ā:

«Āhani i ta'e haka rē mai hai hakaara e te 'Atua, i a ia te pūai ta'ato'a, hora nei ko ŋaro tahi era 'ana a tātou pa he nu'u o [Tōroma] 'e o [Kōmora]».

³⁰ ŪHe aha ia te tātou me'e mo kī o ruŋa i te ŋā me'e ta'ato'a nei? Hai haka moe i te mana'u 'i ruŋa i a Ietū, te 'Atua i haka tano ai ki tō'ona mata i te nu'u ta'e he hūrio, nu'u ta'e kimi i te rāve'a mo tano o rāua ki tō'ona mata. ³¹ 'E te nu'u hūrio u'i i te rāve'a mo tano o rāua ki te mata o te 'Atua hai ha'atura ki te haka tere iŋa 'a Mōtē, 'ina kai rava'a i rā me'e. ³² ŪHe aha i ta'e rava'a ai? He ta'e haka moe i te mana'u 'i ruŋa i te 'Atua. Te me'e aŋa he haka noho i te mana'u 'i ruŋa i te me'e aŋa e rāua mo haka koa i te 'Atua. 'O ira i tu-tuki ai ki te «mā'ea era mo tu-tuki» ³³ mā'ea hā'aki 'i ruŋa i te Pāpa'i Mo'a:

«He haka rē a au i te mā'ea e tahi 'i te kona era ko [Tione], mā'ea 'i ruŋa ka tu-tuki ena me'e rahi nu'u. Kope haka moe i tō'ona mana'u 'i ruŋa, ki te hora hope'a e ko mana'u ko hape 'ana 'ō o ia 'o te haka moe i te mana'u 'i ruŋa i rā mā'ea».

He itaraera 'e he [roŋo riva-riva o te 'Atua]

10 E te taina, te me'e hope'a 'ā'aku o te haŋa e pure nei ki te 'Atua: mo e'a o tō'oku taŋata he itaraera mai roto i te ūtu'a o te hara 'e mo rava'a i te ora 'āpī 'ina he hope'a ra'a. ² Te parauti'a, e kimi rō 'ana mo tano o rāua ki te mata o te 'Atua; te 'ati nō, ta'e a roto i te ara parauti'a o te 'Atua. ³ Mo rāua, pa'i, ta'e he parauti'a te rāve'a va'ai e te 'Atua mo tano o te taŋata ki tō'ona mata. 'O ira e aŋa ena hai rāve'a mau 'ana o rāua, 'e 'ina he haŋa ki te rāve'a va'ai e te 'Atua. ⁴ Te haŋa: he haka tano e te 'Atua i a rāua ki tō'ona mata hai ha'atura o rāua ki te [haka tere iŋa 'a Mōtē]. 'E te parauti'a mau, hai tu'u iŋa mai era o Ietū Kiritō i kore ai te hauha'a o te me'e ena he ha'atura ki rā haka tere iŋa mo tano o te taŋata ki te mata o te 'Atua. Hora nei taŋata nō era mo [haka moe i te mana'u] 'i ruŋa i a Ietū e tano rō 'ā ki te mata o te 'Atua.

⁵ E ai rō 'ana te me'e i haka pāpa'i e te 'Atua ki a Mōtē o ruŋa i te me'e he tano o te taŋata ki tō'ona mata hai ha'atura ki te haka tere iŋa 'a Mōtē e kī ena pē

nei ē: «Te kope ha'atura i te me'e ta'ato'a hā'aki o ruŋa i rā haka tere iŋa, 'ātā i te me'e hope'a o te 'iti-'iti, he rava'a i te ora 'āpī 'ina he hope'a ra'a». ⁶ 'E e ai tako'a rō 'ana te me'e i haka pāpa'i e te 'Atua o ruŋa i te me'e he tano o te taŋata ki tō'ona mata hai haka moe i te mana'u 'i ruŋa i te [Kiritō], 'e o rā me'e te haka 'ite mai: me'e ta'e aŋarahi te ai ō'ou e tano rō 'ā ki te mata o te 'Atua hai haka moe i te mana'u 'i ruŋa i te Kiritō. Pē nei i pāpa'i ai: «'Ina koe ko kī 'i roto i a koe: "Mo haka moe ō'ou i tu'u mana'u 'i ruŋa i te Kiritō, e iri 'i ra'e e tahi kope ki te raŋi mo haka topa mai o te Kiritō mo haka 'ite atu i tā'ana roŋo". ⁷ 'E 'ina tako'a koe ko kī 'i roto i a koe: "Mo haka moe ō'ou i tu'u mana'u 'i ruŋa i te Kiritō, e topa 'i ra'e e tahi kope ki raro atu era ki te kona o te nu'u mate mo haka e'a mai i te Kiritō mo haka 'ite atu i tā'ana roŋo"».

⁸ Te me'e mau nō 'ā'au mo mana'u: «Te roŋo o te 'Atua nā 'i muri i a koe mau 'ā: 'i roto i tu'u māhatu 'e 'i roto i tu'u haha». Te roŋo nei ko te me'e ena: e haka moe te mana'u 'i ruŋa i a Ietū, he me'e nei o mātou e haka 'ite e oho nei. ⁹ Mo kī ō'ou 'i mu'a i te taŋata: a Ietū he Pū'oko Haka Tere ō'ou, 'e mo mana'u ō'ou hai māhatu: te 'Atua i haka ora rō i a Ietū mai te mate, he e'a ia koe mai roto i te ūtu'a o te hara 'e he rava'a i te ora 'āpī 'ina he hope'a ra'a. ¹⁰ Pē nei te aura'a: hai haka moe parauti'a ō'ou i te mana'u 'i ruŋa i a Ietū, te 'Atua he haka tano i a koe ki tō'ona mata, 'e hai kī ō'ou 'i mu'a i te taŋata: a Ietū Kiritō he Pū'oko Haka Tere ō'ou, he haka e'a e te 'Atua i a koe mai te ūtu'a o te hara 'e he va'ai atu i te ora 'āpī 'ina he hope'a ra'a.

¹¹ E kī rō 'ana, pa'i, 'i ruŋa i te [Pāpa'i Mo'a] pē nei ē: «Te kope haka moe i te mana'u 'i ruŋa i te Kiritō, ki te hora hope'a e ko mana'u ko hape 'ana 'ō 'o te haka moe i te mana'u 'i ruŋa i a ia». ¹² Te me'e nei ta'e mo te nu'u [hūrio] nō, mo te nu'u ta'e he hūrio tako'a. A Ietū, pa'i, he Pū'oko Haka Tere o te ta'ato'a, 'e tō'ona riva rahi 'i ruŋa i te taŋata ta'ato'a ani ki a ia. ¹³ Pē nei, pa'i, e kī ena 'i ruŋa i te Pāpa'i Mo'a: «Ta'ato'a nu'u ani ki te 'Atua mo haka 'aroha i a rāua, he haka e'a e ia mai roto i te ūtu'a o te hara 'e he va'ai i te ora 'āpī 'ina he hope'a ra'a». ¹⁴ Te me'e nō, ŷpē hē ia ana ani te nu'u mo ai 'ina he haka moe i te rāua mana'u 'i ruŋa i a Ietū? 'E ŷpē hē ana haka moe i te rāua mana'u 'i ruŋa mo ai 'ina he 'ite e tahi me'e o ruŋa i a ia? 'E ŷpē hē ana 'ite o ruŋa i a ia, mo ai 'ina he taŋata haka 'ite o ruŋa? ¹⁵ 'E ŷpē hē ana haka 'ite ana oho i te roŋo riva-riva o te 'Atua mo ai 'ina he uŋa i te kope mo haka 'ite? E hā'aki rō 'ana, pa'i, 'i ruŋa i te Pāpa'i Mo'a pē nei ē: «ŷKo te koa 'ō i te me'e he tu'u mai o te nu'u e ma'u rō 'ana i te roŋo riva-riva o te 'Atua!».

¹⁶ Ka ai atu pē ira, ta'e ta'ato'a taŋata e haŋa rō 'ā ki te roŋo riva-riva o te 'Atua. Pa he me'e kī e te perofeta era ko 'Itaia: «E te 'Atua, nu'u ta'e rahi te nu'u haka noho i te rāua mana'u 'i ruŋa i te me'e haka 'ite e mā-tou». ¹⁷ Te me'e nō, mo haka moe e tahi kope i tō'ona mana'u 'i ruŋa i te Kiritō, e ŋaro'a 'i ra'e i te roŋo parauti'a o ruŋa; 'e mo ŋaro'a i rā roŋo, e haka 'ite e te nu'u.

¹⁸ Tā'aku 'ui ia: ¿'Ina 'ō pēaha kai ŋaro'a e te nu'u hūrio i te roŋo riva-riva o te 'Atua? I ŋaro'a rō. E kī rō 'ana, pa'i, 'i ruŋa i te Pāpa'i Mo'a pē nei ē:

«Te re'o o te ma'uroŋo ko tu'u 'ā ki te kona ta'ato'a, 'ātā ki te kona hope'a o te ao».

¹⁹ 'E tā'aku 'ui haka 'ou: ¿'Ina 'ō pēaha te itaraera kai aŋi-aŋi riva-riva i te rāua me'e ŋaro'a era? I aŋi-aŋi rō. Te me'e nō, kai haŋa a rāua mo ha'atura. O ruŋa i pā-pā'i ai e Mōtē i haka 'ite e te 'Atua pē nei ē:

«E haka mākota rō e au i a kōrua mo te nu'u ta'e he hūrio,
'e e haka riri rō e au mo te nu'u ta'e 'ite o ruŋa i a au».

²⁰ I pāpa'i tako'a rō e te perofeta era ko 'Itaia pē nei ē:

«Te nu'u ta'e kimi mai, i rava'a rō i a au;
'e te nu'u ta'e 'ui o ruŋa ō'oku,
ki a rāua a au i haka take'a ai i a au».

²¹ 'E mo te itaraera i kī tako'a ai e te 'Atua i haka pāpa'i ki a 'Itaia:

«Te aŋa nō 'ā'aku he haka toro i tō'oku rima
ki te hau haka 'āriŋa 'e ta'e haka roŋo».

Te 'Atua kai hāru i te itaraera hai tua'ivi

11 He 'ui haka 'ou nei: ¿Ko hāru i'ana hō te 'Atua i te itaraera hai tua'ivi? 'Ina. A au mau nei 'ā, pa'i, he itaraera, he hakaara o [Aparahama] o te mata o [Mēhāmina]. ² Te parauti'a, 'ina te 'Atua kai hāru i tahi i te itaraera, he nu'u ha'ata'a e ia mā'ana mai mu'a 'ā, hai tua'ivi.

Ka haka topa rā te kōrua mana'u ki te me'e ena e hā'aki ena 'i ruŋa i te [Pāpa'i Mo'a] o ruŋa i te perofeta era ko 'Ēria. 'I tō'ona hora pure ki te 'Atua i horo ai i tā'ana ture mo tō'ona taŋata he itaraera pē nei ē: ³ «E te 'Atua, ko tiŋa'i ko haka kore tahi 'ana e rāua i ta'u perofeta, 'e ko haka mārere-rere tahi 'ana i tu'u fata. Ko au mau nō ta'u taŋata toe, 'e 'I e haŋa tako'a rō 'ana rāua mo tiŋa'i i a au». ⁴ 'E pē nei te 'Atua i pāhono ai: «Ko te ai iŋa 'ana e hitu ta'utini taŋata haka 'ou ha'ata'a e au mā'aku, ŋāŋata ta'e ha'amuri ki te me'e kī e te nu'u he 'atua o rāua ko Vāara». †

⁵ Pē ira tako'a 'ana 'i te hora nei, e te taina ē, e toe nō 'ā te itaraera ha'ata'a e te 'Atua mā'ana hai riva rahi ō'ona. ⁶ 'E, i ai ena hai riva rahi o te 'Atua i ha'ata'a ai i te itaraera mā'ana, ta'e ia hai me'e i aŋa e rāua. 'Āhani, pa'i, hai me'e i aŋa e rāua, ta'e ia he me'e 'o te riva rahi o te 'Atua.

⁷ ¿He aha ia te aura'a o te me'e ta'ato'a nei? Te au-ra'a: te rahi ra'a o te itaraera 'ina kai rava'a i te rāua

† A VĀARA he 'iŋoa o te me'e ha'amuri pa he 'atua e te nu'u noho, 'i mu'a 'ā, 'i te henua hōrea e te 'Atua mo va'ai ki a Aparahama 'e ki tā'ana hakaara. I tu'u i noho era te itaraera 'i ira, te tētahi o rāua i hāru i rō i te 'Atua hai tua'ivi mo ha'amuri tako'a ki a Vāara.

me'e kimi: he tano o rāua ki te mata o te 'Atua. O te nu'u itaraera ha'ata'a e te 'Atua mā'ana i rava'a. 'E tū rahi ra'a era o te itaraera ko haka hio-hio 'ā e te 'Atua i te rāua mana'u. ⁸ Pa he me'e kī 'i ruŋa i te Pāpa'i Mo'a:

«Te 'Atua i haka hio-hio rō i te rāua mana'u;
i va'ai rō i te mata ta'e take'a,
'e i te tariŋa ta'e ŋaro'a,
'e pē nei mau 'ā a rāua 'ātā ki 'aŋarīnā».

⁹ I pāpa'i tako'a rō e te 'ariki era ko [Tāvita] pē nei ē:

«Ka riro te rāua ŋoŋoro
he me'e mo 'a-'aru mo puru i a rāua, pa he kūpeŋa ika,
ki rava'a ai mo haka ūtu'a hai ūtu'a tano mo rāua.

¹⁰ Ka pōhāhā ka oho nō te rāua mana'u, 'o aŋi-aŋi i te parauti'a,
'e ka piko-piko ka oho nō te rāua tua'ivi 'i te paŋaha'a o te 'ati 'amo e rāua».

He rava'a iŋa e te nu'u ta'e hūrio i te ora 'āpī

¹¹ Tā'aku 'ui ia: i hara era te [hūrio] 'i te ta'e [haka moe i te mana'u] 'i ruŋa i a Ietū, ¿he kore rō 'āvai te rāve'a mo tano o rāua ki te mata o te 'Atua? Ta'e pē ira. 'I te ta'e ha'atura o te hūrio i rava'a ai e te nu'u ta'e he hūrio mo e'a mai te ūtu'a o te hara 'e mo rava'a i te ora 'āpī 'ina he hope'a ra'a. Te me'e nei i aŋa ai e te 'Atua ki mākota ai 'e ki haŋa ai te hūrio mo rava'a tako'a e rāua i te ora 'āpī 'ina he hope'a ra'a. ¹² I ai ena hai hara o te hūrio i ha'amaitai ai e te 'Atua i te nu'u o te ao ta'e he hūrio, ika mana'u atu rā kōrua pē hē ka ai ena 'i te mahana haka moe i te mana'u 'i ruŋa i a Ietū te ta'ato'a nu'u hūrio ha'ata'a e te 'Atua mā'ana!

¹³ E ai rō 'ana tā'aku me'e mo kī atu ki a kōrua ki te nu'u ta'e he hūrio: te 'Atua ko ha'ata'a 'ā i a au pa he [l'āpōtoro] mo haka 'ite atu ki a kōrua i tā'ana vānaŋa. 'O ira a au e aŋa riva-riva nei i te aŋa nui-nui nei, ¹⁴ he haŋa ō'oku mo haka mākota i tō'oku taŋata koi'ite pē ira tētahi o rāua ana haka moe i te mana'u 'i ruŋa i a Ietū mo e'a mai roto i te ūtu'a o te hara 'e mo rava'a i te ora 'āpī 'ina he hope'a ra'a va'ai e te 'Atua. ¹⁵ Mo ai ia hai hāru i te 'Atua i te nu'u hūrio hai tua'ivi e ai ena te rāve'a mo haka riva-riva i te taŋata ta'ato'a ki a ia, ika mana'u atu kōrua pē hē ka ai ena 'i te hora haka tano e te 'Atua i a rāua ki tō'ona mata! ika ai ena pa he nu'u mate ko ora haka 'ou 'ā mai te mate!

¹⁶ Mo ai e ha'ata'a rō 'ana mo te 'Atua te haraoa ra'e tunu mai ruŋa i te haraoa ko ŋatu 'ā, pē ira tako'a 'ā ia te haraoa ta'ato'a ŋatu era. 'E mo ai o te aka o te tumu e ha'ata'a rō 'ana mo te 'Atua, pē ira tako'a 'ana ia te maŋa ta'ato'a o rā tumu.

¹⁷ Te hūrio pa he tumu 'ōrivo mai ruŋa i pa'o ai i te tētahi maŋa, 'e a rā ŋā kona pa'o mau era 'ā i haka puā haka 'ou ai hai maŋa 'ōrivo o 'uta ta'e hāpa'o e te taŋata, te aura'a, ko kōrua he nu'u ta'e hūrio. Pē ira e ora ena 'i te hora nei hai tāpau 'e hai aka o rā tumu.

¹⁸ Ka ai atu pē ira, 'ina ko mana'u i hau rō atu koe ki te maŋa mau era o rā tumu. E haka topa te mana'u: ta'e mai i a koe mai te maŋa te aka e ora ena; a koe e ora ena hai aka o rā tumu.

¹⁹ E kī rō pēaha e tahi o kōrua: 'Ei, i pa'o rō i te tētahi maŋa mo haka puā i a au ki ruŋa. ²⁰ He anjī 'ā. I pa'o ai i a rāua he ta'e haka moe i te mana'u 'i ruŋa i a Ietū, 'e a koe e ra'u ena 'i ruŋa 'o te haka moe nō i tu'u man-a'u 'i ruŋa i a ia. 'O ira, 'ina ko kī i hau rō atu koe ki a rāua; te me'e nō, e ri'a-ri'a koe. ²¹ Mo ai 'ina kai haka rehu e te 'Atua i te hara o te maŋa mau o rā tumu, e ko haka rehu tako'a e ia i tu'u hara.

²² Te 'Atua e haka take'a rō 'ana i tō'ona riva 'e i tō'ona riri. Ki te nu'u hūrio hāruī i a ia hai tua'ivi i haka take'a ai i tō'ona riri, 'e ki a kōrua ki te nu'u ta'e he hūrio i haka take'a ai i tō'ona riva. Te me'e nō, e u'i e noho kōrua 'i roto i tō'ona riva rahi, 'o pa'o tako'a rō i a kōrua mai ruŋa i rā tumu. ²³ Mo haka moe o te hūrio i te mana'u 'i ruŋa i a Ietū, he haka tupu haka 'ou e te 'Atua 'i ruŋa i rā tumu; i a ia, pa'i, te parau mo haka tupu haka 'ou. ²⁴ Pē nei te aura'a: mo ai ko to'o 'ana e te 'Atua i a koe, he maŋa o te tumu o 'uta mo haka tupu 'i ruŋa i te tumu 'ōrivo riva-riva, ōpē hē ia ana ta'e haka tupu haka 'ou e ia, 'i ruŋa i rā tumu, i te hūrio, he maŋa parauti'a mau o rā tumu?

He e'a iŋa o te hūrio mai te ūtu'a o te hara

²⁵ E te taina ē, e haŋa rō 'ana a au mo haka 'ite atu i te me'e 'ina kai 'ite 'ana e te taŋata o ruŋa i te hūrio, 'o mana'u rō kōrua i hau rō atu 'ō kōrua ki a rāua. Tētahi o rāua ko hāruī 'ana hai tua'ivi i te 'Atua, 'e pē rā mau 'ā ka oho ena 'ātā ka haka moe tahi rō te mana'u 'i ruŋa i a Ietū te nu'u ta'e he hūrio ha'ata'a e te 'Atua mā'ana. ²⁶ Ki topa te me'e nei, ka e'a iho ena te hūrio ta'ato'a mai roto i te ūtu'a o te hara 'e ka rava'a ena i te ora 'āpī 'ina he hope'a ra'a va'ai e te 'Atua. E kī rō 'ana, pa'i, 'i ruŋa i te Pāpa'i Mo'a pē nei ē:

«Te kope to'o i te taŋata mai roto i te 'ati ka oho mai ena mai te kona era ko [Tione] mo ha'ata'a i te itaraera mai roto i te me'e ta'e tano. ²⁷ Pē ira ka haka tano ena te hōrea kī e au mo rāua: he haka kore e au i te rāua hara».

²⁸ 'I te ta'e haŋa o te hūrio ki te [rono riva-riva o te 'Atua] 'e 'i te ta'e haka moe i te mana'u 'i ruŋa i a Ietū, i hāruī ai e te 'Atua hai tua'ivi. 'E rā me'e mo te kōrua riva-riva, mo haka 'ite atu i tā'ana roŋo ki a kōrua ki te nu'u ta'e he hūrio. Ka ai atu pē ira, ko te haŋa iŋa 'ana te 'Atua ki a rāua; i ha'ata'a rō, pa'i, e ia i te rāua tupuna, 'i mu'a 'ana, mo taŋata 'ā'ana. ²⁹ Te 'Atua 'ina he hiko i tā'ana me'e va'ai, 'e 'ina he haka rehu i te nu'u ha'ata'a e ia mā'ana.

³⁰ 'I mu'a 'ā, 'ina a kōrua he ha'atura ki te 'Atua, 'e, hora nei 'i ruŋa i a kōrua te riva rahi ō'ona, he ta'e ha'atura o te hūrio ki a ia. ³¹ Te ta'e ha'atura o te hūrio he me'e e tahi o te 'Atua mo haka 'aroha i a kōrua, 'e mo haka 'aroha tako'a i a rāua. ³² Te 'Atua ia 'i te haŋa

mo haka take'a i tō'ona haka 'aroha 'e i tō'ona riva rahi 'i ruŋa i te taŋata ta'ato'a, ko haka 'ite mai 'ana pē nei ē: ka hūrio 'e ka ta'e hūrio, ta'ato'a he nu'u ta'e ha'atura ki a ia.

³³ ōKo ai te kope mo rava'a mo hāito i te rahi o te riva o te 'Atua, i tō'ona mārama-rama 'e i tā'ana me'e 'ite? 'E ōko ai tako'a te kope mo rava'a mo anjī-anjī i tō'ona mana'u, 'e mo ha'aura'a i tā'ana me'e anjā? ³⁴ Pa he me'e kī 'i ruŋa i te Pāpa'i Mo'a:

«ōKo ai te me'e mo 'ite i te mana'u o te 'Atua? ōKo ai te kope mo kī he aha tā'ana me'e mo anjā?

³⁵ ōKo ai te kope i va'ai i tā'ana me'e mo haka hoki iŋa e ia?».

³⁶ Ta'ato'a me'e o te 'Atua i anjā, 'e hai ia e ai e oho nō ena; i anjā ai mo ha'ahana-hana ki a ia. ōKi ha'a-hana-hana tahi ia tātou ki te 'Atua 'ātā ki te hope'a ra'a! ['Āmene].

Te noho iŋa 'āpī

12 E te taina, te 'Atua e haka 'aroha rō 'ana i a tā-tou, 'e 'i ruŋa i a tātou tō'ona riva rahi. 'O ira 'ī a au he ani atu: e va'ai tahi kōrua i te kōrua hakari 'e i te kōrua mana'u ki te 'Atua pa he tūtia ora ha'ata'a mā'ana mo anjā i tā'ana me'e haŋa. Te me'e nei he rāve'a tano mo ha'amuri ki te 'Atua. ² 'Ina kōrua ko noho haka 'ou hai mana'u ta'e tano o te taŋata. E haka rē ki te 'Atua mo huri i te kōrua mana'u, ki huri ai te kōrua noho iŋa, 'e ki 'ite ai e kōrua he aha te me'e haŋa o te 'Atua, te aura'a, he aha te me'e tano ki a ia, he aha te me'e mo koa ō'ona, 'e he aha te me'e hope'a o te riva-riva ki tō'ona mata.

³ Pa he taŋata uŋa au e te 'Atua hai riva rahi ō'ona mo haka 'ite atu i tā'ana roŋo, 'ī a au he kī atu: 'ina ko mana'u 'ata hau kōrua ki te roa parauti'a va'ai atu era e te 'Atua. Te tano mau: e 'ite kōrua mo haka tano i te mana'u ki te pūai o te kōrua haka moe iŋa o te mana'u 'i ruŋa i a Ietū Kiritō. ⁴ Te hakari taŋata he me'e e tahi mau nō. Ka ai atu pē ira, me'e rahi nō atu kona o te hakari, 'e rā ŋā kona me'e kē me'e kē te me'e anjā. ⁵ Pē ira 'ā tātou, te nu'u [haka moe i te mana'u] 'i ruŋa i a Ietū. Ka ai atu e rahi rō 'ana a tātou, e tahi mau nō hakari, he hakari o Ietū.

⁶ Te 'Atua, pa'i, 'i tō'ona riva rahi, ko va'ai mai 'ana ki a tātou ta'ato'a huru kē huru kē te me'e mo anjā i tā'ana anjā. Mo ai o rā me'e va'ai mai era he vānaŋa i te me'e haka 'ite mai e te 'Atua, e haka 'ite hai pūai o te tātou haka moe iŋa i te mana'u 'i ruŋa i a ia. ⁷ 'E mo ai rā me'e va'ai mai era he tāvini ki te rua, e tāvini riva-riva. 'E te kope i a ia te me'e he hāpī i te rua, e noho e hāpī. ⁸ 'E te kope i a ia te me'e he haka pūai i te man-a'u o te rua, e noho e haka pūai. 'E te kope i a ia te me'e he va'ai hai me'e ki te rua, e va'ai hai māhatu. 'E te kope te me'e i va'ai ki a ia he haka tere i te nūna'a taŋata haka moe i te mana'u 'i ruŋa i a Ietū, e u'i e anjā

riva-riva tā'ana aña, 'e te kope tā'ana me'e he hā'ū'ū ki te rua, e hā'ū'ū hai koa.

Te noho iña tano mo te [kiritiano]

⁹ E haña kōrua ki te rua hai māhatu. 'Ina ko haña ki te me'e ta'e tano; e haka noho te mana'u 'i ruña i te me'e tano ki te mata o te 'Atua. ¹⁰ E here 'i roto i a kōrua pa he taina, 'e e mo'a pa he nu'u mana'u i hau rō atu te rua ki a rāua.

¹¹ 'Ina ko haka hupe-hupe; e aña hai māhatu ki a Ietū Kiritō, he Pū'oko Haka Tere o tātou.

¹² E koa kōrua 'i te me'e era pe mu'a ka oho ena e ai rō 'ana te me'e riva-riva mo tātou. E ha'aoroma'i te 'ati ta'ato'a hai pūai. 'E 'ina ko haka rē, ki te hora hope'a, te me'e ena he pure ki te 'Atua.

¹³ E hā'ū'ū kōrua ki te nu'u ha'ata'a e te 'Atua mā'ana ai o te 'ati. E hāpa'o riva-riva te nu'u tu'u atu ki te kōrua hare.

¹⁴ E ani ki te 'Atua mo ha'amaitai i te nu'u tōtōā atu i a kōrua; 'ina ko ani mo haka ūtu'a i a rāua.

¹⁵ E koa kōrua ananake ko te nu'u koa, 'e e tanji ananake ko te nu'u tanji.

¹⁶ 'Ina ko tātake 'i roto i a kōrua. 'Ina ko mana'u i hau rō atu ki te rua, 'o mana'u e ai rō 'ana te nu'u mo ta'e piri e kōrua 'e te aña mo ta'e aña e kōrua. 'Ina ko mana'u ko 'ite tahi 'ana i te me'e ta'ato'a.

¹⁷ 'Ina ko haka hoki hai me'e ta'e tano ki te kope aña atu i te me'e ta'e tano. E noho riva-riva kōrua, 'o ai te vānaña mo tuhi atu i te kōrua hape. ¹⁸ E aña te me'e nō era i ai i a kōrua mo noho riva-riva 'i roto i te haumārū ananake ko te ta'ato'a nō tanjata.

¹⁹ E te taina, 'ina ko kimi i te rāve'a mo haka ūtu'a i te nu'u aña atu i te me'e ta'e tano; e haka rē mo te 'Atua a rāua e haka ūtu'a. E kī rō 'ana, pa'i, 'i ruña i te [Pāpa'i Mo'a] pē nei ē: «Mā'aku mau nō e haka ūtu'a i te tanjata, 'e mā'aku e haka 'auhau i te rāua me'e ta'e tano aña, he kī iña nei o te 'Atua». ²⁰ E kī tako'a rō 'ana: «Mo maruaki o te nu'u ta'e haña atu, e va'ai hai kai; 'e mo pohe ki te vai, e va'ai. Pē ira he ha'amā a rāua».

²¹ 'Ina ko ha'ati'a mo rē atu o te me'e ta'e tano. E aña te me'e riva-riva, ki rē ai kōrua ki te me'e ta'e tano.

13 E ha'atura kōrua ta'ato'a ki te nu'u ko rāua te pū'oko haka tere henua. Ta'e i ai tahaña nō i a rāua te aña era; o te 'Atua i haña 'e i ha'ati'a mo topa pē ira. ² Te nu'u ta'e ha'atura ki te rāua pū'oko haka tere henua e ta'e ha'atura 'ana ki te me'e haña e te 'Atua. He haka ūtu'a te nu'u era. ³ Te nu'u aña i te me'e tano 'ina he ri'a-ri'a 'i te nu'u pū'oko haka tere henua. He nu'u aña i te me'e ta'e tano te nu'u ri'a-ri'a. ¿E haña rō 'ana koe mo ta'e ri'a-ri'a 'i te nu'u pū'oko haka tere henua? 'Ina ia ko aña i te me'e ta'e tano. Pē ira he tano koe ki te rāua mata. ⁴ A rāua he tāvini o te 'Atua mo tu'u riva-riva. 'E, mo aña ō'ou i te me'e ta'e tano, e ri'a-ri'a; i a rāua, pa'i, te parau mo haka ūtu'a i te nu'u aña i te me'e ta'e tano. ⁵ 'O ira, e ha'atura ki te nu'u pū'oko haka tere henua, ta'e nō 'ō he ri'a-ri'a 'o haka ūtu'a atu, 'o te ai he me'e kī mau atu 'ā e tu'u mana'u riva-riva mo aña.

⁶ 'O ira tako'a a kōrua e 'auhau ena i te moni haka 'auhau atu e te nu'u pū'oko haka tere henua. A rāua, pa'i, e haka tere ena i te henua e aña 'ana ki te 'Atua. ⁷ E 'auhau te me'e ta'ato'a ena mo 'auhau ki te nu'u ki a rāua ana 'auhau koia ko mo'a i a rāua. Te nā me'e nei he me'e mau 'ā mo aña e tātou.

⁸ E hāpa'o 'o ai tu'u tārahu. Te tārahu mau nō mo ai ō'ou he haña ki te rua; te kope haña ki te rua e haka tano 'ana i te me'e ta'ato'a kī 'i ruña i te [haka tere iña 'a Mōtē]. ⁹ E kī rō 'ana, pa'i, 'i ruña: «'Ina ko tai'ata, 'ina ko tinja'i ko haka mate i te rua, 'ina ko toke 'e 'ina ko pohe ki te me'e o te rua». Te roño ta'ato'a nei 'e te tē-tahi atu roño e tano tahi nō mo ha'atura ō'ou ki te roño mau nō nei: «E haña ki te rua pa he haña iña ena 'ā ō'ou ki a koe mau 'ā». ¹⁰ Te kope haña ki te rua e ko aña i te me'e ta'e tano ki rā kope. Te me'e ta'ato'a kī, pa'i, o ruña i te roño o te 'Atua e tano tahi ena hai haña ki te rua.

¹¹ E 'ite rō 'ana a kōrua pē hē te noho iña o te hora nei. 'O ira, e aña e oho nō kōrua i te me'e tano ki te mata o te 'Atua. E veveri kōrua. Hora nei 'ata hāhine te mahana mo tu'u mai o Ietū mo haka e'a i a tātou mai te 'ati o te ao nei ki te mahana haka moe o tātou i te mana'u 'i ruña i a ia. ¹² Te noho iña ta'e tano o te hora nei pa he pō ko hāhine 'ana he ma'urima e te 'ōtea. 'O ira, 'ina ko aña haka 'ou tātou i te me'e ta'e tano aña 'i te pō. Ki aña tātou i te me'e tano, he me'e aña 'i te 'ōtea, ki ai ai mo tātou pa he kahu uru e te va'ehau 'i te hora o te tama'i. ¹³ E noho tātou pa he nu'u ha'ere 'i roto i te mā'eha. E haka rē te me'e ta'e tano aña 'i te pō pa he roño ro ta'e hāito i te me'e aña, pa he ta'ero 'ava, pa he tai'ata 'e he tētahi haka 'ou atu me'e tu'u pē ira, pa he tātake 'e pa he pohe ki te me'e o te rua. ¹⁴ Te me'e mau nō mo aña e kōrua he haka rē ki a Ietū Kiritō mo haka tere i a kōrua, mo tano o te kōrua noho iña pa he noho iña mau 'ana ō'ona, 'o tano rō te kōrua noho iña ki te me'e pohe nō o te hakari.

¿Ko ai koe mo tuhi i te hape o te rua?

14 E to'o hai māhatu ki roto i a kōrua te nu'u 'ina he pūai rahi te rāua haka moe iña i te mana'u 'i ruña i a Ietū. E u'i 'o haka tātake e kōrua. ² He ha'aaura'a nei e tahi: e ai rō 'ana te nu'u mana'u 'ina he 'ati mo kai ta'ato'a me'e ena mo kai. 'E e ai tako'a rō 'ana te nu'u mana'u 'ina ko kai i te kiko, he ta'e anji-anji riva-riva o ruña i te me'e o te 'Atua. ³ Te nu'u kai i te me'e ta'ato'a 'ina ko ta'e haka au mo te nu'u e ai rō 'ana te rāua me'e ta'e kai. 'E te nu'u nei 'ina ko ta'e haka au mo te nu'u kai i te me'e ta'ato'a; pē tū haña iña 'ana, pa'i, te 'Atua ki a rāua ta'ato'a.

⁴ ¿Ko ai ia koe mo tuhi iña i te hape o te tāvini o te rua? Mā Ietū mau nō, he Pū'oko Haka Tere ō'ona e kī hoki e tano rō 'ana 'o 'ina he tano tā'ana me'e aña. 'E rā tāvini e aña rō i te me'e tano; i a Ietū, pa'i, te pūai mo hā'ū'ū ki a ia mo aña pē ira.

⁵ He ha'aaura'a haka 'ou nei e tahi: e ai rō 'ana te nu'u mana'u e ai rō 'ana te mahana 'ata hau rō atu i te hauha'a ki te tētahi mahana mo ha'amuri ki te 'Atua,

'e e ai rō 'ana te nu'u mana'u: ta'ato'a mahana pē tū hauha'a tahi 'ā. Te me'e nō, e 'ite riva-riva e te ta'ato'a he aha mau te rāua me'e mana'u. ⁶ Te kope ha'amuri ki te 'Atua 'i te mahana mana'u e ia he mahana 'ata hauha'a mo ha'amuri, mō'ona he rāve'a e tahi mo mo'a i te 'Atua. 'E te kope kai i te ta'ato'a me'e ai mo kai 'i te mana'u 'ina e tahi kai ta'e ha'ati'a e te 'Atua mo kai, mō'ona he rāve'a tako'a mo mo'a i te 'Atua, 'e he māuru-uru o ruŋa. Te kope e ai rō 'ana tā'ana me'e ta'e kai, te ta'e kai era ō'ona i rā me'e he rāve'a e tahi mo ha'amuri ki te 'Atua, 'e he māuru-uru tako'a o ruŋa.

⁷ Ta'e mo koa o tātou nō a tātou, te nu'u [haka moe i te mana'u] 'i ruŋa i a Ietū, e ora nei 'o e mate ena. ⁸ A tātou e ora nei 'o e mate ena mo te 'Atua. Te aura'a: ka mate 'o ka ora, ko te ai iŋa 'ana a tātou 'ā'ana. ⁹ Mo ira a Ietū i mate ai 'e i ora haka 'ou ai: mo Pū'oko Haka Tere o tātou ta'ato'a, ka ai atu nu'u mate 'o nu'u ora.

¹⁰ ǂHe aha ia koe e kī ena e hape rō 'ā tu'u taina? 'E ǂhe aha koe e haka ta'e au ena ki a ia? Ta'ato'a nō tātou ka māroa ena 'i mu'a o te 'Atua, 'e he kī mai he aha te tātou me'e tano 'e ta'e tano i aŋa. ¹¹ E haka 'ite rō 'ana, pa'i, 'i ruŋa i te [Pāpa'i Mo'a] te kī iŋa o te 'Atua pē nei ē:

«He hōrea atu au hai 'iŋoa ō'oku:
te nu'u ta'ato'a o te ao e tū-turi tahi rō 'i mu'a i a au
'e e kī rō ko au mau 'ā te 'Atua».

¹² Pē ira, e tahi e tahi o tātou ka kī ena i tā'ana me'e i aŋa ki te 'Atua.

¹³ 'O ira, 'ina ko kī haka 'ou e hape rō 'ā te rua. Te me'e nō, e u'i kōrua 'o haka 'aka-'aka i te mana'u o te kōrua taina o ruŋa i a Ietū, 'o uŋa i a rāua ki roto i te hara hai me'e aŋa e kōrua. ¹⁴ Ko 'ite riva-riva 'ana a au, pa he taŋata haka moe i te mana'u 'i ruŋa i a Ietū, ta'ato'a me'e ai mo kai e ha'ati'a rō 'ana e te 'Atua mo kai. Ka ai atu pē ira, mo mana'u e tahi kope e ai rō 'ana te me'e ta'e ha'ati'a mo kai, mō'ona ia he me'e ta'e ha'ati'a mau 'ā. ¹⁵ Te kī: mo ta'e au rō o te mana'u o tu'u taina hai me'e kai e koe, ta'e ia koe hai haŋa e haka tere ena. ǂ'Ina ko ai hai me'e kai e koe tu'u taina ana ta'e haka moe haka 'ou i tō'ona mana'u 'i ruŋa i a Ietū mate era mō'ona! ¹⁶ 'E, tako'a, mo kī o te nu'u i te vānaŋa ta'e tano mo te nu'u haka moe i te mana'u 'i ruŋa i a Ietū hai aŋa ō'ou e tahi me'e, ka ai atu rā me'e he me'e ta'e 'ati mo te 'Atua, 'ina ia koe ko aŋa. ¹⁷ Ta'e, pa'i, o ruŋa o te kai 'e o ruŋa i te me'e mo unu te haka tere iŋa o te 'Atua; o ruŋa i te me'e he tano o te taŋata 'e o te rāua noho iŋa ki tō'ona mata hai koa 'e hai haumārū o te [Vārua Maitai]. ¹⁸ Te nu'u tāvini pē nei ki te [Kiritō] he koa te 'Atua, 'e ki te mata o te taŋata e tano rō 'ā.

¹⁹ 'O ira, ki u'i ki aŋa i te rāve'a ta'ato'a ai mo hā'ū'ū i a tātou mo 'ata 'ite o ruŋa i te me'e o te 'Atua, 'e mo ai o te haumārū 'i roto i a tātou ta'ato'a o te nu'u haka moe i te mana'u 'i ruŋa i a Ietū. ²⁰ 'Ina ko ai o ruŋa i te kai ana haka mira-mira koe i te aŋa o te 'Atua 'i roto i

te māhatu o tu'u taina. Te parauti'a mau, 'ina he kai ta'e ha'ati'a e te 'Atua mo kai. Te me'e ta'e tano nō: hai kai ō'ou i te me'e mana'u e tu'u taina he me'e ta'e ha'ati'a e te 'Atua, he 'aka-'aka tō'ona mana'u 'i ruŋa i a Ietū. ²¹ I hau rō atu i te tano mo ta'e aŋa ō'ou i te me'e mana'u e te rua he me'e ta'e ha'ati'a e te 'Atua, pa he kai i te kiko 'e pa he unu i te 'ava, 'o hara tu'u taina.

²² 'E te me'e mana'u e koe o ruŋa i te me'e ha'ati'a 'e ta'e ha'ati'a e te 'Atua ko koe 'e ko ia mau nō te me'e mo 'ite. ǂKo te koa 'ō i te kope aŋa i te me'e mana'u e ia he me'e tano, 'e 'i roto i te māhatu 'ina he me'e kī ko hape 'ana 'ō a ia! ²³ 'E te kope ta'e aŋi-aŋi riva-riva hoki e tano rō 'ana 'o e ta'e tano rō 'ana te kai ō'ona e tahi me'e, ka kai era, e hara 'ana, he ta'e ma'u 'i roto i a ia he parauti'a mau 'ā he me'e tano ki te 'Atua. Ta'ato'a nō me'e, pa'i, mo aŋa e tāua 'ina kai 'ite riva-riva hia 'ā hoki he me'e tano ki te mata o te 'Atua 'o 'ina, e hara 'ana.

E haka tere koe pē Ietū 'ā

15 A tātou, te nu'u 'ite riva-riva i te me'e o ruŋa i te 'Atua, e ha'aoroma'i te ta'e aŋa o te tātou taina i te me'e mana'u e rāua he me'e ta'e ha'ati'a e te 'Atua. 'Ina ko aŋa i te me'e mo koa o tātou nō. ² Ki aŋa tahi tātou i te me'e hai haŋa mo haka koa 'e mo hā'ū'ū i te taina, 'e mo 'ata 'ite o tātou ta'ato'a o ruŋa i te me'e o te 'Atua. ³ A Ietū, pa'i, 'ina kai aŋa i te me'e mo tō'ona koa mau nō. 'I ruŋa i a ia i haka tano ai te me'e kī 'i ruŋa i te [Pāpa'i Mo'a] pē nei ē: «Te vānaŋa ta'e tano kī era mō'ou, 'i ruŋa i a au i topa mai ai».

⁴ Te me'e ta'ato'a pāpa'i 'i mu'a 'ā 'i ruŋa i te Pāpa'i Mo'a i pāpa'i ai mo 'ite o tātou i te ha'aoroma'i i te 'ati topa mai, 'e mo haka pūai i te mana'u mo aŋi-aŋi riva-riva pē nei ē: e ko ta'e aŋa e te 'Atua i te me'e ta'ato'a hōrea mai e ia. ⁵ O te 'Atua, va'ai i te 'ite mo ha'aoroma'i i te 'ati 'e i te pūai mo haka hio-hio i te tātou man-a'u, te hā'ū'ū atu i a kōrua mo noho 'i roto i te haumārū, pa he nu'u te rāua noho iŋa pē Ietū Kiritō 'ā, ⁶ mo ha'ahana-hana tahi o kōrua i te 'Atua, he Matu'a o te tātou Pū'oko Haka Tere ko Ietū Kiritō hai mana'u mau nō e tahi.

⁷ 'O ira, 'i roto i a kōrua, e haŋa e tahi ki te rua pa he taina, pa he haŋa iŋa o Ietū ki a kōrua, ki ha'ahana-hana tahi ai te taŋata ki te 'Atua. ⁸ 'Ina ko rehu i a kōrua: a Ietū i oho mai ai mo tāvini ki te [hūrio], mo tano o te hōrea va'ai era ki te mātou tupuna 'i mu'a 'ā, 'e mo haka take'a: te 'Atua e haka tano rō 'ana i tā'ana hōrea. ⁹ I oho tako'a mai ai mo ha'ahana-hana o te nu'u ta'e he hūrio ki te 'Atua 'o tō'ona riva rahi, pa he me'e kī 'i ruŋa i te Pāpa'i Mo'a:

«'I mu'a o te taŋata ta'ato'a o te ao
ka ha'ahana-hana atu ena a au ki a koe,
'e he hīmene atu i te hīmene mō'ou».

¹⁰ 'I te kona haka 'ou e tahi o ruŋa i te Pāpa'i Mo'a e kī ena:

«Ka koa tahi kōrua, e te nu'u ta'e hūrio ē, ananake ko te hūrio,
he nu'u ha'ata'a e te 'Atua mā'ana!».

¹¹ 'E 'i te kona haka 'ou e tahi e kī ena:

«E te hau ta'ato'a o te ao ē,
je ha'ahana-hana ki te 'Atua!».

¹² I pāpa'i tako'a rō e te perofeta era ko 'Itaia:

«Mai te hakaara o te tanjata ko Hētē †
ka e'a mai ena te kope mo haka tere i te nu'u ta'e he hūrio,
'e 'i ruŋa ka ŋatu ena i te rāua haŋu».

¹³ Mo te 'Atua haka aŋi-aŋi mai e haka tano rō 'ana i tā'ana hōrea e 'ata haka koa 'e e 'ata haka haumārū atu i a kōrua i te nu'u [haka moe i te mana'u] 'i ruŋa i a ia, 'e mā'ana tako'a e 'ata haka aŋi-aŋi atu, hai pūai o te [Vārua Maitai], e ko ta'e aŋa a ia i tā'ana me'e hōrea.

Te aŋa 'a Pauro pa he [ʻāpōtoro]

¹⁴ E te taina ō'oku ē, e 'ite riva-riva rō 'ana a au: te kōrua noho iŋa noho iŋa tano ki te mata o te 'Atua, ko 'ite riva-riva 'ana kōrua o ruŋa i te hāpī parauti'a 'ā'ana, 'e e tano rō 'ana mo hā'ū'ū 'i roto i a kōrua 'ā mo haka tika o ruŋa i te me'e haŋa o te 'Atua. ¹⁵ Ka ai atu pē ira, 'i ruŋa i te parau nei, ko pāpa'i ko haka 'ite atu 'ana a au o ruŋa i te tētahi me'e, 'o rehu i a kōrua. I pāpa'i atu ai 'o te ai te 'Atua hai riva rahi ō'ona ko haka 'āpōtoro 'ā i a au ¹⁶ mo tāvini ki a Ietū Kiritō mo te riva-riva o te nu'u ta'ato'a ta'e he hūrio. Tā'aku aŋa pa he aŋa 'ā o te [oromatu'a]: he haka 'ite ki te nu'u ta'e he hūrio i te [roŋo riva-riva o te 'Atua], ki haka moe ai a rāua i te mana'u 'i ruŋa i a Ietū. Pē ira ka ai ena a rāua pa he me'e mo va'ai ki te 'Atua mo tō'ona koa haka ma'itaki e te Vārua Maitai.

¹⁷ 'E, 'i te ai ō'oku 'a Ietū Kiritō, e tano nō a au mo koa o ruŋa i tā'aku aŋa mo te 'Atua. ¹⁸ Ka ai atu pē ira, tā'aku me'e nō mo 'a'amu atu he me'e i aŋa e te [Kiritō] mo ha'atura o te nu'u ta'e he hūrio ki te 'Atua hai me'e kī 'e aŋa e au, ¹⁹ 'e, tako'a, hai mana aŋa e au hai pūai va'ai mai e te Vārua o te 'Atua. Pē ira i haka mao riva-riva ai a au i te aŋa va'ai mai he haka 'ite he oho i te roŋo riva-riva o ruŋa i te Kiritō mai Hērutarema ki te kona ta'ato'a, 'ātā ka tu'u rō ki Iriria. ²⁰ 'I tō'oku ara, tā'aku me'e aŋa he haka 'ite i te roŋo riva-riva o te 'Atua a te kona kai 'ite 'ā o ruŋa o Ietū Kiritō, 'o aŋa 'o oho a te kona ko ha'amata era 'ā te aŋa e te rua. ²¹ Hai aŋa nei 'ā'aku i haka tano ai te vānaŋa kī 'i ruŋa i te Pāpa'i Mo'a pē nei ē:

«Te nu'u ta'e 'ite o ruŋa i a ia ko rāua te nu'u ka 'ite ena ko ai a ia;

† A HĒTĒ he matu'a tane o te 'ariki era ko Tāvita (Māteo 1.6). Mai i a ia i haka ara mai ai a Ietū, kope mā'ana e haka tere i te tanjata o te ao ta'ato'a.

te nu'u ta'e ŋaro'a o ruŋa i a ia ko rāua te nu'u ka aŋi-aŋi ena i tā'ana roŋo».

He mana'u iŋa o Pauro mo oho ki Roma

²² I rahi rō tō'oku mahana i mana'u mo oho atu mo u'i i a kōrua, 'e, 'i te rahi o tā'aku aŋa, e ta'e rava'a nei a au mo oho atu. ²³ 'E, hora nei, 'i te oti o tā'aku aŋa 'i te ŋā kona nei, 'e 'i te rahi o tō'oku matahiti haŋa mo oho atu ki a kōrua 'i Roma, ²⁴ ko mana'u 'ana a au mo hipa atu 'i tō'oku ara ka oho nei ki Paniora. Ki tu'u atu a au 'e ki koa tātōu, ka ai atu mahana ta'e rahi, he oho haka 'ou a au 'i tō'oku ara hai hā'ū'ū o kōrua.

²⁵ 'Ī a au he oho 'i te hora nei ki Hērutarema, he ma'u i te me'e mo hā'ū'ū o te ŋā taina era o ira. ²⁶ Ko haka taka-taka 'ana, pa'i, e te taina o Mātērōnia 'e o Ākāia i te moni mo haka ma'u mo te taina veve o Hērutarema. ²⁷ Te me'e nei i aŋa ai hai mana'u o rāua, ka ai atu he me'e mau 'ana mo aŋa e rāua. Pa he haka 'ite iŋa era 'ā e te hūrio o ruŋa i te rāua hauha'a, he roŋo riva-riva o te 'Atua, ki te nu'u ta'e he hūrio, pē ira tako'a 'ana te nu'u ta'e hūrio ana hā'ū'ū 'i te hora nei hai hauha'a o rāua o te ao nei mo te hūrio haka moe i te mana'u 'i ruŋa i a Ietū. ²⁸ Ki va'ai ki oti a au i tū me'e va'ai mai era e rā nu'u, he oho au ki Paniora 'e, 'i tō'oku ara ki ira, ka hipa atu ena a au ki a kōrua 'i Roma. ²⁹ 'E, ko 'ite riva-riva 'ana a au pē nei ē: ki tu'u atu a au, ka 'ata ha'amaitai mai ena e te Kiritō i a tātōu ta'ato'a.

³⁰ E te taina, 'i te ai o tātōu ta'ato'a 'a Ietū Kiritō, he Pū'oko Haka Tere o tātōu, 'e 'i te ai o te haŋa 'i roto i a tātōu va'ai mai e te Vārua Maitai, he ani atu a au: e pure kōrua ki te 'Atua mō'oku. ³¹ E ani kōrua ki a ia mo hāpa'o i a au 'o tōtōā mai e te nu'u ta'e haka moe i te mana'u 'i ruŋa i a Ietū o Hūrea, 'e e ani tako'a mo koa o te ŋā taina era o Hērutarema 'o tū me'e era mo ma'u e au. ³² Pē ira, ki oti te aŋa nei, he oho atu a au ki a kōrua, ana haŋa te 'Atua, hai koa, mo haka ora 'e mo haka pūai haka 'ou i te tātōu mana'u. ³³ Ka noho riva-riva kōrua, 'e mo te 'Atua, kope va'ai i te haumārū, e hokorua atu i a kōrua ta'ato'a. [ʻĀmene].

He 'aroha

16 Nā he oho atu te vi'e e tahi te 'iŋoa ko Peve, he vi'e hā'ū'ū i te nūna'a tanjata [haka moe i te mana'u] 'i ruŋa i a Ietū o te kona era ko Tenekerea. ² Ki tu'u atu, e u'i kōrua e haka naho-naho i a ia 'o te ai tako'a ō'ona 'a Ietū, he me'e mau 'ā, pa'i, mo aŋa e tātōu e te taina haka moe i te mana'u 'i ruŋa i a Ietū. 'E mo hape o te me'e, e hā'ū'ū kōrua. I rahi rō, pa'i, te nu'u i hā'ū'ū e ia, 'ātā i hā'ū'ū tako'a rō mai i a au.

³ E 'aroha atu kōrua ki a Pirika 'e ki a Ākira; a rāua he hokorua ō'oku 'i te aŋa va'ai mai e Ietū Kiritō. ⁴ Te nu'u ena i va'ai rō i a rāua ki roto i te 'ati mo ora ō'oku. E māuru-uru rō 'ā a au i a rāua, 'e pē ira tako'a te nūna'a taina ta'ato'a ta'e he hūrio haka moe i te mana'u 'i ruŋa i a Ietū.

⁵ E 'aroha tako'a ki te nūna'a taŋata haka moe i te mana'u 'i ruŋa i a Ietū taka-taka 'i te hare o Pirika ararua ko 'Ākira.

E 'aroha atu kōrua ki tō'oku repahoa ko 'Epeneto, he kope ra'e i haka moe i tō'ona mana'u 'i ruŋa i te [Kiritō] o 'Ātia ta'ato'a.

⁶ E 'aroha atu ki a [Māria], va'ai i a ia ki te aŋa mo hā'ū'ū atu ki a kōrua.

⁷ E 'aroha ki a Anatoroniko 'e ki a Hūnia, he [hūrio] tako'a pē au 'ā, 'e he hokorua era ō'oku 'i roto i te hare ma'u'aurī. He [āpōtoro] mo'a rahi a rāua, 'e 'i ra'e ki a au i haka moe ai i te rāua mana'u 'i ruŋa i a Ietū.

⁸ E 'aroha ki a Amapiriato, he repahoa ō'oku 'i te haka moe iŋa i te mana'u 'i ruŋa i a Ietū.

⁹ E 'aroha ki a 'Urupano, he hokorua aŋa o tātou ki te Kiritō, 'e ki tō'oku repahoa haŋa rahi ko 'Ētaki.

¹⁰ E 'aroha ki a Āpere, he kope ko haka take'a mai 'ana i te pūai o tō'ona haka moe iŋa i te mana'u 'i ruŋa i a Ietū, 'e, tako'a, ki te hua'ai o Aritovuro.

¹¹ E 'aroha ki a Erotione, hūrio tako'a pē au, 'e ki te nu'u o te hua'ai o Naratito haka moe i te mana'u 'i ruŋa i a Ietū.

¹² E 'aroha ki a Tiripena 'e ki a Tiripota, he ŋā vi'e aŋa i te aŋa o te tātou Pū'oko Haka Tere ko Ietū Kiritō, 'e pē ira tako'a 'ana ki a Peretire, taina haŋa rahi o tātou, va'ai i a ia ki te aŋa mā Ietū.

¹³ E 'aroha atu ki a Rufo, kope haka kē 'i tō'ona aŋa iŋa ki a Ietū, 'e pē ira tako'a 'ana ki tō'ona matu'a vahine. A ia pa he matu'a tako'a ō'oku.

¹⁴ E 'aroha atu ki a Atinikirito, ki a Perekonono, ki a 'Ēreme, ki a Patarova, ki a 'Ērema, 'e ki te taina ta'ato'a o muri i a rāua.

¹⁵ E 'aroha tako'a kōrua ki a Firoroko, ki a Hūrita, ki a Nēreo 'e ki tō'ona taina vahine, ki a 'Ōrimpa 'e ki te taina ta'ato'a haka moe i te mana'u 'i ruŋa i a Ietū o muri i a rāua.

¹⁶ E 'aroha 'i roto i a kōrua 'ā hai haŋa.

Te nūna'a taŋata ta'ato'a haka moe i te mana'u 'i ruŋa i a Ietū o te kona tu'u ō'oku i 'aroha rō mai mo kōrua.

¹⁷ E te taina, e u'i e haka tapa mai muri i te nu'u haka huri i te mana'u hai hāpī ta'e parauti'a, 'o ta'e ai e tahi mau nō kōrua mana'u o ruŋa i te hāpī parauti'a haka

'ite atu era, 'o haka tapa kōrua mai te ara parauti'a o te 'Atua. ¹⁸ A rāua, pa'i, ta'e he tāvini o te tātou Pū'oko Haka Tere he Kiritō; he tāvini o te me'e pohe 'e haŋa nō o rāua. Hai vānaŋa koro'iti 'e reka e reo-reo ena ki te nu'u māhatu rehe-rehe ta'e mana'u e aŋa rō 'ō e te rua i te me'e ta'e tano ki a rāua.

¹⁹ Ko 'ite 'ana te taina ta'ato'a e ha'atura rō 'ana a kōrua ki te 'Atua, 'e e koa rō 'ana a au 'o te ai o kōrua pē ira. Te me'e nō, e haka tere kōrua i a kōrua 'ā hai mana'u 'Atua, ki aŋa ki oho nō ai kōrua i te me'e riva-riva, ta'e i te me'e ta'e tano. ²⁰ Pē ira e ko roa he to'o mai e te 'Atua, va'ai i te haumārū, he haka hēpi'i i a Rukifero 'i raro i te kōrua va'e. Ka ai 'i ruŋa i a kōrua te riva rahi o Ietū, he Pū'oko Haka Tere o tātou.

²¹ Ī e 'aroha atu ena a Timoteo, hokorua aŋa ō'oku, pē ira tako'a 'ana tō'oku hau a Rūtio, a Hātō, 'e a Tōti-pataro.

²² He 'aroha tako'a atu ki a kōrua hai 'iŋoa o te tātou Pū'oko Haka Tere te kope pāpa'i i te parau nei 'ā'aku ko Teretio.

²³ E 'ī a Kāio e 'aroha atu ena mo kōrua. E noho nei a au 'i tō'ona hare, he kona haka rē e ia mo taka-taka o te nūna'a taŋata haka moe i te mana'u 'i ruŋa i a Ietū. 'E 'ī e 'aroha tako'a atu ena a Erato, he kope hāpa'o moni o te kona nei, 'e te tātou taina ko Kuarato. [²⁴ Ka ai 'i ruŋa i a kōrua ta'ato'a te riva rahi o te tātou Pū'oko Haka Tere ko Ietū Kiritō. [Āmene].]

He ani iŋa mo ha'ahana-hana ki te 'Atua

²⁵ Ki ha'ahana-hana tahi tātou ki te 'Atua. I a ia te pūai mo haka hio-hio i te kōrua mana'u 'i ruŋa i a ia hai roŋo haka 'ite e au o ruŋa i a Ietū Kiritō, he parauti'a ta'e haka 'ite 'i mu'a 'ā o ruŋa i te me'e mana'u e ia mo aŋa ²⁶ 'e, hora nei, ko haka 'ite 'ana 'i ruŋa i te me'e pāpa'i e te perofeta. Nei parauti'a ko haka 'ite 'ana ki te taŋata o te henua ta'ato'a mo haka moe o rāua i te mana'u 'i ruŋa i a Ietū 'e mo ha'atura ki a ia. O te 'Atua, 'ina ō'ona ha'amata 'e 'ina ō'ona hope'a, i kī mo aŋa pē ira.

²⁷ Ī'Ātā ki te hope'a ra'a ki ha'ahana-hana tahi tātou hai Ietū Kiritō ki te 'Atua, ko ia mau nō te 'Atua, 'e i a ia mau nō te mārāma-rama parauti'a! Āmene.

1 KŌRINTO

Te parau nei i pāpa'i ai e Pauro mo te nu'u taina o Kōrinto. I pāpa'i ai 'i te me'e era e rahi rō 'ana te me'e ta'e tano aŋa e tētahi o rā nā taina. He hatu ia e Pauro pē hē te haka tere iŋa tano mo rāua mo te nu'u he [kiritiano]. Te me'e ra'e i kī: e ai rāua e tahi mau nō mana'u 'i te me'e o te 'Atua (1.10–17).

Te kona nei ko Kōrinto, e māhani era e te nu'u 'i rā noho iŋa, he kona 'i ira e rahi rō 'ā te nu'u aŋa i te me'e hano-hano pohe nō e te hakari, 'ātā e ai rō 'ana te rāua vānaŋa pē nei ē: «e kōrinto 'ana», he kī iŋa mo te nu'u aŋa i te me'e hope'a o te hara. 'E te 'ati o te nūna'a taina [haka moe i te mana'u] 'i ruŋa i a Ietū o rā kona, te kope e tahi o roto o rāua ko moe 'ana i te vi'e o tō'ona matu'a (5.1), he me'e 'ina he aŋa korohaŋa e te nu'u ta'e he kiritiano.

Te me'e ta'e tano tako'a i aŋa e te taina o Kōrinto he horo i te rāua taina haka moe i te mana'u 'i ruŋa i a Ietū 'i mu'a o te huē ta'e he kiritiano, he me'e 'ina ko aŋa e te nu'u haka moe i te mana'u 'i ruŋa i a Ietū. He ture e Pauro 'e he kī mo ta'e aŋa haka 'ou pē ira. E ai rō 'ana, pa'i, te nu'u o roto o rāua mo haka tī-tika i te rāua ture. Tētahi ia nu'u taina o Kōrinto e mana'u era: me'e ta'e tano te me'e he [hāipo-ipo], te aura'a, te noho pa he kenu pa he vi'e, 'e he haka 'ite e Pauro ta'e he parauti'a te mana'u era o rāua. Ka ai atu pē ira, i haka rē nō ki te rāua mana'u, 'e pē nei i haka mao i kī ai: te kope haŋa mo hāipo-ipo, ko tano 'ana, 'e te kope haŋa mo noho taure'a-re'a 'ina ko piri tane, 'ata hau rō atu i te riva-riva (7.38).

I ai tako'a rō te taina o Kōrinto e 'aka-'aka rō 'ana te mana'u o ruŋa i te ora iŋa haka 'ou mai te mate (15.12). 'E 'i ruŋa nei i haka mana'u haka 'ou ai e Pauro: he parauti'a mau 'ana ko ora 'ā a Ietū mai te mate (15.3–8). 'E he haka 'ite pē nei ē: (15.21).

I ha'aura'a rō e Pauro ki te nā taina nei o Kōrinto: te nūna'a taŋata haka moe i te mana'u 'i ruŋa i a Ietū he hakari o Ietū (12.12–30). I haka 'ite tako'a rō: 'ina e tahi hauha'a te 'ite me'e rahi me'e, te 'ite mo vānaŋa me'e rahi nō atu 'arero, 'e te haka moe o te mana'u 'i ruŋa i a Ietū mo ta'e haŋa ki te rua. 'O ira i kī ai pē nei ē: (13.13).

He 'aroha

1 ¹² A au, a Pauro, ha'ata'a mo ['āpōtoro] 'a Ietū Kiritō hai haŋa o te 'Atua, he 'aroha atu māua ko te taina nei ko Tōtene ki a kōrua ki te nūna'a taŋata [haka moe i te mana'u] 'i ruŋa i a Ietū o Kōrinto, ha'ata'a e ia mo nu'u 'ā'ana 'ina e tahi hara ananake ko te nu'u o te kona ta'ato'a haka moe i te mana'u 'i ruŋa i a Ietū, Pū'oko Haka Tere o tātou o te nu'u ta'ato'a ha'ata'a e te 'Atua mā'ana. ³ Ka ai 'i ruŋa i a kōrua te riva rahi 'e te haumārū o te 'Atua he Matu'a, 'e o te tātou Pū'oko Haka Tere ko Ietū Kiritō.

He māuru-uru

⁴ He māuru-uru nō tā'aku aŋa ki te 'Atua mo kōrua 'i te riva rahi va'ai atu e ia hai Ietū Kiritō. ⁵ Hai ia, pa'i, te 'Atua i ha'amaitai ai i a kōrua mo aŋi-aŋi riva-riva e kōrua i tā'ana vānaŋa 'e mo 'ite mo hāpī i te nu'u, ⁶ 'i te me'e era e ma'u hio-hio rō 'ana kōrua 'i roto i te māhatu i te [roŋo riva-riva o ruŋa i a Ietū Kiritō]. ⁷ 'O ira, e tiaki nō ena kōrua ki te mahana o te hoki iŋa haka 'ou mai o te tātou Pū'oko Haka Tere ko Ietū Kiritō, e ko hape mai i a kōrua e tahi me'e o te me'e ta'ato'a va'ai e te 'Atua ki tā'ana nu'u mo aŋa i tā'ana aŋa. ⁸ Mo te 'Atua e haka pūai i te kōrua haka moe iŋa i te mana'u 'i ruŋa i a Ietū 'ātā ki te hope'a, 'o ai te hape mo

tahi iŋa atu 'i te hora o tō'ona hoki iŋa mai. ⁹ 'E te 'Atua e ko ta'e haka tano i tā'ana me'e kī. 'Ā'ana, pa'i, i ha'ata'a i a kōrua mo nu'u o tā'ana Poki ko Ietū Kiritō, Pū'oko Haka Tere o tātou.

He haka topa-topa iŋa o te taina

¹⁰ E te taina, hai 'Ōroa o te tātou Pū'oko Haka Tere ko Ietū Kiritō he ani atu a au mo ai o kōrua ta'ato'a e tahi mau nō mana'u, 'e 'ina ko haka topa kē-kē. E noho kōrua ta'ato'a 'i roto i te haumārū, e tahi mau nō mana'u 'e tahi mau nō me'e haŋa mo aŋa.

¹¹ E kī atu ena a au i te me'e nei, e te taina ē, he 'ite ō'oku, mai te hua'ai o Kōroe, e tātake rō 'ana kōrua 'i roto i a kōrua 'ā. ¹² E ai rō 'ā te nu'u o kōrua kī: «A au 'a Pauro»; 'e tētahi te kī: «A au 'a 'Āporo»; tētahi atu: «A au 'a Tefa»; 'e tētahi haka 'ou atu te kī: «A au o te [Kiritō]». ¹³ ¿Ka kī 'ō e topa-topa rō 'ana a Ietū? ¿I veo rō 'ō a Pauro 'i ruŋa i te tātaurō mo te riva-riva o kōrua? ¿I [papatito] rō 'ō kōrua hai 'Ōroa ō'ona? ¹⁴ ¿He māuru-uru a au ki te 'Atua 'i te me'e era 'ina e tahi o roto i a kōrua i papatito e au, ko Kīripo mau nō ararua ko Kāio! ¹⁵ Pē ira 'ina e tahi kope mo kī i papatito ai a ia hai 'Ōroa ō'oku. ¹⁶ ¡Ā! I papatito tako'a rō a au i te hua'ai 'a Etefana, 'e ko rehu atu 'ana i a au hoki i papatito rō a au i te tētahi nu'u. ¹⁷ Te Kiritō 'ina kai uŋa mai i a au mo papatito i te taŋata; mo haka 'ite i te parau 'āpī ri-

va-riva o ruŋa i a ia i uŋa mai ai, 'e ta'e 'ō hai vānaŋa nehe-nehe mo haka take'a i tō'oku mārama-rama, pa he me'e aŋa e te taŋata o te ao, 'o ta'e hauha'a te mate o Ietū 'i ruŋa i te tātaurō.

He mārama-rama o te 'Atua 'e o te taŋata

¹⁸ Te roŋo o te mate o Ietū 'i ruŋa i te tātaurō he me'e ma'a-ma'a nō atu e tahi mo te nu'u 'i ruŋa i a rāua ka topa ena te ūtu'a o te 'Atua. 'E mo tātou mo te nu'u e'a mai roto i te ūtu'a o te hara he pūai o te 'Atua. ¹⁹ Pa he me'e hā'aki 'i ruŋa i te [Pāpa'i Mo'a]:

«E haka take'a rō e au 'ina e tahi hauha'a te mana'u mārama-rama o te taŋata.

'E te nu'u mana'u e 'ite rahi rō 'ana a rāua he haka mira-mira e au i te mana'u».

²⁰ 'I hē i hope'a ai te nu'u mārama-rama, te [ma'ori o te haka tere hūrio] 'e te kope haka kē mo vānaŋa i te me'e o te ao nei? Ko haka 'ite mai 'ā e te 'Atua: mō'ona 'ina e tahi hauha'a te mārama-rama o te taŋata. ²¹ Te 'Atua, pa'i, 'i tō'ona mārama-rama 'Atua i kī ai: te taŋata e ko riva mo 'ite ko ai a ia hai mārama-rama taŋata mau nō. 'E, 'i tō'ona riva rahi, i mana'u ai mo haka e'a i te taŋata mai roto i te ūtu'a o te hara 'e mo va'ai i te ora 'āpī 'ina he hope'a ra'a hai haka moe o rāua i te mana'u 'i ruŋa i tā'ana roŋo o ruŋa i a Ietū Kiritō, roŋo haka 'ite e mātou, ka ai atu he me'e ma'a-ma'a nō atu e tahi mo te nu'u ta'e haka moe i te mana'u 'i ruŋa i a Ietū.

²² Te [hūrio], mo haka moe iho i te rāua mana'u 'i ruŋa i rā roŋo, e take'a 'i ra'e i te mana, 'e te [kirieko], e vānaŋa e te taŋata hai mārama-rama. ²³ 'E a mātou 'ina he aŋa i te nā me'e era. Te mātou me'e aŋa he haka 'ite he oho o ruŋa i te Kiritō veo era 'i ruŋa i te tātaurō. Te me'e nei he parau'ino e tahi mo te hūrio, 'e mo te kirieko he me'e ma'a-ma'a nō atu e tahi. ²⁴ 'E mo te nu'u ha'ata'a e te 'Atua mā'ana, ka hūrio 'e ka ta'e hūrio, he haka take'a iŋa o te 'Atua i tō'ona pūai 'e i tō'ona mārama-rama. ²⁵ Te me'e aŋa e te 'Atua tu'u pa he me'e ma'a-ma'a e tahi mo te taŋata, he me'e 'ata hau rō atu 'i te mārama-rama ki te mana'u mārama-rama ta'ato'a o te taŋata. 'E te me'e o te 'Atua tu'u pa he me'e ta'e pūai, he me'e 'ata hau rō atu i te pūai ki te pūai ta'ato'a o te taŋata.

Te taina o Kōrinto

²⁶ E te taina, 'ina ko rehu pē hē te taŋata e mana'u era o ruŋa i a kōrua 'i te hora ha'ata'a e te 'Atua i a kōrua mā'ana. Ki te rāua kī: nu'u ta'e rahi te nu'u mārama-rama, te nu'u tōro'a ra-rahi 'e te nu'u te rāua hua'ai nu'u hōnui o roto i a kōrua. ²⁷ I ha'ata'a ai e te 'Atua i te taŋata mā'ana hai nu'u ta'e hāpī 'e ta'e mārama-rama rahi, ki te mana'u taŋata, mo haka ha'amā i te nu'u hāpī rahi. I ha'ata'a tako'a rō i te nu'u ta'e pūai, ki te kī o te taŋata, mo haka ha'amā i te nu'u pūai.

²⁸ Te nu'u ta'e haka au 'e ta'e haŋa e te taŋata, te au-ra'a, te nu'u 'ina e tahi hauha'a, ki te rāua kī, ko te nu'u nei te nu'u i ha'ata'a e te 'Atua mā'ana, mo haka take'a: te nu'u e hauha'a rō 'ā ki te mata o te taŋata, ki te mata o te 'Atua ta'e pē ira.

²⁹ 'O ira, 'ina e tahi kope mo haka paka i a ia 'i mu'a i te 'Atua. ³⁰ Hai ia, pa'i, e ai nei tātou 'a Ietū Kiritō. 'E hai Ietū Kiritō e haka tere nei a tātou hai mana'u 'Atua 'e e tano nei ki tō'ona mata. Hai ia tako'a e ai nei tātou he nu'u ha'ata'a mā'ana 'ina e tahi hara 'e he nu'u e'a mai roto i te pūai o te hara. ³¹ E kī rō 'ana, pa'i, 'i ruŋa i te Pāpa'i Mo'a: «Te kope haŋa mo haka paka i a ia, te tano mau: e haka paka i te 'Atua, Pū'oko Haka Tere o tātou, 'o te me'e aŋa e ia».

He haka 'ite iŋa o Pauro o ruŋa i te Kiritō

2 E te taina, hora oho vānaŋa atu era o'oku o ruŋa i te me'e mana'u e te 'Atua mo aŋa ta'e haka 'ite mai era e ia 'i mu'a 'ā, ta'e hai vānaŋa nehe-nehe mo haka take'a atu 'ō i tō'oku mārama-rama a au i haka 'ite atu ai. ² E noho atu era a au 'i muri i a kōrua te me'e mau nō 'ā'aku i mana'u he hāpī atu o ruŋa i a Ietū Kiritō 'e o ruŋa i tō'ona mate iŋa 'i ruŋa i te tātaurō. ³ I māroa atu ai a au 'i mu'a o kōrua 'ina e tahi o'oku pūai e ŋaro'a era e au 'e e rurū rō 'ā 'i te ri'a-ri'a, 'o ta'e haka tano au i te me'e haŋa o te 'Atua. ⁴ E vānaŋa atu era a au o ruŋa i te roŋo o te 'Atua, ta'e hai vānaŋa mārama-rama e haka 'ite atu era; o te [Vārua Maitai] te haka 'ite atu he parauti'a rā vānaŋa era 'ā'aku, ⁵ 'o ai hai mārama-rama o te taŋata te haka moe iŋa ena o kōrua i te mana'u 'i ruŋa i a Ietū 'e ta'e 'ō hai pūai o te 'Atua.

Te me'e o te 'Atua e 'ite ena hai Vārua Maitai

⁶ Te parauti'a, 'i roto i te nu'u e hio-hio rō 'ā te rāua haka moe iŋa i te mana'u 'i ruŋa i a Ietū e hāpī nei a mātou hai vānaŋa mārama-rama, 'e rā mārama-rama ta'e he mārama-rama o te taŋata 'o he mārama-rama o te nu'u pū'oko haka tere o te ao nei. Te pūai, pa'i, o te rāua mārama-rama pe te ŋaro pe te oho nō. ⁷ Te me'e nei o mātou e vānaŋa nei: o ruŋa i te mārama-rama o te 'Atua ta'e 'ite e te taŋata: he me'e i mana'u e ia mo aŋa mo te tātou riva-riva pe mu'a ka oho ena ta'e haka 'ite mai e ia 'i mu'a 'ā. Te me'e nei i mana'u ai mai te hora era kai aŋa 'ā i te ao. ⁸ Rā me'e mana'u era e te 'Atua mo aŋa 'ina kai aŋi-aŋi e te nu'u pū'oko haka tere o te ao nei. 'Āhani, pa'i, a rāua i aŋi-aŋi, e ko veo 'i ruŋa i te tātaurō i te tātou Pū'oko Haka Tere, kope i a ia te parau o te me'e ta'ato'a. ⁹ E kī rō 'ana, pa'i, 'i ruŋa i te [Pāpa'i Mo'a]:

«Te 'Atua ko haka riva-riva 'ā mo te nu'u haŋa ki a ia i te me'e 'ina he kope ra'e i take'a, i ŋaro'a 'e koro-haŋa i mana'u».

¹⁰ Rā me'e ta'e haka 'ite mai era 'i mu'a 'ā ko haka aŋi-aŋi mai 'ā e te 'Atua hai Vārua Maitai 'i te hora nei; a ia,

pa'i, e 'ite rō 'ā i te me'e ta'ato'a, 'ātā i te mana'u hope'a o te 'Atua.

¹¹ ĶKo ai te kope 'ite i te mana'u o te taŋata mo ta'e ai ko rā taŋata mau 'ā? Pē ira tako'a te mana'u o te 'Atua, he Vārua Maitai mau nō te me'e 'ite. ¹² 'Ina i a tā-tou i te nu'u [haka moe i te mana'u] 'i ruŋa i a Ietū, te mana'u iŋa ena o te taŋata o te ao. Te me'e i a tātou he Vārua Maitai va'ai mai e te 'Atua, mo aŋi-aŋi he aha te me'e ta'ato'a va'ai mai e ia 'i tō'ona riva rahi.

¹³ 'O ira, hora ena o mātou e hāpī ena o ruŋa i te 'Atua, e vānaŋa nei hai vānaŋa haka 'ite mai e te Vārua Maitai, ta'e hai vānaŋa mārama-rama hāpī mai e te taŋata. Pē ira e ha'aaura'a nei i te me'e o te 'Atua hai vānaŋa va'ai mai e te Vārua Maitai.

¹⁴ Te kope ta'e haka moe i te mana'u 'i ruŋa i a Ietū 'e kore o te Vārua Maitai o roto i a ia 'ina he to'o mō'ona i te hāpī haka 'ite e te Vārua Maitai; te hāpī nei he me'e ma'a-ma'a e tahi mō'ona. 'E 'ina e ko aŋi-aŋi, 'i te me'e era o te Vārua Maitai mau nō te haka aŋi-aŋi i te aura'a parauti'a o rā hāpī. ¹⁵ Te kope 'i roto i a ia te Vārua Maitai e aŋi-aŋi rō 'ana i te me'e ta'ato'a haka 'ite e te Vārua Maitai. 'E te kope 'ina he Vārua Maitai o roto i a ia, 'ina he aŋi-aŋi i te mana'u o te nu'u e ai rō 'ā 'i roto i a rāua te Vārua Maitai. ¹⁶ E kī rō 'ana, pa'i, 'i ruŋa i te Pāpa'i Mo'a: «ĶKo ai te kope 'ite i te mana'u o te 'Atua? ĶKo ai te kope mo hāpī i a ia?». 'E, he mana'u o te [Kiritō] te me'e i a tātou.

Te mana'u ta'e pa'ari o te taina o Kōrinto

3 E te taina, hora era 'ā ō'oku 'i muri i a kōrua, kai tano a au mo hāpī atu i a kōrua pa he hāpī iŋa ō'oku i te nu'u haka tere e te [Vārua Maitai] pa'ari 'i te me'e o te 'Atua. I hāpī atu ai pa he nu'u ta'e haka moe rahi i te mana'u 'i ruŋa i a Ietū, ma'u oho i te mana'u o te ao nei, pa he ŋā poki 'i te me'e o te [Kiritō]. ² 'E, pa he ŋā poki 'omo-'omo ū hai ū e va'ai ena 'e ta'e hai kai paŋaha'a, pē ira tā'aku me'e hāpī atu era, he hāpī ta'e aŋarahi mo aŋi-aŋi e kōrua. Kai tano riva-riva 'ana, pa'i, a kōrua mo aŋi-aŋi i te hōhonu o te hāpī o te 'Atua, 'e 'ātā ki te hora nei, ko te ai iŋa 'ā pē ira. ³ Ko te mana'u iŋa 'ana kōrua pa he taŋata o te ao ta'e [haka moe i te mana'u] 'i ruŋa i a Ietū. Hai mākota 'e hai tātake e take'a ena ko te mana'u iŋa 'ana kōrua hai mana'u taŋata, 'e o rā mana'u te haka tere i a kōrua. ⁴ Hora ena o te kope e tahi e kī ena: «'A Pauro a au» 'e o te rua te kī: «'A Āporo a au», e haka tere 'ana hai mana'u taŋata mau nō.

⁵ Ka haka topa rā te kōrua mana'u. ĶKo ai a Pauro 'e ko ai a Āporo? He tāvini nō o te 'Atua, 'e mai i a rāua a kōrua e haka moe ena i te mana'u 'i ruŋa i a Ietū. Te me'e aŋa nō o māua he me'e kī mai e te 'Atua. ⁶ A au pa he kope pī i te karu 'e a Āporo pa he kope pī-pī vai, 'e o te 'Atua te haka tupu 'e te haka nui-nui. ⁷ 'O ira, ta'e ki te ŋā kope era o rāua i pī 'e pī-pī hai vai ana ha'ahana-hana, ki te 'Atua, kope era 'ā'ana i haka tupu 'e i haka nui-nui i rā me'e 'oka era. ⁸ Te kope pī i te karu 'e te kope pī-pī hai vai ko tū tōro'a 'ā, 'e mo te 'Atua e 'auhau i te rāua aŋa. ⁹ He tāvini nō māua o te 'At-

ua, 'e a kōrua pa he 'āua 'oka kai 'i ira a māua e aŋa ena, 'e, tako'a, pa he hare aŋa e te 'Atua mō'ona.

¹⁰ Hai riva rahi o te 'Atua, 'ā'aku i ha'amata i hāpī atu ki a kōrua i te parau 'āpī riva-riva o ruŋa i a Ietū Kiritō; 'e, tako'a, i hā'ū'ū i te nu'u ra'e o kōrua mo haka moe i te rāua mana'u 'i ruŋa i a Ietū, pa he kope 'ā'ana i aŋa i te mekerā 'i ruŋa ka haka tu'u era te hakari o te hare. 'E, hora nei, o te tētahi te hāpī te oho atu o ruŋa i a Ietū mo haka hio-hio o kōrua 'i te ara o te 'Atua, pa he nu'u o rāua te haka tu'u i te hakari o te hare 'i ruŋa i te mekerā. Te me'e nō, e u'i e aŋa riva-riva te hare.

¹¹ Te hare aŋa e te 'Atua e tahi mau nō mekerā 'i ruŋa e haka tu'u ena te hare, ko Ietū Kiritō, 'e 'ina e tahi kope mo mono i te mekerā nei. ¹² 'I ruŋa i te mekerā nei te hare ana haka tu'u hai me'e hio-hio pa he piru, pa he parata, pa he mā'ea hope'a ena o te nehe-nehe 'e o te hauha'a, 'e ta'e 'ō hai me'e e vera nō pa he miro, pa he mauku, 'e pa he 'ohe.

¹³ Te huru o te aŋa o te ta'ato'a ka take'a riva-riva ena 'i te mahana o te ture hope'a, mahana ka u'i era e Ietū hai ahi hoki i aŋa riva-riva rō 'o 'ina. ¹⁴ Mo ta'e vera o rā me'e aŋa era, he va'ai e te 'Atua hai me'e mo koa. ¹⁵ 'E mo vera, e ko va'ai; 'e, ka ai atu pē ira, ko te e'a iŋa 'ana rā kope mai roto i te ūtu'a o te hara 'e ko te rava'a iŋa 'ana i te ora 'āpī 'ina he hope'a ra'a, pa he taŋata rava'a tere mai roto i te hare e vera rō 'ā 'ina he me'e ma'u 'i te rima.

¹⁶ Ķ'Ina hō kōrua he 'ite: pa he [Kona Ha'amuri 'Atua] 'ā a kōrua, 'i te me'e era 'i roto i a kōrua e noho ena te Vārua Maitai? ¹⁷ Te kope tōtōā i te Kona Ha'amuri 'Atua, te aura'a, te kope haka tumu i te ture mo ha'ata'a o kōrua, he haka ūtu'a e te 'Atua. Te Kona Ha'amuri 'Atua, pa'i, me'e mo'a, 'e rā Kona ko kōrua.

¹⁸ E u'i 'o reo-reo ki a kōrua 'ā hai mana'u ena pē nei ē: nu'u mārama-rama kōrua ki te mata o te taŋata o te ao nei. I hau rō atu 'i te tano mo riro o kōrua pa he nu'u ta'e mārama-rama, ki riro iho ai kōrua mo te 'Atua he nu'u mārama-rama mau 'ā. ¹⁹ Te mana'u mārama-rama o te taŋata o te ao nei he me'e ma'a-ma'a nō atu e tahi mo te 'Atua. Pa he me'e kī 'i ruŋa i te [Pāpa'i Mo'a]: «Te nu'u mana'u he nu'u mārama-rama a rāua e haka 'ite rō 'ā e te 'Atua ta'e pē ira hai ta'e ha'ati'a mo tano o te rāua me'e mana'u mo aŋa». ²⁰ E kī tako'a rō 'ana: «Te 'Atua ko 'ite 'ā: te mana'u o te nu'u mana'u pē nei ē: nu'u mārama-rama a rāua, he me'e ma'a-ma'a nō atu e tahi». ²¹ 'O ira 'ina e tahi o kōrua mo te'o-te'o 'a 'ai i hāpī. Te me'e ta'ato'a, pa'i, o kōrua 'e mo te kōrua riva-riva: ²² a Pauro, a Āporo, a Tefa, te ao, te ora, te mate, te hora nei, pe mu'a ka oho ena; ta'ato'a me'e o kōrua, ²³ 'e a kōrua 'a Ietū Kiritō, 'e a Ietū o te 'Atua.

† Te aura'a o te vānaŋa nei: 'ina e tahi kope mo kī atu e ai rō 'ā te rua rāve'a mo e'a o te taŋata mai roto i te ūtu'a o te hara 'e mo rava'a i te ora 'āpī 'ina he hope'a ra'a mo ta'e ai hai Ietū Kiritō mau nō.

Te aŋa o te [ʻāpōtoro]

4 E mana'u kōrua i a mātou i te nu'u haka 'ite i te [rono riva-riva o te 'Atua] pa he tāvini nō o te [Kiritō] uŋa mo haka 'ite i te me'e mana'u e te 'Atua mo aŋa ta'e haka 'ite mai 'i mu'a 'ā. ² Ko 'ite 'ana e kōrua: te taŋata ki a ia e va'ai ena i te aŋa e haka tano tahi i te me'e kī mo aŋa. ³ 'E a au, 'ina he tapa atu i te vānaŋa kī e kōrua 'e e te tētahi nu'u hoki ko tano 'ā 'o kai tano tā'aku me'e aŋa. 'Ātā a au mau nei 'ā 'ina he kī i te tano 'e i te ta'e tano o tā'aku me'e aŋa. ⁴ 'E, ka ai atu 'i-na he mana'u ō'oku he tuhi mai ko aŋa 'ana a au i te me'e ta'e tano, te ha'aaura'a o te me'e era ta'e 'ō pē nei ē: 'ina mau 'ana pēaha ō'oku hape. Te kope mau nō, pa'i, mo kī i te tano 'e i te ta'e tano o tā'aku me'e aŋa he Pū'oko Haka Tere o tātou ko Ietū Kiritō.

⁵ 'O ira, e haka kore te kōrua kī i te tano 'e i te ta'e tano o te me'e aŋa e te rua. Ki tiaki tātou ki te hoki iŋa mai o te Kiritō. Mā'ana e haka 'ite mai i te mana'u o te taŋata ta'e 'ite e te rua 'e he haka aŋi-aŋi mai he aha i mana'u ai pē ira. 'I rā hora e ture rō 'e e ha'ahana-hana rō e te 'Atua i te ta'ato'a tano ki te rāua me'e i aŋa.

⁶ E te taina, mo te kōrua riva-riva i vānaŋa i ha'aaura'a atu ai au o ruŋa i a māua ko 'Āporo mo 'ite o kōrua mo haka tere nō i a kōrua hai me'e hā'aki 'i ruŋa i te [Pāpa'i Mo'a], 'o haka paka kōrua i te kope e tahi 'e 'o ta'e haka au i te rua. ⁷ 'A 'ai koe i kī i hau rō atu koe ki te rua? 'Ina e tahi me'e ena 'ā'au i ta'e ai o te 'Atua i va'ai atu. 'E 'i te ai pē ira, 'he aha ia koe e te'o-te'o ena 'e e haka tu'u ena pa he me'e ena ē: te me'e i a koe hai koe mau 'ā e ai ena?

⁸ Te huru, e mana'u ena kōrua 'ina he me'e toe mo 'ite o ruŋa i te 'Atua 'e i a kōrua te me'e ta'ato'a va'ai e te [Vārua Maitai] mo aŋa i tā'ana aŋa. Te huru tako'a, e mana'u ena kōrua a kōrua he 'ariki 'e 'ina e tahi me'e haŋa toe mo va'ai atu e mātou. 'Pē hiva 'ana 'ō he parauti'a he 'ariki a kōrua mo haka tere o tātou ananake! ⁹ E tu'u tako'a rō 'ana pe he me'e ena ē: te 'Atua ko haka rē 'ana i a mātou i te 'āpōtoro, pa he me'e hope'a, haka ūtu'a mo mate 'i roto i te koro nui-nui e tahi mo māta'i-ta'i o te merahi 'e o te taŋata ta'ato'a. ¹⁰ E mana'u ena te nu'u o te ao nei he ma'a-ma'a a mātou 'o te aŋa ki te Kiritō, 'e a kōrua e mana'u ena: 'o te ai a kōrua o te Kiritō he nu'u mārama-rama. Ki te mana'u tako'a o te nu'u o te ao nei he nu'u ta'e pūai a mātou, 'e a kōrua e mana'u ena he nu'u pūai kōrua. Te nu'u o te ao e ta'e haka au rō 'ana i a mātou, 'e ki a kōrua e mo'a atu ena. ¹¹ 'Ātā ki 'aŋarīnā e ŋaro'a rō 'ana e mātou te maruaki 'e te pohe ki te vai. E kore rō 'ana te mātou kahu mo uru, e tōtōā rō mai 'ana e te nu'u, e kore rō 'ā te mātou kona mo noho ¹² 'e e rohi-rohi rō 'ana 'i te aŋa iŋa. E taro-taro mai ena e te nu'u, hai ha'amaitai e haka hoki nei e mātou; 'e e tute mai ena mo tōtōā, he ha'aoroma'i e mātou. ¹³ E reo-reo ena o ruŋa i a mātou, hai vānaŋa riva-riva e mātou e pāhono ena. 'E 'ātā ki 'aŋarīnā, e ha'ariro ena i a mā-

tou e te nu'u pa he iŋo-iŋo 'e pa he me'e hope'a o te ta'e hauha'a.

¹⁴ Te me'e nei e au e pāpa'i atu ena ta'e mo haka ha'amā i a kōrua, mo haka tī-tika i te kōrua mana'u, pa he ŋā poki haŋa rahi 'ā'aku. ¹⁵ Ka rahi atu te nu'u hāpa'o 'e hāpī i a kōrua pa he [kiritiano], e tahi mau nō kope pa he matu'a tane o kōrua ko au. 'Ā'aku, pa'i, i haka 'ite ra'e atu i te [rono riva-riva o ruŋa i a Ietū Kiritō], 'e i kī atu mo [haka moe i te mana'u] 'i ruŋa i a ia mo ai o kōrua 'ā'ana. ¹⁶ 'O ira 'i a au he ani atu: e haka tano te kōrua mana'u 'e te kōrua noho iŋa pē au.

¹⁷ Mo te ŋā me'e nei i uŋa atu ena au i a Timoteo mo hā'ū'ū atu i a kōrua. A ia pa he poki haŋa rahi 'ā'aku ta'e haka rē ki te hora hope'a i te aŋa o te 'Atua. Mā'ana e haka mana'u atu i tō'oku haka tere iŋa pa he kope haka moe i te mana'u 'i ruŋa i a Ietū Kiritō. Tō'oku haka tere iŋa, pa'i, e tano rō 'ā ki tā'aku me'e mau nei 'ā e hāpī e oho nei ki te nūna'a taŋata haka moe i te rāua mana'u 'i ruŋa i a Ietū o te kona ta'ato'a vari ō'oku.

¹⁸ Ko 'ite 'ana a au: tētahi o roto i a kōrua nā e haka paka 'ana i a rāua 'i te me'e era e mana'u ena e ko hoki atu au e ko u'i i a kōrua. ¹⁹ 'E, mo haŋa o te 'Atua, e ko roa hia he tu'u atu a au. 'I rā hora ka u'i nei a au: e pūai rō 'ana a rāua 'o he haka kē nō mo vānaŋa te rāua me'e. ²⁰ Te haka tere iŋa o te 'Atua 'i roto i te tā-tou māhatu e 'ite ena ta'e hai vānaŋa, hai pūai mau era 'ā ō'ona haka huri i te tātou mana'u 'e i te tātou noho iŋa mo aŋa i tā'ana me'e haŋa. ²¹ 'He aha ia te kōrua me'e haŋa: he oho atu ō'oku haka ūtu'a i a kōrua, 'o he oho atu he u'i i a kōrua hai koa 'e hai haŋa?

He taŋata aŋa i te me'e ta'e tano

5 E te taina, ko ŋaro'a 'ana a au i te vānaŋa: te kope e tahi o roto i a kōrua ko noho 'ā ki te vi'e o tō'ona matu'a tane. Te me'e tu'u pē nei me'e ta'e tano, 'e he hara taparahi-ta'ata 'ina kai take'a 'ā korohaŋa 'i roto i te nu'u kai 'ite ko ai te 'Atua parauti'a mau. ² Ka ai atu pē ira, ko te te'o-te'o iŋa 'ā a kōrua pē nei ē: ko 'ite riva-riva 'ana a kōrua i te me'e o te 'Atua. Te tano mau: e māui-ui te kōrua māhatu 'i te me'e tu'u pē nā. Te taŋata aŋa i te me'e tu'u pē nei e haka e'a mai roto i a kōrua.

³ 'E, ka ai atu ta'e a au 'i te hora nei 'i muri i a kōrua, he haka 'ite atu a au i tō'oku mana'u pa he me'e ena ē: nā a au 'i muri i a kōrua. Te kope aŋa i te me'e tu'u pē nā e ai rō 'ana te ūtu'a tano mō'ona. ⁴ Hora ena o kōrua ka taka-taka tahi ena mo haka e'a i a ia, a au tako'a 'i muri i a kōrua, 'e pē ira tako'a 'ana te pūai o Ietū Kiritō Pū'oko Haka Tere o tātou. 'I rā hora, hai 'iŋoa ō'ona, ⁵ he haka rē kōrua i te taŋata ena ki te rima o Rukifero mo haka 'amo hai 'ati, ki huri haka 'ou ai i te mana'u ki te 'Atua 'e, 'i te mahana era o te hoki iŋa mai o te [Kiritō], he e'a tō'ona vārua mai roto i te ūtu'a o te hara 'e he rava'a i te ora 'āpī 'ina he hope'a ra'a 'o te huri haka 'ou o tō'ona mana'u ki te 'Atua.

⁶ E ko tano kōrua mo te'o-te'o. E kī rō 'ana, pa'i: «E tahi 'apa 'iti-'iti o te revaura he ahū tahi te haraoa». Pē ira tako'a 'ana hai taŋata mau nō e tahi e hara nō me'e rahi nō atu nu'u. ⁷ Te me'e haŋa he to'o mai roto i a kōrua i te revaura ena, ki ai ai a kōrua he nūna'a taŋata 'ina e tahi kope hara o roto, pa he haraoa aŋa iho ta'e hoa hai revaura. A kōrua, pa'i, he haraoa kai 'i te [Pakate] 'ina he hoa hai revaura, he nu'u 'ina e tahi hara 'o te [haka moe i te mana'u] 'i ruŋa i a Ietū. E mana'u: a Ietū he māmoe o te Pakate tūtia mo haka e'a i a tātou mai roto i te hara. ⁸ 'O ira, e ai te tātou noho iŋa, paurō te mahana, pa he haraoa 'ina kai 'āno'i hai revaura, noho iŋa 'ina e tahi me'e ta'e tano aŋa, pa he me'e aŋa o mu'a 'ā, 'e noho iŋa ha'atura parauti'a ki te 'Atua hai māhatu ma'itaki.

⁹ 'I ruŋa i tā'aku me'e pāpa'i ra'e atu era i hā'aki atu ai a au: 'ina kōrua ko ai he repahoa o te nu'u moe i te vi'e 'o i te taŋata ta'e he kenu 'ā'ana. ¹⁰ Te kī nei 'ā'aku: ta'e ka haka tapa mau 'ā a kōrua mai te nu'u ta'ato'a o te ao nei moe i te vi'e 'o i te taŋata ta'e he kenu 'ā'ana, 'e mai muri i te nu'u nou-nou, toke-toke 'e ha'amuri ki te 'ītoro. Mo rava'a, pa'i, e kōrua mo aŋa i te me'e nei, e ta'e ai mau nō kōrua 'i te ao nei. ¹¹ Tā'aku kī: nu'u nō era mo kī atu he taina rāua o kōrua 'i te haka moe iŋa i te mana'u 'i ruŋa i a Ietū, 'e te rāua me'e aŋa he moe i te vi'e 'o i te taŋata ta'e he vi'e 'o he kenu 'ā'ana, he nou-nou, he ha'amuri ki te 'ītoro, he vānaŋa ta'e tano mo te rua, he rava ta'ero, 'o he toke, 'ina kōrua ko ai he repahoa o rāua, 'e 'ina ko kai 'i muri. ¹²⁻¹³ Ta'e he me'e o tātou te kī i te me'e tano 'e i te me'e ta'e tano o te nu'u ta'e haka moe i te rāua mana'u 'i ruŋa i a Ietū; mo te 'Atua a rāua e kī. Ki te nu'u haka moe i te mana'u 'i ruŋa i a Ietū a tātou ana ture. 'O ira, e haka e'a mai roto i a kōrua te kope hara.

'Ina ko horo ki te hare ture i tu'u taina

6 Mo ai o te taina e ai rō 'ana tā'ana ture mo te rua taina, 'ina ko ma'u i rā taina ki mu'a o te nu'u pū'oko haka tere o te hare ture o te ao nei. Te me'e mau mo aŋa he ani ki te tētahi taina ha'ata'a e te 'Atua mā'ana mo hā'ū'ū i a ia. ² 'Kai 'ite 'ana 'ō kōrua: pe mu'a ka oho ena, mo tātou mo te nu'u ha'ata'a e te 'Atua e ture i te nu'u o te ao nei? 'E, mo ai pē ira, 'e ko rava'a mau 'ō e kōrua 'i te hora nei mo haka riva-riva i te ture 'iti-'iti e tahi? ³ 'Kai 'ite tako'a 'ana 'ō kōrua: pe mu'a ka oho ena 'ātā ki te merahi ka ture ena e tātou? 'Pē hē ia ana ta'e tano i a tātou mo ture i te me'e 'iti-'iti o te ao nei?

⁴ Mo ai tā'ue o te kōrua ture, e ko tano mo ma'u o kōrua i te kōrua taina ki mu'a o te nu'u ta'e haka moe i te mana'u 'i ruŋa i a Ietū mo haka kore o te ture. ⁵ Te vānaŋa nei e kī atu ena mo ha'amā o kōrua. E tu'u rō 'ana, pa'i, pa he me'e ena ē: 'ina he kope mārama-rama o roto i a kōrua mo haka kore i te kōrua ture. ⁶ 'E ko te horo ko te oho iŋa 'ana kōrua i a kōrua 'ā ki te pū'oko haka tere o te hare ture ta'e haka moe i te mana'u 'i ruŋa i a Ietū.

⁷ Te ai te oho nō o te ture 'i roto i a kōrua e take'a ena ko rē atu 'ana ki a kōrua te mana'u ta'e tano. Te me'e mau o kōrua mo aŋa he ha'aoroma'i i te kope aŋa atu i te me'e ta'e tano 'e toke atu i a kōrua. ⁸ 'E te me'e aŋa oho nō e kōrua he me'e ta'e tano 'e he toke, 'ātā i te me'e o te kōrua taina.

⁹⁻¹⁰ 'Kai 'ite 'ana hō kōrua: te nu'u aŋa i te me'e ta'e tano ki te mata o te 'Atua e ko o'o ki roto i te nūna'a taŋata haka tere e ia? 'Ina kōrua ko reo-reo ki a kōrua 'ā. 'Ina, pa'i, o roto i te nūna'a taŋata haka tere e te 'Atua te nu'u moe i te vi'e i te taŋata ta'e he vi'e 'o ta'e he kenu 'ā'ana, 'ina he nu'u ha'amuri ki te 'ītoro, he nu'u tai'ata, he ŋāŋata ha'ariro i a rāua pa he vi'e, he hiku, he toke-toke, he nu'u nou-nou, he nu'u rava ta'ero, he nu'u vānaŋa ta'e tano mo te rua, 'e he nu'u toke i te rua hai reo-reo. ¹¹ Tētahi o kōrua i aŋa rō i te ŋā me'e nei 'i mu'a 'ā. 'E, hora nei, 'i te ai o te tātou Pū'oko Haka Tere ko Ietū Kiritō hai haka moe i te mana'u 'i ruŋa i a ia, te 'Atua ko haka kore 'ana i te kōrua hara, ko ha'ata'a 'ana i a kōrua mā'ana, 'e ko haka riro 'ana he nu'u tano ki tō'ona mata 'i te ai o te [Vārua Maitai] 'i roto i a kōrua.

Te tātou hakari mo tāvini ki a Ietū

¹² Mo kī o te kope e tahi o roto i a kōrua pē nei ē: «A mātou, te nu'u haka moe i te mana'u 'i ruŋa i a Ietū, 'ina e tahi me'e ta'e ha'ati'a i a mātou mo aŋa i te me'e nō era o mātou i haŋa 'o te ai ta'e hai haka tano ki te [haka tere iŋa 'a Mōtē] e tano nei mātou ki te mata o te 'Atua», he aŋi mau 'ana tā'ana me'e kī. Ka ai atu pē ira, ta'e ta'ato'a me'e mo aŋa e tātou he me'e mo te tātou riva-riva. A au mau nei 'ā, ka ai atu 'ina he me'e ta'e ha'ati'a i a au mo aŋa i tā'aku me'e haŋa, 'ina a au he aŋa e tahi me'e mo ai ka hope'a era he haka tere mai i a au e rā me'e.

¹³ 'E mo kī o te rua kope pē nei ē: «Te 'Atua i aŋa ai i te tātou kōpū mo te kai 'e te kai mo te kōpū», he aŋi tako'a 'ā tā'ana vānaŋa, ka ai atu pe mu'a ka oho ena e ko ai haka 'ou pē ira. Te me'e nō, 'ina kōrua ko mana'u: pē ira tako'a 'ana te hakari. Te 'Atua, pa'i, kai aŋa i te hakari mo moe i te vi'e 'o i te taŋata ta'e he kenu ta'e he vi'e; i aŋa ai e te 'Atua mo tāvini ki te tātou Pū'oko Haka Tere ko Ietū Kiritō, 'e tā'ana me'e haŋa he hāpa'o o tātou i te hakari. ¹⁴ 'E pe mu'a ka oho ena, he haka ora e te 'Atua i a tātou mai te mate hai pūai ō'ona, pa he haka ora iŋa era e ia i a Ietū, Pū'oko Haka Tere o tātou.

¹⁵ A kōrua ko 'ite 'ana: te kōrua hakari he ŋā kona ena o te hakari o Ietū. Iā. 'E to'o mau rō ia a kōrua i te kona e tahi o te hakari o te [Kiritō] 'e he haka riro he kona o te hakari o te vi'e tai'o? 'Ina! ¹⁶ Hora ena o te taŋata e piri ena ki te tai'o, he riro ararua e tahi mau nō hakari, pa he me'e kī 'i ruŋa i te [Pāpa'i Mo'a]: «Ararua he riro e tahi mau nō hakari». ¹⁷ 'Ina ko rehu, te kope o te Kiritō e tahi mau nō vārua ararua.

¹⁸ 'O ira, e hāpa'o kōrua e te hara he moe i te vi'e i te kenu ta'e o kōrua. Te kope moe i te vi'e i te kenu ta'e 'ā'ana e hara 'ana ki tō'ona hakari 'e ki tō'ona vārua. 'E

'ina he rua hara hope'a o te taparahi-ta'ata tōtōā i te taŋata pa he hara nei. ¹⁹ 'Ina ko rehu, te tātou hakari pa he Kona Ha'amuri o te Vārua Maitai va'ai mai e te 'Atua, 'e 'i roto e noho ena a ia. A tātou ta'e o tātou 'ā, o te 'Atua. ²⁰ Ko 'auhau 'ana, pa'i, e ia i a tātou mā'ana 'i te hora mate era o Ietū 'i ruŋa i te tātaurō. 'O ira, te me'e ta'ato'a aŋa e tātou hai hakari e take'a e mo'a rō 'ana tātou i te 'Atua.

He hāpī mo te nu'u hāipo-ipo

7 Hora nei he pāhono atu au i te me'e pāpa'i 'ui mai era e kōrua. I hau rō atu i te tano mo ta'e [hāipo-ipo]. ² Te 'ati nō, 'o hara i te hara he moe i te vi'e i te kenu ta'e o kōrua, e ai te kōrua vi'e 'e te kōrua kenu. ³ Te nu'u hāipo-ipo e moe i te rāua kenu 'o i te rāua vi'e. E ko tano mo ta'e moe e te kenu i tā'ana vi'e 'e e te vi'e i tā'ana kenu. ⁴ Te hakari o te vi'e hāipo-ipo ta'e ō'ona nō, o tā'ana kenu tako'a, 'e te hakari o te kenu o tā'ana vi'e. ⁵ 'O ira, 'ina e tahi o rāua mo kī ki te rua 'ina he haŋa mo piri tane, mo ta'e ai 'i ra'e i ha'a'au ai ararua mo ta'e piri 'i te tētahi mahana mo pure ki te 'Atua. Ki oti rā ŋā mahana he piri haka 'ou, 'o ta'e rava'a rō mo haka noho i te hakari 'e he haka hara e Rukifero.

⁶ Ta'e e kī atu 'ā ka tapu kōrua. Tā'aku kī: mo haŋa o kōrua mo tapu e tano nō mo aŋa pē ira. ⁷ 'Āhani 'ō kōrua pē au 'ā tako'a: 'ina he vi'e. 'E, ka ai atu pē ira, e 'ite rō 'ana a au: te 'Atua i aŋa ai i te taŋata ta'e pē tū huru tahi 'ā: tētahi i aŋa ai mo hāipo-ipo 'e tētahi mo ta'e hāipo-ipo.

He hāpī mo te tētahi nu'u

⁸ He kī atu a au ki te nu'u taure'a-re'a 'e ki te nu'u hove: i hau rō atu i te tano mo ta'e hāipo-ipo o kōrua pē au. ⁹ 'E, mo ta'e rava'a mo haka noho i te me'e pohe e te hakari, e hāipo-ipo. I hau rō atu, pa'i, i te tano mo hāipo-ipo ki te noho pa he taure'a-re'a pohe nō te aŋa ki te vi'e 'o ki te taŋata.

¹⁰ Ki te nu'u hāipo-ipo he kī atu a au i te roŋo nei o te tātou Pū'oko Haka Tere: 'ina he vi'e hāipo-ipo ko ha'ata'a mai tā'ana kenu. ¹¹ 'E, mo ha'ata'a, 'ina ko hāipo-ipo haka 'ou ki te rua taŋata, 'o, mo haŋa ō'ona, he hoki ki tā'ana kenu. Pē ira tako'a 'ana te kenu, 'ina ko ha'ata'a mai tā'ana vi'e.

¹² 'E ki te tētahi nu'u he kī atu a au, pa he me'e 'ā'aku, ta'e pa he vānaŋa o te tātou Pū'oko Haka Tere ko Ietū Kiritō: mo ai e tahi taina o roto i a kōrua tā'ana vi'e 'ina he haka moe i tō'ona mana'u 'i ruŋa i a Ietū, 'e ko te haŋa iŋa 'ana rā vi'e mo noho mo oho nō ararua, 'ina rā taina ko ha'ata'a mai rā vi'e. ¹³ 'E mo ai he vi'e ko hāipo-ipo 'ā ki te taŋata 'ina he haka moe i tō'ona mana'u 'i ruŋa i a Ietū, 'e ko te haŋa iŋa 'ana rā taŋata mo noho mo oho nō ararua, 'ina rā vi'e ko ha'ata'a mai rā taŋata. ¹⁴ Te taŋata ta'e haka moe i tō'ona mana'u 'i ruŋa i a Ietū hāipo-ipo ki te vi'e e haka moe rō 'ā i te mana'u 'i ruŋa i a Ietū, he hāpa'o tako'a e te 'Atua 'o te ai ko hāipo-ipo 'ā ki rā vi'e; 'e te vi'e ta'e haka moe i

tō'ona mana'u 'i ruŋa i a Ietū he hāpa'o tako'a e te 'Atua 'o te ai ko hāipo-ipo 'ana ki te taŋata e haka moe rō 'ana i te mana'u 'i ruŋa i a Ietū. 'E he hāpa'o tako'a e te 'Atua i te rāua ŋā poki pa he ŋā poki 'ā'ana 'o te ai e tahi o rā ŋā matu'a o te 'Atua.

¹⁵ Te taŋata 'e te vi'e ta'e [haka moe i te mana'u] 'i ruŋa i a Ietū ta'e haŋa mo noho mo oho nō ararua ko tā'ana vi'e 'o ko tā'ana kenu haka moe i te mana'u 'i ruŋa i a Ietū, e haka rē mo oho. Mo topa o te me'e nei ki a kōrua 'ina he 'ati. Te me'e haŋa, pa'i, o te 'Atua, he haumārū 'i roto i a kōrua. ¹⁶ Ka ai atu pē ira, te tano mau: 'ina ko ha'ata'a mai te vi'e mai te kenu, kōi'ite hai rā vi'e 'o hai rā kenu haka moe era i te mana'u 'i ruŋa i a Ietū he e'a mai roto i te ūtu'a o te hara 'e he rava'a i te ora 'āpī 'ina he hope'a ra'a.

¹⁷ Huru kē huru kē te tātou noho iŋa i va'ai mai ai e te tātou Pū'oko Haka Tere ko Ietū Kiritō: kē mo taure'a-re'a, kē mo hāipo-ipo, kē mo 'ekaravo, mo ta'e 'ekaravo, mo [hūrio] 'e mo ta'e hūrio. 'E tā'ana me'e haŋa: he noho he oho ta'ato'a o tātou pa he hora kī mai era e ia 'i roto i te tātou māhatu mo haka moe i te mana'u 'i ruŋa i a Ietū. Ko te me'e nei te me'e hāpī e au 'i roto i te nūna'a ta'ato'a o te taŋata haka moe i te mana'u 'i ruŋa i a Ietū.

¹⁸ Pē nei te aura'a: te kope ko hore 'ā te kiri o te kinonŋa 'i te hora kī e te 'Atua mo haka moe i tō'ona mana'u 'i ruŋa i a Ietū, 'ina ko kimi i te rāve'a mo na'a i rā me'e. 'E te kope kai hore te kiri o te kinonŋa 'i te hora kī e te 'Atua mo haka moe i tō'ona mana'u 'i ruŋa i a Ietū, 'ina te kope nei ko u'i mo hore i te kiri o tō'ona kinonŋa. ¹⁹ Te me'e hauha'a, pa'i, mo te 'Atua, ta'e he hore 'o he ta'e hore o te kiri o te kinonŋa; he ha'atura ki tā'ana roŋo te me'e hauha'a. ²⁰ 'O ira, e noho e oho a tātou ta'ato'a pa he hora kī mai era e te 'Atua 'i roto i te tātou māhatu mo haka moe i te mana'u 'i ruŋa i a Ietū.

²¹ Mo ai ō'ou he 'ekaravo 'i te hora haka moe i tu'u mana'u 'i ruŋa i a Ietū, nōatu. 'E, mo ai tā'ue o te rāve'a mo e'a ō'ou mai te rima o te taŋata haka aŋa atu, e e'a. ²² Te kope, pa'i, he 'ekaravo 'i te hora haka moe i te mana'u 'i ruŋa i a Ietū, hora nei, ko e'a 'ana mai te pūai o te hara mo tāvini tako'a ki a Ietū, Pū'oko Haka Tere o tātou. 'E te kope ta'e he 'ekaravo 'i te hora haka moe i te mana'u 'i ruŋa i a Ietū, hora nei pa he 'ekaravo o te [Kiritō]. ²³ Te 'Atua, pa'i, hai mate iŋa era o tā'ana Poki ko Ietū Kiritō 'i ruŋa i te tātaurō i 'auhau ai i a tātou mā'ana. 'O ira, 'ina ko ha'ati'a mo haka riro i a kōrua e te taŋata he 'ekaravo o rāua. ²⁴ E te taina, e noho e oho nō kōrua 'i mu'a o te 'Atua pa he hora kī mau atu era 'ā e ia 'i roto i te kōrua māhatu mo haka moe i te mana'u 'i ruŋa i a Ietū.

²⁵ 'E, te nu'u ta'e hāipo-ipo, 'ina e tahi 'ā'aku roŋo mo haka 'ite ki a rāua va'ai mai e Ietū, Pū'oko Haka Tere o tātou. 'E, ka ai atu pē ira, a au pa he taŋata aŋa i tā'ana me'e kī hai riva rahi o te 'Atua, he kī atu au i tō'oku mana'u. ²⁶ Mō'oku, 'i te ta'e au o te noho iŋa o te hora nei, i hau rō atu i te riva mo ta'e hāipo-ipo o kōrua. ²⁷ Te kope ai o tā'ana vi'e, 'ina ko ha'ata'a mai muri i a

ia. 'E mo ta'e ai o tā'ana vi'e, 'ina ko hāipo-ipo. ²⁸ 'E, mo hāipo-ipo, ta'e e hara 'ā; 'e mo hāipo-ipo te vi'e taure'a-re'a e tahi, ta'e tako'a e hara 'ā. Te me'e nō, mo hāipo-ipo he 'ati taŋata te rāua me'e ka 'amo era, he me'e ta'e haŋa 'ā'aku mo topa atu ki a kōrua.

He mana'u tano mau mo te nu'u [kiritiano]

²⁹ E te taina, tā'aku me'e haŋa mo kī atu: hora ta'e rahi te hora toe o tātou mo aŋa ki te 'Atua. 'O ira, te nu'u hāipo-ipo e haka topa te hora mo aŋa ki te 'Atua, ka ai atu he nu'u hāipo-ipo a rāua. ³⁰ Pē ira tako'a 'ana te nu'u 'amo i te 'ati, te nu'u koa 'i te rāua noho iŋa, te nu'u ha'aputu i te tao'a mo rāua, ³¹ 'e te nu'u aŋa oho mo rava'a moni 'i te ao nei. Ta'e hai ŋā me'e ta'ato'a nei o te ao ana ta'e topa te kōrua hora mo aŋa ki te 'Atua. Te ŋā me'e ta'ato'a nei, pa'i, e ŋaro tahi rō koia ko te ao.

³² Te me'e haŋa 'ā'aku: 'ina ko ai te me'e o te ao nei mo mana'u rahi o kōrua. Te taŋata taure'a-re'a, 'i te ai hoko tahi nō, 'ina e tahi me'e ta'e ha'ati'a i a ia mo aŋa ki te tātou Pū'oko Haka Tere, 'e, tako'a, mo haka koa.

³³ 'E, te taŋata hāipo-ipo, te me'e mana'u rahi he me'e o te ao nei, 'e pē hē a ia ana haka koa i tā'ana vi'e.

³⁴ Tō'ona mana'u ta'e e tahi mau nō he aŋa ki te 'Atua. Te vi'e taure'a-re'a, 'i te ai tako'a ō'ona hoko tahi nō, te me'e mana'u mau nō he va'ai i tō'ona hakari 'e i tō'ona vārua mo aŋa ki te 'Atua. 'E te vi'e hāipo-ipo, he me'e o te ao te me'e mana'u rahi 'e pē hē a ia ana haka koa i tā'ana kenu.

³⁵ Ta'e a au e kī atu 'ā 'ina kōrua ko hāipo-ipo. E kī atu ena a au i te me'e nei mo hā'ū'ū atu mo aŋa o kōrua i te me'e tī-tika 'e mo tano o kōrua mo tāvini ki te tātou Pū'oko Haka Tere hai mana'u mau nō e tahi.

³⁶ Nā 'i roto i a kōrua te ŋāŋata 'ina he aŋi-aŋi he aha te rāua me'e tano mo aŋa, 'i te me'e era ko ha'amo'a-mo'a era 'ā i a rāua e te rāua matu'a e ŋā poki nō 'ana. Mo mana'u e tahi o te ŋā nu'u nei: te me'e tano 'ā'ana mo aŋa he hāipo-ipo ki te vi'e haka ha'amo'a-mo'a era ki a ia, 'o aŋa a ia i te me'e ta'e tano ki rā vi'e, 'e rā vi'e ia ko tano 'ā tō'ona matahiti mo hāipo-ipo, e hāipo-ipo; ta'e e hara 'ana. ³⁷ 'E mo 'ite e tahi o te nu'u nei mo haka noho i te me'e pohe o te hakari, 'e he mana'u: tā'ana me'e tano mo aŋa he ta'e hāipo-ipo 'o te ai 'ina a ia kai haŋa, 'e mo te vi'e haka ha'amo'a-mo'a era ki a ia ta'e he 'ati te ta'e hāipo-ipo o rāua, e tano nō 'ā mo ta'e hāipo-ipo. ³⁸ Tā'aku kī: te taŋata mana'u mo hāipo-ipo ki tā'ana vi'e haka ha'amo'a-mo'a, e aŋa 'ā i te me'e riva-riva, 'e te kope mana'u mo ta'e hāipo-ipo, 'ata hau te riva-riva.

³⁹ Te vi'e hāipo-ipo o tā'ana kenu 'i te hora e ora nō 'ā. 'E, mo mate o rā kenu, e tano nō rā vi'e mo hāipo-ipo haka 'ou. Te me'e nō, e hāipo-ipo ki te taŋata haka moe tako'a i tō'ona mana'u 'i ruŋa i a Ietū. ⁴⁰ Ka ai atu pē ira, ki tō'oku mana'u, i hau rō atu a ia 'i te koa mo ta'e hāipo-ipo. E mana'u rō 'ana a au: te me'e nei he me'e i haka mana'u mai e te [Vārua Maitai].

Te kai tūtia ki te 'itoro

8 'I a au he vānaŋa atu o ruŋa i te 'ui era o kōrua o te kai tūtia ki te 'itoro. Ta'ato'a o tātou e 'ite rō 'ā 'ina e tahi pūai o te 'itoro 'i ruŋa i a tātou. Ka ai atu pē ira, ka haka topa te mana'u: mo haka tere o tātou hai 'ite, he mana'u tātou i hau rō atu tātou ki te rua. 'E, mo haka tere hai haŋa, he aŋa tātou i te me'e riva-riva mo te rua. ² Te kope mana'u e 'ite rahi rō 'ana a ia o ruŋa i te me'e e tahi 'ina kai aŋi-aŋi riva-riva i rā me'e pa he me'e haŋa e te 'Atua mo aŋi-aŋi e ia. ³ 'E te kope kī e te 'Atua 'ā'ana, he kope haŋa rahi ki a ia.

⁴ 'E te me'e ena he kai i te kai tūtia ki te 'itoro, e 'ite rō 'ana e tātou: te 'itoro ta'e he 'atua parauti'a, 'e e 'ite tako'a rō 'ana: e tahi mau nō 'Atua. ⁵ Ki te kī o te nu'u ta'e 'ite ko ai te 'Atua parauti'a mau me'e rahi nō atu 'atua 'e pū'oko haka tere 'i te raŋi 'e 'i ruŋa i te henua. ⁶ 'E, a tātou, te nu'u [haka moe i te mana'u] 'i ruŋa i a Ietū, e 'ite riva-riva rō 'ana: e tahi mau nō 'Atua, he Matu'a, 'ā'ana i aŋa i te me'e ta'ato'a, 'e mā'ana a tātou e ai nei. 'E e tahi mau nō tātou Pū'oko Haka Tere ko Ietū Kiritō, hai ia te me'e ta'ato'a i ai ai, 'e 'ātā a tātou mau nei 'ā.

He haka tere iŋa hai haŋa

⁷ Te 'ati nō, tētahi o tātou kai aŋi-aŋi riva-riva 'ana 'ina he pūai o te 'itoro o ruŋa i a tātou, 'i te me'e era 'i mu'a 'ā e ha'amuri rō 'ana e rāua. 'E hora nei, mo kai i te kai tūtia ki te 'itoro, he mana'u ko hara 'ana a rāua. ⁸ 'E a tātou ko 'ite 'ā: ta'e hai kai 'o hai ta'e kai i te me'e e tahi e tano nei a tātou ki te mata o te 'Atua; mo kai, 'ina he 'ati; 'e mo ta'e kai, pē ira tako'a 'ana.

⁹ 'Ina ko ai hai 'ite o kōrua 'ina e tahi me'e ta'e ha'ati'a e te 'Atua mo kai, he viri tu'u taina ta'e aŋi-aŋi riva-riva i te me'e o te 'Atua ki roto i te hara. ¹⁰ Pē nei te aura'a: mo ai o te taina ta'e aŋi-aŋi riva-riva i te me'e o te 'Atua he take'a i a koe e kai 'ana i te kai tūtia ki te 'itoro, e ko ta'e pohe mau hō rā taina mo kai tako'a tā'ana? ¹¹ Pē ira, hai 'ite era ō'ou tu'u taina ka ta'e haka moe haka 'ou era i tō'ona mana'u 'i ruŋa i a Ietū mate tako'a era mō'ona. ¹² Mo aŋa o tātou i te me'e ta'e tano tu'u pē nei ki te tātou taina, e hara 'ā tātou ki a Ietū. ¹³ 'O ira, mo ai tā'ue hai kai ō'oku i te kiko ana ta'e haka moe haka 'ou tō'oku taina i tō'ona mana'u 'i ruŋa i a Ietū, 'ina ia a au e ko kai haka 'ou.

¿E hā'ū'ū te taina ki te ['āpōtoro]?

9 Ta'e a au he 'ekaravo o te mana'u taŋata. A au he 'āpōtoro. Ko take'a 'ana, pa'i, e au i a Ietū, Pū'oko Haka Tere o tātou, 'e hai aŋa nei i haka moe ai kōrua i te mana'u 'i ruŋa i a Ietū. ² Ka ai atu a au ta'e he 'āpōtoro mo te tētahi, mo kōrua 'ē-ē. Hai kōrua, pa'i, e take'a ena he parauti'a mau 'ā he 'āpōtoro a au.

³ He vānaŋa nei 'ā'aku mo te nu'u kī i te tano 'o i te ta'e tano o tā'aku aŋa pa he 'āpōtoro: ⁴ Te 'āpōtoro e tano rō 'ā mo no-no'i hai me'e mo kai 'e hai me'e mo unu, ⁵ 'e mo ma'u 'i muri i a rāua i te rāua vi'e [kiri-

tiano], pa he me'e aña e Tefa, e te n̄a taina era o Ietū 'e e te tētahi 'āpōtoro. ⁶ ʔPē nei hō te kī o kōrua: ko māua ko Verenāvē mau nō te me'e mo ta'e hā'ū'ū mai e te nūna'a taŋata [haka moe i te mana'u] 'i ruŋa i a Ietū?

⁷ ʔKo ai hō te kope aña pa he va'ehau 'auhau i a ia 'ā? ʔKo ai te kope 'oka vino ta'e kai i tā'ana vino 'oka? 'E ʔko ai te kope hāpa'o vato-vato ta'e unu i te ū o tā'ana vato-vato ana tatau? ⁸ 'Ina kōrua ko mana'u: te me'e nei he me'e taŋata mau nō; e kī tako'a rō 'ana, pa'i, e [te haka tere iña era 'a Mōtē]. ⁹ E pāpa'i rō 'ana 'i ruŋa i rā puka pē nei ē: «'Ina ko here te ŋutu o te 'uei tiŋi-tiŋi tariko». Ta'e te 'Atua i kī ai i te me'e nei e mana'u 'ā 'i ruŋa i te 'uei; ¹⁰ i mana'u ai mo tātou.

Te haka tere iña era 'a Mōtē, pa'i, i pāpa'i ai mo te tā-tou riva-riva. Te aura'a: te kope 'ārote i te henua 'e te kope tiŋi-tiŋi i te karu tariko e aña 'ā i te rāua aña koia ko mana'u e ai tako'a rō to rāua o rā kai 'oka era. ¹¹ A mātou ko 'oka 'ana i te me'e o te [Vārua Maitai] 'i roto i te kōrua māhatu. 'E ki te kōrua kī, ʔe ko tano a mātou mo no-no'i atu e tahi me'e ki a kōrua? ¹² Mo ai e tano rō 'ā mo hā'ū'ū o kōrua ki te tētahi, 'ata hau rō atu ia i te tano mo hā'ū'ū mai ki a mātou. 'E, ka ai atu pē ira, 'ina 'ā a mātou kai no-no'i atu 'ā e tahi me'e. Te me'e aña e mātou he ha'aoroma'i i te ta'ato'a nō 'ati 'o ta'e haŋa te nu'u mo haka roŋo i te roŋo riva-riva o ruŋa i te [Kiritō].

¹³ A kōrua e 'ite rō 'ana: te nu'u aña mo te [Kona Ha'amuri 'Atua] mai ira e rava'a era i te me'e mo rāua mo kai. Te aura'a: te kope aña 'i te kona tūtia 'animare e kai era hai kiko o rā tūtia. ¹⁴ Pē ira te kope haka 'ite o ruŋa i te [roŋo riva-riva o te 'Atua]. 'Ā'ana mau 'ā, pa'i, i kī: hai rā me'e ana rava'a mo kai. ¹⁵ 'E, ka ai atu e tano rō 'ana a au mo no-no'i atu, 'ina e tahi ō'oku mahana i no-no'i atu ki a kōrua, 'e ta'e a au e pāpa'i atu ena mo va'ai mai o kōrua e tahi me'e. Mo va'ai mai o kōrua hai tara, e ko tano haka 'ou a au mo kī pē nei ē: e haka 'ite nei a au i te roŋo o te 'Atua ta'e e 'auhau mai, 'e i hau rō atu i te tano mō'oku mo mate 'i te maruaki ki te ta'e kī haka 'ou pē ira.

¹⁶ Ta'e he me'e mo te'o-te'o e haka 'ite e oho nei o ruŋa i te roŋo o te 'Atua; he me'e mau 'ā mo aña e au. 'E, ʔko te 'aroha mo ta'e aña ō'oku pē ira! ¹⁷ 'Āhani hai mana'u mau 'ā ō'oku e aña nei, he tano ia mo 'auhau mai. 'E, mo ai he me'e mau 'ā 'ā'aku mo aña, e ha'aturā 'ana ia a au ki te me'e kī mai e te 'Atua. ¹⁸ 'E i ai era pē nei, te 'auhau mō'oku he koa o te haka 'ite o te oho i te roŋo riva-riva o te 'Atua ta'e e 'auhau mai, te aurā'a, 'ina e tahi 'ā'aku me'e no-no'i atu, ka ai atu e tano rō 'ana a au mo aña pē ira.

¹⁹ A au ka ta'e 'ekaravo o te kope e tahi, ko haka 'ekaravo 'ana au i a au ki te ta'ato'a mo 'ata rahi o te taŋata haka moe i te mana'u 'i ruŋa i a Ietū. ²⁰ E noho nei a au 'i roto i te [hūrio], he haka tere a au i a au pa he hūrio, ki rava'a ai mo haka huri i te rāua mana'u ki ruŋa i a Ietū; te aura'a: mo hāpī ō'oku i te nu'u ma'u i te haka tere iña 'a Mōtē, e haka tere tako'a a au i a au pē rāua, ka ai atu e 'ite rō 'ana a au: ta'e hai haka tano

ki te haka tere iña era o rāua e tano nei a au ki te mata o te 'Atua. ²¹ 'E mo ai ō'oku 'i roto i te nu'u ta'e he hūrio ta'e ma'u i te haka tere iña 'a Mōtē, he haka tere tako'a a au i a au pē rāua, ki rava'a ai i te rāve'a mo haka huri i te mana'u ki ruŋa i a Ietū. Ka ai atu pē ira, ta'e a au e ta'e ha'atura 'ā ki te roŋo o te 'Atua; e haka tano e oho 'ana i te roŋo o te Kiritō. ²² 'E 'i te hora ō'oku 'i roto i te nu'u kai hio-hio 'ā te rāua haka moe iña i te mana'u 'i ruŋa i a Ietū, he haka tere tako'a a au i a au pē rāua, mo haka hio-hio i te rāua mana'u 'i ruŋa i a Ietū. Te roa: e haka tere nei a au i a au pa he ta'ato'a nō, he rāve'a e tahi mo haka e'a i te tētahi o rāua mai roto i te ūtu'a o te hara 'e mo rava'a i te ora 'āpī 'ina he hope'a ra'a va'ai e te 'Atua. ²³ E aña nei a au i te me'e ta'ato'a nei mo rahi mo oho o te nu'u haka moe i te rāua mana'u 'i ruŋa i te [roŋo riva-riva o ruŋa i a Ietū], 'e mo ai i a au 'e i te tētahi nu'u te me'e hōrea mai era e te 'Atua.

²⁴ Ko 'ite 'ana a kōrua: 'i te 'ā'ati tahuti, ta'ato'a e tahuti ena, 'e ki te kope mau nō e tahi e topa ena te me'e va'ai 'o te tu'u ra'e. Pē ira kōrua ana me'e 'i te ara o te 'Atua: e haka 'uhu e oho mo aña i te me'e haŋa o te 'Atua, pa he kope haka 'uhu mo rē i te 'ā'ati, ki topa atu ai ki a kōrua te me'e va'ai e ia. ²⁵ Te nu'u 'ā'ati e hāpa'o rō 'ana i a rāua mo te hora o te 'ā'ati. E aña ena pē ira mo rē i te hei, 'e rā hei e hope'a era he mae-mae. 'E, a tātou e aña nei mo rava'a i te me'e te hauha'a e ko kore ki te hora hope'a. ²⁶ 'O ira a au e aña nei i tā'aku aña pa he kope 'ā'ati te me'e mana'u mau nō he tu'u ki te kona haka mao o te 'ā'ati, 'e, tako'a, pa he kope moto 'ina he haka māu'a i tō'ona rima ana ava ki te rua. ²⁷ 'Ina a au he ha'ati'a mo haka tere mai i a au e tō'oku hakari; 'ā'aku te haka tere 'o viri a au ki roto i te me'e ta'e tano pohe e tō'oku hakari 'e 'o ta'e rava'a e au, e te kope hāpī i te rua, i te me'e va'ai e te 'Atua.

Ki te 'Atua mau nō tātou ana ha'amuri

10 E te taina, 'ina ko rehu te me'e topa era ki te tā-tou tupuna: ta'ato'a o te nu'u nei i haka tika rō e te 'Atua hai raŋi e tahi, ta'ato'a i haka e'a rō ki te rua pā'iña o te vai era ko Vaikava Mea-mea. ² Hai n̄a me'e nei i tu'u ai pa he me'e: ko [papatito] tahi 'ana a rāua pa he nu'u hāpī 'a [Mōtē]. ³ 'E ta'ato'a i va'ai rō e te 'Atua hai me'e mo kai ⁴ 'e i haka unu rō hai vai haka e'a mai roto i te mā'ea. Te mā'ea nei ko Ietū hokorua i a rāua 'i te ara. ⁵ 'E, ka ai atu pē ira, 'ina he 'Atua kai koa mo te rahi ra'a o te nu'u nei 'i te me'e era he hara nō te aña o rāua. 'O ira i mā-mate ai 'i te kona 'one ta'e noho taŋata.

⁶ Te me'e topa era ki a rāua e to'o pa he hāpī mo tā-tou, 'o haŋa ki te me'e ta'e tano, pa he haŋa iña era o rāua. ⁷ 'Ina ko ha'amuri kōrua ki te 'ītoro, pa he me'e i aña e rāua. E kī rō 'ana, pa'i, 'i ruŋa i te [Pāpa'i Mo'a]: «He noho ananake, he kai 'e he unu, 'e i oti era he e'a ki ruŋa, he ha'amuri hai 'ori ki te 'ītoro». ⁸ 'Ina tātou ko moe i te vi'e i te taŋata ta'e he vi'e 'o he kenu hāipo-ipo, pa he me'e aña e te tētahi o te nu'u era. 'I te aña o

rāua i te me'e nei i mā-mate ai e piti 'ahuru mā toru ta'utini taŋata 'i te mahana mau nō e tahi. ⁹ 'E 'ina tā-tou ko haka 'atu i te [Kiritō], 'ina ko u'i 'ātā ki hē tō'ona roa mo ha'aoroma'i i te tātou hara, pa he me'e aŋa e te tētahi o te nu'u era. He aŋa i te me'e nei i mā-mate ai i ŋau e te kōreha veneno. ¹⁰ 'Ina tako'a ko hēŋu'i-ŋu'i mo te 'Atua, pa he me'e aŋa e te tētahi o te nu'u era. He aŋa o te nu'u era i te me'e era i tiŋa'i ai e te merahi o te mate.

¹¹ Te me'e ta'ato'a topa era ki te tupuna e to'o pa he hāpī mo tātou. 'E te ŋā me'e nei ko pāpa'i 'ana 'i ruŋa i te Pāpa'i Mo'a mo 'ite o te nu'u noho o te hora nei hāhine ki te pa'o iŋa o te ao: te 'Atua e haka ūtu'a rō i te nu'u aŋa i te me'e tu'u pē nei. ¹² 'O ira, te kope mana'u e haka moe riva-riva rō 'ana a ia i te mana'u 'i ruŋa i a Ietū e u'i 'o hara. ¹³ E mana'u tātou: te me'e haka 'atu i a tātou mo hara ko te me'e ena 'ā e haka 'atu ena i te ta'ato'a nō taŋata mo hara. 'Ina ko rehu 'i te hora o te haka 'atu: te 'Atua 'ina e ko ta'e haka tano i tā'ana me'e kī. Ko kī 'ana, pa'i: 'ina e ia e ko ha'ati'a mo haka 'atu mai i a tātou hai me'e e ko rava'a e tātou mo ha'aoroma'i, 'e, tako'a, e va'ai rō mai e ia i te rāve'a mo e'a o tātou 'ina kai hara mai rā me'e era mo haka 'atu mai.

¹⁴ 'O ira, e tō'oku taina haŋa rahi ē, e u'i kōrua 'o ha'amuri ki te 'ītoro. ¹⁵ A kōrua he nu'u 'ite mo haka topa riva-riva i te mana'u; mo kōrua mau 'ā e u'i hoki e tano rō 'ā 'o e ta'e tano rō 'ā tā'aku vānaŋa pāpa'i atu ena. ¹⁶ Hora ena o tātou o te nu'u [haka moe i te mana'u] 'i ruŋa i a Ietū e piri ena mo haka mana'u o ruŋa i tō'ona mate, e ai rō 'ana te tātou me'e unu, 'e mo rā me'e e māuru-uru nei tātou ki te 'Atua. He tāpa'o ko ma'itaki 'ana tātou 'i te toto o te Kiritō. 'E te haraoa mo-more kai e tātou he tāpa'o pē nei ē: mo tātou tako'a te me'e riva-riva rava'a hai mate era o te Kiritō. ¹⁷ Mai te haraoa mau nō e tahi e kai ena tātou ta'ato'a, he tāpa'o pē nei ē: a tātou, te nu'u ta'ato'a 'a Ietū, he hakari mau nō e tahi.

¹⁸ Te itaraera kai i te 'animare tūtia ki te 'Atua, e ha'amuri 'ana ki te 'Atua. ¹⁹ Mo ai pē ira, ōko tū me'e 'ana hō mo te nu'u kai i te kai tūtia ki te 'ītoro? 'Ina. Te 'ītoro, pa'i, 'e te kai tūtia ki a ia 'ina e tahi ō'ona hauha'a. ²⁰ Te 'ati nō, hora ena e tūtia ena ki te 'ītoro, e tūtia 'ana ki te tātane, ta'e ki te 'Atua, 'e 'ina a au kai haŋa mo ai e tahi me'e o kōrua o te tātane. ²¹ E ko tano, pa'i, a au mo unu 'e mo kai i te me'e haka mana'u i te mate o te tātou Pū'oko Haka Tere ko Ietū Kiritō 'e, 'i ruŋa 'ā, mo unu 'e mo kai i te me'e tūtia ki te tātane. ²² ōE haŋa 'ana hō tātou mo haka mākota i te tātou Pū'oko Haka Tere? 'Ina ko rehu: i hau rō atu a ia i te pūai ki a tātou.

Te kōrua me'e aŋa, e aŋa mo koa o te 'Atua

²³ He parauti'a te vānaŋa ena e kī ena: «'Ina he me'e ta'e ha'ati'a i te taŋata mo aŋa i tā'ana me'e haŋa». Ka ai atu pē ira, ta'e ta'ato'a me'e he me'e riva-riva mo te taŋata, 'e ta'e ta'ato'a me'e he me'e haka hio-hio i te mana'u 'i ruŋa i a Ietū. ²⁴ 'Ina koe ko mana'u ki te me'e

mo te riva-riva mau nō ō'ou; e mana'u ki te me'e mo te riva-riva o te tētahi.

²⁵ E kai kōrua i te me'e ta'ato'a nō ho'o o roto i te hare ho'o kiko 'ina ko 'ui hoki ko tūtia 'ā 'o 'ina kai tūtia ki te 'ītoro, ²⁶ 'i te me'e era te henua 'e te me'e ta'ato'a o ruŋa o te 'Atua.

²⁷ Mo kī atu o te kope e tahi ta'e haka moe i te mana'u 'i ruŋa i a Ietū mo oho ō'ou ki tō'ona hare mo kai 'e he oho koe, e kai i te me'e nō era ka va'ai atu era, 'ina ko 'ui hoki he kai tūtia ki te 'ītoro 'o he kai ta'e tūtia.

²⁸ 'E, mo kī atu e te kope e tahi o ira: «Te kiko nei ko tūtia 'ā ki te 'ītoro», mo te riva-riva o te kope era, 'ina koe ko kai, koi'ite mō'ona 'e mo te tētahi nu'u o ira te kai i rā kiko he hara. ²⁹ E kī atu ena a au i te me'e nei ta'e o ruŋa i te mana'u o kōrua kī atu he aha te me'e tano 'o ta'e tano mo aŋa, o ruŋa i te mana'u o tētahi a au e kī atu ena.

E kī rō pēaha te kope e tahi: «ŌHe aha a au ana ta'e aŋa i te me'e e ha'ati'a rō 'ana mo aŋa 'o te ai nō mo te rua he hara, 'i te ta'e aŋi-aŋi riva-riva i te me'e o te 'Atua?». ³⁰ 'E e kī tako'a rō pēaha: «Mo māuru-uru a au i te kai ki te 'Atua, ōhe aha ia te nu'u ana tuhi mai i tō'oku hape 'o te kai ō'oku i te me'e ko māuru-uru era 'ā e au ki te 'Atua?».

³¹ E te taina, te tano mau: te me'e ta'ato'a ena o kōrua mo aŋa, 'ātā mo kai 'e mo unu, e aŋa tahi mo koa o te 'Atua 'e mo 'ata mo'a o te taŋata i a ia. ³² 'Ina kōrua ko aŋa i te me'e mo haka riri i te rua, ka ai he [hūrio], he ta'e hūrio 'o he nu'u haka moe i te mana'u 'i ruŋa i a Ietū. ³³ E me'e kōrua pē au. Te me'e aŋa, pa'i, 'ā'aku he u'i i te rāve'a mo haka koa i te ta'ato'a. 'Ina a au he u'i i te me'e mo tō'oku riva-riva nō, mo te riva-riva tako'a o te rua a au e u'i nei, mo e'a o rāua mai roto i te ūtu'a o te hara 'e mo rava'a i te ora 'āpī 'ina he hope'a ra'a va'ai e te 'Atua.

11 E te taina, e haka tere kōrua pē au, pa he haka tere iŋa nei ō'oku i a au pa he [Kiritō].

'I te hora e taka-taka 'ā mo pure ki te 'Atua

² E koa rō 'ana a au 'o te rava mana'u mai o kōrua ki a au 'e, tako'a, 'o te ma'u 'o te oho nō o kōrua i te hāpī haka 'ite atu era e au. ³ E haŋa rō 'ana a au mo aŋi-aŋi riva-riva e kōrua i te me'e nei: te Kiritō he pū'oko haka tere o te ŋāŋata, te ŋāŋata he pū'oko haka tere o te ŋā vi'e, 'e te 'Atua he pū'oko haka tere o te Kiritō.

⁴ Mo pu'a o te taŋata i tō'ona pū'oko 'i te hora pure 'o 'i te hora haka 'ite i te roŋo va'ai ki a ia e te 'Atua, e ta'e mo'a 'ana i te Kiritō. ⁵ 'E te vi'e, mo ta'e pu'a i tō'ona pū'oko 'i te hora pure 'o 'i te hora haka 'ite i te roŋo va'ai ki a ia e te 'Atua, e haka ha'amā 'ā i tā'ana kenu pa he me'e: ko varu māreŋo 'ana i te pū'oko.

⁶ Mo ta'e pu'a o te vi'e i tō'ona pū'oko, i hau 'i te tano mo varu māreŋo i a ia. 'E mo mana'u o te vi'e he me'e ha'amā e tahi te varu i te pū'oko 'o te varu māreŋo i a ia, e pu'a ia te pū'oko.

⁷ Te taŋata 'ina ko pu'a i te rāua pū'oko. 'I ruŋa i a ia e take'a ena te pūai 'e te nui-nui o te 'Atua. 'E te me'e take'a mai te vi'e he pūai 'e he hōnui o te taŋata. ⁸ Te

taŋata ta'e mai te vi'e i aŋa ai; he vi'e te me'e i aŋa mai te taŋata. ⁹ E te taŋata ta'e mo hokorua o te vi'e i aŋa ai; he vi'e te me'e i aŋa mo hokorua o te taŋata. ¹⁰ O ira te vi'e e pu'a i tō'ona pū'oko hai kahu pa he tāpa'o mo take'a 'ātā e te merahi e ha'atura rō 'ā ki te kenu.

¹¹ I te haka tere iŋa o tātou o te nu'u [haka moe i te mana'u] 'i ruŋa i a Ietū, te taŋata 'e te vi'e e ai ena mo hā'ū'ū ki a rāua, te vi'e ki te taŋata 'e te taŋata ki te vi'e. ¹² He parauti'a te me'e ena: te vi'e ra'e i aŋa ai mai te taŋata, 'e he parauti'a tako'a, te taŋata e poreko ena mai roto i te vi'e. 'E te me'e ta'ato'a mai te 'Atua e ai ena.

¹³ E te taina, mo haka topa riva-riva i te mana'u he 'ite e kōrua pē nei ē: e ko tano te ŋā vi'e mo pure ki te 'Atua 'ina he pu'a i te rāua pū'oko. ¹⁴ Ka mana'u kōrua: ki te tātou haka tere iŋa te haka roa-roa o te taŋata i tō'ona rau'oho pa he vi'e he me'e ha'amā e tahi. ¹⁵ E mo te vi'e he me'e nehe-nehe e tahi te rau'oho ro-roa va'ai ki a ia e te 'Atua pa he me'e mo 'api o tō'ona pū'oko. ¹⁶ Mo mana'u o te kope e tahi e hape rō 'ana tā'aku me'e vānaŋa atu ena, he kī atu a au: he me'e nei te me'e hāpī e mātou e te ['āpōtoro], 'e he me'e ma'u e te nu'u haka moe i te mana'u 'i ruŋa i a Ietū 'i te kona ta'ato'a.

Te kai haka mana'u ki te mate o Ietū (Māteo 26.26-29; Marko 14.22-25; Ruka 22.14-20)

¹⁷ Te me'e nei 'ā'aku ka pāpa'i atu ena ta'e mo koa o kōrua. I 'ite ai a au e taka-taka ena kōrua mo ha'amuri ki te 'Atua, he me'e rake-rake te me'e ai, ta'e he me'e riva-riva. ¹⁸ Te me'e 'ā'aku i ŋaro'a: e taka-taka ena a kōrua, he tātake nō te aŋa 'e he haka topa-topa kē-kē, 'e ki tō'oku mana'u e ai rō 'ā te parauti'a o te vānaŋa nei. ¹⁹ E topa-topa kē-kē mau 'ā pēaha kōrua ki take'a ai ko ai te kope tano ki te mata o te 'Atua! ²⁰ E taka-taka ena, pa'i, kōrua mo kai i te kai haka mana'u i te mate o te tātou Pū'oko Haka Tere, e hope'a ena ta'e toe mo mana'u ki a ia, ²¹ 'i te me'e era 'i te hora o te kai, e ai rō 'ā te nu'u kai ra'e, 'ina he tiaki ki te tētahi nu'u. Pē ira e ai ena te nu'u oho mai te kona taka-taka o kōrua e maruaki rō 'ā, 'e tētahi e ta'ero rō 'ana. ²² Ka kī 'ō 'ina kōrua hare mo kai 'e mo unu 'i ira? He aha kōrua e ta'e mo'a ena i te nūna'a taŋata haka moe i te mana'u 'i ruŋa i a Ietū? He aha e haka ha'amā ena i te nu'u 'ina rāua me'e? He aha tā'aku me'e mo kī atu? He koa 'ana a au? 'Ina a au kai koa.

²³ E te taina, te me'e nei 'ā'aku ka kī atu ena mai te tātou Pū'oko Haka Tere mau 'ā i 'ite mai ai, 'e i haka 'ite rō atu e au ki a kōrua: A Ietū, te tātou Pū'oko Haka Tere, 'i te pō ho'o mau era 'ā i a ia, i to'o ai i te haraoa e tahi ki tō'ona rima, ²⁴ 'e, ki oti te māuru-uru ki te 'Atua, he mo-more he kī: «Te me'e nei he hakari ō'oku ka mate ena mo te riva-riva o kōrua. E aŋa i te me'e nei pa he me'e mo mana'u ki a au». ²⁵ E pē ira tako'a 'ana, i oti era te kai, he to'o i te hapaina vino ki tō'ona rima 'e he kī: «Te me'e nei he toto ō'oku ka pariŋi ena mo kōrua, he tāpa'o o te [haka tere iŋa 'āpī o te 'Atua ananake ko te taŋata]. E aŋa i te me'e nei pa he me'e

mo mana'u ki a au». Pē ira i kī ai e Ietū. ²⁶ O ira, e te taina ē, 'ina ko rehu: ta'ato'a hora kai o kōrua i te haraoa 'e unu i te vino pa he me'e mo mana'u ki a ia, e haka 'ite e oho 'ā, 'ātā ki te hoki iŋa mai o te tātou Pū'oko Haka Tere, o ruŋa i tō'ona mate iŋa mo tātou.

Pē hē mau te kai haka mana'u ki te mate o Ietū

²⁷ Kope nō era mo kai i te haraoa 'e mo unu i te vino haka mana'u i te mate o te tātou Pū'oko Haka Tere 'e 'ina he mo'a 'e 'ina he mana'u i te ha'aaura'a parauti'a o rā me'e, e hara 'ana ki te hakari 'e ki te toto mau era 'ā o te tātou Pū'oko Haka Tere. ²⁸ O ira, 'i ra'e ki te kai 'e ki te unu i rā me'e, e haka topa te mana'u hoki e tano mau rō 'ana tu'u māhatu ki te 'Atua. ²⁹ E mo kai 'e mo unu tahaŋa nō 'ina kai mana'u hia, e kimi 'ana koe i to'u ūtu'a. ³⁰ O te aŋa i te me'e nei me'e rahi o kōrua ko māui-ui 'ā, ko rehe-rehe 'ana te hakari 'e tētahi ko mā-mate 'ā. ³¹ Mo haka topa riva-riva i te tātou mana'u 'i ra'e ki te kai i rā kai, e ko haka ūtu'a mai e te 'Atua. ³² E mo haka ūtu'a mai, he me'e mo aŋi-aŋi e tā-tou, 'o haka ūtu'a rō i a tātou 'i muri i te nu'u o te ao ta'e haka moe i te mana'u 'i ruŋa i a ia.

³³ O ira, e te taina ō'oku ē, hora taka-taka o kōrua mo kai mo mana'u ki a Ietū, e tiaki ki te tētahi nu'u. ³⁴ E mo maruaki o te kope e tahi o roto i a kōrua, ka kai rō 'ai 'i tō'ona hare, 'o haka ūtu'a i a kōrua e te 'Atua, he ta'e tano o te kōrua haka tere iŋa 'i te hora haka taka-taka mo mana'u i te mate o te tātou Pū'oko Haka Tere.

'E te tētahi me'e 'ui mai era e kōrua, ki tu'u atu a au ana haka 'ite atu.

Te me'e va'ai e te [Vārua Maitai] mo aŋa i te aŋa o te 'Atua

12 E te taina, e haŋa rō 'ana a au mo aŋi-aŋi riva-riva e kōrua o ruŋa i te me'e va'ai mai e te Vārua Maitai ki a tātou, ki te nu'u [haka moe i te mana'u] 'i ruŋa i a Ietū, mo aŋa i te aŋa o te 'Atua.

² A kōrua ko 'ite riva-riva 'ana: hora era kai haka moe 'ana i te mana'u 'i ruŋa i a Ietū, e haka rē nō 'ana a kōrua i a kōrua mo ha'amuri ki te 'Itoro, ki te me'e re'o kore. ³ O ira e haŋa 'ana a au mo 'ite o kōrua: 'ina e tahi kope haka tere e te Vārua Maitai tohu i a Ietū, 'e 'ina e tahi kope ta'e o te Vārua Maitai te haka tere kī: a Ietū he Pū'oko Haka Tere ō'ona.

Rauhuru te me'e va'ai mai e te Vārua Maitai

⁴ I roto i a tātou i te nūna'a taŋata haka moe i te mana'u 'i ruŋa i a Ietū e ai rō 'ā huru kē huru kē te me'e va'ai mai mo aŋa i te aŋa o te 'Atua. Ka ai atu pē ira, o te kope mau nō e tahi te va'ai mai, o te Vārua Maitai. ⁵ E ai tako'a rō 'ā rauhuru rāve'a mo tāvini. Ka ai atu pē ira, ki te kope mau nō e tahi e tāvini ena, ki a Ietū Kiritō, he Pū'oko Haka Tere o tātou. ⁶ E, huru kē huru kē te me'e aŋa e tātou hai pūai o te 'Atua. Ka ai atu pē ira, o te kope mau nō e tahi te va'ai mai i rā pūai, o te 'Atua. ⁷ Hai me'e va'ai mai mo aŋa i te aŋa o

te 'Atua e take'a ena: o te Vārua Maitai te haka tere i a tātou. 'E nei nā me'e i va'ai mai ai ki a tātou e tahi e tahi mo te riva-riva o te nu'u ta'ato'a haka moe i te mana'u 'i ruŋa i a Ietū.

⁸ O te Vārua Maitai te va'ai ki te tētahi taŋata i te pūai mo vānaŋa i te vānaŋa mārama-rama; 'e o te Vārua Maitai tako'a 'ā te va'ai ki te rua i te pūai mo haka 'ite i te me'e hōhonu o te 'Atua haka 'ite e ia mau 'ā ki rā taŋata. ⁹ O te Vārua Maitai te va'ai ki te tētahi taŋata i te pūai mo 'ata haka moe i tō'ona mana'u 'i ruŋa i a Ietū, 'e ki te tētahi haka 'ou atu i te pūai mo haka ora i te māui-ui. ¹⁰ E ai rō 'ā te nu'u i a rāua te pūai va'ai e te Vārua Maitai mo aŋa i te mana, 'e te nu'u i a rāua te pūai mo vānaŋa i te me'e haka 'ite e te 'Atua. Ki te tētahi nu'u i va'ai ai e te 'Atua i te pūai mo 'ite hoki te me'e vānaŋa e te rua he roŋo mau 'ā o te 'Atua 'o he me'e o te tātane. 'E ki te tētahi haka 'ou nu'u i va'ai ai i te pūai mo vānaŋa hai 'arero kē ta'e 'ite e rāua, 'e ki te tētahi haka 'ou atu te pūai mo haka 'ite i te aura'a o te vānaŋa kī hai rā 'arero. ¹¹ O te Vārua Maitai mau 'ā e tahi mau nō te va'ai i te nā me'e ta'ato'a nei, 'e 'ā'ana te va'ai ki te kope nō era 'ā'ana i haŋa.

¹² Te hakari, ka ai atu e rahi rō 'ā te kona, he me'e mau nō e tahi. Pē ira tako'a te Kiritō koia ko te nu'u ta'ato'a haka moe i te mana'u 'i ruŋa i a ia he me'e e tahi mau nō. ¹³ Ta'ato'a o tātou ko [papatito] tahi 'ana hai tū Vārua 'ā mo riro he hakari mau nō e tahi, ka [hūrio], ka ta'e hūrio, ka 'ekaravo, 'e ka ta'e 'ekaravo. 'E ki te ta'ato'a o tātou ko va'ai mai 'ana i tū Vārua Maitai 'ā.

¹⁴ Te hakari me'e rahi nō atu kona, ta'e e tahi mau nō. ¹⁵ Mo kī o te va'e pē nei ē: «'I te ta'e ai ō'oku he rima, ta'e ia a au he kona o te hakari», ta'e 'o te kī pē ira ana ta'e ai o te hakari. ¹⁶ 'E mo kī o te tariŋa pē nei ē: «'I te ta'e ai ō'oku he mata, ta'e a au o te hakari», ta'e 'o te kī tako'a pē ira ana ta'e ai o te hakari. ¹⁷ 'Āhani te hakari ta'ato'a he mata, e ko ŋaro'a e tātou te vānaŋa. 'E 'āhani i ai he tariŋa, e ko ŋaro'a e tātou te hau'a.

¹⁸ Te 'Atua me'e rahi nō atu kona o te hakari i aŋa ai 'e i haka rē ai i rā nā kona 'i te kona mana'u e ia e tano rō 'ā. ¹⁹ 'Āhani e tahi mau nō kona o te hakari, ta'e ia he hakari. ²⁰ Ka ai atu me'e rahi kona o te hakari, te hakari he me'e e tahi mau nō.

²¹ Te mata e ko tano mo kī ki te rima: «'Mo aha koe 'ā'aku?», 'e mo kī tako'a pē ira e te pū'oko ki te va'e.

²² Te parauti'a, te nā kona ena o te hakari e tu'u rō 'ana pa he kona rehe-rehe, ta'e hauha'a, he kona hope'a o te hauha'a mo te hakari. ²³ Te kona o te hakari mana'u e tātou e ko tano mo take'a, he 'api riva-riva hai kahu; ²⁴ 'e te kona 'ina he 'ati mo take'a, 'ina he hāpa'o pē ira. Te 'Atua ko popo 'ana i te kona ta'ato'a o te hakari 'i te rāua kona 'e ko va'ai mai 'ana ki a tātou i te haŋa mo mo'a 'e mo hāpa'o riva-riva i te kona mana'u e tātou 'ina e tahi hauha'a. ²⁵ I aŋa ai pē ira mo aŋa tahi o rā nā kona pa he me'e mau nō e tahi 'e mo hāpa'o i a rāua. ²⁶ E 'ati ena e tahi kona o te hakari, ta'ato'a nō kona o te hakari e ma'u ena i rā 'ati, 'e e mo'a ena, ta'ato'a nō e koa ena.

²⁷ Te me'e nei 'ā'aku e haŋa nei mo haka aŋi-aŋi atu: te nūna'a taŋata haka moe i te mana'u 'i ruŋa i a Ietū he hakari o te [Kiritō], 'e e tahi e tahi o te nu'u nei he kona o rā hakari koia ko tā'ana aŋa. ²⁸ 'E te me'e haŋa o te 'Atua mo te hakari nei: he nu'u mo ['āpōtoro], te ra'e; he nu'u mo vānaŋa i te me'e haka 'ite e ia, te rua; 'e te toru he ma'ori hāpī; tako'a he nu'u mo aŋa i te mana, he nu'u mo haka ora i te māui-ui, he nu'u mo hā'ū'ū ki te rua, he nu'u mo haka tika i te taŋata 'i te aŋa, 'e he nu'u mo vānaŋa i te 'arero kē ta'e 'ite e rāua. ²⁹ 'E ta'e ta'ato'a o te nu'u haka moe i te mana'u 'i ruŋa i a Ietū he 'āpōtoro, 'e he nu'u vānaŋa i te me'e haka 'ite e te 'Atua. Ta'e ta'ato'a he ma'ori hāpī 'e he nu'u aŋa i te mana. ³⁰ Ta'e ta'ato'a e ai rō 'ā te pūai mo haka ora i te māui-ui. 'E, tako'a, ta'e ta'ato'a e vānaŋa rō 'ā i te 'arero kē ta'e 'ite e rāua, 'e ta'e ta'ato'a e 'ite rō 'ana mo ha'aaura'a i te vānaŋa kī hai rā 'arero. ³¹ 'O ira, e haŋa tātou mo ai i a tātou te me'e hope'a o te hauha'a o te me'e va'ai e te Vārua Maitai mo aŋa i te aŋa o te 'Atua. 'E, hora nei, 'I a au he haka 'ite atu i te me'e 'ata hau rō atu i te hauha'a ki tū nā me'e ta'ato'a ena.

Te haŋa ki te rua i hau rō atu ki te me'e ta'ato'a

13 Mo vānaŋa ō'oku rauhuru 'arero o te ao nei, 'e 'ātā i te 'arero vānaŋa e te merahi, 'e 'ina o roto i a au te haŋa mo te rua, te me'e nō era 'ā'aku mo kī he pōŋeha nō atu e tahi pa he pahu e tinji-tinji 'ā.

² 'E mo vānaŋa ō'oku ki te nu'u i te me'e haka 'ite mai e te 'Atua, 'e mo aŋi-aŋi ō'oku i te me'e ta'ato'a, 'ātā i te me'e mana'u e te 'Atua mo aŋa ta'e haka 'ite mai 'i mu'a 'ā, 'e mo riva ō'oku mo haka tapa i te ma'uŋa mai tō'ona kona 'i te pūai o tō'oku haka moe iŋa i te mana'u 'i ruŋa i a Ietū, 'e 'ina o roto i a au te me'e he haŋa ki te rua, 'ina ia e tahi ō'oku hauha'a.

³ 'E mo tuha'a ō'oku ki te nu'u veve i te me'e ta'ato'a 'ā'aku, 'e 'ātā he va'ai a au i tō'oku hakari mo tutu 'i roto i te ahi, 'e 'ina a au he haŋa ki te rua, 'ina ia e tahi hauha'a o rā me'e.

⁴ Te kope haka tere i a ia hai haŋa parauti'a e 'ite rō 'ā i te ha'aoroma'i. A ia he taŋata riva, ta'e fil'i'i, ta'e te'o-te'o, ta'e mana'u i hau rō atu a ia ki te rua, ⁵ ta'e 'ite i te parau'ino; 'ina he 'ōhumu, 'ina he riri 'e 'ina he ma'u i te riri mo te rua ⁶ 'e, tako'a, 'ina he koa o ruŋa i te me'e ta'e tano. E koa ena 'i te me'e tano 'e 'i te me'e parauti'a.

⁷ Te kope haka tere i a ia hai haŋa e 'ite rō 'ā mo 'amo i te 'ati, e haka moe e oho rō 'ā i te mana'u 'i ruŋa i a Ietū, 'ina he haka tapa i tō'ona mana'u mai ruŋa i te 'Atua ki te hora hope'a 'e e 'ite rō 'ā mo ha'aoroma'i i te me'e ta'e tano aŋa e te rua ki a ia.

⁸ Te nā me'e ena he vānaŋa i te me'e haka 'ite e te 'Atua, he vānaŋa i te 'arero ta'e 'ite, 'e he 'ite o ruŋa i te me'e hōhonu o te 'Atua, e tano rō te mahana he ŋaro, 'e te me'e ena he haŋa e ko ŋaro ki te hora hope'a. ⁹ Ka ai atu 'i te hora nei e va'ai rō mai 'ana e te [Vārua Maitai] i te pūai mo vānaŋa i te me'e haka 'ite mai e te 'Atua, 'e i te pūai mo 'ite o ruŋa i te 'Atua, ko

te toe iŋa 'ana te me'e mo 'ite e tātou o ruŋa i a ia.
¹⁰ 'E, ki tu'u mai te kope ena 'ina ō'ona hape, he 'ite tahi e tātou, 'e he kore te ŋā me'e nei.

¹¹ Hora era ō'oku e ŋā poki nō 'ā, e vānaŋa era, e mana'u era 'e e haka topa era i te mana'u pa he ŋā poki 'ana; 'e hora nei ko pa'ari 'ā, ko haka rē atu 'ā e au i rā ŋā me'e. ¹² Te me'e 'ite o tātou 'i te hora nei o ruŋa i te 'Atua pa he me'e 'ehu-'ehu e tahi 'i roto i te hi'o; 'e, ka tano ena te mahana, he take'a riva-riva mai. Hora nei e ai rō 'ā te me'e ta'e aŋi-aŋi e au o ruŋa i a ia; 'e, e tano rō te mahana, he māhani a au i a ia, pa he māhani iŋa mai ō'ona i a au.

¹³ E toru me'e 'ina e ko kore ki te hora hope'a: he haka moe iŋa i te mana'u 'i ruŋa i te 'Atua, he ŋatu o te haŋu 'i ruŋa i tā'ana me'e hōrea mai era, 'e he haŋa ki te rua. 'E te me'e hope'a o te hauha'a o te ŋā me'e nei e toru he haŋa ki te rua.

He haka tere iŋa tano mo te ta'ato'a

14 'O ira, te me'e ra'e mo ai i a kōrua he haŋa ki te rua; 'e, tako'a, e haŋa ki te me'e va'ai e te [Vārua Maitai] mo aŋa i te aŋa o te 'Atua. 'E, o te ŋā me'e va'ai ena e te Vārua Maitai, te me'e 'ata hauha'a he vānaŋa i te me'e haka 'ite e te 'Atua hai 'arero aŋi-aŋi e te nu'u. ² Te kope ki a ia te me'e i va'ai ai he vānaŋa hai 'arero kē ta'e 'ite e ia ta'e ki te taŋata e vānaŋa ena; e vānaŋa 'ā ki te 'Atua, 'e 'ina he nu'u he aŋi-aŋi i tā'ana me'e kī. ³ 'E te kope ki a ia i va'ai ai i te me'e he vānaŋa i te me'e haka 'ite e te 'Atua e vānaŋa 'ana ki te nu'u mo haka pūai i te rāua haka moe iŋa i te mana'u 'i ruŋa i a Ietū, mo haka haŋu 'e mo haka koa i a rāua. ⁴ Te kope vānaŋa i te 'arero kē ta'e 'ite e ia mō'ona mau nō te riva-riva, 'e te kope vānaŋa i te me'e haka 'ite e te 'Atua, mo te nūna'a ta'ato'a o te taŋata [haka moe i te mana'u] 'i ruŋa i a Ietū te riva-riva.

⁵ Mo vānaŋa o kōrua ta'ato'a i te 'arero kē ta'e 'ite e kōrua, he koa a au. Te me'e nō, mo te riva-riva o te ta'ato'a, i hau rō atu 'i te tano te vānaŋa o kōrua i te me'e haka 'ite e te 'Atua hai 'arero mo aŋi-aŋi e te nu'u ki te vānaŋa i te 'arero kē ta'e 'ite e kōrua, mo kore o te kope mo ha'aura'a i rā vānaŋa. 'O ira 'ata hau rō atu tō'oku koa mo vānaŋa o kōrua i te me'e haka 'ite atu e te 'Atua.

⁶ E te taina: 'ina, pa'i, e tahi hauha'a mo oho atu ō'oku mo u'i i a kōrua 'e he vānaŋa atu hai 'arero kē ta'e 'ite e au 'e ta'e aŋi-aŋi e kōrua. I hau rō atu, pa'i, i te tano mo vānaŋa atu i te me'e haka aŋi-aŋi mai e te 'Atua, i te parauti'a ō'ona, i te vānaŋa haka 'ite mai e ia, 'e i te hāpī mo te kōrua riva-riva hai 'arero aŋi-aŋi e kōrua.

⁷ Pē ira tako'a te me'e haka taŋi e te taŋata pa he puhi 'e pa he *arpa*: mo ta'e tano o te rei iŋa, e ko aŋi-aŋi e te nu'u i te peho ka haka taŋi era. ⁸ 'E mo ta'e puhi riva-riva i te koneta 'i te hora o te tama'i, 'ina e tahi va'ehau mo haka rito i a ia mo te tama'i. ⁹ Pē ira tako'a a kōrua: mo ta'e vānaŋa hai 'arero 'ite e te taŋata, *zēpē hē* ia ana aŋi-aŋi i te kōrua me'e kī? iE vānaŋa 'ana ia a kōrua ki te tokerau!

¹⁰ Te parauti'a, me'e rahi 'arero e vānaŋa ena 'i te ao, 'e e ai rō 'ā te nu'u aŋi-aŋi i rā ŋā 'arero. ¹¹ Mo ta'e aŋi-aŋi e au i te 'arero vānaŋa e te kope e tahi, he tu'u a au pa he taŋata o te rua henua mo rā kope 'e a ia tako'a mō'oku. ¹² E tano rō 'ā, e te taina ē, te haŋa mo ai i a kōrua te me'e va'ai e te Vārua Maitai mo aŋa i te aŋa o te 'Atua. Te me'e nō, e ani ki a ia mo va'ai atu hai ŋā me'e ena mo hā'ū'ū ki te nu'u ta'ato'a haka moe i te mana'u 'i ruŋa i a Ietū mo pūai o te rāua mana'u 'i ruŋa i a ia.

¹³ Te kope ki a ia te me'e i va'ai ai he vānaŋa i te 'arero kē ta'e 'ite e ia e ani ki te 'Atua mo va'ai i te pūai mo ha'aura'a i tā'ana vānaŋa era. ¹⁴ Mo pure ō'oku hai 'arero kē ta'e 'ite e au, e pure 'ana a au i te me'e i haka pure mai e te Vārua Maitai, ta'e 'ō hai me'e i mana'u e au. ¹⁵ He aha ia te tātou me'e mo aŋa? He pure hai pūai o te Vārua Maitai, 'e he pure tako'a mo aŋi-aŋi e te ta'ato'a. He hīmene hai pūai o te Vārua Maitai, 'e he hīmene tako'a hai hīmene mo aŋi-aŋi e te ta'ato'a. ¹⁶ Mo ha'ahana-hana ō'ou ki te 'Atua hai 'arero va'ai atu e te Vārua Maitai, 'e he ŋaro'a e te kope e tahi, e ko riva te kope era mo hokorua atu 'i ta'a pure 'i te me'e era 'ina he aŋi-aŋi i ta'u vānaŋa.

¹⁷ Ka ai atu e riva rō 'ā ta'a pure mo māuru-uru ki te 'Atua, mo te rua 'ina e tahi hauha'a.

¹⁸ E māuru-uru rō 'ana a au ki te 'Atua 'o te ai 'ata rahi tō'oku vānaŋa 'i te 'arero kē ta'e 'ite e au ki a kōrua ta'ato'a. ¹⁹ Ka ai atu pē ira, 'i roto i te nu'u haka moe i te mana'u 'i ruŋa i a Ietū, i hau rō atu tō'oku haŋa mo kī e rima vānaŋa aŋi-aŋi e te nu'u mo hāpī i a rāua ki te kī e ho'e 'ahuru ta'utini vānaŋa hai 'arero kē.

²⁰ E te taina, ka haka rē te mana'u ŋā poki o ruŋa i te ŋā me'e nei. Mo haŋa o kōrua mo mana'u pa he ŋā poki, e mana'u ia pa he ŋā poki poreko iho mo te me'e ta'e tano. ²¹ E kī rō 'ā e te 'Atua 'i ruŋa i te [Pāpa'i Mo'a]:

«E vānaŋa rō a au ki te nu'u o te henua nei a roto i te haha o te nu'u o te rua henua 'e hai 'arero kē, 'e, ka ai atu pē ira, 'ina e ko haka roŋo mai».

²² Te vānaŋa hai 'arero kē ta'e 'ite he me'e mo haka take'a ki te nu'u ta'e haka moe i te mana'u 'i ruŋa i a Ietū i te pūai o te 'Atua. 'E te vānaŋa i te me'e haka 'ite e te 'Atua hai 'arero aŋi-aŋi e te taŋata he me'e mo te riva-riva o te nu'u haka moe i te mana'u 'i ruŋa i a Ietū, ta'e mo te nu'u ta'e haka moe i te mana'u 'i ruŋa i a ia.

²³ Pē nei te aura'a: mo ai ko taka-taka 'ā a kōrua mo ha'amuri i te 'Atua, 'e he tu'u atu ki roto i a kōrua te nu'u ta'e haka moe i te mana'u 'i ruŋa i a Ietū 'e te nu'u ta'e aŋi-aŋi o ruŋa i te ŋā me'e nei, 'e he ŋaro'a i a kōrua ta'ato'a e vānaŋa 'ā 'i te 'arero huru kē huru kē, he mana'u ko ma'a-ma'a tahi 'ana kōrua. ²⁴ 'E mo vānaŋa tahi o kōrua i te vānaŋa haka 'ite atu e te 'Atua hai 'arero aŋi-aŋi e te taŋata 'e he tu'u atu ki muri i a kōrua te nu'u ta'e haka moe i te mana'u 'i ruŋa i a Ietū 'e te nu'u ta'e aŋi-aŋi o ruŋa i te ŋā me'e nei, ka ŋaro'a

era i te kōrua vānaŋa, he haka topa riva-riva i te mana'u: a rāua he nu'u hara 'e e ai rō 'ā te ūtu'a mo rāua mo ta'e huri o te mana'u ki te 'Atua,²⁵ 'e, tako'a, te me'e ta'ato'a ta'e tano o roto i te rāua māhatu ta'e 'ite e te nu'u e 'ite tahi rō 'ā e te 'Atua. 'I rā hora he [huri te mana'u ki te 'Atua], he tū-turi 'e he ha'amuri ki a ia koia ko anjī-anjī: he parauti'a mau 'ā te 'Atua 'i roto i a kōrua.

Hai tī-tika ana ha'amuri ki te 'Atua

²⁶ Tā'aku kī, e te taina ē: 'i te hora taka-taka o kōrua mo ha'amuri ki te 'Atua, e tano nō te tētahi nu'u mo hīmene i te hīmene ha'ahana-hana, 'e te tētahi atu mo hāpī 'o mo haka 'ite i te me'e haka anjī-anjī e te 'Atua, 'o mo vānaŋa hai 'arero kē ta'e 'ite e ia, 'o mo kī i te ha'aaura'a o rā vānaŋa. Te me'e ta'ato'a nei e anjā mo te riva-riva o te nūna'a ta'ato'a o te taŋata haka moe i te mana'u 'i ruŋa i a Ietū. ²⁷ Hora era mo vānaŋa i te 'arero kē ta'e 'ite, hoko rua 'o hoko toru mau nō ana vānaŋa 'e e tahi e tahi, 'e e ai tako'a te kope mo ha'aaura'a i rā vānaŋa. ²⁸ 'E mo kore o te kope mo ha'aaura'a, 'ina ko vānaŋa hai 'arero kē ta'e 'ite 'i mu'a o te nūna'a taŋata ta'ato'a haka moe i te mana'u 'i ruŋa i a Ietū. Hoko tahi nō ana vānaŋa i rā vānaŋa 'e mo te 'Atua nō.

²⁹ Pē ira tako'a 'ana, mo ai o te nu'u vānaŋa i te me'e haka 'ite e te 'Atua, hoko rua 'o hoko toru ana vānaŋa, 'e mo te tētahi e u'i hoki rā vānaŋa o te 'Atua mau 'ā. ³⁰ 'E mo haka 'ite e te 'Atua e tahi me'e ki te kope e noho rō 'ā 'i rā kona, te kope vānaŋa he mou mo vānaŋa o rā rua kope era. ³¹ Mo anjā o kōrua pē ira, ta'ato'a nō ka ai era te hora mo vānaŋa i te me'e haka anjī-anjī e te 'Atua, he 'ite te ta'ato'a 'e he 'ata pūai te mana'u 'i ruŋa i a Ietū. ³² Te kope vānaŋa i te me'e haka 'ite e te 'Atua e 'ite mo tiaki ki tō'ona hora, 'o vānaŋa hoko rua 'i tū hora 'ā. ³³⁻³⁴ Te 'Atua, pa'i, ta'e he 'Atua o te me'e mira-mira; tā'ana me'e haŋa he me'e tī-tika 'e he haumārū.

'I te hora taka-taka mo ha'amuri ki te 'Atua, 'ina ko ha'ati'a i te nā vi'e mo vānaŋa. Pē ira te haka tere iŋa o te nūna'a taŋata ta'ato'a haka moe i te mana'u 'i ruŋa i a Ietū. Te nā vi'e e ha'atura ki te rāua kenu, pa he me'e hā'aki 'i ruŋa i te [haka tere iŋa 'a Mōtē]. ³⁵ Mo haŋa mo 'ite e tahi me'e, 'i te hare ana 'ui ki te kenu; 'ina, pa'i, he nā vi'e e ko tano mo vānaŋa 'i te hora e taka-taka rō 'ana mo ha'amuri ki te 'Atua.

³⁶ Te vānaŋa o te 'Atua ta'e mai i a kōrua i 'ite ra'e ai, 'e ta'e ko kōrua mau nō te me'e i 'ite o ruŋa. ³⁷ Mo mana'u o te kope e tahi e vānaŋa 'ana a ia i te me'e haka 'ite e te 'Atua, 'e he kope haka tere a ia e te Vārua Maitai, e 'ite pē nei ē: tā'aku me'e nei e pāpa'i atu ena he roŋo o te tātou Pū'oko Haka Tere ko Ietū Kiritō. ³⁸ 'E mo ta'e mo'a i te roŋo nei, 'ina tako'a ia kōrua ko haka roŋo ki tā'ana me'e haka 'ite atu.

³⁹ E te taina o'oku ē, e haŋa kōrua ki te me'e he vānaŋa i te me'e haka 'ite atu e te 'Atua va'ai e te Vārua Maitai mo anjā i te anjā o te 'Atua. 'E 'ina ko ta'e ha'ati'a i te nu'u mo vānaŋa hai 'arero kē ta'e 'ite e rāua haka

vānaŋa e te Vārua Maitai. ⁴⁰ Te me'e haŋa mau nō: te nā me'e nei ana anjā a roto i te haumārū 'e a roto i te tī-tika.

Te ora iŋa mai o Ietū mai te mate

15 Hora nei, e te taina ē, e haŋa rō 'ana a au mo mana'u o kōrua ki te [roŋo riva-riva o te 'Atua] haka 'ite atu e au, ma'u hio-hio e kōrua 'i roto i te kōrua māhatu. ² Hai roŋo nei i e'a ai kōrua mai roto i te ūtu'a o te hara 'e i rava'a ai i te ora 'āpī 'ina he hope'a ra'a va'ai e te 'Atua, ana ma'u hio-hio kōrua pa he me'e haka 'ite atu era e au. Mo ta'e ai pē ira, 'ina e tahi hauha'a o te haka moe iŋa ena o kōrua i te mana'u 'i ruŋa i a Ietū.

³ Te roŋo ra'e i hāpī atu e au he me'e haka 'ite mai: a Ietū Kiritō i mate ai mo te tātou hara, pe he me'e hā'a-ki 'i ruŋa i te [Pāpa'i Mo'a]; ⁴ he tanu 'e, 'i te toru mahana, he ora haka 'ou mai te mate, pe he me'e hā'aki tako'a 'i ruŋa i te Pāpa'i Mo'a; ⁵ 'e i haka take'a rō i a ia ki a Pētero 'e ki oti ki te ho'e 'ahuru mā piti ['āpōtoro]. ⁶ I haka take'a tako'a rō i a ia ki te nu'u 'ata rahi ki te pae hānere e taka-taka rō 'ā, he nu'u [haka moe i te mana'u] 'i ruŋa i a ia. Te rahi ra'a o rā nā nu'u ko te ora iŋa 'ana 'ātā ki te hora nei 'e tētahi ko mā-mate 'ā. ⁷ He haka take'a i a ia ki a [Tanatiako], 'e ki oti he haka take'a haka 'ou ki te nu'u 'āpōtoro ta'ato'a. ⁸ I hope'a i haka take'a mai ai ki a au, ka ai atu ko rahi atu 'ā te 'ā-va'e a tu'a o te haka take'a i a ia ki te tētahi atu 'āpōtoro, 'e i haka moe era a au i tō'oku mana'u 'i ruŋa i a ia, i tu'u rō pa he nono e tahi, pa he poki haka poreko kai tano 'ā te 'āva'e.

⁹ E kī atu ena a au i te me'e nei 'o te ai he kope hope'a o te ta'e hōnui a au o roto i te 'āpōtoro, 'ātā e ko tano mo raŋi mai he 'āpōtoro 'i te tute o'oku i te nūna'a taŋata haka moe i te mana'u 'i ruŋa i a Ietū mo tōtōā. ¹⁰ 'E, hai riva rahi o te 'Atua e tu'u nei a au pē nei, 'e 'ina kai ta'e hauha'a rā riva rahi era o'ona. Te parauti'a, 'ata hau tō'oku anjā ki te tētahi 'āpōtoro, ka ai atu, ta'e ko au mau 'ā rā me'e, he 'Atua, 'i tō'ona riva rahi, e hā'ū'ū mai era. ¹¹ Ta'e he me'e hauha'a te kope haka 'ite atu, ka ai atu ko au 'o he tētahi 'āpōtoro. Te me'e hauha'a ko rā roŋo mau era 'ā o ruŋa i a Ietū, he me'e haka 'ite oho e mātou ta'ato'a, 'e he me'e o ruŋa kōrua e haka moe ena i te mana'u.

Te ora iŋa mai te mate

¹² 'E mo ai te me'e hāpī o mātou pē nei ē: ko ora 'ā a Ietū Kiritō mai te mate, zhe aha ia tētahi o kōrua e kī ena: te nu'u mate e ko ora haka 'ou? ¹³ Mo ai 'ina he ora haka 'ou te nu'u mate, 'ina tako'a ia te [Kiritō] kai ora haka 'ou mai. ¹⁴ 'E mo ai 'ina he Kiritō kai ora mai, te me'e haka 'ite e mātou 'ina e tahi hauha'a, 'ina tako'a e tahi hauha'a o te haka moe iŋa o te kōrua mana'u 'i ruŋa i a ia, ¹⁵ 'e he riro mātou he mata'ite reo-reo o te 'Atua. Ko kī 'ana, pa'i, a mātou ko haka ora 'ana e ia i a Ietū mai te mate. 'E mo ai 'ina te nu'u

mate he ora haka 'ou, ta'e tako'a ia he parauti'a ko haka ora 'ana e te 'Atua i te Kiritō.

¹⁶ Mo ai 'ina he nu'u he ora haka 'ou mai te mate, 'ina tako'a ia te Kiritō kai ora mai. ¹⁷ 'E mo ai 'ina he Kiritō kai ora mai, te haka moe iŋa ena o te kōrua mana'u 'i ruŋa i a ia 'ina e tahi hauha'a, te kōrua hara ko te ai iŋa 'ana, ¹⁸ 'e te nu'u mate haka moe i te mana'u 'i ruŋa i te Kiritō e ko e'a mai roto i te ūtu'a o te hara 'e e ko rava'a i te ora 'āpī 'ina he hope'a ra'a va'ai e te 'Atua. ¹⁹ 'E mo ai mo te ao nō nei e ŋatu ena te tātou haŋu 'i ruŋa i te Kiritō, he haka 'aroha mau nō ia te me'e mo tātou.

²⁰ 'E te parauti'a, te Kiritō ko ora 'ā mai te mate. A ia he ra'e o te me'e mo kato, te aura'a, he kope ra'e mo ora mai te mate. ²¹ Pa he ai iŋa o te mate hai taŋata mau nō e tahi, pē ira tako'a 'ana hai taŋata mau nō e tahi ka ai ena te ora iŋa mai te mate. ²² Te aura'a: hai ['Ātamu] te taŋata ta'ato'a e mate ena, 'e hai Ietū Kiritō ka ora ena mai te mate, ²³ 'e ta'ato'a 'i tō'ona hora: 'i ra'e te Kiritō, 'e ki hoki mai a ia, he nu'u 'ā'ana. ²⁴⁻²⁵ Ki oti he tu'u mai te hora hope'a o te ao nei, hora ka haka tere ena e te Kiritō 'e ka haka kore ena i te pūai o te me'e ta'ato'a ta'e take'a ta'e haŋa ki a ia haka tere i te ao nei, 'ātā ka haka hēpi'i tahi rō i a rāua 'i raro i tō'ona va'e. 'Ai era ka va'ai iho i te ao nei ki te 'Atua Matu'a mo haka tere e ia. ²⁶ 'E te me'e hope'a ka haka kore ena he mate.

²⁷ E hā'aki rō 'ana, pa'i, 'i ruŋa i te Pāpa'i Mo'a: te 'Atua ko haka rē 'ana i te me'e ta'ato'a mo te Kiritō e haka tere. 'E ko 'ite 'ā e tātou: te me'e ta'e haka tere mau nō e ia he 'Atua; 'ā'ana, pa'i, i va'ai i te parau mo haka tere i te me'e ta'ato'a. ²⁸ 'E ki haka tere a Ietū Kiritō, te Poki, i te me'e ta'ato'a, 'i rā hora, mā'ana mau 'ā e haka rē i a ia mo te 'Atua e haka tere, he kope 'ā'ana i va'ai ki a ia i te parau mo haka tere. Pē ira te 'Atua ka haka tere iho ena i te me'e ta'ato'a.

²⁹ Ki mana'u haka 'ou rā tātou i te ora iŋa o te nu'u mai te mate. Mo ai ta'e he parauti'a, ūhe aha ia te nu'u e haka [papatito] ena i a rāua mo te rāua nu'u mate? Mo ai, pa'i, 'ina he ora te nu'u mai te mate, 'ina e ko aŋa i te me'e era. ³⁰ 'E a mātou mau nei 'ā, ūhe aha e ha'aoroma'i e oho nei, paurō te mahana, i te 'ati mo ta'e ai he ora haka 'ou te taŋata mai te mate?

³¹ E te taina, paurō te mahana e oho nei a au mo mate 'i te rima o te nu'u ta'e haŋa ki te 'Atua. Te me'e nei he parauti'a pa he parauti'a mau ena 'ā o te koa 'i roto i a au 'o te ai o kōrua 'a Ietū Kiritō, Pū'oko Haka Tere o tātou. ³² 'E mo ai he parauti'a 'ina he nu'u he ora haka 'ou mai te mate, ūe ai rō hō te mana'u o te ao nei tano mo haka moto i a au ki te nu'u o Ēfeto tu'u pa he 'animare taehae pa he me'e aŋa e au? Mo ta'e ora ia o te nu'u mai te mate, i hau 'i te riva mo aŋa o tātou pa he me'e kī e te nu'u: «iKi kai, ki unu; āpō, he mate 'e he oti mau rō 'ai!».

³³ 'Ina kōrua ko haka rē mo reo-reo atu e te rua. Pa he vānaŋa kī e te kope e tahi: «Te hokorua aŋa i te me'e ta'e tano he haka riro i a koe pē ia tako'a». ³⁴ E haka topa riva-riva haka 'ou te mana'u, 'e 'ina ko hara.

Te tētahi, pa'i, o kōrua 'ina he 'ite i te hāpī parauti'a o te 'Atua. E kī atu ena a au i te me'e nei mo ha'amā o kōrua.

Pē hē ka ora haka 'ou ena te taŋata mai te mate

³⁵ E 'ui rō pēaha te kope e tahi: «Ūpē hē te taŋata ka ora haka 'ou ena mai te mate? 'E ūpē hē te huru o tō'ona hakari ka ai era?». ³⁶ Te kope 'ui tā'ue pē ira 'ina kai haka topa i te mana'u. E mana'u kōrua he aha te me'e topa ki te karu e 'oka ena: e ko tupu mo ta'e kōpiro 'e mo ta'e ŋa'aha 'i ra'e te haho. ³⁷ Te karu, ka ai atu he karu tariko 'o he tētahi atu karu, e ai rō 'ā tō'ona huru, 'e te me'e tupu mai roto i te karu ta'e he huru karu toe. ³⁸ Te huru o te tumu e tupu ena o te 'Atua te va'ai, 'e huru kē huru kē e tupu ena mai te rauhuru o te karu.

³⁹ Pē ira tako'a 'ā te huru o te tētahi me'e aŋa e te 'Atua. Ta'e ta'ato'a pē tū huru tahi 'ā; e ai rō 'ā te huru o te taŋata, o te 'animare, o te manu 'e o te ika. ⁴⁰ Me'e rahi nō atu huru o te me'e i aŋa e te 'Atua 'i te raŋi 'e 'i ruŋa i te henua, 'e te nehe-nehe o te ŋā me'e nei, ta'e pē tū huru tahi 'ana. Te nehe-nehe o te me'e o ruŋa i te raŋi ta'e pa he nehe-nehe o te me'e o ruŋa i te henua. ⁴¹ Te mā'eha iŋa o te ra'ā ta'e pa he mā'eha iŋa o te mā'hina 'e o te hetu'u. 'E te pura-pura iŋa o te hetu'u ta'e pē tū huru tahi 'ā.

⁴² Pē ira tako'a 'ana te hakari o tātou o te hora nei ta'e pa he hakari ka ora ena mai te mate 'o te ai te hakari nei he mate 'e he piro. 'E te hakari ora mai te mate 'ina e ko mate ki te hora hope'a. ⁴³ Te hakari mate o te hora nei he me'e rake-rake 'e 'ina e tahi pūai. 'E te hakari ora mai te mate me'e nehe-nehe 'e pūai. ⁴⁴ Te hakari mate o te hora nei, he hakari tano mo noho 'i te ao nei. 'E te hakari ora mai te mate he hakari tano mo noho 'i te raŋi. 'E mo ai o te hakari tano mo te ao nei, he ai tako'a ia te hakari tano mo te raŋi.

⁴⁵ Pē nei e hā'aki ena 'i ruŋa i te Pāpa'i Mo'a: «Ki te taŋata ra'e era ko 'Ātamu i va'ai ai e te 'Atua i te ora ki tō'ona hakari mo noho 'i te ao nei»; 'e ki a 'Ātamu hope'a ena, ko Ietū Kiritō, i va'ai ai i te parau mo va'ai i te ora 'āpī 'ina he hope'a ra'a mo noho 'i te raŋi. ⁴⁶ Te ora 'āpī mo noho 'i te raŋi ta'e he me'e ra'e. Te me'e ra'e he ora mo noho 'i te ao nei, 'e ki oti te ora 'āpī mo noho 'i te raŋi. ⁴⁷ Te taŋata ra'e era ko 'Ātamu hai 'ō'one i aŋa ai, 'i te me'e era o te ao nei a ia. 'E te rua 'Ātamu ko Ietū Kiritō, 'e a ia o te raŋi. ⁴⁸ Te hakari o te taŋata o te ao nei pa he hakari o te taŋata aŋa era hai 'ō'one. 'E te hakari o te nu'u ka noho ena 'i te raŋi pa he hakari o te taŋata era o te raŋi. ⁴⁹ 'E pa he tu'u iŋa nei o tātou pa he taŋata aŋa era hai 'ō'one, pē ira tako'a 'ana ka tu'u ena a tātou pa he kope era o te raŋi.

⁵⁰ Te kī, e te taina ē: te hakari mate nei o tātou e ko tano 'i te ao haka tere e te 'Atua, he kona ta'e ai o te mate. ⁵¹ 'E, 'i a au he vānaŋa atu o ruŋa i te me'e man-a'u e te 'Atua mo aŋa ta'e haka 'ite mai e ia 'i mu'a 'ā: e ko mate ta'ato'a tātou te nu'u haka moe i te mana'u

'i ruŋa i a Ietū; nā e tu'u rō te mahana te hakari mate nei o tātou he riro he hakari ta'e mate. ⁵² Te me'e nei ka topa ena 'i te hora o te puhi iŋa hope'a o te koneta, 'e te hōrou pa he mine iŋa ena 'ā o te mata. He puhi te koneta, te nu'u mate he ora tahi mai, 'e 'ina e ko mate haka 'ou. 'E a tātou te nu'u ora o rā hora, he mono te hakari, ⁵³ 'i te me'e era te hakari mate nei o tātou o te hora nei e riro rō he hakari 'ina e ko mate ki te hora hope'a. ⁵⁴ Ki topa te me'e nei, he tano te me'e hā'aki 'i ruŋa i te Pāpa'i Mo'a pē nei ē:

«E ko ai haka 'ou te mate,
ko haka kore 'ana e te 'Atua».

⁵⁵ 'O ira e tano nō tātou mo kī:

«E te Mate, ǀe rē mau rō mai koe?
ǀE ai mau nō 'ā tu'u pūai 'i ruŋa i a mātou?».

⁵⁶ Te pūai o te mate mai te hara e ai ena, 'e te hara e pūai ena he ta'e ha'atura ki te roŋo o te 'Atua. ⁵⁷ E te taina, ǀki māuru-uru tātou ki te 'Atua 'o te va'ai mai i te pūai mo rē ki te hara 'e ki te mate hai me'e aŋa era e Ietū Kiritō, he Pū'oko Haka Tere o tātou!

⁵⁸ Te me'e haŋa ia, e te taina haŋa rahi ō'oku ē: he haka hio-hio he oho te kōrua mana'u 'i ruŋa i a Ietū, 'o haka tapa kōrua mai te hāpī parauti'a o te 'Atua. 'E, ka aŋa ka oho nō i te aŋa haŋa o te 'Atua mo aŋa e kōrua. E 'ite rō 'ana, pa'i, e kōrua: te aŋa ki a ia e ko ta'e hauha'a.

Te moni mo te taina o Hērutarema

16 Te haka taka-taka i te moni mo te nu'u ha'ata'a e te 'Atua mā'ana o Hērutarema, e aŋa pa he me'e haka 'ite e au ki te nūna'a ta'ato'a [haka moe i te mana'u] 'i ruŋa i a Ietū o te nā kona ta'ato'a era o Karatia. ² 'I te mahana tāpati ta'ato'a, e ha'ata'a 'i te kōrua hare e tahi 'apa o te tara ai o kōrua 'e 'ai ka hāpa'o rō, ki tu'u atu a au, ko ha'ata'a era 'ā, 'o haka taka-taka iho kōrua 'i rā hora. ³ 'E, ki tu'u atu a au, he haka ma'u i rā moni ki Hērutarema hai nu'u nō era o kōrua i haŋa. Ki a rāua ka va'ai nei e au i te parau 'i ruŋa e hā'aki rō 'ā ko ai a rāua 'e ki te aha 'i Hērutarema. ⁴ 'E mo u'i ō'oku e tano nō a au mo oho 'i muri, he oho tahi a mātou.

He mana'u iŋa o Pauro mo oho ki Kōrinto

⁵ 'I tō'oku ara ki a kōrua 'i Kōrinto 'i ra'e a au ka vari nei ki Mātērōnia, 'e ki oti ka tu'u iho atu ena a au ki a kōrua. ⁶ E rahi 'iti rō pēaha tō'oku noho atu 'i muri i a kōrua, korohaŋa 'āva'e ta'ato'a era o te toŋa. Pē ira, ki oho haka 'ou a au 'i tō'oku ara ki te rua kona, e tano rō pēaha kōrua mo hā'ū'ū mai hai me'e mo tō'oku ara.

⁷ 'Ina a au e ko haŋa mo hipa 'iti-'iti nō atu mo u'i i a kōrua; e haŋa rō 'ana mo roa 'iti o tō'oku noho iŋa atu, ana haŋa te 'Atua. ⁸ 'Ī a au 'i Ēfeto 'e ka noho nei a au 'ātā ki oti te [ŋoŋoro o te Peneketote], ⁹ 'o te ai e rahi rō 'ana te nu'u o nei haŋa mo haka 'ite ō'oku ki a rāua i te [roŋo riva-riva o te 'Atua], ka ai atu e rahi tako'a rō 'ana te nu'u ta'e haŋa mai.

¹⁰ 'E mo tu'u atu o Timoteo, e u'i e haka naho-naho; a ia e aŋa tako'a rō 'ana pē au 'i te aŋa o te tātou Pū'oko Haka Tere. ¹¹ 'Ina kōrua ko u'i ta'e au ki a ia; e hā'ū'ū i tō'ona ara mo oho mai mo u'i i a au. 'Ī a au e tiaki atu ena ki a ia 'e ki te nā taina hokorua ena i a ia.

¹² 'E te tātou taina a 'Āporo, i kī rō e au mo oho atu 'i muri i te taina oho atu u'i i a kōrua, 'e, mo te hora nei, 'ina e ko tano mo oho atu. Ki tano tō'ona hora ka oho atu ena.

Te me'e mo aŋa

¹³ E u'i kōrua e hāpa'o 'e e haka hio-hio i te kōrua mana'u 'i ruŋa i a Ietū. E kiahio kōrua, 'ina ko ha'amā 'i te haka moe iŋa i te mana'u 'i ruŋa i a ia. ¹⁴ 'E te me'e ta'ato'a o kōrua mo aŋa, e aŋa hai haŋa.

¹⁵ E te taina, ko 'ite 'ana a kōrua: te hua'ai o Etefana he nu'u ra'e o te kona era o Ākāia i haka moe i te mana'u 'i ruŋa i a Ietū, 'e 'i te hora nei te me'e rava aŋa o rāua he hā'ū'ū ki te taina haka moe i te mana'u 'i ruŋa i a Ietū. ¹⁶ He ani atu a au mo haka rē i a kōrua mo te nu'u era 'e mo te nu'u tu'u pē rāua hā'ū'ū 'i te aŋa o te 'Atua e haka tere atu.

¹⁷ Me'e huru kē te rahi o tō'oku koa i tu'u mai ai a Etefana, a Forotunato, 'e a Akaiko mai i a kōrua ena. 'I te kore, pa'i, o kōrua, ¹⁸ o rāua te haka koa 'e te 'ata haka pūai mai i a au, pa he me'e ka aŋa atu ena ki a kōrua ki hoki haka 'ou atu. Te nu'u pē nei e mo'a.

He 'aroha

¹⁹ Te nūna'a taŋata ta'ato'a haka moe i te mana'u 'i ruŋa i a Ietū o te nā kona nei o 'Ātia ko 'aroha mai 'ā mo kōrua. A 'Ākira 'e a Pirika, 'e te nu'u taina taka-taka i te rāua hare ko 'aroha tako'a mai 'ā mo kōrua hai 'iŋoa o te tātou Pū'oko Haka Tere, ²⁰ 'e pē ira 'ā te taina ta'ato'a o muri i a au. 'E 'i roto i a kōrua tako'a e 'aroha hai haŋa.

²¹ A au, a Pauro, e pāpa'i atu ena i te 'aroha nei hai rima mau nei 'ā ō'oku.

²² Mo ta'e haŋa o te kope e tahi ki te tātou Pū'oko Haka Tere ko Ietū Kiritō, mo te 'Atua e haka ūtu'a. ǀE te mātou Pū'oko Haka Tere ē, ka hōrou koe ka hoki mai!

²³ E te taina, ka ai 'i ruŋa i a kōrua ta'ato'a te riva rahi o te tātou Pū'oko Haka Tere. ²⁴ E haŋa rahi rō atu 'ana a au ki a kōrua 'o te ai 'a Ietū Kiritō tātou ta'ato'a.

2 KŌRINTO

I ha'amata ai te parau nei 'a Pauro e vānaŋa 'ana ki te taina o Kōrinto o ruŋa o tō'ona haŋa mo hipa mo u'i i a rāua 'i tō'ona ara ki Mātērōnia, he me'e, i hope'a ai, kai rava'a mo aŋa (1.12–24), 'e he ani mo ta'e riri mō'ona 'o tō'ona ta'e tu'u.

E tahi o roto i te nūna'a taŋata [haka moe i te mana'u] 'i ruŋa i a Ietū o Kōrinto i haka māui-ui rō i te māhatu o Pauro hai me'e aŋa e ia. Ka ai atu pē ira, i haka 'ite nō e Pauro ki rā kope ko haka rehu 'ana e ia i rā me'e, 'o te ai ko haka tapa 'ana mai rā me'e ta'e tano aŋa era e ia, 'e he ani ki te taina ta'ato'a o Kōrinto mo haka rehu tako'a (2.5–11).

Ki oti he vānaŋa a Pauro o ruŋa i te haka tere iŋa 'āpī o te 'Atua ananake ko te taŋata, he me'e 'ata hau rō atu ki te haka tere iŋa ra'e. 'I te haka tere ra'e era, pa'i, e ha'atura ki te [haka tere iŋa 'a Mōtē] mo tano ki te mata o te 'Atua. 'I te haka tere iŋa 'āpī nei, e haka moe i te mana'u 'i ruŋa i a Ietū 'e e haka rē mo te [Vārua Maitai] va'ai mai e te 'Atua e haka tere mai (3.6–18). I oti era he ha'aura'a mai e Pauro i te tātou hakari pa he karapā ta'e hio-hio. Hai me'e nei e haka mana'u mai 'ā pē nei ē: e ai rō 'ā te hare hio-hio mo tātou 'i te ranjī aŋa e te 'Atua, te aura'a, he hakari e ko mate ki te hora hope'a (5.1–2).

'E 'i te me'e era e ai rō 'ana 'i Kōrinto te nu'u kī pē nei ē: a Pauro ta'e he ['āpōtoro] parauti'a, he vānaŋa 'iti-'iti a Pauro o ruŋa i te 'ati ta'ato'a 'amo e ia 'o te aŋa ō'ona mo te 'Atua. He haka oti i tā'ana parau nei e no-no'i 'ana ki te 'Atua mo te nu'u haka moe i te mana'u 'i ruŋa i a Ietū o Kōrinto. Tā'ana pure: mo pūai o rāua 'i te ara parauti'a o te 'Atua (13.9), mo ai o rāua e tahi nō mana'u 'e mo noho ananake 'i roto i te haumārū (13.11).

He 'aroha

1 A au a Pauro, ['āpōtoro] 'a Ietū Kiritō hai haŋa o te 'Atua, 'e te tātou taina nei ko Timoteo he 'aroha atu ki a kōrua ki te nūna'a taŋata [haka moe i te mana'u] 'i ruŋa i a Ietū o Kōrinto, 'e ki te tētahi atu taina o te ŋā kona ta'ato'a ena o Ākāia. ² Ka ai 'i ruŋa i a kōrua te riva rahi 'e te haumārū o te 'Atua, Matu'a o tātou, 'e o Ietū Kiritō, Pū'oko Haka Tere o tātou.

He māuru-uru

³ Ki ha'ahana-hana tātou ki te 'Atua, Matu'a o te tātou Pū'oko Haka Tere ko Ietū Kiritō. A ia he Matu'a haka 'aroha i a tātou, 'e he 'Atua haka koa 'e haka pūai mai. ⁴ 'I roto i te tātou 'ati ta'ato'a he haka koa 'e he haka pūai nō mai te aŋa e ia, mo 'ite tako'a o tātou mo haka koa 'e mo haka pūai i te nu'u e ai rō 'ana te rāua 'ati hai hā'ū'ū va'ai mau mai era 'ā e ia. ⁵ Pa he rahi ena 'ā, pa'i, o te 'ati 'amo e tātou 'o te ai o tātou o te [Kiritō], pē ira tako'a 'ā te rahi o te haka koa 'e o te haka pūai mai e te 'Atua 'o te ai o tātou o te Kiritō.

⁶ Hora ena o mātou o te 'āpōtoro e 'amo ena i te 'ati, he me'e mo te kōrua riva-riva, 'e, tako'a, mo rava'a e kōrua i te ora 'āpī 'ina he hope'a ra'a. 'E, hora ena o te 'Atua e haka koa e haka pūai mai ena i a mātou, he me'e mo kōrua tako'a. Pē ira mātou e 'ite nei mo haka koa 'e mo haka pūai atu i a kōrua, mo ha'aoroma'i o kōrua hai pūai i te 'ati 'amo e tātou 'o te ai o tātou o te Kiritō. ⁷ 'E, ko 'ite riva-riva 'ana e mātou: pa he 'amo iŋa tako'a ena 'ā o kōrua i te 'ati, ka haka koa 'e ka haka pūai tako'a atu ena i a kōrua e te 'Atua.

⁸ E te taina, e haŋa rō 'ā a mātou mo 'ite o kōrua i te rahi o te 'ati topa mai ki a mātou 'i 'Ātia. He 'ati taparahi-ta'ata e tahi, 'ati ena mo ta'e ha'aoroma'i, 'e 'ātā i mana'u rō e mātou he mā-mate a mātou. ⁹ I tu'u mau rō pa he me'e ena ē: he mā-mate mau 'ā a mātou 'i ira. I topa mai ai te me'e nei mo 'ite o mātou: 'i ruŋa i te 'Atua mau nō, kope haka ora i te taŋata mai te mate, ana haka moe mātou i te mana'u, 'e ta'e 'ō 'i ruŋa i a mātou mau 'ā. ¹⁰ 'E te 'Atua i haka e'a rō i a mātou mai rā 'ati, 'e ko 'ite 'ā e mātou pē ira ka aŋa ka oho ena. 'Ē-ē, ko 'ite riva-riva 'ana e mātou pē ira ka aŋa ka oho mai ena. ¹¹ Te me'e haŋa he hā'ū'ū he pure mai o kōrua mo te mātou aŋa. 'E mo rahi o te nu'u pure mo mātou, he rahi tako'a ia te nu'u māuru-uru ki te 'Atua o tō'ona ha'amaitai mai i a mātou.

He aha a Pauro i ta'e oho ai ki Kōrinto

¹² E te taina, e koa nei a mātou 'i te me'e era e haka 'ite rō mai 'ana e te mātou māhatu pē nei ē: te noho iŋa o mātou 'i roto i a kōrua 'e 'i roto i te taŋata ta'ato'a hai mo'a 'e hai parauti'a o te 'Atua. A mātou e haka tere nei hai haka moe i te mana'u 'i ruŋa i te riva rahi o te 'Atua, 'e ta'e 'ō hai mārāma-rama o te taŋata. ¹³ 'E te me'e pāpa'i atu e mātou ta'e he me'e mo ta'e aŋi-aŋi e kōrua ana tai'o, he me'e mo aŋi-aŋi. Te me'e haŋa he aŋi-aŋi riva-riva e kōrua ¹⁴ i te mātou māhatu 'e i te mātou me'e aŋa, ki koa ai kōrua mo mātou, 'e pē ira tako'a 'ana a mātou mo kōrua 'i te hora o te hoki iŋa mai o te tātou Pū'oko Haka Tere ko Ietū.

¹⁵⁻¹⁶ 'E he 'ite ō'oku e koa rō 'ana a kōrua mo mātou, i topa mai ai te mana'u mo hipa atu mo u'i i a kōrua 'i

tō'oku ara ki Mātērōnia 'e, tako'a, 'i tō'oku hoki iña mai; pē ira e rua tātou koa iña. 'E 'i tō'oku hoki iña mai tako'a, e tano nō kōrua mo hā'ū'ū mai hai rāve'a mo tō'oku ara ki Hūrea, ana haña kōrua. ¹⁷ 'I te ta'e oho atu ō'oku, kai haña a au mo mana'u o kōrua pē nei ē: a au he tañata huri tahaña o te mana'u, 'o he tañata kī, pa he nu'u o te ao nei, «'ē-ē», 'e te parauti'a o te rāua mana'u «'ina».

¹⁸ Te 'Atua he kope aña i tā'ana me'e kī 'e he mata'ite pē nei ē: a mātou tako'a. Mo kī atu o mātou «'ē-ē», 'ē-ē mau 'ā; 'e mo kī atu «'ina», 'ina mau 'ā. ¹⁹ A Ietū Kiritō, Poki era o te 'Atua, haka 'ite atu era e au, e Tira 'e e Timoteo, kope ta'e kī «'ē-ē» mo 'ina, 'e «'ina» mo 'ē-ē. A ia he 'ē-ē mau 'ā o te 'Atua; ²⁰ hai ia, pa'i, e haka tano tahi ena e te 'Atua i tā'ana me'e hōrea. 'O ira, 'i te hora ha'ahana-hana o tātou ki te 'Atua e kī nei: «['Āmene]». ²¹ 'Ā'ana, pa'i, te haka pūai i te tātou haka moe iña i te mana'u 'i ruña i te Kiritō, 'e te ha'ata'a i a tātou mā'ana. ²² Te 'Atua ko va'ai mai 'ana i te [Vārua Maitai] pa he tāpa'o haka 'ite mai: a tātou 'ā'ana. 'E, 'i te ai o te Vārua Maitai 'i roto i a tātou, e 'ite nei: te me'e ta'ato'a hōrea mai era e te 'Atua e haka tano tahi rō.

²³ He 'Atua te me'e i 'ite, e te taina ē, pē nei ē: a au i ta'e tu'u atu ai mo u'i i a kōrua 'o ture atu a au o ruña i te me'e ta'e tano aña e kōrua 'o mamae te kōrua māhatu 'i tā'aku vānaña. ²⁴ Ta'e, pa'i, i a mātou te kī pē hē kōrua ana ma'u i te kōrua haka moe iña i te mana'u 'i ruña i a Ietū. Te me'e i a mātou he hā'ū'ū atu mo 'ata koa o kōrua. E 'ite rō 'ana, pa'i, mātou e pūai rō 'ana te kōrua haka moe iña i te mana'u.

2 'O ira a au i ta'e oho atu ai mo u'i i a kōrua 'o ture atu a au 'e he mamae te kōrua māhatu, pa he me'e topa era 'i te hora tu'u ra'e atu era ō'oku. ² 'E mo mamae o te kōrua māhatu i a au, ζpē hē ia a au ana tiaki mo haka koa mai i a au e te nu'u haka mamae era e au i te māhatu? ³ Te me'e pāpa'i atu era e au 'i ruña i te parau ra'e era i pāpa'i atu ai 'o tu'u atu a au 'e he māui-ui tō'oku māhatu 'i te take'a i a kōrua, nu'u i a rāua a au ana koa, e aña 'ana i te me'e ta'e tano. Ko 'ite 'ana, pa'i, e kōrua: mo koa o kōrua he koa tako'a a au. ⁴ 'E, hora pāpa'i atu era ō'oku i rā parau, i mana'u rahi rō atu a au ki a kōrua 'e i rahi rō te mamae o tō'oku māhatu, 'ātā i tañi rō a au. Ka ai atu pē ira, ta'e i pāpa'i atu ai mo haka māui-ui i te kōrua māhatu; mo haka 'ite atu i te rahi o tō'oku haña mo kōrua.

He haka rehu iña i te me'e ta'e tano

⁵⁻⁷ Hora nei e haña 'ana a au mo pāpa'i atu o ruña i te kope o roto o kōrua aña era i te me'e ta'e tano. Te kope nei ko [huri 'ana te mana'u ki te 'Atua] 'e ko haka rē 'ana i te me'e ta'e tano aña era e ia. 'E, ka ai atu i māui-ui rō tō'oku māhatu 'e te kōrua māhatu tako'a 'i rā me'e, te me'e o tātou mo aña 'i te hora nei he haka rehu i te me'e ta'e tano aña era e ia 'e he hā'ū'ū i a ia, 'o rahi rō te māui-ui 'amo 'i roto i tō'ona māhatu 'e 'o haka tapa rō mai te ara o te 'Atua. Ko tano ko oti 'ana, pa'i, te ūtu'a va'ai era e te rahi ra'a o kōrua ki a ia. ⁸ 'O

ira, he ani atu a au mo haka 'ite o kōrua ki a ia i te rahi o te kōrua haña mō'ona.

⁹ 'I ruña i tā'aku parau ra'e era i pāpa'i atu ai a au o ruña i rā kope 'e o ruña i te kōrua me'e mo aña ki a ia, mo u'i hoki e ha'atura rō mai kōrua. ¹⁰ Te me'e haña 'i te hora nei he haka rehu e kōrua i te me'e ta'e tano aña era e rā kope. Rā me'e ko haka rehu 'ana e au, 'e ko 'ite 'ana e te [Kiritō]: hai māhatu a au i haka rehu ai. I aña ai a au pē ira mo te kōrua riva-riva, ¹¹ 'o rē a Rukiferō; ko 'ite 'ana, pa'i, e tātou he aha tā'ana me'e haña.

'I Toroare a Pauro

¹² I tu'u era a au ki Toroare, me'e rahi te 'ōpani i mā-taki mai e te tātou Pū'oko Haka Tere mo haka 'ite ō'oku 'i ira i te roño riva-riva o te Kiritō. ¹³ 'E, 'i te ta'e take'a e au i te tātou taina era ko Tito, kai riva-riva a au mo noho 'i ira. He haka rē ia a au i te nu'u taina o ira 'e he e'a he oho rō 'ai a au ki Mātērōnia.

He māuru-uru

¹⁴ He māuru-uru a au ki te 'Atua. 'Ā'ana, pa'i, te va'ai mai i te pūai mo rē ki te me'e ta'ato'a 'o te ai o mātou o te Kiritō. 'E 'ā'ana tako'a te hā'ū'ū mai mo haka 'ite i te [roño riva-riva o ruña i a Ietū], roño pa he mano'i 'eo tu'u ki te kona ta'ato'a. ¹⁵ Hora ena o mātou e haka 'ite e oho ena i te roño riva-riva o ruña i a Ietū a mātou pa he 'eo *incienso* tūtia e te Kiritō haka koa i te 'Atua, 'e tu'u ki te nu'u e'a mai roto i te ūtu'a o te hara, 'e ki te nu'u ta'e e'a. ¹⁶ Te 'eo nei, mo te nu'u ta'e e'a mai roto i te ūtu'a o te hara, pa he hau'a o te mate; 'e mo te nu'u e'a mai roto i te ūtu'a o te hara, pa he 'eo va'ai ki a rāua i te ora. Te aña nei, aña nui-nui. ζE ai rō hō te kope tano mo te aña nei? ¹⁷ 'Ina a mātou he haka 'ite i te [roño riva-riva o te 'Atua] mo rava'a moni, pa he me'e aña e te tētahi. Te mātou me'e aña he vānaña hai parauti'a, pa he tāvini o te 'Atua 'o te ai o mātou o te Kiritō, 'e he 'Atua te mātou mata'ite.

He haka tere iña 'āpī o te 'Atua

3 Ta'e te mātou vānaña nei e haka paka atu 'ana i a mātou. Ta'e, pa'i, mo mātou e va'ai atu i te parau vānaña riva-riva o ruña i a mātou, pe he tētahi atu nu'u, 'o mo ani atu ki a kōrua mo pāpa'i mai i te parau pē ira o ruña i a mātou mo 'ite e te nu'u pē nei ē: te me'e aña e mātou he me'e tī-tika. ² Ko kōrua, pa'i, te mātou parau haka 'ite ko ai a mātou pāpa'i 'i roto i te māhatu, te aura'a: hai u'i i te kōrua noho iña tano, e 'ite ena e te tañata ta'ato'a: te me'e aña e mātou me'e riva-riva. ³ A kōrua he parau pāpa'i e te [Kiritō] hai mā-tou, parau ta'e hai 'ārahu i pāpa'i ai, hai [Vārua Maitai] o te 'Atua, 'e ta'e 'i ruña i te mā'ea pa he roño pāpa'i e [Mōtē]; i pāpa'i ai 'i roto i te māhatu o te tañata.

⁴ E tano nei mo kī pē ira he 'ite o mātou: o te 'Atua te hā'ū'ū mai hai Ietū Kiritō. ⁵ E ko tano mātou mo kī: hai mārama-rama mau 'ā o mātou e aña nei; ko 'ite riva-riva 'ana, pa'i, e mātou: o te 'Atua te va'ai mai i te māra-

ma-rama mo aŋa i nei aŋa. ⁶ Hai hā'ū'ū mau nō ō'ona e tano nei mātou mo haka 'ite o ruŋa i te haka tere iŋa 'āpī ō'ona ananake ko te taŋata, 'e te oho iŋa nei ta'e hai ha'atura ki te [haka tere iŋa 'a Mōtē] ana tano ki tō'ona mata, hai ai o te Vārua Maitai 'i roto i te māhatu. Te me'e mo rava'a hai ha'atura ki te haka tere iŋa 'a Mōtē he mate, 'e te me'e va'ai e te Vārua Maitai he ora 'āpī 'ina he hope'a ra'a.

⁷ Hai pūai nui-nui te 'Atua i haka 'ite mai ai i te haka tere iŋa tuai ō'ona ananake ko tātou ko te taŋata i pā-pā'i 'i ruŋa i te mā'ea pararaha. Te aura'a: hora turu mai era o Mōtē mai ruŋa i te ma'uŋa e ma'u rō 'ana i nei mā'ea, e 'ana-'ana rō 'ā tō'ona 'āriŋa 'i te pūai o te 'Atua ki te roa 'ina he itaraera he tano mo u'i a ruŋa, ka ai atu 'ai e ŋaro e oho era te pūai o rā 'ana-'ana. Mo ai ia hai pūai nui-nui pē ira i haka 'ite mai ai e te 'Atua i rā haka tere iŋa tuai era ō'ona, he me'e mo ma'u i a tā-tou ki te mate, ⁸ ze ko ai hō hai pūai 'ata hau rō atu 'i te nui-nui te haka 'ite iŋa mai o te haka tere iŋa 'āpī ō'ona ananake ko tātou ko te taŋata va'ai mai i te Vārua Maitai?

⁹ Mo ai he me'e pūai 'e nui-nui te haka tere iŋa tuai o te 'Atua ananake ko te taŋata ma'u mai i te ūtu'a, ze ko ai hō te [haka tere iŋa 'āpī o te 'Atua ananake ko te taŋata] haka tano i te taŋata ki te mata o te 'Atua he me'e 'ata hau rō atu 'i te pūai 'e 'i te nui-nui? ¹⁰ Hora nei 'ina e tahi pūai 'e nui-nui toe o te me'e ra'e era; ko mono 'ana hai haka tere iŋa 'āpī 'ata nui-nui 'e 'ata pūai ki rā me'e. ¹¹ Mo ai ia he me'e pūai 'e nui-nui te haka tere iŋa ra'e era, haka tere iŋa era mo ŋaro, 'ata hau rō atu ia te pūai 'e te nui-nui o te haka tere iŋa 'āpī nei, he me'e e ko ŋaro ki te hora hope'a.

¹² 'E, 'o te 'ite o mātou e ko ŋaro te haka tere iŋa 'āpī nei, 'ina e tahi mātou me'e na'a e haka 'ite e oho nei o ruŋa. ¹³ A mātou ta'e pē Mōtē, puru i tō'ona 'āriŋa hai kahu 'o take'a e te itaraera te ŋaro iŋa o te 'ana-'ana mai ruŋa. ¹⁴ 'E te itaraera, 'ātā ki te hora nei, 'ina he haŋa mo aŋi-aŋi pē nei ē: te haka tere iŋa tuai o te 'Atua ananake ko te taŋata he me'e mo ŋaro. E tai'o ena i rā haka tere iŋa, e tu'u rō 'ā pa he me'e ena ē: e ai rō 'ā te me'e puru i te rāua mana'u 'o aŋi-aŋi i te parauti'a. 'E te me'e mau nō mo kume i te me'e puru i te rāua mana'u 'o aŋi-aŋi he [haka moe i te mana'u] 'i ruŋa i a Ietū. ¹⁵ 'Ātā ki 'aŋarīnā, e tai'o ena i te puka pā-pā'i e Mōtē, e ai rō 'ā te me'e puru i te rāua mana'u 'o aŋi-aŋi. ¹⁶ Ka ai atu pē ira, 'i te hora haka moe o te kope e tahi i tō'ona mana'u 'i ruŋa i te tātou Pū'oko Haka Tere ko Ietū Kiritō, he kume e te 'Atua i te me'e puru i tō'ona mana'u.

¹⁷ Te tātou Pū'oko Haka Tere e haka tika ena i te tā-tou māhatu hai Vārua Maitai. 'E te kope haka tika e te Vārua Maitai ko e'a 'ā mai te pūai o te hara 'e ko e'a tako'a 'ā mai te mana'u pē nei ē: hai ha'atura ki te haka tere iŋa 'a Mōtē he tano ki te mata o te 'Atua. ¹⁸ Hora nei a tātou ta'ato'a, te nu'u haka moe i te mana'u 'i ruŋa i a Ietū, kume o te me'e puru o te 'āriŋa, e haka take'a ena i te pūai 'e i te nui-nui o te tātou Pū'oko Haka Tere, pa he 'ata 'i roto i te hi'o, 'e a ia hai Vārua

Maitai e aŋa e oho ena 'i roto i te tātou māhatu mo haka riro mo oho i te tātou huru pa he huru riva mau 'ā ō'ona.

He nu'u haka 'ite o ruŋa i a Ietū

4 Te 'Atua i va'ai mai ai i te aŋa nei, he riva rahi ō'ona. 'O ira a mātou e ta'e hōriŋa nei. ² A mātou e hāruī rō 'ana hai tua'ivi i te me'e ta'e tano ta'ato'a aŋa e te taŋata e na'a rō 'ana 'o ha'amā, 'e, tako'a, 'ina a mātou he reo-reo 'e he huri i te vānaŋa o te 'Atua. Te 'Atua ko 'ite 'ana he parauti'a mau nō te me'e haka 'ite e mātou o ruŋa i a ia, 'e ta'ato'a taŋata mana'u riva-riva e 'ite tako'a rō 'ā: te mātou me'e kī he parauti'a.

³ 'E mo ai o te me'e puru i te mana'u 'o aŋi-aŋi i te aura'a parauti'a o te roŋo riva-riva haka 'ite e mātou, mo te nu'u ta'e e'a mau nō mai roto i te ūtu'a o te hara ka ai ena. ⁴ Te nu'u nei, 'i te ta'e haka moe i te rāua mana'u 'i ruŋa i a Ietū, ko haka pōhāhā 'ā i te rāua mana'u e Rukiferō, 'atua o te ao nei, 'o aŋi-aŋi, 'o take'a i te mā'eha o te mōrī o te roŋo riva-riva o ruŋa i te pūai 'e i te nui-nui o te [Kiritō], 'āriŋa ora o te 'Atua.

⁵ 'Ina a mātou he haka 'ite he oho o ruŋa i a mātou. E haka 'ite nei o ruŋa i a Ietū Kiritō, he Pū'oko Haka Tere o te ta'ato'a. Te me'e mau nō haka 'ite e mātou o ruŋa i a mātou: he tāvini mātou o te ta'ato'a 'i te haŋa o mātou ki a Ietū. ⁶ O te 'Atua kī era pē nei ē: «Ka ai te mōrī 'i roto i te pōhāhā», te haka mā'eha i te mātou mana'u mo haka mā'eha tako'a e mātou i te mana'u o te tē-tahi nu'u hai haka 'ite i te pūai 'e i te nui-nui o te 'Atua take'a 'i ruŋa i a Ietū Kiritō.

Hai pūai o te 'Atua

⁷ Te aŋa va'ai mai nei e te 'Atua, he haka 'ite i te [roŋo riva-riva o ruŋa i a Ietū], he me'e hope'a o te hauha'a. 'E a mātou, te nu'u i a rāua nei hauha'a, pa he pani aŋa hai 'ō'one. Pē ira te 'Atua i aŋa ai mo 'ite e te ta'ato'a: te pūai nui-nui nei i a mātou o te 'Atua, ta'e 'ō o mātou mau 'ā. ⁸ He topa nō mai te 'ati, 'e 'ina a mātou he haka tapa i te mātou mana'u mai ruŋa i te 'Atua; e ai rō 'ā te mahana e tu'u rō 'ā pa he me'e ena ē: 'ina he rāve'a toe mo e'a mai roto i te 'ati, 'e ko te haka moe iŋa 'ana te mātou mana'u 'i ruŋa i te 'Atua mo hā'ū'ū mai. ⁹ He tute nō mai te aŋa i a mātou mo tōtōā e te nu'u ta'e haŋa mai, 'e 'ina te 'Atua he haka rē i a mātou; e tiŋa'i rō mai 'ā e te nu'u ki te pi'i-pi'i, 'e e e'a haka 'ou nō 'ā a mātou ki ruŋa. ¹⁰⁻¹¹ 'I te kona ta'ato'a tu'u o mātou, he take'a nō te aŋa e te nu'u pē nei ē: e oho rō 'ana a mātou mo mate 'i te rima o te nu'u ta'e haŋa mai, pa he me'e topa ki a Ietū. 'E, hai hā'ū'ū mai ō'ona 'o mate a mātou, e take'a tako'a ena: e ora nō 'ā a Ietū. ¹² A mātou e oho mau rō 'ā mo mate 'o te haka 'ite i te roŋo riva-riva o ruŋa i a Ietū, 'e a kōrua, hai nei me'e mau 'ā, e rava'a ena i te ora 'āpī 'ina he hope'a ra'a.

¹³ A mātou pa he kope kī 'i ruŋa i te [Pāpa'i Mo'a] pē nei ē: «E haka moe rō 'ana a au i tō'oku mana'u 'i ruŋa i te 'Atua, 'o ira a au e vānaŋa nei o ruŋa i a ia». 'E, pa

he oho iŋa era 'ā o rā kope, a mātou tako'a, 'i te haka moe iŋa i te mana'u 'i ruŋa i te Kiritō, e haka 'ite e oho nei o ruŋa i a ia. ¹⁴ E 'ite rō 'ana, pa'i, a mātou: te 'Atua haka ora era i a Ietū mai te mate, pe mu'a ka oho ena he haka ora tako'a i a mātou, 'e pē ira 'ana i a kōrua, 'o te ai o tātou 'ā'ana. 'E ananake tātou ka ma'u ena e te 'Atua ki muri i a ia. ¹⁵ Te ha'aoroma'i o mātou i te 'ati ta'ato'a he me'e mo te riva-riva o kōrua, 'e mo 'ata rahi mo oho o te nu'u [haka moe i te mana'u] 'i ruŋa i a Ietū, he 'ite o ruŋa i te riva rahi o te 'Atua. Pē ira ka rahi ka oho ena te nu'u māuru-uru 'e ha'ahana-hana ki te 'Atua.

¹⁶ 'O ira a mātou e ta'e hōriŋa nei 'i te mātou aŋa. Te mātou hakari, pe te rehe-rehe pe te oho nō, 'e, ka ai atu pē ira, te mātou haka moe iŋa i te mana'u 'i ruŋa i a Ietū pe te pūai pe te oho nō te mahana. ¹⁷ E haka topa nei i te mana'u o ruŋa i te me'e ka ai ena mo tātou pe mu'a ka oho ena: he noho iŋa riva-riva 'ina he hope'a ra'a 'i te raŋi, te 'ati 'amo e mātou 'i te ao nei 'ina e mātou he tapa atu; e tu'u rō 'ana, pa'i, pa he me'e ta'e paŋaha'a 'e e ko roa he ŋaro. ¹⁸ 'O ira, te me'e mana'u o mātou ta'e he me'e o te ao nei, pa he 'ati topa mai. Te mātou mana'u e haka noho nei 'i ruŋa i te me'e o te raŋi. Te me'e take'a, pa'i, o te ao nei e ko roa he ŋaro, 'e te me'e ta'e take'a va'ai mai e te 'Atua e ko ŋaro ki te hora hope'a.

5 Te hakari pa he hare 'ā, 'e e 'ite rō 'ā e tātou, hora era mo marere, te aura'a, hora era mo mate, e ai rō 'ā te hare 'āpī e tahi 'i te raŋi aŋa e te 'Atua mo tātou, he hakari e ko mate ki te hora hope'a. ² E noho nei tātou hai hakari nei he 'u-'ū nō te aŋa 'i te 'ati 'amo e tātou. Te me'e haŋa he tu'u hōrou mai te hora mo kamiare o te hakari nei ki te hakari 'āpī o te raŋi. ³ Ka ai atu he mate te hakari nei 'e he e'a te tātou vārua mai roto, e ko noho te vārua 'ina ō'ona hakari. ⁴ 'Ē-ē, e noho nei tātou hai hakari nei he 'u-'ū nō te aŋa 'i te 'ati 'amo e tātou. Ka ai atu pē ira, ta'e he mate te tātou me'e haŋa mo kore o te hakari, te me'e haŋa he mono o te hakari nei ki te hakari e ko mate ki te hora hope'a. ⁵ I haka tano ai i a tātou e te 'Atua mo rā me'e mau 'ā, 'e ko va'ai mai 'ā i te [Vārua Maitai] pa he tāpa'o: he haka tano tahi e ia i tā'ana me'e hōrea mai era.

⁶ 'O ira a mātou e ta'e 'aka-'aka nei te mana'u 'i ruŋa i te 'Atua. 'E, ko 'ite 'ana e mātou: e noho e oho nō nei mātou 'i roto i te hakari nei, ko te roa-roa iŋa 'ana mātou mai te kona era 'i ira te tātou Pū'oko Haka Tere. ⁷ E haka tere nei a mātou 'i te ao nei hai [haka moe i te mana'u] 'i ruŋa i a ia 'e 'i ruŋa i tā'ana me'e hōrea mai era, ka ai atu 'ina he take'a mai. ⁸ 'E 'ina he 'aka-'aka te mātou mana'u 'i ruŋa i a ia. Ka ai atu pē ira, te me'e haŋa mau o mātou he noho o mātou 'i te kona era 'i ira te tātou Pū'oko Haka Tere. ⁹ 'O ira, te me'e haŋa o mātou he aŋa i te me'e haŋa e te 'Atua, ka ai atu 'i te ao nei 'o ta'e 'i te ao nei. ¹⁰ A tātou ta'ato'a, pa'i, hoko tahi hoko tahi ka māroa ena 'i mu'a o te [Kiritō], mo kī mai e ia i te tano 'e i te ta'e tano o te tātou me'e aŋa, 'e mo va'ai mai e ia i te me'e tano ki te huru o te me'e i

aŋa 'i te hora e noho nō 'ā hai hakari nei, ka ai atu he me'e riva-riva 'o he me'e ta'e tano te me'e i aŋa.

Pē hē ana riva-riva ki te 'Atua

¹¹ He mo'a o mātou i te Kiritō 'e he haŋa mo ha'atura ki a ia, e kimi nei a mātou i te rāve'a ta'ato'a mo aŋi-aŋi e te nu'u i te roŋo parauti'a o te 'Atua, mo haka moe o rāua i te mana'u 'i ruŋa i a Ietū. Te 'Atua e 'ite rō 'ana e aŋa nei a mātou i te me'e nei hai māhatu ma'itaki, 'e a mātou e haŋa rō 'ā mo 'ite tako'a e kōrua. ¹² Ta'e e haka paka haka 'ou atu 'ā a mātou. E va'ai atu 'ana i te rāve'a mo koa o kōrua mo mātou, ki ai ai te kōrua vānaŋa mo pāhono ki te nu'u u'i i te tōro'a mau nō o te taŋata 'e ta'e 'ō i te me'e o roto i te māhatu.

¹³ Mo kī o te nu'u e ma'a-ma'a rō 'ā a mātou, 'ina kōrua ko tapa atu; te me'e ta'ato'a aŋa o mātou mo te 'Atua. 'E mo kī o te nu'u e haka topa riva-riva rō 'ā a mātou i te mana'u, ko 'ite 'ana e kōrua e aŋa nei mātou mo te kōrua riva-riva. ¹⁴ Te me'e haka tere, pa'i, i a mātou he haŋa o te Kiritō mo tātou mo te taŋata mai te hora aŋi-aŋi: he kope mau nō e tahi te me'e i mate mo te ta'ato'a 'e e tu'u rō 'ā pa he me'e ena ē: ta'ato'a nō i mate ai. ¹⁵ Te Kiritō i mate ai mo te ta'ato'a, ki aŋa ai e tātou e te nu'u ora i tā'ana me'e haŋa, 'e ta'e 'ō i te tātou me'e haŋa. A ia, pa'i, i mate ai 'e i ora haka 'ou mai ai mo tātou.

¹⁶ 'O ira a mātou e ta'e u'i haka 'ou ena i te taŋata hoki a rāua he nu'u hōnui 'o he nu'u ta'e hōnui, pa he mana'u iŋa o te taŋata o te ao nei. Pē ira mātou e u'i era i te Kiritō 'i mu'a 'ā, 'e, hora nei, 'ina he u'i haka 'ou pē ira. ¹⁷ Kope nō era o te Kiritō 'i te haka moe i te mana'u 'i ruŋa i a ia, he kope 'āpī e tahi; te mana'u 'e te noho iŋa ra'e ō'ona ko ŋaro 'ā, 'e ko ha'amata 'ana tō'ona noho iŋa 'āpī. ¹⁸ Te me'e ta'ato'a nei he aŋa o te 'Atua haka riva-riva i a tātou ki a ia hai Ietū Kiritō, 'e va'ai mai i te aŋa he haka 'ite pē hē te taŋata ana riva-riva ki a ia. ¹⁹ Hai mate era, pa'i, o Ietū Kiritō 'i ruŋa i te tātaurō i aŋa ai e te 'Atua i te rāve'a mo haka riva-riva i te taŋata ki a ia 'e mo ta'e tapa atu i te rāua hara. 'E ki a mātou i va'ai mai ai i te aŋa he haka 'ite he oho i te roŋo nei. ²⁰ He nu'u vānaŋa mātou hai 'iŋoa o te Kiritō, 'e hai mātou te 'Atua e vānaŋa atu ena ki a kōrua. 'O ira, hai 'iŋoa o te Kiritō he ani atu mātou: e haka moe kōrua i te mana'u 'i ruŋa i te roŋo parauti'a o ruŋa i te Kiritō mo riva-riva o kōrua ki te 'Atua.

²¹ Te Kiritō 'ina e tahi me'e ta'e tano i aŋa, 'e, ka ai atu pē ira, te 'Atua i haka ūtu'a rō i a ia mo te tātou hara, ki tano ai mo kī: a tātou, te nu'u haka moe i te mana'u 'i ruŋa i a Ietū, he nu'u tano ki tō'ona mata.

6 Hora nei, pa he nu'u hokorua mātou 'i te aŋa o te 'Atua, he ani atu: 'ina kōrua ko haka māu'a i te riva rahi o te 'Atua va'ai atu era e ia. ² I kī rō, pa'i, e ia 'i ruŋa i te [Pāpa'i Mo'a]:

«I te hora mo haka take'a i tō'oku riva rahi, i haka roŋo atu ai au i te kōrua pure;

'i te mahana mo haka e'a i te taŋata mai roto i te ūtu'a o te hara,
i hā'ū'ū atu ai au».

E te taina, ko te hora nei rā hora, he mahana mo e'a mai roto i te ūtu'a o te hara.

He 'ati topa 'i ruŋa i a Pauro

³ A mātou e hāpa'o rō 'ā i te mātou me'e aŋa, 'o aŋa i te me'e ta'e tano haka 'aka-'aka i te mana'u o te taŋata 'o [haka moe i te mana'u] 'i ruŋa i a Ietū, 'e 'o tuhi tā'ue mai i te ta'e tano o te mātou aŋa. ⁴ Hai me'e ta'ato'a aŋa e mātou e take'a ena he tāvini parauti'a mā-tou o te 'Atua. E ha'aoroma'i rō 'ana, pa'i, mātou hai haumārū i te 'ati, i te me'e kore, ⁵ i te tiŋa'i, i te puru 'i roto i te hare ma'u'aurī, i te haka tumu i te ture, i te aŋa paŋaha'a, i te ta'e ha'uru 'e i te maruaki. ⁶ E take'a tako'a ena he tāvini mātou o te 'Atua hai noho iŋa ta'e hara o mātou, hai 'ite i te parauti'a o ruŋa i a ia, hai riva o mātou, hai ha'aoroma'i o mātou i te rua, hai ai o te [Vārua Maitai] 'i roto i a mātou, hai haŋa parauti'a ki te rua, ⁷ hai hāpī i te roŋo parauti'a, 'e hai pūai o te 'Atua 'i roto i a mātou. Te noho iŋa tano nei o mātou ki te mata o 'Atua, 'i te hora ta'ato'a, pa he me'e e rua ma'u e te va'ehau 'i te rima 'i te hora o te tama'i, e tahi o rā me'e mo moto 'e te rua mo puru i a ia 'o pū.

⁸ E ai rō 'ā te nu'u haka nui-nui i a mātou, 'e te nu'u parau'ino mai. E ai rō 'ā te nu'u vānaŋa riva-riva 'e te nu'u vānaŋa rake-rake o ruŋa i a mātou. A rāua he kī nō mai te aŋa i te mātou reo-reo, ka ai atu he parauti'a te mātou me'e kī. ⁹ E u'i mai ena i a mātou pa he nu'u ta'e māhani e rāua, ka ai atu e 'ite riva-riva rō 'ā ko ai a mātou. He oho nō te aŋa o mātou mo mate i a rāua, 'e ko te ora iŋa 'ana. He tōtōā nō mai te aŋa, 'e, ka ai atu pē ira, 'ina a mātou he mate. ¹⁰ E tu'u rō 'ā a mātou pa he nu'u e mamae rō 'ā te māhatu, 'e, ka ai atu pē ira, ko te koa iŋa 'ā. E u'i mai ena i a mātou pa he nu'u veve, 'e, ka ai atu pē ira, e rahi rō 'ā te nu'u haka 'ono e mātou. E tu'u rō 'ā pa he me'e ena ē: 'ina e tahi mā-tou me'e, 'e te parauti'a e ai tahi rō 'ā.

¹¹ E te taina o Kōrinto ē, ta'ato'a me'e mana'u e mā-tou ko haka 'ite tahi atu 'ana. Ko va'ai tahi atu 'ā a mā-tou i te mātou māhatu. ¹² Mo ai o te hihi-hihi 'i roto o tātou, ta'e 'o te kore o te mātou haŋa ki a kōrua, he kore o te haŋa o kōrua mo mātou. ¹³ He ani atu ia a au, pa he ani iŋa o te matu'a ki tā'ana ŋā poki: e haŋa mai kōrua, pa he haŋa iŋa atu ena o mātou.

E haka tapa mai te me'e ta'e tano

¹⁴ E te taina, ko 'ite 'ana e tātou ta'ato'a e ko tano mo here 'i ruŋa i tū iuko 'ā e tahi hoi 'e e tahi 'uei. Pē ira 'ā e ko tano mo [hāipo-ipo] 'o mo ha'a'au i te aŋa e tahi mo aŋa te kope haka moe i te mana'u 'i ruŋa i a Ietū ararua ko te kope 'ina he haka moe i te mana'u 'i ruŋa i a Ietū. ¿Pē hē, pa'i, ana tano te me'e riva-riva ki te me'e rake-rake? 'E ¿pē hē te mā'eha ana hokorua i te pō'uri? ¹⁵ ¿Hoki e ha'a'au mau rō te [Kiritō] ararua ko Rukifero? ¿Hoki e ha'a'au mau rō te nu'u haka moe i te

mana'u 'i ruŋa i a Ietū 'e te nu'u ta'e haka moe i te mana'u 'i ruŋa i a ia? ¹⁶ 'E te 'itoro, ¿e tano mau rō 'i te kona ha'amuri 'Atua? E kī atu ena a au i te me'e nei 'o te ai a tātou pa he kona ha'amuri 'Atua. 'I ruŋa i te Pā-pa'i Mo'a e kī ena, pa'i, e te 'Atua:

«Ka noho nei a au 'i roto i a rāua,
a au mo 'Atua o rāua,
'e a rāua mo taŋata 'ā'aku».

¹⁷ 'E 'i te rua kona o te Pāpa'i Mo'a e kī tako'a ena:

«E e'a kōrua mai roto i te nu'u aŋa i te me'e ta'e tano 'e 'ina ko noho haka 'ou 'i muri;
'ina kōrua ko aŋa i te me'e ta'e tano pē rāua.
Pē ira he to'o a au i a kōrua mā'aku,
¹⁸ 'e he riro au he Matu'a mo kōrua,
'e a kōrua mo ŋā poki 'ā'aku.
Pē ira te 'Atua, i a ia te pūai ta'ato'a, i kī ai».

7 E te taina haŋa rahi ō'oku ē, te ŋā me'e nei he hōrea o te 'Atua mo tātou. 'O ira, e haka tapa tā-tou mai te me'e haka 'ō'one hai hara i te hakari 'e i te vārua. 'E, 'i te mo'a o tātou i a ia, e u'i mo tano o te tā-tou noho iŋa ki tō'ona mata ki te roa 'ina e tahi hara.

He koa iŋa o Pauro mo te nu'u o Kōrinto

² E mātaki mai te kōrua māhatu! 'Ina, pa'i, a mātou kai aŋa atu e tahi me'e ta'e tano, kai aŋa atu e tahi me'e mo haka tapa e tahi o kōrua mai te ara parauti'a o te 'Atua, 'e kai reo-reo atu mātou mo rava'a moni. ³ Ta'e he riri mo kōrua e kī atu ena i te ŋā me'e nei. 'I mu'a 'ā, pa'i, i kī rō atu au e ma'u rō 'ana a au i a kōrua 'i roto i tō'oku māhatu; ka ora 'o ka mate a au, e ko kore kōrua mai roto. ⁴ E koa rō 'ana a au mo kōrua, 'e e vānaŋa atu ena ta'e hai ri'a-ri'a. Ka ai atu e 'amo rō 'ana a mātou i te 'ati, ko te pūai iŋa 'ana tō'oku man-a'u 'e ko te koa iŋa 'ana a au.

⁵ I tu'u era a mātou ki Mātērōnia, 'ina a mātou he rava'a mo haka ora 'i te haka tātake nō mai e te nu'u ta'e haŋa mai, 'e 'i te ŋaro'a i te ri'a-ri'a 'i roto i a mā-tou. ⁶ 'E, o te 'Atua, haka pūai i te nu'u 'ina he haŋu toe, i haka pūai mai i a mātou hai tu'u iŋa mai o Tito. ⁷ 'E ta'e nō hai tu'u iŋa mai era ō'ona, tako'a hai 'ite mai e koa rō 'ana 'i a kōrua. Ko 'a'amu mai 'ana e ia i te rahi o te kōrua haŋa mo take'a i a mātou, 'e ko 'a'a-mu tako'a mai 'ana i te māui-ui e ma'u ena 'i roto i te kōrua māhatu he mana'u rahi mai o kōrua ki a au. He 'ata koa rō atu 'ai a au 'i te ŋā me'e ta'ato'a nei.

⁸ I 'ite era e au i māui-ui rō te kōrua māhatu 'i te pa-rau pāpa'i atu era e au, tē rā ia au ka mana'u: ko te 'aroha 'ō i haka ma'u atu ai. 'E hora nei, ka ai atu 'i rā parau i māui-ui ai te kōrua māhatu, ko kore 'ana te ha-ka 'aroha era ō'oku mo kōrua 'o te ai kai māu'a a au i pāpa'i atu ai. ⁹ 'E, ko koa 'ana a au, ta'e 'ō 'o te māui-ui o te kōrua māhatu, 'o te ai hai rā māui-ui i hāru haka 'ou ai te kōrua mana'u ki te 'Atua. Te me'e ŋaro'a era e kōrua he me'e haŋa o te 'Atua mo tā'ana nu'u. 'I te ai

pē ira, 'ina ia a mātou kai aña atu i te me'e ta'e tano ki a kōrua hai rā me'e pāpa'i atu era e au. ¹⁰ Ko rā māui-ui te māui-ui māhatu haña o te 'Atua, he me'e haka hāru i te mana'u o te tañata ki a ia, ma'u i a rāua mo e'a mai roto i te ūtu'a o te hara 'e mo rava'a i te ora 'āpī 'ina he hope'a ra'a. 'E te māui-ui māhatu pē ira ta'e he 'ati. Te māui-ui māhatu o te tañata ta'e haña ki te 'Atua, ta'e haka hāru i te mana'u o te tañata ki ruña i te 'Atua, he me'e ma'u i te tañata ki te mate, te au-ra'a, he ha'ata'a mau rō 'āvai mai muri i te 'Atua.

¹¹ Ka u'i rā he aha he aha te me'e riva-riva poreko mai te me'e n̄aro'a era e kōrua: ko haña 'ana kōrua mo haka tī-tika i te me'e hape o roto i te nūna'a tañata [haka moe i te mana'u] 'i ruña i a Ietū o Kōrinto, ko riri 'ana kōrua mo te me'e ta'e tano aña era e rā kope, 'e ko ri'a-ri'a 'ana 'o haka ūtu'a atu i a kōrua e te 'Atua ananake ko rā kope. Ko haña tako'a 'ana a kōrua mo oho atu ō'oku mo u'i i a kōrua, ko 'ata ha'atura 'ana a kōrua i tā'aku me'e kī atu era 'e ko haka ūtu'a 'ā i rā kope. Hai n̄ā me'e nei e take'a ena: 'ina e tahi hape o kōrua o rā me'e topa era. ¹² Hora pāpa'i atu era ō'oku i rā parau, tō'oku mana'u ta'e 'i ruña i te kope hara era, 'o 'i ruña i te kope māui-ui era o te māhatu 'i rā hara. Ko 'ite 'ana e te 'Atua: tō'oku mana'u i pāpa'i atu ai mo aņi-aņi e kōrua i te rahi o te haña o kōrua mo mātou. ¹³ He 'ite o mātou ko haka tano tahi 'ana e kōrua i te me'e pāpa'i atu era i 'ata haņu ai a mātou.

Ka ai atu pē ira, 'ata hau rō atu te mātou koa 'i te take'a i a Tito e koa rō 'ā mo kōrua. Hai me'e aña era e kōrua i 'ata haka haņu ai i a ia. ¹⁴ Ko haka paka era 'ana e au ki a Tito: a kōrua nu'u ha'atura, 'e 'ina kai hape rā vānaña era 'ā'aku. Ko take'a 'ā, pa'i, e Tito, he parauti'a, pa he me'e ta'ato'a kī atu e mātou ki a kōrua. ¹⁵ E topa nei te mana'u o Tito ki te mo'a 'e ki te ha'atura iña era o kōrua ki a ia, he 'ata rahi rō atu 'ai tō'ona haña mo kōrua. ¹⁶ 'E hora nei, ko 'ata koa 'ana a au he 'ite ō'oku: a kōrua nu'u haka tano i te kōrua me'e kī!

E riva ki te rua

8 E te taina, e haña rō 'ā a mātou mo 'a'amu atu he aha te me'e riva-riva i poreko 'i roto i te nūna'a tañata [haka moe i te mana'u] 'i ruña i a Ietū o te kona era ko Mātērōnia 'o te to'o mo rāua i te riva rahi o te 'Atua. ² Ka ai atu i topa rō te 'ati taparahi-ta'ata ki te nu'u nei, ko te koa iña 'ana, 'e, ka ai atu he nu'u veve, 'i te rāua riva, pa he 'ono e va'ai era i te moni. ³ He mata'ite a au e va'ai era hai māhatu e haka tano ki te me'e ai o rāua, 'e 'ātā 'ata rahi rō atu. Te nu'u nei, hai mana'u mau 'ā o rāua, ⁴ i haka koni mai ai mo ha'ati'a o mātou i a rāua mo hā'ū'ū tako'a hai tara mo te nu'u haka moe i te mana'u 'i ruña i a Ietū o Hērutarema. ⁵ 'E ta'e he moni nō te me'e i va'ai mai e te nu'u nei, pa he me'e mana'u era e mātou. 'I ra'e i va'ai ai i a rāua mo tāvini ki te 'Atua, 'e ki oti ki a mātou, pa he me'e haña o te 'Atua.

⁶ 'I te nehe-nehe o rā me'e aña era e te taina o Mātērōnia, 'i mātou ko ani 'ā ki a Tito mo oho atu

ō'ona mo haka mao i te aña ha'amata era e ia 'i mu'a 'ā he haka taka-taka, mai i a kōrua, i te moni mo te taina o Hērutarema. ⁷ A kōrua he nu'u haka kē 'i te me'e ta'ato'a: 'i te haka moe i te mana'u 'i ruña i a Ietū, 'i te 'ite mo vānaña, 'i te 'ite i te hāpī parauti'a o te 'Atua, 'i te haña mo hā'ū'ū, 'e 'i te haña mo te rua, he me'e i 'ite e kōrua mai i a mātou. Pē ira tako'a 'ana kōrua ana haka kē 'i te aña riva nei: he ha'aputu i te moni 'i roto i a kōrua mo te taina veve o Hērutarema.

⁸ Ta'e a au e kī atu ena i te me'e nei pa he me'e mo ha'atura mau 'ā e kōrua. Mo riva o kōrua mo ha'atura, ko tano 'ā. Tō'oku haña mau mo u'i hoki he parauti'a mau 'ana te kōrua haña mo te rua, pa he me'e i take'a e au 'i te taina o Mātērōnia. ⁹ Ko 'ite 'ana, pa'i, kōrua: te tātou Pū'oko Haka Tere ko Ietū Kiritō, ka ai atu he 'ono 'i te ranji, 'i tō'ona riva rahi, i haka veve nō i a ia mo te kōrua riva-riva, ki 'ono ai kōrua 'i te me'e o te 'Atua hai rā haka veve iña era ō'ona.

¹⁰ Mo te kōrua riva-riva he haka 'ite atu a au i tō'oku mana'u o ruña i tū me'e ha'amata aña era e kōrua hai koa 'i tū matahiti oti ena, he haka taka-taka i te moni mo te nu'u veve o Hērutarema. ¹¹ Te me'e haña: he haka mao i rā aña hai me'e tara o kōrua hai koa take'a mau era 'ā e au i a kōrua 'i mu'a 'ā hora mana'u era mo aña i rā me'e. ¹² Mo ai 'i roto i te kōrua māhatu te haña parauti'a mo va'ai, 'e te me'e va'ai e kōrua e tano rō 'ā ki te me'e ai o kōrua, he koa te 'Atua. 'Ina, pa'i, a ia he no-no'i mai 'ata rahi te me'e ki te me'e ai o tātou mo va'ai.

¹³ Ta'e a au e kī atu ena mo va'ai tahi i te me'e ai o kōrua, 'o kore te kōrua me'e hai hā'ū'ū ki te rua. Te me'e haña he haka tano-tano mo te ta'ato'a. ¹⁴ 'I te hora nei e ai rō 'ā i a kōrua te me'e 'ina i te nu'u o Hērutarema. Pe mu'a ka oho ena, pēaha, he ai i a rāua te me'e e hape rō 'ā i a kōrua, 'e mo hā'ū'ū o te taina 'i roto i a rāua, e ko hape te me'e. ¹⁵ Mo aña o kōrua pē ira, he topa pa he me'e kī 'i ruña i te [Pāpa'i Mo'a] o ruña i te itaraera, hora va'ai era e te 'Atua i te [mānā] mai te ranji: «Te kope ha'aputu rahi, 'e te kope ta'e ha'aputu rahi, ko tū mākona iña 'ana ararua».

He uña iña i a kuā Tito ki Kōrinto

¹⁶ Māuru-uru ki te 'Atua 'o te haka poreko 'i roto i te mana'u o Tito te haña mo hā'ū'ū atu ki a kōrua pē au. ¹⁷ I kī era e mātou mo oho atu mo u'i i a kōrua, 'ina kai pāto'i mai. Te parauti'a, ko koa atu 'ā 'i te haña mo oho atu mo u'i 'e mo hā'ū'ū atu i a kōrua.

¹⁸ 'I muri i a Tito i uña atu ai a au i te taina e tahi. E vānaña riva-riva rō 'ā o ruña i a ia te taina ta'ato'a o Mātērōnia, he tano o tā'ana aña he haka 'ite i te [roņo riva-riva o te 'Atua]. ¹⁹ Te kope nei o te n̄ā taina mau nei 'ā i ha'ata'a mo hokorua tako'a mai 'i te mātou ara ki Hērutarema ma'u i te moni mo te taina veve o ira. Te me'e nei he rāve'a e tahi mo ha'ahana-hana o te tañata ki te 'Atua 'e mo take'a i te haña o mātou mo hā'ū'ū. ²⁰ I uña atu ai mātou i te kope nei 'i muri i a Tito 'o ai tā'ue te vānaña mo kī i te hape o te haka tere iña o mātou i te moni ena. ²¹ Te me'e haña o mātou he aña

riva-riva i te aŋa nei ki te mata o te 'Atua, 'e pē ira tako'a 'ana ki te mata o te taŋata.

²² 'I muri i a kuā Tito i uŋa tako'a atu ai a au i te taina haka 'ou e tahi. Te kope nei hai rauhuru atu me'e aŋa e take'a ena i te rahi o tō'ona haŋa mo hā'ū'ū 'i te aŋa o te 'Atua. 'E hora nei, ko 'ata haŋa 'ana a ia mo hā'ū'ū 'o te 'ite e ko ta'e va'ai kōrua hai māhatu mo te taina veve o Hērutarema. ²³ 'E o ruŋa i a Tito he kī atu a au: a ia he hokorua ō'oku 'e e aŋa nei a māua mo te kōrua riva-riva. 'E te nā taina haka 'ou ena e rua o muri he nu'u mo'a 'e ha'atura ki te [Kiritō] uŋa atu e te nu'u haka moe i te mana'u 'i ruŋa i a Ietū o te nā kona nei. ²⁴ 'E kuā taina, e hāpa'o kōrua i a rāua hai haŋa, ki take'a ai e tū nā nu'u uŋa atu ena i a rāua, he parauti'a mau 'ā te mātou me'e kī o ruŋa i a kōrua.

9 'E o ruŋa i te me'e he ha'aputu i te moni mo te taina veve o Hērutarema, jzmo aha atu 'ā a au ana pāpa'i haka 'ou atu?! ² Ko 'ite riva-riva 'ana, pa'i, e au e haŋa rō 'ana a kōrua mo hā'ū'ū. 'E tā'aku aŋa he 'a'amu nō hai koa ki te nu'u o Mātērōnia pē nei ē: mai tū matahiti oti era 'ā, a kōrua, te nu'u o Ākāia, e haŋa rō 'ana mo hā'ū'ū. 'E te rahi ra'a o te nu'u o ira ko haŋa tako'a 'ā mo hā'ū'ū i te aŋa nei, he 'ite i te rahi o te haŋa o kōrua mo hā'ū'ū.

³ 'E, kai ai atu pē ira, he uŋa atu a au i te nā taina nei mo hā'ū'ū atu, 'o ta'e tano tā'aku vānaŋa kī era o ruŋa i a kōrua. Te me'e haŋa: ka tu'u atu ena a au, ko taka-taka 'ā te moni i a kōrua, ⁴ 'o oho tā'ue atu te nu'u o Mātērōnia 'i muri i a au he take'a kai taka-taka 'ā i a kōrua, 'e he ha'amā a au. 'E, jzmo aha atu 'ā ana kī atu pē hē kōrua ka ha'amā tako'a ena?! 'E 'a'amu rō 'ana, pa'i, mātou: a kōrua e haka tano tahi rō 'ana i te kōrua me'e kī. ⁵ 'O ira a au i mana'u ai mo vānaŋa ki te nā taina nei mo oho atu mo u'i i a kōrua 'i ra'e ki a au, mo hā'ū'ū atu mo haka mao i rā me'e kī era e kōrua. Pē ira ka tu'u atu ena a mātou, he take'a e te taina ta'ato'a i va'ai ai a kōrua hai māhatu, ta'e 'ō 'o te ai ko kī atu 'ā.

E hā'ū'ū hai māhatu

⁶ 'E mana'u kōrua ki te vānaŋa nei: «Te kope ta'e 'oka rahi, me'e ta'e rahi te me'e ka kato era; 'e te kope 'oka rahi, me'e rahi ka kato era». ⁷ Ta'ato'a o kōrua ana va'ai i te me'e mana'u 'i roto i te māhatu hai haŋa, 'e ta'e 'ō 'o te ai ko kī atu 'ā e te rua. Te 'Atua, pa'i, e haŋa rō 'ā ki te kope va'ai i te me'e hai koa. ⁸ 'E i a ia te pūai mo ha'amaitai hai rauhuru nō atu me'e 'o hape e tahi me'e o kōrua, 'e, 'i te rahi, he topa 'ātā mo hā'ū'ū ki te tētahi. ⁹ 'E kī rō 'ana, pa'i, 'i ruŋa i te [Pāpa'i Mo'a] mo te kope riva:

«E rahi rō 'ā te va'ai iŋa ki te nu'u veve,
'e tō'ona riva era e ko rehu ki te hora hope'a».

¹⁰ 'O te 'Atua te va'ai i te karu ki te nu'u 'oka, 'e i te kai ki te taŋata. 'Ā'ana tako'a te va'ai 'e te haka rahi i te me'e ai o kōrua, mo 'ata rahi o te kōrua hā'ū'ū ki te rua. ¹¹ Pē ira ka ai ena rauhuru nō atu kōrua hauha'a 'e he tano mo hā'ū'ū ki te rua hai māhatu. Te moni haka

taka-taka ena e kōrua ka ma'u ena e mātou he rāve'a haka 'ou e tahi mo māuru-uru o te tātou nā taina era o Hērutarema ki te 'Atua. ¹² Te ma'u i te hā'ū'ū nei ki te nā taina era o ira ta'e nō e ma'u 'ā i te me'e hape o rāua, e aŋa tako'a 'ā i te me'e mo 'ata māuru-uru o rāua ki te 'Atua. ¹³ Hai hā'ū'ū ena o kōrua he ha'ahana-hana te taina o Hērutarema ki te 'Atua 'i te 'ite e ma'u 'e e ha'atura rō 'ana kōrua ki te [roŋo riva-riva o te 'Atua] o ruŋa i a Ietū Kiritō, 'e 'i te rahi o te kōrua hā'ū'ū iŋa ki a rāua 'e ki te taŋata ta'ato'a. ¹⁴ 'E 'ātā he pure hai māhatu mo kōrua 'i te take'a i te riva rahi o te 'Atua 'i ruŋa i a kōrua. ¹⁵ jKi māuru-uru tahi tātou ki te 'Atua 'o te va'ai mai i te hauha'a hope'a o te nui-nui, hauha'a 'ina he vānaŋa mo ha'aaura'a, he Poki ena 'ā'ana!

He pāhono iŋa o Pauro ki te taina o Kōrinto

10 'E te taina, nā 'i roto i a kōrua te nu'u e ha'a'ino rō 'ā i a au pē nei ē: 'i te hora ō'oku 'i muri i a kōrua, 'ina a au he kī atu ki te kōrua 'āriŋa i te kōrua hape, 'e, 'i te hora mo pāpa'i atu, he ture nō atu tā'aku aŋa. 'O ira, a au, a Pauro, he ani atu hai haŋa 'e hai riva rahi o te [Kiritō]: ² Ka u'i ka haka tī-tika rō 'ai te nā nu'u ena, nu'u mana'u: a mātou e haka tere nei hai mana'u taŋata mau nō, 'o tu'u atu au, he ture atu ki a kōrua ananake ko nā nā nu'u. ³ Ka ai atu a mātou he taŋata noho 'i te ao nei, ta'e pa he taŋata o te ao nei e moto nei. ⁴ 'E te mātou me'e ma'u mo moto ta'e he me'e o te ao nei, he pūai o te 'Atua mo rē ki te mana'u ta'ato'a poreko mai i a Rukifero ta'e haka rē i te taŋata mo haka hāhine ki te 'Atua. Hai pūai nei o te 'Atua e rē nei mātou ki te mana'u o te nu'u ta'e haŋa mai, ⁵ 'e pē ira tako'a 'ā ki te mana'u o te nu'u te'o-te'o ta'e ha'ati'a i a rāua mo māhani ki te 'Atua. Pē ira e hā'ū'ū nei a mātou ki te nu'u mo huri ki te 'Atua 'e mo mana'u o rāua pa he me'e haŋa o te Kiritō. ⁶ 'E ki take'a ia e mātou i te rahi ra'a o kōrua e ha'atura parauti'a mau rō 'ā ki te me'e ta'ato'a haŋa o te Kiritō, 'i rā hora he u'i mātou he haka ūtu'a i te nu'u o roto i a kōrua ta'e ha'atura ki a ia.

⁷ 'E haka topa te kōrua mana'u o ruŋa i te me'e ko 'ite riva-riva 'ā e kōrua o ruŋa i a mātou. Nā, pa'i, 'i roto i a kōrua te nu'u kī: a rāua he tāvini parauti'a o te Kiritō. 'E 'ite e te nu'u era: a mātou tako'a he tāvini o te Kiritō. ⁸ 'E mo ai tā'ue i rahi rō tō'oku te'o-te'o iŋa atu: i a au te parau mo haka tere i a kōrua a te ara parauti'a o te 'Atua, e ko ha'amā a au. O te tātou Pū'oko Haka Tere, pa'i, i va'ai mai mo haka pūai atu i te kōrua haka moe iŋa i te mana'u 'i ruŋa i a ia, ta'e 'ō mo haka tapa i te kōrua mana'u mai ruŋa. ⁹ 'Ina kōrua ko mana'u e haŋa 'ana 'ō a au mo haka ri'a-ri'a i a kōrua hai parau pāpa'i atu e au. ¹⁰ 'Ī a au e kī atu ena: nā 'i roto i a kōrua te nu'u kī: pūai ri'a-ri'a tā'aku vānaŋa 'i te hora pāpa'i atu, 'e, 'i te hora 'i mu'a i a kōrua, e tu'u rō 'ā pa he kope ta'e pūai 'e ta'e 'ite mo tātara. ¹¹ Te nu'u kī i te vānaŋa nei e 'ite: pa he pūai ena 'ā o te mātou huru 'i ruŋa i te parau pāpa'i atu ena, pē ira te mātou pūai ka

take'a ena e rāua ka tu'u atu ena a mātou, ka haka tano tahi ena i te mātou me'e kī.

¹² Ta'e mātou o roto o te nu'u te'o-te'o. Te nu'u nei, 'i te hora u'i hoki e tano rō 'ā te rāua aña mo te 'Atua, e hāito ena hai me'e aña 'e mana'u e rāua mau 'ā, ta'e 'ō hai mana'u o te 'Atua. 'Te oho iña nei he me'e ma'a-ma'a e tahi! ¹³ A mātou, ta'e pa he nu'u nei. 'I te hora vānaña o mātou o ruña i te mātou aña mo te 'Atua, e hāito rō 'ana te mātou me'e kī ki te me'e ha'ati'a nō mai e te 'Atua. 'E o te 'Atua te kī mai 'ātā ki kona hē ana tu'u te mātou aña, 'e 'ā'ana te ha'ati'a mai i a mātou mo tu'u atu 'ātā ki a kōrua ena 'i Kōrinto. ¹⁴ 'O ira 'ina a mātou he e'a mai te me'e ha'ati'a mai e te 'Atua 'i te hora kī atu: i a mātou te parau mo haka tere i a kōrua a te ara o te 'Atua. 'Āhani mātou i ta'e ai 'i roto i a kōrua 'i mu'a 'ā, ko e'a era 'ā ia a mātou mai rā roa ha'ati'a mai era e te 'Atua. 'E te parauti'a, ko mātou te nu'u ra'e i haka 'ite atu i te [ronjo riva-riva o ruña i a Ietū Kiritō]. ¹⁵ 'E 'ina tako'a a mātou he te'o-te'o 'i te aña o te rua, 'o e'a a mātou mai rā roa. Te mātou me'e haña he pūai he oho te kōrua haka moe iña i te man-a'u 'i ruña i a Ietū, mo 'ata rahi mo oho te mātou aña 'i roto i a kōrua.

¹⁶ E haña tako'a rō 'ā a mātou mo oho mo haka 'ite i te [ronjo riva-riva o te 'Atua] 'i te kona 'ata roa mai te kona ena 'i ira a kōrua, hai kona 'ina he kope ra'e i hāpī, 'o te'o-te'o a mātou 'i te aña o te rua. ¹⁷ E kī rō 'ā, pa'i, 'i ruña i te [Pāpa'i Mo'a]: «Te kope haña mo haka paka i tā'ana me'e aña, te tano mau: e haka paka i te me'e aña e te tātou Pū'oko Haka Tere». ¹⁸ Te kope koa o te 'Atua ta'e he kope te'o-te'o kī pē nei ē: a ia e aña riva-riva rō 'ā mo te 'Atua; he kope o ruña e kī ena e te 'Atua: «E koa rō 'ana a au mō'ona».

Ko Pauro 'e he [āpōtoro] reo-reo

11 'iPē hiva 'ā a kōrua ana ha'aoroma'i mai i te vānaña tu'u pa he me'e ma'a-ma'a ka kī atu ena! E u'i e ha'aoroma'i mai. ² 'Ina kōrua ko rehu: e haña rō atu 'ana a au ki a kōrua pa he haña iña ena 'ā o te 'Atua ki tō'ona tañata. A kōrua ko haka ha'amo'a-mo'a era 'ana e au mo hāipo-ipo ki te kenu mau nō e tahi, he [Kiritō], 'e ko haña 'ana a au mo ma'u i a kōrua ki mu'a i a ia pa he vi'e 'ina kai noho 'ā ki te tañata 'e hāpa'o i a ia mo tā'ana kenu mau nō. ³ 'E, e ri'a-ri'a rō 'ā a au 'o kore te kōrua haña parauti'a ki te Kiritō, pa he me'e topa ki a [Eva] 'i te hora haka ronjo ki te reo-reo o tū kōreha era ko Rukifero. ⁴ 'E, nā kōrua e haka ronjo 'ā hai koa ki te nu'u vānaña atu o ruña i te Ietū kē ki te Ietū haka 'ite atu era e mātou. E haka ronjo tako'a 'ana hai koa ki te ronjo kē ta'e hāpī atu e mātou, 'e ki te vārua kē ta'e ki te [Vārua Maitai] noho 'i roto i a kōrua. ⁵ 'Ina a au he ŋaro'a pē nei ē: kope ta'e hōnui a au 'i muri i tū ŋā 'āpōtoro reo-reo tu'u atu ena ki a kōrua mana'u ena pē nei ē: 'ata hau rō atu 'ō a rāua 'i te hōnui ki a au. ⁶ He aņi 'ana, pēaha, kope ta'e haka kē a au mo vānaña. Ka ai atu pē ira, e 'ite rō 'ana a au i te hāpī parauti'a o ruña i te 'Atua, 'e ko haka take'a ko oho atu 'ā hai me'e ta'ato'a aña e mātou.

⁷ 'I te hora haka 'ite atu ō'oku i te [ronjo riva-riva o te 'Atua], 'ina a au he kī atu mo 'auhau mai; i aña a au mo rava'a o tā'aku rāve'a. Ki te kōrua mana'u, 'e kope ta'e hōnui au 'o te me'e ō'oku pē ira? I aña ai a au pē ira mo te kōrua riva-riva. 'Ka kī 'ō te me'e nei he hara e tahi? ⁸ Te parauti'a, i tano ai a au mo aña atu ki a kōrua ta'e e 'auhau mai 'i te me'e era i haka ma'u rō mai e te tētahi taina o te tētahi atu kona hai me'e tara mō'oku. ⁹⁻¹⁰ 'E, 'i rā hora era ō'oku 'i muri i a kōrua, e hape era tā'aku me'e, 'ina a au he no-no'i atu. O te taina tu'u mai mai Mātērōnia i hā'ū'ū mai. A au, pa'i, e u'i rō 'ana 'o riro a au he me'e pañaha'a e tahi mo kōrua, 'e pē ira a au e aña e oho nei 'i te kona ta'ato'a o Ākāia. 'O ira, 'ina e tahi kope o rā ŋā kona mo kī i tō'oku reo-reo ana te'o-te'o a au o ruña i te ta'e no-no'i i te moni mo haka 'ite i te ronjo riva-riva o te 'Atua. 'E tā'aku vānaña nei e kī atu ena pa he parauti'a ena 'ā o tā'aku vānaña ta'ato'a kī atu o ruña i te Kiritō. ¹¹ Te ta'e no-no'i atu ō'oku mo hā'ū'ū mai, 'e ta'e haña atu 'ana a au ki a kōrua? 'He 'Atua te me'e i 'ite e haña rō atu 'ana a au!

¹² 'E, e ko haka kore a au i tō'oku haka tere iña nei he ta'e no-no'i atu hai moni, 'o te'o-te'o tū nu'u tu'u atu ena ki a kōrua pē nei ē: e aña rō 'ana a rāua pa he aña iña nei 'ā o mātou. ¹³ A rāua he 'āpōtoro reo-reo e haka tu'u rō 'ana i a rāua pa he 'āpōtoro o te Kiritō. ¹⁴ Te me'e nei ta'e he me'e mo māere; a Rukifero mau 'ā e haka tu'u rō 'ana i a ia pa he merahi 'ana-'ana o te 'Atua. ¹⁵ 'E mo aña o Rukifero i te me'e tu'u pē ira, ta'e ia he me'e mo māere te haka tu'u o te nu'u aña ki a ia pa he nu'u tano aña ki te 'Atua. Te me'e ka topa ena ki te nu'u pē nei he ūtu'a tano ki te rāua me'e aña.

He haka paka iña o Pauro

¹⁶ 'I a au he kī haka 'ou atu: 'ina kōrua ko mana'u e ma'a-ma'a rō 'ana a au. 'E mo ai pē ira e mana'u ena, ka haka rē mai ia mo vānaña atu ō'oku pa he ma'a-ma'a, ki tano tako'a ai au mo te'o-te'o 'iti-'iti atu o ruña i a au mau 'ā, ¹⁷ ka ai atu te te'o-te'o nei he me'e ma'a-ma'a e tahi 'e ta'e 'ō he me'e mo koa o te 'Atua. ¹⁸ Nu'u ri'a-ri'a, pa'i, te nu'u, hai mana'u tañata, e te'o-te'o ena o ruña i a rāua 'e o ruña i te rāua me'e aña. 'He aha ia a au ana ta'e te'o-te'o tako'a atu? ¹⁹ 'iA kōrua e mana'u ena he nu'u mārama-rama kōrua, 'e te aña he ha'aoroma'i hai haña i te nu'u ma'a-ma'a! ²⁰ Mo tu'u atu, pa'i, o te nu'u ha'ariri i a kōrua he 'ekaravo o rāua, te nu'u to'o i te kōrua me'e, te nu'u reo-reo atu, te nu'u ta'e haka au atu, 'e te nu'u vā-vā atu he ha'aoroma'i e kōrua. ²¹ 'iKo te ha'amā 'ō 'i te pūai kore o mātou mo me'e tako'a atu pē rāua!

'E, 'i te me'e era 'ina a rāua he ri'a-ri'a mo te'o-te'o, 'ina tako'a ia a au e ko ri'a-ri'a, ka ai atu pa he kope ma'a-ma'a a au e vānaña atu ena. ²² 'He [evereo] a rāua? Pē ira tako'a 'ana a au. 'He itaraera a rāua? Pē ira tako'a 'ana a au. 'He hakaara a rāua o [Aparahama]? Pē ira tako'a 'ana a au. ²³ 'He tāvini a rāua o te Kiritō? 'Ata hau rō atu tō'oku tāvini iña ki te Kiritō ki a rāua, ka ai atu 'i tō'oku kī i te me'e nei, e vānaña 'ana a au pa he

ma'a-ma'a. 'Ata rahi rō atu tō'oku aña mō'ona ki a rāua, 'ata rahi rō atu tō'oku puru iña 'i roto i te hare ma'u'aurī 'o te aña ki te Kiritō ki a rāua, 'ata rahi rō atu te tiña'i iña mai i a au, 'e i rahi rō te mahana i oho rō a au mo mate. ²⁴ E rima tiña'i iña mai e te [hūrio] e toru 'ahuru mā iva 'uaka ki te tua'ivi. ²⁵ E toru pu'a-pu'a iña mai hai miro, 'e e tahi tama'i iña mai hai mā'ea. E toru oho iña o'oku 'i ruña i te pahī i emu ai te pahī. E tahi pō, e tahi 'ōtea i noho ai a au 'i roto i te vaikava.

²⁶ 'I tō'oku ara ta'ato'a i piri rō mai me'e rahi nō atu 'ati: he rio ko 'ata rahi 'ā e te vai, he toke-toke, he haña o tō'oku tañata he hūrio 'e o te nu'u o te rua henua mo tōtōā mai. I piri mai ai te 'ati nei 'i te kona noho tañata, 'i 'uta, 'i roto i te vaikava, 'e 'i muri i te nu'u kī e haka moe rō 'ana a rāua i te mana'u 'i ruña i a Ietū 'e, te parauti'a, ta'e pē ira. ²⁷ 'I rā nā ara tako'a i rahi rō tā'aku aña 'e i rohi-rohi rō a au; i rahi rō te mahana 'i-na a au kai ha'uru; 'i tō'ona mahana i maruaki rō 'e i pohe rō ki te vai. I ai rō te mahana 'ina a au kai kai, 'e kē mahana i take'o rō 'i te kahu kore mo pu'a.

²⁸ 'E ta'e nō 'ō he nā me'e nei te me'e i topa mai ki a au; tako'a paurō te mahana he mana'u nō tā'aku aña ki te nu'u ta'ato'a [haka moe i te mana'u] 'i ruña i a Ietū, ²⁹ 'o viri tā'ue e tahi o rāua ki roto 'i te hara 'o te ta'e pūai o tō'ona haka moe iña i te mana'u 'i ruña i a Ietū 'e 'o te haka hara i a ia e te kope e tahi. Ka me'e era, he riri i a au mo rā kope era 'ā'ana i haka hara.

³⁰ Me'e ta'e haña 'ā'aku he te'o-te'o o ruña i a au; 'e mo te'o-te'o atu, he te'o-te'o atu ia a au 'i tō'oku ta'e pūai. ³¹ Te 'Atua, Matu'a o te tātou Pū'oko Haka Tere ko Ietū, kope ki a ia ana ha'ahana-hana 'ātā ki te hora hope'a, ko 'ite 'ā e kī atu 'ana a au i te parauti'a. ³² 'Ā! 'I te hora era o'oku 'i Rāmako, te suerekao aña ki te 'ariki ko 'Āreta i haka 'auario rō i te 'ōpani o ira mo 'a-'aru i a au. ³³ Ka ai atu pē ira, i ai rō te nu'u i haka topa i a au ki haho o Rāmako 'i roto i te kānato. Pē ira a au i tere ai mai te rima o rā suerekao.

He me'e haka take'a 'e haka 'ite ki a Pauro

12 'Ina e tahi me'e mo rava'a e te kope e tahi mo te'o-te'o o ruña i a ia mau 'ā. 'E, ka ai atu pē ira, 'i a au he vānaña atu o ruña i te me'e haka take'a 'e haka 'ite mai e te tātou Pū'oko Haka Tere. ² Ka ho'e 'ahuru mā maha matahiti a tu'a i ma'u ai e te [Kiritō] i a au, kope [haka moe i te mana'u] 'i ruña i a ia, ki te ranji. Kai 'ite riva-riva mai hoki hai hakari mau 'ā 'o i to'o vārua nō; he 'Atua te me'e i 'ite. ³⁴ Te me'e nō 'ā'aku i 'ite: ko tu'u 'ana a au ki te ranji (ka ai hai hakari 'o hai vārua, he 'Atua mau nō te me'e i 'ite). 'I ira i nāro'a ai e au i te me'e 'ina he vānaña o te ao nei mo ha'aaura'a atu, 'e 'ina tako'a he ha'ati'a e te 'Atua mo haka 'ite ki te tañata. ⁵ E tano nō a au mo haka paka atu 'o te topa mai o te me'e nei ki a au; ka ai atu pē ira, 'ina nō a au he haña mo haka paka atu. 'E, mo haka paka atu, he haka paka atu ia a au i a au pē hē te 'Atua e haka take'a ena i tō'ona pūai 'i ruña i te kope ta'e pūai pē au. ⁶ 'E, ka haña atu a au mo haka paka atu o ruña i rā me'e, e ko riro he me'e ma'a-ma'a e tahi 'i te

me'e era e kī atu 'ana a au i te parauti'a. 'E 'ina a au he aña pē ira, 'o mana'u tā'ue rō e te nu'u: te me'e haka nui-nui i a au he to'o iña o te Kiritō i a au ki te ranji, 'e ta'e 'ō he noho iña tano 'e he hāpī iña parauti'a o'oku, he me'e take'a 'e nāro'a e rāua.

⁷ 'E, 'o mana'u au i hau rō atu a au ki te rua 'o te haka take'a mai 'e 'o te haka 'ite mai e te 'Atua i te me'e hope'a o te nui-nui 'i ruña i te ranji, he ha'ati'a e te 'Atua i a Rukifero mo tōtōā mai i a au hai māui-ui. ⁸ E toru o'oku ani iña ki tō'oku Pū'oko Haka Tere mo to'o i te 'ati nei mai ruña i a au. ⁹ 'E pē nei i kī mai ai: «'Ina. Ko ha'ati'a 'ana, pa'i, e au mo māui-ui o'ou, mo aña-aña e koe pē nei ē: hai riva rahi nei o'oku 'ina a'u me'e haña toe mo ha'aoroma'i i te 'ati ta'ato'a piri atu, 'e mo aña-aña tako'a o'ou: te pūai o'oku e 'ata take'a ena 'i te hora hā'ū'ū o'oku ki te nu'u pūai kore». Pē ira a Ietū i kī mai ai. 'O ira e koa rō 'ana a au 'e e te'o-te'o rō 'ana o tō'oku ta'e pūai, mo 'ite e te nu'u pē nei ē: hai pūai mau nō o te Kiritō a au e tāvini nei ki a ia. ¹⁰ 'Ē-ē, e koa rō 'ana a au 'o tō'oku ta'e pūai, 'o te vā-vā mai, 'o te kore o tā'aku me'e, 'o te tute mai mo tōtōā 'e 'o te 'ati ta'ato'a topa mai 'i ruña i a au 'i te ai o'oku 'a Ietū Kiritō; 'i te hora ta'e pūai o'oku, pa'i, 'i rā hora mau 'ā e 'ata pūai ena a au hai pūai o'ona.

¹¹ He hape o kōrua i vānaña ma'a-ma'a atu ai a au o ruña i a au; mo kōrua, pa'i, e vānaña riva-riva o ruña i a au. Ta'e te nā [āpōtoro] reo-reo ena 'ata hau ki a au, ka ai atu ta'e a au he kope hōnui. ¹² Te me'e tāpa'o i te tañata pa he āpōtoro parauti'a, pa he aña i te mana 'e he tētahi atu me'e mo māere e te tañata aña hai pūai o te 'Atua, i aña tahi rō a au 'i roto i a kōrua hai ha'aoroma'i. ¹³ Te me'e mau nō 'ā'aku i ta'e aña 'i roto i a kōrua, aña e au 'i roto i te tētahi nūna'a tañata haka moe i te mana'u 'i ruña i a Ietū, he ta'e no-no'i atu e tahi me'e, 'o ai a au pa he me'e pañaha'a e tahi o kōrua mo 'amo. 'E mo ta'e au atu o rā me'e, jka haka rehu atu!

He mana'u o Pauro mo hoki ki Kōrinto

¹⁴ Hora nei ko rito 'ana a au mo oho atu i tō'oku toru ara u'i i a kōrua, 'e, ki tu'u atu a au, e ko haña a au mo riro he me'e pañaha'a e tahi mo kōrua. Ta'e he me'e o kōrua tā'aku me'e haña, ko kōrua mau 'ā. He matu'a, pa'i, te me'e mo ha'aputu i te moni mo tā'ana poki, ta'e 'ō he poki mo te matu'a. ¹⁵ 'E hai koa a au ka haka pau tahi atu ena i tā'aku me'e mo kōrua, 'e 'ātā i a au mau nei 'ā mo te kōrua riva-riva. Mo 'ata haña atu ia o'oku ki a kōrua, jhe rehe he oho hō te kōrua haña iña mai?

¹⁶ Ko 'ite riva-riva 'ana a kōrua pē nei ē: 'i te hora era o'oku 'i muri i a kōrua 'ina a au kai ai pa he me'e pañaha'a e tahi mo kōrua mo 'amo. Ka ai atu pē ira, tētahi o kōrua nā e ha'a'ino rō 'ā pē nei ē: hai mārama-rama 'e hai reo-reo a au i toke ai i a kōrua. ¹⁷ jKa kī 'ō i haka toke rō mai a au i te kōrua me'e mā'aku hai nu'u uña atu e au? ¹⁸ Ki a Tito a au i uña atu ai mo oho atu mo u'i i a kōrua, 'e 'i muri i a ia e tahi taina haka 'ou. jKa kī 'ō i to'o rō a Tito i te kōrua moni hai reo-reo? 'Ina. A

māua, pa'i, pē tū haka tere iŋa 'ā 'e e tahi mau nō māua mana'u.

¹⁹ E mana'u ena pēaha a kōrua: te tumu o te me'e ta'ato'a pāpa'i atu ena e au e kimi 'ā i te mātou ora 'o te reo-reo ta'ato'a tuhi mai e tū ŋā 'āpōtoro reo-reo era, 'e ta'e, pa'i, pē ira. Te tumu mau o te me'e ta'ato'a nei, e te taina haŋa rahi ē, mo haka pūai i te kōrua haka moe iŋa i te mana'u 'i ruŋa i a Ietū. E vānaŋa atu ena, pa'i, a mātou hai parauti'a 'i mu'a o te 'Atua, 'e pa he nu'u o te Kiritō. ²⁰ E ri'a-ri'a rō 'ana a au, ka oho atu ena a au u'i i a kōrua, te kōrua noho iŋa ta'e pa he me'e haŋa 'ā'aku. 'E, mo ai pē ira, ta'e ia toe tō'oku huru pa he me'e haŋa e kōrua. Tō'oku ri'a-ri'a 'o ai te tātake 'i roto i a kōrua, te mākota, te riri, te 'ino, te ha'a'ino, te vānaŋa ta'e tano mo te tētahi, te mana'u i hau rō atu ki te rua, 'e te hihi-hihi o te kōrua noho iŋa. ²¹ E ri'a-ri'a tako'a rō 'ana a au 'o ha'amā a au i a kōrua 'i mu'a i te 'Atua 'i tō'oku ara oho u'i atu i a kōrua, 'e he taŋi a au 'i te rahi o kōrua mai mu'a 'ā e hara e oho mai ena 'ina he haka rē i te me'e ta'e tano pa he moe i te vi'e 'e i te taŋata ta'e he kenu 'e he vi'e 'ā'ana, 'e he tētahi atu me'e ta'e tano pohe e te hakari.

13 He toru ara nei ō'oku ka oho atu ena u'i i a kōrua. 'Ina ko rehu: mo ai tā'ue o te tātake 'i roto i a kōrua i te taina mo haka tī-tika ka tu'u atu ena a au, e ai e rua 'o e toru mata'ite, pa he me'e kī 'i ruŋa i te [Pāpa'i Mo'a]. ² 'I tō'oku rua oho iŋa atu era, i kī rō au ki te nu'u o roto i a kōrua noho 'i roto i te hara 'e ki te ta'ato'a pē nei ē: e u'i e e'a mai roto i te me'e ta'e tano 'o haka ūtu'a. 'E hora nei, 'i ra'e ki tō'oku tu'u iŋa haka 'ou atu, he haka 'ite atu a au: ka tu'u atu ena a au, 'ina a au e ko ta'e haka ūtu'a i te nu'u ko te noho iŋa 'ana 'i roto i te hara. ³ Pē ira ka 'ite ena e kōrua: hai parau mau 'ā o te [Kiritō] a au e vānaŋa atu ena. A ia, pa'i, kope ta'e haka rehe-rehe i a ia 'i te hora haka tī-tika i a kōrua; kope haka take'a i tō'ona pūai 'i roto i a kōrua. ⁴ Ka ai atu i tu'u rō a ia pa he kope 'ina e tahi pūai hora veo era 'i ruŋa i te tātaurō, hora nei, hai pūai o te 'Atua Matu'a e ora ena. Pē ira 'ana a mātou. E tu'u rō 'ana pa he nu'u pūai kore, 'e, 'i te ai o mātou o te

'Atua, hai pūai ō'ona mātou e ora nei mo tāvini atu ki a kōrua.

⁵ E u'i kōrua hoki e haka moe parauti'a mau rō 'ana kōrua i te mana'u 'i ruŋa i a Ietū. Mo ŋaro'a e kōrua nā a Ietū Kiritō 'i roto i a kōrua, e haka moe parauti'a rō 'ā ia kōrua i te mana'u 'i ruŋa i a ia 'e, tako'a, e tano rō 'ana kōrua ki te mata o te 'Atua. ⁶ 'E, pē hiva 'ā, ana anj-anj kōrua: a mātou e tano rō 'ā ki te mata o te 'Atua, 'e he [āpōtoro] parauti'a 'ā'ana. ⁷ E ani rō 'ana a mātou ki te 'Atua 'o aŋa a kōrua i te me'e ta'e tano. Te tumu o mātou e ani nei mo aŋa o kōrua i te me'e riva-riva ta'e 'ō pē nei ē: mo take'a e te nu'u e tano rō 'ana 'ō te mātou aŋa pa he 'āpōtoro. E ani nei mo aŋa o kōrua i te me'e riva-riva ka ai atu mo te nu'u ta'e a mātou he 'āpōtoro parauti'a o te Kiritō. ⁸ Mo ha'atura o kōrua ki te me'e parauti'a, 'ina e tahi mātou me'e mo ture atu pa he 'āpōtoro. Te me'e mau nō mo aŋa he hā'ū'ū atu. ⁹ He koa a mātou mo pūai o kōrua 'i te ara parauti'a o te 'Atua ka ai atu e ai rō 'ana te nu'u mana'u 'ina mātou pūai pa he 'āpōtoro. 'E he pure he oho a mātou mo kōrua mo tu'u ki te roa ena 'ina e tahi hape.

¹⁰ E pāpa'i atu ena a au i te parau nei 'i ra'e ki tō'oku oho iŋa atu, 'o ai, hora ena ō'oku ka tu'u atu ena, he haka ūtu'a atu au i a kōrua hai parau va'ai mai e te tātou Pū'oko Haka Tere, parau va'ai mai mo haka pūai i te nu'u haka moe i te mana'u 'i ruŋa i a ia, ta'e 'ō mo ha'ata'a i a rāua mai muri i a ia.

¹¹ Mo haka mao atu, e kuā taina ē, e koa kōrua 'e e noho 'ina e tahi hape. E haka haŋu kōrua i a kōrua 'ā, e ai kōrua e tahi mau nō mana'u 'e e noho 'i roto i te haumārū. Pē ira te 'Atua, va'ai i te haŋa 'e i te haumārū, ka ha'amaitai ena i a kōrua. ¹² E 'aroha kōrua ki a kōrua 'ā hai haŋa. Te taina ta'ato'a [haka moe i te mana'u] 'i ruŋa i a Ietū 'i e 'aroha atu ena.

¹³ Ka ai 'i ruŋa i a kōrua te haŋa o te 'Atua 'e te riva rahi o te tātou Pū'oko Haka Tere ko Ietū Kiritō 'i te hora ta'ato'a. 'E ka hokorua ka oho nō atu i a kōrua ta'ato'a e te [Vārua Maitai].

KARATIA

Te parau nei 'a Pauro mo te nu'u [haka moe i te mana'u] 'i ruŋa i a Ietū o te kona ta'ato'a o Karatia. E vānaŋa 'ana o ruŋa o te e'a iŋa o te [kiritiano] mai te pūai o te hara 'e o te haka rē iŋa i te mana'u pē nei ē: hai ha'atura ki te [haka tere iŋa 'a Mōtē] he tano ki te mata o te 'Atua.

I haka 'ite ai a Pauro i te parau 'āpī riva-riva o ruŋa i a Ietū Kiritō 'i te kona ta'ato'a o Karatia 'i te rua ara oho ō'ona haka 'ite ki te nu'u i te roŋo o te 'Atua (Aŋa o te 'Āpōtoro 16.6). Me'e rahi nō atu nu'u o Karatia i haka moe i te rāua mana'u 'i ruŋa i a Ietū, 'e i to'o mo pū'oko haka tere o rāua. Te me'e nō, i tu'u rō ki rā ŋā kona te tētahi atu nu'u kī he kiritiano a rāua 'e he hāpī ki te taina o rā ŋā kona pē nei ē: mo tano ki te mata o te 'Atua, e 'āmui ki te haka moe iŋa o te mana'u 'i ruŋa i a Ietū te ha'atura ki te haka tere iŋa 'a Mōtē (1.6–9). He ture e Pauro 'o te haka tapa mai te hāpī parauti'a hāpī e ia (3.1–5).

He haka aŋi-aŋi e Pauro ki te taina o Karatia pē hē te haka tere iŋa tano o te taŋata haka moe i te mana'u 'i ruŋa i a Ietū hai 'a'amu 'iti-'iti o ruŋa i te hōrea aŋa e te 'Atua ki a ['Aparahama], 'e pē hē a 'Aparahama i haka moe ai i tō'ona mana'u 'i ruŋa i te 'Atua. I oti era he haka 'ite e Pauro: te haka tere iŋa 'a Mōtē ta'e he me'e rake-rake, he me'e riva-riva. Ka ai atu pē ira, i va'ai mai ai e te 'Atua i rā haka tere iŋa ta'e mo haka tano i a tā-tou ki tō'ona mata, mo te me'e kē (3.21): mo ma'ori hāpī haka tika i te tātou mana'u ki a Ietū mo haka moe o tātou i te mana'u 'i ruŋa i a ia (3.24). Te kī 'a Pauro: mo te 'Atua, a tātou, te nu'u ta'ato'a 'a Ietū Kiritō, pē tū hauha'a tahi 'ā, ka vi'e ka taŋata, ka [hūrio] ka [kirioko], ka 'ekaravo 'o ka ta'e 'ekaravo (3.28), 'e te haka tere iŋa era 'a Mōtē ta'e toe he me'e ha'ata'a i a tātou.

Te kī tako'a 'a Pauro: te ta'e ai haka 'ou o tātou he 'ekaravo o te haka tere iŋa era 'a Mōtē ta'e he 'ōtohe mo aŋa i te me'e ta'e tano pohe nō e te hakari (5.13). Te me'e mo aŋa he haka rē i a tātou mo haka tere e te [Vārua Maitai]. Ki oti he haka aŋi-aŋi mai e Pauro i te huru o te kiritiano parauti'a (5.22–24), 'e he kī mai: te tātou noho iŋa 'āpī nei o te Vārua Maitai i va'ai mai. 'O ira, ki haka rē i a tātou mā'ana e haka tika mai (5.25).

He 'aroha

1 A au, a Pauro, ha'ata'a mo te aŋa he 'āpōtoro, tōro'a ta'e o te taŋata i va'ai mai, 'a Ietū Kiritō, 'e o te 'Atua Matu'a haka ora i a ia mai te mate, ² he 'aroha atu mātou ananake ko te taina ta'ato'a o nei ki a kōrua ki te nu'u ta'ato'a [haka moe i te mana'u] 'i ruŋa i a Ietū o Karatia. ³ Ka ai 'i ruŋa i a kōrua te riva rahi 'e te haumārū o te 'Atua Matu'a 'e o Ietū Kiritō, he Pū'oko Haka Tere o tātou.

⁴ A Ietū i va'ai ai i a ia mo mate mo haka kore e te 'Atua i te tātou hara 'e mo haka e'a i a tātou mai roto i te noho iŋa ta'e tano o te ao, 'i te me'e era ko haŋa 'ā e te 'Atua, Matu'a o tātou. ⁵ Ki ha'ahana-hana tātou ki a ia 'ātā ki te hope'a ra'a! ['Āmene].

He māere iŋa o Pauro 'i te nu'u o Karatia

⁶ Ko māere riva-riva 'ana a au 'i te hōrou o kōrua mo hāruai hai tua'ivi i te 'Atua 'e i tā'ana hāpī parauti'a. O te 'Atua, pa'i, i ha'ata'a i a kōrua mā'ana hai riva rahi mau nō o te [Kiritō], mo e'a o kōrua mai roto i te ūtu'a o te hara 'e mo rava'a i te ora 'āpī 'ina he hope'a ra'a. 'E nā kōrua e haka roŋo mai ena ki te hāpī kē mana'u e kōrua he [roŋo riva-riva o te 'Atua]. ⁷ 'E te parauti'a, 'ina he rua roŋo riva-riva o te 'Atua. Te me'e nō, e ai rō 'ana te nu'u nā e haka mira-mira 'ana i te kōrua man-a'u. E haŋa 'ā mo haka poteko i te [roŋo riva-riva o

ruŋa i a Ietū]. ⁸ 'I a au he kī atu: ka ai atu ko mātou mau nei 'ā 'o he merahi e tahi o te raŋi hāpī atu i te rua me'e, ta'e he roŋo riva-riva hāpī atu era e mātou 'i mu'a 'ā, ka topa 'i ruŋa te ūtu'a o te 'Atua. ⁹ Ko kī atu era 'ā e mātou i te me'e nei 'e 'I e au he kī haka 'ou atu: mo ai o te kope haka 'ite atu i te rua roŋo, ta'e he roŋo riva-riva hāpī atu era e mātou, ka topa 'i ruŋa i a ia te ūtu'a o te 'Atua.

Mai i a Ietū i 'ite ai a Pauro i te roŋo o te 'Atua

¹⁰ Ki te kōrua mana'u, ζe aŋa nei a au mo koa o te taŋata 'o mo koa o te 'Atua? 'Āhani mo koa o te taŋata, ta'e ia a au he tāvini o te Kiritō.

¹¹ E 'ite kōrua, e te taina ē: te roŋo riva-riva o te 'Atua haka 'ite e au ta'e he me'e poreko mai te mana'u taŋata. ¹² 'E ta'e o te taŋata i hāpī mai; a Ietū Kiritō mau 'ā i haka 'ite mai.

¹³ Ko ŋarora 'ana e kōrua o ruŋa i tā'aku me'e aŋa 'i mu'a 'ā, pē hē a au e tute era mo tōtōā i te nu'u haka moe i te mana'u 'i ruŋa i a Ietū hora era ō'oku e ma'u nō 'ana i te haka tere iŋa hūrio. Te mana'u ō'oku 'i rā hora mo haka kore i a rāua. ¹⁴ 'I rā noho iŋa, i hau rō atu a au 'i te haka kē ki te tētahi nu'u o tō'oku taŋa mo ma'u i te hāpī haka rē mai e te mātou tupuna. ¹⁵⁻¹⁶ 'E, ka ai atu i tute rō a au mo tōtōā i te nu'u haka moe i te mana'u 'i ruŋa i a Ietū, te 'Atua, kai poreko hia 'ana a au, i ha'ata'a rō ai i a au mā'ana 'e, hai riva rahi ō'ona,

i haka 'ite mai ai ko ai a Ietū, mo haka moe ō'oku i te mana'u 'i ruŋa i a ia. Te haŋa ō'ona: mo haka 'ite mo oho ō'oku i te roŋo riva-riva o ruŋa i a Ietū ki te nu'u ta'e he hūrio. Hora topa mai era o te me'e nei, 'ina a au kai oho kai kimi e tahi kope mo haka 'ite mai o ruŋa i te roŋo o te 'Atua, ¹⁷ 'e 'ina tako'a a au kai oho ki Hērutarema kai 'ui ki te nu'u era ko rāua te 'āpōtoro ra'e ki a au. Te me'e ra'e 'ā'aku i aŋa, he oho a au ki te henua era ko Aravia, 'e i tano era tō'oku hora 'i ira, he e'a a au he hoki ki Rāmako.

He māhani iŋa o Pauro ki a Pētero

¹⁸ Ka toru matahiti mai te hora haka moe ō'oku i te mana'u 'i ruŋa i a Ietū i oho iho ai a au ki Hērutarema mo māhani ki a Pētero, 'e e ho'e 'ahuru mā pae mahana i noho ai a au 'i muri i a ia. ¹⁹ 'Ina he rua 'āpōtoro i take'a e au; te kope haka 'ou nō 'ā'aku i māhani ko Tanatiako, taina o Ietū. ²⁰ 'E 'ī a au he kī atu 'i mu'a i te 'Atua: te me'e ta'ato'a nei e au e pāpa'i atu ena he parauti'a.

²¹ Mai ira a au i oho ai ki te ŋā kona era o Tīria 'e o Tiritia. ²² Te taina haka moe i te mana'u 'i ruŋa i a Ietū o Hūrea kai take'a hia 'ana i a au. ²³ Te me'e nō o rāua i ŋaro'a o ruŋa i a au: «Te kope tute era i a tātou mo tōtōā hora nei e haka 'ite e oho 'ā i te roŋo riva-riva o te 'Atua, roŋo haŋa era e ia mo haka kore 'i mu'a 'ā». ²⁴ 'E 'i te parau 'āpī era o ruŋa i a au, i ha'ahana-hana ai rā nu'u ki te 'Atua.

2 E ho'e 'ahuru mā maha matahiti mai te hora tu'u ra'e era ō'oku ki Hērutarema i hoki haka 'ou ai a au ki ira ararua māua ko Verenāvē. 'I muri i a māua i ma'u tako'a ai i a Tito. ² 'I oho ai a au 'o te ai ko kī mai 'ana e te 'Atua mo oho ō'oku. 'I ira i haka 'ite ai a au ki te nu'u mau nō era ko rāua te pū'oko haka tere o te taina o Hērutarema o ruŋa i tā'aku roŋo hāpī ki te nu'u ta'e he hūrio, mo anjī-anjī riva-riva e rāua: te me'e hāpī 'ā'aku he parauti'a, 'o ta'e hauha'a rō tā'aku aŋa ka hope'a ena. ³ He koa rō atu 'ai, 'e 'ina kai kī mai mo hore i te kiri o te kinōŋa o tō'oku hokorua [kirieko] nei ko Tito.

⁴ Ka ai atu pē ira, i ai rō 'i ira te nu'u haka tu'u i a rāua pa he nu'u [haka moe i te mana'u] 'i ruŋa i a Ietū, te haŋa mo u'i hoki ko te ma'u iŋa 'ana a mātou i te [haka tere iŋa 'a Mōtē] 'e, mo ta'e ai pē ira, mo haka 'amo haka 'ou mai i rā haka tere iŋa. 'E te parauti'a, 'ina he pūai toe o te haka tere iŋa 'a Mōtē 'i ruŋa i a tātou 'o te ai o tātou 'a Ietū Kiritō. ⁵ 'Ina a mātou kai haka roŋo ki te rāua mana'u, 'o ta'e ma'u haka 'ou kōrua i te roŋo parauti'a o ruŋa i a Ietū hāpī atu era e mātou.

⁶ Te nu'u era ko rāua te pū'oko haka tere o ira kai take'a e tahi hape o tā'aku me'e hāpī. ('E 'ina a au he tapa atu hoki a rāua he nu'u ra-rahi. Te 'Atua, pa'i, 'i te hora e u'i ena i te tano 'e i te ta'e tano o te me'e aŋa e te taŋata, 'ina he tapa atu hoki he taŋata ra-rahi 'o he taŋata ta'e ra-rahi; mō'ona pē tū huru tahi 'ā te taŋata). ⁷ Te me'e o rāua i anjī-anjī: o te 'Atua mau 'ā i va'ai mai i te aŋa he haka 'ite he oho i te [roŋo riva-riva o ruŋa i a Ietū] ki te nu'u ta'e he hūrio, pa he va'ai iŋa

era 'ā ki a Pētero mo haka 'ite mo oho i te roŋo nei ki te hūrio. ⁸ O te 'Atua uŋa era i a Pētero pa he ['āpōtoro] ki te [hūrio], i uŋa tako'a i a au pa he 'āpōtoro ki te nu'u ta'e he hūrio.

⁹ I anjī-anjī era e [Tanatiako], e Pētero 'e e [Iovani], pū'oko haka tere o te nu'u haka moe i te mana'u 'i ruŋa i a Ietū o Hērutarema pē nei ē: o te 'Atua mau 'ana i va'ai mai, hai riva rahi ō'ona, i te aŋa nei ki a au, he va'ai mai ia e kuā Pētero i te rāua rima mo haka take'a mai ki a māua ko Verenāvē: a māua he hokorua tako'a o rāua 'i te aŋa o te 'Atua, 'e e tano rō 'ana ki a rāua mo oho o māua mo aŋa 'i roto o te nu'u ta'e he hūrio, 'e ko rāua mo haka 'ite mo oho ki te nu'u hūrio. ¹⁰ Te me'e mo ta'e rehu nō i a māua i kī mai ai: mo hā'ū'ū ki te nu'u veve o Hērutarema, he me'e ko man-a'u era 'ana e au mo aŋa.

¹¹ 'I Antiokia a au i tu'u atu ai a Pētero, 'e ki tō'ona 'āriŋa mau 'ā e au i kī ai i te hape o tā'ana me'e i aŋa. ¹² Te ŋā mahana ra'e era ō'ona 'i ira e kai era ananake ko te nu'u taina ta'e he hūrio. 'E, i tu'u atu era te taina hūrio e ma'u nō 'ā 'i te haka tere iŋa 'a Mōtē uŋa atu e Tanatiako, he ha'amata he haka topa kē i a ia; 'ina kai haŋa haka 'ou mo kai 'i muri i tū nu'u era, 'i te ri'a-ri'a 'o ture e tū nu'u hūrio era 'o te aŋa i te me'e 'ina he tano ki te haka tere iŋa hūrio. ¹³ 'E tētahi atu taina hūrio o Antiokia i pe'e tako'a rō ki tū me'e aŋa era e Pētero, 'e 'ātā ki a Verenāvē. ¹⁴ 'O ira, i take'a era e au 'ina he tano tā'ana me'e aŋa ki te parauti'a o te roŋo riva-riva o ruŋa i a Ietū, he kī e au ki a Pētero 'i mu'a o te taina ta'ato'a: «Mo ai e tano rō 'ā mō'ou, e te hūrio ē, mo noho pa he taŋata ta'e he hūrio, e tano rō 'ana ia mo kī o tātou ki te nu'u ta'e he hūrio mo haka tere i a rāua pa he hūrio?».

Pē hē e tano nei ki te mata o te 'Atua

¹⁵ A mātou i poreko ai he hūrio, ta'e 'ō pē nei ē: «he nu'u hara ta'e 'ite ko ai te 'Atua parauti'a», pa he me'e mana'u e mātou 'i mu'a 'ā o ruŋa i te nu'u ta'e he hūrio. ¹⁶ Ka ai atu pē ira, e 'ite rō 'ana e tātou 'ina e tahi kope mo tano ki te mata o te 'Atua hai ha'atura ki te haka tere iŋa 'a Mōtē. Hai haka moe mau nō i te mana'u 'i ruŋa i a Ietū ana tano te taŋata ki te mata o te 'Atua. 'O ira a mātou, te hūrio, e haka moe ena i te mana'u 'i ruŋa i a Ietū, mo tano o mātou ki te mata o te 'Atua hai me'e nei 'e ta'e 'ō hai ha'atura ki te haka tere iŋa 'a Mōtē. 'Ina, pa'i, e tahi taŋata mo tano ki a ia hai ha'atura ki rā haka tere iŋa.

¹⁷ Te me'e nō, 'i te kimi iŋa o mātou mo tano ki te mata o te 'Atua hai haka moe i te mana'u 'i ruŋa i a Ietū e kī ena e te tētahi nu'u hūrio pē nei ē: he nu'u hara a mātou 'o te ta'e ha'atura tahi i te haka tere iŋa 'a Mōtē. eTe kī hō, a Ietū te uŋa i te taŋata ki roto i te hara? Ta'e pē ira. ¹⁸ Te parauti'a, e hara 'ana a au mo hoki haka 'ou ō'oku ki te haka tere iŋa 'a Mōtē mo tano ki te mata o te 'Atua. ¹⁹ I anjī-anjī era e au e ko rava'a mo tano ki te mata o te 'Atua hai ha'atura ki te haka tere iŋa 'a Mōtē, kai haka haŋu haka 'ou ia a au a ruŋa i rā haka tere iŋa. 'E hora nei, mo te 'Atua mau nō

a au e ora nei. I haka moe era a au i tō'oku mana'u 'i ruŋa i a Ietū, i tu'u rō pa he me'e ena ē: ko mate tako'a 'ana a au 'i muri i a ia 'o te ai i mate ai a ia mō'oku. ²⁰ 'E hora nei, ta'e ko au toe te me'e e ora atu ena, ko Ietū Kiritō te me'e e ora nei 'i roto i a au 'e e haka tere nei i a au 'i te ao nei. Te me'e nei e ai ena hai haka moe o'oku i te mana'u 'i ruŋa i te Poki o te 'Atua haŋa mai ki a au 'e va'ai i a ia ki te mate mō'oku. ²¹ Kai ta'e haka hauha'a a au i te riva rahi o te 'Atua pa he nu'u era. Mo ai rō, pa'i, hai ha'atura ki te haka tere iŋa 'a Mōtē e tano ena te taŋata ki te mata o te 'Atua, i mate tahaŋa nō ia a Ietū.

¿Pē hē e ai ena te Vārua Maitai?

3 E te taina pū'oko hio-hio o Karatia ē, ¿'a 'ai kōrua i haka ma'a-ma'a atu? 'I roto i te hāpī iŋa atu era o mātou i haka 'ite riva-riva atu ai ki a kōrua he aha te me'e i rava'a e Ietū mo tātou hora mate era o'ona 'i ruŋa i te tātaurō. ² Iā. 'I a au he 'ui atu: ¿Te Vārua Maitai o roto i a kōrua hai ha'atura ki te [haka tere iŋa 'a Mōtē] 'o hai haka moe i te mana'u 'i ruŋa i a Ietū? ¿Ta'e 'ō hai haka moe i te mana'u 'i ruŋa i a Ietū? ³ 'E, mo ai pē ira, ¿ko te ta'e aŋi-aŋi iŋa 'ana e kōrua? 'Ina ko rehu: hai pūai o te Vārua Maitai i ha'amata ai kōrua a te ara o te 'Atua. 'E hora nei, ¿e haŋa 'ana a kōrua mo tu'u ki te roa hope'a o rā ara, te aura'a, ki te roa haŋa e te 'Atua mo kōrua, hai pūai mau nō o te taŋata? ⁴ ¿Ka kī 'ō te me'e riva-riva ta'ato'a topa atu era ki a kōrua mai te hora haka moe i te mana'u 'i ruŋa i a Ietū, 'ina e tahi hauha'a mo kōrua? ¿Pē hiva 'ā ana ta'e ai pē ira! ⁵ Ka haka topa rā te kōrua mana'u he aha te 'Atua e va'ai atu ena i te Vārua Maitai 'e e aŋa ena i te mana 'i roto i a kōrua. 'O te haka moe o kōrua i te mana'u 'i ruŋa i a Ietū 'e 'i ruŋa i tā'ana roŋo, ta'e 'ō 'o te ha'atura ki te haka tere iŋa 'a Mōtē.

He ha'aaura'a iŋa hai 'Aparahama

⁶ Ka haka topa rā te kōrua mana'u ki a ['Aparahama]: i haka moe rō i te mana'u 'i ruŋa i te me'e kī e te 'Atua, 'e hai nei me'e i kī ai e te 'Atua e tano rō 'ana ki tō'ona mata. ⁷ 'O ira, e 'ite kōrua: te hakaara parauti'a o 'Aparahama he nu'u haka moe i te rāua mana'u 'i ruŋa i te 'Atua. ⁸ Ko mana'u era 'ana, pa'i, e te 'Atua, 'e ko haka 'ite era 'ā e ia 'i ruŋa i te [Pāpa'i Mo'a] pē nei ē: mo haka moe o te nu'u ta'e he hūrio i te rāua mana'u 'i ruŋa i a ia, e kī tako'a rō e te 'Atua mo rāua: he nu'u tano ki tō'ona mata. Te parau 'āpī nei i haka 'ite rō ki a 'Aparahama 'i te hora kī era pē nei ē: «Hai koe ka ha'amaitai nei e au i te taŋata ta'ato'a o te ao». ⁹ Pē ira te nu'u ta'ato'a haka moe i te mana'u 'i ruŋa i a Ietū, he ha'amaitai tako'a e te 'Atua pa he ha'amaitai iŋa era 'a i a 'Aparahama.

¹⁰ Te nu'u mana'u: hai ha'atura ki te haka tere iŋa 'a Mōtē he tano a rāua ki te mata o te 'Atua ko ai era 'ā te ūtu'a mo rāua. E kī rō 'ana, pa'i, 'i ruŋa i te Pāpa'i Mo'a: «Te kope ta'e ha'atura ki te roŋo ta'ato'a o te haka tere iŋa 'a Mōtē, he haka ūtu'a e te 'Atua 'ātā ki te

hope'a ra'a». ¹¹ Hai me'e nei e 'ite ena 'ina e tahi taŋata mo tano ki te mata o te 'Atua hai ha'atura ki te haka tere iŋa 'a Mōtē, 'i te me'e era e hā'aki rō 'ana 'i ruŋa i te Pāpa'i Mo'a pē nei ē: «Te kope kī e te 'Atua e tano rō 'ana ki tō'ona mata 'o te haka moe i te mana'u 'i ruŋa i a ia, he rava'a i te ora 'āpī 'ina he hope'a ra'a». ¹² 'E, mo rava'a tā'ue e te kope e tahi mo ha'atura tahi i rā roŋo, i a ia tako'a ia te ora 'āpī 'ina he hope'a ra'a, ka ai atu 'ina he haka moe i te mana'u 'i ruŋa i te 'Atua. Nā, pa'i, e kī rō 'ana 'i ruŋa i te Pāpa'i Mo'a: «Te kope ha'atura ki te haka tere iŋa ta'ato'a 'a Mōtē he rava'a i te ora 'āpī 'ina he hope'a ra'a».

¹³ Te me'e nō, ko 'ite 'ā e tātou ta'ato'a, 'ina e tahi kope mo rava'a i rā me'e. 'O ira ko tano riva-riva 'ā mo ai 'i ruŋa i a tātou i te taŋata te ūtu'a kī e te 'Atua. 'E a Ietū i haka kore i te ūtu'a mai ruŋa i a tātou hai 'amo e ia i rā ūtu'a hora mate era 'i ruŋa i te tātaurō. E hā'aki rō 'ana, pa'i, 'i ruŋa i te Pāpa'i Mo'a: «Te ūtu'a o te 'Atua 'i ruŋa i te kope mate 'i ruŋa i te tātaurō». ¹⁴ Te me'e nei i topa ai mo rava'a tako'a e te nu'u ta'e he hūrio, hai Ietū Kiritō, i te ha'amaitai hōrea e te 'Atua ki a 'Aparahama, 'e mo ai 'i roto i a tātou ta'ato'a, hai haka moe i te mana'u 'i ruŋa i a Ietū, te Vārua Maitai hōrea mai e te 'Atua.

Te haka tere iŋa 'a Mōtē 'e te hōrea o te 'Atua

¹⁵ E te taina, 'I a au he ha'aaura'a atu hai haka tere iŋa taŋata: te kope e rua ha'a'au e tahi me'e, 'e he tāpura hai 'iŋoa o rāua 'i ruŋa i te parau, 'ina he rua taŋata mo haka kore 'e mo pāpa'i haka 'ou e tahi me'e 'i ruŋa. ¹⁶ Pē ira tako'a te hōrea nei o te 'Atua, hōrea kī e te 'Atua ki a 'Aparahama 'e ki tō'ona hakaara. 'E te vānaŋa kī era e te 'Atua ki a 'Aparahama «he hakaara», ta'e mo te hakaara ta'ato'a o 'Aparahama, mo te hakaara mau nō era o'ona ko Ietū. ¹⁷ Iā. Tā'aku kī: te hōrea kī era e te 'Atua ki a 'Aparahama 'ina e ko tano mo haka kore 'e mo ta'e haka hauha'a e te haka tere iŋa 'a Mōtē. Te hōrea aŋa era, pa'i, e te 'Atua ki a 'Aparahama, ko kī era 'ana ka maha hānere ka toru 'ahuru matahiti ki te haka tere iŋa era 'a Mōtē. ¹⁸ Te 'Atua e ko ta'e haka tano i tā'ana me'e hōrea. 'O ira, 'āhani hai ha'atura nō o tātou ki te haka tere iŋa 'a Mōtē ana va'ai mai e te 'Atua i te me'e hōrea mai, e ko ai ia he me'e ko hōrea mai era 'ā e ia. Pē ira tako'a 'ana te me'e hōrea era e te 'Atua ki a 'Aparahama. 'Āhani 'o te aŋa o 'Aparahama e tahi me'e i va'ai ai e te 'Atua i rā me'e, e ko ai ia he me'e ko hōrea era 'ana e ia. 'E te parauti'a, te 'Atua i va'ai ai i rā me'e ki a 'Aparahama 'o te ai mau nō ko hōrea era 'ana e ia.

¹⁹ ¿Mo aha ia te haka tere iŋa 'a Mōtē? Te haka tere iŋa 'a Mōtē i va'ai mai ai e te 'Atua mo aŋi-aŋi e tātou ta'ato'a e hara rō 'ana a tātou. Te mana'u o te 'Atua: hai rā haka tere iŋa ana haka tika ana oho a tātou 'ātā ki te tu'u iŋa mai o tū hakaara era ko Ietū Kiritō, he kope 'i ruŋa i a ia te hōrea kī era e te 'Atua ki a 'Aparahama. E ko hape tātou mo kī i hau rō atu 'i te hauha'a te me'e hōrea e te 'Atua ki te haka tere iŋa 'a Mōtē. Te haka tere iŋa nei hai merahi i ūŋa mai ai, 'e a Mōtē i

haka 'ite ki te taŋata. ²⁰ 'E te hōrea va'ai era e te 'Atua ki a 'Aparahama 'ina kai uŋa mai hai rua kope, 'ā'ana mau 'ā i kī ki a 'Aparahama.

Mo aha te haka tere iŋa 'a Mōtē

²¹ ¿Te kī hō, te haka tere iŋa 'a Mōtē e ta'e haka hauha'a rō 'ā 'i te hōrea o te 'Atua? Ta'e pē ira. Mo te me'e kē, mo te me'e kē i va'ai mai ai i te ŋā me'e nei. 'E, mo ai ko va'ai mai 'ā e te 'Atua i te haka tere iŋa 'a Mōtē mo rava'a e tātou i te ora 'āpī 'ina he hope'a ra'a, he tano ia a tātou ki tō'ona mata 'o te ha'atura ki rā haka tere iŋa. ²² Te me'e nō, pē nei e kī ena 'i ruŋa i te Pāpa'i Mo'a: te taŋata ta'ato'a o te hara te haka tere, 'e te rāve'a nō mo rava'a i te me'e hōrea e te 'Atua, he ora 'āpī 'ina he hope'a ra'a, e haka moe i te mana'u 'i ruŋa i a Ietū.

²³ Hora era 'ina kai tu'u mai 'ā te rāve'a he haka moe i te mana'u 'i ruŋa i a Ietū mo tano te taŋata ki te mata o te 'Atua, e tu'u rō 'ā a tātou pa he nu'u puru 'auario e te haka tere iŋa 'a Mōtē, tiaki ki te hora va'ai i te rāve'a he haka moe i te mana'u 'i ruŋa i a Ietū. ²⁴ Mo tātou te haka tere iŋa 'a Mōtē pa he kope hāpa'o ŋā poki, haka tika i te tātou ara 'ātā ki te tu'u iŋa mai o Ietū Kiritō, ki ai ai hora era ō'ona ka tu'u mai ena he tano a tātou ki te mata o te 'Atua hai haka moe i te mana'u 'i ruŋa i a ia. ²⁵ 'E, hora nei, ko tu'u mai 'ā rā rāve'a era he haka moe i te mana'u 'i ruŋa i a Ietū mo tano o tātou ki te mata o te 'Atua, 'e 'ina toe tātou he hāpa'o 'e he haka tika e te haka tere iŋa 'a Mōtē.

²⁶ Hai haka moe mau nō i te mana'u 'i ruŋa i a Ietū e ŋā poki nei tātou o te 'Atua. ²⁷ 'E e tu'u rō 'ā pa he me'e ena ē: a tātou ta'ato'a, te nu'u haka moe i te mana'u 'i ruŋa i a Ietū [papatito] i a rāua mo take'a e te nu'u 'a Ietū a rāua, ko uru tahi 'ana i te [Kiritō], pa he uru iŋa ena 'ā o te taŋata i te kahu. ²⁸ 'E 'i te hora nei, ki te mata o te 'Atua, ta'e he me'e te ai ō'ou he [hūrio] 'o he [kirieko], he 'ekaravo 'o ta'e he 'ekaravo, he vi'e 'o he taŋata. 'O te ai o tātou 'a Ietū Kiritō, a tātou ta'ato'a e tahi mau nō. ²⁹ 'E, 'i te ai o tātou 'ā'ana, he hakaara tātou o 'Aparahama, 'e mo tātou tako'a ia te me'e hōrea e te 'Atua ki a ia.

He ŋā poki tātou, ta'e toe he 'ekaravo

4 Pē nei te ha'aaura'a: Te poki ki a ia ka haka rē era te hauha'a ta'ato'a o tō'ona matu'a, 'i te hora e ŋā poki nō 'ana, pa he 'ekaravo haka 'ou nō atu e tahi o te hare 'i te me'e era o te rua te haka tere i a ia, ka ai atu ō'ona rā hauha'a. ² Te aura'a: e ai rō 'ana te nu'u hāpa'o i a ia 'e i tā'ana me'e ta'ato'a 'ātā ka tano rō te matahiti kī e tō'ona matu'a. ³ Te me'e nei pa he oho iŋa era 'ā o tātou 'i mu'a 'ā: 'i te hora era kai aŋi-aŋi 'ā i te hāpī parauti'a o te 'Atua, 'e kai haka moe 'ā i te mana'u 'i ruŋa i a Ietū, o te hāpī ta'e hauha'a o te ao nei te haka tere mai i a tātou. ⁴ 'E, i tano era te hora, he uŋa mai e te 'Atua i tā'ana Poki 'e he haka poreko mai roto i te vi'e ha'atura ki te [haka tere iŋa 'a Mōtē], ⁵ mo haka e'a i a tātou mai roto i rā haka tere iŋa, 'e mo ha-

ka riro i a tātou i te nu'u [haka moe i te mana'u] 'i ruŋa i tā'ana Poki he ŋā poki parauti'a 'ā'ana. ⁶ 'E, ko 'ite 'ana a tātou he ŋā poki parauti'a tātou o te 'Atua 'o te ai ko uŋa mai 'ā i te [Vārua Maitai] o tā'ana Poki ki roto i te tātou māhatu; 'e hai ia e tano nei a tātou mo kī ki te 'Atua 'i te hora e pure nei tātou: «E koro ō'oku ē».

⁷ Hora nei ia ta'e he 'ekaravo toe kōrua o te me'e haka tere i te ao nei. He ŋā poki kōrua o te 'Atua; 'e, 'i te ai o kōrua he ŋā poki 'ā'ana, mo kōrua tako'a ia te me'e ta'ato'a hōrea e ia mo va'ai ki tā'ana ŋā poki.

⁸ 'I mu'a 'ā, hora era kai haka moe 'ana kōrua i te mana'u 'i ruŋa i te 'Atua parauti'a, he 'ekaravo kōrua o te me'e kī e kōrua he 'atua. ⁹ 'E hora nei, he hora ko to'o 'ana a kōrua i te 'Atua parauti'a mo 'Atua o kōrua, 'o, te tī-tika mau, he hora ko to'o 'ana i a kōrua pa he ŋā poki 'ā'ana, ¿he aha ia kōrua e haka rē ena mo haka tere haka 'ou atu e te ŋā me'e ena 'ina rāua pūai 'e mo haka riro haka 'ou atu i a kōrua he 'ekaravo o rāua?

¹⁰ ¿E mana'u ena 'ō kōrua: hai aŋa o kōrua i te ŋoŋoro mo te 'Atua 'i te tētahi mahana, 'i te tētahi 'āva'e 'e 'i te tētahi matahiti, he tano kōrua ki tō'ona mata? ¹¹ ¿Ka kī 'ō tū aŋa ta'ato'a era 'ā'aku 'i roto i a kōrua ko māu'a tahi 'ā?

He mana'u iŋa o Pauro ki te nu'u o Karatia

¹² 'E te taina, he ani atu a au mo riro o kōrua pē au 'ā, kope ta'e mana'u pē nei ē: mo tano ki te mata o te 'Atua e ma'u tako'a 'ō i te haka tere iŋa 'a Mōtē. A au, pa'i, i riro rō pē kōrua, nu'u ta'e ma'u i rā haka tere iŋa. 'I te hora era ō'oku 'i muri i a kōrua, 'ina kōrua kai tōtōā mai. ¹³ E mana'u kōrua: 'i tō'oku māui-ui a au i tu'u atu ai ki a kōrua ena 'e i hāpī atu ai i te [roŋo riva-riva o te 'Atua]. ¹⁴ 'E, ka ai atu māui-ui ta'e au tō'oku, kai ta'e haka au mai kōrua. Te me'e o kōrua i aŋa he to'o he hāpa'o i a au 'i roto i a kōrua pa he me'e ena ē: e to'o 'ā i te merahi o te 'Atua 'o i a Ietū Kiritō mau 'ā.

¹⁵ ¿Ka kī 'ō ko ŋaro 'ana tū koa era o tātou o mu'a 'ā? E riva nō a au mo kī: a kōrua, 'i mu'a 'ā, 'āhani he me'e e rava'a rō mo aŋa, 'ātā e kume nō mai i te kōrua mata mo va'ai mai mō'oku. ¹⁶ 'E hora nei, ¿ko ai 'ana a au he kope ta'e haŋa o kōrua 'o te kī nō atu i te parauti'a?

¹⁷ Te nu'u hāpī atu i te me'e ta'e he parauti'a e tu'u rō 'ā pa he me'e ena ē: e u'i 'ā i te kōrua riva-riva. 'E te parauti'a mau, te mana'u o rāua mo kōrua mana'u ta'e riva-riva. Te haŋa he haka topa kē i a kōrua mai i a mātou mo haka roŋo ki a rāua mau nō. ¹⁸ Ka haka roŋo mai, e te taina ē. Te me'e ena he u'i i te riva-riva o te rua me'e tano ana ai hai mana'u riva-riva 'e paurō te mahana, ta'e nō 'ō e ai atu a au 'i roto i a kōrua. ¹⁹ E te ŋā poki haŋa rahi 'ā'aku ē, pa he māui-ui ŋaro'a e te vi'e a'u i te poki te māui-ui ŋaro'a e au mo kōrua 'ātā ka ai rō te kōrua huru ta'ato'a pē Ietū Kiritō 'ā.

²⁰ 'Āhani 'ō a au nā 'i muri i a kōrua mo vānaŋa koro'iti mo oho atu. Te parauti'a, kai 'ite a au he aha tā'aku me'e mo mana'u o ruŋa i a kōrua.

Ko 'Ākara † 'e ko [Tara]

²¹ Ka kī mai rā kōrua, e te nu'u haŋa mo ma'u i te haka tere iŋa 'a Mōtē ē, ʔkai ŋaro'a 'ana 'ō e kōrua te me'e hā'aki 'i ruŋa i rā haka tere iŋa? ²² Pē nei e kī ena: e rua poki 'a [Aparahama], e tahi mai roto i te vi'e 'ekaravo, 'e te rua, mai roto i tā'ana vi'e mau era 'ā. ²³ Te poki poreko era mai roto i te vi'e 'ekaravo hai mana'u taŋata nō i poreko ai. 'E te poki poreko era mai tā'ana vi'e e haka tano 'ana i te hōrea aŋa e te 'Atua ki a 'Aparahama. ²⁴ E ai rō 'ana te ha'aaura'a o te me'e nei: te ŋā vi'e nei e rua e haka take'a mai 'ā e rua rāve'a o te [haka tere iŋa o te 'Atua ananake ko te taŋata]. Te rāve'a ra'e he roŋo va'ai era e te 'Atua ki a Mōtē 'i ruŋa i te ma'uŋa era ko [Tinaī], 'e te tāpa'o o rā haka tere iŋa ko 'Ākara, matu'a vahine o te poki ka poreko era he 'ekaravo tako'a. ²⁵ Te vi'e nei ko 'Ākara pa he tāpa'o o te ma'uŋa era ko Tinaī 'i te henua era ko Aravia, he kona 'i ira i poreko ai te haka tere iŋa 'a Mōtē. 'E he tāpa'o tako'a o Hērutarema o te hora nei, he kona ko te ma'u ko te oho iŋa 'ā e te taŋata i te haka tere iŋa 'a Mōtē pa he nu'u 'ekaravo o rā haka tere iŋa. ²⁶ 'E a [Tara], pa he tāpa'o o te rua haka tere iŋa o te 'Atua ananake ko te taŋata 'e o Hērutarema o te raŋi. A Tara ta'e he 'ekaravo, 'e a tātou, pa he hakaara o Tara, ta'e he 'ekaravo tako'a. ²⁷ E hā'aki rō 'ana, pa'i, 'i ruŋa i te [Pāpa'i Mo'a] pē nei ē:

«Ka koa, e te vi'e pa'a ē, a koe ena 'ina e tahi poki; ka 'eha koe, e te vi'e ta'e 'ite i te me'e he mamae mo a'u i te poki ē.

Te vi'e hoa era e tā'ana kenu, pa'i,
'ata rahi rō atu te poki ka ai era ki te vi'e 'ina kai hoa».

²⁸ A Ita'ata, poki era 'a 'Aparahama, i poreko ai 'o te haka moe o 'Aparahama i tō'ona mana'u 'i ruŋa i te me'e hōrea e te 'Atua ki a ia. Pē ira 'ana a tātou, e te taina ē. He haka moe o tātou i te mana'u 'i ruŋa i tā'ana me'e hōrea mai e ai nei a tātou he ŋā poki o te 'Atua. ²⁹ Te poki poreko era 'a 'Aparahama hai mana'u taŋata he ta'e haka au nō te aŋa i te poki poreko era hai hā'ū'ū o te Vārua Maitai. 'E pē ira 'ā 'i te hora nei: te nu'u mana'u e ha'atura ki te haka tere iŋa 'a Mōtē mo tano ki te mata o te 'Atua he ta'e haka au nō mai te aŋa i a tātou i te nu'u ko 'ite 'ana: mo tano ki te mata o te 'Atua e haka moe i te mana'u 'i ruŋa i a Ietū. ³⁰ 'E, ʔpē hē e kī ena 'i ruŋa i te Pāpa'i Mo'a? Pē nei e kī ena: «Ka haka oho te vi'e 'ekaravo ena koia ko tā'ana poki. E ko tano, pa'i, mo ai tako'a mo te poki o te vi'e 'ekaravo te me'e mo te poki poreko mai te vi'e ta'e he 'ekaravo». ³¹ Pē ira, e te taina ē, ta'e a tātou he poki o te vi'e 'ekaravo era, a tātou o te rua vi'e era.

Ta'e toe he 'ekaravo o te [haka tere iŋa 'a Mōtē]

5 A Ietū Kiritō i haka e'a i a tātou mai te me'e ena he 'amo i te haka tere iŋa 'a Mōtē mo tano ki te mata o te 'Atua. 'O ira, e u'i kōrua 'o haka 'amo haka

† A 'ĀKARA he 'ekaravo 'a Tara 'e he matu'a vahine o Itamaera.

'ou rō atu i te haka tere iŋa era, 'o 'ekaravo haka 'ou kōrua o rā haka tere iŋa.

² Haka roŋo mai. 'Ī a au, a Pauro, he kī atu: mo hore o te kiri o te kinōŋa hai mana'u: pē ira he tano kōrua ki te mata o te 'Atua, te me'e aŋa era ia e Ietū e ko hā'ū'ū atu. ³ 'E 'Ī a au he kī haka 'ou atu: te kope hore i te kiri o te kinōŋa e ha'atura ia ki te roŋo ta'ato'a o ruŋa i te haka tere iŋa 'a Mōtē. ⁴ A kōrua, te nu'u haŋa mo tano ki te mata o te 'Atua hai ha'atura ki rā haka tere iŋa, ko haka tapa 'ana mai muri i a Ietū, 'e ko hāru'i 'ana hai tua'ivi i te riva rahi o te 'Atua. ⁵ 'E a tātou, te nu'u 'a Ietū Kiritō, hai [Vārua Maitai] e 'ite nei: te 'Atua e kī rō: he nu'u tano a tātou ki tō'ona mata 'o te [haka moe i te mana'u] 'i ruŋa i a Ietū. ⁶ 'E, 'i te ai o tātou 'a Ietū Kiritō, te 'Atua e ta'e tapa haka 'ou ena hoki ko hore 'ā te kiri o te hua 'o 'ina kai hore. Te me'e hauha'a mau he haka moe i te mana'u 'i ruŋa i a Ietū, he me'e e take'a ena hai haŋa ki te rua.

⁷ 'I mu'a 'ā, a te ara parauti'a a kōrua e oho era. 'E hora nei, ʔ'a 'ai te haka noho i a kōrua 'o ma'u 'o oho i te hāpī parauti'a o te 'Atua? ⁸ Te haka tapa o kōrua mai te ara nei ta'e he me'e o te 'Atua. 'Ā'ana mau 'ā, pa'i, i kī atu mo oho o kōrua a nei ara. ⁹ 'O ira, e u'i kōrua e te hāpī ta'e parauti'a, 'o riro pa he me'e kī e te nu'u: «hai 'apa 'iti-'iti e tahi o te revaura he ahu tahi te haraoa mata». ¹⁰ 'E, 'i te ai o kōrua 'a Ietū Kiritō tako'a, ko 'ite riva-riva 'ana e au he ma'u kōrua i te hāpī haka 'ite atu era e au 'e ta'e 'ō i te hāpī kē. 'E te 'Atua he haka ūtu'a i te kope haka huri i te kōrua mana'u, nōatu ko ai rā kope.

¹¹ E te taina, nā e ai rō 'ā te nu'u kī o ruŋa i a au pē nei ē: e hāpī 'ana a au ki te nu'u ta'e he hūrio: mo tano o rāua ki te mata o te 'Atua, 'āmui ki te haka moe i te mana'u 'i ruŋa i a Ietū, e hore i te kiri o te kinōŋa. Mo ai o te vānaŋa nei he parauti'a, ʔhe aha ia te nu'u rarahi o te [hūrio] e tute mai ena i a au mo tōtōā? Mo ai, pa'i, pē ira mau 'ā a au e hāpī nei, 'ina ia rāua ko riri 'o te hāpī ō'oku o ruŋa i te mate era o Ietū 'i ruŋa i te tā-taurō. ¹² 'E mo ai he me'e nui-nui e tahi mo te nu'u haka mira-mira atu i te kōrua mana'u te hore i te kiri o te kinōŋa, ʔka pātehe ia i a rāua 'ā!

Hai haŋa mau nō ki te rua

¹³ E te taina, o te 'Atua i haka e'a i a tātou mai te me'e he 'amo i te haka tere iŋa 'a Mōtē mo tano o tātou ki tō'ona mata. Te parauti'a nei 'ina ko ai mo tātou he 'ōtohe mo aŋa i te me'e ta'e tano pohe nō e te hakari. Te me'e o tātou mo aŋa he haŋa 'e he hā'ū'ū ki te rua hai māhatu. ¹⁴ Mo ha'atura o tātou ki te roŋo mau nō nei e tahi: «E haŋa ki te rua pa he haŋa iŋa mau ena 'ā ō'ou ki a koe», ko ha'atura tahi 'ana ia a tātou ki te roŋo ta'ato'a o te 'Atua haka pāpa'i ki a Mōtē. ¹⁵ 'E, mo moto 'e mo tātake 'i roto i a kōrua, e u'i 'o kore rō te kōrua haŋa pa he taina 'e 'o haka tapa rō te kōrua mana'u mai ruŋa i a Ietū.

E haka rē mo haka tere atu e te Vārua Maitai

¹⁶ 'O ira, 'I a au he kī atu: e haka rē mo haka tere atu i a kōrua e te Vārua Maitai, 'o aña i te me'e ta'e tano pohe nō e te hakari. ¹⁷ Te me'e ta'e tano pohe e te hakari me'e ta'e haña o te Vārua Maitai. 'E te me'e haña 'ā'ana mo aña e tātou ta'e he me'e ta'e tano pohe e te hakari. Te nā me'e nei ararua e tātaka rō 'ā 'i roto i a tātou. 'O ira a tātou e ta'e rava'a ena mo aña i te me'e haña mau era mo aña. ¹⁸ Ka ai atu pē ira, mo haka rē o tātou mo haka tere mai e te Vārua Maitai, 'ina he pūai toe o te haka tere iña 'a Mōtē 'i ruña i a tātou.

¹⁹ Te me'e aña e te nu'u haka tere i a rāua hai mana'u ki te me'e pohe nō e te hakari ko te me'e nei: he moe o te vi'e 'e o te tañata i te kope ta'e he kenu 'o he vi'e 'ā'ana 'e tētahi haka 'ou atu me'e ta'e tano tu'u pē ira, 'e he aña i te me'e hano-hano ta'e tano ki te hakari. ²⁰ He ha'amuri ki te 'ītoro, he aña i te tahu-tahu, he ma'u i te riri 'i roto i te māhatu, he haka tumu i te ture, 'e he mākota 'i te rua. E ko roa he riri, te me'e haña mau nō he me'e mana'u o rāua, te aña he haka tātaka mo haka topa kē i te tañata, 'e he mana'u he me'e mau nō era o rāua te me'e tano. ²¹ He fi'i'i, he rava ta'ero, he rava kai, 'e tētahi haka 'ou atu me'e tu'u pē ira. 'E 'I a au he kī haka 'ou atu i te me'e kī atu era e au 'i mu'a 'ā: te nu'u pē nei 'ina e ko o'o ki roto i te nūna'a tañata haka tere e te 'Atua.

²² 'E te me'e poreko 'i roto i te nu'u haka tere e te Vārua Maitai ko te nā me'e nei: he haña, he koa, he haumārū, he 'ite mo ha'aoroma'i, he huru riva, he māhatu 'aroha, he haka tano iña i te me'e kī, ²³ he ta'e mana'u i hau rō atu ki te rua, 'e he 'ite mo hāito i te me'e kī 'e i te me'e aña. Te nu'u pē nei, e ko aña e tahi me'e hape ki te haka tere iña o te 'Atua. ²⁴ A tātou, te nu'u 'a Ietū Kiritō, ko veo 'ana i te huru hara ta'ato'a era o tātou o mu'a 'ā 'i ruña i te tātaurō, te aura'a, ko hāru'i 'ana a tātou hai tua'ivi ki rā nā me'e. ²⁵ 'E, 'i te me'e era te tātou noho iña 'āpī nei o te Vārua Maitai i va'ai mai, ki ha'ati'a ia mā'ana e haka tika mai.

²⁶ 'I roto i a tātou, 'ina ko mana'u i hau rō atu tātou ki te rua, 'ina ko haka tātaka i te kope e tahi ki te rua 'e 'ina ko mākota.

Te me'e mo aña e te nu'u [kiritiano]

6 E te taina, mo take'a e kōrua e tahi taina [haka moe i te mana'u] 'i ruña i a Ietū e hara 'ā, e hā'ū'ū e kōrua e te nu'u ko te haka tere iña 'ā e te [Vārua Maitai], mo hoki haka 'ou o'ona a te ara tī-tika. 'E ana hā'ū'ū, hai haña 'e hai haumārū. E u'i 'o haka hara rō atu i a kōrua. ² E hā'ū'ū tako'a kōrua i te rua mo 'amo i tō'ona 'ati; pē ira he haka tano kōrua i te me'e kī mai e te [Kiritō] mo aña.

³ Mo mana'u o te kope e tahi 'ina a ia e ko tano mo hā'ū'ū i te rua 'i te me'e era 'ata hau rō atu a ia ki rā kope, he me'e ta'e he parauti'a, e reo-reo 'ana ki a ia

mau 'ā. ⁴ Mo tātou mau 'ā, hoko tahi hoko tahi, e u'i hoki e riva-riva rō 'ā te tātou haka tere iña, 'e, mo ai pē ira, e koa tātou. 'Ina e tahi o tātou mo mana'u e haka tano 'ō te tātou haka tere iña ki te haka tere haña o te rua ana koa iho o tātou. ⁵ Ta'ato'a nō, pa'i, ko 'ite 'ana he aha te me'e tano 'e te me'e ta'e tano ki te mata o te 'Atua.

⁶ Te kope hāpī i te vānaña o te 'Atua, e hā'ū'ū hai me'e ai 'ā'ana ki te ma'ori hāpī i a ia.

⁷ E u'i kōrua 'o mana'u rō pē nei ē: e rava'a rō e kōrua mo reo-reo ki te 'Atua. E kī atu ena a au i te me'e nei 'o te ai te me'e 'oka e te tañata ko rā me'e mau 'ā te me'e ka kato era. ⁸ Te kope 'oka, pa'i, i te me'e pohe nō e te hakari, te me'e mo rava'a he ūtu'a o te hara he mate; 'e te kope 'oka i te me'e haña e te Vārua Maitai, he ora 'āpī 'ina he hope'a ra'a. ⁹ 'O ira, 'ina ko rohi-rohi mo hā'ū'ū ki te rua. Mo ta'e rohi-rohi, 'i te hora tano he ha'amaitai a tātou e te 'Atua. ¹⁰ Mo ai i a tātou te rāve'a mo hā'ū'ū, he hā'ū'ū tātou, 'e he nu'u taina haka moe i te mana'u 'i ruña i a Ietū te me'e ra'e o tātou mo hā'ū'ū.

He hatu 'e he 'aroha

¹¹ 'Ka u'i rā te nu-nui o tā'aku ti'ara'a! Hai rima mau nei 'ā o'oku i pāpa'i ai i te vānaña nei. ¹² Te nu'u kī atu mo hore i te kiri o te kinoña, e kī atu ena pē ira mo tano o rāua ki te mata o te nu'u ra-rahi o te [hūrio], 'o tute i a rāua mo tōtōā 'o te hāpī pē nei ē: hai haka moe nō i te mana'u 'i ruña i a Ietū 'e 'i ruña i te me'e rava'a e ia hai mate iña era o'ona 'i ruña i te tātaurō he e'a te tañata mai roto i te ūtu'a o te hara 'e he rava'a i te ora 'āpī 'ina he hope'a ra'a. ¹³ Te parauti'a, 'ina e tahi nu'u ha'atura ki te roño ta'ato'a o te [haka tere iña 'a Mōtē], 'ātā te nu'u hore i te kiri o te kinoña. E haña ena a rāua mo hore o kōrua i te kiri o te kinoña mo te'o-te'o pē nei ē: ko rava'a 'ana 'ō e rāua mo ma'u e kōrua i te tāpa'o ena 'i ruña i te kōrua hakari.

¹⁴ Tā'aku me'e mau nō mo te'o-te'o he me'e aña era e Ietū Kiritō, Pū'oko Haka Tere o tātou. Hai mate iña era o'ona 'i ruña i te tātaurō i ta'e ai haka 'ou ai a au he 'ekaravo o te me'e o te ao nei, 'e 'ina he pūai toe o te nā me'e nei mo haka tere mai i a au. ¹⁵ 'E, ki te mata o te 'Atua, 'ina e tahi hauha'a o te me'e he hore 'o he ta'e hore o te kiri o te kinoña. Te me'e hauha'a mō'ona he haka 'āpī atu i a koe e te Vārua Maitai. ¹⁶ Ka ai te haumārū 'e te riva rahi o te 'Atua 'i ruña i te nu'u ta'ato'a haka tere i a rāua hai me'e kī atu ena e au; a rāua he itaraera parauti'a o te 'Atua, te aura'a, he nu'u ha'ata'a e te 'Atua mā'ana.

¹⁷ Mo haka hope'a atu: e ko haña a au mo ta'e haka au haka 'ou mai o te kope e tahi o ruña i tā'aku me'e hāpī. 'I ruña i tō'oku hakari, pa'i, a au e ma'u nei i te more tuai, he tāpa'o: ki a Ietū a au e tāvini nei.

¹⁸ E te taina, ka ai 'i ruña i a kōrua ta'ato'a te riva rahi o te tātou Pū'oko Haka Tere ko Ietū Kiritō. [Āmene].

ĒFETO

A Ēfeto he kona nui-nui e tahi o te kona ta'ato'a haka tere e te rōmano. E rua tu'u iŋa o Pauro ki te kona nei. 'I te rua ara oho ō'ona ki ira e rua matahiti tūma'a i noho ai (Aŋa o te 'Āpōtoro 18.19–21; 19.1–20.1). Te nu'u [haka moe i te mana'u] 'i ruŋa i a Ietū Kiritō o rā kona, nu'u ta'e haka tapa i te rāua mana'u mai ruŋa ki te hora hope'a, 'e nu'u 'amo i te 'ati ri'a-ri'a 'o te ai o rāua 'a Ietū (Me'e Haka Take'a 2.1–3). Ka ai atu pē ira, e ai rō 'ana te tētahi hāpī haŋa a Pauro mo haka aŋi-aŋi riva-riva ki rā nu'u.

'I te parehe ra'e o tā'ana parau nei (1.1–3.21) e ai rō 'ana te hāpī hōhonu o te 'Atua, hāpī e 'ite e te nu'u ta'ato'a haka moe i te mana'u 'i ruŋa i a Ietū. He haka mana'u e Pauro i te pūai o te 'Atua, pūai haka take'a 'i te hora haka ora mai te mate i a Ietū (1.19–20), kope ki a ia i va'ai ai e te 'Atua i te parau mo haka tere i te me'e ta'ato'a (1.21–22). He haka aŋi-aŋi e Pauro ki te nu'u o Ēfeto pē nei ē: 'i te riva rahi o te 'Atua ko haka e'a 'ana i a rāua mai roto i te ūtu'a o te hara 'o te haka moe o rāua i te mana'u 'i ruŋa i a Ietū. Ta'e he me'e i rava'a e rāua, he me'e o te 'Atua i va'ai, 'e ta'e 'ō o te aŋa o rāua i te me'e riva-riva (2.8–9).

Mai te vāeŋa o te parau nei pe mu'a (4.1–6.20) e hā'aki ena pē hē te nu'u [kiritiano] ana haka tere i a rāua pauro te mahana. He haka 'ite e Pauro ki te kenu mo haŋa ki te rāua ŋā vi'e, pa he haŋa iŋa ena 'ā o Ietū Kiritō ki tā'ana nu'u haka moe i te mana'u 'i ruŋa i a ia, he nu'u mo rāua i va'ai ai i a ia mo mate 'i ruŋa i te tātaurō (5.25). He haka 'ite tako'a pē hē te noho iŋa tano o te poki ararua ko tō'ona matu'a, o te matu'a ararua ko tā'ana poki, o te 'ekaravo ararua ko te kope haka aŋa i a ia 'e o rā kope ararua ko tā'ana 'ekaravo 'o te ai o rāua he taina haka moe i te mana'u 'i ruŋa i a Ietū, Pū'oko Haka Tere o rāua ta'ato'a (6.1–9).

I haka mao ai te parau nei e Pauro hai ha'aaura'a pē nei ē: mo rē o te nu'u kiritiano ki a Rukifero e ai rō 'ana te me'e mo hāpa'o i a rāua pa he me'e hāpa'o i te va'ehau 'i te hora o te tama'i (6.10–17). I oti era, he 'aroha a Pauro ki te nu'u taina o Ēfeto koia ko ani ki te 'Atua 'e ki a Ietū Kiritō mo nei nu'u (6.23–24).

He 'aroha

1 A au, a Pauro, [‘āpōtoro] 'a Ietū Kiritō hai haŋa o te 'Atua, he 'aroha atu ki a kōrua ki te taŋata ha'ata'a e ia mā'ana o Ēfeto, nu'u 'a Ietū Kiritō 'o te [haka moe i te mana'u] 'i ruŋa i a ia. ² Ka ai 'i ruŋa i a kōrua te riva rahi 'e te haumārū o te 'Atua Matu'a 'e o Ietū Kiritō, he Pū'oko Haka Tere o tātou.

He ha'ahana-hana iŋa ki te 'Atua

³ Ki ha'ahana-hana tātou ki te 'Atua, he Matu'a o te tātou Pū'oko Haka Tere ko Ietū Kiritō, 'i te me'e era ko ha'amaitai mai 'ana i a tātou hai va'ai mai i te me'e riva-riva ai 'i ruŋa i te raŋi mo hā'ū'ū mai 'i te tātou ha'ere iŋa a tō'ona ara 'o te ai o tātou 'a Ietū Kiritō. ⁴ 'I mu'a 'ā, hora era kai aŋa 'ana i te ao, i ha'ata'a rō ai te 'Atua i a tātou i te nu'u 'a Ietū Kiritō mo nu'u 'ā'ana 'i-na e tahi hape 'i mu'a i a ia. He haŋa mai o te 'Atua ki a tātou ⁵ i mana'u ai mo haka riro i a tātou he ŋā poki 'ā'ana hai me'e aŋa e Ietū Kiritō. Te me'e nei i aŋa ai e te 'Atua he riva rahi ō'ona 'e 'i te ai ko haŋa 'ana e ia. ⁶ 'O ira, ki ha'ahana-hana ki te 'Atua 'i tō'ona riva rahi haka take'a mai 'o te ai o tātou 'a Ietū Kiritō, he Poki haŋa rahi 'ā'ana.

⁷ Hai toto tehe era o Ietū 'i ruŋa i te tātaurō te 'Atua ko haka rehu 'ana i te tātou hara, 'e ko haka kore 'ana i te ūtu'a mai ruŋa i a tātou 'o te ai o tātou 'a Ietū Kiritō. I aŋa ai i te me'e nei e te 'Atua he riva rahi ō'ona 'i-

na he hāito 'i ruŋa i a tātou. 'E 'ā'ana tako'a i va'ai mai i te mārama-rama mo aŋi-aŋi e tātou i te parauti'a o ruŋa i a ia. ⁹ Ko haka 'ite mai 'ana, pa'i, i tā'ana me'e mana'u era mo aŋa ta'e haka 'ite era e ia 'i mu'a 'ā. 'E, 'i tō'ona riva rahi, i mana'u ai mo aŋa i te me'e nei hai Ietū Kiritō ¹⁰ 'i te mahana kī e ia. Rā me'e mana'u era e te 'Atua mo aŋa he haka riro i a Ietū Kiritō he Pū'oko Haka Tere o te me'e ta'ato'a o te raŋi 'e o te ao.

¹¹ I ha'ata'a ai i a tātou, 'i mu'a 'ā, e te 'Atua mo nu'u 'ā'ana hai Ietū Kiritō, he me'e i mana'u e ia mo aŋa. Te 'Atua, pa'i, e haka tano tahi rō 'ana i tā'ana me'e haŋa 'e i tā'ana me'e mana'u. ¹² I aŋa ai i te me'e nei mo ha'ahana-hana te taŋata ki te 'Atua 'i te nui-nui o tō'ona pūai hai mātou hai [hūrio], nu'u haka moe ra'e i te mana'u 'i ruŋa i a Ietū.

¹³ 'E a kōrua, te nu'u ta'e he hūrio, i ŋaro'a era i te parauti'a, he [roŋo riva-riva o te 'Atua] o ruŋa i te rāve'a pē hē ana e'a mai roto i te ūtu'a o te hara 'e ana rava'a i te ora 'āpī 'ina he hope'a ra'a, he haka moe rō 'ai kōrua i te mana'u 'i ruŋa i a Ietū, 'e he tāpa'o rō atu 'ai e te 'Atua i a kōrua pa he nu'u 'ā'ana hai va'ai atu i te [Vārua Maitai], pa he me'e hōrea e ia. ¹⁴ 'E, 'o te ai o te Vārua Maitai 'i roto i a tātou, e 'ite nei: te 'Atua e haka oti rō i tā'ana me'e ha'amata aŋa era: he haka e'a i a tātou mai roto i te hara, 'e pe mu'a ka oho ena he va'ai mai i te me'e ta'ato'a hōrea mo tā'ana nu'u, ki ha'ahana-hana tahi ai a tātou i te nui-nui o tō'ona pūai.

He pure mo te nu'u taina

¹⁵ Mai te hora 'ite ō'oku e haka moe rō 'ana kōrua i te mana'u 'i ruŋa i a Ietū 'e e haŋa rō 'ana ki te nu'u ha'ata'a e te 'Atua mā'ana, ¹⁶ tā'aku aŋa he māuru-uru nō ki a ia mo kōrua 'i roto i tā'aku pure. ¹⁷ He ani nō tā'aku aŋa ki te 'Atua o te tātou Pū'oko Haka Tere ko Ietū Kiritō, ki te tātou Matu'a o te raŋi, i a ia te pūai 'e te nui-nui ta'ato'a, mo va'ai atu, hai Vārua Maitai, i te mārāma-rama mo aŋi-aŋi e kōrua i te parauti'a o ruŋa ō'ona, ki māhani riva-riva ai kōrua ki a ia. ¹⁸ 'E e ani tako'a rō 'ana a au ki a ia mo haka mā'eha atu i te kōrua mana'u, ki 'ite ai kōrua he aha te me'e 'ā'ana mo kōrua pe mu'a ka oho ena 'o te ai o kōrua he nu'u ha'ata'a mā'ana, 'e ki 'ite tako'a ai kōrua i te rahi 'e i te nui-nui o te me'e hōrea e ia mo tā'ana nu'u, ¹⁹ 'e i te rahi o tō'ona pūai e hā'ū'ū mai ena ki a tātou ki te nu'u haka moe i te mana'u 'i ruŋa i a Ietū. Te pūai nei he mana haka take'a era e te 'Atua ²⁰ 'i te hora haka ora i a Ietū mai te mate 'e haka noho i a ia 'i tō'ona pā'iŋa mata'u 'i te raŋi. ²¹⁻²² Te 'Atua ko va'ai 'ana ki a Ietū i te parau mo pū'oko haka tere o te merahi 'e o te vārua ta'ato'a ta'e take'a e tātou haka tere 'i te ao nei 'e, tako'a, o te me'e ta'ato'a o te ao; tō'ona tōro'a, he tōro'a 'ina e ko rava'a e te rua 'i te hora nei 'e pe mu'a ka oho ena. 'E i va'ai rō e te 'Atua i a Ietū mo Pū'oko o te nu'u ta'ato'a haka moe i te mana'u 'i ruŋa i a ia; ²³ a rāua he hakari ō'ona. Mai i a ia e rava'a ena e rāua i te ora 'e i te pūai; 'ā'ana, pa'i, te va'ai i te ora ki te me'e ta'ato'a o te ao.

He riva rahi o te 'Atua

2 'I mu'a 'ā, 'i te hora kai haka moe 'ana a kōrua i te mana'u 'i ruŋa i a Ietū, e tu'u rō 'ana kōrua pa he nu'u mate mo te me'e o te 'Atua, te aura'a, 'ina he ŋaro'a 'e 'ina he ha'atura ki a ia, 'i te me'e era ko ŋaro 'ana kōrua 'i roto i te hara. ² Te noho iŋa era o kōrua e haka tano era ki te noho iŋa ta'e tano o te nu'u o te ao nei ta'e haŋa ki te 'Atua, 'e e aŋa era i te me'e haŋa 'a Rukifero, he pū'oko haka tere o te tātane e noho mai ena 'i roto i te tokerau. 'Ā'ana te haka tere i te mana'u o te nu'u ta'e ha'atura ki te 'Atua.

³ Pē ira te noho iŋa o tātou ta'ato'a 'i mu'a 'ā, 'i te hora kai haka moe 'ana i te mana'u 'i ruŋa i a Ietū. E aŋa 'ā a tātou i te me'e haŋa nō era o tātou. E haka tano 'ana i te noho iŋa ki te me'e ta'e tano mana'u 'e pohe nō o te hakari. 'I rā hora e tano mau rō 'ā te 'Atua mo riri 'e mo haka ūtu'a mai i a tātou, pa he me'e ka aŋa ena ki te tētahi nu'u. ⁴ 'E, 'i te riva rahi o te 'Atua 'e 'i te māhatu 'aroha ō'ona, i haŋa rahi nō mai ⁵ 'e, ka ai atu a tātou pa he nu'u mate mo te me'e 'ā'ana 'o te noho o tātou 'i roto i te hara, i va'ai nō mai e te 'Atua i te ora 'āpī 'ina he hope'a ra'a 'o te ai o tātou 'a Ietū Kiritō. (Hai riva rahi mau nō, pa'i, o te 'Atua, ko e'a 'ana a kōrua mai roto i te ūtu'a o te hara 'e ko rava'a 'ana i te ora 'āpī 'ina he hope'a ra'a).

⁶ 'I te ai o tātou 'a Ietū Kiritō, e tu'u rō 'ana pa he me'e ena: ko haka ora tako'a 'ana e te 'Atua i a tātou 'i muri i a Ietū Kiritō, 'e ko haka noho tako'a 'ana i a tātou 'i muri i a ia 'i te raŋi mo haka tere pa he 'ariki 'i muri i a ia. ⁷ Te me'e nei i aŋa ai e te 'Atua mo haka take'a ki te nu'u ta'ato'a, pe mu'a ka oho ena, i te rahi o tō'ona riva 'e o tō'ona māhatu 'aroha mo tātou mo te nu'u 'a Ietū Kiritō. ⁸ 'I te riva rahi o te 'Atua ko haka e'a 'ana i a tātou mai roto i te ūtu'a o te hara 'o te haka moe o tātou i te mana'u 'i ruŋa i a Ietū. Ta'e he me'e i rava'a e tātou, he me'e o te 'Atua i va'ai mai, ⁹ 'e ta'e 'ō 'o te aŋa o tātou i te me'e riva-riva. 'O ira 'ina e tahi kope mo te'o-te'o 'o te e'a ō'ona mai te ūtu'a o te hara. ¹⁰ Ko haka 'āpī 'ana te 'Atua i te tātou noho iŋa 'o te ai o tātou 'a Ietū Kiritō, ki aŋa ai a tātou i te me'e riva-riva, 'e ki haka tano ai i te me'e mana'u e ia 'i mu'a 'ā mo aŋa e tātou.

E tahi mau nō nūna'a

¹¹ E te nu'u ta'e hūrio ē, kī mo kōrua e te hūrio: «nu'u ta'e hore i te kiri o te kinoŋa» 'e kī mo rāua mau 'ana 'o te tāpa'o i te rāua hakari: «he nu'u hore i te kiri o te kinoŋa», ¹² ka haka topa te kōrua mana'u: 'i mu'a 'ana, 'i te hora kai haka moe 'ana a kōrua i te mana'u 'i ruŋa i a Ietū, ta'e kōrua 'a Ietū Kiritō, 'e e topa kē rō 'ana mai te itaraera. Te [haka tere iŋa o te 'Atua ananake ko te taŋata] 'e te me'e ta'ato'a hōrea e ia mo te itaraera kai ai 'ana, 'i rā hora, mo kōrua. E noho era kōrua 'ina he 'ite ko ai te 'Atua parauti'a, 'e 'ina he mana'u pē nei ē: e ai rō 'ō te me'e riva-riva mo kōrua pe mu'a ka oho ena. ¹³ 'E hora nei, 'i te ai o kōrua 'a Ietū Kiritō, ko haka hāhine 'ana e te 'Atua i a kōrua ki a ia hai toto tehe era o Ietū 'i ruŋa i te tātaurō.

¹⁴ Hai Ietū i poreko ai te haumārū 'i roto i te nu'u hūrio 'e ta'e hūrio, 'e he riro nei ŋā nu'u he nūna'a mau nō e tahi. Te me'e haka riri 'e ha'ata'a era i a rāua ko haka kore 'ā. ¹⁵ Pē nei te aura'a: 'i mu'a 'ā te hūrio e ta'e haka au rō 'ana ki te nu'u ta'e hūrio 'o te ta'e ha'atura ki te [haka tere iŋa 'a Mōtē]. 'E a Ietū, hai mate era ō'ona 'i ruŋa i te tātaurō, i haka kore ai i te me'e ena he ha'atura ki rā haka tere iŋa mo tano ki te mata o te 'Atua. I aŋa ai pē ira mo riro o te nu'u ta'ato'a 'ā'ana, ka hūrio, ka ta'e hūrio, e tahi mau nō nūna'a, 'e mo haka poreko i te haumārū 'i roto i a rāua. ¹⁶ Hai mate era ō'ona 'i ruŋa i te tātaurō i haka kore ai e Ietū i te riri o te ŋā nūna'a nei e rua, 'e i haka riva-riva ai i a rāua ki te 'Atua. 'E hora nei, te nu'u 'ā'ana, ka hūrio ka ta'e hūrio, pa he hakari mau nō e tahi.

¹⁷ A Ietū i oho mai ai ki te ao nei mo haka 'ite mai pē hē te taŋata ana riva-riva ki te 'Atua. I haka 'ite ai i te me'e nei ki a kōrua ki te nu'u ta'e hūrio, nu'u 'ava-ava mai muri i a ia, 'e, tako'a, ki te hūrio, nu'u hāhine ki a ia. ¹⁸ Hai me'e aŋa era e Ietū Kiritō e riva nō tātou, te hūrio 'e te nu'u ta'e hūrio, mo haka hāhine ki te 'Atua Matu'a hai [Vārua Maitai] va'ai mai e ia. ¹⁹ 'O ira, a kōrua, te nu'u ta'e hūrio [haka moe i te mana'u] 'i ruŋa i a Ietū, ta'e toe kōrua he hau kē mo te 'Atua, he taŋata henua ananake ko te tētahi atu nu'u ha'ata'a e

te 'Atua mā'ana, 'e he nā poki 'ā'ana tako'a ananake ko rā nā nu'u.

²⁰ A tātou, te nu'u ta'ato'a haka moe i te mana'u 'i ruŋa i a Ietū, pa he mā'ea o te hare e tahi aŋa e te 'Atua. Te hāpī o te ['āpōtoro] 'e o te perofeta pa he mekerā 'i ruŋa e haka tu'u ena i rā hare, 'e a Ietū pa he mā'ea matu'a haka noho hare. ²¹ 'Ā'ana, pa'i, te haka pi-piri 'e te haka hio-hio te oho i te hare nei 'ātā ka riro rō he hare mo'a e tahi, he kona mo ha'amuri ki a ia. ²² 'E a kōrua, 'o te ai 'a Ietū Kiritō tako'a, e to'o ena i a kōrua e te 'Atua 'e e titi ena ki ruŋa i rā hare, he kona 'i ira a ia e noho ena hai Vārua Maitai.

Te aŋa 'a Pauro

3 A au, a Pauro, i puru nei 'i roto i te hare ma'u'auri 'o te aŋa ki a Ietū Kiritō mo te riva-riva o kōrua o te nu'u ta'e he hūrio. ² Ko 'ite 'ana a kōrua: o te 'Atua i va'ai mai i te aŋa nei he haka 'ite he oho atu i te nui-nui o tō'ona riva rahi mo kōrua. ³ 'Ā'ana i haka 'ite mai i te parauti'a ta'e haka 'ite era 'i mu'a 'ā, he me'e nā ko pāpa'i 'iti-'iti atu 'ana e au. ⁴ Ki tai'o, he aŋi-aŋi e kōrua e 'ite rō 'ana a au i rā parauti'a era o ruŋa i a Ietū, ⁵ he me'e ta'e haka 'ite era ki te taŋata 'i mu'a 'ā, 'e, 'i te hora nei, ko haka 'ite 'ana e te 'Atua ki tā'ana ['āpōtoro] 'e ki te perofeta hai [Vārua Maitai]. ⁶ Rā parauti'a ko te me'e nei: mo haka moe o te nu'u ta'e hūrio i te mana'u 'i ruŋa i a Ietū, mo rāua tako'a te ha'amaitai ena o te 'Atua mo tō'ona taŋata he itaraera. 'I te hora nei, te [hūrio] 'e te nu'u ta'e hūrio [haka moe i te mana'u] 'i ruŋa i a Ietū he nūna'a mau nō e tahi, 'e te me'e ta'ato'a hōrea e te 'Atua mo te hūrio mo rāua tako'a, 'i te me'e era a rāua tako'a, pa'i, 'a Ietū Kiritō. ⁷ 'E, 'i tō'ona riva rahi mō'oku, ko va'ai mai 'ana i te aŋa he haka 'ite he oho i te [roŋo riva-riva o ruŋa i a Ietū] hai pūai o'ona.

⁸ Te tētahi nu'u ha'ata'a e te 'Atua mā'ana i hau rō atu ki a au. Ka ai atu pē ira, i va'ai nō mai ki a au e te 'Atua i te aŋa he haka 'ite ki te nu'u ta'e hūrio i te roŋo o ruŋa i te hauha'a mo va'ai e te [Kiritō] ki a rāua, hauha'a e ko rava'a mo aŋi-aŋi hai mana'u taŋata mau nō. ⁹ 'E ko va'ai tako'a mai 'ana i te aŋa he haka aŋi-aŋi o'oku ki te taŋata ta'ato'a pē hē i haka tano ai e ia i tā'ana me'e mana'u era mo aŋa. Te 'Atua, kope 'ā'ana i aŋa i te me'e ta'ato'a, ko haka 'ite mai 'ana i tā'ana me'e mana'u era mo aŋa, he me'e ta'e haka 'ite era ki te taŋata 'i mu'a 'ā, ¹⁰ mo take'a aŋe ai, 'i te hora nei, e te merahi 'e e te vārua ta'ato'a ta'e take'a e tātou, hai nu'u haka moe i te mana'u 'i ruŋa i a Ietū, te māramarama o tā'ana me'e i aŋa mo haka riva-riva i te taŋata ki a ia. ¹¹ Ko mana'u era 'ā e te 'Atua mo aŋa i te me'e nei mai mu'a 'ā, mai te hora kai aŋa 'ana i te ao, 'e ko aŋa 'ana hai me'e i aŋa e Ietū Kiritō, he Pū'oko Haka Tere o tātou, hora mate era o'ona 'i ruŋa i te tātaurō.

¹² 'E hora nei, 'o te ai o tātou 'a Ietū Kiritō 'e 'o te haka moe o tātou i te mana'u 'i ruŋa i a ia, e riva nei tātou mo pure mo haka hāhine ki te 'Atua 'ina he ri'ari'a. ¹³ 'E, ka ai atu 'i a au e 'amo atu ena i te 'ati 'o te haka 'ite o'oku i te [roŋo riva-riva o te 'Atua], he ani

atu a au mo ta'e haka hōriŋa o te kōrua haka moe iŋa o te mana'u 'i ruŋa i a Ietū. E koa kōrua; te me'e nei mo te kōrua riva-riva.

He pure 'e he ha'ahana-hana iŋa ki te 'Atua

¹⁴ E haka topa nei au i tō'oku mana'u ki te me'e ta'ato'a nei, he tū-turi a au he pure ki te 'Atua Matu'a, ¹⁵ Matu'a o te nu'u ta'ato'a haka moe i te mana'u 'i ruŋa i a Ietū, ka ai atu a rāua 'i ruŋa i te raŋi 'o 'i ruŋa i te henua, ¹⁶ 'e he ani a au ki a ia mo hā'ū'ū atu, hai pūai ta'e pau o'ona 'e hai Vārua Maitai, mo haka hio-hio i te kōrua mana'u 'i ruŋa i a Ietū. ¹⁷ He ani tako'a a au mo noho mo oho nō atu a Ietū Kiritō 'i roto i a kōrua hai haka moe i te mana'u 'i ruŋa i a ia, 'e mo haka pūai mo oho nō i te kōrua haŋa ki a ia 'e ki te rua. ¹⁸ Pē ira ka aŋi-aŋi ena e kōrua 'e e te ta'ato'a haka 'ou atu nu'u ha'ata'a e te 'Atua mā'ana i te rahi o te haŋa o Ietū mo tātou, he me'e e ko oti ki te hora hope'a. ¹⁹ Ka ai atu 'ina e tahi kope mo aŋi-aŋi riva-riva i te rahi o tō'ona haŋa mo te taŋata, tā'aku me'e ani ki te 'Atua, he 'ata haka 'ite he oho atu 'i roto i te kōrua māhatu i te haŋa o Ietū Kiritō mo kōrua, 'ātā ka riro rō te kōrua huru, pa he huru riva o'ona 'ina e tahi hape.

²⁰ Ki ha'ahana-hana tātou ki te 'Atua. I a ia, pa'i, te pūai mo aŋa i te me'e 'ata hau rō atu ki te me'e mana'u 'e ki te me'e no-no'i e tātou ki a ia hai pūai o tō'ona Vārua Maitai noho 'e aŋa 'i roto i a tātou. ²¹ Ka ha'ahana-hana te taŋata i te 'Atua, 'i te hora nei 'e ki te hope'a ra'a, 'i te pūai nui-nui o'ona haka take'a e ia hai Ietū Kiritō 'e hai nu'u ta'ato'a haka moe i te mana'u 'i ruŋa i a ia. Ka ai pē ira.

E tahi mau nō mana'u

4 A au, a Pauro, e puru atu ena 'o te haka 'ite i te [roŋo riva-riva o ruŋa i a Ietū Kiritō], he ani atu: 'o te ai o kōrua he nu'u ha'ata'a e te 'Atua mā'ana, e ai te kōrua noho iŋa, noho iŋa tano o te nu'u 'ā'ana. ² 'Ina ko mana'u i hau rō atu kōrua ki te rua, 'ina ko 'ōhumu, 'ina ko riri tahaŋa, 'e e 'ite kōrua mo ha'aoroma'i hai haŋa i te rua. ³ A kōrua, pa'i, e tahi nō mana'u hai [Vārua Maitai]; 'o ira, e ai te haumārū 'i roto i a kōrua 'o topa kē-kē rō kōrua. ⁴ A tātou, te nu'u 'a Ietū Kiritō, pa he nā kona ena 'ā o te hakari mau nō e tahi, 'e e tahi mau nō vārua haka tika i a tātou, he Vārua Maitai. 'E te me'e tiaki e tātou ta'ato'a ko tū me'e 'ā, he ha'amaitai hōrea e te 'Atua mo te nu'u ta'ato'a ha'ata'a e ia mā'ana. ⁵ E tahi mau nō Pū'oko Haka Tere o tātou ko Ietū Kiritō, e tahi mau nō hāpī parauti'a o ruŋa i a ia, 'e e tahi mau nō [papatito]. ⁶ E tahi mau nō 'Atua, he Matu'a o tātou ta'ato'a. A ia e noho ena 'i roto i a tātou hai Vārua Maitai, e haka tere mai ena, 'e e aŋa ena i tā'ana me'e haŋa hai tātou.

⁷ Ki te ta'ato'a nō o tātou i va'ai mai ai e Ietū huru kē huru kē te me'e mo aŋa i te aŋa o te 'Atua, he me'e i haŋa e ia mo va'ai mai. ⁸ 'O ira e kī ena 'i ruŋa i te Pāpa'i Mo'a:

«Ko iri 'ana ki te kona ruŋa nui e ma'u rō 'ā i te nu'u 'a-'aru mai te tama'i,
'e ki tō'ona taŋata i va'ai ai huru kē huru kē te me'e».

⁹ He aha te ha'aaura'a o te vānaŋa ena: «ko iri 'ana»? Te ha'aaura'a: mo iri i topa ra'e mai ki ruŋa i te henua.
¹⁰ Te kope topa mai era ko Ietū, 'e te kope iri era ki te kona ruŋa nui ko ia 'ā, mo Pū'oko Haka Tere o te kona ta'ato'a o te ao. ¹¹ 'E 'ā'ana mau 'ā i ha'ata'a, mai roto i te nu'u ta'ato'a [haka moe i te mana'u] 'i ruŋa i a Ietū, i te nu'u ki a rāua i va'ai ai i tō'ona pūai mo aŋa i te aŋa o te 'Atua, kē pa he [āpōtoro], kē pa he taŋata vānaŋa i te me'e haka 'ite e te 'Atua ki a ia, kē pa he ma'ori haka 'ite oho i te [roŋo riva-riva o te 'Atua], 'e kē pa he taŋata hāpa'o 'e hāpī i te taina. ¹² I aŋa ai a Ietū i te me'e nei mo hāpī 'e mo haka riva-riva o te nu'u nei i a tātou i te nu'u ta'ato'a ha'ata'a e te 'Atua mā'ana, ki tano tahi ai a tātou mo aŋa tako'a ki a ia. Pē ira ka hio-hio ka oho ena a tātou te nu'u ta'ato'a 'ā'ana, ¹³ 'ātā ka ai rō e tahi mau nō mana'u 'o te māhāni 'e 'o te haka moe i te mana'u 'i ruŋa i te Poki o te 'Atua. 'E pē ira tako'a ka pa'ari ka oho ena te tātou mana'u o ruŋa i te me'e o te 'Atua, 'ātā ka ai rō te tātou huru, huru riva, pa he huru riva o Ietū Kiritō, 'ina e tahi hape. ¹⁴ E ko ai haka 'ou ia a tātou pa he ŋā poki e ko roa he huri te mana'u 'i te haka roŋo ki te hāpī ta'e he parauti'a haka 'ite e te nu'u mārama-rama 'ite i te reo-reo. ¹⁵ E ai rō tātou pa he nu'u pa'ari ma'u hio-hio 'e haka 'ite hai haŋa ki te nu'u i te hāpī parauti'a o te 'Atua, 'e te tātou huru e hāhine e oho rō ki te huru riva o Ietū Kiritō, Pū'oko o tātou. ¹⁶ 'E, 'o te ai ō'ona he Pū'oko o tātou 'e a tātou he hakari ō'ona, mā'ana e haka tika e papa e haka riva-riva 'i tō'ona kona i a tātou, he kona o tō'ona hakari. 'E mo aŋa tahi o te ŋā kona nei i te rāua aŋa hai haŋa, he nui-nui 'e he pūai he oho te hakari.

Te noho iŋa 'āpī hai Ietū Kiritō

¹⁷ Te me'e haŋa 'a Ietū Kiritō mo kī atu e au ko te me'e nei: 'ina kōrua ko noho haka 'ou pa he nu'u ta'e 'ite ko ai te 'Atua parauti'a. Te noho iŋa, pa'i, o rā nu'u e haka tano ena ki te mana'u ta'e hauha'a 'e ta'e hā'ū'ū i a rāua. ¹⁸ 'E, 'i te pū'oko hio-hio, 'ina he haŋa mo 'ite 'e mo aŋi-aŋi o ruŋa i te me'e o te 'Atua. E pōhāhā nō 'ā te mana'u, 'e 'ina i a rāua te ora 'āpī 'ina he hope'a ra'a va'ai e te 'Atua. ¹⁹ 'Ina he ha'amā haka 'ou 'i te me'e ta'e tano aŋa e rāua; ko va'ai mau 'ana i a rāua ki te rauhuru nō atu me'e ta'e tano pohe e te hakari.

²⁰ 'E ta'e he me'e ena te me'e i hāpī atu, e te taina ē, hora haka 'ite atu era o ruŋa i a Ietū Kiritō. ²¹ 'I te 'ite ō'oku e haka moe rō 'ana kōrua i te mana'u 'i ruŋa i a Ietū, e 'ite tako'a nei a au ko hāpī atu 'ana i te parauti'a o ruŋa i a ia 'e o ruŋa i te noho iŋa tano haŋa e ia mo kōrua. ²² 'O ira, e haka rē te kōrua huru 'e te kōrua noho iŋa ta'e tano o mu'a 'ā haka tere e te me'e ta'e tano pohe e te hakari. O te me'e ena te reo-reo 'e te ma'u i te taŋata a te ara ta'e tano. ²³ E haka rē mo te

Vārua Maitai e haka 'āpī atu i te kōrua mana'u. ²⁴ Te me'e mo take'a 'i ruŋa i a kōrua he huru 'e he noho iŋa 'āpī tano ki te huru 'āpī va'ai atu e te 'Atua, pa he huru mau era 'ā ō'ona. Te noho iŋa nei he noho iŋa tī-tika, tano ki te mata o te 'Atua, 'ina e tahi hape.

Te me'e mau mo aŋa

²⁵ 'O ira, 'ina ko reo-reo haka 'ou; e kī te parauti'a ki te rua. Ta'ato'a nō, pa'i, a tātou o tū hakari 'ā. ²⁶ Mo riri, e u'i kōrua 'o hara; 'e 'ina ko ma'u te riri ki te rua mahana, ²⁷ 'o rava'a rō i a kōrua e Rukifero mo haka hara.

²⁸ Te toke-toke, 'ina ko toke haka 'ou. E aŋa mo rava'a o tā'ana me'e 'e mo hā'ū'ū ki te nu'u veve.

²⁹ 'Ina ko parau'ino 'e 'ina ko kī i te vānaŋa mo ta'e au o te rua. Te me'e mau nō o kōrua mo vānaŋa he me'e riva-riva mo hā'ū'ū i te rua.

³⁰ 'Ina ko haka māui-ui te māhatu o te Vārua Maitai hai aŋa i te me'e ta'e tano; hai ia, pa'i, te 'Atua i tāpa'o ai i a kōrua pa he taŋata 'ā'ana mo te mahana pe mu'a ka oho ena ka haka oti ena e te 'Atua i tā'ana me'e ha'amata aŋa: he haka e'a mau rō 'āvai i a kōrua mai roto i te hara.

³¹ E haka kore mai i a kōrua te ŋā me'e nei: he man-a'u he oho o ruŋa i te me'e ta'e tano aŋa atu e te rua, he hū he riri mo te rua, he tātaka, he vā-vā, 'e he ta'ato'a nō huru o te me'e ta'e tano aŋa ki te rua. ³² E ai kōrua he nu'u riva, māhatu 'aroha, 'ite i te haka rehu i te me'e ta'e tano aŋa atu e te rua, pa he haka rehu iŋa era e te 'Atua i te kōrua hara hai Ietū Kiritō.

5 Pa he ŋā poki haŋa rahi kōrua o te 'Atua, e tu'u kōrua pē ia. ² E haka rē mo te haŋa e haka tika atu, pa he me'e aŋa e Ietū hora va'ai era i a ia ki te mate mo tātou. 'E tō'ona mate era, mo te 'Atua, pa he tūtia 'eo.

³ E ai te kōrua noho iŋa noho iŋa tano o te nu'u ha'ata'a e te 'Atua mā'ana. 'Ina kōrua ko moe i te vi'e 'e i te taŋata ta'e he kenu 'e he vi'e o kōrua, 'ina kōrua ko aŋa i te tētahi haka 'ou atu me'e ta'e tano tu'u pē ira 'e, tako'a, 'ina ko nou-nou. E hāpa'o te kōrua noho iŋa, 'o mana'u tā'ue te nu'u pē nei ē: e aŋa rō 'ana kōrua i te ŋā me'e nei.

⁴ 'Ina kōrua ko vānaŋa i te me'e hano-hano, 'ina ko kī i te vānaŋa ma'a-ma'a 'e i te vānaŋa 'i-'ino. Te me'e o kōrua mo aŋa he ha'ahana-hana i te 'Atua.

⁵ E 'ite kōrua: te kope aŋa i te me'e ta'e tano pohe e te hakari, te kope aŋa i te me'e hano-hano, 'e te kope haka rē i a ia ki te nou-nou, e ko o'o ki roto o te nūna'a taŋata haka tere e Ietū 'e e te 'Atua. Te nou-nou, pa'i, e tu'u rō 'ā pa he me'e ena: e ha'amuri 'ana kōrua ki te 'ītoro, 'e rā 'ītoro he tao'a.

⁶ E u'i kōrua 'o haka roŋo ki te reo-reo ana kī atu: te nu'u aŋa i te ŋā me'e ena 'ina he hape. Te 'Atua e ko ta'e haka ūtu'a i te nu'u ta'e ha'atura ki a ia aŋa i te ŋā me'e nei. ⁷ 'O ira, e u'i 'o aŋa tako'a rō kōrua i te me'e ta'e tano aŋa e tū nu'u era.

He noho iŋa 'i roto i te mā'eha

⁸ 'I mu'a 'ā e noho era kōrua 'i roto i te pōhāhā. 'E hora nei, 'i te ai o kōrua 'a Ietū Kiritō, 'i roto i te mā'e-ha kōrua. 'O ira, e haka tere kōrua pa he nu'u noho 'i roto i te mā'eha. ⁹ 'E te me'e poreko mai te nu'u noho 'i roto i te mā'eha he me'e riva-riva, tī-tika 'e parauti'a. ¹⁰ Te aura'a: e 'ite kōrua he aha te me'e mo koa o te tā-tou Pū'oko Haka Tere ko Ietū Kiritō, 'e 'ai ka aŋa rō.

¹¹ 'Ina ko aŋa i te me'e ta'e hauha'a aŋa e te nu'u noho o roto i te pōhāhā. Te me'e o kōrua mo aŋa he hā'ū'ū ki a rāua mo aŋi-aŋi pē nei ē: te me'e aŋa o rāua me'e ta'e tano. ¹² Te me'e aŋa e te nu'u era e na'a rō 'ā 'o take'a e te taŋata he me'e ha'amā 'ātā mo vānaŋa o ruŋa. ¹³ 'E mo haka mā'eha e te mōrī i te ŋā me'e nei, he take'a e te ta'ato'a i te rake-rake o nei ŋā me'e. ¹⁴ O te mōrī, pa'i, te haka take'a i te huru parauti'a o te me'e. Pa he me'e kī 'i ruŋa i te [Pāpa'i Mo'a]:

«Ka 'ara koe, e ha'uru mai ena;
ka e'a mai roto i te nu'u mate,
'e mā Ietū Kiritō e haka mā'eha atu i a koe».

¹⁵ 'O ira, e u'i te kōrua noho iŋa. 'Ina ko ai pa he noho iŋa o te nu'u ta'e 'ite mo haka topa i te mana'u. ¹⁶ Mo ai o te me'e riva-riva mo aŋa e kōrua, e aŋa; hora nei, pa'i, nu'u rahi te nu'u aŋa i te me'e ta'e tano. ¹⁷ 'Ina kōrua ko aŋa i te me'e 'ina kai mana'u riva-riva hia; e noho e haka topa he aha te me'e haŋa mau o te 'Atua.

¹⁸ 'Ina ko unu ka ta'ero rō, 'o ta'e tano te kōrua noho iŋa; e haka rē mo te [Vārua Maitai] e va'ai atu i tō'ona pūai 'e e haka tere atu i a kōrua. ¹⁹ Pē ira he hīmene kōrua i te vānaŋa o te 'Atua aŋa mo hīmene, i te hīmene kati-kati mo te 'Atua, 'e i te me'e haka hīmene e te Vārua Maitai koia ko ha'ahana-hana hai māhatu ki te 'Atua. ²⁰ 'O te ai o kōrua 'a Ietū Kiritō, Pū'oko Haka Tere o tātou, e māuru-uru e oho ki te 'Atua Matu'a mo te me'e ta'ato'a.

²¹ E te taina, e mo'a kōrua 'i roto i a kōrua 'ana, ki take'a ai e mo'a rō 'ana kōrua i a Ietū Kiritō.

He kenu 'e he vi'e [kiritiano]

²² Pa he haka rē iŋa o te vi'e mo haka tere i a ia e Ietū, pē ira tako'a ana haka rē i a ia mo haka tere e tā'ana kenu. ²³ Te kenu, pa'i, he pū'oko o te vi'e, pē Ietū he pū'oko o te nūna'a taŋata [haka moe i te mana'u] 'i ruŋa i a ia, hakari ō'ona. A Ietū tako'a he kope haka e'a i a rāua mai roto i te ūtu'a o te hara 'e va'ai i te ora 'āpī 'ina he hope'a ra'a. ²⁴ Pa he haka rē iŋa o tā-tou o te nu'u haka moe i te mana'u 'i ruŋa i a Ietū mo haka tere mai e ia, pē ira tako'a 'ana te ŋā vi'e ana haka rē i a rāua mo haka tere e te rāua kenu 'i te me'e ta'ato'a.

²⁵ E te kenu, e haŋa ki te kōrua ŋā vi'e, pa he haŋa iŋa ena 'ā o Ietū ki a tātou, ki te nu'u ta'ato'a haka moe i te mana'u 'i ruŋa i a ia, haka take'a hai va'ai iŋa

era i a ia ki te mate mo tātou. ²⁶ I aŋa ai a Ietū i te me'e nei mo haka riro i a tātou i te nu'u ta'ato'a haka moe i te mana'u 'i ruŋa i a ia he nu'u 'ina e tahi hape ki te mata o te 'Atua hai [papatito] 'e hai vānaŋa era 'ā'ana, ²⁷ mo riro tahi o tātou pa he vi'e hāipo-ipo nehe-nehe mā'ana, 'ina e tahi me'e ta'e tano 'e 'ina e tahi hape 'i te hora ka to'o ena i a tātou mo noho 'i muri i a ia. ²⁸ Pē ira a kōrua te kenu ana haŋa ki te kōrua vi'e, pa he haŋa iŋa mau ena 'ā ki te kōrua hakari. Te kope haŋa ki tā'ana vi'e e haŋa 'ā ki a ia mau 'ā. ²⁹ 'Ina, pa'i, e tahi taŋata ta'e haŋa ki tō'ona hakari. Te me'e aŋa he hāŋai 'e he hāpa'o, pa he hāpa'o iŋa o Ietū Kiritō i a tā-tou i te nūna'a taŋata haka moe i te mana'u 'i ruŋa i a ia. ³⁰ A tātou ta'ato'a, pa'i, he hakari ō'ona; e tahi e tahi o tātou he kona o rā hakari. ³¹ E kī rō 'ana, pa'i, 'i ruŋa i te Pāpa'i Mo'a pē nei ē: «Te taŋata e hāipo-ipo ena, he haka rē i tō'ona matu'a tane 'e i tō'ona matu'a vahine mo noho 'i muri i tā'ana vi'e 'e araru he riro he hakari mau nō e tahi». ³² Hai ŋā vānaŋa nei e take'a ena i te nui-nui o te parauti'a ta'e haka 'ite mai era e te 'Atua 'i mu'a 'ā pē nei ē: a Ietū 'e te nūna'a taŋata haka moe i te mana'u 'i ruŋa i a ia e tahi mau nō. ³³ 'E mo kōrua tako'a te vānaŋa nei: e haŋa te kenu ki tā'ana vi'e, pa he haŋa iŋa mau era 'ā ō'ona ki a ia, 'e te vi'e, e 'ite mo mo'a i tā'ana kenu.

He poki 'e he matu'a [kiritiano]

6 E te ŋā poki, 'o te ai o kōrua 'a Ietū Kiritō, e ha'atura ki te kōrua matu'a, he me'e tano mo aŋa e kōrua. ² 'Ā'ana, pa'i, i kī 'i ruŋa i te [Pāpa'i Mo'a]: «E mo'a te kōrua matu'a tane 'e te kōrua matu'a vahine». Te roŋo nei he roŋo ra'e o te 'Atua ai o te hōrea mo te nu'u ha'atura. ³ Pē nei e kī ena:

«Mo mo'a ō'ou i tu'u matu'a,
he ha'amaitai 'e he haka roa-roa au i tu'u noho iŋa 'i te ao nei».

⁴ 'E a kōrua, e te matu'a tane ē, 'ina ko haka riri i te kōrua ŋā poki. Te tano mau: e hāpa'o e hāpī i a rāua hai oho iŋa tano haŋa e te tā-tou Pū'oko Haka Tere ko Ietū Kiritō.

He 'ekaravo 'e he nu'u haka aŋa i a rāua

⁵ E te 'ekaravo, e ha'atura ki te nu'u haka aŋa atu i a kōrua hai mo'a 'e hai māhatu pa he me'e: e tāvini 'ana a kōrua ki a Ietū. ⁶ E aŋa riva-riva te kōrua aŋa, ta'e nō 'ō 'i te hora 'i muri i a kōrua te nu'u haka aŋa atu ki koa ai a rāua. E aŋa kōrua pa he tāvini o Ietū aŋa hai māhatu i te me'e haŋa e te 'Atua. ⁷ E aŋa riva-riva kōrua hai koa, pa he me'e: e tāvini 'ana kōrua ki a Ietū, ta'e 'ō ki te taŋata. ⁸ E 'ite: e ai rō 'ā te me'e mo va'ai e te 'Atua ki te taŋata, ka 'ekaravo 'o ka ta'e 'ekaravo, 'o te me'e riva-riva aŋa e rāua.

⁹ E a kōrua, e te nu'u haka aŋa ē, e u'i e hāpa'o riva-riva te kōrua 'ekaravo, 'e 'ina ko haka ri'a-ri'a. E mana'u: a Ietū Kiritō 'i te raŋi he Pū'oko Haka Tere o kōrua 'e o rāua tako'a, 'e mō'ona pē tū huru tahi 'ā te taŋata.

He me'e va'ai mai 'o rava'a tātou e Rukifero

¹⁰ E te taina, te vānaŋa hope'a 'ā'aku ka kī atu ena: 'i te hora ta'ato'a e haka rē mā Ietū e haka haŋu atu hai pūai nui-nui ō'ona. ¹¹ E u'i e hāpa'o kōrua hai me'e ta'ato'a va'ai atu e ia mo haka hio-hio, 'o reo-reo atu kōrua e Rukifero. ¹² Ta'e a tātou e moto 'ā ki te taŋata; e moto 'ana ki te tātane, te aura'a, ki a Rukifero 'e ki tā'ana va'ehau ta'ato'a 'ina he take'a mai haka tere i te nu'u noho 'i roto i te pōhāhā. ¹³ E hāpa'o kōrua hai me'e ta'ato'a va'ai atu e te 'Atua mo haka hio-hio 'i te hora moto atu e Rukifero. Pē ira e ko rava'a i a kōrua.

¹⁴ E ma'u hio-hio te parauti'a o te 'Atua pa he va'ehau e haratu'a ena i te pena mo haka noho i tō'ona kahu 'i te hora oho ki te tama'i. E tano te kōrua noho iŋa ki te mata o te 'Atua, ki riro ai rā noho iŋa he me'e mo hāpa'o atu i a kōrua pa he kahu aŋa hai 'aurī e hāpa'o ena i te uma o te va'ehau. ¹⁵ E noho 'i roto i te haumārū va'ai atu e te [roŋo riva-riva o ruŋa i a Ietū], mo hio-hio o kōrua a te ara o te 'Atua, pa he va'ehau e uru ena i te kiriva'e mo haka hio-hio i tō'ona rei iŋa 'i te hora oho ki te tama'i. ¹⁶ E haka moe e oho te kōrua mana'u 'i ruŋa i a Ietū. Pē ira kōrua ka hāpa'o ena i a kōrua 'o hara 'i te hora haka 'atu atu e Rukifero, pa he va'ehau e ma'u ena 'i te rima i te me'e 'aurī mo puru i te te'a pu-puhi ki a ia 'i te hora o te tama'i. ¹⁷ E 'ina ko rehu ki te hora hope'a pē nei ē: ko e'a 'ana a kōrua mai roto i te ūtu'a o te hara 'e ko rava'a 'ana i te ora 'āpī 'ina he hope'a ra'a va'ai e te 'Atua. Pē ira kōrua ka hāpa'o ena mai te reo-reo 'a Rukifero, pa he va'ehau e pu'a ena hai ha'u 'aurī mo hāpa'o i tō'ona pū'oko. 'E e

'ite kōrua mo moto ki a Rukifero hai vānaŋa o te 'Atua, he hoe va'ai atu e te [Vārua Maitai], pa he moto iŋa o te va'ehau hai hoe 'i te hora o te tama'i.

¹⁸ E te taina, 'ina kōrua ko haka rē i te pure; e ani e oho ki te 'Atua hai pūai o te Vārua Maitai. E u'i 'o hōriŋa rō 'e 'o oho kē rō te mana'u. E pure mo te nu'u ta'ato'a ha'ata'a e te 'Atua mā'ana. ¹⁹ E pure tako'a mō'oku, ki va'ai mai ai e te 'Atua i te vānaŋa tano mo kī 'i te hora ka vānaŋa era au o ruŋa i te roŋo riva-riva 'ā'ana, he parauti'a ta'e haka 'ite mai era 'i mu'a 'ā, 'e ki va'ai tako'a mai ai i te pūai 'o ri'a-ri'a a au 'i rā hora. ²⁰ 'O te haka 'ite ō'oku i te [roŋo riva-riva o te 'Atua], he aŋa i va'ai mai e ia, e puru atu ena a au. E pure kōrua mō'oku mo ta'e ri'a-ri'a ō'oku 'i te hora haka 'ite o ruŋa i a Ietū Kiritō.

He 'aroha

²¹ Mo te tātou taina haŋa rahi nei ko Tikiko e ma'u atu i te parau 'āpī o ruŋa i te me'e ta'ato'a topa mai ki a au. E hā'ū'ū rō mai 'ana a Tikiko, 'e he tāvini tako'a pē au o te 'Atua 'ite i te haka tano i tā'ana me'e kī. ²² 'O ira i uŋa atu ena e au mo haka 'ite atu pē hē a mātou. Pē ira he koa a kōrua 'e he pūai te mana'u 'i ruŋa i a Ietū.

²³ Mo te 'Atua Matu'a 'e mo te tātou Pū'oko Haka Tere ko Ietū Kiritō e va'ai atu i te haumārū 'e i te haŋa koia ko haka pūai i te kōrua mana'u 'i ruŋa i a rāua.

²⁴ Ka ai te riva rahi o te 'Atua 'i ruŋa i te nu'u ta'ato'a haŋa hai māhatu ki a Ietū Kiritō, Pū'oko Haka Tere o tātou.

FĪRIPO

A Fīripo he kona nui-nui e tahi o te kona ta'ato'a 'i te rima o te rōmano. 'I te rua ara oho o Pauro haka 'ite ki te nu'u i te roŋo o te 'Atua, i tu'u ai ki te kona nei (Aŋa o te 'Āpōtoro 16.12–40), 'e i haka moe rō i te rāua mana'u 'i ruŋa i a Ietū te tētahi nu'u o ira. Te ŋā taina nei nu'u riva, 'e i hā'ū'ū rō a rāua hai tara mo te aŋa 'a Pauro. 'O ira i haka paka ai 'e i māuru-uru ai e Pauro (4.10–18).

'I te hora pāpa'i era e Pauro i te parau nei, 'i roto i te hare ma'u'aurī (1.7–17), ka ai atu kai 'ite mai ko kona hē rā kona. Me'e rahi, pa'i, te puru iŋa ō'ona 'i te rauhuru nō atu kona (2 Kōrinto 11.23; Aŋa o te 'Āpōtoro 24.27; 28.16). Ka ai atu a Pauro 'i roto i te hare ma'u'aurī, ko te haka moe iŋa 'ana i te mana'u 'i ruŋa i a Ietū 'e ko te koa iŋa 'ana, 'e 'ātā i hatu rō ki te nu'u [kiritiano] o Fīripo mo koa tako'a o rāua (4.4).

'I ruŋa i te parau nei e rahi rō 'ana te vānaŋa mo haka koa o te taina o Fīripo. I haka 'ite rō, pa'i, e Pauro e haŋa rahi rō 'ana 'e e mana'u rahi rō 'ana a ia ki a rāua (1.7–8; 4.1), 'e e pohe rō 'ana mo take'a haka 'ou (1.26). 'E i hatu rō mo haka moe mo oho nō i te rāua mana'u 'i ruŋa i a Ietū Kiritō, mo haŋa mo oho nō e tahi ki te rua, mo noho mo oho nō 'i roto i te haumārū, 'e mo ai mo oho nō e tahi mau nō mana'u (2.2–3). Ko te ŋā me'e nei te me'e hope'a o te nui-nui o ruŋa i te parau nei 'a Pauro (1.27).

Te hope'a o te parau nei he 'aroha a Pauro koia ko te taina puru o muri i a ia ki te taina o Fīripo, 'e he pure mo rāua (4.21–22).

He 'aroha

1 A au, a Pauro, 'e a Timoteo, tāvini o Ietū Kiritō, he 'aroha atu ki a kōrua ki te nu'u o Fīripo ha'ata'a e te 'Atua mā'ana 'o te [haka moe i te mana'u] 'i ruŋa i a Ietū. Te 'aroha nei mo te ta'ato'a o kōrua ananake ko te nu'u pū'oko haka tere o kōrua 'e ko te kōrua [taina hā'ū'ū]. ² Ka ai 'i ruŋa i a kōrua te riva rahi 'e te haumārū o te 'Atua, Matu'a o tātou, 'e o Ietū Kiritō, Pū'oko Haka Tere o tātou.

He māuru-uru

³ 'I te ta'ato'a nō hora mana'u ō'oku ki a kōrua e māuru-uru nei au mo kōrua ki te tātou 'Atua, ⁴ 'e hai koa a au e pure nei mo kōrua ta'ato'a. ⁵ Mai te hora haka moe era, pa'i, o kōrua i te mana'u 'i ruŋa i a Ietū 'ātā ki te hora nei e hā'ū'ū rō mai 'ā kōrua 'i tā'aku aŋa he haka 'ite he oho i te [roŋo riva-riva o ruŋa i a Ietū]. ⁶ O te 'Atua, pa'i, i ha'amata i aŋa i te me'e riva-riva 'i roto i a kōrua 'i te hora haka moe o kōrua i te mana'u 'i ruŋa i a Ietū. 'E, ko 'ite riva-riva 'ana e au he aŋa he oho rō 'ai i nei aŋa 'ātā ka oti rō 'i te mahana o te hoki iŋa mai o Ietū Kiritō.

⁷ Ta'e he me'e mo māere te mana'u ō'oku i te ŋā me'e nei mo kōrua; e ma'u rō 'ana, pa'i, au i a kōrua 'i roto i tō'oku māhatu. A kōrua, pa'i, ka ai a au 'i roto i te hare ma'u'aurī 'o 'i mu'a o te nu'u ra-rahi e haka aŋi-aŋi 'ā pē nei ē: he parauti'a mau 'ā te [roŋo riva-riva o te 'Atua], ko te hokorua iŋa nō mai 'ā kōrua 'i tā'aku aŋa va'ai mai e te 'Atua hai riva rahi ō'ona. ⁸ He 'Atua te me'e i 'ite i te rahi o tō'oku mana'u mo kōrua ta'ato'a; tō'oku haŋa ki a kōrua pa he haŋa iŋa atu ena 'ā o Ietū Kiritō.

⁹ E pure nei au mo kōrua, e ani rō 'ana a au mo 'ata rahi mo oho o te kōrua haŋa mo te 'Atua 'e mo te rua, mo 'ata aŋi-aŋi mo oho kōrua ko ai mau a ia, 'e mo 'ata 'ite o kōrua he aha te me'e riva-riva 'e he aha te me'e rake-rake, ¹⁰ ki aŋa ki oho ai kōrua i te me'e riva-riva mau nō. Pē ira he tano te kōrua noho iŋa ki te mata o te 'Atua, 'e he oho mau rō 'ai kōrua pē ira 'ina e tahi hape 'ātā ki te hoki iŋa mai o Ietū. ¹¹ 'E pē ira tako'a he poreko mai roto i a kōrua me'e rahi te me'e riva-riva hai pūai o Ietū Kiritō, 'e he ha'ahana-hana ia te taŋata i te 'Atua.

Te hauha'a o te puru i a Pauro

¹² E te taina, e haŋa rō 'ana a au mo 'ite o kōrua: ta'e he 'ati mō'oku te me'e topa mai nei ki a au 'o te ai hai nei me'e ko rahi ko oho 'ana te nu'u ŋaro'a i te roŋo riva-riva o ruŋa i a Ietū 'e haka moe i te mana'u 'i ruŋa i a ia. ¹³ Te nu'u 'auario o te hare o te 'ariki 'e te ta'ato'a haka 'ou atu nu'u o nei ko 'ite 'ana e puru atu ena a au 'i roto i te hare ma'u'aurī 'o te haka 'ite ō'oku o ruŋa i a Ietū. ¹⁴ 'E te rahi ra'a o te tātou taina, i 'ite era ko puru 'ana a au, ko 'ata haŋu 'ā te mana'u mo haka 'ite mo oho o ruŋa i te roŋo riva-riva o te 'Atua 'ina he ri'a-ri'a haka 'ou, 'e ko haka noho mau 'ā i te rāua mana'u 'i ruŋa i a Ietū.

¹⁵ Ko 'ite 'ana e au e ai rō 'ana te nu'u haka 'ite o ruŋa i a Ietū he mākota 'e he haŋa mo ai 'ata hau rō atu rāua ki a au, 'e e ai tako'a rō 'ā te nu'u haka 'ite o ruŋa hai mana'u riva-riva. ¹⁶ Te nu'u nei e haka 'ite ena o ruŋa i a Ietū Kiritō he haŋa mai ki a au 'e he 'ite: o te 'Atua a au i ma'u mai ki roto nei mo kī i te parauti'a o ruŋa i tā'ana roŋo. ¹⁷ Tū nu'u mākota ena ta'e hai māhatu e haka 'ite ena o ruŋa i a Ietū, hai haŋa mo ai

ko rāua te ra'e 'e mo haka 'ati i a au hora nei ō'oku 'i roto i te hare ma'u'aurī. ¹⁸ Nōatu. Mo ai he parauti'a te rāua me'e hāpī, ko te koa iña 'ana a au, ka ai hai māhatu 'o ta'e hai māhatu e hāpī ena. Te me'e hauha'a, pa'i, ko te haka 'ite ko te oho iña 'ana o ruña i a Ietū.

¹⁹ 'E, koa ri'a-ri'a au 'i te 'ite ō'oku: māuru-uru ki te kōrua pure 'e ki te hā'ū'ū o te [Vārua Maitai] va'ai mai e Ietū Kiritō te me'e ta'ato'a topa mai ki a au mo tō'oku riva-riva. ²⁰ Tā'aku me'e hope'a o te haña he ta'e aña ō'oku e tahi me'e 'o ha'amā a au 'i mu'a i a Ietū, 'e he vānaña he oho ō'oku o ruña i a ia hai pūai, pa he me'e nei e aña atu ena ki 'aņarīnā, ki take'a ai e te nu'u i te nui-nui o Ietū hai me'e ta'ato'a aña 'e kī e au, 'o, ana haña te 'Atua, hai mate iña ō'oku.

²¹ A au e ora nei mo tāvini 'e mo ha'amuri mau nō ki a Ietū. 'E mo mate ō'oku, ko 'ata tano 'ā; he ai, pa'i, a au 'i muri i a ia. ²² 'E mo ora mo oho nō ō'oku, he 'ata ai ia tō'oku hora mo aña i tā'ana aña. Te me'e nō, kai 'ite a au he aha te me'e ka topa mai ena ki a au 'i te hora nei. ²³ E tātake rō 'ana, pa'i, tō'oku mana'u o ruña i te nā me'e nei ararua. E haña rō 'ana, pa'i, a au mo mate mo iri ō'oku ki muri i a Ietū, he me'e 'ata riva-riva mō'oku. ²⁴ 'E, ka ai atu pē ira, te me'e riva-riva mo kōrua he ora he oho nō atu ō'oku. ²⁵ 'I te aņi-aņi ō'oku kai oti 'ā tā'aku aña 'i roto i a kōrua, he 'ite e au 'ina kai tano 'ā tō'oku hora mo mate, 'e he noho atu a au mo hā'ū'ū mo 'ata haka pūai i te kōrua haka moe iña i te mana'u 'i ruña i a Ietū ki 'ata koa ai kōrua. ²⁶ Pē ira he tu'u haka 'ou atu a au ki muri i a kōrua, 'e he 'ata ha'amuri kōrua ki a Ietū 'o te hā'ū'ū mai mo hoki haka 'ou atu ki a kōrua ena.

Te noho iña tano mo te nu'u kiritiano

²⁷ E te taina, te me'e haña: e u'i e haka tano te kōrua noho iña ki te roņo riva-riva o te 'Atua. Te me'e haña nō, pa'i, 'ā'aku mo 'ite mai o ruña i a kōrua, ka oho atu 'o ka ta'e oho atu a au: nā kōrua e haka pūai mai ena e tahi nō mana'u 'i te haka 'ite iña i te roņo riva-riva o ruña i a Ietū ²⁸ ta'e hai ri'a-ri'a, ka ai atu e ai rō 'ā te nu'u 'ina he haña ki te kōrua aña. 'E 'i te ta'e ri'a-ri'a o kōrua, ka aņi-aņi ena e rā nu'u: te hope'a o te rāua ara he ūtu'a, 'e ka aņi-aņi ena e kōrua: he va'ai atu i te ora 'āpī 'ina he hope'a ra'a. 'E te nā me'e nei ararua o te 'Atua.

²⁹ Te 'Atua, pa'i, hai riva rahi ō'ona, ko va'ai mai 'ana ki a tātou i te me'e ta'e va'ai ki te ta'ato'a: te me'e ena he haka moe i te mana'u 'i ruña i a Ietū, 'e pē ira 'ā te me'e ena he 'amo i te 'ati topa mai ki a tātou ki te nu'u 'ā'ana, ³⁰ he 'ati nā e kōrua e 'amo mai ena 'o te haka 'ite i te roņo riva-riva o ruña i a Ietū 'i mu'a o te nu'u e riri rō 'ana mo te vānaña o te 'Atua. A kōrua, pa'i, he mata'ite pē hē a au i 'amo ai 'i rā 'ati 'i mu'a 'ā, 'e ko 'ite 'ana ko te 'amo iña 'ana a au 'ātā ki 'aņarīnā.

E tu'u te kōrua mana'u pa he mana'u iña o Ietū

² E te taina, mo ai e pūai rō 'ā a kōrua 'o te ai o kōrua 'a Ietū Kiritō, mo ai e ŋaro'a rō 'ana e kōrua i te ora 'o te haña atu ō'ona ki a kōrua, mo ai e koa rō 'ana a kōrua 'o te ai o te [Vārua Maitai] 'i roto i a kōrua, 'e mo ai he nu'u māhatu 'aroha kōrua, ² e haña ia kōrua 'i roto i a kōrua 'ā, e noho kōrua 'i roto i te haumārū, 'e e ai te kōrua mana'u e tahi mau nō, ki koa mau rō ai a au mo kōrua. ³ 'Ina kōrua ko aña e tahi aña mo haka tu'u pē nei ē: 'auē 'ō kōrua ē. Ana aña kōrua e tahi me'e, e aña hai haumārū 'e hai mana'u pē nei ē: i hau rō atu te tētahi nu'u ki a kōrua. ⁴ 'E 'ina ko kimi i te riva-riva mo kōrua mau nō; e u'i tako'a i te riva-riva mo te rua. ⁵ E tu'u te kōrua mana'u pa he mana'u iña o Ietū ⁶ pē nei ē:

Ka ai atu a ia he 'Atua,
i haña nō mo haka rē i rā tōro'a
⁷ mo haka riro i a ia he taņata,
'e mo tu'u mai ō'ona pa he tāvini.

'E, 'i tō'ona ha'ere iña pa he taņata,
⁸ te me'e i aña he ha'atura ki te 'Atua
'ātā ki te roa he ha'ati'a i a ia mo mate,
'e 'ātā mo mate 'i ruña i te tātaurō,
he ūtu'a mo te nu'u taparahi-ta'ata.

⁹ 'O ira te 'Atua i va'ai ai ki a Ietū
i te tōro'a hope'a o te nui-nui,
'e i te parau o te me'e ta'ato'a,
¹⁰ ki tū-turi 'e ki ha'amuri tahi ai ki a Ietū
te me'e ta'ato'a 'i te raņi, 'i ruña i te henua 'e 'i te
pō'auahi, †

¹¹ ki kī ai te nā me'e ta'ato'a nei pē nei ē:
he parauti'a mau 'ā a Ietū Kiritō he Pū'oko Haka Tere
o te me'e ta'ato'a.
Pē ira ka ha'ahana-hana tahi ena ki te 'Atua Matu'a.

Te noho iña tano 'i te ao nei

¹² E te taina, hora era ō'oku 'i muri i a kōrua, he ha'atura nō te kōrua aña ki te 'Atua. 'E, hora nei, 'ina a au o muri o kōrua, e 'ata haka pūai te kōrua ha'atura iña ki a ia mo aña mo oho nō o kōrua, hai mo'a, i te me'e tano aña e te nu'u e'a mai roto i te ūtu'a o te hara. ¹³ O te 'Atua, pa'i, te haka poreko 'i roto i a kōrua i te haña mo ha'atura ki a ia 'e te va'ai atu i te pūai mo aña o kōrua i te me'e mo koa ō'ona.

¹⁴ Te me'e ta'ato'a aña e kōrua, ana aña 'ina ko tātake 'e 'ina ko hēņu'i-ņu'i, ¹⁵ 'o ai te kōrua hape 'e te kōrua me'e ta'e tano mo tuhi atu e te taņata. 'I roto i te nu'u ha'avare 'e taparahi-ta'ata o te ao nei e riro kōrua he nā poki o te 'Atua 'ina e tahi hape. E mā'eha kōrua 'i roto i a rāua pa he hetu'u pura 'i roto i te pōhāhā ¹⁶ koia ko haka 'ite ko oho i te vānaña o te 'Atua ki a rāua, vānaña va'ai i te ora 'āpī 'ina he hope'a

† Te ha'aaura'a: te merahi ta'ato'a, te nu'u ora, te nu'u mate 'e te tātane ta'ato'a.

ra'a. Mo aņa o kōrua pē ira, he koa a au mo kōrua 'i te hora o Ietū ka hoki mai ena 'o te 'ite ō'oku pē nei ē: tā'aku aņa aņa atu 'i roto i a kōrua kai māu'a.

¹⁷ Pa he tūtia va'ai e kōrua ki te 'Atua mo koa ō'ona te 'ati e 'amo ena e kōrua 'o te [haka moe i te mana'u] 'i ruņa i a Ietū 'e 'o te aņa o kōrua ki a ia. 'E mo haņa o te 'Atua mo 'āmui i tō'oku mate ki te tūtia va'ai e kōrua ki a ia, pa he huri iņa i te manu tūtia hai vino, e koa nō a au, pa he koa iņa nei ō'oku mo kōrua. ¹⁸ Pē ira tako'a kōrua: ana topa mai i te me'e nei, e koa kōrua mō'oku.

Timoteo

¹⁹ Ana haņa a Ietū, e ko roa he uņa atu a au i a Timoteo, 'e, ka hoki mai ena a ia mai i a kōrua, he koa a au 'i te parau 'āpī ka ma'u mai ena o ruņa i a kōrua. ²⁰ O roto o tō'oku hokoru a ko ia mau nō te kope mana'u pē au, haņa hai māhatu mo riva-riva o kōrua. ²¹ Te tētahi te me'e mana'u ra'e he riva-riva o rāua, ta'e 'ō he aha te me'e haņa 'a Ietū. ²² Ko 'ite 'ana, ho'i, kōrua pē hē te huru o Timoteo 'e pē hē a ia i hā'ū'ū i oho mai ai mo haka 'ite i te [roņo riva-riva o te 'Atua]. E hā'ū'ū mai nei pa he poki mau 'ana 'ā'aku. ²³ 'O ira, ki 'ite a au he aha te me'e ka topa mai ena, ka uņa iho atu ena e au, ²⁴ ka ai atu te parauti'a, 'i a au e haka noho rō 'ā i tō'oku mana'u 'i ruņa i te 'Atua pē nei ē: e ko roa he oho tako'a atu a au ki a kōrua ena.

Epafororito

²⁵ 'I a au e mana'u tako'a 'ā mo uņa atu i te tātou taina ko Epafororito, kope uņa mai era e kōrua mo hā'ū'ū mai ki a au. A ia he hokoru a aņa ō'oku 'e pa he va'ehau haka 'ou e tahi o te [Kiritō].

²⁶ A Epafororito e koromaki rō 'ana ki a kōrua ta'ato'a. 'I e mana'u rahi atu ena 'i te 'ite o kōrua pē nei ē: i māui-ui rō a ia. ²⁷ 'E he aņi mau 'ā i māui-ui rō, 'ātā i oho rō mo mate. 'E, te 'Atua i haka 'aroħa rō i a ia 'e i a au tako'a, 'o 'ata rahi rō te māui-ui 'i roto i tō'oku māhatu.

²⁸ 'I a au he haka ke'o-ke'o he haka uņa atu mo koa o kōrua 'o te take'a haka 'ou i a ia, 'e pē ira e ko mana'u rahi haka 'ou atu a au. ²⁹ Ka tu'u atu ena a ia, e to'o kōrua hai māhatu, pa he taina haka moe i te mana'u 'i ruņa i a Ietū. Te nu'u pē ia e mo'a e kōrua. ³⁰ A Epafororito, pa'i, i va'ai rō i a ia ki te mate mo aņa ki a Ietū. Te parauti'a, i oho rō mo mate 'i te hā'ū'ū mai i a au 'i te aņa 'ina e ko rava'a e kōrua mo aņa he kore o kōrua o muri i a au.

Te me'e hauha'a he māhani i a Ietū

3 Te me'e hope'a, e te taina ē, e koa 'o te ai o kōrua 'a Ietū Kiritō. Te kī te oho nō atu i te me'e ko kī atu era 'ana e au ta'e he 'ati mō'oku; ko 'ite 'ana, pa'i, e au he me'e mo hā'ū'ū atu i a kōrua.

² E hāpa'o kōrua e te nu'u kī: mo e'a mai roto i te ūtu'a o te hara 'e mo rava'a i te ora 'āpī 'ina he hope'a ra'a e hore te kiri o te kinonja. Te nu'u ena pa he pai-heņa taehae haņa mo aņa atu i te me'e ta'e tano. ³ Pē

nei e mana'u ena: a rāua he nu'u o te 'Atua 'o te hore i te kiri o te kinonja. 'E ki te mata o te 'Atua, te nu'u parauti'a hore i te kiri o te kinonja, te aura'a, te nu'u parauti'a 'ā'ana, ko tātou, he nu'u koa 'o te ai 'a Ietū Kiritō 'e he nu'u ha'amuri ki a ia hai pūai o te [Vārua Maitai]. Ko 'ite 'ana, pa'i, e tātou ta'e hai hore i te kiri o te kinonja 'e hai haka tano ki te tētahi atu haka tere iņa ana tano te taņata ki te mata o te 'Atua.

⁴ 'Āhani te taņata e tano rō 'ana ki te mata o te 'Atua hai nā me'e ena, ko au ia te kope ra'e mo tano ki tō'ona mata. ⁵ He [hūrio], pa'i, a au 'e e va'u mahana o tō'oku poreko i hore ai i te kiri o tō'oku hua tano ki te mātou haka tere iņa. 'E, tako'a, he hakaara a au o [Mēhāmina], poki o te mātou tupuna ko Hākovo, kī tako'a ko [Itaraera]. Te kī 'ā'aku: he ['evereo] a au, poki o te nu'u 'evereo. 'E, 'i ra'e ki te haka moe ō'oku i te mana'u 'i ruņa i a Ietū, he [fariseo] a au, taņata 'ata ha'atura ki te [haka tere iņa o te 'Atua haka pāpa'i ki a Mōtē] ⁶ ki te roa, 'ina e tahi nu'u mo kī e hape rō 'ana a au, 'e 'ātā he kimi nō tā'aku aņa i te nu'u [haka moe i te mana'u] 'i ruņa i a Ietū mo tōtōā.

⁷ Te me'e ta'ato'a ena, me'e mana'u era e au e hauha'a rō 'ā mo tano ō'oku ki te mata o te 'Atua, hora nei, 'o te ai ō'oku 'a Ietū Kiritō, e 'ite nei a au me'e hauha'a-'ore. ⁸ 'E ta'e nō pē ira. Mō'oku, 'ina e tahi me'e mo hāhine ki te me'e ena he māhani ki a Ietū Kiritō, Pū'oko Haka Tere ō'oku. Ko hoa tahi 'ana e au i rā nā me'e mo koa ō'ona; mō'oku, pa'i, rā nā me'e ta'ato'a he tūta'e nō atu e tahi o te ao nei. Tā'aku me'e haņa nō ko ia ⁹ 'e he ai ō'oku 'ā'ana. Hai ia, pa'i, a au e tano nei ki te mata o te 'Atua, ta'e 'ō hai ha'atura ki te [haka tere iņa 'a Mōtē]. He haka moe ō'oku i te mana'u 'i ruņa i a Ietū i kī ai e te 'Atua e tano rō 'ana a au ki tō'ona mata. ¹⁰ 'E hora nei, tā'aku me'e haņa he māhani riva-riva he oho ō'oku i te [Kiritō] 'e he ŋaro'a 'i roto i a au tō'ona aņa iņa mai hai pūai, pa he aņa iņa era o te 'Atua hai pūai hora haka ora era i a Ietū mai te mate. 'E, tako'a, he 'ite ō'oku mo ha'aoroma'i, pē ia, i te 'ati mo aņa i te me'e haņa o te 'Atua, 'e 'ātā mo mate 'o te ai ō'oku 'a Ietū Kiritō, ana haņa te 'Atua. ¹¹ Te tumu e haņa nei a au ki te nā me'e nei: mo haka ora i a au e te 'Atua mai te mate pe mu'a ka oho ena.

Te roa hope'a

¹² 'Ina a au he kī: ko tu'u 'ana 'ō a au ki te roa hope'a: he taņata 'ina e tahi hape pē Ietū. Te me'e nō 'ā'aku mo kī atu: 'i a au e aņa e oho nō 'ā mo tu'u pē ia; hora ha'ata'a era, pa'i, i a au mā'ana, he me'e ena te me'e haņa mō'oku. ¹³ E te taina, 'ina a au he kī: ko rava'a mau 'ana 'ō e au i rā roa. Tā'aku me'e aņa he haka rehu atu i te me'e o tu'a, 'e he aņa he oho i te me'e haņa e te 'Atua mo aņa e au, ¹⁴ mo tu'u ki te roa hope'a 'e mo rava'a e au i te me'e mo va'ai mai e te 'Atua 'i te raņi 'o te ai ō'oku 'a Ietū Kiritō, pa he kope 'ā'ati e tahuti ena mo rava'a i te me'e mo haka koa i a ia ka tu'u ena ki te roa hope'a.

¹⁵ Pē nei a tātou, te nu'u mana'u pa'ari o ruņa i te me'e o te 'Atua, ana mana'u. 'E mo ai tā'ue e mana'u

kē rō 'ana kōrua o ruŋa i te ŋā me'e nei, he haka anj-anji atu e te 'Atua he aha te me'e tano. ¹⁶ Te me'e haŋa nō: he riro o te tātou noho iŋa noho iŋa tano ki te me'e ko haka anj-anji mai era 'ā e ia.

O te raŋi tātou

¹⁷ E te taina, e haka tano te kōrua noho iŋa pa he noho iŋa ō'oku 'e o te nu'u te rāua noho iŋa pa he noho iŋa take'a e kōrua 'i ruŋa i a au. ¹⁸ Ko kī atu era 'ā e au 'e hai taŋi ka kī haka 'ou atu ena: nu'u rahi te nu'u kī: 'a Ietū a rāua, 'e te parauti'a mau, e riri rō 'ana mō'ona. O te rāua noho iŋa ta'e tano, pa'i, te haka take'a mai pē nei ē: te mate era o Ietū 'i ruŋa i te tā-taurō 'ina e tahi hauha'a mo rāua. ¹⁹ Te me'e hope'a ka topa era ki te nu'u era he ūtu'a o te 'Atua. He me'e pohe nō o te hakari te rāua 'atua. Te me'e ha'amā he me'e te'o-te'o e tahi o rāua, 'e te rāua mana'u 'i ruŋa i te me'e o te ao mau nō nei.

²⁰ 'E a tātou, te nu'u haka moe i te mana'u 'i ruŋa i a Ietū, o te raŋi; 'e e tiaki 'ana ki te topa iŋa mai o Ietū Kiritō, Pū'oko Haka Tere o tātou, he kope haka e'a i te taŋata mai roto i te ūtu'a o te hara 'e va'ai i te ora 'āpī 'ina he hope'a ra'a, ²¹ 'e he kope haka riro i te hakari mate nei o tātou pa he hakari era 'ā ō'ona, hakari pūai 'ina e ko mate; i a ia, pa'i, te pūai mo aŋa i te me'e ta'ato'a.

4 'O ira, e te taina ē, e u'i e haka noho e oho te kōrua mana'u 'i ruŋa i a Ietū. E mana'u rahi rō atu 'ana a au ki a kōrua, e haŋa rahi rō atu 'ā, 'e hai kōrua a au e koa nei.

He hatu mo te taina hoko rua o Fīripo

² He ani atu a au ki a kōrua, e 'Evorā ē, 'e e Tinitike ē: ka haka kore te riri o roto i a kōrua; a kōrua, pa'i, he taina haka moe i te mana'u o ruŋa i a Ietū. ³ 'E a koe, e te hokoru a aŋa ō'oku ē: e hā'ū'ū ki te ŋā taina ena. A rāua ananake ko kuā Keremente 'e tētahi atu nu'u i aŋa tako'a rō 'i muri i a au 'i te aŋa he haka 'ite he oho i te [roŋo riva-riva o ruŋa i a Ietū]. Te rāua 'iŋoa nā 'i ruŋa i te puka o te 'Atua, puka 'i ruŋa e pāpa'i ena te 'iŋoa o te nu'u rava'a i te ora 'āpī 'ina he hope'a ra'a.

He hatu mo te ta'ato'a

⁴ E koa e oho nō kōrua 'o te ai o kōrua 'a Ietū Kiritō. 'Ī a au he kī haka 'ou atu: ꝑ koa kōrua! ⁵ 'E 'ite e te nu'u ta'ato'a: nu'u riva kōrua. Te hoki iŋa mai, pa'i, o Ietū ko hāhine 'ana.

⁶ 'Ina ko mana'u rahi ki te me'e topa atu 'i ruŋa i a kōrua. E pure ki te 'Atua, e ani ki a ia mo hā'ū'ū atu, 'e 'ina ko rehu mo māuru-uru. ⁷ Mo aŋa o kōrua i te me'e ena, he va'ai atu e te 'Atua i te haumārū 'ina e ko anj-anji e te mana'u taŋata, 'e mo nā haumārū e hāpa'o i te kōrua māhatu 'e i te kōrua mana'u 'o te ai o kōrua 'a Ietū Kiritō.

⁸ 'E tā'aku vānaŋa hope'a mo kōrua, e te taina ē: e mana'u ki te me'e parauti'a, ki te me'e ta'ato'a tano mo mo'a, ki te me'e tano ki te mata o te 'Atua, ki te me'e 'ina he hara, ki te me'e nehe-nehe, ki te ta'ato'a me'e riva-riva. Te kī: e mana'u ki te me'e ta'ato'a tī-tika 'e tano mo ha'ahana-hana.

⁹ 'E aŋa tahi kōrua i te me'e hāpī atu e au, he me'e ŋaro'a 'e take'a era kōrua mai i a au. Pē ira he hokoru a atu e te 'Atua va'ai mai i te haumārū.

He māuru-uru

¹⁰ Ko koa 'ana 'e ko māuru-uru 'ana a au ki te 'Atua 'o te haka take'a haka 'ou mai o kōrua, 'i te hora nei, i te kōrua mana'u iŋa mai ki a au hai haka ma'u mai o kōrua hai moni. Ko 'ite 'ana e au he mana'u nō te aŋa o kōrua mo hā'ū'ū mai. Te me'e nō, he rava'a iho e kōrua i te rāve'a pē hē ana haka ma'u mai i te kōrua hā'ū'ū. ¹¹ Ta'e he hape o tā'aku me'e e kī atu ena a au i te me'e nei. A au, pa'i, ko 'ite 'ana mo koa i te me'e nō era 'ā'aku i ai. ¹² 'E 'ite rō 'ā a au pē hē te noho iŋa 'i roto i te oŋe 'e pē hē te noho iŋa 'i roto i te mau. 'E e 'ite tako'a rō 'ana a au mo koa ka ai atu e mākona rō 'ā 'o e maruaki rō 'ana, e ai rō 'ā 'o e ta'e ai rō 'ā tā'aku me'e. ¹³ Me'e nō era mo topa mai, e 'ite nō e au mo ma'u, māuru-uru ki a Ietū Kiritō, kope haka pūai mai i a au. ¹⁴ 'E, ka ai atu pē ira, he māuru-uru atu a au i hā'ū'ū mai ai kōrua 'i tō'oku 'ati.

¹⁵ Ko 'ite 'ana a kōrua, e te taina o Fīripo ē, hora oho era ō'oku mai Mātērōnia mo haka 'ite mo oho i te roŋo riva-riva o ruŋa i a Ietū, hora e haka moe iho 'ana kōrua i te mana'u 'i ruŋa i a ia, ko kōrua mau nō te nu'u i hā'ū'ū mai hai moni. ¹⁶ 'Ātā 'i te hora era ō'oku 'i Tētārōnika, ta'e nō e tahi haka ma'u iŋa mai o kōrua hai moni. ¹⁷ Te me'e nei e au e kī atu ena ta'e 'ō he haŋa ō'oku mo hā'ū'ū mai; tō'oku haŋa mo 'ata ha'amaitai atu e te 'Atua 'o te hā'ū'ū mai o kōrua i a au.

¹⁸ He haka 'ite atu a au: te me'e ta'ato'a haka ma'u mai era e kōrua ki a Epafororito ko tu'u mai 'ana; rahi ri'a-ri'a 'e 'ina he me'e hape toe 'ā'aku. Te me'e nei pa he tūtia 'eo va'ai ki te 'Atua, 'e he me'e koa 'ā'ana. ¹⁹ 'E mo te 'Atua, ki a ia a au e tāvini nei, e va'ai atu i te me'e ta'ato'a hape o kōrua mai te hauha'a ta'e pau 'ā'ana 'o te ai o kōrua 'a Ietū Kiritō. ²⁰ Ki ha'ahana-hana tahi tātou ki te 'Atua, he Matu'a o tātou, 'ātā ki te hope'a ra'a. ['Āmene].

He 'aroha

²¹ 'E 'aroha atu kōrua ki te nu'u ta'ato'a [haka moe i te mana'u] 'i ruŋa i a Ietū. Te ŋā taina nei o muri i a au 'i e 'aroha atu ena ki a kōrua. ²² 'Ī e 'aroha tako'a atu ena te taina ta'ato'a haka moe i te mana'u 'i ruŋa i a Ietū o nei. 'E te nu'u o nei aŋa ki te 'ariki rōmano, ko rāua te me'e 'ata 'aroha atu ki a kōrua. ²³ Ka ai 'i ruŋa i a kōrua ta'ato'a te riva rahi o Ietū Kiritō, he Pū'oko Haka Tere o tātou.

KŌROSA

'I te kona nei ko Kōrosa i poreko ai e tahi o te nūna'a [kiritiano] ra'e o roto o te nu'u ta'e he [hūrio]. O te kope e tahi o nei kona te 'īŋoa ko Epafara i haka 'ite ra'e ki te nu'u nei o ruŋa i a Ietū 'e i kī ki a rāua mo [haka moe i te mana'u] 'i ruŋa (1.7). I ŋaro'a era e te nu'u nei i te parauti'a o ruŋa i a Ietū, he to'o mo rāua hai koa i te hāpī nei 'e he haka moe i te mana'u 'i ruŋa i a Ietū. Ka ai atu pē ira, pe mu'a 'iti i ha'amata i haka tapa ai a rāua mai te hāpī nei. 'O ira a Pauro, 'i ruŋa i te parau nei, i haka mana'u haka 'ou ai ki rā ŋā taina pē nei ē: hai toto tehe era o Ietū 'i ruŋa i te tātaurō te 'Atua i haka riva-riva haka 'ou ai ki a ia i te me'e ta'ato'a o te ao 'e o ruŋa i te ranjī 'a-va-'ava mai i a ia hai hara era o ['Ātamu] (1.20).

Te tētahi nu'u o Kōrosa e hāpī 'ā pē nei ē: e ai rō 'ā te vārua pūai rahi. O ruŋa i te hāpī nei te hatu 'a Pauro mo te taina o Kōrosa: mo ta'e haka roŋo ki te nu'u era 'e mo mana'u pē nei ē: a Ietū Kiritō he 'Atua 'e 'ata hau rō atu 'i te pūai ki te vārua (2.8–10,15). He hatu tako'a mo ta'e haka rē i a rāua mo reo-reo e te nu'u kī e ai rō 'ana te me'e mo 'āmui ki te haka moe iŋa o te mana'u 'i ruŋa i a Ietū, mo tano iho o rāua ki te mata o te 'Atua (2.16–17).

Te me'e vānaŋa rahi o ruŋa i te parau nei he noho iŋa 'āpī tano mo te nu'u 'a Ietū Kiritō. He haka anjī-anjī e Pauro ki te nu'u o Kōrosa 'e ki te nu'u kiritiano ta'ato'a: a rāua ko mate 'ana, te aura'a, ko haka rē 'ana i te rāua noho iŋa ra'e. 'E hora nei, te rāua noho iŋa pa he me'e: 'i muri i a Ietū Kiritō a rāua 'e 'i mu'a o te 'Atua (3.3–4). Pē nei, pa'i, e kī ena: (3.11).

Mo haka mao i te parau nei he 'aroha a Pauro ki te nu'u ta'ato'a haka moe i te mana'u 'i ruŋa i a Ietū o Kōrosa hai 'īŋoa o te nu'u ta'ato'a o muri i a ia, 'e he ani mo tai'o i tā'ana parau nei ki te taina o te kona era ko Rāōritea (4.16).

He 'aroha

1 A au, a Pauro, ['āpōtoro] 'a Ietū Kiritō hai haŋa o te 'Atua, 'e te tātou taina ko Timoteo, ² he 'aroha atu ki a kōrua ki te nu'u ta'ato'a ha'ata'a e te 'Atua mā'ana o Kōrosa, taina [haka moe i te mana'u] 'i ruŋa i a Ietū ta'e haka rē i a ia ki te hora hope'a. Ka ai 'i ruŋa i a kōrua te riva rahi 'e te haumārū o te 'Atua, Matu'a o tātou.

He māuru-uru 'e he pure iŋa o Pauro

³ E pure nei a mātou, te nu'u taina o nei, mo kōrua, e māuru-uru rō 'ana ki te 'Atua, Matu'a o te tātou Pū'oko Haka Tere ko Ietū Kiritō. ⁴ Ko ŋaro'a 'ana, pa'i, e mātou pē nei ē: e haka moe rō 'ana kōrua i te mana'u 'i ruŋa i a Ietū, 'e e haŋa rō 'ana kōrua ki te nu'u ta'ato'a ha'ata'a e te 'Atua mā'ana, ⁵ 'o te ai e tiaki tako'a rō 'ana kōrua ki te me'e hōrea mai e ia mo tātou 'i te ranjī. A kōrua ko ŋaro'a era 'ana o ruŋa i te me'e nei hora haka 'ite atu era i te roŋo parauti'a o te 'Atua ⁶ tu'u atu era ki a kōrua. Te roŋo riva-riva nei o ruŋa i a Ietū nā ko 'ite ko oho 'ana 'i te kona ta'ato'a o te ao koia ko te haka 'āpī ko te oho i te noho iŋa o te nu'u haka moe i te mana'u 'i ruŋa i a ia, pa he me'e topa atu ki a kōrua hora anjī-anjī era he parauti'a mau 'ā te vānaŋa ŋaro'a e kōrua o ruŋa i te riva rahi o te 'Atua mo te taŋata. ⁷ Te me'e ena 'a Epafara, kope haŋa rahi o mātou aŋa tako'a ki te 'Atua, i hāpī atu. A ia he tāvini parauti'a 'a Ietū Kiritō. ⁸ 'Ā'ana i ma'u mai i te parau

'āpī o ruŋa i a kōrua 'e o ruŋa i te kōrua haŋa haka poreko e te [Vārua Maitai] 'i roto i a kōrua mo te nu'u ta'ato'a ha'ata'a e te 'Atua mā'ana.

⁹ 'O ira, mai te hora 'ite era o mātou o ruŋa i a kōrua, e pure e oho nō nei ki te 'Atua mo va'ai atu e ia, hai Vārua Maitai, i te 'ite 'e i te mārama-rama mo anjī-anjī riva-riva i tā'ana me'e haŋa mo aŋa e kōrua. ¹⁰ Pē ira te kōrua noho iŋa ka ai ena noho iŋa tano o te nu'u 'a Ietū Kiritō, 'e ka aŋa ka oho mau nō ena kōrua i te me'e mo koa ō'ona 'e i te me'e riva-riva mo hā'ū'ū ki te rua. 'E pē ira tako'a ka 'ata māhani ka oho ena kōrua i te 'Atua.

¹¹ 'I roto i te mātou pure e no-no'i rō 'ana a mātou ki te 'Atua mo haka haŋu atu i a kōrua hai pūai nui-nui ō'ona. Pē ira he 'ite kōrua mo 'amo hai pūai, hai haumārū 'e hai koa i te 'ati ta'ato'a nō era mo topa atu 'i ruŋa i a kōrua ¹² koia ko māuru-uru ki te 'Atua Matu'a 'o te haka riro atu i a kōrua he nu'u tano mo rava'a tako'a i te me'e hōrea era e ia mo te nu'u ha'ata'a mā'ana, he nu'u o tō'ona haka tere iŋa, haka tere iŋa o te mā'eha. ¹³ O te 'Atua, pa'i, i haka e'a i a tā-tou mai te rima o te kope te haka tere iŋa 'i roto i te pōhāhā, 'e he haka noho i a tātou 'i roto i te haka tere iŋa o tā'ana Poki haŋa rahi ko Ietū Kiritō, ¹⁴ kope hai toto tehe era ō'ona 'i ruŋa i te tātaurō i 'auhau ai i te tātou hara mo haka e'a i a tātou mai roto i te pōhāhā 'e mo haka rehu e te 'Atua i te tātou hara.

¿Ko ai a Ietū Kiritō?

¹⁵ O te [Kiritō] te haka 'ite mai i te huru o te 'Atua, kope 'ina he take'a e tātou. Te Kiritō ko ai era 'ana 'i ra'e ki te aña i te ao, 'e i hau rō atu ki te me'e ta'ato'a aña e te 'Atua. ¹⁶ O te 'Atua i haka aña ki te Kiritō i te me'e ta'ato'a e ai ena: te me'e 'i ruña i te ranji 'e te me'e 'i ruña i te henua, te me'e take'a 'e te me'e ta'e take'a koia ko te rāua pū'oko haka tere ta'ato'a. Te me'e ta'ato'a i aña ai e te 'Atua hai ia 'e mā'ana.

¹⁷ Ko ai era 'ana te Kiritō ki te me'e ta'ato'a, 'e hai ia e noho tahi ena 'i tō'ona kona. ¹⁸ A ia he Pū'oko Haka Tere o tātou o te nu'u ta'ato'a haka moe i te mana'u 'i ruña i a ia, 'e a tātou pa he hakari ō'ona. Mā'ana e haka tika mai, pa he pū'oko e haka tika ena i tō'ona hakari. 'E a ia tako'a he kope ra'e i haka ora e te 'Atua mai te mate, ki ai ai ko ia te ra'e 'i te me'e ta'ato'a.

¹⁹ I a Ietū Kiritō te huru 'e te pūai ta'ato'a o te 'Atua; pē ira i haña ai e te 'Atua. ²⁰ 'E hai Ietū, hai toto tehe era ō'ona 'i ruña i te tātaurō, te 'Atua i haka riva-riva haka 'ou ai ki a ia i te me'e ta'ato'a o te ao 'e o ruña i te ranji 'ava-'ava mai i a ia 'i te hara.

He haka riva-riva iña o te 'Atua i a tātou ki a ia

²¹ E te taina, 'i mu'a 'ā e 'ava-'ava rō 'ana a kōrua mai te 'Atua, 'e hai me'e ta'e tano aña e kōrua, e take'a era e hāruī rō 'ana a kōrua i a ia hai tua'ivi. ²² 'E hora nei, te 'Atua ko haka riva-riva haka 'ou 'ana i a kōrua ki a ia hai mate iña era o Ietū Kiritō pa he tañata. Te me'e nei i aña ai ki tu'u ai a kōrua ki mu'a o te 'Atua e ma'itaki rō 'ā 'ina e tahi hara, 'e 'ina e tahi hape mo tuhi atu. ²³ Te me'e nō, e haka hio-hio e oho te kōrua mana'u 'i ruña i a Ietū 'e e tiaki e oho ki te me'e ta'ato'a hōrea e te 'Atua mo te nu'u 'ā'ana, me'e i 'ite e kōrua 'i te hora ŋaro'a era i te [roño riva-riva o ruña i a Ietū], roño haka 'ite oho a te kona ta'ato'a o te ao, 'e roño hā'ū'ū e au, e Pauro, mo haka 'ite.

Te aña 'a Pauro

²⁴ E koa rō 'ana a au 'i te me'e era ko 'ite 'ana e au: te 'ati nei e 'amo atu ena mo te kōrua riva-riva. Ko va'ai tahi 'ana, pa'i, a au i a au mo 'amo i te 'ati ta'ato'a haña e te Kiritō mo 'amo e au, mo te riva-riva o te nu'u ta'ato'a haka moe i te mana'u 'i ruña i a ia. ²⁵ Ko haka riro 'ana, pa'i, a au i a au he tāvini o te nu'u nei 'i te hora va'ai mai e te 'Atua i te aña he haka 'ite tahi i tā'ana roño ki a kōrua ki te nu'u ta'e hūrio. ²⁶ Nei roño he parauti'a ta'e haka 'ite era e te 'Atua 'i mu'a 'ā ki te tañata 'e, hora nei, nā ko haka 'ite mai 'ana ki a tātou ki tā'ana nu'u, ²⁷ nu'u ki a rāua te 'Atua i haña ai mo haka 'ite pē nei ē: te hauha'a ta'ato'a o rā parauti'a mo te nu'u ta'e hūrio tako'a. 'E rā parauti'a ko te me'e nei: a Ietū Kiritō e noho tako'a rō 'ana, hai Vārua Maitai, 'i roto i a kōrua i te nu'u ta'e hūrio. 'E hai noho atu ō'ona 'i roto i a kōrua he 'ite kōrua pē nei ē: pe mu'a ka oho ena a kōrua tako'a 'i roto i tō'ona nui-nui, te aura'a: i a kōrua tako'a tō'ona huru riva.

²⁸ 'I te kona ta'ato'a, e hāpī e oho nei mātou o ruña i a Ietū Kiritō, 'e hai mārāma-rama va'ai mai e te 'Atua, e hatu e hāpī nei ki te nu'u mo haka moe i te rāua mana'u 'i ruña i a Ietū. Te me'e haña, pa'i, o mātou he ma'u i te nu'u ta'ato'a 'a Ietū Kiritō ki mu'a o te 'Atua ko pa'ari 'ana 'i te me'e o te 'Atua 'e 'ina e tahi hape. ²⁹ Mo te me'e nei a au e aña nei hai hañu 'e hai pūai va'ai mai e Ietū.

2 E haña rō 'ana a au mo 'ite o kōrua: 'i a au e aña e oho nō 'ā mo kōrua mo te taina o Kōrosa, mo te nu'u [haka moe i te mana'u] 'i ruña i a Ietū o Rāōrītea, 'e mo te nu'u ta'ato'a pē kōrua kai take'a 'ana i a au. ² Tā'aku me'e haña: he pūai o te kōrua mana'u 'i ruña i te 'Atua, he pūai he oho te kōrua haña 'i roto i a kōrua, mo ai e tahi mau nō mana'u, 'e he ŋaro'a e kōrua i te koa 'e i te ora o te nu'u anji-anji riva-riva o ruña i te parauti'a ta'e haka 'ite e te 'Atua 'i mu'a 'ā, 'e nei parauti'a ko Ietū Kiritō. ³ Mā'ana mau nō e hā'ū'ū mai mo anji-anji riva-riva i te roño nui-nui nei. ⁴ E kī atu ena a au i te me'e nei 'o reo-reo atu kōrua e te nu'u hai vānaña nehe-nehe. ⁵ 'E, ka ta'e ai atu a au 'i muri i a kōrua, he mana'u nō atu tā'aku aña 'e e koa rō 'ā a au 'o te ai o kōrua e tahi mau nō mana'u 'e 'o te haka hio-hio i te kōrua mana'u 'i ruña i a Ietū.

He noho iña 'āpī

⁶ A kōrua ko to'o 'ana i a Ietū Kiritō mo Pū'oko Haka Tere o kōrua. 'O ira, e haka tere kōrua pa he nu'u 'ā'ana. ⁷ Pa he me'e hāpī atu ki a kōrua, e 'ata hāpī e oho kōrua o ruña i a Ietū koia ko ha'atura ki a ia, mo 'ata hio-hio o te kōrua mana'u 'i ruña i a ia, pa he hio-hio iña ena o te tumu 'i te aka e nui-nui e oho ena a raro. 'E e māuru-uru e oho kōrua ki te 'Atua 'i tō'ona riva-rahi mo kōrua.

⁸ E u'i kōrua e te nu'u 'o reo-reo atu hai hāpī ta'e parauti'a, he haka tere iña poreko mai te mana'u tañata nō, 'o he me'e haka mana'u e te tātane haka tere i te ao nei. Te hāpī nei ta'e 'a Ietū Kiritō.

⁹ Te huru 'e te pūai ta'ato'a, pa'i, o te 'Atua i a Ietū Kiritō, ka ai atu tō'ona hakari hakari tañata. ¹⁰ 'E, 'o te ai o kōrua 'ā'ana, ko ai tahi 'ana i a kōrua te me'e mo tano o kōrua 'e o te kōrua noho iña ki te mata o te 'Atua. A Ietū Kiritō, pa'i, he Pū'oko Haka Tere o te me'e ta'ato'a, 'ātā o te ŋā kope ena 'ina he take'a mai haka tere i te ao nei.

¹¹ 'E a kōrua, ka ai atu ta'e he hūrio, ko tāpa'o 'ana i a kōrua e te 'Atua pa he nu'u 'ā'ana. 'E te tāpa'o nei ta'e pa he tāpa'o o te [hūrio] 'i ruña i te hakari, he hore i te kiri o te kīnoña, he tāpa'o aña e te 'Atua 'i roto i te kōrua māhatu. Pē nei te aura'a: i haka moe era kōrua i te mana'u 'i ruña i a Ietū, he haka kore e te 'Atua mai ruña i a kōrua i te pūai o te me'e ta'e tano pohe e te hakari. ¹² 'E, i [papatito] era, e tu'u rō 'ā pa he me'e: ko mate 'ā, ko tanu 'ā, 'e ko ora haka 'ou 'ā kōrua mai te mate 'i muri i a Ietū 'o te haka moe i te mana'u 'i ruña i te parauti'a nei: e ai rō 'ā te pūai o te 'Atua mo haka ora i te tañata mai te mate.

¹³ 'I mu'a 'ā, a kōrua, te nu'u ta'e he hūrio, pa he nu'u mate mo te me'e o te 'Atua. E noho era, pa'i, a kōrua 'i roto i te hara, 'e te me'e haka tere atu he me'e ta'e tano pohe e te hakari, me'e kai haka kore 'ana e te 'Atua mai ruŋa i a kōrua. 'E, hora nei, ko haka ora 'ana e te 'Atua i a kōrua 'i muri i a Ietū Kiritō, te aura'a, ko va'ai atu 'ana i te noho iŋa 'āpī. Te 'Atua, pa'i, i haka kore tahi ai i te tātou hara, ¹⁴ pa he haka kore iŋa ena i te tārahu 'i te hora 'auhau. Pē nei te aura'a: hai mate era o Ietū 'i ruŋa i te tātaurō i 'auhau ai i te tātou hara, 'e ko tu'u 'ana pa he me'e: ko veo tako'a 'ana 'i ruŋa i te tātaurō i te parau 'i ruŋa e pāpa'i tahi rō 'ā te tātou hara. ¹⁵ 'I rā hora i haka kore tako'a ai e te 'Atua i te pūai 'e i te tōro'a mai ruŋa i te ŋā kope ena 'ina he take'a mai haka tere i te ao nei 'e he haka take'a mai 'ina rāua pūai toe.

¹⁶ 'O ira, 'ina kōrua ko tapa atu te kī o te nu'u i te ta'e ha'atura o kōrua ki te rāua haka tere iŋa o ruŋa i te me'e mo kai 'e mo unu, o ruŋa i te mahana aŋa i te ŋoŋoro mo te 'Atua, 'o i te ŋoŋoro o te māhina he 'ōhi-ro 'e o ruŋa i te [mahana haka ora]. ¹⁷ Te me'e ta'ato'a nei he 'ata e tahi o te me'e parauti'a mo oho mai, 'e rā me'e ko Ietū Kiritō. ¹⁸ 'Ina tako'a ko tapa atu i te nu'u ta'e haka au atu i a kōrua 'i te ta'e ha'amuri pē rāua ki te merahi. E haka tu'u rō 'ana i a rāua pa he nu'u haumārū, ta'e mana'u i hau rō atu ki te rua, 'e te parauti'a mau, he te'o-te'o nō te aŋa 'o te ai, ki te rāua kī, ko take'a 'ana i te me'e i haka take'a e te 'Atua. 'E te me'e aŋa he haka paka 'i te mana'u taŋata nō. ¹⁹ Ko haka topa kē 'ana te nu'u nei i a rāua mai i a Ietū Kiritō, Pū'oko Haka Tere o tātou. 'Ā'ana te haka pūai te oho i te tātou mana'u 'i ruŋa i a ia, 'e te haka riro i a tātou e tahi mau nō mana'u, pa he me'e haŋa e te 'Atua, pa he ua-ua haka piri hakari e haka piri e haka hio-hio ena i te kona ta'ato'a o te hakari.

Te haka tere iŋa taŋata

²⁰ 'I te haka moe o kōrua i te mana'u 'i ruŋa i a Ietū ko mate 'ana kōrua 'i muri i a ia, te aura'a, ko haka kore 'ā e te 'Atua mai ruŋa i a kōrua i te pūai o te me'e ta'e tano pohe e te hakari 'e i te pūai o te ŋā kope ena 'ina he take'a mai haka tere i te ao nei. ħHe aha ia kōrua e ha'atura nō ena ki te haka tere iŋa taŋata ²¹ pē nei ē: «'Ina ko haka puā i te me'e ena», «'ina ko kai i te me'e era», 'e «'ina ko to'o i te me'e ena»? ²² Te ŋā roŋo nei he hāpī poreko mai te mana'u taŋata mau nō 'o te ai nei ŋā roŋo o ruŋa i te me'e e ŋaro nō. ²³ Ki te mana'u taŋata, nei roŋo roŋo mārama-rama 'o te hāpī pē nei ē: mo koa o te 'Atua e aŋa me'e rahi me'e aŋarahi mo aŋa, mo haka take'a i tu'u haŋa ki a ia, e ko mana'u, ki te hora hope'a, i hau rō atu koe ki te rua, 'e e tōtōā koe i tu'u hakari. Ka ai atu pē ira, te ŋā me'e nei 'ina he hā'ū'ū ki te taŋata mo haka noho i te me'e ta'e tano pohe e te hakari.

3 E te taina, 'i te me'e era ko haka ora 'ana e te 'Atua i a kōrua 'i muri i a Ietū, te aura'a, ko va'ai atu 'ana i te noho iŋa 'āpī, e haŋa kōrua ki te me'e o te ranj, he kona 'i ira a Ietū e noho ena 'i te pā'iŋa mata'u

o te 'Atua. ² Te kī: e haŋa mo riro o te kōrua noho iŋa, noho iŋa tano o te taŋata ka noho ena 'i te ranj, ta'e 'ō pa he noho iŋa o te nu'u o te ao nei ta'e haŋa ki te 'Atua. ³ A kōrua, pa'i, ko mate 'ana, te aura'a, ko haka rē 'ana te kōrua noho iŋa ra'e era. 'E hora nei, te kōrua noho iŋa 'āpī ena pa he me'e: 'i muri i a Ietū Kiritō 'i mu'a o te 'Atua. Te noho iŋa nei 'ina he aŋi-aŋi e te taŋata ⁴ 'o te ai mai i a Ietū e ai ena. 'E hora ena 'ō'ona ka hoki mai ena ki te ao nei, he ai tako'a a kōrua 'i muri i a ia 'i roto i tō'ona nui-nui, te aura'a, he ai tako'a i a kōrua te huru riva 'ō'ona.

Te noho iŋa tano hai Ietū Kiritō

⁵ E te taina, e haka kore tahi te me'e ta'e tano aŋa 'i mu'a 'ā. 'Ina kōrua ko moe i te vi'e 'o i te taŋata ta'e he vi'e 'o he kenu o kōrua, 'ina ko aŋa e tahi me'e ta'e tano 'e hano-hano haŋa e te hakari, 'ina kōrua ko ha'ati'a ki te me'e ta'e tano pohe e te hakari mo haka tere atu, 'e 'ina tako'a ko nou-nou. (Te nou-nou, pa'i, e tu'u rō 'ā pa he me'e ena: e ha'amuri 'ana kōrua ki te 'ītoro, 'e rā 'ītoro he tao'a). ⁶ 'I te ŋā me'e nei ka topa ena te ūtu'a taparahi-ta'ata o te 'Atua 'i ruŋa i te nu'u ta'e ha'atura ki a ia. ⁷ 'I ra'e ki te haka moe o kōrua i te mana'u 'i ruŋa i a Ietū e aŋa rō 'ana kōrua i te ŋā me'e ena. ⁸ 'E, 'i te hora nei, te me'e o kōrua mo aŋa he haka kore mai ruŋa i a kōrua i te riri, i te riri taparahi-ta'ata, i te aŋa iŋa i te me'e ta'e tano, i te vā-vā 'e i te parau'ino. ⁹ 'Ina kōrua ko reo-reo. Te huru 'e te noho iŋa ta'e tano, pa'i, o kōrua o mu'a 'ā ko haka rē tahi 'ana.

¹⁰ Te 'Atua ko va'ai atu 'ana i te huru 'āpī, 'e 'ā'ana te aŋa te oho atu 'i roto i te kōrua māhatu mo riro o kōrua pē ia, ki 'ata māhani ai kōrua i a ia. ¹¹ 'I te noho iŋa 'āpī nei, 'ina te 'Atua he tapa atu hoki a koe he [hūrio] 'o ta'e he hūrio, he kope hore i te kiri o te ki-noŋa 'o ta'e hore, he taŋata o te rua henua, 'o he kope hāpī kore, he 'ekaravo 'o ta'e he 'ekaravo. Te me'e hauha'a mau nō ko Ietū, 'e a ia 'i roto i te nu'u ta'ato'a [haka moe i te mana'u] 'i ruŋa i a ia.

¹² Te 'Atua e haŋa rō 'ana ki a kōrua 'e ko ha'ata'a 'ana i a kōrua mā'ana. 'O ira, e riro kōrua nu'u māhatu 'aroha, nu'u riva, nu'u ta'e mana'u i hau rō atu ki te rua, nu'u haumārū, 'e nu'u 'ite i te ha'aoroma'i. ¹³ 'Ina kōrua ko hōrou ko riri mo te rua; e haka rehu te me'e ta'e tano aŋa atu. Pa he haka rehu iŋa e te 'Atua i te kōrua hape, pē ira ana haka rehu tako'a i te hape o te rua. ¹⁴ 'E ki te ŋā me'e ta'ato'a nei e 'āmui te haŋa mo te rua. Hai haŋa, pa'i, e ai ena te taina e tahi mau nō mana'u. ¹⁵ 'E mo te haumārū va'ai e Ietū Kiritō e hā'ū'ū atu mo 'ite o kōrua he aha te me'e tano mo aŋa. Te 'Atua ko ha'ata'a 'ana i a kōrua i te nu'u haka moe i te mana'u 'i ruŋa i a Ietū mo riro e tahi mau nō hakari 'e mo noho o kōrua ta'ato'a 'i roto i te haumārū. 'E, e 'ite kōrua mo māuru-uru mo oho ki te 'Atua.

¹⁶ E te taina, e ma'u te roŋo 'a Ietū Kiritō 'i roto i te kōrua māhatu, ki haka tika ai nei roŋo i te kōrua mana'u 'e i te kōrua me'e aŋa. E hāpī 'e e hatu ki te rua, hai mārama-rama, mo ha'atura o rāua ki te 'Atua. E

hīmene kōrua i te vānaŋa o te 'Atua aŋa mo hīmene, i te tētahi hīmene ha'ahana-hana mo te 'Atua, 'e i te me'e haka hīmene e te [Vārua Maitai] koia ko māuru-uru ki te 'Atua hai māhatu. ¹⁷ Te me'e ta'ato'a kī 'e aŋa e kōrua, e tano o te nu'u 'a Ietū Kiritō. 'E e māuru-uru e oho ki te 'Atua Matu'a mo te me'e ta'ato'a aŋa e Ietū mo kōrua.

Te me'e mo aŋa e te hua'ai [kiritiano]

¹⁸ E te ŋā vi'e, e haka rē mo te kōrua kenu e haka tere atu, he oho iŋa tano o te ŋā vi'e haka moe i te mana'u 'i ruŋa i a Ietū. ¹⁹ E te kenu, e haŋa ki te kōrua ŋā vi'e; 'ina ko tōtōā ki te hora hope'a.

²⁰ E te ŋā poki, e ha'atura ki te kōrua matu'a i te me'e ta'ato'a, he me'e koa o te 'Atua. ²¹ E te matu'a, 'ina ko haka riri i te kōrua ŋā poki, 'o hōriŋa mo aŋa i te me'e riva-riva.

²² E te 'ekaravo, e ha'atura ki te vānaŋa ta'ato'a o te kope 'ā'ana te haka aŋa atu, 'e ta'e nō 'ō 'i te hora 'i muri i a kōrua ki koa ai. 'I te ta'ato'a nō hora kōrua ana ha'atura ki rā kope hai māhatu 'i te me'e era e mo'a rō 'ā a kōrua i a Ietū. ²³ Ta'ato'a me'e o kōrua mo aŋa, e aŋa hai māhatu pa he me'e: e aŋa 'ā kōrua ki a Ietū 'e ta'e ki te taŋata. ²⁴ A Ietū, pa'i, he Pū'oko Haka Tere parauti'a o tātou o te nu'u ta'ato'a haka moe i te mana'u 'i ruŋa i a Ietū, 'e ki a ia tātou e tāvini nei. 'E ko 'ite 'ā e tātou: pe mu'a ka oho ena te 'Atua e va'ai rō mai i te me'e i hōrea e ia mo tā'ana nu'u, ²⁵ 'e e haka ūtu'a rō i te nu'u aŋa i te me'e ta'e tano. 'E 'i te hora kī o te 'Atua i te tano 'e i te ta'e tano o te taŋata, 'ina he u'i hoki he kope ra-rahi 'o he kope ta'e ra-rahi. 'O ira, e te 'ekaravo ē, e aŋa riva-riva kōrua ki te nu'u haka aŋa atu.

4 'E a kōrua, e te nu'u ai o te 'ekaravo ē, e hāpa'o kōrua i a rāua 'e e aŋa i te me'e tī-tika. 'Ina ko rehu: e ai tako'a rō 'ana te kōrua Pū'oko Haka Tere 'i ruŋa i te raŋi.

He hatu mo te ta'ato'a

² 'Ina kōrua ko haka rē 'i te pure. E pure 'ā, e u'i 'o oho kē te mana'u. E māuru-uru ki te 'Atua ³ 'e e pure tako'a mo mātou, ki mātaki ai e te 'Atua i te ara mo haka 'ite mo oho mātou i tā'ana roŋo, 'e mo haka aŋi-aŋi i te parauti'a o ruŋa i a Ietū ta'e haka 'ite mai era e ia 'i mu'a 'ā. 'O te haka 'ite ō'oku o ruŋa i te me'e nei a au e puru atu ena 'i roto i te hare ma'u'aurī. ⁴ E pure kōrua mō'oku, ki tano ai a au mo haka aŋi-aŋi riva-riva i te roŋo nei, pa he me'e haŋa e te 'Atua.

⁵ 'E 'i te hora ta'ato'a e hāpa'o te kōrua noho iŋa 'i mu'a o te nu'u ta'e [haka moe i te mana'u] 'i ruŋa i a

Ietū, 'o ta'e haka au rō atu 'i te hora haŋa o kōrua mo vānaŋa ki a rāua o ruŋa i a Ietū. ⁶ Ana vānaŋa hai koa 'e e reka rō 'ana, ki haka roŋo atu ai. 'E e 'ite tako'a kōrua mo pāhono riva-riva i te rāua 'ui o ruŋa i a Ietū.

He 'aroha

⁷ Mo te tātou taina haŋa rahi nei ko Tikiko e ma'u atu i te parau 'āpī o ruŋa i te me'e ta'ato'a topa mai ki a au. A ia e hā'ū'ū rō mai 'ana, 'e he tāvini tako'a pē au o te 'Atua 'ite mo haka tano i tā'ana me'e kī. ⁸ 'O ira a au i uŋa atu ena i a ia mo haka 'ite atu pē hē a mātou 'e mo haka koa 'e mo haka pūai i te kōrua mana'u 'i ruŋa i a Ietū. ⁹ 'E nā 'i muri i a ia i uŋa tako'a atu ena i a Onetimoro, he taina haŋa rahi o tātou 'ite tako'a mo haka tano i tā'ana me'e kī. A ia o te kona ena o kōrua. Mo rāua e 'a'amu atu i te me'e ta'ato'a o nei.

¹⁰ 'Ī a Aritarako e 'aroha atu ena mo kōrua; a ia he hokorua ō'oku 'i roto i te hare ma'u'aurī. 'E a Marko, poki o te taina poreko o te matu'a o Verenāvē, 'ī e 'aroha tako'a atu ena mo kōrua. 'E nā a au ko pāpa'i atu 'ā o ruŋa i a ia; ana tu'u atu, e hāpa'o riva-riva. ¹¹ A Ietū, kī tako'a ko Huto, 'ī e 'aroha atu ena mo kōrua. Ko te ŋā kope nō nei a to-toru te taina [hūrio] hā'ū'ū mai mo haka 'ite mo oho o ruŋa i te haka tere iŋa o te 'Atua 'i roto i te māhatu o te taŋata, 'e hai rāua a au e haŋu 'e e koa nei.

¹² A Epafara, tāvini tako'a o Ietū Kiritō, 'ī e 'aroha atu ena. A ia tako'a o te kona ena o kōrua, 'e te aŋa nō 'ā'ana he ani ki te 'Atua mo kōrua 'i roto i tā'ana pure, mo haka hio-hio atu i te mana'u 'i ruŋa i a Ietū, ki aŋi-aŋi riva-riva ai e kōrua he aha te me'e haŋa o te 'Atua mo kōrua. ¹³ E mana'u rahi rō atu 'ana a Epafara ki a kōrua ki te nu'u o Kōrosa, ki te nu'u o Rāōrītea, 'e ki te nu'u o Iērāpori tako'a, 'e ko au te mata'ite.

¹⁴ A Ruka, taote haŋa rahi o mātou, 'ī e 'aroha atu ena mo kōrua, 'e pē ira tako'a 'ā te taŋata nei ko Re-ma.

¹⁵ E 'aroha kōrua ki te taina ta'ato'a era o Rāōrītea, ki a Ninfa, 'e ki te taina ta'ato'a taka-taka 'i tō'ona hare. ¹⁶ Ki oti kōrua i te tai'o i te parau nei, e haka ma'u ki te nūna'a taŋata haka moe i te mana'u 'i ruŋa i a Ietū o Rāōrītea, mo tai'o tako'a e rāua. 'E a kōrua, e tai'o i te parau mo tu'u atu mai ira. ¹⁷ E kī te me'e nei ki a Arakipo: «E u'i e aŋa tahi te aŋa va'ai atu era e te 'Atua».

¹⁸ 'Ā'aku, a Pauro, i pāpa'i atu i te 'aroha nei hai rima mau nei 'ā ō'oku. E u'i 'o rehu: 'ī a au 'i roto i te hare ma'u'aurī; e pure kōrua mō'oku. 'E ka ai 'i ruŋa i a kōrua te riva rahi o te 'Atua.

1 TĒTĀRŌNIKA

'I te rua ara oho haka 'ite o Pauro i te roŋo o te 'Atua i tu'u ai ki Tētārōnika, kona hope'a o te nui-nui o Mātērōnia. He haka 'ite ki te nu'u o ira i te parau 'āpī riva-riva o ruŋa i a Ietū. I ŋaro'a era e te nu'u nei, he to'o hai koa i te hāpī nei 'e he [haka moe i te mana'u] 'i ruŋa i a Ietū. Pē ira i poreko ai te nūna'a taina o te kona nei ko Tētārōnika (Aŋa o te 'Āpōtoro 17.1–9). Ko 'āva'e atu 'ā he mana'u a Pauro mo hoki mo u'i i te taina [kiritiano] o ira (1.2–4). 'I te ta'e rava'a i te hora mo oho he uŋa i a Timoteo. I hoki era a Timoteo e ma'u rō 'ana i te parau 'āpī o ruŋa i rā ŋā taina, he mana'u a Pauro mo pāpa'i i te parau nei.

'I te ha'amata iŋa he 'aroha a Pauro koia ko māuru-uru ki te 'Atua mo te ŋā taina nei o Tētārōnika. Hai rāua, pa'i, i 'ite i oho ai o ruŋa i a Ietū a te me'e rahi nō atu kona o ira (1.8). He māuru-uru a Pauro 'o te to'o o te ŋā taina nei o Tētārōnika i te roŋo o ruŋa i a Ietū pa he me'e o te 'Atua, 'e ta'e 'ō pa he me'e o te taŋata (2.13). 'I te 'ite ia e Pauro pē nei ē: te noho iŋa o te taina o Tētārōnika noho iŋa tano ki te mata o te 'Atua, he haka pūai he oho e Pauro i te rāua mana'u, 'e he kī he aha he aha te rāua me'e mo aŋa ki noho ki oho nō ai a rāua pē ira (4.1–12). Te me'e haka nui-nui e Pauro 'i ruŋa i te parau nei he koa iŋa ō'ona 'o te take'a i te pūai o te [roŋo riva-riva o ruŋa i a Ietū] i te taina o Tētārōnika, ka ai atu e rahi rō 'ā te 'ati topa 'i ruŋa i a rāua.

Te nu'u ta'ato'a kiritiano o Tētārōnika ko 'ite riva-riva 'ana: a Ietū i mate rō 'e i ora haka 'ou rō mai te mate, 'e e tiaki 'ana ki tō'ona hoki iŋa mai. He haka haŋu e Pauro i te nu'u nei mo haka noho mo oho nō i te rāua mana'u 'i ruŋa i a Ietū 'ātā ki tō'ona hoki iŋa mai. 'E he haka mana'u e Pauro pē nei ē: 'ina e tahi nu'u i 'ite a hē ka hoki mai a Ietū. Ka tu'u mai ena, pa'i, 'i te mahana 'ina e tahi taŋata i 'ite, pa he tu'u iŋa o te toke-toke 'i te pō (5.2). 'O ira i hatu ai e Pauro ki te nu'u o Tētārōnika mo 'ara o te mata 'e mo noho 'i te ara tano haŋa e te 'Atua, 'e ta'e 'ō pa he tētahi nu'u ta'e mana'u ki te hoki iŋa mai o te [Kiritō] (5.6).

He 'aroha ia a Pauro ki te nu'u o Tētārōnika koia ko kī pē nei ē: (5.16–17).

He 'aroha

1 A au, a Pauro, a Tirivano 'e a Timoteo he 'aroha atu ki a kōrua ki te nu'u ta'ato'a o Tētārōnika ha'a-muri ki te 'Atua Matu'a 'e ki te Pū'oko Haka Tere ko Ietū Kiritō. Ka ai 'i ruŋa i a kōrua te riva rahi 'e te haumārū o te 'Atua.

He māuru-uru

2 He māuru-uru nō te mātou aŋa ki te 'Atua mo kōrua 'e, 'i roto i te mātou pure, e no-no'i tako'a rō 'ā mo kōrua. **3** E māuru-uru nei 'i te me'e era he mana'u nō te mātou aŋa pē hē kōrua e aŋa ena ki te 'Atua, 'o te [haka moe i te mana'u] 'i ruŋa i a Ietū, pē hē e hā'ū'ū ena ki te rua, 'o te rahi o te kōrua haŋa mo rāua, 'e pē hē e ha'aoroma'i ena hai pūai 'i te hora o te 'ati, 'o te ai e tiaki e oho rō 'ā kōrua ki te hoki iŋa mai o te tātou Pū'oko Haka Tere ko Ietū Kiritō. **4** Ko 'ite 'ana e mātou, e kuā taina haŋa o te 'Atua ē, ko ha'ata'a 'ana kōrua e te 'Atua mā'ana. **5** I haka 'ite atu era, pa'i, mātou i te [roŋo riva-riva o ruŋa i a Ietū Kiritō], he haka moe rō 'ai kōrua i te mana'u 'i ruŋa i a ia, 'e ta'e nō 'o te ŋaro'a e kōrua i te mātou vānaŋa, 'o te take'a tako'a, hai me'e aŋa e mātou hai pūai o te [Vārua Maitai], te pūai o te 'Atua 'i ruŋa i a mātou, 'e 'o te 'ite e kōrua: mo mātou te me'e vānaŋa atu era he parauti'a mau 'ā, he take'a e kōrua pē hē mātou e noho era 'i roto i a kōrua mo hā'ū'ū atu.

6 'E a kōrua ko haka tano 'ana i te kōrua noho iŋa pa he noho iŋa 'ana o mātou, 'e pa he noho iŋa tako'a o te tātou Pū'oko Haka Tere ko Ietū Kiritō. 'E, ka ai atu e topa rō atu 'ana te 'ati 'i ruŋa i a kōrua, i to'o nō kōrua i te roŋo nei mo kōrua hai koa va'ai atu e te Vārua Maitai. **7** Pē ira te kōrua noho iŋa i ai ai he me'e mo aŋi-aŋi pē hē te noho iŋa tano ki te mata o te 'Atua mo te nu'u ta'ato'a haka moe i te mana'u 'i ruŋa i a Ietū o te ŋā kona era o Mātērōnia 'e o Ākāia. **8** Hai kōrua te roŋo riva-riva o ruŋa i a Ietū Kiritō i 'ite i oho ai a te kona ta'ato'a o Mātērōnia 'e o Ākāia, 'e ta'e nō a te ŋā kona nei, a te kona ta'ato'a. Te nu'u o te ŋā kona nei e 'ite rō 'ana pē nei ē: e haka moe rō 'ana kōrua i te mana'u 'i ruŋa i te 'Atua. **9** Mo aha ia a mātou ana vānaŋa haka 'ou o ruŋa i a kōrua ki a rāua? Ta'e he parau 'āpī mo te nu'u era. **9** Kona nō era, pa'i, o mātou e tu'u era, e 'a'amu rō 'ā te nu'u he aha te me'e i topa ki a kōrua hora tu'u atu era o mātou, pē hē kōrua i hāruai ai hai tua'ivi i te 'itoro mo ha'amuri mau nō ki te 'Atua ora 'e parauti'a. **10** 'E e 'a'amu tako'a rō 'ana rā nu'u pē hē kōrua e tiaki ena ki te hoki iŋa mai mai te ranji o tā'ana Poki ko Ietū, kope haka ora e te 'Atua mai te mate, 'e kope haka e'a i a tātou mai te ūtu'a taparahi-ta'ata, ūtu'a nā e tu'u rō mai.

He mana'u ki te me'e i aŋa 'i Tētārōnika

2 A kōrua mau ena, e te taina ē, e 'ite rō 'ana pē nei ē: kai māu'a te noho iŋa atu era o mātou 'i muri i

a kōrua. ² Ko 'ite 'ana e kōrua: 'i ra'e ki te tu'u atu o mātou ki a kōrua ena i vā-vā 'e i tōtōā rō mai i a mātou 'i te kona era ko Fīripo. Ka ai atu pē ira, i hā'ū'ū nō mai te 'Atua mo haka 'ite atu ki a kōrua i te [roŋo riva-riva o ruŋa i a Ietū] ta'e e ri'a-ri'a 'e ta'e e tapa atu i te nu'u riri mo mātou. ³ Te me'e haka 'ite atu era, pa'i, e mā-tou, he parauti'a, 'e ta'e hai mana'u ta'e tano 'o hai mana'u mo reo-reo i haka 'ite atu ai. ⁴ E vānaŋa ena mātou pa he taŋata tano ki te mata o te 'Atua 'e ha'ata'a e ia mo haka 'ite i tā'ana roŋo riva-riva o ruŋa i a Ietū, 'e ta'e 'ō mo koa o te taŋata; mo koa o te 'Atua, kope 'ite i te me'e tano 'e i te me'e ta'e tano 'i roto i te mātou māhatu.

⁵ Ko 'ite 'ana e kōrua, kai vānaŋa atu mātou hai vānaŋa nehe-nehe mo haka koa atu 'o mo rava'a moni. He 'Atua te mata'ite o te me'e nei. ⁶ 'E, ki te hora hope'a, 'ina kai aŋa a mātou e tahi me'e hai mana'u mo haka paka o kōrua 'o o te tētahi atu nu'u i a mā-tou, ⁷ ka ai atu e tano rō 'ana, pa he ['āpōtoro] 'a Ietū, mo haka 'ite atu ko ai a mātou. Hora era o mātou 'i muri i a kōrua e aŋa atu era hai haŋa, pa he matu'a vahine e hāpa'o ena i tā'ana ŋā poki. ⁸ Pē ira te haŋa o mātou ki a kōrua. 'O ira te me'e i aŋa o mātou 'i roto i a kōrua ta'e nō he haka 'ite atu i te [roŋo riva-riva o te 'Atua], i aŋa tako'a rō i te me'e nō era mo hā'ū'ū atu, 'i te rahi o te mātou haŋa mo kōrua.

⁹ E te taina, ko 'ite 'ana a kōrua pē hē mātou e aŋa era, ka pō ka 'ōtea, mo rava'a moni mo te mātou me'e hape hora era o mātou 'i muri i a kōrua, 'o ai mātou he me'e paŋaha'a e tahi mo 'amo e kōrua. ¹⁰ 'E a kōrua he mata'ite, 'e pē ira 'ana te 'Atua: te mātou noho iŋa 'i muri i a kōrua i te nu'u [haka moe i te mana'u] 'i ruŋa i a Ietū, noho iŋa tī-tika, tano ki te mata o te 'Atua, 'e 'i-na e tahi hape mo tuhi e te taŋata. ¹¹⁻¹² Ko 'ite tako'a 'ana a kōrua pē hē a mātou i haka haŋu 'e i haka koa atu ai i a kōrua pa he me'e aŋa e te matu'a tane ki tā'ana ŋā poki. Ko hatu atu 'ā e mātou mo ai o te kōrua noho iŋa, noho iŋa tano o te nu'u o te 'Atua, kope kī mai 'i roto i te tātou māhatu mo o'o ki roto o te nūna'a taŋata haka tere e ia, 'e ki roto i tō'ona nui-nui.

¹³ E māuru-uru rō 'ā a mātou ki te 'Atua 'o te ai hora ŋaro'a era e kōrua i te roŋo haka 'ite atu e mātou o ruŋa i a ia, he 'ite e kōrua pē nei ē: he roŋo 'ā'ana, ta'e 'ō he roŋo o te taŋata. 'E he roŋo parauti'a mau 'ā o te 'Atua, roŋo aŋa i te me'e haŋa e ia 'i roto i a kōrua i te nu'u haka moe i te mana'u 'i ruŋa i a Ietū.

¹⁴ E te taina, te 'ati topa atu era, he tute atu mo tōtōā i a kōrua e te nu'u o te kōrua henua, i topa tako'a rō ki te nūna'a taŋata haka moe i te mana'u 'i ruŋa i a Ietū o te kona era ko Hūrea. A rāua, pa'i, i tute tako'a rō e te nu'u o te rāua henua, he [hūrio], mo tōtōā. ¹⁵ O te ŋā hūrio nei i tiŋa'i i te tātou Pū'oko Haka Tere ko Ietū Kiritō, pa he tiŋa'i iŋa era 'i mu'a 'ā i te perofeta, 'e o rāua tako'a i tute i a mātou mai te ŋā tētahi kona era 'i ira e haka 'ite era e mātou i te roŋo riva-riva o te 'Atua. Te 'Atua 'ina he koa mo rāua 'o te rava u'i i te rāve'a mo ta'e haka tano i te mātou aŋa, 'e nei aŋa mo te riva-riva o te taŋata ta'ato'a. ¹⁶ E haŋa era, pa'i, mātou

mo vānaŋa ki te nu'u ta'e he hūrio o ruŋa i a Ietū, mo e'a o rāua mai roto i te ūtu'a o te hara 'e mo rava'a i te ora 'āpī 'ina he hope'a ra'a, 'ina he haka rē i a mātou e nei ŋā hūrio mo vānaŋa. Pē ira e ha'aputu e oho ena i te rāua hara ki te roa hope'a. 'E hora nei, te me'e toe mo rāua he ūtu'a o te 'Atua.

He haŋa o Pauro mo hoki ki Tētārōnika

¹⁷ E te taina, hora tute era i a mātou mai muri i a kōrua, ka ai atu e roa rō 'ana kōrua mai muri i a mā-tou, ko te ma'u iŋa 'ana mātou i a kōrua 'i roto i te mā-tou māhatu, 'e e rahi rō 'ana te mātou haŋa mo take'a haka 'ou i a kōrua. ¹⁸ 'O ira a mātou i haŋa ai mo hoki atu ki a kōrua ena. 'E a au mau nei 'ā, a Pauro, i u'i rō me'e rahi nō atu mahana mo hoki atu 'e, 'i a Rukifero, a mātou i ta'e tu'u atu ai. ¹⁹ Ka ai atu pē ira, ko te haŋa iŋa 'ana a mātou mo hoki atu, he 'ite o mātou he haka moe he oho mau rō 'ai kōrua i te mana'u 'i ruŋa i a Ietū. Te me'e nei he koa e tahi mo mātou. 'E 'i te hora o tātou ka tu'u ena ki mu'a o te tātou Pū'oko Haka Tere ko Ietū Kiritō, 'i te mahana o tō'ona hoki iŋa mai, he koa a mātou mo kōrua 'e mo te hauha'a o te mātou aŋa 'i roto i a kōrua. ²⁰ He aŋi mau 'ā hai kōrua a mā-tou e koa nei.

He uŋa iŋa i a Timoteo

3 'I te rahi o te mahana ta'e 'ite haka 'ou mai o ruŋa i a kōrua i niva-niva ai a mātou. 'O ira i man-a'u ai mo noho o te tētahi o mātou 'i 'Ātena ² 'e mo uŋa atu i te tātou taina ko Timoteo mo u'i i a kōrua. A ia he taŋata hā'ū'ū 'i te aŋa he haka 'ite i te [roŋo riva-riva o ruŋa i a Ietū Kiritō]. I uŋa atu ai e mātou mo 'ata haka pūai 'e mo 'ata haka haŋu i te kōrua haka moe iŋa i te mana'u 'i ruŋa i a Ietū, ³ 'o haka tapa kōrua mai te ara o te 'Atua 'o te tute atu i a kōrua e te nu'u mo tōtōā. Ko 'ite riva-riva 'ana e kōrua: mo tātou mo te nu'u [haka moe i te mana'u] 'i ruŋa i a Ietū, e 'amo i te 'ati tu'u pē nei. ⁴ Hora era, pa'i, o mātou 'i muri i a kōrua 'ā, i haka 'ite rō atu mātou pē nei ē: e topa rō mai te 'ati 'i ruŋa i a tātou 'e, ko 'ite riva-riva 'ana e kōrua, pē ira mau 'ā i topa ai. ⁵ 'O ira, 'i te niva-niva o mātou 'o te ta'e 'ite mai hoki e haka moe e oho nō 'ana kōrua i te mana'u 'i ruŋa i a Ietū, i uŋa atu ai au i a Timoteo mo 'ite mai o ruŋa i a kōrua. Tō'oku ri'a-ri'a: 'o hoa kōrua i te kōrua haka moe iŋa i te mana'u 'i ruŋa i a Ietū ka haka 'atu atu ena i a kōrua e Rukifero, 'e 'o māu'a te mātou aŋa 'i roto i a kōrua.

⁶ 'E hora nei, 'i ko hoki mai 'ā a Timoteo mai Tētārōnika e ma'u rō mai 'ana i te parau 'āpī riva-riva o ruŋa i a kōrua pē nei ē: ko te haka moe iŋa 'ana kōrua i te mana'u 'i ruŋa i a Ietū 'e ko te haŋa iŋa 'ana kōrua 'i roto i a kōrua 'ā. Ko kī mai 'ā he mana'u nō te aŋa o kōrua hai māhatu ki a mātou, 'e e rahi rō 'ana te haŋa mo take'a haka 'ou i a mātou, pa he haŋa iŋa nei 'ā o mātou mo take'a i a kōrua.

⁷ 'I roto i te 'ati ta'ato'a 'amo e mātou, e te taina ē, te parau 'āpī tu'u mai nei o ruŋa i a kōrua ko haka pūai 'e

ko haka koa mai 'ana i a mātou. ⁸I 'ite era, pa'i, e mātou ko te haka noho ija 'ana a kōrua i te mana'u 'i ruŋa i a Ietū, he ŋaro'a e mātou i te ora. ⁹E ko pau te māuru-uru o mātou ki te 'Atua, 'i roto i te mātou pure, mo te rahi o te koa ŋaro'a e mātou hai kōrua. ¹⁰Ka pō ka 'ōtea e ani nei ki te 'Atua mo ha'ati'a i a mātou mo tu'u haka 'ou atu ki muri i a kōrua, mo 'ata haka 'ite atu o ruŋa i a Ietū, ki pūai riva-riva ai te kōrua mana'u 'i ruŋa i a ia.

He me'e no-no'i e Pauro ki te 'Atua

¹¹E ani nei ki te 'Atua, he Matu'a o tātou, 'e ki te tātou Pū'oko Haka Tere ko Ietū Kiritō, mo hā'ū'ū mai, mo tu'u atu ki a kōrua ena. ¹²E ani tako'a nei ki te tātou Pū'oko Haka Tere mo 'ata haka pūai 'e mo 'ata haka rahi i te haŋa 'i roto i a kōrua 'e i te haŋa mo te ta'ato'a, pa he haŋa ija nei 'ā o mātou ki a kōrua, ¹³'e, tako'a, mo hā'ū'ū i a kōrua mo 'ata haka hio-hio i te mana'u 'i ruŋa i a ia, 'o ai tā'ue e tahi me'e mo tuhi ija atu e te 'Atua 'i te hora ka tu'u ena ki mu'a i a ia 'i te mahana o te hoki ija mai o te tātou Pū'oko Haka Tere ko Ietū koia ko te nu'u ta'ato'a ha'ata'a mā'ana. [Āmene].

Te noho ija tano ki te mata o te 'Atua

4 E te taina, ko haka 'ite atu era 'ā e mātou pē hē ana tano te kōrua noho ija ki te mata o te 'Atua, 'e ko 'ite 'ā e mātou, nā kōrua e noho mai ena pē ira. Ka ai atu pē ira, he ani atu a mātou hai 'iŋoa o te tātou Pū'oko Haka Tere ko Ietū: ka 'ata haka tano ka oho nō te kōrua noho ija pē ira mo koa o te 'Atua.

²A kōrua, pa'i, ko 'ite 'ana i te me'e kī atu e mātou mo aŋa e kōrua hai 'iŋoa o te tātou Pū'oko Haka Tere ko Ietū Kiritō. ³Te haŋa o te 'Atua: he ai o te kōrua noho ija 'ina e tahi hara, he ta'e moe e tahi kope i te vi'e 'e i te taŋata ta'e he vi'e 'o he kenu 'ā'ana, ⁴'e he 'ite o kōrua ta'ato'a mo haka noho i te me'e pohe e te hakari, ki ai ai te kōrua noho ija, noho ija 'ina e tahi hara mo mo'a atu e te taŋata. ⁵Ta'e mo te me'e ta'e tano pohe e te hakari e haka tere atu i a kōrua, pa he me'e aŋa o te nu'u 'ina kai 'ite ko ai te 'Atua parauti'a. ⁶'Ina e tahi o kōrua mo tōtōā i te taina [haka moe i te mana'u] 'i ruŋa i a Ietū hai to'o i tā'ana vi'e mā'ana. Ko haka 'ite atu era 'ā, pa'i, e mātou pē nei ē: te 'Atua e haka ūtu'a rō 'ā i te nu'u aŋa i te me'e tu'u pē nei hai ūtu'a taparahi-ta'ata. ⁷Ta'e, pa'i, mo noho 'i roto i te hara i ha'ata'a ai e te 'Atua i a tātou i te nu'u haka moe i te mana'u 'i ruŋa i a Ietū; i ha'ata'a ai mo noho 'ina e tahi hara. ⁸'E te taina ta'e haŋa 'e ta'e ha'atura ki te hāpī nei e hāru'i 'ana i te 'Atua hai tua'ivi, ta'e 'ō i te taŋata; o te 'Atua, pa'i, te hāpī nei 'e 'ā'ana te uŋa atu i te [Vārua Maitai] mo noho 'i roto i a kōrua.

⁹'E o ruŋa i te me'e he haŋa o te taina haka moe i te mana'u 'i ruŋa i a Ietū 'i roto i a rāua 'ā, 'ina e mātou e ko pāpa'i atu. Ko hāpī atu era 'ā, pa'i, e te 'Atua mau 'ā mo haŋa o kōrua ki te rua. ¹⁰'E he aŋi mau 'ā e haŋa rō'ana a kōrua ki te taina ta'ato'a o te ŋā kona ta'ato'a

ena o Mātērōnia. Ka ai atu pē ira, e te taina ē, 'i mātou he ani atu pē nei ē: e 'ata haŋa e oho kōrua ki te ta'ato'a. ¹¹E noho kōrua 'i roto i te haumārū, 'e e u'i i te kōrua noho ija, 'o riro he 'ati mo te rua. E aŋa kōrua mo ai o te kōrua me'e, pa he me'e kī atu e mātou.

¹²Mo haka tere o kōrua i a kōrua hai ŋā me'e nei, he mo'a atu te nu'u ta'e haka moe i te mana'u 'i ruŋa i a Ietū 'i te take'a i te kōrua noho ija tano, 'e 'ina ia e ko ai kōrua pa he me'e paŋaha'a mo 'amo e te rua, he ta'e hape o te kōrua me'e.

Te hoki ija mai o Ietū

¹³E te taina, e haŋa rō 'ana a mātou mo 'ite o kōrua o ruŋa i te me'e topa ki te nu'u mate, 'o māui-ui rahi rō te kōrua māhatu, pa he nu'u ta'e haka moe i te mana'u 'i ruŋa i a Ietū ta'e 'ite: te nu'u mate e ora haka 'ou rō. ¹⁴Pa he me'e 'ite e tātou: a Ietū i mate rō 'e i ora haka 'ou rō mai, pē ira tako'a a tātou e 'ite nei: te 'Atua e haka ora rō i te nu'u mate haka moe i te mana'u 'i ruŋa i a Ietū, 'e e hokorua rō rāua i a Ietū.

¹⁵'O ira mātou e kī atu ena, pa he hāpī o te tātou Pū'oko Haka Tere: a tātou, te nu'u e ora nō 'ā 'i te hora o te hoki ija mai o Ietū, e ko iri 'i ra'e ki te nu'u mate. ¹⁶Pē ira ka topa ena: e ŋaro'a rō te re'o ohu o te merahi ra-rahi 'e te puhi ija o te koneta o te 'Atua. He topa mai ia a Ietū mai te raŋi, 'e te nu'u mā-mate haka moe i te mana'u 'i ruŋa i a ia he ora haka 'ou. ¹⁷'E a tātou, te nu'u e ora nō 'ā ananake ko te nu'u nei he ma'u he iri 'i ruŋa i te raŋi tea-tea mo piri ki a Ietū 'i roto i te tokerau. Pē ira a tātou ka noho ena 'i muri i a ia 'ina he hope'a ra'a. ¹⁸E haka koa kōrua i a kōrua 'ā hai ŋā vā-ŋa nei.

5 Te hora 'e te mahana o tō'ona hoki ija mai 'ina e mātou e ko pāpa'i atu. ²Ko 'ite riva-riva 'ana, pa'i, e kōrua: te hoki ija mai o te tātou Pū'oko Haka Tere ka tu'u mai ena pa he toke-toke 'i te hora kai mana'u hia. ³E kī nō 'ā e te nu'u pē nei ē: «'Ina he tama'i 'e 'ina he me'e mo ri'a-ri'a ija», 'i rā hora, mā te ta'e 'ite, he topa te 'ati 'i ruŋa i a rāua, pa he hora o te huki ija o te tūā-toto o te hānautama, 'e e ko rava'a mo e'a mai rā 'ati.

⁴'E a kōrua, e te taina ē, ta'e 'i roto i te pōhāhā o te ao nei e noho ena, ki ma'urima ai i a kōrua pa he toke-toke e te mahana o tō'ona hoki ija mai. ⁵A tātou, te nu'u [haka moe i te mana'u] 'i ruŋa i a Ietū, he nu'u o te mā'eha, 'e o te 'ōtea, te aura'a, he nu'u aŋa i te me'e riva-riva, ta'e he nu'u o te pōhāhā 'e o te pō aŋa i te me'e ta'e tano. ⁶'O ira, e tiaki e oho tātou ki te hoki ija mai o Ietū pa he nu'u 'ite mo hāito i te rāua me'e kī 'e i te rāua me'e aŋa.

'Ina a tātou ko riro pa he nu'u hā'uru, te aura'a, pa he nu'u ta'e haka moe i te mana'u 'i ruŋa i a Ietū ta'e tiaki ki a ia. ⁷'I te pō, pa'i, te nu'u e ha'uru ena 'e e ta'ero ena, 'e 'ina he 'ite he aha te me'e mo topa.

⁸A tātou, te nu'u o te 'ōtea, e 'ite mo hāito, paurō te mahana, i te tātou me'e kī 'e i te tātou me'e aŋa. 'E pa he hāpa'o ija o te va'ehau i a ia hai kahu aŋa hai 'aurī, pē ira tako'a 'ana a tātou ana hāpa'o i a tātou hai haka moe i te mana'u 'i ruŋa i a Ietū 'e hai haŋa ki a ia 'e ki

te rua, 'o aṅa mai e Rukifero i te me'e mo haka hara i a tātou. 'E pa he hāpa'o iṅa o te va'ehau i tō'ona pū'oko e pu'a i te ha'u aṅa hai 'aurī, pē ira tako'a tātou ana hāpa'o i a tātou hai ma'u hio-hio 'i roto i a tātou i te parauti'a: a Ietū e haka e'a rō i a tātou mai roto i te ūtu'a o te hara 'e e va'ai rō mai i te ora 'āpī 'ina he hope'a ra'a.

⁹ Ta'e, pa'i, mo 'amo i te ūtu'a te 'Atua i ha'ata'a ai i a tātou; mo e'a o tātou mai roto i te ūtu'a o te hara 'e mo rava'a i te ora 'āpī 'ina he hope'a ra'a hai Ietū Kiritō, Pū'oko Haka Tere o tātou. ¹⁰ A ia i mate ai mo tātou, mo noho o tātou 'i muri i a ia, ka ai atu 'i te hora era o tō'ona hoki iṅa mai e ora rō 'ā 'o e mate rō 'ā a tātou. ¹¹ 'O ira, 'i roto i a kōrua e haka koa, e haka pūai te kōrua mana'u 'i ruṅa i a Ietū, pa he me'e mau ena 'ā e kōrua e aṅa mai ena.

He mana'u tano mo te nu'u [kiritiano]

¹² E te taina, he ani atu mātou: e mo'a kōrua i te nu'u ta'ato'a aṅa 'i roto i a kōrua, he nu'u hatu atu 'e he nu'u haka tika atu 'i te me'e o te 'Atua. ¹³ E mo'a 'e e haṅa rahi kōrua ki a rāua 'o te rāua me'e aṅa. 'E 'i roto i a kōrua e noho hai haumārū.

¹⁴ He ani tako'a atu mātou, e te taina ē: e haka pūai te mana'u o te nu'u e ri'a-ri'a rō 'ā, e hā'ū'ū ki te nu'u 'ina he pūai te rāua haka moe iṅa i te mana'u 'i ruṅa i a Ietū, e kī ki te nu'u hupe-hupe: «e aṅa», 'e e 'ite kōrua mo ha'aoroma'i i te ta'ato'a.

¹⁵ E u'i tako'a kōrua 'o haka hoki e te kope e tahi hai me'e ta'e tano ki te kope aṅa i te me'e ta'e tano ki a ia.

Te me'e mau nō, pa'i, o kōrua mo aṅa he me'e riva-riva, 'e ta'e nō 'i roto i a kōrua, ki te ta'ato'a nō taṅata.

¹⁶ 'I te ta'ato'a nō hora, e koa ¹⁷ 'e e pure kōrua. ¹⁸ 'E, tako'a, e māuru-uru kōrua ki te 'Atua 'i te ta'ato'a nō hora nōatu te me'e topa atu. Ko te ṅā me'e nei te me'e haṅa 'ā'ana mo aṅa e kōrua e te nu'u haka moe i te mana'u 'i ruṅa i a Ietū.

¹⁹ 'Ina ko ta'e ha'atura ki te vānaṅa kī atu e te [Vārua Maitai] 'i roto i a kōrua. ²⁰ 'Ina ko ta'e haka au i te vānaṅa haka 'ite atu e ia hai rua kope. ²¹ E u'i riva-riva hoki rā vānaṅa kī atu era he parauti'a mau 'ā o te Vārua Maitai 'e, mo ai pē ira, e ma'u e kōrua. ²² 'E e haka tapa kōrua mai te me'e ta'e tano ta'ato'a.

²³ Mo te 'Atua, kope va'ai mai i te haumārū, e haka ma'itaki i te kōrua huru 'e i te kōrua noho iṅa ki te roa 'ina e tahi hara mo tuhi atu. 'E mā'ana tako'a e hāpa'o i a kōrua 'ina e tahi hape, mai te hakari ki te vārua, 'ātā ki te hoki iṅa mai o te tātou Pū'oko Haka Tere ko Ietū Kiritō. ²⁴ 'E, 'o te ai o te 'Atua i ha'ata'a i a kōrua mā'ana 'e a ia kope haka tano i tā'ana me'e kī, e 'ite ena e kōrua pē ira mau 'ā ka me'e ena.

He 'aroha

²⁵ E te taina, e pure tako'a kōrua mo mātou.

²⁶ E 'aroha atu kōrua hai haṅa ki te tātou taina ta'ato'a haka moe i te mana'u 'i ruṅa i a Ietū.

²⁷ He ani atu a au, hai 'īṅoa o te tātou Pū'oko Haka Tere, e tai'o kōrua i te me'e nei ki te taina ta'ato'a o tātou.

²⁸ Ka ai 'i ruṅa i a kōrua te riva rahi o te tātou Pū'oko Haka Tere ko Ietū Kiritō.

2 TĒTĀRŌNIKA

'I te parau pāpa'i ra'e ki te taina o Tētārōnika i vānaŋa ai te [l'āpōtoro] nei ko Pauro o ruŋa i te hoki iŋa mai o te [Kiritō]. 'I te rua parau nei, e vānaŋa haka 'ou 'ā a Pauro o ruŋa 'e, hora nei, 'ātā rahi te me'e kī o ruŋa o te hoki iŋa mai o Ietū. Tētahi nu'u o rā noho iŋa kī a rāua he [kiritiano] e hāpī e oho 'ā pē nei ē: ko tu'u haka 'ou mai 'ā te Kiritō (2.1–3), 'e ta'e he parauti'a rā vānaŋa. 'O ira a Pauro i pāpa'i ai ki te taina o Tētārōnika mo kī pē nei ē: he reo-reo te hāpī era.

He haka mana'u e Pauro ki te hāpī haka 'ite era e ia o mu'a 'ā pē nei ē: 'i ra'e ki te tu'u iŋa mai o te Kiritō e ai rō te tētahi tāpa'o mo haka aŋi-aŋi i tō'ona hoki iŋa mai. Te nu'u ta'e haŋa ki te 'Atua e haka take'a rō i te rāua ta'e haŋa ki a ia, e e'a rō mai e tahi taŋata taparahi-ta'ata, e reo-reo rō ki te taŋata 'e me'e rahi atu nu'u ka haka roŋo ena. 'E 'ātā e kī rō e te taŋata taparahi-ta'ata nei he 'Atua a ia. Ka hope'a ena he haka kore e te 'Atua i te kope nei (2.3–12). 'O ira a Pauro e haka pūai nei i te taina o Tētārōnika mo haka rē 'e mo ta'e haka roŋo i te hāpī reo-reo nei, 'e mo haka noho mo oho nō i te rāua mana'u 'i ruŋa i te 'Atua. 'E he ani tako'a e Pauro mo ta'e haka tapa mai te hāpī haka 'ite e ia (2.15).

'I roto o te kiritiano o Tētārōnika e ai rō 'ā te taina hupe-hupe ta'e haŋa mo aŋa, 'e hai me'e rava'a mai te tētahi taina e ora era. He haka mana'u ia e Pauro ki rā ŋā nu'u pē hē a ia e noho era 'i muri i a rāua. 'Ina, pa'i, a ia he tiaki ki te rua mo va'ai i te me'e; 'ā'ana mau 'ā te u'i i tō'ona ora. 'O ira i pāpa'i ai hai pūai: (3.6–12).

He 'aroha

1 A au, a Pauro, a Tirivano 'e a Timoteo he 'aroha atu ki a kōrua ki te nu'u ta'ato'a o Tētārōnika ha'a-muri ki te 'Atua Matu'a 'e ki te Pū'oko Haka Tere ko Ietū Kiritō. ² Ka ai 'i ruŋa i a kōrua te riva rahi 'e te haumārū o te 'Atua, Matu'a o tātou, 'e o te Pū'oko Haka Tere o tātou ko Ietū Kiritō.

He māuru-uru 'e he pure

³ E te taina, te me'e tano mo aŋa e mātou he māuru-uru he oho ki te 'Atua mo kōrua 'o te ai te haka moe iŋa o kōrua i te mana'u 'i ruŋa i a Ietū pe te 'ata pūai e oho ena, 'e te haŋa o kōrua mo te rua pe te 'ata rahi nō e oho ena. ⁴ 'O ira a mātou e vānaŋa nei hai koa o ruŋa i a kōrua 'i roto i te nu'u [haka moe i te mana'u] 'i ruŋa i a Ietū 'i te kona ta'ato'a tu'u o mātou. E 'a'amu rō 'ā e mātou pē hē kōrua e haka moe e oho nō ena i te mana'u 'i ruŋa i a Ietū, 'ina he 'aka-'aka te kōrua mana'u, ka ai atu e rahi rō 'ana te 'ati topa atu 'e e ai rō 'ana te nu'u tute i a kōrua mo tōtōā.

⁵ Hai ha'aoroma'i iŋa o kōrua i te me'e ta'ato'a ena, e 'ite nei a mātou: a kōrua ko haka moe mau 'ana i te mana'u 'i ruŋa i a Ietū 'e he nu'u mau 'ā 'ā'ana. 'E, 'i te 'ite o tātou pē nei ē: te 'Atua, he 'Atua aŋa i te me'e tī-tika, e 'ite tako'a nei: pe mu'a ka oho ena, e aŋa tako'a rō te 'Atua i te ŋā me'e nei: e kī rō he nu'u tano kōrua mo noho, 'ina he hope'a ra'a, 'i tō'ona kona haka tere, 'o te haka moe i te mana'u 'i ruŋa i a Ietū, ⁶ e haka 'amo rō hai 'ati i te nu'u tōtōā i a kōrua, ⁷ 'e e va'ai rō mai i te ora ki a tātou, ki te nu'u 'amo i te 'ati. Te me'e nei ka topa ena 'i te mahana o te hoki iŋa mai o te tātou Pū'oko Haka Tere ko Ietū Kiritō ananake ko tā'ana

merahi pūai mai te raŋi e haka vari tahi rō 'ā e te ura o te ahi.

⁸ Ka tu'u mai ena mo haka ūtu'a i te nu'u hāruai hai tua'ivi i te 'Atua 'e ta'e ha'atura ki te roŋo riva-riva o ruŋa o Ietū, Pū'oko Haka Tere o tātou. ⁹⁻¹⁰ Te ūtu'a mo te nu'u era he ūtu'a 'ina he hope'a ra'a. 'I te mahana ka tu'u mai ena mai te raŋi te tātou Pū'oko Haka Tere e to'o rō i rā nu'u e haka 'ava-'ava rō, 'o o'o ki roto i tō'ona pūai nui-nui 'ana-'ana.

'E a tātou, te nu'u ha'ata'a ta'ato'a e te 'Atua mā'ana, nu'u haka moe i te mana'u 'i ruŋa i a Ietū, e ha'ahana-hana tahi rō ki a ia 'e e māere rō 'i te me'e ta'ato'a aŋa e ia mo tātou. 'E, 'i te haka moe o kōrua i te mana'u 'i ruŋa i te me'e hāpī atu era e mātou, a tātou ta'ato'a o roto o te nu'u ha'ahana-hana ki a ia.

¹¹ 'O ira, 'i roto i te mātou pure, e pure tako'a rō 'ana a mātou mo kōrua paurō te mahana. E ani nei mātou ki te tātou 'Atua mo hā'ū'ū atu, ki ai ai te kōrua noho iŋa tano o te nu'u ha'ata'a e ia mā'ana, 'e ki rava'a ai kōrua, hai pūai ō'ona, mo aŋa i te me'e riva-riva ta'ato'a mana'u e kōrua mo aŋa 'o te ai o kōrua he nu'u haka moe i te mana'u 'i ruŋa i a Ietū. ¹² E pure nei mātou pē ira mo kōrua ki ha'ahana-hana ai te taŋata i te tātou Pū'oko Haka Tere ko Ietū Kiritō hai kōrua, 'i te take'a i te kōrua noho iŋa tano 'e i te kōrua me'e riva-riva aŋa, 'e ki koa ai a Ietū mo kōrua. Te me'e ta'ato'a nei ka topa ena hai riva rahi mau nō o te tātou 'Atua 'e o te tātou Pū'oko Haka Tere ko Ietū Kiritō.

Te hoki iŋa mai o Ietū

2 E te taina, hora nei ko haŋa 'ana a mātou mo vānaŋa atu o ruŋa i te hoki iŋa mai o te tātou Pū'oko Haka Tere ko Ietū Kiritō, 'e o ruŋa i te taka-taka iŋa o

tātou mo noho 'i muri i a ia. ² Mo tu'u tā'ue atu e tahi kope e kī rō 'ā: ko haka take'a 'ana ki a ia e te [Vārua Maitai] e tahi me'e, 'o ko tu'u 'ana te hāpī mai i a mā-tou, ka ai atu i vānaŋa 'o i pāpa'i, pē nei ē: ko hoki mai era 'ā te tātou Pū'oko Haka Tere ko Ietū, he ani atu a mātou: 'ina kōrua ko haka roŋo 'e 'ina ko ri'a-ri'a. ³ Te me'e nei 'ā'aku e kī atu ena: e u'i kōrua 'o haka roŋo rō ki te reo-reo kī atu e te nu'u. 'I ra'e, pa'i, ki te hoki iŋa mai o Ietū, e rahi rō te nu'u riri mo te 'Atua 'e haka tumu i te ture ki a ia. 'I rā hora ka e'a mai ena e tahi taŋata riri taparahi-ta'ata mo te 'Atua, kope mō'ona ko ai era 'ana te ūtu'a he pō'auahi. ⁴ Te taŋata nei he riri nō te aŋa mo te 'Atua 'e mo te me'e ta'ato'a ha'amuri e te taŋata pa he 'atua. E kī rō e nei taŋata: i a ia te pūai 'e te tōro'a 'ata hau rō atu ki te pūai 'e ki te tōro'a o te ŋā me'e ta'ato'a nei, 'e 'ātā e uru rō ki roto i te Kona Ha'amuri 'Atua, e noho rō 'e e kī rō ko ia te 'Atua.

⁵ Ko rehu 'ana 'ō pēaha i a kōrua pē nei ē: i vānaŋa rō atu a au o ruŋa i te ŋā me'e nei 'i te hora era ō'oku 'i muri i a kōrua. ⁶ 'E ko 'ite 'ā e kōrua ko ai te kope haka noho i rā taŋata, 'o tu'u mai 'i ra'e ki te hora kī e te 'Atua. ⁷ A Rukifero, pa'i, ko ha'amata ko aŋa mai era 'ā 'i ruŋa i te taŋata, mā te ta'e 'ite e rāua, 'o haŋa 'e 'o ha'atura ki te roŋo o te 'Atua. 'E te kope 'ā'ana te haka noho i te taŋata 'o riri 'o haka tumu i te ture mo te 'Atua, he aŋa he oho mau rō 'ai i te me'e nei 'ātā ki te mahana ka to'o ena i a ia e te 'Atua.

⁸ Ki to'o, ka take'a iho ena e te nu'u i rā taŋata riri taparahi-ta'ata era mo te 'Atua, kope ka haka kore ena e te tātou Pū'oko Haka Tere hai re'o ō'ona 'e hai 'ana-'ana o tō'ona mana 'i te hora ka hoki mai ena. ⁹ Te taŋata riri taparahi-ta'ata nei mo te 'Atua hai hā'ū'ū o Rukifero ka tu'u mai ena. 'E ka haka take'a ena i tō'ona pūai hai mana tu'u pa he me'e aŋa e te 'Atua. ¹⁰ Hai rauhuru nō atu me'e ta'e tano ka reo-reo ena ki te nu'u 'i ruŋa i a rāua te ūtu'a o te 'Atua 'o te ta'e haŋa mo haka moe i te rāua mana'u 'i ruŋa i te parauti'a o ruŋa i a Ietū Kiritō, mo e'a mai roto i te ūtu'a o te hara 'e mo rava'a i te ora 'āpī 'ina he hope'a ra'a.

¹¹ 'I te ta'e haŋa o rā nu'u ki rā parauti'a, he haka rē e te 'Atua i te reo-reo iŋa era o rā taŋata mo riro he parauti'a mo nei nu'u, ¹² ki haka ūtu'a ai e te 'Atua i te nu'u ta'ato'a ta'e haŋa mo [haka moe i te mana'u] 'i ruŋa i te roŋo parauti'a, nu'u haŋa mau nō mo aŋa i te me'e ta'e tano.

He mana'u tano mo te [kiritiano]

¹³ Te me'e tano mau o mātou mo aŋa he māuru-uru he oho ki te 'Atua mo kōrua, e te taina haŋa rahi o te tātou Pū'oko Haka Tere ē. Te 'Atua, pa'i, ko ha'ata'a era 'ana i a kōrua, 'i ra'e ki te aŋa iŋa o te ao, ki ai ai kōrua he nu'u haka e'a e ia mai roto i te ūtu'a o te hara 'e va'ai i te ora 'āpī 'ina he hope'a ra'a 'i te haka moe o kōrua i te mana'u 'i ruŋa i te roŋo parauti'a o ruŋa i a Ietū Kiritō, 'e 'i te aŋa o te Vārua Maitai 'i roto i a kōrua mo riro o kōrua he taŋata 'ina e tahi hara.

¹⁴ Hai hāpī haka 'ite atu era e mātou, te 'Atua i aŋa ai mo haka moe mo oho nō kōrua i te mana'u 'i ruŋa i a

Ietū, ki o'o ai kōrua ki roto i te nui-nui ō'ona, te aura'a, ki ai tako'a ai i a kōrua tō'ona huru riva.

¹⁵ 'O ira, e te taina ē, e haka noho e oho te kōrua mana'u 'i ruŋa i a Ietū 'e 'i ruŋa i te me'e hāpī atu era e mātou, ka ai i vānaŋa 'o i pāpa'i atu. ¹⁶ 'E mā Ietū Kiritō mau 'ā, Pū'oko Haka Tere o tātou, 'e mo te 'Atua, Matu'a o tātou, haŋa mai 'e va'ai mai hai riva rahi ō'ona i te koa 'ina he hope'a ra'a 'e i te 'ite pē nei ē: pe mu'a ka oho ena e va'ai rō mai i te me'e hōrea mai era e ia, ¹⁷ e haka pūai atu i te māhatu 'e e va'ai atu i te pūai mo aŋa 'e mo kī mo oho i te me'e riva-riva mau nō.

He ani iŋa ki te taina mo pure

3 Te me'e hope'a, e te taina ē, e pure kōrua mo mā-tou, ki tu'u ai te roŋo parauti'a o te tātou Pū'oko Haka Tere ki te kona ta'ato'a, 'e, tako'a, mo to'o 'e mo ha'atura e te nu'u hai koa pē kōrua. ² E pure tako'a kōrua mo hāpa'o mai i a mātou e te 'Atua, 'o rave'ino mai e te nu'u ta'e haŋa ki a ia; ta'e, pa'i, ta'ato'a taŋata ŋaro'a i te [roŋo riva-riva o ruŋa i a Ietū] e haka moe ena i te mana'u 'i ruŋa i a ia. ³ Ka ai atu pē ira, te tātou Pū'oko Haka Tere ko Ietū e ko ta'e haka tano i tā'ana me'e kī, 'e mā'ana e haka pūai 'e e hāpa'o atu 'o haka hara i a kōrua e Rukifero. ⁴ 'O ira mātou e 'ite riva-riva nei pē nei ē: hai hā'ū'ū ō'ona e aŋa e oho mai ena kōrua i te me'e hāpī atu era e mātou 'e pē ira ka aŋa ka oho ena. ⁵ 'E mo te tātou Pū'oko Haka Tere ko Ietū e hā'ū'ū atu mo aŋi-aŋi i te rahi o te haŋa o te 'Atua ki a kōrua 'e mo 'ite o kōrua mo ha'aoroma'i hai pūai 'i te hora o te 'ati, pa he oho iŋa era ō'ona.

'Ina ko hupe-hupe

⁶ E te taina, he kī atu a mātou hai 'iŋoa o te tātou Pū'oko Haka Tere ko Ietū Kiritō: mo ai 'i roto i a kōrua e tahi taina hupe-hupe ta'e haka tere i a ia hai me'e hāpī atu era e mātou, e haka tapa kōrua mai muri. ⁷ Ko 'ite 'ana a kōrua pē hē kōrua ana haka tere, mo tano o te kōrua noho iŋa ki te mātou noho iŋa. 'Ina, pa'i, mā-tou kai hupe-hupe 'i te hora era 'i muri i a kōrua, ⁸ 'e 'i-na mātou kai kai i te haraoa i ta'e 'auhau e mātou. Te me'e nō, ka pō ka 'ōtea e aŋa era mo rava'a moni, 'o ai mātou he me'e paŋaha'a e tahi mo 'amo e kōrua, ⁹ ka ai atu e tano rō 'ā a mātou mo kī atu mo hā'ū'ū mai. 'E i aŋa a mātou mo haka take'a atu ki a kōrua pē hē kōrua ana haka tere i a kōrua.

¹⁰ Hora era o mātou 'i muri i a kōrua i haka rē rō atu i te roŋo nei: Te kope ta'e haŋa mo aŋa, 'ina ko kai. ¹¹ 'E, hora nei, ko ŋaro'a 'ana e mātou pē nei ē: tētahi o kōrua e hupe-hupe rō 'ā; te rāua me'e aŋa nō he haka mira-mira i te aŋa o te tētahi. ¹² Te roŋo o mātou mo te ŋā nu'u nei hai 'iŋoa o te tātou Pū'oko Haka Tere ko Ietū Kiritō: 'ina ko haka mira-mira haka 'ou i te aŋa o te tētahi, 'e e aŋa mo ai o te rāua rāve'a.

¹³ 'E a kōrua, e te taina ē, 'ina ko ha'umani 'i te aŋa iŋa i te me'e riva-riva. ¹⁴ 'E mo ai e tahi taina ta'e ha'atura ki te me'e kī atu e mātou 'i ruŋa i te parau

nei, e u'i ko ai, 'e 'ai ka haka tapa rō kōrua mai muri, ki ha'amā ai. ¹⁵ 'Ina kōrua ko tāpūfētī i a ia. Te me'e o kōrua mo aṅa, he ture, pa he taina, mo haka tī-tika ō'ona i tō'ona ara.

He 'aroha

¹⁶ 'E mo te tātou Pū'oko Haka Tere, i a ia te haumārū, e va'ai atu ki a kōrua i te haumārū 'i te ta'ato'a nō ho-

ra. Ka ai a ia 'i muri i a kōrua ta'ato'a. ¹⁷ A au, a Pauro, e pāpa'i atu ena i te 'aroha nei hai rima mau nei 'ā ō'oku. Pē ira a au e tāpa'o tahi nei i tā'aku parau pāpa'i. ¹⁸ Ka ai 'i ruṅa i a kōrua ta'ato'a te riva rahi o te tātou Pū'oko Haka Tere ko Ietū Kiritō.

1 TIMOTEO

'I te nā ara oho era o te [‘āpōtoro] nei ko Pauro mo haka 'ite i te roŋo o te 'Atua, nu'u kē nu'u kē te nu'u i hokorua i a ia. E tahi o rā nā hokorua he kope 'āpī e tahi ko Timoteo, poki o te vi'e [hūrio] 'e o te taŋata [kirieko] (Aŋa o te 'Āpōtoro 16.1–3; Rōmano 16.21; 2 Kōrinto 1.1; Fīripo 1.1). 'I ruŋa i te parau nei (1.3), e no-no'i 'ā a Pauro ki a Timoteo mo noho 'i te kona era ko Ēfeto mo haka kore i te hāpī reo-reo vānaŋa 'i roto i te taina o ira (1.6–7; 4.1–5).

'I ruŋa tako'a nei e haka mana'u 'ana e Pauro ki a Timoteo i te parauti'a nei: te parau 'āpī riva-riva o ruŋa i a Ietū mo te taŋata ta'ato'a nō. He hatu ia e Pauro: e pure ki te 'Atua mo te taŋata ta'ato'a o te ao 'e mo te nu'u ra-rahi ta'ato'a. Pē ira he ai te noho iŋa haumārū, 'e te nu'u [kiritiano] he tano mo noho riva-riva e ha'atura rō 'ana ki te 'Atua 'ina he tātaka ananake ko te tētahi taŋata (2.1–2). He haka 'ite e Pauro ki a Timoteo pē nei ē: mo te riva-riva o te nūna'a taŋata [haka moe i te mana'u] 'i ruŋa i a Ietū, e ko tano mo pū'oko haka tere o rāua te taina nō era i haŋa mo pū'oko haka tere. 'E he haka aŋi-aŋi e Pauro pē hē te huru o te kope mo pū'oko haka tere 'e o te nu'u ta'ato'a aŋa mo te nūna'a taina (3.1–13). He vānaŋa tako'a e Pauro o ruŋa i te haka tere iŋa tano o te taina 'i roto i a rāua 'ā (5.1–6.2). 'I ruŋa i te puka nei e ai rō 'ana te tētahi hāpī kiritiano ko haka poto 'ā 'e ko pāpa'i 'ā pa he pāta'u-ta'u mo ma'u'a'au e te taina (2.5–6; 3.16).

I haka mao ai a Pauro i te parau nei e hatu 'ana ki a Timoteo hai vānaŋa e riva nō mo to'o tako'a e te nu'u ta'ato'a haka moe i te mana'u 'i ruŋa i a Ietū. Pē nei a Pauro i hatu ai: 'E a koe, e te taŋata o te 'Atua ē, e tere mai te me'e ta'ato'a ta'e tano. E ai tu'u noho iŋa noho iŋa tī-tika, mo'a 'e ha'atura ki te 'Atua. E haka moe e oho koe i te mana'u 'i ruŋa i a Ietū, e haŋa ki te rua, e 'ite i te ha'aoroma'i i te 'ati hai pūai, 'e te me'e ta'ato'a kī 'e aŋa e koe e aŋa hai haumārū (6.11).

He 'aroha

1 A au, a Pauro, [‘āpōtoro] 'a Ietū Kiritō, uŋa e te 'Atua, kope to'o i a tātou mai roto i te ūtu'a o te hara, 'e e Ietū Kiritō, kope 'i ruŋa i a ia e ŋatu ena te tātou haŋu, ² he 'aroha atu ki a koe, e Timoteo ē. A koe pa he poki parauti'a mau 'ana 'ā'aku 'i te haka moe iŋa i te mana'u 'i ruŋa i a Ietū. Ka ai 'i ruŋa i a koe te riva rahi, te haka 'aroha 'e te haumārū o te 'Atua, he Matu'a o tātou, 'e o Ietū Kiritō, he Pū'oko Haka Tere o tātou.

E hāpa'o kōrua e te hāpī ta'e tano

³ E Timoteo, ka noho nō koe 'i Ēfeto, pa he me'e ani atu era e au ki a koe 'i te hora oho era ō'oku ki Mātērōnia, mo kī ō'ou ki tū nu'u kī atu era e au mo ta'e hāpī o rāua i te me'e reo-reo, ⁴ 'e mo ta'e haka roŋo haka 'ou ki te 'a'amu ta'e parauti'a o ruŋa i te hakaara. Te me'e nō, pa'i, mo rava'a mai te nā me'e era he tātaka. He māu'a ia te hora mo haka 'ite i te ara parauti'a o te 'Atua, he me'e ana aŋi-aŋi mau nō e [haka moe i te mana'u] 'i ruŋa i a ia.

⁵ E kī atu ena i te vānaŋa nei 'i te haŋa ō'oku mo ai o te haŋa 'i roto i a tātou, he haŋa e'a mai roto i te māhatu ma'itaki, mai roto i te mana'u riva-riva 'e mai te haka moe iŋa parauti'a i te mana'u 'i ruŋa i te 'Atua. ⁶ 'E nā ko oho kē 'ana te tētahi taŋata mai te ara parauti'a, 'e 'i roto i te tātaka tahaŋa i ŋaro ai. ⁷ E haŋa rō

'ā a rāua mo riro he ma'ori hāpī o te [haka tere iŋa 'a Mōtē], ka ai atu 'ina he aŋi-aŋi riva-riva o ruŋa i te me'e kī 'e hāpī e rāua pa he nu'u 'ite.

⁸ E 'ite rō 'ā e tātou: te haka tere iŋa 'a Mōtē, haka tere iŋa riva-riva, ana haka topa a tātou i te mana'u mo te aha rā roŋo i va'ai mai ai e te 'Atua. ⁹ 'E ko 'ite tako'a 'ā e tātou 'ina kai pāpa'i e tahi roŋo mo te nu'u aŋa i te me'e riva-riva. Te roŋo i pāpa'i ai mo te nu'u haka 'āriŋa, mo te nu'u ta'e haka roŋo, mo te nu'u taparahi-ta'ata, mo te nu'u hara, mo te nu'u ta'e 'ite i te mo'a i te 'Atua 'e i tā'ana hāpī parauti'a, mo te nu'u tiŋa'i haka mate i tō'ona matu'a tane 'e matu'a vahine, mo te nu'u ta'ato'a tiŋa'i haka mate i te taŋata, ¹⁰ mo te nu'u tai'ata 'e mo te nu'u aŋa i te tētahi atu me'e pē ira, mo te nu'u hiku, mo te nu'u ho'o i te taŋata, mo te nu'u reo-reo, mo te nu'u hōrea hai reo-reo, te kī, mo te nu'u ta'ato'a aŋa i te me'e ta'e tano ki te hāpī parauti'a o te 'Atua. ¹¹ He hāpī nā o te roŋo riva-riva hope'a o te nui-nui mo haka 'ite e au, uŋa mai e te 'Atua, ki a ia ana ha'ahana-hana.

Te haka 'aroha iŋa o te 'Atua i a Pauro

¹² He māuru-uru au ki te kope va'ai mai i te haŋu, ko Ietū Kiritō, he Pū'oko Haka Tere o tātou, 'o te u'i mai i a au pa he taŋata e ko haka rē i a ia ki te hora hope'a 'e 'o te ha'ata'a i a au mo aŋa ki a ia, ¹³ ka ai atu 'i mu'a 'ā e kī rō 'ana e au i te vānaŋa ta'e tano mō'ona, e tute rō 'ana a au mo tōtōā i tā'ana nu'u, 'e e vā-vā tako'a rō

'ana i a rāua. 'E te 'Atua i haka 'aroha nō i a au 'o te ai 'i rā hora kai haka moe 'ana a au i te mana'u 'i ruŋa i a Ietū, 'e kai 'ite 'ana a au he aha tā'aku me'e e aŋa era. ¹⁴ 'E i haka 'ite rō mai e ia i tō'ona riva 'e i tō'ona haŋa ki a au hai haka poreko 'i roto i a au i te haŋa mo haka moe ō'oku i te mana'u 'i ruŋa i a Ietū, 'e i te haŋa mo te rua taŋata hai Ietū Kiritō.

¹⁵ Te vānaŋa ena e kī ena: a Ietū Kiritō i tu'u mai ai ki te ao mo haka e'a i te nu'u mai roto i te ūtu'a o te hara, he parauti'a, 'e te taŋata ta'ato'a e haka noho i te rāua mana'u 'i ruŋa. 'E o te nu'u hara, ko au te 'ata taparahi-ta'ata. ¹⁶ 'E te 'Atua i haka 'aroha nō mai, ki haka take'a ai e Ietū Kiritō 'i ruŋa i a au, kope hara taparahi-ta'ata, i te roa o tō'ona huru haumārū mo tia-ki ki te nu'u hara mo huri i te rāua mana'u ki a ia. Pē ira a au i ai ai pa he ha'aaura'a mo haka moe o te nu'u i te mana'u 'i ruŋa i a Ietū, mo rava'a e rāua i te ora 'āpī 'ina he hope'a ra'a va'ai e te 'Atua. ¹⁷ Kī mo'a 'e ki ha'ahana-hana tahi tātou, 'ātā ki te hope'a ra'a, ki te 'Ariki, he 'Atua 'ina ō'ona ha'amata, 'ina ō'ona hope'a, 'ina he mate, 'ina he take'a, 'e e tahi mau nō! Ka ai pē ira.

¹⁸⁻¹⁹ E Timoteo, e te poki 'ā'aku ē, 'I a au he haka rē atu i te roŋo nei: pa he va'ai iŋa o te va'ehau i a ia 'i te hora o te tama'i, ana va'ai tako'a koe i a koe mo haka 'ite mo oho o ruŋa i te roŋo parauti'a o te 'Atua hai pūai o tu'u haka moe iŋa i te mana'u 'i ruŋa i a ia 'e hai mana'u riva-riva tako'a ō'ou tano ki te me'e kī era e te perofeta o ruŋa i a koe 'i mu'a 'ā. 'E nā tētahi nu'u, 'i te ta'e haka roŋo ki te rāua mana'u riva-riva, ko oho kē 'ana mai roto i te ara o te 'Atua. ²⁰ I topa ai te me'e nei ki a Hīmēneo ararua ko Arehantaro, 'e ko haka rē atu 'ana e au ki a Rukifero mo aŋi-aŋi e rāua ararua: 'ina ko kī haka 'ou i te vānaŋa ta'e tano mo te 'Atua.

Te pure mo te taŋata ta'ato'a

2 'I a au he kī atu: e no-no'i, e ani, e pure 'e e māuru-uru ki te 'Atua mo te taŋata ta'ato'a o te ao. ² E pure mo te nu'u haka tere i te henua 'e mo te nu'u rarahi ta'ato'a, ki noho riva-riva ai a tātou 'ina e tahi ture, ki mo'a ai 'e ki ha'atura ai ki te 'Atua. ³ Te me'e nei he me'e riva-riva 'e he me'e haŋa o te 'Atua, kope to'o i a tātou mai roto i te ūtu'a o te hara 'e va'ai mai i te ora 'āpī 'ina he hope'a ra'a. ⁴ A ia e haŋa rō 'ana mo e'a o te taŋata ta'ato'a mai roto i te ūtu'a o te hara 'e mo rava'a i te ora 'āpī 'ina he hope'a ra'a. E haŋa tako'a rō 'ana te 'Atua mo 'ite o te taŋata i te hāpī parauti'a pē nei ē:

⁵ Te 'Atua e tahi nō, 'e e tahi nō kope haka riva-riva i te taŋata ki te 'Atua, ko Ietū Kiritō.

⁶ 'O haka ūtu'a e te 'Atua i te taŋata, i va'ai ai a Ietū i a ia mo mate mo 'amo e ia i te ūtu'a o te hara.

Te me'e nei i topa ai 'i te hora kī e te 'Atua, 'e i haka 'ite rō mai ki a tātou:

a ia e haŋa rō 'ana mo e'a o te taŋata ta'ato'a mai roto i te ūtu'a o te hara.

⁷ Mo haka 'ite mo oho i te roŋo nei i uŋa ai i a au e te 'Atua, pa he taŋata ma'uroŋo 'e pa he ['āpōtoro], 'e i kī rō mai mo hāpī ki te nu'u ta'e he hūrio o ruŋa i te haka moe iŋa i te mana'u 'i ruŋa i a Ietū 'e o ruŋa i te hāpī parauti'a o te 'Atua. Te me'e nei 'ā'aku e kī atu ena he parauti'a, ta'e he reo-reo.

Te noho iŋa tano mo te taŋata 'e mo te vi'e

⁸ Te me'e haŋa 'ā'aku: e pure te nāŋata 'i te kona ta'ato'a, e ma'u te rima a ruŋa mo pure ki te 'Atua hai māhatu ma'itaki, ta'e hai riri 'e ta'e hai 'aka-'aka o te mana'u.

⁹ 'E tā'aku me'e haŋa mo te nā vi'e: e hāito e haka tano te uru iŋa o te kahu, te ha-hari iŋa o te rau'oho, 'e te huki iŋa o te pīru ana vati-vati i a rāua, 'o ta'e mo'a rō e te taŋata. ¹⁰ Te haka tau iŋa mau hai huru o te me'e riva-riva aŋa, he me'e tano o te nā vi'e haŋa mo mo'a 'e mo ha'amuri ki te 'Atua.

¹¹ Te nā vi'e e haka roŋo kiva-kiva i te hāpī o ruŋa i te vānaŋa o te 'Atua hai haŋa mo ha'atura. ¹² 'E 'ina e au he ha'ati'a i a rāua mo hāpī 'e mo haka tere i te nāŋata 'i roto i te nūna'a taŋata haka moe i te mana'u 'i ruŋa i a Ietū. Te me'e haŋa he haka roŋo kiva-kiva nō o rāua. ¹³ 'I ra'e, pa'i, a ['Ātamu] i aŋa ai e te 'Atua ki a [Eva]. ¹⁴ 'E ta'e ko 'Ātamu te me'e i haka roŋo ki te reo-reo 'a Rukifero, ko Eva; 'e, 'i te haka roŋo ki rā reo-reo, he hara rō 'ai. ¹⁵ Te tano mau: e haka tere te nā vi'e hai mana'u o te 'Atua ki mo'a ai e te taŋata. E noho e hāpa'o i te rāua nā poki, e haka moe e oho i te rāua mana'u 'i ruŋa i a Ietū, e haŋa e oho ki te rua, 'e e ha'atura e oho ki te 'Atua. Pē ira he haka e'a e te 'Atua mai roto i te ūtu'a o te hara.

Te nu'u mo pū'oko haka tere

3 He parauti'a te me'e nei: Mo haŋa o te kope e tahi mo riro ō'ona he pū'oko haka tere o te nūna'a taŋata [haka moe i te mana'u] 'i ruŋa i a Ietū, e haŋa 'ā ki te aŋa riva-riva. ² Te kope mo pū'oko haka tere 'ina ko ai ō'ona hape. E ai he kope kai oho ki te rua vi'e 'i tō'ona hāipo-ipo, 'ite i te hāito i tā'ana me'e kī 'e i tā'ana me'e aŋa, 'ite mo ture hai me'e tano, 'e e mo'a rō 'ana e te taŋata. E ai he kope to'o i te nu'u kē ki tō'ona hare mo hāpa'o, 'e e 'ite riva-riva rō 'ana mo hāpī i te nu'u. ³ 'Ina ko ai he kope ta'ero 'ava 'e rava moto. E ai he taŋata māhatu riva 'e haumārū, ta'e nou-nou moni, ⁴ 'ite mo haka tere riva-riva i tō'ona hare, ki ha'atura ai 'e ki mo'a ai e tā'ana nā poki, 'e rā nā poki 'ina ko ai e tahi hape. ⁵ Mo ta'e 'ite, pa'i, i te haka tere riva-riva i tō'ona hare, pē hē ia ana 'ite mo haka tere i te nūna'a taŋata haka moe i te mana'u 'i ruŋa i a Ietū?

⁶ 'O ira, te taŋata mo pū'oko haka tere 'ina ko ai e haka moe iho 'ana i te mana'u 'i ruŋa i a Ietū, 'o haka pa-ka rō 'e he topa 'i ruŋa i a ia te ūtu'a va'ai era ki a Rukifero. ⁷ E ai tako'a he taŋata e mo'a rō 'ana e te nu'u ta'e haka moe i te mana'u 'i ruŋa i a Ietū. Pē ira e ko

vānaŋa ta'e tano o ruŋa i rā kope 'e e ko rava'a e Rukifero.

Te nāŋata mo [taina hā'ū'ū]

⁸ Te nāŋata to'o mo taina hā'ū'ū o te nūna'a taŋata haka moe i te mana'u 'i ruŋa i a Ietū e ai tako'a he nāŋata e mo'a rō 'ā e te nu'u, nāŋata haka tano i te rāua me'e kī, ta'e he ta'ero, 'e ta'e nou-nou moni. ⁹ Te nu'u nei e haka hio-hio i te rāua mana'u ki te roŋo parauti'a o te 'Atua haka 'ite mai era e ia, 'e e ai e ma'ita-ki rō 'ā te rāua māhatu. ¹⁰ Te me'e ra'e, e u'i ana ai te rāua hape, 'e mo ai 'ina, he to'o mo taina hā'ū'ū o te nūna'a taŋata haka moe i te mana'u 'i ruŋa i a Ietū.

¹¹ 'E te rāua nā vi'e, e ai e mo'a tako'a rō 'ana e te taŋata, he nā vi'e ta'e ha'al'ino, hāito i te rāua me'e kī 'e i te rāua me'e aŋa, 'e he nā vi'e haka tano i te rāua me'e kī. ¹² Te kope mo taina hā'ū'ū e ai tako'a he kope kai oho ki te rua vi'e 'i tō'ona hāipo-ipo, haka tere riva-riva i tō'ona hare 'e i tā'ana nā poki. ¹³ 'E mo aŋa riva-riva o te taina hā'ū'ū i tā'ana aŋa, he 'ata mo'a e te taŋata, 'e he 'ata pūai mo haka 'ite mo oho o ruŋa i te haka moe iŋa i te mana'u 'i ruŋa i a Ietū Kiritō.

He parauti'a haka 'ite mai e te 'Atua

¹⁴⁻¹⁵ E Timoteo, ko haŋa 'ana a au 'ina ko roa hia mo oho atu mo u'i i a koe. 'O ŋe'i tā'ue, e pāpa'i atu ena au i te me'e nei, mo 'ite ō'ou pē hē te noho iŋa tano o te hua'ai o te 'Atua ora, he nūna'a taŋata ha'ata'a e ia mā'ana. O te nu'u nei te ma'u 'e te hāpa'o i te parauti'a. ¹⁶ He me'e nui-nui mau 'ana te parauti'a haka 'ite mai era e te 'Atua pē nei ē:

Te Kiritō i tu'u mai ai pa he taŋata,
i haka 'ite rō mai e te [Vārua Maitai] he Poki o te 'Atua,
'e he merahi te mata'ite.
Te roŋo riva-riva o ruŋa i a ia i haka 'ite rō ki te hau ta'ato'a,
i haka moe rō te mana'u o te taŋata 'i ruŋa i a ia,
'e i to'o rō e te 'Atua ki muri i a ia.

Te hāpī ta'e parauti'a

4 Ko haka 'ite riva-riva 'ā e te [Vārua Maitai] pē nei ē: ka hāhine ena te nā mahana hope'a era, tētahi taŋata e ko haŋa haka 'ou mo haka roŋo ki te hāpī parauti'a o te 'Atua. Ka haka roŋo ena ki te hāpī reo-reo o te tātane ² hāpī e te nu'u reo-reo riva a te haho 'ā 'e ta'e ŋaro'a haka 'ou i te mamae 'i roto i a rāua 'o te aŋa i te me'e ta'e tano. ³ Te nu'u nei 'ina he ha'ati'a i te taŋata mo [hāipo-ipo] 'e mo kai i te tētahi kai aŋa e te 'Atua. Te nu'u 'ite i te parauti'a [haka moe i te mana'u] 'i ruŋa i a Ietū ko aŋi-aŋi 'ana pē nei ē: ta'ato'a kai māuru-uru ki te 'Atua e tano nō mo kai. ⁴ Ta'ato'a me'e aŋa e te 'Atua me'e riva-riva; mo māuru-uru ki a ia, 'ina e tahi kai mo ta'e kai. ⁵ 'Ā'ana, pa'i, i kī, 'e o tātou te māuru-uru ki a ia.

⁶ E Timoteo, mo hāpī ō'ou ki te taina i te nā me'e nei, he tāvini riva-riva ia koe o Ietū Kiritō. 'E te roŋo parauti'a o te 'Atua 'e te ma'u ō'ou i te hāpī riva-riva haka 'ite atu he haka haŋu he oho i a koe.

⁷ 'Ina koe ko haka roŋo ki te 'a'amu ma'a-ma'a o te taŋata. Ka aŋa ka oho nō koe mo 'ata pūai ō'ou pa he taŋata mo'a 'e ha'atura ki te 'Atua. ⁸ Te haka aŋa i te hakari mo haka hio-hio e hauha'a rō 'ā, 'e te 'ite mo mo'a 'e mo ha'atura ki te 'Atua 'ata hau rō atu i te hauha'a, 'e ta'e mo te noho iŋa 'i te ao nō nei, pē ira 'ana mo te noho iŋa ka oho mai ena. ⁹ He parauti'a te me'e nei; e haka roŋo te taŋata ta'ato'a. ¹⁰ Mo ira, e Timoteo ē, e aŋa 'e e haka 'uhu e oho nei a tātou 'i te aŋa o te 'Atua ora, 'o te 'ite e tātou e haka tano tahi rō i tā'ana me'e kī. 'Ā'ana, pa'i, te haka e'a i te taŋata ta'ato'a mai roto i te ūtu'a o te hara 'e te va'ai i te ora 'āpī 'ina he hope'a ra'a ana haka moe i te mana'u 'i ruŋa i a Ietū.

¹¹ He nā me'e nei te me'e 'ā'au mo hāpī 'e mo kī mo aŋa e te taina. ¹² E u'i 'o ta'e haka au rō atu 'o te ai ō'ou he taŋata 'āpī. Hai huru o tu'u vānaŋa 'e o tu'u noho iŋa, hai haŋa ō'ou ki te rua, hai huru o tu'u haka moe iŋa i te mana'u 'i ruŋa i te 'Atua 'e hai noho iŋa hara kore ana haka take'a ki te tētahi nu'u haka moe i te mana'u 'i ruŋa i a Ietū pē hē tako'a a rāua ana ai.

¹³ 'I tu'u tiaki iŋa mai, e tai'o koe ki te taŋata i te [Pāpa'i Mo'a], e hāpī 'e e haka haŋu koe i te taina. ¹⁴ E Timoteo, e haka hio-hio e oho koe 'i te aŋa o te 'Atua hai me'e hauha'a va'ai atu era e ia 'i te hora haka topa atu era i te rima a ruŋa i tu'u pū'oko e te nā kope pū'oko haka tere era koia ko kī atu i tā'ana roŋo hai Vārua Maitai.

¹⁵ E u'i e aŋa riva-riva te nā me'e kī atu ena e au, ki take'a ai e te nu'u ta'ato'a pē hē e aŋa e oho ena koe i te me'e haŋa o te 'Atua. ¹⁶ E u'i riva-riva te huru o tu'u noho iŋa 'e te huru o tu'u hāpī iŋa i te rua; e haka hio-hio e oho nō koe i te nā me'e ta'ato'a ena. Mo aŋa ō'ou pē ira, ta'e ko koe nō te me'e ka e'a ena mai roto i te ūtu'a o te hara, pē ira 'ana te nu'u haka roŋo atu.

He haka tere iŋa tano

5 Ana kī tā'ue koe i te hape o te taŋata pa'ari, e kī hai mo'a, pa he kī iŋa ō'ou ki tu'u matu'a tane. Ki te nāŋata 'āpī e kī pa he kī iŋa ō'ou ki tu'u taina. ² Ki te nā vi'e pa'ari e mo'a koe pa he matu'a vahine ō'ou; 'e ki te nā vi'e 'āpī e mo'a 'e e haŋa pa he taina vahine ō'ou.

³ E hā'ū'ū ki te vi'e hove 'ina he hua'ai ō'ona mo hāpa'o i a ia. ⁴ 'E mo ai tā'ue te poki 'e te makupuna mo hāpa'o i rā hove, ko rāua te me'e ra'e mo hā'ū'ū i a ia. Pē ira he haka hoki ki rā matu'a te haŋa va'ai era e ia ki a rāua. He me'e nei te me'e haŋa o te 'Atua.

⁵ Te vi'e hove o roto i te taina kope kore mo hāpa'o i a ia he ŋatu nō te haŋu ki te 'Atua mo hā'ū'ū. 'O ira ka pō ka 'ōtea e pure e ani ena. ⁶ 'E te vi'e hove haŋa ki te me'e o te ao nō nei pa he vi'e mate ka ai atu e ora nō 'ā. ⁷ E kī ki te taina ta'ato'a: e hāpa'o te rāua hua'ai, 'o tuhi e te nu'u 'i te ta'e hāpa'o i a rāua. ⁸ Te parauti'a, te

taŋata ta'e hāpa'o i tō'ona hua'ai 'e i tā'ana hua'ai mau 'ā e hāruī 'ana hai tua'ivi i te hāpī parauti'a o te 'Atua, 'e tō'ona māhatu 'ata hau 'i te rake-rake ki te nu'u 'ina he [haka moe i te mana'u] 'i ruŋa i te 'Atua; te nu'u era, pa'i, e hāpa'o rō 'ana i te rāua hua'ai.

⁹ Te vi'e hove mo haka pāpa'i 'i ruŋa i te parau o te ŋā vi'e hove mo hāpa'o e te taina haka moe i te man-a'u 'i ruŋa i a Ietū he vi'e mai te ono 'ahuru matahiti pe ruŋa, 'e he vi'e, 'i tō'ona hāipo-ipo, kai tai'ata. ¹⁰ Te vi'e nei he vi'e ko 'ite tahi 'ana e te taŋata i tō'ona huru riva, hāpa'o riva-riva i tā'ana ŋā poki, hāpa'o i te nu'u tu'u ki tō'ona hare, haka hopu i te va'e o te nu'u haka moe i te mana'u 'i ruŋa i a Ietū, 'e hā'ū'ū ki te nu'u ta'ato'a ai o te 'ati. He vi'e aŋa mau 'ā a ia i te me'e haŋa o te 'Atua.

¹¹ 'E te vi'e hove matahiti ta'e rahi he vi'e mo ta'e haka pāpa'i 'i ruŋa i rā parau, 'o topa pē nei ē: pe mu'a ka oho ena, 'ata pūai tō'ona haŋa ki tā'ana o te tane ki tō'ona haŋa mo tāvini ki te [Kiritō], 'e he haŋa mo [hāipo-ipo] haka 'ou. ¹² Mo hāipo-ipo tā'ue, he hape ki te hōrea aŋa 'i te hora haka pāpa'i i a ia. ¹³ 'E ta'e 'o ira nō, 'o māhani i te hupe-hupe, 'o oho ki hare era ki hare era, 'o ha'amata 'o ha'a'ino i te rua, 'e 'o 'āmui ki roto i te ture kē koia ko kī i te vānaŋa ta'e tano.

¹⁴ 'O ira a au e haŋa nei ki te ŋā vi'e 'āpī hove mo hāipo-ipo, mo ai o te ŋā poki 'e mo ai he ŋā vi'e ma'u riva-riva i te rāua hare 'e i te rāua hua'ai, 'o ai te me'e ta'e tano mo kī o ruŋa i a rāua e te nu'u ta'e haŋa ki te 'Atua. ¹⁵ Te tētahi ŋā vi'e hove, pa'i, ko haka tapa 'ā i a rāua mai te ara o te 'Atua 'e ko oho 'ana a roto i te ara o Rukifero.

¹⁶ Mo ai 'i roto i te hua'ai o te vi'e haka moe i te man-a'u 'i ruŋa i a Ietū te ŋā vi'e hove, e hā'ū'ū 'e e hāpa'o e rā vi'e i rā ŋā hove, 'o ai he paŋaha'a haka 'ou e tahi mo 'amo e te nūna'a taŋata haka moe i te mana'u 'i ruŋa i a Ietū, ki topa ai te hora o te nu'u era mo hā'ū'ū ki te vi'e hove 'ina he kope mo hāpa'o i a ia.

¹⁷ Te nu'u pū'oko haka tere o te nūna'a taŋata haka moe i te mana'u 'i ruŋa i a Ietū aŋa riva-riva i te rāua aŋa e mo'a 'e e 'auhau riva-riva e te taina. 'E te nu'u ra'e mau mo mo'a 'e mo 'auhau riva-riva ko te ŋā pū'oko haka tere ena te rāua aŋa he haka 'ite i te vānaŋa o te 'Atua. ¹⁸ Pē nei, pa'i, te [Pāpa'i Mo'a] e kī ena: «'Ina ko here te ŋutu o te 'uei haka rei-rei tariko». 'E e kī tako'a rō 'ā: «'E 'auhau te taŋata aŋa».

¹⁹ 'Ina koe ko haka roŋo ki te me'e ta'e tano kī atu o ruŋa i te nu'u pū'oko haka tere. Ana haka roŋo iho koe e ai e rua 'o e toru mata'ite.

²⁰ 'E mo ai ko hara 'ana 'e 'ina he haka tapa mai roto i rā me'e, e ture 'i mu'a o te nu'u ta'ato'a haka moe i te mana'u 'i ruŋa i a Ietū, ki ri'a-ri'a ai te tētahi nu'u pū'oko haka tere.

²¹ 'Ī a au he kī atu: e aŋa koe i te me'e hatu atu ena o ruŋa i te nu'u pū'oko haka tere. Ana haka tī-tika koe e tahi o rāua, 'ina ko u'i ko ai a ia ana ture iho i tō'ona hara. 'Ina ko rehu i a koe: nā e u'i atu ena te 'Atua, a Ietū Kiritō 'e te merahi. ²² 'Ina koe ko veve-veve mo ha'ata'a 'e mo ha'amaitai i te kope mo te aŋa o te 'At-

ua hai haka puā i tu'u rima a ruŋa, 'o ai e hara rō 'ā kai 'ite hia koe; pē ira he hara tako'a a koe. E hāpa'o koe 'o hara.

²³ E Timoteo, 'i te ai me'e rava māui-ui manava koe, 'ina ko unu i te vai nō, e unu 'iti-'iti tako'a hai vino.

²⁴ Ana ha'ata'a koe i te taŋata mo te aŋa o te 'Atua, 'ina ko rehu i a koe: te hara o te tētahi nu'u e 'ite rō 'ana e tātou ka ai atu kai ture ia, 'e te hara o te tētahi atu nu'u e ture e 'ite iho ena e tātou. ²⁵ Pē ira tako'a 'ā e ai rō 'ana te me'e riva-riva aŋa e te nu'u e 'ite rō 'ana e te ta'ato'a, 'e e ai rō 'ana te me'e riva-riva aŋa 'ina he 'ite e te nu'u. Pe mu'a ka oho ena he 'ite.

6 E Timoteo, e haka 'ite ki te nu'u 'ekaravo [haka moe i te mana'u] 'i ruŋa i a Ietū: e mo'a i te taŋata haka aŋa i a rāua. Mo ta'e mo'a o rāua, he kī e te nu'u i te vānaŋa ta'e tano o ruŋa i te tātou hāpī 'e o ruŋa i te 'Atua. ² 'E mo ai te taŋata haka aŋa i a rāua he kope haka moe i te mana'u 'i ruŋa i a Ietū, 'ina ko ta'e mo'a 'o te ai he taina haka moe i te mana'u 'i ruŋa i a Ietū. Te tano mau: e 'ata aŋa riva-riva 'o te ai te kope era ki a ia e tāvini era he taina haŋa rahi.

Te hauha'a parauti'a

E Timoteo, ka hāpī te me'e pāpa'i atu ena e au 'e ka kī ki te taina: hai me'e nei a rāua ana haka tere. ³ Mo hāpī o te kope e tahi i te me'e kē 'e 'ina he haŋa ki te hāpī parauti'a o te tātou Pū'oko Haka Tere ko Ietū Kir-itō 'e ki te hāpī ma'u e tātou, ⁴ te kope nei ia he kope mana'u i a ia nō te tano, 'e te parauti'a mau, 'ina e tahi 'ā'ana me'e i 'ite. Pa he māui-ui e tahi ō'ona te haka tumu i te tātaka o ruŋa i te me'e hauha'a-'ore. Pē ira he poreko te mākota, te ta'e au, te vā-vā, te mana'u 'i-no, ⁵ 'e te rava ture 'i roto i te nu'u 'ina he mana'u riva-riva toe 'e 'ina he aŋi-aŋi haka 'ou he aha te me'e he parauti'a 'e he aha te me'e he reo-reo. Mo rāua te hāpī o ruŋa i te 'Atua he rāve'a e tahi mo 'ono. ⁶ Te parauti'a, e ai mau rō 'ana te 'ono o te hāpī o ruŋa i te 'Atua, 'e rā 'ono mo te taŋata e koa rō 'ana 'i tā'ana me'e ai. ⁷ 'Ina, pa'i, e tahi me'e ma'u e tātou 'i te rima e poreko ena, 'e 'ina e tahi me'e ma'u ka mate ena. ⁸ Mo ai o te tātou me'e mo kai 'e o te kahu mo uru, e koa 'o te ai i a tātou te ŋā me'e nei. ⁹ 'E te nu'u haŋa mo 'ono e haka 'atu rō e te rauhuru me'e mo hara. Pē ira he rava'a riva-riva i a rāua e te pohe ki te me'e ta'e tano 'e ma'a-ma'a, he me'e mo ma'u i a rāua ki roto i te 'ati 'e ki roto i te ūtu'a. ¹⁰ Te nou-nou ki te moni he tumu o te rauhuru atu me'e ta'e tano. 'E nā e ai rō 'ana te nu'u, 'i te pohe rahi ki te moni, ko haka tapa 'ana i te mana'u mai ruŋa i te 'Atua, 'e ko 'amo 'ana me'e rahi nō atu 'ati i kimi e rāua 'ā.

Te haka tere iŋa tano mo Timoteo

¹¹ 'E a koe, e te taŋata o te 'Atua ē, e tere mai te ŋā me'e ta'ato'a nei. Tu'u noho iŋa e ai noho iŋa tī-tika, mo'a 'e ha'atura ki te 'Atua. E haka moe e oho koe i te mana'u 'i ruŋa i a Ietū, e haŋa ki te rua, e 'ite i te ha'aoroma'i i te 'ati hai pūai, 'e te me'e ta'ato'a kī 'e

aŋa e koe e aŋa hai haumārū. ¹² E va'ai tahi koe i a koe mo hio-hio mo oho nō o tu'u mana'u 'i ruŋa i te 'Atua 'e mo aŋa ki a ia, pa he va'ai iŋa ena o te va'ehau i a ia ki te mate 'i te hora o te tama'i. 'Ina ko haka pako'o mai tu'u rima te ora 'āpī 'ina he hope'a ra'a va'ai atu e te 'Atua. Mo rava'a i rā me'e i to'o ai i a koe e te 'Atua 'i te hora kī ō'ou, 'i mu'a i te rahi o te mata'ite, i tu'u haka moe i te mana'u 'i ruŋa i a Ietū.

¹³ E Timoteo, he kī atu au 'i mu'a i te 'Atua, i a ia te ora o te me'e ta'ato'a, 'e 'i mu'a i a Ietū Kiritō, kī i te parauti'a 'i mu'a o Pontio Pirato: ¹⁴ e aŋa tahi koe i tā'aku me'e kī atu ena, 'e e noho e oho koe 'ina e tahi hape 'ātā ki te hoki iŋa mai o te tātou Pū'oko Haka Tere ko Ietū Kiritō ¹⁵ 'i te hora kī e te 'Atua.

Te 'Atua e tahi mau nō. Ki a ia ana ha'ahana-hana; i a ia, pa'i, te parau o te me'e ta'ato'a. A ia he 'Ariki o te 'ariki, 'e he Pū'oko Haka Tere o te pū'oko haka tere ta'ato'a. ¹⁶ 'Ina o ruŋa i a ia te mate; 'i roto i te mōrī 'ana-'ana e noho ena 'e 'i te pūai o rā mōrī e ko hāhine e tahi kope. 'Ina 'ā e tahi taŋata i take'a 'e mo take'a tako'a i a ia. Ki ha'amuri 'e ki ha'ahana-hana tātou i te 'Atua; i a ia, pa'i, te parau 'e te pūai mo haka tere i te me'e ta'ato'a 'ātā ki te hora hope'a. [Āmene].

¹⁷ Ki te nu'u 'ono o te ao nei e kī: 'ina ko mana'u i a rāua mau nō te tano, 'e 'ina ko haka noho i te rāua mana'u 'i ruŋa i te hauha'a; te hauha'a, pa'i, e ko roa he pau tahi. Te me'e o rāua mo aŋa he haka noho i te mana'u 'i ruŋa i te 'Atua. 'Ā'ana, pa'i, te va'ai mai ki a tātou i te me'e ta'ato'a hai mau mo koa o tātou. ¹⁸ E kī tako'a: e haka rahi te rāua me'e riva-riva aŋa ki te rua, mo 'ono tako'a o rāua 'i te aŋa iŋa i rā ŋā me'e, 'e e va'ai hai riva to te tētahi o te hauha'a. ¹⁹ Pē ira he ha'aputu 'i ruŋa i te raŋi te hauha'a parauti'a mo te rāua noho iŋa pe mu'a ka oho ena, 'e te rāua noho iŋa 'i te ao nei he tano ki te noho iŋa haŋa e te 'Atua.

He hatu iŋa hope'a 'e he 'aroha

²⁰ E Timoteo, e ma'u riva-riva te me'e va'ai atu e te 'Atua. 'Ina koe ko haka roŋo ki te vānaŋa hauha'a-'ore o te ao nei 'e ki te vānaŋa 'ina he tano ki te hāpī parauti'a o ruŋa i te 'Atua hāpī e te tētahi pa he parauti'a. ²¹ Nā e ai rō 'ana, pa'i, te nu'u, 'i te haka roŋo ki rā hāpī, ko haka tapa 'ana i a rāua mai roto i te hāpī parauti'a.

Ka ai 'i ruŋa i a kōrua ta'ato'a te riva rahi o te 'Atua.

2 TIMOTEO

He rua parau nei i pāpa'i e Pauro ki a Timoteo, 'e e tu'u rō 'ā pa he parau ra'e era. 'I te ai o te nu'u e hāpī 'ā i te hāpī reo-reo ki te nu'u [haka moe i te mana'u] 'i ruŋa i a Ietū, he 'ata haka anji-anji e Pauro ki a Timoteo i te me'e mo hāpī ki te nu'u taina. 'I ruŋa tako'a nei e hatu 'ā e Pauro ki a Timoteo mo ta'e ha'amā 'o te ma'u i te parau 'āpī riva-riva o ruŋa i a Ietū Kiritō, 'e mo topa tā'ue 'i ruŋa i a ia te 'ati 'o te haka 'ite ki te nu'u i rā parau 'āpī, e ha'aoroma'i hai pūai pa he va'ehau haka kē 'a Ietū Kiritō (1.6–8; 2.3).

Te nu'u o te noho iŋa nei o Timoteo e mana'u rahi rō 'ana o ruŋa i te pa'o o te ao. 'O ira i haka 'ite ai e Pauro ki a Timoteo pē nei ē: 'i te ŋā mahana hope'a ena e ai rō te mahana taparahi-ta'ata. He 'ino te taŋata, he haŋa ki te moni nō, he haka me'e i a rāua, he mana'u i a rāua mau nō te tano, he vānaŋa ta'e tano mo te 'Atua, e ko ha'atura ki te rāua matu'a, e ko 'ite mo māuru-uru 'e 'ina tako'a e ko mo'a i te hāpī o te 'Atua. He hatu ia e Pauro mo ta'e haŋa ki te nu'u pē rā mo repahoa ō'ona (3.1–5).

E ai tako'a rō 'ana 'i ruŋa nei te hāpī ko haka poto 'ā 'e ko pāpa'i 'ā pa he pāta'u-ta'u mo ma'u'a'au e te taina. Te hāpī nei e haka mana'u 'ana i te parauti'a nei: a Ietū he kope anja i tā'ana me'e kī (2.11–13).

Mo haka oti o te parau nei he haka 'ite e Pauro ki a Timoteo i te parau 'āpī o te tētahi taina māhani tako'a e Timoteo 'e he haka ma'u i te 'aroha ki te tētahi atu taina. E tu'u rō 'ana pa he me'e ena ē: ko anji-anji 'ana e Pauro ko hāhine 'ana a ia mo mate (4.6).

He 'aroha

1 A au, a Pauro, [‘āpōtoro] 'a Ietū Kiritō, uŋa e te 'Atua mo haka 'ite ki te taŋata o ruŋa o te ora 'āpī hōrea mai e ia rava'a hai Ietū Kiritō mau nō ² he 'aroha atu hai haŋa ki a koe, e Timoteo ē. A koe pa he poki parauti'a mau 'ā 'ā'aku. Ka ai 'i ruŋa i a koe te riva rahi, te haka 'aroha 'e te haumārū o te 'Atua Matu'a, 'e o Ietū Kiritō, he Pū'oko Haka Tere o tātou.

He māuru-uru

³ E Timoteo, hai māhatu ma'itaki a au e anja nei ki te 'Atua, pa he me'e anja e tō'oku tupuna. 'E 'i tō'oku pure iŋa 'i te pō 'e 'i te 'ōtea, e māuru-uru nei a au mō'ou. ⁴ E haŋu, e mana'u rō 'ana a au 'i ruŋa i tu'u matavai taŋi era mō'oku; 'o ira a au e haŋa nei mo take'a mai i a koe. ¡Ko te koa 'ō i a au mo ai pē ira! ⁵ E mana'u tako'a rō 'ana a au i tu'u haka moe iŋa parauti'a i te mana'u 'i ruŋa i a Ietū, he me'e ai 'i tu'u māmārū'au era ko Rōira 'e 'i tu'u matu'a vahine era ko Eunite. 'E ko 'ite riva-riva 'ana e au nā i a koe tako'a.

'Ina ko ha'amā

⁶ 'I au he kī atu: pa he ni'o iŋa i te ahi, ana haka pūai ana oho koe i te me'e va'ai atu era e te 'Atua 'i te hora haka topa atu era ō'oku i te rima a ruŋa i tu'u pū'oko. ⁷ Te [Vārua Maitai] va'ai mai era e te 'Atua ta'e he Vārua haka 'aka-'aka i te mana'u; he Vārua pūai, haka haŋu, haka poreko i te haŋa ki te rua, 'e haka 'ite i te haka topa riva-riva i te mana'u.

⁸ 'Ina koe ko ri'a-ri'a mo vānaŋa o ruŋa i te tātou Pū'oko Haka Tere ko Ietū Kiritō, 'e 'ina koe ko ha'amā 'o tō'oku puru 'i roto i te hare ma'u'aurī. Hai pūai o te

'Atua, mai ki ha'aoroma'i ki oho i te 'ati mo topa mai 'o te haka 'ite i te roŋo riva-riva o ruŋa i a Ietū.

⁹ Te 'Atua ko haka e'a 'ā i a tātou mai roto i te ūtu'a o te hara mo riro o tātou he nu'u 'ā'ana. I anja ai pē ira, ta'e he huru riva o tātou, he haŋa mau 'ā ō'ona, 'e mai te hora era 'ā kai anja 'ana i te ao i haŋa rō ai mo haka take'a mai i tō'ona riva rahi hai Ietū Kiritō. ¹⁰ 'E, ko haka take'a mai 'ā e te 'Atua hai tu'u mai era o Ietū Kiritō, kope haka e'a i a tātou mai roto i te ūtu'a o te hara. Ko haka kore 'ā, pa'i, e Ietū i te pūai o te mate, 'e ko haka 'ite 'ā ki te nu'u: mo haka noho o rāua i te mana'u 'i ruŋa i te [roŋo riva-riva o te 'Atua] he rava'a i te ora 'āpī 'ina he hope'a ra'a.

¹¹ Te 'Atua ko kī mai 'ana mo haka 'ite ō'oku i te roŋo nei, 'e ko uŋa 'ana i a au pa he 'āpōtoro 'e pa he ma'ori. ¹² 'O ira te 'ati e topa mai nei ki a au. Ka ai atu pē ira, 'ina a au he ri'a-ri'a. Ko 'ite 'ana, pa'i, e au 'i ruŋa i a ai a au e haka noho nei i tō'oku mana'u, 'e ko anji-anji riva-riva 'ana e au e ai rō 'ana tō'ona pūai mo hāpa'o 'e mo hā'ū'ū mai i te anja va'ai mai e ia 'ātā ki te mahana o tō'ona hoki iŋa mai.

¹³ Ana hāpī koe, e u'i e haka tano ki te hāpī iŋa parauti'a haka 'ite atu era e au koia ko te haka moe ko te oho i te mana'u 'i ruŋa i a Ietū, 'e ko te haŋa ko te oho ki te rua 'o te ai ō'ou 'a Ietū Kiritō. ¹⁴ E Timoteo, hai hā'ū'ū o te Vārua Maitai noho 'i roto i a tātou, ka hāpa'o i te hāpī parauti'a va'ai atu era mo haka 'ite ki te nu'u.

¹⁵ Ko 'ite 'ana koe: te nu'u ta'ato'a o 'Ātia ko hoa 'ana i a au, 'e 'i roto i rā nu'u a Fikero 'e a Eremōhene. ¹⁶ 'E mo 'Onetiforo 'e mo te nu'u ta'ato'a o tō'ona hare, ka ai 'i ruŋa i a rāua te riva rahi o te 'Atua. I rahi rō, pa'i, te mahana i haka haŋu ai i tō'oku mana'u, 'e 'ina kai ha'amā 'o tō'oku puru 'i roto i te hare ma'u'aurī. ¹⁷ I

tu'u mai era a 'Onetiforo ki Roma, te me'e ra'e i aña he kimi i a au ka rava'a rō. ¹⁸ 'O ira a au e pure nei mo haka 'aroha o te 'Atua i a ia 'i te mahana o te ture hope'a. Ko 'ite riva-riva 'ana, ho'i, koe, e Timoteo ē, pē hē a ia i hā'ū'ū mai ai 'i Ēfeto.

He ha'aoroma'i iña i te 'ati hai pūai

2 E hañu, e haka pūai koe hai riva rahi o te 'Atua va'ai atu hai Ietū Kiritō. ² E kimi koe hai nāñata haka tano i te rāua me'e kī, nāñata 'ite tako'a mo hāpī i te rua. Ki a rāua koe ana haka 'ite mo hāpī e rāua ki te tētahi i te hāpī parauti'a o ruña i a Ietū Kiritō haka 'ite atu era e au 'i te hora hāpī ō'oku i te nu'u.

³ E ha'aoroma'i koe i te 'ati ka topa atu ena pa he va'ehau haka kē 'a Ietū Kiritō. ⁴ 'Ina e tahi va'ehau o'o ki te aña o te nu'u ta'e he va'ehau. Te me'e haña o te va'ehau he aña riva-riva i te aña mo koa o te kape. ⁵ Pē ira tako'a 'ā te kope 'ā'ati, 'ina e ko haka hei mo ta'e ha'atura ki te haka tere iña era o rā 'ā'ati. ⁶ Te kope 'o-ka kai, mā'ana e kai ra'e i tā'ana kai 'oka. ⁷ E mana'u koe i te me'e nei e kī atu ena e au, 'e mo te 'Atua e 'ata haka aña-aña atu i te me'e ta'ato'a.

⁸ 'Ina ko rehu i a koe te roño riva-riva haka 'ite e au pē nei ē: te 'Atua i haka ora rō mai te mate i a Ietū Kiritō, hakaara o te 'ariki era ko [Tāvita]. ⁹ 'O te haka 'ite 'o te oho ō'oku i te roño ena i topa mai ai te 'ati, 'ātā ki te roa ko here-here 'ana i a au hai vivi pa he taparahi-ta'ata. 'E, ka ai atu ko here-here 'ana i a au, te vānaña o te 'Atua e ko rava'a mo haka noho. ¹⁰ 'O ira a au e ha'aoroma'i nei i te ta'ato'a nō 'ati mo te riva-riva o te nu'u ha'ata'a e te 'Atua mā'ana, mo e'a tako'a o rāua mai roto i te ūtu'a o te hara hai Ietū Kiritō 'e mo rava'a mo noho 'i muri i a ia 'ina he hope'a ra'a pe mu'a ka oho ena.

¹¹ He parauti'a te me'e nei:

Mo ai ko mā-mate 'ā a tātou 'i muri i a Ietū Kiritō, 'i muri i a ia a tātou ka no-noho ena.

¹² Mo ha'aoroma'i o tātou i te 'ati hai pūai, he haka tere a tātou 'i tō'ona ao 'i muri i a ia.

Mo kī o tātou kai 'ite a tātou ko ai a ia, pē ira tako'a 'ā ka kī ena e ia mo tātou.

¹³ Ka ta'e aña atu a tātou i te tātou me'e kī, ko te aña iña 'ana a ia i tā'ana me'e kī; e ko aña, pa'i, a ia e tahi me'e 'ina he tano ki tō'ona huru.

Te noho iña tano mo Timoteo

¹⁴ E haka mana'u koe ki te nu'u, e Timoteo ē, i te nā me'e kī atu era e au, 'e 'ai ka kī rō hai 'iñoa o te 'Atua: 'ina a rāua ko tātake o ruña i te aura'a o te vānaña; 'ina, pa'i, e tahi hauha'a. Te me'e mau nō mo rava'a he haka kore i te haka moe iña o te mana'u 'i ruña i a Ietū o te nu'u haka roño i rā vānaña. ¹⁵ E aña riva-riva koe i ta'a aña, ki ai ai koe he tañata tano 'e aña i te me'e tī-

tika 'i mu'a i te 'Atua, pa he tañata 'ina ō'ona hape mo ha'amā iña 'e, tako'a, hāpī riva-riva oho i te roño parauti'a o te 'Atua.

¹⁶ 'Ina koe ko haka roño ki te vānaña tahaña o te nu'u ta'e [haka moe i te mana'u] 'i ruña i a Ietū. Te nu'u vānaña, pa'i, pē ira pe te 'ava-ava pe te oho nō mai muri i te 'Atua, ¹⁷ 'e te rāua hāpī ta'e tano he 'ata rahi he oho, pa he māui-ui kai i te hakari. He me'e nei te me'e i topa ki a Hīmēneo ararua ko Fireto. ¹⁸ A rāua ko haka tapa 'ana mai roto i te parauti'a hai kī o rāua: te ora iña haka 'ou o tātou mai te mate ko ai era 'ā, 'e pē ira e haka mira-mira e oho era i te mana'u o te tētahi nu'u haka moe i te mana'u 'i ruña i a Ietū.

¹⁹ Ka ai atu pē ira, te nūna'a tañata haka moe parauti'a i te rāua mana'u 'i ruña i a Ietū e hio-hio rō 'ana pa he kona mekerā 'i ruña e haka tu'u ena i te hare, 'e 'i ruña tako'a i pāpa'i ai: «Te 'Atua e aña-aña rō 'ā i tā'ana tañata», 'e, «Te nu'u ta'ato'a ha'amuri ki te 'Atua e haka tapa mai roto i te me'e ta'e tano».

²⁰ 'I roto i te hare o te 'ono, ta'e nō he me'e aña hai pīru 'e hai parata te me'e o roto. E ai tako'a rō 'ana te me'e aña hai miro 'e hai 'ō'one. Te nā me'e riva-riva era he ha'ata'a mo te mahana roño, 'e te tētahi me'e era mo te mahana ta'e roño. ²¹ Te kope haka tapa i a ia mai roto i te me'e ta'e tano pa he nā me'e pīru era 'ā, me'e ha'ata'a mo te me'e riva-riva haña e te 'Atua mo aña.

²² E Timoteo, e u'i koe e te me'e haka hara i te nu'u 'āpī. E aña mo riro ō'ou 'e o te nu'u ta'ato'a ha'amuri hai māhatu ma'itaki ki te 'Atua, he nu'u aña i te me'e tano ki te mata o te 'Atua, haka moe i te mana'u 'i ruña i a ia, haña ki te rua 'e haumārū. ²³ 'Ina koe ko haka roño ki te vānaña tahaña o te nu'u ta'e haka moe i te mana'u 'i ruña i a Ietū; ko 'ite 'ana, pa'i, koe: te me'e nō mo rava'a he tātake. ²⁴ Te tāvini o te 'Atua 'ina ko tātake; e riva ki te ta'ato'a, e 'ite mo hāpī i te rua 'e mo ha'aoroma'i i te me'e hai haumārū.

²⁵ E 'ite tako'a i te kī, hai māhatu ma'itaki, i te hape o te nu'u ta'e haka roño, koi'ite 'i te riva rahi o te 'Atua, he huri i te rāua mana'u ki a ia, 'e he 'ite i te parauti'a o ruña i a Ietū Kiritō, ²⁶ ki veveri ki tere ai mai te rima o Rukifero. 'Ā'ana, pa'i, te puru i a rāua mo aña o nei nu'u i tā'ana me'e nō era i haña.

Te huru o te nu'u 'i te nā mahana hope'a era

3 E 'ite tako'a koe: 'i te nā mahana hope'a ena e ai rō te mahana taparahi-ta'ata. ² He 'ino te tañata, he haña ki te moni nō, he haka me'e i a rāua, he mana'u i a rāua mau nō te tano, he vānaña ta'e tano mo te 'Atua, e ko ha'atura ki te rāua matu'a, e ko 'ite mo māuru-uru 'e 'ina tako'a e ko mo'a i te hāpī o te 'Atua. ³ E ko haka 'aroha 'e e ko haña ki te rua tañata. He riro nu'u ha'a'ino, ta'e hāito i te me'e kī 'e i te me'e aña, tōtōā i te rua 'e ta'e haña ki te me'e tano. ⁴ E riro tako'a rō a rāua he tañata ho'o i te rua, aña i te me'e 'ina he mana'u hia, 'e haka paka i a rāua. 'E te me'e mau nō ka kimi era he reka, ta'e he 'Atua. ⁵ E haka tu'u rō i a rāua pa he tañata mo'a 'e ha'atura ki te 'Atua; 'e,

hai haka tere iŋa o rāua, ka take'a era 'ina mau 'ā he ha'atura.

'Ina e tahi a'a me'e mo aŋa 'i muri i te nu'u tu'u pē rā, e Timoteo ē. ⁶ O rāua, pa'i, te nu'u oho ki hare era ki hare era 'e hai reo-reo e rava'a ena mo haka tere i te ŋā vi'e 'ina he pūai o te mana'u, 'amo me'e rahi hara, 'e pohe ki te me'e ta'e tano. ⁷ He haka roŋo nō te aŋa o te ŋā vi'e nei ki nu'u era ki nu'u era, 'e 'ina he aŋi-aŋi, ki te hora hope'a, 'i hē mau te hāpī parauti'a o te 'Atua. ⁸ Te nu'u hāpī era i te ŋā vi'e hai reo-reo he nu'u mana'u ta'e tano, haka tapa i te rāua mana'u mai ruŋa i te 'Atua. Pa he ta'e haka roŋo iŋa era 'ā o Hane ararua ko Hampere ki a [Mōtē] te ta'e haka roŋo o rā nu'u i te hāpī parauti'a o te 'Atua. ⁹ Te nu'u nei e ko rava'a mo haka roŋo mo oho nō e te nu'u ki a rāua ka 'ite rō ena e te ta'ato'a pē nei ē: he nu'u ma'a-ma'a. He me'e nei te me'e i topa tako'a ki a Hane ararua ko Hampere.

He hatu iŋa ki a Timoteo

¹⁰ E a koe, e Timoteo ē, ko 'ite riva-riva 'ana i tā'aku me'e hāpī, i te huru o tō'oku noho iŋa, i tā'aku me'e haŋa mo aŋa, i tō'oku haka moe iŋa i te mana'u 'i ruŋa i a Ietū, i tō'oku haumārū, i tō'oku haŋa ki te rua 'e i tō'oku ha'aoroma'i iŋa i te 'ati hai pūai ¹¹ e tute mai era i a au mo tōtōā 'i te ŋā kona era ko Antiokia, ko Īkōnio 'e ko Rītara. ¶Me'e huru kē te rahi o te 'ati a au i ha'aoroma'i ai! 'E o te 'Atua au i hā'ū'ū mai mo e'a mai roto i rā ŋā 'ati. ¹² 'I a au he kī atu: te nu'u ta'ato'a [haka moe i te mana'u] 'i ruŋa i a Ietū Kiritō, haŋa mo riro o rāua he nu'u mo'a 'e ha'atura ki a ia, e 'ite: he tute i a rāua e te nu'u ta'e haŋa ki te 'Atua mo tōtōā. ¹³ 'E te ŋāŋata aŋa i te me'e ta'e tano 'e te nu'u haka tu'u i a rāua pa he nu'u haka moe i te mana'u 'i ruŋa i a Ietū pe te 'ata ta'e riva-riva ka oho ena; te aŋa he reo-reo he oho nō ki te taŋata 'e, 'ina he aŋi-aŋi, e reo-reo tako'a rō 'ana ki a rāua.

¹⁴ 'E a koe, e ma'u hio-hio te ŋā me'e hāpī atu era. Ko 'ite 'ana, pa'i, e koe he parauti'a 'e 'a 'ai i hāpī atu.

¹⁵ Mai tu'u 'iti-'iti haŋa 'ā i 'ite rō ai a koe i te me'e o ruŋa i te [Pāpa'i Mo'a], he me'e haka 'ite 'e haka aŋi-aŋi atu pē nei ē: mo e'a mai roto i te ūtu'a o te hara e haka moe i te mana'u 'i ruŋa i a Ietū Kiritō. ¹⁶ Te me'e ta'ato'a kī 'i ruŋa i te Pāpa'i Mo'a he me'e haka 'ite mai e te 'Atua. Tō'ona hauha'a: he hāpī mai, he ture mai, he haka tī-tika mai i te mana'u 'e he hāpī mai i te noho iŋa tano ki te mata o te 'Atua, ¹⁷ ki ai ai te nu'u aŋa ki a ia e tano riva-riva rō 'ana mo aŋa rauhuru me'e riva-riva haŋa 'ā'ana.

4 'I mu'a o te 'Atua 'e o Ietū Kiritō, kope ka oho mai ena pa he 'Ariki nui-nui mo haka ūtu'a i te nu'u ora 'e i te nu'u mate, ka kī atu ena a au: ² e haka 'ite e oho koe, e Timoteo ē, i te roŋo o te 'Atua, ka haŋa 'e ka ta'e haŋa e te nu'u mo haka roŋo atu. Hai haumārū ana hāpī 'e ana haka 'ite i te rāua hape, ana ture, 'e ana haka haŋu i te rāua mana'u. ³ Nā e tu'u rō te mahana e ko haŋa haka 'ou te taŋata ki te hāpī parauti'a. Te me'e ka aŋa era he kimi i te ma'ori hāpī i te me'e

haŋa nō o rāua mo haka roŋo, ⁴ he hāru i hai tua'ivi i te parauti'a, 'e he haka roŋo ki te rauhuru nō atu 'a'amu. ⁵ 'E a koe, e 'ite i te hāito i ta'a me'e kī 'e i ta'a me'e aŋa, e ha'aoroma'i hai pūai i te 'ati, e haka 'ite e oho i te [roŋo riva-riva o ruŋa i a Ietū Kiritō], 'e e aŋa riva-riva ta'a aŋa.

⁶ E Timoteo, ko hāhine 'ana a au mo mate; ko tu'u 'ana a au 'i te hora nei pa he tūtia mo te 'Atua. ⁷ Ko va'ai tahi 'ana a au i a au mo tāvini ki te 'Atua, pa he va'ai iŋa o te va'ehau i a ia ki te mate 'i te hora o te tama'i, 'e pa he kope 'ā'ati, ko tu'u 'ana a au ki te hope'a. 'Ina kai haka tapa, ki te hora hope'a, mai te hāpī parauti'a o te 'Atua. ⁸ Te me'e toe nō he va'ai mai i tō'oku hei, hei va'ai ki te nu'u aŋa i te me'e tī-tika ki te mata o te 'Atua ka va'ai mai ena 'i te mahana o te ture hope'a e Ietū Kiritō, kope ture hai parauti'a i te hape o te taŋata. 'E ta'e ki a au nō ka va'ai mai ena, ki te nu'u ta'ato'a tiaki hai māhatu ki tō'ona hoki iŋa mai.

He parau 'āpī

⁹ E Timoteo, ka u'i te rāve'a mo hōrou ō'ou mo oho mai. ¹⁰ A Rema, 'i te haŋa rahi ki te me'e o te ao nei, ko hoa 'ana i a au 'e ko oho 'ana ki Tētārōnika. A Keretene 'ai Karatia, 'e a Tito 'i Raramatia. ¹¹ Ko Ruka mau nō te me'e 'i muri i a au.

E u'i e kimi mai a Marko 'e 'ai ka ma'u rō mai 'i muri i a koe mo hā'ū'ū mai 'i tā'aku aŋa. ¹² A Tīkiko ko haka ūtu'a 'ana e au ki Ēfeto.

¹³ Ki oho mai koe, e ma'u mai te paratoa haka rē e au ki a Karapō 'i Toroare. E ma'u tako'a mai te puka, 'e te me'e mo ta'e rehu i a koe he puka aŋa era hai kiri.

¹⁴ A Arehantaro, taŋata aŋa 'aurī era, ko aŋa mai 'ana i te me'e ta'e tano ki a au; mo te 'Atua e haka ūtu'a i a ia. ¹⁵ E hāpa'o koe e ia; 'ina, pa'i, he haŋa ki te roŋo haka 'ite e tātou.

¹⁶ 'I te mahana ma'u ra'e era i a au mo ture 'i mu'a o te nu'u ra-rahi o te rōmano, 'ina e tahi kope i mata'ite mō'oku; ta'ato'a nō i hoa ai i a au. Pē hiva 'ana te 'Atua ana ta'e tapa atu, 'o haka ūtu'a i a rāua. ¹⁷ 'Ā'ana mau nō i hā'ū'ū mai 'e i va'ai mai i te pūai mo haka 'ite ō'oku i te roŋo riva-riva o ruŋa o Ietū Kiritō, 'e, tako'a, mo haka roŋo tahi mai o te nu'u ta'e he hūrio. Pē ira te 'Atua i to'o ai i a au mai roto i te haha o te reone, ¹⁸ 'e pē ira tako'a 'ā ka haka e'a ena i a au mai roto i te 'ati ta'ato'a 'e ka ma'u ena i a au ki te raŋi ki te ao haka tere e ia. ¶Ki ha'ahana-hana tahi tātou ki a ia 'ātā ki te hope'a ra'a! ['Āmene].

He 'aroha

¹⁹ Ka 'aroha ki a Pirika ararua ko 'Ākira, pē ira 'ā ki a 'Onetiforo 'e ki tō'ona hua'ai.

²⁰ A Erato ko noho 'ana 'i Kōrinto, 'e a Torofimo, 'i te māui-ui, ko haka rē 'ana e au 'i Mīreto.

²¹ E Timoteo, e hōrou mai koe mai ta'e tu'u mai te toŋa. A Euvuro, a Purenete, a Rino, a Karauria 'e te taina ta'ato'a 'i e 'aroha atu ena.

²² Ka ai i a koe te hā'ū'ū o te tātou Pū'oko Haka Tere ko Ietū Kiritō, 'e te riva rahi o te 'Atua 'i ruņa i a kōrua ta'ato'a.

TITO

A Tito he hokorua haka 'ou e tahi o te [ʻāpōtoro] era ko Pauro. Te me'e ta'ato'a o ruŋa i a ia mai ruŋa i te parau nei i 'ite mai ai 'e, tako'a, mai ruŋa i te tētahi puka (2 Kōrinto 2.13; 7.6–16; 8.23; Karatia 2.1–3). E hā'aki ena 'i ruŋa nei: a Pauro i haka rē ai i a Tito 'i te motu era ko Kereta mo hā'ū'ū i te nūna'a [kiritiano] ta'ato'a o rā motu mo to'o i te rāua pū'oko haka tere. He haka 'ite ki a Tito pē hē te huru o te kope mo pū'oko haka tere (1.5). Te me'e i haka 'ite e Pauro ki a Tito ko te me'e haka 'ite era 'ana ki a Timoteo: e tano te noho iŋa o te nu'u 'āpī 'e o te nu'u pa'ari ki te mata o te 'Atua (2.1–7). Te nu'u 'ekaravo e aŋa riva-riva i te rāua aŋa 'e e ha'atura ki te kope haka aŋa i a rāua (2.9–10). 'E te nu'u ta'ato'a haka moe i te rāua mana'u 'i ruŋa i a Ietū e ha'atura ki te nu'u pū'oko haka tere henua 'e ki te nu'u ra-rahi o te kāiŋa (3.1). Mo haka oti i te parau nei he 'aroha a Pauro ki a Tito 'e he 'aroha tako'a hai 'iŋoa o te taina o muri i a ia. 'E he ani mo 'aroha ki te taina ta'ato'a o rāua 'i Kereta (3.15).

He 'aroha

1 ¹⁴A au, a Pauro, he 'aroha atu ki a koe, e Tito ē. A koe pa he poki mau 'ā 'ā'aku 'o tu'u [haka moe i te mana'u] 'i ruŋa i a Ietū pē au. Ka ai 'i ruŋa i a koe te riva rahi 'e te haumārū o te 'Atua, he Matu'a o tātou, 'e o Ietū Kiritō, kope haka e'a i a tātou mai roto i te ūtu'a o te hara 'e va'ai mai i te ora 'āpī 'ina he hope'a ra'a.

E Tito, ko 'ite riva-riva 'ana e koe: a au he tāvini o te 'Atua, 'e he [ʻāpōtoro] 'a Ietū Kiritō, kope uŋa mai i a au ki te nu'u ha'ata'a e te 'Atua mā'ana, mo haka pūai i te rāua haka moe iŋa i te mana'u 'i ruŋa i a ia, 'e mo 'ata haka aŋi-aŋi ki a rāua i te roŋo parauti'a o ruŋa i te [Kiritō], he roŋo hā'ū'ū i te taŋata mo riro o te rāua noho iŋa noho iŋa tano ki te mata o te 'Atua, ki aŋi-aŋi riva-riva ai pē nei ē: e ai rō i a rāua te ora 'āpī 'ina he hope'a ra'a va'ai e te 'Atua. 'I ra'e, pa'i, ki te aŋa i te ao, i hōrea rō ai e te 'Atua i te ora 'āpī nei, 'e a ia 'Atua haka tano i tā'ana me'e kī. 'I te hora tano kī e te 'Atua i haka 'ite ai ki te taŋata o ruŋa i te ora 'āpī nei hai [roŋo riva-riva o ruŋa i a Ietū Kiritō], he roŋo haka 'ite oho e au uŋa mai e te 'Atua, kope to'o i a tātou mai roto i te ūtu'a o te hara.

Te nu'u mo pū'oko haka tere

⁵E haŋu, i haka rē ai a au i a koe 'i te motu ena ko Kereta mo haka tī-tika ō'ou i te me'e toe mo aŋa o nā, 'e mo u'i tako'a ō'ou hai nŋaŋata mo pū'oko haka tere o te nŋa nūna'a ena e haka moe ena i te mana'u 'i ruŋa i a Ietū o te kona ta'ato'a o Kereta, pa he me'e kī atu era e au.

⁶Te kope mo pū'oko haka tere he kope 'ina ō'ona hape; he kope kai oho ki te rua vi'e 'i tō'ona hāipo-ipo. Tā'ana nŋa poki e haka moe rō 'ana i te mana'u 'i ruŋa i a Ietū, 'e 'ina rāua hape mo tuhi iŋa e te nu'u pē nei ē: a rāua 'ō he nŋa poki aŋa i te me'e ta'e tano, pū'oko hio-hio 'e ta'e haka roŋo. ⁷Te pū'oko haka tere, pa'i, o te nūna'a taŋata haka moe i te mana'u 'i ruŋa i a Ietū

e aŋa 'ā i te aŋa o te 'Atua. 'O ira 'ina ko ai te hape. 'I-na ko ai he kope pū'oko hio-hio, riri-riri taŋaŋa, ta'ero 'ava, rava moto, 'e nou-nou moni. ⁸E ai he taŋata haŋa mo to'o 'e mo hāpa'o i te nu'u tu'u ki tō'ona hare, he taŋata aŋa i te me'e riva-riva mo te rua, haka topa riva-riva i te mana'u 'e aŋa i te me'e tī-tika, he taŋata māhatu ma'itaki, 'ite mo hāito i tā'ana me'e kī 'e i tā'ana me'e aŋa. ⁹Te kope nei e haka hio-hio i te mana'u ki te roŋo parauti'a o te 'Atua hāpī ki a ia, ki tano ai mo haka haŋu i te mana'u o te tētahi taŋata hai rā roŋo 'e mo haka take'a ki te nu'u ta'e haŋa ki te roŋo parauti'a he aha te hape o te rāua mana'u.

Te nu'u hāpī i te me'e ta'e tano

¹⁰Te tumu o tā'aku vānaŋa ta'ato'a nei, e Tito ē: rahi ri'a-ri'a te nu'u o roto i te nūna'a taŋata haka moe i te mana'u 'i ruŋa i a Ietū 'ina he haŋa haka 'ou mo haka roŋo 'e mo ha'atura ki te roŋo parauti'a. 'I roto i a rāua e ai rō 'ana te [hūrio] e ma'u nō 'ā i te [haka tere iŋa era 'a Mōtē], 'e e hāpī rō 'ā ki te nu'u pē nei ē: 'āmui ki te haka moe i te mana'u 'i ruŋa i a Ietū e hore tako'a te kiri o te kinona. Te me'e nei ta'e he parauti'a 'e 'ina e tahi hauha'a. Ka ai atu pē ira, me'e rahi nu'u e haka roŋo rō 'ā ki a rāua. ¹¹Te me'e haŋa he 'api i te haha o te nu'u era; ko rahi 'ā, pa'i, te hua'ai huri o te mana'u 'i te hape o te rāua hāpī. Te me'e haŋa o te nu'u pē rā he huhu i te kete o te rua.

¹²O te perofeta mau 'ā e tahi o Kereta i kī:

«Te nu'u o Kereta nu'u reo-reo,
nu'u manu, rava kai 'e hupe-hupe».

¹³'E he parauti'a. 'O ira, e haka pūai koe ana ture, ki tano ai te rāua haka moe iŋa i te mana'u 'i ruŋa i te 'Atua, ¹⁴'o haka roŋo rō ki te 'a'amu reo-reo o te tētahi [hūrio] 'e 'o ha'atura rō ki te me'e kī e te nu'u 'ina he haŋa ki te roŋo parauti'a.

¹⁵Mo te nu'u mana'u ma'itaki, ta'ato'a me'e me'e ma'itaki; 'e mo te nu'u mana'u ta'e ma'itaki 'e ta'e

haŋa mo haka moe i te mana'u 'i ruŋa i a Ietū, ta'ato'a me'e me'e ta'e ma'itaki, 'o te ai te rāua mana'u man-a'u rake-rake 'e 'ina he aŋi-aŋi haka 'ou he aha te me'e riva-riva 'e he aha te me'e rake-rake. ¹⁶ Pē nei e kī ena: e māhani rō 'ā a rāua ki te 'Atua, 'e hai me'e aŋa e take'a ena 'ina kai māhani. A rāua, pa'i, he nu'u taparahi-ta'ata, ta'e haka roŋo ki te 'Atua. 'O ira e ko tano mo aŋa i te me'e riva-riva ki te mata o te 'Atua.

Te me'e mo hāpī e Tito

2 'E a koe, e Tito ē, ana hāpī i te nu'u taina, e haka tano ki te hāpī parauti'a o te 'Atua. ² E hāpī ki te ŋāŋata pa'ari mo hāito i te rāua me'e kī 'e i te rāua me'e aŋa, mo haka tere i a rāua hai me'e tano ki mo'a ai i a rāua e te taŋata, mo haka topa riva-riva i te man-a'u, mo haŋa ki te rua hai māhatu, mo haka hio-hio i te rāua mana'u ki te roŋo parauti'a o te 'Atua, 'e mo ha'aoroma'i i te 'ati hai pūai.

³ 'E ki te ŋā vi'e pa'ari e hāpī mo haka tere i a rāua hai mo'a 'e hai ha'atura ki te 'Atua, 'e mo ta'e ai he ŋā vi'e ha'a'ino 'e ta'ero. E ai he ŋā vi'e hāpī i te me'e riva-riva, ⁴ ki tano ai mo hatu ki te ŋā vi'e 'āpī mo 'ata haŋa ki te rāua kenu 'e ki te rāua ŋā poki, ⁵ mo hāito i te rāua me'e kī 'e i te rāua me'e aŋa, mo hāpa'o i te rāua hakari mo te rāua kenu, mo ma'u riva-riva i te rāua hare, mo hā'ū'ū ki te rua, 'e mo mo'a i te rāua kenu, 'o kī rō e te nu'u i te vānaŋa ta'e tano mo te roŋo o te 'Atua.

⁶ E hāpī ki te ŋāŋata 'āpī tako'a mo hāito i te rāua me'e kī 'e i te rāua me'e aŋa. ⁷ 'E a koe, e Tito ē, e haka tere koe 'i te hora ta'ato'a hai me'e tano, ki take'a ai e te nu'u pē hē a rāua ana haka tere. E hāpī koe ki te taina hai parauti'a, hai pūai o tu'u māhatu, ⁸ 'e hai vānaŋa riva-riva 'e tī-tika, 'o ai te vānaŋa ta'e tano mo kī e te tētahi taŋata mō'ou. Pē ira ka ha'amā ena te nu'u ta'e haŋa ki te hāpī parauti'a o te 'Atua, he ta'e rava'a e rāua e tahi me'e ta'e tano o tātou mo kī.

⁹ E hāpī koe ki te 'ekaravo mo ha'atura ki te taŋata haka aŋa i a rāua. E hāpī tako'a mo riro o rāua he nu'u riva, ta'e pāhono-hono, ¹⁰ 'e ta'e toke ki te hora hope'a, ki take'a ai e te taŋata ta'ato'a i te me'e riva-riva 'e nehe-nehe o te hāpī parauti'a o te 'Atua, kope haka e'a i a tātou mai roto i te ūtu'a o te hara 'e va'ai mai i te ora 'āpī 'ina he hope'a ra'a.

¹¹ Te 'Atua ko haka take'a 'ana i tō'ona riva rahi hai va'ai ki te taŋata ta'ato'a o te ao i te rāve'a mo e'a mai roto i te ūtu'a o te hara 'e mo rava'a i te ora 'āpī 'ina he hope'a ra'a. ¹² 'E hai riva rahi o te 'Atua e ai nei i a tātou i te nu'u [haka moe i te mana'u] 'i ruŋa i a Ietū te haŋa mo haka tapa mai te me'e ta'e tano 'e mai te pohe ki te me'e o te ao mau nō, 'e te haŋa tako'a mo haka tere o tātou 'i te ao nei hai haka topa riva-riva i te mana'u, hai aŋa i te me'e tī-tika ki tō'ona mata, 'e hai mo'a 'e ha'atura ki a ia, ¹³ 'ātā ka tu'u rō mai te me'e nui-nui tiaki e tātou: he hoki iŋa haka 'ou mai o te tā-tou 'Atua pūai ko Ietū Kiritō, kope haka e'a i te taŋata mai roto i te ūtu'a o te hara 'e va'ai mai i te ora 'āpī 'ina he hope'a ra'a. ¹⁴ A Ietū, pa'i, ko va'ai 'ā i a ia ki te

mate mo kore o te pūai o te hara mai ruŋa i a tātou, ki ai ai tātou he nu'u ha'ata'a mā'ana, 'ina e tahi hara, 'e haŋa mo aŋa i te me'e riva-riva ki tō'ona mata.

¹⁵ He me'e nei e au e pāpa'i atu ena te me'e mo hāpī 'e mo kī e koe ki te taina mo aŋa, ki tano ai te rāua mana'u 'e te rāua noho iŋa ki te hāpī parauti'a o te 'Atua. 'E ana hape a rāua, e ture. I a koe, pa'i, te parau; 'e 'ina ko ha'ati'a mo ta'e mo'a atu.

He haka tere iŋa tano mo te kiritiano

3 E Tito, e haka mana'u ki te taina: 'ina ko rehu i a rāua mo ha'atura ki te nu'u pū'oko haka tere henua 'e ki te nu'u ra-rahi, 'e mo riro o rāua he nu'u ko rito era 'ā mo aŋa i te me'e riva-riva, ² nu'u ta'e vānaŋa 'ino mo te rua, ta'e moto, riva, 'e 'ite i te mo'a i te nu'u ta'ato'a.

³ A tātou, 'i ra'e ki te haka moe i te mana'u 'i ruŋa i a Ietū, i ai tako'a rō he taŋata ta'e haka topa riva-riva i te mana'u, haka 'āriŋa, oho a te ara ta'e tano, aŋa i te me'e rake-rake pohe e te hakari 'e rauhuru haka 'ou atu me'e ta'e tano reka mai ki a tātou. E noho era 'i roto i te mākota, 'e 'ina he haŋa ki te tētahi 'e pē ira 'ana te tētahi ki a tātou. ⁴ 'E te 'Atua, kope to'o i a tātou mai roto i te ūtu'a o te hara, i haka take'a rō mai i tō'ona riva 'e i tō'ona haŋa. ⁵ 'E, ka ai atu 'ina e tahi me'e riva-riva o tātou i aŋa, te 'Atua, 'i tō'ona haka 'aroha, ko haka e'a 'ā i a tātou mai roto i te ūtu'a o te hara hai haka ma'itaki i te tātou māhatu 'e hai va'ai mai i te ora 'e 'i te noho iŋa 'āpī hai [Vārua Maitai]. ⁶ Te 'Atua, i va'ai mai ai i te Vārua Maitai hai Ietū Kiritō, kope haka e'a i a tātou mai roto i te ūtu'a o te hara, ⁷ ki aŋi-aŋi riva-riva ai e tātou: pe mu'a ka oho ena e rava'a rō e tātou i te ora 'āpī 'ina he hope'a ra'a va'ai e te 'Atua, pa he hauha'a haka rē e te matu'a mo tā'ana poki. 'E e 'ite nei e tātou i nei me'e 'o te ai, 'i tō'ona riva rahi, i kī ai e te 'Atua: a tātou he nu'u tano ki tō'ona mata.

⁸ He parauti'a te ŋā me'e kī atu ena e au, 'e te me'e haŋa, 'i te hora nei, he haka aŋi-aŋi riva-riva e koe i nā ŋā me'e ki te nu'u haka moe i te mana'u 'i ruŋa i te 'Atua, ki ai ai o rāua he nu'u aŋa oho i te me'e riva-riva. Te hāpī ena he me'e tano 'e riva-riva mo te ta'ato'a. ⁹ E Tito, 'ina koe ko haka māu'a tu'u hora ki te tātake tahaŋa o ruŋa i te hakaara tupuna 'e o ruŋa i te [haka tere iŋa era 'a Mōtē]; 'ina, pa'i, e tahi me'e riva-riva mo rava'a.

¹⁰ Mo haka topa kē-kē o te kope e tahi i te nu'u haka moe i te mana'u 'i ruŋa i a Ietū, e ture. Ana ta'e haka roŋo atu, e ture haka 'ou. 'E mo ta'e haka roŋo mau atu 'ā, ka haka e'a mai roto i te nu'u ena. ¹¹ Ko 'ite 'ana, pa'i, koe: te kope pē nā, he kope haka tapa i tō'ona mana'u mai ruŋa i te roŋo parauti'a o te 'Atua. 'E hai noho iŋa hara o'ona ka take'a ena pē nei ē: ko hape mau 'ā a ia.

Te me'e hope'a

¹² Ka uŋa atu ena a au i a Ārētema 'o i a Tikiko, e u'i te rāve'a mo oho atu ō'ou ki Nīkōpori u'i mai i a au; e mana'u rō 'ana, pa'i, a au mo noho 'i ira 'i te toŋa.

¹³ E Tito, e hā'ū'ū koe ki a 'Āporo 'e ki a Tena, kope ma'u ture o te rua 'i roto i te hare ture, hai me'e mo te rāua ara.

¹⁴ Te nu'u o tātou e 'ite mo aŋa i te me'e riva-riva 'e mo hā'ū'ū i te rua, ki hauha'a ai te rāua noho iŋa 'i te ao nei.

He 'aroha

¹⁵ Te nu'u ta'ato'a o muri i a au 'ī e 'aroha atu ena. E 'aroha atu koe ki te tātou repahoa haka moe i te rāua mana'u 'i ruŋa i a Ietū.

'E ka ai 'i ruŋa i a kōrua ta'ato'a te riva rahi o te 'Atua.

FIREMONO

Te parau nei i pāpa'i ai e Pauro ki te taŋata [kiritiano] e tahi te 'īŋoa ko Firemono. Hai parau nei e take'a ena pē nei ē: ko 'ite riva-riva 'ana a Pauro i te pāpa'i i te parau 'e pē hē te haka koni iŋa.

'A Firemono e ai rō 'ā te 'ekaravo e tahi te 'īŋoa ko Onetimoro. I tu'u era te mahana, he e'a he tere te 'ekaravo nei. I oho era he māhani i a Pauro 'i roto i te hare ma'u'aurī. He haka 'ite e Pauro o ruŋa i a Ietū Kiritō, 'e he haka moe a Onetimoro i tō'ona mana'u 'i ruŋa i a Ietū (10). He riro ia a Onetimoro he hokorua riva-riva mo te ['āpōtoro] nei ko Pauro (11). Ka ai atu pē ira, te me'e tano mo aŋa o Onetimoro, pa he kiritiano, he hoki ki a Firemono. Te 'ati nō, ko 'ite 'ā a Pauro he haka ūtu'a i a Onetimoro ka hoki era. 'O ira i pāpa'i i ani ai a Pauro ki a Firemono mo haka 'aroha i a Onetimoro 'e mo to'o hai haŋa 'e hai koa. He haka 'ite ki a Firemono pē nei ē: a Onetimoro, 'i te hora nei, ta'e nō he 'ekaravo 'ā'ana, he taina kiritiano tako'a ō'ona 'o te haka moe i tō'ona mana'u 'i ruŋa i a Ietū (15–16).

Te parau nei i pāpa'i ai i haka topa riva-riva i te mana'u. E tano nō, pa'i, a Pauro mo kī ki a Firemono hai 'īŋoa o Ietū Kiritō, mo to'o i a Onetimoro hai haŋa, 'e, ka ai atu pē ira, 'ata hau te haŋa o Pauro mo ani hai māhatu. He no-no'i ia ki a Firemono mo to'o i a Onetimoro hai haŋa mau ena 'ā ō'ona ki te 'Atua (20).

He 'aroha

1 A au, a Pauro, puru 'o te tāvini ki a Ietū Kiritō, 'e a Timoteo, taina o tātou, he 'aroha atu ki a koe, e Firemono ē, hokorua haŋa rahi 'i te aŋa o te 'Atua, ² ki a 'Āpia, vi'e taina o tātou, ki a Arakipo, hokorua tako'a 'i te aŋa o te 'Atua, 'e ki te nūna'a taŋata [haka moe i te mana'u] 'i ruŋa i a Ietū taka-taka 'i tu'u hare. ³ Ka ai 'i ruŋa i a kōrua ta'ato'a te riva rahi 'e te haumārū o te 'Atua, he Matu'a o tātou, 'e o Ietū Kiritō, he Pū'oko Haka Tere o tātou.

He huru riva o Firemono

⁴ I tō'oku pure iŋa paurō te mahana e māuru-uru nei a au ki te 'Atua mō'ou, e Firemono ē. ⁵ Ko ŋaro'a 'ana, pa'i, e au o ruŋa i tu'u haka moe iŋa i te mana'u 'i ruŋa i a Ietū, 'e o ruŋa i te rahi o tu'u haŋa ki te nu'u ta'ato'a ha'ata'a e te 'Atua mā'ana. ⁶ I roto i tā'aku pure e ani nei a au ki te 'Atua mo vānaŋa-naŋa mo oho nō ō'ou ananake ko te tētahi taina o ruŋa i te haka moe iŋa i te mana'u 'i ruŋa i a Ietū, ki 'ata aŋi-aŋi ai koe i te me'e ta'ato'a riva-riva va'ai mai e te 'Atua 'i te me'e era a tātou 'a Ietū Kiritō. ⁷ Ko koa 'ana a au 'e ko 'ata ai 'ana tō'oku haŋu, e Firemono ē, 'i te ai o tu'u haŋa ki te nu'u ha'ata'a e te 'Atua mā'ana, 'i te me'e era e haka koa rō 'ana koe i te rāua māhatu.

He ani iŋa mo Onetimoro

⁸ E Firemono, e tano nō a au mo kī atu hai 'īŋoa o Ietū Kiritō, he aha ta'a me'e mo aŋa, ⁹ 'e 'ina a au kai haŋa mo aŋa pē ira. 'I te ai o tu'u here mo te taina, te haŋa e no-no'i atu. 'Ī a au, a Pauro, korohu'a, e puru atu ena 'i te hora nei 'o te haka 'ite o ruŋa i a Ietū Kiritō, ¹⁰ he ani atu mo haka 'aroha ō'ou i a Onetimoro. A ia ko tu'u 'ana pa he poki 'ā'aku 'e a au pa he matu'a

ō'ona he haka moe i te mana'u 'i ruŋa i a Ietū 'i te hora haka 'ite e au, 'i roto i te hare ma'u'aurī, o ruŋa i a Ietū.

¹¹ I mu'a 'ana, 'ina e tahi me'e riva-riva mo rava'a e koe mai i a ia; 'e hora nei, e ai rō 'ana te me'e riva-riva mo rava'a e koe 'e pē ira tako'a 'ana e au. ¹² Nā ko haka hoki haka 'ou atu 'ana e au: a ia he māhatu ō'oku. ¹³ I haŋa rō, ho'i, a au mo noho mai ō'ona mo hā'ū'ū mai 'i te hora nei ō'oku 'i roto i te hare ma'u'aurī 'o te haka 'ite i te [roŋo riva-riva o te 'Atua], pa he hā'ū'ū iŋa mai ō'ou 'āhani ko koe te me'e o nei. ¹⁴ 'E kai haŋa a au mo aŋa e tahi me'e 'ina he tano ki tu'u mana'u, 'o tu'u pa he me'e ena ē: i kī atu 'ō e au. Tō'oku haŋa: mā'au 'ā e mana'u.

¹⁵ Koi'ite te ha'ata'a 'iti-'iti ena o Onetimoro mai muri i a koe mo riro mau rō atu 'ai ō'ona 'i te hora nei 'ā'au, ¹⁶ ta'e nō 'ō pa he 'ekaravo, pa he me'e 'ata hau rō atu ki te me'e ena: pa he taina haŋa rahi e tahi o tātou. E haŋa rahi rō 'ana a au ki a Onetimoro, 'e a koe e 'ata haŋa ki a ia, ta'e nō 'ō pa he taŋata, pa he taina tako'a 'i te haka moe iŋa i te mana'u 'i ruŋa i a Ietū.

¹⁷ 'O ira, mo ai he hokorua haŋa rahi mau 'ā tāua 'i te aŋa o te 'Atua, ka to'o haka 'ou atu koe i a ia ki tu'u hare, pa he to'o iŋa ō'ou i a au mo ai ko au nā me'e.

¹⁸ Mo ai ko aŋa atu 'ā i te me'e ta'e tano 'o ko tārahu atu 'ā, mā'aku e 'auhau atu. ¹⁹ Hai rima mau 'ana ō'oku o Pauro e pāpa'i atu ena: mā'aku mau 'ā e 'auhau atu. Ka ai atu pē ira, 'ina ko rehu i a koe e ai rō 'ana tu'u tārahu mō'oku: hai au, pa'i, i rava'a ai e koe i te ora 'āpī 'ina he hope'a ra'a va'ai e te 'Atua.

²⁰ E te taina, ka aŋa koe i tā'aku me'e nei e kī atu ena hai haŋa ena ō'ou ki te 'Atua; ka haka koa mai koe i tō'oku māhatu pa he taina haka moe i te mana'u 'i ruŋa i a Ietū.

²¹ E pāpa'i atu ena 'o te 'ite ō'oku e ha'atura rō mai koe, 'e 'o te 'ite tako'a ō'oku pē nei ē: e hau rō atu ta'a

me'e riva-riva ka aŋa ena ki te me'e no-no'i atu ena e au. ²² E haŋa tako'a rō 'ana a au mo haka riva-riva mai ō'ou e tahi piha mō'oku; ko 'ite riva-riva 'ana, pa'i, e au: te 'Atua he haka roŋo i te kōrua pure 'e he haka rē mai i a au mo oho atu mo u'i i a kōrua.

He 'aroha

²³ 'Ī a Epafara e 'aroha atu ena; a ia he hokorua ō'oku 'i roto i te hare ma'u'aurī 'o te haka 'ite tako'a o ruŋa i

a Ietū Kiritō. ²⁴ 'E, 'ī e 'aroha tako'a atu ena a Marko, a Aritarako, a Rema, 'e a Ruka, nu'u hā'ū'ū mai 'i tā'aku aŋa.

²⁵ Ka ai 'i ruŋa i a kōrua te riva rahi o te tātou Pū'oko Haka Tere ko Ietū Kiritō.

'EVEREO

Te ha'amata iŋa o te puka nei e haka 'ite mai 'ana pē nei ē: mai te ha'amata iŋa o te ao te 'Atua e vānaŋa e oho mai ena o ruŋa i tā'ana me'e mana'u mo aŋa, 'i ra'e hai perofeta 'e, hora nei, hai Ietū Kiritō, Poki 'ā'ana (1.2). 'I ruŋa nei tako'a e haka aŋi-aŋi mai ena: a Ietū 'ata hau rō atu ki te merahi (1.4–2.9), ki a [Mōtē] (3.3–6), ki a [Kosuē] (4.8), ki a [Ārone], ki te [oromatu'a hope'a o te ra-rahi] ta'ato'a (5.1–10; 7.20–8.6), 'e ki te [haka tere iŋa ra'e o te 'Atua ananake ko te taŋata] (8.7–13). A Ietū 'ata hau rō atu tako'a ki te tūtia ta'ato'a, 'i te me'e era ko va'ai 'ā i a ia pa he tūtia mo haka kore o te hara, he tūtia e tahi mau nō mo te hora ta'ato'a; pē ira he tano te 'Atua mo haka kore i te tātou hara (10.12).

Ki oti te haka 'ite mai: 'ata hau rō atu a Ietū ki te ta'ato'a, he haka 'ite tako'a mai pē hē te noho iŋa tano mo te nu'u [kiritiano]. O roto i te me'e ta'ato'a kī mai o ruŋa i te noho iŋa tano, te me'e 'ata hauha'a he haka moe i te mana'u 'i ruŋa i te 'Atua. He 'a'amu mai ia o ruŋa i te ŋāŋata 'e o ruŋa i te ŋā vi'e i haka moe i oho nō i te rāua mana'u 'i ruŋa i te 'Atua, ka ai atu te me'e hōrea e te 'Atua ki a rāua 'ina 'ā i a rāua (11.4–39).

Te vānaŋa o ruŋa i te parau nei, vānaŋa nehe-nehe tano ki te me'e haŋa mo haka 'ite mai, 'e mai te ha'amata iŋa o te puka nei e aŋi-aŋi rō 'ā pē nei ē: te kope era 'ā'ana te me'e nei i pāpa'i, ka ai atu kai 'ite mai ko ai, ko 'ite riva-riva 'ana i te me'e o ruŋa i te [Pāpa'i Mo'a]. 'Ina he rohi-rohi e kī e oho mai ena pē nei ē: hai me'e aŋa era e Ietū mo tātou hora va'ai era i a ia mo mate 'i ruŋa i te tātaurō, 'ina he hauha'a toe o te tūtia o mu'a 'ā aŋa hai 'animare mo haka kore e te 'Atua i te tātou hara (7.27; 9.12,26; 10.10).

I haka oti ai i te parau nei hai 'aroha mo te nu'u ta'ato'a [haka moe i te mana'u] 'i ruŋa i a Ietū, nu'u ha'ata'a e te 'Atua mā'ana (13.24).

Te Poki o te 'Atua

1 'I mu'a 'ā, i rahi rō te mahana 'e hai rauhuru nō atu rāve'a i vānaŋa ai te 'Atua ki te tātou tupuna hai tā'ana ŋā perofeta era. ² 'E hora nei, 'i te ŋā hora hope'a nei, ko vānaŋa mai 'ā hai Poki era 'ā'ana, kope hai ia i aŋa ai i te ao 'e ki a ia i va'ai tahi ai i te parau o te me'e ta'ato'a. ³ Te 'ana-'ana 'e te pūai nui-nui o te 'Atua e take'a ena 'i ruŋa i tā'ana Poki; a ia he 'āriŋa mau 'ā o te 'Atua, 'e 'ā'ana te haka noho i te me'e ta'ato'a o te ao 'i tō'ona kona hai kī mau nō e ia. I tu'u mai era ki te ao nei, he aŋa tahi i tā'ana me'e ta'ato'a mo aŋa mo haka kore e te 'Atua i te tātou hara. I oti tahi era nei aŋa, he hoki ki te raŋi 'e he noho 'i te pā'iŋa mata'u o te 'Atua. ⁴ Hai me'e nei i haka take'a mai ai e te 'Atua i hau rō atu tā'ana Poki ki te merahi. I a ia, pa'i, te tōro'a 'ata hau rō atu ki te tōro'a o te merahi.

Te Poki o te 'Atua i hau rō atu ki te merahi

⁵ Te 'Atua 'ina kai kī ki te merahi pē nei ē:

«He Poki koe 'ā'aku,
'e 'i 'aŋarīnā he haka take'a e au:
a au he Matu'a ō'ou».

'E 'ina kai kī tako'a mo te merahi:

«He ai a au he matu'a mō'ona,
'e a ia mo poki 'ā'aku».

⁶ 'E 'i te rua kona, hora haka 'ite era i tā'ana 'Atariki ki te ao, i kī ai:

«E ha'amuri ki a ia
te merahi ta'ato'a o te 'Atua».

⁷ Te me'e i kī e te 'Atua mo te merahi:

«He ma'uroŋo hōrou pa he tokerau,
'e he tāvini pa he ura ahi ena 'ā».

⁸ 'E ki te Poki i kī ai:

«Tu'u haka tere iŋa, e te 'Atua ē, 'ina he hope'a ra'a,
'e hai tī-tika koe e haka tere ena.

⁹ Ta'a me'e haŋa he me'e riva-riva
'e ta'a me'e ta'e haŋa he me'e ta'e tano;
'o ira a au, tu'u 'Atua, i haka nui-nui ai i a koe,
'e i va'ai atu ai i te koa 'ata hau rō atu ki tu'u ŋā hokoru ena».

¹⁰ E kī tako'a rō 'ana 'i ruŋa i te Pāpa'i Mo'a:

«I te ha'amata iŋa 'ā, e te Pū'oko Haka Tere ē,
i aŋa ai koe i te henua 'e 'ā'au i aŋa tako'a i te raŋi.

¹¹ Te ŋā me'e ena e ŋaro rō,
'e ko koe te me'e ka ta'e ŋaro ena ki te hora hope'a.

Te ŋā me'e ena e pau tahi rō pa he kahu;

¹² je hā-hatu rō e koe pa he hā-hatu iŋa ena i te kahu,
'e e mono rō pa he mono iŋa ena 'ā o te kahu!
'E a koe he noho mau rō 'ai pē nā,

'e 'ina he hope'a ra'a o tu'u ora».

¹³ 'Ina te 'Atua kai kī ki te merahi:

«Ka noho koe i tō'oku pā'īnā mata'u,
'ātā ka haka riro rō a au i te nu'u ta'e haŋa atu he
me'e mo raŋo o tu'u va'e».

¹⁴ Te merahi ta'ato'a, pa'i, he vārua aŋa ki te 'Atua uŋa
mo hā'ū'ū ki te nu'u e'a mai roto i te ūtu'a o te hara 'e
rava'a i te ora 'āpī 'ina he hope'a ra'a va'ai e te 'Atua.

Te hauha'a o te me'e haka 'ite mai era

2 'I te ai he parauti'a te nā me'e ta'ato'a nei, e u'i e
ma'u riva-riva te roŋo ŋaro'a e tātou, 'o haka tapa
mai te ara parauti'a o te 'Atua. ² 'Ina ko rehu: te nu'u
hara 'e ta'e ha'atura ki te [haka tere iŋa 'a Mōtē] haka
'ite mai era e te 'Atua hai merahi era 'ā'ana 'i mu'a 'ā,
e haka ūtu'a era hai ūtu'a tano mo rāua. ³ Mo ai pē ira,
ŋpē hē ia ana ta'e haka ūtu'a i a tātou ana hāruī hai tu-
a'ivi i te rāve'a va'ai mai e te 'Atua mo e'a mai roto i te
ūtu'a o te hara 'e mo rava'a i te ora 'āpī 'ina he hope'a
ra'a? Te me'e nei o te Pū'oko Haka Tere mau nei 'ā o
tātou i haka 'ite ra'e mai. I oho era he haka 'ite tako'a
mai he parauti'a mau 'ā e te nu'u ŋaro'a era i rā me'e
mai i a ia. ⁴ 'E o te 'Atua i haka aŋi-aŋi tako'a mai he
parauti'a mau 'ā hai aŋa i te mana a roto i rā nu'u, 'e
hai va'ai ki a rāua, hai [Vārua Maitai], rauhuru nō atu
me'e mo aŋa i tā'ana aŋa, tano ki tō'ona mana'u.

A Ietū i riro ai he taŋata mo te tātou riva-riva

⁵ Te 'Atua kai va'ai ki te rima o te merahi i te haka
tere iŋa o te ao 'āpī ka oho mai ena, he me'e vānaŋa o
tātou. ⁶ Ki te rima o te taŋata i va'ai ai. Pē nei, pa'i, e kī
ena 'i te kona e tahi o ruŋa i te [Pāpa'i Mo'a]:

«E te 'Atua, ŋhe aha te me'e he taŋata?
ŋHe aha koe e mana'u 'e e hāpa'o ena i a rāua?

⁷ Mo te hora 'iti-'iti e tahi i va'ai rō ki te merahi
i te tōro'a 'ata hau rō atu ki te tōro'a o te taŋata.
I oho era he haka nui-nui haka 'ou i te taŋata
'e he mo'a pa he mo'a iŋa ki te 'ariki,

⁸ 'e he va'ai ki tō'ona rima i te haka tere iŋa o te me'e
ta'ato'a».

Te ha'aaura'a o te kī nei: «ko va'ai 'ana ki tō'ona rima i
te me'e ta'ato'a mo haka tere e ia» ko te me'e nei: 'ina
e tahi me'e o te ao mo ta'e haka tere e ia, ka ai atu 'ina
kai take'a vave mai 'ā. ⁹ 'E, ko 'ite 'ana e tātou: te me'e
nei ko haka tano 'ana 'i ruŋa i a Ietū. I riro era, pa'i, he
taŋata, 'ata hau rō atu te tōro'a o te merahi ki tō'ona
tōro'a «mo te hora 'iti-'iti e tahi», 'e, hora nei, 'o te
va'ai i a ia ki te mate mo tātou 'i te haŋa 'e 'i te riva
rahi o te 'Atua mo tātou, «ko haka nui-nui 'ā 'e ko mo'a
'ā pa he 'ariki».

¹⁰ 'I te haŋa o te 'Atua, kope aŋa 'e hāpa'o i te me'e
ta'ato'a, mo ma'u me'e rahi taŋata ki muri i a ia mo ŋā

poki 'ā'ana, ŋā poki te rāua huru pa he huru mau era
'ā ō'ona, i tano ai mo haka riro i a Ietū, hai 'ati ha'ati'a
e ia mo 'amo, he kope hope'a o te tano mo ma'u i te
taŋata ki a ia. A Ietū, pa'i, he kope haka e'a i te taŋata
mai roto i te ūtu'a o te hara 'e va'ai i te ora 'āpī 'ina he
hope'a ra'a. ¹¹ Te kope 'ā'ana te haka tano i te taŋata ki
te mata o te 'Atua 'e te nu'u haka kore e ia i te hape o
tū Matu'a tahi 'ana a rāua. 'O ira te Poki o te 'Atua e
ta'e ha'amā ena mo kī he taina rāua ō'ona. ¹² I kī rō,
pa'i, e ia 'i ruŋa i te Pāpa'i Mo'a:

«E vānaŋa rō a au o ruŋa i a koe ki tō'oku taina,
'e e hīmene rō atu a au 'i vāeŋa o te nu'u ha'amuri
atu».

¹³ I kī tako'a rō:

«'I ruŋa i a ia a au ka haka noho nei i tō'oku mana'u».

'E, tako'a:

«'Ī a au 'ī a'a ananake ko te ŋā poki va'ai mai era e te
'Atua».

¹⁴ 'I te ai o te ŋā poki o te 'Atua he taŋata e mate nō i
haka riro ai a Ietū i a ia he taŋata, ki mate tako'a ai 'e
ki haka kore ai, hai mate era ō'ona, i te pūai o te kope i
a ia te mate, te aura'a, ko Rukifero. ¹⁵ 'E he haka kore
tako'a i te ri'a-ri'a o te taŋata 'i te mate, he me'e haka
'ekaravo i te taŋata mai te rāua poreko iŋa 'ā. ¹⁶ A ia
ta'e ki te merahi hā'ū'ū i oho mai ai, ki te hakaara o
[Aparahama]. ¹⁷ Mo te me'e nei i haka riro ai i a ia he
taŋata, mo riro ō'ona he [oromatu'a hope'a o te ra-
rahi], māhatu haka 'aroha, ta'e haka rē ki te hora
hope'a i tā'ana me'e aŋa ki te 'Atua, ki 'amo ai e ia i te
ūtu'a o te hara, ki tano ai te 'Atua mo haka rehu i te
hara o te taŋata. ¹⁸ 'E, 'i te ai ko 'amo 'ana a ia i te 'ati
'e ko haka 'atu 'ā i a ia e Rukifero mo hara, e tano ena
a ia, 'i te hora nei, mo hā'ū'ū ki te nu'u haka 'atu e
Rukifero mo hara.

I hau rō atu a Ietū ki a [Mōtē]

3 'O ira, e te taina ē, a kōrua, te nu'u ha'ata'a 'e
haŋa e te 'Atua mo tu'u ki muri i a ia 'i te raŋi, e
mana'u riva-riva o ruŋa i a Ietū, he kope 'i ruŋa i a ia a
tātou e haka moe ena i te mana'u. A ia he kope uŋa
mai e te 'Atua mo [oromatu'a hope'a o te ra-rahi] o tā-
tou. ² 'E 'a Ietū, kope ha'ata'a e te 'Atua mo rā aŋa, i
aŋa tahi rō i te me'e kī e te 'Atua mo aŋa. Pē ira 'ana a
Mōtē, i aŋa tahi rō i te me'e kī e te 'Atua mo aŋa hora
haka tere era e ia i tō'ona taŋata.

³ Ka ai atu pē ira, mo te 'Atua, 'ata hau rō atu a Ietū
ki a Mōtē, pa he oho iŋa ena i hau rō atu te kope
'ā'ana te hare i aŋa, ki rā hare mau 'ā. ⁴ Ta'ato'a hare i
ai rō te taŋata 'ā'ana i aŋa, 'e te me'e ta'ato'a e ai ena
o te 'Atua i aŋa. ⁵ A Mōtē, pa he tāvini o te 'Atua, kai
ta'e aŋa i te me'e ta'ato'a kī e te 'Atua mo aŋa hora ha-
ka tere era e ia i tō'ona taŋata, 'e rā aŋa era 'ā'ana he
ha'aaura'a o te me'e ka haka 'ite era e te 'Atua pe

mu'a ka oho era. ⁶ Pē ira 'ā te [Kiritō], 'ina e ko ta'e aña i te me'e ta'ato'a kī e te 'Atua mo aña. Te me'e topa kē ō'ona, a ia he Poki o te 'Atua, 'e pa he Poki o te 'Atua e haka tere 'e e hāpa'o ena i te nu'u ta'ato'a o te 'Atua, 'e rā nu'u ko tātou ana ma'u hio-hio ana oho nō tātou i te mana'u 'i ruņa i a ia, 'e ana tiaki hai koa i te me'e ta'ato'a hōrea mai e ia.

'Ina ko haka hio-hio te kōrua māhatu

⁷ 'O ira, pa he me'e kī e te [Vārua Maitai] 'i ruņa i te [Pāpa'i Mo'a]:

«Mo ŋaro'a e kōrua 'i 'aņarīnā i te me'e kī atu e te 'Atua,

⁸ 'ina ko haka hio-hio te kōrua mana'u, pa he nu'u era 'i te kona 'one ta'e noho taņata ta'e ha'atura era ki te 'Atua, aña era i te me'e ta'e tano mo u'i 'ātā ki hē te roa ka ha'aoroma'i era e ia.

⁹ 'I ira te kōrua tupuna i haka 'atu mai ai i a au, ka ai atu i take'a rō i te mana aña e au 'i roto i te matahiti e maha 'ahuru.

¹⁰ 'O ira a au i riri ai 'e i kī ai mo te nu'u era:

“Ta'e te rāua māhatu 'i ruņa i a au, 'e 'ina he haņa mo ha'atura mai”.

¹¹ 'E 'i roto i tō'oku riri a au i hōrea ai:

“Ki te hora hope'a 'ina a rāua e ko o'o ki te kona haka riva-riva era e au mo haka ora o rāua”.

¹² E te taina, e u'i 'o ai te kōrua māhatu ta'e tano ta'e [haka moe i te mana'u] 'i ruņa i te 'Atua ora, 'o ha'ata'a rō kōrua mai muri i a ia. ¹³ Te me'e mo aña paurō te mahana mai ora 'ā kōrua, he hatu ki te rua mo haka noho mo oho i te mana'u 'i ruņa i te 'Atua, 'o reo-reo atu e te hara, 'o hio-hio te māhatu, 'o ta'e haņa haka 'ou mo ha'atura ki a ia. ¹⁴ E te taina, mo haka moe mo oho nō tātou i te mana'u 'i ruņa i a Ietū ki te hora hope'a pa he hora ra'e era 'ā, mo tātou tako'a te me'e ta'ato'a 'a Ietū Kiritō.

¹⁵ 'O ira e kī ena:

«Mo ŋaro'a e kōrua 'i 'aņarīnā i te me'e kī atu e te 'Atua,

'ina ko haka hio-hio te kōrua mana'u pa he nu'u ta'e ha'atura era ki a ia».

¹⁶ ¿Ko ai tū nu'u ta'e ha'atura era ki te 'Atua hora ŋaro'a era i tō'ona re'o? He nu'u ta'ato'a haka e'a era e Mōtē mai Ehipto. ¹⁷ ¿Mo kuā ai te 'Atua i riri ai 'i te ŋā matahiti era e maha 'ahuru? Mo te nu'u hara mā-mate era 'i te kona 'one ta'e noho taņata. ¹⁸ 'E ¿ki a ai i kī ai e te 'Atua e ko o'o a rāua ki te kona haka riva-riva e ia mo haka ora? Ki te nu'u ta'e ha'atura era ki a ia. ¹⁹ 'E, he aņi 'ā, 'ina mau 'ā a rāua kai o'o, he ta'e haka moe i te mana'u 'i ruņa i te 'Atua.

4 'E hora nei, hora e ai nō 'ā mo tātou te me'e hōrea mai e te 'Atua pē nei ē: he o'o ki te kona ha-

ka riva-riva e ia mo haka ora, e u'i 'o ta'e rava'a rō mo o'o e tahi o tātou. ² Te roņo riva-riva nei ko haka 'ite mai 'ana ki a tātou 'e pē ira tako'a 'ana ki te tātou tupuna. I hope'a ai kai ai pa he me'e riva-riva mo rāua, he ta'e [haka moe i te mana'u] 'i ruņa i te 'Atua 'e 'i ruņa i tā'ana roņo. ³ 'E a tātou, te nu'u haka moe i te mana'u 'i ruņa i a ia, e o'o rō ki roto i te haka ora o te 'Atua. 'E mo te nu'u ta'e haka moe i te mana'u 'i ruņa i a ia i kī ai e te 'Atua:

«I roto i tō'oku riri a au i hōrea ai:

“Ki te hora hope'a 'ina a rāua e ko o'o ki te kona haka riva-riva era e au mo haka ora o rāua”.

Te haka ora nei o te 'Atua ko haka riva-riva era 'ā mai te aña iņa era ō'ona i te ao. ⁴ 'E 'i ruņa i te [Pāpa'i Mo'a] e kī ena o ruņa i te hitu mahana:

«Te 'Atua i haka ora ai mai tā'ana aña 'i te hitu mahana».

⁵ E kī tako'a rō 'ana pē nei ē:

«'Ina e ko o'o ki tō'oku haka ora nei».

⁶ 'E e ai nō 'ana te nu'u mo o'o ki roto i te haka ora nei; te nu'u 'ite ra'e era, pa'i, o ruņa, 'ina kai o'o he ta'e ha'atura ki te 'Atua. ⁷ 'O ira te 'Atua i va'ai haka 'ou mai ai i te mahana mo o'o ki roto, 'e rā mahana ko 'aņarīnā. I haka 'ite mai ai hai me'e kī e [Tāvita] 'i ruņa i te Pāpa'i Mo'a ko rahi atu 'ā te matahiti mai te noho iņa o rā nu'u 'ite ra'e era, he me'e haka 'ite atu era e au pē nei ē:

«Mo ŋaro'a e kōrua 'i 'aņarīnā i te me'e kī atu e te 'Atua,

'ina ko haka hio-hio te mana'u».

⁸ 'Āhani te haka ora va'ai e [Kosuē] ki te itaraera he haka ora hōrea e te 'Atua mo tō'ona taņata, e ko vānaņa mai ia e te 'Atua o ruņa i te mahana haka 'ou e tahi mo o'o ki roto i tō'ona haka ora. ⁹ Pē ira a tātou e 'ite nei e ai nō 'ana te haka ora haka riva-riva e te 'Atua mo tō'ona taņata. ¹⁰ Te kope o'o ki roto i te haka ora nei, he haka ora mai tā'ana aña, pa he haka ora iņa era o te 'Atua mai tā'ana aña. ¹¹ 'O ira, ki va'ai tahi tātou i a tātou mo o'o ki roto i tō'ona haka ora, 'o ta'e o'o rō e tahi o tātou, pa he nu'u ta'e ha'atura era ki te 'Atua.

¹² Te vānaņa o te 'Atua vānaņa ora 'e vānaņa pūai. 'A-ta hau rō atu 'i te ka'i-ka'i ki te hoe ka'i-ka'i ararua pā'iņa. E o'o ena ki roto nui atu era o te māhatu 'e o te vārua, 'e 'ātā ki te kona hope'a mau era o te mana'u taņata, 'e 'ā'ana te haka 'ite i te mana'u 'e i te me'e haņa mau o te māhatu. ¹³ 'Ina e tahi me'e o te me'e aña e te 'Atua mo ta'e take'a e ia; tō'ona mata 'i ruņa i te me'e ta'ato'a, 'e ki a ia tātou ka kī ena i te tātou me'e i aña.

A Ietū he [oromatu'a] māhatu 'aroha

¹⁴ A Ietū, Poki o te 'Atua, he oromatu'a hope'a o te ra-rahi o tātou 'i te ranjī. 'O ira, e haka moe e oho tātou i te mana'u 'i ruŋa i a ia. ¹⁵ Te tātou oromatu'a hope'a nei o te nui-nui e anjī-anjī rō 'ā i te huru ta'e pūai nei o tātou o te taŋata. 'I mu'a 'ana, pa'i, i haka 'atu tako'a rō i a ia mo hara e Rukifero, pa he haka 'atu iŋa mai nei i a tātou. Te me'e nō, 'ina a ia kai hara ki te hora hope'a. ¹⁶ 'O ira, 'ina tātou ko ri'a-ri'a mo haka hāhine hai pure ki te 'Atua, ki haka 'aroha mai ai i a tātou 'e, 'i tō'ona riva rahi, e hā'ū'ū rō mai 'i te hora o te 'ati.

5 Te [oromatu'a hope'a o te ra-rahi] e to'o ena mo vānaŋa ki te 'Atua mo te ta'ato'a, mo va'ai ki te 'Atua i te me'e ha'ata'a e rāua mā'ana 'e mo aŋa i te tūtia mo te rāua hara. ² Te nā oromatu'a nei he taŋata e ai rō 'ana te hape. 'O ira e 'ite ena mo ha'aoroma'i i te nu'u ta'e 'ite riva-riva i te me'e o te 'Atua oho a te ara kē. ³ 'E 'o ira tako'a, 'i te hora aŋa i te tūtia mo te hara o te taŋata, e aŋa ena i te tūtia mo te rāua hara.

⁴ 'Ina e tahi kope to'o i a ia 'ā mo oromatu'a hope'a o te ra-rahi; o te 'Atua mau nō i va'ai i te aŋa nui-nui era, pa he va'ai iŋa era 'ā ki a [Ārone]. ⁵ Pē ira tako'a 'ana te [Kiritō], ta'e 'ā'ana i ha'ata'a i a ia mo oromatu'a hope'a o te ra-rahi. O te 'Atua i va'ai i te aŋa nui-nui era; 'ā'ana, pa'i, i kī:

«He Poki koe 'ā'aku,
'e 'i 'aŋarīnā he haka take'a e au:
a au he Matu'a ō'ou».

⁶ 'E 'i te rua kona o te [Pāpa'i Mo'a] e kī tako'a ena:

«He oromatu'a koe
'e he noho mau rō 'ai koe
he oromatu'a ki te hora hope'a,
pa he oho iŋa era o [Merekitereke]».

⁷ Hora era o Ietū 'i te ao nei, 'i te 'ite e ai rō 'ā i te 'Atua te pūai mo haka e'a i a ia mai te mate, he pure he ani nō te aŋa hai re'o pūai koia ko taŋi; 'e 'i tō'ona ha'atura, he haka roŋo e te 'Atua. ⁸ A Ietū Kiritō, ka ai atu he Poki o te 'Atua, i 'amo rō i te 'ati o te ao nei pa he taŋata; pē ira i anjī-anjī ai e paŋaha'a rō 'ā mo te taŋata te me'e ena he ha'atura ki te 'Atua. ⁹ 'E 'i te ha'atura ō'ona 'e 'i te aŋa i te me'e ta'ato'a kī e te 'Atua mo aŋa, i riro ai he kope haka e'a i te taŋata mai roto i te ūtu'a o te hara 'e va'ai i te ora 'āpī 'ina he hope'a ra'a mo te nu'u ta'ato'a ha'atura ki a ia. ¹⁰ 'E he kī e te 'Atua he oromatu'a hope'a o te ra-rahi pa he oho iŋa era o Merekitereke.

E mana'u pa'ari 'i te me'e o te 'Atua

¹¹ Me'e rahi nō atu te mātou me'e mo kī atu o ruŋa i a Ietū pa he oromatu'a ra-rahi o tātou, 'e aŋa ri'a-ri'a mo haka anjī-anjī atu he pū'oko hio-hio o kōrua. ¹² A kōrua ko haka moe nō mai era 'ā i te mana'u 'i ruŋa i a Ietū. 'O ira, te tano mau: e hāpī kōrua i te rua. Ka ai

atu pē ira, ko te ai iŋa 'ana kōrua pa he nu'u e hāpī haka 'ou i te me'e ta'e aŋarahi mo anjī-anjī o ruŋa i te 'Atua. E tu'u rō 'ana kōrua pa he nā poki poreko iho 'o-mo-'omo ū ta'e 'ite mo kai i te kai paka-paka. ¹³ Te nā poki poreko iho, pa'i, he ū mau nō te me'e kai. Pē ira te nu'u ta'e mana'u pa'ari mo te me'e o te 'Atua: te hāpī 'ata hōhonu o te 'Atua o ruŋa i te me'e tano 'e i te me'e ta'e tano mo aŋa 'ina he anjī-anjī. ¹⁴ 'E te nu'u pa'ari e tano rō 'ā mo ŋau-ŋau i te kai paka-paka. Pē ira te nu'u mana'u pa'ari mo te me'e o te 'Atua e tano rō 'ana mo anjī-anjī i te hāpī 'ata hōhonu o te 'Atua o ruŋa i te me'e tano 'e i te me'e ta'e tano mo aŋa 'o te ai hai rā me'e e haka tere ena i a rāua.

6 'O ira, e te taina ē, 'ina tātou ko noho mau rō 'ai 'i ruŋa i te hāpī ra'e o ruŋa i te [Kiritō]. Ki 'ata hāpī ki oho tātou 'ātā ka pa'ari rō 'i te me'e o te 'Atua, 'o teka-teka 'o oho nō tātou 'i ruŋa i te hāpī ra'e era pe he hāpī o ruŋa i te huri iŋa o te mana'u ki te 'Atua, o ruŋa i te haka tapa iŋa mai roto i te me'e ta'e tano ma'u ki te mate, o ruŋa i te haka moe iŋa i te mana'u 'i ruŋa i a Ietū, ² o ruŋa i te [papatito], o ruŋa i te haka puā iŋa hai rima ki te pū'oko mo ha'amaitai, o ruŋa i te ora iŋa mai te mate, 'e o ruŋa i te ture hope'a. ³ Te me'e mau o tātou mo aŋa, ana ha'ati'a e te 'Atua, he 'ite he oho o tātou o ruŋa i te hōhonu o tā'ana hāpī.

⁴ Te nu'u haka mā'eha e te 'Atua i te mana'u o ruŋa i te parauti'a anjī-anjī i te riva rahi o te 'Atua, i te pūai o te [Vārua Maitai], ⁵ i te reka 'e i te ora o te vānaŋa o te 'Atua, 'e i te pūai ō'ona ka haka take'a era pe mu'a ka oho ena, ⁶ mo hāru i te 'Atua hai tua'ivi, e ko rava'a haka 'ou mo haka huri i te rāua mana'u ki te 'Atua, he tu'u pa he me'e ena ē: e veō haka 'ou 'ā a rāua i te Poki o te 'Atua 'i ruŋa i te tātaurō, mo haka me'e-me'e haka 'ou e te ta'ato'a.

⁷ Te kope ki a ia e hāpī ena o ruŋa i te 'Atua pa he henua topa rahi e te 'ua. Mo riva-riva o te kai ka hua ena 'i rā henua, he ha'amaitai e te 'Atua. ⁸ 'E mo tupu o te mauku pū-pū 'e te tētahi atu mauku rake-rake, 'ina ia e tahi hauha'a. He tohu e te 'Atua 'e, ka hope'a era, he to'o mai he tutu.

⁹ E te taina haŋa rahi ē, ka ai atu me'e paŋaha'a te mātou me'e kī atu, e 'ite riva-riva rō 'ā e mātou: a kōrua pa he henua hua o te kai riva-riva tano o te nu'u e'a mai roto i te ūtu'a o te hara 'e rava'a i te ora 'āpī 'ina he hope'a ra'a. ¹⁰ Te 'Atua, pa'i, 'Atua aŋa i te me'e tano. 'Ina he rehu i a ia te kōrua me'e riva-riva aŋa 'e te haŋa ena o kōrua mo tō'ona taŋata. Te haŋa ena o kōrua e take'a ena hai hā'ū'ū ki a rāua, he me'e o kōrua e aŋa mai ena.

¹¹ E haŋa rō 'ana a mātou mo aŋa mo oho nō o kōrua pē nā, 'e mo ŋatu mo oho i te kōrua haŋu ki te me'e hōrea atu e te 'Atua 'ātā ka haka tano tahi rō e ia. ¹² 'E 'ina a mātou he haŋa mo hupe-hupe o kōrua. Ka aŋa ka oho nō, pa he me'e aŋa e te nu'u [haka moe i te mana'u] 'i ruŋa i a Ietū ta'e haka rē i a ia ki te hora hope'a. I a rāua te me'e hōrea e te 'Atua.

Te 'Atua e haka tano rō 'ā i tā'ana me'e hōrea

¹³ Hora hōrea era o te 'Atua ki a [Aparahama], hai 'īŋoa mau era 'ā ō'ona i hōrea ai 'o te ai 'ina he rua kope 'ata hau rō atu ki a ia ki hōrea ai hai rā 'īŋoa.

¹⁴ He kī: «'Ī a au he ha'amaitai i a koe 'e he haka rahi i tu'u hakaara ka 'ī ka 'ī». ¹⁵ I tiaki i oho nō a 'Aparahama hai haumārū 'e i haka tano rō e te 'Atua i rā me'e hōrea era ki a ia.

¹⁶ Te taŋata haŋa mo haka aŋi-aŋi ki te nu'u pē nei ē: tā'ana vānaŋa he parauti'a mau 'ā e hōrea ena hai 'īŋoa o te kope 'ata hau rō atu ki a ia, 'e mo aŋa pē ira, 'ina ia he vānaŋa toe mo kī. ¹⁷ Pē ira tako'a 'ana te 'Atua, 'i te haŋa mo haka aŋi-aŋi riva-riva ki te nu'u era i a rāua tā'ana hōrea pē nei ē: e haka tano tahi mau rō a ia i tā'ana me'e kī era, 'e 'ina e tahi o rā nā me'e mo ta'e haka tano, hai hōrea i haka 'ite ai.

¹⁸ Te me'e kī 'e te me'e hōrea e te 'Atua e ko ta'e haka tano; ta'e, pa'i, a ia he reo-reo. Mo tātou mo te nu'u haka hāhine ki te 'Atua mo hāpa'o e ia, te parauti'a nei he me'e haka pūai i te tātou mana'u 'i ruŋa i a ia, mo tiaki mo oho nō o tātou ki te haka tano iŋa ō'ona i tā'ana me'e hōrea mai era. ¹⁹ I te 'ite o tātou i te nā me'e nei, e hio-hio nei te tātou mana'u, pa he haka hio-hio iŋa ena o te pahī e te 'aka, 'e he tu'u pa he me'e: ko o'o 'ā tātou ki te kona era 'i ira te 'Atua 'i te raŋi, pa he o'o iŋa o te [oromatu'a hope'a o te ra-rahi], 'i mu'a 'ā, ki te [Kona 'Ata Mo'a] puru era hai korotina. ²⁰ Ko o'o 'ana a Ietū ki rā kona 'i te raŋi mo mātaki mai i te ara mo tātou, 'e ko riro 'ana a ia he oromatu'a hope'a o te ra-rahi 'ātā ki te hope'a ra'a pē Merekitereke, he oromatu'a o mu'a 'ā.

A Ietū he [oromatu'a] pē Merekitereke 'ā

7 Te taŋata nei ko Merekitereke he 'ariki o te kona era ko Tārema, 'e he oromatu'a o te 'Atua o te raŋi. Hora hoki mai era o [Aparahama] mai te tama'i, rē era ki te 'ariki hoko hā, he piri a Merekitereke 'e he ha'amaitai. ² He va'ai e 'Aparahama e tahi 'apa o te 'apa e ho'e 'ahuru o tā'ana me'e ta'ato'a rava'a 'i te tama'i, he 'apa tano mo va'ai ki te oromatu'a. Te 'īŋoa nei ko Merekitereke e rua ha'aaura'a: e tahi, «he 'ariki tano ki te mata o te 'Atua»; 'e te rua, «he 'ariki o te haumārū»; a ia, pa'i, he 'ariki o te kona era ko Tārema, 'e te aura'a o te 'īŋoa nei he haumārū. ³ 'Ina e tahi me'e 'ite e te nu'u o ruŋa i te matu'a tane 'e o ruŋa i te matu'a vahine 'e o tō'ona tupuna; pē ira 'ā o ruŋa i tō'ona poreko 'e o ruŋa i tō'ona mate. 'O ira e tu'u rō 'ā pa he me'e ena ē: ko te aŋa ko te oho iŋa 'ā a ia i tā'ana aŋa pa he oromatu'a 'ina he hope'a ra'a, pē Ietū, Poki o te 'Atua.

⁴ E haka topa rā kōrua i te mana'u o ruŋa i te hōnui o Merekitereke: 'ātā te tātou tupuna era ko 'Aparahama i va'ai rō ki a ia i te 'apa tano mo va'ai ki te oromatu'a o tā'ana me'e ta'ato'a rava'a era 'i te tama'i. ⁵ Ki te [haka tere iŋa era 'a Mōtē], te oromatu'a haka ara mai i a [Rēvī] e haka 'auhau rō 'ā i te taŋata e tahi 'apa o te 'a-

pa e ho'e 'ahuru o te rāua me'e ta'ato'a, ka ai atu rā nu'u he hua'ai 'e mai i a 'Aparahama tako'a i haka ara ai. ⁶ 'E a Merekitereke, ka ai atu ta'e he hakaara o Rēvī, a 'Aparahama, kope i a ia te hōrea o te 'Atua, i va'ai nō i te 'apa tano mo va'ai ki te oromatu'a o tā'ana me'e ta'ato'a rava'a era. 'E he ha'amaitai e Merekitereke. ⁷ 'E a tātou e 'ite rō 'ana i hau rō atu te kope 'ā'ana te ha'amaitai ki te kope ha'amaitai era.

⁸ 'I te ao nei, te oromatu'a ki a rāua e 'auhau ena e tahi 'apa o te 'apa e ho'e 'ahuru he taŋata e mate nō. 'E 'i ruŋa i te [Pāpa'i Mo'a] e vānaŋa ena o ruŋa i a Merekitereke pa he kope e ora e oho nō 'ā. ⁹ Hora 'auhau era e 'Aparahama ki a Merekitereke pa he mo'a iŋa ki a ia, e tu'u rō 'ana pa he me'e ena ē: i mo'a 'e i 'auhau tako'a rō e te oromatu'a ta'ato'a haka ara mai i a Rēvī, he nu'u ki a rāua e 'auhau ena 'i te hora nei ¹⁰ 'o te ai hora piri era o Merekitereke ki a 'Aparahama, ko ai nō mai era 'ana 'i ruŋa i a 'Aparahama tō'ona hakaara ta'ato'a kai poreko hia 'ā.

He oromatu'a haka ara iŋa kē

¹¹ Ki te [haka tere iŋa 'a Mōtē] va'ai era e te 'Atua ki te itaraera, te oromatu'a mai te hakaara mau nō o Rēvī ana e'a mai. 'Āhani i rava'a e te nā oromatu'a nei mo haka tano i te taŋata ki te mata o te 'Atua hai aŋa o rāua, e ko mono ia e te 'Atua i te nā oromatu'a nei hai oromatu'a kē, oromatu'a pē Merekitereke ta'e o te hakaara o Rēvī pē [Ārone]. ¹² 'E mo mono o te oromatu'a, he mono tako'a ia te haka tere iŋa.

¹³ Te tātou Pū'oko Haka Tere ko Ietū Kiritō, mō'ona e kī ena te nā vānaŋa nei 'i ruŋa i te Pāpa'i Mo'a, ta'e o te hakaara o Rēvī, o te rua hakaara, 'e 'ina he oromatu'a o rā hakaara. ¹⁴ 'E a tātou, pa'i, ko 'ite riva-riva 'ana: mai te hakaara o [Hūrā] te tātou Pū'oko Haka Tere i poreko ai, 'e a Mōtē, hora vānaŋa era o ruŋa i te oromatu'a, 'ina e tahi me'e i kī o ruŋa i te hakaara nei.

¹⁵ Mo mana'u o tātou: a Ietū he oromatu'a o te oho iŋa kē pē Merekitereke, 'e hai ia i mono ai e te 'Atua i te nā oromatu'a ra'e era, he aŋi-aŋi riva-riva ia e tātou pē nei ē: te haka tere iŋa ra'e era ko mono tako'a 'ā.

¹⁶ A Ietū i oromatu'a ai ta'e 'o te haka tano ki te haka tere iŋa era 'a Mōtē pē nei ē: he hakaara o Rēvī; i oromatu'a ai 'o te ai i a ia te pūai o te ora 'ina he hope'a ra'a. ¹⁷ He me'e nei te me'e i kī e te 'Atua o ruŋa i a ia:

«He oromatu'a koe
'e he noho mau rō 'ai koe
he oromatu'a ki te hora hope'a,
pa he oho iŋa era o Merekitereke».

¹⁸ Te 'Atua i haka kore ai i te haka tere iŋa ra'e era, he ta'e hā'ū'ū i te taŋata mo tu'u ki te roa haŋa e ia mo rāua. ¹⁹ Kai rava'a, pa'i, e te haka tere iŋa era 'a Mōtē mo haka tano i te taŋata ki te mata o te 'Atua. 'E hora nei, ko va'ai mai 'ana e te 'Atua i a Ietū mo oromatu'a, 'e hai ia a tātou e hāhine nei ki te 'Atua.

'Ata hau rō atu a Ietū ki te tētahi oromatu'a

²⁰⁻²¹ 'I te hora o'o era o te hakaara o Rēvī mo oromatu'a, 'ina kai hōrea e te 'Atua e tahi me'e ki a rāua. 'E hora o'o era o Ietū mo oromatu'a i hōrea rō e te 'Atua. E kī rō 'ana, pa'i, 'i ruŋa i te Pāpa'i Mo'a:

«Ko hōrea 'ana e te 'Atua
'e 'ina e ko ta'e haka tano:
"He oromatu'a koe
'e he noho mau rō 'ai koe
he oromatu'a ki te hora hope'a"».

²² Hai hōrea nei o ruŋa i a Ietū, e 'ite nei e tātou: hai ia ka haka tano ena te haka tere iŋa 'āpī nei o te 'Atua ananake ko te taŋata, haka tere iŋa 'ata hau rō atu ki te haka tere iŋa ra'e era. ²³ Oromatu'a rahi te oromatu'a o te hakaara o Rēvī, 'e a rāua e ko noho e ko oho mau rō 'ai he oromatu'a 'i te me'e era te taŋata e mate rō 'ā. ²⁴ 'E a Ietū, 'i te ta'e mate, he aŋa he oho mau rō 'ai i tā'ana aŋa he oromatu'a. ²⁵ 'O ira a Ietū e riva ena mo haka e'a mau rō mai 'ai i a tātou mai roto i te ūtu'a o te hara 'e mo va'ai mai i te ora 'āpī 'ina he hope'a ra'a ki a tātou ki te nu'u haka hāhine ki te 'Atua hai [haka moe i te mana'u] 'i ruŋa i a ia. A Ietū, pa'i, e ora e oho ena mo ani ki te 'Atua mo tātou.

²⁶ A Ietū he oromatu'a hope'a o te ra-rahi tano mo tātou. Te 'Atua e koa rō 'ana mō'ona. 'Ina, pa'i, ō'ona hara 'o hape mo tuhi iŋa e te rua. Ko ha'ata'a 'ana i a ia mai muri i te nu'u hara 'e ko va'ai 'ana i te tōro'a hope'a o te nui-nui 'i te raŋi. ²⁷ A ia ta'e pe he tētahi ŋā oromatu'a ra-rahi ena, tiŋa'i i te 'animare paurō te mahana mo tūtia ki te 'Atua mo haka ma'itaki i tō'ona hara 'i ra'e, ki tano iho ai mo tūtia i te 'animare ki te 'Atua mo te hara o te ta'ato'a. Ta'e pē ira a Ietū. E tahi mau nō tūtia i aŋa e ia hora va'ai era i a ia mo mate 'i ruŋa i te tātaurō, 'e rā tūtia mo te hora ta'ato'a. ²⁸ 'I te haka tere iŋa era 'a Mōtē te me'e i haka oromatu'a he taŋata hara. 'E hai hōrea aŋa e te 'Atua i mono ai i te haka tere iŋa nei, 'e te me'e i haka oromatu'a mo oromatu'a hope'a o te ra-rahi he Poki era 'ā'ana, he kope 'ina e tahi hape ki te hora hope'a.

A Ietū he [oromatu'a hope'a o te ra-rahi]

8 Te me'e haŋa 'ā'aku mo aŋi-aŋi e kōrua: te tātou oromatu'a hope'a o te ra-rahi ko Ietū Kiritō, 'ai te raŋi e noho rō 'ā 'i te pā'iŋa mata'u o te 'Atua, kona mo te kope hope'a o te hōnui. ² 'I ira a ia e aŋa ena i tā'ana aŋa he oromatu'a 'i mu'a o te 'Atua, he [Kona Mo'a] parauti'a aŋa e te 'Atua mo ha'amuri ki a ia, ta'e 'ō 'i te Kona Mo'a aŋa e te taŋata.

³ Te aŋa o te oromatu'a ta'ato'a he tūtia 'e he va'ai i te me'e mo te 'Atua. 'O ira, e ai tako'a te me'e 'a Ietū Kiritō mo va'ai ki te 'Atua. ⁴ 'Āhāni a ia 'i te ao nei, e ko oromatu'a; e ai rō 'ana, pa'i, te oromatu'a o te ao nei va'ai i te me'e mo te 'Atua, pa he me'e kī e te [haka tere iŋa 'a Mōtē]. ⁵ Te ŋā oromatu'a nei e aŋa ena 'i te kona tu'u pa he kona parauti'a mau era 'i te raŋi. A tā-

tou e 'ite ena i te me'e nei 'o te ai hora oho era o Mōtē mo aŋa i te [Karapā Mo'a] mo ha'amuri ki te 'Atua he kī e te 'Atua: «E u'i e aŋa tahi pa he me'e haka take'a mau atu era 'ā e au 'i ruŋa i te ma'uŋa». ⁶ Te aŋa va'ai era e te 'Atua ki te tātou Oromatu'a hope'a o te ra-rahi i hau rō atu ki te aŋa o te tētahi oromatu'a, 'e pē ira 'ana te [haka tere iŋa 'āpī o te 'Atua ananake ko te taŋata] haka riva-riva e Ietū, ki te haka tere iŋa ra'e era 'o te ai hora aŋa era i te haka tere iŋa 'āpī, te me'e hōrea mai e te 'Atua me'e 'ata nui-nui ki te me'e hōrea mai e ia hora aŋa era i te haka tere iŋa ra'e era.

Te haka tere iŋa ra'e

⁷ 'Āhāni te haka tere iŋa ra'e era o te 'Atua ananake ko te taŋata i hā'ū'ū i te taŋata mo tu'u ki te roa haŋa e ia mo rāua, e ko mono mai ia hai rua haka tere iŋa. ⁸ 'E 'i te take'a e te 'Atua i te hape o te taŋata, i kī ai pē nei ē:

«E tu'u rō te mahana he aŋa e au
'i te haka tere iŋa 'āpī ananake ko tō'oku taŋata ta'a-to'a, he hakaara o Itaraera 'e o Hūrā.

⁹ Te haka tere iŋa nei e ko ai pa he haka tere iŋa va'ai era e au ki te kōrua tupuna,
hora to'o mai era e au a te rima mo haka e'a mai te henua era ko Ehipto;
'e 'i te ta'e ha'atura o rāua ki rā haka tere iŋa, he hāru i e au hai tua'ivi,
i kī ai e te 'Atua.

¹⁰ Te haka tere iŋa 'āpī ka aŋa ena e au ananake ko te itaraera 'i rā mahana, ko te me'e nei:
He ha-ha'o e au i tā'aku roŋo 'i roto i te rāua mana'u,
'e he pāpa'i 'i roto i te rāua māhatu.
He riro a au he 'Atua o rāua,
'e a rāua he taŋata 'ā'aku.

¹¹ 'I rā noho iŋa, ūmo aha atu 'ā a rāua ana hāpī haka 'ou ki te hua'ai 'e ki te nu'u o te henua o ruŋa i a au?
Ta'ato'a nō, pa'i, ka 'ite ena ko ai a au,
mai te kope hope'a o te 'iti-'iti ki te kope hope'a o te nui-nui.

¹² He haka kore e au i te rāua me'e ta'e tano aŋa,
'e he haka rehu i te rāua hara».

¹³ 'I te hora vānaŋa o te 'Atua o ruŋa i te haka tere iŋa 'āpī ananake ko te taŋata, mō'ona te haka tere iŋa ra'e era he me'e tuai; 'e te me'e tuai 'e rū'au, e ko roa he ŋaro rō 'ai.

Te me'e ta'e rava'a e te ŋā tūtia ra'e era

9 'I te haka tere iŋa ra'e era o te 'Atua ananake ko te itaraera e ai rō 'ā te rāua me'e mo aŋa mo ha'amuri ki a ia 'i roto i te [Karapā Mo'a] aŋa era e rāua. ² E rua piha o te karapā nei. 'I roto i te piha ra'e te hakari'i 'e te 'amurama'a 'i ruŋa te haraoa ha'ata'a mo te 'At-

ua. E kī era i te piha nei he [Kona Mo'a]. ³ Te o'o iņa ki te piha nei e puru rō 'ā hai korotina. E ai tako'a rō 'ana te rua korotina puru i te rua piha e kī era he [Kona 'Ata Mo'a]. ⁴ 'I nei piha te [fata] aņa hai piru mo tutu i te me'e mo haka 'eo, 'e te [avahata o te haka tere iņa o te 'Atua ananake ko te taņata], 'avahata viri tahi hai piru. 'I roto i rā 'avahata te toko-toko era o ['Ārone] ko pipi 'ā, te mā'ea pāpa'i era 'i ruņa te roņo o te 'Atua, 'e te poko-poko e tahi aņa hai piru, te me'e o roto he [mānā]. ⁵ 'I ruņa i rā 'avahata e rua me'e tu'u pa he merahi e haka roa-roa rō 'ā te karā a ruņa i te pu'a, he tāpa'o pē nei ē: 'ai ira te 'Atua. † O ruņa i te nģa me'e nei o roto o te karapā he oti 'ā tā'aku me'e mo kī atu.

⁶ Te Karapā Mo'a nei pē ira koia ko tō'ona me'e ta'a-to'a o roto. Paurō te mahana e uru era te oromatu'a ki te piha ra'e era, he Kona Mo'a, ki te rāua aņa. ⁷ 'E, 'i te rua piha, he Kona 'Ata Mo'a, he oromatu'a hope'a o te ra-rahi mau nō te me'e mo uru ki roto e tahi nō mahana 'i te matahiti. E uru era, e ma'u rō 'ā i te toto 'animare mo tūtia ki te 'Atua mo tō'ona hara 'e mo te hara aņa e te taņata mā te ta'e 'ite e rāua. ⁸ Hai nģa piha nei e rua e haņa ena te [Vārua Maitai] mo haka 'ite mai pē nei ē: te ara ki te 'Atua e ko ha-hata ki te taņata mo ai ko te ma'u iņa 'ana i te haka tere iņa ra'e era. ⁹ Te me'e nei e haka 'ite mai 'ā ki a tātou nei pē nei ē: te me'e ta'ato'a va'ai 'e tūtia ki te 'Atua e ko haka kore i te hara o te nu'u ha'amuri ki a ia hai rā haka tere iņa ra'e era ¹⁰ 'o te ai te roņo o rā haka tere iņa he me'e mau nō o te haho, pa he roņo o ruņa i te me'e tano mo kai 'e mo unu, 'e o ruņa i te [haka ma'itaki] iņa. Te nģa me'e nei i hauha'a ai 'ātā ki te hora mono era e te 'Atua hai rua haka tere iņa.

Te me'e i rava'a e Ietū Kiritō hai tūtia i a ia

¹¹ 'E hora nei, ko o'o 'ana te [Kiritō] mo oromatu'a hope'a o te ra-rahi o te me'e riva-riva ta'ato'a e ai ena mo tātou hai tūtia i a ia, 'e e aņa mai ena 'i te Kona 'Ata Mo'a 'ata nui-nui 'e 'ata riva-riva 'i te me'e era ta'e o te taņata i aņa 'e ta'e o te ao nei. ¹² E tahi mau nō o'o iņa o Ietū ki te Kona 'Ata Mo'a parauti'a 'i te raņi mo te hora ta'ato'a, 'e kai ma'u i te toto o te vato-vato 'e o te pua'a mo tūtia ki te 'Atua. I tūtia ai hai toto mau era 'ā o'ona, 'e hai toto era o'ona i rava'a ai mo haka e'a mau rō 'ai i a tātou mai roto i te ūtu'a o te hara 'e mo va'ai mai i te ora 'āpī 'ina he hope'a ra'a.

¹³ Ki te [haka tere iņa 'a Mōtē], e ai rō 'ana te pūai o te toto o te pua'a, o te vato-vato, 'e o te 'eo-'eo o te pua'a taņa vahine tutu 'i ruņa i te fata mo haka ma'itaki a te haho i te nu'u ta'e ma'itaki ana pī-pī a ruņa i a rāua. ¹⁴ 'E mo ai o te pūai o te nģa me'e era mo haka ma'itaki i te taņata, jka mana'u atu ia kōrua pē hē te pūai o te toto o Ietū Kiritō! Hai Vārua Maitai, pa'i, i va'ai ai e Ietū i a ia ki te 'Atua pa he tūtia 'ina e tahi hape. 'E te me'e haka ma'itaki hai toto o'ona he mana'u ta'e tano o tātou o te taņata ma'u i a tātou ki te

mate, ki riva ai tātou mo tāvini ki te 'Atua, tō'ona ora 'i-na he hope'a ra'a.

Te [haka tere iņa 'āpī o te 'Atua ananake ko te taņata]

¹⁵ 'O ira, 'i te haka tere iņa 'āpī nei, a Ietū he kope haka riva-riva i te taņata ki te 'Atua, ki rava'a ai e te nu'u kī e te 'Atua mo taņata 'ā'ana i te me'e ta'ato'a 'ina he hope'a ra'a hōrea e ia mo rāua. A Ietū Kiritō, pa'i, i mate ai mo haka e'a tako'a mai roto i te ūtu'a o te hara i te taņata hara o te haka tere iņa ra'e era.

¹⁶ Mo pāpa'i o te kope e tahi i te parau 'i ruņa e kī ena ki a ai ki a ai ana tuha'a te hauha'a o'ona 'i te hora o tō'ona mate, 'i ra'e ki te tuha'a, e ai e tahi taņata mo mata'ite ko mate mau 'ā a ia. ¹⁷ 'Ina e tahi hauha'a, pa'i, o rā parau mo ai e ora nō 'ā te kope era 'ā'ana i pāpa'i; e mate ki hauha'a iho ai.

¹⁸ Pē ira tako'a te haka tere iņa ra'e era o te 'Atua ananake ko te taņata: e haka hauha'a era hai toto, he mata'ite o te mate. ¹⁹ A Mōtē, i oti era te haka 'ite i te roņo ta'ato'a o te 'Atua ki te taņata, he to'o mai i te huru-huru mea-mea e tahi 'e i te maņa 'iti-'iti o te tumu he 'ītopo, he haka rari 'i roto i te toto o te pua'a ararua ko te vato-vato 'āno'i hai vai, 'e 'ai ka pī-pī a ruņa i te puka o te roņo 'e a ruņa i te taņata ta'ato'a. ²⁰ I oti era he kī: «Hai toto nei e tāpa'o ena e te 'Atua i te haka tere iņa o'ona ananake ko te taņata kī mai era mo ha'atura e tātou». ²¹ I pī-pī tako'a rō e Mōtē hai toto i te Karapā Mo'a era koia ko te me'e ta'ato'a o roto mo ha'amuri ki te 'Atua. ²² Ki te haka tere iņa era 'a Mōtē, te rahi ra'a o te me'e e haka ma'itaki era hai toto. 'E 'i-na e ko haka kore i te hara mo ta'e tehe o te toto. ²³ 'O ira te Karapā Mo'a era 'e te me'e ta'ato'a o roto e haka ma'itaki era hai toto. Te nģa me'e ta'ato'a nei he me'e i aņa nō e te taņata mo tu'u pa he me'e parauti'a era 'i te raņi. 'E te me'e parauti'a mau era e haka ma'itaki hai tūtia 'ata hau rō atu ki te toto o te 'animare.

'I mu'a o te 'Atua a Ietū

²⁴ Te kona o'o era o Ietū ta'e ko te kona aņa era e te taņata mo ha'amuri ki te 'Atua, kona i aņa mo tu'u pa he kona parauti'a era 'i te raņi. Ki te raņi mau 'ana a Ietū i o'o ai, 'e 'ai mu'a o te 'Atua 'i te hora nei e ani 'ana mo te riva-riva o tātou. ²⁵ 'E ta'e i o'o ai mo va'ai mo oho i a ia pa he tūtia te matahiti te matahiti, pa he me'e aņa e te oromatu'a hope'a o te ra-rahi hora uru o rāua ki te Kona 'Ata Mo'a tūtia i te toto o te 'animare. ²⁶ 'Āhani, pa'i, i ai pē ira, ko ai 'ana me'e rahi nō atu mate iņa o Ietū mai te hora aņa era e te 'Atua i te ao. 'E te parauti'a mau, hora nei, he hora hope'a, ko tu'u mai 'ā a ia ki te ao nei 'e ko va'ai 'ā i a ia, mo te hora ta'ato'a, pa he tūtia mo haka kore mau rō 'ai i te pūai o te hara mai ruņa i a tātou. ²⁷ E tahi mau nō mate iņa o tātou o te taņata 'e ki oti ka kī mai ena e te 'Atua i te tano 'e i te ta'e tano o te tātou me'e aņa. ²⁸ Pē ira tako'a a Ietū Kiritō: e tahi mau nō va'ai iņa i a ia mo mate pa he tūtia mo haka kore i te hara o te nu'u. 'E pe mu'a ka oho ena he tu'u haka 'ou mai a Ietū ta'e 'ō

† Te pu'a o te 'avahata he kona 'i ira e pī-pī era te oromatu'a i te toto mo haka kore e te 'Atua i te hara o te taņata.

mo va'ai haka 'ou i a ia pa he tūtia mo te hara o te taŋata, mo va'ai ki te nu'u tiaki ki a ia i te ora 'āpī 'ina he hope'a ra'a.

Te me'e ta'e rava'a e te [haka tere iŋa 'a Mōtē]

10 Hora nei ko anji-anji 'ana e tātou: te haka tere iŋa ena 'a Mōtē he ha'aaura'a nō o ruŋa o te me'e mo oho mai 'e ta'e 'ō ko rā me'e mau era, te au-ra'a, he me'e riva-riva era mo va'ai mai e te 'Atua hai Ietū Kiritō. Te haka tere iŋa ena, pa'i, 'a Mōtē, 'ina e ko haka tano ki te mata o te 'Atua i te nu'u haka hāhine ki a ia aŋa ka matahiti ka matahiti i tū tūtia 'ā. ² 'Āhani e haka tano rō 'ā e te haka tere iŋa era, 'o e haka rehe rō 'ā i te paŋaha'a o te rāua hara, e ko aŋa e ko oho nō ia i te tūtia. ³ Te me'e aŋa e te tūtia era he haka mana'u i te nu'u, paurō te matahiti, o ruŋa i te rāua hara. ⁴ Te toto, pa'i, o te pua'a 'e o te vato-vato e ko haka kore i te hara o te taŋata.

Te va'ai iŋa o Ietū i a ia pa he tūtia

⁵ 'O ira, hora tu'u mai era o Ietū ki te ao nei i kī ai ki te 'Atua:

«'Ina 'ō koe he koa ki te tūtia o te 'animare 'e ki te tētahi atu me'e haka 'ou mo va'ai atu; he hakari ō'oku ta'a me'e i va'ai mai mo tūtia atu.

⁶ Me'e ta'e koa 'ā'au he 'animare tūtia tutu ka oti rō 'e he me'e va'ai atu mo haka kore o te hara.

⁷ 'Ī a au ia 'i a'a mo aŋa i ta'a me'e haŋa, e te 'Atua ē, pa he me'e kī mau era 'ā o ruŋa i a au 'i ruŋa i te pu-ka».

⁸ Te aura'a o te vānaŋa ra'e kī nei e Ietū: te 'Atua 'ina he haŋa 'e he koa 'i te rauhuru me'e va'ai e te taŋata ki a ia, 'i te tūtia o te 'animare 'e 'i te 'animare tūtia tutu ka oti rō mo haka kore o te hara, ka ai atu te rŋā me'e nei he me'e mo aŋa hā'aki 'i ruŋa i te haka tere iŋa era 'a Mōtē. ⁹ 'E te rua vānaŋa era: «'Ī a au 'i a'a mo aŋa i ta'a me'e haŋa». Hai me'e nei e 'ite ena: he haka kore e te 'Atua i te tūtia haŋa tuai era 'e he mono hai me'e 'āpī. ¹⁰ 'O te aŋa e Ietū Kiritō i te me'e haŋa o te 'Atua hora va'ai era, e tahi va'ai iŋa mau nō mo te hora ta'ato'a, i tō'ona hakari mau era 'ā pa he tūtia, i haka kore ai e te 'Atua i te tātou hara 'e i ha'ata'a ai i a tātou mā'ana pa he nu'u 'ina e tahi hara.

¹¹ 'E te aŋa o te [oromatu'a] [hūrio] ta'ato'a he tūtia, paurō te mahana, i tū tūtia 'ā, ka ai atu e ko haka kore, ki te hora hope'a, i te hara o te taŋata e te rŋā tūtia nei. ¹² 'E a Ietū Kiritō i va'ai ai i a ia pa he tūtia mo haka kore o te hara, e tahi nō tūtia iŋa mo te hora ta'ato'a, 'e i oti era he noho 'i te pā'iŋa mata'u o te 'Atua. ¹³ 'Ai ira e tiaki 'ana 'ātā ki te haka riro e te 'Atua i te nu'u ta'e haŋa ki a ia he me'e mo raŋo o tō'ona va'e. ¹⁴ Hai tūtia mau nō era ō'ona e tahi i haka riro ai i te nu'u ha'ata'a e te 'Atua mā'ana he nu'u 'ina e tahi hara ki te hora hope'a. ¹⁵ 'E o te [Vārua Maitai] te haka 'ite mai he parauti'a mau 'ā te me'e nei hai vānaŋa ena e kī ena 'i ruŋa i te [Pāpa'i Mo'a]:

¹⁶ «Te haka tere iŋa 'āpī ka aŋa ena e au ananake ko tō'oku taŋata pe mu'a ka oho ena, ko te me'e nei: He ha-ha'o e au i tā'aku raŋo 'i roto i te rāua māhatu, 'e he pāpa'i 'i roto i te rāua mana'u.

¹⁷ 'Ina a au e ko mana'u haka 'ou ki te rāua hara 'e ki te rāua me'e ta'e tano aŋa».

¹⁸ 'E mo ai ko haka kore 'ā e te 'Atua i te hara, ūmo aha ia ana tūtia haka 'ou mo haka kore i te hara?

E haka hāhine ki te 'Atua hai māhatu

¹⁹ E te taina, hora nei, hai haka moe o tātou i te mana'u 'i ruŋa i te me'e rava'a e Ietū mo tātou hai mate ō'ona 'e hai tehe o tō'ona toto, e tano nei a tātou mo hāhine ki te 'Atua 'ina he ri'a-ri'a, pa he hāhine era o te oromatu'a ra-rahi ki te 'Atua 'i roto i te [Kona 'Ata Mo'a]. ²⁰ 'E pa he puru iŋa era e te korotina i te Kona 'Ata Mo'a, pē ira te hara e puru era i a tātou 'o hāhine ki te 'Atua. 'E hora nei, hai va'ai o Ietū i tō'ona hakari pa he tūtia mo 'amo i te ūtu'a o te hara mo tātou, i mātaki ai i te ara 'āpī mo hāhine o tātou ki te 'Atua, 'e rā ara ko ia. ²¹ 'E ta'e nō 'ō pē ira, a ia he oromatu'a hope'a o te ra-rahi haka tere i te nūna'a taŋata ha'ata'a e te 'Atua mā'ana.

²² 'O ira, e haka hāhine tātou ki te 'Atua hai māhatu, hai haka moe iŋa i te mana'u 'ina he 'aka-'aka 'i ruŋa i a ia, hai mana'u ma'itaki pa he me'e ena: ko pī-pī 'ā e te toto era o Ietū 'e hai hakari ma'itaki pa he me'e ena: ko hopu 'ā hai vai ma'itaki. ²³ E haka hio-hio e oho nō tātou i te mana'u 'i ruŋa i te me'e hōrea mai era e te 'Atua. A ia, pa'i, e ko ta'e aŋa i tā'ana me'e kī. ²⁴ E u'i tātou i te rāve'a mo hā'ū'ū ki a tātou 'ā mo 'ata pūai o te haŋa 'i roto i a tātou i te taina 'e mo aŋa i te me'e riva-riva. ²⁵ 'Ina ko ta'e haka taka-taka tātou mo ha'amuri ki te 'Atua, pa he tētahi nu'u. Te me'e o tātou mo aŋa he 'ata haka hio-hio i te mana'u o te tātou taina 'i te rŋā hora nei; ko 'ite 'ana, pa'i, a tātou ko hāhine mai 'ā te hoki iŋa mai o te tātou Pū'oko Haka Tere ko Ietū Kiritō.

²⁶ Mo hara mo oho nō o tātou ka ai atu ko 'ite 'ana a tātou i te hāpī parauti'a o ruŋa i a Ietū, 'ina ia he rua tūtia mo haka kore i te hara era o tātou. ²⁷ Te me'e toe nō mo tātou he ture taparahi-ta'ata o te 'Atua, 'e he ahi pūai haka ūtu'a i te nu'u hāru i te 'Atua hai tua'ivi.

²⁸ 'I mu'a 'ā, taŋata nō era mo hape ki te haka tere iŋa 'a Mōtē, 'ina he haka 'aroha, he haka ūtu'a hai mate ana ai e rua 'o e toru kope mata'ite ko hape mau 'ā a ia. ²⁹ Mo ai pē ira e haka ūtu'a era i te nu'u ta'e ha'atura ki te haka tere iŋa 'a Mōtē, ka mana'u atu kōrua i te ūtu'a mo te nu'u ta'e haŋa 'e hāru i te Poki o te 'Atua hai tua'ivi, 'e ta'e haka hauha'a i tō'ona toto, toto tāpa'o i te [haka tere iŋa 'āpī o te 'Atua ananake ko te taŋata], haka ma'itaki i a rāua mai te hara 'e ha'ata'a i a rāua mo te 'Atua. Te nu'u aŋa i te me'e pē ira, e parau'ino 'ā ki te Vārua Maitai, kope haka take'a i te riva rahi o te 'Atua. ³⁰ Ko 'ite 'ana a tātou ko kī 'ana e te 'Atua pē nei ē: «'Ī a au te parau mo haka ūtu'a i te

rāua hape 'e mo va'ai i te me'e tano ki te rāua me'e aŋa». 'E i kī tako'a rō: «Mā'aku e u'i i te me'e tano 'e i te me'e ta'e tano o tō'oku taŋata». ³¹ He taparahi-ta'ata e tahi te me'e ena 'i te rima o te 'Atua koe mo haka ūtu'a atu!

³² 'O ira, e mana'u kōrua ki te hora ra'e māhani era ki a Ietū Kiritō. I 'amo i oho nō kōrua hai pūai i te 'ati nui-nui e topa atu era. ³³ Tētahi o kōrua i vā-vā rō 'e i tōtōā rō 'i mu'a o te taŋata, 'e tētahi atu i mamae tako'a rō 'i te 'ati topa ki rā nu'u. ³⁴ I haka 'aroha rō kōrua mo te nu'u puru 'i roto i te hare ma'u'aurī, 'e 'ātā hai koa e haka rē era e kōrua mo to'o e te nu'u i te kōrua hauha'a, he 'ite o kōrua: 'i te raŋi e ai rō 'ā te me'e 'ata hau rō atu e ko pau ki te hora hope'a.

³⁵ 'Ati nō era mo topa atu e haka noho e oho nō te kōrua mana'u 'i ruŋa i te 'Atua; pē ira i a kōrua te me'e hope'a o te nui-nui pe mu'a ka oho ena. ³⁶ 'E 'ite i te ha'aoroma'i i te 'ati hai pūai mo aŋa i te me'e haŋa o te 'Atua; pē ira tako'a i a kōrua pe mu'a ka oho ena te me'e hōrea mai era e ia. ³⁷ E kī rō 'ana, pa'i, 'i ruŋa i te Pāpa'i Mo'a:

«Nā he tu'u mai te kope era mo oho mai;
e ko roa hia.

³⁸ Te nu'u tano ki tō'oku mata 'i te [haka moe i te mana'u] 'i ruŋa i a au,
he rava'a i te ora 'āpī 'ina he hope'a ra'a.

'E mo haka tapa te mana'u mai ruŋa i a au,
e ko koa a au».

³⁹ Ta'e a tātou o roto i te nu'u haka tapa i te mana'u mai ruŋa i te 'Atua, nu'u te rāua hope'a ra'a he ūtu'a. A tātou o roto i te nu'u e'a mai roto i te ūtu'a o te hara 'e rava'a i te ora 'āpī 'ina he hope'a ra'a va'ai e te 'Atua 'o te haka moe i te tātou mana'u 'i ruŋa i a ia.

Te haka moe iŋa o te mana'u 'i ruŋa i te 'Atua

11 ¿Pē hē e 'ite ena ko haka moe mau 'ana a tātou i te mana'u 'i ruŋa i te 'Atua? Hai 'ite e tātou pē nei ē: he parauti'a mau 'ā e ai rō i a tātou te me'e e tia-ki nei, 'e he parauti'a tako'a mo tātou e ai mau rō 'ā te ŋā me'e ena 'ina e tātou he take'a. ² He haka moe o te tātou tupuna i te rāua mana'u 'i ruŋa i te 'Atua i tano ai ki tō'ona mata.

³ He haka moe o tātou i te mana'u 'i ruŋa i te 'Atua e 'ite nei: hai vānaŋa era 'ā'ana i aŋa ai i te ao. Te me'e ta'ato'a e tātou e take'a ena i aŋa ai mai te me'e ta'e take'a.

⁴ He haka moe o [Āvere] i te mana'u 'i ruŋa i te 'Atua i aŋa ai i te tūtia 'ata hau rō atu ki te tūtia aŋa e tō'ona taina ko [Kāiŋa]. 'O ira te 'Atua i kī ai e tano rō 'ā ki tō'ona mata, 'e he koa mo tā'ana tūtia. 'E hora nei, ka ai atu ko mate 'ana a Āvere, ko te noho iŋa 'ā te ha'aaura'a o'ona: he hauha'a o tō'ona haka moe iŋa era i te mana'u 'i ruŋa i te 'Atua.

⁵ He haka moe o 'Ēnoko i te mana'u 'i ruŋa i te 'Atua i to'o ora ai ki te raŋi, 'e 'ina kai take'a haka 'ou. 'I ruŋa i te [Pāpa'i Mo'a] e kī ena mo 'Ēnoko hora era kai to'o 'ā ki te raŋi: he kope tano ki te mata o te 'Atua. ⁶ 'Ina e tahi taŋata ta'e [haka moe i te mana'u] 'i ruŋa i te 'Atua mo tano ki tō'ona mata. Mo hāhine ki a ia, e ai he parauti'a mau 'ā mō'ou e ai rō 'ā te 'Atua 'e e ai rō 'ana te me'e mo va'ai ki te nu'u kimi i a ia.

⁷ He haka moe o Nōē i te mana'u 'i ruŋa i te 'Atua i aŋa ai i te pahī 'o mate tā'ana hua'ai hora kī era e te 'Atua e topa rō te me'e kai take'a hia 'ā e te mata o te taŋata. 'E 'i tō'ona ha'atura ki te 'Atua i take'a ai: te taŋata ta'ato'a o rā hora e aŋa rō 'ana i te me'e ta'e tano, 'e e tano rō 'ana mo haka ūtu'a e te 'Atua. 'E a Nōē i tano ai ki te mata o te 'Atua 'o te haka moe i tō'ona mana'u 'i ruŋa i a ia.

⁸ He haka moe o [Aparahama] i te mana'u 'i ruŋa i te 'Atua i ha'atura ai, 'e i e'a i oho ai mai tō'ona kāiŋa hora kī era e te 'Atua mo oho ki te henua va'ai mo rāua, ka ai atu 'ina kai 'ite hia ki hē a ia ka oho era. ⁹ 'E he haka moe o'ona i te mana'u 'i ruŋa i te 'Atua, i noho ai pa he taŋata o te rua kona 'i te henua e ai rō mo rāua pe mu'a ka oho era, henua hōrea era e te 'Atua mo va'ai. 'I roto i te karapā e noho era; pē ira 'ana tā'ana poki ko Ita'ata 'e tō'ona makupuna ko Hākovo, i a rāua tako'a rā hōrea era o te 'Atua. ¹⁰ A 'Aparahama i aŋa ai i te me'e nei e tiaki e oho 'ana ki te kona mau era mo noho 'ina he hope'a ra'a, he kona mana'u 'e aŋa e te 'Atua.

¹¹ He haka moe i te mana'u 'i ruŋa i te 'Atua, a Tara, vi'e 'a 'Aparahama, ka ai atu he pa'a 'e ko rū'au riva-riva 'ā, i tupu nō te poki 'o te 'ite e ko ta'e haka tano e te 'Atua i tā'ana me'e hōrea. ¹² Pē ira 'ana a 'Aparahama, ka ai atu ko korohu'a riva-riva 'ana, i rahi nō tō'ona hakaara pa he hetu'u ena 'ā o te raŋi, 'e pa he 'one o te taha-taha tai e ko oti mo tatakū.

¹³ Te nu'u ta'ato'a nei i mā-mate ai e haka moe nō 'ana i te mana'u 'i ruŋa i te 'Atua, ka ai atu 'ina kai ai hia 'ā i a rāua te me'e hōrea era e te 'Atua. A rāua, pa'i, e 'ite rō 'ana: pe mu'a ka oho ena i a rāua rā ŋā me'e ta'ato'a, 'e e koa rō 'ā o ruŋa. 'E e aŋi-aŋi rō 'ana 'e e kī rō 'ana: te ao nei ta'e he kāiŋa mau o rāua. ¹⁴ Te nu'u kī era pē ira e haka 'ite mai 'ana ko te kimi ko te oho iŋa 'ana i te kāiŋa mo rāua. ¹⁵ 'Āhani e mana'u rō 'ā: te rāua kāiŋa mau he kona era mai ira i e'a ai, e ko ta'e hoki ia ki ira. ¹⁶ Te me'e haŋa mau o rāua he kāiŋa 'ata riva-riva, te aura'a, he kāiŋa era 'i te raŋi. 'O ira te 'Atua e ta'e ha'amā ena mo kī he 'Atua a ia o rāua; ko haka riva-riva 'ana, pa'i, e ia i te kona mo rāua mo noho.

¹⁷ He haka moe o 'Aparahama i te mana'u 'i ruŋa i te 'Atua i ma'u ai i tā'ana poki ko Ita'ata mo va'ai pa he tūtia hora haka 'atu era i a ia e te 'Atua. Te haŋa o 'Aparahama he haka tano i te me'e uŋa era mo aŋa, ka ai atu e tahi mau nō 'ā'ana poki 'e ko hōrea 'ana e te 'Atua: ¹⁸ «Hai Ita'ata ka ai ena tu'u hakaara». ¹⁹ He 'ite o 'Aparahama e ko ta'e haka tano e te 'Atua i tā'ana me'e kī, 'e i te 'Atua te pūai mo haka ora i te taŋata mai te mate, i aŋa ai i te me'e kī era e te 'Atua. Mō'ona,

pa'i, he rava'a haka 'ou e ia i rā poki era 'ā'ana mai te mate.

²⁰ He haka moe o Itā'ata i te mana'u 'i ruŋa i te 'Atua i ha'amaitai ai i a [Hākovo] ararua ko [Etaū], he nā poki 'ā'ana, 'o te 'ite: pe mu'a ka oho ena e ai rō te me'e riva-riva o te 'Atua mo rāua.

²¹ He haka moe o Hākovo i te mana'u 'i ruŋa i te 'Atua, hora oho era mo mate, e toŋa rō 'ana hai toko-toko, i ha'amaitai ai i te nā poki 'a [Kōsē] 'e i ha'amuri ai ki te 'Atua.

²² He haka moe o Kōsē i te mana'u 'i ruŋa i te 'Atua i haka 'ite ai ki te itaraera, 'i te hora era he mate, e e'a rō a rāua pe mu'a ka oho ena mai te henua era ko Ehipto, 'e he aha te rāua me'e mo aŋa ki tō'ona hakari.

²³ He haka moe i te mana'u 'i ruŋa i te 'Atua te nā matu'a era o [Mōtē], ka ai atu ko kī 'ā e te 'ariki: te nā poki tane itaraera ta'ato'a e tiŋa'i e haka mate, i na'a nō e toru 'āva'e i te poki nehe-nehe poreko iho era o rāua ko Mōtē.

²⁴ He haka moe o Mōtē i te mana'u 'i ruŋa i te 'Atua i ta'e haŋa haka 'ou ai, ko pa'ari 'ā, mo kī: he poki a ia o te poki vahine o te 'ariki. ²⁵ 'Ata hau rō atu, pa'i, te haŋa mo tōtōā i a ia e te ehipto 'i muri i tō'ona taŋata he itaraera ki te noho ki te oho e koa rō 'ā 'i roto i te hara. ²⁶ Tō'ona mana'u: i hau rō atu mō'ona te 'amo i te 'ati topa 'i ruŋa i te nu'u ŋatu i te haŋu ki te [Mētia] mo uŋa mai e te 'Atua ki te ai i a ia te hauha'a o Ehipto; a ia, pa'i, e tiaki 'ana ki te me'e hope'a o te riva-riva mo va'ai e te 'Atua.

²⁷ He haka moe o Mōtē i te mana'u 'i ruŋa i te 'Atua i e'a i oho ai mai te henua era ko Ehipto 'ina kai ri'a-ri'a 'o riri te 'ariki. He oho mau rō 'ai 'e 'ina kai hāru i haka 'ou a tu'a; e tu'u rō 'ā pa he me'e ena ē: tō'ona mata 'i ruŋa i te 'Atua 'ā. ²⁸ He haka moe o Mōtē i te mana'u 'i ruŋa i te 'Atua i aŋa ai i te [ŋoŋoro o te Pakate], pa he me'e kī e te 'Atua. He uŋa he haka paru hai toto i te 'ō-pani o te hare o te hakaara ta'ato'a o [Itaraera], mo vari roa-roa o te merahi o te mate, 'o tiŋa'i i te nā poki 'atariki tane o te itaraera hora tiŋa'i era i te nā poki 'atariki tane o te ehipto.

²⁹ He haka moe i te mana'u 'i ruŋa i te 'Atua i ha'ere i oho ai te itaraera a vāeŋa tini o Vaikava Mea-mea ki te rua pā'iŋa pa he me'e: e ha'ere 'ana a te ara paka-paka hora 'āvahi era e te 'Atua i te vaikava. 'E i oho era te ehipto 'i tu'a, he emu tahi rō atu 'ai.

³⁰ He haka moe o te itaraera i te mana'u 'i ruŋa i te 'Atua i haka teka i haka vari ai e hitu mahana a te kona era ko Herikō, 'e he marua tahi rō 'ai te 'āua ruŋa nui puru o ira.

³¹ He haka moe i te mana'u 'i ruŋa i te 'Atua te tai'o era ko Rāhava i ta'e mate ai 'i muri i te nu'u ta'ato'a o Herikō ta'e ha'atura ki te 'Atua, 'o te hā'ū'ū ki te ŋāŋa-ta itaraera oho piko u'i i rā kona.

³² He aha tā'aku me'e haka 'ou mo kī atu? 'Ina he hora mo 'a'amu tahi atu o ruŋa i a Kereone, † o Vāraka,

† A KEREONE he pū'oko haka tere e tahi o te itaraera 'i mu'a 'ā. I haka moe rō i tō'ona mana'u 'i ruŋa i te 'Atua 'e i ani rō mo haka 'ite ki a ia he aha te me'e tano mo aŋa. 'I te hora oho 'i mu'a o te va'e-

†† o Tamatona, ‡ o Hefetē, †† o [Tāvita], o [Tamuere] 'e o te perofeta ta'ato'a. ³³ He haka moe i te mana'u 'i ruŋa i te 'Atua te nā nu'u nei 'e te tētahi atu i rē ai i te tama'i 'e i rava'a henua ai, i haka tere ai i te taŋata hai tī-tika, i ai ai i a rāua te me'e hōrea e te 'Atua, i puru ai i te ha-ha o te reone, ³⁴ i tiŋa'i ai i te ahi taparahi-ta'ata, i ta'e mate ai 'i te hoe, i ai ai te pūai ka ai atu 'ina he haŋu o rāua, i riro ai he 'aito o te tama'i 'e i rē ai ki te va'ehau o te rua henua.

³⁵ He haka moe i te mana'u 'i ruŋa i te 'Atua te tētahi nā vi'e i rava'a haka 'ou ai i te rāua hua'ai mai te mate 'e te tētahi nu'u i mā-mate ai i tōtōā he ta'e haŋa mo hāru i te 'Atua hai tua'ivi 'i te tiaki ki te noho iŋa riva-riva 'i te raŋi ki ora haka 'ou rāua mai te mate.

³⁶ Tētahi atu i haka me'e-me'e 'e i tiŋa'i hai 'uaka, 'e 'ātā i here-here hai vivi 'e i puru 'i roto i te hare ma'u'aurī. ³⁷ 'E tētahi i mate ai i tama'i hai mā'ea, i hore hai hia-hia a vāeŋa 'e i 'o-'oka hai hoe. Ki kona era ki e kona era i hā'ere i oho ai e uru rō 'ana i te kahu aŋa hai kiri o te māmo'e 'e o te vato-vato. A rāua nu'u veve, 'amo i te 'ati 'e tōtōā e te rua. ³⁸ A te kona ta'ato'a nō i oho ai: a te kona 'one ta'e noho taŋata 'e a ruŋa i te ma'uŋa; 'e e noho era 'i roto i te 'ana 'e 'i roto i te pū. Te parauti'a, te nu'u hara o te ao nei nu'u ta'e tano mo hokorua i te nu'u tu'u pē nei.

³⁹ Ka ai atu te nu'u ta'ato'a nei e tano rō 'ana ki te mata o te 'Atua 'o te haka moe i te mana'u 'i ruŋa i a ia, kai take'a i te haka tano iŋa o te 'Atua i tā'ana me'e hōrea era i mā-mate rō ai. ⁴⁰ I aŋa ai e te 'Atua pē ira he mana'u ki a tātou 'e ki te me'e 'ata hau rō atu o te riva-riva: 'i te hora ka haka tano ena e ia i tā'ana hōrea, te aura'a, 'i te hora ka ma'u ena i tā'ana nu'u ki te raŋi mo noho 'i muri i a ia, a tātou ta'ato'a ananake ko rā nā nu'u.

He 'ite mo 'amo i te 'ati hai pūai

12 'I te 'ite o tātou e ai rō 'ā me'e rahi nō atu nu'u 'i ra'e ki a tātou [haka moe i te mana'u] 'i ruŋa i te 'Atua 'ātā ki te hope'a, 'e a rāua pa he nu'u haka haŋu mai, e to'o mai ruŋa i a tātou te me'e paŋaha'a ta'ato'a haka tu-tuki mai, 'e i te hara haka hihi-hihi mai mo tu'u o tātou ki te hope'a o te 'ā'ati haka rē mai e te 'Atua, te aura'a, mo tu'u o tātou ki te roa haŋa e ia mo tātou.

² Te tātou mata a ruŋa i a Ietū ana u'i 'o te ai mai i a ia te haka moe iŋa nei o tātou i te mana'u 'i ruŋa i te 'Atua 'e 'ā'ana te haka tī-tika. A ia, pa'i, i ha'aoroma'i rō i tō'ona mate 'i ruŋa i te tātaurō, 'e 'ina kai tapa atu i te ha'amā o te mate iŋa tu'u pē ira 'o te 'ite ki oti te 'ati he koa a ia. 'E hora nei, ko noho 'ā 'i te pā'iŋa mata'u o te 'Atua.

hau ki te tama'i, ka ai atu nu'u ta'e rahi a rāua, i rē nō 'i te hā'ū'ū o te 'Atua. †† A VĀRAKA he pū'oko haka tere haka 'ou e tahi o te itaraera o te noho iŋa tuai era. I tama'i era ki te nu'u ta'e haŋa ki a rāua, ko ia te me'e oho 'i mu'a 'e he rē ki rā nu'u hai hā'ū'ū o te 'Atua. ‡ A TAMATONA i ai tako'a rō he pū'oko haka tere o te itaraera o mu'a 'ā. I haka ai rō e te 'Atua he taŋata hope'a o te haŋu. †† A HEFETĒ he va'ehau 'aito e tahi 'e he pū'oko haka tere o te itaraera 'i mu'a 'ā.

³ E haka topa te tātou mana'u pē hē a Ietū i ha'aoroma'i ai i te me'e ta'ato'a ta'e tano aŋa e te nu'u hara ki a ia; 'o ira 'ina kōrua ko rohi-rohi 'e 'ina ko hōriŋa ⁴ i te hora tōtōā atu e te nu'u hara. A kōrua, pa'i, kai mate pē Ietū 'i te aŋa iŋa mo rē ki te hara. ⁵ ŹKo rehu ko oti 'ana 'ō i a kōrua te me'e hatu atu 'i ruŋa i te [Pāpa'i Mo'a] pē nei ē:

«E haka roŋo koe, e te poki 'ā'aku ē,
ana haka tī-tika atu e te 'Atua,
'e 'ina koe ko hōriŋa ana ture atu.

⁶ Te 'Atua, pa'i, e haka tī-tika rō 'ana i te kope haŋa e ia,
'e va'ai rō 'ana ki te kope to'o mo poki 'ā'ana
i te ūtu'a tano mo tō'ona ta'e ha'atura.»?

⁷ E ha'aoroma'i te 'ati e 'amo mai ena e kōrua, he me'e mo haka tī-tika atu i a kōrua. Te 'Atua, pa'i, e hāpa'o ena i a kōrua pa he nā poki 'ā'ana. ŹE ai mau rō 'ana hō te matu'a ta'e ture ta'e haka tī-tika i tā'ana nā poki? ⁸ 'E mo ta'e ture mo ta'e haka tī-tika e te 'Atua i a kōrua, pa he haka tī-tika iŋa ena i tā'ana nā poki ta'ato'a, ta'e ia kōrua he poki parauti'a 'ā'ana.

⁹ E nā poki nō 'ana a tātou, te matu'a o tātou o te ao nei e ture e haka tī-tika rō mai 'ana, 'e he mo'a e tātou. ŹHe aha ia a tātou ana ta'e haka rē mo haka tere mai i a tātou e te tātou Matu'a o te raŋi, ki riro ai te tātou noho iŋa noho iŋa riva-riva, ha'amaitai e ia?

¹⁰ Te matu'a o tātou o te ao nei, matahiti ta'e rahi nō i ture i haka tī-tika mai ai i a tātou ki te rāua mana'u. 'E te 'Atua e ture e haka tī-tika mai ena mo te tātou riva-riva, mo riro o tātou pē ia 'ā 'ina e tahi hara. ¹¹ 'Ina e tahi ūtu'a au 'i te hora o te haka ūtu'a; te me'e mo ŋaro'a e koe he mamae. Ka ai atu pē ira, mo rava'a ō'ou mo haka tī-tika i tu'u haka tere iŋa hai rā ūtu'a, he rava'a ia e koe te noho iŋa tano 'i roto i te haumārū.

¹² 'O ira, 'ina ko haka hōriŋa haka 'ou ki te 'ati e 'amo mai ena. Ka haka hio-hio ka oho te kōrua mana'u 'i ruŋa i te 'Atua ¹³ 'e ka ha'ere ka oho a roto i te ara tī-tika, ki take'a ai te kōrua haka tere iŋa e te taina ta'e pūai o te rāua mana'u 'i ruŋa i te 'Atua, 'e ki haka hio-hio tako'a ai i te rāua haka moe iŋa i te mana'u 'i ruŋa i te 'Atua.

He hatu iŋa mo 'ara riva-riva o te mata

¹⁴ E u'i kōrua i te rāve'a mo noho hai haumārū ananake ko te taŋata ta'ato'a 'e mo tano te kōrua noho iŋa ki te mata o te 'Atua. 'Ina, pa'i, e tahi kope ta'e tano ki tō'ona mata mo take'a i a ia. ¹⁵ E u'i tako'a 'o hāruai e tahi o kōrua i te riva rahi o te 'Atua hai tua'ivi, 'o tu'u rō pa he tumu hua o te me'e maŋeo. Te kope pē ira he haka tupu i te mana'u ta'e tano 'i roto i te tē-tahi nu'u. ¹⁶ 'Ina e tahi o kōrua mo moe i te vi'e i te taŋata ta'e he vi'e 'o he kenu o kōrua 'e 'ina e tahi mo ta'e mo'a i te me'e o te 'Atua pē [Etaū], kope ho'o i tō'ona tōro'a 'atariki ki te mareti kai. ¹⁷ Ko 'ite 'ana a kōrua pē hē i hope'a ai rā me'e. I haŋa era a Etaū mo

va'ai e tō'ona matu'a tane i te ha'amaitai o te 'atariki, ka ai atu i taŋi rahi rō, kai rava'a i rā me'e haŋa era e ia; 'ina, pa'i, he rāve'a toe mo haka hoki i te me'e a tu'a.

¹⁸ E te taina, kai hāhine tātou ki te 'Atua pa he itaraera 'i mu'a 'ā. I hāhine ai a rāua ki a ia hai me'e e take'a rō 'ā, he ma'uŋa era ko Tinaī, e ura rō 'ā 'i te ahi, e pōhāhā rō 'ā, 'e e hu-hū rō 'ā 'i te tokerau. ¹⁹ 'E kai ŋaro'a e tātou i te puhi iŋa o te koneta 'e i te re'o o te 'Atua pē rāua. I ŋaro'a era e te itaraera i rā re'o, he ani ki a [Mōtē] mo ta'e vānaŋa haka 'ou o te 'Atua ki a rāua, ²⁰ he ri'a-ri'a 'i rā re'o 'e he ri'a-ri'a tako'a 'i te roŋo kī era ki a rāua pē nei ē: «Me'e nō era mo eke ki ruŋa i te ma'uŋa e tiŋa'i e haka mate hai mā'ea ka ai atu he taŋata 'o he 'animare». ²¹ 'I te taparahi-ta'ata o te me'e ŋaro'a 'e take'a era e rāua, he ri'a-ri'a tahi rō atu 'ai, 'e 'ātā i kī rō e Mōtē: «Ko rurū 'ana a au 'i te ri'a-ri'a».

²² 'E te tātou haka hāhine ki te 'Atua ora, e te taina ē, ta'e pē ira. E hāhine nei tātou ki a ia e tu'u rō 'ana pa he me'e: ko uru tī-tika 'ā a tātou ki mu'a ō'ona 'i te ma'uŋa era ko [Tione] 'i Hērutarema o te raŋi, he kona 'i ira e taka-taka ena me'e rahi nō atu merahi e koa rō 'ā, ²³ 'e te nu'u ta'ato'a haka moe i te mana'u 'i ruŋa i a Ietū, nu'u i a rāua te tōro'a o te nā poki 'atariki 'e te rāua 'iŋoa ko pāpa'i 'ana 'i ruŋa i te raŋi, 'e he kona 'i ira a tātou e piri nei ki te 'Atua, kope 'ā'ana te ture i te ta'ato'a; ki te vārua o te nu'u mā-mate ko haka tano ko oti 'ā ki te mata o te 'Atua; ²⁴ ki a Ietū, kope 'ā'ana te haka riva-riva i te taŋata ki te 'Atua 'i te haka tere iŋa 'āpī nei 'ā'ana ananake ko te taŋata; 'e ki te toto haka ma'itaki i a tātou, he toto 'ata hau rō atu ki te toto o [Āvere], toto ani era ki te 'ati kōpeka.

²⁵ E te taina, e u'i kōrua 'o ta'e haka roŋo rō ki te vānaŋa o te 'Atua. Te nu'u o mu'a 'ā hāruai hai tua'ivi ki tā'ana vānaŋa haka 'ite e Mōtē 'i te ao nei 'ina kai ta'e haka ūtu'a e te 'Atua. Pē ira ka topa ena ki a tātou mo ta'e haka roŋo ki te kope 'ā'ana te vānaŋa mai mai te raŋi. ²⁶ 'I te noho iŋa era o Mōtē i haka rurū rō te henua e te re'o o te 'Atua. 'E hora nei, ko kī 'ā e ia: «He haka rurū haka 'ou e au i te henua 'e pē ira tako'a 'ana te raŋi». ²⁷ Te aura'a o tā'ana vānaŋa kī era «he haka rurū haka 'ou»: he haka kore i te me'e ta'ato'a aŋa e ia o te ao nei, ki noho ai te me'e mau era o te raŋi, he me'e mo ta'e ŋaro ki te hora hope'a. ²⁸ 'O ira, ki māuru-uru tātou ki te 'Atua 'o te ai o tātou 'i roto i te nūna'a taŋata haka tere e ia, he me'e e ko ŋaro ki te hora hope'a, 'e ki ha'amuri tātou ki a ia hai māhatu 'e hai mo'a, pa he me'e haŋa e ia. ²⁹ 'Ina ko rehu i a kōrua: te tātou 'Atua pa he ahi haka kore tahi i te me'e ta'e tano.

He huru tano o te [kiritiano]

13 A kōrua he taina [haka moe i te mana'u] 'i ruŋa i a Ietū. 'O ira, e haŋa e oho nō kōrua 'i roto i a kōrua 'ā. ² Nu'u nō era mo tu'u atu ki te kōrua hare e hāpa'o riva-riva, kōi'ite he merahi te me'e ka tu'u atu ena, pa he me'e i topa ki te tētahi nu'u.

³ Ina ko rehu i a kōrua mo hā'ū'ū i te taina puru 'i roto i te hare ma'u'aurī. E hāpa'o kōrua i a rāua pa he me'e haŋa o kōrua mo hāpa'o atu e te rua i a kōrua. Pē ira tako'a i te nu'u tōtōā; e tano nō, pa'i, mo topa tako'a atu te 'ati era ki a kōrua.

⁴ Te [hāipo-ipo] he me'e mo mo'a e te ta'ato'a. Te nu'u hāipo-ipo e 'ite mo mo'a i te rāua hāipo-ipo 'e mo hāpa'o i te rāua hakari mo rāua 'ā. Te 'Atua, pa'i, e haka ūtu'a rō i te nu'u moe i te vi'e i te taŋata ta'e he vi'e ta'e he kenu 'ā'ana 'e i te nu'u tai'ata.

⁵ Ina kōrua ko haŋa rahi ki te moni; e koa mo te me'e ai o kōrua. I kī rō, pa'i, e te 'Atua:

«Ina a au e ko haka rē i a kōrua ki te hora hope'a».

⁶ O ira e tano nō tātou mo kī:

«O te 'Atua te hā'ū'ū mai.

¿He aha ia ana ri'a-ri'a 'i te me'e mo aŋa mai e te taŋata?».

⁷ E mana'u ki te kōrua pū'oko haka tere o mu'a 'ā haka 'ite atu i te vānaŋa o te 'Atua. E haka topa te mana'u ki te me'e riva-riva ta'ato'a poreko o te rāua noho iŋa tano, 'e 'ai kōrua ka haka moe ka oho nō i te mana'u 'i ruŋa i te 'Atua pē rāua.

⁸ E te taina, ko tū mana'u 'ā te mana'u o Ietū Kiritō 'i mu'a 'ā, 'i 'aŋarīnā 'e ki te hora hope'a. ⁹ O ira, 'ina ko haka roŋo 'e 'ina ko ma'u i te hāpī kē, ta'e he hāpī parauti'a haka 'ite atu era. E haka pūai e oho te tātou māhatu hai riva rahi o te 'Atua, 'e ta'e 'ō hai ha'atura o tātou ki te [haka tere iŋa era 'a Mōtē] o ruŋa i te kai, he me'e 'ina e tahi hauha'a mo te nu'u ma'u i rā haka tere iŋa.

¹⁰ Te ha'amaitai o te 'Atua mo tātou mo te nu'u haka moe i te mana'u 'i ruŋa i a Ietū, rava'a e Ietū mo tātou hai mate ō'ona 'i ruŋa i te tātaurō, ta'e mo te nu'u ma'u oho nō i te haka tere iŋa era 'a Mōtē. ¹¹ I te [haka tere iŋa ra'e o te 'Atua ananake ko te taŋata] te [oromatu'a hope'a o te ra-rahi] e ma'u ena i te toto o te 'animare ki roto i te [Kona 'Ata Mo'a], ki haka kore ai e te 'Atua i te rāua hara, 'e te hakari o rā ŋā 'animare tūtia era e tutu ena 'i haho o te rāua kona noho pa he ha'aura'a pē nei ē: te ūtu'a o te hara 'i ruŋa o rā ŋā 'animare. ¹² I te [haka tere iŋa 'āpī o te 'Atua ananake ko te taŋata] e ai rō 'ā te me'e tu'u pē ira. A Ietū, pa'i, i mate ai 'i haho o Hērutarema, 'i ruŋa i a ia te ūtu'a o te 'Atua mo te hara o te taŋata, mo haka riro i a rāua he nu'u ha'ata'a 'e 'ina e tahi hara mo te 'Atua hai toto mau era 'ā ō'ona.

¹³ O ira, e te taina ē, ki e'a tātou ki haho ki a Ietū ki 'amo tako'a i te ha'amā 'amo e ia, te aura'a: 'ina tātou ko ma'u haka 'ou i te me'e o te haka tere iŋa ra'e era o te 'Atua ananake ko te taŋata. Ki haka moe ki oho nō tātou i te mana'u 'i ruŋa i a Ietū, nōatu te nu'u ta'e haka au mai i a tātou 'o te pe'e ki a ia. ¹⁴ Te ao nei, pa'i, ta'e he kāiŋa mau o tātou; e tiaki nō 'ana a tātou ki te kāiŋa 'i te raŋi pe mu'a ka oho ena. ¹⁵ Te me'e mo aŋa mo oho nō o tātou hai Ietū Kiritō he ha'ahana-hana 'e he māuru-uru ki te 'Atua. Te ha'ahana-hana nei he tūtia tano mo va'ai ki a ia e te nu'u kī: a Ietū he Pū'oko Haka Tere o rāua. ¹⁶ E 'ina ko rehu mo aŋa i te me'e riva-riva 'e mo va'ai tako'a ki te rua o te me'e ai o kōrua. Te ŋā me'e nei he tūtia haŋa tako'a o te 'Atua.

¹⁷ E ha'atura ki te pū'oko haka tere o kōrua o te nu'u haka moe i te mana'u 'i ruŋa i a Ietū. E haka rē mo rāua e haka tere atu. O rāua, pa'i, te hāpa'o i a kōrua pa he nu'u 'ite: pe mu'a ka oho ena he haka 'ite e rāua ki te 'Atua pē hē i aŋa ai i te rāua aŋa. Mo haka rē o kōrua i a rāua mo haka tere atu, he koa 'i te rāua aŋa 'e e ko ai he me'e paŋaha'a e tahi mo 'amo. 'E mo ta'e aŋa o kōrua pē ira, e ko ai ia mo te kōrua riva-riva.

¹⁸ E te taina, e pure kōrua mo mātou. E 'ite riva-riva rō 'ana a mātou 'ina e tahi mātou me'e ta'e tano i aŋa 'o te ai te me'e haŋa nō o mātou mo aŋa he me'e riva-riva. ¹⁹ He no-no'i atu a au mo pure mai mō'oku, mo ha'ati'a mai e te 'Atua mo hoki hōrou atu ō'oku ki muri i a kōrua.

He ha'amaitai 'e he 'aroha

²⁰ Mo te 'Atua va'ai i te haumārū, haka ora mai te mate i te tātou Pū'oko Haka Tere ko Ietū Kiritō, kope riva-riva hāpa'o māmoē, tāpa'o i te haka tere iŋa 'ina he hope'a ra'a o te 'Atua ananake ko te taŋata hai toto era ō'ona, ²¹ e haka riro i a kōrua he taŋata riva, tano i te me'e ta'ato'a, mo aŋa i tā'ana me'e haŋa. 'E mā'ana tako'a e aŋa 'i ruŋa i a tātou tā'ana me'e nō era i haŋa hai Ietū Kiritō. ¡Ki ha'ahana-hana tātou ki a Ietū Kiritō 'ātā ki te hope'a ra'a! Ka ai pē ira.

²² E te taina, he ani atu au mo haka roŋo riva-riva kōrua ki tā'aku me'e 'iti-'iti pāpa'i atu ena mo haka pūai i te kōrua mana'u 'i ruŋa i te 'Atua. ²³ Mo 'ite o kōrua: te tātou taina ko Timoteo ko e'a 'ana mai roto i te hare ma'u'aurī. Mo hōrou ō'ona mo tu'u mai, he ma'u atu e au 'i te hora ō'oku ka oho atu ena u'i i a kōrua.

²⁴ E 'aroha atu kōrua ki te kōrua pū'oko haka tere 'e ki te nu'u ta'ato'a haka moe i te mana'u 'i ruŋa i a Ietū. Te ŋā taina era o 'Ītāria ko 'aroha mai 'ana mo kōrua.

²⁵ Ka ai te riva rahi o te 'Atua 'i ruŋa i a kōrua ta'ato'a.

TANATIAKO

Te kī 'a [Tanatiako], kope pāpa'i i te parau nei: a ia he tāvini o te 'Atua 'e o Ietū Kiritō. Te Tanatiako nei, ki te me'e rahi nu'u, ko te Tanatiako kī era e Pauro «he taina o Ietū» (Karatia 1.19). I pāpa'i ai i tā'ana parau nei ki te nūna'a taina ta'ato'a [haka moe i te mana'u] 'i ruŋa i a Ietū o te ao (1.1), 'e ta'e 'ō ki te kope e tahi 'o ki te nūna'a taina o te kona e tahi, pa he ŋā parau pāpa'i era e te 'āpōtoro era ko Pauro.

Te hāpī o ruŋa i te parau nei ta'e he hāpī hōhonu o ruŋa i te me'e i aŋa e te 'Atua mo tātou. He hāpī o ruŋa i te noho iŋa tano ki te mata o te 'Atua. Te me'e haka 'ite mai e Tanatiako: te [kiritiano] 'ina ko ha'ata'a i te taŋata hai mana'u taŋata, te aura'a: te 'ono e hauha'a rō 'ā 'e te veve 'ina. Te me'e mo aŋa he ha'atura ki te roŋo hope'a o te hauha'a va'ai mai e te 'Atua: (2.8). Ki oti he haka aŋi-aŋi mai pē nei ē: te kope kī e haka moe rō 'ana i te mana'u 'i ruŋa i te 'Atua 'e 'ina he aŋa i te me'e haŋa o te 'Atua, 'ina e tahi hauha'a o tō'ona haka moe iŋa era i te mana'u. Ta'e, pa'i, pē [Aparahama]. E take'a ena te hauha'a o tō'ona haka moe iŋa i te mana'u 'i ruŋa i te 'Atua hai aŋa i te me'e haŋa o te 'Atua (2.22).

Te 'arero he me'e e ma'u nō i te taŋata ki roto i te 'ati. 'O ira a Tanatiako i pāpa'i i hatu ai ki te nu'u kiritiano pē nei ē: e 'ite mo haka noho i te 'arero 'o hara (3.2–12). He haka mana'u tako'a: te moto 'e te tama'i e ai ena mai te 'ino 'e mai te mākota. 'O ira i haka haŋu i te taina mo ta'e mana'u i hau rō atu a rāua ki te rua 'e mo haŋa ki te 'Atua (4.1–10). He hatu ia ki te nu'u 'ono mo ta'e ha'aputu i te hauha'a mo rāua hai moni i to'o mai te moni ha'au mo 'auhau ki te nu'u aŋa, 'o tuhi i te rāua hape 'i mu'a o te 'Atua e rā moni mau 'ā (5.1–4).

'I te hope'a o te parau nei, e haka haŋu ena ki te nu'u kiritiano hai vānaŋa nei: (5.16).

He 'aroha

1 A au, a [Tanatiako], tāvini o te 'Atua 'e o te Pū'oko Haka Tere ko Ietū Kiritō, he 'aroha atu ki a kōrua ki te taina [haka moe i te mana'u] 'i ruŋa i a Ietū o te ho'e 'ahuru mā piti mata o te itaraera noho 'i te henua ta'ato'a.

E ha'aoroma'i i te 'ati hai pūai

² E te taina, ka topa atu ena rauhuru 'ati, e koa kōrua. ³ Ko 'ite 'ana, pa'i, kōrua: 'i te hora ha'ati'a e te 'Atua mo topa atu o te 'ati, e haka 'atu 'ana i te kōrua haka moe iŋa i te mana'u 'i ruŋa i a ia. 'E mo hio-hio mo oho nō o te kōrua mana'u 'i rā hora, he 'ite kōrua mo ha'aoroma'i i te 'ati hai pūai. ⁴ E ha'aoroma'i e oho kōrua hai pūai 'i te 'ati, ki ai ai kōrua he nu'u haka moe parauti'a i te mana'u 'i ruŋa i te 'Atua 'e nu'u aŋa i te me'e tī-tika ki tō'ona mata ki te roa 'ina e tahi hape mo tuhi iŋa atu.

⁵ 'E mo ai 'i roto i a kōrua te kope kai 'ite pē hē ana haka tere i a ia hai mana'u o te 'Atua 'i te hora o te 'ati, e no-no'i ki te 'Atua, 'e mā'ana e haka 'ite. Te 'Atua ki te ta'ato'a nō kope no-no'i e hā'ū'ū ena 'ina he hāito 'e 'ina he haka 'ati. ⁶ 'E ana no-no'i, e haka moe te mana'u 'i ruŋa i a ia 'e 'ina ko 'aka-'aka. Te kope 'aka-'aka o te mana'u pa he vave 'ā 'i te hora haka makenu e te tokerau ki te pā'iŋa ki te pā'iŋa. ⁷ Te taŋata tu'u pē ira 'ina ko mana'u he rava'a e ia te me'e mai te 'Atua ⁸ 'i te me'e era 'i aŋarīnā 'i ruŋa i te 'Atua tō'ona mana'u, 'e āpō 'i ruŋa i te me'e o te ao nei. 'Ina he haka tano i te

mana'u ki te me'e e tahi, 'e te taŋata nei mo te me'e ta'ato'a pē ira.

⁹ Te taina veve haka moe i te mana'u 'i ruŋa i a Ietū e koa 'o te ai i a ia te hauha'a parauti'a o te 'Atua. ¹⁰ 'E te taina 'ono e koa 'o te aŋi-aŋi he nu'u hara a rāua 'e 'o te haka moe i te mana'u 'i ruŋa i a Ietū, ta'e 'i ruŋa i te rāua hauha'a. Te taŋata 'ono, pa'i, pa he tiare mauku 'ā, e ko roa he ŋaro. ¹¹ Hora ena o te ra'ā e 'ata pūai ena he paka-paka te mauku, he vī-viri tō'ona tiare, he kore te nehe-nehe. Pē ira tako'a 'ā te taŋata 'ono ka ŋaro ena. 'I te mahana e tahi, e riva-riva nō 'ā; 'e 'i te rua mahana, ko mate ko oti 'ā.

¹² Ko te koa i te taŋata ha'aoroma'i hai pūai i te 'ati ta'ato'a topa 'i ruŋa i a ia. 'I te haka moe nō i te mana'u 'i ruŋa i a Ietū 'i roto i te 'ati, he tano rā taŋata ki te mata o te 'Atua, 'e he va'ai ki a ia i te ora 'āpī 'ina he hope'a ra'a, he hei kī e te 'Atua mo va'ai ki te nu'u haŋa ki a ia.

¹³ Mo ŋaro'a e te kope e tahi i te me'e e kī 'ana 'i roto i a ia mo aŋa i te me'e ta'e tano, 'ina ko mana'u o te 'Atua i kī. Te 'Atua, pa'i, 'ina he ŋaro'a 'i roto i a ia i te me'e era 'e, tako'a, 'ina he haka 'atu i te taŋata mo aŋa i te me'e ta'e tano. ¹⁴ Te me'e haka 'atu i te taŋata mo hara he mana'u ta'e tano o rāua. O rā mana'u mau 'ā te haka pohe te oho mo aŋa i te me'e ta'e tano. ¹⁵ Mai roto i te mana'u ta'e tano e poreko ena te hara, 'e te me'e hope'a mo poreko mai roto i te hara he mate.

¹⁶ E te mau taina haŋa rahi ō'oku ē, e 'ite kōrua pē nei ē: ¹⁷ ta'ato'a me'e riva-riva ai o tātou mai te 'Atua e ai mai ena. 'Ā'ana, pa'i, i aŋa i te me'e ta'ato'a mā'eha o te raŋi. Te ŋā me'e nei e huri rō 'ana 'i tō'ona hora: e pō'uri rō 'ā 'e e mā'eha rō 'ana. 'E te huru o te 'Atua 'i-

na he huri. ¹⁸ Te 'Atua, 'i te ai ko haŋa 'ā, i va'ai rō mai i te ora 'āpī 'ina he hope'a ra'a hai haka moe i te mana'u 'i ruŋa i tā'ana roŋo o ruŋa i te parauti'a, ki ai a tātou he ra'e o roto i tā'ana me'e aŋa ta'ato'a.

Te me'e haŋa he haka roŋo 'e he ha'atura

¹⁹ E te taina haŋa rahi ē, e u'i 'o rehu: a kōrua ta'ato'a e 'ite mo haka roŋo i te vānaŋa. 'E, ana vānaŋa, 'i ra'e ana mana'u riva-riva te kōrua me'e mo kī, 'e 'ina ko riri taŋa. ²⁰ Te taŋata riri, pa'i, e ko tano mo aŋa i te me'e tī-tika ki te mata o te 'Atua. ²¹ 'O ira, ka haka rē te kōrua hara hano-hano 'e te me'e rake-rake ta'ato'a ra-va aŋa e kōrua. Te roŋo parauti'a haka 'ite atu e to'o mo kōrua. E ai rō 'ana, pa'i, te pūai o rā roŋo mo haka e'a i a kōrua mai roto i te ūtu'a o te hara 'e mo va'ai atu i te ora 'āpī 'ina he hope'a ra'a.

²² 'E ta'e nō e haka roŋo i rā roŋo; e aŋa tako'a i te me'e era e kī atu era. Mo ta'e aŋa pē ira, e reo-reo 'ana kōrua ki a kōrua 'ā. ²³ Te kope haka roŋo nō i rā roŋo 'e 'ina he aŋa i tā'ana me'e kī, pa he taŋata u'i a roto i te hi'o: ²⁴ he take'a i a ia, 'e i taha era, he rehu rō 'ai pē hē tō'ona huru. ²⁵ 'E te kope ta'e rehu te me'e ŋaro'a, hāpī mo 'ata 'ite ō'ona o ruŋa i te haka tere iŋa hope'a o te tī-tika haka e'a i te taŋata mai roto i te hara, haka tano tahi i te me'e aŋa ki te me'e kī e rā roŋo, he ha'amaitai e te 'Atua 'i tā'ana me'e ta'ato'a aŋa.

²⁶ Te taŋata kī he taŋata pure 'Atua a ia 'e 'ina he haka rehe i tō'ona 'arero, e reo-reo 'ana ki a ia 'ā, 'e te me'e aŋa 'ā'ana mo te 'Atua 'ina e tahi hauha'a. ²⁷ Te ha'amuri iŋa parauti'a 'e tano ki te mata o te 'Atua Matu'a ko te me'e ena: he hā'ū'ū ki te ŋā poki matu'a kore 'e ki te ŋā vi'e hove ai o te rāua 'ati, 'e, tako'a, he ta'e hara hai me'e o te ao nei.

'Ina ko ha'ata'a te taŋata hai mana'u ta'e tano

2 E te taina ō'oku ē, a kōrua, te nu'u [haka moe i te mana'u] 'i ruŋa i te tātou Pū'oko Haka Tere hōnuī ko Ietū Kiritō, e u'i 'o ha'ata'a rō i te taŋata hai mana'u taŋata. ²³ Pē nei te ha'aura'a: mo ai e taka-taka rō 'ana kōrua, he tu'u atu e tahi kope 'ono, e huki rō 'ā 'i tō'ona rima i te tāpe'a pīru 'e e uru rō 'ana i te kahu nehe-nehe, he haka koa e kōrua koia ko kī: «Ka noho koe a te kona nei, kona riva-riva», 'e, 'i tū hora 'ā, he tu'u atu e tahi kope veve, e uru rō 'ana i te kahu ko rū'au 'ā, 'e ki rā kope he kī e kōrua: «Ka māroa koe a rā; ana ta'e haŋa, ka noho atu ki raro». ⁴ Mo aŋa o kōrua pē ira, e ha'ata'a 'ā i te taŋata 'e e u'i 'ana hai mana'u ta'e tano.

⁵ Ka haka roŋo mai, e te taina haŋa rahi ē: te 'Atua ko ha'ata'a 'ana i te nu'u veve mo 'ono 'i te haka moe iŋa i te mana'u 'i ruŋa i a ia, 'e, tako'a, mo ai i a rāua te hōrea kī e ia mo te nu'u haŋa ki a ia: he o'o o rāua ki roto i te nūna'a taŋata haka tere e ia. ⁶ 'E nā kōrua e ta'e haka au 'ā i te nu'u veve. ⁷ 'E tā'e 'ō o te 'ono te tōtōā atu hai aŋa 'e te horo i a kōrua ki te pū'oko haka tere o te hare ture? ⁷ 'E tā'e 'ō ko rāua tako'a te nu'u kī i te vā-

naŋa ta'e tano mo te 'iŋoa nehe-nehe o te kope ko ia te tātou Pū'oko Haka Tere ko Ietū Kiritō?

⁸ Mo haka tano tahi o kōrua ki te roŋo hope'a o te nui-nui hā'aki 'i ruŋa i te [Pāpa'i Mo'a] pē nei ē: «E haŋa koe ki te rua taŋata pa he haŋa iŋa ena 'ā ō'ou ki a koe», e aŋa 'ana kōrua i te me'e riva-riva. ⁹ 'E mo ha'ata'a o kōrua i te taŋata hai mana'u ta'e tano, e hara 'ana, 'e ki te haka tere iŋa o te 'Atua ko hape 'ā.

¹⁰ Te kope ha'atura oho ia ki te haka tere iŋa o te 'Atua, mo hape 'i te me'e nō e tahi, ko hape 'ā ki te haka tere iŋa ta'ato'a o te 'Atua. ¹¹ Ko kī 'ana, pa'i, e te 'Atua: «'Ina ko tai'ata», 'e ko kī tako'a 'ā: «'Ina ko tiŋa'i ko haka mate i te taŋata». 'O ira, ka ai atu 'ina koe kai tai'ata, 'e i tiŋa'i nō i te taŋata mo mate, ko hape 'ā a koe ki te haka tere iŋa o te 'Atua.

¹² 'E a kōrua, e te taina ē, e vānaŋa 'e e haka tere i a kōrua pa he nu'u 'ite pē nei ē: te 'Atua ka kī ena i te kōrua me'e tano 'e ta'e tano hai haka tere iŋa 'ā'ana haka e'a i te taŋata mai roto i te hara. ¹³ Te nu'u ta'e haka 'aroha i te rua taŋata, pē ira tako'a ka ta'e haka 'aroha ena i a rāua e te 'Atua 'i te hora o te ture hope'a, 'e te nu'u haka 'aroha i te rua taŋata, e ko ri'a-ri'a 'i rā hora.

Hai me'e aŋa e take'a ena

¹⁴ E te taina ō'oku ē, ka haka topa rā te mana'u: *ze* hauha'a rō 'ā te kī iŋa o te kope e tahi e haka moe rō 'ā a ia i te mana'u 'i ruŋa i te 'Atua, 'e 'ina 'ā'ana me'e riva-riva aŋa mo haka take'a he aŋi 'ā tā'ana me'e kī era? Te haka moe iŋa o te mana'u pē rā, *ze* to'o mau rō i a ia mai roto i te hara?

¹⁵ Pē nei te aura'a: mo ai o te taina haka moe i te mana'u 'i ruŋa i a Ietū 'ina he kahu mo uru 'e 'ina he me'e mo kai, ¹⁶ 'e he kī e tahi o kōrua: «Ka oho riva-riva; e haka mahana koe, e kai ki te mākona», 'e 'ina e tahi 'ā'ana me'e i va'ai mo te 'ati o rā kope, *ze* hauha'a rō 'ā hō tā'ana me'e kī era? ¹⁷ Pē ira te haka moe iŋa o te mana'u 'i ruŋa i te 'Atua, mo ta'e haka take'a hai me'e riva-riva aŋa, 'ina ō'ona hauha'a, pa he me'e mate 'ā.

¹⁸ Nā e kī rō atu e te kope e tahi: «Tu'u me'e he haka moe i te mana'u 'i ruŋa i te 'Atua, 'e tō'oku, he me'e riva-riva aŋa». 'Ī a au he kī atu: «Ka haka take'a mai rā tu'u haka moe iŋa ena i te mana'u 'i ruŋa i te 'Atua 'ina he me'e riva-riva aŋa, 'e mā'aku e haka take'a atu, hai me'e riva-riva aŋa, i tō'oku haka moe iŋa i te mana'u 'i ruŋa i te 'Atua». ¹⁹ A koe e mana'u ena: te 'Atua e tahi mau nō, 'e he aŋi 'ā. Ka ai atu pē ira, ta'e hai 'ite i rā me'e ana tano kōrua ki tō'ona mata. Te tātane, pa'i, e 'ite tako'a rō 'ā 'e e rurū rō 'ana 'i te ri'a-ri'a.

²⁰ E te ma'a-ma'a ē, ka haka topa te mana'u: te haka moe iŋa i te mana'u 'i ruŋa i te 'Atua mo ta'e haka take'a hai me'e riva-riva aŋa, 'ina e tahi hauha'a. ²¹ Mo te 'Atua, te tātou hakaara ko [Aparahama] he taŋata tano ki tō'ona mata hai oho mo tūtia i tā'ana poki ko Ita'ata. ²² Te haka moe iŋa o Aparahama i te mana'u 'i ruŋa i te 'Atua i take'a ai hai tā'ana me'e aŋa, 'e hai rā me'e e 'ite ena he parauti'a mau 'ā tō'ona haka moe

inā i te mana'u 'i ruŋa i te 'Atua. ²³ Pē ira i tano ai te me'e kī 'i ruŋa i te Pāpa'i Mo'a: «A 'Aparahama i haka moe rō i tō'ona mana'u 'i ruŋa i te 'Atua. 'O ira te 'Atua i kī ai he taŋata tano 'i mu'a i a ia, 'e he repahoa ō'ona».

²⁴ Hora ena ko 'ite 'ā e kōrua: te 'Atua e kī rō 'ana: te taŋata e tano rō 'ā ki tō'ona mata ta'e nō hai haka moe i te mana'u 'i ruŋa i a ia, e ai tako'a te me'e riva-riva aŋa. ²⁵ I kī rō e te 'Atua pē ira mo Rāhava, he tai'o o Herikō 'o te haka piko i te ŋāŋata uŋa e [Kosue] mo ra-rama i te henua 'e o te haka tē-tere i rā nu'u a te ara kē, he haka moe ō'ona i te mana'u 'i ruŋa i te 'Atua.

²⁶ Mo haka mao o te vānaŋa: te hakari mo kore rō o te vārua o roto he me'e mate. Pē ira tako'a 'ana te haka moe i te mana'u 'i ruŋa i te 'Atua he me'e mate mo ta'e haka take'a hai me'e riva-riva aŋa.

Te 'arero

3 E te taina, ta'e ta'ato'a o kōrua mo ma'ori hāpī. E 'ite rō 'ā, pa'i, kōrua: 'ata hau te paŋaha'a o te ture o te 'Atua mo mātou mo te nu'u haka 'ite i tā'ana vānaŋa ki te tētahi nu'u. ² A tātou, te taŋata ta'ato'a e hape rahi rō 'ā. 'E mo ai tā'ue o te kope ta'e hape 'i tā'ana me'e kī, he taŋata 'ina e tahi hape ia 'i mu'a o te 'Atua 'e he taŋata 'ite mo haka noho i a ia 'o hara.

³ E mana'u rā kōrua ki te tāvaha: ka ai atu he me'e 'i-ti-'iti e tahi, e rava'a nō e tātou mo haka oho i te nui-nui ena o te hoi a te kona o tātou i haŋa. ⁴ Pē ira tako'a 'ā te pahī: ka ai atu he pahī hope'a o te nui-nui 'e te tokerau haka makenu i a ia he tokerau hope'a o te pūai, hai hui'a 'iti-'iti e tahi e haka oho ena e te kope haka tere a te kona 'ā'ana i haŋa.

⁵ Pē ira te 'arero; he me'e 'iti-'iti e tahi o te hakari, 'e, ka ai atu pē ira, e rava'a nō mo aŋa i te me'e hope'a o te nui-nui. Te kona rahi o te tumu e vera tahi nō 'i te ahi hope'a o te 'iti-'iti. ⁶ 'E te 'arero pa he ahi 'ā. He kona o te tātou hakari mai ira e poreko ena te me'e rake-rake haka 'ō'one tahi i a tātou hai hara. Te 'arero e ura ena hai ahi mau era 'ā o te pō'auahi koia ko te tutu ko te oho i te tātou noho inā 'i te ao nei.

⁷ Ta'ato'a huru o te manu e haka māŋaro nō e te taŋata, ka ai he manu va'e e hā, he manu rere, he kōreha, 'e he manu o roto i te vaikava; 'e ko māŋaro 'ana 'i te taŋata. ⁸ 'E te 'arero, kai rava'a 'ā e te taŋata mo haka māŋaro 'o te ai he me'e hope'a o te rake-rake ta'e rava'a mo haka noho, 'ātā e tu'u rō 'ana pa he me'e 'ī e te veneno. ⁹ Hai 'arero a tātou e ha'ahana-hana ena i te 'Atua Matu'a 'e e tohu ena i te taŋata, ka ai atu i aŋa ai e te 'Atua hai huru ō'ona. ¹⁰ Mai roto i tū haha 'ana e e'a ena te vānaŋa mo ha'ahana-hana i te 'Atua 'e pē ira 'ā te vānaŋa ta'e tano mo te rua taŋata. Te me'e nei 'ina ko ai pē ira, e te taina ē. ¹¹ 'Ina, pa'i, he tehe mai tū kona 'ā te vai māŋaro 'e te vai maŋeo. ¹² 'Ina tako'a he hua mai ruŋa i te tumu pika te *aceituna* 'e mai ruŋa i te tumu vino te pika. Pē ira 'ana, e te taina ē, 'ina he e'a te vai maŋeo mai te kona e'a o te vai māŋaro.

Te huru tano ki te mata o te 'Atua

¹³ Mo ai 'i roto o kōrua te kope mana'u ko 'ite 'ā he aha te me'e tī-tika mo aŋa 'i te hora ta'ato'a, e haka take'a hai me'e riva-riva aŋa 'e hai ta'e mana'u e hau rō atu a ia ki te rua, he huru o te nu'u haka tere i a rāua hai mana'u o te 'Atua. ¹⁴ 'E mo ai e nou-nou rō 'ana ki te me'e o te rua 'e e haŋa rō 'ana mo ai ko ia mau nō te ra'e 'i te me'e ta'ato'a, 'ina ko kī pē nei ē: e 'ite rō 'ana 'ō mo aŋa i te me'e tī-tika 'i te hora ta'ato'a. He reo-reo. E hape 'ā ki te parauti'a. ¹⁵ Ta'e o te 'Atua te huru ena; he me'e o te ao nei, o te taŋata 'e o Rukifero. ¹⁶ Te kona ai o te nou-nou, 'e o te haŋa mo ra'e 'i te me'e ta'ato'a, 'i ira e ai ena te mira-mira 'e rauhuru atu me'e ta'e tano.

¹⁷ 'E te nu'u mai te 'Atua te rāua 'ite, te me'e ra'e he noho inā ta'e hara, 'e te rāua huru: haumārū, riva 'e 'ite i te mo'a. A rāua tako'a nu'u māhatu 'aroha, u'i i te ta'ato'a pē tū huru tahi 'ā, kī i te parauti'a, 'e aŋa i te me'e riva-riva.

¹⁸ Te nu'u aŋa mo ai o te haumārū 'i ruŋa i te henua te me'e 'oka he haumārū. 'E 'i te hora hope'a te me'e rava'a he me'e tano ki te mata o te 'Atua.

Te haŋa ki te me'e o te ao nei

4 E te taina, ¿ko 'ite 'ā a kōrua mai hē te ture 'e te tātaka e ai ena 'i roto i a kōrua? Mai te haŋa ki te me'e ta'e tano haka tātaka oho i te mana'u. ² Pē nei te aura'a: e ai rō 'ana te kōrua me'e haŋa 'e 'ina he rava'a. 'E 'i te haŋa mo rava'a i rā me'e, e tiŋa'i e haka mate nō i te taŋata. Te moto 'e te tama'i e ai ena he mākota 'i te rua.

E ta'e rava'a ena e kōrua i te me'e, he ta'e no-no'i ki te 'Atua. ³ 'E mo ai ko no-no'i 'ā 'e 'ina he va'ai atu, he ta'e tano o te kōrua mana'u i no-no'i ai. E haŋa ena kōrua mo te me'e pohe nō o te hakari. ⁴ 'E te nu'u haka rehu i te 'Atua ē! ¿Kai 'ite 'ana 'ō kōrua: te taŋata haŋa ki te haka tere inā o te ao nei he taŋata ta'e haŋa ki te 'Atua? Te kope he repahoa o te ao nei he taŋata riri mo te 'Atua. ⁵ Ta'e i hā'aki tahaŋa nō 'i ruŋa i te [Pāpa'i Mo'a]: «Te [Vārua Maitai] uŋa mai e te 'Atua ki roto i te tātou māhatu e haŋa rō 'ana mo ai o tātou o te 'Atua mau nō». ⁶ 'E te 'Atua, 'i tō'ona riva rahi, e hā'ū'ū rō mai 'ā. E kī rō 'ana, pa'i, 'i ruŋa i te Pāpa'i Mo'a:

«Te 'Atua 'ina he haka tano i te mana'u o te nu'u mana'u i hau rō atu rāua ki te tētahi, 'e ki te nu'u ta'e mana'u pē ira, e hā'ū'ū ena hai riva rahi ō'ona».

⁷ 'O ira, e haka rē kōrua mo haka tere atu e te 'Atua; 'ina ko haka rē ki a Rukifero, ki tere ai mai muri i a kōrua. ⁸ E haka hāhine ki te 'Atua, ki haka hāhine atu ai.

E te nu'u hara ē, ¿ka haka ma'itaki te kōrua māhatu! E te nu'u haŋa ki te 'Atua 'e ki te haka tere inā o te ao nei ē, ¿ka to'o te me'e rake-rake mai roto i te kōrua

māhatu! ⁹ E tanji 'e e ha'amā 'i te kōrua me'e ta'e tano aña! jE huri te kōrua kata ki te matavai 'e te kōrua koa ki te tanji! ¹⁰ E riro kōrua he nu'u 'ite pē nei ē: mo kore o te 'Atua 'ina e tahi kōrua aura'a, ki haka hōnuī atu ai kōrua e ia.

¹¹ E te taina, 'ina ko vānaŋa 'ino mo te rua. Te kope vānaŋa 'ino mo te rua e vānaŋa 'ino tako'a 'ā mo te haka tere iŋa o te 'Atua. Pē nei te aura'a: te kope vānaŋa 'ino mo te rua e ha'ariro 'ā i a ia he pū'oko haka tere o te hare ture mo kī i te hape 'e i te ta'e hape o te tētahi 'e, tako'a, o te haka tere iŋa o te 'Atua haka 'ite mai pē nei ē: e haŋa tātou ki te rua. 'E 'i te vānaŋa 'ino e take'a ena: kope ta'e ha'atura ki te haka tere iŋa o te 'Atua. ¹² Te haka tere iŋa nei o te 'Atua i va'ai mai, 'e i a ia nō te parau mo ture. Tu'u ora 'e tu'u mate i a ia mau nō. 'E, ζko ai ia a koe mo kī i te hape o te rua?

I ra'e ana mana'u ki te 'Atua

¹³ Ka haka roŋo mai e te nu'u kī pē nei ē: «'Arinā 'o āpō he oho tātou ki te kona e tahi, 'i ira ka noho ka ho'o ena e tahi matahiti ka 'ī rō te moni». ¹⁴ jKai 'ite hia he aha te me'e ka topa atu ena āpō! A kōrua, pa'i, pa he kapua 'ā: he topa 'e 'ina he roa ia e ŋaro rō ena. ¹⁵ Te me'e mau o kōrua mo kī: «Ana haŋa te 'Atua he ora tātou, 'e ana haŋa tako'a a ia he aña tātou i te me'e nei 'o i te me'e era». ¹⁶ 'E a kōrua ko te haka paka iŋa 'ana 'i te kōrua me'e aña. Te vānaŋa iŋa pē nā vānaŋa iŋa ta'e tano. ¹⁷ Te kope 'ite i te me'e riva-riva mo aña 'e 'ina he aña, e hara 'ā.

He vānaŋa mo te nu'u 'ono

5 jE haka roŋo te vānaŋa nei, e te nu'u 'ono ē! jE kī kōrua e tanji 'i te 'ati ka topa atu ena, he ture hope'a o te 'Atua! ² Te me'e ha'aputu e kōrua 'ina e tahi hauha'a toe; te kōrua kahu ko momo-momo 'ā 'i te manu. ³ Te kōrua me'e pīru ko para tahi 'ana, 'e he mata'ite te para o te kōrua nou-nou. 'E 'i te nou-nou o kōrua ka haka ūtu'a atu ena e te 'Atua, pa he kai iŋa ena e te para i te 'aurī, 'e pa he vera iŋa ena o te me'e 'i te ahi. Ko ha'aputu 'ana, pa'i, kōrua i te tao'a 'i te ŋā mahana nei, he mahana hope'a.

⁴ Te nu'u kato i te kōrua kai 'e te moni ta'e 'auhau ki a rāua 'ī e tuhi 'ana i te kōrua hape, 'e te 'Atua, i a ia te pūai ta'ato'a, ko ŋaro'a 'ana i te rāua ture. ⁵ E noho ena kōrua 'i te ao nei 'i roto i te hauha'a 'e 'i roto i te reka. E haka porio 'ā pa he pua'a, j'e nā e tu'u rō te mahana he tiŋa'i! ⁶ Te nu'u 'ina he hape ko haka ūtu'a 'ā 'e ko tiŋa'i 'ana e kōrua, 'e kai ta'e haka rē atu i a rāua mo tiŋa'i.

E tiaki hai haumārū

⁷ E te taina, e 'ite kōrua mo tiaki hai haumārū 'ātā ki te tu'u iŋa mai o te tātou Pū'oko Haka Tere ko Ietū Kir-

itō. Te tanjata 'oka kai e 'ite rō 'ana mo tiaki ki te 'āva'e 'ua mo taiko o tā'ana ha'a'apu, 'e 'ai ka kato iho. ⁸ Pē ira tako'a 'ana kōrua, e 'ite mo tiaki ki tō'ona tu'u iŋa mai e haka hio-hio rō 'ana i te mana'u 'i ruŋa i a ia. E ko roa, pa'i, ka tu'u haka 'ou rō mai ena te tātou Pū'oko Haka Tere.

⁹ E te taina, 'i roto i a kōrua e 'ite mo ha'aoroma'i, 'e 'ina ko ha'a'ino 'o haka ūtu'a atu i a kōrua. Nā, pa'i, 'i te 'ōpani, te kope i a ia te parau mo ture 'e mo haka ūtu'a i te tanjata. ¹⁰ Ka mana'u rā kōrua ki te ŋā perofeta era o mu'a 'ā: i ha'aoroma'i i oho nō e tōtōā era e te tanjata 'o te vānaŋa hai 'īŋoa o te 'Atua. E ha'aoroma'i kōrua, e te taina ē, pē ira. ¹¹ Ko 'ite 'ana a tātou: te nu'u ha'aoroma'i i te 'ati e hio-hio rō 'ā te mana'u 'i ruŋa i te 'Atua e ha'amaitai rō 'ā e ia. Ko 'ite 'ana, pa'i, e kōrua pē hē a Hope, 'i mu'a 'ā, i ha'aoroma'i ai i tō'ona 'ati, 'e pē hē te 'Atua i ha'amaitai ai i a ia 'i te hora hope'a. Te 'Atua me'e māhatu 'aroha.

¹² E te taina ō'oku ē, tā'aku me'e haka 'ou mo kī atu: 'Ina kōrua ko hōrea ki te ranji, ki te henua 'e ki te tētahi atu me'e. Mo kī o kōrua «'ē-ē», e ai 'ē-ē mau 'ā; 'e mo kī o kōrua «'ina», e ai 'ina mau 'ā, 'o haka ūtu'a kōrua e te 'Atua.

Te pure

¹³ Mo 'ati o te kope e tahi o roto i a kōrua, e pure. 'E mo koa, e hīmene e ha'ahana-hana ki te 'Atua. ¹⁴ Mo māui-ui, e hā'aki ki te nu'u ko rāua te pū'oko haka tere o te kōrua nūna'a tanjata [haka moe i te mana'u] 'i ruŋa i a Ietū mo pure mō'ona koia ko paru 'iti-'iti hai mōrī hai 'īŋoa o Ietū, he Pū'oko Haka Tere o tātou. ¹⁵ 'E ka pure era e haka moe rō 'ana i te mana'u 'i ruŋa i a Ietū, he haka ora e Ietū i tō'ona māui-ui, 'e mo ai ko hara 'ā, he haka kore i tō'ona hara.

¹⁶ 'O ira, 'i roto i a kōrua e kī i te kōrua hara 'e e pure te taina nei mo te taina era, ki haka ora atu ai e te 'Atua i te kōrua hakari 'e i te kōrua vārua. Te pure o te kope aña i te me'e tī-tika ki te mata o te 'Atua e ai rō 'ana te mana. ¹⁷ Te perofeta era ko ['Ēria] he tanjata pē tātou 'ā. I pure era hai māhatu mo ta'e hoa o te 'ua, kai hoa te 'ua e toru matahiti 'e te 'afa. ¹⁸ I pure haka 'ou era mo hoa o te 'ua, he hoa te 'ua, 'e he tupu haka 'ou te me'e 'i ruŋa i te henua.

He huri iŋa haka 'ou o te mana'u ki te 'Atua

¹⁹ E te taina, mo oho kē o te kope e tahi o roto i a kōrua mai te ara o te parauti'a 'e o te rua i haka hoki mai, ²⁰ e 'ite pē nei ē: te tanjata haka hoki i tō'ona taina mai te ara ta'e tano e mātaki 'ā i te ara mo e'a o tō'ona taina mai te ūtu'a o te pō'auahi 'e mo haka kore e te 'Atua me'e rahi hara.

1 PĒTERO

Te nu'u haka moe ra'e era i te mana'u 'i ruŋa i a Ietū o Itaraera i tute rō mo tōtōā e te nu'u ta'e [haka moe i te mana'u] 'i ruŋa i a ia. 'O ira e noho era e maraŋa rō 'ana 'i te tētahi atu henua haka tere e te rōmano. Ki te nu'u maraŋa ki Ponotō, ki Karatia, ki Kāpārōtia, ki 'Ātia 'e ki Vītīnia i pāpa'i ai te 'āpōtoro era ko Pētero i te parau nei (1.1).

Me'e rahi te 'ati i 'amo e te nu'u nei 'i te rāua kona noho 'o te ai o rāua 'a Ietū Kiritō. 'O ira, 'i ruŋa i te parau nei, he haka pūai e Pētero i te mana'u 'e he hatu mo ha'ahana-hana mo oho nō ki te 'Atua, kope va'ai mai (1.3). He hatu tako'a e Pētero pē nei ē: te me'e mo take'a 'i ruŋa i a rāua 'o te ai i a rāua te noho iŋa 'āpī nei he haka tapa iŋa mai roto i te hara (1.15–16), 'e he koa, ka ai atu e topa rō 'ana 'i ruŋa i a rāua te 'ati (1.6–9). Te [kiritiano] ta'ato'a, pa'i, he hua'ai o te 'Atua 'e he [oromatu'a] aŋa ki a ia (2.9).

Te me'e vānaŋa rahi 'i ruŋa i te parau nei: pē hē te noho iŋa tano mo te nu'u kiritiano. Ki te kī 'a Pētero: te nu'u kiritiano e ha'atura ki te nu'u ra-rahi 'e ki te nu'u pū'oko haka tere o te henua 'o te ai he me'e haŋa e te tātou Pū'oko Haka Tere ko Ietū Kiritō (2.13–15).

'E ki te kī tako'a 'a Pētero: te pa'o iŋa o te ao nā ko hāhine mai 'ana (4.7). 'O ira, e haŋa te taina ki te rua, e to'o e hāpa'o i te nu'u kiritiano tu'u atu ki te hare, 'e e koa 'o te topa atu o te 'ati 'o te ai ō'ou 'a Ietū Kiritō (4.8–9,12–16).

He 'aroha

1 A au, a Pētero, ['āpōtoro] 'a Ietū Kiritō, he 'aroha atu ki a kōrua ki te nu'u ta'ato'a ha'ata'a e te 'Atua mā'ana noho 'i te henua kē, ta'e 'i te rāua henua mau era, 'i te ŋā kona era ko Ponotō, ko Karatia, ko Kāpārōtia, ko 'Ātia 'e ko Vītīnia. ² Te mana'u o te 'Atua Matu'a i ha'ata'a ai i a kōrua: mo haka riro i a kōrua he nu'u 'ina e tahi hara ha'ata'a mā'ana hai Vārua Maitai 'e ha'atura ki a Ietū 'i te haka kore e te 'Atua i te kōrua hara hai toto tehe era o Ietū 'i ruŋa i te tātaurō. Ka rahi ka oho nō te riva rahi 'e te haumārū o te 'Atua 'i ruŋa i a kōrua.

He ha'ahana-hana ki te 'Atua

³ Ki ha'ahana-hana tātou i te 'Atua, Matu'a o te tātou Pū'oko Haka Tere ko Ietū Kiritō. A ia, pa'i, ko va'ai mai 'ana i te ora 'e i te noho iŋa 'āpī, he rahi o tō'ona haka 'aroha mo tātou. 'E, 'i te ai ko haka ora 'ana e ia i a Ietū mai te mate, e 'ite nei a tātou e haka ora tako'a rō mai i a tātou mai te mate pe mu'a ka oho ena, ⁴ 'e e va'ai rō mai i te me'e hāpa'o mo tātou 'i ruŋa i te raŋi, he me'e e ko kore, e ko tāpau 'e e ko mae-mae ki te hora hope'a. ⁵ 'O te haka moe o tātou i te mana'u 'i ruŋa i a Ietū, te 'Atua e hāpa'o e oho mai ena i a tātou hai pūai nui-nui ō'ona, ki rava'a ai e tātou, 'i te mahana hope'a, i te ora 'ina he hope'a ra'a hāpa'o mo tātou. ⁶ 'O ira a tātou e koa nei, ka ai atu e 'amo rō 'ā a tātou, mo te hora 'iti-'iti, rauhuru atu 'ati.

⁷ Te 'Atua, pa'i, e ha'ati'a rō 'ā mo topa mai o te 'ati mo 'ite hoki te haka moe iŋa nei o tātou i te mana'u 'i ruŋa i a Ietū e hio-hio rō 'ā 'o 'ina, pa he pīru e tunu ena 'i roto i te ahi. 'E mo te 'Atua te haka moe iŋa o tā-

tou i te mana'u 'i ruŋa i a Ietū i hau rō atu i te hauha'a ki te pīru, he me'e e ŋaro nō. Mo hio-hio mo oho nō o te tātou mana'u 'i ruŋa i a Ietū ka ai atu e rahi rō 'ā te 'ati topa mai, 'i te hora o te hoki iŋa mai o Ietū Kiritō, he koa te 'Atua 'e he haka paka he haka nui-nui i a tātou.

⁸ A kōrua e haŋa rō 'ana ki a Ietū Kiritō ka ai atu kai take'a hia i a ia. 'E 'i te hora nei, ka ai atu 'ina he take'a, e haka moe rō 'ana kōrua i te mana'u 'i ruŋa i a ia, 'e e rahi rō 'ana te kōrua koa, he koa 'ina he vānaŋa mo ha'aura'a. ⁹ Ko rava'a 'ana, pa'i, e kōrua i te me'e haŋa mo rava'a hai haka moe o kōrua i te mana'u 'i ruŋa i a Ietū: he e'a mai roto i te ūtu'a o te hara 'e he rava'a i te ora 'āpī 'ina he hope'a ra'a.

¹⁰ Te perofeta o mu'a 'ā i haka 'ite rō ki te taŋata i te roŋo haka vānaŋa e te 'Atua o ruŋa i te haka e'a iŋa i te taŋata mai roto i te ūtu'a o te hara hai riva rahi ō'ona 'e, 'i te ta'e aŋi-aŋi e te perofeta i nei roŋo, he rara he oho o ruŋa. ¹¹ Te me'e o rāua i haŋa mo aŋi-aŋi o rā roŋo: a hē 'e pē hē ka tano te me'e kī era ki a rāua e te Vārua o te [Kiritō] pē nei ē: e topa rō te 'ati 'i ruŋa i te Kiritō 'e ki oti he haka nui-nui. ¹² 'E te 'Atua i haka 'ite rō ki rā ŋā perofeta pē nei ē: te roŋo haka 'ite oho era e rāua he me'e mo topa pe mu'a ka oho era, te au-ra'a, 'i te noho iŋa nei o tātou, 'e ta'e 'ō 'i te rāua noho iŋa era. 'E ko rā roŋo te me'e i haka 'ite atu ki a kōrua e te nu'u haka 'ite oho i te roŋo riva-riva nei o ruŋa i a Ietū hai pūai o te [Vārua Maitai] uŋa mai mai te raŋi. 'E 'ātā te merahi e haŋa rō 'ana mo aŋi-aŋi o ruŋa i te roŋo nei o te haka e'a iŋa o te taŋata mai roto i te ūtu'a o te hara.

Te noho iŋa tano mo te nu'u [kiritiano]

¹³ E te taina, e 'ara te kōrua mata 'e e 'ite i te hāito i te kōrua me'e kī 'e i te kōrua me'e aŋa. E haka hio-hio te kōrua mana'u 'i ruŋa i te me'e o te 'Atua ka va'ai atu ena hai riva rahi ō'ona 'i te hora o te hoki iŋa mai o Ietū Kiritō.

¹⁴ Pa he ŋā poki ha'atura ki te 'Atua, 'ina ko haka tano haka 'ou te kōrua noho iŋa ki te me'e ta'e tano haka tere atu i a kōrua 'i mu'a 'ā, 'i te hora kai 'ite 'ana o ruŋa i te 'Atua. ¹⁵ Te tī-tika mau: e noho kōrua 'ina e tahi hape 'i te me'e era te 'Atua ha'ata'a era i a kōrua mā'ana 'ina e tahi ō'ona hape. ¹⁶ Pē nei e kī ena 'i ruŋa i te [Pāpa'i Mo'a]: «E ai kōrua he nu'u 'ina e tahi hape, pē au 'ā».

¹⁷ A kōrua e kī rō 'ana: te 'Atua he Matu'a o kōrua. 'O ira, e mo'a 'e e ha'atura ki a ia 'i te ta'ato'a nō hora o te noho iŋa 'i te ao nei. 'Ā'ana, pa'i, te kī i te tano 'e i te ta'e tano o te taŋata hai huru o te rāua me'e aŋa, 'e mō'ona te taŋata pē tū huru tahi 'ā. ¹⁸ Te 'Atua ko to'o 'ana i a kōrua mai roto i te noho iŋa hauha'a kore rava'a e kōrua mai te kōrua tupuna. 'E ko 'ite riva-riva 'ana e kōrua: ta'e hai me'e pa he pīru, me'e tō'ona hauha'a mo te ao nō nei, i 'auhau ai mo to'o i a kōrua mai te noho iŋa nei, ¹⁹ hai toto hauha'a era o te Kiritō, kope pa he mā'moe mo tūtia 'ina e tahi ō'ona hape, i to'o ai i a kōrua.

²⁰ 'I te hora kai aŋa hia 'ā i te ao, i ha'ata'a rō ai e te 'Atua i te Kiritō mo te me'e nei; 'e 'i te ŋā hora hope'a nei, i tu'u mai ai mo te riva-riva o kōrua. ²¹ Hai Kiritō kōrua e haka moe ena i te mana'u 'i ruŋa i te 'Atua. 'E, 'o te haka ora e te 'Atua i te Kiritō mai te mate 'e 'o te haka nui-nui, e ta'e haka tapa ena te kōrua mana'u mai ruŋa i te 'Atua 'e e 'ite ena e kōrua e aŋa tahi rō e ia i tā'ana me'e hōrea era.

²² 'I te ha'atura o kōrua ki te roŋo parauti'a i haka kore ai e te 'Atua i te kōrua hara, ki haŋa parauti'a ai kōrua ki te kōrua taina. 'O ira, e haŋa e oho 'i roto i a kōrua hai māhatu 'e hai pūai. ²³ A kōrua, pa'i, ko poreko haka 'ou mai 'ana, 'e ta'e mai roto i te taŋata, he me'e e mate nō, mai roto i te vānaŋa o te 'Atua, he me'e ora 'e 'ina e ko mate ki te hora hope'a. ²⁴ Pē nei, pa'i, e kī ena 'i ruŋa i te Pāpa'i Mo'a:

«Te taŋata ta'ato'a pa he mauku 'ana
'e tō'ona pūai pa he tiare o te mauku;
he paka-paka te mauku, he mae-mae te tiare 'e he marere,

²⁵ 'e te vānaŋa o te 'Atua e ko ŋaro ki te hora hope'a».

'E nei vānaŋa he [roŋo riva-riva o ruŋa i a Ietū Kiritō] haka 'ite atu ki a kōrua.

2 'E hora nei, 'i te ai i a kōrua te ora 'āpī, e haka kore mai ruŋa i a kōrua te me'e ta'ato'a ta'e tano: te reo-reo, te haka tu'u i a kōrua pa he nu'u riva 'e rā riva a te haho 'ā, te nou-nou ki te me'e o te rua, 'e te ha'a'ino. ² E riro kōrua pa he ŋā poki poreko iho pohe ki te ū, te aura'a: e pohe kōrua ki te ū parauti'a mo te kōrua

riva-riva, he vānaŋa o te 'Atua, mo haka pūai mo oho o te kōrua mana'u 'i ruŋa i te 'Atua 'ātā ki te mahana ka to'o ena i a kōrua ki te raŋi pe mu'a ka oho ena. ³ A kōrua ko ŋaro'a 'ana i te ora o te riva rahi o te tātou Pū'oko Haka Tere ko Ietū Kiritō; 'o ira, e aŋa kōrua pē ira.

He nu'u ha'ata'a e te 'Atua mā'ana

⁴ E haka hāhine kōrua ki a ia, he mā'ea ora ta'e haŋa era e te taŋata, mā'ea ha'ata'a e te 'Atua, 'e mā'ea hauha'a rahi. ⁵ A kōrua tako'a pa he mā'ea ora, 'e te 'Atua, hai ŋā mā'ea ora ena ko kōrua, e aŋa mai ena i te kona mo ha'amuri ki a ia. 'I roto a kōrua pa he [oro-matu'a] ha'ata'a e ia mā'ana tūtia ki a ia i te me'e riva-riva haka poreko e te Vārua Maitai 'i roto i a kōrua, he tūtia koa 'ā'ana 'o te ai o kōrua 'a Ietū Kiritō. ⁶ Pē nei, pa'i, e kī ena 'i ruŋa i te [Pāpa'i Mo'a]:

«He haka tu'u au i te mā'ea e tahi 'i te kona era ko [Tione],

he mā'ea matu'a haka noho hare, mā'ea ha'ata'a e au 'e mā'ea hauha'a rahi.

Te kope [haka moe i te mana'u] 'i ruŋa,

e ko mana'u ki te hora hope'a ko hape 'ana 'ō a ia».

⁷ Mo kōrua mo te nu'u haka moe i te mana'u 'i ruŋa i a Ietū, te mā'ea ena mā'ea hauha'a rahi. 'E mo te nu'u ta'e haka moe i te mana'u 'i ruŋa i a ia, e kī ena 'i ruŋa i te Pāpa'i Mo'a pē nei ē:

«Te mā'ea ta'e haŋa era e te nu'u aŋa hare,
ko riro 'ana he mā'ea matu'a haka noho hare».

⁸ 'E e kī tako'a ena:

«He mā'ea e tahi 'i ruŋa ka tu-tuki ena».

Te nu'u ta'e haka moe i te mana'u 'i ruŋa i a Ietū e tu-tuki ena 'o te ta'e ha'atura ki te roŋo o te 'Atua, he me'e mau 'ana mo topa ki te nu'u ta'e haka roŋo.

⁹ 'E a kōrua he hua'ai to'o e te 'Atua, he oromatu'a aŋa ki te 'ariki, he nu'u ha'ata'a mā'ana, 'e he taŋata haka tere e ia. Te 'Atua, kope haka e'a i a kōrua mai roto i te pōhāhā o te me'e ta'e tano mo o'o ki roto i tō'ona mōrī nui-nui ena, i ha'ata'a ai i a kōrua mo haka 'ite mo oho o ruŋa i te me'e nui-nui aŋa e ia. ¹⁰ 'I mu'a 'ana ta'e kōrua he nu'u o te 'Atua, 'e hora nei he nu'u 'ā'ana; 'i mu'a 'ā kai ŋaro'a e kōrua i te riva rahi o te 'Atua, 'e hora nei e ŋaro'a rō 'ana e kōrua.

E u'i te kōrua haka tere iŋa

¹¹ E te taina, a kōrua pa he nu'u o te kona kē noho 'i te ao nei mo te hora 'iti-'iti nō e tahi. 'O ira, 'ina ko va'ai i a kōrua ki te me'e pohe nō o te hakari, he me'e haka tapa i a kōrua mai te ara o te 'Atua. ¹² E noho kōrua 'ina e tahi hape 'i roto i te nu'u ta'e haŋa ki te 'Atua. Mo noho o kōrua pē ira, he take'a e rā nu'u i te me'e riva-riva aŋa e kōrua 'e he ha'ahana-hana ki te

'Atua 'i te mahana ka kī era e ia i te me'e tano 'e i te me'e ta'e tano aña e te tañata, ka ai atu 'i te hora nei e kī rō 'ana e rāua pē nei ē: a kōrua he nu'u aña i te me'e ta'e tano.

E ha'atura ki te nu'u ra-rahi

¹³ Pa he mo'a iña i te tātou Pū'oko Haka Tere ko Ietū Kiritō ana ha'atura kōrua i te nu'u ra-rahi ta'ato'a. E ha'atura kōrua ki te 'ariki rōmano, i a ia te tōro'a hope'a o te nui-nui, ¹⁴ 'e ki te suerekao uña e ia mo haka ūtu'a i te nu'u aña i te me'e ta'e tano 'e mo haka paka mo haka nui-nui i te nu'u aña i te me'e tano. ¹⁵ Te 'Atua, pa'i, e haña rō 'ana mo aña o kōrua i te me'e riva-riva. Pē ira he 'api i te haha o te nu'u ma'a-ma'a tuhi atu i te kōrua hape, he ta'e haña mo aña-āni i te me'e o te 'Atua.

¹⁶ E noho kōrua pa he nu'u ta'e haka tere e te me'e o te ao nei; te 'Atua, pa'i, ko haka e'a 'ana i a kōrua mai rā haka tere iña. 'E, ka ai atu pē ira, e u'i 'o riro te parauti'a nei he 'ōtohe e tahi mo aña o kōrua i te me'e ta'e tano. Te me'e haña mau: e noho kōrua pa he tāvini o te 'Atua. ¹⁷ E mo'a kōrua i te tañata ta'ato'a. E haña ki te taina, e ha'amuri ki te 'Atua 'e e mo'a i te pū'oko haka tere o te kōrua henua.

Te me'e mo aña o te 'ekaravo

¹⁸ E te 'ekaravo, e ha'atura 'e e mo'a kōrua i te tañata haka aña i a kōrua ka ai atu he tañata riva 'o ta'e riva. ¹⁹ Te 'Atua, pa'i, e ha'amaitai rō 'ana i te kope 'amo 'e ha'aoroma'i hai pūai i te ūtu'a ta'e tano topa 'i ruña i a ia 'i te haña mo aña i te me'e tī-tika ki te mata o te 'Atua. ²⁰ Te 'amo 'e te ha'aoroma'i i te ūtu'a 'o te aña i te me'e ta'e tano, 'ina e tahi hauha'a. 'E mo 'amo 'e mo ha'aoroma'i hai pūai i te ūtu'a 'o te aña i te me'e tī-tika, he koa te 'Atua. ²¹ Mo nei me'e te 'Atua i ha'ata'a ai i a tātou. Te Kiritō, pa'i, i 'amo rō pē ira i te 'ati mo tā-tou, 'e pē ira i haka rē mai ai i te ha'aaura'a pē hē a tā-tou ana haka tere.

²² Kai hara te [Kiritō] 'e kai reo-reo ki te hora hope'a. ²³ Hora vā-vā era i a ia, 'ina he pāhono hai vānaña ta'e tano, 'e hora tōtōā era, 'ina kai kī i te vānaña mo haka ri'a-ri'a i te tañata. Te me'e mau nō i aña he haka rē i a ia ki te rima o te 'Atua, kope ture hai tī-tika. ²⁴ A Ietū i 'amo ai i te tātou hara 'i ruña i te tātaurō, ki haka rē ai a tātou i te aña i te me'e ta'e tano, 'e ki tano ai te tātou noho iña ki te mata o te 'Atua. Hai 'amo e ia i te 'ati i ora ai tātou. ²⁵ 'I mu'a 'ā, pa'i, e ha'ere era a tātou pa he māmoe ko ŋaro 'ana, 'e, hora nei, ko hoki tahi 'ana ki te Kiritō, kope hāpa'o mai i a tātou pa he tañata hāpa'o māmoe.

Te me'e mo aña o te nu'u hāipo-ipo

3 ¹⁻² 'E a kōrua, e te ŋā vi'e [hāipo-ipo] ē, e ha'atura ki te kōrua kenu, ka ai atu he kenu ta'e [haka moe i te mana'u] 'i ruña i te [roño riva-riva o ruña i a Ietū]. Mo aña o kōrua pē ira, he huri pēaha te mana'u, 'e he haka moe tako'a i tō'ona mana'u 'i ruña i a Ietū, 'e ta'e

'ō 'o te me'e i kī e kōrua, 'o te take'a i te kōrua noho iña tano, noho iña mo'a 'e ha'atura ki te 'Atua.

³ Te me'e mo haka nehe-nehe i a kōrua 'ina ko ai hai me'e o te haho nō, pa he ha-hari huru kē i te rau'oho, pa he me'e piru, 'e pa he kahu hope'a o te nehe-nehe. ⁴ E ai hai me'e o roto i te māhatu, pa he huru riva 'e haumārū, he nehe-nehe ta'e ŋaro ki te hora hope'a. Te nehe-nehe tu'u pē nei e hauha'a rahi rō 'ā ki te 'Atua.

⁵ Pē ira te ŋā vi'e mo'a 'e ha'atura ki te 'Atua o mu'a 'ā e haka nehe-nehe era. A rāua e haka noho rō 'ana i te mana'u 'i ruña i te 'Atua 'e e ha'atura rō 'ana ki te rāua kenu. ⁶ Pē ira te vi'e era ko Tara, vi'e ha'atura ki tā'ana kenu ko [Aparahama] kī mō'ona: «e te pū'oko ō'oku ē». 'E a kōrua, e te ŋā vi'e hāipo-ipo ē, mo aña i te me'e riva-riva 'e mo ta'e ri'a-ri'a e tahi me'e, pē [Tara] 'ā ia a kōrua.

⁷ 'E a kōrua, e te kenu hāipo-ipo ē, e haña e hāpa'o riva-riva i te kōrua ŋā vi'e. Ka ai atu 'ata hau rō atu te kōrua pūai ki a rāua, e mo'a 'i te 'ite pē nei ē: mo rāua tako'a te hauha'a ka va'ai ena e te 'Atua, he ora 'āpī 'ina he hope'a ra'a. Mo ta'e aña o kōrua pē ira he hihihī i te kōrua pure.

Te me'e mo aña o te [kiritiano] ta'ato'a

⁸ Te me'e haña: e noho kōrua ta'ato'a 'i roto i te haumārū 'e e tahi mau nō mana'u. E here 'i roto i a kōrua pa he taina. E riva kōrua, 'e 'ina ko mana'u pē nei ē: i hau rō atu kōrua ki te rua. ⁹ 'Ina ko aña hai me'e rake-rake ki te nu'u aña atu i te me'e rake-rake, 'e 'ina ko parau'ino ki te nu'u parau'ino atu. Te me'e o kōrua mo aña he ani ki te 'Atua mo ha'amaitai i rā nu'u. Te 'Atua, pa'i, i ha'ata'a ai i a kōrua mā'ana mo ha'amaitai atu e ia. ¹⁰ Pē nei e kī ena 'i ruña i te [Pāpa'i Mo'a]:

«Te kope haña mo riva-riva 'e mo koa o tō'ona noho iña 'i te ao nei,

e 'ite mo haka noho i tō'ona 'arero 'o vānaña i te me'e ta'e tano, 'e 'o kī i te reo-reo.

¹¹ E haka tapa mai te me'e ta'e tano 'e e aña i te me'e tī-tika ki te mata o te 'Atua; e kimi i te ara o te haumārū 'e 'ai ka oho rō a ira.

¹² Te 'Atua, pa'i, e hāpa'o rō 'ana i te nu'u aña i te me'e tī-tika

'e e haka roño rō 'ana i te rāua pure.

'E 'ina he haka tano i te mana'u o te nu'u aña i te me'e ta'e tano».

¹³ Mo aña mo oho nō o kōrua i te me'e riva-riva, ¿ko ai ia te me'e mo aña atu i te me'e rake-rake? ¹⁴ 'E mo topa atu o te 'ati 'i ruña i a kōrua, ka ai atu e aña 'ana i te me'e tī-tika, he ha'amaitai atu kōrua e te 'Atua. 'O ira, 'ina ko ri'a-ri'a 'i te nu'u tōtōā atu. ¹⁵ Te me'e o kōrua mo aña: he ha'amuri ki a Ietū Kiritō 'i roto i te māhatu pa he Pū'oko Haka Tere o kōrua i a ia te kī iña hope'a o te me'e mo topa atu ki a kōrua. 'E 'i te hora ta'ato'a e 'ite pē hē kōrua ka pāhono ena ki te nu'u 'ui

atu he aha kōrua e haka moe ena i te mana'u 'i ruŋa i a Ietū. ¹⁶ 'E ana pāhono, hai haumārū 'e hai mo'a. 'Ina kōrua ko aŋa i te me'e ta'e tano. Pē ira te nu'u vānaŋa ta'e tano o ruŋa i a kōrua ka ha'amā ena 'i te rāua vānaŋa 'i te take'a i te kōrua noho iŋa tano 'o te ai o kōrua he nu'u haka moe i te mana'u 'i ruŋa i te [Kiritō].

¹⁷ 'Ata hau rō atu 'i te tano mo 'amo i te 'ati topa 'i ruŋa i a kōrua 'o te aŋa i te me'e riva-riva, ana haŋa te 'Atua, ki te 'amo i te 'ati 'o te aŋa i te me'e ta'e tano. ¹⁸ 'I te hara, pa'i, o tātou i mate ai te Kiritō, 'e tō'ona mate era mo te hora ta'ato'a. 'Ina e tahi 'ā'ana me'e ta'e tano i aŋa 'e, mo haka riva-riva i a tātou ki te 'Atua, i 'amo ai i te ūtu'a o te mate mo tātou, nu'u aŋa i te me'e ta'e tano. Ka ai atu i mate rō tō'ona hakari taŋata, he vāua ō'ona te me'e i ta'e mate. ¹⁹ Hai vārua era ō'ona i oho i tātara ai ki te vārua e puru rō 'ā, ²⁰ vārua o te nu'u o te noho iŋa era o Nōē ta'e ha'atura ki te 'Atua, nu'u tiaki 'e ha'aoroma'i e te 'Atua, 'i te matahiti ta'ato'a aŋa era e Nōē i te pahī, mo hāru i o te rāua mana'u ki ruŋa i a ia. 'E 'i rā hora, hoko va'u nō i uru ai ki roto i te pahī 'e i ora ai 'i te 'ati era o te vai. ²¹ 'E nei me'e e tu'u rō 'ā pa he e'a iŋa o tātou mai roto i te ūtu'a o te hara he mate, me'e e ha'aaura'a nei hai [papatito]. 'E nei papatito ta'e e haka ma'itaki 'ā i te hakari; e kī 'ā ki te 'Atua pē nei ē: e ko haka rē a tātou i a ia ki te hora hope'a 'i te 'ite e tātou ko haka kore 'ana e ia i te tātou hara hai ora iŋa era o Ietū Kiritō mai te mate. ²² 'E hora nei, 'ai te raŋi 'i te pā'iŋa mata'u o te 'Atua, kona mo te kope hope'a o te hōnui, e noho ena 'e e haka tere ena i te merahi ta'ato'a 'e i te ŋā vārua ta'ato'a ena e ai rō 'ana te rāua tōro'a 'e pūai.

4 Ko 'ite 'ana e tātou: a Ietū Kiritō i 'amo rō i te 'ati 'i te ao nei. 'I roto i tō'ona mana'u, pa'i, ko haka tano era 'ana i a ia mo aŋa pē ira, ana haŋa te 'Atua. 'O ira te tātou mana'u e tu'u pa he mana'u mau era 'ā ō'ona. Te kope mana'u pē ira ko hāru i 'ana hai tua'ivi i te hara, ² 'e te me'e haŋa nō 'ā'ana mo te hora toe ō'ona 'i te ao nei he haka tere i a ia e te me'e haŋa e te 'Atua, 'e ta'e 'ō e te me'e ta'e tano pohe e te hakari.

³ A kōrua, matahiti rahi i aŋa i oho ai i te me'e aŋa e te nu'u ta'e haŋa ki te 'Atua. Te noho iŋa o kōrua 'i rā hora noho iŋa ta'e tano: e aŋa 'ana i te me'e ta'e tano pohe e te hakari, i te ŋoŋoro ta'e hāito i te kai 'e i te 'ava, 'e e ha'amuri 'ana ki te 'ītoro, me'e hano-hano mo te 'Atua. ⁴ 'E, hora nei, 'i te haka tapa o kōrua mai muri i rā nu'u 'i te rāua noho iŋa ta'e tano, he māere 'e he vānaŋa ta'e tano mo kōrua. ⁵ Ka ai atu pē ira, pe mu'a ka oho ena, ka ta'e haŋa atu e rāua, e kī tahi nō i te rāua me'e i aŋa ki te kope mā'ana e ture i te nu'u ora 'e i te nu'u mate. ⁶ 'E ki te taina ko mate 'ā 'i te hora nei i haka 'ite rō i te [rono riva-riva o ruŋa i a Ietū] 'i te hora era e ora nō 'ā, mo rava'a e te rāua vārua i te ora 'i muri i te 'Atua, ka ai atu ko mate 'ana te rāua hakari taŋata, he ūtu'a mau 'ā mo te taŋata ta'ato'a.

E hā'ū'ū ki te rua hai haŋa 'e hai pūai o te 'Atua

⁷ Te pa'o iŋa o te ao nā ko hāhine mai 'ana. 'O ira, e 'ite mo hāito i te kōrua me'e kī 'e i te kōrua me'e aŋa, ki riva ai te kōrua pure.

⁸ 'I roto i a kōrua te me'e mo ra'e he here he haŋa ki te rua. Mo haŋa, pa'i, o tātou ki te rua hai māhatu, me'e ta'e aŋarahi ia te me'e ena he haka rehu i te me'e ta'e tano aŋa mai e te rua, ka ai atu me'e rahi.

⁹ E to'o e hāpa'o te taina tu'u atu ki te kōrua hare, 'e 'ina ko hēŋu'i-ŋu'i mo rāua.

¹⁰ Hai me'e va'ai atu e te 'Atua mo aŋa i tā'ana aŋa, e hā'ū'ū ki te rua, pa he nu'u 'ite i te haka tere riva-riva i te rauhuru me'e va'ai e ia. ¹¹ Te aura'a: te kope ki a ia i va'ai ai e te 'Atua i te me'e he haka 'ite i tā'ana vānaŋa, e haka 'ite i te vānaŋa mau 'ā o te 'Atua. 'E te kope ki a ia i va'ai ai i te me'e he hā'ū'ū ki te rua, e aŋa hai pūai va'ai e te 'Atua, ki ha'ahana-hana tahi ai ki te 'Atua hai Ietū Kiritō, i a ia te nui-nui 'e te pūai ki te hora hope'a. Ka ai pē ira.

E koa 'i te hora topa atu o te 'ati

¹² E te taina haŋa rahi ē, 'ina kōrua ko māere 'o te ai ko topa atu 'ana te 'ati 'i ruŋa i a kōrua, pa he haka 'atu iŋa ena i te pīru hai ahi, 'e 'ina ko mana'u he me'e huru kē e tahi. ¹³ Te tano mau: e koa kōrua 'o te 'amo tako'a i te mamae tu'u pa he mamae 'amo e te [Kiritō], ki rahi ai te kōrua koa 'i te hora ka haka take'a mai ena i tō'ona nui-nui.

¹⁴ E koa kōrua mo vā-vā atu e te nu'u 'o te ai o kōrua 'a Ietū Kiritō; hai me'e nei e 'ite ena: te [Vārua Maitai] pūai o te 'Atua nā 'i ruŋa i a kōrua 'i te hora ta'ato'a.

¹⁵ Mo 'amo o kōrua i te 'ati, pē hiva 'ā ana ta'e ai 'o te tiŋa'i 'o te haka mate i te taŋata, 'o te toke i te me'e o te rua, 'o te aŋa i te me'e taparahi-ta'ata, 'e 'o te 'āmui ki roto i te ture kē. ¹⁶ Me'e kē te me'e he 'amo i te 'ati 'o te ai o kōrua he [kiritiano], 'e, mo topa atu, 'ina ko ha'amā. Te me'e mo aŋa: he ha'ahana-hana i te 'Atua 'o te ai o kōrua 'a Ietū Kiritō.

¹⁷ Nā ko tu'u mai 'ana te hora mo ha'amata o te ture, 'e ka ha'amata ena a te hua'ai o te 'Atua. 'E mo ha'amata o te ture mai i a tātou, ōpē hē ia te hope'a ra'a o te nu'u 'ina he ha'atura ki te [rono riva-riva o te 'Atua]?

¹⁸ Mo ha'ati'a o te 'Atua mo topa o te 'ati 'ātā 'i ruŋa i te nu'u tano ki tō'ona mata 'i ra'e ki te to'o i a rāua ki te raŋi, ōhe aha rā nei te me'e ka topa ena ki te taŋata hara ta'e mo'a i a ia? ¹⁹ 'O ira, te nu'u 'amo i te 'ati 'o te ai pē ira te 'Atua i haŋa ai, e aŋa e oho nō i te me'e riva-riva, 'e e va'ai i a rāua ki tō'ona rima, kope 'ā'ana a rāua i aŋa, 'e kope ki te hora hope'a e ko ta'e aŋa i tā'ana me'e kī.

He hatu mo te nu'u pū'oko haka tere

5 Hora nei e haŋa rō 'ana a au mo hatu ki te ŋā pū'oko haka tere ena o kōrua o te nu'u [haka moe i te mana'u] 'i ruŋa i a Ietū. A au he pū'oko haka tere tako'a, pē rāua, 'e he mata'ite o te 'ati topa era 'i ruŋa i

te [Kiritō]. Pē rāua e o'o tako'a rō a au 'i roto i tō'ona nui-nui ka haka take'a ena, te aura'a, i a au tako'a, pe mu'a ka oho ena, te huru riva ō'ona.

² E te pū'oko haka tere, e hāpa'o riva-riva kōrua i te māmoe o te 'Atua haka hāpa'o atu ki a kōrua. 'E ana hāpa'o, hai māhatu, pa he me'e haŋa o te 'Atua, ta'e 'ō 'o te ai nō 'ā'ana i kī atu. E hāpa'o hai haŋa, ta'e 'ō hai pohe ki te moni. ³ 'Ina ko mana'u: o kōrua rā māmoe haka hāpa'o atu era. Te me'e mo aŋa he haka take'a ki a rāua pē hē a rāua ana haka tere hai haka tere iŋa tano ena o kōrua. ⁴ Pē ira, 'i te hora o te tu'u iŋa haka 'ou mai o te Pū'oko Haka Tere o te nŋaŋata hāpa'o māmoe ta'ato'a, he haka hei atu i a kōrua hai me'e 'ina e ko ŋaro ki te hora hope'a, ko te me'e ena: he noho mau rō 'ai kōrua 'i muri i a ia 'i roto i tō'ona nui-nui 'ana-'ana.

He hatu mo te ta'ato'a nō taina

⁵ 'E a kōrua, e te ŋā poki 'āpī ē, e ha'atura ki te kōrua nu'u pū'oko haka tere. 'I roto i a kōrua i te nu'u haka moe i te mana'u 'i ruŋa i a Ietū 'ina ko ai e tahi kope mana'u i hau rō atu a ia ki te rua 'o te ai:

«Te 'Atua 'ina he haka tano i te mana'u o te nu'u mana'u i hau rō atu rāua ki te tētahi, 'e ki te nu'u ta'e mana'u pē ira, e hā'ū'ū ena hai riva rahi ō'ona».

⁶ E haka hauha'a-'ore kōrua i a kōrua 'i mu'a i te pūai nui-nui o te 'Atua, ki haka nui-nui atu ai i a kōrua 'i te hora tano ki a ia. ⁷ E haka rē 'i te rima o te 'Atua te me'e ta'ato'a haka mana-mana'u atu i a kōrua; e haŋa rō 'ana, pa'i, a ia mo hāpa'o atu i a kōrua.

⁸ E veveri e 'ara kōrua; te kope ta'e haŋa atu ena ko Rukifero, nā e kimi e oho 'ana, pa he reone maruaki, ki

te taŋata mo kai. ⁹ 'Ina ko ha'ati'a mo haka tere atu i a kōrua. E haka hio-hio e oho te kōrua haka moe iŋa i te mana'u 'i ruŋa i te 'Atua 'i te 'ite pē nei ē: 'i te kona ta'ato'a o te ao, e topa tako'a rō 'ana te 'ati tu'u pē ira ki te kōrua taina. ¹⁰ 'E ki oti i te ha'aoroma'i tahi i te 'ati topa atu 'i ruŋa i a kōrua, he me'e e ko roa rahi, he haka riro e te 'Atua i a kōrua he nu'u 'ina e tahi hape, e hio-hio rō 'ana te mana'u 'i ruŋa i a ia, nu'u pūai mo ha'aoroma'i, 'e nu'u noho, ki te hora hope'a, 'i te ara o te 'Atua. A ia, pa'i, he 'Atua kī mai, 'i tō'ona riva rahi, mo noho o tātou 'i muri i a ia 'ina he hope'a ra'a 'i roto i tō'ona nui-nui 'ana-'ana hai haka moe o tātou i te mana'u 'i ruŋa i a Ietū Kiritō, ¹¹ 'e 'Atua hope'a o te pūai haka tere i te me'e ta'ato'a 'ina he hope'a ra'a. Ka ai pē ira.

He 'aroha

¹² A Tirivano i hā'ū'ū mai mo pāpa'i atu i te parau nei. Mō'oku a ia he taina ta'e haka rē i te 'Atua ki te hora hope'a.

Tā'aku me'e 'iti-'iti haka pāpa'i atu ena he me'e mo hatu 'e mo haka aŋi-aŋi atu pē nei ē: te riva rahi 'e te haŋa o te 'Atua 'i ruŋa i a kōrua. 'O ira, e u'i 'o hāruī rō hai tua'ivi i tō'ona haŋa mo kōrua.

¹³ Te nu'u haka moe i te mana'u 'i ruŋa i a Ietū o [Vāvīrōnia], † ha'ata'a e te 'Atua mā'ana, pa he ha'ata'a iŋa ena i a kōrua, 'i e 'aroha atu ena 'e pē ira tako'a 'ana a Marko, he kope pa he poki 'ā 'ā'aku.

¹⁴ E 'aroha kōrua ki te kōrua taina hai māhatu.

Ka ai te haumārū 'i roto i a kōrua ta'ato'a, e te nu'u o te Kiritō ē.

† Te VĀVĪRŌNIA 'i te kona nei ko Roma.

2 PĒTERO

Te kī o te kope 'ā'ana te parau nei: tō'ona 'īŋoa ko Tīmona Pētero. I pāpa'i ai i te parau nei mo te nu'u ta'ato'a [haka moe i te mana'u] 'i ruŋa i a Ietū. E toru hāpī pūai o ruŋa nei: he hatu iŋa mo ma'u hio-hio mo oho i te hāpī parauti'a o ruŋa i a Ietū (1.1–21), he vānaŋa o ruŋa i te ma'ori hāpī reo-reo (2.1–22), 'e he vānaŋa o ruŋa i te hoki iŋa mai o te [Kiritō] (3.1–13).

'I te hāpī ra'e he kī mai e Pētero: (1.3). 'O ira, e haka rē tātou mo haka tika mai e te 'Atua 'e e ma'u hio-hio i te hāpī parauti'a o ruŋa i a ia.

'I te rua hāpī he vānaŋa mai a Pētero o ruŋa i te ma'ori hāpī reo-reo. Ki tā'ana kī, ko hāruī 'ana a rāua hai tua'ivi i te tātou Pū'oko Haka Tere ko Ietū Kiritō, 'e e haka tere ena hai me'e ta'e tano pohe nō e te hakari. He kī mai pē nei ē: ko ai era 'ana te ūtu'a o te 'Atua mo rāua, 'e e ko ta'e haka ūtu'a. 'E he hatu mai: e hāpa'o tātou te nu'u haka moe parauti'a i te mana'u 'i ruŋa i a Ietū, 'o haka tapa mai te ara parauti'a, 'e 'o 'ata 'ati a tātou ki te hora ra'e era, hora kai haka moe hia 'ana i te mana'u 'i ruŋa i a ia (2.20).

'I roto i te hāpī o ruŋa i te hoki iŋa mai o Ietū he kī mai pē nei ē: e ai rō, 'i te ŋā mahana hope'a era, te nu'u mana'u ta'e he parauti'a te vānaŋa o ruŋa i te hoki iŋa mai o Ietū 'e o ruŋa i te ture hope'a, nu'u haka me'e-me'e o ruŋa i rā ŋā me'e. Ka ai atu pē ira, te me'e mo ta'e rehu i a tātou: te ŋā me'e nei 'a Ietū 'e o tā'ana 'āpō-toro i hāpī. 'O ira e 'ite nei e tātou: rā ŋā me'e e ko ta'e topa. 'E he haka haŋu mai hai ŋā vānaŋa nei: (3.9).

He 'aroha

1 A au, a Pētero, kī tako'a ko Tīmona, tāvini 'e [‘āpōtoro] 'a Ietū Kiritō, he 'aroha atu ki a kōrua ki te nu'u i a rāua tako'a te hauha'a he [haka moe i te mana'u] 'i ruŋa i a Ietū, pa he haka moe iŋa nei o te mātou mana'u, he me'e rava'a hai riva rahi o te 'Atua 'e o Ietū Kiritō, kope haka e'a i a tātou mai roto i te ūtu'a o te hara 'e va'ai mai i te ora 'āpī 'ina he hope'a ra'a. ² Ka rahi ka oho te riva rahi 'e te haumārū o te 'Atua 'i ruŋa i a kōrua 'i te hora ta'ato'a 'ite oho o kōrua o ruŋa i a ia 'e o ruŋa i a Ietū, Pū'oko Haka Tere o tātou.

Te me'e haŋa o te 'Atua i a tātou

³ Te 'Atua, hai pūai ō'ona, e hā'ū'ū mai ena hai rauhuru rāve'a mo riva o tātou mo ha'atura ki a ia 'e mo tano o te tātou noho iŋa ki tō'ona mata. Te me'e nei e rava'a ena hai māhani o tātou ki a ia, kope ha'ata'a i a tātou mo hua'ai 'ā'ana hai haka 'ite mai i tō'ona huru riva 'e i tō'ona pūai nui-nui. ⁴ Hai ŋā me'e nei i va'ai mai ai i te me'e nui-nui 'e hauha'a hōrea mai era mo tātou. 'E hai rā ŋā me'e hōrea mai era e riva nei tātou mo e'a mai roto i te mana'u ta'e tano o te ao nei 'e mo riro o tātou pē ia, te aura'a, mo ai i a tātou tako'a tō'ona huru riva.

⁵ 'O ira, e va'ai tahi kōrua i a kōrua mo aŋa i te me'e nei: ki te kōrua haka moe iŋa i te mana'u 'i ruŋa i a Ietū, e 'āmui te noho iŋa tī-tika ki te mata o te 'Atua, 'e ki te noho iŋa tī-tika, te 'ite i te haka topa riva-riva i te mana'u, ⁶ 'e ki te 'ite i te haka topa riva-riva i te mana'u, te 'ite i te haka noho 'o hara, 'e ki te 'ite i te haka noho 'o hara, te 'ite i te ha'aoroma'i hai haumārū, 'e ki te 'ite i te ha'aoroma'i hai haumārū, te mo'a 'e te

ha'atura ki te 'Atua, ⁷ 'e ki te mo'a 'e ha'atura ki te 'Atua, te haŋa ki te taina haka moe i te mana'u 'i ruŋa i a Ietū, 'e ki te haŋa ki te taina, te haŋa mo te taŋata ta'ato'a.

⁸ 'E mo ai nā i a kōrua te ŋā me'e nei 'e e haka pūai e oho rō 'ana, 'ina ia te kōrua noho iŋa e ko māu'a, 'e te māhani o kōrua ki te tātou Pū'oko Haka Tere ko Ietū Kiritō e ko māu'a tako'a. ⁹ 'E te ŋā taina ena 'ina he ŋā me'e ena i a rāua, pa he nu'u matakeva 'ā, ko rehu 'ana i a rāua: te hara o rāua o mu'a 'ā ko haka kore 'ana.

¹⁰ 'O ira, e te taina ē, e va'ai tahi kōrua i a kōrua mo tano o te kōrua noho iŋa ki te mata o te 'Atua, ki take'a ai e te nu'u: he parauti'a mau 'ā a kōrua he nu'u ha'ata'a e te 'Atua mā'ana mo haka moe i te mana'u 'i ruŋa i a Ietū. Mo aŋa o kōrua pē ira, e ko haka tapa kōrua mai te ara parauti'a ki te hora hope'a, ¹¹ 'e te 'Atua, hai koa, ka haka uru ena i a kōrua ki roto i te ao 'i-na he hope'a ra'a, he ao haka tere e te tātou Pū'oko ko Ietū Kiritō, kope haka e'a i a tātou mai roto i te ūtu'a o te hara 'e va'ai mai i te ora 'āpī 'ina he hope'a ra'a.

Te hāpī nei he parauti'a

¹² 'O ira a au, e te taina ē, ka haka mana'u ka oho atu ena o ruŋa i te me'e ta'ato'a ena, ka ai atu, nā e ma'u hio-hio mai ena kōrua i nā parauti'a. ¹³ 'Ē-ē, mai ora atu 'ana a au, tā'aku me'e ka aŋa nei he haka mana'u he oho atu o ruŋa i te ŋā me'e hatu atu era e au. ¹⁴ Te tātou Pū'oko Haka Tere, pa'i, ko Ietū Kiritō ko haka 'ite mai 'ana: e ko roa he haka rē a au i te ao nei. ¹⁵ 'O ira a au e va'ai tahi atu ena i a au mo hāpī atu i te ŋā me'e nei, ki te kona, ka mate ena a au, e ko rehu i a kōrua ki te hora hope'a.

¹⁶ Te hāpī haka 'ite atu era e mātou o ruŋa i te pūai nui-nui o te tātou Pū'oko Haka Tere ko Ietū Kiritō 'e o ruŋa i tō'ona hoki iŋa mai, ta'e he 'a'amu e tahi. Hai mata mau nei 'ā o mātou i take'a ai i tō'ona pūai nui-nui. ¹⁷ I take'a rō, pa'i, e mātou i te pūai 'ana-'ana ō'ona hora haka paka era e te 'Atua Matu'a mai te raŋi pē nei ē: «A ia he poki haŋa rahi 'ā'aku, 'i ruŋa i a ia tō'oku koa». ¹⁸ O mātou mau 'ā i ŋaro'a i rā re'o e vānaŋa mai 'ana mai te raŋi 'i ruŋa i te ma'uŋa mo'a era; 'i rā hora, ananake mātou ko te tātou Pū'oko Haka Tere.

¹⁹ Pē ira a mātou e 'ite nei: te me'e ta'ato'a kī era e te perofeta o mu'a 'ā o ruŋa i a Ietū he parauti'a mau 'ā, 'e te me'e tano o kōrua mo aŋa he haka roŋo tako'a ki rā ŋā me'e kī era e rāua 'o te ai rā ŋā me'e pa he hakari'i pura 'i te kona pōhāhā, 'ātā ki te 'ōtea 'e ki te e'a iŋa o te hetu'u popohaŋa mo haka mā'eha i te kōrua māhatu, te aura'a, 'ātā ki te hoki iŋa mai o Ietū Kiritō, hora ka haka aŋi-aŋi mai ena i te me'e ta'ato'a. ²⁰ 'E hora nei, te me'e hope'a o te nui-nui mo aŋi-aŋi e kōrua: 'ina e tahi me'e pāpa'i e te perofeta 'i ruŋa i te [Pāpa'i Mo'a] mo ha'aaura'a hai mana'u o kōrua 'ā.

²¹ Te perofeta, pa'i, 'ina kai vānaŋa hai mana'u taŋata; i vānaŋa ai hai mana'u o te 'Atua, 'e o te [Vārua Maitai] i haka vānaŋa.

Te ma'ori reo-reo

2 I ai rō te perofeta reo-reo 'i roto i te itaraera. Pē ira tako'a 'ana ka ai ena te ma'ori reo-reo 'i roto i a kōrua. 'Ē-ē, e o'o rō atu ki roto i a kōrua, mā te ta'e 'ite e kōrua, 'e e hāpī e oho rō i te hāpī ta'e parauti'a ma'u i te taina mo haka tapa mai te ara parauti'a o te 'Atua. 'E te ŋā ma'ori reo-reo nei 'ātā e hāruī rō hai tu-a'ivi i te tātou Pū'oko Haka Tere ko Ietū Kiritō, kope 'auhau hai toto era ō'ona mo haka e'a i a tātou mai roto i te hara. 'E, 'i te aŋa pē ira, e ko roa hia ka rava'a ena e rāua i te ūtu'a o te 'Atua. ² Ka ai atu pē ira, e rahi rō te nu'u ka aŋa tako'a ena i te me'e ta'e tano aŋa e te ŋā ma'ori reo-reo era, 'e hai noho iŋa ta'e tano o rā nu'u ka ai ena te vānaŋa ta'e tano mo te ara parauti'a o te 'Atua. ³ 'I te nou-nou o te ŋā ma'ori reo-reo era, he u'i i te rāve'a mo 'ata to'o i te moni mai i a kōrua hai hāpī reo-reo o rāua, hāpī poreko 'i roto i te rāua mana'u mau nō era. 'E mo te nu'u ena, ko ai era 'ana te ūtu'a o te 'Atua mai mu'a 'ā, 'e a ia e ko ta'e haka ūtu'a i a rāua.

⁴ Te 'Atua 'ina kai haka rehu i te hara o te merahi aŋa i me'e ta'e tano. Te me'e i aŋa: he ava i rā ŋā merahi ki roto i te pō'auahi, 'e i haka rē ai 'i roto i te pō'uri e here-here rō 'ana hai vivi mo te mahana o te ture. ⁵ 'E 'ina kai haka rehu tako'a i te hara o te nu'u aŋa i te me'e ta'e tano o mu'a 'ā. Te me'e i aŋa: he uŋa mai ki ruŋa i te ao nei i te 'ua ta'e mo mahana haka 'ou 'ātā ki te roa mo emu o te me'e ta'ato'a, 'e te taŋata i haka ora ko Nōē, he kope haka 'ite o ruŋa i te noho iŋa tī-tika ki te mata o te 'Atua, 'e he nu'u haka 'ou hoko hitu. ⁶ 'E te ŋā kona era ko [Tōroma] 'e ko [Kōmora] i haka ūtu'a rō e te 'Atua hai ahi 'ātā ka topa rō he 'eo-'eo,

mo haka take'a he aha te me'e mo topa ki te nu'u aŋa i te me'e ta'e tano. ⁷ Te taŋata i ora o rā ŋā kona ko [Rota], he taŋata aŋa i te me'e tī-tika ki te mata o te 'Atua. A ia e ta'e au rō 'ana 'i te noho iŋa ta'e tano o te nu'u taparahi-ta'ata o ira. ⁸ Te taŋata nei e māui-ui rō 'ana te māhatu paurō te mahana e noho era 'i muri i rā nu'u e ŋaro'a era 'e e take'a era i te me'e ta'e tano aŋa e rāua.

⁹ Hai ŋā ha'aaura'a nei e 'ite ena e ai rō 'ana te pūai o te 'Atua mo haka e'a mai roto i te 'ati i te taŋata aŋa i te me'e tī-tika, 'e mo haka ūtu'a i te nu'u aŋa i te me'e ta'e tano, nu'u e tiaki e oho 'ā ki te mahana o te ture hope'a. ¹⁰ Te nu'u ka 'ata haka ūtu'a ena e te 'Atua he nu'u ta'e mo'a i a ia 'e he nu'u aŋa oho i te me'e pohe nō o te hakari. 'E te ŋā ma'ori reo-reo nei he nu'u pū'oko hio-hio, ta'e raku i te rāua vānaŋa, 'e ta'e ri'a-ri'a mo kī i te vānaŋa ta'e tano mo te kope 'ata hau rō atu ki a rāua. ¹¹ 'E, ka ai atu i te merahi te parau 'e te pūai 'ata hau rō atu ki te ŋā ma'ori reo-reo nei, 'ina he vā-vā 'e he kī i te vānaŋa ta'e tano 'i mu'a o te 'Atua mo rā ŋā ma'ori.

¹² Te nu'u nei pa he 'animare ta'e aŋi-aŋi e tahi me'e, 'animare noho hai me'e ŋaro'a nō o te hakari, poreko mo 'a-'aru mo tiŋa'i mo haka mate. Te nu'u nei he vānaŋa ta'e tano nō te aŋa mo te me'e 'ina he aŋi-aŋi e rāua 'e ka mate ena pa he 'animare ¹³ koia ko 'amo i te 'ati, he 'auhau o te me'e ta'e tano i aŋa ki te tētahi. E koa rō 'ana i te va'ai i a rāua ki te noho iŋa ta'e tano 'ātā 'i te 'ōtea, 'e 'ina he ha'amā haka 'ou. A rāua, 'i te hora hokorua atu 'i te kōrua ŋoŋoro, he 'ati 'e he ha'amā e tahi 'i te me'e ta'e tano 'e reo-reo aŋa oho e rāua mo reka.

¹⁴ 'Ina e tahi vi'e ta'e pohe e rāua mo moe; e ko rohi-rohi mo hara. Te aŋa nō he reo-reo ki te nu'u māhatu rehe-rehe; he 'aito mo te me'e he nou-nou; e ko ta'e haka ūtu'a rāua e te 'Atua. ¹⁵ Ko oho 'ana, pa'i, a te ara kē mai te ara tī-tika o te 'Atua. Te me'e aŋa oho he me'e aŋa e te perofeta era ko [Vārama], poki 'a Vō-toro, 'i te hora haŋa mo aŋa i te me'e ta'e tano mo rava'a moni. ¹⁶ I ture rō 'o tō'ona hara: o te muni mau 'ā ō'ona i ture i vānaŋa pa he taŋata, 'e 'ina kai haka rē mo aŋa i tā'ana me'e ma'a-ma'a mana'u era mo aŋa.

¹⁷ Te ŋā ma'ori reo-reo ena pa he pū vai 'ina he vai o roto, pa he raŋi ena 'ā e puhia ena 'i te tokerau, 'e te ūtu'a mo rāua he noho mau rō 'āvai 'i roto i te kona hope'a o te pō'uri. ¹⁸ He te'o-te'o te aŋa o ruŋa i a rāua hai vānaŋa 'ina e tahi aura'a. Hai me'e rake-rake mo te hakari 'e hai me'e ta'e tano pohe nō o te hakari e aŋa ena mo haka huri i te mana'u o te nu'u aŋa ri'a-ri'a i e'a ai mai roto i te me'e ta'e tano. ¹⁹ He kī nō te aŋa e tū ŋā ma'ori reo-reo ena: «Te nu'u oho mai a te ara o mātou 'ina he kope mo kī pē hē a rāua ana haka tere». 'E te parauti'a, te ŋā ma'ori reo-reo nei he 'ekaravo o te me'e ta'e tano aŋa e rāua. Te taŋata ta'ato'a, pa'i, he 'ekaravo o te me'e ta'ato'a haka tere i a rāua. ²⁰ Te nu'u e'a mai roto i te me'e ta'e tano o te ao nei hai [haka moe i te mana'u] 'i ruŋa i te tātou Pū'oko Haka Tere ko Ietū Kiritō, kope haka e'a i a tātou mai roto i te

ūtu'a o te hara, mo haka rē i a rāua mo haka tere haka 'ou e rā nā me'e, ka hope'a ena 'ata peore ki tū roa ra'e era. ²¹ I hau rō atu 'i te tano 'āhani i ta'e 'ite o ruŋa i te ara tī-tika o te 'Atua, ki te māhani 'e 'ai ka hāruai hai tua'ivi i te roŋo mo'a o te 'Atua va'ai ki a rāua. ²² I ruŋa i a rāua i haka tano ai te parauti'a o te kī iŋa era pē nei ē: «He hoki he kai te paiheŋa i tō'ona rua», 'e, «Te oru haka hopu iho he hoki he tū 'i roto i te rare-rare».

Te hoki iŋa mai o Ietū

3 E te taina, he rua parau nei 'ā'aku e pāpa'i atu ena. 'E hai nā parau nei i haŋa ai a au mo haka tī-tika atu i te kōrua mana'u. ² E mana'u kōrua ki te me'e kī e te perofeta 'i mu'a 'ana 'e ki te me'e hāpī atu e te [l'āpōtoro] o ruŋa i te roŋo o te tātou Pū'oko Haka Tere ko Ietū Kiritō, kope haka e'a i a tātou mai roto i te ūtu'a o te hara 'e va'ai mai i te ora 'āpī 'ina he hope'a ra'a.

³ Te me'e ra'e mo ta'e rehu i a kōrua ko te me'e nei: 'i te nā mahana hope'a era e ai rō te nu'u, te rāua noho iŋa hai me'e pohe nō e te hakari, 'e pa he haka me'e-me'e ⁴ ka 'ui era: «¿Ko aha 'ana rā te hōrea kī era pē nei ē: e hoki haka 'ou rō mai te [Kiritō]? Ko mā-mate tahi 'ana te tātou matu'a, 'e ko te noho iŋa 'ana 'ō te me'e ta'ato'a pa he hora aŋa era 'ā e te 'Atua i te ao». ⁵ Te nu'u era e haka rehu rō 'ā pē nei ē: ko ai era 'ana te raŋi 'e te henua, 'e o te 'Atua i haka e'a mai roto i te vai 'e i haka noho 'i tō'ona kona hai kī mau nō e ia. ⁶ 'E hai vai i haka kore ai e te 'Atua i te henua o mu'a 'ā. ⁷ Te raŋi 'e te henua o te hora nei ko haka rē 'ā e te 'Atua mo tutu hai ahi. 'I te mahana era o te ture hope'a 'e o te haka ūtu'a i te nu'u aŋa i te me'e ta'e tano ka tutu ena hai nei ahi.

⁸ E te taina, 'ina tako'a ko rehu: te mahana e tahi, mo te 'Atua, pa he matahiti e ho'e ta'utini, 'e te ho'e ta'utini matahiti, pa he mahana e tahi mō'ona. ⁹ Ta'e he ŋe'i o te 'Atua e ta'e topa ena te me'e kī e ia, pa he me'e mana'u e te tētahi nu'u. Te parauti'a, e tiaki 'ana ki a kōrua hai haumārū 'i te me'e era 'ina he haŋa mo mate e tahi nu'u. Tā'ana me'e haŋa he huri o te man-a'u o te taŋata ta'ato'a ki a ia.

¹⁰ Ka ai atu pē ira, te mahana o te hoki iŋa mai o te tātou Pū'oko Haka Tere ko Ietū Kiritō pa he toke-toke 'ā ka tu'u mai ena. E ŋaro'a rō i te heruru taparahi-ta'ata, 'e e ŋaro rō te raŋi. 'E te ra'ā, te hetu'u, te māhi-

na, 'e te henua koia ko te me'e ta'ato'a o ruŋa he vera tahi 'i te ahi.

¹¹ 'I te ai pē ira te me'e ta'ato'a ka haka kore ena, e tano te kōrua noho iŋa ki te mata o te 'Atua koia ko ha'atura 'e ko mo'a i a ia ¹² e tiaki ena kōrua ki te tu'u iŋa mai o te mahana era o te 'Atua, koia ko haŋa mo tu'u hōrou mai o rā mahana. 'I rā mahana he haka kore tahi e te ahi i te raŋi 'e i te me'e ta'ato'a o ruŋa pa he ra'ā, hetu'u 'e māhina; he tehe tahi 'i roto i te ura o te ahi. ¹³ Ka ai atu pē ira, a tātou 'ī e tiaki 'ana ki te henua 'e ki te raŋi 'āpī hōrea mai era e te 'Atua, 'e te nu'u mau nō ka noho era 'i ira he nu'u aŋa i te me'e tī-tika ki te mata o te 'Atua.

¹⁴ 'O ira, e te taina ē, e tiaki 'ana kōrua ki nā me'e, e u'i te kōrua noho iŋa, 'o ai te hape mo tuhi iŋa atu, 'e e ai te haumārū 'i roto i a kōrua, ki koa ai te tātou Pū'oko Haka Tere ko Ietū Kiritō 'i te hora o tō'ona hoki iŋa mai. ¹⁵ E mana'u tako'a kōrua: te haumārū ena o te tātou Pū'oko Haka Tere ko Ietū Kiritō mo tiaki nō mai he rāve'a e tahi 'ā'ana mo e'a o tātou o te taŋata mai roto i te ūtu'a o te hara 'e mo rava'a i te ora 'āpī 'ina he hope'a ra'a. 'E o ruŋa i te me'e mau nei 'ā i pāpa'i atu ai e Pauro, taina haŋa rahi ena o tātou, hai mārama-rama va'ai e te 'Atua. ¹⁶ 'I ruŋa i tā'ana parau pāpa'i ta'ato'a i pāpa'i ai o ruŋa i te me'e nei 'e, tako'a, o ruŋa i te me'e aŋa ri'a-ri'a mo aŋi-aŋi, me'e e huri rō 'ana tō'ona ha'aura'a e te nu'u ta'e 'ite 'e ta'e hio-hio o te rāua mana'u 'i ruŋa i te 'Atua, pa he huri iŋa ena e rāua i te tētahi me'e o ruŋa i te [Pāpa'i Mo'a]. 'E e haka ūtu'a rō e te 'Atua i te nu'u nei 'o te aŋa i te me'e tu'u pē ira.

Te me'e hope'a

¹⁷ 'O ira, e te taina ē, 'i te 'ite o kōrua o ruŋa i te nā me'e ena, e hāpa'o kōrua, 'o viri ki roto i te reo-reo o te nu'u taparahi-ta'ata 'e 'o haka tapa kōrua mai roto i te hāpī parauti'a e ma'u hio-hio mai ena. ¹⁸ Te me'e mau o kōrua mo aŋa he u'i mo māhani riva-riva ki te tātou Pū'oko Haka Tere ko Ietū Kiritō, kope haka e'a i a tātou mai roto i te ūtu'a o te hara 'e va'ai mai i te ora 'āpī 'ina he hope'a ra'a, 'e 'ai kōrua ka noho ka oho rō 'i roto i tō'ona haŋa.

¡Kī ha'ahana-hana tātou ki a ia 'i te hora nei 'e 'i te hora ta'ato'a! Ka ai pē ira.

1 IOVANI

Te kope 'ā'ana i pāpa'i i te parau nei kai haka 'ite mai ko ai tō'ona 'īŋoa. 'E, ka ai atu pē ira, me'e rahi te me'e o te puka nei tu'u pa he 'evaneria ena 'a [Iovani]. 'O ira te nu'u [kiritiano] e kī ena: 'a Iovani te puka nei i pāpa'i. Te me'e haka 'ite mai 'i ruŋa nei: te 'Atua he mōrī (1.5), 'e he haŋa (4.8), 'e e haka take'a rō mai 'ana i tō'ona haŋa hai Ietū Kiritō, Poki 'ā'ana (4.9). Te kope pāpa'i era i te parau nei e haka aŋi-aŋi rō mai 'ā: te kope haŋa ki te 'Atua 'e ki a Ietū, e haŋa tako'a ki te taina (4.11–12), 'e te kope haka moe i te mana'u 'i ruŋa i a Ietū, e noho 'i roto i te mōrī (1.7), 'ina ko hara 'e 'ina ko reo-reo (2.3–6).

Mo te kope pāpa'i i te puka nei, he parauti'a mau 'ā a Ietū Kiritō he Vānaŋa va'ai i te ora, 'e nei Vānaŋa ko ai era 'ana 'i ra'e ki te aŋa i te ao (1.1–4). Te me'e haka pūai mai e te kope nei: e hāpa'o tātou e te nu'u ma'ori reo-reo kī: a Ietū Kiritō kai tu'u mai ki te ao nei pa he taŋata (4.2). Ka ai atu pē ira, ko 'ite 'ana e ia e aŋi-aŋi nō e te nu'u haka moe parauti'a i te mana'u 'i ruŋa i a Ietū i te ma'ori reo-reo 'e i te ma'ori ta'e reo-reo; te kope nō era, pa'i, mo kī i te vānaŋa tu'u pē rā, 'ina he Vārua o te 'Atua 'i roto i a ia (4.3).

'I ruŋa i te parau nei e haka haŋu mai ena mo haka moe mo oho nō i te mana'u 'i ruŋa i a Ietū. 'E e haka aŋi-aŋi mai ena ki te nu'u [kiritiano] parauti'a: i a rāua te ora 'āpī 'ina he hope'a ra'a hai vānaŋa nei: Te 'Atua (5.11–12).

I te Vānaŋa te ora 'āpī 'ina he hope'a ra'a

1 'I a au he pāpa'i atu o ruŋa i te Vānaŋa i a ia te ora 'āpī 'ina he hope'a ra'a. A ia ko ai era 'ā 'i ra'e ki te ha'amata iŋa o te ao, 'e, ka ai atu pē ira, i take'a rō 'e i ŋaro'a rō e mātou i a ia. He aŋi 'ā, ko take'a 'ā 'e ko haka puā 'ā e mātou. ² Te kope nei i a ia te ora 'āpī 'ina he hope'a ra'a i haka take'a rō i a ia ki te taŋata. I take'a rō e mātou 'e he mata'ite mātou ō'ona. 'O ira e haka 'ite atu ena o ruŋa i a ia. 'I muri i te 'Atua Matu'a a ia, 'e i haka take'a rō mai ki a mātou. ³ E haka 'ite atu ena o ruŋa i tū kope take'a 'e ŋaro'a era e mātou, mo rava'a tako'a e kōrua i te ora 'āpī nei i a mātou, he ora i te 'Atua Matu'a 'e i tā'ana Poki ko Ietū Kiritō, ⁴ mo kōkoa tahi o tātou 'o te haka moe tako'a o kōrua i te mana'u 'i ruŋa i a ia.

He e'a iŋa mai roto i te hara

⁵ Te roŋo hāpī mai era e Ietū Kiritō 'e e haka 'ite atu ena e mātou: te 'Atua he Mōrī 'e 'ina he me'e pō'uri 'i ruŋa i a ia. ⁶ Mo kī o tātou: i a tātou te ora 'āpī o te 'Atua, 'e te parauti'a mau 'i roto i te pō'uri a tātou e noho nei, e reo-reo 'ana a tātou, 'e te noho iŋa o tātou 'ina he tano ki te roŋo parauti'a o te 'Atua. ⁷ 'E mo noho o tātou 'i roto i te mōrī, pa he oho iŋa o te 'Atua, i a tātou te ora 'āpī o te 'Atua, 'e te toto o tā'ana poki ena ko Ietū e haka kore rō 'ana i te tātou hara.

⁸ Mo kī o tātou 'ina a tātou he hara, e reo-reo 'ana a tātou ki a tātou 'ā, 'e 'ina kai aŋi-aŋi i te roŋo parauti'a o te 'Atua. ⁹ 'E mo kī o tātou ki te 'Atua i te tātou hara, he haka kore e ia, 'e he haka ma'itaki i te me'e ta'ato'a ta'e tano o roto i te tātou māhatu, 'i te ai ō'ona he 'Atua aŋa i te me'e tī-tika 'e haka tano i tā'ana me'e kī.

¹⁰ 'E mo kī o tātou 'ina a tātou kai hara, e kī 'ana ia a tā-

tou i te reo-reo o te 'Atua, 'e 'ina a tātou he haŋa parauti'a ki tā'ana vānaŋa.

2 E te ŋā poki 'ā'aku ē, e pāpa'i atu ena a au i te me'e nei 'o hara kōrua. 'E mo hara tā'ue e tahi o kōrua, e ai rō 'ana e tahi kope 'i mu'a o te 'Atua mo vānaŋa mo te tātou ora ko Ietū Kiritō, 'e a ia he kope aŋa i te me'e tī-tika. ² A Ietū i va'ai rō i a ia pa he tūtia mo tātou, ki haka kore ai e te 'Atua i te tātou hara, 'e ta'e nō i te hara o tātou, i te hara tako'a o te nu'u ta'ato'a o te ao.

He roŋo o te me'e he haŋa

³ A tātou e 'ite nei e māhani rō 'ana ki te 'Atua hai ha'atura o tātou ki te roŋo o te 'Atua. ⁴ Te kope kī: «Ko māhani 'ā a au i te 'Atua» 'e 'ina he ha'atura ki tā'ana me'e kī, he reo-reo e tahi, 'e 'ina he ma'u i te roŋo parauti'a o te 'Atua. ⁵ 'E te kope ha'atura ki tā'ana vānaŋa, ko ia te kope haŋa parauti'a ki te 'Atua. E 'ite nei: o te 'Atua mau 'ā a tātou hai ha'atura tātou ki a ia. ⁶ Te kope kī: 'i muri i te 'Atua a ia, e haka tere ia i a ia pē Ietū Kiritō.

⁷ E te taina, ta'e o ruŋa i te roŋo 'āpī a au e pāpa'i atu ena, o ruŋa i te roŋo tuai, he roŋo ko 'ite era 'ana e kōrua mai te hora haka moe era 'ā i te mana'u 'i ruŋa i a Ietū: e haŋa ki te rua. ⁸ 'E, ka ai atu pē ira, e haka 'ite atu ena 'i nei roŋo pa he me'e 'āpī. Ko take'a 'ā, pa'i, 'i ruŋa i a Ietū 'e 'i ruŋa i a kōrua. Hai ha'atura ki te roŋo nei he ŋaro he oho te me'e he pōhāhā, 'e he mā'eha he oho te hāpī parauti'a o te 'Atua pa he mōrī.

⁹ Te kope kī: 'i roto i te mā'eha a ia, 'e te parauti'a mau e riri rō 'ana mo tō'ona taina, ko te noho iŋa 'ana 'i roto i te pōhāhā. ¹⁰ Te kope haŋa hai māhatu ki tō'ona taina, 'i roto i te mā'eha e noho ena, 'e 'ina e tahi me'e haka hara i a ia. ¹¹ 'E te kope riri mo tō'ona taina 'i roto i te pōhāhā e noho 'e e ha'ere ena, 'e 'ina

he 'ite ki hē e oho ena, 'i te me'e era 'i te pōhāhā 'ina he take'a haka 'ou.

E haŋa ki te 'Atua 'e ta'e ki te me'e o te ao nei

¹² E te nā poki ē, nu'u haka moe iho i te mana'u 'i ruŋa i a Ietū ē,
e pāpa'i atu ena a au 'o te ai hai Ietū Kiritō te kōrua hara i haka kore ai e te 'Atua.

¹³ E te matu'a ē, nu'u pa'ari 'i te me'e o te 'Atua haka moe oho nō i te mana'u 'i ruŋa i a Ietū ē,
e pāpa'i atu ena a au 'o te ai ko māhani 'ana a kōrua i te kope ko ai era 'ana 'i ra'e ki te ha'amata iŋa o te ao.
E te nā poki 'āpī, nu'u pūai pa he nā poki 'āpī 'i te [haka moe i te mana'u] 'i ruŋa i a Ietū ē,
e pāpa'i atu ena a au ki a kōrua 'o te ai ko rē 'ana a kōrua ki a Rukifero.

¹⁴ I pāpa'i atu ai a au, e te nu'u haka moe iho i te mana'u 'i ruŋa i a Ietū ē,
'o te ai ko māhani 'ā a kōrua ki te 'Atua Matu'a.
I pāpa'i atu ai a au, e te nu'u pa'ari 'i te me'e o te 'Atua ē,
'o te ai ko māhani 'ana a kōrua i te kope ko ai era 'ana 'i ra'e ki te ha'amata iŋa o te ao.
I pāpa'i tako'a atu ai a au, e te nu'u pūai pa he nā poki 'āpī ē,
he hio-hio o te kōrua haka moe iŋa i te mana'u 'i ruŋa i a Ietū;
e ma'u rō 'ana, pa'i, kōrua i te vānaŋa o te 'Atua 'i roto i te kōrua māhatu,
'e ko rē 'ana kōrua ki a Rukifero.

¹⁵ E te taina, 'ina kōrua ko haŋa ki te ao haka tere hai mana'u taŋata 'e ki te me'e va'ai mai. Mo haŋa o kōrua, 'ina ia kōrua he haŋa ki te 'Atua Matu'a ¹⁶ 'o te ai pē nei ē: te me'e va'ai mai e te ao haka tere hai mana'u taŋata ta'e mai te Matu'a i oho mai ai, mai te ao mau nei 'ā. 'E ko te nā me'e nei te me'e va'ai e te ao: he pohe ki te me'e haŋa nō e te hakari, he pohe ki te me'e take'a e te mata 'e he haka mana'u i te taŋata: i a ia mau nō te tano 'o te ai ō'ona he 'ono. ¹⁷ 'E te ao haka tere hai mana'u taŋata nā e kore e oho ena koia ko tā'ana me'e ta'ato'a ta'e tano. 'E te kope aŋa i te me'e haŋa e te 'Atua, i a ia te ora 'āpī 'ina he hope'a ra'a.

'Ina ko haka tapa mai muri i a Ietū

¹⁸ E nā poki ē, ko te hora hope'a era nei. Ko ŋaro'a 'ana e kōrua nā e oho mai ena te kiritō reo-reo. 'E 'i te hora nei, ko 'ata rahi mai 'ana. Pē ira a tātou e 'ite nei ko te hora hope'a era nei. ¹⁹ A rāua mai roto i a tātou i e'a ai, 'e, ka ai atu pē ira, ta'e a rāua o tātou. 'Āhani, pa'i, o tātou ko noho mai 'ana. Te me'e nei i topa ai mo take'a riva-riva: ta'e ta'ato'a nu'u o roto i a tātou he nu'u o tātou.

²⁰ 'E a kōrua ko ha'ata'a 'ana e Ietū Kiritō mā'ana hai va'ai atu i te [Vārua Maitai]. 'O ira a kōrua ta'ato'a e 'ite ena i te hāpī parauti'a. ²¹ E pāpa'i atu ena a au ta'e

'o te ta'e 'ite o kōrua i te hāpī parauti'a, 'o te ai e 'ite rō 'ana e kōrua. 'E, ko 'ite tako'a 'ana e kōrua 'ina e tahi reo-reo e'a mai roto i te hāpī parauti'a.

²² ¿Ko ai ia te kope reo-reo? He kope kī: a Ietū ta'e he [Kiritō]. Ko ia te kiritō reo-reo 'o te ai pa he ta'e haŋa iŋa era 'ā ō'ona ki te 'Atua Matu'a, pē ira 'ā e ta'e haŋa tako'a ena ki tā'ana Poki. ²³ Te kope ta'e haŋa ki te Poki, ta'e a ia o te 'Atua Matu'a. 'E te kope kī: o te Poki a ia, o te 'Atua Matu'a tako'a a ia.

²⁴ 'O ira, e hāpa'o 'e e haka tere kōrua hai hāpī ŋaro'a mai te hora haka moe era 'ā i te kōrua mana'u 'i ruŋa i a Ietū. Mo aŋa pē ira, e ko topa kē a kōrua mai muri i te 'Atua Poki 'e mai muri i te 'Atua Matu'a. ²⁵ 'E te me'e hōrea mai era e Ietū Kiritō ko te me'e nei: he ora 'āpī 'ina he hope'a ra'a.

²⁶ E pāpa'i atu ena a au i te nā me'e nei, 'o haka roŋo kōrua ki te nu'u reo-reo atu 'e 'o haka tapa kōrua mai te hāpī parauti'a. ²⁷ 'Ina ko rehu: a kōrua ko ha'ata'a 'ā e Ietū Kiritō mā'ana hai va'ai atu i te Vārua Maitai, 'e ta'e i te taŋata te vānaŋa hope'a o ruŋa i te me'e o te 'Atua. Mo te Vārua Maitai e haka 'ite atu o ruŋa i te me'e ta'ato'a 'e tā'ana hāpī he parauti'a, ta'e he reo-reo. 'E, pa he me'e haka 'ite atu e ia, 'ina kōrua ko haka tapa mai muri i a Ietū Kiritō.

²⁸ 'Ē-ē, 'ina kōrua ko haka tapa. Ka haka noho nō kōrua, e nā poki ē, 'i muri i te Kiritō, 'o ha'amā kōrua 'e 'o ri'a-ri'a 'i mu'a i a ia 'i te hora o tō'ona hoki iŋa mai.

He nā poki o te 'Atua

²⁹ Ko 'ite 'ana e kōrua: a Ietū he kope aŋa i te me'e tī-tika. 'E e 'ite tako'a: te nu'u ta'ato'a aŋa i te me'e tī-tika he nā poki o te 'Atua.

3 Ka haka topa rā te kōrua mana'u 'i te rahi o te haŋa o te 'Atua Matu'a ki a tātou e kī mai ena e ia he nā poki tātou 'ā'ana, 'e he aŋi 'ā, 'ā'ana mau 'ā a tā-tou. 'O ira te nu'u o te ao haka tere hai mana'u taŋata e ta'e māhani ena ki a tātou, he ta'e māhani o rāua ki te 'Atua.

² E te taina, he nā poki tātou o te 'Atua. Ka ai atu 'ina a tātou kai take'a vave 'ā pē hē te tātou huru pe mu'a ka oho ena, a tātou e 'ite rō 'ana pē nei ē: ka tu'u haka 'ou mai ena a Ietū Kiritō, te tātou huru pē ia 'ā 'i te me'e era he take'a iho mau e tātou i a ia. ³ 'E ta'ato'a nu'u tiaki ki te hoki iŋa mai o Ietū Kiritō, e haka tapa rō 'ana mai roto i te hara, mo riro o rāua pē Ietū Kiritō, he taŋata hara kore.

⁴ Kope nō era mo hara, e hape 'ā ki te haka tere iŋa o te 'Atua; te hara, pa'i, he hape ki te haka tere iŋa o te 'Atua. ⁵ 'E 'ite rō 'ana e kōrua: a Ietū i oho mai ai ki te ao nei mo haka kore i te hara o te taŋata, 'e ko 'ite tako'a 'ana e kōrua: 'ina ō'ona hara. ⁶ Te nu'u ta'ato'a haka noho nō i a rāua 'i muri i a Ietū 'ina he noho 'i roto i te hara. 'E te nu'u noho 'i roto i te hara, kai take'a 'e kai māhani 'ā i a ia.

⁷ E te nā poki 'ā'aku ē, e u'i kōrua 'o reo-reo rō atu: te kope aŋa i te me'e tī-tika, he taŋata tano ki te mata o te 'Atua, pē Ietū. ⁸ 'E te kope aŋa i te me'e ta'e tano 'a Rukifero. Mai te ha'amata iŋa o te ao, pa'i, a Rukifero e

hara e oho mai ena. 'E te Poki o te 'Atua i oho mai ai mo te me'e mau nei 'ā: mo haka kore i te me'e aña e Rukifero.

⁹ Ina e tahi poki parauti'a o te 'Atua noho 'i roto i te hara 'o te ai 'i roto i a ia te mana'u o te 'Atua; 'ina he haña haka 'ou mo hara 'i te ai 'ō'ona o te 'Atua.

¹⁰ E 'ite rō 'ana ko ai te nā poki o te 'Atua 'e ko ai te nā poki 'a Rukifero: te kope ta'e aña i te me'e tano 'e ta'e haña ki tō'ona taina, ta'e o te 'Atua.

He roņo o te me'e ena he haña

¹¹ He roņo nei te roņo ŋaro'a e kōrua mai te hora haka moe era i te kōrua mana'u 'i ruņa i a Ietū: e here tātou ki a tātou 'ā. ¹² Ina ko ai tātou pē [Kāiņa]. A ia 'a Rukifero, 'e i tiņa'i i haka mate ai i tō'ona taina. ¹³ O te aha i tiņa'i ai i tō'ona taina? 'O te ai te me'e aña o tō'ona taina he me'e riva-riva 'e tā'ana me'e aña he me'e ta'e tano.

¹³ E te taina, 'ina kōrua ko huru kē ana ma'u i te riri mo kōrua e te taņata o te ao nei. ¹⁴ E 'ite nei ko e'a 'ana a tātou mai roto i te mate 'e ko o'o 'ā ki roto i te ora he here o tātou ki te tātou taina. Te kope ta'e haña ki tō'ona taina kai e'a 'ana mai te mate. ¹⁵ Te kope ma'u i te riri mo tō'ona taina he kope taparahi-ta'ata tiņa'i taņata, 'e a kōrua ko 'ite 'ā 'ina e tahi kope tu'u pē rā mo rava'a i te ora 'āpī 'ina he hope'a ra'a.

¹⁶ A tātou e 'ite rō 'ā he aha te me'e he haña ki te rua 'o te ai i va'ai rō a Ietū i a ia mo mate mo tātou. Pē ira tako'a 'ā a tātou ana me'e mo te tātou taina. ¹⁷ Kope nō era e ai rō 'ā tō'ona hauha'a o te ao nei, 'e he take'a i tō'ona taina e ai rō 'ana tā'ana me'e hape 'e 'ina he hā'ū'ū, ¹⁸ e ai mau rō 'ana hō i a ia te haña o te 'Atua mo te rua?

¹⁸ E te nā poki 'ā'aku ē, 'ina ko ai te tātou haña ki te rua hai haha nō; te tātou haña e haka take'a hai me'e riva-riva aña e tātou. ¹⁹ Pē ira ka 'ite nei: o roto i te parauti'a a tātou, 'e 'ina e tahi me'e mo haka ha'amā i a tātou 'i mu'a i te 'Atua. ²⁰ E mo haka 'ite mai e te māhatu ko hape 'ā a tātou, e mana'u: te 'Atua 'ata nui-nui ki te tātou māhatu; e 'ite rō 'ana, pa'i, i te me'e ta'ato'a.

²¹ E te taina, mo ta'e haka 'ite mai o te tātou māhatu e hape rō 'ā a tātou, 'ina ia he me'e mo ha'amā o tātou 'i mu'a i te 'Atua, ²² 'e he va'ai mai e ia i te ta'ato'a me'e o tātou mo no-no'i 'o te ai e ha'atura rō 'ana a tātou ki tā'ana roņo 'e e aña rō 'ā i tā'ana me'e haña.

²³ E te roņo 'ā'ana: he haka moe i te tātou mana'u 'i ruņa i tā'ana Poki ko Ietū Kiritō 'e he haña a tātou ki te rua, pa he me'e haka 'ite mai era e ia. ²⁴ Te nu'u ha'atura ki tā'ana roņo, 'i roto i a ia e noho ena, 'e a ia 'i roto i rā nu'u. E 'ite nei a tātou: 'i roto o tātou e noho ena hai [Vārua Maitai] va'ai mai era e ia.

I a ai te Vārua o te 'Atua

⁴ E te taina, 'ina kōrua ko mana'u he parauti'a te vānaņa o te nu'u ta'ato'a kī e vānaņa 'ana a rāua i te me'e haka vānaņa e te 'Atua. Te me'e o kōrua mo

aña he haka 'atu ana ai te vārua era 'i roto i a rāua o te 'Atua mau 'ā; e rahi rō 'ana, pa'i, te perofeta reo-reo 'i te ao.

² ² Pē hē a kōrua ana aņi-aņi ko ai te kope i a ia te Vārua o te 'Atua? He kope nō era mo kī: a Ietū Kiritō pa he taņata i oho mai ai, i a ia te Vārua o te 'Atua. ³ E te kope ta'e kī pē ira o ruņa i a Ietū, 'ina i a ia te Vārua o te 'Atua; he vārua o te kiritō reo-reo te me'e i a ia. A kōrua i ŋaro'a rō i te vānaņa e oho rō mai te vārua ena, 'e te parauti'a mau, 'i a ia 'i te ao nei.

⁴ E nā poki, o te 'Atua a kōrua, 'e ko rē 'ana ki te nā ha'avare era 'o te ai te Vārua ena i a kōrua 'ata pūai ki te vārua o te ao nei. ⁵ A rāua o te ao nei. 'O ira e vānaņa ena i te me'e o te ao nō nei, 'e te nu'u o te ao ki a rāua e haka roņo ena. ⁶ E a tātou o te 'Atua. Te kope māhani i te 'Atua ki a tātou e haka roņo mai ena, 'e te kope ta'e o te 'Atua e ko haka roņo mai. Hai me'e nei e 'ite ena e tātou ko ai te kope i a ia te Vārua kī i te parauti'a 'e ko ai te kope i a ia te vārua kī i te reo-reo.

Hai haña ki te rua e 'ite ena o te 'Atua a tātou

⁷ E te taina, e haña a tātou ki te rua 'o te ai te me'e he haña, mai te 'Atua e oho mai ena. Te nu'u ta'ato'a haña ki te rua he nā poki o te 'Atua, 'e ko māhani 'ā i a ia. ⁸ E te kope ta'e haña ki te rua, 'ina he māhani i te 'Atua; te 'Atua, pa'i, he haña.

⁹ Ko haka take'a mai 'ana e te 'Atua i tō'ona haña hai uņa mai i tā'ana Poki mau nō era e tahi ki te ao nei mo rava'a e tātou te ora 'āpī 'ina he hope'a ra'a hai ia.

¹⁰ Ko te me'e nei te me'e he haña parauti'a: he uņa mai o te 'Atua i tā'ana Poki pa he tūtia mo haka kore o te tātou hara, ta'e 'ō ko te haña nei o tātou ki a ia.

¹¹ E te taina, mo ai pē ira te haña iņa mai o te 'Atua ki a tātou, e haña tako'a a tātou ki te rua. ¹² Ka ai atu 'ina e tahi kope i take'a i te 'Atua, mo haña o tātou ki te rua, he noho te 'Atua 'i roto i a tātou, 'e tō'ona haña he take'a 'i ruņa i te tātou haka tere iņa.

¹³ Te me'e haka 'ite mai he parauti'a mau 'ana ananake tātou ko te 'Atua ko te me'e nei: ko va'ai mai 'ana e ia i tō'ona Vārua. ¹⁴ E o mātou mau 'ana i take'a 'e i haka 'ite pē nei ē: te Matu'a ko uņa mai 'ana i tā'ana Poki mo e'a o te taņata o te ao mai roto i te ūtu'a o te hara 'e mo rava'a i te ora 'āpī 'ina he hope'a ra'a hai ia. ¹⁵ Te kope kī: a Ietū he Poki o te 'Atua, ararua ko te 'Atua e noho ena.

¹⁶ Pē ira a tātou e 'ite nei: te 'Atua e haña rahi rō mai 'ana 'e tō'ona haña iņa mai e ko pau. Te 'Atua, pa'i, he haña. Te kope noho 'i roto i te haña he kope haña ki te 'Atua 'e ki te rua, 'e ararua ko te 'Atua a ia e noho ena. ¹⁷ Hai haña ki te rua e take'a ena e ma'u rō 'ana a tātou i te haña o te 'Atua 'i roto i te tātou māhatu. Pē ira, 'i te mahana o te ture hope'a, e ko ha'amā tātou 'i te me'e era te noho iņa o tātou 'i te ao nei pa he noho iņa era 'ā o Ietū Kiritō. ¹⁸ Te kona 'i ira te haña, 'ina he ri'a-ri'a. Te taņata e ri'a-ri'a ena 'i te mana'u he haka ūtu'a i a rāua, 'e te haña parauti'a o te 'Atua he haka kore i te ri'a-ri'a. Te kope ri'a-ri'a ia, 'ina kai aņi-aņi riva-riva 'ā i te pūai o te haña o te 'Atua mō'ona.

¹⁹ A tātou e haŋa nei 'o te ai 'i ra'e te 'Atua i haŋa mai ai. ²⁰ Mo kī o te kope e tahi: «E haŋa rō 'ana a au ki te 'Atua» 'e 'ina he haŋa ki tō'ona taina, he reo-reo e tahi. Te taŋata ta'e haŋa ki tō'ona taina, he me'e take'a e ia, ʔpē hē ia ana haŋa ki te 'Atua, he me'e ta'e take'a e ia? ²¹ He roŋo haka rē mai era nei e Ietū Kiritō: te kope haŋa ki te 'Atua e haŋa tako'a ki tō'ona taina.

Te me'e rē ki te ao nei

5 Nu'u nō era mo rāua he parauti'a mau 'ā a Ietū he [Kiritō] he ŋā poki rāua o te 'Atua. 'E te kope haŋa ki te 'Atua Matu'a e haŋa tako'a ki tā'ana ŋā poki. ² Mo haŋa ia o tātou ki te ŋā poki o te 'Atua, he take'a e haŋa parauti'a rō 'ana tātou ki te 'Atua 'e e aŋa rō 'ana tātou i tā'ana me'e kī mai. ³ Te haŋa ki te 'Atua ko te me'e nei: he ha'atura ki tā'ana roŋo, 'e tā'ana roŋo me'e ta'e paŋaha'a.

⁴ A tātou, te ŋā poki o te 'Atua, e ko rava'a e te ao haka tere hai mana'u taŋata mo haka tapa mai te ara o te 'Atua. Hai haka moe, pa'i, o te tātou mana'u 'i ruŋa i a Ietū, e rē nei a tātou ki te ao nei. ⁵ ʔKo ai ia te kope mo rē ki te ao nei? Te kope mō'ona he parauti'a mau 'ā a Ietū he Poki o te 'Atua.

⁶ Te 'Atua i haka take'a ai pē nei ē: a Ietū Kiritō he Poki 'ā'ana, 'i te hora [papatito] hai vai, 'e 'i te hora pariŋi o tō'ona toto 'i ruŋa i te tātaurō. Te [Vārua Maitai] he mata'ite o te me'e nei, 'e tā'ana me'e kī he parauti'a.

⁷ Hoko toru mata'ite o te me'e nei: ⁸ he Vārua Maitai, he vai 'e he toto, 'e ko tū me'e 'ā i mata'ite ai a to-toru.

⁹ Mo haka roŋo o tātou ki te me'e kī 'e mata'ite e te taŋata, ʔpē hē ia a tātou ana ta'e haka roŋo ki te vānaŋa kī e te 'Atua o ruŋa i tā'ana poki era ko Ietū? ¹⁰ Te kope haka moe i tō'ona mana'u 'i ruŋa i te Poki o te 'Atua e 'ite mau rō 'ana 'i roto i tō'ona māhatu a Ietū he Poki o te 'Atua. 'E te kope ta'e haka moe i tō'ona mana'u 'i ruŋa i te me'e kī e te 'Atua e kī 'ana i te reo-reo o te 'Atua, he ta'e haka roŋo i te vānaŋa o te 'Atua

o ruŋa o tā'ana Poki. ¹¹ 'E ko te me'e nei te me'e i kī e te 'Atua: ko va'ai mai 'ana e ia ki a tātou i te ora 'āpī 'ina he hope'a ra'a, 'e nei ora i tā'ana Poki. ¹² Te kope i a ia te Poki o te 'Atua, i a ia te ora 'āpī nei, 'e te kope 'ina he Poki o te 'Atua i a ia, 'ina he ora 'āpī i a ia.

He me'e hope'a

¹³ E pāpa'i atu ena a au i te me'e nei mo 'ite o kōrua, e te nu'u [haka moe i te mana'u] 'i ruŋa i te Poki o te 'Atua ē: i a kōrua te ora 'āpī 'ina he hope'a ra'a.

¹⁴ A tātou, te nu'u haka moe i te mana'u 'i ruŋa i a Ietū, 'ina he ri'a-ri'a mo no-no'i ki te 'Atua, he 'ite o tātou: te 'Atua e haka roŋo rō mai 'ana i te me'e no-no'i e tātou ana tano rā me'e ki tō'ona mana'u. ¹⁵ 'E, 'i te 'ite e haka roŋo rō mai 'ana te 'Atua ki te tātou pure, e 'ite tako'a nei: 'ī i a tātou te me'e no-no'i era.

¹⁶ Mo take'a e tahi taŋata i tō'ona taina e hara 'ana, 'e rā hara ta'e he hara mo haka ūtu'a i a ia hai mate, e pure mō'ona, 'e mo te 'Atua e va'ai i te ora 'āpī 'ina he hope'a ra'a ki rā taina. 'E nā e ai rō 'ā e tahi hara he haka ūtu'a i a koe hai mate, 'e mo rā hara e ko kī atu e au e pure e kōrua. ¹⁷ Te me'e ta'ato'a ta'e tano he hara. Ka ai atu pē ira, e ai rō 'ana te hara e ko haka ūtu'a i a koe hai mate.

¹⁸ Ko 'ite 'ana, pa'i, e tātou 'ina e tahi poki parauti'a o te 'Atua noho 'i roto i te hara. E hāpa'o rō 'ana e te Poki o te 'Atua, ko Ietū Kiritō, 'e 'ina e ko rava'a mo haka puā e Rukifero. ¹⁹ A tātou ko 'ite tako'a 'ana: o te 'Atua a tātou, ka ai atu 'a Rukifero te haka tere i te ao nei.

²⁰ 'E, ko 'ite tako'a 'ā e tātou: ko tu'u mai 'ana te Poki o te 'Atua, 'e ko va'ai mai 'ā i te mārama-rama mo aŋi-aŋi ko ai te 'Atua parauti'a. 'E hora nei, ananake tātou ko nei 'Atua 'o te ai a tātou o tā'ana Poki ko Ietū Kiritō. A ia he 'Atua parauti'a va'ai i te ora 'āpī 'ina he hope'a ra'a.

²¹ E ŋā poki, e u'i kōrua 'o ha'amuri rō ki te me'e ta'e he 'Atua parauti'a.

2 IOVANI

Te kope pāpa'i i te parau nei e haka anji-anji mai nei i a ia pa he (1). Mo te rahi ra'a o te nu'u te parau nei 'a [Iovani] tako'a i pāpa'i, 'e i pāpa'i ai mo te nūna'a taina hāhine ki Ēfeto.

Ka ai atu me'e ta'e rahi te me'e i pāpa'i 'i ruŋa nei, te me'e haka 'ite mai ko te me'e era 'ana o ruŋa i te parau ra'e pāpa'i era e ia, e Iovani, te aura'a: e haka tere a tātou hai roŋo nei: (5–6), 'e 'ina ko ha'ati'a mo reo-reo mai e te kope ta'e haŋa ki te [Kiritō] (7–11).

He 'aroha

1 A au, te pū'oko haka tere o te nūna'a taŋata [haka moe i te mana'u] 'i ruŋa i a Ietū, he 'aroha atu ki a koe, e te vi'e ha'ata'a e te 'Atua mā'ana ē, 'e ki ta'a ŋā poki. † E haŋa rahi rō atu 'ana a au ki a kōrua, 'e ta'e nō ko au, pē ira tako'a 'ana te nu'u ko 'ite 'ana i te parauti'a ² 'o te ai 'i roto i te tātou māhatu te hāpī parauti'a 'ātā ki te hora hope'a.

³ Ka ai te riva rahi, te 'aroha 'e te haumārū o te 'Atua he Matu'a, 'e o Ietū Kiritō, he Poki 'ā'ana, 'i ruŋa i a tātou ta'ato'a, he nu'u oho a te ara o te parauti'a 'e o te haŋa ki te rua.

Te parauti'a 'e te haŋa

⁴ Ko koa riva-riva 'ana a au 'o te 'ite pē nei ē: e ai rō 'ana te tētahi nu'u o roto i a kōrua e tano rō 'ana te noho iŋa ki te hāpī parauti'a o te 'Atua, pa he me'e kī mai e ia. ⁵ 'E hora nei, 'i a au he ani atu ki a kōrua: e haŋa tātou ki te rua. Te roŋo nei he haŋa ki te rua ta'e o te hora nei, he me'e ko haka 'ite mai era 'ā mai te hora haka moe i te mana'u 'i ruŋa i a Ietū. ⁶ Mo ai o te tātou haŋa ki te rua, e haka tano 'ana a tātou i te roŋo

† HE 'AROAHA ATU KI A KOE, E TE VI'E HA'ATA'A E TE 'ATUA MĀ'ANA Ē, 'E KI TA'A ŊĀ POKI. Te ŋā vānaŋa nei he rāve'a e tahi, pēaha, mo ta'e pāpa'i i te 'iŋoa o te nu'u era mo rāua te parau nei 'o tōtōā e te nu'u i a rāua.

o te 'Atua. 'E rā roŋo ko te me'e nei: e haŋa ki te rua, he me'e ko ŋaro'a era 'ā e tātou mai mu'a 'ā.

E u'i kōrua 'o reo-reo atu

⁷ 'I te kona ta'ato'a o te ao e noho mai ena me'e rahi nō atu nu'u reo-reo e kī ena kai oho mai a Ietū hai hakari taŋata. Te kope kī pē ira he kope ha'avare 'e he kope ta'e haŋa ki te [Kiritō]. ⁸ 'Ina ko haka roŋo, 'o ŋaro rō i a kōrua te me'e ta'ato'a riva-riva aŋa e tātou, 'o ta'e rava'a e kōrua i te me'e hōrea mai era e te 'Atua.

⁹ Te kope 'āmui hai hāpī kē i te hāpī parauti'a 'a Ietū 'ina he 'Atua o muri i a ia, 'e te kope haka tano oho i a ia ki rā hāpī 'i muri i a ia te 'Atua Matu'a 'e te Poki. ¹⁰ 'E mo tu'u atu o te taŋata ki te kōrua hare e hāpī 'ā o ruŋa i te 'Atua, 'e tā'ana me'e hāpī ta'e he hāpī parauti'a 'a Ietū, 'ina ko to'o ki roto i tu'u hare 'e 'ina ko 'aroha. ¹¹ Te kope 'aroha ki a ia e pe'e 'ā ki te aŋa ta'e tano o rā taŋata 'e e 'āpiti 'ā ki a ia.

He 'aroha

¹² Me'e rahi tā'aku me'e haŋa mo kī atu ki a kōrua, 'e 'ina a au kai haŋa mo pāpa'i atu. Tō'oku haŋa he oho atu ki a kōrua ena, 'e he vānaŋa atu e au mau 'ā, ki ko koa tahi ai a tātou.

¹³ Te ŋā poki o tu'u taina ha'ata'a tako'a era e te 'Atua mā'ana 'i 'e 'aroha atu ena mo kōrua. 'Iorana.

3 IOVANI

'I ruņa i te parau nei e haka 'ite haka 'ou mai 'ana a [Iovani] i tā'ana vānaņa haka 'ite mai 'i ruņa i te nā parau ra'e era 'ā'ana (1 Iovani 'e 2 Iovani) pē nei ē: e haņa te taina 'i roto i a rāua. Te parau nei i pāpa'i ai ki te kope te 'iņa ko Kāio. Te me'e ō'ona: hai koa e to'o 'e e hāpa'o era i te nu'u [kiritiano] tu'u mai te tētahi kona (5). E haka 'ite tako'a mai ena 'i ruņa nei: te taina era ko Rioteferē, he taina 'ino ta'e haņa mo to'o 'e mo hāpa'o i te nu'u taina tu'u ki tō'ona hare 'e he kope 'ina he ha'ati'a i te tētahi mo to'o i rā nā taina ki te rāua hare. 'E o ruņa i te me'e nei i kī ai e Iovani: (11).

He 'aroha

1 A au, te pū'oko haka tere o te nūna'a taņata [haka moe i te mana'u] 'i ruņa i a Ietū, he 'aroha atu ki a koe, e Kāio ē, e te taina haņa rahi ō'oku ē.

He vānaņa a [Iovani] o ruņa i a Kāio

² E te taina, e ani rō 'ana a au ki te 'Atua mo riva-riva ō'ou 'i te me'e ta'ato'a 'e mo haka pūai atu i tu'u hakari, pa he pūai ena 'ā o tu'u haka moe iņa i te mana'u 'i ruņa i a ia. ³ He koa nō tā'aku aņa 'i te hora tu'u mai o te tētahi taina 'a'amu mai 'ina koe he haka tapa mai roto i te ara o te parauti'a. ⁴ 'Ina he me'e hope'a o te koa pa he me'e ena he 'ite ō'oku pē nei ē: tā'aku nā poki † e noho rō 'ana 'i roto i te ara o te parauti'a.

⁵ E te taina, me'e riva-riva ta'a me'e ena e aņa mai ena he hā'ū'ū ki te tātou taina, 'e 'ata riva-riva mo ai he taina tu'u atu mai te kona roa-roa. ⁶ Tētahi o rāua, e tu'u mai era ki nei, he vānaņa 'i mu'a i te nūna'a taņata haka moe i te mana'u 'i ruņa i a Ietū 'i te rahi o tu'u haņa ki a rāua. Ana vari haka 'ou atu, e 'ata hā'ū'ū nō koe hai māhatu hai me'e mo te rāua ara, pa he me'e haņa e te 'Atua. ⁷ 'I te rāua ara haka 'ite oho o ruņa i a Ietū Kiritō, 'ina he kī ki te nu'u ta'e haka moe i te mana'u 'i ruņa i a Ietū mo hā'ū'ū ki a rāua. ⁸ 'O ira, e hā'ū'ū e tātou, ki ai ai a tātou ananake 'i te haka 'ite iņa o rāua i te hāpī parauti'a o te 'Atua.

† TĀ'AKU NĀ POKI: Te kope pāpa'i i te puka nei e kī ena he nā poki 'ā'ana te nu'u ta'ato'a hā'ū'ū e ia mo haka moe i te mana'u 'i ruņa i a Ietū.

Haka tere iņa kē to Rioteferē 'e to Remeterio

⁹ I pāpa'i rō au e tahi parau ki te kōrua nūna'a taņata haka moe i te mana'u 'i ruņa i a Ietū. 'E a Rioteferē 'ina kai tapa mai i tā'aku me'e pāpa'i era 'i te haņa mo ai ko ia mau nō te pū'oko haka tere o nā. ¹⁰ Ki tu'u atu au, he ture e au 'i mu'a o te taina ta'ato'a o ruņa i tā'ana me'e ta'e tano ena e aņa mai ena. E ha'a'ino 'e e reo-reo e oho ena o ruņa i a tātou. 'E ta'e nō ko rā me'e te me'e e aņa mai ena. 'Ina he haņa mo to'o ki tō'ona hare i te taina tu'u ki ira. 'E te taina haņa mo to'o i rā nā taina ki te rāua hare 'ina e ia he ha'ati'a, 'e he to'o mai i rā nā taina era e haņa rō 'ā he tute mai roto i te nūna'a taņata haka moe i te mana'u 'i ruņa i a Ietū.

¹¹ E te taina, 'ina koe ko aņa i te me'e ta'e tano aņa e te rua; e aņa koe i te me'e riva-riva. Te kope aņa i te me'e riva-riva, o te 'Atua; 'e te kope aņa i te me'e rake-rake, kai māhani 'ā i te 'Atua.

¹² Te taina ta'ato'a e vānaņa riva-riva rō 'ā o ruņa i a Remeterio, 'e hai noho iņa tano ō'ona e take'a ena he taņata riva-riva. A mātou tako'a e vānaņa riva-riva rō 'ā o ruņa i a ia, 'e ko 'ite 'ana e koe he parauti'a te mātou me'e kī.

He 'aroha

¹³ Me'e rahi tā'aku me'e haņa mo kī atu, 'e 'ina a au kai haņa mo pāpa'i atu. ¹⁴ E haņa rō 'ā, pa'i, a au, 'ina ko roa hia, he piri haka 'ou tāua 'e mā'aku mau 'ā e vānaņa atu.

¹⁵ Ka ai te haumārū 'i ruņa i a koe.

Te tātou repahoa 'i e 'aroha atu ena. E 'aroha atu koe ki te tātou repahoa ena o nā. 'Iorana.

HURA

Te kope 'ā'ana i pāpa'i i te parau nei ko Hura, taina o [Tanatiako] (1). I pāpa'i ai ki te nu'u [kiritiano] mo no-no'i ki a rāua pē nei ē: (3). E ai rō 'ana, pa'i, 'i roto i te taina te nu'u kī a rāua he kiritiano huri i te hāpī parauti'a o te 'Atua (4).

Te kī 'a Hura: te nu'u nei pa he nu'u era o [Tōroma] 'e o [Kōmora]. Te me'e o rā nā kona, 'i ira te nu'u e hara taparahi-ta'ata era. Mo Hura, 'ina he nu'u hope'a o te rake-rake pa he nu'u huri nei i te hāpī parauti'a o te 'Atua (8–10). 'O ira e kī mai nei mo rāua pē nei: 'e, 'e he haka 'ite mai: (12–13).

Mo haka mao o te parau nei he hatu mai e Hura pē nei ē: 'e (20–22).

He 'aroha

1 A au, a Hura, tāvini o Ietū Kiritō, 'e taina o [Tanatiako], he 'aroha atu ki a kōrua ki te nu'u haŋa e te 'Atua Matu'a 'e ha'ata'a mā'ana, he nu'u hāpa'o 'a Ietū Kiritō. ² Ka rahi ka oho te haka 'aroha, te haumārū 'e te haŋa o te 'Atua 'i ruŋa i a kōrua ta'ato'a.

E ma'u hio-hio te hāpī parauti'a

³ E te taina, ko haŋa 'ana a au mo pāpa'i atu o ruŋa i te e'a iŋa mai roto i te ūtu'a o te hara 'e te rava'a iŋa i te ora 'āpī 'ina he hope'a ra'a, he me'e ai i a kōrua 'e i a au. 'E, ko u'i 'ana e au 'i te hora nei, te me'e 'ā'aku mo hōrou mo pāpa'i atu: e ma'u hio-hio 'i roto i te kōrua māhatu te hāpī parauti'a va'ai mai e te 'Atua ki a tātou ki te nu'u ha'ata'a e ia mā'ana 'e e hāpa'o 'o huri hai mana'u taŋata. ⁴ Nā, pa'i, hai reo-reo ko o'o 'ana ki roto i te nūna'a taŋata [haka moe i te mana'u] 'i ruŋa i a Ietū te nu'u haka 'ite mai era 'i ruŋa i te [Pāpa'i Mo'a] e ai rō 'ā te ūtu'a mo rāua. Te nu'u nei he nu'u taparahi-ta'ata to'o i te riva rahi o te tātou 'Atua pa he 'ōtohe mo aŋa i te me'e haŋa nō e te rāua hakari, 'e 'ina he haŋa ki te tātou Pū'oko Haka Tere ko Ietū Kiritō.

He ūtu'a o te 'Atua

⁵ Te me'e nei e au ka pāpa'i atu ena e 'ite rō 'ana e kōrua 'e, ka ai atu pē ira, e haŋa nō 'ā a au mo haka mana'u haka 'ou atu pē nei ē: ka ai atu te 'Atua i to'o tahi rō i te itaraera mai Ehipto, i haka kore nō i te tē-tahi o rā nu'u he ta'e haka moe i te mana'u 'i ruŋa i a ia. ⁶ 'E te nā merahi ta'e haka hauha'a era i te rāua tōro'a 'e hoa era i te rāua kona noho, ko here-here 'ana e te 'Atua hai vivi ta'e mo pako'o ki te hora hope'a, 'e 'i te kona pō'uri i haka rē ai mo te mahana o te ture hope'a. ⁷ 'E ki te nu'u o [Tōroma], o [Kōmora] 'e o te kona hāhine ki ira i haka ūtu'a ai 'i roto i te ahi 'ina he hope'a ra'a 'o te va'ai i a rāua ki te tai'ata, 'e ki te rauhuru me'e ta'e tano pa he noho te taŋata ki te taŋata 'ā, 'e te vi'e ki te vi'e 'ā. Te nu'u nei koia ko rā nā merahi he noho rō 'ai pa he me'e mo haka mana'u ki

te ta'ato'a, 'o aŋa i te me'e tu'u pē ira 'e 'o haka ūtu'a e te 'Atua.

⁸ 'E, ka ai atu pē ira, te nu'u o'o atu era ki roto i a kōrua hai reo-reo ko te haka hara iŋa 'ana i te rāua hakari. Pē nei e reo-reo ena: o te 'Atua te haka take'a 'i roto i te moe vārua e tano rō 'ā rā me'e. Te parauti'a mau, te nu'u nei 'ina he ha'atura ki te 'Atua 'e he parau'ino nō te aŋa mo te merahi. ⁹ Ka mana'u rā: hora tātake era o Mihaera, he merahi ra-rahi o te 'Atua, ararua ko Rukifero o ruŋa i te hakari o [Mōtē], 'ina a Mihaera kai kī i te vānaŋa rake-rake mo Rukifero; i kī nō: «iMo te 'Atua koe e ture atu!». ¹⁰ 'E nā ia te nu'u o'o atu ena ki roto i a kōrua e vānaŋa ta'e tano 'ā mo te me'e 'ina e rāua kai 'ite. Te me'e 'ite mau nō o rāua he me'e kī e te hakari, pa he oho iŋa o te 'animare, 'e hai nei me'e e tiŋa'i e oho ena i a rāua.

¹¹ i'Au-auē te nu'u ena! Ko oho 'ana a te ara ta'e tano pē [Kāiŋa]. 'I te haŋa ki te moni, ko haka tapa 'ā mai te ara o te 'Atua, pē [Vārama], 'e, 'i te haka 'āriŋa mau era 'ā o rāua, pē Kōrē † ka mā-mate ena.

¹² Te nu'u ena he ha'amā e tahi 'i te hora kai i te haraoa mo haka mana'u i te mate iŋa o Ietū. 'Ina a rāua he mo'a i te ŋoŋoro ena; te me'e aŋa nō he kai, he unu 'e he reka. Te nu'u ena pa he nu'u hāpa'o mā-moe hāpa'o i a rāua mau nō, pa he raŋi vai kore ma'u e te tokerau. 'E pa he tumu 'ina he hua, 'ina e tahi me'e riva-riva mo poreko mai roto i te nu'u ena. A rāua he me'e mate, pa he tumu ko o'i 'ā a te aka 'e ko paka-paka 'ana. ¹³ A rāua tako'a pa he vave taparahi-ta'ata, 'e te me'e ta'e tano ha'amā aŋa e rāua pa he kuta-kuta 'ō'one o te vaikava. Te nu'u ena tako'a pa he hetu'u e'a mai te rāua ara, 'e nā ko ai era 'ā te ūtu'a mo rāua, he noho mau rō 'āvai 'i roto i te kona hope'a o te pō'uri.

¹⁴ A 'Ēnoko, he hitu taŋata mai i a 'Ātamu, i vānaŋa rō pa he perofeta o ruŋa i te nu'u ena 'i te hora kī era pē nei ē: «I take'a rō e au i te 'Atua e oho mai 'ana koia ko tā'ana merahi ka mi'i ka mi'i ¹⁵ mo ture 'e mo haka ūtu'a i te taŋata o ruŋa i te me'e ta'ato'a ta'e tano aŋa

† A KŌRĒ he kope haka tumu i te ture ki a Mōtē ararua ko 'Ārone. Te 'Atua i riri rahi rō mō'ona, 'o ira i mātaki ai i te henua 'e he horo i te kope nei ananake ko te nu'u ta'ato'a pe'e ki a ia.

'e o ruŋa i te parau'ino ta'ato'a kī mō'ona e te nu'u hara taparahi-ta'ata».

¹⁶ Te nu'u ena he riri-riri nō te aŋa mo te me'e ta'ato'a, 'ina e tahi me'e tano mo rāua, te me'e haŋa mau nō he haka koa i a rāua. Te vānaŋa iŋa e haka tu'u rō 'ana pa he me'e ena ē: i a rāua mau nō te tano, 'e te aŋa he haka paka i te tētahi mo rava'a nō i te me'e mai i a rāua.

E haka hio-hio te mana'u 'i ruŋa i te 'Atua

¹⁷ E te taina, e u'i 'o rehu te vānaŋa kī 'i mu'a 'ā e te [l'āpōtoro] o te tātou Pū'oko Haka Tere ko Ietū Kiritō ¹⁸ pē nei ē: «I te ŋā mahana hope'a ena e ai rō te nu'u haka kata-kata 'i te 'Atua 'e 'i tā'ana nu'u, 'e hai me'e ta'e tano pohe nō e te hakari ka haka tere ena i a rāua». ¹⁹ O te nu'u ena te haka topa-topa kē i te taŋata. Te rāua me'e aŋa he me'e pohe nō o te hakari, 'e 'ina he Vārua o te 'Atua i a rāua.

²⁰ 'E a kōrua, e te taina ē, e haka hio-hio e oho nō 'i roto i te hāpī parauti'a hai haka moe i te mana'u 'i ruŋa i a Ietū, 'e e pure hai pūai o te [Vārua Maitai]. ²¹ E u'i 'o rehu te rahi o te haŋa o te 'Atua mo tātou. 'E e

tiaki ki te mahana ka va'ai mai ena e te tātou Pū'oko Haka Tere ko Ietū Kiritō, hai riva rahi ō'ona, i te ora 'āpī 'ina he hope'a ra'a.

²² E haka 'aroha 'e e hā'ū'ū e oho kōrua i te nu'u e 'a-ka-'aka rō 'ana te rāua mana'u. ²³ 'E ki te tētahi e u'i e haka e'a mai roto i te ūtu'a o te pō'auahi. E haka 'aroha kōrua i te nu'u hara, 'e e u'i kōrua e te hara era o rāua pa he 'ō'one haka pea-pea i te kahu, 'o pea-pea tako'a rō kōrua.

E ha'ahana-hana ki te 'Atua

²⁴⁻²⁵ Ki ha'ahana-hana tahi tātou ki te 'Atua, kope haka e'a i a tātou mai roto i te ūtu'a o te hara 'e va'ai mai i te ora 'āpī 'ina he hope'a ra'a hai Ietū Kiritō, he Pū'oko Haka Tere o tātou. I te 'Atua mau nō te pūai mo hāpa'o i a tātou 'o o'o ki roto i te hara, 'e mo haka māroa i a tātou pe mu'a ka oho ena 'i mu'a i a ia 'i roto i tō'ona pūai 'ana-'ana e koa rō 'ana 'e 'ina e tahi hape. I a ia mau nō te nui-nui, te pūai, te parau o te me'e ta'ato'a 'i mu'a 'ā, 'i te hora nei 'e 'ina he hope'a ra'a. [Āmene].

ME'E HAKA TAKE'A

Te puka nei i pāpa'i a [Iovani], [ʻāpōtoro] 'a Ietū Kiritō, 'e te me'e i pāpa'i he me'e i haka take'a 'e i haka anji-anji e te 'Atua. I pāpa'i ai 'i Patamo, motu 'i ira i haka ūtu'a ai e te rōmano 'o te haka 'ite i te [roŋo riva-riva o ruŋa i a Ietū]. 'I rā noho iŋa te 'ariki o te rōmano ko Tomitiano, 'e te anja he tute he tōtōā i te nu'u [kiritiano].

Te ha'amata o te puka nei, he roŋo mo te nūna'a taina e hitu o te kona e hitu o 'Ātia, roŋo 'a Ietū i va'ai ki a [Iovani] mo pāpa'i (2.1–3.22). Ki oti te pāpa'i i te nā roŋo nei e hitu, he pāpa'i mai a Iovani o ruŋa i te me'e i haka take'a e te 'Atua ki a ia 'i te ranji: te me'e ra'e, he pepe 'ariki 'i ruŋa te 'Atua e ha'amuri 'ana e te nu'u ta'ato'a haka vari i a ia (4.1–5.14); te rua, he me'e ta'ato'a ka oho mai ena 'i ra'e ki te pa'o o te ao. Mo haka mao, he pāpa'i mai a Iovani o ruŋa i te ranji 'āpī, te henua 'āpī, 'e te noho iŋa o te nu'u [haka moe i te mana'u] 'i ruŋa i a Ietū 'i muri i te 'Atua pe mu'a ka oho ena (21.1–22.5).

Hai me'e hā'aki 'i ruŋa i te puka nei i haŋa ai te 'Atua mo haka haŋu i te taina kiritiano 'o haka tapa i te rāua mana'u mai ruŋa i a Ietū 'i te hora o te 'ati, 'e mo haka veveri i te nu'u ta'e haka moe i te mana'u 'i ruŋa i a Ietū 'o noho nō 'i te pā'iŋa o te tātane. Te haŋa tako'a o te 'Atua he tiaki hai koa o te taina kiritiano ta'ato'a ki te tano iŋa ō'ona i tā'ana hōrea: he haka ūtu'a mau rō 'āvai i a Rukifero.

He ha'amata

¹ Te me'e nei e au e [Iovani] ka pāpa'i atu ena he me'e e ko roa ka topa rō mai ena, he me'e i haka 'ite e te 'Atua ki a Ietū Kiritō mo haka 'ite mai ki a tātou ki tō'ona tāvini. Nei me'e i haka 'ite mai ai e Ietū hai me'e i haka take'a mai e tō'ona merahi. ² 'E a au e pāpa'i atu ena hai parauti'a i tā'ana me'e ta'ato'a haka take'a mai era. 'E he mata'ite a au o te roŋo nei o te 'Atua 'e o te me'e ta'ato'a haka 'ite mai era e Ietū Kiritō.

³ Te 'Atua he ha'amaitai i te kope nō era mo tai'o i te puka nei ki te taina [haka moe i te mana'u] 'i ruŋa i a Ietū, 'e he ha'amaitai tako'a i te taina ta'ato'a haka roŋo 'e ha'atura ki te me'e hā'aki o ruŋa nei; nā, pa'i, ko hāhine 'ā te hora mo topa o rā nā me'e.

⁴ A au a Iovani he 'aroha atu ki te nūna'a taŋata hoko hitu † haka moe i te mana'u 'i ruŋa i a Ietū o te nā kona era o 'Ātia. Ka ai 'i ruŋa i a kōrua te riva rahi 'e te haumārū o te 'Atua o te hora nei, o mu'a 'ā 'e ka tu'u mai ena, o te vārua hoko hitu †† o mu'a i tō'ona pepe noho 'ariki, ⁵ 'e o Ietū Kiritō, he mata'ite haka 'ite i te parauti'a o ruŋa i te 'Atua, 'e tā'ana vānaŋa he parauti'a mau 'ā. A ia he kope ra'e ora haka 'ou mai te mate 'e 'ina kai mate haka 'ou, 'e i a ia te parau mo haka tere i te 'ariki ta'ato'a o te ao.

Te Kiritō e haŋa rō mai 'ā ki a tātou, 'e ko haka e'a 'ana i a tātou mai roto i te hara hai toto tehe era ō'ona. ⁶ Ko haka riro 'ana i a tātou he nūna'a taŋata haka tere 'ā'ana, 'e he [oromatu'a] anja ki te 'Atua, he Matu'a ō'ona. jKa ai i a ia te ha'ahana-hana o te ta'ato'a 'e te

† TE NŪNA'A TAŊATA HOKO HITU: 'I ruŋa i te Pipīria te ha'aaura'a o te hitu he me'e hope'a o te tī-tika 'e he ta'ato'a o te me'e e tahi. Pē ira te nā nūna'a nei e hitu he nūna'a ta'ato'a o te nu'u haka moe i te mana'u 'i ruŋa i a Ietū. †† TE VĀRUA HOKO HITU o mu'a o te 'Atua he ha'aaura'a o te Vārua Maitai.

pūai mo haka tere i te ao ta'ato'a 'ātā ki te hope'a ra'a! [ʻĀmene].

⁷ Ina ko rehu:

'i ruŋa i te ranji tea-tea ka oho mai ena a Ietū!

Ta'ato'a nō ka take'a ena, 'ātā te nu'u 'o-'oka era i a ia.

Te taŋata ta'ato'a o te ao ta'e haka moe i te mana'u 'i ruŋa i a ia

e ŋaro'a rō i te māui-ui ki roto i te ivi o ruŋa i a ia.

He anji mau 'ā, pē ira ka topa ena.

⁸ Te 'Atua o te hora nei, o mu'a 'ā 'e ka tu'u mai ena, 'Atua i a ia te pūai ta'ato'a, pē nei e kī ena: «A au he Ha'amata 'e he Hope'a».

Te [Kiritō] ko haka nui-nui 'ā

⁹ A au, a Iovani, he taina o kōrua, 'e, 'i te ai ō'oku 'a Ietū, a au tako'a 'i roto i te nūna'a taŋata haka tere e te 'Atua, 'amo 'e ha'aoroma'i i te 'ati ananake ko kuā kōrua. 'E, 'i te haka 'ite ō'oku i te roŋo o te 'Atua 'e 'i te vānaŋa o ruŋa i a Ietū, i ma'u i puru ai i a au 'i te motu era ko Patamo.

¹⁰ 'I ira, 'i te mahana tāpati e tahi, mahana o te 'Atua, he haka moe vārua i a au e te [Vārua Maitai], 'e he ŋaro'a e au i te re'o pūai pa he koneta 'i tu'a i a au ¹¹ e kī mai 'ā: «E pāpa'i 'i ruŋa i te puka te me'e ta'ato'a ena ka take'a ena e koe 'e 'ai ka haka ma'u rō ki te nā nūna'a taŋata era hoko hitu haka moe i te mana'u 'i ruŋa i a Ietū o te nā kona era o 'Ātia: ki Ēfeto, ki Ētēmī-rina, ki Perekamo, ki Tiatira, ki Tare, ki Pīrārēpia, 'e ki Rāōritea».

¹² He hāru i a au he u'i o 'ai tū re'o era. Te me'e i take'a mai he hakari'i e hitu anja hai piru, ¹³ 'e 'i vāeŋa o rā nā hakari'i te kope pa he Poki era 'ā o te taŋata, e

uru rō 'ana i te kahu roa-roa 'ātā ki te va'e, e haratu'a rō 'ā a te uma hai rīpena aŋa hai piru. ¹⁴ Te rau'oho pū'oko ō'ona pa he tea-tea ena 'ā o te huru-huru mā-moe 'o pa he rito-rito ena 'ā o te huru-huru manu, 'e te mata e tu'u rō 'ana pa he ura ena 'ā o te ahi. ¹⁵ Te va'e e pura rō 'ā pa he 'aurī ko tunu 'ā 'i roto i te rona 'e ko haka 'uira 'ā. Tō'ona re'o te pūai pa he heruru ena 'ā o te vai topa mai ruŋa i te kona ruŋa nui. ¹⁶ 'I te rima mata'u e hitu hetu'u, 'e mai roto i te haha e e'a era e tahi hoe e ka'i-ka'i rō 'ā ararua pā'iŋa. Te 'āriŋa pa he ra'ā 'i te hora pūai o te 'ana-'ana.

¹⁷ 'I take'a era e au, he tū-turi a au he moe a tō'ona va'e pa he me'e: ko mate 'ana a au. He haka puā mai ia e rā kope i tō'ona rima mata'u 'e he kī mai:

«'Ina koe ko ri'a-ri'a. A au he Ra'e 'e he Hope'a, ¹⁸ he kope e ora rō 'ā. I mate rō a au, 'e, hora nei, he ora he oho mau rō 'ai 'ātā ki te hope'a ra'a. Te tāviri o te mate i a au.

¹⁹ »E Iovani, e pāpa'i te me'e ta'ato'a ena ka haka take'a atu ena e au: he me'e mo topa 'i te hora nei 'e he me'e mo topa pe mu'a ka oho ena. ²⁰ Te aura'a o te ŋā hetu'u era e hitu take'a era e koe 'i tō'oku rima mata'u he merahi hoko hitu hāpa'o i te ŋā nūna'a taŋata era hoko hitu, 'e nei ŋā merahi he pū'oko haka tere o rā ŋā nūna'a. 'E te aura'a o te hakari'i piru era e hitu ko te ŋā nūna'a taŋata nei hoko hitu.

He roŋo mo Ēfeto

2 »E pāpa'i ki te merahi o te nūna'a taŋata [haka moe i te mana'u] 'i ruŋa i a au o Ēfeto:

“Pē nei te kī o te kope ma'u 'i te rima mata'u i te hetu'u e hitu, ha'ere 'i vāeŋa o te hakari'i e hitu aŋa hai piru:

² 'E 'ite tahi rō 'ana a au i ta'a me'e aŋa. E aŋi-aŋi rō 'ana i te paŋaha'a o ta'a aŋa, i te ha'aoroma'i iŋa ō'ou i te 'ati hai haumārū, 'e i tu'u ta'e haŋa ki te nu'u aŋa i te me'e ta'e tano. E 'ite tako'a rō 'ana a au i haka 'atu rō koe i te nu'u kī he 'āpōtoro rāua, 'e te parauti'a mau, ta'e pē ira; ko ma'urima 'ana, pa'i, e koe he reoreo. ³ 'I amo i oho nō koe i te 'ati 'o te ai ō'ou 'ā'aku, 'e 'ina kai hōriŋa, ko te haka moe ko te oho iŋa 'ana a koe i tu'u mana'u 'i ruŋa i a au.

⁴ 'Ka ai atu pē ira, e ai rō 'ana tā'aku ture mā'au: he ta'e haŋa haka 'ou mai ō'ou ki a au 'e ki te rua pa he oho iŋa era o mu'a 'ā, hora haka moe ra'e era ō'ou i te mana'u 'i ruŋa i a au. ⁵ E mana'u koe pē hē te rahi o tu'u haŋa 'i rā hora, 'e 'ai ka huri haka 'ou rō tu'u man-a'u. Te me'e aŋa era e koe 'i mu'a 'ā ka aŋa haka 'ou, 'o oho rō atu a au he to'o i ta'a hakari'i ena mai tō'ona kona.

⁶ 'Te me'e riva ō'ou: he ta'e haŋa ki te me'e aŋa e te nīkōrāita, he me'e ta'e haŋa e au.

⁷ 'Te kope haŋa mo aŋi-aŋi i tā'aku roŋo e haka roŋo te vānaŋa kī e te [Vārua Maitai] ki te nūna'a ta'ato'a haka moe i te mana'u 'i ruŋa i a au!

'Te nu'u rē ki te pūai o Rukifero he va'ai e au mo kai mai ruŋa i te tumu va'ai i te ora 'āpī 'ina he hope'a ra'a 'i te kona era o te 'Atua'’.

He roŋo mo Ētēmīrina

⁸ »E pāpa'i tako'a ki te merahi o te nūna'a taŋata haka moe i te mana'u 'i ruŋa i a au o Ētēmīrina:

“Pē nei te kī o te kope he Ra'e 'e he Hope'a, he kope i mate rō 'e i ora haka 'ou rō:

⁹ 'E 'ite rō 'ana a au i te rahi o te 'ati e 'amo ena e koe, 'e i tu'u veve, ka ai atu te parauti'a mau he 'ono koe. E 'ite tako'a rō 'ana a au pē hē e vānaŋa ta'e tano ena o ruŋa ō'ou e te nu'u kī he [hūrio] a rāua 'e te parauti'a mau he nūna'a rāua 'a Rukifero.

¹⁰ 'Ina koe ko ri'a-ri'a 'i te 'ati ka topa ena. Tētahi o kōrua e puru rō 'i roto i te hare ma'u'aurī hai Rukifero, he rāve'a e tahi mo haka 'atu atu i a kōrua ta'ato'a. E ho'e 'ahuru mahana ka 'amo ena kōrua i rā 'ati. E haka noho e oho nō koe i tu'u mana'u 'i ruŋa i a au ka ai atu he mate koe 'o te aŋa pē ira, 'e he va'ai atu e au i te ora 'āpī 'ina he hope'a ra'a mo haka koa i a koe.

¹¹ 'Te kope haŋa mo aŋi-aŋi i tā'aku roŋo e haka roŋo te vānaŋa kī e te Vārua Maitai ki te nūna'a ta'ato'a haka moe i te mana'u 'i ruŋa i a au!

'Te nu'u rē ki te pūai o Rukifero e ko topa 'i ruŋa i a rāua te rua mate iŋa, e ko ha'ata'a mau rō 'āvai mai muri i te 'Atua'’.

He roŋo mo Perekamo

¹² »E pāpa'i tako'a ki te merahi o te nūna'a taŋata haka moe i te mana'u 'i ruŋa i a au o Perekamo:

“Pē nei te kī o te kope i a ia te hoe ka'i-ka'i ararua pā'iŋa:

¹³ 'Ko 'ite 'ana a au e noho ena koe 'i te kona 'a Rukifero te haka tere, 'e, ka ai atu pē ira, kai haka tapa koe i tu'u mana'u mai ruŋa i a au, 'e kai haka rē i tā'aku hāpī, korohaŋa 'i te hora tiŋa'i era 'i nā i a Antipa, he mata'ite parauti'a ō'oku.

¹⁴ 'Ka ai atu pē ira, e ai rō 'ā tā'aku ture mā'au: 'i te kona ena e ai rō 'ā te kōrua nu'u ko te ma'u iŋa 'ana i te haka tere iŋa era 'a [Vārama]. O te kope nei, pa'i, i hāpī i a Vāraka † pē hē ana haka hara i te itaraera hai haka haŋu i a rāua mo kai i te kai tūtia ki te 'ītoro 'e mo moe i te vi'e 'e i te taŋata ta'e he vi'e 'o he kenu 'ā'ana.

¹⁵ 'E nā e ai tako'a rō 'ana te kōrua nu'u 'ina he haŋa mo haka rē i te hāpī o te nīkōrāita. ¹⁶ 'O ira, ka huri haka 'ou te mana'u ki te 'Atua. Mo ta'e aŋa pē ira, e ko roa a au ka oho atu ena ki a koe 'e, hai hoe e'a mai roto i tō'oku haha, te aura'a, hai vānaŋa 'ā'aku, ka haka ūtu'a ena i a rāua.

† Te VĀRAKA nei he 'ariki o te nu'u mōava uŋa i te perofeta era ko Vārama mo tohu i te itaraera 'o rē ki a rāua 'i te tama'i.

¹⁷ 'ĪTe kope haŋa mo aŋi-aŋi i tā'aku roŋo e haka roŋo te vānaŋa kī e te Vārua Maitai ki te nūna'a ta'ato'a haka moe i te mana'u 'i ruŋa i a au!

'Te nu'u rē ki te pūai o Rukifero he va'ai e au i te kai he [mānā] na'a era. 'E he va'ai tako'a e au e tahi mā'ea tea-tea 'i ruŋa e pāpa'i rō 'ā te 'īŋoa 'āpī e tahi, 'e 'ina he rua kope 'ite i rā 'īŋoa, ko te kope nō era i a ia rā mā'ea'".

He roŋo mo Tiatira

¹⁸ »E pāpa'i tako'a ki te merahi o te nūna'a taŋata haka moe i te mana'u 'i ruŋa i a au o Tiatira:

"Pē nei te kī o te Poki nei o te 'Atua, he kope tu'u o te mata pa he ura o te ahi, 'e te va'e pa he 'aurī pura:

¹⁹ 'E 'ite tahi rō 'ana a au i ta'a me'e aŋa. E 'ite rō 'ana a au i tu'u haŋa, i tu'u haka moe iŋa i te mana'u 'i ruŋa i a au, i te aŋa e aŋa mai ena 'e i te ha'aoroma'i ō'ou i te 'ati hai haumārū. E 'ite tako'a rō 'ana a au 'ata hau rō atu tu'u aŋa 'i te hora nei ki te hora era o mu'a 'ā.

²⁰ 'Ka ai atu pē ira, e ai rō 'ana tā'aku ture mā'au: he ha'aoroma'i ō'ou i te vi'e ko Hētāvere, vi'e kī i a ia mau 'ā he perofeta. Te vi'e nei hai hāpī reo-reo 'ā'ana e haka haŋu ena i tō'oku tāvini mo moe i te vi'e i te taŋata ta'e he vi'e 'o he kenu 'ā'ana 'e mo kai i te kai tūtia ki te 'ītoro. ²¹ I va'ai rō au i te hora mo hurī o tō'ona man-a'u ki te 'Atua 'e 'ina kai haŋa, 'e kai haŋa tako'a mo haka rē i tā'ana me'e aŋa he moe i te kenu ta'e 'ā'ana.

²²⁻²³ "O ira, he haka māui-ui e au i a ia ki te roa e ko e'a mai ruŋa i te ro'i, 'e he tiŋa'i he haka mate e au i tā'ana ŋā poki. 'E te taina moe i a ia, mo ta'e haka rē i te me'e aŋa e rā vi'e, he uŋa atu e au i te 'ati nui-nui ki ruŋa i a rāua.

'Pē ira ka 'ite ena e te nūna'a taŋata ta'ato'a haka moe i te mana'u 'i ruŋa i a au pē nei ē: e 'ite rō 'ana a au i te mana'u hope'a ena o te hōhonu 'e i te me'e o roto i te māhatu. 'E e tahi e tahi kope ka va'ai ena e au i te me'e tano, tano ki te me'e i aŋa e ia.

²⁴ 'E a kōrua, te tētahi nu'u haka moe i te mana'u 'i ruŋa i a au o Tiatira ta'e ma'u i te hāpī o te vi'e ena, hāpī kī e te tētahi he hāpī hōhonu, 'e te parauti'a mau he hāpī 'a Rukifero, he kī atu a au: 'ina a au e ko haka 'amo i a kōrua hai me'e haka 'ou mo ha'atura.

²⁵ Tā'aku me'e haŋa nō: ka haka moe ka oho nō i te kōrua mana'u 'i ruŋa i a au 'ātā ki tō'oku hoki iŋa mai.

²⁶ 'Te nu'u rē ki te pūai o Rukifero aŋa oho, 'ātā ki te hope'a, i tā'aku me'e haŋa mo aŋa, he va'ai e au i te parau mo haka tere i te henua ta'ato'a o te ao, ²⁷⁻²⁸ pa he va'ai iŋa mai era e tō'oku Matu'a ki a au, 'e he haka tere a rāua i te kona ta'ato'a hai pūai, 'e 'ina he nu'u mo rē ki a rāua. 'E te nu'u haka 'āriŋa he haka pararaha pa he haka pararaha iŋa i te pani aŋa hai 'ō'one. 'E ki tū nu'u rē era he va'ai tako'a a au i te hetu'u ena o te pō'ā.

²⁹ 'ĪTe kope haŋa mo aŋi-aŋi i tā'aku roŋo e haka roŋo te vānaŋa kī e te Vārua Maitai ki te nūna'a ta'ato'a haka moe i te mana'u 'i ruŋa i a au!'".

He roŋo mo Tare

3 »E pāpa'i tako'a ki te merahi o te nūna'a taŋata [haka moe i te mana'u] 'i ruŋa i a au o Tare:

"Pē nei te kī o te kope i a ia te vārua e hitu o te 'Atua 'e te ŋā hetu'u era e hitu:

'E 'ite tahi rō 'ana a au i ta'a me'e aŋa, 'e ko 'ite tako'a 'ana a au ko mate 'ā a koe, ka ai atu e kī ena e te tētahi nu'u e ora rō 'ā. ² Ka 'ara ka haka pūai te me'e toe ena i a koe, he me'e 'ina he roa toe he mate. Ko take'a 'ana e au: ta'a me'e aŋa me'e ta'e tano ki te mata o te 'Atua. ³ Ka mana'u koe ki te hāpī va'ai atu era koia ko hāruai haka 'ou i tu'u mana'u ki te 'Atua 'e 'ai ka ha'atura ka oho rō ki rā hāpī. Mo ta'e aŋa ō'ou pē ira, he tu'u atu a au pa he toke-toke haka ūtu'a i a koe 'i te hora 'ina kai 'ite hia e koe.

⁴ 'Ka ai atu pē ira, nai nā e ai rō 'ana te tētahi nu'u kai 'ō'one te rāua kahu, te aura'a, 'ina a rāua kai aŋa i te me'e ta'e tano. Te nu'u ena 'i muri i a au ka ha'ere ena e uru rō 'ana i te kahu tea-tea, he me'e tano mo rāua.

⁵ 'Te nu'u rē ki te pūai o Rukifero he uru i te kahu tea-tea, 'e 'ina a au e ko haka kore i te rāua 'īŋoa mai ruŋa i te puka 'i ruŋa e pāpa'i ena i te 'īŋoa o te nu'u i a rāua te ora 'āpī 'ina he hope'a ra'a va'ai e te 'Atua. 'E he haka māhani e au i a rāua ki tō'oku Matu'a 'e ki tō'ona merahi pa he nu'u 'ā'aku.

⁶ 'ĪTe kope haŋa mo aŋi-aŋi i tā'aku roŋo e haka roŋo te vānaŋa kī e te [Vārua Maitai] ki te nūna'a ta'ato'a haka moe i te mana'u 'i ruŋa i a au!'".

He roŋo mo Pīrārēpia

⁷ »E pāpa'i tako'a ki te merahi o te nūna'a taŋata haka moe i te mana'u 'i ruŋa i a au o Pīrārēpia:

"Pē nei te kī o te kope 'ina he hara 'e a ia he parauti'a, kope i a ia te tāviri o te 'ariki era ko [Tāvita], 'e kope mo mātaki e tahi me'e, 'ina he rua kope mo puru; 'e mo puru e tahi me'e, 'ina he rua kope mo māta-ki:

⁸ 'E 'ite tahi rō 'ana a au i ta'a me'e aŋa. 'E e 'ite tako'a rō 'ana a au: haŋu ta'e rahi tō'ou. 'E, ka ai atu pē ira, ko te haka roŋo 'e ko te ha'atura ko te oho iŋa 'ā koe i tā'aku vānaŋa, 'e ko te haka moe iŋa mai 'ā koe i te mana'u 'i ruŋa i a au. 'O ira, nā 'i mu'a i a koe i haka rē ai a au i te 'ōpani e ha-hata rō 'ā 'e 'ina he rua kope mo rava'a mo puru. ⁹ 'E, te nu'u 'a Rukifero kī atu: he [hūrio] a rāua 'e ta'e mau pē ira, he haka tū-turi atu e au 'i mu'a i a koe, ki 'ite ai pē nei ē: e haŋa rō atu 'ana a au ki a koe.

¹⁰ 'E 'i te ha'atura ō'ou i tā'aku roŋo nei: he ha'aoro-ma'i hai haumārū i te 'ati, he hāpa'o a au i a koe, 'o topa atu 'i ruŋa i a koe te 'ati taparahi-ta'ata ka topa ena 'i te ao mo haka 'atu i te taŋata ta'ato'a. ¹¹ E ko roa tō'oku hoki iŋa mai. 'O ira, ka haka moe ka oho nō i te kōrua mana'u 'i ruŋa i a au, 'o to'o e te rua i tu'u hei.

¹²Te nu'u rē ki te pūai o Rukifero, he haka riro e au pa he pou hio-hio 'i te kona ha'amuri 'Atua 'i te ranji, te aura'a: he noho mau rō 'ai a rāua 'i muri i a ia. 'E 'i ruŋa ka pāpa'i ena e au i te 'iŋoa o tō'oku 'Atua 'e o tō'ona kona noho, he Hērutarema 'āpī topa mai te ranji, 'e he pāpa'i tako'a e au 'i ruŋa i te 'iŋoa 'āpī ō'oku.

¹³Te kope haŋa mo anji-anji i tā'aku roŋo e haka roŋo te vānaŋa kī e te Vārua Maitai ki te nūna'a ta'ato'a haka moe i te mana'u 'i ruŋa i a au!'''.

He roŋo mo Rāōritea

¹⁴»E pāpa'i tako'a ki te merahi o te nūna'a taŋata haka moe i te mana'u 'i ruŋa i a au o Rāōritea:

“Pē nei te kī o te kope he [Āmene], he mata'ite kī mau nō i te parauti'a, he kope hai ia te 'Atua i aŋa ai i te me'e ta'ato'a:

¹⁵'E 'ite tahi rō 'ana a au i ta'a me'e aŋa. E 'ite tako'a rō 'ana a au: ta'e koe he take'o 'e ta'e koe he vera. jMāu'a ō i ta'e ai ai he take'o 'o he vera! ¹⁶'I te ai ō'ou he mahana, ta'e he take'o 'e ta'e he vera, he haka rua atu a au i a koe mai roto i tō'oku haha.

¹⁷He 'ono koe e kī ena, e riva-riva rō 'ā 'e 'ina e tahi a'a me'e hape; 'e te parauti'a 'ina koe he anji-anji pē nei ē: a koe, 'i te me'e o te 'Atua, he haka 'aroa e tahi, he veve, he matapō 'e 'ina u'u kahu uru. ¹⁸'O ira, mo haŋa ō'ou mo 'ono parauti'a, e ho'o, mai i a au, i te piru riva-riva tunu hai ahi; 'e e ho'o tako'a, mai i a au, i te kahu tea-tea mo uru mo 'api i te ha'amā o tu'u kahu kore, 'e i te rā'au mo paru o te mata mo take'a.

¹⁹'A au e ture e haka tī-tika rō 'ā i te nu'u ta'ato'a haŋa e au. 'O ira, ka hāruai haka 'ou tu'u mana'u ki te 'Atua 'e 'ai ka ha'atura rō hai māhatu.

²⁰'Ī a au e pātōtō atu ena 'i haho o te 'ōpani.

Te kope ŋaro'a 'e mātaki mai, he uru a au ki roto 'e he noho māua he kai.

²¹Te nu'u rē ki te pūai o Rukifero he haka noho e au 'i ruŋa i tō'oku pepe 'ariki 'i muri i a au, pa he rē iŋa ō'oku e noho nei 'i muri i tō'oku Matu'a 'i ruŋa i tō'ona pepe 'ariki.

²²Te kope haŋa mo anji-anji i tā'aku roŋo e haka roŋo te vānaŋa kī e te Vārua Maitai ki te nūna'a ta'ato'a haka moe i te mana'u 'i ruŋa i a au!'''».

Te ha'amuri iŋa 'i te ranji

4 I oti era te me'e nei, he u'i atu au ko te 'ōpani e tahi e ha-hata nō mai 'ana 'i te ranji. 'E te re'o ŋaro'a ra'e era e au, tu'u era pa he koneta, he kī haka 'ou mai: «Ka iri mai koe; 'Ī a au he haka take'a atu i te me'e mo topa pe mu'a ka oho ena».

²'I rā hora mau 'ā he haka moe vārua i a au e te [Vārua Maitai], 'e he take'a e au i te pepe noho 'ariki e tahi 'i ruŋa e noho rō 'ā te kope e tahi. ³Te 'ana-'ana o rā kope pa he 'ana-'ana o te mā'ea hope'a o te nehe-

nehe he *jaspe* 'o he *cornalina*. Rā pepe e haka vari rō 'ā e te hānua-nua mea e 'ana-'ana rō 'ana pa he *esmeralda*, ⁴'e e haka vari tako'a rō 'ana e te pepe 'ariki haka 'ou e piti 'ahuru mā maha 'i ruŋa e noho rō 'ana e piti 'ahuru mā maha ŋāŋata ra-rahi e uru rō 'ana i te kahu tea-tea 'e e pu'a rō 'ana i te hei aŋa hai piru.

⁵Mai te pepe 'ariki o vāeŋa e e'a era te 'uira, te re'o 'e te pātiri. 'I mu'a o rā pepe e hū rō 'ā e hitu rama, he vārua e hitu o te 'Atua. ⁶E ai tako'a rō 'ana 'i mu'a o rā pepe 'ariki era te me'e tu'u pa he vaikava, mā'eha pa he hi'o.

'I vāeŋa, kona 'i ira rā pepe, e haka vari rō 'ā e te me'e ora e hā, te mu'a 'e te tu'a o te hakari o rā ŋā me'e ko 'Ī 'ā e te mata. ⁷Te ra'e o rā ŋā me'e e tu'u rō 'ana pa he reone, te rua pa he 'uei, te toru te 'āriŋa pa he taŋata, 'e te hā pa he manu toke-toke e rere rō 'ā.

⁸Rā ŋā me'e ora era e ai rō 'ā e ono karā ka tahi o rāua, te roto 'e te haho o rā ŋā karā e 'Ī rō 'ana e te mata. Ka pō ka 'ōtea e kī era:

«Te Pū'oko Haka Tere o te me'e ta'ato'a, te 'Atua, i a ia te pūai ta'ato'a, 'ina ō'ona hape, 'ina ō'ona hara, 'e 'ina he rua kope pē ia; ko ia te kope 'i mu'a 'ā, 'i te hora nei 'e ka tu'u mai ena!».

⁹'I te hora ta'ato'a ha'ahana-hana 'e māuru-uru e tū ŋā me'e ora era e hā ki te kope noho 'i ruŋa i tū pepe 'ariki era o vāeŋa, kope i a ia te ora 'ina he hope'a ra'a, ¹⁰he tū-turi te piti 'ahuru mā maha ŋāŋata ra-rahi era 'i mu'a o rā kope he ha'amuri, 'ai ka ava i te rāua hei a mu'a i rā pepe koia ko kī:

¹¹«E te mātou Pū'oko Haka Tere ē, e te mātou 'Atua ē, mō'ou te me'e he mo'a, he haka nui-nui, 'e he ha'ahana-hana o te taŋata ta'ato'a.

'Ā'au, pa'i, i aŋa i te me'e ta'ato'a o te ao; hai haŋa ō'ou e ai ena 'e i aŋa tahi ai».

Te Māmoe 'e te taka parau

5 'I te rima mata'u o te kope era e noho rō 'ā 'i ruŋa i te pepe 'ariki i take'a ai e au i te taka parau e pāpa'i rō 'ā te roto 'e te haho, 'e e tāma'u rō 'ana hai tāma'u e hitu. ²'E he take'a e au i te merahi pūai e tahi e ohu 'ā: «¿Ko ai te kope tano mo kume i te tāma'u o te taka nei 'e mo mātaki?».

³'Ina kai ai 'i te ranji, 'i ruŋa i te henua 'e 'i raro o te henua, o roto i te me'e aŋa e te 'Atua, te kope tano mo mātaki 'e mo tai'o i rā parau. ⁴I to'o rō atu ai tō'oku taŋi 'i te kore o te kope mo mātaki 'e mo tai'o i rā parau. ⁵He kī mai ia e tahi o tū ŋāŋata ra-rahi era:

«'Ina koe ko taŋi haka 'ou! Kope ena he Reone o te mata o [Hūrā], he hakaara o [Tāvita], ko rē 'ā ki te pūai o Rukifero. Ko ia te kope tano mo kume i te ŋā tāma'u era e hitu 'e mo mātaki i te taka parau era».

⁶I rā hora he take'a e au i te Māmoe e tahi e māroa rō 'ā 'i vāeŋa o te kona era 'i ira te pepe 'ariki, te nā me'e ora era e hā, 'e tū nāŋata ra-rahi era. Te Māmoe nei e tu'u rō 'ā pa he me'e ena ē: ko tiŋa'i 'ā 'e ko tūtia 'ana. E hitu ō'ona tara [†]'e e hitu mata; rā nā mata ko te nā vārua era e hitu o te 'Atua ūŋa era ki te kona ta'ato'a o te ao.

⁷He oho ia tū Māmoe era he to'o i tū taka parau era mai te rima mata'u o te kope era 'i ruŋa i te pepe 'ariki. ⁸I to'o era he noi he tū-turi 'e he ha'amuri ki rā Māmoe e rā nā me'e ora era e hā 'e e tū nā piti 'ahuru mā maha nāŋata ra-rahi era. Ta'ato'a o tū nāŋata ra-rahi era e ma'u rō 'ā i te *arpa* 'e, tako'a, i te poko-poko aŋa hai piru e 'ī rō 'ana e te *inciense*, te aura'a: he pure o te nūna'a taŋata ha'ata'a e te 'Atua mā'ana. ⁹E hīmene 'ā i te hīmene 'āpī nei:

«Ko koe mau 'ā te kope tano mo to'o i te taka parau ena 'e mo kume i tō'ona tāma'u 'o te ai i tiŋa'i i tūtia rō i a koe.

Hai toto tehe era ō'ou i ho'o ai koe i te taŋata mo te 'Atua o te ta'ato'a nō hau, 'arero 'e henua o te ao, ¹⁰'e i haka riro ai he nūna'a taŋata haka tere e ia, 'e he [oromatu'a] mā'ana; mo rāua te ao nei e haka tere».

¹¹E u'i nō 'ana a au he ŋaro'a mai te re'o o te merahi ka mi'i ka mi'i haka vari i tū pepe 'ariki era, i tū nā me'e ora era 'e i tū nāŋata ra-rahi era. ¹²Hai re'o pūai e kī era:

«Te me'e mo te Māmoe tiŋa'i tūtia era: he mo'a, he haka nui-nui 'e he ha'ahana-hana o te taŋata ta'ato'a 'o tō'ona pūai, 'o tō'ona hauha'a, 'o tō'ona māramarama 'e 'o tō'ona mana!».

¹³'E he ŋaro'a tako'a e au i te me'e ta'ato'a ora aŋa e te 'Atua o ruŋa o te raŋi, o ruŋa o te henua, o raro o te henua 'e o roto i te vaikava e kī 'ā:

«Ki ha'ahana-hana, ki mo'a, 'e ki haka nui-nui tātou 'ātā ki te hope'a ra'a i te kope noho o ruŋa i te pepe 'ariki 'e i te Māmoe; i a rāua, pa'i, te pūai!».

¹⁴He pāhono ia e tū nā me'e ora era e hā: «Ka ai pē ira!». 'E tū nā piti 'ahuru mā maha nāŋata ra-rahi era he noi he tū-turi 'ai ka ha'amuri.

Te nā tāma'u ra'e era e hā

6 I oti era he take'a e au i tū Māmoe era e kume 'ā i te tāma'u ra'e o tū nā tāma'u era e hitu. 'E he ŋaro'a e au e tahi o tū nā me'e ora era e hā e kī 'ana hai re'o pūai tu'u pa he pātiri: «Ka oho mai!».

[†] E HITU Ō'ONA TARA: Te ha'aaura'a o te tara ena e hitu o te Māmoe: he pūai 'ina he hope'a ra'a o Ietū.

²He u'i atu ia a au ko te hoi tea-tea e tahi, 'e te kope eke o ruŋa e ma'u rō 'ana i te te'a. He haka pu'a i rā kope hai hei 'ariki, 'e he oho he moto pa he kope rē, mo rē haka 'ou ki te taŋata ta'e haŋa ki a ia.

³I kume era e te Māmoe i te rua tāma'u, he ŋaro'a e au i te rua o tū nā me'e ora era e hā ka kī: «Ka oho mai!».

⁴He e'a mai te hoi haka 'ou e tahi, hoi mea-mea. 'E he va'ai ki te kope eke o ruŋa i rā hoi i te parau mo haka kore i te haumārū mai te ao, ki moto ai te taŋata 'e ki tiŋa'i-ŋa'i ai i a rāua. 'E he va'ai tako'a i te hoe roaroa e tahi.

⁵I kume era e te Māmoe i te toru tāma'u, he ŋaro'a e au i te toru o tū nā me'e ora era e hā ka kī: «Ka oho mai!». He u'i atu a au ko te hoi 'uri-'uri e tahi, 'e 'i te rima o te kope eke o ruŋa te hāito. ⁶'E mai te vāeŋa o tū nā me'e ora era e hā i ŋaro'a ai e au i te re'o e kī 'ana: «E tahi mau nō kiro tariko mo te moni aŋa o te mahana e tahi, 'e e toru kiro sevara mo tū moni 'ā; 'e 'ina ko tōtōā i te tumu 'ōrivo 'e i te tumu vino».

⁷I kume era e te Māmoe i te hā tāma'u, he ŋaro'a e au te kī iŋa o te hā o tū nā me'e ora era: «Ka oho mai!».

⁸He u'i atu a au he hoi tōuamāmari e tahi, 'e te kope eke o ruŋa te 'iŋoa ko Mate. 'I tu'a ō'ona e oho era te kope e tahi o te kona ko 'Are te 'iŋoa, he kona o te nu'u mate. I oho era he va'ai ki te nā kope nei i te parau mo tiŋa'i mo haka mate e tahi 'apa o te 'apa e hā o te taŋata ta'ato'a o te ao hai tama'i, hai maruaki, hai māui-ui 'e hai manu taehae.

Te rima 'e te ono tāma'u

⁹I kume era e te Māmoe i te rima tāma'u, he take'a e au 'i raro o te [fata] i te vārua o te nu'u mā-mate, tiŋa'i e te nu'u 'o te haka 'ite 'o te oho i te [roŋo riva-riva o te 'Atua] 'e 'o te ma'u i rā roŋo pa he me'e o rāua. ¹⁰Pē nei e kī pūai era: «E te Pū'oko Haka Tere mo'a 'e parauti'a ē, ʒa hē koe ka haka 'auhau hai ūtu'a i te taŋata o te ao 'o te tiŋa'i i a mātou?».

¹¹He to'o mai ia he va'ai ki rā nu'u hai kahu tea-tea mo uru, 'e he kī mo haka ora mo oho nō 'ātā ka tano tahi rō te rahi kī era e te 'Atua o te taina, taina ka mā-mate tako'a era pē rāua 'o te aŋa ki a ia.

¹²I kume era e te Māmoe i te ono tāma'u, he u'i atu a au ko mākenu-kenu tahi 'ana te henua. Te ra'ā he 'uri-'uri rō atu 'ai, pa he kahu uru o te hove, 'e te māhi-na he mea-mea pa he toto. ¹³Te hetu'u he vī-viri ki ruŋa i te henua, pa he viri iŋa ena o te pika mata mai ruŋa i te tumu 'i te hora ue-ue pūai e te tokerau. ¹⁴Te raŋi he ŋaro pa he me'e ena ē: i taka pa he parau. Te ma'uŋa 'e te motu ta'ato'a he haka makenu mai te rāua kona.

¹⁵Te 'ariki ta'ato'a o ruŋa i te henua he tē-tere he pī-piko 'i roto i te 'ana 'e 'i roto i te vaha mā'ea o te kona ma'uŋa ananake ko te nu'u hōnui, ko te nu'u pū'oko haka tere o te va'ehau, ko te nu'u 'ono, ko te nu'u ai o te pūai mo haka tere i te taŋata, ko te 'ekaravo 'e ko te

ta'e 'ekaravo. ¹⁶ E pē nei e ohu e ani era ki te ma'uŋa 'e ki te mā'ea:

«Ka viri 'e ka 'api mai i a mātou, 'o take'a rō e te Kope era o ruŋa i te pepe noho 'ariki 'i te ranji, 'o topa mai te riri o te Māmoe 'i ruŋa i a mātou! ¹⁷ Ko tu'u mai 'ana, pa'i, te mahana o te haka ūtu'a, 'e 'ina e tahi kope mo ha'aoroma'i».

He me'e i take'a 'i ra'e ki te kume i te hitu tāma'u

7 I oti era te me'e nei, he take'a e au e hā merahi e māroa rō 'ana 'i te pā'iŋa ena e hā o te henua. E haka noho 'ā i te tokerau 'o puhi a ruŋa i te henua, a roto i te vaikava 'e a ruŋa i te tumu. ² He take'a tako'a e au i te merahi e tahi e oho mai 'ā mai te pā'iŋa e'a mai o te ra'ā, e ma'u rō 'ā 'i te rima i te tāpa'o o te 'Atua. He ohu pūai e rā merahi ki tū ŋā merahi era e hā, merahi i a rāua te parau mo tōtōā i te henua 'e i te vaikava, pē nei ē: ³ «ĪĒ, 'ina kōrua ko tōtōā i te henua, i te vaikava 'e i te tumu 'ātā ka tāpa'o tahi rō e mātou a te tira i te tāvini o te tātou 'Atua!».

⁴ I ŋaro'a rō e au e hia rahi o rā nu'u era mo tāpa'o: e ho'e hānere maha 'ahuru mā maha ta'utini o roto i te mata ta'ato'a o te itaraera.

⁵ E ho'e 'ahuru mā piti ta'utini o te mata o Hūrā,
 e ho'e 'ahuru mā piti ta'utini o te mata o Rūveni,
 e ho'e 'ahuru mā piti ta'utini o te mata o Kati,
⁶ e ho'e 'ahuru mā piti ta'utini o te mata o 'Ātere,
 e ho'e 'ahuru mā piti ta'utini o te mata o Nefetārī,
 e ho'e 'ahuru mā piti ta'utini o te mata o Manatē,
⁷ e ho'e 'ahuru mā piti ta'utini o te mata o Timione,
 e ho'e 'ahuru mā piti ta'utini o te mata o [Rēvī],
 e ho'e 'ahuru mā piti ta'utini o te mata o Ītākara,
⁸ e ho'e 'ahuru mā piti ta'utini o te mata o Tāvūrone,
 e ho'e 'ahuru mā piti ta'utini o te mata o [Kōsē],
 'e e ho'e 'ahuru mā piti ta'utini o te mata o
 [Mēhāmina].

⁹ I oti era te me'e nei, he u'i atu a au ko te nu'u ri'a-ri'a o te ao o te ta'ato'a hau, o te ta'ato'a 'arero 'e o te ta'ato'a henua, e māroa rō 'ana 'i mu'a o te kona pepe 'ariki era 'e o te Māmoe. 'I te rahi e ko rava'a mo tatakū. E uru tahi rō 'ana i te kahu tea-tea, e ma'u-ma'u rō 'ā 'i te rima i te maŋa niu. ¹⁰ Ta'ato'a e ohu pūai era:

«ĪA tātou i e'a nei mai roto i te ūtu'a o te hara 'e i rava'a nei i te ora 'āpī 'ina he hope'a ra'a hai 'Atua nei o tātou e noho mai nei 'i ruŋa i te pepe 'ariki 'e hai Māmoe!».

¹¹ Te merahi ta'ato'a e māroa rō 'ā 'i te tapa o tū kona pepe noho 'ariki era, 'e o tū ŋāŋata ra-rahi era 'e o tū ŋā me'e ora era e hā. He ha'amuri rā ŋā merahi ki te 'Atua i noi ka topa rō te tira ki ruŋa i te 'ō'one, ¹² 'e he kī pē nei ē:

«ĪHe anjī 'anal

Te me'e mo te tātou 'Atua:
 he ha'ahana-hana, he haka nui-nui,
 he mo'a 'e he māuru-uru o te ta'ato'a
 'o te 'ite ō'ona i te me'e ta'ato'a,
 'o te ai i a ia te pūai 'e te mana.
 Ki ha'ahana-hana tātou ki a ia 'ātā ki te hope'a ra'a.
 Ī[Āmene]!».

¹³ He 'ui mai ia e tahi o tū ŋāŋata ra-rahi era:

—ĪKo ai te nu'u uru kahu tea-tea era, 'e mai hē a rāua i oho mai ai?

¹⁴ —E koro, ko koe i 'ite —i pāhono ai e au.

He kī mai ia:

—Te nu'u era he nu'u e'a mai roto i te 'ati taparahi-ta'ata o te pa'o iŋa o te ao, ko te nu'u haka ma'itaki era 'e haka rito-rito era i te rāua kahu hai toto o te Māmoe.

¹⁵ »'O ira a rāua e māroa ena 'i mu'a o te pepe 'ariki o te 'Atua 'i te [Kona 'Ata Mo'a],
 'e ka pō ka 'ōtea e tāvini ena ki a ia.
 'E o te kope era 'i ruŋa i rā pepe te hokorua 'e te hāpa'o.

¹⁶ E ko maruaki haka 'ou, e ko pohe haka 'ou ki te vai, e ko vera haka 'ou 'i te pūai o te ra'ā, 'e 'ina e ko 'ati 'i te ve'a-ve'a

¹⁷ 'o te ai te Māmoe era 'i vāeŋa o te kona pepe 'ariki era
 he hāpa'o i a rāua pa he taŋata hāpa'o māmoe e hāpa'o 'ana i tā'ana māmoe.
 Mā'ana e ma'u ki te kona vai va'ai i te ora 'āpī 'ina he hope'a ra'a,
 'e mo te 'Atua e haro'i i te rāua matavai.

Te hitu tāma'u

8 I kume era e te Māmoe i te hitu tāma'u mai ruŋa i tū taka parau era, e toru 'ahuru minuti i kiva-kiva ai a ruŋa o te ranji.

He koneta e hitu

² He take'a ia e au e hitu merahi e māroa rō 'ana 'i mu'a o te 'Atua, 'e he va'ai ki a rāua e hitu koneta. ³ I oti era he take'a haka 'ou e au i te merahi e tahi e ma'u rō 'ā i te poko-poko aŋa hai piru mo tutu o te me'e haka 'eo. He māroa rā merahi 'i mu'a o te [fata] aŋa tako'a hai piru o mu'a o te kona pepe noho 'ariki era, 'e he va'ai ki a ia me'e rahi nō atu *incienso* mo tūtia koia ko te pure o te nu'u ha'ata'a e te 'Atua mā'ana 'i ruŋa i rā fata. ⁴ Te 'au o tū me'e 'eo era ko iri ko oho 'ana mai te rima o tū merahi era 'ātā ka tu'u rō ki mu'a o te 'Atua koia ko te pure o te nu'u ha'ata'a e ia mā'ana. ⁵ He to'o mai e tū merahi era i tū poko-poko era he ha'a'ī hai mara-mara ahi o te kona fata era. I oti era he ava a ruŋa i te henua, 'e 'i rā hora he heruru te

pātiri, he 'anapa te 'uira, 'e he mākenu-kenu pūai te henua.

⁶Tū nā merahi era ia e hitu, merahi era i a rāua te koneta, ko haka rito 'ā mo puhi.

Te nā koneta ra'e era e hā

⁷He puhi ia te merahi ra'e i tā'ana koneta. 'I rā hora he ava a ruŋa i te henua i te mata-matāika 'e i te ahi e 'āno'i rō 'ana hai toto. He vera e tahi 'apa o te 'apa e toru o te henua 'e o te tumu, 'e te mauku ritomata ta'ato'a.

⁸He puhi ia te rua merahi i tā'ana koneta. He ava a roto i te vaikava i te me'e tu'u pa he ma'uŋa nui-nui e tahi e ura rō 'ana e te ahi. He riro rō atu 'ai he toto e tahi 'apa o te 'apa e toru o te vaikava. ⁹'E he mā-mate e tahi 'apa o te 'apa e toru o te me'e ta'ato'a o roto i te vaikava, 'e he haka kore e tahi 'apa o te 'apa e toru o te pahī.

¹⁰He puhi te toru merahi i tā'ana koneta. He viri mai te ranji te hetu'u nui-nui e tahi e ura rō 'ana pa he rama ki roto i te 'apa e tahi o te 'apa e toru o te rio 'e o te kona manana vai. ¹¹Te 'iŋjoa o rā hetu'u ko Maŋeo. He maŋeo rō 'ai ia te vai o rā 'apa era e tahi, 'e me'e rahi nō atu taŋata i mā-mate 'i rā vai.

¹²He puhi te hā merahi i tā'ana koneta. He haka kore i te mā'eha o te 'apa e tahi o te 'apa e toru o te ra'ā, o te māhina 'e o te hetu'u, 'e he pōhāhā rā 'apa. Pē ira i pōhāhā ai e tahi 'apa o te 'apa e toru o te pō 'e o te 'ōtea.

¹³I oti era he u'i atu a au ko te manu nui-nui e tahi e rere rō 'ā 'i vāeŋa o te ranji e ohu pūai 'ā: «i!Au-auē te taŋata o ruŋa i te henua ka puhi ena te nā koneta haka 'ou ena e toru!».

Te rima koneta

9 He puhi te rima merahi i tā'ana koneta. He take'a e au i te hetu'u e tahi viri ki ruŋa i te henua. Te hetu'u nei he merahi o te kona pū 'ina he hope'a o te raro nui. Ki a ia i va'ai ai i te tāviri o rā kona. ²He māta-ki ia e rā merahi i tū pū era, 'e mai roto i e'a ai te 'au tu'u pa he 'au e'a mai roto i te rona nui-nui. He pō'uri te ra'ā 'e he 'ehu-'ehu te henua.

³Mai roto i rā 'au i e'a ai te manu'ino tu'u pa he perete'i 'e he kau 'i ruŋa i te henua. He va'ai ki a rāua i te pūai mo pātia pa he veri'ārahu. ⁴He kī mo ta'e tōtōā i te mauku, i te tumu 'e i te me'e ritomata ta'ato'a tupu o ruŋa i te henua. Te me'e mau nō i ha'ati'a ki a rāua mo tōtōā he nu'u ta'e ma'u i te tāpa'o o te 'Atua 'i te rāua tira. ⁵'Ina kai ha'ati'a mo tiŋa'i mo haka mate i te taŋata. Te me'e i ha'ati'a he haka mamae i a rāua e rima 'āva'e. Te mamae pa he mamae iŋa ena 'ā o te pātia o te veri'ārahu.

⁶'I rā nā mahana he haŋa te taŋata mo mate, 'e 'ina e ko mate.

⁷Te huru o rā nā me'e tu'u era pa he perete'i pa he hoi ko haka riva-riva 'ana mo oho ki te tama'i. 'I te rāua pū'oko e pu'a rō 'ana i te me'e tu'u pa he hei aŋa

hai piru, 'e te 'āriŋa pa he 'āriŋa taŋata 'ana. ⁸Te rau'o-ho e roa-roa rō 'ana, pa he pū'oko o te nā vi'e, 'e te niho pa he niho reone 'ā. ⁹Te hakari e puru tahi rō 'ana e te kahu aŋa hai 'aurī, 'e te heruru o te karā pa he heruru ena 'ā o te me'e rahi nō atu pere'oa haro hai hoi 'i te hora o te tama'i. ¹⁰Te hiku pa he hiku ena 'ā o te veri'ārahu, 'e 'i te hiku te pūai o te nā manu'ino nei mo haka mamae i te taŋata e rima 'āva'e.

¹¹Te 'ariki o rā nā manu'ino he merahi mātaki era i tū kona pū era 'ina he hope'a o te raro nui. Te 'iŋjoa o te merahi nei 'i te ['evereo] ko Āvārone 'e 'i te [kirioko] ko 'Āporione. Te ha'aaura'a o te nā 'iŋjoa nei: «he kope taparahi-ta'ata 'i te me'e ta'ato'a».

¹²Ko oti 'ana ia te 'ati ra'e; e rua 'ati toe.

Te ono koneta

¹³He puhi ia te ono merahi i tā'ana koneta. He ŋaro'a e au i te re'o e tahi e'a mai vāeŋa o te tara e hā o tū [fata] aŋa era hai piru o mu'a o te 'Atua. ¹⁴He kī rā re'o ki tū ono merahi era i a ia te koneta: «Ka haka pako'o te nā merahi ena e hā here-here ena 'i te kona rio nui-nui era ko Eufrate».

¹⁵He haka pako'o ia i tū nā merahi era mo oho mo tiŋa'i i te 'apa e tahi o te 'apa e toru o te taŋata ta'ato'a. Ko haka rito era 'ana, pa'i, i a rāua e te 'Atua mo aŋa i rā me'e 'i rā hora, 'i rā mahana, 'i rā 'āva'e 'e 'i rā matahiti mau 'ā. ¹⁶'E i ŋaro'a rō e au i te rahi o te va'e-hau oho a ruŋa i te hoi: e piti hānere mirione.

¹⁷Pē nei te huru o te hoi 'e o te nu'u eke i rā nā hoi i haka take'a mai ai e te 'Atua. Te nu'u eke o ruŋa e puru rō 'ana i te rāua uma hai me'e aŋa hai 'aurī mea-meapa he ahi, moana pa he vaikava 'e tōuamāmari. Te pū'oko o rā nā hoi pa he pū'oko 'ā o te reone, 'e mai roto i te haha e e'a era te ahi, te 'au 'e te *azufre*.

¹⁸E tahi 'apa o te 'apa e toru o te taŋata i mā-mate 'i te nā me'e nei e toru. ¹⁹Te pūai o rā nā hoi 'i te haha 'e 'i te hiku. 'I ruŋa o te hiku te me'e tu'u pa he pū'oko o te kōreha veneno, 'e hai rā me'e e tōtōā era i te taŋata.

²⁰'E te tētahi nu'u ta'e mā-mate era 'i rā nā 'ati, ka ai atu ko mate 'ana e tahi 'apa o te 'apa e toru o te taŋata, 'ina kai haka rē i te me'e ta'e tano aŋa e rāua, 'e 'ina tako'a kai haka rē i te ha'amuri ki te tātane, ki te 'i-toro aŋa hai piru, hai 'aurī, hai mā'ea 'e hai miro, me'e 'ina he take'a, 'ina he ŋaro'a 'e 'ina he ha'ere. ²¹'E 'ina tako'a kai haka rē i te tiŋa'i i te haka mate i te taŋata, i te aŋa i te tahu-tahu, i te moe i te vi'e i te taŋata ta'e he vi'e he kenu 'ā'ana 'e i te toke.

Te me'e i topa 'i ra'e ki te puhi o te hitu koneta

10 He take'a ia e au i te merahi pūai e tahi e topa 'ā mai te ranji e viri tahi rō 'ana e te ranji tea-tea. 'I ruŋa i tō'ona pū'oko te hānuu-nua mea e tahi. Te 'āriŋa e 'ana-'ana rō 'ā pa he ra'ā, 'e te va'e pa he ura ahi 'ā. ²E ma'u rō 'ana 'i tō'ona rima i te taka parau 'iti-iti e tahi e ha-hata rō 'ā. He haka topa i tō'ona va'e mata'u a ruŋa i te vaikava 'e i te va'e mau i ruŋa i te henua, ³'e he ohu pūai. Tō'ona re'o pa he ŋū-ŋuru iŋa

ena 'ā o te reone. I ohu era he pāhono e te pātiri e hitu.

⁴ I oti era te pātiri i te vānaŋa, he oho a au mo pāpa'i i te rāua me'e kī era, 'e mai te ranji te re'o e tahi i kī mai ai: «'Ina koe ko pāpa'i te vānaŋa era; e hāpa'o, 'ina ko haka 'ite».

⁵ Te merahi take'a era e au e māroa rō 'ā e tahi va'e 'i ruŋa i te vaikava 'e te rua 'i ruŋa i te henua, he ma'u i tō'ona rima mata'u a te ranji, ⁶ 'e hai 'iŋoa o te kope era 'ina he mate ki te hora hope'a aŋa era i te ranji, i te henua, i te vaikava, 'e i te me'e ta'ato'a e ai ena, i hōrea ai pē nei ē: «'Ina he 'Atua e ko tiaki haka 'ou.

⁷ Ka puhi ena, pa'i, te hitu merahi i tā'ana koneta, he tano tahi te me'e mana'u era e ia mo aŋa ta'e aŋi-aŋi e te taŋata 'i mu'a 'ā, he me'e kī era e ia ki te perofeta, tāvini ō'ona».

⁸ Te re'o ŋaro'a era e au vānaŋa mai era mai te ranji he kī haka 'ou mai: «Ka oho ka to'o te taka parau 'iti-'iti era e ha-hata rō 'ā 'i te rima o te merahi māroa era 'i ruŋa i te henua 'e 'i ruŋa i te vaikava».

⁹ He oho ia a au he kī mo va'ai mai. He pāhono mai e rā merahi: «'I a'a. Ka to'o 'e 'ai ka kai rō. Ka kai ena, he ŋaro'a e koe he nene nō pa he meri, 'e ka horo ena, he ŋaro'a e koe e maŋeo rō 'ā».

¹⁰ He to'o ia e au i rā parau mai te rima o tū merahi era he kai. He ŋaro'a e au e nene mau rō 'ā pa he meri, 'e, i horo era, he maŋeo a au. ¹¹ I oho era he kī mai e te kope e tahi: «E oho haka 'ou koe e haka 'ite i te roŋo o te 'Atua, roŋo haka 'ite atu e ia o ruŋa i te me'e ka topa ena ki te nu'u o te me'e rahi nō atu hau, henua, 'e 'arero, 'e ki te rāua 'ariki».

11 He va'ai mai ia i te miro hāito tu'u pa he 'ohe, 'e he kī mai e te 'Atua:

«Ka oho koe ka hāito i te [Kona Mo'a 'e 'Ata Mo'a] o te [Kona Ha'amuri 'Atua] 'e i te fata, 'e 'ai ka tataku rō e hia nu'u ha'amuri o ira. ² 'Ina koe ko hāito i te haho; ko haka rē 'ana, pa'i, te kona ena ki te nu'u ta'e 'ite ko ai te 'Atua parauti'a. Mo rāua e tōtōā i te kona mo'a ena ko Hērutarema e maha 'ahuru mā piti 'āva'e, te aura'a, e ho'e ta'utini piti hānere ono 'ahuru mahana. ³ E uŋa rō a au ki ira e rua mata'ite e uru rō 'ana i te kahu aŋa hai pūtē tore mo haka 'ite i tā'aku roŋo 'i rā ŋā mahana ta'ato'a».

Pē ira i kī mai ai e te 'Atua.

⁴ Te ŋā mata'ite nei e ha'aura'a ena 'i ruŋa i te [Pā-pa'i Mo'a] pa he tumu ō'rivo e rua 'e pa he hakari'i e rua o mu'a o te Pū'oko Haka Tere o te henua. ⁵ Mo oho o te kope e tahi mo tōtōā i rā ŋā mata'ite, he tutu i rā kope hai ahi e'a mai roto i te rāua haha 'e he vera tahi rō atu 'ai. Pē ira ka haka kore ena i te nu'u haŋa mo tōtōā i a rāua. ⁶ I te ŋā mata'ite nei te pūai mo puru i te ranji 'o hoa te 'ua 'i te hora ta'ato'a haka 'ite o rāua i te roŋo o te 'Atua, 'e te pūai tako'a mo haka riro i te vai he toto 'e mo tōtōā i te henua hai rauhuru nō atu 'ati hora nō era o rāua i haŋa.

⁷ Ki oti te rāua aŋa, he haka 'ite i te roŋo o te 'Atua, te manu'ino taparahi-ta'ata e'a mai raro i te pū 'ina he hope'a te raro nui he moto ki a rāua 'e he rē. He tiŋa'i ia he haka mate i rā ŋā mata'ite. ⁸ He haka rē i te rāua hakari 'i te kona taka-taka taŋata o te kona nui-nui ena ko Hērutarema, kona veo era 'i ruŋa i te tātaurō i te tā-tou Pū'oko Haka Tere, kona e kī tako'a rō 'ana ko [Tōroma] 'o ko Ehipto he 'i-'ino o te nu'u o ira. ⁹ 'E 'ina he haka rē mo tanu; e toru mahana 'e te 'afa ka mā-ta'i-ta'i ena i te hakari mate o te ŋā mata'ite nei e te nu'u o te rauhuru nō atu kona, hau, 'arero 'e henua. ¹⁰ He koa te taŋata o te ao 'o te mate o rāua. 'E, 'i te rahi o te koa, he aŋa i te ŋoŋoro 'e he va'ai e te kope e tahi ki te rua kope i te me'e mo haka koa; rā ŋā perofeta, pa'i, he 'ati e tahi mo rāua.

¹¹ Ki tano te toru mahana 'e te 'afa, he haka ora haka 'ou e te 'Atua i tū ŋā mata'ite era 'e he e'a ki ruŋa. 'E te nu'u ta'ato'a take'a i a rāua he ri'a-ri'a rō atu 'ai. ¹² He kī ia e te re'o pūai e tahi mai te ranji ki rā ŋā mata'ite: «'Ka iri mai kōrua!».

He iri ararua a ruŋa i te ranji tea-tea e tahi, 'e he take'a e tū nu'u ta'e haŋa era ki a rāua. ¹³ 'I rā hora mau 'ana he mākenu-kenu tahi te henua 'e, 'i te mākenu-kenu, he mārere-rere te 'apa e tahi o te 'apa e ho'e 'ahuru o rā kona, 'e he mā-mate e hitu ta'utini taŋata. Te nu'u ta'e mā-mate era he ri'a-ri'a rō atu 'ai, he [huri i te mana'u ki te 'Atua] 'i te ranji 'e he ha'amata he ha'ahana-hana ki a ia.

¹⁴ Pē ira te rua 'ati ka topa ena, 'e e ko roa hia ka tu'u mai ena te toru 'ati.

Te hitu koneta

¹⁵ He puhi te hitu merahi i tā'ana koneta. He ŋaro'a mai me'e rahi nō atu re'o pūai 'i te ranji e kī 'ā:

«'I te hora nei, i te 'Atua 'e i te [Kiritō] te haka tere iŋa o te ao, 'e he haka tere he oho 'ātā ki te hope'a ra'a».

¹⁶ Te ŋā piti 'ahuru mā maha ŋāŋata ra-rahi era, noho era 'i ruŋa i te rāua pepe noho 'ariki 'i mu'a o te 'Atua, he noi te tira 'ātā ka topa rō ki ruŋa i te 'ō'one he ha'amuri ki te 'Atua ¹⁷ koia ko kī:

«He māuru-uru atu mātou ki a koe,
e te 'Atua hope'a o te pūai ē,
'Atua o te hora nei 'e o mu'a 'ā,
hai pūai nui-nui, pa'i, ō'ou
i ha'amata i haka tere ai koe i te ao.

¹⁸ Te nu'u o te ao ta'e haŋa atu ki a koe ko riri tahi 'ana mō'ou.

'E te mahana o tu'u riri 'i ko tu'u mai 'ā,
he hora ture ō'ou i te nu'u mate,
'e he hora va'ai ō'ou ki te perofeta, tāvini ō'ou,
ki te nu'u ha'ata'a mā'au
'e ki te nu'u mo'a i tu'u 'iŋoa i te me'e mo haka koa o rāua,

ka hōnui 'e ka ta'e hōnui rāua.
'E te nu'u tōtōā i te henua he haka kore e koe».

¹⁹ He mātaki mai ia te kona mo ha'amuri ki te 'Atua 'i te ranji. E take'a nō mai 'ā 'i rā kona te ['avahata o te haka tere iŋa o te 'Atua ananake ko te taŋata]. He 'anapa te 'uira, he heruru te pātiri, he mākenu-kenu te ao 'e he topa te mata-matāika taparahi-ta'ata.

He vi'e

12 He take'a ia e au i te me'e nui-nui 'i te ranji: he vi'e e tahi e viri rō 'ana e te 'ana-'ana o te ra'ā, pa he kahu uru ō'ona. 'I raro i tō'ona va'e te māhina, 'e 'i tō'ona pū'oko te hei e ho'e 'ahuru mā piti hetu'u o ruŋa. ² E hānautama rō 'ā rā vi'e, 'e e 'au-auē 'ā 'i te mamae o te tūātoto 'e 'i te māui-ui o te a'u poki.

He manu'ino nui-nui mea-mea e tahi

³ I oti era he take'a haka 'ou e au i te me'e nui-nui e tahi 'i te ranji: he manu'ino nui-nui mea-mea † e tahi. E hitu ō'ona pū'oko, e ho'e 'ahuru tara. 'E 'i ruŋa i rā nā pū'oko e huki rō 'ā e tahi e tahi hei. ⁴ Hai hiku i to-toi ai i te 'apa e tahi o te 'apa e toru o te hetu'u o te ranji 'e he ava ki ruŋa i te henua. He noho ia rā manu'ino 'i mu'a o tū vi'e era e a'u 'ā i te poki, mo kai i rā poki 'i te hora era ka poreko era.

⁵ He poki tane te poki i poreko, poki mā'ana e haka tere i te taŋata ta'ato'a o te ao hai pūai 'e 'ina he nu'u mo rē ki a ia. I poreko era he to'o e te merahi i tū poki era, he ma'u ki mu'a o te 'Atua 'e ki mu'a o tō'ona pepe noho 'ariki. ⁶ He tere ia rā vi'e ki te kona 'one ta'e noho taŋata, kona 'i ira i haka riva-riva ai e te 'Atua i te kona mo hāpa'o i a ia e ho'e ta'utini piti hānere ono 'ahuru mahana.

⁷ I oho era he ha'amata te tama'i 'i ruŋa i te ranji: a Mihaera koia ko tō'ona merahi he moto ki tū manu'ino nui-nui mea-mea era 'e ki tā'ana va'ehau. Ka ai atu hai pūai i tama'i ai rā manu'ino ki a kuā Mihaera, ⁸ i rē nō a Mihaera, 'e kai ha'ati'a e te 'Atua mo noho haka 'ou o rāua 'i te ranji. ⁹ He ava i rā manu'ino ananake ko tā'ana va'ehau ki ruŋa i te henua. Rā manu'ino ko te kōreha era o te noho iŋa tuai era ko Rukifero, he kope reo-reo ki te taŋata o te henua ta'ato'a.

¹⁰ He ŋaro'a ia e au i te re'o pūai e tahi 'i ruŋa i te ranji e kī era:

«Ko tano 'ā te hora era o te rē o te 'Atua,
hora haka take'a i tō'ona pūai 'Ariki,
'e hora mo haka tere e te [Kiritō] uŋa e ia.
Ko tute 'ana, pa'i, i te kope rava tuhi era 'i mu'a o te
'Atua, ka pō ka 'ōtea,
i te hape o te taina haka moe i te mana'u 'i ruŋa i a
Ietū.

¹¹ Ko rē 'ā nei nā taina ki rā kope hai toto tehe era o te Māmoe

† Te MANU'INO NUI-NUI MEA-MEA ena e ha'aaura'a mai 'ā i a Rukifero.

'e hai roŋo riva-riva haka 'ite era e rāua.
'Ina kai ri'a-ri'a 'i te mate, i va'ai nō i a rāua mo mate.

¹² I te me'e noho 'i te ranji ē, ka koa kōrua!
i'E, ko te 'aroha i a kōrua,
e te me'e o ruŋa i te henua 'e o roto i te vaikava ē,
nā ko topa atu 'ā a Rukifero ko 'ata riri atu 'ā
'i te 'ite 'ina ō'ona hora toe!».

¹³ I u'i era e tū manu'ino era ko ava mai 'ana i a ia ki ruŋa i te henua, he tute he oho i tū vi'e poreko era o te poki. ¹⁴ He va'ai ia e te 'Atua ki rā vi'e e rua karā, pa he karā o te manu nui-nui, mo rere mo oho ki tō'ona kona 'i te kona 'one ta'e noho taŋata, he kona e roa rō 'ā mai tū manu'ino era, 'i ira ka hāpa'o era e toru matahiti 'e te 'afa.

¹⁵ He haka rua ia e tū manu'ino era i te vai mai roto i tō'ona haha, mo to-toi i rā vi'e. ¹⁶ He hā'ū'ū e te henua i rā vi'e, he mātaki i tō'ona haha 'e he 'opo tahi i tū vai haka rua era e te manu'ino. ¹⁷ He 'ata riri rō atu 'ai tū manu'ino era mo rā vi'e. He e'a he oho he moto ki te hakaara haka 'ou o rā vi'e, he nu'u ha'atura ki te roŋo o te 'Atua 'e ki te parauti'a haka 'ite e Ietū.

¹⁸ He oho ia tū manu'ino era he māroa 'i te taha-taha tai.

He manu'ino e'a mai roto i te vaikava

13 He u'i atu a au he manu'ino taparahi-ta'ata haka 'ou e tahi ka e'a mai roto i te vaikava. E hitu ō'ona pū'oko 'e e ho'e 'ahuru tara. 'I ruŋa i rā nā tara te hei, 'e 'i ruŋa i te pū'oko te 'iŋoa parau'ino mo te 'Atua. ² Te manu'ino taparahi-ta'ata nei pa he manu ena 'ā he *leopardo*. Te va'e pa he va'e 'ā o te *oso* 'e te haha pa he haha 'ā o te reone. He va'ai ki te manu'ino nei e tū manu'ino nui-nui mea-mea era i te pūai 'e i tō'ona tōro'a 'ariki era mo haka tere o rā manu'ino pa he 'ariki.

³ I ruŋa i te pū'oko e tahi o tū manu'ino e'a nei mai roto i te vaikava te more ko ora 'ā, more nui-nui taparahi-ta'ata mo mate, 'e 'ina kai mate. I take'a era e te taŋata ta'ato'a o te ao, he māere tahi rō atu 'ai 'e he pe'e rō 'ai ki rā manu'ino. ⁴ He ha'amuri tahi ananake ki tū manu'ino nui-nui mea-mea era 'o te va'ai ki te manu'ino taparahi-ta'ata e'a era mai roto i te vaikava i te parau mo haka tere, 'e he ha'amuri tako'a ki rā manu'ino koia ko kī e rā nu'u: «'Ina he rua kope pa he manu'ino nei, 'e 'ina he kope mo rē ki a ia».

⁵ Te 'Atua i haka rē nō i te manu'ino e'a era mai roto i te vaikava mo kī i te me'e ta'e tano 'e parau'ino mō'ona, 'e i haka rē tako'a nō mo haka tere pa he 'ariki e maha 'ahuru mā piti 'āva'e. ⁶ 'E pē ira mau 'ā i aŋa ai; i kī rō i te me'e ta'e tano 'e parau'ino mo te 'Atua, mo te kona ha'amuri ki a ia 'e mo te nu'u ta'ato'a noho 'i te ranji. ⁷ I ha'ati'a nō mo moto ki te nu'u o te 'Atua 'e mo rē ki a rāua. 'E i ha'ati'a tako'a nō mo haka tere i te nu'u o te ta'ato'a nō hau, 'arero 'e kona o te ao.

⁸ He ha'amuri ia ki rā manu'ino te taŋata ta'ato'a te rāua 'iŋoa 'ina o ruŋa i te puka pāpa'i o te 'iŋoa o te nu'u i a rāua te ora 'āpī 'ina he hope'a ra'a. Te puka nei o te Māmoe tūtia era, 'e tō'ona tūtia era ko haka tano era 'ā mai te ha'amata iŋa o te ao.

⁹ Te nu'u haŋa mo anji-anji e haka roŋo:

¹⁰ «Te nu'u ena mo puru, e ma'u e puru rō; 'e te nu'u ena mo mate hai hoe, hai hoe ka mate ena».

'O ira, te nu'u ha'ata'a e te 'Atua mā'ana e 'ite mo 'amo i te 'ati topa 'i ruŋa i a rāua, 'e e haka moe e oho te mana'u 'i ruŋa i a Ietū.

Te manu'ino e'a mai raro o te henua

¹¹ I oti era he take'a e au i te manu'ino haka 'ou e tahi ka e'a mai raro o te henua. Rā manu'ino e ai rō 'ā e rua tara tu'u pa he tara o te māmoē, 'e te vānaŋa iŋa pē tū manu'ino nui-nui mea-mea era. ¹² Te manu'ino nei he raro'ava'e o te manu'ino e'a era mai roto i te vaikava, 'e 'ā'ana te haka tere i te taŋata pe'e ki rā manu'ino. 'E 'ā'ana tako'a te aŋa mo ha'amuri o te taŋata ta'ato'a o te ao ki tū manu'ino ora era o te more.

¹³ Nei manu'ino i aŋa rō i te mana 'e i te me'e mo māere o te taŋata, 'e 'ātā i haka hoa rō i te ahi mai te raŋi. ¹⁴ Hai ŋā mana nei, mana ha'ati'a era mo aŋa e ia hai 'iŋoa o tū manu'ino e'a era mai roto i te vaikava, i reo-reo ai ki te taŋata. He uŋa ia i te nu'u nei he haka aŋa i te 'ītoro pē rā manu'ino mau 'ā, manu'ino ta'e mate era ka ai atu i more rō 'i te more taparahi-ta'ata 'i te hoe.

¹⁵ Ki te manu'ino e'a nei mai raro o te henua i va'ai ai i te pūai mo haka ora 'e mo haka vānaŋa i te 'ītoro o tū manu'ino era. 'E o rā 'ītoro te uŋa te haka tiŋa'i i te nu'u ta'ato'a ta'e ha'amuri ki a ia. ¹⁶ O tū manu'ino e'a era mai raro o te henua i haka tāpa'o a te rima mata'u 'o a te tira i te nu'u ta'ato'a, ka ŋā poki 'o ka pa'ari, ka 'ono 'o ka veve, ka 'ekaravo 'o ka ta'e 'ekaravo. ¹⁷ 'E 'i-na e tahi kope mo ho'o 'e mo ho'o mai, korohaŋa e tahi me'e, mo ta'e ma'u i rā tāpa'o, 'e rā tāpa'o he 'iŋoa o te manu'ino e'a era mai roto i te vaikava, 'o he nūmera o tō'ona 'iŋoa.

¹⁸ 'E mo anji-anji i te ha'aaura'a o te nūmera o rā manu'ino taparahi-ta'ata era, e ai i a koe te mārama-rama va'ai e te 'Atua. 'E te kope haŋa mo anji-anji e 'ite mo haka tano-tano i rā nūmera ki te ti'ara'a tano mo anji-anji i rā 'iŋoa, he 'iŋoa o te taŋata e tahi. 'E rā nūmera he ono hānere ono 'ahuru mā ono.

He Māmoe 'e he nu'u ha'ata'a mā'ana

14 He take'a ia e au i te Māmoe e māroa rō 'ana 'i ruŋa i te ma'uŋa era ko [Tione]. 'I muri i a ia e ho'e hānere maha 'ahuru mā maha ta'utini taŋata 'i te rāua tira e pāpa'i rō 'ā te 'iŋoa o te Māmoe 'e o tō'ona Matu'a. ² He ŋaro'a e au 'i rā hora i te heruru 'i te raŋi e tu'u rō 'ā pa he heruru o te vai topa mai te kona

ruŋa nui, pa he heruru pūai o te pātiri, 'e pa he heruru o te me'e rahi nō atu *arpa*. ³ Rā me'e he ŋāŋata era e ho'e hānere maha 'ahuru mā maha ta'utini ha'ata'a era e te 'Atua mai roto i te taŋata ta'ato'a o te ao, haka e'a era mai roto i te ūtu'a o te hara. E hīmene 'ana i te hīmene 'āpī, hīmene ko rāua mau nō i 'ite, 'i mu'a o te kona pepe noho 'ariki era, o te me'e ora era e hā 'e o tū ŋāŋata ra-rahi era. ⁴ Te nu'u nei he nu'u kai ha'amuri ki te 'ītoro, he nu'u kai haka rē i te 'Atua ki te hora hope'a, 'e he nu'u i oho 'i muri i te Māmoe ki te kona nō era o te Māmoe i oho. A rāua ko ha'ata'a 'ā mai roto i te taŋata ta'ato'a o te ao pa he me'e ra'e mo mahia ki te 'Atua 'e ki te Māmoe. ⁵ Te nu'u nei nu'u ta'e reo-reo 'e nu'u 'ina rāua hape.

Te [Poki o te taŋata] 'e te merahi e ono

⁶ He take'a ia e au i te merahi haka 'ou e tahi e rere rō 'ana 'i vāeŋa era o te raŋi e ma'u rō 'ana i te roŋo 'i-na he hope'a ra'a mo haka 'ite ki te nu'u o te ta'ato'a nō hau, 'arero 'e kona o te ao. ⁷ E kī pūai era:

«E mo'a kōrua i te 'Atua, e ha'ahana-hana kōrua i a ia 'o te ai 'i ko tu'u mai 'ā te hora era mo ture ō'ona i te taŋata.

E ha'amuri kōrua ki te kope 'ā'ana i aŋa i te raŋi, i te henua, i te vaikava 'e i te kona manana vai».

⁸ 'I tu'a e kī e oho era te rua merahi:

«Ki haka pararaha tahi 'ā te kona nui-nui era ko [Vāvīrōnia],

kona haka hara 'e haka ha'amuri era i te taŋata ta'ato'a o te ao ki te me'e ta'e he 'Atua!».

⁹ 'I tu'a o rā merahi te toru merahi e kī e oho era hai re'o pūai pē nei ē:

«Te nu'u ha'amuri ki te manu'ino e'a era mai roto i te vaikava 'e ki te 'ītoro aŋa era pē ia, haka rē i a rāua mo tāpa'o a te tira 'o a te rima hai tāpa'o o rā manu'ino ¹⁰ e unu rō i te 'ava ta'e 'āno'i o te 'Atua, te aura'a, e haka ūtu'a rō e te 'Atua hai ūtu'a taparahi-ta'ata. 'E 'i mu'a o te merahi 'e o te Māmoe e haka māui-ui rō e te 'Atua hai ahi 'e hai *azufre*. ¹¹ 'E mai te kona 'amo o rāua i te ūtu'a ka e'a ena te 'au 'ina he hope'a ra'a, 'e 'i ira, ka pō ka 'ōtea, 'ina he haka ora te nu'u ha'amuri ki te manu'ino 'e ki te 'ītoro aŋa pē ia haka tāpa'o i a rāua hai 'iŋoa o rā manu'ino».

¹² 'I te me'e era pē ira ka topa ena, te nu'u ha'ata'a e te 'Atua mā'ana, ha'atura i tā'ana roŋo, ta'e haka rē i a Ietū ki te hora hope'a, e 'ite mo 'amo i te 'ati topa 'i ruŋa i a rāua.

¹³ He ŋaro'a ia e au i te re'o e tahi mai te raŋi e kī 'ā: «Ka pāpa'i te me'e nei: "Ko te koa i te nu'u mate, 'i te hora nei 'e pe mu'a ka oho ena, [haka moe i te man-a'u] 'i ruŋa i te tātou Pū'oko Haka Tere ko Ietū Kiritō"».

«'Ē-ē —i kī ai e te [Vārua Maitai]— e haka ora rō rāua mai te rāua aña, 'e e va'ai rō hai me'e mo haka koa 'o te rāua me'e riva-riva aña».

¹⁴ He u'i atu a au he ranjī tea-tea e tahi 'i ruña e noho rō 'ā te kope pa he Poki era 'ā o te taŋata. E pu'a rō 'ā i te hei aña hai piru, 'e 'i te rima e ma'u rō 'ā i te hoe ka'i-ka'i hore tariko. ¹⁵ 'E mai te kona ha'amuri 'Atua 'i te ranjī i e'a mai ai te merahi haka 'ou e tahi e ohu pūai 'ā ki tū kope era: «jKa to'o ta'a hoe ka hore te tariko; ko tano 'ana, pa'i, tō'ona hora mo kato!».

¹⁶ He ha'amata ia tū kope noho era 'i ruña i te ranjī he kato i te tariko o ruña i te henua.

¹⁷ He e'a ia e tahi merahi haka 'ou mai te kona ha'amuri 'Atua 'i te ranjī e ma'u tako'a rō 'ana i te hoe ka'i-ka'i hore tariko. ¹⁸ 'E mai te kona [fata] era i e'a ai te merahi haka 'ou e tahi i a ia te parau o te ahi, 'e hai re'o pūai i ohu ai ki te merahi ma'u era i te hoe ka'i-ka'i hore tariko: «jKa ha-ha'o ta'a hoe ka'i-ka'i ena a roto i te tumu vino, 'e 'ai ka hore tahi rō te kāhui vino ena o ruña i te henua; ko para tahi 'ana, pa'i!».

¹⁹ He ha-ha'o ia tū merahi era i tū hoe ka'i-ka'i era 'ā'ana a roto i te tumu vino, 'e he hore i te vino ta'ato'a o ruña i te henua. I oti era he ha'a'i ki roto i te pokopoko nui-nui e tahi, he kona mo rei-rei ka pi'i-pi'i rō. Te me'e nei he ha'aaura'a o te ūtu'a o te 'Atua mo te nu'u aña i te me'e ta'e tano. ²⁰ He rei-rei i rā vino ta'ato'a era 'i haho o te kona noho taŋata. 'E mai roto i rā pokopoko he toto te me'e i tehe ki te roa era e toru hānere *kilómetro*, 'e te parera ki te roa ena o te tāvaha o te hoi.

E hitu merahi 'e e hitu 'ati

15 He take'a ia e au 'i te ranjī i te me'e haka 'ou e tahi mo māere o te taŋata: he merahi e hitu i a rāua te parau mo haka tano i te 'ati hope'a e hitu o te 'Atua. Hai nā 'ati nei ka haka mao ena te riri o te 'Atua.

² He take'a tako'a e au te me'e tu'u pa he vaikava aña hai hi'o e 'āno'i rō 'ana hai ahi. 'I muri o rā kona e māroa rō 'ā te nu'u rē ki tū manu'ino e'a era mai roto i te vaikava, ki te 'itoro aña pē ia 'e ki te nūmera o tō'ona 'iŋoa. E ma'u-ma'u rō 'ana i te *arpa* i va'ai e te 'Atua. ³ E hīmene 'ana i te hīmene o te tāvini o te 'Atua ko [Mōtē] 'e i te hīmene o te Māmoē pē nei ē:

«Me'e nui-nui 'e nehe-nehe te me'e ta'ato'a aña e koe,

e te mātou Pū'oko Haka Tere,
e te mātou 'Atua hope'a o te pūai ē.

Te haka tere iŋa ō'ou ananake ko te taŋata
haka tere iŋa tī-tika 'e parauti'a,
e te 'Ariki o te ao ē.

⁴ jKo ai te me'e mo ta'e mo'a i a koe,
e te mātou Pū'oko Haka Tere ē?

jKo ai te me'e mo ta'e ha'ahana-hana atu?
Ko koe mau nō te me'e hara kore.
Ta'ato'a nu'u o te ao ka ha'amuri atu ena.

Ko take'a 'ana, pa'i, e te ta'ato'a: ta'a me'e aña me'e tī-tika».

⁵ I oti era te me'e nei, he take'a e au te [Kona 'Ata Mo'a] o roto i te [Karapā Mo'a] era 'i te ranjī e ha-hata rō 'ā. ⁶ Mai roto i rā kona i e'a mai ai tū nā merahi era e hitu. E uru rō 'ana i te kahu ma'itaki aña hai rino e 'uira rō 'ā. E here rō 'ana a te uma i te rīpena aña hai piru.

⁷ He va'ai ia ki rā nā merahi e te me'e ora era e tahi o roto o tū nā me'e ora era e hā o mu'a o te 'Atua, e tahi e tahi pokopoko aña hai piru. Rā nā pokopoko ko 'ī 'ana e te riri o te 'Atua, 'Atua tō'ona ora 'ina he hope'a ra'a. ⁸ 'E tū Kona 'Ata Mo'a era he 'ī rō atu 'ai e te me'e tu'u pa he 'au o te 'ana-'ana 'e o te pūai o te 'Atua, 'e 'ina e tahi kope mo uru 'ātā ka oti tahi rō te 'ati era e hitu.

16 He ŋaro'a ia e au i te re'o pūai e tahi mai tū [Kona 'Ata Mo'a] era e kī 'ā ki tū nā merahi era e hitu: «Ka oho kōrua ka huri i te nā pokopoko ena e hitu, he riri o te 'Atua».

Te pokopoko e hitu

² He oho ia te merahi ra'e he huri i tā'ana pokopoko a ruña i te henua. He e'a 'i ruña i te nu'u ta'ato'a ma'u i te tāpa'o o te manu'ino e'a era mai roto i te vaikava, ha'amuri ki a ia 'e ki te 'itoro aña pē ia te harakea piro 'e mamae.

³ He oho te rua merahi he huri i tā'ana pokopoko a roto i te vaikava. He riro rō atu 'ai te vaikava he toto ko pata 'ā, 'e he mā-mate tahi te me'e ta'ato'a o roto i te vaikava.

⁴ He oho ia te toru merahi he huri i tā'ana pokopoko a roto i te rio 'e a te kona manana vai, 'e he riro tahi rō atu 'ai he toto.

⁵ I oho era he ŋaro'a e au i te merahi hāpa'o vai e kī 'ā ki te 'Atua:

«E te 'Atua mo'a ē, 'Atua o te hora nei 'e o mu'a 'ā,
ko tano 'ana koe i haka ūtu'a ena i te taŋata.

⁶ A rāua, pa'i, i haka pariŋi rō i te toto o te perofeta 'e o te nu'u ha'ata'a e koe mā'au,
'e, hora nei, ko haka unu 'ā e koe hai toto.
jHe ūtu'a tano mo rāua!».

⁷ He ŋaro'a tako'a e au i te kī iŋa, mai te kona [fata] era: «'Ē-ē, e te 'Atua hope'a o te pūai, Pū'oko Haka Tere o mātou ē. Hai parauti'a 'e hai tī-tika a koe i haka ūtu'a ai i te taŋata».

⁸ He oho ia te hā merahi he huri i tā'ana pokopoko a ruña i te ra'ā. Pē ira i 'ata pūai ai te ra'ā mo tutu i te taŋata hai ahi. ⁹ He vera tahi rō 'ai te taŋata 'i te vera taparahi-ta'ata. 'E, ka ai atu pē ira, 'ina kai hāru i te mana'u ki te 'Atua 'e 'ina kai ha'ahana-hana. Te me'e i aña he kī i te me'e ta'e tano mo te 'Atua, kope 'ā'ana te haka tere i rā nā 'ati.

¹⁰ He oho te rima merahi he huri i tā'ana pokopoko a ruña i te pepe noho 'ariki o te manu'ino e'a era mai

roto i te vaikava, 'e he pō'uri tahi rō 'ai te kona ta'ato'a haka tere e ia. 'E te nu'u 'i te mamae he ŋau i te rāua 'arero. ¹¹ 'E, ka ai atu pē ira, kai [huri i te mana'u ki te 'Atua], ko te aŋa iŋa 'ana i te me'e ta'e tano ki tō'ona mata. 'I te rahi o te mamae o te rāua harakea, he parau'ino mo te 'Atua 'i te raŋi.

¹² He oho te ono merahi he huri i tā'ana poko-poko a roto i te rio nui-nui era ko Eufrate, 'e he paka-paka rō atu 'ai rā rio, mo ha-hata o te kona mo vari o te ŋā 'ariki era o te pā'iŋa e'a o te ra'ā koia ko te rāua va'ehau ki te tama'i.

¹³ He take'a e au e toru tātane tu'u pa he 'animare ena he rana. E tahi o rā ŋā tātane i e'a mai roto i te haha o te manu'ino nui-nui mea-mea era, e tahi mai te haha o te manu'ino e'a era mai roto i te vaikava, 'e e tahi mai te haha o tū perofeta reo-reo era. ¹⁴ Te ŋā tātane nei e ai rō 'ā te rāua pūai mo aŋa i te mana 'e i te me'e mo māere o te taŋata. He e'a he oho ananake he haka taka-taka i te 'ariki ta'ato'a o te ao, mo moto ki te 'Atua, i a ia te pūai ta'ato'a, 'i te mahana o te ture hope'a. ¹⁵⁻¹⁶ He haka taka-taka ia i te ŋā 'ariki ta'ato'a nei 'i te kona te 'iŋoa 'i te ['evereo] ko Aramaherone.

I oho era he ŋaro'a e au i te re'o o Ietū e kī 'ā:

«Ka haka roŋo mai. Pa he tu'u iŋa atu o te toke-toke 'i te hora ta'e 'ite e koe, ka tu'u atu ena a au. 'E ko te koa i te kope ko te 'ara iŋa 'ā 'e ko te uru iŋa 'ā i tō'ona kahu, te aura'a, ko te aŋa iŋa 'ana i te me'e tī-tika, 'o ha'amā 'i te hora o tō'oku hoki iŋa mai, pa he kope ha'amā 'i tō'ona kahu kore».

¹⁷ He oho ia te hitu merahi he huri i tā'ana poko-poko a roto i te tokerau, 'e mai te Kona 'Ata Mo'a o te kona pepe noho 'ariki era i e'a ai te re'o pūai e tahi e kī era: «Te me'e era mo aŋa, ko aŋa tahi 'ana!».

¹⁸ I oho era he 'anapa te 'uira, he heruru te pātiri, 'e he mākenu-kenu tahi te henua 'i te mākenu-kenu kai ai 'ā 'i ruŋa i te henua mai te hora o te taŋata 'i te ao. ¹⁹ Te kona nui-nui ena ko [Vāvīrōnia] ko 'āvahi 'ana e toru pā'iŋa, 'e ko mārere-rere tahi 'ana te kona noho taŋata ta'ato'a o te ao. Te 'Atua kai haka rehu i te hara o te nu'u o Vāvīrōnia; ko haka unu 'ana hai vino o tō'ona riri taparahi-ta'ata. ²⁰ He ŋaro te motu 'e te ma'uŋa ta'ato'a. ²¹ 'E mai te raŋi i vī-viri ai ki ruŋa i te taŋata te mata-matāika ko tetu ko tetu. Te paŋaha'a o rā ŋā mata-matāika e maha 'ahuru tūma'a kiro. He parau'ino ia e te nu'u i te 'Atua 'o te haka ūtu'a i a rāua pē ira.

He vi'e 'e he manu'ino e'a mai roto i te vaikava

17 E tahi o tū ŋā merahi era e hitu ma'u poko-poko era he oho mai 'e he kī mai ki a au:

«'I a au he haka take'a atu pē hē te 'Atua ka haka ūtu'a ena i te tai'o 'ite e te nu'u, tai'o noho 'i te kona e rahi rō 'ā te rio. ² Te 'ariki ta'ato'a o te ao ko moe tahi 'ā i te tai'o nei, 'e ko ta'ero tahi 'ana te nu'u o te ao 'i tā'ana 'ava, te aura'a, ko haka rē 'ana i a rāua mo haka

tere e te me'e ta'e tano aŋa e te vi'e nei, he ha'amuri ki te me'e ta'e he 'Atua parauti'a».

³ I me'e era he ma'u i tō'oku vārua e te merahi ki te kona 'one ta'e noho taŋata. 'I ira i take'a ai e au i tū vi'e era e eke rō 'ana 'i ruŋa i te manu'ino mea-mea e tahi. Te manu'ino nei e hitu o'ona pū'oko e ho'e 'ahuru tara. Te hakari ko pāpa'i tahi 'ā hai 'iŋoa parau'ino mo te 'Atua. ⁴ Rā vi'e e uru rō 'ana i te kahu moana 'apa mea 'e mea-mea, 'e e haka nehe-nehe rō 'ā hai piru, hai mā'ea hope'a o te nehe-nehe 'e hai poe. E ma'u rō 'ana 'i te rima i te hapaina aŋa hai piru ko 'i'ā e te me'e hope'a o te hano-hano o tā'ana aŋa era. ⁵ 'I te tira e pāpa'i rō 'ā te 'iŋoa: «[Vāvīrōnia], matu'a vahine o te tai'o ta'ato'a 'e o te me'e ta'ato'a hano-hano o te ao». Te taŋata 'ina kai 'ite i te ha'aaura'a mau o te 'iŋoa nei. ⁶ He u'i atu ia a au ko ta'ero 'ā rā vi'e 'i te unu i te toto o te nu'u ha'ata'a e te 'Atua mā'ana, nu'u mā-mate i tiŋa 'i 'o te ai he mata'ite o Ietū.

I take'a era e au, he māere rō atu 'ai au.

He ha'aaura'a o te vi'e 'e o te manu'ino

⁷ He kī mai ia e tū merahi era:

«Te aha koe i māere ai? 'I a au he haka 'ite atu i te me'e ta'e 'ite e kōrua e te taŋata o ruŋa o te vi'e era 'e o te manu'ino era 'i ruŋa rā vi'e, manu'ino era e hitu pū'oko e ho'e 'ahuru tara.

⁸ »Te manu'ino nei 'i te ao 'i mu'a 'ā; 'e 'i te hora nei, 'ina. 'E, ka ai atu pē ira, pe mu'a ka oho ena e e'a rō mai mai raro i te pū 'ina he hope'a te raro nui 'e, ka tano era, he hoa ki roto i te pō'auahi mo haka ūtu'a. Te nu'u te rāua 'iŋoa 'ina o ruŋa i te puka pāpa'i i te 'iŋoa o te nu'u i a rāua te ora 'āpī 'ina he hope'a ra'a mai te ha'amata iŋa era 'ā o te ao he māere ka take'a ena i te manu'ino nei, manu'ino 'i te ao 'i mu'a 'ā, ŋaro era, 'e e'a haka 'ou mai ena.

⁹ »E mo aŋi-aŋi i te me'e nei, e ai i a koe te mārarama va'ai atu e te 'Atua: Te ŋā pū'oko era e hitu e ha'aaura'a mai 'ā i te ma'uŋa e hitu 'i ruŋa rā vi'e e noho ena 'e, tako'a, i te 'ariki e hitu. ¹⁰ E rima o te ŋā 'ariki nei ko mā-mate 'ā, e tahi e haka tere 'ā, 'e e tahi kai tu'u mai 'ā. Ka tu'u mai ena, e ko roa hia ka ŋaro rō era. ¹¹ 'E te manu'ino era, he va'u 'ariki, 'e 'i ruŋa 'ā he 'ariki e tahi o roto o rā ŋā 'ariki era e hitu, 'e pe mu'a ka oho ena he hoa ki roto i te pō'auahi.

¹² »Te ŋā tara take'a era e koe he 'ariki e ho'e 'ahuru kai ha'amata kai haka tere 'ā. E va'ai rō ki a rāua koia ko te manu'ino i te parau mo haka tere i te taŋata mo te hora e tahi. ¹³ Te ŋā 'ariki nei e ha'a'au rō mo va'ai i te rāua tōro'a 'ariki ki rā manu'ino, 'e mo tāvini ki a ia. ¹⁴ E moto rō ananake ki te Māmoe, 'e he rē te Māmoe ki a rāua, 'i te me'e era he Pū'oko Haka Tere o te pū'oko haka tere ta'ato'a 'e he 'ariki o te 'ariki ta'ato'a. Te nu'u i moto 'i muri i te Māmoe he nu'u ta'e haka rē i te Māmoe ki te hora hope'a, ha'ata'a era e ia mā'ana, kī era mo [haka moe i te mana'u] 'i ruŋa i a ia».

¹⁵ He kī haka 'ou mai ia e tū merahi era:

«Te nā rio take'a era e koe 'i te kona 'i ira tū tai'o era he nu'u o te ta'ato'a nō hau, 'arero 'e kona o te ao.

¹⁶ Tū manu'ino era ia 'e tū nā tara era ō'ona, te kī, tū nā 'ariki era e ho'e 'ahuru e ma'u rō i te riri taparahi-ta'ata mo rā tai'o, e hiko tahi rō i tā'ana me'e ta'ato'a, e haka mārere-rere tahi rō, e kai rō i te kiko o tō'ona hakari 'e e tutu tahi rō i a ia 'i roto i te ahi.

¹⁷ »Te me'e nei ka topa ena 'i te me'e era ko ha-ha'o 'ā e te 'Atua 'i roto i te rāua pū'oko i te mana'u mo aña i tā'ana me'e haña. 'O ira rā nā 'ariki ka ha'a'au era mo va'ai i te rāua tōro'a 'ariki ki rā manu'ino, ki tano tahi ai te me'e kī e te 'Atua. ¹⁸ Te vi'e take'a era e koe he kona nui-nui noho tañata haka tere i te 'ariki ta'ato'a o te ao».

He haka pararaha iña o [Vāvīrōnia]

18 I oti era te me'e nei, he take'a e au i te merahi tōro'a nui-nui e tahi ka topa mai te ranji. He mā'eha ia te henua ta'ato'a 'i te pūai o tō'ona 'ana-'ana. ² 'E hai re'o pūai i kī ai:

«iKo haka pararaha 'ā te kona nui-nui era ko Vāvīrōnia!

iKo riro 'ā he kona noho o te tātane, he hare o te ti'aporo,

hakapupa o te rauhuru atu manu rere kai i te me'e hano-hano

'e he 'ana o te 'animare taparahi-ta'ata!

³ Te nu'u o te henua ta'ato'a 'e te 'ariki o te kona ta'ato'a

ko ta'ero 'ā 'i te aña 'ā'ana, te aura'a, ko haka rē 'ana i a rāua mo haka tere e te me'e ta'e tano aña e ia,

he ha'amuri ki te me'e ta'e he 'Atua parauti'a.

'E te nu'u ho'o me'e o te ao ko 'ono 'ā

'i te rava ho'o e rā vi'e i tā'ana me'e haña 'ina he hāi-to».

⁴ He nāro'a ia e au i te re'o haka 'ou e tahi 'i te ranji e kī 'ā:

«Ka e'a kōrua mai te kona ena, e te nu'u ha'ata'a mā'aku ē,

'o hara kōrua 'e 'o topa tako'a atu te 'ati ka topa ena ki a ia.

⁵ Tō'ona hara, pa'i, ko papa ko iri 'ā 'ātā ki te ranji, 'e 'ina he rehu i te 'Atua tā'ana me'e ta'e tano aña».

⁶ He nāro'a haka 'ou ia e au i tū re'o era e kī 'ā:

«Ka haka hoki ki a ia, e rua haka hoki iña, te me'e ta'e tano aña era e ia ki te rua.

Ka 'āno'i ka haka pūai te 'ava mo haka unu ki a ia ki te 'ava haka unu era e ia ki te rua.

⁷ Ka va'ai hai 'ati 'e hai māui-ui ki roto i te ivi, pa he rahi o te te'o-te'o iña ō'ona, 'e pa he rahi o te reka 'e o te koa nāro'a e ia 'i tō'ona noho iña era 'ina he me'e haña toe.

Te vi'e era he kī nō te aña 'i roto i tō'ona māhatu:

“A au e noho nei 'i te kona nei pa he 'ariki; ta'e a au he hove, 'e e ko topa mai te 'ati ki a au”.

⁸ 'O ira, 'i te mahana mau nō e tahi ka tu'u ena te 'ati mō'ona:

he maruaki, he māui-ui māhatu 'e he mate, 'e he tutu 'i roto i te ahi.

E pūai rō 'ā, pa'i, te 'Atua haka ūtu'a i a ia».

⁹ Te 'ariki ta'ato'a moe era i rā vi'e koa era ananake 'i te aña i te me'e ta'e tano e ta-tañi rō 'e e 'au-auē rō ka take'a era i te 'au, 'i te hora e tutu 'ā i rā vi'e. ¹⁰ 'I te ri'a-ri'a 'o haka ūtu'a tako'a i a rāua, mai kōnui 'ā ka kī era:

«iKo te 'aroha i a koe, e te kona nui-nui ē, e te kona hope'a o te pūai ko Vāvīrōnia ē!

'I te hora mau nō e tahi i topa atu ai te ūtu'a 'i runja i a koe».

¹¹ 'E te nu'u ho'o me'e o te ao e tañi tako'a rō 'e e 'au-auē rō; 'ina he kope toe, pa'i, mo ho'o i te rāua tao'a: ¹² he piru, he parata, he mā'ea hope'a o te nehe-nehe, he poe, he kahu hope'a o te riva-riva aña hai rino 'e hai sea, tō'ona kōrore moana 'apa mea 'e mea-mea; he rauhuru miro 'eo; he me'e aña hai tara erefani, hai miro nehe-nehe, hai 'aurī, 'e hai mā'ea nehe-nehe; ¹³ he kānera, 'e he me'e mo haka 'eo, he *incienso*, he mano'i, he tāpau miro, he 'ava, he mōrī, he haraoa mata hope'a o te riva-riva, he tariko, he 'animare haka 'amo tao'a, he māmoē, he hoi, he pere'oa, 'e 'ātā he tañata ho'o mo 'ekaravo. ¹⁴ Pē nei ka kī era:

«iTa'u me'e ta'ato'a riva-riva haña era e ko rava'a haka 'ou e koe; ko nāro tahi 'ana!

i'Ina toe tū kai haña rahi era 'ā'au, 'e te nā me'e hope'a era o te hauha'a mo haka nehe-nehe i a koe!».

¹⁵ Te nu'u nei, nu'u i 'ono hai rā kona, 'i kōnui ka noho era 'i te ri'a-ri'a 'o haka ūtu'a tako'a i a rāua, 'e mai ira ka tañi 'e ka 'au-auē era ¹⁶ koia ko kī:

«iKo te 'aroha 'ō i a koe!

E uru era koe hai kahu hope'a o te riva-riva aña hai rino,

kahu kōrore moana 'apa mea 'e mea-mea, e haka nehe-nehe era hai piru, hai poe 'e hai mā'ea hope'a o te nehe-nehe.

¹⁷ 'E 'i te hora mau nō e tahi

i haka kore tahi ai te hauha'a ta'ato'a ena ō'ou!».

Te kape pahī, te nu'u oho 'i runja i te pahī, te mataroa 'e te nu'u aña 'i roto i te vaikava ta'ato'a he noho 'i

kōnui era. ¹⁸ I take'a era ko vera 'ā rā kona 'e ko e'a 'ā te 'au, he 'au-auē koia ko kī: «Ki te 'aroha 'ō; 'ina he rua kona pa he kona nui-nui era!». ¹⁹ He huri ia i te rāua pū'oko hai puŋa'ehu 'ō'one koia ko taŋi e kī era:

«Ki ko topa 'ana te me'e taparahi-ta'ata ki tū kona nui-nui era,
kona haka 'ono era i a tātou ta'ato'a i te nu'u tere vaikava!
i'E 'i te hora mau nō, pa'i, e tahi i haka kore tahi ai!

²⁰ Ki koa kōrua, e te me'e ta'ato'a noho 'i te raŋi ē!
i'E ka koa kōrua, e te nu'u ha'ata'a e te 'Atua mā'ana ē, e te ['āpōtoro] ē, 'e e te perofeta ē!
Ko haka ūtu'a 'ana, pa'i, e te 'Atua i te kona era,
'o te me'e ta'e tano aŋa atu ki a kōrua».

²¹ I oho era he ma'u e te merahi pūai e tahi i te mā'ea nui-nui pa he mā'ea oro tariko a ruŋa, he ava ki roto i te vaikava 'e he kī:

«iPē nei ka haka kore ena i a koe, e te kona nui-nui ko Vāvirōnia ē,
'e 'ina koe e ko take'a haka 'ou e te taŋata!
²² iE ko ŋaro'a haka 'ou te peho o te koneta, o te *arpa*
'e o te puhi 'i tu'u ara ena!
iE ko ai haka 'ou i a koe te nu'u aŋa i te rauhuru me'e,
'e 'ina tako'a e ko ŋaro'a haka 'ou te heruru o ta'u mā'ea oro tariko ena!

²³ Ki te hora hope'a e ko mā'eha haka 'ou koe 'i te mōri o te hakari'i,
'e e ko ŋaro'a haka 'ou te peho o te ŋoŋoro hāipo-ipo 'i tu'u ara ena,
'i te me'e era te nu'u ho'o me'e 'ā'au, he nu'u pūai o te ao,
'e a koe, hai tahu-tahu ena 'ā'au, e reo-reo era ki te taŋata ta'ato'a».

²⁴ I haka ūtu'a ai e te 'Atua i tū kona nui-nui era ko Vāvirōnia 'o te ai hai ia i tehe ai te toto o te perofeta, o te nu'u ha'ata'a e te 'Atua mā'ana, 'e o te nu'u ta'ato'a o te ao mate 'i te rua.

19 I oho era he ŋaro'a e au i te re'o pūai o te nu'u ri'a-ri'a e kī 'ā 'i te raŋi:

«Ki ha'ahana-hana tahi tātou i te 'Atua!
I a ia te e'a iŋa o tātou mai roto i te ūtu'a o te hara 'e te rava'a iŋa i te ora 'āpī 'ina he hope'a ra'a.
I a ia tako'a te nui-nui 'e te pūai ta'ato'a.

² A ia e ture ena hai tī-tika 'e hai parauti'a.
Ko haka ūtu'a 'ana i tū tai'o 'ite era e te nu'u.
Hai ia, pa'i, te taŋata ta'ato'a o te ao i aŋa ai i te me'e ta'e tano.

Ko haka ūtu'a 'ana i a ia,
'o te tiŋa'i 'o te haka mate i te tāvini o te 'Atua».

³ He ŋaro'a haka 'ou e au i te re'o o tū nu'u era e kī 'ā:

«Ki ha'ahana-hana tahi tātou i te 'Atua!
Te 'au o te ahi tutu era i tū tai'o era e ko kore ki te hora hope'a».

⁴ He tū-turi ia te ŋāŋata ra-rahi era e piti 'ahuru mā maha 'e te ŋā me'e ora era e hā 'ātā ka topa rō te tira ki raro 'e he ha'amuri ki te 'Atua 'i ruŋa i tō'ona pepe 'ariki. He kī:

«iHe aŋi 'ā to kōrua!
iKi ha'ahana-hana tahi tātou i te 'Atua!».

⁵ 'E mai te kona pepe noho 'ariki era i ŋaro'a mai ai te re'o e tahi e kī 'ā:

«Ki ka ha'ahana-hana kōrua ki te tātou 'Atua,
e te nu'u ta'ato'a mo'a 'e aŋa ki a ia ē,
ka hōnui 'e ka ta'e hōnui!».

He hīmene ha'ahana-hana

⁶ He ŋaro'a tako'a e au i te re'o o te nu'u rahi tu'u pa he heruru ena o te vai topa mai te kona ruŋa nui 'e pa he heruru pūai o te pātiri e kī era:

«Ki ha'ahana-hana tahi tātou i te 'Atua!
Ko ha'amata 'ā, pa'i, ko haka tere 'ā te tātou Pū'oko Haka Tere,
te tātou 'Atua hope'a o te pūai.

⁷ Ki koa tahi tātou;
ki ha'ahana-hana tātou i a ia 'o tō'ona pūai nui-nui.
Ko tano 'ana, pa'i, te hora mo te hāipo-ipo o te Mā-moe.

Ko haka riva-riva 'ā tā'ana vi'e: †
⁸ ko uru 'ana hai kahu va'ai ki a ia,
kahu aŋa hai rino hope'a o te riva-riva,
kahu ma'itaki 'e pura-pura».

Te ha'aaura'a o te kahu nei: he me'e riva-riva aŋa e te nu'u ha'ata'a e te 'Atua mā'ana.

⁹ He kī mai ia e te merahi: «Ka pāpa'i: "Ko te koa i te nu'u kī mo oho ki te kai o te hāipo-ipo o te Māmoe".
'E he kī haka 'ou mai: «Te vānaŋa nei he vānaŋa parauti'a o te 'Atua».

¹⁰ He tū-turi ia a au a te va'e o rā merahi mo ha'amuri, 'e tē rā ia ka kī mai: «'Ina koe ko aŋa i te me'e ena; ki te 'Atua koe ana ha'amuri. He tāvini nō, pa'i, a au o te 'Atua pē koe 'e pē tu'u ŋā taina era, nu'u ta'e haka tapa mai te hāpī parauti'a haka 'ite e Ietū».

Te hāpī nei 'a Ietū he me'e i haka 'ite e te perofeta hai [Vārua Maitai].

He rē iŋa o te kope o ruŋa i te hoi

¹¹ He u'i atu a au e ha-hata rō 'ā te raŋi 'e he take'a mai te hoi tea-tea e tahi. Te 'iŋoa o te kope o ruŋa: «He

† Te ha'aaura'a o te vi'e ena o te Māmoe he nu'u ta'ato'a haka moe i te mana'u 'i ruŋa i a Ietū.

Kope Aņa i Tā'ana Me'e Kī» 'e «He Kope Parauti'a»; hai tī-tika, pa'i, e haka tere ena i a ia 'i te hora kī i te tano 'e i te ta'e tano o te taņata 'e pē ira 'ā 'i te hora o te tama'i. ¹²Tō'ona mata pa he ura ena o te ahi; e pu'a rō 'ā 'i te pū'oko me'e rahi nō atu hei. 'I ruņa i a ia e pā-pa'i rō 'ā te 'iņoa e tahi ko ia mau nō te me'e 'i te 'ite i te ha'aaura'a. ¹³'E tō'ona 'iņoa tako'a: «He Vānaņa o te 'Atua». Te kope nei e uru rō 'ana i te kahu ko haka ruku 'ā 'i roto i te toto.

¹⁴'I tu'a i a ia e oho atu era te va'ehau o te raņi 'i ruņa i te rāua hoi tea-tea e uru rō 'ā i te kahu rino tea-tea hope'a o te riva-riva 'e ma'itaki. ¹⁵Mai roto i te haha o rā kope e e'a era te hoe roa-roa ka'i-ka'i e tahi, 'e hai rā hoe ka rē ena ki te taņata o te henua ta'ato'a. 'I tō'ona haka tere iņa e haka ūtu'a rō i te nu'u ta'ato'a ta'e ha'atura ki a ia, 'e e haka take'a rō i te riri taparahi-ta'ata o te 'Atua hope'a o te pūai mo te nu'u ta'e haņa ki a ia, pa he rei-rei iņa ena i te vino mo te 'ava. ¹⁶'I ruņa i tō'ona kahu 'e 'i ruņa i tō'ona hūhā e pā-pa'i rō 'ā te 'iņoa nei: «He 'Ariki o te 'ariki, he Pū'oko Haka Tere o te pū'oko haka tere ta'ato'a».

He rē iņa ki te manu'ino

¹⁷I oho era he take'a e au i te merahi e tahi e māroa rō 'ā 'i ruņa i te ra'ā e oho pūai 'ā ki te ta'ato'a manu rere 'i vāeņa o te raņi, manu kai kiko o te me'e mate pē nei ē:

«Ka oho mai kōrua ka haka taka-taka tahi mo kai i te kai nui-nui o te 'Atua, ¹⁸mo kai i te kiko o te 'ariki, o te kape o te va'ehau, o te taņata haka kē, o te hoi, o te kope eke o ruņa, o te ta'ato'a nō: o te nu'u 'ekaravo, o te nu'u ta'e he 'ekaravo, o te nu'u hōnui, 'e o te nu'u ta'e hōnui!».

¹⁹He take'a ia e au i tū manu'ino taparahi-ta'ata e'a era mai roto i te vaikava 'e i te 'ariki o te ao koia ko te rāua va'ehau e taka-taka tahi rō 'ana mo tama'i ki tū kope era o ruņa i te hoi 'e ki tō'ona va'ehau. ²⁰Te manu'ino nei ko 'a-'aru 'ā, 'e ko 'a-'aru tako'a 'ā tū perofeta reo-reo aņa era 'i mu'a i rā manu'ino i te mana 'e i te tētahi atu me'e mo māere o te taņata. Hai rā me'e nei i haka rē ai te nu'u i a rāua mo tāpa'o hai tāpa'o o te manu'ino, 'e i ha'amuri ai i te 'ītoro aņa pē ia.

I oho era he to'o mai he hoa ora i rā manu'ino 'e i rā perofeta reo-reo era ki roto i te pō'auahi, kona 'i ira e ura ena te *azufre*. ²¹'E te nu'u moto era 'i muri i a rāua i mā-mate ai 'i te hoe e'a mai roto i te haha o tū kope era o ruņa i te hoi, 'e te manu ta'ato'a kai kiko o te me'e mate i kai ai ki te rā'aha-'aha o te kōpū.

He rē iņa ki a Rukifero

20 I oho era he take'a e au ka topa te merahi e tahi mai te raņi e ma'u rō 'ana i te tāviri o te kona pū 'ina he hope'a o te raro nui. E ma'u tako'a rō 'ana 'i te rima i te vivi nui-nui e tahi. ²He 'a-'aru ia e rā merahi i te manu'ino nui-nui mea-mea era, he kōreha o te noho iņa tuai era 'ā, he tātane era ko Rukifero, he here-

here hai vivi e ho'e ta'utini matahiti. ³He to'o mai he hoa ki roto i tū pū era, 'e 'i roto i puru ai. He tāma'u i te 'ōpani e ho'e ta'utini matahiti, 'o reo-reo haka 'ou ki te taņata o te ao. Ki tano rā matahiti he haka pako'o mo te hora 'iti-'iti e tahi.

⁴He take'a haka 'ou ia e au i te pepe noho 'ariki, 'e 'i ruņa i rā rā pepe te nu'u ki a rāua i va'ai ai i te parau mo ture i te taņata. He take'a tako'a e au i te vārua o te nu'u i pa'o i te rāua i mā-mate ai 'o te haka 'ite i te hāpī 'a Ietū 'e i te [roņo riva-riva o te 'Atua]. Hora era o rāua e ora nō 'ana kai ha'amuri ki te manu'ino 'e ki te 'ītoro aņa pē ia, 'e 'ina tako'a kai haka rē i a rāua mo tāpa'o a te tira 'e a te rima hai tāpa'o era o rā manu'ino. 'E he take'a e au te ora iņa haka 'ou mai o rāua mai te mate 'e te haka tere iņa ananake ko te [Kiritō] e ho'e ta'utini matahiti. ⁵He ora iņa ra'e nei o te taņata mai te mate. 'E te tētahi atu nu'u mā-mate, ki oti rā ho'e ta'utini matahiti ka ora haka 'ou ena.

⁶Ko te koa i te nu'u ora haka 'ou mai te mate 'i te ora iņa ra'e era; a rāua, pa'i, o roto o te nu'u ha'ata'a e te 'Atua mā'ana! E ko ai 'i ruņa i a rāua te pūai o te rua mate; e [oromatu'a] rō a rāua o te 'Atua 'e o te Kiritō, 'e he haka tere ananake ko kuā Ietū Kiritō 'i rā ho'e ta'utini matahiti era.

⁷Ki oti rā ho'e ta'utini matahiti era, he haka e'a i a Rukifero mai tū kona puru era, ⁸'e he e'a he reo-reo ki a Koko 'e ki a Mākoko, te aura'a, ki te taņata o te rā pā'iņa ena e hā o te henua, 'e he haka taka-taka tahi ananake mo tama'i ki te 'Atua. Te rahi o rāua pa he rahi ena 'ā o te 'one.

⁹'I te rahi, he puru i te henua 'e he haka vari tahi i te kona noho o te nu'u ha'ata'a e te 'Atua mā'ana, kona haņa rahi 'ā'ana. 'E mai te raņi i ava ai hai ahi 'e he vera tahi rō atu 'ai. ¹⁰'E a Rukifero, reo-reo era ki rā nu'u, ko hoa 'ā ki roto i te kona ahi era, kona 'i ira e ura ena te *azufre*, kona ki ira tako'a i hoa ai i tū manu'ino era 'e i tū perofeta reo-reo era. 'I ira ka o'o era te māui-ui ki roto i te ivi ka pō ka 'ōtea 'ātā ki te hope'a ra'a.

He ture

¹¹He take'a e au i te pepe noho 'ariki tea-tea e tahi 'e i te kope noho 'i ruņa. 'I te nui-nui 'e 'i te 'ana-'ana ō'ona, he rāro te henua 'e te raņi mai mu'a i a ia, 'e 'ina kai take'a haka 'ou mai. ¹²He u'i atu ia a au i te nu'u mate, ka hōnui 'e ka ta'e hōnui, e māroa rō 'ana 'i mu'a o tū pepe noho 'ariki era. I oho era he mātaki-taki i te puka 'e i te puka tako'a era 'i ruņa e pāpa'i rō 'ā te 'iņoa o te nu'u i a rāua te ora 'āpī 'ina he hope'a ra'a. He ture ia i te nu'u mate tano ki te rāua me'e i aņa pāpa'i 'i ruņa i rā rā puka. ¹³Te nu'u mā-mate nei, mai roto i te vaikava 'e mai roto i te kona ko 'Are i e'a tahi ai, 'e he ture ki a rāua ta'ato'a tano ki te rāua me'e i aņa. ¹⁴I oti era he to'o mai i te mate 'e i te kona o te mate ko 'Are he hoa ki roto i te pō'auahi. Te kona ahi nei he rua mate iņa, ¹⁵'e 'i ira i hoa ai i te nu'u 'ina te rāua 'iņoa o ruņa i te puka pāpa'i o te 'iņoa o te nu'u i a rāua te ora 'āpī 'ina he hope'a ra'a va'ai e te 'Atua.

21 I oti era he take'a e au i te ranji 'āpī 'e i te henua 'āpī e tahi; te ranji 'e te henua ra'e era, pa'i, ko haka kore 'ā 'e pē ira tako'a 'ā te vaikava.

He Hērutarema 'āpī

² He take'a e au ka topa te kona mo'a, he Hērutarema 'āpī, mai te ranji mai te 'Atua era. Ko haka riva-riva 'ā pa he vi'e ha'amo'a-mo'a e uru rō 'ā i te kahu nehe-nehe mo tā'ana kope era mo hāipo-ipo. ³ 'E he njarō'a e au i te re'o pūai e tahi mai te kona pepe noho 'ariki era e kī 'ā:

«Mai te hora nei pe mu'a, ka noho ena te 'Atua 'i muri i tā'ana taŋata. Ki a ia a rāua ka ha'atura tahi ena. 'E 'ina he 'Atua e ko haka rē i a rāua ki te hora hope'a. ⁴ He haro'i tahi e ia i te rāua matavai. He kore ia te mate, te taŋi, te mamae, 'e e ko 'au-auē haka 'ou, 'i te me'e era te haka tere iŋa o te ao ra'e era ko kore tahi 'ana».

⁵ He kī e te kope noho 'i ruŋa i te pepe noho 'ariki era: «He aŋa 'āpī a au i te me'e ta'ato'a». I oho era he kī mai: «Ka pāpa'i. Te vānaŋa nei he vānaŋa parauti'a, he vānaŋa 'ina e ko ta'e haka tano».

⁶ I oti era he kī haka 'ou mai:

«Nā ko aŋa tahi 'ā. A au he Ha'amata 'e he Hope'a. 'E te kope haŋa ki te vai he va'ai e au, ta'e e 'auhau, mai te kona tehe o te vai va'ai i te ora 'āpī 'ina he hope'a ra'a. ⁷ Te nu'u rē ki te pūai o Rukifero, mo rāua te nā me'e ta'ato'a haka 'ite atu era, 'e he riro a au he 'Atua o rāua 'e a rāua he poki 'ā'aku. ⁸ 'E te nu'u ri'a-ri'a mo kī 'ā'aku a rāua, te nu'u ta'e haka moe oho i te rāua mana'u 'i ruŋa i a au, te nu'u aŋa i te me'e ta'e tano hano-hano, te nu'u tiŋa'i haka mate i te rua, te nu'u moe i te vi'e i te taŋata ta'e he vi'e he kenu o rāua, te nu'u aŋa i te tahu-tahu, te nu'u ha'amuri ki te 'ītoro 'e te nu'u reo-reo ta'ato'a, he hoa ki te kona 'i ira e ura ena te *azufre* mo noho mau rō 'āvai 'i ira e 'ava-'ava rō 'ana mai i a au. Ko te me'e nei te rua mate iŋa».

⁹ He oho mai ia e tahi o tū nā merahi ma'u pokopoko era e hitu, pokopoko era o te nā 'ati hope'a era e hitu, 'e he kī mai: «Ka oho mai koe. 'I a au he haka take'a atu i te vi'e ha'amo'a-mo'a mo hāipo-ipo ki te Māmoe».

¹⁰ 'I roto i tū me'e haka take'a mai nei ia e te [Vārua Maitai], i ma'u ai i a au e nei merahi ki ruŋa i te ma'uŋa ruŋa nui nui-nui e tahi. Mai ira i haka take'a mai ai i te kona mo'a era ko Hērutarema e topa e oho mai 'ā mai te ranji mai mu'a o te 'Atua. ¹¹ Rā kona e pura-pura rō 'ā 'i te 'ana-'ana o te 'Atua, pa he pura-pura iŋa ena o te mā'ea hope'a o te nehe-nehe he *jaspe*, mā'eha pa he hi'o 'ana. ¹² E haka vari rō 'ā rā kona e te 'āua nui-nui ruŋa nui e tahi. E ho'e 'ahuru mā piti 'ōpani o rā 'āua, 'e e tahi e tahi merahi e māroa era 'i muri. 'E 'i ruŋa i rā nā 'ōpani e pāpa'i rō 'ā te 'īŋoa o te ho'e 'ahuru mā piti mata o te itaraera. ¹³ Rā 'āua e hā

pā'iŋa; e toru 'ōpani hāru i te pā'iŋa e'a o te ra'ā, e toru a te pā'iŋa njarō, 'e e toru e toru a te nā pā'iŋa haka 'ou ena e rua. ¹⁴ I titi ai rā 'āua 'i ruŋa i te paenja e ho'e 'ahuru mā piti, 'e 'i ruŋa i rā nā paenja i pāpa'i ai te 'īŋoa o te ho'e 'ahuru mā piti ['āpōtoro] o te Māmoe.

¹⁵ Te merahi vānaŋa mai era e ma'u rō 'ana i te mētera aŋa hai piru mo hāito i rā kona mo'a era ko Hērutarema, i te 'ōpani 'e i te 'āua. ¹⁶⁻¹⁷ Rā kona e hā pā'iŋa; te roa-roa 'e te 'a'ano pē tū roa 'ā. He hāito e te merahi i rā kona hai tū mētera era 'ā'ana. Ki te hāito taŋata, e piti ta'utini piti hānere kirometro o te roa, 'e pē tū roa tako'a 'ā te ruŋa nui 'e te 'a'ano.

I oti era he hāito i tū 'āua era; e ono 'ahuru mā pae mētera. ¹⁸ Rā 'āua i aŋa ai hai mā'ea hope'a o te nehe-nehe he *jaspe*, 'e rā kona mo'a era hai piru mau nō e mā'eha rō 'ā pa he hi'o. ¹⁹ 'E te nā paenja era 'i ruŋa i aŋa ai rā 'āua e haka nehe-nehe rō 'ā hai rauhuru mā'ea hope'a o te nehe-nehe: te ra'e hai *jaspe*, te rua hai *zafiro*, te toru hai *ágata*, te hā hai *esmeralda*, ²⁰ te rima hai *ónice*, te ono hai *rubí*, te hitu hai *crisólito*, te va'u hai *berilo*, te iva hai *topacio*, te ho'e 'ahuru hai *crisoprasa*, te ho'e 'ahuru mā ho'e hai *jasinto*, 'e te ho'e 'ahuru mā piti hai *amatista*. ²¹ E tahi e tahi o tū nā ho'e 'ahuru mā piti 'ōpani era i aŋa ai hai poe mau nō e tahi. Te ara nui-nui era o rā kona i aŋa ai hai piru mau nō e mā'eha rō 'ā pa he hi'o.

²² 'Ina kai take'a e au 'i ira e tahi kona ha'amuri 'Atua. ¿Mo aha atu 'ā? 'I ira, pa'i, e noho ena te 'Atua hope'a o te pūai, 'e te Māmoe. ²³ 'E ¿mo aha tako'a te ra'ā 'e te māhina o rā kona? O te 'Atua mau 'ā, pa'i, 'e o te Māmoe te haka mā'eha. ²⁴ He haka tere ia te nu'u [haka moe i te mana'u] 'i ruŋa i a Ietū o te hau ta'ato'a koia ko te rāua 'ariki 'i roto i te mā'eha o rā kona, 'e he ma'u ki mu'a o te 'Atua i te rāua haka tere iŋa hauha'a. ²⁵ Te 'ōpani o ira 'ina he puru 'i te 'ōtea, 'e 'ina rā kona he pō. ²⁶ 'E ki ira ka ma'u ena i te me'e nehe-nehe ta'ato'a 'e i te haka tere iŋa hauha'a o te hau ta'ato'a. ²⁷ 'E ki te hora hope'a 'ina e tahi me'e ta'e tano mo o'o ki ira. E ko o'o te kope ha'amuri ki te 'ītoro 'e te kope reo-reo. Te nu'u nō mo o'o he nu'u te rāua 'īŋoa e pāpa'i rō 'ā 'i ruŋa i te puka era o te Māmoe, he puka 'i ruŋa i pāpa'i ai i te 'īŋoa o te nu'u i a rāua te ora 'āpī 'ina he hope'a ra'a va'ai e te 'Atua.

22 He haka take'a mai ia e tū merahi era i te rio ma'itaki e tahi mai ira e e'a era te vai va'ai i te ora 'āpī 'ina he hope'a ra'a. Rā vai pa he hi'o 'ā te mā'eha, 'e mai te kona pepe noho 'ariki o te 'Atua 'e o te Māmoe e e'a era. ² Te vai nei a te vāeŋa o te ara nui-nui o rā kona e tehe era. 'E 'i te tapa o rā rio e tupu rō 'ā te tumu va'ai i te ora. E hua era paura te 'āva'e, te aura'a, e ho'e 'ahuru mā piti 'āva'e e hua era 'i roto i te matahiti, 'e te raupā o rā tumu he rā'au.

³ 'Ina e tahi me'e ta'e tano ki te mata o te 'Atua mo o'o ki te ao 'āpī nei. Te pepe noho 'ariki o te 'Atua 'e o te Māmoe 'i Hērutarema 'āpī nei e noho ena, 'e te rāua tāvini ki a rāua e ha'amuri ena. ⁴ He take'a e te nu'u nei i te 'āriŋa o te 'Atua, 'e 'i ruŋa i te rāua tira ka ma'u

era i tō'ona 'iŋoa. ⁵ 'Ina he pō rā kona. ¿Mo aha atu 'ā te hakari'i 'e te ra'ā o rā nu'u? O te 'Atua, pa'i, he Pū'oko Haka Tere, te haka mā'eha i a rāua, 'e ananake ka haka tere ena 'ātā ki te hope'a ra'a.

Ko hāhine 'ā te hoki iŋa mai o Ietū

⁶ He kī mai e te merahi: «Te me'e haka take'a 'e haka 'ite atu era he parauti'a 'e e ko ta'e haka tano. O te Pū'oko Haka Tere mau 'ā, he 'Atua, kope haka 'ite ki te perofeta i te rāua me'e mo haka 'ite, i uŋa i tā'ana merahi mo haka take'a ki tō'ona tāvini i te me'e e ko roa ka topa rō ena».

⁷ He ŋaro'a ia e au i a Ietū e kī 'ana:

«¿E ko roa hia a au ka tu'u atu ena! ¿Ko te koa i te nu'u ha'atura ki te roŋo o ruŋa i te me'e mo topa pe mu'a ka oho ena hā'aki 'i ruŋa i te puka nei!».

⁸ I take'a rō 'e i ŋaro'a rō e au e [Iovani] i te ŋā me'e ta'ato'a nei. I take'a era 'e i ŋaro'a era e au, he tū-turi a au a te va'e o te merahi haka take'a mai era i rā ŋā me'e, mo ha'amuri ki a ia. ⁹ 'E he kī mai e rā merahi: «'Ina koe ko aŋa i te me'e ena; ki te 'Atua koe ana ha'amuri. He tāvini nō, pa'i, a au o te 'Atua pē koe 'ana, 'e pa he ŋā taina ena ō'ou he perofeta, 'e pa he nu'u ta'ato'a haka roŋo i te me'e pāpa'i o ruŋa i te puka nei».

¹⁰ 'E he kī tako'a mai: «'Ina koe ko na'a i te vānaŋa haka 'ite atu o ruŋa i te me'e mo topa pe mu'a ka oho ena. Ko hāhine 'ana, pa'i, te hora mo haka tano tahi.

¹¹ Ki tano rā hora, e haka rē kōrua i te nu'u aŋa i te me'e ta'e tano mo aŋa mo oho nō i te rāua me'e ta'e tano, 'e te nu'u aŋa i te me'e hano-hano mo aŋa mo oho nō i te rāua me'e hano-hano. 'E te nu'u aŋa i te me'e tano ki te mata o te 'Atua, ka aŋa ka oho nō i te rāua me'e tano, 'e te nu'u ta'e hara ka noho nō rāua pē ira».

¹² He kī haka 'ou ia e Ietū:

«He aŋi 'ā, e ko roa hia au ka tu'u atu ena. E ma'u rō atu a au i te me'e mo va'ai mo haka koa o te nu'u,

tano ki te rāua me'e i aŋa. ¹³ A au he Ha'amata 'e he Hope'a.

¹⁴ »Ko te koa i te nu'u tata i te rāua kahu, te aura'a, te nu'u haka rē mo haka kore e te 'Atua i te rāua hara, ki tano ai mo o'o ki roto 'i te kona mo'a era ko Hērutarema 'āpī 'e mo kai mai ruŋa i te tumu va'ai i te ora 'āpī 'ina he hope'a ra'a. ¹⁵ 'E te nu'u aŋa i te me'e ta'e tano hano-hano, te nu'u aŋa i te tahu-tahu, te nu'u moe i te vi'e i te taŋata ta'e he vi'e he kenu o rāua, te nu'u tiŋa'i haka mate i te rua, te nu'u ha'amuri ki te 'ītoro, 'e te nu'u ta'ato'a te rāua me'e aŋa mau nō he reo-reo 'i ha-ho ka noho ena.

¹⁶ »A au, a Ietū, ko uŋa atu 'ā i tā'aku merahi mo haka 'ite i te me'e ta'ato'a nei ki te ŋā nūna'a taŋata haka moe ena i te mana'u 'i ruŋa i a au. He hakaara a au o [Tāvita], 'e he hetu'u pura-pura 'i te pō'ā».

¹⁷ Te [Vārua Maitai] 'e te vi'e hāipo-ipo o te Māmoe pē nei e kī ena: «¿Ka oho mai!».

'E te kope ŋaro'a i te me'e nei, ka kī: «¿Ka oho mai!».

'E te kope pohe ki te vai 'e haŋa mo unu, ka oho mai ka unu i te vai ta'e e 'auhau va'ai i te ora 'āpī 'ina he hope'a ra'a.

¹⁸ Ki te nu'u ta'ato'a ŋaro'a i te roŋo nei o ruŋa i te me'e mo topa pe mu'a ka oho ena pāpa'i 'i ruŋa i te puka nei he kī atu a au: Mo 'āmui o te kope e tahi i te me'e haka 'ou ki te ŋā me'e nei, he 'āmui tako'a e te 'Atua, ki tō'ona ūtu'a, i te 'ati hā'aki 'i ruŋa i te puka nei. ¹⁹ 'E mo haka kore e tahi kope e tahi parehe o te roŋo nei o ruŋa i te me'e mo topa pe mu'a ka oho ena pāpa'i 'i ruŋa i te puka nei, e ko haka rē e te 'Atua mo to'o i tā'ana o te me'e hua mai ruŋa i te tumu va'ai i te ora 'āpī 'ina he hope'a ra'a 'e mo noho ō'ona 'i te kona mo'a haka 'ite 'i ruŋa i te puka nei.

²⁰ Te kope haka 'ite he parauti'a te ŋā me'e nei e kī rō 'ā: «He aŋi 'ā, e ko roa hia a au ka tu'u atu ena».

'E te kī 'ā'aku: «¿Ka ai pē ira! ¿Ka oho mai koe, e Ietū ē, e te mātou Pū'oko Haka Tere ē!».

²¹ Ka ai 'i ruŋa i a kōrua ta'ato'a te riva rahi o te tātou Pū'oko Haka Tere ko Ietū Kiritō.